


Deus Harere Aibaky
Sesus mymyspirikpoko
naha



New Testament in Rikbaktsa (BR:rkb:Rikbaktsa)

**Deus Harere Aibaky Sesus mymyspirikpoko naha
New Testament in Rikbaktsa (BR:rkb:Rikbaktsa)**

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

Mateus	1
Marakos	81
Rukas	128
Suão	208
Atos	271
Homanos	348
1 Korĩtios	389
2 Korĩtios	427
Karatas	452
Epesios	466
Piripēses	481
Korosēses	491
1 Tesaronisēses	501
2 Tesaronisēses	510
1 Timoteo	515
2 Timoteo	528
Titu	537
Piremo	542
Eberēus	544
Tsiaku	575
1 Peduru	587
2 Peduru	599
1 Suão	605
2 Suão	615
3 Suão	617
Sudas	619
Apokaripisi	623

Mateus wasaniha ty ziwatahaka Sesus soho

Mateus Sesus tuk zinymyrykyta Rewi usa inaroka. Kapitão tsyhyryze okyrysaro zikzibykykta. Sesus ipe niy: “kapikta” atsoko tahyriziktsokzawy zerekik. Sesus tuk zinymyrykynahatsa hapik niukuru. Sesus tazo bo ziksizoze Deus Mateus ziapewywyky iwaze papeu humo ziwatahaka Sesus soho iwatsahi katsa kino niwatihi tanymyryky.

Nahi taparaksu Sesus Kiristu zotsa naro.

¹ Sesus Kiristu zotsa naro maha. Sesus Kiristu taparakta Abarão tsekokatsa niy. Idiri Dawi niwatihi taparakta Abarão tsekokatsa niy.

² Tapara Abarão niy. Iwaze Isake ta Abarão tse. Sako ta Isake tse. Suda ta Sako tse itukytsa tuk. Sako hyrytsa niaha.

³ Pereszo Sudata usta tse Sera zinarokota, sije Tama zinarokotatsa Tama niy. Iwaze Esrõ ta Peres tse niy. Arão ta Esrõ tse niy.

⁴ Aminadabe ta Arão tse. Nasõ ta Aminadabe tse, Saramao ta Nasõ tse.

⁵ Boas ta Saramao tse, ije Hahabe zinarokotatsa. Obede ta Boas ije Hute zinarokotatsa. Sese ta Obede tse.

⁶ Takino Dawizo. Iwa taparakta Abarão tsekokatsa niaha. Iwaze Saromao ta Dawi tse ije tapara Urias oke niy.

⁷ Hoboã ta Saromao tse niy. Abias ta Hoboã tse. Asa ta Abias tse.

⁸ Sosapa ta Asa tse niy. Sorã ta Sosapa tse niy. Usias ta Sorã tse.

⁹ Sotã ta Usias tse niy. Akas ta Sotã tse niy. Esekias ta Akas tse niy.

¹⁰ Manases ta Esekias tse niy. Amo ta Manases tse, Sosias ta Amo tse niy.

¹¹ Sekonias ta Sosias tse itukytsa tuk niy. Iwa niy. Kyze kytsa Sudeutsa Babironija bo nisioktyhyryknaha.

¹² Anaeze Sarateu ta Sekonia tse nipuruk. Kyze Sorababeu ta Sarateu tse niy.

¹³ Abiu ta Sorababeu tse. Aso ta Eriakĩ tse.

¹⁴ Sadoke ta Aso tse. Akĩ ta Sadoke tse. Eriude ta Akĩ tse niy.

¹⁵ Ereasa ta Eriude tse. Matã ta Ereasa tse niy. Sako ta Matã tse.

¹⁶ Sako ta Sose zo atahi Maria barikta niyzik. Atatsa katsa Deus zipehata Sesus je niyzik. Sesus Deus zipehata mywata niy.

¹⁷ Iwa Sesus Kiristu zotsa naro. Taparakta Abarão tsekokatsa Dawi bo zinaropyknahaze iwa katorise sinaro niaha. Taparakta Dawi kyze Babironija ezektsa Sudeutsa meky botu nisioktyhyryknaha iwa katorise sinaro. Iwaze Sudeutsa Babironija ekze ziksizonaha kyze Sesus Kiristu purukwy bo iwa katorise sinaro. Iwa hỹ.

Sesus Kiristu purukwy.

¹⁸ Kyze Sesus Kiristu nipuruk. Tapara Maria soho Sose:
– Byri puëtsikze piakse – niy. Kyze ibo tatyhyrizikwyhabyitatu itabykyhy. Deus hyrikoso humo tabykyhy. Ana humo hi Sose batu ihyrinymyry.

¹⁹ Iwaze Sose:
– O mektatu ja ibo natahyrizikwy nikara mytsaty ahabyita nikara. Ituk batu kasukza tsihik. Iwatatu atatsa humo batu kakyri – niy.

²⁰ Iwaze mytsaty nikara zuruze zitsotospkyryk bjoikpe iknykta Deus tsumuëhĩtsa ibo inasik. Bjoikpe iknykta:

– O apyby byihukta Sose! Maria barikta tsimozik! Ibykyhy mektatsebyita tu Deus tse.

²¹ Mopurukze Sesus ty tsipinaro. Kytsa simysapybyitsa tu ziknakaranaha Deus ihumo mysiokzohik – niy. Inaro Sudeu harere tihi:

– Atakta Deus bo aparakbaha mysioktyhyrykta – my.

²² Iwa bijoikpe iknykta niy, Deus harere humo. Tubabatu Deus sohokotsa inarokota Isaijas ziwatahaka, aba zuba atsatu mykara.

²³ – Atatsa ityrykduwyhybyitatsa tu itabykyhy, itse mopurukze Imanue ty pinaro mykara – niy. Inaro piwatawy Deus mypauk baze tu.

Deus sohokotsa tubabatu ziwataha abazuba atsatu niy.

²⁴ Sose inapupuze: Hyỹ niy. Iwatahi iaktaba haĩhaĩbyi niy.

²⁵ Ibo ka batu hyrizikwy – Byriktsa! Abykyhy mopurukze tu – niy. Iwa niy. Iwaze nipurukze Sose taskyrywy Sesus zinaroko niy.

2

Sisukmotsa Sesus Kiristu bo nikozorenaha.

¹ Kyze Erodes Sudeja ezektsa pehatsa niyzikze Sesus nipuruk. Atakta Berēhe eze tu nipuruk. Berēhe Sudeja eze niy. Nipurukze kytsa sisukmotsa Serusarēhe bo niukurunaha. Serusarēhe niwatihi Sudeja eze niy. Sisukmotsa byrisoiktsa humo zinymyrykynaha, sihudikhudikwy nokponi haramwe sukewy taba sihudikhudikwytsa.

² Serusarēhe bo izumunahaze asahi:

– Haneze sa ibykyhy nipuruk. Atahi Deus zipehata mywata Sudeutsa pehatsa mozik. Iwatawy byrisoik bo iktsa tsikaha, haramwe sukewy taba byrisoik bo iktsa tsikaha. Iwatsahi iapik tsikumukunaha. Ibo tsimytsaso tsihikiknaha. O ikia tsamysapyrēta. Tsikpuruk ana humo hi mykurētsa tsimaha – niaha.

³ – Ana soho Erodes ziwabyze paikpa mytsaty nikara. “Uta zuba kytsa pehakatsa mozik iky” – mytsaty nikara. Serusarēhe ezektsa niwatihi paikpa mytsaty nikaranaha. Erodes pokso sipybyrētsa.

⁴ Iwaze kytsa sizubarētsa Erodes bo izumukunaha. Wastuhu taparaktsa Deus wahoro zubata eze ziknapamykysonahatsa, ustsas aktsa Deus harere zinymyrynahatsa kino niwatihi iwa. Sizubarētsa inasikypykbanaha. Erodes tihi:

– Haneze sa Kiristu Deus zipehata mopuruk atakta aparakbaha mypehatsa mozik. Hana eze sa mopuruk – niy.

⁵ – O Berēhe Sudeja eze niaha. Anaeze Deus zipehata mopuruk. Tubabatu Deus sohokotsa botu ziwataha Deus tihi:

⁶ – Berēhe Sudeja eze tisapyrēna.

Anahudikhudikwy ezektsa batu sisikpyby.

Berēhe ezekta hi kytsa kabo mysioktyhyrykta,

katyryktsa mysioktyhyryk – niy.

– Iwa Deus sohokotsa tubabatu botu ziwatahaka – niaha.

⁷ Iwaze Erodes sisukmotsa bo huahua niy. Asazubaze atahi:

– Nawa zuruze sa byrisoik bo iktsa tsikaha – niy. – O nawa zuruze byrisoik bo iktsa tsikaha – niaha. Yhỹ Erodes niy.

⁸ – Iwaze ikiahatsa Berēhe boktsa! tsimaha niy. Berēhe bo makuskyry bo tynakozorēnaha tsimaha. Atahi nataberiki. Ibo tsipomonaha zeka ja iwaze kabo tyziksizonaha. Uta kino niwatihi ibo mynakozore ipe: “Ikia tsamysapyrēta” my – mybarapetu niy. Iwa sisukmotsa pe niy. Tapetu nikara – O makuskyry pibeze tsihikik – niy.

⁹⁻¹⁰ Iwaze sisukmotsa iharere ziwabykynahaze niukurunaha. Niukurunahaze byrisoik bo iktsa niaha. Asta botu iktsa niaha tasapy eze tuze niaha. Ana bo hi iktsa niahaze sakurētsa. Byrisoik siharaze niukuru iwaze asa kino

iapik niukurunaha. Maku skyry purukwy bo zumuze byrisoik iharapu bete pyk niy. Byrisoik natahyrikobaik niy.

¹¹ Iwaze sisukmotsa wahoro bo nipupunaha. Anaeze maku skyry taje Maria tuk ahatsa bo izumunaha. Maku skyry bo iktsa niahaze iokeryk tahaekaratsa humo puruk puruk niaha. Asahi:

– Ikiã tsamysapyrêta ahumo mykurêtsa – niaha. Iwaze isapyha ty ibo nyny niaha. Isapyhaty ouro ty hi ibo nyny niaha. Tsipokzitsiarêna ty. Iwaze jokmorênikia ty parakîsê inarokoha tsonok mahaze tsokmorêna anatyhi nyny niaha. Iwaze mira usaty jokmorênikia ty ibo nyny niaha iwa isapyha ty ibo nyny niaha.

¹² Iwaze unata nisitsotyspykyrykzoze bijoikpe iknykta Deus tsumuêhîtsa ispe niy:

– Eroses bo ka ja erete erete byitaha! Ahahudikhudikwy bo mekta ske buruk tu tsiksinahaktsa! – niy. Yhÿ niaha. Iwaze tahahudikhudikwy bo ziksikinahaze mekta ske buruk tu niukurunaha. Nawa Deus tsumuêhîtsa ispe niy.

Esito bo niwakiknaha.

¹³ Kyze Sose zuruze. Hinipÿ niyze zitsotospkyk bijoikpe iknykta Deus tsumuêhîtsa ipe niy:

– Kyikytkta! Makuskyry ije tuk tysioktyhyk! Esito bo nokponi tuwaknaha. Anaeze tynapykyknaha. Eroses makuskyry myziberiki pibeze tsihikik iwatsahi ipokso Esito bo tuwaknaha! – niy.

¹⁴ Iwaze aidy kyik niy. Unata niukurunaha. Sose makuskyry ije ahatsa nisioktyhyryk Esito bo niwakiknaha.

¹⁵ Anaeze nitarenaha. Eroses nihyrikosokdaze zuba ziksizonaha. Tubabatu Deus sohokotsa ziwataha tihi:
– Katse Esito ikny myziksizo – niy.
Iwa Deus sohokotsa niy tubabatu ziwataha abazuba atsatu niy. Esito eze hudikspyk nikaranaha.

Makuskyrytsa nisibabaiknaha.

¹⁶ Kyze Eroses takyrikize. Sisukmotsa ibo zukbyitahi tsiokaniarêta nikara:
– O Sisukmotsa zikspihikbatakanaha. Kabo mybarapetu niaha – niy.
Sihumo takyriki. Iwaze Eroses:

– Aba makuskyry wahoro batu kahyrinymyry iwatahi makuskyrytsa sizubarêtsa mysiba – mytsaty niy. Iwaze sodadutsa pe:

– Berêhe bo pãotaha: Nabo makuskyrytsa tysibanaha! Makuskyrytsa petok ziytyk tsehenahatsa, tysibabaiknaha! – niy. Hyÿ niaha. Petok ziytyk tseheze niy sisukmotsa harere humo. Nitsasonahaze nawa zuruze byrisoik izoize ana humo makuskyrytsa petok ziytyk tsehenahatsa nisiba tsihikik. Iwa hÿ.

¹⁷ Iwaze hawa ha ty Deus sohokotsa Seremias tubabatu ziwataha atsa tu niy. Atahi:

¹⁸ – Hama Berêhe hudikhudikwy baze tu iaksoho ty ziwaby.

Wytykyryk nipuziukunaha sisukatsihikrêza niapykyryknaha. Tapara kykyryk nipuziukunaha.

Hakeu hyrytsa pokzi nipuziukunaha “Hana bo kahyrytsa. Kahyrytsa hana bo ja” nikaranaha.

Tahahyrytsa pokzi sijeza ziknapuziukunaha – niy.
Iwa Deus sohokotsa tubabatu ziwataha, atsatu niy.

Isareu bo ziksizonaha.

¹⁹ Kyze Eroses niraze bijoikpe iknykta Deus tsumuêhîtsa Sose pe niy.

²⁰ Atakta zitsotospkykze bijoikpe iknykta tihi ipe:

– Kyikty! Isareu bo tsiksizo. Makuskyry ije tuk tysioktyhyk. Makuskyry zibezekyzykynahatsa botu niakbabanaha iwaze Isareu bo tsiksizo – niy.

²¹ Yh̄y niy. Sose Maria makuskyry ahatsa pe:

– Tupaktsa! Isareu bo tsipiksizonaha – niy. Iwa Isareu bo ziksizonaha.

²² Anabo zumunahaze Erodes tse, Arekeraus inarokota tazo inazapyzekeniy. Abaka atakta Sudeja ezektsa pehakatsa niy. Ana humo hi Sose zinymyryze ipokso tsipybyrēta niyzik. Iwaze hinip̄y niyze zitsotospykzoze Deus ipe:

– Sudeja bo ka p̄ao p̄aobyity, Karireja bo tsiksikta! – bjoikpe iknykta niy.

²³ Iwaze Karireja bo zumunaha. Nasare hudikhudikwy bo niaha. Anaeze niapykyryknaha. Deus sohokotsa tubabatu ziwatahanaha. – Atakta Nasare ezekta my – niaha. Tubabatu ziwatahanaha abazuba atsatu niy. Iwa Sesus Nasare eze niapykyryk

3

Suão Batista sohowy.

¹ Tubabatu Suão Batista zumu jerukbara bo niy. Sudeja jerukbara eze Deus harere myzubaha bo nitsasokoro.

² Ata tihi:

– O kytsa ahamysapybyi tsmoewybaiknahaktsa! Deus zipehata humo tsipikymynahaktsa! Abaka kytsa Deus tyryktsa moziknaha hana wa puruze mozumu – nikara.

³ Ata soho Deus sohokotsa tubabatu ziwataha, Isaijas inarokota isoho tihi: – “Aty ja jerukbara eze huahua my.

‘Pykyhytuty Deus zipehata ske bo tsimy.

Iske buruhuwa tsiskezozekta!’ ” niy.

Hawa kytsa piskezokonaha iwa Suão kytsa Deus zipehata humo pikymynaha,

Suão tihi kytsa simysapybyitsa tsmoewynaha iwa pikymynaha Deus zipehata humo.

– Iwa Isaijas niy tubabatu ziwataha abazuba atsatu Suão Batista nikara.

⁴ Atakta Suão kamero hwyk isuk niy. Irikpidiwy siraratsa hwyk niy. Masetsa zuba ziknasiboroko. Pete zuba zikzerukuk. Iwa.

⁵ Kyze Serusarēhe ezektsa, Sudeja ezektsa, kytsa buburu Sorodão bazektsa iwa sizubarētsa ibo niukurunaha.

⁶ Nisiharasusukuze asaktsa:

– Taparaka mysapybyitsa tsikykaranaha. Abaka batu. Mekywa tu tsmoziknaha, mysapybara tahamoewybaiknaha – niaha. Iwa nisiharasusuze niaha.

⁷ Kyze Pariseutsa asaktsa Moises harere humo sihyrinymyrētsa. Sadusitsa kino niwatihi Suão bo zumunaha. Suão sibo iktsa niyze atahi:

– Ikiahatsa pyryhyk myrawy watsa. Katsaktsa pyryhyktsa batu mykparawy Deus niwatihi ahamysapybyritsa humo batu iakparawy.

⁸ Ahape tu ahasopyk “O Suão mymyharasusu zeka ana humo hi Deus bazik takyri” tsimaha. Ahamysapybyitsa ty tsipimoewynaha zeka ana hi tsipiwatawykynahaktsa! Niwazuba Deus ba ziktakyri ahamysapyrētsa tsmoziknaha ana hi Deus tsihyrinymyrēta – niy.

⁹ Batu ahape tu ahasopyk:

– O Abarão taparakta mydiri iwatahi Deus myhumo bazik takyri – tsimaha. – Anaharere Deus tuk batu imysapy my. Batu ahahyrinymyry Deus haraharetsa tuk Abarão tsekokatsa mysisukniki ana hi ihumo batu ihokdaha.

¹⁰ Ikiahatsa hwi watsa. Deus maku wywyk tuk wata. Aba wywyk pizowy, hwitsa mysikakare. Iharatatsa buruk tu mysikakarehikare. Hwi iharatatsa sapybyita tu piweke. Izo bo pioktsokik. Iwa Deus ahabo my, ahamysapybyitsa tu tsimykaranaha isty moewy ahabyi zeka – niy.

¹¹ Kyze kytsa sizubarëtsa pe:

– Utakta paharasusu. Ahamysapybyitsa ty tsipimoewynahaze pihik ty paharasusu. Usta mozumu. Atahi tsimysapyrëta. Tsimyhyrizikwyrëta. Tsizikwyrëta iwatahi ibo zuba tsimykaranaha. Atahi tsimysapyrëta. Utakta batu. Iwatahi kasikpybyrëta. Ipyrysuk pibokik zeka kasikpybyrëta pit-sumuëhĩ naha humo kasikpybyrëta. Atahi mysiharasusu, Deus hyrikoso ihumo ahabo mynasik. Deus hyrikoso izo waha, izo ykpyri nikorobaik. Deus hyrikoso mynasikze ahamysapybyitsa ty tsikykaranaha ihumo mys-iokzohiknaha ahamysapyrëtsa tsimoziknaha ahabo mynasikze ahatuk my-napykyryk.

¹² Atakta Kiristu mozumuze dua ty wabe mykara tawata my. Ahostsa mysizyzyky. Kytsa simysapyrëtsa ahostsa watsa tu maha. Ahostsa zuba mysizyzykynaha. Atuja bo mysidodokonaha sipesuktsa mysipaparakanaha, izo bo mysiwezokonaha. Iwaze kytsa batu simysapy ahostsa pesuktsa watsa maha. Izo bazikbe, nabo mysiooktsoknaha. Iwa Kiristu kytsa metutu mysisapy simysapyrëtsa Deus tuk mynapykyryk, simysapybyitsaktsa, izo bo mysiooktsoktsokiknaha – Suão niy.

Suão Batista Sesus ziharasusu.

¹³ Iwaze Sesus izumu. Karireja ikny niparak Sorodão buburu bo niy. Nabo Suão bo taharasusu tsihikik. Iwatahi:

– O Suão tsikarasusu – niy.

¹⁴ – O batu. Ikia abazubata batu amyi iwatahi tsipikarasu zeka wasani my. Ikia tsamysapyrëta tu amo sa kabo tsikzumu – niy.

¹⁵ Sesus ipe niyzo:

– Aba tsipikarasu zeka wasani my. Katsaktsa Deus nawahi mozihikik tsimaha ana hi tisapyrëna, iwatahi tsikarasusu – niy.

Yhỹ niy.

¹⁶⁻¹⁷ Iwaze Suão Sesus ziharasusu. Pihik ikny inazoze atsoko bijoikpe sakpare niy. Deus hyrikoso ibo inasik. Amytudu wata ibo inasik inatsatsaka isukara bete inazo. Iaksoho bijoikpe ikny ziwaby:

– Ikia hi katse babata. Ikia humo kamypokzitsiarëta. Ikia humo ka kakurëta hỹ – Iwa Deus Sesus pe niy.

4

Satanas Sesus isapybara humo ziazkobyriki.

¹ Iwaze Deus hyrikoso Sesus jerukbara bo zioқтыhyryk. Iwaze hyrikoso sapybara pehakatsa myzokwy Diabo inarokota ibo izumu. Sesus bo zumuze atahi Sesus Deus harere bo ka yhỹ byitykta nizihikik.

² Sesus jerukbara eze niapykyryk, estuba byzoje zirahaze nawa kuarëta zuruze niapykyryk. Anaeze hauk ahabyitatu zikzuruku iwatahi tsiaraparëta nikara.

³ Iwaze Diabo ibo zumu Sesus tsiaraparëta nikara ipe niy:

– Ikia Deus tse babata zeka haraharetsa pe “Atsikara tuziktykta tsimy” – niy.

⁴ Batu Sesus niy.

Tubabatu taparaktsa Deus harere papeu humo ziwatahakanaha:

– Mybarawy ezektsa disahawy humo zuba ba zikzurukunaha sidisahawy ty hauk mahaze sispitu zuba mykaranaha.

Mybarawy ezektsa Deus harere bo hyĩ maha zeka sakurẽtsa moziknaha. Sakurẽtsa hỹ – niaha.

Iwa taparaktsa ziwatahakanaha.

⁵ Kyze Diabo Serusarẽhe bo Sesus zioqtyhyryk. Anaeze Deus wahoro zubata hara bete ziriktohohikare. Jobonikia bo zioqtyhyryk niy.

⁶ Niytahi ipe niy:

– Ikia Deus tse babata zeka tykbo tukutyny. Tykbo tynapurukta! Taparaktsa Deus harere ziwatahakanaha:

“Bijoikpe iknyktsa Deus tsumuẽhĩtsitsa ikia bo nasiakzo.

Paperykynaha. Ikia humo simypokzitsiukrẽtsa.

Haraharetsa bete tsimynaraha zeka tahatsyhyrypetsa ty paik paik maha.

Iwatahi ba zik kahyrikywy” niaha – niy.

⁷ – Batu ba – Sesus niy.

– Tubabatu taparaktsa Deus harere ziwatahakanahazo:

“Deus ta ba ziazobyrinaha Deus batu imyiwiky.

Hawa ha tsimyzihikik Deus ty batu typeha” niaha.

Iwa taparaktsa ziwatahakanaha – niy.

⁸ Kyze Diabo Sesus hara joboni tabo zioqtyhyrykzo ipe niy:

– Nanabyi bo iktsa tykta – niy. Atsoko mybarawy tsizubarẽna bo iktsa niy. Sityryktsa kino niwatihi natakaha. Iwaze Diabo tihi:

– Uta anaty hi abo nynybaik my. Ikia hi sipehatsa tsimozik. Sityryktsa ikia pe abazubata maha.

⁹ Estuba zuba kaokeryk puruk puruk tsimy zeka kabo tsimytsaso zeka: “ikia tsamysapyrẽta aharere bo hyĩ my” tsimy. Ana tyhi tsimy zeka sityryktsa ty ikia bo nynybaik my – Diabo niy.

¹⁰ – Batu ba. Nabo pãoty Satanas! – Sesus niy. – Tubabatu taparaktsa Deus harere papeu humo ziwatahakanaha hi:

“Deus bo zuba tynapamykysokonaha ‘Ikia tsamysapyrẽta’

atabo hi ‘Ikia zuba tsimysapyrẽnikita’ tsimy,

iharere bo zuba hyĩ tynakaranaha.” Deus watahaha, iwa taparaktsa ziwatahakanaha – niy.

¹¹ Iwaze Diabo Sesus zerekekspyk. Iwaze bijoikpe iknyktsa Deus tsumuẽhĩtsitsa Sesus humo simypokzitsiarẽtsa nikaranaha iwatsahi ipokzitsiwy tuk inasiknaha. Nawa de.

Sesus tahyrikzitsokzawy humo ziakbata Karireja eze tu niy.

¹² Kyze kytsa tihi:

– O kytsa Suão Batista sakyriukrẽnikitsa hurukwy bo zioqtyhyryknaha – niaha.

Ana hi Sesus ziwabyze Karireja bo niukuru. Nasare bo ziksizo anaeze taypykyryk.

¹³ Anabo zumuze Nasare eze batu are aha, Kaparanaũ bo niy. Kaparanaũ Karireja pihikzotsabyri sak eze niapykyryk. Anaeze Napatari Seburõ niwatihi parakbaha niaha.

¹⁴ Iwa niy. Iwatahi hawa haty Deus sohokotsa Isaijas tubabatu ziwatahatsatu niy. Isaijas tihi:

¹⁵⁻¹⁶ – O Seburõ ezektsa, Napatari ezektsa myzubaha pihikzotsabyri ezektsa Karireja ezektsa,

buburu Sorodão sak ezektsa asaktsa Sudeutsabyitsa iwa sizubarẽtsa tapara simysapybyitsa humo batu siaku.

Kytsa watsa miwa eze pyik pyik nikaranaha asahi niwatihi sihyrinymyryby-itsa tu abaka Deus sibo zumu.

Atahi situk mynapykyryk iwatsahi sakurëtsa mykaranaha.

Kytsa okoro hyritywaha moziknaha sihyrinymyrëtsa – niy.

Iwa Isaijas tubabatu ziwataha. Sesus Karireja boze anaharere atsatu niy.

¹⁷ Sesus Karireja zumuze kytsa nisihyrinymyryky. Tahy:

– O kytsa ahamysapybara ty tsmoewynaha! Abaka Deus zipehata mozumu iwatsahi ityryktsa tsmoziknaha nawa zuruze botu izumu – niy.

Sesus tuk zinymyrykynahatsa nisihuahua.

¹⁸ Kyze Sesus Karireja pihikzotsabyri sak taba zitabaka. Anaburuk ziknaukuruze Peduru, ãdere ahatsa bo nikoze. ãdere Peduru tsy. Tõhõryk pihik bo ziochtsoktsokoknaha.

¹⁹ Sesus ispe niy:

– Uta kapik tynaunaha! Tapara piknutsa ziknasidokonaha. Abaka, uta katuk, mektsa tu tysitsumuëhñaha. Kytsa bo Deus soho tsimytsasonaha. Ahaharere humo ka aparakbaha Deus harere bo hyñ maha – niy.

²⁰ Iwaze atsoko tahatõhõryk zerebaiknaha. Sesus hapik niukurunaha, ituk pinymyrynaha.

²¹ Ana puëtsik Sesus zitabakaze mektsa botu nikoze. Tsiaku, Suão ahatsa bo niwatihi nikozozo. Suão Tsiaku tsy. Tsaraha eze tahazo tuk tahatõhõryk zizozikiknaha. Iwaze Sesus nisihuahuaka.

²² Iwaze atsoko tahazo zerekeknaaha tsaraha niwatihi. Sesus hapik niukurunaha atahi nisihyrinymyryky.

Sesus nisihyrinymyryky iwatatu nisizororowyky.

²³ Kyze nanabyitaba Karireja bo Sesus niukuru. Deus wahoro bo nikaraze kytsa nisihyrinymyryky. Deus wasania ty sizubarëtsa bo nipamykysoko. Hawa kytsa Deus tyryktsa moziknaha nitsasoko. Kytsa simyitsapyritsa nisizororowy, ustsata batu siaku nisipunihikwyky.

²⁴ Hawa haty nikara kytsa sizubarëtsa ziwabynaha. Nanabyitaba Sirija bo niwatihi kytsa isoho ziwabykynaha. Iwatsahi simyitsapyritsa, asaktsa hyrikoso sapybara sibo pororo ziknakaranaha kuanare zikybyikitsa asaktsa sityrykmyitsa iwatsa sizubarëtsa ibo nisioktyhyryknaha. Sizubarëtsa nisizororowy.

²⁵ Sizubarëtsa Sesus hapik niukurunaha. Karireja ezektsa, Dekaporis ezektsa, Serusarëhe ezektsa, Sudeja ezektsa, buburu Sorodão koiknyktsa iwatsa sizubarëtsa Sesus hapik niukurunaha.

5

Hawa kytsa sakurëtsa moziknaha.

¹ Kyze Sesus myzubaha bo iktsa niyze hara bo nido. Anaeze tadyhy zinymyrykynahatsa ibo zumunaha.

² Iwaze nisihyrinymyryky ispe niy:

Sesus sakurëtsa soho nisihyrinymyryky.

³ – O sakurëtsa asaktsa tahapetu sisopyk zeka “O Deus ikia soho humo batu myhyrinymyry” – maha.

Sihyrinymyrybyitsa tuze Deus tyryktsa moziknaha.

⁴ – O sakurëtsa asaktsa sisukatsihikrëtsa tahamysapybara humo iwaze Deus hi mysiakuwyky, sakurëtsa moziknaha.

⁵ – O sakurëtsa asaktsa ba zik tahakyrinaha Deus harere bo zuba hyñ mykaranaha,

iwaze Deus tsizubarēna ty sibo nyny mykara.

6 – O sakurētsa asaktsa hawa Deus mozihikik zuba anahumo hi hỹ mozi-hikiknaha, Deus mysitsumuēhĩ iwaze simysapyrētsa moziknaha.

7 – O sakurētsa asaktsa ustsya kytsa mysisapywykynaha hawaze Deus sibo hi pisapywyky.

8 – O sakurētsa asaktsa Deus humo zuba mytsaty mykaranaha, hawa ihumo simypokzitsiukrētsa moziknaha, iwatsahi asahi zuba Deus tuk mynapykykynaha.

9 – O sakurētsa asaktsa kytsa naharape harereziuzonaha iwaze siharerezi-uwu moziknaha.

Deus ispe: “kahyrytsa isopyk. Kawatsa maha” – my.

10 – O sakurētsa asaktsa kytsa mysiapikiknahaze Deus harere bo hỹ mykaranaha humo, asahi Deus tyryktsa moziknaha.

11 – Ahakurētsa ustsya kytsa ahasoho mybarapetu mykaranahaze katuk kytsa humo iwaze ahakurētsa tsimaha. Pahamyijakaranahaze ahakurētsa tsimaha. Pahasukyrykynahaze kahumo ahakurētsaktsa. Nawaze ikiahatsa katuktsa humo tsimaha ahakurētsaktsa!

¹² Tsahayzigrētsaktsa! Katuktsa babatsa tsimaha zeka ahanamy bijoikpe eze tu tsizubarēna my. Pahapikiknaha zeka tsahayzigrētsa. Tubabatu kytsa Deus sohokotsa nisimyijakanaha atsawatu pahamyijakazonaha. Iwaze ahakurētsaktsa! – Sesus niy.

Poro waha humo nimyspirikpoko iwaze rika waha humo niwatihi.

¹³ Kyze Sesus tihi:

– Ikiahatsa poro watsa tsimaha. Myzubaha mysitsumuēhĩnaha. Katsaktsa poro mydisahawy tsimytsakykynahaze tisapyrēna my. Iwa ikiahatsa kytsa tsimysitsumuēhĩnahaze tisapyrēna my. Poro mytsarakbyrize ba ziktsakyky-naha. Poro wytyk kykywy humo batu sapy. Iwaze ape bo tututaha. Tahorobaik zuba. Ana bete kytsa mopaparibaiknaha. Ikiahatsa ahamysapy-byitsa tu tsimykarana zeka ustsya kytsa batu isty tsumuēhĩ poro iōrỹkbara wa tsimoziknaha.

¹⁴ – Ikiahatsa rika watsa tsimaha. Kytsa sizubarētsa mysitsumuēhĩnaha. Hudikhudikwy hara joboni nizuknikinahaze iwaze aparakbaha ihumo niko-zonaha. Batu okpitsĩ zikaha ikiahatsa hudikhudikwy watsa tsimoziknaha.

¹⁵ Batu aty tohi rika inapok zeka kyze peryk pukezi zik my. Iwa zeka kytsa miwa eze nitarenaha. Rika inapokze jobo zuba zik my, iwaze wahoro ezek-tsa iktsa maha mypubyi rika humo. Ikiahatsa rika watsa hawa tisapyrēna tsimahaktsa!

¹⁶ Anawata kytsa mysitsumuēhĩnaha zeka kytsa ahabo iktsa mahaze tihi:

“O Deus bijoikpe ezekta sizo. Atahi imysapyrēnikita, katsa ihyrytsa bo iktsa tsimahaze ustsya kytsa mysitsumuēhĩnaha iwatsahi sizo imysapyrēnikita myhyrinymyrētsa” maha. Iwa h̃y, – Sesus niy.

Moises Deus harere ibyky soho.

¹⁷ Kyze Sesus tihi:

– Mybarawy bo ikzumuze kytsa mysihyrynymyry. Batu tyso “O Moises harere bo batu h̃y tsimaha, hawa Deus sohokotsitsa ziwatahakanaha batu h̃y tsimaha” ana ty kino batu tyso. Hawa Moises harere zahahyrynymyryky, hawa ha ty Deus sohokotsitsa ziwatahakanaha nitsasoba ana humo kino pahahyrynymyrybahani kytsa – Sesus niy.

¹⁸ – Ahaspiriktsokdabyihu ja! Moises harere ba zikokza. Mahani ihokzaha bijoikpe epykbyize. Mahani ihokzaha mybarawy kino epykbyize niwatihi

iwatahaha ba zikokza. Hawa ty tubabatu ziwatahaka mahani ba zikokza. Tszubarēna Deus Moises bo nyny niy atsatu wasani my.

¹⁹ Iwatsahi aty tohi Deus harere bo batu hỹ my, iwaze ustsá pe: “Wastuhu Deus harere bo tsimaha byizeka wasani my” atakta Deus tuk my zeka tisikpybyrēta. Atakta Deus harere bo pykyhytuty hỹ my kyze ustsá pe “Deus harere bo tsizubarēna hỹ tsimyкта!” atakta Deus tuk my zeka Deus tihi: “O ikia tsimysapyrēta” Deus my. Atakta batu isikpyby.

²⁰ Ikiahatsa Deus tyryktsa tsimoziknaha zeka iharere bo pykyhytutaha hỹ tsimaha. Hawa ha ty Pariseutsa nikaranaha. Hawa ha ty Moises harere humo zinymyrykynahatsa nikaranaha. “Katsaktsa Deus harere bo hỹ tsimaha” mytsaty ahabyitsa mykaranaha. Ikiahatsa puētsik tsimykaranaha Deus harere bo zuba hỹ tsimykaranaha – Sesus niy.

Mykyriwy soho zinymyryky.

²¹ Kyze Sesus tihi:

Tubabatu myzotsa kytsa nisihyrinymyrykynaha:

– Harape ty beze beze byitaha! – niy. Aty myharape bezenaha zeka sinini my zeka wasani my.

²² Uta hi ahape: – Abaka aty tatukytsa humo takyrikize imysapybyitahi pimiyiwyky atahi myharape bezenahaze tawata atakta sinini my zeka wasani my. Aty tatukytsa pe: “Asopyksapybyita” batu imysapy niwatihi, atakta Sudeutsa kytsaharerewabykytsitsa bo pioktyhyrykze pisininiwyky zeka wasani my. Aty tatukytsa pe: “Ityrykmyita” tsimy, atakta pimiyiwyky niwatihi sinini ykarawy bo my. Wasani my.

²³ Iwatahi Deus wahoro zubata bo tsimytsuk zeka myrara ty Deus bo nyny tsimyeze iwaze mytsaty tsimy. “O katukta kahumo takyriki” apetu asopyk. Deus bo batu kasopyksapy tsimy.

²⁴ Iwa zeka myraratsa anamy niwatihi tsierikik Deus sapy baze tu tsierikik. Batu anamy ty ibo nyny ziky. Taparaka atukta bo tsimy. Ikia tihi: “O katukta kahumo takyri kaharereziuwyy tsimozikzokta! my” tsimy. Iwaze Deus okze wasani tsimy. Iwaze Deus wahoro zubata tsimyziksizoze Deus bo anamy ty nyny tsimy – Sesus niy.

²⁵ – Aidy Deus bo tsimy iokzeka wasani tsimy. Aty zeka kytsaharerewabytsitsa bo paoktyhyryk zeka aidy atsatu ibo tsimynakokozo ske buruk tsimyzurukuze kytsaharerewabytsitsa bo taharapehanaha yhỹ tsimaha. Tsikukurunahaze tu wasani tsimaha. Ske buruk wasani byizeka maku atsipa humo paoktyhyryk, ikia sakyriukanikitsa hurukwy bo tsimytsuk.

²⁶ Anaenze tsimytare. Aokyrýsaro tsizubarēna ty nyny tsimyzeka tsimyzoi. Iwatsahi aidy Deus bo tsimy – Sesus niy.

Mekta oke ba ziaksenaha.

²⁷ Sesus tihi:

– Tubabatu myzotsa kytsa nisihyrinymyryky:

“Mektatsa ty ka okty okty byitaha”

²⁸ Uta hi ahape: Abaka aty mekta oke bo iktsaziu myze tapetu isopyk “Uta atatsa piakse tsihikik” atakta mytsaty mykara pimyi anahumo hi Deus okze ka atakta atatsa botu ziaксе.

²⁹ Pykyhytutaha. Hawa iktsa tsimaha humo pykyhytutaha! Tsimysapybyikinaha zeka ahahyrizik ty hyrykokik ty. Ahyriziktsa humo ahahyrizikubyita tu tsimozik ana hi batu sapy, ikia sinini ykarawy bo zeka ana eze hi isapybarababa.

³⁰ Atsawatu ahatsyhyrypetsa ty tsimaha. Atsyhyrype apanuryk taba asiba tsimyi zeka tseykikta! Iwaze imysapybara humo pyk tsimy. Atsyhyrype ty

estuba zuba tsimy zeka batu sapy, Deus sinini ykarawy bo papeha zeka ana bo hi batu isapybarababa. Pykyhytu hawa iktsa tsimy. Pykyhytu hawa tsimy tatsyhyrype tuk – Sesus niy.

Kytsa tahaokeza mysimoewy naha soho humo zihyrinymyryky.

³¹ Kyze Sesus tihi:

– Tubabatu myzotsa kytsa nisihyrinymyrykynaha:

“Aty taoke perekek zeka papeu ty ibo nyny my. Papeu humo piwatahaka. ‘Utakta kaoke pe nabo pãoty my’. Iwaze usta atatsa piakse zeka wasani my” mytsaty ahabyitsa mykaranaha.

³² Uta hi ahape abaka aty ioke pe nabo pãoty Deus okzeka imysapybyita mykara. Tapara tatsa mekta tu ziaксе zeka kyze tabarikta pe. Nabo pãoty my wasani my. Abaka aty tatsa bo tasukza zeka Deus okzeka imysapybyita mykara – Sesus niy.

Hawa tsimytsasoko atsatu tsimykara.

³³ Kyze Sesus ispe niy:

– Tubabatu myzotsa kytsa nisihyrinymyrykynaha siharere soho kino tsiwabynaha. Asaktsa:

“Tsimytsaso zeka ‘Uta iwa tihi my’ atsatu tsimy. Hawa ha ty Deus okze ka tsimytsasoko atsatu tsimy” – niaha.

³⁴ Utahi ahape:

– Hawa tsimaha tsimytsasonahaze Deus naro ty ba zikaha. Deus sapy anaeze ityryktsa mysipehaka iwatsahi anawatu zekaha humo.

³⁵ Hawa tsimaha tsimytsasonahaze mybarawy naro ty batu tyso, mybarawy kino Deus pyrytsa sapy waha my, iwatsahi awatutaha. Serusarêhe kino Deus abazubata ihudikhudikwy iwatsahi awatutaha.

³⁶ Ahaharek humo kino batu tyso, aharadi estuba zika tsibarazarêta zeka batu ahareke humo nioktsirörö mozik. Iwatahi usta naro ty batu tyso, kytsa bo tsimysiwatawy tsihikze “Kaharere ty my” tsimy.

³⁷ Ikiatsa tihi: “Niwatihi my” kyze atsatu tsimy. “Niwatihi batu yhÿ” kyze ana ty hi batu tsimy. Hawa wasani zuba tsimytsaso, ustsá naro ty batu tyso. Ustsá naro ty tsimytsasonaha zeka Satanas harere mozik – Sesus niy.

Mytsapusarewy soho humo zinymyryky.

³⁸ Sesus:

– Tubabatu myzotsa kytsa nisihyrinymyrykynaha:

“Aty mekta hyrizik pibokik zeka, iwaze kytsa pihyryzikbokiknaha wasani my. Aty mekta tsapu pibokik zeka iwaze kytsa pitsapubokiknaha wasani my” iwa Moises kytsa nisihyrinymyryky.

³⁹ Utahi ahape mykara, aty pahasapybyiki zeka ba zikahatsapusarenaha. Aty paokpyk zeka usta taba kino niwatihi nataba tuktuty tsimy.

⁴⁰ Aty akpyzazawy pibok zeka iwaze ziaксе asuk humo niwatihi ibo nynyntaha. Wasani my. Ba zikakyri.

⁴¹ Sodadu ape my zeka “Kanamy ty kirometero bytykareze tu puhyryty” my. “Yhÿ anamy ty petok tykareze tu pesikik za” tsimy. Asapy baze tu perekek.

⁴² Aty ape my zeka “Kabo ja kabo ja” my zeka ibo nyny tsimy. Aty ape. “Anamy ty kabo nynyre tsimy bykyze ity wabehyrykzo” my. Yhÿ tsimy, kanamy ty nynyrezo tsimy – Sesus niy.

Mysukyrytsitsa humo mysipokzitsinaha.

⁴³ Kyze Sesus tihi:

– Tubabatu myzotsa kytsa nisihyrinymyrykynaha:

“Ahaututsa pauksitsa humo tysipokzitsikinahaktsa kytsa! Asaktsa ahasukyrytsitsa mysisapybyikinaha” niaha.

⁴⁴ Uta hi ahape:

Ahasukyrytsitsa niwatihi tysipokzitsikinahaktsa kytsa! Asaktsa pahamyijakanaha sityhyryze Deus bo tsimypamykysokonahaze tihi:

“O Deus myzo mysukyrytsitsa bo tysisapywykta” tsimaha.

⁴⁵ Iwa tsimaha zeka ahazo wata astatu tsimaha. Ihyrytsa tsimoziknaha. Atahi haramwe nizukni. Haramwe aparakbaha bo naharamweke, kytsa simysapyrëtsa kytsa simysapybyitsa bo kino niwatihi naharamweke. Deus hyritsik myziwökō simysapyrëtsa bo simysapybyitsa bo kino niwatihi aparakbaha bo pisapywyky. Ikiahatsa tihiktsa!

⁴⁶ Ahasukyrytsitsa bo tsipisapywykynaha. Ikiahatsa ahaututsa pauksitsa bo zuba tsipisapywykynaha zeka ustsya kytsa bo batu Deus mytsaty “kaokzeka ahamysapybyitsa tu tsimykaranaha” my. Asaktsa simysapybyitsa tu atsatu mykaranaha. Siotutsa pauksitsa myharape pokzitsikinaha. Ikiahatsa batu ahamysapy siwatsa zuba tsimaha.

⁴⁷ Ikiahatsa ahaututsa pauksitsa zuba awahoro bo mozumunahaze “O paku pakutynaha! Kawahoro eze ahawanu ty haïtaha. Mydisahawy ty hauk tsimy” tsimaha. Iwa tsimaha zeka ahazikeditsa bo zuba ustsya kytsa ba ziksipokzitsi Deus okze ka sispirikpobyitsa watsa, asaktsa atsatu maha.

⁴⁸ Ikiahatsa mekywatsa tu tsimoziknaha. Abazubatsa humo ahamypokzitsiukoktsa! Deus ahazo wata astatu kytsa nasipokzitsiki hÿ – Sesus niy.

6

Hawa kytsa tysipokzitsi.

¹ Kyze Sesus tihi:

– Wabyziutaha kytsa! Hawa tsimyzurukunaha kytsa mysitsumuëhñnaha Deus humo ahaspirikporëtsa. Ata zuba tsakurëta ana hi tsimyzihikiknaha iwatsahi kytsa mysitsumuëhñnaha zeka kytsa bo zuba batu tsimaha. Ahasoho kytsa motsasonaha zeka “O asaktsa wasani” maha. Kytsa pahasapywyky ana hi tsimyzihikiknaha. Ana kino Deus okze batu imysapy my. Iwa ahasopyk zeka bjoikpe eze batu ahahuakak ahazo batu ahabo nyny my.

² Iwatsahi inamybyita tsipitsumuëhñze batu tyso “O kytsa hawa ty mykara iktsa tsimahaktsa!” tsimy. Iwa ahasopyk zeka zispihikbatakanahatsa watsa tsimaha. Asahi Deus wahoro eze motsasokonaha. “Mybo iktsataha! ske buruk kino niwatihi motsasokonaha mybo iktsa tsimaha” mykaranaha. Kytsa sisoho “O simysapyrëtsa” maha. Deus ja. Deus sisoho nawa batu tyso. Kytsa zuba sisoho motsasokonaha. Bjoikpe eze batu sihuakak, Deus tuk sihuakak hana bo ja. Bykyze Deus isapyrënikia ty batu sibo nyny my.

³ Iwaze inamybyikita tsipitsumuëhñze aharezeziuwu bo batu tyso. Amy ty tsimy usta bo tsipitsumuëhñ ikia zuba tsinymyry.

⁴ Iwa ibo nyny tsimy zeka kytsa papa tu Deus zuba iktsa my. Atahi asoho: “Hawa ty tsimy wasani my. Ikia tsamysapyrëta” my – Sesus niy.

Hawa Deus bo tsimypamykysokonaha.

⁵ Kyze Sesus tihi:

– Deus bo tsimypamykysonahaze siharawatahanahatsa watsa byitaha! Asaktsa Deus bo mopamykysonahaze Deus wahoro eze ziknariktohononaha iwaze kytsa sibo iktsa mykaranaha. Ske myparawy eze niwatihi nabo kytsa sibo iktsa mykaranaha ana kino mozihikiknaha. Kytsa sisoho tihi:

“O asaktsa simysapyrëtsa” mykaranaha. Deus okzeka batu. Asaktsa bjoikpe eze tu batu sihuakak. Deus sapyhaty batu sibo nyny my.

⁶ Ikiahatsa Deus bo tsimypamykysokonahaze ahaõtutsakarawy bo tsimaha. Hokbotaha. Iwaze Deus tuk tsimypamykysonaha. Atahi iktsa zikybyi tahi atatu my. Kyze ahazo pahawabyze amy ty tsizapykykynahaze atsatu ahabo nyny my.

⁷ – Deus bo tsimypamykysokonahaze ahaharere tsizubarẽna batu tyso. Kytsa watsa asaktsa Deus humo sispirikpobyitsa asaktsa:

“O katsaktsa tsimypamykysobanahaze Deus myhumo piwaby, katsa myharere atsatu tsimytsasoikiknahaze iwaze Deus myhumo piwabyky” mytsaty ahabyi mykaranaha. Siwatsabyitsa – niy.

⁸ – Iwa zeka batu ahasopyk. Ahazo ahasoho humo tsihyrinymyrẽta. Amy humo ahakubyri tsihyrinymyrẽta. Amy humo ahaku byri zeka tsizapykykynahaze botu inymyry. Tysapyky ahabyizetu ana humo tsihyrinymyrẽta – Sesus niy.

⁹ Iwaze Deus bo tsimypamykysokonahaze tihi:

– O Deus myzo bijoikpe ezekta tu my.

Aparakbaha panyinahaze

“O atahi imysapyrẽnikita batu aty tohi asapyzephyhu”
anatyhi tsimyzihikiknaha.

¹⁰ Aparakbaha myzubarẽtsa atyryktsa tsimoziknaha,
sipehatsa tsimozik.

Mybarawy ezektsa aharene bo hyỹ mahaktsa bijoikpe ezektsa
atsumuẽhĩtsitsa watsa maha.

Iwa tsimyzihikiknaha.

¹¹ Mydisahawy humo tyzibytuhukutu
mybo nyny tynakara anahi tsimyzihikiknaha.

¹² Mysapybyitsa tsikykaranaha iwatsa tu tymyokzohik.

Katsa niwatihi, asaktsa mybo simysapybyitsa nikaranaha
iwatsa tu tsimyokzonaha niwatihi.

¹³ Satanas katsa mype Deus harere bo batu yhỹ tsimaha.

Hawa mozumuze, tsihokdahaõna tynamytsumuẽhĩkta.

Myhumo tymypokzitsikikta! Iwaze Satanas hyrikoso sapybara pehatsa
harere bo ka batu yhỹ tsimaha.

Katsa ikia humo mypunihikrẽtsa tsimoziknaha.

Iwa Deus bo tsimypamykysokonaha – Sesus niy.

¹⁴ – Yhỹ ikiahatsa ustsasimysapybyitsa ty ahabo nikaranaha tysiokzohiknaha Deus ahazo niwatihi atahi ahamysapybyitsa ty tsikykaranaha pahaokzohik.

¹⁵ Niwazuba! Ikiahatsa ustsakysa simysapybyitsa ty ahabo nikaranaha tysiokzo byizeka Deus niwatihi atahi ahamysapybyitsa ty tsikykaranaha batu pahaokzo isopyk. Iwa – Sesus niy.

Deus pokzi hauk haukbyi maha.

¹⁶ Kyze Sesus tihi:

– Deus pokzi hauk byizeka ustsakysa bo tysoso byitaha! Ahaok ahasuka tsihikikbyihu ja myziharawataharanaha ziky watsa asahi haukbyize izohyrikoro ty tahahok bo tsuku tsuku sisopyk iwaze kysa sisoho:

“O asaktsa simysapyrẽtsa humo ka Deus pokzi batu hauk maha” mytsaty ahabyi maha. Anaharere mozihikiknaha iwaze kysa sisoho “simysapyrẽtsa” maha. Deus ja. Deus sisoho ty batu tyso, kysa zuba sisoho maha. Bijokpe eze batu sihuakak. Deus tuk sihuak hana bo ja.

¹⁷ Ikiahatsa Deus pokzi batu hauk tsimaha zeka hokpiktaha! Ahaharadi tsiziurẽna mozik jokmorẽnikia ty ahaharek bo tsuku tsuku tahaktsa!

¹⁸ Iwaze ustsá kytsa batu sihyrinymyry ikiahatsa batu hauk tsimaha zeka ana humo batu sihyrinymyry. Deus zuba ahasoho zinymyry. Hawa ty tsimahaze kytsa papatu tsimaha zeka Deus ahabo iktsa my atahi isapyrēnikia ty ahabo nyny my – Sesus niy.

Ahanamy baba.

¹⁹ Kyze Sesus nipamykysokozo:

– Ahanamy tsizubarēna ty zozozo byitaha! Ahanamy tsizubarēna zeka wazazatsa piokbanaha, ahanamy myworoba moktsirōrō, sityhyryboarētsa ahawahoro bo mynapupunahaze ahanamy peykbánaha iwa ahanamy tsizubarēna soho.

²⁰ Hawa ha Deus mozihikik ana hi atsa tu tatsihikik iwaze Deus namy ahatsyhyryze bijoikpe bo myzizozoko! Ahamysapyrētsa tsimoziknahaze Deus tisapyrēna ty ahabo nyny my, bijoikpe eze pizozoko, iwa ahanamy Deus baze mopykyryk. Anaeze ahanamy ba ziksapybyri, wazazatsa ba zioknaha, ahanamy ba zikwōrō, sityhyryboarētsa ba zebyknaha.

²¹ Ahanamy Deus baze bijoikpe eze tu zeka, iwaze ikiahatsa Deus soho mytsaty tsimykaranaha – niy. Iwa hỹ.

Ahahyriziktsa soho zinymyryky.

²² Kyze Sesus tihi:

– Ahyriziktsa rika watsa ahanamy bo iktsa tsimaha. Ahyriziktsa sisapyrētsa zeka amy ty tisapyrēna sihyrinymyrētsa. Hawa mytsaty tsimaha na wata niwatihi. Amo tisapyrēna bo mytsaty tsimaha zeka ahakurētsa tsimoziknaha. Ahahyrinymyrētsa. Ahanamy bo mytsaty mytsaty byitaha. Amy ty tisapyrēna tsimyzihikiknaha.

²³ Ahahyriziktsa sapy byizeka ikiahatsa miwa eze tu tsimypykyknaha. Batu iktsa ziky miwa zuba. Hawa mytsaty tsimaha na wata niwatihi. Ahanamy bo zuba mytsaty tsimaha zeka amy ty tisapyrēna batu tsimyzihikiknaha.

Deus humo sispirikporētsa babatsa.

²⁴ Kyze Sesus tihi:

– Ikiá ispehatsa petoktsa bo batu tarabaja zikaha. Iwaze petoktsa hyrizik-tsokzawy tsimy zeka estuba harere bo hyỹ tsimy. Usta bo batu, tsikaeni zuba akparawy. Ikiá tihi:

“O estuba maku kakparawy. Usta batu, tsikaeni zuba kakparawy” tsimy. Ikiáhatsa niwatihi. Ikiáhatsa Deus harere bo hyỹ tsimaha zeka, okyrysaro bo tsikaeni zuba ahakparawy. Ikiáhatsa okyrysaro ahakparawy zeka, Deus harere bo batu yhỹ tsimaha. Okyrysaro humo tsimyzihikiknahatsa Deus harere bo batu yhỹ tsimaha. Ahanamy tsikaeni zuba ahakparawy iwaze Deus zuba ahakparawy hỹ.

²⁵ – Iwaze ahanamy bo mytsaty mytsaty byitaha! Iwa paikpa mytsaty tsimykaranaha. “O amy ty sa tsimymydisahanaha ba zikaha. Amy ty sa mysuk ty korobyk tsimaha” ba zikaha. Ahadisahawy ty tsimykaranahaze wasani. Ahasukok ty tsimykaranahaze wasani niwatihi. Ikiáhatsa hi iwatsa tu tsimykzonaha Deus baze mywahi tsimynapykyryknaha zeka mysapyrēnikia niy. Niwazuba atahi ahadisahawy ty, ahapowy ty, ahasuk ty iwa ahabo nyny my hỹ.

²⁶ Piyktsa bo iktsataha! Asaktsa batu sitsohoko, ba ziksipariknaha, Wahoro eze sidisahawy batu izozowyky. Piyktsa batu sipokzitsi Deus sihumo tsimypokzitsiarēta sidisahawy ty sibo nyny my. Ikiáhatsa ja. Deus ahahumo tsimypokzitsiukrēta iwatahi ahadisahawy ty nyny mykara hỹ.

²⁷ Mytsatyziu tsimaha zeka ja usta puruze nahyritziko. Batu ba. Mytsaty tsimykarana zeka ja ba zik kara. Iwatsahi ikiahatsa tsikaeni zuba zikaha zeka, amy skaraba disahawy humo mytsaty tsimykarana. Amy skaraba asuk humo mytsaty tsimykarana – Sesus nikara.

²⁸ Sesus tihi:

– Isazik bo iktsataha! Isazik amytsĩ eze tu taypyk zuba. Isazik mazori ty ka pyryryk pyryryk byitaha. Sisuk ba zikwowo. Tisapyrēna mykarana.

²⁹ Tubabatu Saromao pehatsa tsinamyrēta. Inamy tsiziuwyrēna. Tasuk tisapyrēna korobyk ziknakara. Nanabyi isazik ka abazuba tsiziurēna. Saramao suk ka jokboha ziu.

³⁰ Nawaze Deus isazik humo tsimypokzitsiukrēta. Jaba okyrysaro ispitu wahatu byri hu hana bo ja. Nepyk. Izo bo mokorobaik. Ikiahatsa ja. Deus ahahumo tsimypokzitsiukrēta hỹ. Iwatahi Deus ahasuk ty nyny mykara. Amy skaraba Deus humo ahaspirikpo tsikaeni zuba! – Sesus niy.

³¹ – Iwatsahi mytsaty mytsaty byitaha. Batu tyso:

“Amy ty sa tsimymydisahanaha. Amy ty sa tsipikukunaha. Amy ty mysuk ty korobyk tsimaha.” Iwa mytsaty mytsaty byitaha!

³² Kytsa Deus humo batu sispirikpo iwaze mytsaty nikarana. Ikiahatsa batu. Deus ahazo hi tsihyrinomyrēta. Atahi ahadisahawy ty ahabo nyny my. Ahasuk humo kino niwatihi ahabo nyny mykara.

³³ Katuktsa Deus tyryktsa soho sibo hi mytsaty tsimykarana. Hawa Deus harere bo hỹ tsimaha. Hawa kytsa tsimysitsumuēhĩnaha. Iwa mytsaty tsimykarana zeka Deus ahanamy ty nyny mykara.

³⁴ Iwatsahi byiri ka mytsaty mytsaty byitaha! Aba zuba mytsaty tsimaha. Abaka amy ty tsihokdaharēna tsimaha zeka Deus pahatsumuēhĩ. Amy ty tsihokdaharēna byiri ka mytsaty mytsaty byitaha. Aba zuba ahaspitu tsimaha. Byriri ja. Byri mozumu zeka kyze hawa tsimaha zeka mytsaty tsimaha. Deus ahahumo tsimypokzitsiukrēta, tahi pahatsumuēhĩ – Sesus niy. Iwa zinymyrynahatsa pe niy.

7

Utsa bo ahaharerewabymybarabyihu.

¹ Sesus tuk zinymyrykynahatsa bo nipamykysokozo:

– Kyze ustsya kytsa soho ty batu tyso “O atakta batu imysapy” ba zikaha. Iwa batu tyso. Kyze Deus asoho ty batu tyso. “Atakta batu imysapy” my.

² Hawa ustsya kytsa soho ty tsimytsasoko atsawatu Deus asoho motsaso. Hawa ustsya kytsa soho bo mytsaty tsimy iwa Deus asoho bo mytsaty my.

³ Ahatukytsa simysapybyitsa tu mykarana zeka batu iktsa tsimy. Iktsa tsimy zeka maku wata atahi hwi piak tsibik bo iziky hyrizik eze iktsa my. Hwi puho tahyritzikok eze tuze batu zikozo.

⁴ Tsimytsaso zeka “O byri kaziky, uta ahyrizik oke bo humo hu my” tsimy. Anaharere batu isapy my. Hwi puho ahyrizik eze tuze batu iktsa ziky. Tapara hwi puho ahyrizik eze taty hyrybokty iwaze aziky hyrike bo hu ty. Atsawatuze “O utakta kamysapyrēta” tsimykara. Ikiya batu amysapy tsimy.

⁵ Taparaka ahamysapybyitsa tu tsimykarana hazy pyktahaktsa. Iwaze zuba ustsya kytsa tysitsumuēhĩnaha – niy.

⁶ – Amy ty tisapyrēna, anaharere Deus botu ahabo nipamykyso ana kino kytsa Deus humo batu sispirikpo batu tyso tsimy. Asaktsa sispirikpobyitsa tu tsikuparinita watsa maha. Mydisahawy tisapyrēna ty batu tsikuparinita bo nyny tsimaha. Atsawatu amy ty tisapyrēna Deus botu ahabo nipamykysoko kytsa Deus humo batu sispirikpo batu sibo tyso. Kyze amy ty tsipokzitsiarēna

atsawy wata pazaharezatsa bo batu nyny tsimy. Atsawy watsa ty nyny tsimy zeka mysiharatonaha zuba, amy ty tisapyrēna humo batu sihyrinymyry. Iwaze amy ty tisapyrēna Deus ahabo nipamykysoko kytsa simysapybyitsa batu wabytokto zikaha iwatsahi sibo batu tyso. Asaktsa Deus wasania ty yhỹ byri nikaranaha iwaze tsimyserekek ustsā kytsa bo tsimaha – Sesus niy.

Deus humo tsimyspirikpokonahaktsa.

⁷ Sesus tihi:

– Kyze batu ahape tu ahasopyk “Deus mybo piwaby ja, batu kahyrinymyry” Deus bo tsimyzapykynaha zeka Deus ahabo nyny my. Deus bo tsipiberikinaha zeka tsimozikahanaha. Hokbowy humo toto tsimaha zeka hokbowy ty zoksapare my.

⁸ Aty isapyrēnikia ty myzapyky zeka Deus ibo nyny my. Aty Deus bo piberi zeka ibo natahaha. Aty Deus bo huahua my zeka Deus piwaby hokbowy zoksapare mynakara.

⁹ Aty ahatukze ikiahatsa izo zeka iwaze itse ipe my zeka: “O kazo atsikara ty kabokta!” my zeka ikia atse bo harahare ty ba ibo nyny ziky.

¹⁰ Itse ipe my zeka:

“Kazo piknu ty kabokta!” my zeka ikia atse bo pyryhyk ty ba nyny ziky.

¹¹ Ikiahatsa ahamysapybyitsa tu tsimykaranaha zeka iwatsatu amy ty tisapyrēna ty ahahyrytsa bo nyny tsimaha. Niwazuba! Azo hi bijoikpe eze tahi imysapyrēnikita. Ibo hi tsimyzapykynaha zeka isapyrēnikia ty zuba ahabo nyny mynakara.

¹² – Kyze amy tisapyrēna ty ustsā kytsa bo niwatihi tahaktsa! Hawa tisapyrēnikia ty ahabo tsimyzihikiknaha atsatu sisopyk tsimaha. Tsisapyky-nahaktsa! Ana soho Moises harere my. Deus sohokotsitsa kino niwatihi atsatu nitsasokonaha. Taharere hi Deus nitsasoko hỹ – Sesus niy.

Ske petokuruk.

¹³ Nisihyrinymyrykyzo:

– Kyze hokbowy jakebyita Deus bo mopupunaha! Aba Deus tuk tsimyzurukunaha zeka ske jakebyita tsibik wata buruk tu tsimykurunaha. Usta ske buruk sinini ykarawy bo, ata ske hi tsiakiarēta, kytsa sizubarētsa ata ske buruk mokurunaha. Ata sketa batu ihokdaha iwatsahi sizubarētsa ataske buruk mokurunaha.

¹⁴ Asaktsa Deus tuk mynapykyryknaha. Mekywatu siske. Ata ske buruk bijoikpe bo tsihokdaha rēna asaktsa ata bo mokurunaha Deus tuk tahawahi mynapykyknaha. Sakurētsa. Ata ske buruk kytsa batu sizuba mokurunaha, batu sizuba hokbowy wata paku maha – Sesus niy.

Deus sohokobyitsa soho pinymyryky.

¹⁵ Sesus nipamykysokozo:

– Pykyhytutaha! Kytsa ikiahatsa kaske buruk pāo pāo byitaha sisopyk iwaze asa tihi: “Katsaktsa Deus sohokotsa tsimaha” mybarapetu mykaranaha. Deus harere zimyikinaha. Ahabo mozumunahaze ahaharereziuwu watsa, batu ba asaktsa parinita watsa batu sisapy maha. Kaske buruk tsimykurunaha zeka batu siakparawy, kaharere bo hỹbyri tsimaha zeka anahi mozihikiknaha, iwatsahi pykyhytutaha!

¹⁶ Hawa simysapybyitsa tu mykaranaha humo tsipimytsatyhykynaha, “O isapy byizeka sispihikbatakanahatsa” tsimaha. Pisapybyinahaze simyspihikbatarētsa tsipinymyrynaha. Wihara batu tsarak taypykykze iktsa tsimaha zeka katsa hi: “Atahwi isapy byizeka” tsimaha. Hwi batu sapy byizeka ihara kino niwatihi batu itsārāk. Tahwi ty umaha wata “duabohotsa” watsa batu ihara ty zizykyryknaha. Maku wasani mytsaty mynakara zeka

tsimysapyrēta mozik. Maku batu wasani mytsaty mynakara zeka imysapybyitatu mynakara. Hawa mytsaty tsimykarana ana tihi tsimykarana. Maku isapybyikita tu mykara ibo iktsa tsimahaze “O atakta batu wasani mytsaty mykara” myhyrinomyrētsa.

¹⁷ Hwi taypykyk zeka tisapyrēna ihara kino tisapyrēna hwi isapybyita tu taypykyk zeka ihara kino batu isapy maha.

¹⁸ Hwi tisapyrēna taypykyk zeka ihara kino tisapyrēna. Hwi isapybyita taypykyk zeka ihara kino batu isapy.

¹⁹ Kytsa atahwi hi piwekenaha iwaze izo bo pioktsotsoknaha.

²⁰ Iwaze kytsa wihara watsa. Hawa mykaranaha humo sisoho ahahyrinomyrētsa. Iwatsahi asaktsa tihi: “Katsaktsa Deus sohokotsitsa tsimaha” mybarapetu nikaranaha, anatyhi ahahyrinomyrētsa. Hawa mykaranaha humo ahahyrinomyrētsa – Sesus niy.

Deus zinomyrykyta.

²¹ Nisihyrinomyrykyzo:

– Kytsa kabo motsasokonaha zeka “O ikia kapehatsa” mytsaty ahabyi mykaranaha. Asahi hawa Deus mozihikik anahumo hi yh̄y h̄abyri zeka asahi Deus sapy bo ba ziknapupunaha, Deus tyryktsa ba zikyzyknaha. Asazuba Deus harere bo hȳy mykaranaha, hawa Deus mozihikik anahumo zuba ma mykaranaha asa zuba Deus sapy bo mynapupunaha.

²² Hana wa puruze Deus myzubaha pe my “Ikia tsamysapyrēta” my. Usta pe “Ikia batu amysapy” my. Asaktsa hawa Deus zikzihikik naha humo batu yh̄y ziknakaranaha ipe:

“O mypehatsa mysapyrētsa tsiknakaranaha wasania ty tsiktsasokonaha ahare ty kytsa bo tsiksihyrinomyrykynaha, anaro humo hyrikoso sapybara tsiksiksiwyhiknaha. Hawa kytsa zikaha bara ty katsa tsikykarana azikwy humo zuba. Iwatsahi atuk tsimynapykyryknaha” maha.

²³ Iwaze Deus ispe my:

“Ikiahatsaktsa batu kanyhy. Hana iknyktsa skaraba. Ahamysapybyitsa tsikykarana iwatsahi kasapy bo paku pakubyitaha! Nabo p̄otaha” my – niy. Iwa mymyhyrinomyryky Sesus ziwatawy.

Petok wahoro humo nisispirikpoko.

²⁴ Iwaze Sesus tihi:

– Aty skaraba kaharere ziwabytahi kaharere bo hȳy nikara. Atakta maku wata zinomyrytatu haraharetsa bete tawahoro nizokniki. Tukuke bo iharakorowy sapy tsiok tsihyrizirēna bo zitsek.

²⁵ Kyze zopoktsa mynabybyknahaze, hyritsik mynawōze. Pihik wytyk ikny mynapokze. Pihik mynapokze wahoro bo mozumuze batu ziknatsehpetok. Iwa maha zeka ba ziknazuru. Atakta kaharere bo hȳy nikarata myhyrinomyrytsa wata my.

²⁶ – Aty skaraba kaharere ziwabytahi kaharere bo batu yh̄y ziky. Atakta maku wata ihyrinomyrybyitatu tawahoro nizokniki nimirya eze tu ziukuru. Jokboha zuba batu ioketsehezeze iwa tawahoro nizokniki. Tukuke bo tsikaeni zuba ziu. Iharakorowy sapy batu ioketsehezeze batu zihi bo tohi ahabyitatu.

²⁷ Zopoktsa mynabybyknahaze, hyritsik nawōze. Pihik wytyk ikny inapokze. Pihik mynapokze wahoro bo mozumuze wahoro naktsehpetokyk. Mynakbi – niy.

Kytsa Sesus humo sipybyrētsa.

²⁸ Sesus nisihyrinomyrybaze myzubaha sipybyrētsa.

²⁹ Kytsa nisihrinymyryze Sesus tihi:

– Uta ahape hawa tsimaha – niy. Hawa ha ty Deus mozikik naha humo tsihrinymyrëta. Sudeutsa sihrinymyrykytsa tihi:

– Amy ty taparaktsa nikaranaha ahape hawa ja mytsaty zuba tsimaha – niaha. Iwaze kytsa Sesus harere humo sipybyrëtsa – O iharere wasani my – niaha.

8

Sesus inakõrõrõbaikta zizororowy.

¹ Kyze Sesus hara jobonita ikny inasikze myzubaha iapik niukurunaha.

² Iwaze maku inakõrõrõbaikta Sesus bo zumu. Atakta Sesus okeryk taekaratsa humo puruk puruk niy. Sesus humo tispirikporëta iwatahi puruk puruk niy. Ipe niy:

– O ahrinymynikita, hawa tsimyzeka tsipikzororowy – niy.

³ Kyze Sesus ihumo tsimypokzitsiarëta ihumo paik niy. Ipe niy:

– Uta pazororowy hỹ – Sesus niy. Atsoko siakõrõrõtsa nihokdanaha. Nizororo.

⁴ Iwaze Sesus zipeha:

– Wabyziuty! Sosobyitykta! Ba aty tohi bo ziktsaso. Ikia ziknapamykysokota bo tsikawatawykta! Iwa taparakta Moises ziwataha papeu humo atsatu Deus bo nyny tsimy. Siraratsa ty Deus bo nyny tsimy. Iwatsahi kytsa bo nisiwatawyky tsikzororo – niy.

Iwa Sesus inakõrõrõbaikta zizororowy.

Sesus sodadu taparakta tsumuëhĩtsa zizororowy.

⁵ Kyze Sesus Kaparanaũ bo zumuze sodadu Homa ibo niy. Atakta sã sodadutsa mynasipehaka.

⁶ Tatsumuëhĩtsa zizororowy tsihikik iwaze nizapykyky:

– O myhrinymyrykytsa katsumuëhĩtsa mohoeke. Imyziubyita tu sinini mykara. Tsimyitsapyrëta – niy.

⁷ Sesus:

– Utakta awahoro bo my. Pizororowy – niy.

⁸ – O kamysapybyita tu mykara kawahoro bo paku pakubyity, kasikpybyrëta Sudeubyitatu iwatahi ikia kabo paku pakubyi tsimy. O myhrinymyrykytsa tytsasozubakta! Aharere humo estuba zuba tsimyzeka katsumuëhĩtsa mozororo.

⁹ Uta kahyrinymyrëta aharere soho humo uta kino niwatihi kapehatsa harere bo hỹ kasopyk. Sodadutsa kaharere bo hỹ sisopyk, mysipehaze: “Nabo pãotaha!” Pão atsoko motururuknaha. Utsa pe: “Pany pãotaha!” atsoko mozumunaha hỹ. Katsumuëhĩtsa pe: “Tihi tsimykta!” Hỹ my – niy.

¹⁰ Anaharere Sesus ziwabyze paikpa mytsaty nikara. Sizubarëtsa pe tihi:

– Wabytaha! Sudeutsa batu kahumo sispirikpo maha sodadutsa taparakta wata my. Atahi kahumo ispirikpota babata Sudeutsa batu – niy.

¹¹ Ikiahatsa pe:

– Nanabyitaba kytsa sizubarëtsa kabo mozumunaha. Deus myikaha maha. Taparaktsa Abarão, Isake, Sako iwatsa situk modyhydyhykynaha Deus tuk asakta ityryktsa moziknaha.

¹² Sudeutsa asakta sispirikpobyitsa tu batu Deus tyryktsa moziknaha. Sispirikpobyitsa tu miwa eze zuba mynapykyknaha nabo mysipapararik. Deus mysipeha sinini ykarawy bo anaeze mopuziukunaha. Tahakyrikinaha tsahi tahatsaputsa dydydy mykaranaha – niy.

¹³ Kyze Sesus taparakta sodadutsa pe niy:

– Awahoro bokta! Kahumo aspirikporēta tu hawa ha tsimyzihihik atsatu my – niy. Iwaze babatu itsumuēhītsa nizororo.

Sesus sizubarētsa nisizororowy.

¹⁴ Kyze Sesus Peduru wahoro bo niy. Inatsukze tsaikbatatsa Peduru wapyry ihumuēzumu ibo iktsa niy. Atatsa tawanu eze nihoekik.

¹⁵ Iwaze Sesus iwanu bo hamuba itsyhyrype humo paik niy. Itsyhyrype humo paik niyze nizororo. Ihumuēzukbyitatsa tu idisahawy ty ibo nyny niy.

¹⁶ Nubaze kytsa sizubarētsa ibo nisioktyhyryknaha. Asaktsa hyrikoso sapybara pororo ziknakaranaha sipiakmyitsa hyrikoso sapybara pokso. Iwaze Sesus hyrikoso sapybara nisipehahik. Ispe nabo pāotaha niy. Iharere pokso ziksihiknaha. Utsa kytsa simyitsapyritsa Sesus bo nasioktyhyryknaha nisizororowybaik.

¹⁷ Yh̄y, hawa Deus sohokotsa Isaijas tubabatu ziwataha Sesus atsatu nikara. Tubabatu Isaijas tihi:

– Simyitsapyritsa mysizororowy. Myzubaha izikwy humo sakurētsa – niy. Iwa Isaijas Sesus soho tubabatu ziwataha, anahi Sesus nikara, iwatahi Isaijas harere wasani niy.

Sesus tuktsa niyziknahatsa soho nisihyrinomyryky.

¹⁸ Kyze Sesus myzubaha tazahara niapykyryk. Iwatahi zinomyrynahatsa pe:

– Koikny tsinaporenahaktsa kytsa! – niy. Yh̄y niaha.

¹⁹ Kyze maku atakta Moises harere ziwatahaka Sesus bo zumu. Atahi:

– O tynamyhyrinomyryta uta kino ikia tuk mykara. Ikia tuk paikpa mynakara atuk mynapykyryk – niy.

²⁰ Sesus ipe niy:

– Tsoromamatsaktsa tahahoke eze mynapykyknaha. Piyktsa kino niwatihi tahasuk eze tu mynapykyknaha. Utakta Deus zikpehata ahawata ikyzik batu kawanu sapyky. Batu haneze tohi zikuru my – Sesus niy.

²¹ Kyze usta zinomyrykyta ipe:

– Byikta tapara kazo bo piksizo. Tapara kazo myziykytkare – niy.

²² Sesus tihi:

– Nihyrikosokdanahatsa arekektaha. Mohyrikosokdaze ituk kytsa piytyknaha. Ikia kino Deus wasania ty ityryktsa soho tytsasoko – Sesus niy.

Sesus zopoktsa nisipykik.

²³ Iwaze tsaraha bo takorohyk. Zinomyrykynahatsa ituk kokorohyk niaha.

²⁴ Atsoko zopoktsa nabybyknaha. Hyritsik inawōkō. Pihik ihiridawy wa niukuru. Pihik ty asiba tsaraha inaharek. Asiba nitaboknaha. Sesus kino tsapukteze zurubaka.

²⁵ Iwatsahi zituzutuzukunaha ity zipopowynahaze ipe niaha:

– O mypehatsa batu iktsa ziky! Tsimymybabakanaha – niaha.

²⁶ – Amy pokso ahapybyrētsa. “Sesus batu imypokzitsiu” tsimaha – niy. Kyik niy:

– O zopoktsa akso byitaha! Niwazuba, pihik pykty! – niy. Zopoktsa atsoko pañ niaha. Pihik atsoko nitsikyrituhudi byri. Jakara zikbohota bo mahani itsikepepepe zuba.

²⁷ Kytsa sipybyrētsa tahapetu sisopyk:

– Atakta Sesus aty skaraba. Zopoktsa pihik aha iharere humo ziwabynaha pyk niaha. Aty skaraba Sesus – niaha.

Sesus kytsa petoktsa hyrikoso sapybara situk pororo ziknakaranaha nisik-siwyhik.

²⁸ Kyze amykta taba bo byu niaha. Kadara eze tu. Tsaraha ty byuzo niyze makutsa petoktsa Sesus bo izumunaha. Hyrikoso sapybara sibo pororo ziknakaranaha. Sihumo sakyriukrëtsa ziknakaranaha kytsa sipokso sipauk-taba ba harakmo zikaha. Mytyk sisapy niaha anaeze hudik ziknakaranaha.

²⁹ Sesus okeryk ziktoriktonaha. Atsoko kakaik niaha:

– Amy skaraba Sesus, ikia Deus tse. Amy skaraba mybo tsikzumu. Aba sinini ykarawy bo ja tsimymypeha. Bykyzehu zuba tsimaha – niaha.

³⁰ Na bytykarezetu pazaharezatsa sizubarëtsa hara sukpetara humo tahadisahakanaha.

³¹ Kyze hyrikoso sapybara Sesus bo nizapykykynaha:

– O sinini ykarawy bo myty pehabyity, tsimysiksiwyhik zeka paza-harezatsa bo tsimymypeha – hyrikoso sapybara niaha.

³² Sesus ispe:

– Nabo pãotaha. Pazaharezatsa bo za – niy.

Kyze hyrikoso sapybara kytsa ekze ziponahaze nitururuknaha. Paza-harezatsa bo nipupunahaze pazaharezatsa iharatsupetoho bo inatururukik-naha. Pihik bo niharazukzukbaiknaha. Niakbabaiknaha. Hyrikoso sapy-bara kino tahawahi nihokdanaha. Batu sibo zukzo niaha. De.

³³ Iwaze pazaharezatsa perytsitsa iktsa niahaze hi sihudikhudikwy bo ni-tururukiknaha. Kytsa bo nipamykysonaha. Hawa Sesus hyrikoso sapybara ty nisisiksiwyhik anatyhi nipamykysokonaha.

³⁴ Kyze anahudikhudikwy ezektsa sizubarëtsa Sesus zihobyknaha. Inako-zorenaha. Ibo zumukunahaze asa tihi:

– O tsiksizokta! katsa mybaze ba ziktare. Tsimyparakta! – niaha. Iwaze niparak.

9

Ityrykniakbata pão zikybyita Sesus zizororowy.

¹ Kyze Sesus tsaraha bo takorohykzo tahudikhudikwy bo koikny nipozo. Kaparanaũ tahudikhudikwy bo zinymyrykynahatsa tuk zumunaha.

² Kyze kytsa ityrykniakbata ibo zebykyryknaha. Ityrykniakbata pãozikybyita tawanu bete niy, ituktsa iwanuze zebykyryknaha. Sesus siharereziuwytta pe:

– O kytsa “Sesus myhumo tsimypokzitsiukrëta” tsimaha, ikiahatsa humo kakurëta – niy. Iwaze Sesus ityryk niakbata pe:

– O katse tsipunihikrëtakta! Amysapybyri tsiky kara Deus pe: “batu yhỹ” tsimy. Iwahatu paokzohik. Amysapybara ty kahumo niokzohik – niy.

³ Kyze Moises harere zihyrinymyrykynahatsa anatyhi ziwabykynahaze tahapetu sisopyk:

– O Deus soho tsiharerewabymybarëta. Amo skaraba nitsasoko. Deus zuba pahaokzohik. Atahi zuba “kahumo niokzohik” mykara – mytsaty nikaranaha.

⁴ Kytsa anawahi mytsaty nikaranaha ana kino Sesus tsihyrinymyrëta iwaze ispe:

– O hawa tuza kytsa. Amy humo sa mytsaty nikaranaha.

⁵ “Iwaha tu pahaokzohik” my zeka tsihokdahaarëna. “Kyiktykta” my zeka, ana kino niwatihi tsihokdahaarëna.

⁶ Iwatu utakta Deus zikpehata wyzik niwatihi my – niy. Ityrykniakbata pe:

– O papeha kyiktykta! Awanu ty pohyrykty! Tsiksikta! – niy.

⁷ Iwaze atsoko itarikto tawanu ty kokpuhyryk niy. Tawahoro bo ziksiki.

⁸ Kytsa ana humo nipybybaiknaha. Deus bo mosakibazikiknaha:
 – O ikia humo ka mykurētsa. Ikia maku bo zikwy nyny tsimy iwaze anawa niy. Ikia hi ityrykniakbata nipazyryk tsizororowy. Iwa ty ka batu tyny – niaha. Iwa hỹ.

Mateus Sesus hapik niukuru.

⁹ Iwaze Sesus niparak. Niukuruze ske buruk maku Mateus inarokota bo iktsa niy. Atakta siokyrysaro bykwy sapy baze ziknadyhyky anaeze tarabaja ziknakara. Sesus ipe niy:

– Panykta katuk! – niy. Hyỹ niy. Kyikyky niy. Sesus hapik niukuru ituk zinymyryky.

¹⁰ Kyze Sesus tuk zinymyrykynahatsa tuk Mateus wahoro bo niaha. Anaeze tadisahakanaha. Kytsa siokyrysaro bykyktsitsa sizubarētsa ustsaktsa simysapybyitsa kytsa simymyijanikitsa iwa Sesus tuk tahadisahakanaha.

¹¹ Pariseutsa asaktsa Moises harere soho sihyrinymyrētsa ana bo iktsa niahaze Sesus tuk zinymyrykynahatsa pe:

– Amo skaraba ahahyrinymyrykytsa nawa kytsa tuk maha. Siokyrysaro byktsitsa tuk tumy pikukunaha, simysapybyitsa tuk tahadisahakanaha, batu wasani my – niaha.

¹² Siharere Sesus ziwabyze ispe niy:

– Simysapybyitsa simyitsapyrētsa hyrity watsa niy. Sakurētsaktsa myzororowytsa bo ba zikumunaha. Simyitsapyrētsa zuba myzororowytsa bo pomonaha. Kytsa simysapybyitsa tu simysapyrētsa moziknaha iwatahi ikzumu kahumo simysapybyitsa simysapyrētsa moziknaha.

¹³ Iwatahi simysapyrēnikitsa bo batu zuk. Utakta mybarawy bo iknasik simysapybyitsa bo, asahi tahamysapybara pimoewynaha – niy. Deus sohokotsa tubabatu ziwataha – Tyharape pokzi tsikinahaktsa kytsa! Siraratsa ty kabo nyny tsimaha zeka tsikaeni zuba mozihihik, tsipaharapepokzi tsikinaha zeka ana hi mozihihik hỹ – Deus niy.

– Iwa Deus sohokotsa tubabatu ziwataha abazuba atsatu my. Ana harere humo mytsatzyiutaha! – Sesus niy.

Amy humo kytsa mymyzunaha Sesus nisihyrinymyryky.

¹⁴ Iwaze Suão Batista zinymyrykynahatsa Sesus bo zumunaha. Ipe:

– Katsaktsa hauk habyitsa tu tsizurukunaha, Pariseutsa niwatihi hauk habyitsa ziknakaranaha. Iwaze Deus bo tsimynapamykysonaha. Atuk zinymyrykynahatsa tahadisahakanaha. Amy skaraba atuk zinymyrykynahatsa batu mywatu hauk habyitsa – nikaranaha.

¹⁵ Sesus ispe niy:

– Maku tasukzaze tatukytsa tuk tamiyikaha tumy pikukunaha. Isukzata situk tu sydikrētsa maha. Kyze isukzata moparakze ituk kytsa batu siaku iwatsahi hauk ahabyitsa maha. Uta bijoikpe bozoze katuk zinymyrykynahatsa batu siaku iwatsahi haukabyitsa maha – Sesus niy.

¹⁶ Hawa kytsa Deus tyryktsa moziknaha Sesus nisihyrinymyryky. Ata tihi:
 – Batu aty tohi panu ezytyk izyzykyha humo isuk ibyky humo ba zikzutunaha. Iwa my zeka isuk mysykbai. Isuk ibykta tu panu ezytyk tatu mymyibaik.

¹⁷ – Batu aty tohi duabohotsa tsik ezytyk ty ba sirara hwyk ibykta bo ba zisusu my. Iwa myzeka duabohotsa tsik ezytyk mynapytoze ibykta tsasuk mytok niy. Mopokobaik. Isuk ibykta pimyiibaik iwaze duabohotsa tsik mypukuba. Duabohotsa tsik ezytyk hi tsasuk ezytyk eze tu tsipisusuku. Iwaze duabohotsa tsik isuk kino tisapyrēna maha – Sesus niy.

Sesus imyitsapyritatsa zizororowy. Jypykyhyzytyktatsa niratatsa zihyrizikpowy.

¹⁸ Kyze Sesus sibo nipamykysokoze maku ibo zumu. Sairu inarokota, atakta Sudeu wahoro taparaktsa. Sesus bo zumu iokeryk taekaratsa humo puruk puruk niy. Sesus humo tispirikporêta iwatahi puruk puruk niy. Ipe niy:

– Pany Sesus! Tupakta kawahoro bo, kaste pomozaka. Aidytykta. Ikia atsyhyrype ty ihumo paik tsimy zeka mozororo – niy.

¹⁹ Yhÿ niy. Iwaze Sesus iapik niukuru. Zinymyrykynahatsa niwatihi situk niukurunaha.

²⁰ Kyze wytyk iapik niukuru. Tsimyitsapyrêtatsa. Ispu byri ahabyitatsa. Batu pyk ziky. Dose ziytyk tseheze imyitsapyrêtatsa ziknapykyk. Atatsa ibo izumu.

²¹ Atatsa tape tu nikara – O ikza isuk humo paik my zeka mozororo – mytsaty nikara. Iwaze ipapatu isuk tsihara humo paik niy.

²² Sesus tasukpe bo atatsa bo iktsa niy. Ipe niy:

– Kaste askyrypunihioktsa! “Sesus pikzororo” tsiky. Ikia kahumo tsikspirikpoze azororowy – niy. Atsoko ispu inapyk. Nizororo.

²³ Kyze Sesus taparakta wahoro bo paku niy. Anaeze kytsa sizubarêtsa nipuziukunaha. Nipukarakanaha. Berêkzetsa ty nipamykyzunaha.

²⁴ Sibo iktsa niyze ispe:

– Ahasuka byitaha! Nabo pãotaha! Tatsa ste mahani isukmuza byitatsa tu purubaka tu – niy. Anaharere humo ziwabynahatsa hazi nikaranaha. Zimyijakanaha hazi nikaranaha.

²⁵ Kytsa sizubarêtsa ape bo zipoiknahaze Sesus taparaktsa ste wanusapy bo zumu. Itsyhyrype humo paik niy. Iwaze kyik niy. Nahyrizikpo.

²⁶ Kytsa ana soho nipamykysokonaha. Hawa Sesus niy kytsa nanabyitaba nipamykysokonaha.

Sesus petoktsa sihyrizikubyitsa nisizororowy.

²⁷ Iwaze Sesus niparak. Niukuruze petoktsa sihyrizikubyritya iapik niukurunaha. Asaktsa zihuahuakanaha:

– O Deus zipehata, Dawi tsekokatsa tymypokzitsikta! Tymytsumuêhikta! – niaha.

²⁸ Sesus iwahoro bo inatsukze sihyrizikubyitsa ibo zumunaha ispe niy:

– Ahahyriziktsa mysizororowyzik anatyhi yhÿ tsimaha. Kazikwy humo tsimyspirikponaha – niy.

– Yhÿ tsimaha. Azikwy humo myhyriziktsa tsimykozozonaha – niaha.

²⁹ Iwaze Sesus sihyriziktsa ty tsikatsika nikara. Ispe niy:

– Amy tsimyzihikiknaha atsatu my. Ahahyriziktsa mysizororowykta! Kahumo ahaspirikporêtsawy ahahyriziktsa zororowy.

³⁰ Iwaze nikoazonaha. Kyze Sesus ispe niy:

– Wabyziutaha! Hawa ahabo iky, soso byitaha – iwa ispe niy.

³¹ Asaktsa myzubaha bo nipamykysokonaha. Hawa Sesus niy nanabyitaba nipamykysokonaha.

Sesus iharerebyita zizororowy.

³² Kytsa nitururuknahaze usta maku, Sesus bo zioқтыhyryknaha. Atakta ihyrikoso sapybara humo batu harere ziky.

³³ Iwaze Sesus ihyrikoso sapybara iharerebyita ekze ziksiwyhik, nabo pãoty niy. Iwaze maku taharereke ihyrikoso sapybara nihokda naha humo. Kytsa sipybyrêtsa Sesus zikwy humo asaktsa:

– Hawa mykara. Nawa ty ka katsa batu ityny Isareu eze tu – niaha.

³⁴ Pariseutsa Moises harere sihyrinymyrëtsa:
 – Satanas hyrikoso sapybara pehakatsa ihumo ihyrikoso sapybara ziksi-
 wyhik atahi tazikwy ty ibo nyny my – mybarapetu nikaranaha.

Sesus aparakbaha humo tsimypokzitsiarëta.

³⁵ Kyze Sesus nanabyitaba bo inakuru. Ihudikhudikwytsa myzubahatsa sizubarëna iwa niukuru. Deus wahoro eze kytsa nisihyrinymyryky, kytsa Deus tyryktsa moziknaha ana soho nitsasoko. Deus wasania ty nitsasoko. Kytsa simyitsapyritsa nisizororowy, ustsä kytsa siakubyitsa nisipunihikwyky. Iwa Sesus nikara.

³⁶ Sesus kytsa sizubarëtsa bo iktsa niyze sihumo tsimypokzitsiarëta. Tapetu isopyk:

– Paikpa mytsaty mykaranaha batu siaku. Hozipyrykzatsa watsa, hozipyrykzatsa siperynymyrybyitsa hÿ – mytsaty nikara.

³⁷ Mytsaty nikaraze zinymyrykynahatsa pe:

– Waratok eze tsizubarëna niubaranaha. Wihara nijakuk. Sitsumuëhÿtsa batu sizuba. Wihara myzibakanaha tsumuëhÿtsa batu sizuba. Kytsa sizubarëtsa wihara watsa. Waratok tsihitsa Deus wata my – Sesus niy.

³⁸ – Iwatsahi waratok tsihitsa pe:

“Ikiakta tsumuëhÿtsitsa waratok boktsa! Tysizoziknaha. Wihara bo tysi-peha” maha. Nawa tihi Deus bo tsimypamykysokonaha. Hawa tsihitsa pe: “O waratok boktsa” wihara niakuk, ikiahatsa Deus pe “O kytsa sizubarëtsa humo wasania ty batu tywaby sihyrinymyrybyitsa tu ikia kytsa siboktsa wasania ty motsasokonaha” iwa Deus bo tsimypamykysokonaha – Sesus niy. Iwa nisihyrinymyryky.

10

Sesus zinymyrykynahatsa.

¹ Kyze Sesus dose zinymyrykynahatsa pe niy. – Pany! Kazikwy ahatuk mynapykyryk iwaze hyrikoso sapybara mybarawy ezektsa pororo nakaranahaze ispe: “Nabo päotaha” tsimaha. Hyÿ maha. Kazikwy humo tysiksiwyhiknaha. Ikiahatsa kino simyitsapyrëtsa kazikwy humo tsimysizororowynaha, kytsa siakubyitsa tysiakuwykynaha kazikwy humo sispihkrëtsa moziknaha iwa tsimahaktsa! – niy.

² Sesus sakzohotsa nisiwatawyhik. Tapara Simaõ Peduru ty zinaroko, itsy Ädere niwatihi, Tsiaku, Sebedeu tse itsy Suão niwatihi ziwatawy.

³ Piripi, Baratoromeu, Tome, Mateus okyryrsaro byktsa, Tsiaku Arapeu tse, Tadeu.

⁴ Simaõ Kanaã ezekta, Sudas usta Iskariotses inarokota atahi Sesus isukyrytsitsa bo ziockyhyrykta iwatsa Sesus nisiwatawy.

Dose zinymyrykynahatsa nisipehaka.

⁵ Asaktsa dose kytsa nisipeha. Atahi:

– Ahatukytsa boktsa kytsa! Tsipliksinahaktsa! Ske buruk Sudeutsabyitsa hudikhudikwy bo ba zikumunaha. Samarija ezektsa hudikhudikwy bo ba zikumunaha ahatukytsa bo zuba tsipiksinaha.

⁶ Asaktsa hozipyrykzatsa watsa. Hawa hozipyrykzatsa batu ske buruk nawa sizaratsa nikaranaha. Sudeutsa kahyrinymyrywy bo batu yhÿ zikaha, iwaze sizaratsa watsa niwatihi.

⁷ Ske buruk tsimyzurukunahaze nisihobyknahatsa pe “Abaka myzubaha Deus tyryktsa moziknaha” tsimaha.

⁸ Simyitsapyrëtsa tysizororowynahaktsa! Niakbanahatsa tynasihyrikponahaktsa! Kytsa nibibibaiknahatsa sakõrõrõtsa humo

tysizororowynahaktsa! Mybarawy ezektsa asahi hyrikoso sapybara pororo ziknakaranaha tysiksiwyhiknahaktsa! Deus hi sapyhaty ahabo nyny mykara iwatsahi myzubaha bo isapyha ty nyny tsimaha tysitsumuëhĩnaha.

⁹ Okyrysaro ty koro koro byitaha!

¹⁰ Ske buruk tsimykurunahaze ahaborohobyitsa ty! Wanuty pu pu byitaha! Ahasuk ty kino pok pok byitaha! ahahumokta tyzuba tsimaha. Ahapyrysuk ty estuba zuba korobyktaha! Ahazozowy ty wabehyryk wabehyryk byitaha. Amy tsimyzihikiknaha ana ty hi kytsa ahabo nyny maha. Ahahyrikiziksokzawy humo ahadisahawy ty ahabo nyny maha.

¹¹ Tsipomokonahaze myzubaha bo anahudikhudikwy ezektsa ahape maha: “Kawahoro bo pakutynaha” maha zeka yhỹ tsimaha. Iwahoro bo tsinapupunahaze anaeze tsimypykyryknaha. Ituk tsimytarenaha.

¹² Ata wahoro bo tsinapupunahaze iwa tsimaha “O wahoro ezektsa ahatsyhyryze Deus bo tsimaha ‘Myzo tysisapywyky ahumo sakurëtsa moziknaha’” tsimaha.

¹³ Anaeze tsimypykyryknaha wahoro ezektsa Deus wasania ty yhỹ mykaranaha zeka sakurëtsa moziknaha. Wahoro ezektsa Deus wasania ty ahabyizeka batu siaku moziknaha. Ikiatsa hi ahakurëtsa tsimyziknaha.

¹⁴ Asaktsa Deus wasania ty ahabyi zeka, ahaharere bo waby ahabyizeka meky botu tsimykurunaha. Tsimykuruzonahaze ahapyrysuk ty bok bokyktaha. Wytyk tazy ty mynatõ mysiwatawy. “Tahudikhudikwy ezektsa Deus harere bo batu hỹ” my.

¹⁵ Hanawa puruze Deus aparakbaha soho motsasoze, hawa ha ty kytsa tisapyrëna nikaranahaze “O wasani nikaranaha” my. Utsa kytsa hawa ha ty batu isapy nikaranahaze “O simysapybyitsa nikaranaha” my. Iwa purunahaze asaktsa Sodoma ezektsa humo tsihokdarëna, Korora ezektsa humo kino niwatihi tsihokdakarëna. Anahudikhudikwy anaeze Deus wasania ty batu hỹ nikaranaha tsihokdakarëna baba – Sesus niy.

Sesus sininikarawy soho isukyrywy kino niwatihi nisihyrinymyryky.

¹⁶ Mytsatzyiutaha! Nanabyitaba pahapehaka ikiahatsa hozipyrykzatsa watsa parinita ahatur maha. Iwatsahi pykyhytutaha! Wohorektsa watsa sispirikporëtsa siwatsa kytsa bo tsimytsatzyiukunaha. Amytudutsa watsa batu sakyri, ikiahatsa siwahatsa batu ahakryi tsimaha!

¹⁷ Pykyhytutaha! Sudeutsa siharerewabynahatsa pahaoktyhyryknaha. Sudeutsa sidyhydyhywytsa bo anaeze hwitsa ty pahakikinaha.

¹⁸ Kytsa sipehatsa, sikapitãotsa kino niwatihi sibo pahaoktyhyryknaha. Ikiatsa siokerykze Deus wasania ty sibo tsimytsasonaha. Iwa Sudeutsabyitsa Deus wasania ty piwabynaha.

¹⁹ Ahatsipa humo pahaoktyhyryknaha zeka ahaharere soho bo mytsaty mytsaty byitaha! Sipehatsa okeryk tsimytsasonahaze Deus pahatsumuëhĩ. Iwatsahi ahaharere ty Deus hyrikoso humo mytsaty tsimaha. Ihumo ahahyrinymyrëtsa hỹ.

²⁰ Ikiatsa zuba batu tyso Deus hyrikoso ahatur mynapykyryk iwaze wasani tsimytsasonaha. Atahi ahaharere piakse nawa pahatsumuëhĩ. Ihumo ahahyrinymyrëtsa hỹ.

²¹ Sesus tuk zinymyrykynahatsa pe:

– Kytsa situkytsa sisukyrytsa bo mysioktyhyryknaha, tsipahabawynaha. Iwa situkytsa tahabawynaha. Wastuhu Deus harere bo hỹ mykaranaha. Utsa kytsa Deus harere bo batu hỹ mykaranaha iwaze myharape metuwykynaha. Izotsa siharereziubyitsa tu sihyrytsa mysioktyhyryknaha iwaze tahabawynaha. Ihyrytsa niwatihi sizotsa

humo tahakyrikinaha Deus harere humo sisukyrytsitsa bo tysioktyhyknaha tahabawynaha.

²² Sizubarëtsa kahumo batu siakparawy iwatsahi ahabo niwatihi batu siakparawy. Ikiahatsa kahumo ahaspirikporëtsa tu iwatsahi kytsa aha humo batu siakparawy. Atakta tybyi zuba niy kahumo tispirikporëta babata. Aty kaharere bo hyÿ mynakara zeka iwaze sinini my atakta Deus tuk tawahi mynapykyryk.

²³ Estuba hudikhudikwy eze pahasukyrykynahaze usa hudikhudikwy bo tywakiknahaktsa! Anaeze pahasukyrynahaze usa hudikhudikwy bo tywakik. Utakta mybarawy bo iknasik. Bykyze bjoikpe bo modo. Tapara ahahyriziktsokzawy tsipipyknahaze zuba mybarawy bo myziksizo. Uta mozumuze ikiahatsa Deus wasania ty tsimytsasonaha. Isareu ezektsa bo batu ahapyk.

²⁴⁻²⁵ Abaka pahahyrinymyry hawa kytsa sisopyk ikiahatsa katuktsa babatsa tsimaha zeka kawata tsipinymyryky. Aty pinymyrykyta batu puëtsik ziky. Pinymyryziyu zeka tahyrinymyrykytsa wata mozik. Estuda mopyk zeka tahyrinymyrykytsa wata mozik. Tahyrinymyrykytsa ihumo tsakurëta. Sitsumuëhÿtsa niwatihi. Maku sitsumuëhÿtsa puëtsik tatu ipehatsa ihyrizikwani. Sitsumuëhÿtsa tapehatsa watsa mozik zeka ipehatsa ihumo tsakurëta.

Kytsa mytukytsa taparakta soho “Atakta Beserebu hyrikoso sapybara pehakatsa” maha. Iwa mypehatsa motsasonaha zeka amy skaraba mytukytsa mysinaropykyknaha. Kytsa sisoho sinaro ty batu isapybyikia motsasokonaha. Iwaze asaktsa ziksukyrykynaha ikiahatsa niwatihi, ikiahatsa katuktsa babatsa tsimaha zeka pahasukyrykynaha.

Aty pokso sa mypyby.

²⁶ – Iwaze siharereziubyitsa bo ahapyby byihu ja! Hawa ha ty kytsa papatu mynakaranaha bykyzehu myzubahatsa sihyrinymyrëtsa. Hawa ha ty kytsa akbyibatu mopamykysokonaha humo sizubarëtsa pinymyrykynaha. Hawa ha ty imysapybara mynakaranaha humo aibani sizubarëtsa sihyrinymyrëtsa.

²⁷ Hawa ha ty ahabo motsaso kytsa papatu bykyzehu sizubarëtsa bo opykani tsimytsasonaha.

²⁸ Kytsa pahabanaha zuba sipokso ahapyby byihu ja! Ikiahatsa pahabanaha. Bykyze batu zikaha. Ba amy tohi ahabo zikaha. Ahahyrizikararawy ba ziksibanaha. “Aty pokso sa mypybyrëtsa.” tsimaha. Deus pokso ahapybyrëtsaktsa! Ata zuba kytsa sinini ykarawy bo nasipehaka. Iwatsahi Deus pokso ahapybyrëtsa! – niy.

²⁹ – Amy ty piyk huak ty okyrysaro ty tsipisihyrykzo. Estuba zuba ja. Yhÿ. Piyk estuba zuba zibeze zeka ahazo tsihyrinymyrëta. Yhÿ niy. Deus hi piyktsa humo ba zikspiriktsokda. Sihumo tsimypokzitsiukrëta, iokzeka sipokzitsarëtsa.

³⁰ Ikiahatsa ja. Deus ahasoho humo tsihyrinymyrëta. Tsihyrinymyrëta babata.

³¹ Iwatsahi kytsa pokso ahapyby byihu ja! Hawa ahabo mykaranaha ahapyby byihu ja! Deus okzeka ahahumo tsimypokzitsiarëta. Iokzeka piyktsa sipokzitsarëtsa ikiahatsa pokzitsiuwy abazuba. Iwatahi Deus ahahumo tsimypokzitsiukrëta hÿ – Sesus niy.

Kiristu katukta my. Kiristu batu kanyhy my ana soho humo nisihyrinymyryky.

³² Ikiahatsa myzubaha okze tihi:

– Uta Sesus tukta my. Sesus iny – tsimaha. Iwa tsimytsasonaha zeka uta kino niwatihi bjoikpe eze tu utakta kazo pe my:

– Atakta katukta pinyky my – niy.

³³ Ikiahatsa myzubaha okze tihi:

– Sesus batu kanyhy – tsimaha. Iwa tsimytsasokonaha zeka uta kino niwatihi, bjoikpe eze tu utakta kazo pe my:

– Atakta batu kanyhy my – niy.

Sesus humo metutu niyziknaha.

³⁴ – Mybarawy bo inasik kytsa nisihyrinymyryky. Tozeka ja kytsa astsanitsa ja tsimaha mytsaty ahabyitsa tsimaha. Asaktsa kaharere bo hỹbyri tsimykarannahaze metutu mykaranaha.

³⁵ Itse tazo batu iakparawy. Izo Deus harere bo hyỹ mykara, itse batu, iwatahi tazo humo batu iakparawy. Iste taje humo batu iakparawy. Ije Deus harere bo hyỹ mykara iste batu iwatatsahi taje humo batu iakparawy. Iwapyryza ihyrytsa iokeza batu iakparawy. Atatsa Deus harere bo hyỹ mykara ihyrytsa iokeza batu, iwazahi ihyrytsa iokeza humo batu iakparawy. Iwa katukytsa kaharere humo metutu mynapykyryknaha.

³⁶ Maku iwahoro ezektsa sisukyrytsitsa moziknaha.

³⁷ Amakta zeky izo ije izotsa iwatsa sihumo ka iakparawytsa zuba iwatahi kahumo ka tsikaeni zuba iakparawy iwatahi batu katuktsa babatsa. Aty zeky itse iste ihyrytsa iwatsa sihumo ka iakparawytsa zuba iwatahi kahumo ka tsikaeni zuba iakparawy iwatahi batu katuktsa babatsa my.

³⁸ Sinini tsimahaze tu tsikahazoziknaha! Aty zeka iharapatawyhyta tasukyry buruk piskek zeka mohyrikosokda atahi nikara. Ikiahatsa tihiktsa! Katuk babatsa tsimoziknaha zeka sinini tsimykarannaha! Pabeze tsihikiknaha zeka kahumo ahaspirikpo batu pyk tsimaha. Tsikspirikpotohinaha kahyrinykyryk sinini tsimaha.

³⁹ Aty tabo zuba mytsaty myze: “O utakta ba zik hyrikosokda tapara Sesus bo batu yhỹ iwatahi Sesus soho ‘batu kanyhy’ ” my, atahi Deus tuk batu tawahi mynapykyryk. Atakta Sesus humo sinini my zeka atahi Deus tuk tawahi mynapykyryk, ipauk baze mynapykyryk tsakurēta my – Sesus niy.

Sesus tisapyrēna ty tatuktsa bo nyny mykara.

⁴⁰ – Aty ahape:

“O kawahoro bo pakutynaha. Mytuk tsipadisaha hỹ” my. Atakta kabo hi mykara. Ikiahatsa tsasohokotsa tu kabo mynakaranaha. Deus bo mynakaranaha. Utakta Deus zikpehata ahawata tu Deus bo mynakaranaha – Sesus niy.

⁴¹ – Aty Deus sohokotsa pe my “O kawahoro bo pakutyny. Mytuk tsipadisaha” my. Atakta Deus sohokotsa tuk Deus sapyha ty sibo nyny my. Atahi maku tsimysapyrēta bo atakta Deus harere bo hyỹ mykara. “Pany! Kawahoro bo pakutyny tsimy” my. Iwa tsimysapyrēta humo, atahi tsimysapyrēta Deus sapyha ty sibo nyny my. “O sibo mysisapywyky” – Deus my.

⁴² – Aty zeka pihik ty katukta bo nyny my zeka atahi katukta bo nyny my iwaze Deus isapyha ty ibo nyny my hỹ – niy.

11

Suão Batista tsumuēhĩtsa Sesus bo zumunaha.

¹ Kyze Sesus dose zinymyrykynahatsa pe nitsasobaze niukuruzo. Karireja bo niukuru. Anaeze Deus wasania ty nitsasokoro kytsa nisihyrinymyryky.

² Iwaze Suão Batista sakyriukrēnikitsa hurukwy eze, Kiristu Deus zipehata mywata niyzik hawa nikara ana hi ziwaby. Iwaze wastuhu zinymyrykynahatsa pe niy:

– Pany päotyny Sesus boktsa! “Ikia Deus zapehata ja” ipe tsimaha – niy.

³ Iwaze Sesus bo niukurunaha. Ibo zumunahaze asa tihi:
 – Tapara Suão tihi: “Deus zipehata mozumu” niy. Ikiã Deus zapehata ja. Usta ja tsipiperykynaha – Suão zinymyrynahatsa niaha.

⁴ Sesus ispe niy:
 – Suão bo tsipiksizonahaktsa! Hawa ha bo iktsa tsimaha, hawa tsiwaby-naha ana ty hi Suão bo typamykysonahaktsa!

⁵ Sihyrizikubyitsa myhyrizikzororonaha. Siekbyritsa pitabakanaha. Kytsa sakõrõrõtsa humo nibibibaiknahatsa mozororobaiknaha. Siharawitsa pi-wabykynaha. Niakbakanahatsa inahyrizikponaha atsatuzo niaha. Asaktsa sinamybyikitsa Deus wasania ty piwabykynaha, Deus wasania ty sibo mot-sasoko. Iwa Suão bo typamykysonaha – Sesus niy.

⁶ – Tsakurêta atakta kasoho ty “O atahi Deus bo kytsa mysiockyhyryk” my. Batu iaku atakta kasoho ty “O atahi Deus zipehata ja. Batu kanyhy my” – niy. Iwa batu tyso.

⁷ Kyze Suão Batista tuk zinymyrykynahatsa nitururuknahaze Sesus kytsa sizubarêtsa bo nipamykysoko. Suão soho nitsaso atahi:

– Jerukbara bo tsikurukunahaze Suão harere tsiwabynaha. Amo skaraba tsiny tsihikiknaha. Estuba hwi tsibik wata zopok humo wãkwãk nikara. Maku iwata batu iktsa tsikaha. Suão Batista ta hwi tsibik byiwata niy.

⁸ Amo skaraba tsiny tsihikiknaha. Maku tisukziurêta bo tsikaha. Batu. Kytsa sisukziurêtsa sipehatsa wahoro sihezõni eze mopykyknaha. Suão batu tsinamyrêta wata – niy.

⁹ – Kyze amo skaraba jerukbara bo tsikny tsihikiknaha Deus harere sohokotsa bo tsikaha. Yhÿ, Suão Batista Deus sohokotsa hiba.

¹⁰ Tubabatu Deus sohokotsa ziwataha. Deus tihi:
 “Iktsa tsimaha! Katsumuêhÿtsa Kiristu haraze iakzohota itsyhyryze pikymy. Hawa kytsa ske buruk pizozikbanaha pykyhytuty iwata ihumo pikymy” niy. Iwa Suão Batista soho Deus sohokotsa tubabatu ziwataha, abazuba atsatu niy.

¹¹ Tsiwabytoktonaha! Kytsa sizubarêtsa botu nipupurukuknaha Suão Batista imyhyrizikwani niy. Iwatuze aty Deus tyryktsa mozik, atahi wasania ty my zeka yhÿ my imyhyrizikwanikita mozik Suão batu.

¹² Suão Batista motsasoko zumuze kytsa nisihyrinymyryky. Abaka Sesus izumu kytsa Deus tyryktsa moziknaha, zikwy humo sipunihikrêtsa mozik-naha. Deus hyrikoso zikwy humo iwa kytsa Deus tyryktsa moziknaha.

¹³ Tapara Suão izumu, Deus sohokotsa, Moises harere kino niwatihi iwa Deus tyryktsa soho botu nitsasonaha.

¹⁴ Siharere bo yhÿ tsimahaze Suão Erias wata. Hawa nikara Erias wata. Hawa ha ty Deus sohokotsa Erias soho nitsasoko atsatu nikara, Suão zumuze atsatu nikara.

¹⁵ Ana kino tsiwabynahaze wabyziutahaktsa kytsa! – Sesus niy.

¹⁶ Atahi:
 – Abaktsa kytsa sa hawa, uta pahawatawyky. Jabyitsa watsa maha. Jababtsa mowakyrikinaha kõparasapy eze nidyhydyhykynaha. Paikpa harape bo huahua nikaranaha. Asa zuba mopamykysokonaha:

¹⁷ “Katsaktsa tsipamykyzukunaha ikiahatsa ba zikarinaha.

Kyze katsaktsa tsikzharawatahakanaha kytsa watsa nirata humo tapokzi.

Ikiahatsa ba zikpunaha, mytuk batu huehue zikaha” niaha.

Hawa jabyitsa mowakyrikinaha wastuhu batu siakparawy tahaok-tsinaha. Ikiahatsa siwatsa tsimaha.

¹⁸ Suão Batista zumu. Zumuze hauk habiyita tu niy. Duabohotsa tsik batu tsõ. Kytsa isoho “O atakta ihyrikoso sapybara tuk mynapykyryk” mybarapetu niaha.

¹⁹ Kyze utakta Deus zikpehata ahawata ikyzik ahabo ikzumu. Mydisahawy pihauk. Duabohotsa tsik piku. Kasoho kytsa tihi:

“Iktsa tsimaha. Atakta titsaurêta. Okyrysaro byktsa tuk tadisahaka. Utsa kytsa simysapybyitsa tu iakparawy my” niaha. Jabyitsa watsa. Iwa abaktsa kytsa Deus hyrinymyrywy babaha soho mybarapetu nikaranaha.

Sihudikhudikwy ezektsa simysapybyitsa nikaranaha iwatsahi batu sispirikpo.

²⁰ Kyze Sesus Karireja pihikzotsabyri sihudikhudikwy ezektsa nisibetsakak. Anaeze amy ty kytsa batu zikaha atsatu nikara. Simyitsapyrêtsa nisizororowy. Niakbanahatsa ihumo inahyrizikponaha. Iwatsa tu ihumo batu sispirikpo iwatahi nisibetsakak.

²¹ – O hudikhudikwy Tsoratsĩ inarokoha. Anaezektsa sinini mykaranaha. Kahumo sispirikpobyitsa iwatsahi sinini mykaranaha.

O hudikhudikwy Beseza inarokoha. Anaezektsa sinini mykaranaha. Kahumo sispirikpobyitsa iwatsahi sinini mykaranaha. Anatu kazikwy ziny-naha. Atsatu zeka Tiro ezektsa mykara. Atsatu zeka Sodoma ezektsa niwatihi mykara zeka tubabatu siezektsa Deus harere bo yhỹ nikaranaha. Simysapybyitsa tu nikaranaha ana kino zimoewynaha. Iwaze siakubyitsa izohyri ty tahapiakwatahakanaha tahasopyk tyty humo iwa kytsa bo ziwatawykynaha simysapybyitsa tu nikaranaha ana hi zerekaiknaha.

²² Bykyzehu Deus kytsa simysapyrêtsa pe: O ikiahatsa ahamysapyrêtsa, kyze simysapybyitsa pe: O ikiahatsa batu ahamysapy tsimaha my. Nawa zuruze Tiro ezektsa sinini mykaranaha. Sodoma ezektsa niwatihi jokboa zuba sinini mykaranaha. Ikiahatsa hi sininitohi tsimykaranaha, ba zik zororonaha.

²³ O hudikhudikwy Kaparanaũ inarokoha. Anaezektsa mytsaty nikaranaha. “Katsaktsa abazubatsa tsimoziknaha” iwa mytsaty ahabyitsa nikaranaha. Deus hi sinini ykarawy bo mysipeha. Kaparanaũ ezektsa kahumo sispirikpobyitsa tu amy ty kytsa batu zikaha situk ikykara. Atsatu zeka iky Sodoma ezektsa humo Deus takyri humo batu koro.

²⁴ Iwaze Deus kytsa soho motsasoko Sodoma ezektsa sinini mykaranaha, Kaparanaũ ezektsa kahumo sispirikpobyitsa sinini mykaranaha, Deus sinini ykarawy bo mysipeha.

Deus wasania ty myzubaha bo niy.

²⁵ Kyze Sesus Deus bo nipamykyso:

– O kazo abazubata. Ikia hi bijoikpe ezektsa pehatsa. Ikia hi mybarawy ezektsa pehatsa. Ikia zuba wasani tsimykara. Tapara hawa tsimykara sihyrinymyrêtsa bo ziokpitsĩ. Batu isty watawy. Sihyrinymyrêtsa papatu batu isty watawy. Asaktsa sihyrinymyrybyitsa tu sibo hi tsiksiwatawyky. Hawa tsimykara tsiksiwatawy. Kytsa jabasitsa watsa tsiksiwatawyky. Asaktsa batu simyi.

²⁶ Iwa tsimyzihihikik iwatahi “O tisapyrêna” kazo my – Sesus niy.

²⁷ Kyze Sesus nipamykysokozo zinymyrykynahatsa pe niy:

– Deus kazo hi anamy ty kabo nyny niy. Ba aty tohi ta ja itse ziky ikatahi zuba. Kazo babata. Niwatihi ba aty tohi ta ja kazo ziky ikatahi itse babata ziny. Asa kino mysiwatawy tsihikik. Iwa hỹ – niy.

²⁸ Iwaze Sesus myzubaha pe niy:

– Panytaha! Kabo tyzumunahaktsa! Ikiahatsa batu ahaku ikiahatsa ahakubyrisorokbyitsa ikiahatsa kino kabu panytaha! Iwaze kahumo ahakurētsa tsimoziknaha.

²⁹ Kaharere bo hỹ tsimaha. Utakta zinymyrykynahatsa tuk kakubyrisorokrēta uta kamysapyrēta bazimyi iwatsahi katuk tsinymyrykynahaktsa! Ahakurētsa tsimoziknaha, katuk tsimynapykyknaha.

³⁰ Kaharere humo batu ihokdaha. Kamyspirikpowy ahape tisapyrēna sihumo ahapyby byihu ja iwatsahi kamysopykwy tsimahaktsa – Sesus niy.

12

Sesus Sudeutsa nawa zuruze sibirykywy soho nisihyrinymyryky.

¹ Kyze nawa zuruze tabyrykyze Sesus waratok bo niukuru. Zinymyrykynahatsa siarapa zumu iwatsahi tiriko inasibakanaha. Nisityhyktyhykyknaha iwaze nisiborokonaha.

² Pariseutsa sibo nikozonehaze Sesus pe niaha:

– O iktsa tykta! Ikia tuk zinymyrykynahatsa tarabaja mykaranaha. Amo skaraba niwa mykaranaha. Nawa zuruze tabyryky eze Deus harere humo katsaktsa batu tarabaja zikaha. Ana kino Moises harere tubabatu nymyrykynymyryky – niaha.

³ Iwaze Sesus ispe niy:

– Hawa taparakta Dawi niy baija ahahyrinymyry. Papeu humo Dawi soho ziwatahaka. Taparakta Dawi itukytsa siaraparētsa tuze Deus wahoro bo inapupunaha.

⁴ Deus wahoro bo nitsukze atsikara waha zibyk, ana hi Deus bo ky zituha. Zioko itukytsa niwatihi ziokoknaha. Moises harere tihi: “Ana atsikara waha kytsa batu hauk zikaha. Ziknapamykysokonahatsa zuba zikziokoknaha” niy. Dawi ziok, itukytsa kino ziokoknaha. Ana papeu humo ka ja batu ahahyrinymyry – niy.

⁵ – Ahahyrinymyrētsa nawa zuruze tabyryky eze ziknapamykysokonahatsa Deus wahoro eze tarabaja nikaranaha. Moises harere humo “batu tarabaja maha” ziknapamykysokonahatsa siraratsa nisiba. Deus bo nyny nikaranaha. Iwatsatu wasani ziknakaranaha.

⁶ Utakta ahatuk kamyspirikpowy ezytyk abazuba my, ahasopykwy Deus wahoro soho nepykyknaha.

⁷ Deus harere tubabatu ziwatahaka “Tyharape pokzitsikinahaktsa kytsa! Siraratsa ty kabu nyny tsimaha zeka tsikaeni zuba mozihikik, tyharape pokzitsikinaha zeka ana hi mozihikik” niy. Deus sohokotsa tubabatu ziwatahaka ana harere inymyry baba, anahumo hi zinymyrykynahatsa bo batu ahasapybyi.

⁸ Utakta Deus zikpehata ahawata ikyzik. Anahumo hi uta kino nawa zuruze tabyryky eze tsihitsa ikyzik, nawa zuruze mybyrywy eze pipehaka my – Sesus niy.

Sesus maku itsyhyrype noikta zizororowy.

⁹ Kyze Sesus niparak Deus wahoro bo nitsuk.

¹⁰ Anaenze estuba maku itsyhyrype noikta niy. Wastuhu kytsa Sesus humo batu siakparawy iwatsahi motsasonaha – “Sesus hawa imysapybara ty mykara” iwa motsaso tsihikiknaha. Nizokparakanaha. Iwatsahi ipe:

“Mybyrykywy pomoze tahabyi mopykyryknahaze maku tsipizororowy wasani ja. Moises harere humo tsipizororowy zeka wasani ja” – niaha.

¹¹ Sesus tihi:

– Aty hozipyrykza estuba zuba zeka. Nawa zuruze pororo mykara tahabyi mopykyryk hozipyrykza wytyk hoke bo mynatokoro zeka hawa tsimy. Hozipyrykza bo iwaze atsoko ity paik my.

¹² Hozipyrykzatsakta myraratsa zuba. Makuta Deus humo ka tsipokzitsiarēta. Iwatahi kytsa pitsumuēhī. Nawa puruze tahabyi mopykyryk kytsa mysitsumuēhīnaha zeka wasani my – niy.

¹³ Iwaze itsyhyrype noikta pe niy:

– Atsipa ty kabo nynytny – niy.

Maku tatsipa ty Sesus bo nyny niy. Atsoko nizororohik. Usta tsyhyrype wata niyzik. Sesus itsyhyrype zizororowy.

¹⁴ Pariseutsa ana bo iktsa niahaze tahaokanikinaha, niunaha. Asa zuba nipamykysonaha – Hawa skaraba Sesus tsipibezena – nikaranaha.

– *Sesus katsumuēhītsa ity ziwatawy – Deus niy.*

¹⁵ Siharere soho humo tsihyrinymyrēta iwatahi ana ekze kuorē niy. Kytsa sizubarētsa iapik niukurunaha. Asakta simyitsapyrētsa nisizororowyba.

¹⁶ Nisizororowyze ispe niy:

– Hawa mykara kytsa bo soso byitaha – niy.

¹⁷ Iwa niy. Iwatahi amy ty Deus sohokotsa tubabatu ziwatahaka atsatu nikara. Ta ziwataha Deus tihi:

¹⁸ – Atakta katsumuēhītsa utakta ibo piwatawy.

Ihumo kakurēta hiba. Ihumo kamypokzitsiarēta.

Kahyrikoso ibo pipeha ituk tawahi mynapykyryk,

kahyrikoso ituktu mynapykyryk ihumo kazikwy ituk my.

Kasopykwy tisapyrēna kytsa bo my.

Hawa mozihihikik aparakbaha bo motsaso.

¹⁹ Ba zikaha pebetsak sizubarētsa tuk batu kakaik my,

batu aty tohi ske buruk ba zikaha pebetsak.

²⁰ Kytsa asakta siakubyitsa hwi tsibik wata ihumo sipunihikrētsa moziknaha.

Asakta batu siaku izo mybeke ta hyrity wa ihumo sakurētsa moziknaha, sihumo batu imyi.

Myzubaha kaharere bo hyŷ mykaranaha mozihihikik.

²¹ Kytsa abazubatsa ihumo sispirikporētsa maha – niy.

Iwa Deus sohokotsa Isaijas inarokota tubabatu Sesus soho ziwataha aba zuba atsatu my.

Kytsa Sesus Beresebuhu humo ihyrikoso sapybara ziksiwyhik mybarapetu nikaranaha.

²² Kyze kytsa maku ihyrizikubyita Sesus bo zioқтыhyryknaha. Ana humo kino iharerebyita ihyrikoso sapybara humo. Sesus zizororowy iwatahi inataharerezo, iwaze iktsazo niy. Tsakurēta niyzik.

²³ Hawa Sesus niy kytsa sizubarētsa paikpa iktsa nikaranaha. Nimypybybaiknaha. Asahi:

– Tozeka ja Deus zipehata, tozeka ja taparakta Dawi tsekoka – nikaranaha.

²⁴ Kyze Pariseutsa ana hi ziwabynahaze asa kino:

– O Beresebuhu Satanas usa naro hyrikoso sapybara pehatsa zikwy humo Sesus maku zizororowy. Izikwy humo hyrikoso sapybara nisipehaka – mybarapetu nikaranaha.

²⁵ Hawa ha humo mytsaty nikaranaha Sesus tsihyrinymyrēta. Iwaze ispe niy:

– Ityryktsa asa zuba niharapebakanaha zeka nepyknaha. Nawaze kytsa metutu niakmyinaha. Wahoro ezektsa moharapebakanaha zeka mopyknaha. Hyrikoso sapybara wahoro ezektsa watsa.

²⁶ Iwahatu Satanas tatyryktsa mysibaka zeka mopyk. Hyrikoso sapybara mysiksiwyhik zeka iwaze atahi metutu mozik iwaze mopyk. Batu sipehatsa my.

²⁷ Ikiahatsa iwa mybarapetu tsimykaranaha “O tahi Beserebu zikwy humo hyrikoso sapybara nisiksiwyhik” tsimaha niy. Utakta hyrikoso sapybara mysiksiwyhik zeka Beserebu humo ahatuktsa zinymyrykynahatsa ja. Aty zikwy humo sa atuk zinymyrykynahatsa hyrikoso sapybara mysiksiwyhiknaha. Iwatsahi atuk zinymyrykynahatsa pahawatawynaha, uta batu izikwy humo hyrikoso sapybara mysiksiwyhik ana humo pahawatawy. Ahatuk zinymyrykynahatsa niwatihi Satanas zikwy humo ba hyrikoso sapybara ziksiksiwynaha batu zikaha.

²⁸ Utakta Deus hyrikoso zikwy humo hyrikoso sapybara mysiksiwyhik. Utakta Deus zikpehata kytsa wata icyzik abaka Deus tyryktsa ahatuk mozumu ana humo hi ahahyrinymyrëtsa. Kytsa Deus harere bo botu hyÿ mykaranaha.

²⁹ Batu aty tohi tsipaikrëta wahoro bo mytsukze inamy piakse. Batu zik. Taparaka tsipaikrëta zikwaraka iwaze iwahoro bo mytsuk, inamy piakse.

³⁰ Aty batu katukta kabete batu yhÿ niy. Aty katy tsumuëhÿ byizeka kytsa Deus bo batu mysiockyhyryk atakta metutu myzapyk batu katukta.

³¹ Iwatsahi kytsa simysapybyitsa ty nikaranaha Deus mysiockzohik, siharerebyitsa ty Deus mysiockzohik. Aty zeka Deus hyrikoso pisapybyiki zeka ana hi Deus ba ziockzo. Atakta amy ty tisapyrëna “batu sapy” mykara Deus anahumo hi ba zikspiritsokdatawy batu zik.

³² Aty skaraba Deus zipehata soho pisapybyikinaha zeka ana kino Deus mysiockzohik, aty Deus hyrikoso humo pisapybyikinaha zeka ana kino Deus ba ziockzowy. Imysapybara ty tawahi kytsa tuk mynapykyryk ba ziockzowy ziknakara – Sesus niy.

Hwi wihara kino niwatihi nisispirikpoko.

³³ – Kyze hwi tisapyrëta zeka wihara bobatu zeka tisapyrëna. Hwi batu sapy my zeka wihara batu isapy. Wihara humo hwitsa soho tsinymyrynaha. Uta hwi tisapyrëta wata, hawa ha ty mykara tisapyrëta. Hawa ha ty mytsaty mykara wasani wihara tisapyrëna waha.

³⁴ Ikiahatsa pyryhyktsa watsa tsimaha. Pyryhyktsa batu simysapy maha. Ikiahatsa kino niwatihi ahaharere batu imysapy tsimaha. “Katsaktsa mysapyrëtsa tsimaha” mybarapetu tsimykaranaha. Iwa batu tyso tsimaha. Mysapyrëtsa tu zeka hawa ha ty wasani zuba mytsaty tsimykaranaha. Hawa kytsa mysitsumuëhÿnaha ana bo hi mytsaty tsimykaranaha. Atakta imysapybyita tu zeka amy ty batu sapy mytsaty mykara ana humo hi imysapybyitsa ty mykara. Hawa mytsaty tsimykaranaha ana hi tsimoziknaha.

³⁵ Mysapyrëtsa tu zeka isapyha ty mytsaty tsimykaranaha iwatsahi myharere tisapyrëna tsimaha. Atakta hwi tisapyrëta wata wihara niwatihi tisapyrëna my. Katsa mysapybyitsa tu zeka hawa batu mysapy mytsaty tsimykaranaha iwatsahi myharere batu sapy tsimaha. Atakta hwi batu sapy wata my, wihara niwatihi batu sapy my.

³⁶ Hana wa puruze Deus kytsa soho motsasoze abazubatsa Deus bo amy skaraba tahaharere nitsasonaha. Wastuhu tahaharere batu sapy ana soho Deus bo mopamykysonaha. Utsa tahaharere wasani ana soho Deus bo mopamykysonaha. Abazubatsa tahaharere soho Deus bo motsasonaha.

³⁷ Taharere humo Deus tihi: Sihareresapyrëtsa pe: “Ikia tsamysapyrëta” my. Sihareresapybyitsa pe: “Ikia batu amysapy” my. Iwatsahi aharere humo pykyhytutaha! – Sesus niy. – Hwi wihara batu metutu zikaha. Ikiahatsa ahaharere niwatihi batu metutu zikaha. Hawa mytsaty tsimykarana ana kino tsimoziknaha, iwa hỹ – niy.

Sizubarëtsa iwatahawya nizapykyknaha.

³⁸ Kyze asaktsa Deus harere zinymyrynahatsa Pariseutsa niwatihi Sesus pe:

– O myhyrinymyrykytsa, Deus zikwy mybo tsiwatawykta! Amy ty kytsa zikahabara ty tsimyktsa ana hi tsimyzihikiknaha – niaha.

³⁹ – Batu yhỹ niy. Abaktsa kytsa Deus harere bo batu ma zikaha. Kape tsimaha “Watahatykta” tsimaha. Batu yhỹ my. Tubabatu amy ty Deus zikwy Sonas bo niy ana hi pahawatawy ana humo kino pahahyrynymyryky.

⁴⁰ Sonas piknu puëtsikbyita hakoke eze niapykyryk harakykbyi zuru. Anawahi Deus zipehata wytyk eze harakykbyi hi puru.

⁴¹ Sonas Ninewe Ezektsa bo Deus harere nitsasokoze asaktsa: “O mysapybyitsa tsimaha. Imysapybara tsimoewynaha” niaha. Asaktsa hanawa puruze Deus kytsa mynasihyryzikipowynahaze abaktsa kytsa bo asahi ahape: “Batu wasani tsimaha. Ahamysapybyitsa tsimaha” maha. Ninewe Ezektsa Sonas nitsasokoze iwatsahi Deus harere bo hỹ nikaranaha. Abaktsa kytsa Deus wasaniha bo batu yhỹ zikaha. Utakta abazubata kaharere bo batu yhỹ zikaha.

⁴² Hanawa puruze Deus kytsa soho motsasoze Seba tyryktsa pehatsata atatsa mynahyryzipoze abaktsa kytsa pe: “Ikiahatsa batu ahamysapy tsimaha” my. Atatsa nokponi niukuru. Soromao harere tawaby. Tsihyrynymyryëta harere piwaby tsihikik. Soromao hyrynymyry baba tisapyrëna. Kaharere hi abazuba Deus wasaniha soho tisapyrënikia – Sesus niy.

Hyrikoso isapybara ziksizo.

⁴³ – Ihyrikoso sapybara maku ekze poize pitabaka zuba. Maku wahoro wata, atakta ihyrikoso sapybara sapy nikara. Hyrikoso isapybara tseheha bo pitabaka. Taty byryhabyita tu hana eze tabyrywy myziberiki.

⁴⁴ Iwaze tapetu isopyk:

“Piksizo. Nezeba maku ekze ikzoihik atabo hi piksizo” my. Kyze anasapy bozo. Zumuze batu ihyrikoso sapybara. Iwaze wahoro bo itsarawybyita wata. Tsiziurëna wahoro itsytsykyha niy. Maku wahoro wata niy.

⁴⁵ Kyze niparakzo. Hyrikoso sapybara nisihobykzo. Utsa bo, sete ispe my: “Panytaha! Katuk tsimahaktsa. Maku bo tsimaha” mykara. “Atakta anaeze mysapy ziknakara. Ibo pororo tsimykaranahaktsa! Ituk tsimypykyknaha” niy. Iwa hyrikoso sapybara simysapybyikitsa maku bo nisioktyhyryk. Maku tuk mynapykyryknaha.

Tapara maku batu iaku ihyrikoso sapybara estuba ituk. Abaka tisukat-sihikrëta babata iakubyikita hyrikoso sapybara oito humo. Iwa ikiahatsa niwatihi batu simysapy tsimaha – Sesus niy.

Sesus je itukytsa iwatsa ibo zumunaha.

⁴⁶ Iwaze Sesus myzubaha bo nipamykysokoze taje tukytsa kino niwatihi zumunaha. Batu ibo zikzumunaha, kytsa pokso ba zikzumunaha. Asahi:

– Katsaktsa Sesus bo tsimypamykyso tsihikiknaha – niaha.

⁴⁷ Iwaze tohi Sesus pe niy:

– Aje atukytsa niwatihi ape baze maha. Atuk mopamykyso tsihikiknaha – niy.

⁴⁸ Sesus:

– Aty skaraba kajebabatatsa hawa hatsa skaraba katuk kytsa babatsa – niy.

⁴⁹ Iwaze tatsyhyrype ty zinymyrykynahatsa nisiwatawy:

– Iktsa tsimahaktsa! Asahi kaje watatsa, sihumo kamypokzitsiarēta kaje watatsa mykara. Asaktsa katukytsa watsa, sihumo kamypokzitsiarēta katukytsa watsa mykara.

⁵⁰ Aty zeka kazo bijoikpe eze tu iharere bo zuba hyĩ mykara asahi kajebabaza katukytsa babatsa – Sesus niy.

13

Sesus nisihyrinymyryky mysipariknahaze ky soho.

¹ Kyze nawa zuruze Sesus wahoro eze zoi. Karireja pihikzotsabyri baze nidyhyky kytsa nisihyrinymyryky. Deus tyryktsa soho nisihyrinymyryky.

² Sizubarētsa ibaze niriktotohokonaha. Zihyritzabaiknaha. Iwaze tsaraha bo takoro, anaeze dyhy niy. Kytsa sizubarētsa zarape sak eze niriktotohokonaha iharere ziwabykynaha.

³ Nisihyrinymyry. Nipamykysoko atahi nisihyrinymyryky. Hawa kytsa mektsaktsa Deus harere humo maha, wastuhu iharere bo hyĩ nikaranaha ustsaktsa batu yhyĩ nikaranaha ana humo hi nisihyrinymyryky. Atahi:

– Kyze maku waratok bo niy. Atahi nisiparikik.

⁴ Nisiparikikze ske sak buruk wastuhu natsukunaha asaktsa piyktsa zukumunaha nisihorozukbaiknaha.

⁵ Iwaze mektsatu nisiparikikze harahareziktsa bo inatsukunahatsa. Iak-sukpe bete tu zipokonaha iwatsahi niakbabaiknaha harahareziktsa humo niakbabaiknaha.

⁶ Batu siharatatsaka. Iwatsahi niakbabaiknaha haramwe humo niakbabaiknaha.

⁷ Iwaze ustsata nisiparikikze inikoso bo hi inatsukurunaha. Tahaypykyknahaze, ini saha humo hi batu tahatypyk, niakbabaiknaha.

⁸ Iwaze ustsata riktsa jytykziuha bo inatsukunahatsa. Niahatsahi tahaypykyknahaze tahasuknaha nipopobaiknaha. Asahi niubaranahaze tirita riktsa. Ustsata niwatihi niubaranahaze sesēta riktsa. Ustsaktsa niubaranahababa sē riktsa. Sizubarētsa hiba riktsa ty siytyk tisapyrēna bo nisiparikik. Iwa hỹ.

⁹ Kaharere tsiwabynaha zeka wabyziutaha! – niy.

Hawa Sesus nisipirikpoko.

¹⁰ Kyze zinymyrykynahatsa ibo niaha. Asa zuba ibo nipamykysokonaha:

– Amy skaraba riktsa soho kytsa tsimisihyrinymyryky – niaha.

¹¹ – Deus kaharere ahabo piwatawy tsihikik pahahyrynimyry tsihikik. Deus tyryktsa soho pahawatawyky. Ikiahatsa kasoho ezytyk humo yhyĩ tsimaha. Deus tyryktsa tsimoziknaha. Ustsata batu. Iwatahi tsasohowy humo tsihyrinymyryky.

¹² Aty zeka kaharere tsikaeni zuba pinymyryky Deus ibo mopamykysotohi my. Atakta pihyrinymyrytsihik zeka mopamykysotohi. Aty zeka kaharere batu ihyrinymyry batu ihyrinymyry za. Batu amy tohi Deus ibo ba zikpamykysozo. Hawa ha ty botu zinymyry ana kino pispiriktsokda.

¹³ Iwatahi tsasohowy humo kytsa msihyrinymyry. Asaktsa iktsazuba maha batu sihyrinymyry. Piwabykynaha zuba batu sihyrinymyry. Kaharere bo batu yhyĩ zikaha.

¹⁴ Hawa Deus sohokotsa Isaijas tubabatu ziwatahaka atsatu mykaranaha. Atahi:
“Tsiwabykiknaha batu ahahyrynimyry hỹ.

Tsiksisuparaikiknaha batu ahahyrinymyry hỹ” niy.

15 Asaktsa kytsa batu simytsatyhy piwabynahaze tahaty spioki zuzuk sisopyk,

iwatsahi batu waby zikaha. Iwa hawa wasani abaka batu iktsa zikaha, hawa wasani abaka batu ziwabynaha.

Iktsaziu maha zeka hawa wasani mytsaty maha.

Piwabytoktokonaha zeka, simysapybyitsa ty mykaranaha pimoewy tsihikiknaha.

Iwaze Deus simysapybyri ty nikaranaha mysiokzohik iwaze mysizororowy – niy.

Iwa Deus sohokotsa Isaijas tubabatu ziwatahaka abaktsa kytsa soho, asahi kaharere piwabynaha zuba batu sihyrinymyry tsihikik.

16 – Ikiahatsa ahakurẽtsa tsimaha. Hawa motsasoko Deus tyryktsa soho tsipiwabytoktokonaha ahahyrinymyrẽtsa. Hawa mykara ana kino iktsaziu tsimaha ana humo hi ahahyrinymyrẽtsa. Iwatsahi ahakurẽtsa tsimoziknaha.

17 Kaharere tsiwabytoktonahaktsa! Tubabatu Deus sohokotsa, asaktsa Deus harere bo hỹ nikaranaha niwatihi hawa ikiahatsa tsiwabynaha ana kino ziwaby tsihikiknaha. Batu zikaha. Amy ty iktsa tsimaha ana kino ziny tsihikiknaha. Batu zikaha. Ikiahatsa hi kaharere tsinymyrykynaha. Ikiahatsa hi kabo iktsa tsimaha iwatsahi ahakurẽtsa tsimoziknaha – niy.

Hawa siriktsa soho ty mymyhyrinymyryky.

18 – Abaka wabytoktoktaha! Amy ty tsasohowy sipariktsa soho pahawatawy. Asaktsa kamyspirikpowy ezytyk humo hỹ maha zeka Deus tyryktsa moziknaha.

19 Aparakbaha Deus wasania ty piwabynaha. Asahi riktsa watsa ske sak bo inatsukunahatsa. Asahi Deus wasaniha piwabykynahaze Satanas sibo mozumuze Deus harere ziaксе. Kytsa sihyrinymyrybyitsatuze Satanas Deus harere ziaксе piyktsa hyrity watsa, iwatsahi Deus wasaniha humo batu sispirikpo.

20 Utsa Deus harere piwabykynaha. Asahi riktsa watsa asahi harahareziktsa bo inatsukunahatsa siharatatsa zuba byitsa watsa. Taparaka wasaniha ziwabykynahaze sakurẽtsa.

21 Iwaze riktsa wytyk supe bete inatsukunahatsa watsa asahi tsikaeni zuba zinymyrykynaha. Tsihokdaharẽna zeka Deus harere bo batu yhỹ zikaha, iharere humo nispiriktsokdanaha. Utsa kytsa Deus harere zimyi-jakanahaze Deus wasania ty zerekeknaha. Deus humo sispirikpobyitsa hi nikaranaha.

22 Utsa Deus harere piwabykynaha. Asahi riktsa hyrity watsa inikoso bo inatsukunaha. Wasaniha piwabykynahaze tahanamy bo zuba mytsaty mytsaty nikaranaha. Tahanamy mozihikiknaha zuba. Deus harere humo sakubyri zumunahaze ihumo batu sispirikpo. Asahi wihara waha batu jakuk.

23 Utsa Deus harere piwabykynaha. Asahi riktsa jytykziuha bo inatsukunaha hyrity watsa. Utsa kytsa Deus harere ziwabynahatsa watsa. Deus wasaniha piwabyziukunaha. Piwabynahaze iharere humo sispirikporẽtsa Deus harere bo hỹ mykaranaha. Iwatsahi wihara nijakuk. Wastuhu niubaranaha tirĩta riktsa. Utsa niubaranaha sesẽta riktsa. Utsa niubaranaha sẽ riktsa. Sizubarẽtsa hiba – niy. Deus tuktsa niwatihi iharere bo hỹ mykaranahaze simysapyrẽtsa moziknaha wihara nijakuk naha waha. Iwaze hawa kytsa Sesus ihyrinymyrywy ezytyk piwabykynaha iwaze tsihyrinymyryky.

Towahaditsa soho humo kytsa nisihrinymyryky.

²⁴ Kyze usa soho sibo nipamykysoko. Deus tyryktsa soho humo nisihrinymyryky. Sesus tihi:

– Maku tsuhuk bo riktsa nisiparikik. Tiriko riktsa tisapyrēna waratok buruk nisiparikik.

²⁵ Unata zurubanhaze isukyrytsa itsuhuk bo izumu. Kytsa papatu towahaditsa nisiparikik, tirikotsa tazahara buruk towahaditsa nisiparikik, nesepkyze ziksizo.

²⁶ Kyze tiriko zipokonahaze towahaditsa tuk zipokonaha. Tiriko towahaditsa tuk tayhapykyknaha.

²⁷ Iwaze tsumuēhītsa tsihītsa pe “O mypehakatsa riktsa tisapyrēna zuba atsuhuk eze tsiksiparikik. Hawa sa towahaditsa tiriko tuk taypyknaha” niaha.

²⁸ “Kasukyrytsa iwa niy, atahi towahaditsa nisiparikik” niy. Iwaze sitsumuēhītsa tihi:

“Towahaditsa sa tahaboboknaha” niy.

²⁹ “Batu. Towahaditsa tsimysiboboknaha zeka tirikotsa tuk tu tsimysiboboknaha byri tsinasiboboknaha. Siharatatsa tuk tu nisiakwarabaiknaha. Byriktsa!”

³⁰ Abaka niwatihi zitahapyknaha. Aibani tirikotsa muanahaze tu kytsa mysipurunaha. Ispe my:

“Tapara towahaditsa tysiboboknahaktsa! Tsimysiboboknahaze hāihāi tsimaha, izo bo tysioktsotsoknaha. Kyze tirikotsa tysipurunaha katirikododowytsa bo tysizezonaha” my.

Yh̄y niaha. – iwa Sesus tiriko soho towahaditsa niwatihi nitsasoko. Aty Deus harere bo hȳy mykara zeka tiriko watsa. Aty Deus harere bo yh̄y habyi zeka towahaditsa watsa my ana humo hi nisihrinymyryky.

Sirikbuzubyitsa soho humo nisihrinymyryky.

³¹ Kyze usa soho humo sibo nitsasoko. Deus tyryktsa soho humo nisihrinymyryky. Sesus tihi:

– Deus tyryktsa sirikbuzubyitsa watsa. Mostarada riktsa watsa niy. Maku waratok eze ziparikze.

³² Ziktsa buzubyitsa tuze ziponaha. Taypykze hwi puētsikbyita mozik. Tisarapatsazubarēta. Iwaze piyktsa isarapatsa bete tahasukuknaha – niy.

Iwa nitsasoko hawa Deus tyryktsa sizubarētsa moziknaha. Hawa mostarada nisiubara iwatsa Deus tyryktsa mysiubaraka.

Atsikara pytowy soho humo nisipirikpoko.

³³ Kyze Sesus usa soho humo sibo nitsasoko Deus tyryktsa soho humo nisihrinymyryky. Atahi:

– Deus tyryktsa atsikara pytowy hyrity waha. Wytyk tiriko tsizubarēna ty, iwaze ipytowy ty tsikaeni zuba tiriko eze nitsakyky iwaze napytoko. Abahi atsikara ziharazoko – niy.

Iwa nipamykysoko Deus tyryktsa soho. – Taparaka Deus tyryktsa hudikhudikwy eze estuba zuba. Aibani nanabyitaba kytsa Deus tyryktsa moziknaha – Sesus niy.

Taparaka iokpitsī hatuk anasoho hi kytsa mysihrinymyryky.

³⁴ Iwaze Sesus isoho tsizubarēna myzubaha bo nipamykysoko. Iwa Deus tyryktsa soho humo nisihrinymyryky. Kytsa nisihrinymyrykyze isoho humo zuba nipamykysoko.

³⁵ Iwa niyze hawa ha ty Deus sohokotsa tubabatu ziwataha atsatu nikara. Deus sohokotsa tihi:

– Uta isoho humo kytsa mysihyrinymyryky.
 Isuknihibyize Deus ispirikpowy iokpitsĩ
 abaka kytsa mysihyrinymyry isoho humo – niy.
 Deus sohokotsa, tubabatu ziwataha iwa Sesus atsatu nikara.

Hawaha towahaditsa soho humo nimyhyrinymyrykyzo.

³⁶ Kyze Sesus kytsa sizubarẽtsa nisierekze wahoro bo nitsuk. Zinymyryky-nahatsa ibo zumunaha. Ipe niaha:

– Hawa ha sa tiriko towahaditsa soho mybo tytsasoziu – niaha. Iwaze sibo nitsasoko.

³⁷ Aty wata ja:

– Tiriko riktsa itsuhuk eze nisiparikik utakta Deus zikpehata kytsa wata icyzik, tawata atakta riktsa nisiparikik, utakta Deus harere ty mysihyrinymyryky.

³⁸ Itsuhuk mybarawy ezektsa watsa. Tiriko riktsa tisapyrẽtsa Deus tyryktsa watsa ituktsa maha. Towahaditsa hi Satanas tuktsa watsa.

³⁹ Sisukyrytsitsa towahaditsa nisiparikik atakta Satanas hyrikoso sapybara pehaktsa watsa. Ziubara mybarawy nepykze wata astatu my. Asaktsa nisiubara mysipurunaha bijoikpe iknyktsa Deus tsumuẽhĩtsitsa watsa maha.

⁴⁰ Towahaditsa tysipurunaha izo bo tysioktsotsoknaha iwaze Deus Satanas tuktsa sinini ykarawy bo mysipehahik.

⁴¹ Utakta Deus zikpehata kytsa wata icyzik, utakta bijoikpe iknyktsa Deus tsumuẽhĩtsitsa mysipeha mybarawy ezektsa bo my. Asaktsa kytsa mysimiywynahatsa asahi simysapybyikitsa tu nikaranaha.

⁴² Izo bo tysioktsotsoknaha, sinini ykarawy bo tysipaparanaha. Anaeze nikmyinahatsa tahatsaputsa ty dydydy mykaranaha. Tahakyrikinaha humo mopuziukunaha.

⁴³ Iwaze kytsa Deus harere bo hyỹ mykaranaha wasani mykaranaha haramwe haneze watsa. Jekyríkoso watsa maha. Deus tuktsa soho “O ikiahatsa ahamysapyrẽtsa” my. Kytsa niwatihi sibo iktsa mahaze “O simysapyrẽtsa” mykaranaha. Deus tahazo tuk tahawahi mynapykyknaha – Sesus niy. – Kaharere tsiwabywaha zeka tsiwabytoktonaha – niy.

Maku tisapyrẽna tsipokzitsiarẽna zikaha naha humo nisihyrinymyrykyzo.

⁴⁴ Kyze Sesus usa soho humo sibo nitsasoko Deus tyryktsa soho humo nisihyrinymyryky. Atahi:

– Deus tyryktsa tisapyrẽna tsipokzitsiarẽna waha ty. Maku tsuhukze tisapyrẽna tsipokzitsiarẽna zikaha. Atsoko ziytykikzo ziokpitsĩhikzo. Tsakurẽta anamy tsizubarẽna okyrysaro humo zihuak. Iwaze itsuhuk tsihitsa bo, itsuhuk okyrysaro humo zihuakak iwaze tisapyrẽna ty tsipokzitsiarẽna ziaксе. Ikiahatsa Deus tyryktsa tsimyzihikiknaha zeka sakurẽtsa maku wata, atakta tisapyrẽna tsipokzitsiarẽna ziaксе niy.

Maku perora tisapyrẽnikia ty zuba ziaксе naha humo nisihyrinymyrykyzo.

⁴⁵ Kyze Sesus nitsasokozo:

– Deus tyryktsa maku wata atahi peroratsa ty ziaксе. Perora haraharezipyryktsa sipokzitsiarẽtsa. Perora tisapyrẽnikia ty zuba ziaксе tsihikik.

⁴⁶ Perora isapyrẽnikia zikahaze tanamy tsizubarẽna okyrysaro humo zihuakak iwaze perora isapyrẽnikia ziaксе. Perora humo tsakurẽta my. Ikiahatsa ahakurẽtsa iwatsa Deus tyryktsa tsimoziknaha.

Tõhõryk soho humo nisihyrinymyrykyzo.

⁴⁷ Kyze Sesus Deus tyryktsa tõhõryk waha my. – Piknutsa tõhõryk bo sasabyitsa sizubarẽtsa piknutsa inapupukunaha.

⁴⁸ Inahareknahaze piknutsa hokyktsitsa nimyra eze nidyhydyhykynaha. Piknutsa nisinykynaha sisapyrētsa ty nataba sisapybyitsa ty natabaha niaha. Piknutsa sisapyrēnikitsa ty ka peryk bo nisipupukunaha. Piknutsa sisapyby-itsaktsa ty ka nisipaparakanaha.

⁴⁹ Mybarawy mopykze iwa my. Bijoikpe iknyktsa Deus tsumuēhītsitsa mozumunaha. Kytsa simysapyrētsa asaktsa Deus harere bo hyỹ mykaranaha Deus bo mysioktyhyryknaha. Simysapybyikitsa kino niwatihi metutu mykaranaha.

⁵⁰ Simysapybyikitsa izo bo mysioktsotsoknaha sinini ykarawy bo maha. Anaeze simysapybyikitsa tahatsapu ty dydydy mynakaranaha. Tahakyrik-inaha humo mynapuziukunaha – niy.

Ibyky harere tsiwabynaha, hawa ha ty abaka harere tsiwabyynaha ana humo kino tsinymyrynahaktsa kytsa.

⁵¹ Kyze Sesus tuk zinymyrykynahatsa pe niy:

– Kaharere ja tsinymyrynaha – niy.

Yhỹ niaha.

⁵² – Kyze niwazuba asaktsa zinymyrykynahatsa babatsa Deus tyryktsa tuk sihyrinymyrykytsa moziknaha. Wahoro tsihitsa watsa, anamy zozowy eze wahoro Ezektsa bo nyny my. Iwata sinymyrykytsa kytsa bo mysihyrinymyrykynaha. Hawa ty botu ziwabynaha Moises harere mysihyrinymyrykyzo kaharere ezytyk humo kino niwatihi kytsa mysihyrinymyryky aba zuba anasoho piwabykynaha – niy. De.

Sesus Nasare eze.

⁵³ Sesus nitsasobaze anaeze niparak.

⁵⁴ Nasare bo niukuru anaeze hi taypykyryk naha bo zumu. Deus wahoro bo nitsuk. Anaeze kytsa nisihyrinymyryky. Ihumo sipybyrētsa. Asa tihi:

– Atakta hawa zinymyryky. Hawa myhyrinymyrywy babaha ja. Aty ja zispirikpoko. Amy ty kytsa batu zikaha ana ty hi mykara. Aty zikwy sa ituk mynapykyryk – niaha. Iwa asa zuba nipamykysokonaha.

⁵⁵ – Hwitsa bikitsa tse ja. Hawa skaraba Maria ije. Hawa skaraba Tsiaku, Sudas, Soses, Simaõ ahatsa itukytsa maha.

⁵⁶ Ituk kykyryk mytuk mopykyryknaha ja. Iwaze izikwy ihyrinymyrywy babaha iwa hana eze sa zinymyryky – nikaranaha. Iwatsahi ihumo batu sispirikpo.

⁵⁷ Ihumo kyze ky sisopyk. Sesus ispe niy:

– Nanabyitaba kytsa Deus sohokotsa harere piwabynaha. Atakta tahudikhudikwy eze tuze ka batu wasani zikaha. Tawahoro Ezektsa tu zeka batu wasani zikaha. Itukytsa tukze ka batu wasani zikaha – niy.

⁵⁸ Sesus Nasare eze tu zikwy batu watawy. Amy ty kytsa batu zikaha Nasare eze tu batu zik. Kytsa ihumo sispirikpobyitsa tu iwatahi zikwy batu watawy.

14

Suão Batista hyrikosokdawy.

¹ Iwaze Erodes Karireja Ezektsa pehakatsa Sesus soho ziwaby. Sesus zikwy humo nikara amy ty kytsa batu zikaha izikwy humo nikara ana ziwaby.

² Iwaze Erodes tatsumuēhītsitsa pe:

– O atahi Suão Batista, inahyrikpoko iwatahi tsizikwyrēta amy ty kytsa batu zikaha ana ty hi mykara – mytsaty ahabyi nikara.

³⁻⁴ Tapara Suão Erodes pe niy:

– Ikia Deus harere humo batu hỹ tsimy. Deus harere humo usta oke ba ziakse. Ikia ja. Atsy oke Erodias tsiakse iwatahi Deus harere bo batu yhỹ tsimy. Batu wasani tsimy – nikara. Ana harere humo Erodias takyriki. Kyze Erodias sodadutsa pe:

– Suão tyzioktyhyknaha! Sakyriukrēnikitsa hurukwy bo tytsahurukiknaha. Anaeze tsipawaranaha – niy.

Hyỹ niaha. Iwa hỹ.

⁵ Erodias Suão zibeze tsihikik. Kytsa Sudeutsa humo batu zik. Kytsa Suão soho:

– O atakta Deus sohokotsa my – nikaranaha. Iwatahi Erodias batu tybeze, kytsa mymyhudizunaha pokso.

⁶ Iwaze Erodias ipurukwy zumuze mytsaty nikaranaha. Tummy tsizubarēna nikymynahaze. Imyikaha humo tummy tsizubarēna nikymynahaze sizubarētsa siakzohotsa huahua niaha. Sizubarētsa imyikaha bo zumunaha. Erodias hi Erodias oke my. Atatsa ste tsarawybara bo kytsa okze nikariki. Kytsa sakzohotsa okze nikariki atatsa humo nakokonaha.

⁷ Iwaze Erodias ihumo tsakurēta iwatahi ipe niy:

– Amy tsimyzihikik kabo tsimyzapyky zeka atatu abo nyny my – niy.

⁸ Kyze Erodias tatsapusare tsihikik. Suão harere humo iwaze tatsa taste pe:

– Suão harek ty tuzapykyky – niy. Iwaze ije harere humo atatsa tihi:

– Suão Batista harek ty kabo nyny tsimy. Aidy mypewy eze iharek ty kabo nyny tsimy iwaze nihyrikosokda my iwahi mozihihikik – niy.

⁹ Kyze Erodias tisukatsihikrēta. Sudeutsa ihumo ba ziktahakyrinaha. Iharek Deus bo nitsaso, anaharek sakzohotsa okze niwatihi nitsasoko, ana ty kino mytsaty nikara.

¹⁰ Iwatahi sodadu pe:

– Suão Batista harek ty bokokik ty! Sakyriukrēnikitsa hurukwy bo tsimy anaeze isoik buruk bokokik ty. Iharekty kabo wabehyrykty – niy.

¹¹ Yhỹ niy. Suão Batista harek ty bokokik mypewy eze korohyk niy, niy tahi atatsa bo wabehyryk niy. Kyze atatsa taje bo nyny niy.

¹² Kyze Suão zinymyrykynahatsa zumunaha sakyriukrēnikitsa hurukwy bo zumunaha inury zuba ziytyknaha. Iwaze nitururuknaha Sesus bo zumunaha. Hawa niy Sesus bo nipamykysonaha.

Sesus kytsa sizubarētsa nisidisahawiky.

¹³ Sesus Suão soho ziwabyze niparak. Pihikzotsabyri bo. Iwaze ituktsa tuk tsaraha bo kokorohyk, jerukbara bo koikny niaha, batu aty tohi isapy bo niaha. Kytsa sizubarētsa isohowy zinymyrykynaha iwatsahi, – O Sesus bo tupaktsa! – niaha. Iwaze ibo hara taba niukurunaha. Zitabakanahatsa tu jerukbara bo tapara zumunaha.

¹⁴ Kyze Sesus tsaraha nipoze kytsa sizubarētsa bo iktsa niy. Sihumo tsimypokzitsiarēta iwatahi simyitsapyritsa nisizororowy.

¹⁵ Nubaze zinymyrykynahatsa ituk nitsasokonaha:

– O Sesus, abaka punubaka batu mydisahawiky. Tykara eze ka batu mydisahawiky. Kytsa tysipehakta! “Ahahudikhudikwy boktsa! Ahadisahawy tyzebykyknahaktsa” tsimy – niaha.

¹⁶ – Kyzekta nabytykara ezetu. Ikiahatsa hi sidisahawy ty sibonyny tsimaha! – niy.

¹⁷ – Katsa zuba atsikara mytsyhyry wa zuba piknutsa kino petok zuba tsimaha, iwaze kino ke ba nawatsatu ba zik mydisahanaha – niaha.

¹⁸ – Ana ty hi kabo wabehyryk tynaha – niy.

Yhỹ niaha.

19 Iwaze Sesus sizubarëtsa pe:

– Dyhy dyhy tahaktsa! Parakbaha dyhy dyhy tahaktsa! – niy.

Hyÿ niaha. Towahaditsa sisapyrëtsa bete tahadyhydyhykynaha. Iwaze atsikara ty piknutsa ty iwahaty okok niyze bijo bo iktsa niy. Deus pe:

– Ikia humo ka mykurëtsa – niy. Atsikara zitsakze zinymyrykynahatsa bo nyny niy. – Sibó nyny tahaktsa! – niy. Kytsa bo zibiakaknahaze tsizubarëna niyzikik nyny nikaranahaze kino hawa zuba ja nikara. Piknutsa kino niwatihi, sizubarëtsa nisisukniwy.

20 Kyze kytsa tihi:

– O tsikmyksorokbanaha – nikaranaha. Tahadisahabanahaze itsatsakyhy ha jerehe peryktsa eze zipukpukunaha dose peryktsa zinymyrykynahatsa inasihareknaha.

21 Kytsa, sïko miutsa tahadisahakanaha. Wytykyryk sihyrytsa iwatsa sizubarëtsa tahadisahabanaha. Abazuba hiba.

Sesus pihik tsiksukpe buruk niukuru.

22 Kyze aidy Sesus tuk zinymyrykynahatsa pe:

– Tsaraha boktsa! Kaharaze pihikzotsabyri koikny typunahaktsa kytsa! Bykyze pomo – niy.

Yhÿ niaha. Zinymyrykynahatsa pihik koikny zitsikzanaha. Iwaze Sesus kytsa sizubarëtsa nisipeha:

– Ahawahoro bo tsiksinahaktsa! – niy. Nitururuknaha.

23 Kytsa sizubarëtsa nitururukbanahaze Sesus tapetu isopyk:

– Kazo bo mopamykysoko. – Kyze hara bo nido. Deus bo nipamykysoko. Zunubakaze ata zuba Deus bo nipamykyso.

24 Kyze zinymyrykynahatsa pihik tsikpukteze, ziturikinahaze zopoktsa nabybyknaha. Pihik iheridawy hyrity waha niyzik zopoktsa humo.

25 Zokorobyitu Sesus sibó zumu. Miwa botu kytsa pihikzotsabyri tsikpukteze sibó niukuru. Pihik tsiksukpe buruk niukuru.

26 Sibó zumubanize sipybyrëtsa nikaranaha. Sesus pihik tsiksukpe buruk niukuru tapokso kakaik niaha, sipybyrëtsa nikaranaha:

– O myhyrikoso ja – nikaranaha.

27 Sesus tihi:

– Ahapyby byihu ja! Ahapunihikrëtsaktsa kytsa! Uta hiba – niy.

28 Iwaze Peduru tihi:

– O mypehatsa ikia hehÿ my zeka kape:

“Pany! Kabo pihik tsiksukpe buruk tynaukta” tsimy – niy.

29 Sesus tihi:

– Pany pãoty – niy. Iwaze Peduru tsaraha ekze niparak, Sesus bo pihik tsiksukpe buruk niukuru.

30 Kyze zopoktsa bo iktsa niyze tsipybyrëta iwaze asiba niharazuk:

– O kapehatsa katy paikty – niy.

31 Atsoko Sesus itsyhyrype humo paik niy. Iwaze Sesus ipe niy:

– Amy pokso tsapybyrëta “Sesus batu kamypokzitsiuk” tsimy. Amo skaraba kaharere humo batu aspirikpo. Zopoktsa pokso tsapybyrëta – niy.

32 Tsaraha bo kokokorohyk niahaze zopoktsa pyk niaha.

33 Zinymyrykynahatsa tsaraha eze tu:

– Batu aty tohi pihik tsiksukpe buruk zitaba iwaze ikia zuba Deus tse babata. Ikia humo mykurëtsa hÿ – niaha.

Kenasere eze simyitsapyritsa nisizororowy.

34 Kyze pihikzotsabyri koikny niaha. Byu niahaze Kenasere bo niaha.

³⁵ Kenasere ezektsa Sesus zinyinahaze paikpa nitsasokonaha. Siotutsa pauktsitsa pe:

– Panytaha! Ahamyitsapyritsa Sesus boktsa! – niaha. Iwaze kytsa simyitsapyritsa Sesus bo nisioktyhyryknaha.

³⁶ Sizikeditsa ipe:

– O asuk tsihara humo paik tsimaha zeka mykurëtsa – niaha.

Yhÿ niy.

Iwaze asaktsa Sesus suk tsihara humo paik niahaze nisizororowy. Simyitsapyritsa sizubarëtsa nisizororowybaik.

15

Sesus Sudeutsa sopykwy humo nisihyrinymyry.

¹ Kyze wastuhu Pariseutsa Moises harere humo zinymyrynahatsa kino niwatihi Serusarëhe ikny nitururuknaha. Sesus bo zumunahaze ipe niaha:

² – Atuk pinymyrykynahatsa taparaktsa myzotsa sopyk humo batu yhÿ nikaranaha. Tapara tahatsyhyrype piknaha iwaze tadisahanaha. Taha ty tsyhyrype pik byizeka ba zik tahadisahanaha. Asahi taha ty tsyhyrype pikbyitsa tu ziknatahadisahakanaha iwa taparaktsa harere bo batu yhÿ ziknakaranaha. Batu sapy – niaha.

³ – Ikiyahatsaktsa ja. Ikiyahatsa niwatihi Deus harere bo batu yhÿ zikaha tahanymyrywy humo zuba yhÿ tsimykaranaha. Batu sapy my Sesus niy.

⁴ Deus ahape niy:

“Ahazotsa humo tysipokzitsikinahaktsa! Ahazo ahajeza humo kino niwatihi wasani ahasopyk. Atakta tazotsa mysisapy byizeka tysibaik” Deus niy.

⁵ Ikiyahatsa kytsa pe tihi:

“O kazo kaje kaokyrysaro ty ahabo nyny mykara. Ana okyrysaro ty Deus bo nyny my iwa zeka ba zahatsumuëhÿ” – tsimaha.

⁶ Anaty hi tsimytsasokonahaze kytsa bo tsipimyikinaha. Kytsa tahanamy tahazotsa bo pibiak tsihikiknaha. Ahahumo hi batu nyny maha. Iwatsahi ikiyahatsa humo kytsa niakmyinaha.

⁷ Ahamyspihikbatarëtsa Deus sohokotsa Isaijas inarokota tubabatu aha-soho ziwatahaka. Hawa ha ty ziwataha wasani. Deus harere tihi:

⁸ – Asaktsa kytsa ziharawatakanahatsa watsa

“O Deus harere bo zuba hyÿ tsimykaranaha” – mybarapetu nikaranaha.
– Kaharere bo batu yhÿ niaha.

Hawa ha bo mytsaty nikaranaha mektsatu niy, iwatsahi kaharere bo batu yhÿ.

Iwaze ziharawatakanahatsa watsa.

⁹ Hawa ha ty kabo nitsasokonaha asahi batu ma zikaha. Asahi:

“Myharere hi Deus sopyk atsatu maha” iwa kytsa bo mybarapetu mykaranaha – niy.

Batu ba tahaharere zuba nitsasokonaha Deus sohokotsa Isaijas Pariseutsa soho tubabatu iwa ziwataha.

Hawa mytsaty tsimykaranaha pykyhytutaha.

¹⁰⁻¹¹ Kyze Sesus sizubarëtsa bo huahua niy. Izumubanahaze ispe niy:

– Wabyziutaha! Iwaze tsinymyrynaha. Amy ty maku hauk myze ana humo hi ba zikmyi. Batu disahawy humo Deus okzeka imysapybyita niyzik. Batu ba. Hawa ha ty motsasoko, iharere batu mysapy motsasoko zeka ana humo hi Deus okzeka imysapybyita mozik – Sesus niy.

¹² Kyze ituk zinymyrykynahatsa ibo zumunaha:

– Pariseutsa aharere humo batu siakparawy ana kino tsinymyryky ja – niaha.

¹³ Iwaze Sesus ispe niy:

– Pariseutsa hyrinymyrywy iparikihi haratatsa watsa. Hawa kytsa iparikihi haratatsa watsa mysibobokonaha batu iakubarahi zibobokok naha humo anawata Deus sihyrinymyrywy nepyk, batu iharere humo hawa asahi mytsaty nikaranaha zuba. Iwatahi Pariseutsa hyrinymyrywy nepyk.

¹⁴ Pariseutsa sihyrizikubyitsa watsa. Ihyrizikubyrita usta ihyrizikubyrita ske piwatawy zeka petoktsa mynaranaha. Sihyrizikubyitsa petoktsa wytyk hoke bo mynaranaha. Pariseutsa siwahatsa, kytsa bo mybarapetu mykaranaha iwatsahi Pariseutsa humo amy ty wasani batu hỹ mykaranaha. Iwaze asaktsa Pariseutsa ty arekektaha! – niy.

¹⁵ Kyze Peduru tihi:

– Asoho hawa tsipihauknaha mybo tytsaso – niy.

¹⁶ – Ikiahatsa ja. Ikiahatsa myzubaha watsa kasoho batu ahahyrinymyry.

¹⁷ Kytsa tadisahakanahaze siworozik bo zuba tasapy. Bykyze pikaranahaze hana bo ja.

¹⁸ Amy ty batu imysapybara ty kytsa mozihikiknaha ana soho mytsaty ziknakaranaha, ana humo hi simysapybyitsa niyziknaha.

¹⁹ Kytsa amy ty batu imysapy mytsaty mykaranaha zeka atsatu mykaranaha. Hawa mytsaty mykaranaha humo kytsa pibeze tsihikiknaha, ustsá okeza piakse tsihikiknaha, ustsá kytsa mysiwo tsihikiknaha ustsá namy piakse tsihikiknaha sitsyhyryboarẽtsa moziknaha. Kytsa mysimiwynaha sisoho mybarapetu mykaranaha. Siharerewabymybarẽtsa moziknaha hawa mytsaty mykaranaha batu imysapybara humo.

²⁰ Ana humo hi kytsa batu simysapy maha, Deus okzeka simysapybyitsa mykaranaha. Kytsa ba zik tahatsyhyrypetsa piknaha Deus okzeka mahani. Asahi ipe: “O ikia zuba tsamysapyrẽnikita” maha. Iwa Deus bo mopamykysokonaha – Sesus niy. De.

Sesus Sudeubyitatsa ste zizororowy.

²¹ Iwaze Sesus Tiro bo niparak. Sidõ bo kino niwatihi.

²² Kyze wytyk anaezektatsa Sudeubyitatsa tu ibo zumu. Atatsa kakaik niy. Atatsa tihi:

– O kapehatsa Deus zipehata Dawi tsekokatsa kahumo tsimypokzitsiarẽta. Kaste sinini mynakara, ihyrikoso sapybara pokso atakta pororo ziknakara iwatatsahi sinini mynakara.

²³ Sesus batu iharere ty batu tyso. Zinymyrykynahatsa ipe:

– O amy sa myzapykyky ikia atatsa bo nyny tsimyzeka bykyze ipe: nabo pãoty tsimy. Atatsa myhapik ka mynakara batu pyk aha.

²⁴ Iwaze Sesus:

– Utakta Deus zikpehata Sudeutsa bo zuba asaktsa hozipyrykza watsa batu siperynymyryhy, nizaranahatsa watsa maha, iwa hozipyrykza watsa.

²⁵ Atatsa ana kino ziwabyze ibo izumu, iokeryk taekaratsa humo puruk puruk niy – O kapehatsa ikia amysapyrẽnikita tyziktsumuẽhĩ ky – niy:

²⁶ Sesus:

– Tapara kytsa hyrytsa zitadisahakanaha bykyze zuba kytsa disahawy tsihirik ty tsikuparinitsa bo nyny maha. Tapara sidisahawy ty tsikuparinitsa bo nyny my zeka batu sapy my. Isopyksapybyitsa. Ihyrytsa hi tapara tysidisahawynaha – niy.

²⁷ – O kapehatsa wasape tsiky. Ikia Sudeutsa bo hỹ. Katsaktsa Sudeutsabyitsa tsikuparinitsa watsa, amy ty Sudeutsa ty tsihik byizeka katsaktsa yhỹ

tsimaha. Tsikuparinitsa zipyryktsa mesa hwitsabihi pukezi tu asahi sit-satsakyhy arehe ty tahadisahakanaha. Itsatsakyhy inatsukunahaze ana ty hi tsikuparinitsa zipyryktsa tahadisahakanaha katsa kino niwatihi amy ty Sudeutsa batu yhy zikaha katsaktsa yhy tsimaha – niy.

²⁸ – Aharere wasani my. Kahumo aspirikporētatsa iwatatsahi awahoro boktsa! Aste pizororowy ihyrikoso sapybara botu iksiwyhik hana bo ja. Aste tsakurētatsa hy – Sesus niy. Iwa hy.

Sesus sizubarētsa nisizororowy.

²⁹ Kyze Sesus niparak Karireja pihikzotsabyri sak bo niukuru. Kyze hara bo nido anaeze nidyhyky.

³⁰ Kytsa sizubarētsa ibo izumunaha. Siekbyritsa, sihyrizikubyitsa, siharebyitsa, simyiziubyitsa simyitsapyritsa sizubarētsa iwatsa nisioktyhyryknaha, Sesus paukbaze isty dyhy dyhy niaha.

³¹ Sesus nisizororowyba. Kytsa ihumo sipybyrētsa. Pāozikahabyitsa zitabazonaha, sihyrizikubyitsa iktsazo nikaranaha, simyiziubyitsa nizororobanaha, siharebyitsa nipamykysozonaha kytsa ana bo iktsa niahaze sipybyrētsa. Ana humo hi Deus bo:

– Ikia Isareu Deus my, ikia zuba Deus babata ahumo mykurētsa – nikaranaha.

Sesus sizubarētsa nisidisahawyo.

³² Kyze Sesus ituk zinymyrykynahatsa bo huahua niy:

– Panytahaktsa! Utakta sizubarētsa humo kamypokzitsiarēta. Harakykbyihi katuk zurunaha, batu sidisahawyky niaha. Ispe my zeka: “Tsiksinahaktsa kytsa ahawahoro boktsa” iwa zeka taharapatsapyrispyk ske buruk mynarahana iwatahi batu isty peha siwahoro bo. Tapara sidisahawy ty sibo nyny tsimaha – niy.

³³ – Hawa skaraba tsimaha. Batu aty tohi sidisahawy ty sibo nyny my. Jerukbara eze batu mydisahawyky. Katsaktsa ba ziksitsumuēhinaha.

³⁴ – Hawa skaraba atsikara – niy.

– Nawa, usta tsyhyry humo petok sete atsikara niaha. Piknutsa zipyryktsa kino batu sizuba – niaha.

³⁵ Kyze Sesus kytsa sizubarētsa pe:

– Wytyk humo dyhy dyhy taha! – niy.

³⁶ Iwaze atsikara sete aha ty okokyk niy, piknutsa zipyryktsa kino niwatihi nisibykyk iwaze Deus pe:

– Ikia humo ka mykurētsa tsimaha. Ikia hi mydisahawy ty mybo nyny tsimy – niy.

Iwaze atsikara zitsakze zinymyrykynahatsa bo nyny niy. Piknutsa zipyryktsa kino niwatihi nyny niy.

– O kytsa bo sidisahawy ty nynyta! – niy. Sizubarētsa bo zibiakaknaha tsizubarēna ty nyny nynyzo niaha. Ziubarawy.

³⁷ Bykyze kytsa:

– O mysorokrētsa – niaha. Tahadisahabanahaze itsatsakyhy arehe zipupukunaha. Peryktsa bo pukpuk nikaranaha. Iwa sete peryktsa bo zipupukunaha.

³⁸ Kytsa abazubatsa. Kwatero miu ahatsa kytsa, tahadisahakanaha wytykyryk sihyrytsa ahatsa kino niwatihi iwatsa tahadisahakanaha.

³⁹ Iwaze Sesus ispe niy:

– Ahawahoro bo tsiksinaha – niy. Iwaze ziksikinaha. Ziksibanahaze tsaraha bo takoro Makadã bo niy.

16

Siwatawytsa nizapykykynaha.

¹ Kyze Pariseutsa asaktsa Moises harere sihyrinomykynahatsa, Sadusitsa kino niwatihi Sesus bo zumunaha. Sispirikpobyitsa tu ibo nizokparakanaha. Sesus Moises harere bo batu yh̄y mozihihiknaha iwatsahi nizokparakanaha. Niharapebetsakaknaha. Iwa ipe:

– Deus zikwy mybo tsiwatawykta watawy tsimy zeka Deus zapeha iwa katsa tsipinomyrynaha – niaha.

² Sesus tihi:

– Nubaze bijoikpe tsaririha mozik zeka “O byri hyritsik ba zik nawō” tsimaha.

³ Miwa botuze bijoikpe tsaririha zatata mozik zeka “O aba hyritsik nawō” tsimaha. Wasani tsimaha. Bijoikpe iwatawy humo ahahyrinomyrētsa. Abaka amy ty mykara ana kino batu ahahyrinomyry, kawatahawu batu ahahyrinomyry.

⁴ Abaktsa kytsa iwatawywy piberikinaha asahi simysapybyikitsa Deus harere bo batu yh̄y nikaranaha. Kape tsimaha “Iwatawy tsimykta” tsimaha. “Batu h̄y” my. Tubabatu amy ty Deus zikwy ziwatawy Sonas bo niy, ana kino pahawatawy ana kino pahahyrinomyry – niy. Sesus niparak asa zuba niriktotohokonaha.

– *Pariseutsa, Sadusitsa niwatihi sihyrinomyrywy humo pykyhytutaha!* – *Sesus niy.*

⁵ Kyze Sesus tuk zinomyrykynahatsa tuk Karireja pihikzotsabyri koikny niaha. Zinomyrykynahatsa tahadisahawy humo nispiriktsokdanaha.

⁶ Sesus ispe niy:

– O pykyhytutaha kytsa! Pariseutsa Sadusitsa niwatihi simihipytowy humo pykyhytutaha! – niy.

⁷ Iwaze asa zuba nipamykysokonaha:

– Ana hi nitsaso atsikara humo batu tywabehyk – mytsaty ahabyitsa nikaranaha.

⁸ Sesus siharere humo tsinomyrēta iwatahi ispe niy:

– Hawa ha ty skaraba tsimypamykysokonaha. “Katsaktsa atsikara awani iwatahi anapytowy soho nitsaso” tsimaha. Ikiahatsa kahumo batu ahaspirikpoziu, “Sesus myhumo batu tsimypokzitsiuk” tsimaha.

⁹ Amy skaraba batu tsihyrinomyrykynaha. Deus zikwy kabo nyny niy ana bo hi ikiahatsa botu iktsa tsikaha iwatsa tu kahumo batu ahaspirikpo. Hawa ha ty botu ikykara tsihikzotsokdanaha ja. Atsikara mytsyhyry tsawata zitsaktsakze kytsa abazubatsa “s̄iko miu ahatsa” bo nyny iky. Hana wa ja itsatsakyhy jereheha ty peryktsa bo tsipupunaha – niy.

– Dose peryktsa tsiknasihareknaha – niaha.

¹⁰ – Atsikara sete zitsaktsakze kytsa abazubatsa kwatero miu ahatsa bo nyny iky. Hana wa ja itsatsakyhy jereheha ty peryktsa bo tsipupunaha – niy.

– Sete peryktsa tsiknasihareknaha – niaha. – Ana soho tsikspiriktsokdanaha ja – Sesus niy.

¹¹ – Amy humo kaharere anapytowy soho batu ahawabyhy. Amy humo batu ahahyrinomyry h̄y. Iktsasokoze Pariseutsa Sadusitsa niwatihi anapytowy humo pykyhytutaha atsikara soho batu tyso sihyrinomyrywy soho pykyhytutaha iky, sihyrinomyrywy anapytowy waha my – niy.

¹² Kyze itsaso Pariseutsa Sadusitsa kino niwatihi anapytowy ty batu atsikara soho, sihyrinomyrywy ana soho pykyhytutaha ispe niy. Hawa

anapytowy humo atsikara inawerekbaik anawaha sihyrinymyrywy kytsa mysimiwynaha. Aba zuba sihyrinymyrëtsa iharere ziwabyziukunaha.

Peduru Sesus pe – Ikia hi Deus tse babata – niy.

¹³ Iwaze Sesus tuk zinymyrykynahatsa tuk Sesareja Piripi hudikhudikwy bo zumubahaninahaze Sesus ispe niy:

– Kytsa kasoho paikpa nipamykysokonaha. Utakta Deus zikpehata kytsa wata aty skaraba kahumo maha – niy.

¹⁴ – Wastuhu “O ikia hi Suão Batista” mykaranaha. Ustsaktsa “ata hi Erias” mykaranaha. Mektsaktsa “ikia Seremias” mykaranaha “tozeka ja usta Deus sohokotsa” mykaranaha – niaha.

¹⁵ – Ikiatsa ja. Aty skaraba uta ahaokze ka – niy.

¹⁶ Kyze Simaõ Peduru tihi:

– Ikia hi Kiristu Deus tse babata. Ikiakta Deus koikny bakta tu zapeha – niy.

¹⁷ – O Simaõ Suãotse ikia tsakurëta hÿ. Deus zatsumuëhÿ. Anaharere kasoho kytsa humo batu ahyrinymyry. Deus kazo bjoikpe eze tu anaharere zahyrinymyry. Uta Kiristu Deus zikpehata, ata hi zawatawy hÿ.

¹⁸ Uta kino ape Peduru my ikia hi harahare wata my. Hawa ha ty botu nitsaso Deus hi zawatawy ana kino katuktsa sakurëtsa moziknaha. Hawa wahoro tisapyrëna my harahare humo, katuktsa sakurëtsa moziknaha ahare humo wasani. Satanas hyrikoso sapybara niwatihi katuktsa tuk myharape pehakanahaze batu kazikwy humo simyiwu.

¹⁹ Aty moparak zeka myhyrizikpyryrykwytsa ty mekta botu nyny my atahi wahoro perytsa. Atawata ikia katuktsa mysipokzitsiki asahi kawahoro wata. Deus tuktsa sopyk sisoho “wasani tsimaha zeka” wasani hÿ. Sisopyk soho “batu imysapy” tsimaha zeka batu imysapy hÿ. Deus hi ahaharere soho “wasani” my – niy.

²⁰ Iwaze Sesus tuk zinymyrykynahatsa pe – Utakta Kiristu. Abaka ana ty hi kytsa bo soso byitaha! – niy.

Sesus tabzewy soho nitsasoko iwaze tahyryzikpowy soho niwatihi nitsasoko.

²¹ Kyze Sesus tuk zinymyrykynahatsa bo hawa mohyrikosokda soho mypubara ty nitsasoko. Iharere batu tsihokdharëna. Atahi:

– Uta Serusarëhe bo my. Anaeze Sudeutsa sistsaikbatsa, taparaktsa Deus wahoro zubata eze ziknapamykysokonahatsa, iwatahatsitsa iwatsa piksukyrykynaha. Sinini mykara. Kytsa pikbezenaha. Iwaze petok puruze Deus mynahyryzikpowy – niy.

²² Iwaze Peduru Sesus ziokyhyryk. Atazubata tu zibetsakak ipe niy:

– Awatu tykta! Ana humo kino abo batu mykara, ikia hi batu sinini tsimy iwatahi anatyhi batu tyso – niy. Iwa zibetsakak.

²³ Sesus Peduru bo iktsaziu niy. Zipehahik:

– Nabo päoty Satanas. Ikia Deus harere bo batu yhÿ tsimy, hawa kytsa mytsaty mykaranaha ana bo hi yhÿ tsimykara. Ikia kape:

“O kytsa pikbezenahaze batu yhÿ tsimy” iwatahi tsikykniki ikia harahare wata ske zihiza – Sesus niy.

²⁴ Kyze Sesus tuk zinymyrykynahatsa pe:

– Aty katuk babata mozihikik zeka. Atakta pibytuhukutu ta humo tu mospiriktosokda, amy ty imysapybyri kino pimoewy. Pibytuhukutu kytsa pahasapybyikinaha yhÿ tsimaha Deus pokzi sinini tsimykaranaha mohyrikosokdata wa. Hawa sinini mykara atakta niwatihi katuk babata

mozik zeka kawata sinini mynakara. Iwatsahi tsikymynahaktsa kytsa! – Sesus niy.

²⁵ Sesus tihi:

– Aty “O utakta ba zikyrikosokda iwaze Sesus harere bo batu yh̃ iwaze kytsa ba zikbezenaha” my. Atahi Deus tuk batu tawahi mynapykyryk niy. Atakta hiba katuk babata tu kahumo sinini my zeka atakta Deus tuk tawahi mynapykyryk – niy.

²⁶ – Atakta tanamy zuba mytsaty mykara zeka atahi ihyrizikararawy Deus tuk batu tawahi mynapykyryk atahi tisukatsihikrēta mozik. Tanamy tsizubarēna nizihikik, anahi zihokzaba. Tahyrizikararawy kino niwatihi mohokda, batu amy tohi sihumo ba zikwak.

²⁷ Utakta Deus zikpehata ahawata myziksizoze kazo zikwy tuk mynasik, bjoikpe iknyktsa Deus tsumuēh̃tsitsa niwatihi katuk mynasiknaha. Hawa skaraba kytsa nikaranaha mybarawy eze zikzurukunahaze sisoho motsaso. Asaktsa hawa ha ty wasani nikaranaha “O ahamysapyrētsa” my. Asaktsa simysapybyitsa nikaranaha. “O ikiahatsa batu ahamysapy” my. Iwa kytsa bo motsasoko.

²⁸ Kaharere bo wabytoktoktaha! Ikiahatsa tazaharaeze tu sihyrikosokda byize tu tapara Deus pehatsa ahawata parakbaha moziknaha ana bo iktsa maha, Deus tyryktsa bo pinynaha bykyze mohyrikosokdanaha hawa ha ty iktsaso wasani my ana bo kino iktsa maha – Sesus niy.

17

Moises Erias iwatsa Sesus bo inatakanaha.

¹ Iwaze seis ziharamuze Sesus Peduru, Tsiaku itsy Suão iwatsa nisioktyhyryk. Utsa zinomyrykynahatsa nitarenaha. Iwaze asaktsa harakykbyitsa iapik hara bijobonita bo nidokoknaha. Asa zuba Sesus tuktsa hara bijobonita bo niaha.

² Sesus tuktsa ibo iktsa niahaze meky watu tahyryty. Iok haramwe wata niyzik. Tisukbarazarēta okoroze waha niyzik. Katsaktsa ibarazabaharēta batu inyhuk.

³ Ibaze kytsa petoktsa natakahanaha. Erias, Moises ahatsa, tubabatu nihyrikosokdanahatsa, ituk nipamykysokonaha.

⁴ Iwaze Peduru:

– O mypehatsa katsa ahumo mykurētsa tsimykaranaha. Nabytykareze tu tsimytarenaha. Hawa tsimyzihikik zeka ahaparik tsipizinaha harakykbyihi ahaparik tazi, estuba ikia bo, estuba Moises bo, iwaze usta Erias bo iwa – niy.

⁵ Nipamykysokoze atsoko haramwe zihiza bjo satata haramwe zihiza naikny Deus yksoho ziwabynaha. Atahi ispe niy:

– Atakta katse babata ihumo ka kakurēta h̃y. Iharere tsiwabytoktonaha! – niy.

⁶ Zinomyrykynahatsa anaharere ziwabynahaze sipybyrētsa niyziknaha. Sipybyrētsa wytyk bo inarahanaha.

⁷ Sesus sibo zumuze isty tuzu tuzu niy.

– Kyiktaha! Ahapyby byihu ja! – niy.

⁸ Bjo bo iktsa niahaze Sesus bo zuba nikozonaha.

⁹ Iwaze hara jobonita ekze inasikzonahaze Sesus:

– O jaba tsiknynaha ty ka ja kytsa bo ka soso byitaha. Byi puētsik utakta Deus zikpehata kytsa wata mohyrikosokdaze mynahyryzikpoze ana zuba kytsa bo tsimypamykysonaha – niy.

Yh̃ niaha.

¹⁰ Kyze zinomyrykynahatsa pe:

– Katsakta asoho Kiristu Deus zipehata tsimy yh̄y tsimaha. Amy humo asakta Moises harere sihyrinomyrytsa tihi: “Tapara Erias myziksizo bykyze zuba Kiristu mozumu”. Amy humo Erias aharaze izumu. Siharere ty mybo tsipiwatawy – niaha.

¹¹ – “Wasape” nikaranaha. Tapara Erias mozumuze hatsa ty ezytyk tisapyrēna mokymyky, atahi kaharaze zizokzikik.

¹² Aba ahape Erias botu izumu kytsa ity batu sinyhy. Sisukyrytsitsa zimyijakaranaha zibezena. Utakta Deus zikpehata ahawata ikyzik iwata sinini my piksukyrikiknaha – niy.

¹³ Kyze zinomyrykynahatsa sihyrinomyrētsa niyziknaha. Sesus Erias soho batu tyso, Suão Batista Erias wata isoho nitsaso.

Sesus jypykyhyzytykta zizororowy.

¹⁴ Iwaze Sesus Peduru, Suão, Tsiaku ahatsa iwa ustsā zinomyrykynahatsa bo ziksizonaha. Kytsa sizubarētsa bo zumuzonaha. Iwaze maku estuba Sesus okeryk taekaratsa humo puruk puruk niy.

¹⁵ – O myhyrinomyrytsa katse humo amypokzitsiukta! Atakta iakmyita sinini mykara izo bo naoktsok inarahaikik pihik bo niwatihi inaharazuzukikik ziknakara, iwatahi tsizororowy.

¹⁶ Atuk zinomyrykynahatsa bo ikzioktyhyryk batu tyzororowy – niy.

¹⁷ Sesus tihi:

– O katuk tsinomyrykynahatsa ikiahatsa Deus humo batu ahaspirikpo. Kaharere bo batu yh̄y tsimaha. Iwatsa tu ahatuk mynapykyryk Deus zikwy bo iktsa tsimaha kytsa batu isty tsumuēh̄i iwatahi ahahumo batu kaku. – Iwaze maku pe:

– Pany atse kabo tyzioktyhyk – niy.

Yh̄y niy.

¹⁸ Tatse Sesus bo zioktyhyrykze Sesus ihyrikoso sapybara pe:

– Nabo pāoty! – niy. Taharere humo ihyrikoso sapybara ziksiwyhik itse nizororo tsakurēta niyzik.

¹⁹ Kyze asazubaze zinomyrykynahatsa ipe:

– Amo sa katsa myhumo ihyrikoso sapybara ty batu tyiksiwyhik – niaha.

²⁰⁻²¹ Sesus ispe niy:

– Deus humo tsikaeni zuba ahaspirikpo iwatsahi hyrikoso sapybara ba zikponaha. Deus humo puētsik ahaspirikpo zeka ihyrikoso sapybara tsimysisukewyhiknaha. Deus humo tsimyspirikpotohinaha zeka amy ty tsimyzapykynaha zeka atsatu ahabo nyny my. Iwa zeka hara jobonita pe. “Nabo pāoty!” tsimaha zeka. Ahaharere humo moparak Deus humo tsimyspirikpotohinahaze batu amy tohi ihokdaha. Tsizubarēna ahaharere bo hȳy maha – niy.

Sesus tabzewy soho nitsasokozo.

²² Kyze Karireja eze Sesus tuk zinomyrykynahatsa nisihyrinomyryky:

– Utakta Deus zikpehata ahawata ikyzik aibani kasukyrytsitsa pikbezenaha.

²³ Pikbezenahaze petok puruze mynahyryzikpo – niy.

Iharere humo sisukatsihikrētsa niyziknaha.

Sesus Deus wahoro zubata eze tsinieru zibykyknahatsa bo nyny niy.

²⁴ Kyze Sesus tuk zinomyrykynahatsa niukurunaha. Kaparanaū zumunahaze Deus wahoro zubata okyryrsaro bykyktsitsa Peduru pe niaha:

– Ahyrinomyrykytsa Deus wahoro zubata okyryrsaro ja bykyktsitsa bo nyny my – niaha.

²⁵ Yhỹ niy.

Wahoro bo nitsukze Sesus ipe niy:

– Simaõ Peduru aty sa kytsa sipehatsa bo okyrysaro ty nyny maha. Situkytsa ja. Bipyritsa ja. Amy soho bo mytsaty tsimykara – niy.

²⁶ – O bipyritsa zuba – niy.

– Niwazuba! Sipehatsa tahatukytsa siokyrarsaro ty sibo batu nyny maha niy. Iwaze situkytsa okyrysaro ty batu nyny maha. Iwatahi utakta Deus tse babata okyrysaro ba nyny zeky, iwatahu okyrysaro ty sibo nyny my.

²⁷ Katsa bykyktsitsa mysoho “O asaktsa Deus harere batu ma maha” nawa batu tyso. Iwaze pihikzotsabyri bo tsimykta! Amyzowy ty pihik bo tu tsimyze taparababa piknu tsimyzezota. Isake ty zokbare tsimyze tsinieru isake eze tsimozikaha, ana ty hi mytsyhyryze Deus wahoro zubata bykyktsitsa bo nyny tsimy – niy. Hyỹ niy. Iwa hỹ niy.

18

Aty sa myhyrizikwanita Deus tuk niy.

¹ Iwazebabatu zinymyrykynahatsa Sesus bo zumunaha. Ipe niaha:

– Aty skaraba imyhyrizikwani Deus tyryktsa tuk – niaha.

² Iwaze kyry bo huahua niy. Ibo zumuze situk niriktohoko. Sesus zebyk.

³ – O zinymyrykynahatsa kaharere bo wabytoktoktaha! Ikiahatsa kino tawa kyrywa zeka anawahi mozihikik. Jabasta zotsa pe: “Ma” nikaranaha. Amy ty sizotsa mozihikiknaha atsa tu nikaranaha siharere humo, iwa Deus harere bo hyỹ tsimaha iwaze Deus tyryktsa tsimoziknaha. Iwa ma ahabyizeka Deus tyryktsa ba zikyzykna – niy.

⁴ – Aty Deus harere bo hyỹ my atahi jabasta wata. Hawa sizotsa jabasta zipehaka aty tohi Deus myzipehaka atahi Deus tyryktsa tuk myhyrizikwanita mozik – niy.

⁵ – Aty jabasta humo tsimypokzitsiukrẽta, atahi kaharere bo hyỹ my, ihumo kakurẽta. Utakta ihumo kakurẽta Deus kino niwathi tsakurẽta. Atahi mybarawy bo zikpeha – niy.

Imysapybyiwy mykara ana hi pimoewyze Deus piokzo.

⁶ Jabyitsa kahumo sispirikporẽtsa, aty mysimiywy zeka iwaze kahumo batu sispirikpo atakta imysapybyita mykara. Harahare ty pisoikañaha iwaze pihik maporik bo tapapykik anaeze moharazukik anatyhi batu sapy my. Atakta jabasta imyitsihikik sinini ykarawy bo pipeha anaeze tawahi mynapykyryk, atahi imysapybyikita babata.

⁷ Asaktsa ustsa kytsa mysimiy tsihikiknaha Deus sinini ykarawy bo pipehahik. Kytsa kahumo sispirikporẽtsa batu siakparawy iwaze mysimiy tsihikiknaha. Aty kytsa mysimiy tsihikiknaha atahi Deus sinini ykarawy bo mysipehahik.

⁸ Amy ty atsyhyrype humo imysapybara ty mozihikikze atsyhyrype ty iykykykty.

Hana bo apyry imysapybara ty tsimoparak tsihikze pão pãobyity apyry ty iykykykty! Deus tuk tawahi tsimypykyryk zeka atsyhyrype estuba zuba iwaze apyry estuba zuba niwathi ana kino wasani. Ikiahatsa apyrytsa petoktsa atsyhyrypetsa petoktsa iwaze Deus sinini ykarawy bo papeha zeka ana bo hi wasanibara bo tsipasapy. Anaeze izo napokorok ba zikbe.

⁹ Amy ty imysapybara ty bo iktsa tsimy iwaze tsimyzihikik iktsa iktsabyity. Ahyrizik ty hyrykokik ty. Deus tuk tawahi tsimypykyryk zeka ahyrizik estuba zuba wasani. Ikiahatsa ahyriziktsa petoktsa tsimaha zeka iwaze Deus

sinini ykarawy bo papeha zeka ana kino wasanibara bo tsipasapy. Anaeze izo napokorok ba zikbe.

Hozipyrykza nizarata soho nitsasoko.

¹⁰⁻¹¹ – Pykyhytutaha! Jabastsa humo tsipiwabykynaha! Batu tyso. “O asak-tsa siharereharëtsa” tsimaha. Bijoikpe iknyktsa Deus tuk mopykyryknaha Deus ispe: “Jabastsa humo tysipokzitsikinahaktsa” niy. Iwatsahi jabastsa mynasiperykynaha.

– Sesus nisihrinymyrykyzo. Iwaze hozipyrykzatsa tsihitsa myraratsa humo tsimypokzitsiukrëta.

¹² – Hozipyrykzatsa tsihitsa, sê sizubarëtsa hozipyrykzatsa my, estuba myzara zeka hawa sa my. Utsa ty ka arek niy, hara buruk zitahadisa-hakanaha iwatahi nizarata hapik niukuru. Nizarata piberiki tyberi beri wasani ibo zuk niy.

¹³ Myzikahazoze tsakurëta niyzik. Ustsaktsa batu zara, iwaze nizarata humo tsakurëta.

¹⁴ Iwatahi ahazo bijoikpe ezekta. Jabyitsa estuba ba zikzara – niy. – Deus hozipyrykza tsihitsa wata, aty Deus harere bo yhÿ habyi zeka izarata wata jabastsa hozipyrykzatsa watsa ahazo estuba zuba ba zikzara hozipyrykza nizarata watsa. Kytsa iharere bo hyÿ maha mozihihik – niy.

Atukytsa pasapybyinaha zeka hawa sa tsimy.

¹⁵ – Kyze Sesus tukta pasapy byizeka ituk tsimypamykysokonaha petok zuba typamykysonahaze imysapybara ty ibo tsipiwatawyky. “Amysapybyi ty tytsaso tsimy” tsimaha. Aharere bo yhÿ my zeka wasani my. Atakta “O uta batu kamysapy my kasapybara ty pimoewy” my. Iwaze ata hi Sesus tukta babata iwatsahi ahakurëtsa tsimaha.

¹⁶ Abo batu yhÿ my zeka ustsas Sesus tuktsa atuktsa mysioktyhyryk. Ibo mysapybara soho tsimytsasokozo. Hawa tsimyzeka Deus harere bo hyÿ tsimy. Iharere tihi:

“Maku pisapybyize batu ta zuba zikumu ustsas kytsa aharere piwabynaha. Utsa kytsa anaharere piwabynaha amy ty wasani zuba mopamykysokonaha iwa ustsas kytsa pokso batu mybarapetu maha.” Iwaze amy ty wasape zuba kytsa motsasonaha – niy.

¹⁷ – Atakta maku ahaharere bo yhÿ ahabyizeka imysapybara humo ka iwaze Sesus tuktsa ziknapykyknahatsa bo tsimytsasoziunaha. Kyze Sesus tuktsa maku pe: “O ikia amysapybara ty batu moewy” maha. Atakta maku Sesus tuktsa harere bo batu yhÿ my zeka ahaokze ka Sudeutsabyitsa ahasopyk ispirikpobyita tu okyrysaro bykyktsa ahasopyk.

Hawa ahamybetesanikitsa ahasopykwy motsasonaha.

¹⁸ Iwaze ahape:

– Sesus tuktsa tahasopyk tyhi nikaranaha sisoho “wasani tsimaha zeka” wasani. Deus niwatihi ahaharere wasani my. Utsa Sesus tuktsa tahasopyk tyhi nikaranaha sisoho “batu imysapy” tsimaha zeka batu imysapy. Deus niwatihi ahaharere soho wasani my – niy.

¹⁹ – Pahahyrinymyrykyzo mybarawy ezektsa petoktsa zuba amy ty Deus bo myzapykykynaha atsa ty ty mytsaty mykaranaha iwaze Deus kazo siharere piwabytokto amy ty myzapykykynaha atsatu sibo nyny my.

²⁰ Katuktsa petoktsa harakykbyihi niwatihi mynakypyknaha zeka kahumo simypokzitsirëtsa, Deus bo myzapykykynahaze uta sipauk baze mynapykyryk – niy.

Usta maku takyrize hawa ja piokzohik.

²¹ Peduru Sesus baze babatu ipe niy:

– O mypehatsa! Usta atukta kabo piksapybyriki zeka hana wa ja piokzohik. Imysapybyita tuze sete mykara zeka nawa ha sa piokzohik – niy.

²² – Ba sete humo tsipiokzo tsimynakara. Imysapybara ty watu tsipiokzoikik.

²³ Kyze Sesus usta soho humo nipamykysoko. Deus tyryktsa soho humo nisihrinomyry. Hawa kytsa simysapybyikitsa tu nikaranaha sibo mysiokzoikiknahaze tu nisihrinomyryky. – Kyze ipehakatsa tapetu isopyk:

“Katsumuēhītsitsa hawa sa mykaranaha sibo iktsa my. Sihyrikzokzawyttsa ty pykyhytu maha zeka iktsa myze” niy.

²⁴ Ana hi pikomyze kytsa tsumuēhītsa estuba ibo ziockyhyryknaha. Atakta okyrysaro tsizubarēna ziake, tsizubarēna hỹ, iwatahi ana hi ziserezo.

²⁵ Atakta ipehakatsa bo batu tyserezo batu ziky. Iwaze ipehakatsa kytsa pe:

“Atakta, taoke ty, tahyrytsa ty, iwatsa mysioktyhyryk katsyhyryze piktsumuēhĩkĩnaha kyze inamy tsizubarēna zeka okyrysaro humo tyzihuaknaha! Iwaze okyrysaro ty kabo nyny tynaha hawa ziake zeka piserezo” niy.

²⁶ Iwaze atakta ipehakatsa iokeryk taekaratsa humo puruk puruk niy. Ipe niy:

“O kapehakatsa kahumo tsikpokzitsikta! Ahyrikbarasorokokta aokyrysaro ty ka abo nynyrezo my” niy.

²⁷ Iwaze ipehakatsa ana harere ziwabyze imypokzitsi zumu. Atahi: “Okyrysaro ty kabo tysizotykwatatu mahani ziky” niy.

²⁸ Iwaze maku zoihik. Niparakze usta itukta tsumuēhītsa zihobyk. Atakta okyrysaro tsikaeni zuba ibo zisirezo. Iwaze isoik humo nizobatsik zisoikzyzyky. “Okyrysaro ty kabo tysizotykwabo nynyty” niy.

²⁹ Kyze atakta okyrysaro tsikaeni zuba zisirezo iokeryk taekaratsa humo puruk puruk niy. Atahi:

“Ahyrikbarasorokokta! Aokyrysaro ty abo nyny my” niy.

³⁰ “Batu! Abaka kaokyrysaro ty kabo nyny tsimy” niy. Iwaze okyrysarobyita hi sakyriukrēnikitsa hurukwy bo ziockykyryk. Nyny zikybyikita pe:

“Anaeze tutare. Kaokyrysaro ty kabo nyny tsimyze tu tsimyzoizo” niy.

³¹ Kyze ipehakatsa usts tsumuēhītsitsa maku itukta zipehahik sakyriukrēnikitsa hurukwy bo okyrysaro tsikaeni humo zuba iktsa niahaze tahakyrikinaha. Iwaze sipehakatsa bo niaha. Hawa ja nyny zikybyikita soho ibo nipamykysokonaha.

³² Iwaze ipehakatsa tihi:

“Nyny zikybyikita kabo tyzioktyhykta!” niy. Izumuze ipe:

“O ikia iakmyita! Okyrysaro ty nynyhabyita tu mahani iky. Ikspiriktsokda ahuak ty kabo batu nynyrezo. Tsikzapykykze ahuak ty mahani iky. Ikia ja.

³³ Amo sa atukta humo kawata batu amypokzitsiu. Utakta ahumo kamy-pokzitsiarēta ikykara iwatahi ikia kino atukta humo amypokzitsiarēta tsimy ikia batu kawata tsimykara” niy.

³⁴ Ipehakatsa ihumo takyriki. Iwatahi kytsa pe “Atakta maku sakyriukrēnikitsa hurukwy bo tyoktyhyryktaha! Ihuak ty kabo nynyrezo my zeka myzoik anaeze sinini mynakara” niy. Deus ahasapybyitsatu tsikykaranaha pahaokzohik iwaze ikia usts kytsa simysapybyikitsa tu nikaranaha tsimysiokzohiknaha niwatihi.

³⁵ Iwa Sesus nipamykysoko:

– Kazo bijoikpe eze tu nawa ahasopyk my. Ikiahatsa ahatukytsa simysapybyikitsa tu nikaranaha isty okzo byizeka kazo niwatihi ahamysapybyitsa tu

tsikykaranaha batu pahaokzo – Sesus niy. Iwatsahi ustsya kytsa simysapybyikitsa tu nikaranaha tsimysiokzohiknaha.

19

Sesus myoke moewy soho humo nisihyrinymyryky.

¹ Sesus nisihyrinymyrybaze Karireja ekze niparak. Sudeja bo buburu Sorodão inarokota koikny zitsikza.

² Kytsa sizubarëtsa iapik niukurunaha, asaktsa simyitsapyritsa nisizorowryba.

³ Kyze wastuhu Pariseutsa ibo zumunaha. Asaktsa Sesus nizokparakanaha Sesus Moises harere bo batu yhÿ ana hi mozihikiknaha iwatsahi piwabytoktonaha. Kyze ipe niaha:

– Maku taoke moewy zeka Deus harere bo ja yhÿ my – niaha.

⁴ Sesus ispe niy:

– Deus harere humo tsahahyrinymyrëtsa. Taparaka Deus mybarawy nizukni maku wytyk ahatsa nisisukni. Nisisuknize maku wytyk piakse zeka iwahahi Deus mozihikik.

⁵ Iwatsahi kytsa tahazotsa bara botu tahasapynaha, tahaoke tuk zuba tahasapynaha. Isukzata batu ata zuba mozuru harapetok mozurukunaha.

⁶ Iwatsahi Deus okzeka estuba zubata wata my. Deus tihi petoktsa nisisukni iwatahi batu aty tohi sibo ziky. Batu aty tohi zipyriryky. Ustsya kytsa okeza ziknasipyrirykynaha zeka iwa metutu mykara – niy.

⁷ Kyze Pariseutsa:

– Yhÿ Moises harere ziwatahaka maku taoke perek tsihik zeka tapara atatsa soho papeu humo piwatahaka. Atahi:

“Utakta kaoke perekek abaka ikia batu kaoke tsimy.” Bykyzehu atatsa perekek za niy. Moises iwa niy iwatahi maku taoke zerekek niy – niaha.

⁸ Sesus:

– Batu. Moises ana kino ziwatahaka hawa Deus mozihikik humo batu yhÿ tsikaha. Ikiahatsa tsikauktsinaha, hawa Deus mozihikik batu yhÿ tsikaha hawa ha Deus mozihikik mybarawy nizuknize batu ahawabyhy.

⁹ Abaka ahape:

Aty taoke pimoewy zeka papeu ty atatsa bo nyny my, papeu tyhi “Utakta kaoke pe: ‘nabo pãoty!’ ” my ana hi batu mysapy my. Atatsa mekta botu zeka iwaze tabarikta perek zeka yhÿ my. Iwaze maku atatsa pe: nabo pãoty wasani za. Aty mektatsa botu tasukza zeka Deus iozeka imysapybyikia ty mykara.

¹⁰ Iwaze zinymyrynahatsa.

– Aharere bo yhÿ tsimaha zeka tsihokdaharëna, iwatsahi katsa mysukza byizeka wasani my, katsa zuba tsinapykyryknaha – niaha.

¹¹ Sesus ispe niy:

– Kytsa kaharere bo yhÿ maha zeka tsihokdaharëna batu sizuba pinymyrykynaha. Deus hyrikoso zuba kytsa kaharere mysihyrinymyryky.

¹² Wastuhu kytsa sihyrytsabyitsa humo batu tahasukza niaha nipupurukunahaze iwa niaha. Ustsya kytsa sihyrytsabyitsa humo kytsa sirikara ezektsa bobokohotsa iwatsahi ba zik tahasukzanaha. Ustsya kytsa Deus tsihyryze batu tahasukzanaha. Tapara Deus tsumuëhikĩ iwatsahi batu sisukza tsihik. Deus zuba kaharere ty kytsa mysihyrinymyryky. Aty kaharere bo yhÿ my iwaze ba ziksukza wasani mykara. Asaktsa kaharere tsihokdaharëna zeka iwatsahi tahasukzanaha wasani mykara naha niwatihi – Sesus niy.

Sesus jabyitsa aha niy.

¹³ Kyze wastuhu kytsa tahahyrytsa Sesus bo nisioktyhyryknaha.

– O Sesus myhyrytsa humo paik tsimyzeka mykurëtsa. Deus bo sityhyryze tsimypamykyso zeka tisapyrëna my – niaha. Batu ibo zuk niaha. Sesus tuk zinymyrykatsa sisakparëtsa sizotsa nisibetsakaknaha.

– O nabo tsiksizonahaktsa! – nikaranaha.

¹⁴ Sesus ana humo ziwabyze takyriki.

Sesus:

– O batu “Nabo tsiksizonahaktsa!” batu tahaktsa! Jabyitsa uta kabo tynasioktyhyryknahaktsa! Deus tyryktsa jabyitsa watsa. Jabyitsa kino: yhÿ sisopyk. Jabyitsa watsa zeka, Deus pe: yhÿ tsimaha. Deus pe: yhÿ ahabyi zeka ityryktsabyitsa tu – niy.

¹⁵ Sesus sihyrytsa nisibykyk sihumo paik niy. Sipokzi Deus pe:

– O sihyrytsa tysipokzitsikikta kazo! – niy.

Tsinamyrëta Sesus bo zumu.

¹⁶ Iwaze mykyryburukta Sesus pauk baze rikto, ipe niy:

– Myhyrinymyrykytsa. Hawa sa mykara iwatahi mohyrikosokdaze uta Deus tuk kawahi mynapykyryk – niy.

¹⁷ Sesus ipe niy:

– Hawa amy ty tisapyrëna soho tsikzapykyky. Deus zuba tsimysapyrëta. Deus tuk awahi tsizasapy tsihikik zeka iharere bo hyÿ tsimykara, Moises hyrinymyrywy bo yhÿ tsimykara – niy.

¹⁸ – Moises hyrinymyrywy bo yhÿ mynakara – niy.

Sesus tihi: – Ba zibezenaha. Mektsa okeza ba ziksipyryryknaha. Usta namy ty hyryk hyryk byitaha. Kytsa soho ba zikspihikbataka.

¹⁹ Azotsa humo awatu ty atukytsa tysipokzitsiki. Aotutsa pauktsitsa humo tynasipokzi tsihikik awata tynasipokzitsiki! – niy.

²⁰ – Uta jabasize tu aharere humo wasani ziknakara. Amo tohi my, usta harere bo yhÿ – mykyryburukta niy.

²¹ – Tsimysapyrëta tsimyzihikik zeka anamy ty nynybaik anamy ty okyrysaro humo huak ty! Iwaze aokyrysaro ty sinamybyitsa bo nynybaik tsimy iwaze anamy hi bjoikpe eze tu tsimy. Anamy hi mynapykyryk ikia Deus tuk tsimynapykyryk. Bykyze Pany! Kapikta tynao – niy.

²² Ana harere ziwabyze tisukatsihikrëta niyzik. Tsinamyrëta hi tanamy pokzi tsiwy tuk batu yhÿ niy iwatahi batu iaku. Sesus pauk baze tatu niparak.

²³ Iwaze Sesus tuk zinymyrykynahatsa pe niy:

– Sinamynikitsa humo ka Deus tyryktsa moziknaha tsihokdaharëna. Asaktsa tahanamy bo zuba mytsaty mykaranaha, iwatsahi Deus harere bo hyÿ maha humo tsihokdaharëna. Katukta babata mozik tsihokdaharëna.

²⁴ Tsihokdaharëna sirara kamero inarokota mysukwowowy ispioke buruk mytsuk. Uta ahape tsinamyrëta Deus harere bo hyÿ mynakara iwaze katukta babata mozik ana hi abazuba tsihokdaharëna – niy.

²⁵ Zinymyrykynahatsa ana ziwabykynahaze sipybyrëtsa. Sinamyrëtsa Deus bo yhÿ aha byizeka batu aty tohi iharere bo yhÿ my.

– Batu aty tohi Deus bo yhÿ mynakara itukbabata za. Batu aty tohi Deus bo myzioktyhyryk ja – mytsaty ahabyi nikaranaha.

²⁶ Sesus:

– Kytsa asazubaze Deus harere bo hyÿ ana kino batu zikaha. Deus tuk batu amy tohi ihokdaha. Ba hawa tohi zikzukninaha, atahi kytsa mysitsumuëhÿ iwatsahi iharere bo hyÿ maha.

²⁷ Kyze Peduru tihi:

– Katsa mynamy tserekbaiknaha ikia tuk tsimyzurukunaha. Hawa Deus mymypsapywyky – niy.

²⁸ Kaharere wasani my. Wabytoktotahaktsa!

– Hawa Deus pahasapywyky ahabo motsaso. Utakta Deus zikpehata ahawata ikyzik mybarawy bo mynasikzoze kytsa mysipeha, ikiahatsa katuk ahadyhywytsa bete modyhydyhynaha. Sizubarëtsa katuk mysipehakanaha mybarawy ezytyk eze Isareu siparakbahatsa dose mysipehaka ikiahatsa tsiktsumuëhĩnaha – niy.

²⁹ – Aty tawahoro perek zeka katukta mozik, atakta Deus wasaniha humo tispirikporëta babata. Atahi abaka sē sizubarëtsa wahoro ty nyny mykara. Iwata aty tazikeditsa myserekek zeka tatukytsa, taje, tazo, tahyrytsa iwatsa kapokzi myserekba zeka katukta babata mozik. Utsa zikeditsa watsa nyny my. Aty tatsuhuk perekek zeka kapokzi katukta babata mozik usta ty itsuhuk ty nyny my. Deus baze tawahi mynapykyryk. Isapyhaty ibo nyny my.

³⁰ Sinamyrëtsa tihi:

“O katsaktsa myhyrizikwanitsa Deus tyryktsa tuk tsimaha” mytsaty ahabyi mykaranaha. Batu. Sinamybyitsa tihi:

“O katsaktsa myhyrizikwybyitsa zuba tsimaha” mytsaty ahabyi mykaranaha. Asahi myhyrizikwanitsa Deus tyryktsa tuk maha – Sesus niy.

20

Hawa duabohotsa pariktsitsa sitsumuëhĩtsa humo nikara.

¹ Sesus usa soho nipamykysokozo. Hawa Deus isapyha ty ityryktsa bo nyny my ana soho humo nisihyrinymyry. Atahi:

– Miwa botu maku duabohotsa tsihitsa kytsa bo niy.

² Iwaze kytsa pe:

“Duabohotsa sukpesapy humo tahaktsa! Kyze haramwe punubaze ihuak ty okyrytsaro ty ahabo nyny my” niy. Yhỹ niaha. Iwaze duabohotsa bo niaha.

³ Nazotokokoze ustsya kytsa bo asahi niriktohokonaha zuba. Ispe niy:

⁴ “Duabohotsa sukpesapy humo tahaktsa! Haramwe punubaze ihuak ty okyrytsaro ty ahabo nyny my” niy. Yhỹ niaha. Iwaze duabohotsa bo niaha.

⁵ Iwaze niparak. Duabohotsa tsihitsa tokbaha astatu niy. Tykboze astatu niy. Utsa kytsa duabohotsa sukpesapy humo nikaranaha.

⁶ Nubaze niparakzo. Kytsa zihobyk asaktsa niriktohokonaha zuba. Ispe niy: “Amo skaraba tsimyrriktohokonaha zuba” niy.

⁷ “Batu aty tohi mype ‘Katsyhyryze sukpesapy humo tsimaha’ iwatsahi tsipiperykynaha zuba” niaha. Tsihitsa ispe niy: “Duabohotsa sukpesapywy humo tahaktsa!” niy. Yhỹ niaha. Iwaze duabohotsa bo niaha.

⁸ Haramwe zunubakaze duabohotsa tsihitsa itsumuëhĩtsa huahua niy. Ipe: “Kytsa duabohotsa sukpesapy humo mykaranahatsa bo huahua tykta! Ihuak ty okyrytsaro ty sibo nyny tsimy. Tapara asaktsa kytsa nubaze izumunaha. ‘Asahi tapara siokrytsaro ty sibo nyny tsimy’ ” niy. Hyỹ niy.

⁹ Iwaze asaktsa kytsa nubaze zuba duabohotsa bo zumunaha, sitsumuëhĩtsa bo zukzuk niaha. Estuba estuba zuba ihuak ty okyrytsaro ty sibo nyny niy.

¹⁰ Taparaktsa kytsa asaktsa zokorobyituze sisukpesapy humo nikaranaha tahapetu zuba nikaranaha: “Duabohotsa tsihitsa okyrytsaro ty puëtsik mybo nyny my” mytsaty ahabyitsa nikaranaha. Zumunahaze estuba zuruze okyrytsaro ty ihuak ty sibo nyny niy.

¹¹ Siokrytsaro ziaksenaha. Iwaze tsihitsa soho zisapybyrikinaha. Asa tihi:

¹² “Asaktsa kytsa nubaze zuba duabohotsa bo zumunaha tsikaeni zuba sukpesapy humo nikaranaha. Katsaktsa zokorobyitu sisukpesapy humo

tsikykaranaha, haramwe buruk tu sisukpesapy humo tsikykaranaha. Okyryrsaro ty sibo nyny tsiky atsa tu myokyryrsaro my” niaha.

¹³ Tsihita estuba maku pe:

“Katukta wabyty! Uta ahaty batu spihikbata, zokorobyituze aokyryrsaro soho iktsaso, yh̄y tsiky atsatu nyny my. Anaharere estuba estuba ziwaby. Iwatahi tsiksapybyikize batu mysapy my.

¹⁴ Abaka aokyryrsaro tsiakse awahoro bo tsiksikta! Uta tatihikta siapiktsa bo okyryrsaro pinyiny tsihikik aokyryrsaro atsatu my.

¹⁵ Amy ty kaokyryrsaro tuk mozihikik ana ty hi mykara wasani my. Kahumo ahazokdiharētsa iwatahu kamysapyrēta” niy. Uta sizubarētsa bo okyryrsaro ty nyny my. Kytsa nubaze zumunaha okyryrsaro estuba zuruze ihuak ty sibo nyny my. Deus tsimysapyrēta isapyha ty kytsa bo nyny my. Isapyhaty ahabo nyny my tytsumuēh̄i habiyta humo – anahi Sesus nisihyrinymyry.

¹⁶ Iwa Sesus nipamykyso Deus tyryktsa soho. Tapara Sesus:

– Aty sa kytsa katyryktsa tuk myokzeka “O asaktsa simyhyrizikwanitsa maha” mytsaty ahabyitsa mykaranaha. Sinamybyitsa maha. Aty sa kytsa tihi “O sinamybyitsa maha” simyhyrizikwanitsa maha – niy.

Iwaze tasoho ty nitsasoko. Sesus abazubata myze wastuhu ituktsa it-syhyryze tarabaja mynakaranaha batu simyhyrizikwabyitsa maha. Utsa ituktsa itsyhyryze tarabaja tsikaeni zuba, sihyrizikwanitsa maha. Hawa mozihikik ihuak ty sibo nyny my.

Sesus tabezewy soho tahyryzikpowy naha soho humo nitsasokozo.

¹⁷ Kyze Sesus tuk zinymyrykynahatsa Serusarēhe bo niukurunaha. Niukurunahaze asa zuba nipamykysokonaha.

¹⁸ Sesus:

– Abaka Serusarēhe bo tsimykurunaha. Anaeze utakta Deus zikpehata hi ahawata ikzyk taparaktsa Deus wahoro zubata ziknapamykysonahatsa ustsasaktsa Deus harere ziwatahakanahatsa sibo hi pikoktyhyryknaha, asahi:

“O atakta tybeze” maha. Iwa kasoho motsasonaha.

¹⁹ Bipyritsa bo pikoktyhyryknaha, asaktsa pikmyijakanaha. Pikikinaha. Iharapatawyhyta bete pikyryziknaha iwa pikbezenaha. Iwaze petok puruze Deus hi myzihyryzikpowy – niy.

Tsiaku Suão ahatsa je Sesus bo nizapykykynaha.

²⁰ Kyze Sebedeu oke tahyrytsa tuk Sesus bo zumukunaha. Atatsa tasopyk ty hi iokeryk taekaratsa humo puruk puruk niy.

²¹ Sesus ipe niy:

– Amo. Atatsa:

“Ikia aparakbaha abazubakta tsimozikze kahyrytsa abaze dyhy maha. Estuba apanuryk taba dyhy my. Usta apawazo taba dyhy my ana hi mozihikik” – niy.

²² Sesus Tsiaku itsy Suão kino niwatihi ispe:

– Amy ty tsimyzykykynaha batu ahahyrinymyry. Sinini mykara. Iki-ahatsa ja. Kawata sinini tsimykaranaha ja. Pikbezenahaze ikiahatsa ja. Kawata pahabezenaha zeka ana kino ahapunihiku ja – niy. Yh̄y niaha.

²³ – Kawata sinini tsimaha. Aty kabaze dyhy my batu tyso ziky. Aty kapanuryk taba aty kapawazo taba dyhy dyhy maha ana kino ba ziktsaso. Deus zuba ana hi motsaso atahi mysiwatawy asaktsa kabaze dyhy dyhy maha – niy.

²⁴ Utsa zinymyrykynahatsa des ana hi ziwabynahaze taokanikinaha. Tsiaku itsy Suão sihumo niwatihi sisakparētsa.

²⁵ Iwaze Sesus tuk zinymyrykynahatsa nisihuahua. Izumubanahaze ispe niy:

– Bipyritsa pehatsa asaktsa Deus humo batu sispirikpo kytsa mysipehakanaha ziknakaranaha, siharere pokso kytsa hyĩ ziknakaranaha ana humo ahahyrinymyrẽtsa.

²⁶ Ikiahatsa ahatuk batu. Aty mypehatsa ahatuk mozihikik atakta sizubarẽtsa mysitsumuẽhĩ tsihikik.

²⁷ Aty myhyrizikwanita ahatuk mozihikik, atakta ahatsyhyryze tarabaja mykara.

²⁸ Ikiahatsa iwa tsimyzurukunahaze kawata tsimoziknaha. Utakta Deus zikpehata mybarawy bo iknasik ahawata ikyzikze kytsa bo mysitsumuẽhĩ, iwaze aparakbaha Deus tuk tahawahi mynapykyryknaha – niy.

Sesus sihyrizikubyitsa nisizororowy.

²⁹ Kyze Sesus tuk zinymyrykynahatsa tuk Serikoho bo nitururuknahaze kytsa sizubarẽtsa iapik niukurunaha.

³⁰ Kytsa petoktsa sihyrizikubyitsa ske eze nidyhydyhykynaha. Kytsa ske buruk nikurunahaze ispe:

– Mybo ja mybo ja – nikaranaha. Sihyrizikubyitsa Sesus tuk zinymyrykynahatsa ziharamukunaha ana ziwabynaha. Iwaze asaktsa huahua niaha:

– O Deus zipehata mywata Dawi tsekokata myhumo tymypokzitsiukta! Tymytsumuẽhĩkĩkta! – niaha.

³¹ Kytsa sizubarẽtsa piharamunaha iwatsahi nisibetsakaknaha.

– O akso byitaha! – nikaranaha. Sisakparẽtsa nikaranaha. Asahi opykani hua huazo niaha.

– O Deus zipehata Dawi tsekokata myhumo tymypokzitsiukta! Tymytsumuẽhĩkĩkta! – niaha.

³² Sesus pyk niy:

– Panytaha! Uta kabo tynasioktyhyknaha – niy.

³³ Ibo zumunahaze ispe:

– Amy skaraba, hawa sa my – niy.

– O batu iktsa zikaha. Myhyriziktsa tysizororowykta! – niaha.

³⁴ Sesus sihumo tsimypokzitsiarẽta nisihyriktsa tsika tsikaka. Atsoko iktsazo niaha. Nihyriktsa zororonahaze iapik niukurunaha.

21

Sesus Serusarẽhe bo zumu.

¹ Kyze Sesus tuk zinymyrykynahatsa Serusarẽhe ske buruk niukurunaha. Betepake bo zumunaha. Betepake Oriwereja hwitsa hara baze my. Zumubahaninahaze Sesus tatuktsa petoktsa nisipeha:

² – Nabo sihudikhudikwy bo pãotaha! kytsa. Atsaezubaha eze tsimypupunahaze pikuzza tsipipiktumunaha. Itse tuk. Atatsahi isoikãihikta tsipiny-naha. Satsukyktaha! Kabo tyzioktyhyknaha.

³ Utsa kytsa:

“Hawa sa tsimykaranaha” maha zeka. “Mypehakatsa tihi mype niy pikuzza kabo tyzioktyhyknaha” tsimaha!

“Bykyze ahabo tasirezona” tsimahakta – niy.

⁴ Tubabatu Deus sohotsa isoho botu ziwataha aba zuba atsatu iwaze ana harere wasani niy. Atahi:

⁵ – O Serusarẽhe ezektsa ahapehatsa ahabo mozumu.

Batu imyi pikuzza tsibik bete modyhyky Deus sohotsa niy.

⁶ Kyze zinymyrykynahatsa petoktsa Sesus harere bo yh̄y niaha. Atsatu niaha.

⁷ Pikuza ty itse ahatsa ty Sesus bo nisioktyhyryknaha. Tasuk pikuza bete zizozokonaha. Sesus ibete tadyhyhyk.

⁸ Wastuhu kytsa tahasuk ske buruk zipaparakanaha. Tsarakzapatsa jerukbara eze ty bokok bokok ky niaha ana humo kino niwatihi ske buruk nisipaparakanaha.

⁹ Kytsa Sesus iharaze kazi nikaranaha, kytsa iapiktsa niwatihi sizubarētsa kazi nikaranaha:

– Sesus Deus tuk niapykyryk.

Atahi Deus zipehata mywata niyzik Dawi tsekokata.

Deus bazekta tu mybo inasik.

Atakta tsimysapyrēta. O mykurētsa – nikaranaha.

¹⁰ Sesus Serusarēhe bo nitsukze kytsa paikpa mytsaty nikaranaha. Serusarēhe ezektsa tihi:

– Amakata skaraba – nikaranaha.

¹¹ – Atakta Sesus, Deus sohokotsa Nasare ezekta. Nasare Karireja eze.

Sesus Deus wahoro zubata bo zumu.

¹² Kyze Sesus Deus wahoro zubata bo nitsuk. Anaeze kytsa myraratsa ty hozipyrykzatsa ziknasihuakaknaha okyrysaro humo. Asaktsa nisiksiwykik. Atsoko nitururuknaha. Asaktsa okyrysaro ty nisihuakaknaha hwibihitsa nisitsihipetotokorok. Asaktsa amytudutsa nisihuakaknaha sidyhywytsa nisitsihipetotokbaik.

¹³ Deus harere tihi:

– “Kawahoro zubata anaeze kytsa sizubarētsa kabo mynapamykysonaha” ziwataha. Ikihatsaktsa kawahoro sitsyhyryboarētsa parik waka tsimyza-huaknaha – niy.

¹⁴ Kyze sihyrizikubyitsa, simyziubyitsa kino niwatihi ibo Deus wahoro zubata isturupeze bo zumunaha. Nisizororowybaik.

¹⁵ Amy ty kytsa batu zikaha kytsa nisizororo Sesus tazikwy humo nikara. Tisapyrēna niy. Deus wahoro zubata isturupeze eze ihyrytsa Sesus soho ziwabynahaze kazi nikaranaha:

– O Deus zipehata mywata tsikyzyk Dawi tsekoka ikia humo mykurētsa. Ikia tsamysapyrēta h̄y – nikaranaha. Ana humo hi taparaktsa Deus wahoro zubata ziknapamykysonahatsa, ustsasaktsa Deus harere ziwatahakanahatsa iwatsa tahakyrikinaha.

¹⁶ Sisakparētsa Sesus pe niaha:

– Siharere tsiwaby sa – niaha. Yh̄y niy. Deus harere papeu humo tsinymyrynaha ja. Ziwataha Deus tihi:

– O Deus ikia ibykyhytsa jabastsa kino niwatihi hawa abo mosakibazikiknaha nisihyrinymyry. Asahi abo mosakibazikiknaha, sinymyryrētsa h̄y – niy. Iwa papeu humo ziwataha.

¹⁷ Kyze Sesus Serusarēhe ekze niparak. Betanija bo niy anaeze zuru.

Sesus umaha soho humo nisihyrinymyrykyzo.

¹⁸ Zokorobyitu Sesus Serusarēhe bo niukuru irapa zumu.

¹⁹ Ęrykani ske sak betekta ta bo hwi umaha bo iktsa niy. Umaha bo zumuze ihara bo ziberiki batu iharaka isaro zuba. Kyze Sesus umaha pe niy:

– Abaka ba ziktaharazokta ba aty tohi ahara zezukzo – niy. Iwaze babata. Atsoko niharapara.

²⁰ Zinymyrykynahatsa ana bo nikozonehaze sipybyrētsa:

– Hawa h̄ata sa atsoko niharapara – niaha.

21 – Kaharere wasani isoho mytsatyziu tsimaha. Deus humo tspirikponaha zeka umahaty ikahaty ikiahatsa kino atsawatu tsimaha. Tsimytsasonaha zeka:

“Deus hawa ha ty abo myzapyky mykara ja. Batu kanyhy”. Iwa mytsaty tsimaha zeka hawa ha ty ibo tsimyzapykykynaha batu yhy my. Deus humo tsimyspirikpobabanaha zeka hara jobonita pe:

“Hara pe nabo pãoty buburuzuba bo tsimy” tsimaha. Nawa tihi my ahaharere humo.

22 Ikiatsa Deus bo tsimyzapykykynahaze atsatu ahabo my. Deus ihumo tsimyspirikpobabanahaze hawa ha ty ibo tsimozapykykynaha atsatu ahabo nyny mykara – niy.

Aty harere humo Sesus kytsa mysipeha. Aty sa ipe: – Natihiktsa – my.

23 Kyze Sesus Deus wahoro zubata bo nitsukzo. Anaeze kytsa nisi-hyrinymyrykyze taparaktsa Deus wahoro eze ziknapamykysokonahatsa, Sudeutsa taparaktsa kapitãotsa kino niwatihi ibo zumunaha. Ipe niaha:

– Aty skaraba ape “Katsa tsihyrinymyrykykta, katsyhyryze tarabajatykta!” – niaha.

24 Sesus tihi:

– Uta kino niwatihi kaharere estuba zuba ahabo my. Kaharere bo tsimaha zeka kyze aty sa kape “Katsyhyryze tarabajatykta!” my ahabo mykara – niy.

25 Sesus ispe niy:

– Aty sa Suão Batista pe:

“Kytsa tsiharasusukta! niy. Deus ja. Kytsa ja. Aty skaraba ana hyrizikt-sokzawy zipeha kabo tsimytsasonaha.” – niy.

Kyze kytsa asa zuba nipamykysohokonaha asaktsa:

– Hawa sa tsimaha. Deus ipe: “tsiharasusukta” niy tsimaha zeka kyze atahi mype. “Amy skaraba ihumo batu ahaspirikpo my”.

26 Katsaktsa “Kytsa ipe tsiharasusukta!” niaha tsimaha zeka kytsa sizubarẽtsa Suão Deus sohokotsa humo sispirikporẽtsa iwatsahi kytsa pokso batu tyso kytsa ipe “tsiharasusukta!” batu tyso tsimaha – nikaranaha.

27 Iwaze ipe niaha:

– Aharere Suão Batista soho batu myhyrinymyryhy – niaha.

Sesus:

– Uta niwatihi, ahaharere “aty sa kape tarabajatykta! my” batu tyso – niy.

Maku hyrytsa petoktsa.

28 Kyze Sesus myhyrizikwanitsa, taparaktsa upykyhytsa niwatihi ispe:

– Kasoho humo ka hawa sa mytsaty tsimaha – niy.

– Kyze maku ihyrytsa petoktsa. Taparakta pe: “Katse duabohotsa bokta sukpesapy humo tsimykyta! Abaka nabo tsimykyta!” niy.

29 “Batu yhy” niy. Abahi tapetu isopyk:

“Kazo harere bo hyhy my duabohotsa sukpesapy bo my” niy. Niparak duabohotsa sukpesapy humo nikara.

30 Kyze maku iykpykbita pe “Katse duabohotsa bokta sukpesapy humo tsimykyta! Abaka nabo tsimykyta!” niy.

Yhy niy.

Atakta batu pão.

31 Aty sa tazo harere bo hyhy niy – Sesus niy.

– O taparakta – niaha. Iwaze Sesus ispe niy:

– Kaharere wasani my, kytsa okyrysaro ty zibykyknahatsa. Homa pehakatsa tsyhyryze sibikyhynahatsa, wytykyryk simysapybyiza kino niwatihi Deus tyryktsa moziknaha ikiahatsa batu.

³² Suão Batista Sudeutsa bo zumu. Hawa ha ty Deus okzeka wasani zahawatawy. Ihumo batu ahaspirikpo, okyrysaro zibykyryknahatsa wytykyryk simysapybyiza kino niwatihi asahi iharere humo sispirikporëtsa. Iwatsahi Deus humo sispirikporëtsa ana bo iktsa tsikaha. Iwatuze ikiahatsa ahamysapybyitsa tu tsikykarana batu tymoewy Suão harere bo batu ma zikaha – niy.

Duabohotsa perytsitsa sisopyksapybyikitsa soho humo nitsasoko.

³³ Usta soho ahabo mopamykysoko wabytaha!

– Kyze maku waratok tsihitsa duabohotsa nisiparikik. Duabohotsa ist-sarākatsa. Duabohotsa okarawytsa tyokehyry okehyry haraharetsa zozo nikara. Anaeze sokarawy eze harahare hoke duabohotsa tsikpyrykwy nizukninaha. Kyze jobo isparik ziziki anaeze ziperykykta duabohotsa nisukparaka. Iwaze wastuhu kytsa pe:

“Utakta meky botu mokuru. Ikiahatsa duabohotsa tysiperykynahaktsa! Wihara huak ty ahabo nyny my okyrysaro ty tsapukte ahabo nyny my, kasyhyryze suksesapy” niy.

Yhỹ niaha. Iwaze niparak, mekybotu itasapy.

³⁴ Duabohotsa nijakuknahaze tsihitsa tatumuëhĩtsa siperytsitsa bo zipehe. Okyrysaro humo nisipeha.

³⁵ Kyze itsumuëhĩtsa siperytsitsa bo zumuze nizokbatsinaha. Tapara itsumuëhĩtsa nitsakikinaha, ustakta zibezehiknaha, usta haraharezipyryktsa ty nisipaparkanaha. Iwa itsumuëhĩtsa sisopyk niaha.

³⁶ Kyze duabohotsa tsihitsa usts tsumuëhĩtsa puëtsik nisipeha siperytsitsa bo niy. Hawa tapara sitsumuëhĩtsa sisopyk atsatu usts bo niaha. Nisisapybyrikinaha.

³⁷ Bykyze duabohotsa tsihitsa tatse babata sibo zipeha. Tapetu nikara: “Katse humo ka wasani sisopyk maha ihumo batu ipyriryk. Ata humo ka ba zikaha” niy.

³⁸ Kyze siperytsitsa itse bo iktsa niahaze asa zuba nipamykysokonaha.

“Iktsa tsimaha! Atakta duabohotsa tsihitsa tse niaha. Ata kino izo mohyrikosokdaze tazo namy piakse, duabohotsa tsihitsa mozik. Tabezehikta kytsa! Tabeze zeka katsa hi duabohotsa tahaksenaha. Iwaze duabohotsa tsihitsitsa tsimoziknaha” niaha.

³⁹ Kyze nizokbatsinaha. Waratok bara bo ziokyhyryknaha anaeze zibezehana.

⁴⁰ Kyze Sesus ispe niy:

“Duabohotsa tsihitsa myziksizoze amo skaraba siperytsitsa bo mykara. Hawa sa mytsaty tsimaha” – niy.

⁴¹ – O asaktsa iperytsitsa sisapybyinahatsa tu mysiba. Duabohotsa mektsa bo tu nyny my asahi tsapukte okyrysaro wihara humo ibo nyny maha hawa ha ty wasani maha – niaha. Iwa Sesus usts perytsitsa soho ty nipamykysoko.

⁴² – Deus harere papeu humo tsinymyrykynaha sa – Sesus niy. Deus harere papeu humo iwataha:

– Kytsa wahoro nizuknikinahaze nitsasonaha,

“O ana harahare batu isapy my” iwaze nipapyknaha.

Ata hi harahare abazubata niyzik.

Ana humo hi harahare tisapyrëna humo usts harahareziktsa buruhuwa babatu niaha – niy.

43-44 Iwaze ahape:

– Ikiahatsa Deus tyryktsa batu tsimoziknaha, asaktsa Deus harere bo hỹ maha asahi Deus tyryktsa moziknaha – niy.

45 Kyze simyhyrizikwanitsa Deus wahoro zubata eze ziknapamykysonahatsa, Pariseutsa kino niwatihi Sesus soho ziwabynahaze sihyrinomyr̃etsa. Sisohe nitsasoko ana ty hi zinomyrykynaha iwatsahi tahakyrikinaha. – Katsaktsa siperytsitsa batu sapy watsa – mytsaty nikaranaha. Iwatsahi tahakyrikinaha.

46 Sesus tsipa humo pioktyhyry tsihikiknaha batu zikaha kytsa sizubar̃etsa pokso. Kytsa Sesus soho – Atakta Deus sohokotsa humo ka tsimaha – niaha. Iwaze simyhyrizikwanitsa kytsa pokso Sesus batu ziooktyhyryk.

22

Myikaha abazuba soho humo nisihyrinomyryky.

1 Kyze Sesus usa soho nipamykysokozo Deus tyryktsa soho humo nisihyrinomyryky.

2 Hawa Deus kytsa nisiwatawy nisihyrinomyryky. Batu sizuba hỹ maha ana humo hi nisihyrinomyryky.

Kyze maku myhyrizikwanita tse myikaha inakymy. Itse isukzata humo myikaha zihitsa niy.

3 Kyze zihitsa sitsumũh̃itsitsa nisipeha – Kytsa tynasakzo! “Pany aidy botu nakymy ispe tsimaha” – niy. Iwaze nitururuknaha. Sakzohotsa batu yh̃ niaha.

4 Iwaze zihitsa usts mektsatu nasakzorenaha. Iharere tihi: – Panytaha! katse tasukzata pimiyikahaka. Pikuzatsa botu nisibanaha – niy. Anaharere sitsumũh̃itsitsa nasiakzokonaha.

5 Anaharere bo batu mytsatyziu niaha. Estuba tatsuhuk bo niparak. Usta tanamy bo niparak.

6 Iwaze usts sitsasohotsitsa nisisukbatsinaha nisikikinaha. Nisibaiknaha.

7 Iwatahi zihitsa takyriki sodadutsa pe:

– Kytsa sakzohotsa botaha niy! Asaktsa katsumũh̃itsa nisibanahatsa tysibaiknaktsa! Sihudikhudikwy tsipokiknahaktsa! – niy. Iwa h̃y.

8 Kyze zihitsa sitsasohokotsitsa hua huazo niy ispe niy:

– Katse myikaha inakymy sakzohotsa batu sisopyksapy maha.

9 Abaka ske buruktaha! Nabo kytsa sihobykwy watu tysipehanaha niy. Ikiahatsa tihi:

“Panytaha! Abazubata tse myikaha sukwawy humo panytaha! tsimaha” niy. Yh̃ niaha. Nasiakzobanaha.

10 Iwaze sitsasohokotsitsa ske buruk maha. Sizubar̃etsa zihobyknaha. Simysapyr̃etsa pe simysapybyitsa pe asa kino niwatihi imyikaha bo mysioktyhyryk. Hamyikaha bo inahareknaha sizubar̃etsa h̃y. – Anaeze tahadisa-hakanaha.

11 Kyze abazubata zihitsa inatsukze sakzohotsa bo iktsa niy. Iwa kytsa abazubata zihitsa sisuk humo nisisukba iwa sisopyk. Estuba maku batu, tasuk tyzuba korobyk niy, zihitsa suk humo batu h̃y niy. Iwaze zihitsa maku pe, atakta tasuk tyzuba korobyk.

12 – Hawa kamyikaha bo tsimy. Asukbyita tu mymyikaha bo tsiknatsuk – niy.

Maku batu harere tisikpybyr̃eta. Abazubata zihitsa suk batu yh̃ ana hi batu tyso.

13 Kyze abazubata zihitsa sitsumũh̃itsa pe:

– Maku kasuk batu yhỹ atahi pipawarahiknaha! Ape bo miwaha bo typapykik nabo sinini my iwaze mopuziuku takyrikita tu tatsapu ty dydydy mykara – niy.

¹⁴ Kyze Sesus isoho nitsasoziuku. Atahi:

– Deus zihitsa wata sizubarëtsa mysiakzo ityryktsa moziknaha batu sizuba iharere bo hỹ mykaranaha – niy. Asahi nisiwatawy. Batu sizuba iharere bo hỹ mykaranaha.

Kytsa okyrysaro humo Sesa bo nyny mykaranaha ja.

¹⁵ Kyze wastuhu Pariseutsa ziponaha, asa zuba niaksohokiknaha. Tahatuktu nipamykysokonaha. – Sesus Moises harere bo batu yhỹ mozihikiknaha – iwa mytsaty nikaranaha.

¹⁶ Kyze ituktsa Erodes tuktsa kino niwatihi Sesus nizokparakanaha. Iharere humo batu imysapy mozihikiknaha ana humo hi Sesus bo zumukunaha. Asahi:

– O myhyrinomyrykytsa tisapyrëna haty zuba nisihyrynomyryky ana humo hi myhyrinomyrëtsa. Kytsa pokso batu apyby. Kytsa abazubatsa humo batu asikpyby. Kytsa aharere siakparawy byizeka batu asikpyby. Moises harere tsinomyryziuku ahyrinomyrywy baba my.

¹⁷ Mypehatsa abazubata Sesa okyrysaro ja ibo nyny tsimaha. Katsaktsa Sudeutsa Moises harere bo yhỹ tsimykaranaha okyrysaro ty Homa abazubata nyny tsimaha zeka wasani ja. Ana soho humo ikia mytsaty tsimy – niaha.

¹⁸ Sesus simysapybyi humo tsihyrinomyrëta hÿ. Ispe niy:

– Ikiahatsa tawatahakanahatsa watsa. Amo kaharere humo uta imysapybara tsimyzihikiknaha ana hi tsipiperykynaha. Iwatatu ahape my:

¹⁹ Okyrysaro ty estuba kabo nynytaha! Atakta kytsa bo nyny tsimy – niy. Napiri wata ty estuba ibo nyny niaha.

²⁰ – Aty naro sa okyrysaro humo ziwatahaka. Aty hyrikoso sa okyrysaro humo ziwatahaka – niy.

²¹ – Abazubata Sesa hyrikoso okyrysaro humo – niaha. Sesus ispe niy:

– Niwazuba! Sesa namy ty ibo tu tyszotahaktsa! Deus mozihikik ana ty zuba Deus bo nyny tahaktsa! Deus hawa ha ty mozihikik ibo tyszotaha hÿ – niy.

²² Iharere humo sipybyrëtsa. Iwaze nitururuknaha, Sesus ta zuba nitare.

Mynahyrizikpo naha soho Sesus nitsasoko.

²³ Bykyze Sadusitsa Sesus bo zumunaha. Asahi. – Kytsa mohyrikosokdanahaze ba zikyrizikpozonaha – mykaranaha.

²⁴ Iwatsahi Sesus pe:

– O myhyrinomyrykytsa. Tubabatu Moises Deus harere botu ziwatahaka: “Maku ihyrytsa byitatu mohyrikosokda zeka itsy haramukuka piakse”. Iwaze atatsa tabykyhyze itse mopurukze kytsa tihi: “O izikytse mopuruk” maha – niy. Iwa Deus harere my.

²⁵ – Kyze kytsa itukytsa sete niaha. Taparakta tasukza. Bykyze ihyrytsa byita tu nihyrikosokda.

²⁶ Niytahi itsy haramukuka ziaксе. Itsy kino ihyrytsa byita tu nihyrikosokda. Bykyze itsy taziky wanu sapy ziaксе. Ihyrytsa byita tu ata kino nihyrikosokda. Kyze sete ahatsa astatsa tu ziaксе. Estuba nihyrikosokdaze usta atatsa ziaксе. Iwa kytsa sete itukytsa iwatsa niakbanaha. Itukytsa hyrytsa habyitsa tu niakbakanaha.

²⁷ Iwaze atatsa kino niwatihi nihyrikosokda.

²⁸ Kyze nawa puruze kytsa mynahyryzikponahaze aty sa atatsa barikta babata. Sete itukytsa ziaksenaha – niaha.

²⁹ Kyze Sesus ispe niy:

– Kytsa nahyryzikponaha soho batu ahahyrynymyry. Deus harere humo batu ahaspyrikpo Deus zikwy batu ahanyhỹ.

³⁰ Abaktsa kytsa zuba tahasukzanaha. Wytykyryk zioptyhyryknaha. Aparakbaha inahyryzikponahaze kytsa sisukzabyitsa, wytykyryk ba zita-hapytsazonaha. Niwazuba! Bijoikpe iknyktsa Deus tsumuẽhĩtsitsa watsa moziknaha batu sisukza – niy.

³¹ – Kytsa inahyryzikponaha hawa ha ty Deus botu ziwatahaka batu ahahyrynymyry niy.

³² Deus tihi:

“Utakta Deus, Abarão kahumo tspirikporẽta. Adiri Isake kahumo tspirikporẽta. Adiri Sako kahumo tspirikporẽta iwatsa. Aba kahumo sispirikporẽta.” Kytsa niakbanahatsa Deus humo batu sispirikpo. Iwatsahi mynahyryzikponaha Deus humo sispirikporẽta – Sesus niy.

³³ Myzubaha ihyrynymyrywy ziwabynahaze sipybyrẽtsa maha.

Hawa ha sa Deus harere abazuba.

³⁴⁻³⁵ Kyze Pariseutsa ziwabynahaze hawa Sesus harere Sadusitsa bo niy. Nisiharere pykiknaha. Wastuhu Pariseutsa inakypyknahaze estuba Deus harere zihyrynymyryta Sesus imyiwu mozihikik iwatahi ipe niy:

³⁶ – O myhyrynymyrytsa! Hawa ha sa Deus harere abazuba – niy.

³⁷ Sesus tihi:

– Deus humo ahamypokzitsirẽtsa babatsa. Iharere bo zuba ma tsimykarana! Ibo zuba mytsatyziuty! Itsyhyryze tarabajaziuba tsimykarana – niy.

³⁸⁻³⁹ – Ana harere hi abazuba my. Usa harere wasani ahaotuktsa pauktsitsa tynasipokzitsikinaha, ahumo tsinakara naha wa tihi taha.

⁴⁰ Anaharere petoktsa abazubaha. Hawa ha ty Deus sohokotsa kytsa nisihyrynymyryknaha hawa ha ty Moises harere ziwatahaka niwatihi anaharere petoktsa abazubaha humo my atsatu my – niy.

Deus zipehata soho niy.

⁴¹ Iwaze wastuhu Pariseutsa inakypykyknahaze.

⁴² Sesus ispe niy:

– Deus zipehata aty sa itsekoka my. Aty soho sa mytsaty tsimaha – niy.

– O Kiristu Deus zipehata Dawi tsekoka my – niaha.

⁴³ Sesus:

– Iwa zeka amy humo sa Dawi Deus hyrikoso humo ipe: “Kapehatsa.”

⁴⁴ Dawi tihi:

Deus hi Kiristu zipehata:

“Kabaze dyhy ty!

Ikia abazubata mozik kazikwy humo.

Kapanuryk taba dyhy ty!

Bykzyehu utakta Deus asukyrytsitsa apyrytsa pukezi tysipykwy iwatsahi asukyrytsitsa aharere bo hyỹ maha” niy – Dawi niy.

⁴⁵ – Dawi Deus zipehata pe “Kapehatsa” batu itsekoka hawa Deus zipehata Dawi tsekoka. Atahi Dawi tsekoka ipehatsa niwatihi. Dawi nipurukze Deus zipehata koikny baktatu Deus tsekoka humo – niy.

⁴⁶ Batu aty tohi ziky. Iharere myhyrynymyrykta babata tuze batu aty tohi zikmypeha. Sisikpybyrẽtsa iwatsahi batu harere zikaha.

23

Sesus Moises harere hyrinomyrytsitsa Pariseutsa ahatsa soho humo pykyhytu tahaktsa niy.

¹ Kyze Sesus kytsa sizubarëtsa bo zinyomyrykynahatsa ahatsa pe:

² – Pariseutsa, kytsa asaktsa Moises harere humo zihyrinomyrykynaha.

³ Deus harere zihyrinomyrynaha iwatsahi siharere tsiwabytoktonahaktsa! Siharere bo hyÿ tsimykaranaha. Hawa mykaranaha humo ahamysopykzubyihu ja. Tahahyrinomyrywy humo batu sisopyk.

⁴ Asahi:

“Taparaktsa harere bo hyÿ tsimahaktsa!” maha. Tahahyrinomyrywy batu yhÿ maha. Utsa kytsa Deus harere bo hyÿ mozihikiknahaze asaktsa ba zik mytsumuëhÿnaha. Kytsa watsa asaktsa titsakyrëna ty puhyrykty ba zikmytsumuëhÿnaha iwa Pariseutsa sisopyk. Taparaktsa harere bo hyÿ tsimahaktsa maha asahi batu yhÿ niaha.

⁵ Hawa mykaranaha kytsa sibo iktsa maha ana hi mozihikiknaha. Deus harere iwatahaha tahaokpe humo zikzisikiknaha tahatsipa humo kino niwatihi haÿ niaha. Sisuk mekywahatu. Kytsa tihi. “O saktsa Deus okeze ka wasani maha. Deus harere batu sispiriktsokda. Mysisapywyky” anaharere piwaby tsihikiknaha.

⁶ Sudeutsa wahoro zumubanhaze sidyhydyhywytsa sisapyrëtsa zuba siakparawy. Kytsa pe “Nabo pãotaha” tabete dyhy tsimy. Tahamyikaha nahaze isapyha ty zuba tahadisahakanaha. Sisorokrëtsa nikaranaha hawa ha ty tisapyrëna ziaksenaha. “Katsaktsa myhyrizikwanitsa” mytsaty ahabyitsa nikaranaha.

⁷ Kytsa mysihobyknahaze sibo mopamykysoziukunaha ana hi siakparawy. Nabo kytsa namy huakwy sapy eze sibo mopamykysoziukunaha ispe: “Myhyrinomyrytsa” sisopyk ana hi siakparawy.

⁸ Ikihatsa ahahyrinomyrykytsa estuba zubata, utakta Sesus ahahyrinomyrykytsa ikiahatsa humo kamypokzitsiukrëta, ikiahatsa kino ahatukytsa katuktsa tsimaha. Iwatsahi batu tahapetu sisopyk “Myhyrinomyrytsa”. Batu utsa kape: “Myhyrinomyrytsa”.

⁹ Pariseutsa tihi ikiahatsa mysopyk “myzo” tsimaha ikiahatsa ahazo estuba zubata atahi bijoikpe eze tu my, iwatsahi usta maku mybarawy ezeke tu batu ipe: “myzo” ahasopyk.

¹⁰ Utsa kytsa batu isty peha: “abazubata” ahasopyk, utakta Deus humo zikpehata abazubata estuba zubata my.

¹¹ Aty pehatsa ahatuk mozihikik atakta sizubarëtsa mysitsumuëhÿ mykara hawa ikykara, atakta niwatihi.

¹² Aty tapetu isopyk “Utakta mypehakatsa mozihikik” utsa kytsa isty tsumuëhÿ byizeka, atakta Deus okzeka batu imysapy. Atahi “O sizubarëtsa mysitsumuëhÿ tsihikik” atahi Deus okzeka myhyrizikwani mozik – niy.

Sispihikbatanikitsa Sesus okzeka batu simysapy mykaranaha.

¹³ – O Pariseutsa Deus harere zihyrinomyrykynahatsa niwatihi ahahumo kasukatsihikrëta. Ikihatsa ahamysapybyitsa tu tsimykaranaha iwatsahi sinini tsimaha. Ikihatsa myzihawatahakanahatsa watsa ahahumo kasukat-sihikrëta. Deus tyryktsa wahoro wata, ikiahatsa hokbowy pihyrizikpyrykwyhik, ba zikpupunaha iwaze Deus tyryktsa batu tsimoziknaha. Utsa kytsa mopupu tsihikiknahaze Deus tyryktsa moziknaha ikiahatsa tihi “Batu paku tsimaha” iwa tsimaha.

¹⁴ O Pariseutsa Deus harere zihyrinomyrynahatsa niwatihi aha humo kasukatsihikrëta. Ikihatsa ahamysapybyi tsimykaranaha iwatsahi sinini

tsimaha. Ikiahatsa myzihawatahakanahatsa watsa aha humo kasukatsihikrêta. Ikiahatsa haramukuka namy tsiapiaksenaha. Kytsa okzeka Deus bo tsimypamykysobanaha sipapatu haramukuka namy tsiapiaksenaha. Ana humo hi sinini tsimykaranaha.

¹⁵ O Pariseutsa Deus harere zihyrinomyrynahatsa niwatihi. Ikiahatsa myzihawatahakanahatsa watsa ahahumo kasukatsihikrêta. Sinini tsimaha. Nanabyitaba tsimykurunaha, hara taba tsimykurunaha pihik koikny niwatihi kytsa bo tsimykurunaha, aparakbaha ahaharere humo ahawatsa moziknaha. Ahawatsa Sudeutsa moziknaha anaty hi tsimyzihikiknaha. Atakta ahaparakbaha tu zeka iwataharakatsa mozik ahawatsa sinini ykarawy bo my.

¹⁶ – O ahahyrizikubyitsa watsa. Utsa kytsa batu isty tsumuêhĩ okryrysaro humo ahakparawy. Ikiahatsa tihi: “Aty kytsa bo motsaso zeka. ‘Hawa Deus wahoro zubata Serusarêhe eze my kaharere wasani my’ iwa motsaso zeka iharere wasape ja batu myhyrinomyry.” Ata tihi zeka “O kaokryrsaro Deus wahoro zubata nyny my” niy. Iwaze iharere wasani myhyrinomyrêtsa. Okryrsaro Deus wahoro zubata bo nyny my zeka iharere wasani my ana humo myhyrinomyrêtsa iharere wasapehe my. Hawa ha ty kytsa pe mykara wasape my.

¹⁷ Ikiahatsa ahamyikitsa! Ahyrizikubyitsa watsa! Deus humo ka okryrsaro batu ipokzitsi tawahoro zubata tisapyrêna my. Deus wahoro zubata hi abazubaha my hỹ – niy.

¹⁸ – Ikiahatsa tihi: “Aty Deus bo motsaso zeka ‘Anaeze myraratsa wezowy eze Deus bo nyny tsimaha anaeze Deus wahoro zubata eze tu, kaharere wasani my’ iwa motsaso zeka iharere wasape ja batu myhyrinomyry”. Ata tihi zeka “O myraratsa ty hi atakta Deus bo nyny my zeka iharere wasani my” ana humo myhyrinomyrêtsa.

¹⁹ Ahahyrizikubyitsa watsa. Ahararatsa harazowy tisapyrêna Deus wahoro zubata eze hi abazubaha hỹ.

²⁰ Iwatsahi aty myraratsa wezowy motsasoze iwaze iharere humo wasani ja, niwazuba isapyhatsa ty sizubarêna wezowy bete kino motsasoko iwaze iharere wasani my.

²¹ Iwatsahi aty Deus wahoro zubata motsaso zeka iharere humo wasani ja niwazuba atakta tawahoro eze inapykyrykta kino motsasoko iwaze iharere tisapyrêna my.

²² Aty bijoikpe motsasoze iwaze iharere humo ja wasani, niwazuba atakta bijoikpe eze tu kino motsasoko iwaze iharere wasani my. Bijoikpe Deus dyhywy wata zubata my – Sesus niy.

²³ – O Pariseutsa, Deus harere zihyrinomyrykynahatsa kino niwatihi sinini tsimaha. Ikiahatsa ahanamy mytsyhyrytsa wa tsimaha zeka es-tuba zuba Deus bo nyny tsimaha. Wasani tsimaha. Ikiahatsa ahadisahawykykywy ty Deus bo nyny tsimaha. Deus harere bo hỹ jokboa zuba tsimaha. Hawa ha ty wasania ty Deus okzeka batu yhỹ tsimaha. Kytsa bo batu wasani ahasopyk tsimaha. Utsa humo batu ahampokzitsiuk. Kytsa ahamy ty tsimysisapybyrikinaha. Hawa tsimahaze Deus harere bo batu yhỹ tsimaha. Niwazuba Deus harere wasaniha bo hỹ tsimahaktsa! Utsa harere niwatihiktsa! Iwa ahadisahawykykywytsa Deus bo nyny tsimaha, iharere bo kino niwatihi hỹ tsimaha, Deus harere bo hỹ tsimaha.

²⁴ Ahahyrizikubyitsa watsa. Utsa kytsa batu isty tsumuêhĩnaha. Ikiahatsa tihi: “Katsa mysapyrêtsa utsa bo mysitsumuêhĩ” mytsaty ahabyitsa tsimaha. Ikiahatsa jokboa kaharere humo pykyhytu hỹ tsimaha. Ikiahatsa kytsa watsa asaktsa tsikaeni ahabo zuba mytsaty ahasopyk. Abazubaha bo batu

yh̄y tsimaha, iwatsahi ustsahy kytsa humo batu ahamypokzitsiu, ahadisahawy soho bo zuba mytsaty tsimykarana — niy.

²⁵ — O Pariseutsa, Deus harere zihyrinymyrykynahatsa niwatihi. Ikiahatsa myzihawataharakanahatsa watsa ahahumo kasukatsihikrēta. Ikiahatsa sinini tsimaha. Ikiahatsa ahamypewytsa ahaporosuktsa ty ispetaba zuba tsimysipikiknaha tsibarazarēna. Ioketabaka nioktsirōrō siokpekehiziuhu batu siziu. Amy ty mytsaty tsimykarana batu wasani my. Taha bo zuba mytsaty tsimynakaranaha, amy ty ahakparawy atsatu tsimykarana. Ahamysapybara ty batu moewy iwatsahi batu ahamysapy tsimaha. Kytsa okzeka tsahi simysapyrētsa watsa, batu ba, batu ahamysapy tsimaha.

²⁶ Pariseutsa ahahyrizikubyitsa watsa. Kytsa Deus bo batu mysiockyhyryk. Tapara ahaporosuktsa tysiokkepiknaha. Tysiokkepikik. Iwaze sisukpetaba motsapik tsimaha. Iwatsa hawa ha ty tsimyzihikiknaha zeka wasani my hawa kytsa ahasopyk wasani tsimaha. Ikiahatsa hawa tsimyzihikiknaha batu imysapy ahaporosuktsa watsa asahi batu isty pik — niy.

²⁷ — O Pariseutsa, Deus harere zihyrinymyrykynahatsa niwatihi. Ikiahatsa tsihawataharakanahatsa watsa ahahumo kasukatsihikrēta. Ikiahatsa sinini tsimaha. Ikiahatsa mytyk watsa, mytyk ape taba tsibarazarēna. O “siziurēna” kytsa mykarana. Batu ba. Anaeze siakbatsa nibibibakanaha, sipoiktsa zuba. Iwa ikiahatsa ustsahy bo ahamysapyrētsa watsa. Batu. Ikiahatsa siakbatsa watsa batu ahamysapy tsimaha.

²⁸ Iwa ikiahatsa tsimaha. Hawa tsimykarana kytsa ahasoho “asaktsa simysapyrētsa” maha, ikiahatsa ahamysapybyitsa tu tsimykarana iwatsahi kytsa tsimysisapybyriwynaha. Ikiahatsa tsiwataharakanahatsa watsa — niy.

Deus simysapybyikitsa sinini ykarawy bo mysipeha.

²⁹ — O Pariseutsa, Deus harere zihyrinymyrykynahatsa niwatihi. Ikiahatsa myzihawataharakanahatsa watsa ahahumo kasukatsihikrēta. Ikiahatsa sinini tsimaha. Ikiahatsa Deus sohokotsitsa siytyk tisapyrēna tsikzokninaha, kytsa simysapyrētsa Moises harere bo hȳy nikarana siytyk tisapyrēna tsikzokninaha. Iwatsa tu batu ahamysapy tsimaha.

³⁰ Ikiahatsa tihi:

“Katsaktsa taparaktsa tuk tsikapykyrykna zeka Deus sohokotsitsa batu tsiksibanaha” mytsaty ahabyitsa tsimykarana.

³¹ Iwatuze iwa tsimypamykysokonaha, ikiahatsa Deus sohokotsitsa tsiksibanaha.

³² Niwazuba hawa ha ty taparaktsa ahadiritsa nikarana atsatu tsimykarana — Sesus niy.

³³ — Ikiahatsa pyryhyk myrawy watsa tsimaha. Tsimysapybyi zeka Deus sinini ykarawy bo pahapehahik ba zik zoinaha.

³⁴ Iwaze ustsahy Deus sohokotsa ahabo myzipeha kytsa sispirikporētsa, sihyrinymyrykytsa iwatsa ahabo mysipehahik, pahatsumuēh̄naha humo. Wastuhu tsiksibanaha iharapatawyhytsa humo tsiksihyrizikiknaha iwa tsiksibanaha, ustsahy Sudeutsa dyhydyhywy eze tu tsiksikikinaha. Ustsahy nanabyitaba tsiksiberikinaha tsiksijakanaha. Tsiksibanaha taparaktsa watsa asahi Deus sohokotsa nisibanaha.

³⁵ Asaktsa ahabo mysipehahik iwaze kytsa simyiwybyinahatsa tu sihyriziktsokzawy humo sinini tsimaha. Taparaktsa ahadiritsa Abeu zibezena. Ustsahy sohokotsa nisibanaha. Ziharawy babata Sakarias zibezena. Deus wahoro eze zibezehiknaha.

³⁶ Asaktsa simysapyrētsa niaha, asa humo hi ikiahatsa abaktsa kytsa sinini tsimaha. Ikiahatsa atsatu tsimaha iwatsahi sinini tsimaha — niy.

Sesus Serusarēhe ezektsa humo tsimypokzitsiarēta.

³⁷ Kyze Sesus nipamykysokozo:

– O Serusarēhe ezektsa. Ikiyahatsa Deus sohokotsitsa tsiksibanaha. Asaktsa zahahyrinymyrykynaha tsiksibanaha. Deus sohokotsitsa bo haraharetsa zipyryktsa tsiksipaparakanaha iwa tsiksibanaha. Hawa pahakypyk tsihikik kokuaro wata mykara. Kokuaro tahyrytsa tasara paik puke eze mysipokzitsiki eze atatsa watsa. Iwa uta ahahumo kamypokzitsiarēta. Ikiyahatsa kabaze batu hỹ tsikaha. Ikiyahatsa katuk batu hỹ tsikaha.

³⁸ Iwaze ahawahoro perikik kytsa wahoro monakbiba. Deus tihi ahudikhudikwy soho “tsipiharakbaiknaha” my.

³⁹ Kabo ba ziknyzonaha. Ikiyahatsa tsimytsasonaha zeka “Atakta Deus zipehata myziksizo ihumo mykurētsa tsimoziknaha iharere bo hyỹ tsimaha”. Iwaze kabo iktsazo tsimahaze ahakurētsa tsimoziknaha – Sesus niy.

24

Sesus Deus wahoro zubata mynakbi naha soho nitsasoko.

¹ Iwaze Sesus Deus wahoro zubata ekze niparakze zinymyrykynahatsa ibo zumunaha ipe niaha:

– O myhyrinymyrykytsa Deus wahoro zubata bo iktsa tsimyкта! Hawa tawahoro zubata tisapyrēna zoihitsa sisapyrētsa – niaha.

² Yhỹ niy. Aba haraharetsa bo iktsa tsimaha. Aibatohi haraharetsa ba harape bete zozo zikaha. Haraharetsa mynatōtōbaiknaha. Kytsa Deus wahoro zubata mynakarakba. Tsizubarēna nepykbaik.

Sininikarawy isuk kyrywy kino niwatihi nisihyrinymyryky.

³ Kyze Sesus Oriwereja hwitsa hara bo niy. Anaeze nidyhyky. Iwaze zinymyrykynahatsa asazubaze ipe niaha:

– Hawaze sa Deus wahoro zubata mynakarakbaik amy ty sa mybo tsipiwatawy. Ikiya tsimyziksizoze amy ty mybo tsipiwatawy. Hawaze mybarawy mopyk, amy ty mybo tsipiwatawy – niaha.

⁴ Ana soho mopamykysoko Sesus tihi:

– Pykyhytutaha! Kytsa pahaspikhikbatanaha. Siharere bo ba wabyziu tsimaha!

⁵ Kytsa sizubarētsa ahape maha “Utakta Deus zikpehata Kiristu” mybarapetu maha. Siharere batu wasani my. Kytsa mysipihikbatakanaha zuba, kytsa siharere bo yhỹ maha, siharere wasani mytsaty ahabyitsa mykaranaha. Iwa kytsa bo mybarapetu mykaranaha.

⁶ Kytsa ēryktsa mowatsorokonaha. Kytsa bytykara ezektsa kino niwatihi mowatsorokonaha. Ana soho tsipiwabynaha. Ahapyby byihu ja. Tapara wa tihi my mybarawy abanury ty ka ba zikpyk.

⁷ Tatyryktsa usta tyryktsa bo mowatsoronaha. Nanabyi tabatsa myharape sukyryikiknaha. Nanabyitaba wytyk mytydydykyryk. Kytsa sizubarētsa taharapa piyknaha. Batu sidisahawyky.

⁸ Iwa sinini mykaranaha. Bykyze sinini puētsik maha. Hawa wytyk tsimytsapyrētatsa tabykyhy pipurukze, bykyze sinini mykara puētsik atatsa watsa kytsa sinini mykaranaha. Bykyze puētsik sinini mykaranaha.

⁹ Iwaze ahasukyrytsitsa ahatsipa humo pahaoktyhyryknaha. Pahasukyrikinaha. Kahumo ahaspirikporētsa pahabanaha. Kytsa sizubarētsa ahahumo batu siakparawy.

¹⁰ Iwaze sizubarētsa katuktsa kahumo batu sispirikpo. Kytsa myharape sapybyikinaha, siharerewabymybarētsa moziknaha.

¹¹ Kytsa asaktsa:

“Katsakta Deus sohokotsa tsimaha” mybarapetu maha. Asahi kytsa bo mozumunaha zeka mysimiywynaha.

¹² Iwaze amy ty batu imysapy kytsa mynakanaha. Simiywynahatsa sizubarētsa maha. Ana humo hi ba zikapepokzitsinaha.

¹³ Aty kahumo tspirikporēta tsipunihikrēta mozik. Tsimysapyrēta mozik, atahi Deus tuk tawahi mynapykyryk. Aty sinini mykaraze tsipunihikrēta mozik atahi Deus tuk tawahi mynapykyryk hỹ.

¹⁴ Deus wasania ty kytsa ityryktsa moziknaha soho kytsa aparakbaha bo niy. Nanabyitaba Deus wasania ty motsasonaha iwaze kytsa abazubaha iharere piwabynaha. Kytsa abazubatsa Deus wasania ty piwabynahaze iwaze hi mybarawy mopykba. Ana zuba mybarawy mopykba – Sesus niy.

Sesus Serusarēhe mynakbi naha soho humo nispirikpoko.

¹⁵ Sesus ispezo niy:

– Isapybyiwy imyrawyta Deus wahoro zubata eze perikiknaha. Deus wahoro zubata sapy eze my. Deus sohokotsa Danieu anasoho botu ziwatahaka. Ata bo kino iktsa tsimahaze tywakiknahaktsa! – Sesus niy. Aty tapapeu piny ihyrinymyry tahi my.

¹⁶ Sesus tihi:

– Hawa myze asakta Sudeja eze tuze hara bo tywakiknahaktsa!

¹⁷ Atakta wahoro harapu bete modyhyky zeka mynasik tanamy bo batu paku my, mowakik zuba.

¹⁸ Atakta tatsuhuk eze tu zeka tasuk bo wahoro eze batu erete mowakik zuba!

¹⁹ Wytykyryk siseheza sibikyhykyza sisukatsihikrēza. Tahabykyhytsa tu sisukatsihikrēza. Mywaknahaze tsihokdaharēna.

²⁰ Deus bo tsimypamykysonaha:

“O myzo tsimywaknaha zeka mybo ba hyritsik tyziwō tsimaha. Tsimywaknaha zeka batu mybyrykywy eze ba zikunaha mysopyk tsimaha” niy.

²¹ Iwaze tihi kytsa sinini mykaranaha. Deus bijoikpe wytyk nizuknize kytsa anawa batu sinini niaha. Ba sininizo zikaha. Anawaze zuba sinini tsimykaranaha.

²² Deus zikwy humo jokbohatu sinini tsimaha, kytsa pokzitsiuwy jokbohatu nawa puruze mopyk habyizeka batu aty tohi ispitutsa zikokpykyryknaha. Deus iwatahawysitsa pokzitsiuwy jokbohatu.

²³ Kyze aty ahabo zeka. “Iktsa tsimahaktsa! Anahudikhudikwy bo Deus zipehata my”. Usta ahabo zeka. “Iktsa tsimahaktsa! Atahi Deus zipehata my” mybarapetu mykaranaha. Ana harere bo ba hỹ tsimaha!

²⁴ Sizubarētsa mozumunaha asakta:

“Utakta Deus zikpehata” mybarapetu mykaranaha. “Utakta Deus sohokotsa” mybarapetu mykaranaha. Amy ty kytsa batu zikaha ana ty hi mykaranaha, iwaze kytsa tahapetu sisopyk. “Atakta Deus sohokotsa babata, atakta Deus zipehata babata” mytsaty ahabyitsa mykaranaha. Deus nisiwatahawyhiknahatsa bo mysimiywy tsihikiknaha, batu zikaha – niy.

²⁵ Sesus ispezo niy:

– Kapehawy tsiwabytoktonahaktsa! Abaka taharere ahabo my iwaze kytsakta mozumunahaze siharere bo batu yhỹ tsimaha.

²⁶ Kyze ahape maha zeka:

“Iktsa tsimahaktsa! Deus zipehata jerukbara eze tu my” maha. Usta ahape “Iktsa tsimahaktsa! Deus zipehata wahoro bo inatsuk” maha. Siharere humo batu ahaspirikpo.

²⁷ Utakta Deus zikpehata ahawata mynasikzoze paparizo mykaranaha hyrikoso waha my. Bijoikpe eze tu nanabyitaba hyrikoso my anawa abazubatsa kabo iktsa maha. Aparakbaha hyrikoso bo iktsa maha. Anawatsa aparakbaha kabo iktsa maha. Utakta myziksizoze iwa hi my. Atsoko myziksizo, aparakbaha kabo iktsa maha hyrikoso waha.

²⁸ Myziksizo hỹ. Amakata nihyrikosokda zeka ihoro bo urubutsa mozumubaiknaha. Piborobaiknaha. Urubutsa Deus sohokotsabyitsa watsa, urubutsa tsihoroharẽna ziborokonaha. Deus sohokotsabyitsa kytsa Deus humo sispihikbyitsa bo mybarapetu mykaranaha. Kaharere humo myziksizo naha soho wasani my – Sesus niy.

Deus zipehata mywata niyzik myziksizo.

²⁹ Sesus ispezo:

– Kyze sinini ykarawy mopykze iwatahawytsa mynatakaha. Haramwe ba ziknaharamwe ihizikubyita hi miwa my. Byzoje kino niwatihi ba ihiziku. Byrisoiktsa, bijoikpe ikny mynatsunaha. Bijoikpezektsa mytydydykynaha.

³⁰ Iwaze bijoikpe eze iwatawy natakahaze utakta Deus zikpehata mynasikzo piwatawy. Kytsa aparakbaha anawatahawy bo hi iktsa maha. Ana bo iktsa mahaze sipybyrẽtsa. Mybarawy ezektsa kapokso mopuziukunaha. Utakta bijoikpe satata tuk mynasik iwa kytsa kabo iktsa maha. Mynasikze kamysapyrẽta kahyrizikporẽta kazikwyrẽta ana bo iktsa mahaze mopuziukunaha. Kamysapyrẽta tu iwatsatu mopuziukunaha.

³¹ Kyze porawy wata opykani pypy mykaraze tawata my, iwaze bijoikpe iknyktsa Deus tsumuẽhĩtsitsa siwatawytsitsa bo mysipeha. Nanabyitaba mybarawy ikny iwatawyhiktsitsa mynakypyknaha – niy. Sesus iwa nisi-hyrinymyrykyzo.

Umaha soho humo nisihrinymyryky.

³² Sesus ispezo:

– Kyze umaha bo iktsa tsimaha. Hyritsik nawõze pahahyrinymyry. Umaha taypykze tapara isarapatsa ytsik humo tasaropok zeka iwaze okyrysaro mozipokoroknahaze “O hyritsik mynawõkõ” tsimaha. Ahahyrinymyrẽtsa.

³³ Anawatawywahi mahaze utakta mynasikzoze ahahyrinymyrẽtsa hỹ. Bijoik ezektsa mytydydykynaha iktsa tsimaha utakta mynasikzoze ahahyrinymyrẽtsa hỹ. Atsatu my.

³⁴ Kaharere wasani wabyziutaha! Abaktsa kytsa kaharere pinymyrybaiknaha. Kaharere atsatu mykaraze bykyzehu zuba mohyrikosokdanaha.

³⁵ Bijoikpe mohokda. Wytyk kino mohokda. Kaharere ka ba zikokza. Ba zikpyk. Kaharere tawahi mynapykyk – Sesus niy.

Sesus myziksizo naha humo batu aty tohi ihyrinymyry.

³⁶ Ispezo niy:

– Myziksizo naha humo batu myhyrinymyry. Batu aty tohi nawa taize ja ziky ba zikaha. Bijoikpe iknyktsa Deus tsumuẽhĩtsitsa kino batu sihyrinymyryhy. Uta kino Deus tse babata tu batu kahyrinymyryhy. Kazo zuba tsihyrinymyrẽta.

³⁷ Tapara utakta Deus zikpehata mynasikzoze kytsa Noe okzekywatihi my.

³⁸ Zibiyituhukutu tahadisahakanaha, zikukunaha, tahasukzakanaha, wytykyryk nisioktyhyryknaha. Iwa nikaranaha iwaze Noe tsaraha puẽtsikbyita nizuknize atsaeze takoroze atsoko hyritsik inawõ. Utsa kytsa pihik humo tahababaiknaha. Sispirikpobyitsa tahaharazukik.

³⁹ Anawahi utakta Deus zikpehata myziksizoze kytsa sispihikbyitsa tuze atsoko myziksizo.

⁴⁰ – Iwaze makutsa petoktsa waratok eze pitetekenaha. Estuba Deus piwatawy, kabo pioktyhyryk ustakta motare.

⁴¹ Petokzahaza wanatsitsa mysiwazikinaha. Estuba Deus piwatawy, kabo pioktyhyryk ustatsa katsa motare.

⁴² Mytsatyziu tykaranaha! Ahaspihik tsiwabykynaha! Haneze ahapehatsa mynasikzo ana humo batu ahahyrinomyry hỹ iwatsahi ahaspihik tsiwabyky nahaktsa!

⁴³ Wahoro tsihitsa zinomyryky zeka hawaze unata tityhyryboarēta iwahoro bo mytsukze, piperyky, ba zikuru, iwatahi itsyhyryboarēta iwahoro ba ziktsuk.

⁴⁴ Iwatsahi ahaspihik tsiwabykynahaktsa! Tsimykymynaha atsoko utakta mynasikzo iwatsahi tsimykymynaha wahoro zihitsa watsa ahaspihik tsiwabykynahaktsa! Iwa tsipiperykynahaktsa – Sesus niy.

Sitsumuēhĩtsa wasani isopykta usta pykyhytu zikybyita iwaha humo nisi-hyrinomyryky.

⁴⁵ Sesus puētsik nisihrinomyryky ikiahatsa tsumuēhĩtsitsa watsa. Atahi: – Hawa tsumuēhĩtsa tsimysapyrēta ahabo motsasoko. Aty ipehatsa harere bo hỹ mykara. Iharekykarabyita tu tisokpykziurēta babata ipehatsa nikuruze tsumuēhĩtsa pe:

“Kanamy tsiperyta! Kawahoro Ezektsa tysipokzitsiuktsa! Usta tsumuēhĩtsa sidisahawy ty sibo nyny tsimy” my. Iwaze meky botu niukuru. Sitsumuēhĩtsa nitare.

⁴⁶ Atakta itarabaja pykyhytu mynakara bykyzehu ipehatsa myziksizoze ihumo tsakurēta hỹ.

⁴⁷ Ipehatsa tihi:

“Ikia tsamysapyrēta tu kanamy tsizubarēna tsiperyky iwatahi ahumo kakurēta my, katsyhyryze tarabajaziu tsikykara iwatahi pasapywyky” my.

⁴⁸ Sitsumuēhĩtsa ihyriziktsokzawy pykyhytu habyi zeka tapetu isopyk:

“O kapehatsa azymyny. Batu aidy erete ziky mykara” my iwatahi ipehatsa harere bo batu yhỹ niy.

⁴⁹ Iwaze usta tsumuēhĩtsitsa mysikiki. Tadisahaikik siopuwy pikuikik.

⁵⁰ Ipehatsa myziksizoze sitsumuēhĩtsa batu ity pery. Haramwe haneze sa batu inomyryhy. Ihyrinomyrybyita tu ipehatsa atsoko ziksi.

⁵¹ Ipehatsa ihumo takyriki sinini ykarawy bo pipeha. Iharawatakana-hatsitsa tuk sinini mykara. Situk mopuziuku nabo tahatsapu ty dydydy mykaranaha – Sesus niy.

25

Sityrykduwybyiza des soho nitsasoko.

¹ – Iwaze uta mybarawy bo mynasikzoze Deus tyryktsa hawa ja my – niy. Iwatahi usa soho humo nipamykysozo. Deus tuktsa soho humo nisi-hyrinomyry. Hawa ihumo tsipiperykynaha, asaktsa ihumo piperykynaha Deus bo mysioktyhyryk. Usta batu ziperynaha sinini mykaranaha iwatsahi – Aperykynahaktsa – niy. Atahi:

– Kyze sityrykduwybyiza des niaha. Asiza hi taharikapuwy zisuhyknaha mytasukzata zihobyk tsihikiknaha. Sisopyk hi. Sityrykduwybyiza tasukzata myikaha bo zuba niaha.

² Sityrykduwybyiza mytsyhyry waza sispirikpoza. Sityrykzowybyiza mytsyhyry waza batu sispirikpo. Iwa.

³ Sispirikpobyiza taharikapuwytša tsihirik tuk zuba niaha. Ituta taharikapuwytša eze tsikaeni zuba. Awatu haty batu tysuhyk.

⁴ Usiza sispirikpoza awatuha zisuhykna. Taharikapuwy ty zihareknaha usa awatuha zibykyryknaha.

⁵ Sityrykduwybyiza tasukzata ziperykynaha typerypery batu zuk. Tasukzata ba zikzumu, haneze ja mozumu batu sihyrinomyry. Siötutsarēza tu hini nikaranaha.

⁶ Unopokteze aty ja kakaik niy. “O tasukzata mozumuku iokeryk pāotaha!” niy.

⁷ Iwaze sityrykduwybyiza taharikapuwy ty zikymynaha taharika humo pokpok niaha.

⁸ Kyze sispirikpobyiza sispirikporēza pe “Ahazikaopuwy ty katsa mybo ja! Katsa myrikapuwy nepykbaik” niaha.

⁹ “Katsa kino batu niaha. Sozeka ja katsa myrika opuwy batu huhu my katsa ahabo nyny tsimaha zeka myrika opuwy tsikaeni zuba. Kytsa bo ahazikaopuwy tyzisyhyryknaha okyrysaro humo” niaha.

¹⁰ Iwazahi nitururuknaha, rika opuwy zisuhykna. Asiza sapy baze tasukzata izumu. Sityrykduwybyiza sispirikporēza iperykynahaza iapik niaha. Nikymynahaze tu imyikaha bo niaha. Imyikaha sapy bo nipupunaha kyze aty hokbowy ziockbohik.

¹¹ Iwaze usiza sityrykduwybyiza izumunaha. Sispirikpobyiza hokbowy eze huahua niaha. Isukzata bo hua nikaranaha. “O mypehatsa hokbowy ty zoksaparety” niaha.

¹² “Batu ba niy. Hokbowy ty ahabo zoksapare ba ziky ikiahaka siza batu kanyhy” niy. – Iwa Sesus sityrykduwybyiza soho humo nipamykysoko hawa ihumo tsipiperykynaha nisihyrinomyryky.

¹³ Kyze atahi:

– Hawa taeze myziksizo naha humo batu ahahyrinomyry. Hanawa puruze myziksizoze batu ahahyrinomyry iwatsahi tsiperykynahaktsa! – niy.

Maku tatsumuēhītsa bo okyrysaro zisirezo ana soho humo Sesus nisihyrinomyky.

¹⁴ Kyze utakta myziksizoze Deus tuktsa hawa ja my. Iwaze usa soho humo nipamykysoko, iwa nisihyrinomyryky.

– Maku niparak meky botu niparak. Niparakakze sitsumuēhītsa pe: “Kanamy tsizubarēna tsiperykykta” niy.

¹⁵ Tapara sitsumuēhītsa pe:

“Pany! Okyrysaro ouro hi mytsyhyry wa sīko miutsa abo nyny my. Ahawatu nyny nyny my! Kaokyrysaro humo puētsik tsiptakse!” niy.

Yh̄y niy. Kyze usta tsumuēhītsa pe:

“Pany! Okyrysaro ty ouro hi petok miutsa abo nyny my. Ahawatu nyny nyny my! Kaokyrysaro humo puētsik tsiptakse!” niy.

Yh̄y niy. Kyze usta tsumuēhītsa pe:

“Pany! Okyrysaro ty ouro hi estuba miu abo nyny my. Ahawatu nyny my! Kaokyrysaro humo puētsik tsiptakse!” niy.

Yh̄y niy. Iwa niy. Estuba estuba tsumuēhītsa izikwy humo okyrysaro ibo nyny niy. Iwaze niparak meky botu niukuru.

¹⁶ Atakta tsumuēhītsa okyrysaro mytsyhyry wa miutsa ty aidy kytsa bo. Okyrysaro humo ziakestohi iwaze okyrysaro puētsik ziakesteta, usta okyrysaro mytsyhyry tsawa sīko miutsa ziaakse. Abaka okyrysaro mytsyhyrytsa sepyk niy.

¹⁷ Atakta tsumuēhĩtsa okyryrsaro petok miutsa tu atsatu niy. Okyryrsaro humo ziaoksetohi iwaze okyryrsaro puētsik ziaксе usta okyryrsaro petok miutsa ziaкseta. Abaka okyryrsaro napetok napetok niy.

¹⁸ Atakta tsumuēhĩtsa okyryrsaro estuba zuba miu ziaкseta wytyk hoke bo zikorohik, tapehatsa okyryrsaro zioкpitsĩ. Abaka okyryrsaro estuba zuba nitare.

¹⁹ Kyze sipehatsa meky botu niapykyryk. Aiba ziksizoze tapetu isopyk:

“Katsumuēhĩtsa bo iktsa my kaokryrsaro ty sibо nyny iky hawa ja ity nakaranaha iktsa my. Sihyryziksokzawy ty pykyhytu maha zeka ana bo hi iktsa my” niy. Iwaze sitsumuēhĩtsa sibо huahua niy.

²⁰ Kyze tapara itsumuēhĩtsa ibo zumuze tihi:

“Ikia aokryrsaro ty mytsyhyry wa miutsa kabo nyny tsiky. Uta okyryrsaro mytsyhyry wa puētsik ziaксе abaka okyryrsaro ty mytsyhyrytsa wa sepyk abo nynyrezo my” niy.

²¹ Ipehatsa “O wasani. Ikia tsiapyba, ikia sitsumuēhĩtsa tsimysapyrēta tsimy. Ahyryziksokzawy tsikaeni zuba pykyhytu tsikykara abaka amy ty ipamabikia ty abo nyny my. Kamyikaha bokta! Katuk tsakurētakta!” niy.

²² Kyze ustsа itsumuēhĩtsa ibo zumuze: “Ikia aokryrsaro ty petok miutsa kabo nyny tsiky. Uta okyryrsaro petok puētsik ziaксе abaka okyryrsaro ty napetok napetok abo nynyrezo my” niy.

²³ Ipehatsa:

“O wasani. Ikia tsiapyba ikia sitsumuēhĩtsa tsimysapyrēta niy. Ahyryziksokzawy tsikaeni zuba pykyhytu tsikykara aba amy ty ipamabikia ty abo nyny my. Kamyikaha bokta! Katuk tsakurētakta” niy.

²⁴ Kyze usta itsumuēhĩtsa ibo zumuze: “Ikia aokryrsaro ty estuba zuba miu kabo nyny tsiky. Ikia humo kytsa sinamybyitsa. Ikia atsuhuk sizōjanita bo ba ziksiparik. Tsimysizozeke zuba. Batu tywe kytsa nisizozokonaha ikia tsyhyryze. Ana ty hi kahyrinymyrēta.

²⁵ Iwatahi apokso kapybyrēta. Wytyk eze aokryrsaro iytykik. Abaka aokryrsaro estuba zuba miu abo nynyrezo my” niy.

²⁶ Iwaze ipehatsa zibetsakak:

“O ikia katsumuēhĩtsa batu atsyhyry. Ikia iakmyita. Ikia mytsaty kahumo kytsa sinamybyitsa. Ikia mytsaty isty parikbyita tu tsiksizozoko zuba.

²⁷ Iwa mytsaty tsimyzeka amy skaraba maku okyryrsaro zozowy bo kaokryrsaro ty batu nynsypyk tsiky. Atakta kaokryrsaro humo ziaксе tohi. Iwaze kaokryrsaro humo tsiky zeka tihi, zibiaakta okyryrsaro nynyrezoze kaokryrsaro tsikaeni zuba tsiakse. Iwa ziksizoze kaokryrsaro puētsik zuba kabo nynyrezo tsimy” niy.

²⁸ Kyze pehatsa ustsа tsumuēhĩtsa pe:

“Okyryrsaro ty estuba zuba taty okoktaha! Tapara tsumuēhĩtsa atakta okyryrsaro mytsyhyrytsa wa sĩko miutsa nynytahaktsa ibo hi ana okyryrsaro ty estuba nyny tsimaha” niy.

²⁹ Aty tapehatsa tsyhyryze tarabajaziu my zeka tsakurēta iwatahi ihyryziksokzawy tohi my. Tisokpykziurēta mozik. Aty tapehatsa tsyhyryze batu tarabaja my ihyryziksokzawy tsikaeni zuba ziaксеbaik. Itsyhyrybyita tuze inamybyita mozik. Ihumo batu iaku iwatahi batu ihyryziksokza nabo pāoty my.

³⁰ Tatsumuēhĩtsa iakmyita ape bo miwa ha zuba typapykik nabo mopuziuku takyrikita tu tatsapu ty dydydy mykara niy. Iwa sisoho Sesus nipamykysoko Deus tyryktsa soho humo nisihyrinymyryky. Hawa Deus isapyha ty ituktsa bo nyny my nisihyrinymyryky. Wastuhu sisokpykziurētsa

moziknaha ustsá ituktsa isapyha ty batu yhȳ maha zeka ana kino Deus piakse ustsá bo nyny my – niy.

Sesus myziksizoze hawa aparakbaha soho motsaso.

³¹ Kyze Sesus tihi:

– Utakta Deus zikpehata ahawata ikyzik mynasikzoze abazuba my. Izikwyrēnikita my. Iwatahi kadyhywy tisapyrēta bete modyhyky. Mynasikzoze bjoikpe iknyktsa Deus tsumuēhītsitsa sizubarētsa katuk mynasiknaha.

³² Iwaze bjoikpe iknyktsitsa mybarawy ezektsa sizubarētsa kaokeryk my-sioқтыhyryknaha. Nabo sizubarētsa mynapykyknaha. Hawa hozipyrykzatsa perytsa myraratsa ty meky taba tu hozipyrykzatsa usta taba kabertotsa, anawata utakta mybarawy ezektsa petok metutu my. Nataba simysapyrētsa mekytaba tu simysapybyitsa iwa kaokeryk mynapykyrykbanaha.

³³ Asaktsa simysapybyitsa kapawazo taba maha. Ustsá simysapyrētsa kino kapanuryk taba maha.

³⁴ Kyze kytsa kapanuryk tabaktsa pe my:

“Pany!” Ikihatsa bo Deus kazo pahasapywyky, abaka ityryktsa babatsa tsimoziknaha. Deus isuknihybyze ikiahatsa soho mytsaty nikara hawa ityryktsa tsimoziknaha ana ty hi mytsaty nikara. Isapyhaty ahabo nyny my, hawa ihyrytsa bo nyny my nawata ty ikiahatsa niwatihi ahabo nyny my.

³⁵⁻³⁶ Karaparēta ikykaraze ahadisahawy ty kabo nyny tsikykaranaha. Karapukrēta ikykaraze pihik ty kabo nyny tsikykaranaha. Utakta bipyritsa mozikze ikiahatsa kape:

“Paku tsimy. Mywahoro awanu sapy bo” tsikykaranaha. Kakpyrēta ikykaraze ahasuk ty kabo nyny tsikykaranaha. Kamyitsapyrēta ikykaraze kahumo ahamypokzitsiukrētsa. Sakyriukrēnikitsa hurukwy bo zikuruknahaze ikiahatsa kabo tsikozorēnaha. Kape “O katsa abo tsimytsumuēhī tsihikiknaha.” tsikykaranaha.

³⁷⁻³⁸ Iwaze simysapyrētsa kape maha:

“O abazubata iwaze batu tsikykaranaha. Katsaktsa ikia araparētaze disahawyty batu abo nyny tsikaha. Ikiá arapukrētaze batu abo nyny tsikaha. Ikiá bipyri tuze batu ape ‘paku tykta!’ batu ape ha tsikaha. Ikiá batu asuku batu abo nyny tsikaha.

³⁹ Ikiá amyitsapyrētaze ahumo batu mypokzitsiuk. Ikiá sakyriukrēnikitsa hurukwy eze katsaktsa batu abo kozore” niaha.

⁴⁰ Iwaze utakta abazubata tihi:

“Sinamybyitsa bo tsiksapywykynahaze kabo hi tsiksapywykynaha. Batu kabo tsikykaranaha sinamybyitsa bo tsikykaranaha, sibo tsiksitsumuēhīnahaze kabo tsiktsumuēhīnaha kabo tsizasapykynahaze kakurēta. Ikihatsa sinamybyitsa tsizasapykynahaze kakurēta kino asahi katukytsa watsa humo.”

⁴¹ Iwaze utakta kytsa bo simysapybyikitsa kapawazo taba ispe my:

“Nabo pāotaha!” Ikihatsa ahamumo Deus takyriki sinini ykarawy bo pahapeha, anaeze izo eze tynakoronaha ba zikbe. Anasapy Deus botu zikyry Satanás tsyhyryze iapiktsa kino niwatihi zikyry.

⁴²⁻⁴³ Karaparētaze ahadisahawy ty batu kabo nyny tsikaha. Karapukrētaze pihik ty batu kabo nyny tsikaha. Bipyri tuze ikiahatsa batu tyso. “Paku tsimy mywahoro awanu sapy” iwa batu tyso. Kakpyrētaze batu kasuku humo ahasuk ty batu kabo nyny tsikaha. Kamyitsapyrētaze kahumo batu ahamypokzitsiuk. Sakyriukrēnikitsa hurukwy eze ikypykyrykze batu kabo kozore zikoktyhyryknaha ikiahatsa kahumo batu ahamypokzitsiuk, iwatahi Deus sinini ykarawy bo pahapehahik.

⁴⁴ Iwaze asaktsa simysapybyitsa kape maha:

“O abazubata batu atyny tsikaha. Katsaktsa ikia araparētaze batu abo iktsa tsikaha. Ikia arapukrēta, bipyri, amyitsapyrēta, sakyriukrēnikitsa hurukwy eze iwatsa batu abo iktsa tsikaha, iwatsahi batu aty tsumuēhī” maha.

⁴⁵ Iwaze utakta abazubata tihi:

“Sinamybyikitsa bo tsisapybyikinahaze kabo hi tsiksapybyikinaha, batu isty tsumuēhīze batu katy tsumuēhī” my. Sinamybyikitsa katuk kytsa watsa.

⁴⁶ Asaktsa simysapybyikitsa tu kapawazo taba sinini ykarawy bo mysipehahik. Utsa kapanuryk taba simysapyrētsa tu iwatsahi Deus tuk tahawahi mynapykyryknaha. Iwa atsaesubaha metutu my – Sesus niy.

26

Sesus zibeze tsihikiknaha.

¹ Kyze Sesus kytsa bo nisihyrinymyrybaze zinymyrykynahatsa pe:

– Petok puruze Sudeutsa myikaha Paskoa my.

² Nawa puruze Deus taparaktsa nisitsumuēhīze bo mytsaty ziknakaranaha. Simyikaha bo tsimahaze utakta Deus zikpehata kasukyrytsitsa pikbezenaha, iharapatawyhyta humo pikyrikiziknaha – niy.

³ Kyze taparaktsa Deus wahoro zubata eze ziknapamykysokonahatsitsa, taparaktsa kapitaōtsa Sudeutsa ahatsa niwatihi inapykyknaha, taparakta ziknapamykysokota Kajapas inarokota iwahoro bo inauzuzuknaha.

⁴ Asaktsa Sesus isukyrytsitsa niaha. Itsipa humo zioқтыhyryknaha tabeze tsihikik. Kytsa papatu tsahi Sesus pibeze tsihikiknaha. Asa zuba tihi:

– Hawa zeka kytsa papatu tabezehik – nikaranaha.

⁵ – Mymyikaha eze tuze Sesus ba zibezenaha, kytsa pokso mypybyrētsa. Tabeze zeka nawa puruze kytsa mymybabanaha, sizubarētsa moakmyinaha – niaha.

Sesus Simaō Pariseu wahoro bo niy. Anaeze wytyk ibo jokmorēnikia ty ziharasusuhik.

⁶ Kyze Sesus Betanija hudikhudikwy bo niy. Simaō wahoro bo nitsuk. Tapara Simaō iakōrōrōtsa humo nibibibaka ata hi nizororota niy. Inaro Simaō iakōrōrōta niy.

⁷ Anaeze Sesus tadisahakaze sidisahakawy hwibihitsa baze nidyhyky iwaze wytyk inatsuk. Atatsa ibo zumu. Atatsa jokmorēnikia ty tsipokzitsiarēna zibykyk. Jokmorēnikia suk tisapyrēna arabastero harahare hi tsipokzitsiarēna. Atatsa Sesus bo zumuze tasuk zisoiktsakik iwaze jokmorēnikia ty zihareksusuku. Iwa nikara.

⁸ Zinymyrykynahatsa atatsa bo iktsa niahaze ihumo tahakyrikinaha. Sisakparētsa. Atatsa jokmorēnikia ty ba ziharasusu mytsaty nikaranaha.

– Amy skaraba jokmorēnikia ty ziharasusuku.

⁹ Ana jokmorēnikia tsipokzitsiarēna hỹ. Katsaktsa jokmorēnikia ty tahuak zeka okyryrsaro tsizubarēna tsimaha. Kyze okyryrsaro tsizubarēna ty sinamybyikitsa bo nyny tsimaha zeka wasani tsimaha – nikaranaha.

¹⁰ Kyze siharere humo Sesus tsihyrinymyrēta. Atahi:

– Awatu betsak betsak byitaha. Atatsa tsimysapyrētatsa. Amy humo sa tsasukatsihikarētsa atatsa kahumo wasani nikara.

¹¹ Sinamybyikitsa ahapauk baze mynapykyryknaha. Tysitsumuēhīekiknaha zeka wasani my. Utakta ahatuk batu mopykyryk kabo ka ba nyny zikaha.

¹² Abanurytu pikbezenaha. Mohyrikosokda. Atatsa kanury ziharasusuku kymyba. Mohyrikosokdaze atatsa botu jokmorēnikia ty pikarasusu – niy.

13 – Kaharere wasani nanabyitaba Deus wasania ty kytsa sizubarëtsa bo motsasonaha. Hawa atatsa katsyhyryze niy ana kino niwatihi nanabyitaba mynapamykysokonaha niwatihi iwaze kytsa atatsa soho bo mytsaty mykaranaha – niy.

Sudas Sesus sukyrytsitsa bo niy.

14 Kyze Sudas Iskariotses estuba Sesus zinymyrykyta isukyrytsitsa bo zumu. Imyspihikbatanikita tu Deus wahoro zubata eze ziknapamykysokonahatsa tuk taparakta bo zumu.

15 Atahi:

– O Sesus humo batu ahakparawy. Tsipibeze tsihikiknaha. Uta pahatsumuëhĩ. Bykyze uta hi ibo pahaoktyhyryk. Uta pahatsumuëhĩ zeka amy ty sa kabo nyny tsimaha – niy.

– O ikia tsimytsumuëhĩ zeka okyrysaro ty abo nyny tsimaha, tirĩta okyrysaro parata hi abo nyny tsimaha – niaha.

– Yhÿ. Bykyzehuta! Aba piksizo.

– Yhÿ. Tsipiksi.

16 Kyze Sudas mytsaty nikara – Hawa sa Sesus bo mysioktyhyryk. Yhÿ ja. Bykyzehu – niy. Ziperyky zuba.

Sesus tamyikaha ty tadisahaka.

17 Kyze estuba puruze imyikaha eze Sudeutsa Deus taparaktsa nisitsumuëhĩ naha bo mytsaty ziknakaranaha. Atsikara ikpytowybara tu ty ziokoknaha tamyikaha eze nikaranaha. Nawa puruze zinymyrykynahatsa Sesus pe:

– Hana eze sa mymyikaha tsipikymynaha. Hana eze sa ikia baze tsimymydisahanaha – niaha.

18 – O nabo myzubaha boktsa! Tohi boktsa! ipe myhyrinymyrykytsa tihi:

“Bykyze pikbezenaha. Awahoro eze mymyikaha bo tsimaha. Awahoro utakta zinymyrykynahatsa tuk hauk tsimaha” tsimaha – niy.

19 Yhÿ niaha. Sesus harere bo hyÿ niaha. Simyikaha nakymy, hozipyrykzatsa ni nizokonaha. Wasani niaha.

20 Zunubakaze Sesus tuk zinymyrykynahatsa sizubarëtsa dose tahadisahanaha.

21 Tahadisahanahaze Sesus ispe niy:

– Kaharere wasani ahatuk estuba. “O Sesus kaharereziwybyita. Abaka batu Sesus tukta my” mykara. Atakta kahumo iakyriwy tu mozuruku kasukyrytsitsa tuk kabo nasioktynaha – niy.

22 Iwaha ziwabynahatsa hi batu siaku. Sisukatsihikrëtsa tu ipe:

– O aty skaraba “Utakta batu Utakta batu” – nikaranaha.

23 – Estuba katuk tamihy ty sok mytahi kasukyrytsitsa bo pikoktyhyryk.

24 Utakta Deus zikpehata kytsa wata ikyzik ahasapyzekeny mohyrikosokda. Tubabatu kytsa Deus harere papeu humo isoho botu ziwatahakanaha. Abaka ziwatahakanaha atsatu my. Atakta Deus zikpehata humo iakyriwy tu mozuruku sinini mykara. Atakta ipuruk byizeka wasani my, atahi sinini ykarawy bo tawahi mynapykyryk – niy.

25 Iwaze Sudas iakyriwy tuze Sesus pe niy:

– O kahyrinymyrykytsa, ikia hi sa kasoho tsimytasaso – niy.

– Ikia hi tsimytasoko – niy.

Sesus tatuktsa tuk tadisahaka.

26 Kyze tahadisahanahaze, Sesus atsikara hyritywaha ty okok niy Deus pe:

– Ikia tsamysapyrêta ahumo ka mykurêtsa – niy. Atsikara ty tsak niy. Zinymyrykynahatsa bo nyny niy:

– O hauk tahaktsa! Atsikara kanury waha my. Naka hauk tsimahaze kanury soho bo mytsaty tsimaha. “Sesus mysapyzekenihyrikosokda” tsimaha – niy. Iwa niaha.

²⁷ Kyze taoporosuk ty paik niy Deus pe:

– Ikia tsamysapyrêta ahumo ka mykurêtsa – niy. Taoporosuk ty zinymyrykynahatsa bo nyny niy:

– O tsôtahaktsa kytsa!

²⁸ Duabohotsa tsik kaspu waha my. Tsô tsimahaze kaspu soho bo mytsaty tsimaha. Hawa ahasapyzekenihyrikosokda. Tubabatu kaharere nawa niy abazuba atsatu my. Iwatahi Deus ahasoho pe my: “simysapybara humo mysiokzo iwatsahi kaokzeka meky watu moziknaha” Deus nikara – niy.

²⁹ – Utakta aba zuba duabohotsa tsik piku. Pikuzoze Deus kazo tuk kytsa tuk asaktsa kaharere bo hyÿ mykaranaha katyryktsa moziknaha. Deus tyryktsa mozumunahaze pikuzo – niy. Iwaze sizubarêtsa duabohotsa tsik zikunaha.

³⁰ Iwaze Deus bo nisakibazikiknaha – O ikia tsamysapyrêta – niaha. Deus bo nisakibazibanahaze ape bo ziponaha. Oriwereja inarokoha hara bo niukurunaha.

Sesus Peduru nizukpeheze – O batu Sesus kanyhy tsimy – niy.

³¹ Kyze Sesus ispe niy:

– Utakta mohyrikosokda. Aba ikiahatsa kahumo batu ahaspirikpo, tsipikarekbaiknaha. Tubabatu Deus harere tihi:

“Uta hozipyrykzatsa irarakata pibeze iwaze hozipyrykzatsa nanabyitaba mowakbaiknaha” Deus niy. Iharere taparakta ituktsa kino niwatihi sisoho nitsasoko. Iwaha kabo my. Kasukyrytsitsa pokso tsimywakiknaha.

³² Deus mozikyryzikpowyzoze aharaze Karireja bo my – niy.

³³ Kyze Peduru:

– Utsa ahumo batu sispirikpo utakta batu. Uta kino atuk mykara ba zaharek – niy.

³⁴ – O Peduru, kyze kokuaro ipobyi tu “Batu Sesus kanyhy”. Iwa harakykbyi mybarapetu tsimy – niy.

³⁵ – O niwazubakta! Atuk tu pikbezenaha zeka “Utakta Sesus tukta zinymyrykyta” my – niy.

Sizubarêtsa kino niwatihi nikaranaha.

Sesus tuk zinymyrykynahatsa tuk Oriwereja hara bo nidoko.

³⁶ Kyze Sesus tuk zinymyrykynahatsa tuk niukurunaha. Kesemani isaziktsa koso bo zumunahaze ispe niy:

– Anaeze dyhy dyhytaha. Uta kino nohi eze Deus bo mopamykyso – niy.

³⁷ Utsa dyhy dyhy niahaze, tatuktsa Peduru, Suão, Tsiaku iwatsa nisioktyhyk. Sesus mytsaty nikara.

– O bykyze pikbezenaha – nikara. Batu iaku. Tisukatsihikrêta.

³⁸ Tatuktsa pe:

– O batu kaku. Kasukatsihikrêta tu pomoza tawa muku. Tykareze tu tsipiperynaha. Ahatôtsabyrihu ja! – niy.

³⁹ Siharapu bo harakmotohi niy. Wytyk bo okmymy niy. Deus bo nipamykysoko. Iwaze Deus pe niy:

– O kasukyrytsitsa kabo mozumunaha kazo. Sinini mynakara. Nabo kabara botu sakpyty. Utakta batu kahyrikosokda tsihik. Ikia kape:

“Tyhyrikosokdakta” tsimy zeka mohyrikosokda aharere bo hyÿ my – niy.

⁴⁰ Kyze tatuktsa harakykbyihi ahatsa bo ziksizo zurubakanaha. Peduru pe niy:

– O tsikurubaiknaha ja kytsa. Katuk batu tsiperykynaha ja hini hini byitahaktsa.

⁴¹ Ikiahatsa Deus bo typamykysonahaktsa! Ikiahatsa tihi:

“O Deus myzo katsaktsa batu mypunihik ana kino tsinymyry mysapybara humo batu mykparawy iwatahi tymytsumuēhī” iwatsahi Satanas harere bo batu hỹ tsimaha. Hawa ha ty wasani tsipitsihikiknaha, ahapunihikbyitsa tu kaharere bo batu yhỹ tsimaha ana humo hi kahyrinymyrēta – Sesus niy.

⁴² Siharapu bozo niyze iwaze Deus bo nipamykysokozo:

– O kazo hawa ha ty tsimyzihihik ana bo hi hyỹ my. “Tyhyrikosokda” tsimy zeka, uta mohyrikosokda sinini mynakara – niy.

⁴³ Iwaze tatuktsa bo ziksizo. Zurubakazonaha. Siōtutsarētsa. Iwaze niparakzo.

⁴⁴ Sesus siharapu bozo niyze Deus bo nipamykysokozo. Iharere atsatu Deus bo nipamykysokozo.

⁴⁵ Iwaze zinymyrykynahatsa bo ziksizo.

– O tsikpurubakanaha zuba. Tsipahabyrykynaha. Abaka batukta! Utakta Deus zikpehata kytsa wata ikyzik kasukyrytsitsa kabo mozumukunaha abahi pikbezenaha. Sinini mynakara.

⁴⁶ Kyiktahaktsa! Tupaktsa! Atakta kahumo iakyriwy kasukyrytsitsa kabo mynasioktykyryk mozumubahanikinaha. Kasukyrytsitsa tuk mozumuku.

Isukyrytsitsa Sesus tsipa humo zioqtyhyryknaha.

⁴⁷ Ana hi nipamykysokoze Sudas ibo zumu. Sudas zinymyrykyta iharerez-iubyitsa tuk, isukyrytsitsa Sesus bo inasioktykyryk. Kytsa sizubarētsa ituk tahatanoratsa tahaupetsa iwa nasebykyknaha. Sudeutsa, taparaktsa Deus wahoro zubata eze ziknapamykysokonahatsa kino niwatihi nisipehanaha.

⁴⁸ Tapara Sudas ispe niy:

– Kytsa Sesus tuk piwatawyze piharapyrykze ahanyhybyitsa tsipinyaha. Ataty paiktahaktsa! Itsipa humo tsioktyhyryknahaktsa! – niy.

⁴⁹ Iwaze Sesus bo zumuze:

– O kahyrinymyrytsa ikzumu – niy. Sesus ziharapyryk.

⁵⁰ Sesus:

– Katukta katy hawa tsimy aidytykta tsimy – niy. Kyze kytsa Sesus nizokbatsinaha itsipa humo zioqtyhyknaha.

⁵¹ Ipaubazekta Sesus tuk zinymyrykyta tasokorotsapu zibokik. Ziknapamykysokota taparakta itsumuēhītsa ispi zezykik.

⁵² Sesus:

– Niwazubakta. Asokorotsapu isapy bo kurukty. Ikiahatsa ahasokorotsaputsa tuk tsipihuzedukunaha zeka ikiahatsa kino niwatihi sokorotsaputsa ty pahabanaha.

⁵³ Kazo bo myzapyky zeka:

“O kazo tsipiktsumuēhīkta my zeka tahi bijoikpe iknyktsitsa sizubarētsa kabo mysipeha ana kino ahahyrinymyryhu ja.

⁵⁴ O kazo tsipiktsumuēhīkta” batu tsaso ana kino my zeka Deus harere batu wasani my. Tubabatu Deus harere kasoho botu nitsaso iwa atsatu mykara hỹ – niy.

⁵⁵ Iwaze Sesus kytsa sizubarētsa pe niy:

– Utakta katsyhyryboabyita. Batu kakyri iwaze amy skaraba ahaupetsa ahatanorotsa iwatsa tsiknasebykyknaha! Awatutaha. Ikiahatsa tuk zikzibytuhukutu Deus wahoro zubata eze ahahyrinymyryky. Iwatsa tu sa batu katsipa humo katy oktyhyryk. Abaka wasiza katsipa humo tsikoktyhyryknaha.

⁵⁶ Kytsa pikoktyhyryknaha iwa niy. Hawa ha ty Deus harere tubabatu nikara atsatu mykara. Iharere wasani my – niy.

Iwaze anaty ziwabynahaze zinymyrykynahatsa niwakbaiknaha. Sipybyrëtsa. Kytsa pokso niwakiknaha.

Kytsa Sesus kytsaharerewabytsitsa bo ziooktyhyryknaha.

⁵⁷ Iwaze asaktsa Sesus tsipa humo ziooktyhyryknaha Kajapas wahoro bo niaha. Kajapas imyhyrizikwanikita, Deus wahoro zubata eze ziknapamykysokonahatsa tuk. Moises harere kytsa nisihyrinymyrykynahatsa, Sudeutsa taparaktsa iwatsa sizubarëtsa anaeze ziknapykyryknaha.

⁵⁸ Peduru Sesus hapik atazuba niukuru. Iwaze Kajapas wahoro peze nidyhyky. Deus wahoro zubata perytsitsa tuk nidyhyky. Hawa sa maha ana kino ziwaby tsihikik iwatahi kytsa baze nidyhyky.

⁵⁹ Taparaktsa Deus wahoro zubata eze ziknapamykysokonahatsa, ustsaktsa kytsa Deus wahoro siharerewabytsitsa ahatsa hawa kytsa imysapybyi ziwabykynaha. Asahi inakypyknahaze kytsa Sesus soho metuwu piwaby tsihikiknaha. Iwaze siharere humo pibeze tsihikiknaha. Isoho mekywa tu nitsasokonaha iwatsahi batu tybeze.

⁶⁰ Kytsa isoho zispihikbatakanaha, siharere batu amy tohi iwatsahi Sesus batu tybeze. Mekywatu nitsasokonaha.

⁶¹ Kyze kytsa petoktsa tihi:

– Atakta maku tihi “Deus wahoro zubata mokarakbaik zeka petok puruze mozoknizo” niy – niaha.

⁶² Nitsasobanahaze, Kajapas myhyrizikwanikita rikto niyze:

– Amo Sesus kytsa asoho nitsasokonaha asoho zisapybyikinaha ana soho tsiwaby. Hawa sa tsimy – niy.

⁶³ Batu harere, tahabyi pyk zuba niy. Iwaze ziknapamykysokota tihi:

– Deus okzeka atahi aharere piwabyky hawa Sesus. Ikiahi ja Deus zapehata. Ikia ja Deus tse – niy.

⁶⁴ – Ikiahi iwa tsimytsasoko. Abaka Deus zipehata atahi Deus zikwyrënikita ipanuryk taba dyhy my. Utakta bijoikpe satata tuk mynasikzo ana bo kino iktsa tsimaha – niy.

⁶⁵ Imyhyrizikwanikita anaharere ziwabyze takyriki. Tasuk zisykik iwa takyrikize ziwatawyky iwa sisopyk. Atahi:

– Deus soho ziharereziubyiki anaharere tsiwabykynaha. Niwazuba ustsaktsa harere batu mywaby – niy.

⁶⁶ – Hawa ha ty isoho mytsaty tsimykaranaha. Hawa sa ity tsimaha – niy. – Hawa batu sapy nikara mytsaty tsimykaranaha. Iwaze tabezehikta! tabezehikta! – nikaranaha.

⁶⁷ Zehezozokoknaha. Zihyrizikwarakanahaze nitsakikinaha. – Aty sa zaki.

⁶⁸ Deus zapehata babata tsimy zeka. Aty sa zaki – nikaranaha.

Peduru zispihikbataka – Sesus batu kanyhy – mybarapetu nikara.

⁶⁹ Kyze Peduru wahoro peze nidyhyky. Itsumuëhïtsata ibo nikoza. Atatsahi:

– O ikia hi sa Sesus Karireja ezekta tukta – niy.

⁷⁰ Peduru:

– O batu. Batu kanyhy – kytsa pe niy.

⁷¹ Kyze pakuwyta boze ustaktsa itsumuëhïtsata kytsa pe:

– Atakta Sesus Nasare ezekta tukta – niy.

⁷² – O batukta niy. Kaharere wasani my Sesus batu kanyhy – niy.

⁷³ Kyze kytsa ibo niaha. Asaktsa:

– Ikia Sesus tukta tsimy. Aharere Karireja ezekta wata – niaha.

⁷⁴ Iwaze Peduru tsipybyrêta nitsaso:

– Batu kanyhy. Aty skaraba Sesus. Deus okzeka motsaso iwaze kaharere imysapybara zeka, Deus piksininiwyky, motsasozo Sesus batu kanyhy – niy. Nitsasokoze atsoko kokuaro nipo

⁷⁵ Peduru mytsaty niy. Tapara Sesus:

– O kokuaro pobyituze “Batu Sesus kanyhy” iwa tsimytsaso – niy. Peduru niparak. Ape baze nipuziuku.

27

Kytsa Sesus Piratus bo zioқтыhyryknaha.

¹ Kyze zokorobyitu Sudeutsa taparaktsa sizubarêtsa ziknapamykysokonahatsa Deus wahoro zubata eze iwa inakypyknahaze asakta hi:

– Hawa sa tsimaha iwaze Sesus tabezehik. Katsakta ba zibezena batu zikaha iwatsahi Piratus bo abazubata ata hi zuba mymypeha – niaha.

² Iwaze kytsa Sesus zipawarakanaha, Piratus bo zioқтыhyryknaha. Piratus myhyrizikwanikita iharere awatu zeka Sudeutsa ba zibezena.

Sudas atatu tabeze.

³ Kyze Sudas atakta Sesus humo iakyriwy – Sesus tabeze – ana hi ziwabyze tisukatsihikrêta niyzik. Imysapybyita hi zerekyzyky iwatahi okyrysaro parata hi ziknapamykysokonahatsa taparaktsa kapitâotsa ahatsa sibo okyrysaro ty nynyrezo niy.

⁴ Atahi:

– Utakta kamyspihikbatakanikita Sesus tsimysapyrêta aba kytsa pibezena – niy. Kytsa ipe:

– Hawa tsiky ana humo hi batu mytsaty.

Hawa tsiky ikia hi ana humo mytsatyziu tsimykara – niaha.

⁵ Iwaze Sudas okyrysaro parata hi Deus wahoro zubata eze nisiparahikze zoihik. Atatu tabeze tsazikiha humo tatsubere borok iwa tabeze.

⁶ Ziknapamykysokonahatsa taparaktsa okyrysaro parata hi zebykyknaha atsahi:

– Okyrysaro maku huakba ziaksenaha iwaze Deus wahoro zubata okyrysaro suk bo batu koro tsimaha. Moises harere ana hi nymyhyrinymyryky. Hawa ja tsimaha – niaha.

⁷ Iwaze nahapepehaikiknahaze okyrysaro ty itsuhuk zihuaknaha. Maku aektsikni humo tarabaja nikara itsuhuk ziaksenaha okyrysaro humo. Anaee Sudeutsabyitsa mysiytyknaha.

⁸ Aba kino – Iytyk spu – inarokoha nikaranaha. Okyrysaro itsuhuk huak niaha maku nihyrikosokda.

⁹ Ana ty hi niahaze Deus sohokotsa Seremias tubabatu ziwatahaka atsatu my. Ta tihi:

– Okyrysaro ty okyrysaro parata hi zibykyknaha, ana kino Sudeutsa ihumo zihuaknaha, kyze itsuhuk ty bo ziaксеhyk niaha.

¹⁰ Ana okyrysaro ty itsuhuk huak ziaксеhyknaha. Aektsikni humo tarabaja ziknakarata itsuhuk huak ziaксеhyk naha okyrysaro tuk – Seremias niy. Hawa Deus niy Seremias botu ziwatahaka abazuba anaharere atsatu niy.

Kytsa Sesus Piratus bo zioқтыhyryknaha.

¹¹ Kyze Sesus Piratus myhyrizikwanikita bo zioқтыkyryknaha. Piratus:

– O Sesus ikia ja Sudeutsa pehatsa – niy. – Yhÿ ikia hi tsiktsaso – niy.

¹² Ziknapamykysokonahatsa taparaktsa kapitaôtsa kino niwatihi nitsasokonaha:

– Atakta zisapybyiki – nikaranaha. Sesus sibo batu harere. Tahabyi ziwaby zuba.

¹³ Iwaze Piratus ipe niy:

– Siharere ty sa batu waby. Amo sa batu mysapy asoho nitsasokonaha. Iwa sa wasani – niy.

¹⁴ Batu harere. Iwatahi Piratus tsipybyrëta nikara iwatahi:

– O amo skaraba batu harere ziky, batu aokani – niy.

Sesus zibeze tsihikiknaha.

¹⁵ Tubabatu Paskoa myikaha eze tahasopyk ty hi ziknakaranahaze Piratus maku estuba nizuke. Kytsa maku ziwatawyhik.

¹⁶ Kytsa sizubarëtsa sakyriukrënikitsa hurukwy eze, estuba Bahabas inarokota. Kytsa bakatsa iwata hi nitsahuruknaha.

¹⁷ Kytsa sizubarëtsa inakypyknahaze Piratus ispe niy:

– Aty sa myzuke. Bahabas ja ahabo myzuke. Sesus kytsa isoho “O Kiristu Deus zipehata” maha, atahi ja ahabo myzuke. Aty sa tsipiwatawynaha – niy.

¹⁸ Ziknapamykysokonahatsa sizokdirëtsa iwatsahi Sesus ibo zioқтыhyryknaha ana humo hi Piratus tsihyrinymyrëta.

¹⁹ Piratus kytsa harerewabykywy eze nidyhyky. Kyze ioke mysokotsa zipeha. Atahi:

– O aoke tihi “Unata Sesus soho zitsotospkyke. Atakta tsimysapyrëta. Batu imyi. Mybara botu sapy ty katsotospkyk humo mytsatyziu tsimykara” niy.

²⁰ Ziknapamykysokonahatsa taparaktsa kapitaõtsa kino niwatihi kytsa sizubarëtsa bo niaha. Nisipehaka “O Bahabas tsipiwatawynaha.” Sesus “tabezekta” tsimykaranaha, iwa Piratus bo tsimykaranaha – nikaranaha. Iwa kytsa papatu sukyryze nikaranaha.

²¹ Kyze Piratus kytsa sizubarëtsa pe:

– O aty sa myzuke. Bahabas ja myzuke. Sesus ja myzuke. Aty skaraba iwatawyhyta – niy.

– Bahabas! – nikaranaha.

²² – Sesus ja. Atakta kytsa isoho Deus zipehata Kiristu my. Hawa sa my Sesus ty – niy.

– Tabezekta! Iharapatawyhyta humo tabezekta! – nikaranaha.

²³ – Hawa niyta sa tsipibeze tsihikiknaha. Batu imyiki – niy. Kytsa aparakbaha:

– Tabezekta! – kazi nikaranaha.

²⁴ Kytsa sizubarëtsa asiba niharapehudidunaha iwaze Piratus harere batu siwabyhy ana humo hi tsipybyrëta. Iwaze pihik ty tatsyhyrype pikik. Sizubarëtsa okzeka tatsyhyrype pikikze atahi ispe niy:

– Atakta maku tsimysapyrëta. Iwatahi tsipibezena zeka batu kamyzihik ikiahatsa zuba “tsibezena” – niy.

²⁵ Kyze kytsa sizubarëtsa tihi:

– Katsa mytsekokatsa niwatihi ata maku mynamopykwy zeka wasi – nikaranaha.

²⁶ Iwaze Bahabas nizuke, Sesus ta batu, sodadutsa pe:

– O tytsakinahaktsa! Siraratsa hwyk tsadikihi ty tytsakinaha. Bykyze iharapatawyhyta humo tsibezenahtsa! – niy.

Sodadutsa Sesus zimijakanaha. Inisaha ty zitsorikiknaha.

²⁷ Iwaze sodadutsa Piratus wahoro bo zioқтыhyryknaha. Sodadutsa sizubarëtsa iharape inakypykyknaha.

²⁸ Isuk ty hyrykok niaha. Isuk tsahirita ty zisuknaha.

²⁹ Inisaha ty zitsorikiknahaze iharek humo pu niaha. Hwi sarapa tsibik ty ipanuryk taba tybykyhy niaha. Iwaze zimyjakanaha. Tahaekaratsa humo iokeryk puruk puruk nikaranaha, sipehakatsa okeryk watsa iwa zisininiwy. Asa tihi:

– O Sudeutsa abazubata ja. Tsizuruku mypehatsa ana kino tsimyzihikiknaha – mybarapetu nikaranaha.

³⁰ Ity zehezozokikiknaha. Hwi ty tahawa tu ziharektotokonaha.

³¹ Zimyjabanahaze isuk tsahirita ty hyrykok niaha. Isukbabata ty ihumo korobykzo niaha. Iwaze mekybotu zioctyhyryknaha. Nabo tabeze nikaranaha. Iharapatawyhyta humo tabeze nikaranaha.

Iharapatawyhyta humo zihyrizikiknaha.

³² Ske buruk niukurunahaze Simaõ nasihobyk. Simaõ Sireni ezekta niy. Sodadutsa ipe niaha:

– O iharapatawyhyta tsebykta! – niaha.

³³ Nabo zebykyryk. Anasapy kokota inarokota Sudeutsa harere iharekpokoso ziwatawy.

³⁴ Anabo zumunahaze mymyitsapyri hwi ty Sesus bo nyny niaha. Naka isipianikia ty tsikaeni zuba ziaqpy batu tsõ.

³⁵ Sodadutsa iharapatawyhyta humo zihyrizikiknaha. Ipapepe eze zihyrizikiknaha. Ipyrytsa eze kino niwatihi zihyrizikiknaha zikymynahaze iharapatawyhyta zitseknahaze zirikonaha. Sodadutsa isuk ziaксе tsihikiknahatsa harahareziapyryktsa ty nisipaparakanaha. Aty ja Sesus suk piakse nikaranaha tsahi ziwatawykynaha.

³⁶ Iwaze nidyhydyhykynaha. Sesus iharapatawyhyta humo zihyrikbanahaze zihaperykynaha.

³⁷ Iharapu bete iwatahaha. SUDEUTSA PEHATSA ziwatahakanaha.

³⁸ Kytsa petoktsa ituk nisibanaha. Sitsyhyryboanikitsa. Siharapatawyhytsa humo nisibanaha, estuba ipanuryk taba usta ipawazo taba ahatsa niaha.

³⁹ Iwaze kytsa nabaze ske buruk nikaranahatsa zisapybyrikinaha.

⁴⁰ Asaktsa:

– O Ikia “Deus wahoro zubata myokarabaka bykyze petok puruze usta mozoknizo” tsiky kara abaka tsimzyhyrikosokda. Ikia Deus tse tsimzyzeka ja parany! tsimy. Tynasikta! Bazekara – nikaranaha.

⁴¹ Deus wahoro zubata eze ziknapamykysokonahatsa taparaktsa kapi-taõtsa, Moises harere iwatahatsitsa iwatsa zisakpybyrikinaha niwatihi.

⁴² – O ustsatsiksitsumuẽhĩkĩ, ikia tu tsikaktsumuẽhĩkta! Sudeutsa pehatsa ja. Iwatatu sa tsipomozaka. Sudeutsa pehatsa babata zeka, Deus tse zeka tynasikta! Iwa bo tsimykozona zeka “O Sesus Sudeutsa pehatsa” tsimaha – mybarapetu nikaranaha.

⁴³ – Atahi Deus humo tispirikporẽta, “Utakta Deus tse” niy. Abaka Deus ihumo tsimypokzitsiurẽta zeka iktsa tsimaha. Deus ity pitsumuẽhĩ naha bo iktsa tsimaha – nikaranaha.

⁴⁴ Sitsyhyryboanikitsa siharapatawyhytsa humo mohyrikosokdanaha nataba natabaha ibo atsatu zisapybyrikinaha

Sesus mohyrikosokda.

⁴⁵ Kyze tokbaha eze miwa niyzik. Batu haramweke. Nanabyitaba haramwe byitatu. Bykyze iharakibikia bo zoize inaharamwezo.

⁴⁶ Iharakibikia boze Sesus opykani huahua niy:

– “Eri Eri rama sabaktani” kaka niy. Myharere piwatawy, “O Deus ikia humo kaspirikporẽta. Amy skaraba uta zuba tsipikarikik.” – niy.

⁴⁷ Wastuhu nabaze niriktohokonaha ana harere ziwabynahaze:

– O amo sa Erias bo hua mykara – niaha.

⁴⁸ Tohi duabohotsa tsik itsārākbara ty morosuk eze ky ty tsikok niy. Anabo mazori waha ty duabohotsa tsik bo sokyk niy, zipypyiki. Mazori waha ty hwi humo zitsihi jobo Sesus sak bo tsyktsyk nikara. Sesus batu tsō.

⁴⁹ Utsa kytsa tihi:

– Byriktsa! Tozeka ja Erias mozumu tsiperynahaktsa kytsa! – niaha.

⁵⁰ Iwaze Sesus kakazo niyze nihyrikosokda.

⁵¹ Iwaze panu ipamaba ipokpedawy Deus wahoro zubata eze ky nisykbaik. Tsapukte buruk bijoikny tu niaksykyryk. Wytyk nitydydykyk tu. Hara-haretsa nitōbaiknaha.

⁵² Tahaytykeze kytsa puke puke niaha. Siakbatsa Deus humo sispirik-porētsa inahyryzikpobanaha.

⁵³ Bykyze Sesus inahyryzikpoze Serusarēhe bo inapupunaha. Anaeze kytsa sizubarētsa sibo nikozonaha.

⁵⁴ Kyze sodadutsa Sesus ziharaperykynaha. Wytyk nidydykyze sipy-byrētsa. Hawa sa nikaranaha niakozonahaze sipybyrētsa:

– O atahi Deus tse babata – niaha.

⁵⁵ Kykyryk tihi ērykzatu nikozonekaha. Asiza Karireja ikny iapik niukurunaha. Sitsumuēhīza tu ihumo simypokzitsiukrēza.

⁵⁶ Situk Maria Madarena, ustatsa Maria Tsiaku Sose ahatsaje, ustatsa Sebedeu oke iwaza ēryk tu ibo nikozonekaha.

Sesus nury ziytyknaha.

⁵⁷ Kyze nubaze Sose Arimeteja Ezekta zumu. Tsinamyrēta niy. Atakta niwatihi Sesus tuk zinymyrykyta niy.

⁵⁸ Piratus bo izumu. Sose:

– O Sesus nury ty uta kabokta Piratus! Uta iytyk bo mytsahorok – niy.

Yhỹ niy. Iwaze sodadu pe:

– Sesus nury ty Sose bo nynyty! – niy. Iwa hỹ.

⁵⁹ Sose inury nazipikze panu tsiziurēna eze ziakwaraka. Tubatu Sose taytyk zitua bo anabo hi nitsahorok.

⁶⁰ Iyktaba ezytyk anaeze inury ty hoekare niy. Harahare bobyri ihok bo zihokbore. Iwaze niparak.

⁶¹ Maria Madarena, ustatsa Maria iytyk nizokparakanaha. Iytyk baze nidyhydyhykynaha.

Sodadutsa iytyk ziharaperykynaha.

⁶² Hinipỹ sesta-peira ziharamuze okoroze sibirykywy bo zumu zikna-pamykysokonahatsa Deus wahoro zubata taparaktsa, Pariseutsa iwatsa Piratus bo niaha.

⁶³ Asa tihi:

– Mypehakatsa, mospihikbatakata atatuze petok puruze Deus mozi-hyryzykpowy niy.

⁶⁴ Iwatahi sodadutsa tysipeha iytyk pehaperykynaha, okoroze. Iwaze zinymyrykynahatsa inury ba ziaксе naha kytsa pe “O Sesus inahyryzykpo” maha ana harere pokso iytyk bo sodadutsa pe pykyhytutaha. Zinymyrykynahatsa tihi “Sesus Deus zipehata” niaha ana harere batu sapy niy, abaka “Sesus inahyryzykpo” maha zeka ana harere isapybara baba – niaha.

⁶⁵ – Ahaharere humo sodadutsa ahatuk mysipeha. Iytyk pykyhytu tsi-zoziknaha iwaze batu aty tohi ana bo ba ziktsuk – niy.

⁶⁶ Iwaze nitururuknaha. Iytyk bo niaha. Harahare bobyri zihokbore tsazikihia tuk zihirikiknaha nawa batu aty tohi ana bo ba ziktsuk. Iwaze sodadutsa pe niaha:

– Iytyk tsihaperykynaha! – niaha. Iwa hỹ.

28

Deus Sesus zihyrizikpowy.

¹ Kyze petok zuruze, sabado ziharamuze kykyryk iytyk bo niukuruzonaha. Domiko miwa botu Maria Madarena ustatsa Maria kino niwatihi iytyk bo zumuzonaha.

² Atsoko wytyk nitydydykyktu. Iwaze bijoikpe iknykta Deus tsumuẽhĩtsa inasik harahare bobyri zipetu ibete nidyhyky.

³ Bijoikpe iknykta tisukbarazarẽta katsaktsa ibarazabaharẽta batu mynyhy. Paiparezo mykaranaha ihyrikoso waha bijoikpe myze iwa bijoikpe iknykta wata my.

⁴ Sodadutsa ipokso mytydydykyknaha. Sipybyrẽtsa nikaranaha iwatsahi wytyk bo inarahanaha. Siakbatsa watsa niyziknaha.

⁵ Bijoikpe iknykta kykyryk pe niy:

– Ahapyby byihu ja! Sesus iharapatawyhyta humo nihyrikosokdata tsipiberikinaha ana kino kanymyrẽta.

⁶ Atakta iytyk eze hana bo ja. Hawa botu niy nahyrizikpo. Iktsataha isapy bo anaeze nihoeke.

⁷ Aidityktsa! Nabo zinymyrykynahatsa bo tynakozorenahaktsa! ispe tsimaha:

“O inahyrizikpo aharaze Karireja bo my, nabo ibo iktsa tsimaha. Aba tsipinyaha”. Kaharere tsiwabyziunaha – niy.

⁸ Iwaze iytyk ekze nitururuknaha. O Sesus nahyrizikpo sakurẽza nikaranaha. Sipybyrẽza nikaranaha Sesus tuk zinymyrykynahatsa pe aidy niaha.

⁹ Atsoko Sesus nisihobyk:

– Awy ahapyby byihu ja! Ahapunihikrẽtsaktsa! – niy. Kykyryk ibo zumunahaze ipyrytsa humo paik paik niaha. – Ikiya tsamysapyrẽta ahumo zuba mykurẽza – niaha.

¹⁰ – Ahapyby byihu ja! Zinymyrykynahatsa bo katuk kytsa bo tsimahaktsa! Ispe tsimaha:

“Karireja bo tsimaha nabo kabo iktsa tsimaha” tsimaha – Sesus niy.

Sodadutsa Sesus nury soho mybarapetu nikaranaha.

¹¹ Iwaze wytykyryk ske buruk niukurunahaze wastuhu sodadutsa, asahi iytyk ziharaperykynaha sihudikhudikwy bo ziksizonaha. Hawa ty nikara Deus wahoro zubata ziknapamykysokonahatsa taparaktsa bo nipamykysokonaha.

¹² Kyze taparaktsa ziknapamykysokonahatsa taparaktsa ypykytsa bo niaha. Asa zuba inapamykysonaha. – Hawa sa tsimaha – nikaranaha. Iwaze tsizubarẽna okyrysaro ty sodadutsa bo nyny niaha.

¹³ Ispe niaha:

– Ikiyahsaktsa kytsa pe “Unata eze tsikurunahaze iwaze zinymyrykynahatsa izumunaha inury zibykyknaha” tsimaha iwa kytsa bo tytsaso – niaha. Yhỹ niaha. Iwa humo okyrysaro ty sodadutsa bo nyny niaha.

¹⁴ Homa pehatsaktsa Piratus taharere piwaby zeka, katsaktsa ipe:

– Sodadutsa wasani maha tsimaha. Iwa ahahumo batu takyri, iperykynahatsa sõtutsarẽtsa tuze batu takyri myharere humo. Iwatsahi mytsaty mytsaty byijataha! – ziknapamykysokonahatsa niaha.

¹⁵ Iwaze Sudeutsa perykynahatsa okryrsaro tsizubarēna ziaksenaha. Hawa ha ty ziknapamykysokonahatsa sibo nitsasonaha atsatu ziknapamykysokonaha. Sudeutsa anaharere bo yh̄y mykaranaha abaka bo yh̄y mykaranaha.

Sesus tuktsa nisipehahik kytsa aparakbaha bo Deus wasania ty motsasonaha.

¹⁶ Kyze zinymyrykynahatsa ōse Karireja bo niukurunaha. Hara bo nidokoknaha. Anaeze Sesus botu nitsaso nabo izumunaha.

¹⁷ Sesus bo inakozonahaze iokeryk taekaratsa humo puruk puruk niaha. – O ikia tsamysapyrēta tsimy ikia humo mykurētsa – ipe nikaranaha. Wastuhu kytsa – O inahyrizikpo ja batu kanyhy nikaranaha. – Utsa kytsa sihyrinymyrētsa nikaranaha ihumo sispirikporētsa.

¹⁸ Sesus sipauk baze tu natakaha ispe niy:

– Kanamy tsizubarēna, bijoikpe eze tu mysipehaka, mybarawy eze tu mysipehaka tsizubarēna ty Deus kabo nyny niy.

¹⁹ Iwatahi aparakbaha naboktsa! Nanabyitaba tsimykurunaha ityryktsa aparakbaha bo wasanihaty tytsasonahaktsa! Katuktsa moziknaha tsipiksopykzukunaha kaharere bo yh̄y mykaranaha. Iwaze mysiharasusukunahaze Deus inaokota tytsasonaha. Iharere humo mysiharasusukunaha Deus myzo, Deus tse, Deus hyrikoso iwa tytsasonaha.

²⁰ Hawa botu zahahyrinymyry hȳy tsimykaranaha atsatu tsihyrinymyrykynahaktsa! Ahatuk mynapykyryk pahatsumuēh̄i mykara. Mybarawy nepykze ahapauk baze tu mykara tawahi mynapykyryk. Iwa h̄y – Sesus niy.

Marakos wasaniha Sesus soho ziwatahaka

Marakos Sesus humo ispirikpota. Sesus mybarawy eze ziknapykyrykze iwazeka Marakos mykyryburuk zikzuruku iwatahi batu ituk pão. Sesus tazo bo ziksizoze Deus hyrikoso ziapewywyky iwaze hi Sesus ziknakara naha ty Marakos ziwatahaka.

Suão Batista mypehawy kytsa bo nitsasoko.

¹ Papeu humo Deus wasania ty Sesus Kiristu soho ziwatahaka. Sesus Kiristu Deus tse.

² Ata hi mybarawy bo inasikta ana kino Deus sohotsa Isaijas botu ziwatahaka. Isaijas hawa niy, tubabatu ziwatahaka tahi:

– Tapara katsumuëtsa aharaze pipeha.

Hawa katsa myske piskezozeke atahi aske piwatawy. Piskezozeke.

³ Atahi jerukbara eze hua mykara

“Pykyhytuty Deus zipehata ske buruk tsimaha.

Tsipiskezozeknaha.

Iske buruhuwa tu taha.

Iwa iske takymy” iwaze Deus zipehata mozumuze mokuru – niy.

Iwa Deus sohokotsa niy. Hawa kytsa mokymynaha Deus zipehata harere bo yhÿ mykaranaha ana hi motsasoko.

⁴ Anaharere wa Suão Batista jerukbara bo izumu. Anaeze Deus harere nitsasoko kytsa nisiharasusuku. Atahi:

– O kytsa ahamysapybyi tsimoewynahaktsa tynamyharasusukta! Tsipihasarusunaha zeka iwatawy kytsa bo meky watu tsimoziknaha, ahamysapybyitsa tsikykaranaha tsimoewy tsihikiknaha – niy. Iwaze Deus ahamysapybyitsa tsikykaranaha humo pahaokzohik.

⁵ Sizubarëtsa Suão Batista bo zumukunaha. Serusarëhe ezektsa Sudeja ezektsa iwatsa ibo ziknakaranaha. Suão sizubarëtsa ziknasiharasusuku. Nisiharasusukuze asa kino:

– Tapara mysapybyitsa tsikykaranaha. Abaka batu meky watu tsimoziknaha mysapybyi tsikykaranaha anahi tamoewy tsihikik – nikaranaha.

⁶ Suão kamero hwyk zikziwaskik niy. Irikpidiwy kino kamero hwyk. Masetta ziknasiboroko. Pete zikzerukuk ziknakara.

⁷ Myzubaha bo ziknatsasokoze:

– Usta mozumuze. Atahi tsimysapyrëta, iwatahi myhyrizikwani. Utakta batu. Iwatahi kasikpybyrëta. Ipyrysuktsa mysibobokzeka kasikpybyrëta mozik.

⁸ Utakta pihik ty zuba kytsa mysiharasusuku. Atakta Deus hyrikoso pipehaka. Mynasikze ahatuk mynapykyryk iwatsahi ihumo meky watu ahamysapyrëtsa tsimoziknaha – niy.

Sesus harasuwy.

⁹ Iwaze Sesus Suão bo izumu. Nasare iknykta. Nasare Karireja eze tu. Suão bo zumuze, taharasusu tsihikik iwatahi ibo zumu. Suão buburu Sorodão inarokota eze kytsa nisiharasusuku. Anaeze hi Sesus kino ziharasu.

¹⁰ Pihik ikny inazoze atsoko bijoikpe sakpare iktsa niy. Deus hyrikoso ibo inasik, amyudu hyrity wata ibo inasik.

¹¹ Iwaze bijoikpe ikny iaksoho ziwaby Deus hi:

– Ikia hi katse babata. Ikia humo ka kamypokzitsiarëta. Ikia humo kakurëta – niy. Iwa Deus Sesus pe niy.

Sesus jerukbara bo niy. Anaeze Satanas zimiywy tsihikik.

¹² Iwaze Deus hyrikoso hi Sesus jerukbara bo zioқтыhyryk.

¹³ Anaeze estuba byzoje zirahaze. Kuarēta zuruze anaeze ziknapykyryk. Anaeze sasabyitsa niaha. Satanas hyrikoso sapybara pehatsa Sesus Deus harere bo ka yhybyitykta nizihikik. Batu zik. Sesus ipe batu yhy niy. Iwaze bijoikpe iknyktsitsa Deus tsumuēhītsitsa Sesus ziperykynaha. Iwa de

Sesus Karireja eze Deus wasania ty ziakbata motsasoko.

¹⁴ Kytsa Suão Batista tsipa humo sakyriukrēnikitsa hurukwy bo zioқтыhyryknaha. Iwaze Sesus Karireja bo ziksizo Deus harere wasania ty nitsasoko.

¹⁵ Atahi:

– Nawa zuruze kytsa Deus tyryktsa moziknahaze mozumu. Abaka kytsa Deus tyryktsa moziknaha. Iwatsahi ahamysapybyri tsimoewynahaktsa! Deus harere bo zuba hyh tahaktsa – niy.

¹⁶ Kyze Sesus pihikzotsabyri sak taba Karireja inarokota eze niy. Ana buruk ziknaukuruze petoktsahatsa, ziktsikparakanahatsa bo nikozo. Peduru inarokota itsy tihi Ādere iwahatsa tōhōryk pihik bo zioќtsotsokoknaha.

¹⁷ Sesus ispe niy:

– Uta kapikta! Tapara tsitsikparakanahaze piknutsa ziknasizokonaha. Abaka, uta katuk, mekywatsatu tsimysitsumuēhīnaha. Kytsa bo Deus soho tsimysasonaha. Ahaharere humo kytsa Deus harere bo hyh mykaranaha – niy.

¹⁸ Iwaze atsoko tahatōhōryk zerebaiknaha. Iapik niukurunaha.

¹⁹ Sesus puētsik pāozo niyze mektsa bo tu nikozo. Tsiaku Suão ahatsa tahazo Sebedeu tuk. Suão, Tsiaku tsy niy. Tsaraha Ezektsa tu, tahatōhōryk pykyhytu zizozikiknaha.

²⁰ Atsoko Sesus nisihuahua:

– Uta kapikta – niy.

Hyh niaha. Iwaze tahazo ty ka tsaraha eze, tatsumuēhītsitsa baze zerekek-naha. Sesus tuk niukurunaha.

Ihyrikoso sapybyita maku tuk ziknakara iwatahi Sesus ziksiwyhik.

²¹ Kyze Kaparanaū eze, Sesus Deus wahoro bo nitsuk, Sudeutsa zinymyrykynahatsa wahoro bo nitsuk. Sabado, nawa zuruze Sudeutsa byrykywy Sesus siwahoro anaeze inakypyknahaze nisihyrinymyryky.

²² Kytsa ziwabykynahaze:

– Atakta tsimysapyrēta hawa mymyhyrinymyryky naha wasani mykara. Ta hi myhyrinymyrykytsa. Moises harere zinymyrykynahatsa batu sihyrinymyryziu – niaha. Sipybyrētsa paikpa iktsa nikaranaha.

²³ Iwaze maku anaeze nitsuk. Ihyrikoso sapybara ibo pororo ziknakara.

²⁴ Sesus bo iktsa niyze ipokso kakaik niy:

– Amy skaraba mybo tsimyzumuku, Sesus Nasare Ezekta. Mype nabo pāoty tsimy. Ikia mynyhy Deus zapehata tsimysapyrēta. Ikia mopyk sa – niy.

²⁵ Sesus:

– Aksobyitykta! Nabo pāotykta! – niy.

²⁶ Ihyrikoso sapybara humo maku hi nitydydykyk tu kakaik niy, niwakik. Batu ity nyzo.

²⁷ Kytsa sizubarētsa ibaze tutsa nipybybaiknaha.

– O amy skaraba ihyrinymyrywy ezytyk ja Sesus hyrikoso sapybara pe: “Nabo pāotaha” myze, hyh sisopyk – niaha. Iwatsahi kytsa nipybybaiknaha.

²⁸ Iwatahi sizubarētsa nanabyitaba Karireja eze Sesus niyhaty ziwabyky-naha.

Sesus Simaō wapyry zizorowoy.

²⁹ Iwaze Sesus wahoro eze ziponaha iwaze Tsiaku, Suão, ahatsa tuk Simaõ ãdere siwahoro bo nipupunaha.

³⁰ Simaõ wapyry ihumuẽzumu.

– O Simaõ wapyry ihumuẽzumu – niaha.

³¹ Sesus iwanu sapy bo zumuze, itsyhyrype humo paik niy. Itsyhyrype humo tyzikto niyze nizororo. Iwaze ihumuẽzukbyitatsa tu nisidisahawyky.

Sesus simyitsapyritsa nisizororowy.

³² Kyze zunubazoze Sudeu byrywy nepyk iwaze Kaparanaũ ezektsa simyitsapyritsa Sesus bo nasioktyhyryknaha. Kytsa sipiakmyitsa hyrikosotsa simysapybaratsa humo sibo pororo ziknakaranahatsa. Asa kino Sesus bo nasioktyhyryknaha.

³³ Kytsa ape baze sizubarẽtsa wahoro peze niriktotohokonaha.

³⁴ Iwaze Sesus meky mekywatu simyitsapyritsa ty nisizororowyky. Sihyrikosotsa sapybaratsa hi nisiksiwyhik. Ispe:

– Nabo pãotaha – myze iharere bo hyỹ sisopyk niaha. Hyrikoso sapybara Sesus humo sihyrinymyrẽtsa atahi Deus zipehata zinymyryknaha iwatahi Sesus ispe niy:

– Soso byitaha – niy. Iwatsahi batu harere.

Sesus Karireja eze.

³⁵ Kyze zokorobyitu Sesus inapopoze jerukbara bo niparak. Anaeze Deus bo nipamykysoko.

³⁶ Iwaze Simaõ tuktsa ziberikinaha.

³⁷ Zihobyknahaze ipe niaha:

– Kytsa sizubarẽtsa paberikinaha – niaha.

³⁸ Sesus ispe niy:

– Utsa hudikhudikwy boktsa kytsa! Sihudikhudikwy bytykareze tu. Anabo Deus wasania ty motsaso ana humo hi ikzumu – niy.

³⁹ Iwaze Karireja buruk niukurunaha. Sesus Sudeutsa wahoro bo nitsuk. Anaeze wasania ty nitsasoko. Sihyrikosotsa sapybaratsa nisiksiwyhik iwa zikzuruku.

Maku inakõrõrõbaikta humo zizororowy.

⁴⁰ Maku inakõrõrõbaikta humo asiba nibibibata zizororowy. Maku nakõrõrõbaikta Sesus bo izumu. Atahi Sesus okeryk taekaratsa humo puruk puruk niy. Sesus humo tispirikporẽta nikara iwatahi puruk puruk niy. Ipe niy:

– Ikia tsipitsihikik zeka tsipikzororowy – niy.

⁴¹⁻⁴² Iwaze Sesus ihumo tsimypokzitsiarẽta tatsyhyrype ty humo paik niy. Ipe:

– Yhỹ ana hi mozihihikik pazororowy. Aba pazororowy hỹ – niy. Atsoko iakõrõrõtsa nihokdanaha. Zizororowyhik.

⁴³⁻⁴⁴ Sesus zipehaka:

– Sosobyity. Batu aty tohi bo ziktsaso. Aba ikia Deus wahoro bokta! Ziknapamykysokota bo tsikawatawykta. Niytahi amytudutsa ty ikia petoktsa ty Deus bo nyny tsimy.

Iwa taparakta Moises tubabatu ziwatahaka papeu humo atsatu tsimy. Tsimyze kytsa sizubarẽtsa tsikzororo baba sihyrinymyrẽtsa. Ikia azororowy soho batu tyso – niy.

⁴⁵ Nizororo tahi niparak. Iwata tu Sesus ipe:

– Sosobyity – atahi Sesus soho ty nipamykysoko. Nanabyitaba kytsa sizubarẽtsa bo tazõrõrõwy soho nitsasoko. Iwatahi Sesus sihudikhudikwy bo

batu zukzo. Jerukbara eze kytsa pokso nitare. Iwatsa tu kytsa sizubarëtsa ibo niukurunaha.

2

Sesus ityryk niakbata zizororowy.

¹ Kyze byi puëtsik Sesus Kaparanaũ bo ziksizo. – O Sesus ziksizo – nikaranaha.

² Iwaze myzubaha ibo nikozorenaha. Wahoro inahareknaha batu iwewehe. Ape baze hokbowy baze, sizubarëtsa niriktotohokonaha. Deus soho ty sibo nipamykysoko.

³ Iwaze ustsä kytsa izumukunaha. Sapetoktsa sapetoktsa ahatsa izumunaha. Ityryk niakbata hi ibo izebykyryknaha. Batu hawa tohi zikaha.

⁴ Kytsa sizubarëtsa izihyrizabaiknaha. Iwatsahi batu Sesus bo zuk niaha. Iwatsahi wahoro harapu nidokoknaha. Zipeksykiknaha. Zipeksykiknahaze ityryk niakbata hi iwanu bete inaripiknaha. Sesus bo imyitsapyrita inaripiknaha.

⁵ Iwaze Sesus iharereziuwytša pe niy:

– O kytsa, “Sesus myhumo tsimypokzitsiukrëta” tsimaha. Iwatahi ikiahatsa humo kakurëta – niy. Iwaze ityryk niakbata pe:

– O katukytsa wata “Kamysapybyita” tsimy kara. “Deus harere bo batu yhÿ mykara” tsimy. Iwahatu paokzohik. Asopyksapybyita tu tsimy kara paokzohik – niy.

⁶ Moises harere zinymyrykynahatsitsa, ibaze tu tsahi iharere humo tahakyrikinaha.

⁷ – Amo skaraba nitsasoko. Atahi isopyksapybyita mykara Deus zuba: paokzohik mykara – mytsaty nikaranaha.

⁸ Kytsa iwa mytsaty nikaranaha, Sesus tsihyrinymyrëta iwaze ispe niy:

⁹ – O hawa tuza kytsa “Iwahatu, paokzohik” my zeka tsihokdaharëna. “Kyiktykta” my zeka, ana kino tsihokdaharëna.

¹⁰ Iwatu utakta wyzik niwatihi my – niy.

¹¹ Ityryk niakbata pe tihi:

O papeha. – Kyiktykta! Awanu ty pohyrykty! Tsiksikta!

¹² Iwaze atsoko itarikto. Tawanu ty kokpuhyryk niy. Kytsa nikozokonahatsa nipybybaiknaha:

– O Deus ahumo mykurëtsa. Iwa batu ityny – asa zuba nipamykysonaha.

Rewi Sesus hapik niukuru.

¹³ Iwaze Sesus niparakzo Karireja buruk pihikzotsabyri sak bo zukzo niy. Kytsa sizubarëtsa zikziberikinaha. Zihobyknaha siwatu ziknasihyrinymyryky.

¹⁴ Niukuruze Rewi bo iktsa niy. Rewi Arapeu tse. Atahi siokyrysaro bykyktsitsa sipehakatsa tsyhyryze nikara. Atakta siokyrysarobykwy sapy eze ziknadyhyky, Sesus ipe niy:

– Panykta! Katuk! – niy.

Yhÿ niy. Niytahi atsoko kyiky Sesus tuk niukuru. Tanamy zerekbaik.

¹⁵ Kyze Sesus Rewi wahoro eze tadisahaka. Kytsa siokyrysarobyktsitsa sipehakatsa tsyhyryze tahadisahakanaha. Sesus tuk zinymyrykynahatsa, kytsa simysapybyitsa iwa ahatsa tahadisahakanaha. Tummy zikukunaha.

¹⁶ Pariseutsa asaktsa Moises harere humo sihyrinymyrëtsa ana bo iktsa niahaze tahakyrikinaha. Siokyrysarobyktsitsa, kytsa simysapybyitsa tuk iwa tahadisahakanaha ana bo hi iktsa niahaze tahakyrikinaha. Sesus tuk zinymyrykynahatsa nisibetsakaknaha:

– Amo skaraba mykara. Atakta siokyrysarobykyktsa tuk tadisahaka. Simysapybyitsa tuk tumy mozikuku – niaha.

¹⁷ Sesus siharere ziwabyze ispe niy:

– Sakurëtsaktsa batu myzororowytsa bo ba zikumunaha. Simyitsapyritsa zuba mozororowytsa bo pomonaha. Simysapybyitsa simyitsapyritsa watsa niy. Iwaze ikzumu, iwatahi simysapyrëtsa bo batu zuk icy. Uta simysapybyitsa bo ikzumu – Sesus niy.

Sesus hauk ahabyita soho humo nisihyrinymyryky.

¹⁸ Kyze estuba okoroze Suão Batista tuk zinymyrykynahatsa haukabyitsa ziknakaranaha. Pariseutsa atsabarëtsa kino niwatihi haukabyitsa ziknakaranaha. Deus bo mopamykysokonaha. Iwatsahi kytsa Sesus bo zumukunaha. Ipe niaha:

– Suão Batista zinymyrykynahatsitsa tuk haukabyitsa ziknakaranaha. Pariseutsa kino niwatihi haukabyitsa ziknakaranaha. Ikia tuk zinymyrykynahatsa batu. Asaktsa tahadisahakanaha. Amy humo sa tahadisahakanaha – nikaranaha.

¹⁹ Sesus ispe niy:

– Zinymyrykynahatsa katuk hauk tsimykaranaha. Maku tasukzaze tatukytsa tuk tamyikaha maha tumy mytakuku. Hamyikaha maha.

²⁰ Isukzata moparakze asaktsa haukabyitsa mykaranaha. Iwaze utakta kazo bo myziksizoze zinymyrykynahatsa kino niwatihi haukabyitsa mykaranaha. Iwaze Deus bo mopamykysonaha – niy.

²¹ Iwaze panu soho nitsasoko. Tah:

– Ba aty tohi panu ezytyk ty zizyzykyha isuk ibyky myzutsuku iwa myzeka isuk mysykbaik. Panu ibykta tu ezytyk humo mymyibaik – Sesus niy.

²² – Batu aty tohi duabohotsa tsik ezytyk ty ba siraratsa hwyk ibykta bo ba zisusu. Iwa myzeka duabohotsa tsik ezytyk mynapytoze ibykta tsasuk mytok. Mopokobaik. Duabohotsa tsik tsasuk ibykta bo susu tsimyzeka pimyiibaik. Duabohotsa tsik ezytyk tsasuk ezytyk eze tu tsipisusu hỹ – Sesus niy.

Iwa Sesus nitsasoko taharere panu ezytyk wata, duabohotsa tsik ezytyk waha nikara.

Sesus Sudeutsa mybyrywy humo nisihyrinymyryky.

²³ Kyze mybyrywy eze Sesus tuk zinymyrykynahatsa tuk waratok buruk niukurunaha. Niukurunahaze zinymyrykynahatsa tirikotsa nisibykyknaha sihipyrytsa ty tsiky tsiky iwaze taharapaspyk tu nisiborokonaha.

²⁴ Iwaze Pariseutsa Sesus pe niaha:

– Iktsa tykta! Ikia tuk zinymyrykynahatsa tarabaja mykaranaha. Amo skaraba nawa mykaranaha. Okoroze mybyrywy eze katsaktsa batu tarabaja mysopyk. Ana kino tubabatu Moises harere papeu humo mybyrywy soho humo nimyhyrinymyryky – niaha.

²⁵⁻²⁶ Kyze Sesus Pariseutsa pe niy:

– Hawa taparakta Dawi niy batu sa ahahyrinymyry Papeu humo Dawi soho ziwataha. Taparakta Dawi itukytsa siaraparëtsa tuze Deus wahoro bo nipupunahaze. (Taparakta Abiata inarokota Deus wahoro zubata taeze ziknapamykysokonahatsa tuk taparakta.) Dawi nitsukze atsikara ty ziknapamykysokonahatsa Deus bo ky zituha ziknapamykysokonahatsa Deus bo nyny niaha anatyhi wabehyryk niy. Zioko itukytsa niwatihi ziokoknaha. Moises harere tihi:

“Ana humo ka atsikara kytsa ba zioknaha. Ziknapamykysokonahatsitsa zuba zikziokoknaha” niy. Iwahatu Dawi ziokok. Itukytsa kino ziokoknaha. Ana papeu humo batu ahahyrinymyry ja niy.

²⁷⁻²⁸ Deus kytsa nisisukni. Batu mybyrywy humo nisisukni. Kytsa tahabyrykynaha ana humo hi tabyrywy nizukni. Utakta Deus zikpehata ahawata ikyzik. Anahumo hi uta kino mybyrykywy zihitsa ikyzik nawazuruze tabyryky eze zipehaka my hỹ – niy.

3

Sesus maku itsyhyrype noikta zizororowy.

¹ Sesus itsyhyrype noikta zizororowy. Kyze usta nawa zuruze tabyrykywyze Sesus Sudeutsa wahoro bozo niy. Anaeze estuba maku itsyhyrype noikta niy.

² Pariseutsa Sesus bo nikozeptoktonaha. Sesus nizokparakanaha iwatsahi iktsaziu nikaranaha:

– O mybyrykywyze ja hawa pizororowy – mytsaty nikaranaha. Sesus soho iharerewabymybarakanaha. Sesus Moises harere bo batu yhỹ nizihikiknaha iwatsahi pykyhytu ibo iktsaziu nikaranaha.

³ Sesus sisoho humo tsihyrinymyrẽta. Hawa abaktsa mytsaty nikaranaha ana humo kino zinymyryky. Iwaze itsyhyrype noikta pe – Kyikytkta! Pany! Mytazahara eze riktoty – niy. Yhỹ niy.

⁴ Iwaze Pariseutsa pe niy:

– Hawa skaraba mybyrykywy eze ahasopyk. Mybyrykywy eze kytsa bo tsipisapybaka zeka iwaze Moises harere bo ka ja yhỹ tsimaha. Kytsa bo tsipimiwy zeka ja wasani tsimaha. Kytsa bo tsimytsumuẽhĩ zeka ja wasani tsimaha. Maku tsipibeze zeka ja wasani tsimaha. Hawa sa mybyrywy eze ahasopyk – niy.

Kytsa siharerebyitsa wa niunaha.

⁵ Iwaze Sesus sihumo takyriki. Sioktsiokrẽtsa hi sihumo tisukatsihikrẽta. Itsyhyrype noikta humo batu simypokzitsiu ana humo takyriki. Iwaze itsyhyrype noikta pe:

– Atsyhyrype ty kabo nynyty – niy. Maku tatsyhyrype ty nyny niy. Atsoko nizororohik.

⁶ Iwatsahi Pariseutsa tahakyrikinaha, niunaha. Erodes tuktsa izumubanaha. Niharapepehakanaha:

– Hawa skaraba Sesus tabezehik – nikaranaha.

Sesus ustsya kytsa sizubarẽtsa nisizororowy.

⁷ Sesus tuk zinymyrykynahatsa tuk pihikzotsabyri Karireja inarokota zitsikzanaha. Kyze kytsa sizubarẽtsa Sesus bo niaha. Karireja ezektsa, Sudeja ezektsa.

⁸ Serusarẽhe ezektsa. Idumaja ezektsa, Sorodão buburu koiknyktsa, kytsa asahi Sidõ bytykareze tutsa, Tiro bytykareze tutsa iwa myzubaha ezektsa Sesus bo zumukunaha. Tapara hawa Sesus nikara botu ziwabykynaha. Iwatsahi ibo zumukunaha.

⁹ Iwaze Sesus tuk zinymyrykynahatsa pe niy:

– Kytsa pokso tsaraha bo tsatahaktsa! Iwa zeka mynamyhirizabanaha – niy.

¹⁰ Tapara Sesus sizubarẽtsa nisizorohikwy iwatsahi simyiziubyitsa Sesus bo nikaranahatsa paikpa niharape petutukunaha.

¹¹ Kytsa asahi hyrikosotsa sapybaratsa sibo ziknakaranaha tsa hi Sesus bo iktsa niahaze iokeryk tahaekaratsa humo puruk puruk niaha. Kazi nikaranaha:

– Ikia hi Deus tse babata – nikaranaha.

¹² – Soso byitaha! Ana tyhi batu aty tohi bo tsimytsasonaha – Sesus niy. Iwa nisibetsakik.

Sesus tuk zinymyrykynahatsa nisiwatawyky.

¹³ Kyze Sesus hara bo nidoze kytsa nisiwatawyky. Mysiwatawynahatsa ibo izumukunaha.

¹⁴⁻¹⁹ Tatuk zinymyrykynahatsa nisiwatawy. Ituk zinymyrykynahatsa.

Simaõ pe: – Ikiakta Peduru – niy. Tsiaku Suão Sebedeu hyrytsa ahat-saktsa. Asaktsa nisitsatsikik – Bijo bipyri hyrytsa – maha. Iwaze Ædere, Piripi, Baratoromeu, Mateus, Tome. Usta Tsiaku Arapeu tse, Tadeu, Simaõ tatyryktsa humo niwatsoroko. Iwaze Sudas usta Iskariotses inarokota atahi Sesus isukyrytsitsa bo ziockyhyrykta iwatsa Sesus nisiwatawy.

Nisipeha:

– Nohi bo tsimynakozorenahaktsa! Myzubaha bo Deus wasania ty tyt-sasonahaktsa! Tysizororowynaha! Hyrikosotsa sapybaratsa tysiksiwyhik! – niy. Hyỹ niaha. Sesus nipamykyso, iwa niaha.

Sesus Beresebuhu soho humo nisihyrinymyryky.

²⁰ Iwaze Sesus wahoro bo zumuzo niy. Iwaze kytsa sizubarẽtsa ibo zumukunaha. Sipokso batu hauk, zinymyrykynahatsa niwatihi batu hauk.

²¹ Itukytsa isoho ziwabynahaze ibo zumunaha:

– O ikia wahoro bo tsipaoktyhyryknaha – niaha. Atakta ityrykmyita wata mytsaty ahabyitsa nikaranaha.

²² Iwaze Sudeu sopykwy iwatahatsitsa ibo zumunaha. Serusarẽhe ezektsa nitururuknaha. Sizubarẽtsa Sesus ziharerewabykynaha. Asaktsa:

– Beresebuhu Sesus tuk mynapykyryk. Iwatahi hyrikosotsa sapybaratsa humo mysipeha, Satanas humo nisiksiwyhik – mybarapetu nikaranaha. Satanas usta inarokota Beresebuhu atakta hyrikosotsa sapybaratsa pehakatsa.

²³ Iwaze Sesus tabo nasipeha. Sudeu sopykwy iwatahatsitsa tabo nisi-huahuaka. Isoho humo nisihyrinymyryky.

– Hawa sa Satanas atatu taiksiwyhik – niy.

²⁴ – Ityryktsa myharape ziubynahaze mopyknaha. Kytsa metutu mymyi-naha zeka iwaze mysibabaiknaha.

²⁵ Nawatihi estuba zubahatsa myharape ziubynaha zeka asa zuba mok-myinaha.

²⁶ Iwahatu Satanas tatuktsa tu myharape ziubyi zeka myokbabaik. Siso-hometutu humo mopyk – niy.

²⁷ – Batu aty tohi ipaikta wahoro bo ba ziktsuk iwaze ba inamy ziaксе. Ba ziky. Tapara amata ipaikta piakwaraze, iwahoro bo mytsuk inamy piakse.

²⁸⁻²⁹ Kaharere tsiwabytoktonaha. Kytsa simysapybyitsa nikaranaha Deus mysiokzohik. Siharere batu imysapy ana hi Deus piokzohik. Sisopyksapyby-itsa mysiokzohik. Kytsa Deus hyrikoso soho pisapybyrikinahaze ana humo hi ba ziockzohik. Deus ana humo hi ba zikspiriktsokda. Ana isopyksapybyitsa ty tawahi kytsa tuk mynapykyryk – Sesus niy.

³⁰ Iwa ispe niy. Nezeba kytsa ipe niaha:

– Ihyrikoso sapybara ty ikia tuk mynapykyryk – niaha. Iwatahi ana humo kino nitsasoko.

Sesus je itukytsa niwatihi ibo izumunaha.

³¹ Kyze Sesus je itukytsa ahatsa ibo zumu tsihikiknaha. Kytsa humo batu ibo zukzuk. Ape baze niriktotohokonaha. Iwatsahi zipehakanaha.

³² Kytsa sizubarẽtsa Sesus okeryk nidyhydyhykynaha. Ipe niaha:

– Aje atukytsa ahatsa ape baze moriktotohokonaha. Atuk mopamykyso tsihikiknaha – niaha.

³³ Sesus ispe niy:

– Atatsa hi kaje. Asaktsa hi katukytsa – niy.

³⁴ Iwaze kytsa asaktsa harape baze nidyhydyhykynahatsa sibo iktsaziu niy.

³⁵ Ata hi:

– Asaktsa Deus harere bo hyỹ mykaranaha hawa Deus mozihikik sisopyk asa hi katukytsa babatsa. Asiza hi kaje babaza katukytsa babatsa niwatihi – Sesus niy.

4

Sesus nisiparikikta soho nisihyrinymyry.

¹ Iwaze zinymyrykynahatsa ibo ziksizonahaze Sesus pihik sak eze nisihyrinymyrykyzo. Myzubaha pihikzotsabyri eze niriktotohokonaha. Iwatahi myzubaha pokso tsaraha bo takorohyk. Tsaraha sak bete nidyhyky. Kytsa pihik sak eze iharere ziwabykynaha

² Nisihyrinymyryky. Waratok soho humo nitsasoko nawa humo nisiwatawyky. Hawa kytsa mekywatsa tu Deus harere bo maha, wastuhu iharere bo hyỹ maha, ustsahatsa iharere bo batu yhyỹ maha ana humo hi nisihyrinymyryky.

³ Ata hi:

– Tsiwabytoktonahaktsa! Kyze maku waratok bo niy. Ata siriktsa nisiparikik.

⁴ Nisiparikikze wastuhu riktsa ske sak bo inatsukunaha. Iwaze piyktsa nisihorozukbaiknaha.

⁵ Kyze ustsahatsa riktsa nisiparikikze harahare buruk inatsukurunaha. Iwatsahi atsoko zipokonahaze wytyk tsikaeni zuba humo niakbabaiknaha, batu iytyk sapy.

⁶ Batu siharapyryky iwatsahi niakbabaiknaha. Nitsehebaiknaha. Haramwe humo niakbabaiknaha.

⁷ Kyze ustsahatsa riktsa nisiparikikze inikoso bo inatsukurunaha. Tahapykyknahaze nisiupyksiknaha. Inisahatsa humo, batu tahatypyk. Niakbabaiknaha.

⁸ Ustsaktsa mahani. Ustsa riktsa nisiparikikze jytykziuha bo inatsukurunahaze sisapyrẽtsa. Tsiytyksapyrẽna bo natsukurunaha. Niahatsahi taypykyknahaze tahasuknaha nipopokonaha. Wastuhu nisiubaranaha tirĩta riktsa. Ustsa nisiubaranaha sesẽta riktsa. Ustsa nisiubaranaha sẽ riktsa sizubarẽtsa hỹ – niy.

⁹ Iwaha soho humo nisihyrinymyryky:

– Kaharere tsiwabynaha zeka wabyziutahaktsa kytsa! – niy.

Hawa Sesus nisispirikpoko.

¹⁰ Kyze kytsa sizubarẽtsa niparaknahaze zinymyrykynahatsa wastuhu wabynahatsa ahatsa ibo zumunaha ipe niaha:

– Hawa ha ty aharere ty riktsa soho tsimymywatawy – niaha.

¹¹ Sesus ispe niy:

– Deus kaharere ty pahahyrinymyry tsihikik Deus tyryktsa soho pahawatawy tsihikik. Ustsa batu wabyziu. Ikiahatsa kahyrinymyrywy ezytyk bo yhyỹ tsimaha iwatsahi Deus tyryktsa tsimoziknaha. Ustsa batu, iwatahi isoho humo nisihyrinymyryky.

¹² Isoho humo piwabynahaze hawa ha ty piwatawy batu mytsaty hỹ. Isoho humo mytsatykynaha zeka sisopykysapybyitsa ty mykaranaha pimoewy

tsihikiknaha. Sisopyksapybyi humo sisukatsihikrētsa tu zeka Deus mysiok-zohik hỹ ana hi batu sihumo itsihik – niy.

Riktsa parikitsa soho humo nisispirikpoko.

¹³ – Kasoho humo ahahyrinymyry byizeka. Iwaze hawa usa soho humo sa mytsaty tsimykaranaha – niy.

¹⁴ – Kaharere pahawatawyky. Asaktsa kahyrinymyrywy ezytyk bo yhỹ maha zeka Deus tyryktsa moziknaha. Atakta nisiparikiktsa Deus harere mynatsasokonahaktsa watsa. Riktsa Deus harere hyrity watsa niy.

¹⁵ Wastuhu Deus harere ziwabynahatsa riktsa watsa ske sak bo inatsukurunaha. Deus wasania ty piwabynahaze Satanas sibo mozumuze, Deus harere piakse. Kytsa sispirikpobyitsa tu Satanas Deus harere ziake piyktsa hyrity watsa iwaze wasani humo batu sispirikpo.

¹⁶ Utsa Deus harere piwabykynaha. Asaktsa riktsa watsa harahare buruk inatsukurunaha wytyk tsikaeni zuba batu siharapyryky. Tapara wasaniha ziwabykynaha sakurētsa niyziknaha. Riktsa jakspe bete tu niapykyryknaha batu jytyksapy eze inatsukurunaha watsa. Asahi tsikaeni zuba pinymyrykynaha.

¹⁷ Ziwabyziubynahatsa tu Deus bo tsihokdaharēna zeka Deus harere bo batu yhỹ my nikaranaha, iharere humo ispiriktsokdanaha. Utsa kytsa Deus harere humo nisimiyjakanaha Deus wasaniha zimoewynaha. Deus humo batu sispirikpo.

¹⁸⁻¹⁹ Utsa Deus harere piwabykynaha. Asahi riktsa watsa inikoso bo inatsukurunaha iwatsahi niupyksikbaiknaha. Deus harere piwabynahaze tahanamy bo zuba mytsaty mytsaty nikaranaha. Tahanamy tsihikiknaha zuba. Sinamy inisahara watsa iwatsahi siriktsa batu taypykwatsa, wihara batu nijakuk Deus harere humo sakubyri zumunahaze ihumo batu sispirikpo.

²⁰ Utsa Deus harere piwabykynaha hawaha mykaranaha riktsa watsa wytyk tisapyrēna bo inatsukurunahatsa, utsa kytsa Deus harere siwabynahatsa watsa piwabyziukunaha. Piwabykynaha iharere bo yhỹ mykaranaha ihumo sispirikporētsa moziknaha. Deus harere bo hyỹ nikaranaha. Iwatsahi wihara nijakuk naha wa. Wastuhu nisiubaranaha tirīta riktsa. Utsa nisiubaranaha sesētsa riktsa. Utsa nisiubaranaha sē riktsa. Sizubarētsa hỹ – niy.

Deus tuktsa niwatihi iharere bo hyỹ mykaranaha simysapyrētsa moziknaha wihara waha simysapyrētsa. Iwaze hawa kytsa Sesus hyrinymyrywy ezytyk hawa ja maha iwatahi nisihyrinymyryky.

Rika soho humo nisihyrinymyryky.

²¹ Kyze Sesus tuktsa zinymyrykynahatsa bo nipamykysokozo. Rika soho nitsasoko. Ata hi:

– Batu aty tohi pitsi rika ziknapok. Iwaze peryk pukezi zik niy. Batu aty tohi rika wanu pukezi zik niy. Pitsi rika jobaze zik my. Isapy eze tu my. Iwatsahi kytsa inapupunahaze amypubyri.

²² Aba hawa ha jokpitsīha bykyze kino piwatawy. Aba amy humo batu myhyrinymyry bykyze kino tanymyryky.

²³ Kaharere tsiwaby tsihikiknaha zeka wabyziutaha! – niy.

²⁴ – O wabyziutahaktsa kytsa! Hawa utsa kytsa ahasopyk ana kino Deus ahabo isopyk. Ikiahatsa utsa kytsa mysisapywyky zeka Deus pahasapywyky. Ikiahatsa utsa bo tsmysisapybyrikinaha zeka ahasopyk, iwaze Deus kino niwatihi ahabo atsatu isopyk Deus ahahumo iakyri mozik.

²⁵ Atakta pinymyry tsihikik pihyrinymyrytohi. Atakta kaharere bo batu wabytokto tsikaeni zuba pinymyry myspiriktsokdaka, Deus mymyspiriktsokda.

Siriktsa soho humo nisihrinymyryky.

²⁶ Sesus nipamykysokozo:

– Deus tyryktsa abazubatsa mozikze maku wata. Atakta tatsuhuk bo siriktsa nisiparikik.

²⁷ Unata zurubakaze siriktsa mozipobanaha. Pibytuhukutu inapopoze siriktsa taypykbakanaha. Hawa siriktsa taypyknaha maku batu ihyrinymyry.

²⁸ Ta zuba taypyknaha siriktsa mozipokonaha. Tapara ipa mozipo, iwaze ikoka motaypyk iwaze riktsa ikoka eze mynahareknaha. Sizubarëtsa niubaranaha.

²⁹ Kyze moakuknahaze niunaha maku penari ty mysizyzyknaha, nikymy-nahaze atsoko mysizyzyk nahỹ – niy. Iwa Sesus siriktsa soho humo nisi-hyrinymyry.

Mostarada riktsa soho humo nisihrinymyryky.

³⁰ Sesus nipamykysokozo. Deus tyryktsa abazubatsa humo nisihrinymyryky:

– Hawa kytsa Deus tyryktsa sa. Hawa Deus tyryktsa mypehakatsa zahawatawyky.

³¹ Rik tsibik taypykze watsa. Rik mostarada wata niy. Wytyk eze ziparikikze mostarada pyripykani riktsa.

³² Kyze rik taypykze hwi puëtsikbyita mozik, tisarapazubarëta mozik. Iwaze piyktsa ibete tahasukuknaha isarapatsa watu mykaranaha – niy.

Iwa nipamykysoko Deus tyryktsa sizubarëtsa mozik. Taparaka batu sizuba aibani abazubatsa moziknaha. Hawa mostarada niubara iwatsa Deus tyryktsa mysiubaraka.

Taparaka iokpitsĩhatuk anasoho hi kytsa mysihyrinymyryky.

³³ Iwaze Sesus sisoho sizubarëtsa kytsa bo nipamykysoko. Iwa nisi-hyrinymyryky. Sibonipamykysoko, zinymyrykynahaze iwaze kytsa nisi-hyrinymyrytohi. Isoho humo zuba nisihrinymyryky.

³⁴ Bykyzehu atazubaze zinymyrykynahatsa tuk sisoho humo nisiwatawyziu ana hi nitsasoko. Iwa sisoho humo mytsatyziu nikaranaha.

Sesus zopoktsa nisipykwyhik.

³⁵ Kyze haramwe zunubakaze, Sesus zinymyrykynahatsa pe:

– Koikny tynaporenahaktsa kytsa! – niy.

Yhỹ niaha.

³⁶ Utsa nisiksiwyhiknahaze Sesus tsaraha eze nitareta, iwaze zinymyrykynahatsa zikorohyknaha. Nabo amykta taba zitsikzakanaha. Utsa tsarahatsa kino niwatihi nikurunaha.

³⁷ Iwaze atsoko zopoktsa inabybyknaha. Pihik ihiridawy waha niukuru tsaraha pihik ty inaharekek, ana humo hi asiba nitaboknaha.

³⁸ Sesus kino tsapukteze nihoeke. Zurubaka iharek panu bete nihoeke iwatsahi tahapybyspyk tu zituzutuzukunaha. Zinymyrykynahatsa ity zipopohiknaha.

³⁹ Kytsa:

– O mypehakatsa batu iktsa ziky tsimymybabakanaha! – niaha.

Kyikrikto niyze:

– O zopoktsa aksobyitahaktsa! Niwazuba pihik pyktykta! – niy.

Zopoktsa atsoko paỹ niaha. Pihik atsoko nitsikyrituhudibyri.

⁴⁰ Sesus ispe niy:

– Amy pokso ahapybyrẽtsa “Sesus batu imypokzitsiuk” tsimykaranaha – niy.

⁴¹ Tahapybytuk tu nitsasokonaha:

– Atakta Sesus aty skaraba! Zopoktsa, pihik, ihumo ziwabykynaha. Aty skaraba Sesus! – nikaranaha. Batu sihyrinymyry. Sesus Deus tse, ihumo sihyrinymyrybyitsa.

5

Sesus maku hyrikosotsa sapybaratsa tukukta nisiksiwyhik.

¹⁻² Iwaze koiknyktsa taba bo Kerasa tyryktsa bo zukzuk niahaze. Sesus byuzo niyze, maku ibo izumu. Hyrikoso sapybara zikzibytuhukunaha tu ibo pororo ziknakaranaha.

³ Iwatahi siytyk baze nitareta. Atazuba zikzuruku. Mytyk ikny tahi ziknakara ana eze hi ziknapykyryk. Batu ipaiktaze kino zizukbatsi karikutsitsitsa humo kino ba ziknazukbatsikinaha ba itsipatsa ty pokzi zikaha ipyrytsa ty iwa ziknakaranaha kino batu karikutsitsitsa ziknasitsawakbakanaha ba aty tohi zipaik.

⁴ Karikutsitsitsa zipyrytsahãihiknahaze ziknasitsawakbaka sasabyitsaktsa batu sipaik ipaikwy tysukni ahabyitsa.

⁵ Okoroze unata niwatihi kadi ziknakara. Hara joboni eze siytyk eze kino niwatihi ziknakuru. Haraharetsa humo taharekywyikik.

⁶⁻⁸ Iwaze ẽrykani Sesus bo nikoze ibo zumu. Taekaratsa humo iokeryk puruk puruk niy.

– O Sesus abazubata tsihyrinymyrẽta – nikara. (Sesus ihyrikoso sapybara ziny tahi zipeha:

– O hyrikoso sapybara nabo pãoty! – niy.) Maku hyrikoso sapybara tukta opykani kakaik niy:

– Amo Sesus Ikia hi Deus tse. Amo skaraba kabo tsikzumuku Deus zikwy humo awatu tykta! myhumo batu asopyksapyhukta – niy.

⁹ Sesus:

– Amo skaraba anaro – niy.

– O kanaro myzubaha katsa myzubarẽtsa hỹ – niy.

¹⁰ – O hyrikoso sapybara sapy bo ka isty pehapehabyity – maku nikara.

¹¹⁻¹² Pazaharezatsa sizubarẽtsa hara sukpe taba bo tahadisahakanaha.

– Katsaktsa za pazaharezatsa tuk tsimypykyknaha – hyrikoso sapybara nikaranaha.

¹³ Sesus ispe niy:

– Pazaharezatsa bo tahaktsa – niy. Iwaze pazaharezatsa bo zumukunaha, asa hi iharatsupetohowy bo nitururukiknaha. Pihik bo niharazukzukbaiknaha sizubarẽtsa dois miutsa niakbabaiknaha. De.

¹⁴ Iwaze pazaharezatsa perytsitsa nitururukiknaha, nanabyitaba myzubaha bo nipamykysokonaha.

– Sesus hyrikoso sapybara nisiksiwyhik iwatsahi pazaharetsa niakbabaiknaha – nitsasokonaha. Iwatsahi kytsa Sesus bo inakozorenaha:

– O hawa skaraba – nikaranaha.

¹⁵ Ibo izumunaha, maku bo nikozonaha. Astatu. Taparaka hyrikoso sapybara pokso, dyhyhabyita tu, inakuru zuba. Abaka Sesus baze modyhyky nikara. Taparaka batu isuku. Abaka tasukuk. Wasani mytsaty mykara nizororo.

¹⁶ Ibo nikozonahaze sipybyrëtsa. Pazaharezatsa perytsitsa: – Iwaha nitsasokonaha – niaha.

¹⁷ Hyrikoso sapybara soho ty nipamykysobanahaze, kytsa:

– O tsiksizokta, Sesus! Ikia pokso mypybyrëtsa – niaha.

¹⁸ Iwaze Sesus tsaraha bo takoroze izororota:

– O ikia hapik! – niy.

¹⁹ Sesus:

– O batu. Awahoro bo tsiksikta! Atukytsa pe tsimy “O, Deus kahumo tsimypokzitsiukrëta. Abaka ikzororo” tykta! – niy.

²⁰ Hyÿ niy. Ziksizo. Itukytsa Sesus soho ty nipamykysoko. Nanabyitaba hudikhudikwy mytsyhyrytsawa bo Sesus soho ty nipamykysoko.

– O abaka ikzororo. Sesus zikzororowy – nikara. Sizubarëtsa paikpa iktsa nikaranaha.

– Amo skaraba! – niaha.

Sesus imyitsapyritatsa zizororowy. Sairuste jypykyhyzytyktatsa zihyrizikpowy.

²¹ Kyze Sesus zinymyrykynahatsa tuk amykta tabakta iziksizonaha. Iwaze nimyrazata eze kytsa sizubarëtsa ibo izumukunaha.

²² Iwaze Sairu Sudeu wahoro taparaktsa Sesus bo izumu.

– Sesus abazubata – mytsaty nikara. Iwatahi taekaratsa humo puruk puruk nikara

²³ Niytahi:

– Pany Sesus! Tupakta kawahoro bo! Kaste pomozaka. Aidytykta! Ihumo paik tsimy zeka mozororo. Iwa zeka ba zikumuza – niy.

²⁴ Yhÿ niy. Sairu hapik niparak. Siapik sizubarëtsa niukurunaha zihyriz-abaiknaha.

Sesus imyitsapyritatsa zizororowy.

²⁵ Wytyk tihi siapik niukuru. Ispubyri ahabyitatsa ispu ba ziknapyk. Mytsyhyrytsa wa ziytyk tseheze imyitsapyritatsa ziknapykyryk.

²⁶ Atatsa myzororowytsa bo. Nanabyi zikzikuku zikino batu izororowyhuk iwatatsahi taokyrasaroko zepykba. Imyitsapyritatsa babatatsa.

²⁷⁻²⁸ Sesus soho kytsa nisizororowy ziwaby iwaze atatsa tasopyk:

– O ikza isuk humo paik my zeka mozororo – mytsaty nikara. Iwaze isukpetaba zuk. Kytsa papatu isuk tsihara humo paik niy.

²⁹ Atsoko ispu inapyk nizororo.

– O ikzororobaba – mytsaty nikara.

³⁰ Sesus zinymyry Deus zikwy zipo. Iwaze Sesus:

– Aty sa kasuk humo paik niy – niy.

³¹ Zinymyrykynahatsa:

– O ikiasta iwewehe baeze tsimypykyryknaha. Amo “Aty sa kasuk humo paik niy” tsiky – niaha.

³² Sesus paikpa iktsa nikara aty sa kasuk humo paik niy atahi ziperyky.

³³ Iwaze atatsa izororotatsa ibo zumuzo. Tsipybyrëtsa nikara. Nitydydykyktatsa tu ibo zumu iokeryk taekaratsa humo puruk puruk niy. Ihumo tispirikporëtsa. Ibo ta humo ky nitsasoko.

³⁴ Sesus ipe niy:

– O katukywatatsa. “Sesus pikzororowy” tsiky. Ikia kazikwy humo aspirikpotatsawy azororowy. Akurëtsa tsiksi. Awahi tsikzororo baba – niy.

Sesus jypykyhyzytyktatsa niratatsa zihyrizikpowy.

³⁵ Iwa nitsasokoze, kytsa sibo zumunaha. Kytsa Sairu wahoro ezektza, sibo harape bo zumukunaha. Asahi:

– Aste botu nihyrikosokda Sairu. Kyzekta! Iwa zeka Sesus mytakni! – niaha.

³⁶ Sesus ziwaby tahi Sairu pe niy:

– Apyby byihukta! Uta kabo zuba mytsaty tsimy zeka kahumo tsaspirikporêta. Tupakta! – niy. Iske buruk hyry hyry hyryzo niaha.

³⁷ Iwaze Sesus tuk zinymyrykynahatsa harakykbyi zuba nisioktyhyryk Peduru, Tsiaku, itsy Suão, iwatsa zuba Sairu wahoro bo zumunaha.

³⁸ Ata wahoro eze kytsa sizubarêtsa Sairuste pokzi hawa tohi zikahabyispyk nipuziukunaha.

³⁹ Sesus nitsukze ispe niy:

– Hawa hatsa sa tsimopuziukunaha Iste mahani isukmuza byitatsa tu purubakatu – niy.

⁴⁰ Iwaze ana hi ziwabynahatsa hazi nikaranaha. Sesus humo sihyrinymyrybyitsa iwatsahi tsaeni bete tu nikaranaha. Sesus ispe niy:

– Ape bo tsiponahaktsa! – niy, ape bo kytsa zipoiknaha. Iwaze Sesus tatuktsa, Sairu, Sairu oke, iwa jypykyhyzytyktatsa bo izumunaha.

⁴¹ Sesus jypykyhyzytyktatsa bo izumuze itsyhyrype humo paik niy. Ipe:

– *Tarita kumi* – niy. Siharere piwatawy. – Jypykyhyzytyktatsa pe kyikyktatsa! – niy.

⁴²⁻⁴³ Atsoko nahyritziko, natarikto, zitabaka iwaze nipybybaiknaha. Atatsa dose mytsyhyrytsa wa ziytyk tsehetatsa. Sesus kytsa pe:

– Ahakso byitaha. Atatsa idisahawy ty ibo nynyntaha! – niy. Idisahawy ty ibo nyny niaha. Iwa hỹ.

6

Nasare ezektza Sesus harere bo batu yhỹ nikaranaha.

¹ Kyze Sesus ziksizo. Nasare eze itaypykyk zinymyrykynahatsa tuk zumu.

² Nawa zuruze tabyrywy eze Sudeutsa wahoro bo zumubanaha. Anaeze kytsa nisihyrynymyrykyze sipybyrêtsa nikaranaha. Ihyrinymyrywy ziwabynahaze nipybybaiknaha. Asa hi:

– Atakta hawa sa zinymyryky. Hawa myhyrinymyrywy baba sa. Aty sa zispirikpoko. Amy ty kytsa batu zikaha ana ty hi mykara, aty sa zikwy ituk mynapykyryk.

³ Atahi ja hwitsabikitsa Maria tse. Tsiaku Sose Sudas Simaõ iwatsa moziky ipe sisopyk. Iwa itukytsa maha. Itukykyry mytuk tu niwatihi maha – nikaranaha.

Iwaze iharere bo batu yhỹ nikaranaha.

⁴ Iwaze Sesus ispe niy:

– Nanabyitaba Deus sohokotsa harere kytsa piwabytoktokonaha. Atahi tahudikhudikwy eze tu zeka iututsa pauksitsa batu iharere ziwabynaha – niy.

⁵ Kytsa Sesus humo sispirikpoziubyitsa zikwy batu iwatawyhy. Atahi batu sizuba simyitsapyritsa nisizororowy tatsyhyrypetsa ty sibete tsika nikaraze nisizororowy.

⁶ Ihumo sispirikpobyitsa tu ana humo hi paikpa mytsaty nikara.

Sesus dose zinymyrykynahatsa nisipeha.

Iwaze ustsya myzubahatsa bo niukuru, anabo kytsa nisihyrynymyryky.

⁷ Kyze Sesus tuk zinymyrykynahatsa nisipehaka. Iwaze tazikwy ty sibo nyny niy. Iwatsahi kytsa asahi hyrikosotsa sapybaratsa sibo pororo ziknakaranaha nisiksiwyhiknaha. Sesus zikwy humo hi hyrikosotsa sapybaratsa ziknasiksiwyhiknaha. Nanabyitaba nisipehaka. Sipepok kohotsa ty zuba iwa nisipeha.

⁸ Ispe niy:

– Ahazozowy ty zuba wabehyryk taha. Ęryka bo tsipomonahaze ahaboro-hobyitsa tutaha! Ahadisahawy byitsa tutaha! Okyrysaro ty kino pok pok byitaha!

⁹ Ahapyrysuktsa ty zuba korobyktaha! Usa ahasuk tyka pok pok byitaha! Estuba zuba tsimaha. Batu petok suk pok pok byitaha – niy.

¹⁰ – Hudikhudikwy tsimyzumunaha. Wahoro bo tsimypupunaha zeka anaeze hi tsimypykyryknaha. Asta wahoro eze tu zuba tynapykyryknaha.

¹¹ Tsipomonahaze tsarytsitsa ahape pany pakuty ahabyi zeka. Asaktsa ahaharere ty waby ahabyizeka meky botu tsimaha. Tsimykurunahaze ahapyrysuktsa ty bokbokyk taha. Wytyk tazy ty mynatō. Mynatō zeka sihudikhudikwy ezektsa Deus harere bo batu yhỹ niaha iwatawy – niy. Iwa Deus mysisininiwyky anahi piwatawyky.

¹² Iwatsahi zinymyrykynahatsa Deus wasaniha sizubarētsa bo mot-sasokonaha. Asaktsa:

– Ahasopyksapybyitsa ty tsikykaranaha tsimoewynahaktsa kytsa – nikaranaha.

¹³ Kytsa asahi hyrikosotsa sapybaratsa sibo pororo ziknakaranaha nisisik-siwykynaha. Simyitsapyritsa siharek bete ituta hyrity waha ty ziknasiharasusunahaze ziknasizororowykynaha.

Suão Batista bezewy.

¹⁴ Kyze sihudikhudikwy pehakatsa myhyrizikwanitsa Erodes inarokota atahi Sesus soho ziwaby. Kytsa sizubarētsa Sesus soho ziwabykynaha. Asa zuba nipamykysokonaha:

– O atakta Suão Batista inahyrizikpo iwatahi amy ty kytsa zikahabara ty ana ty hi mykara.

¹⁵ Utsa batu:

– O atakta Erias taparakta mydiri – nikaranaha.

– O batu, taparakta Deus sohotsa ziknakaranaha – ustsas wastuhutsa nikaranaha.

¹⁶ Erodes ana ziwabykyze:

– O ata hi ja Suão Batista iky. Uta kino kytsa pe Suão Batista soik buruk hi bokokik iky. Atahi ja inahyrizikpo – niy.

¹⁷ Tapara Erodes pehakata kytsa Suão bo nisipehahik. Asahi itsipa humo sakyriukrēnikitsa hurukwy bo zioқтыhyryknaha. Ana eze karikutsitsiwytsa ty zipawarakanaha. Iwa hỹ. Ana kino isopyk Erodias humo. Tatsa itsy Piripi oke iwatuze atatsa tuk ziaксе niy.

¹⁸ Tapara Suão tihi:

– Ikia Deus harere bo batu yhỹ tsimy. Deus harere tihi “Atsy oke ba ziaксе.” Ikia atsy oke tsiakse iwatahi Deus harere bo yhỹ ahabyitahi tsiky – ziknakara.

¹⁹ Ana humo hi Erodias tsiakyriukarētatsa, iwatsahi Suão zibezekyzyky Erodes ipokso hi batu zik, atahi ihumo tsipybyrēta.

²⁰ Erodes Suão soho humo tsihyrinymyrēta. Atahi tsimysapyrēta ana humo hi tsihyrinymyrēta. Iwatahi ihumo tsimiharerewabyrēta. Iharere humo ziwabyze paikpa mytsaty nikara. Iharere ziwaby tsihikik ziknakara:

– Atakta sakyriukrēnikitsa hurukwy eze ka kytsa ba zibezena, iwahi piperyky – mytsaty nikara.

²¹ Kyze Eroses myikaha zumuze. Tummy tsihohokrēna inakymyze iwa Eroses purukwy zumuze imyikaha bo mytsaty nikaranaha. Sizubarētsa sakzohotsa bo huahua niy. – Kamyikaha bo tyzumunaha – nikaranaha. Kytsa myhyrizikwanitsitsa sodadutsa pehakatsa, Karireja hudikhudikwy ezektsa asaktsa simyhyrizikwanikitsa iwatsa kytsa sizubarētsa imyikaha bo izumunaha. Iwaze Eroses oke Erodias inarokotatsa ana hi ziperyky iwaze hi Suão zibeze tsihikik. Naha atatsa tape aba ikza Suão pibezewyky.

²² Kyze Erodias ste jypykyhyzytyktatsa tsarawybara bo tu netsuk. Atatsa hi Eroses ykzohotsa okze nikariki. Tisapyrēna ty nikariki iwatatsa hi kytsa sakurētsa nikaranaha. Iwaze Eroses ipe niy:

– Amy sa tsimyzihikik. Amy ty kabo tsimyzapyky zeka anatyhi abo nyny my.

²³ Deus kaharere piwaby iwatahi atsatu mykara. Amy kabo tsimyzapyky zeka ana ty hi abo nyny my. Kahudikhudikwy bo tsimyzapyky zeka tsapukte buruk abo nyny my – niy.

²⁴ Iwaze atatsa zoihik. Taje pe niy:

– O kaje amy sa ibo myzapyky – niy. – Suão Batista harek tsimyzapyky hỹ – ije niy.

²⁵ Iwaze aidy atatsa ziksizo. Eroses pe niy:

– Suão Batista harek ty kabo nyny tsimy hỹ. Aidy iharek ty mypewy eze korok tsimy iwaze kabo tyny – niy.

²⁶ Sipehakatsa Eroses zisukatsihikbaik. Suão Batista soho ziwabyze tisukatsihikarēta nikara. Taharere ty ka sakzohotsa bo batu yhỹ niy, ana humo hi batu tyso. Tisikpybyrēta. Iwaze sodadu pe niy.

²⁷ – Suão Batista harek ty bokokiktykta. Isoik buruk bokokyk ty – niy. Sodadu niparak. Sakyriukrēnikitsa hurukwy bo netsuk. Anaeze Suão soik ty bokokik niy.

²⁸ Iwaze iharek ty mypewy eze niy. Erodias ste bo zibykyryk. Atatsa taje bo iharek ty nyny niy. Iwa Eroses Suão Batista zibeze. Erodias iharek bo iktsa niyze Suão zibeze tsihyrinymyrētatsa.

²⁹ Suão Batista tuk zinymyrykynahatsa ana soho ziwabynahaze izumukunaha. Inury ty zizozikarenaha. Harahare yktaba nitsahoroknaha de.

Sesus kytsa sizubarētsa nisidisahawyky.

³⁰ Kyze siakzohotsa Sesus bo ziksizonaha. Amy ty nisihyrynymyrykynaha ibo nipamykysobaiknaha.

³¹ Kytsa sizubarētsa paikpa myzukurunaha zinymyrykynahatsa Sesus ahatsa bo zumukunaha. Iwatsahi sibirybyitsa tu nikaranaha sidisahabyitsa tu. Iwaze Sesus zinymyrykynahatsa pe niy:

– Nabokta jerukbara bo tsimymybyrynaha! – niy.

Yhỹ niaha.

³² Iwaze zinymyrykynahatsa ituk jerukbara bo tsaraha eze kokorohyk niaha.

³³ Utsa kytsa zuba nisinyaha. Asaktsa:

– O Sesus tuk zinymyrykynahatsa nabo mokurunaha. Tsimytururuknahaktsa! Hara taba siharaze nabo tsipomonahaktsa! – niaha. Kytsa sizubarētsa niukurunaha.

³⁴ Iwaze Sesus anabo byuzo niyze kytsa sizubarētsa bo iktsa niy. Sihumo tsimypokzitsiarēta, sispirikpobyitsa tu sihumo tsimypokzitsiukrēta:

– O Deus soho piwaby tsihikiknaha iwatsahi kaharaze nitururuknaha – niy. Iwaze Sesus nisihyrinymyryky iwaze kytsa ziwabytoktonaha.

³⁵ Zunubakaze zinymyrykynahatsa ibo zumunaha:

– O Sesus tykara eze ka batu mydisahawyky. Abaka punubaka hỹ.

³⁶ Kytsa hudikhudikwytsa bo tysipehakta! “Ahadisahawy tyzeskyknahaktsa” tsimy – niaha.

³⁷ Sesus:

– O ikiahatsa sidisahawy ty sibo nynytahaktsa! tsimaha – niy.

– Hawa skaraba atsikara ty huak tsimaha batu okyrysarotsa dusētos namy parata hi batu ziaксе. Batu amy tohi ty zikaha – niaha.

³⁸ Sesus:

– Hana wa skaraba mydisahawy iktsatahaktsa! – niy. Kytsa iktsa niahaze:

– O atsikara mytsyhyry wa zuba. Piknutsa petok zuba – niaha.

³⁹ Iwaze kytsa sizubarētsa pe tsimaha:

– Tyk humo dyhy dyhytaha! Parakbaha dyhy dyhytaha! – Sesus niy. Sīkuētatsa, sētsa iwa nidyhydyhykynaha.

⁴⁰ Towahaditsa sikakairētsa bete itahadydyhynaha. Parakbaha sē, sīkuēta iwatsa sibete nidyhydyhykynaha.

⁴¹ Iwaze Sesus atsikara ty okok niyze, piknutsa ty iwa nasekykzoze bijo bo iktsa niy. Deus pe nikara:

– Ikiakta tsamysapyrēta ikia humo ka mykurētsa – niy. Atsikara zitsakze zinymyrykynahatsa bo nyny niy:

– O sibo tsipibiaknaha piknutsa petok tsibik zuba tsatu niwatihi sibo nynytahaktsa! – niy.

⁴² Sibō nyny nyny nynyzo niy. Sesus ziubarawy iwatsahi kytsa sizubarētsa tahadisahakanaha. Sibō zibiakakzoze iwaze nitare tu. Bykyze:

– O mysorokrētsa – nikaranaha.

⁴³⁻⁴⁴ Tahadisahabanahaze atsikara piknutsa ahatsa nitare nahatsa peryktsa bo zipupukunaha. Mytsyhyrytsa ty pỹ ahatsawa nasiharekbanaha. Kytsa sizubarētsa sīko miutsa tahadisahakanaha. Siokeza, tahahyrytsa tuk niwatihi tahadisahakanaha.

Sesus pihik tsiksukpe buruk niukuru.

⁴⁵ Atsoko Sesus tuk zinymyrykynahatsa Betesaida bo nisipeha. Ispe niy:

– Tsaraha eze kokorohyktaha! Kaharaze pihikzotsabyri koikny tsitsikzanahaktsa! kytsa! – niy. Iwaze Sesus myzubaha siwahoro bo nisipehaka. Nisipehakaze zinymyrykynahatsa koikny ziturikinaha.

⁴⁶ Myzubaha ziksibanahaze, Sesus hara bo nido. Anaeze Deus bo nipamykysoko.

⁴⁷ Zunubaze Sesus atazuba hara bo nido. Zinymyrykynahatsa pihik tsikpukteze buruk ziturikinaha.

⁴⁸ Sesus sibo nikozo. Opykani ziturikinaha. Zopoktsa pokso opykani ziturikinaha, iwatsahi ispara izumu. Zokorobyitu sibo niy. Miwa botu kytsa bo pihik tsiksukpe buruk inaukuru harazuk ahabyita pitabaka. Asiba nisiharamu.

⁴⁹⁻⁵⁰ Sesus bo nikozonahaze pihik tsiksukpe buruk niukuru sipybyrētsa nikaranaha. Tahapybyspyk tu kakaik niaha. Ihyrikoso zuba mytsaty ahabyitsa. Ipokso sipybyrētsa. Iwaze atahi:

– O ahapunihikuktsa kytsa! Ahapyby byihu ja! Uta hi mykara – Sesus niy.

⁵¹ Iwaze Sesus tsaraha bo natakorō. Atsoko zopoktsa inapyknaha niukurunaha. Iwatsahi paikpa mytsaty nikaranaha.

⁵² Sesus Deus tse babata humo batu sihyrinomyry. Amy humo kytsa sizubarētsa disahawyky ty ziubarawy ana humo hi nisiwatawy zinomyryky-nahatsa ihumo batu sispirikpo. Sioktsiokrētsa iwatsahi batu siaku. Bykyze zuba Sesus humo sispirikporētsa moziknaha.

Kenaserete bo simyitsapyritsa nisizororowy.

⁵³ Pihikzotsabyri zitsikzanahaze Kenasere bo zumunaha. Ipupuwu bo nimyra byu niaha.

⁵⁴ Tsaraha ikny nizoknahaze kytsa Sesus zinynaha.

⁵⁵ Iwatsahi siwahoro taba paikpa zikzumukunaha. Simyitsapyritsa Sesus bo nisioktyhyryknaha. Asaktsa tahawanu eze tu ibo nisioktyhyknaha. Nanabyitaba niukuruze.

⁵⁶ Kytsa hi:

– O Sesus mybo mozumuku – niaha. Ana zikziwabykynahaze simyitsapyritsa Sesus bo ziknasioktykyryknaha. Tsarawybara eze simyitsapyritsa iokeryk ziknasihoekeknaha. Situkytsa Sesus pe niaha:

– O asuk tsihara humo paik tsimaha zeka mykurētsa – nikaranaha.

Yh̄y niy.

Iwaze asaktsa Sesus suk tsihara humo paik maha zeka mozororobaiknaha. Nanabyi Sesus zikwy humo simyitsapyritsa sizubarētsa nizororobaiknaha.

7

Sesus Sudeutsa sopykwy humo nisihyrinomyry.

¹ Kyze Pariseutsa iwatahatsitsa kino niwatihi asaktsa Serusarēhe ezektsa inakypyknaha. Sesus bo izumubanaha.

² Taparaktsa sopykwy ty nisihyrinomyrykynaha. Tapara tahatsyhyrype pikiknaha iwaze tahadisahakanaha. Taha ty tsyhyrype pik byizeka ba ziktahadisahanaha.

³ Pariseutsa Sudeutsa ahatsa tahatytsyhyrype pik byizeka ba ziktahadisahanaha, sizotsa iwa nisihyrinomyrykynaha.

⁴ Hawa ha ty sidisahawy zozokorowy ikny zibykyknahaze nitsapikiknaha tsizubarēna iwaze zuba tahadisahakanaha. Iwa taparaktsa sopykwy humo nikaranaha. Deus okze ka mysapyrētsa mytsaty ahabyitsa nikaranaha. Taparaktsa sopykwy humo yh̄y byizeka Deus ispe:

– Ikiahatsa batu ahamysapy – mytsaty ahabyitsa ziknakaranaha. Sipowysuktsa ty morosuk ty karikuktsa ty iwahatsa ty mysiokepiknaha taparaktsa sidiritsa sopykwy humo.

⁵ Sesus tuk zinomyrykynahatsa tahadisahanahaze ba ziktahatsyhyrype piknaha. Taha ty tsyhyrype pikbyritsa tu tahadisahakanaha. Taparaktsa sopykwy humo yh̄yhabyytsa nikaranaha. Iwaze Pariseutsa Moises harere watahatsitsa niwatihi ana bo kino iktsa nikaranahaze ipe niaha:

– Amy humo zinomyrykynahatsa taparaktsa mydiritsa sopykwy yh̄yhabyytsa nikaranaha. Amy skaraba sityhyrytsape pikihikbyitsa tu tahadisahakanaha – niaha.

⁶ Iwaze Sesus ispe niy:

– Tubabatu Deus ahasoho ziwatahaka. Ikiahatsa zihawatahakanahatsa watsa kytsa bo tysimiwykynaha. Isaijas Deus sohokotsa tihi:

“Asaktsa katsa Deus humo mymypoکززitsirētsa mybarapetu mykaranaha.

Ihumo batu simypoکزzitsi, iwatsahi nispipihikbatakanahatsa.”

⁷ “O Deus ikia zuba wasani tsimykara” nikaranaha

kaharere bo batu ma nikaranaha. Sispipihikbatakatsa tu

“O katsa Deus harere ahabo tsimytsasokonaha” mybarapetu nikaranaha.

Tahaharere ty zuba motsasokonaha.

Tubabatu Isaijas Deus sohokotsa iwa sisoho ziwatahaka – Sesus niy.

⁸ Deus harere bo batu ma zikaha. Iharere batu ahawabyhy. Ahazotsa sopykwy ty zuba tsimykaranaha.

⁹ Deus harere bo batu yhÿ. Katsa mysapyrëtsa mytsaty ahabyitsa tsimykaranaha, ahasopyk zuba tsimyzihikiknaha. Batu ahape tu tsipimykiknaha.

¹⁰ Tubabatu Moises ziknakara:

– Ahazotsa tysipokzitsinahaktsa! Ahazotsa, ahajeza kino niwatihi wasani ahasopyk. Aty tazo pisapybyriki zeka tsibezehek. Aty taje pisapybyriki zeka tsibezehta – niy. Iwa tubabatu Moises ziwataha ahazotsa soho. Ikiahatsa hi iharere bo batu yhÿ zikaha.

¹¹ Ikiahatsa hi:

– O kazo kaokyrysaro ty abo nyny mykara eze tu batu zik. Anaokyrysaro ty Deus bo nyny my iwaze ba zatsumuëhĩ – tsimaha.

¹² Anahi kytsa bo tsimytsasonaha zeka tsimykiknaha. Kytsa tahanamy ty tahazotsa bo nyny maha wasani maha. Aha humo batu nyny maha. Iwaze ikiahatsa kytsa tsimiyiwykynaha.

¹³ Ikiahatsa Deus harere bo batu ahamyzihih. Ahaharere ty zuba tsimykaranaha. Iwaze Deus harere humo batu ahakparawy. Iharere humo tsipimykiknaha. Sesus Pariseutsa pe niy.

Kytsa simysapybyitsa moziknaha.

¹⁴ Kyze Sesus kytsa sizubarëtsa pe niyzo:

– Kabo tyzumunahaktsa kytsa. Kaharere bo wabytaha! Tsiwabytoktonahaktsa! – niy.

¹⁵ – Amy ty maku hauk my zeka ba ana humo hi isopyksapybyita nikara. Hawa kytsa mytsaty mykara ana humo hi batu imysapy mozik. Hawa motsasoko ana humo hi batu imysapy mozik hawa mynakara ana kino batu imysapybara mozik.

¹⁶ Kaharere tsipiwaby tsihikiknaha zeka wabytoktotahaktsa! – niy.

¹⁷ Iwaze Sesus myzubaha ikny niparak. Zinymyrykynahatsa tuk iwahoro bo zumunaha. Inapupunahaze ipe niaha:

– Amy ty asoho ty tsimymywatawyky, amy ty tsimymyhyrinymyryky – niaha.

¹⁸⁻¹⁹ Sesus:

– Ikiahatsa ja niwatihi ikiahatsa sizubarëtsa watsa, batu wabyziuha tsimaha. Kytsa tahadisahanahaze wasani mykaranaha. Ana humo hi sakurëtsa moziknaha. Sidisahawy siwazik eze zuba. Iwaze pikaranahaze hana bo ja – niy.

Iwa Sesus nisihyrinymyryky nanabyi mydisahawy wasani my, kytsa bo mektsatu disahawy watsa ty wasani my.

²⁰ Sesus nitsasokozo:

– Mydisahawy tisapyrëna my. Hawa ty kytsa mytsaty mykaranaha ana humo hi batu imysapy my.

²¹ Kytsa wytykyryk ahaza niwatihi hawa sa batu simysapy mytsaty mykaranaha zeka sisopyksapybyitsa tu mykaranaha anahi batu imysapy. Iwaze kytsa ustsaktsa pimiywy tsihikiknaha. Mekta oke tu piakse tsihikiknaha. Mektsa barikta tu mozihikiknaha zeka. Kytsa mysiba tsihikiknaha. Kytsa namy piakse tsihikiknaha.

²² Mekta oke bo ihizikikwy. Siharerewabymybarëtsa. Simyspihikbatanikitsa. Sisopyksapybyitsa tu mykaranaha anahi zimiywynaha.

Sizokdirētsa. Utsa mysimiywykynaha. Sisakimiyjarētsa tu, “O katsa zuba mysapyrētsa” mybarapetu mykaranaha.

²³ Iwa kytsa mytsaty mykaranaha zeka iwaze batu imysapy moziknaha. Ana kino batu imysapy my. Mydisahawy zuba tisapyrēna my – Sesus niy.

Sudeubyitatsa tu Sesus humo tispirikporētatsa.

²⁴ Kyze Sesus niparak. Tiro bo bytykareze tu anabo niukuru. Anaeze wahoro bo nitsuk. Nitare tykareze. Kytsa batu ityny anaezehe nitarespyk. Batu kytsa ityny.

²⁵ Iwaze wytyk Sesus wahoro eze ziwaby. Ana ziwabyze atsoko wahoro bo niparak. Atatsa ste bo hyrikoso sapybara ibo pororo ziknakara. Iwatatsahi aste tsyhyryze Sesus bo niy. Zumuze iokeryk taekaratsa humo puruk puruk niy, ihumo tispirikporētatsa nikara iwaze iokeryk taekaratsa humo puruk puruk niy.

²⁶ Atatsa Sudeubyitatsa tu Kereko harere nitsasoko. Siropenisia ezektatsa niy. Iwaze atatsa hi Sesus pe niy:

– O hyrikoso sapybara ty kaste bo pororo mynakara tsiksiwyhik ky! Nabo pãoty tsimy – niy.

²⁷ Sesus ipe niy:

– Batu. Ikia Sudeubyitatsa tapara kahyrytsa Sudeutsa mysitsumuēhĩ. Bykyze zuba Sudeutsabyitsa mysitsumuēhĩ. Tapara ahahyrytsa zitadisahanaha bykyze zuba kytsa sidisahawy tsihirik ty tsikuparinitsa bo nyny mynakaranaha. Tapara tsikuparinitsa bo ahadisahawy ty nyny tsimaha zeka batu isapy tsimaha. Isopyksapybyitsa. Ihyrytsa tapara tadisahanaha – niy.

²⁸ Atatsa ipe niy:

– O myhyrinymyrykytsa wasape tsiky. Tsikuparinitsa zipyryktsa hwi upukezi tu asaktsa itsatsakyhy arehe ty tahadisahakanaha. Itsatsakyha ty tsikuparinitsa tahadisahakanaha. Ikza kino niwatihi piperyky tsipiktsumuēhĩ tsikuparinitsa zipyryktsa hwi upukezi watsa – niy.

²⁹ – O aharene wasani my niy. Ana harere humo kino awahoro boktsa! Hyrikoso sapybara ty aste ekze botu iksiksiwy – niy.

³⁰ Iwaze atatsa tawahoro bo ziksi. Nitsukze iste wanu eze nihoeke. Hyrikoso sapybara botu nisiksiwy tsakurētatsa niyzik.

Sesus zikwy humo iharawita ziwaby.

³¹ Kyze Sesus Tiro ikny niparakze. Sidō bo nio kyze Dekaporis ziharamu Karireja pihikzotsabyri bo niy.

³² Iwaze kytsa iharawita Sesus bo zioqtyhyryknaha. Ana humo kino iharerebyita. Kytsa Sesus bo zioqtyhyryknaha ipe niaha:

– O atsyhyrype ty iharawita hareke bete tsikatykta! Iwaze tsipizororowyky – nikaranaha.

³³ Iwaze Sesus iharawita zioqtyhyryk. Sizubarētsa ikny ituk zuba niy. Iwaze Sesus maku ispiuke bo tatsyhyry ty korok niy. Hezok niy. Tasaytsik ty iharawita stiārik bete tsika niy.

³⁴ Iwaze bijoik pe bo iktsa niyze sisy nikara. Ipe niy:

– *Epapata* – iharere nitsasoko. Ana harere ziwatawy – Aspiukitsa sapare-taha – niy.

³⁵ Iwaze ispiukitsa sapare niaha. Ziwabyky istiārik zizororobaba tsihareresapyrēta niyzik.

³⁶ Asaktsa ibo iktsa niahaze ispe niy:

– Ana kino kytsa sizubarētsa bo batu tyso – niy. Iharere bo batu ma zikaha. Ziknapamykysokonaha hawa iharawita zizororowy naha nanabyitaba ana soho ziknatsasokonaha.

³⁷ Paikpa iktsa nikaranaha. Asa hi:

– Amy skaraba nikara tisapyrēna my – nikaranaha. – Atakta iharawita tu abaka piwabyky. Ata iharerebyita tu abaka taharere piziuku. Hawa skaraba my – nikaranaha.

8

Sesus sizubarētsa nisidisahawyky.

¹ Kyze myzubaha Sesus tuk inakypyzonaha. Batu sidisahawyky iwatsahi siarapa izumu.

² Iwaze Sesus zinymyrykynahatsa pe niy:

– Pany pāotynaha! Uta kytsa abazubatsa humo kamypokzitsiarēta. Harakykbyihi katuk zurunaha aba sidisahawy nepykba.

³ Ispe: “Awahoro bo tsiksinahaktsa!” my zeka ske buruk taharapat-sapyrispyk pumuzanaha, mektsaktsa ēryktsa tu izumukunaha – niy.

⁴ Zinymyrykynahatsa:

– Hawa skaraba tsimaha. Batu aty tohi mydisahawy ty kytsa bo nyny zeky. Jerukbara bo batu mydisahawyky. Katsaktsa ba ziksitsumuēhīnaha – niaha.

⁵ Sesus:

– Atsikara ja hana wa skaraba atsikara – niy.

– Yh̄y. Nawa usta tsyhyrype wa humo petok ziakyri sete atsikara tsimaha – niaha.

⁶ Iwaze Sesus kytsa sizubarētsa pe niy:

– Wytyk humo dyhy dyhy taha! – niy. Iwaze Sesus atsikara ty okok niyze Deus pe niy:

– Ikia tsamysapyrēta ahumo ka mykurētsa – niy. Atsikara zitsaktsakze tatuktsa bo nyny niy:

– O sibo nynyntaha! – niy. Iwaze zinymyrykynahatsa sizubarētsa bo atsikara kytsa bo zibiakaknaha.

⁷ Piknutsa batu sizuba niwatihi niaha. Sesus Deus pe niyzo:

– O kazo ikia zuba tsamysapyrēta. Piknutsa zipyryktsa ty mybo nynytykta – niy. Iwaze zinymyrykynahatsa pe niy:

– O sizubarētsa bo piknutsa zipyryktsa ty nynyntaha – niy.

Yh̄y niaha. Iwa kytsa sizubarētsa bo piknupyryktsa nisibiakaknaha. Kytsa sizubarētsa bo nyny nyny nyny nikaranaha. Nisiubarawy.

⁸ Kyze kytsa sizubarētsa:

– O mysorokrētsa – nikaranaha. Tahadisahabanahaze zinymyrykynahatsa atsikara piknutsa ty itsatsakyhy arehe ty peryktsa bo zipupukurunaha. Pok pok pok nikaranaha. Iwa sete peryktsa inasiharekbanaha.

⁹ Kytsa sizubarētsa tahadisahakanaha. Kwatero miutsa ahatsa. Iwaze Sesus nisipeha:

– Ahawahoro bo tsiksinahaktsa! – niy.

Yh̄y niaha.

¹⁰ Iwaze Sesus tsaraha bo itakorohyk. Zinymyrykynahatsa tuk kokokorohyk. Daramanuta bo niaha.

Pariseutsa Sesus pe – Amy ty kytsa batu zikaha tymywatawy – niaha.

¹¹ Iwaze Pariseutsa Sesus bo izumunahaze niharapebetsakaknaha iwaze ipe niaha:

– Deus zikwy mybo tsiwatawykta. Atakta bijoikpe iknykta zikwy iwatawy humo tsiny tsihikiknaha iwatsahi Deus zapeha tsinymyrykynaha – niaha. Iwa ziazkobyrikinaha.

¹² Sesus sihumo tisukatsihikrēta. Ihumo batu sispirikpo ana humo hi tisukatsihikrēta. Ispe niy:

– Amy humo abaktsa kytsa iwatawywy myziberikinaha. Amy humo utakta Deus zikwy mysiwatawy mozihikiknaha. Kaharere wasape batu amy tohi abaktsa kytsa bo mysiwatawy – Sesus niy.

¹³ Iwaze Sesus niparak. Tsaraha bo takorozo. Zinymyrykynahatsa tuk pihikzotsabyri koikny nipo. Pariseutsa asa zuba pihikzotsabyri sak nirikto-tohokonaha.

Pariseutsa, Erodes niwatihi sihyrinymyry napyto waha.

¹⁴ Zinymyrykynahatsa atsikara humo nispiriktsokdanaha. Estuba zuba tatuk zibykyknaha.

¹⁵ Iwaze Sesus ispe niy:

– O kytsa pykyhytutaha. Pariseutsa harere humo pykyhytutaha. Erodes harere humo niwatihi pykyhytutaha! Sihyrinymyrywy napyto naha waha anaty hi jokpitsihik abahi atsikara tsakyky napyto naha humo nawerekbaik. Iwaze sispirikpobyitsa siharere bo yh̄y mykaranaha – niy.

¹⁶ Iwaze zinymyrykynahatsa asa zuba nipamykysokonaha:

– Anatyhi nitsaso atsikara humo tsikspiriktsokdanaha ja – nikaranaha. Iharere batu sinymyry.

¹⁷ Sesus siharere humo tsihyrinymyrēta. Iwaze atahi:

– Amy humo tsimaha ikiahatsa “Katsaktsa atsikara byitsahi iwatahi anapytowy soho mybo nitsaso tsimaha”. Kahumo batu ahaspirikpo. Batu kabo mytsaty tsimaha.

¹⁸ Ikiahatsa ahahyriktsa katsa tuba, iwatsa tu batu iktsa zikaha. Ikiahatsa ahaspiukikitsa tuba iwatsa tu batu waby zikaha. Hawa ha ty botu ikykara tsikspiriktsokdanaha ja.

¹⁹ Atsikara mytsyhyry tsawata zitsaktsakze kytsa sizubarētsa s̄iko miutsa bo nyny iky, hana wa ja peryktsa bo tsipupukunaha sa atsikara ty jerehe haty tsikaha – niy.

– Dose peryktsa tsiknasihareknaha – niaha.

²⁰ – Atsikara usta tsyhyry humo petok ziakyri sete zitsaktsakze, kytsa sizubarētsa kwatero miutsa bo nyny iky, hana wa ja peryktsa bo tsipupukunaha sa itsatsakyhy jerehe haty tsikaha – niy.

– Sete peryktsa tsiknasihareknaha – niaha.

²¹ – Yh̄y iwa atsikara tsizubarēna niyzik. Ikiahatsa ahamytsatyhybyritsa tu – Sesus niy.

Sesus Betesda eze ihyrizikbyrita zizororowy.

²² Kyze Sesus Betesda ezektsa bo niukuru, zinymyrykynahatsa tuk zumunaha. Kytsa ihyrizikbyrita ibo izioktyhyryknaha.

– O Sesus ikia ihyrizikubyita ty tsika tsimy zeka mozororo – niaha. Iwa nizapykyknaha.

²³ Iwaze Sesus ihyrizikubyita tsyhyry humo paik niy. Ape baze myzubaha pauk bo ziokyhyryk. Iwaze hezok niy. Tasaytsik ty ihyriziktsa bo tsyktsyk niy. Tatsyhyry ty ihyriziktsa bete tsika niyze:

– Hawa sa iktsa tsimy kara – niy.

²⁴ – Abaka tsikaeni zuba iktsa mykara. Kytsa hwitsa watsa kaokeryk monaukurunahatsa watsa – niy.

²⁵ Iwaze Sesus tatsyhyry ty ihyriziktsa bete tsikazo niy. Nizororo. Amy-pubyri niyzik iksaziu nikara. Nizororobaba hỹ.

²⁶ Sesus ipe:

– Awahoro bo tsiksikta! Betesda bo ka erete eretebyijaty – Sesus niy.

Peduru Sesus soho humo zinymyry babata.

²⁷ Kyze Sesus tuk zinymyrykynahatsa tuk nitururuknaha. Sisarija Piripi bo niukurunaha. Piripi sihudikhudikwytsa ezektsa nisipehaka. Niukurunahaze asa zuba ske buruk inapamykysokonaha. Sesus ispe niy:

– Aty skaraba uta kahumo kytsa mytsaty mykaranaha – niy.

²⁸ Zinymyrykynahatsa ipe niaha:

– Wastuhutsa ikia pe Suão Batista nihyrikosokdata ja mykaranaha. Mekt-saktsa batu niaha. Ata hi nihyrikosokdata Erias ja – mykaranaha. Ustsaktsa batu.

– Ikia taparakta Deus sohokotsa nahyrizikpota ja mykaranaha – niaha.

²⁹ Sesus ispe niy:

– Ikiahatsa ja. Ahaokze ka aty skaraba uta ahahyrizikze ka tsimykaranaha – niy.

Peduru tihi:

– Ikiakta Kiristu. Ikiakta Deus pehababata – niy.

³⁰ – Ana tyka kytsa bo soso byitaha! – Sesus niy.

Sesus tabezewy soho nitsasoko inahyrizikpo nahasoho niwatihi nitsasoko.

³¹ Iwaze Sesus hawa mohyrikosokda naha soho nitsaso, kytsa pibezenaha soho kino nitsaso. Nisihyrinymyryky:

– Tapara utakta Deus zikpehata maku babata ahawata ikyzik. Sinini mykara Sudeutsa tapara tapykynahatsa kaharere bo yhỹhabyitsa ziknakaranaha. Taparaktsa ziknapamykysokonahatsa Deus wahoro kahumo batu siakparawy. Iwatahatsitsa kino niwatihi kaharere bo yhỹhabyitsa ziknakaranaha. Kytsa pikbezenaha. Petok puruze mynahyrizikpo – niy.

³² Iwa nitsaso kytsa nisihyrinymyryky, iharere amypubyri batu ihokdaha. Iwaze Peduru Sesus ziokytyhyryk. Žibetsakak ipe niy:

– Iwa katy kaja sosobyity – niy.

³³ Sesus uwok niyze zinymyrynahatsa bo iksa niyze Peduru pe niy:

– Satanas nabo pãotyкта – niy. – Ikia Deus harere bo yhỹhabyitahi tsimy, hawa kytsa mytsaty mykaranaha ana bo hi yhỹ tsimykara iwatahi Satanas wata tsimozik – niy, iwa zibetsakik.

³⁴ Iwaze Sesus kytsa sizubarẽtsa bo nisihuahuaka. Zinymyrykynahatsa ahatsa nisihuahuazo. Sibonipamykysoko.

Ispe niy: – Aty katukbabata mozihikik zeka atakta pibytuhukutu hawaha iakparawy zeka ana humo ka piwari. Kaharere bo zuba ma tsimykaranaha. Kytsa iharapatawyhyta bo iksa mahaze maku pibezenaha sihyrinymyrẽtsa. Pibytuhukutu kawata tsimahaktsa! Tozeka ja ikiahatsa kawa tu sinini tsimykaranaha! Hawa sinini mykara naha humo kawatu sinini tsimykaranaha hỹ. Ikiahatsa kahumo sinini tsimykaranaha zeka ana humo hi tykymynahaktsa kytsa!

³⁵⁻³⁶ Aty tapokzitsi zuba zeka tahyrizikararawy pihokda. Tanamy pihokz-aba. Aty inamy ty tsizubarẽna piakse zeka mohyrikosokdaze tsizubarẽna mohokda. Ihyrizikararawy niwatihi mohokda. Aty tohi kahumo ispirikpo iwaze kytsa ity pibeze atahi Deus tuk tawahi mynapykyryk. Atahi kahumo tispirikporẽta Deus wasania ty motsasoko atakta mohyrikosokdaze atahi Deus tuk tawahi mynapykyryk.

³⁷ Katsa Deus tuk mywahi tsimynapykyry tsihikiknaha zeka Deus bo batu amy ty ibo nyny zikaha. Deus harere humo zuba yh̄y tsimykaranaha iwaze tawahi ituk mynapykyryk, isapyha ty mybo nyny my.

³⁸ Mektsaktsa kytsa simysapybyitsa tu nikaranaha, asaktsa abaktsa kytsa deusbyitsa humo yh̄y mykaranaha. Kahumo sisikpybyrētsa. Kaharere humo kino niwatihi sisikpybyrētsa. Utakta Deus zikpehata maku wata ikyzik. Deus imysapyrēnikita izikwy tuk myziksizo. Bijoikpe iknyktsa Deus tsumuēh̄itsitsa kino niwatihi situk myziksizo. Myziksizoze, aty kahumo tisikpybyrēta zeka. Uta kino ihumo kasikpybyrēta. Aty kaharere humo tisikpybyrēta zeka. Uta kino iharere humo kasikpybyrēta Asaktsa batu katukytsa byitsawatsa – Sesus niy.

9

¹ Kaharere wasani mykara. Deus hi ityryktsa mynasipehaka. Kytsa abazubaha mynasipeha. Wastuhu ahatur kytsa ana bo hi iktsa maha. Deus ahapehakatsa mozik ana bo hi iktsa maha. Bykzehu zuba mohyrikosokdanaha.

Moises Erias iwatsa Sesus bo inatakanaha.

² Kyze mytsyhyrytsa wa zurunahaze Sesus hara bo jobonita bo kytsa nisioktyhyryk. Peduru Tsiaku Suão iwatsa nisioktyhyryk. Asa zuba, ustsaktsa nitarenaha. Sibaze meky watu itahyryty.

³ Tisukbarazarēta niyzik. Katsaktsa ibarazabaharēta batu myny h̄y. Ibaze kytsa petoktsa natakahanaha.

⁴ Erias, Moises ahatsa, tubabatu nihyrikosokdanahatsa tu, ituk nipamykysokonaha.

⁵ Iwaze Peduru:

– O myhyrinymyrytsa, watsa wyzik tykara eze harakykbyihi ahaparik tazi. Estuba ikia bo, estuba Moises bo, estuba Erias bo iwa – niy.

⁶ Tsipybyrēta tu amy ty ja nipamykysoko batu inymyryhy. Sipybyrētsa tu nikaranaha.

⁷ Iwaze bijo satata inasiharasuk. Bijo satata eze nihokdanaha. Deus iaksoho ziwabynaha. Atahi ispe niy:

– Atakta katse babata, ihumo ka kamypokzitsiarēta uta iwatawyta. Myt-sasoze tsiwabytoktonahaktsa! – niy.

⁸ Nitsasobaze atsoko Sesus atazuba nitare. Paikpa iktsa nikaranaha. Sesus bo zuba nikozonaha.

⁹ Bykzyze hara jobonita ekze inasikzonahaze Sesus:

– O jabasani tsinynaha ty kaja kytsa bo ka soso byitaha! Uta Deus zikpehata ahawata ikyzik mohyrikosokdaze mynahyryzikpoze ana zuba kytsa bo tsimypamykysonaha – niy.

¹⁰ Yh̄y niaha. – Amy skaraba inahyryzikpo – mytsaty nikaranaha. Si-hyrynimyrybyitsa nikaranaha, iwaze asa zuba nipamykysokonaha.

¹¹ Iwaze ipe niaha:

– Amo humo sa Moises harere mymyhyrinymyrykynahatsa hi “Tapara Erias myziksizo”. Amo skaraba iharere mymywatawy – niaha.

¹² – Wasani my. Tapara Erias mozumuze atsatu ezytyk pikymyze. Kytsa Deus humo sispirikporētsa mytsaty mykaranaha. Tubabatu utakta Deus zikpehata ahawata ikyzik kasoho hi ziwatahanaha. “Atakta sinini mykara. Ihumo mymyijakanaha, ihumo batu siakparawy. Iharere bo batu yh̄yhabyitsa ziknakaranaha”.

¹³ Hawa sa ziwatahakanaha Erias soho atsatuty nikaranaha. Erias hyritywata botu izumu. Isukyrytsitsa zimyjakanaha zibezenaha. Amy ty tubabatu ziwatahakanaha atsatu nikaranaha – niy.

Sesus jypykyhyzytykta hyrikoso sapybara ibo pororo ziknakarata iwatahi zizororowy.

¹⁴ Kyze Sesus tuktsa ustsá zinymyrykynahatsa bo zumunahaze kytsa sizubarëtsa sipauk baze iktsa niaha. Sudeutsa sopykwy humo sihyrinomyrëtsa zinymyrykynahatsa tuk nahapepehakanaha.

¹⁵ Kytsa sizubarëtsa Sesus bo iktsa niahaze sipybyrëtsa nikaranaha ibo inatururukiknaha. Iwaze ipe:

– Tsikzumu – nikaranaha. Yhÿ ikzumu Sesus niy.

¹⁶ – Hawa hatsa sa zinymyrykynahatsa tuk tsimyharape pehakanaha – niy.

¹⁷ Estuba maku tihi:

– O myhyrinomyrykytsa, katse zioқтыhyryk. Hyrikoso sapybara ibo pororo ziknakara iwatahi iharerebyita iharawita niwatihi.

¹⁸ Myzumuze wytyk bo naraha narahaka, isake soroporo, tatsaputy dy nikara itsipa ziboro. Iwaze zinymyrykynahatsa pe iky:

– Hyrikoso isapybara katse bo pororo ziknakara ata kino tsiksiwyhiknahaktsa kytsa. Ipe nabo pãoty tsimaha iky. Zinymyrykynahatsa batu zikaha – niy.

¹⁹ Iwaze Sesus ispe niy:

– Ikiahatsa Deus humo batu ahaspirikpo, Deus humo ahaspirikpo byizeka iwatsa tu ahatuk mynapykyryk. Jypykyhyzytykta kabo tyzioktyhyk! – niy.

²⁰ Iwatsahi jypykyhyzytykta Sesus bo zioқтыhyryknaha. Hyrikoso sapybara Sesus bo iktsa niyze jypykyhyzytykta wytyk bo zirahawy opykani nitydydyky niy. Jypykyhyzytykta wytyk buruk paikpa niparakak weze weze nikara. Isake soroporo zipoko.

²¹ Sesus izo pe niy:

– Hawaze sa atse niwa niu – niy:

– Jabaseze tu niwa niu – niy.

²² – Hyrikoso sapybara pibeze tsihikik. Hyrikoso sapybara humo pihik bo piharazukik izo bo pioќtsokik. Iwa pibeze tsihikik – izo niy. – O tymytsumuëhïkta! Azikwykyta zeka tymytsumuëhïkta! Myhumo amypokzitsiakta! – niy.

²³ – Hawa sa tsimy “azikwykyta zeka”. Yhÿ ikyba. Aty Deus humo ispirikpo zeka kazikwy humo ziky – Sesus niy.

²⁴ Atsoko jypykyhyzytyktazo kakaik niy, Sesus pe niy:

– O ahumo kaspirikporëta tsikaeni zuba. Tsipiktsumuëhï zeka ahumo mospirikpotohi kaspirikporëta babata mozik – niy.

²⁵ Kytsa sizubarëtsa harape baze ziknapykyknahaze Sesus ihyrikoso sapybara pe niy:

– O hyrikoso sapybara aharawita aharerebyita kino niwatihi nabo pãoty. Awahi pãoty. Erete eretebyijaty – niy. Iwa ihyrikoso sapybara zipehahik.

²⁶ Iwaze ihyrikoso sapybara kakaik niy. Jypykyhyzytykta nitydydykyk tu. Iwa niparak. Jypykyhyzytykta nirata hyrity wata niyzuknihikare niy. Iwaze kytsa tihi:

– O atakta botu nihyrikosokda – nikaranaha.

²⁷ Sesus jypykyhyzytykta tsyhyrype humo paik niy. Zitsumuëhïkï ity kyik niy. Tsakurëta niyzikzo.

²⁸ Iwaze Sesus wahoro bo paku niy. Asazubaze zinymyrykynahatsa ipe niaha:

– Amo skaraba katsa ihyrikoso sapybara ty batu tyiksiwyhik batu zikaha – niaha.

²⁹ – Deus bo pamykyso byizeka ihyrikoso sapybara tawata ba ziksiwynaha – Sesus niy. Iwa hỹ.

Sesus tasukmozawy soho tahyrizikpowy humo kino niwatihi nitsasokozo.

³⁰ Kyze niukurunahaze, Sesus nisihrinymyryky. Haneze niy kytsa batu sihrinymyry anahi ziny tsihikik. Karareu buruk niukurunahaze zinymyrykynahatsa zuba nisihrinymyryky.

³¹ Sesus:

– O aibani kasukyrytsitsa pikbezenaha. Pikbezenahaze petok puruze mynahyrizikpo – niy.

³² Zinymyrykynahatsa asa zuba:

– O amy skaraba “mynahyrizikpo” – mytsaty nikaranaha. Zinymyrykynahatsa tahasikpybyspyk tu batu ity peha.

– Aty sa myhyrizikwanita mozik Deus tyryktsa tuk – nikaranaha.

³³⁻³⁴ Kyze zinymyrykynahatsa Sesus hapik ske buruk niukurunaha. Asa zuba nipamykysokonaha. Kytsa tihi:

– Utakta mypehatsa wata. Ahazubarẽtsa tyziktsumuẽhĩnaha! Usta:

“O batu, utazakta! batu, utazakta!” – nikaranaha. Kyze Kaparanaũ bo zumunahaze, Sesus ispe niy:

– O kytsa hawa skaraba tsiktsasokonaha. Ske buruk tsikukurunahaze hawaha tsiktsasokonaha – niy. Tahasikpybyspyk. Batu harere. Batu yhỹ.

³⁵ Iwaze Sesus itadyhyze:

– Kapauk baze dyhy dyhytaha! Tsipiwabynaha. Ikiyahatsa:

“Utakta mypehatsa wata sizubarẽtsa moziktsumuẽhĩnaha” tsikykarana-haze, Deus kino myha batu. Deus tihi:

“Aty sa tatukytsa mysitsumuẽhĩekik, atahi mypehatsa wata. Atahi katyryktsa tukta myhyrizikwanita my” niy. Hyỹ nikaranaha. Hawa sizotsa mozi-hikiknaha siharere humo astsa tu nikaranaha iwa Deus harere bo hyỹ tsimykarana zeka iwaze Deus tyryktsa tsimoziknaha. Iwa ahabyi zeka batu Deus tyryktsa tsimoziknaha – niy.

³⁶ Iwaze Sesus jabisatatsa tsibik tahatazaha eze tyrikto niy. Ziharapykze sibo ziwatawyky:

³⁷ Sesus:

– O jabyitsa humo ahamypokzitsiukrẽtsa zeka, niwaha humo ka kakurẽta. Ikiyahatsa kahyrytsa watsa. Jabyitsa humo ahamypokzitsiukrẽtsa zeka kahumo niwatihi ahamypokzitsiukrẽtsa. Iwaze ikiahatsa humo kakurẽta zeka Deus kino niwatihi. Atahi mybarawy bo zikpeha – ispe niy.

Asaktsa mybo batu sisakanibyitsa mytuktsa moziknaha.

³⁸ Kyze Suão Sesus bo nipamykysoko:

– O myhrinymyrykytsa maku tsinynaha hyrikoso sapybara nisiksiwyhik azikwy humo. Atakta katsa mytukbyita tu iwatsahize katsa ipe:

“Batu tihikta! Ikiakta mytyrykbyita tsimy” – tsikaha.

³⁹ Sesus:

– O batu. Ahasopyksapybyritsa tsimykarana. Aty tohi amy ty kytsa batu zik kahumo my zeka atakta kaokzeka pisapywyky.

⁴⁰ Kahumo tsakurẽta mozik. Asaktsa myhumo sisakanibyitsa mytukytsa moziknaha.

⁴¹ Kaharere wasani hỹ tsiwabytoktokonaha. Aty pihik ty ahabo nyny my zeka ikiahatsa Kiristu tuktsa humo atakta isapyha ty ibo nyny my – niy.

Imysapybara ty pimoewy zeka iwaze hi Deus piokzo.

⁴² Sesus nisihrinymyrykzo. Kytsa jabyitsa bo nisiaknikinaha soho Sesus ispe niy:

– Aty harahare ty pisoikaĩhiknaha zeka iwaze pihik maporik bo nipapykik iwaze moharazukik ana humo batu isapy. Atakta jabyitsa kahumo tispirik-porēta tu zeka zimiywyky ana humo batu imysapy. Atakta imysapybyrēnikita babata.

⁴³⁻⁴⁴ Atsyhyrype ahumo isapybyri zeka, atsyhyrype ty iykzykiky. Deus sapy bo tsimysukze atsyhyrype estuba zuba zeka wasani. Sinini ykarawy bo zeka atsyhyrypetsa petok zeka wasanibara bo tsipasapy. Sinini ykarawy anaeze izo ba zikbe. Anaeze winuputsa tahawahi mynapykyryknaha.

⁴⁵⁻⁴⁶ Apyry humo isapybyri zeka apyry ty iykzykiky. Deus sapy bo tsimysukze apyry estuba zuba zeka wasani. Sinini ykarawy bo zeka apyrytsa petok zeka wasanibara bo tsipasapy.

⁴⁷ Ahyrizik humo isapybyi zeka ahyrizik ty hyrykokik ty. Deus sapy bo tsimysukze ahyrizik estuba zuba zeka wasani. Sinini ykarawy bo zeka ahyriziktsa petoktsa zeka wasanibara bo tsipasapy.

⁴⁸ Sinini ykarawy eze ka izo ba zikbe. Anaeze winuputsa tahawahi mynapykyryknaha. Sinini mynakaranaha. Anaeze tsizubarēna batu mysapy, kytsa tawahi mynapykyryknaha. Iwatsahi mysapybaraka tamoewyhyk.

⁴⁹ Hawa katsa poro siraratsani kykywy iwazeka ba ziktahōrō anahyryty wa ha Deus mymysininiwy iwaze imysapybaraka tsmoewynaha.

⁵⁰ Poro tisapyrēna. Poro morỹk byizeka ba zik tsakykyzonaha. Poro iōrỹkbara wytyk humo batu sapy mozik mymaiwy. Poro mydisahawy tsakykyha wasani my. Iwa hyryty wa ha ahamysapyhuktsa kytsa! – niy. Tynaharape pokzitsikinaha.

10

Sesus myokeza moewy soho humo nisihrinymyryky.

¹ Iwaze Sesus niparak. Sudeja bo. Sorodão buburu zitsikza. Iwaze myzubaha ibo inakypykyknaha nisihrinymyrykzo.

² Pariseutsa zukzuk niaha. Izumunahaze ibo nipamykysokonaha. Asatu niharapepehakanahatsa tu iharere zimyi tsihikiknaha. Ipe niaha:

– Hawa sa wasani maku taoke pimoewyhyk zeka Moises harere bo ja batu yhỹ ha – niaha.

³ Sesus:

– Amo taparakta Moises harere botu zahapehaka – niy.

⁴ Moises tihi:

– Maku taoke pimoewy tsihik zeka tapara papeu atatsa soho piwataha iwaze atatsa pāoty zikaha my. “Ikia hi batu kaokebyitatsa” piwatahaka – niaha. Iwa kytsa siokeza siakparawy byizeka ziknakaranaha. Aokzeka ja wasani nikaranaha.

⁵ Sesus ispe niy:

– Ikiahatsa Deus harere bo yhỹ ahabyitsa tsikykaranaha. Iwatsa tu Moises ahaharere bo yhỹ niy. Deus harere bo ahawabytoktobyitsa tu tsimykaranaha iwaze Moises ahaharere bo yhỹ niy.

⁶ Tapara Deus mybarawy nizuknize iwaze maku wytyk ahatsa niwatihi nisisukni. Petoktsa nisisukni.

⁷⁻⁸ Iwatsahi kytsa tahazotsa bara botu tahasapynaha tahaokeza tuk zuba tahasapynaha. Isukzata batu ata zuba mozuru harapetok mozurukunaha.

⁹ Iwatahi Deus maku ibarikta nizukni atatsa ioke nizukni niwatihi Deus okzeka estuba zubata wata iwatahi ba zikaharapemoewynaha. Iwa zeka batu imysapy – niy.

¹⁰ Iwaze Sesus tuk zinymyrykynahatsa wahoro bo pakuzo niaha. Asa tihi:
– Amy ty sa nisihyrinymyryky – niaha.

¹¹ Iwaze Sesus ispe niy:
– Maku taoke moewyky zeka mektatsa tu piakse zeka batu imysapy my. Taoke humo batu imysapy my.

¹² Iwa wytyk atatsa kino tabarikta moewyky zeka mekta tu piakse zeka. Atatsa imysapybyitatsa. Tabarikta humo batu imysapy – niy. Nawa Sesus sibo nipamykysoko.

Sesus jabyitsa tuk.

¹³ Kyze wastuhu sizotsa tahahyrytsa Sesus bo nisioktykyryknaha.
– O Sesus myhyrytsa ty paik tsimy zeka sakurëtsa tsimoziknaha – niaha. Zinymyrykynahatsa sihumo sisakparëtsa iwatsahi batu ibo zuk.

– O nabo tsiksizonahaktsa! – niaha.

¹⁴ Sesus ziwabyze takyriki. Sesus:
– “O nabo tsiksizonahaktsa!” soso byitaha! Jabyitsa uta kabo tynasioktyhyknahaktsa! Deus tyryktsa jabyitsa watsa.

¹⁵ Jabyitsa kino isapyha ty isty nyny my zeka sakurëtsa moziknaha: yhÿ sisopyk. Jabyitsa watsa zeka Deus pe: yhÿ tsimaha. Deus pe: yhÿ aha byizeka ityryktsabyitsa tu tsimaha – niy.

¹⁶ Sesus sihyrytsa nisibykyk, siwatu isty paik niyze. Deus pe:

– O kazo sihyrytsa tynasipokzitsikikta – niy.

Maku tsinamyrëta Sesus bo izumu.

¹⁷ Kyze Sesus ziokpykyze iwaze niukuru maku tsinamyrëta ibo izumu. Izu muze Sesus okeryk taekaratsa humo puruk puruk niy. O Sesus tsimysapyrëta humo ka iwaze puruk puruk niy. Ipe niy:

– O myhyrinymyrykytsa ikia hi tsamysapyrëta. Hawa sa mykara, iwatahi uta mohyrikosokdaze Deus tuk kawahi mynapykyryk – niy.

¹⁸ Sesus:

– Amo skaraba ikia kape tsiky “tsimysapyrëta”. Deus zuba tsimysapyrëta koikny baktatu tsimysapyrëta.

¹⁹ Deus harere tsinymyryky. Mektsa okeza ba ziksipyryryryna. Ba zika hapebezenaha. Usta namy ty hyryk hyryk byitaha. Ba zikspihikbatanaha. Ba zik mybarapetu tsimaha. Azotsa humo awatu ty amypokzitsiuhukta! Deus harere bo yhÿ tsimy zeka iwaze Deus tuk tawahi tsimynapykyryk – niy.

²⁰ Inamynikita ipe niy:

– O myhyrinymyrykytsa jabasize tu aharere humo wasani ziknakara – niy.

²¹ Iwaze Sesus ibo iktsaziu niy. Ihumo tsimypokzitsiarëta. Ipe niyzo:

– Ikia aba estubaha ty tsimy. Tsipiksi anamy huak ty okyryrsaro ty. Iwaze sinamybyitsa bo okyryrsaro ty nynybaik tsimy. Iwaze hi anamy baba ty Deus sapy eze tu tsimy. Anamy baba ty mopykyryk. Bykyze pany! Kapik tynao – niy.

²² Inamynikita ana ziwabyze iakubyri tisukatsihikrëta. Tsinamyrëta hi tanamy pokzi tsiwy tuk batu yhÿ niy iwatahi batu iaku. Sesus ekze niparak tisukatsihikrëta.

²³ Iwaze Sesus zinymyrykynahatsa bo iktsa niy. Ispe niy:

– Sinamyrëtsa Deus tyryktsa moziknaha tsihokdaharëna. Tahanamy bo zuba mytsaty mynakaranaha.

²⁴ Zinymyrykynahatsa iharere humo nipybybaiknaha. Sesus nitsasokozo:
 – O kytsa katukytsa watsa hawa Deus tyryktsa moziknaha tsihokdaharēna hỹ Deus harere bo yhỹ ahabyitsa iwatsahi ba Deus tyryktsa zikyzyknaha.

²⁵ Tsihokdaharēna siraratsa kamero inarokota mysukwowowy ispioke buruk mytsuk. Tsinamyrēta Deus tyryk mozik tsihokdaharēna hỹ batu zik – niy.

²⁶ Ana humo ziwabykynahaze sipybyrētsa asa zuba nipamykysokonaha.
 – Aty skaraba Deus tyryktsa moziknaha – nikaranaha.

²⁷ Sesus sibo iktsaziu niy. Ispe niy:

– Kytsa tuka batu zikaha. Deus humo ka batu amy tohi ihokdaha.

²⁸ Peduru ipe niy:

– Niwazuba! Katsaktsa mybo ka iktsa tykta, mynamy mywahoro eze niwatihi tsizubarēna tsikzerebaiknaha iwaze ikia tuk tsimymysapynaha – niy.

²⁹ Sesus:

– Kaharere wasani my. Wabyziutaha! Aty tawahoro perekek zeka katukta mozik, atakta Deus wasaniha humo tispirikporēta mozik. Atahi abaka sē sizubarētsa wahoro ty nyny mykara, ana wata aty tatukytsa myserekek zeka, taziky, tatsy, taje, tazo, tahyrytsa tatsuhuk iwa myserekba zeka ustsatsukytsa Deus ibo nyny my. Sē itukytsa sizubarētsa hỹ.

³⁰ Abaka ustsatsuky, itsy, ije, izo, ihyrytsa, itsuhuk sē sizubarētsa ty iwa ibo nyny mykara. Ustsatsuky pisapybyriki. Kyze atakta mohyrikosokdaze Deus baze tawahi mynapykyryk.

³¹ Sizubarētsa tihi: “O katsaktsa myhyrizikwanitsa tsa watsa tsimoziknaha” mybarapetu nikaranaha. Asaktsa siapiktsa zuba moziknaha. Abaka sizubarētsa siapiktsa maha asahi sihyrizikwanitsa watsa moziknaha – Sesus niy.

Sesus tabzewy soho nitsasokozo tahyrizikpowy soho niwatihi nitsasokozo.

³² Kyze Serusarēhe bo niukurunahaze Sesus siharaze niukuru. Zinymyrykynahatsa ihumo mytsaty nikaranaha. Ustsatsuky kytsa siapik niukurunaha sipybyrētsa nikaranaha. Iwaze Sesus tuk zinymyrykynahatsa bo nipamykysokozo, hawa sa ihumo my.

³³ – Wabyziutaha aba katsa Serusarēhe bo tsikukurunaha. Uta Deus zikpehata ahawata ikyzyk Serusarēhe bo mokuru. Nakpo zukzuk tsimahaze kytsa taparaktsa Deus wahoro eze ziknapamykysonahatsa, Moises harere ty nisihyrinymyrynahatsa iwatsa kasukyrytsitsa bo pikoktyhyryknaha. Pikspihikbatanaha. “Atakta Deus okzeka batu mysapy mykara, katsa kino niwatihi atakta batu mysapy mytsaty tsimykaranaha” motsasonaha. Bipyritsa bo pikoktyhyryknaha.

³⁴ Pikuezozokoknaha. Pikikinaha. Pikbezenaha. Iwaze petok puruze mynahyryzikpo. Utakta Deus zikpehata, ahawata ikyzyk pikbezenaha – Sesus niy.

Tsiaku itsy Suão ahatsa Sesus bo nizapykykynaha.

³⁵ Kyze Tsiaku itsy Suão niwatihi Sesus bo izumunaha. Asa hi Sebedeu hyrytsa niaha. Sesus pe niaha:

– O myhyrinymyrykytsa abo tsimyzapykykynaha zeka atsatu mybo yhỹ tsimy – niaha.

³⁶ – Amy sa tsimyzihikiknaha – niy.

³⁷ – Ikia aparakbaha abazubata tsimozikze katsaktsa abaze dyhy dyhy tsimaha. Estuba apanuryk taba dyhy my. Usta apawazo taba dyhy my – niaha.

³⁸ – Amy sa tsimyzapykykynaha batu ahahyrinymyry. Tozeka ja sinini tsimaha kawata ja. Pikbezenahaze ikiahatsa ja. Kawata pahabezenaha zeka ana kino ahapunihiku ja.

³⁹ Yh̃y niaha.

Iwaze Sesus ispe niy:

– Sinini tsimaha kawata h̃y. Pahabezenaha kawata pikbezenaha h̃y.

⁴⁰ Aty kabaze dyhy my ba ziktsaso. Aty kapanuryk taba dyhy my. Aty kapawazo taba dyhy my ba ziktsaso. Deus botu nisiwatawy utakta batu – Sesus niy.

⁴¹ Utsa zinymyrykynahatsa Tsiaku Suão ahatsa harere ziwabynahaze taokanikinaha.

⁴² Iwatahi Sesus tabo inasipehaze ispe niy:

– Bipyritsa pehatsa kytsa sizubarêtsa mysipehakanaha. Katsa abazubatsa mytsaty ahabyitsa mykaranaha. Kytsa ziknasipehaikiknaha. Ana tyhi ahahyrinymyrêtsa.

⁴³ Ikiahatsa ahatuk batu. Aty mysipeha tsihikik atahi sizubarêtsa mysitsumuêh̃i.

⁴⁴ Aty myhyrizikwanita mozihikik ahatuk sizubarêtsa mysitsumuêh̃ik̃i.

⁴⁵ Utakta Deus zikpehata ahawata ikyzik. Mybarawy bo inasikze myzubaha mysitsumuêh̃i. Myzubaha humo ba katsumuêh̃ihuk kytsa katy ba ziktsumuêh̃inaha ana bo ka batu zuk. Ikzumuze mybarawy ezektsa sisapyzeky mohyrikosokda iwatsahi asaktsa Deus tuk tahawahi mynapykyryknaha. Kabzewy humo kytsa simysapyrêtsa moziknaha ana bo hi ikzumu – niy.

Sesus ihyrizikubyita zizororowy.

⁴⁶ Kyze Baratimeu ihyrizikubyita zizororowy. Sesus zinymyrykynahatsa tuk Serikoho bo niukurunaha. Kyze Serikoho zipokonahaze kytsa sizubarêtsa siapik niukurunaha. Ihyrizikubyrita Baratimeu Timeu tse Serikoho ske sak eze nidyhyky. Ba zikozo batu amy tohi humo ziky. Kytsa ziharamunahaze sakpyri zuba ziwaby.

– O kaboja, kaboja! – nikara. Kytsa okyrysaro ty ibo nyny niaha. Siske eze nidyhyky. Kytsa Baratimeu pe:

– Sesus Nasare ezekta mozumu – niaha.

⁴⁷ Iwaze Sesus ibaze Baratimeu kaka niy:

– O aidytykta Sesus! Tyziktsumuêh̃ikta! O Sesus ikia mydiri Dawi tse kahumo amypokzitsiukta – kaka niy.

⁴⁸ Kytsa zibetsakaknaha:

– O aksobyitykta! – niaha. Tybyi zuba niy:

– O tyziktsumuêh̃ikta kahumo amypokzitsiukta, Sesus! – kakazo niy.

⁴⁹ Sesus itarikto:

– Pany! Uta kabo tyzioktyhyknaha! – niy. Kytsa ihyrizikubyita zihuahuahiknaha:

– O apybybyihukta! Riktotykta! Sesus pahuahuaka – niaha.

⁵⁰ Atsoko itarikto. Tasuk izezerênikita zibokikare. Sesus bo niparak.

⁵¹ Sesus:

– Amo skaraba hawa sa my – niy.

– O myhyrinymyrykytsa ba zikozo. Kahyriktsa tysizororowykta! – niy.

⁵² Sesus:

– Ikia kahumo aspirikporêta. Iwatahi pazororowy – niy.

Iwaze nihyriziktsa nisizororowy nikozozo. Sesus hapik niukuru.

11

Sesus Serusarēhe bo zumuku.

¹ Kyze Sesus tuk zinymyrykynahatsa Serusarēhe bo niukurunaha. Betepake Betanija baze na hara jobonikita Oriwereja inarokota baze anaeze Sesus tatuktsa petoktsa nisipeha:

² — Nabo pāotaha kytsa. Atsezubaha myharaze tsimypupunahaze pikuza tsibik tsipipiktumunaha. Ata bo hi isoikāihita tsipinyaha, batu aty tohi ibete dyhy. Satsukyktaha! Kabo tyzioktyhyknaha!

³ Utsa kytsa:

“Hawa sa tsimykaranaha” maha zeka, “Mypehakatsa mype niy kabo tyzioktyhyknaha” tsimaha! “Bykyze ahabo tasirezo” tsimahakta! — niy. Yhỹ niaha.

⁴ Iwaze niukurunahaze, pikuza ske eze zinyaha hokbowy baze zikahanaha. Isoik ihāihita bo zisatsukyknaha.

⁵ Utsa kytsa sibaze tutsa:

— Hawa sa tsimykaranaha. Hawa hatsa sa pikuza tsipisatsukykyknaha — niaha.

⁶ — O mypehakatsa tihi mype niy pikuza tsibik kabo tyzioktyhyknaha. Bykyze ahabo tasirezo — niaha.

— Yhỹ. Tsioktyhyryknahaktsa! — niaha.

⁷ Sesus bo pikuza zioktyhyryknaha. Tahasuk pikuza bete zizozokonaha. Sesus ibete niukuru.

⁸ Iwaze utsa kytsa kino niwatihi tahakpyzazawy ske buruk zipapakanaha. Tsarakzapatsa jerukbara ezektsa ty bokok bokok ky niaha ana humo kino niwatihi ske buruk nisipapakanaha. Iwa tsimykaranaha Sesus tsimysapyrēta humo asazuba nipamykysokonaha

⁹ Sizubarētsa Sesus haraze, kytsa iapik kino niwatihi niukurunaha, myzubaha zihuahuakanaha.

— Sesus Deus baze niapykyk, mywata niyzik.

Deus bazekta tu, katsa mybo izumu. Deus mybarawy bo zipeha. Atakta tsimysapyrēta.

¹⁰ Taparakta Dawi mydiri wata “O Deus ibo zisapywy iwatsahi mykurētsa!”

Ata humo Deus tyryktsa tsimoziknaha. Atahi wasani mynakara.

“O ihumo mykurētsa hỹ” — nikaranaha.

¹¹ Iwaze Sesus Serusarēhe bo niukuru. Deus wahoro zubata bo nitsuk. Paikpa kytsa bo iktsa nikara. Zunubakaze, Betanija zinymyrykynahatsa tuk ziksizonaha.

Sesus umaha soho humo nisihyrinymyryky.

¹² Sesus estuba zuruze zinymyrykynahatsa tuk Serusarēhe bo ziksizonaha. Niukurunahaze irapa izumu.

¹³ Ęrykani umaha bo iktsa niaha. Tisarozubarēta niy. Iwaze Sesus umaha bo nakpo zuk niyze iharabyita botu zuk niy. Ihara ziberiki. Isaro zuba. Batu iharaka. Aibani zuba tahara.

¹⁴ Iwatahi umaha pe niy:

— Niwazuba! Aharahokbita ba aty tohi ahara zezukzo — niy.

Ana humo hi zinymyrykynahatsa ziwabynaha.

Sesus Deus wahoro zubata isturupe bo nitsuk.

¹⁵ Kyze Sesus tuk zinymyrykynahatsa Serusarēhe bo niaha. Deus wahoro zubata isturupeze bo nitsuk. Kytsa asaktsa myraratsa ty ziknasihuakaknaha

okyrysaro humo. Ustsaktsa bipyri okyrysaro humo Sudeutsa okyrysaro ty ziknasihuakaknaha. Iwaze Sesus sizubarëtsa nisiksiwykik. Atsoko nitururuknaha. Asaktsa okyrysaro ty nisihuakaknaha sidisahawyzozokorowy nisitsihipetotokokbaik. Asaktsa amytudutsa nisihuakaknaha sidyhywytsa nisitsihipetotokokbaik.

¹⁶ Sesus ispe niy:

– Batu amy tohi Deus wahoro zubata isturupeze sinamy ba zisikta batu skeke – niy.

¹⁷ Iwaze nisihyrinomyryky.

– Deus harere tubabatu ziwataha tihi:

“Kawahoro zubata haneze nanabyitabaktsa myzubaha kabo mynapamykysokonaha” ziwataha. Ikiahatsa kawahoro sityhyryboarëtsa wahoro tsimyzapyhuaknaha – niy.

¹⁸ Taparaktsa ziknapamykysokonahatsa, asaktsa Sudeutsa sopykwy zikziwatahakanahatsitsa kino niwatihi iharere ziwabykynaha. Ana kino ziwaby nahaze pibeze tsihikiknaha. Ipokso sipybyrëtsa. Myzubaha Sesus harere bo yhÿ mykaranaha ihumo sispirikporëtsa iwatsahi ipokso sipybyrëtsa. Isukyrytsitsa tu pibeze tsihikiknaha myzubaha pokso tsawyzik batu zikaha.

¹⁹ Zunubakaze Sesus zinymyrykynahatsa tuk niparakzo. Betanija bo ziksizonaha.

Umaha niharapara tasoho.

²⁰ Byri zokorobyitu niukuruzonahaze umaha bo iktsa niaha. Iharatatsa niharaparabaiknaha.

²¹ Nezeba Sesus nipamykysoko ana bo hi Peduru mytsaty nikara iwaze ipe niy:

– O myhyrinomyrykytsa iktsa tykta! Umaha ikia tsikykarata niharapara – niy.

²² Sesus:

– Deus humo ahaspirikporëtsaktsa!

²³ Kaharere wasani my. Wabyziutaha! Hara jobonita bo tsipepehanaha zeka “Nabo päoty buburu zuba bokta”. Nawa tihi my. Ba mytsaty tsimaha “O buburu zuba bo ja, batu yhÿ ja” tsimaha. Ahaharere humo buburu zuba bo my. Deus humo tsimyspirikponaha zeka hawa ha sa tsimyzapykykynaha atsatu ahabo nyny my.

²⁴ Hawa ha ty Deus bo tsimyzapykykynaha zeka ana humo hi Deus ahabo nyny my, iwa tsimaha zeka ihumo tsimyspirikponaha. Nawaze ahabo nyny my hÿ.

²⁵ Deus bo tsimypamykysokonahaze kytsa humo batu ahakyri. Ikia tsipakyriki zeka ustsasimysapybaratsa humo aha bo mahaze ana humo ka tyspiriktsokdakta iwatsa tu tysiokzohik tsimaha. Simysapybyitsa tu nikaranaha tsimysiokzohik zeka myzo bjoikpe ezekta ahamysapybyi humo pahaokzohik.

²⁶ Ikiahatsa kytsa simysapybyitsa bo mytsaty tsimykaranaha zeka myzo bjoikpe ezekta kino ahamysapybyi humo ba zikspiriktsokda ba zahaokzohik – Sesus niy.

Aty harere humo Sesus kytsa mysipeha. Aty sa ipe: – Natihiktsa – my.

²⁷ Kyze Serusarëhe bo niukuruzonaha. Sesus Deus wahoro zubata eze zitabakaze taparaktsa Deus wahoro ziknapamykysokonahatsitsa, Sudeutsa sopykwy zikziwatahakanahatsitsa, taparaktsa Sudeutsa kapitäotsa nisipeha iwatsa ibo zumunaha.

²⁸⁻³⁰ Ipe niaha:

– Aty sa ikia pe Deus wahoro zubata kytsa tysiksiwyhik! Katsyhyryze tarabajakta! tsimykara. Aty sa zapeha – niaha. Batu ihumo siakparawy iwatsahi ibo nipamykysokonaha. Iwaze Sesus ispe niy:

– Aty sa Suão Batista pe: “Kytsa tysiharasusukta” niy. Aty sa Suão Batista zipeha. Tozeka ja Deus ipe niy. Tozeka ja kytsa ipe niaha. Aty sa kabo tsimytsasokonaha – Sesus niy. – Ana hi kabo tsimytsasonahaze uta kino ahape my. Aty kape:

“Tarabajakta iwa tihikta” my – niy.

³¹ Iwaze taparaktsa kapitaõtsa asa zuba nipamykysokonaha.

– Hawa sa tsimaha Deus ipe niy zeka kytsa tysiharasusukta tsimaha zeka iwaze Sesus mype:

“Amy skaraba Suão humo ahaspirikpobyitsa tsimaha” – my.

³² – Katsa batu tyso “Kytsa ipe tysiharasusukta”. Myzubaha Suão Deus sohokotsa babata humo ka sispirikporëtsa iwatsahi kytsa pokso batu tyso, kytsa ipe tysiharasukukta batu tyso – nikaranaha.

³³ Iwaze ipe niaha:

– Suão Batista soho humo batu myhyrinymyry – niaha.

Iwaze Sesus ispe niy:

– Uta kino ahabo ba ziktsaso aty kape:

“Tarabajakta” – niy.

12

Duabohotsa perytsitsa sisopyksapybyikitsa soho humo nitsasoko.

¹ Iwaze Sesus myzubaha bo nipamykysokozo. Waratok humo nikarana-hatsitsa soho nitsasoko iwa nisihyrinymyryky. Atahi:

– Maku estuba duabohotsa nisiparikik. Nisiparikikze jokarawytsa ty okehyry okehyry niy. Ihoke ziuku anaeze kytsa duabohotsa tsik nisipypyrikik-naha. Iwaze tsihitsa jo bo isparik ziziki anaeze ziperykykta duabohotsa nisisukparaka. Waratok tsihitsa niparakze kytsa pe: “Utakta mu. Nokponi mokuru. Ikiahatsa duabohotsa tysiperynaha! Tsapukte buruk kaperytsa humo duabohotsa ty ahabo nyny my” niy. Yhỹ niaha. Iwaze tsihitsa meky botu itasapy.

² Kyze duabohotsa nijakuknahaze tsihitsa tatsumuëhĩtsa pe: “Tupaktsa! Iperytsitsa bo tsimy. Abaka duabohotsa nakymynaha, siperytsitsa mysizyzykyknaha. Iwaze okyryrsaro tsapukte bo duabohotsa huak humo kabo tyzibykyk!” niy. Yhỹ niy. Niparak.

³ Zumuze duabohotsa perytsitsa nizokbatsinaha. Nitsakikinaha. Awani ziksiwyhiknaha.

⁴ Iwaze duabohotsa tsihitsa usta tsumuëhĩtsa zipeha. Anabo zumuze zimyijakanaha. Ziharektotokoknaha.

⁵ Iwaze ustsá tsumuëhĩtsa nisipeha. Wastuhu nisikikinaha ziksiwyhik-naha. Ustsá nisibanaha. Hawa tapara tsumuëhĩtsa sisopyk atsatu ustsá bo niaha.

⁶ Iwaze itse babata zuba are niy, ihumo tsimypokzitsiarëta. Iwatatu tatse sibo zipeha. Tapetu nikara:

“O katse humo ka ja ba zikaha” mytsaty nikara.

⁷ Iwaze duabohotsa perytsitsa itse zinyahaze asa zuba nipamykysokonaha. Asa tihi:

“Atakta duabohotsa tsihitsa tse my. Ata kino izo mohyrikosokdaze izo namy takse. Duabohotsa tsaizekita takse. Tabezehiktsa kytsa! Tsip-ibezenaha zeka katsa hi duabohotsa tahaksenaha” niaha. Iwa asa zuba nipamykysokonaha.

⁸ Iwaze tsihitsa tse nizokbatsinaha. Zibezehiknaha. Inury duabohotsa kosobara bo nipapykiknaha.

⁹ Tsihitsa ziksize hawa my duabohotsa perytsitsa bo my – Sesus niy.

– Atahi mozumuze iperytsitsa mysiba. Duabohotsa mektsa botu nyny my. Duabohotsa sukpesapy ty ustsaskezo kotsitsa bo nyny my – Sesus nikara.

¹⁰ Tubabatu Deus harere papeu humo botu ziwatahaka. Ana hi tsinymyrykynaha.

– Harahare wahoro mozoknikitsitsa batu isapy mytsaty nikaranaha iwatsahi nipapykiknaha,

ata hi harahare abazubata niyzik iwatahi wahoro tisapyrēna niyzik – Deus harere niy.

¹¹ – Ana hi Deus mykara. Iwatsahi katsaktsa:

“O tisapyrēna. Tsipisapywyky tsimaha. Deus mypehatsa ihumo hi tisapyrēna hỹ tsimaha”.

Iwa tubabatu Deus harere papeu humo botu ziwatahaka – Sesus niy.

¹² Iwaze sisukyrytsitsa sihyrinymyrētsa. Hawa nitsasoko sisoho nipamykysoko ana humo hi sihyrinymyrētsa. Iwatsahi itsipa humo ziocky tsihikiknaha. Kytsa pokso sipybyrētsa. Iwaze sisukyrytsitsa zerekeknaha ziksinaha.

Kytsa okyrysaro humo Homa Sesa abazubata bo nyny mykaranaha ja.

¹³ Kyze asaktsa Sesus sukyrytsitsa Pariseutsa, Erodes tuktsa kino niwatihi kytsa Sesus bo nisipehakanaha. Nizokparakanaha iharere batu isapy mozi-hikiknaha ana wakysukik Sesus bo zumukunaha.

¹⁴ Zumunahaze asa hi:

– O myhyrinymyrykytsa tisapyrena haty zuba nisihyrynymyryky ana humo myhyrynymyrētsa. Kytsa pokso batu apyby, kytsa abazubatsa humo ikia batu asikpyby. Kytsa aharere siakparawy byizeka batu asikpyby. Amy bo mytsaty tsimykarana sihyrynymyrēta hỹ. Deus harere ty zuba tsimysihyrynymyryky. Ahyrynymyrywy baba ty zuba tsimykara. Tozeka ja mypehatsa abazubata Homa Sesa okyrysaro ibo nyny tsimaha. Tozeka ja batu nyny tsimaha. Hawa sa batu myhyrynymyry – nikaranaha.

¹⁵ Sesus simysapybyi humo tsihyrynymyrēta. Iharere batu sapy mozi-hikiknaha humo tsihyrynymyrēta. Iwaze ispe niy:

– Amo kaharere humo imysapybara tsimyzihikiknaha Okyrysaro ty estuba kabo nynytaha! Okyrysaro wata bo iktsa taha – niy.

¹⁶ Okyrysaro wata ty estuba ibo nyny niaha.

– Aty naro sa okyrysaro humo ziwatahaka. Aty hyrikoso sa okyrysaro humo ziwatahaka – niy:

– Abazubata Sesa hyrikoso okyrysaro humo – niaha.

¹⁷ Sesus:

– Niwazuba. Abazubata Sesa namy ty ibo tu tyszotahaktsa! Okyrysaro ty abazubata Sesa bo tsisizonaha. Hawa ha Deus mozi-hikik ana ty zuba Deus bo nyny tahaktsa! Deus hawa ty mozi-hikik ibo tyszotaha – Sesus niy.

Iharere ziwabynahatsa paikpa iktsa nikaranaha.

Mynahyryzikpo naha soho nitsasoko.

¹⁸ Kyze wastuhu Sadusitsa Sesus bo zumunaha. Asaktsa tsimyhryzykosokdanahaze ba ziknahyryzykponaha mykaranaha.

¹⁹ Iwatsahi Sesus pe niaha:

– O myhyrynymyrykytsa, tubabatu Moises ziwatahaka. Deus harere myhumo ziwatahaka atahi “Taparakta maku nihyrykosokdaze itsy haramukuka

ziakse. Iwaze atatsa tabykyhyze mopurukze kytsa tihi: ‘O izikytse mopuruk’ maha” niy. Iwa Deus harere papeu humo ziwatahaka. Ipezo maha.

²⁰ Kyze kytsa sete itukytsa nisakba. Taparakta tasukza. Kyze hyrytsa ahabyita tu nihyrikosokda.

²¹ Kyze itsy haramukuka bo zipytsawy. Itsy kino niwatihi ihyrytsa byita tu nihyrikosokda. Bykyze itsy taziky wanu sapy bo ziaксезоze ata kino ihyrytsa byita tu nihyrikosokda.

²² Iwa itukytsa nisakba katsyhyrywatsa sete atatsa ziaксе. Estuba nihyrikosokdaze usta itsy atatsa zioктыhyryk siwatu atatsa zioктыhyryk. Kytsa hyrytsa ahabyitsa tu niakbakanaha. Iwaze atatsa kino niwatihi nihyrikosokda.

²³ Kyze nawa puruze sizubarëtsa mynahyryzikponahaze aty sa ibarikta babata niaha. Sete itukytsa atatsa ziaксеnaha iwatsahi aty sa ibarikta babata – niaha.

²⁴ Iwaze Sesus ispe niy:

– Ana humo kino zahaspihikbatakanaha. Deus harere siakbatsa sohowy humo batu ahaspirikpo. Deus zikwy humo batu ahahyrinymyry.

²⁵ Abaktsa kytsa tahasukzanaha. Wytykyryk mysiaksekenaha. Iwatsa tu mohyrikosokdanahaze mynahyryzikponaha. Inahyryzikponahaze sisukzabyitsa bijoikpe eze tu mynapykyknaha. Ba zikarazonaha. Iwaze bijoikpe iknyktsitsa watsa moziknaha asahi batu tahasukza – niy.

²⁶ – Tsimyhyrikosokdanahaze tsinahyryzikponaha ana ty hi tsinymyryknaha – niy. Tubabatu Moises ziwataha, ana papeu humo ja batu ahahyrinymyry. Mytsatytaha! Moises okyrysaro mokorobaka soho ziwatahaka. Hana eze okyrysaro ikny Deus yksoho ziwaby. Deus tihi:

– Utakta Deus my. Taparakta Abarão kahumo tispirikporëta. Adiri Isake niwatihi kahumo tispirikporëta. Adiri Sako kahumo tispirikporëta. Iwa – niy.

²⁷ Kytsa niakbakanahatsa Deus humo batu sispirikpo. Kytsa asatu zuba ihumo sispirikporëtsa. Iwatsahi asaktsa tapara niakbakanahatsa aba kino asatu sispitu. Iwatsahi Deus tihi:

– Uta hi Deus my asahi kahumo mospirikpokonaha. Iwatsahi kytsa batu myhyryzikpozo mytsaty tsimykaranaha zeka batu wasani tsimaha, tsipimynaha – ispe niy.

Amy ty Deus harere aba zuba iharereta.

²⁸ Kyze estuba siwatahakatsa Sesus bo niy. Hawa isukyryktsitsa pe nitasoziuku ziwaby. Iwaze Sesus pe niy. Atahi:

– Amy ty sa Deus harere aba zuba iharereta. Tisopykzubarëta sa – niy.

²⁹ Sesus ipe niy:

– Deus harere iwa aba zuba my. Wabytaha Isareu Ezektsa! Deus estuba zuba koikny baktatu atahi Deus babata. Ihumo ahaspirikporëtsa.

³⁰ Deus harere bo zuba hyÿ tsimykaranaha. Ibo zuba mytsatyziuty. Ihumo ahamypokzitsirëtsa babatsa. Itsyhyrype ze tarabajaziuba tsimykaranaha. Tsahapaikrëtsa itsyhyrypeze ahahyryziktsokzawy tsimykaranaha. Hawa Deus mytsaty mynakara tsipinymyryknaha zuba. Nawa tubabatu Deus harere papeu humo botu ziwatahaka.

³¹ Usta harere aba zuba tihi:

– Ahatuktsa pauktsitsa tynasipokzitsikinaha, ahumo tsinakaranaha watihi. Iwa tubabatu Moises Deus harere papeu humo ziwatahaka. Anaharere petoktsa abazubatsa maha iwatsahi anaharere bo hyÿ tsimykara – Sesus niy.

³² Iwaze Sudeu ziwatahakata nitsaso:

– O myhyrinymyrytsa hawa ty tsimykara wasani my. Deus estuba zuba, koiknybakta tu atahi Deus babata.

³³ Katsa ibo tsimykaranaha tihi. Atahi abazubata my. Ibo zuba mytsatyziu tsimykaranaha tihi. Ihumo mymypoکززitsirētsa babatsa. Iharere bo zuba hȳ tsimykaranahaktsa. Mypaikrētsa itsyhyrypeze myhyriziktsokzawy tsimykaranaha. Hawa Deus mytsaty mynakara tanymyry zuba. Iwaze mytuktsa pauksitsa tysipokzitsikinaha my humo tu tsinakaranaha wa tihi. Ana harere aba zuba. Katsa siraratsa nisibanahaze Deus bo isty nyny tsimykaranaha. Wasani my. Siraratsa tsimysikorobanahaze iwaze Deus bo nyny tsimykaranaha. Wasani my. Katsaktsa iharere bo hȳ tsimykaranaha zeka ana humo hi wasani babatsa tsimykaranaha Deus myhumo tsakurēta mozik – niy.

³⁴ Sudeu ziwatahakata nitsasoziuku iwaze Sesus ipe niy:

– Ikia Deus tyryktsa tsimozik tsihikik abanury tu tsimozik – niy.

Iwatsahi kytsa iharere pokso sisikpybyrētsa. Batu – Hawa sa tsimy niahazo – nikaranaha.

Deus zipehata Dawi tsekokata atsatu sa.

³⁵ Iwaze Sesus Deus wahoro zubata eze nisihyrynymyrykyze ispe niy:

– Hawa Deus harere hyrynymyrytsa Deus zipehata Dawi tsekokatsa mozik.

³⁶ Tubabatu Dawi Deus hyrikoso humo nitsaso.

Deus pehatsa pe: “Kapanuryk taba dyhyty!

Bykzehu utakta Deus asukyrytsitsa apyrytsa pukezi typykyk apokso sipybyrētsa” niy.

Iwa Dawi Deus hyrikoso humo ziwatahaka.

³⁷ Tubabatu Dawi hi Kiristu Deus zipehata pe “Kapehatsa” iwatahi Deus zipehata Dawi tsekokatsa h̄y ata kino ipehatsa niwatihi – Sesus niy.

Kytsa sizubarētsa iharere humo sakurētsa niyziknaha.

Sesus Moises harere hyrynymyrytsitsa soho – Pykyhytu tahaktsa kytsa! – niy.

³⁸ Sesus nisihyrynymyrykyzo. Atahi:

– Moises harere hyrynymyrytsitsa humo pykyhytutaha kytsa! Asaktsa tahasuk humo tisapyrēna ty zuba siakparawy.

“Katsa zuba mysapyrētsa” mybarapetu nikaranaha. Anasapy kytsa sinamy pihuakaknaha, anaeze kytsa zihobyknahaze sibo nitsasoziukunahaze ana kino siakparawy.

³⁹ Sudeutsa wahoro eze sidyhydyhywytsa sisapyrētsa zuba siakparawy. Tahamyikahanaha zeka isapyha zuba siakparawy. Sisorokrētsa. “Katsaktsa wasani tsimykaranaha” mybarapetu nikaranaha.

⁴⁰ Asahi maku nihyrikosokdaze haramukuka namy piaksenaha. Okyryrsaro piaksenaha. Asahi kytsa okzeka Deus bo mopamykysokonahaze sipapatu haramukukaka namy piaksebanaha. Kytsa okzeka ihyritywaha humo zuba, Deus sihumo tsihyrynymyrēta. Atahi sinini ykarawy bo mysipehahik anaeze tahawahi mynapykyryknaha – niy.

Haramukuka okyryrsaro ty ikatyhi nynybaik niy. Ana bo hi Sesus iktsa niy.

⁴¹ Kyze Sesus Deus wahoro zubata isturupeze okyryrsarosuk baze nidyhyky. Kytsa okyryrsaro suk bo zipopokonaha ana bo hi nikozoko. Sinamyrētsa okyryrsaro tsizubarēna ty poktohi nikaranaha.

⁴² Iwaze haramukuka bo iktsa niy. Inamybyitatsa tu okyrysaro suk bo korok niy. Atatsa okyrysaro suk bo okyrysaro kaha tihi petok tsibik zuba korok niy.

⁴³⁻⁴⁴ Iwaze Sesus zinomyrykynahatsa pe:

– Totsohi bo iktsatahaktsa! Atatsa okyrysaro tsizubarēna ty nyny niy, iwatatsatu petok tsibik korok niy. Sinamyrētsa okyrysaro tsizubarēna ty nyny niaha iwatsa tu siokyrysaro kino kyhybyri habara ziknakara. Atatsa katsa batu. Inamybyitatsa tu okyrysaro ty tadisahawy huakaty nynybaik niy. Deus okzeka ikahatyhi okyrysaro ty nynybaik niy. Atatsa hi okyrysaro ty nynybaik tsihyrizikporētatsa nikara – Sesus niy.

13

Deus wahoro zubata mynakbi Sesus niy.

¹ Kyze Sesus Deus wahoro zubata ekze zinomyrykyta ipe niy:

– O myhyrinomyrytsa iktsa tykta. Haraharetsa sisapyrētsa sibuzurētsa. Deus wahoro zubata ipamabita – niy.

² Sesus:

– Yhỹ. Haraharetsa bo iktsa ty. Aibatohi haraharetsa ba harape bete zozo zikaha. Haraharetsa mynatōtōbaiknaha, iwaze Deus wahoro zubata nakarakbaik – niy.

Sininikarawy isukyrywy aha.

³ Bykyze Sesus nidyhyky. Oriwerejatsa hara eze nidyhyky. Deus wahoro zubata bo inakozo. Iwaze Peduru, Tsiaku, Suão, Ādere iwatsa ibo nipamykysokonaha. Asazubatsa ibo nipamykysokonaha.

⁴ – Hawaze Deus wahoro zubata mynakarakbaik amy ty sa tsimymyhyrinomyry ana hi mybo tsipiwatawy – nikaranaha.

⁵ Iwaze ispe niy:

– Pykyhytutaha! Kytsa pahaspikhikbataikiknaha hỹ. Siharere bo ka waby waby byitaha!

⁶ Sizubarētsa mozumunahaze pahaspikhikbatanaha “Utakta Kiristu Deus zikpehata maha” mybarapetu mykaranaha. Siharere batu wasani my situka pão pão byitaha – niy.

⁷ Tsiwabykynahaze kytsa nokponi mysibanaha, kytsa bytykara eze kino niwatihi mysibanaha. Ahapybybyihu ja iwa my zeka mybarawy ipyklaratu.

⁸ Nanabyi tabatsa myharape sukyryyikiknaha. Nanabyi taba usa koikny mybarawy taba mytydydykyk tu. Kytsa sizubarētsa taharapa piyknaha. Batu sidisahawyky iwa myziakbataka mysinininaha.

⁹ – Pykyhytutaha! Botu ahabo iktsaso. Kytsaharerewabytsitsa bo pahaoktyhyryknaha. Sudeutsa wahoro eze pahamyijakanaha, kapokzi pahakikinaha. Tahapehatsitsa bo pahaoktyhyryknaha. Ikiahatsa siokeze tu kaharere tsimytsasonaha.

¹⁰ Taparaka wasania ty myzubaha bo tsimytsasonaha bykyze zuba mybarawy mopykba.

¹¹ Ahatsipa humo pahaoktyhyryknaha. Sipehatsa okeryk pahaoktyhyryknaha zeka ahaharere soho mytsaty mytsaty byitahaktsa! Sipehatsa okeryk tsimytsasonaha zeka Deus pahatsumuēhĩ. Deus hyrikoso myzapikso izikwy humo tsimytsasonaha iwaze ahahyrynyrētsa hỹ. Ahasukyrytsitsa ahaharere ba ziaksenaha – niy.

¹² Iwaze atukytsa siharerewabymybarētsa tu maku tahatsy ty sisukyrytsitsa bo mysioktyhyryknaha iwa mysibanaha. Sizotsa tahahyrytsa sisukyrytsitsa bo mysioktyhyryknaha iwa mysibanaha.

Sihyrytsa kino niwatihi tahazotsa humo tahakyrikinaha sisukyrytsitsa bo mysioktyhyryknaha iwaze mysibanaha.

¹³ Ikiahatsa kahumo ahaspirikporëtsa iwatsahi kytsa ahahumo tahakyrikinaha. Atakta tsipunihikrëta tu tsimysapyrëta mozik. Aty sinini mykara zeka iwatahi tsipunihikrëta mozik atakta tawahi Deus tuk mynapykyryk hÿ.

Sesus isapybyiwy soho nitsasoko ana humo hi kytsa sinini mykaranaha.

¹⁴ Sesus nisispirikpoko.

– Iktsa tsimahaze isapybyiwy anahi imyrawy namymyikik, ana bo kino iktsa tsimahaze Deus wahoro zubata eze batu zetuba my! (Aty papeu pinymyryky siwabynahatsitsa bo pinymyryziuku!) Hawa myze asaktsa Serusarëhe eze tu Sudeja hara bo tywaknahaktsa!

¹⁵ Aty wahoro bete zeka paku paku byity, ba anamy zebyk.

¹⁶ Aty tatsuhuk ezeka awahoro bo ba eretezo asuk humo zikykta!

¹⁷ Wytykyryk sihyryzahaza sisukatsihikrëza mopykyknaha. Sijeza niwatihi tahabykytsa tuk sisukatsihikrëza mopykyknaha.

¹⁸ Deus bo tsimypamykysonaha:

“O myzo nawa puruze batu hyritsik tyziwõ tsimyzapykykynaha.” tsimaha.

¹⁹ Amakata okoroze sinini tsimykaranaha. Deus mybarawy nizuknize kytsa anawa haty batu sinini niaha. Ba sininizo zikaha. Iwaze zuba nawa sinini tsimykaranaha.

²⁰ Deus siwatahawhytsa pokzi nawa puruze mopykba. Batu mybara bo ka siwatahawhytsa pokzi. Nawa puruze mopyk byizeka batu aty tohi ispitutsa ba zikapykyryknaha.

²¹ – Aty ahabo motsaso zeka “Iktsa tahaktsa! tabo Deus zipehata Kiristu maha” iharere bo ka ba hÿ tsimaha. Usta ahape my zeka “Nabo Kiristu my” iharere bo ka ba hÿ tsimaha.

²² Kytsa sizubarëtsa mozumunaha. Asa tihi: “Utakta Kiristu maha” pahaspihikbatakanaha. Kytsa sizubarëtsa siharere bo yhÿ mykaranaha. Mymyspihikbataikiknaha zuba. Mektsa tu mozumukunahaze “Katsaktsa Deus sohokotsa maha” mybarapetu mykaranaha. Siwatahawytsa mykaranaha ana humo hi kytsa mysiakmyiwykynaha. Deus watawyhytsitsa mysiakmyiwy tshikiknaha.

²³ Iwatsahi pykyhytutaha! Hawa mykara naha botu ahabo motsasoko iwatsahi ahaspirikpohuja!

Uta Deus zikpehata ahawata ikzyik myziksizo.

²⁴ – Bykyze sininikarawy mopykze nanabyi iwatawy natakaha. Bijoikpe eze iwatahawy natakaha. Haramwe mybe. Miwa zuba byzoje kino niwatihi myhyrizikubyri.

²⁵ Byrisoiktsa mynatsunaha. Bijoikpe iknyktsa mytydykyryknaha.

²⁶ Iwaze uta mynasikze kabo tsimykozona. Utahi Deus zikpehata ahawata bijo oksĩ tuk kabo tsimykozona. Mynasikze kamysapyrëta, kahyryzikporëta, kazikwyrëta ana kino kytsa sizubarëtsa mytsaty mykaranaha.

²⁷ Iwaze bijoikpe iknyktsitsa Deus tsumuëhÿtsitsa mysipeha. Siwatawyhytsa bo mysipeha. Nanabyitaba siwatahawhytsa mynakypyknaha – niy.

Iwa Sesus tuk zinymyrykynahatsa bo nipamykysoko.

Umaha soho humo nisiwatawyky.

28 – Umaha bo iksa tsimykarannahaze ana soho hawa pahawatawy tsinymyrykynaha. Umaha taypykze tapara isarapatsa ytsik humo tasaropok iwaze moziponaha. Iwaze ikiahatsa:

“O hyritsik abaka jokboha” tsimykarannaha. Ahahyrinymyrëtsa.

29 Iwaha hi sinini tsimykarannahaze utakta mynasik ana humo hi ahahyrinymyrëtsa hÿ. Wasani my.

30 Kaharere ka wasani hÿ wabytaha! Abaktsa kytsa amy ty motsasoko pinymyrynaha. Kaharere atsatu mykara iwaze zuba mohyrikosokdanaha.

31 Bijoikpe mybarawy ahaka mohokda. Kaharere ka ba zikokza. Ba nawa taize ja zikaha ba zikpyk. Kaharere ka tawahi mynapykyk – iwa Sesus tuk zinymyrykynahatsa nisihyrinymyryky.

Sesus myziksizo naha humo batu aty tohi ihyrinymyry.

32 Sesus:

– Utakta myziksizoze batu aty tohi nawa taize ja ziky ba sihyrinymyryhy. Batu aty tohi sinini ykarawy bo myze ba ihyrinymyryhy. Bijoikpe iknyktsa Deus tsumuëhÿtsitsa kino ba sihyrinymyryhy. Uta kino Deus tse babata tu batu kahyrinymyryhy. Kazo zuba tsihyrinymyrëta.

33 Iwatsahi tsimyziperykynaha! Tykymybanahaktsa!

34 Hana wa okoroze sinini okarawy mozumuze maku wata. Atahi meky botu moparak. Taparaka tatsumuëhÿtsitsa sihyriziktsokdawy humo mysipehare. Hokbowy perytsitsa nisipeha. Iwaze tawahoro ekze niparak.

35 Iwa tsiperynahaktsa! Zihitsa myziksizo naha humo batu sihyrinymyry. Kyze punubaze ja myziksi, unopokte ja myziksi, nakokze ja myziksi, zokorobyi tu ja myziksi. Batu ahahyrinymyry.

36 Atsoko myziksizo zeka batu ahazika. Iwatsahi tsiperykynahaktsa!

37 Hawa ha ty ahape mykara atsatu sizubarëtsa pe mykara. Ahazikara byihuja tsiperykynahaktsa! kytsa – niy.

14

Sesus zibeze tsihikiknaha.

1 Aba petok puru nahawaze simyikaha asiba inakymy. Simyikaha atsikara ipytowybara ty zikziokoknaha. Simyikaha eze Deus taparaktsa nisitsumuëhÿ bo mytsaty ziknakaranaha. Iwaze Deus wahoro eze ziknapamykysokonahatsitsa, siwatahatsitsa kino niwatihi Sesus ziberikinaha. Sisukyrytsitsa niaha. Itsipa humo zioptyhyryk tsihikiknaha. Tabezehikta nikaranaha tsahi kytsa papatu asahi Sesus zibeze tsihikiknaha.

2 Asa hi:

– Mymyikaha eze tuze ba Sesus zibezena. Kytsa pokso mypybyrëtsa. Tsihibezenaha zeka iwazeka kytsa mymybabanaha. Sizubarëtsa niakmyinaha – nikaranaha.

Sesus Betanija hudikhudikwy eze.

3 Sesus Betanija bo zumu. Tapara Simaõ iakõrõrõta zizororowyta wahoro bo nitsuk. Tahadisahakanahaze wytyk inatsuk. Atatsa jokmorënikia ty taoporosuk arabastero harahare hi, tsipokzitsarëna niy. Narado inarokoha tsipokzitsarëna ty. Atatsa Sesus boze taoporosuk zisoiktsakik iwaze jokmorënikia ty iharek bete ziharasusuku. Iwa nikara.

4 Iwatsahi wastuhu sakzohotsa ihumo tahakyrikinaha. Tahasakparekenaha:

– Amy skaraba jokmorënikia ty piharasusuku – asa zuba nipamykysonaha.

⁵ – Jokmorēnikia tsipokzitsiarēna. Katsaktsa jokmorēnikia ty tahuak zeka okryrsaro tsizubarēna humo, 300 denario tsimaha. Iwaze okryrsaro ty sinamybyitsa bo nyny tsimaha zeka wasani tsimaha – nikaranaha. Iwa zibetsakaknaha.

⁶ – Awatu betsak betsak byitaha! – Sesus niy. – Atatsa hiba wasani mykara. Amy humo sa tsipesuka tsihikiknaha nikara kahumo tisapyrēna niy.

⁷ Sinamybyitsa ahapauk baze mopykyryknaha zeka sibo nyny tsimaha zeka wasani my. Utakta kabo ka ba nyny zikaha.

⁸ Abanurytu pikbezenaha. Mohyrikosokda. Atatsa kanury ziharasusuku iwaze kaytyk bo mokymy – niy.

⁹ – Kaharere tsiwabyziunahaktsa! Nanabyitaba Deus wasania ty myzubaha bo motsasokonaha. Hawa atatsa niy ana ty hi nanabyitaba inapamykysokonaha niwatihi iwaze sizubarētsa atatsa soho bo mytsaty mykaranaha – niy.

Sudas Sesus sukyrytsitsa bo niy.

¹⁰ Kyze Sudas Iskariotses isopyksapybyita tu mykara. Sesus tuk zinymyrykyta iwatatu Deus wahoro eze ziknapamykysonahatsa taparaktsa bo zumu ispe niy:

– O Sesus batu ahakparawy. Tsipibeze tsihikiknaha. Uta pahatsumuēhī. Bykyze uta hi ibo pahaoktyhyryk – niy.

¹¹ Iwaha ziwabynahatsa sakurētsa nikaranaha:

– O ikia tsimymytsumuēhī zeka okryrsaro ty abo nyny tsimaha – niaha.

– Yh̄y. Bykyzehuta! Aba ibo piksizo – niy.

– Yh̄y. Tsi piksi za – niaha. Iwaze Sudas mytsaty nikara:

– Hawa sa Sesus bo mysioktyhyryk. Yh̄y ja. Bykyzehu – niy. Ziperyky zuba.

Sesus tuk zinymyrykynahatsa myikaha ty tadisahaka.

¹² Kyze Sudeutsa simyikaha mozumuze zinymyrykynahatsa ipe niaha:

– O Sesus hana eze sa mymyikaha tsipikymynaha Hana eze sa ikia tuk karaneru tsani tazobaze tsimymydisahanaha – niaha. Amyikaha bo pororo ziknakaranaha Deus Sudeutsa taparaktsa ziknasitsumuēhīkīnahatsa bo mytsaty ziknakaranaha.

¹³ Sesus ispe niy:

– O nabo tsimykaranaha kytsa. Ikiahatsa petoktsa nabo Serusarēhe hudikhudikwy bo tsimytururuknaha! Anaeze maku pihik suk pebykykyrykta bo tsimykozonaha. Pihik myzizokota hapikta! Wahoro bo mytsukze, iapik tu paku paku tsimaha!

¹⁴ Tsihitsa pe:

O myhyrinymyrytsa “Hana eze sa amyikaha eze mydisahawy ty katuktsa tuk hauk tsimaha my” tsimahakta! Iwaze ahape my “Iktsatahaktsa”!

¹⁵ Wahoro jobo tsimydokoknaha, pokpedawy bo pykyhytu mydyhydyhywy bo iktsa tsimaha. Mysapy eze inakymy. Anaeze mymyikaha katsa mybo inakymynahaktsa! – niy. Yh̄y niaha.

¹⁶ Iwaze zinymyrykynahatsa petoktsa nitururuknaha. Serusarēhe bo izumunahaze hawa ty Sesus botu nitsasoko, atsatu niaha. Nawa tahamyikaha zikymynaha karaneru tsani zizobanahaze.

¹⁷ Kyze zunubaze Sesus ustsas zinymyrykynahatsa tuk zumukunaha, mytsyhyrytsa watsa tuk izumuku.

¹⁸⁻²¹ Tahadisahakanahaze Sesus ispe niy:

– Ahatuk estuba:

“O Sesus kaharereziuwbyita my. Abaka batu Sesus tukta my” mykara.

Iwatahi kasukyrytsitsa tuk kabo tynasioktyhyk. O bykyze atakta sinini myze zikpuruk byizeka wasani my. Imyspihikbatanikita tu Deus zipehata mywata humo sinini mykara. Ana hi Deus botu ziwataha – niy. Iwaha ziwabynahatsa hi batu siaku:

– O aty skaraba. Uta kino batu. Uta kino batu. – nikaranaha. Si-hyrinymyrybyitsa tu sibo Sudas soho nitsasoko. Sesus:

– Estuba katuk tamihi ty sok mytahi imyspihikbatanikita – niy.

Hawa Sesus tuktsa ihumo mytsaty mykaranaha.

²² Kyze tahadisahabanahaze Sesus atsikara waha ty okok niy. Deus pe niy:

– Ikia humo ka mykurëtsa – niy. Atsikara zitsatsakak. Sibo zibiakak:

– O hauk tahaktsa, naty hauk tsimahaze, kanury soho bo mytsaty tsimaha, “Sesus mysapyzeyke nihyrikosokda” tsimaha – niy. Iwa niaha.

²³ Iwaze taoporosuk duabohotsa tsik ty okokzo niy. Deus pe niy:

– Ikia humo ka mykurëtsa – niy. Iwaze sibo nyny niy.

²⁴ – O naka kaspu waha. Tsimyzikukunahaze kaspu soho bo mytsaty ty-nakaranaha. Kaspu mopuku iwaze Deus ahasoho pe my “Sisopyksapybyitsa humo mysiokzo iwatsahi kaokzeka meky watu moziknaha” Deus mykara.

²⁵ Uta aba zuba duabohotsa tsik piku. Pikuzoze kazo tuk kytsa tuk asaktsa kaharere bo hyÿ mykaranaha, katyryktsa moziknaha – niy. Iwaze sizubarëtsa duabohotsa tsik zikukunaha.

²⁶ Kyze unata eze Deus bo nisakibazikiknaha:

– O Deus ikia tsamysapyrëta – nikaranaha. Kyze Deus bo nisakibaz-ibanahaze ape bo ziponaha. Hara jobonita bo Oriwereja inarokota bo niukurunaha.

Sesus Peduru nizukpeheze – O batu Sesus kanyhy tsimy – niy.

²⁷ Nakpo zukzuk niahaze. Sesus ispe niy:

– Utakta aba pikbezenaha. Pikbezenahaze, batu aty tohi katuk mopykyryk. Kasukyrytsitsa pokso tsimywaknaha. Deus harere botu ziwataha “Hozipyrykzatsa irarakata pibezenaha iwaze myraratsa mowakbaiknaha” iwa Deus harere botu kahumo ziwataha. Utakta hozipyrykzatsa irarakata wata.

²⁸ Mynahyryzikpoze ahaharaze Karireja eze pahapery – niy.

²⁹ Peduru:

– O batu. Utsa kytsa ja. Utakta batu. Uta kino atuktu mopykyryk.

³⁰⁻³¹ Sesus:

– O Peduru aba unata eze harakykbyi kasoho “Batu Sesus kanyhy” tsimyspihikbata, kokuaro petok nipuze iwa tsimyspihikbata. Iwa ba zabezenaha – niy.

– O niwazubakta. Abaze pikbezenaha zeka:

“Utakta Sesus tukta” my – niy.

Kytsa sizubarëtsa kino niwatihi nikaranaha.

Sesus zinymyrykynahatsa tuk Oriwerejatsa hara bo Kesemani inarokota niukurunaha.

³² Kyze Sesus zinymyrykynahatsa tuk hara bo nidoknaha anaeze isaziktsa koso Kesemani inarokoha bo hi nisioktyhyryk. Ispe niy:

– Anaeze dyhy dyhytahaktsa! Uta kino Deus bo mopamykyso – niy.

³³ Utsa kytsa dyhy dyhy niahaze, Peduru, Suão, Tsiaku, ahatsahi nisioktyhyryk. Sesus mytsaty nikara:

– O bykyze pikbezenaha – nikara. Paikpa mytsaty nikara. Iakubyita niapykyryk. Tisukatsihikrëta nikara.

³⁴ Tatuktsa pe niy:

– O batu kaku. Pikbezenaha kasukatsihikrēta mykara. Uta kino Deus bo mopamykysoko. Tykara eze tu tutarenaha. Tsikperynaha ahaōtutsabyihu ja – niy.

³⁵ Iwaze siharapu bo niparak. Niparakze, wytyk bo okmymy niy, Deus bo nipamykysoko.

³⁶ Iwaze Deus pe niy:

– O kasukyrytsitsa kabo mozumukunaha, kazo. Tsiktsumuēhīkta iwaze sinini mykara. Uta tu zeka ba mohyrikosokda tsihikik. Ikia:

“Tyhyrikosokdakta!” tsimy zeka, mohyrikosokda – niy.

³⁷ Iwaze tatuktsa Peduru, Tsiaku Suāo ahatsa bo iziksizo. Zurubaiknaha.

– O tsikurubaik naha sa Peduru. Katuk batu tsiperyky ja hini hini byitahaktsa! – niy.

³⁸ – Deus bo typamykysonahaktsa! Deus zikwy humo zuba ikiahatsa ahapunihikrētsa tsimoziknaha niy iwatsahi Satanas harere bo batu yhỹ tsimaha. Hawa ha ty wasani tsipitsihikiknaha ikiahatsa batu ahapunihik iwatsahi Deus bo typamykysonahaktsa – Sesus niy.

³⁹ Atsa botu ziksizoze, Deus bo nipamykysokozo:

– O “Tyhyrikosokdakta!” tsimy zeka, kazo, utakta mohyrikosokda – niy.

⁴⁰ Sibo ziksizoze, zurubaikzonaha. Tahaōtutsaspyk nikaranaha. Sesus:

– O tsipuruziukunaha zuba – niy. Batu harere zikaha.

⁴¹ Bykyze Deus bo nipamykysozozze sibo ziksizo.

– O abaze sihi tsikahabyrynaha. Abaka ba zikumunaha. Abaka utakta Deus zikpehata ahawata ikyzik kasukyrytsitsa bo pikoktyhyryknaha niy. Abahi pikbezenaha.

⁴² Kyiktykta! Tupaktsa! Abaka imyspihibatanikita mozumuku. Kasukyrytsitsa kabo tynasioktyhyryk.

Kytsa Sesus tsipa humo ziooktyhyryknaha.

⁴³ Ana hi nitsasokoze Sudas ibo izumu. Sudas zinymyrykyta tu siharerez-iubyitsa tuk izumuku. Sesus bo inasioktykyryk. Tanoratsa upepetsa iwatsa tu nasebykyknaha.

⁴⁴ Tapara Sudas ispe niy:

– O Sesus piwatawyze piharapyrykze ahanyhybyitsa tsipinynaha kytsa. Atahi piharapyryk! Iwaze tsipa humo tsioktyhyryknahaktsa! – niy. Taparaktsa Deus wahoro eze ziknapamykysonahatsa nisipeha Sesus pioktyhyryknaha, Moises harere hyrinymyrytsa, Sudeutsa taparaktsa kino niwatihi nisipehanaha.

⁴⁵ Iwaze Sudas Sesus bo zuk niy. Sudas:

– O ikzumukta kahyrinymyrytsa – niy.

Iwaze Sesus ziharapyryk.

⁴⁶ Kytsa Sesus ziooktyhyryknaha.

⁴⁷ Ipaukbazekta Sesus tukta tasokorotsapu izibok. Maku spi zizykik. Atahi taparakta maku ziknapamykysokota Deus wahoro zubata eze tsumuēhītsa.

⁴⁸ Sesus ispe niy:

– Amo skaraba tanoratsa ahaupepetsa iwatsa tsiknasebykyknaha. Awatu-taha. Utakta kasyhyryboabyita. Batu kakyri.

⁴⁹ Ahatuk zikzuruku. Ikiahatsa tuk Deus wahoro zubata eze zikzahyrinymyryky. Iwatsa tu batu katsipa humo katy oktyhyryk. Deus harere botu ziwataha itsyhyryboanikita wata katsipa pikoktyhyryknaha. Aba zuba katsipa humo tsipikoktyhyryknaha – niy.

⁵⁰ Iwaze zinymyrykynahatsa niwakbaiknaha. Tahapybyspyk hi niwakbaiknaha. – Iwa zeka mymybabanaha – niaha.

⁵¹ Itsipa humo zioқтыhyryknahaze mykyryburukta Sesus hapik niukuru. Atahi niwakik panu ty irikpidiwyhyta niy.

⁵² Nizokbatsinaharēta tu niwakik. Tazikpidiwy zuba sibaze zereke. Iwatahi isukbyitatu niwakik.

Kytsa Sesus kytsa harerewabytsa bo zioқтыhyryk.

⁵³ Kyze Sudas tuktsa taparakta ziknapamykysokonahatsa tuk myhyrizikwanikita wahoro Sesus zioқтыhyryknaha. Taparaktsa kapitaōtsa watsa Moises harere hyrinymyrytsitsa kino niwatihi anaeze niapykyryknaha. Sizubarētsa inakypyknaha.

⁵⁴ Peduru tsipybyrēta hi ērykani iapik inaukuru. Taparakta wahoro sturupe eze nitsukze iwarikspyk sodadutsa baze nidyhyky izo baze niakpyzazaka.

⁵⁵ Iwaze taparaktsa Deus wahoro ziknapamykysonahatsitsa. Sudeutsa taparaktsa Moises harere hyrinymyrytsitsa ahatsa inakypyknahaze kytsa harere ziwabynaha. Asahi:

– O kytsa Sesus soho pisapybyrikinaha iwatsahi pibezenaha – anahi mozihikiknaha. Siharere meky watu nitsasokonaha.

⁵⁶ Iwaze wastuhu kytsa ispe:

– Sesus harere batu wasani – niaha. Utsa kytsa batu yh̄y niaha. – O batu imysapy – niaha. Isoho nimyspihikbataikik. Mekywatu nikaranaha.

⁵⁷ Wastuhu niriktotohokonaha.

⁵⁸ Asa tihi:

– Katsa iharere tsiwabynaha mype niy:

“Utakta Deus wahoro zubata anahi kytsa nizukninaha myzipyk bykyze petok puruze usta wahoro mozokni anahi kytsa batu mozokninaha” Sesus niy, anahi tsiwabynaha – mybarapetu nikaranaha.

⁵⁹ Ana ty hi metutu nitsasokonaha iwatsahi Kajapas:

– O mybarapetu mykaranaha – niy.

⁶⁰ Nitsasobanahaze, Kajapas sibaze tarikto:

– Amo Sesus. Kytsa asoho nitsasokonaha anahi tsiwaby. Hawa sa tsimy – niy.

⁶¹ Sesus batu harere. Iwaze Kajapas ipe niyzo:

– Hawa sa Sesus. Ikiahi ja Deus zapehata. Ikiahi ja Deus bo tsimymyoktykta. Ikiahi ja Deus tse – niy.

⁶² – Yh̄y. Deus zuba izikwyrēnikita. Utakta Deus zikpehata ahawata ikyzik. Ibaze tuze mybarawy ezektsa bo zikpeha. Iwaze mybarawy bo mynasik. Aba uta Deus bo mydo. Ibaze tuze bijoikpe eze tu, kabo iktsa tsimaha iwaze mybarawy bo bijo satata tuk mynasikzo – niy.

⁶³ Kajapas ana harere ziwabyze tsiakyriukrēta niyzik. Iwaze isuk zisykik nawa ziwatawy takyriki.

⁶⁴ – O soso byitaha ba ziktsasonaha! – niy.

– “Utakta Deus wata” my. Iharere botu tsiwabynaha hawa sa ity tsimaha – niy.

– Tabezehikta! Tabezehikta! – nikaranaha.

⁶⁵ Iziakbatakanahatsa zehezozokoknaha, zihyryzikwarakanahaze iwaze hi nitsakikinaha.

– Aty skaraba zaki – nikaranaha, zimyijakanaha. Isperytsitsa kino niwatihi nitsakikinaha.

Peduru Sesusta batu kanyhy nikara.

⁶⁶ Peduru wahoro peze nidyhyky. Anaeze myhyrizikwanita tsumuēh̄tsata ziharamuze.

⁶⁷ Atatsa Peduru izo bo niakpyzazaka ibo zinytokto, iwaze ipe niy:

– O ikia tihi sa Sesus Nasare ezekta tukta tsiky – niy.

⁶⁸ – O batu. Batu kanyhy – nikara. Iharere batu kawabyhy zispihikbata. Iwaze hokbowy baze zumuzoze kokuaro nipo.

⁶⁹ Atatsa ibo nikozone ustsya kysa pe niy:

– O ata tihi kok Sesus tuk zinymyrykyta – niy. Iwa niyzoze:

⁷⁰ – O batu – mybarapetu nikara. Bykyze ustsya:

– O atatsa nitsasoze wasape hi niaha. Ikiya tihiba Sesus tukta ikiya kino niwatihi Karireja ezekta – niaha.

⁷¹ Peduru tsipybyrēta nikara:

– Batu kanyhy. Aty skaraba Sesus batu itukta Deus kaharere piwabyky iwatahi kaharere wasani byizeka Deus piksininiwyky Sesus batu kanyhy – Peduru nikara.

⁷² Iwa nitsasokoze kokuaro nipozo. Peduru mytsaty niy. Tapara Sesus kape niy:

– O kokuaro ipozoze: Harakykbyri kasoho “Batu Sesus kanyhy” tsimy kara – niy.

Peduru ana bo hi mytsaty niyze nipuziuku.

15

Kysa Sesus Piratus bo ziockyryk.

¹ Kyze zokorobyitu Sudeutsa Deus wahoro eze ziknapamykysonahaktsa, taparaktsa kapitāotsa Moises harere nisihyrinymyrykynahatsitsa iwatsa sizubarētsa inakypyknahaze hawa Sesus tabeze nipamykysokonaha iwaze Sesus Piratus bo ziockyryknaha. Taparaka zipawarakanaha. Iwaze Piratus bo zipehahik. Piratus abazubata iharere awatu zeka Sudeutsa ba zikbezenaha.

² Piratus ipe niy:

– O Sesus ikiya ja Sudeutsa pehatsa – niy.

– Ikiya tihi tsiktsaso – Sesus niy.

³ Taparaktsa Deus wahoro zubata eze ziknapamykysokonahatsitsa:

– O Piratus Sesus batu imysapy – nikaranaha. Isoho humo zispihikbatakanaha.

⁴ Piratus ipezo niy:

– Amo Sesus. Asoho humo zasapybyrikinaha. Tsiwaby sa. Iwa wasani sa – niy.

⁵ Batu harere tasoho humo batu harere. Iwatahi Piratus ata zuba tatu mytsaty nikara – O amo skaraba! Batu harere ziky, batu taokani! – niy.

Sesus tabezewy.

⁶ Tapara tahamyikaha eze Piratus maku estuba inazukenaha. Maku sizubarētsa sakyriukrēnikitsa hurukwy eze tu. Situkta estuba nizuke.

– O aty sa myzuke – nikara. Atakta! Serusarēhe ezektsa nikaranaha, yh̄ nikara. Iwa simyikaha eze ziknakara.

⁷ Serusarēhe eze kysa niwatsoronaha iwaze sakyriukrētsa nitsahurukiknaha. Estuba sakyriukrēnikitsa hurukwy eze Bahabas inarokota niy. Kysa bakatsa niy. Ana humo hi nitsahurukiknaha.

⁸ Iwaze kysa sizubarētsa Piratus bo zumunaha. – O aty sa tsimy zuke – nikaranaha.

⁹ Piratus:

– O ikiahatsa ista. Hawa sa tsimy zihikiknaha. Sudeutsa pehatsa za myzuke Sesusta tsimysapyrēta! – niy.

¹⁰ Taparaktsa Sudeutsa tahakyrikinaha sizokdirētsa nikaranaha iwatsahi Sesus ibo ziockyryknaha ana humo hi Piratus tsihyrinymyrēta.

11 – O batu. Mektatukta! Bahabas zakta! – niaha. Iwa taparaktsa botu kytsa sizubarētsa pe niy:

– Ikiahatsa tsimaha zeka Bahabas. Bahabas tsimaha – niaha.

12 Piratus ispe niy:

– Sesus ja. Hawa sa Sesus ty my. Atakta Sudeutsa pehatsa – niy.

13 Myzubaha tihi:

– Tabezehikta! Iharapatawyhyta humo tabezehikta! – nikaranaha.

14 Piratus:

– Amo humo sa. Amy ty sa imysapybara ty nikara – niy.

– Tabezehikta! Tabezehikta! – opykani kazi nikaranaha.

15 Iwaze Piratus: Yhỹ niy. Nawa myzubaha humo zuba harereziyu tsihik mykara iwatahi Bahabas nizukehik. Sesus ta batu. Sodadutsa pe:

– O tytsakinahaktsa! Iharapatawyhyta humo tsibezehiknahaktsa! – niy. De.

Sodadutsa Sesus zimyijakanaha. Inisaha ty zitsorikiknaha.

16 Kyze sodadutsa Sesus tahawahoro isturupeze bo zioqtyhyryknaha. Sodadutsa zumubannahaze Sesus zispihikbatakanaha.

17 Isuk tsaririta ty zisuknaha.

– O abaka Sudeutsa pehatsa abazubata! tsimy – zimyijakanaha. Inisaha ty zitsorikiknaha. Tubabatu nawa sisopyk. Sipehatsa mekywa tu sitsorik. Sesus ty ka inisaha ty zitsorikiknaha iwaze zimyijakanaha.

18 – O ikia Sudeutsa pehaktsa – zispihikbatakanaha.

19 Hwi ty ziharektotokoknaha, zihwezozokoknaha. Tahaekaratsa humo iokeryk puruk puruk nikaranaha, sipehatsa okeryk watsa iwa zisininiwyky.

20 Zispihikbatabannahaze isuk tsaririta zibokiknaha. Isuk babata ty tysukzonaha. Iwaze ape bo zioqtykyryknaha. Iharapatawyhyta humo tabeze nikaranaha.

Iharapatawyhyta humo zihyrizikiknaha.

21 Ske buruk niukurunahaze, Simaõ nasihobyk. Atakta Sireni ezekta tatsuhuk ikny ziksikirita. Ihyrytsa Aresãdere Hupus ahatsa inarokotsa. Iwaze sodadutsa ipe niaha:

– O iharapatawyhyta tsebykta! – niaha.

22 Niytahi zebykyk! Iharekpokoso sapy inarokoha bo Sesus zioqtyhyryknaha, iharekpokoso Sudeutsa harere kokota maha.

23 Anabo izumunahaze aty tohi mymyitsapyri hwi ty Sesus bo nyny niy:

– Tsõty – niy.

Batu niy. Batu tsõ.

24 Isuk zibokiknahaze ziaksenaha. Sodadutsa harahare zipyryktsa ty nisipaparakanaha aty ja Sesus suk piakse nikaranaha tsahi ziwatawykyknaha. Iharapatawyhyta humo zihyrizikiknaha, itsyhyry soikare eze zaza nikaranaha zihyrizikiknaha, ipyrytsa ty kino niwatihy zaza nikaranaha zihyrizikiknaha. Iwaze nepykbanahaze iharapatawyhyta zirikonaha.

25 Haramwe nazotoktoze iharapatawyhyta humo zihyrizikiknaha. Zikymynahaze, iharapatawyhyta zitseknahaze zirikonahaze.

26 Iharapu bete iwatahaha ty. SUDEUTSA PEHATSA ziwatahakanaha iwa isoho humo hazi nikaranaha.

27-28 Kytsa petoktsa sitsyhyryboanikitsa ituk nisibanaha siharapatawyhytsa humo nisibanaha estuba ipanuryk taba usta ipawazo taba ahatsa niaha.

29 Kytsa nabaze ske buruk niukurunahatsa, zisapybyrikinaha hazi nikaranaha:

– O iktsatahaktsa. Taparaka zuba:

“Deus wahoro zubata myokarabaka bykyze petok puruze usta pizi tsikykara” abaka tsimiraka – nikaranaha.

³⁰ – Ikia tsahyrinymyrēta babata zeka, pany, tynasikta! Ba zikumuzakta – zimiyjakanaha.

³¹⁻³² Deus wahoro zubata eze ziknapamykysokonahatsa Moises harere nisihyrinymyrykynahatsitsa kino niwatihi nitsasokonaha:

– O ustsya kytsa nisitsumuēhīkī, atahi ba ziktsumuēhī! Iwatatu sa pomoza Deus zipaha zeka “tynasikty”, Sudeutsa pehatsa babata zeka, iharapatawyhyta ekze “tynasikta!” Iwa tsimy zeka:

“O Sesus hi Deus zipehata babata” tsimaha – mybarapetu nikaranaha.

Asaktsa ituk nihyrikosokdanahatsa asa kino niwatihi zisapybyrikinaha.

Sesus nihyrikosokda.

³³ Iwaze tokbaha eze miwa niyzik. Batu haramweke. Sudeja eze miwa niyzik.

³⁴ Iharakibikia bo zoize inaharamwezo. Iwaze Sesus:

– *Eri Eri rama sabaktani* – ana taharere baba ty huahua niy. Anatyhi myharere. – O Deus amo skaraba uta zuba tsipikarikik – niy.

³⁵ Ustsya kytsa niaha:

– Amo sa Erias bo hua mykara – niaha.

³⁶ Tohi duabohotsa tsik ipokzitsibara ty itsārākbara ty morosuk eze ky ty tsikok niy. Anabo mazori waha ty duabohotsa tsik bo sokyk niy. Zipypyikik. Mazori waha ty hwi humo korokbykyk jobo Sesus sak bo tsyk tsyk nikara. Atakta:

– Byriktsa, tozeka ja Erias mozumu, iharapatawyhyta humo piakse. Tsiperynahaktsa! – niy.

³⁷ Iwaze Sesus kakazo niyze zumuza.

³⁸ Iwaze panu ipamaba ipokpedawy Deus wahoro zubata eze ky nisykbaik. Tsapukte buruk nisyk bijoikny tu niakskyryk.

³⁹ Sodadutsa pehaktsa tuk nikozoko iharapatawyhyta okeryk nirikto-hoko Sesus iwa nihyrikosokdaze atahi:

– O atahi Deus tse babata – niy.

⁴⁰ Wastuhu wytykyryk nizokparakanaha. Maria Madarena, ustatsa Maria, Sarome, usiza, iwa ēryk tu nizokparakanaha. Maria hyrytsa Sose Tsiaku jypykyhyzytykta iwatsa niy.

⁴¹ Asiza hi Karireja ikny ihumo simypokzitsiarēza nikaranaha. Usiza wytykyryk iapik Serusarēhe bo zikzumukunaha za kino niwatihi asiza nizokparakanaha: Zitsumuēhīkiknaha.

Sose Sesus ziytykyk.

⁴²⁻⁴³ Iwaze byiri Sudeutsa nawa zurunahaze tahabyrykywy, nubaze Sose Arimeteja ezekta Piratus bo izumu. Sose taparakta Deus wahoro zubata eze tu niy. Tsimysapyrēta atahi kytsa Deus harere bo hȳ mykaranaha ana hi mozihikik. Batu pyby iwaze Piratus pe niy. – O Sesus nury ty kabokta. Uta inury ty iytyk bo mytsahok – niy.

⁴⁴⁻⁴⁵ Piratus:

– Botu sa p̄y niy – niy. Iwaze sodadutsa pehatsa pe niy:

– Sesus sa botu nihyrikosokda – niy. Sodadutsa pehatsa ipe niy:

– Yh̄y p̄y – niy. Iwaze Piratus:

– Ikia za tsinazipik Sose. Iwaze tsimytsahok – niy.

⁴⁶ Sose panu kōpara niy inury inazipikze, panu ty ziakwaraka. Tubabatu harahare yktaba nitsahoknaha, abaka anabo hi nitsahok. Harahare bobyri ihok bo zikorore. Zihokbore.

⁴⁷ Maria Madarena, ustatsa Maria, ahaza nizokparakanaha. Iytyk zinyrenaha.

16

Sesus inahyrizikpo.

¹⁻² Kyze petok zuruze, sabado nipykze miwa botu Maria Madarena ustatsa Maria, Tsiaku je Sarome, iwahaza iytyk bo niukurunaha. Jokmorēnikia bykyhy tuk. Niukurunaha zahi inury iokmorēnikia ty taharasusu nikaranaha. Anahi Sudeutsa sopykwy ty ziknakaranaha.

³ – O aty sa harahare mytsyhyryze pipetu nikaranaha. Titsakyrikrēta hỹ. Aty skaraba mytsyhyryze sukyhy my – nikaranaha.

⁴ Iwaze nitururuknaha anabo zumunahaze iktsa niaha, mektatu botu harahare bobyri zipetuhikare.

⁵ Iwaze iytyk bo nipupunaha. Anaeze maku bo nikoizonaha, atahi nidyhyky. Tisukbarazarēta. Iwaze ipokso nipybybaiknaha.

⁶ Maku hi:

– Kapokso ahapyby byihujaktsa. Sesus Nasare ezekta atahi kytsa iharapatawyhyta humo zihyrizikiknaha tsipiberikinaha ana hi pinymyry. Atahi inahyrizikpo. Nabo isapy bo iktsataha. Isapy zuba niapykyk.

⁷ Aidytahaktsa Peduru ustsā zinymyrykynahatsa bo tynakozorēnahaktsa! ispe tsimaha:

“O Sesus inahyrizikpo. Aba tsipinyaha Karireja bo ahaharaze mykara hawa botu ahape niy” tsimaha – bijoikpe iknykta niy.

⁸ Iwaze wytykyryk puke puke niaha. Nitururukuknaha. Sipybyrēza zik-sikirinaha. Nitydydykyknahaza tu paikpa mytsaty nikaranaha. Sipybyrēza nikaranaha iwazahi kytsa bo batu tyso.

Sesus Maria Madarena bo natakaha.

⁹ Sesus domiko eze inahyrizikpo tapara Maria atatsa Makadā ezektatsa bo inatakaha. Tapara Sesus hyrikoso sapybara sete nisiksiwyhikze. Atatsa ihumo nizororobabatatsa.

¹⁰ Iwaze atatsa itukytsa bo niy. Ipokzi nipuziukunaha. Atatsa hi:

– O myhyrinymyrytsa inahyrizikpo. Ispituzo my. Ikza inyzo – niy.

¹¹ Itukytsa iharere humo paze! nikaranaha. Inahyrizikpo naha humo ma ahabyitsa nikaranaha. Atatsa mybarapetu ja mykara iwa mytsaty nikaranaha.

Sesus tuk zinymyrykynahatsa petoktsa ahatsa bo natakaha.

¹² Kyze Sesus meky watu itahyrity niyzik petoktsa ahatsa bo natakaha. Niukurunahaze amytsī eze natakaha. Situk nipamykysoko.

¹³ Iwatsahi ziksizonaha. Itukytsa bo nipamykysokonaha. Siharere humo kino niwatihi itukytsa ma ahabyitsa nikaranaha. Asaktsa mybarapetu ja mykaranaha iwa mytsaty nikaranaha.

Sesus tuk zinymyrykynahatsa bo natakaha.

¹⁴ Iwaze zinymyrykynahatsa ōse ahatsa bo natakaha. Tahadisahakana-haze sibo natakaha. Ma zikahabyitsa nisibetsakak. Tahaoktsīnahatsa humo nisibetsakak. Ustsā harere humo inahyrizikpo naha soho batu ma ahabyitsa iwatahi nisibetsakak.

¹⁵ Iwaze ispe niy:

– Nanabyitaba tynakaranahaktsa! Sihudikhudikwy taba wasania ty abazubatsa bo tytsasonahaktsa! – niy.

¹⁶ – Aty kaharere bo hỹ my zeka kahumo tispirikporēta mozik atahi imysapybara ty myzeka Deus piokzohik. Ata kino piharasuhikze iwatawyhyta

katukta my, atahi Deus myzo bo pioktyhyryk. Aty kahumo ispirikpobyi zeka imysapybara ty my zeka ba ziozko, imysapybara ty nikara ituk tawahi mynapykyryk.

¹⁷ Asaktsa kahumo sispirikporētsa Deus zikwy piwatawynaha. Kahumo hyrikosotsa sapybaratsa tysiksiwyhiknaha. Mektsa harere ty mopamykysokonaha.

¹⁸ Pyryhyk ty paik maha zeka ba zikyrikosokdanaha. Tummy tsarawyhyha ty pikunaha zeka ba zikyrikosokdanaha. Simyitsapyritsa tahatsyhyrype ty tsika maha zeka, mysizororowy sakurētsa moziknaha – Sesus niy.

Sesus bjoikpe bo nido.

¹⁹ Taharere nitsasobaze jobo bjoikpe bo Deus ziozkyhyryk. Tazo tuk ipanuryk taba mynadyhyky niy.

²⁰ Iwaze itukytsa nitururuknaha. Nanabyitaba Deus wasania ty natsasokonaha. Hawa ha ty kytsa batu zikaha ana ty hi Deus zikwy humo nikaranaha. Iwatsahi kytsa siharere bo hyŷ niahaze Sesus humo sispirikporētsa niyziknaha. Sipehakatsa hi nisispirikpoko. Deus zikwy humo ziwatawykynaha, Sesus nisitsumuēhīkī iwatsahi myzubaha siharere bo hyŷ nikaranahaze Sesus humo sispirikporētsa niyziknaha. Niwazuba.

Rukas wasaniha Sesus soho ziwatahaka

Taparaka Rukasta batu Sesus tuk pão, bykyze zuba Sesus tazo bo ziksi-zoze ihumo tispirikporêta niyzik. Sudeubyita tu nokponi zizuruku Toroadé hudikhudikwy anaeze Pauro ibo zihobyk. Myzororowykytsa niy. Deus hyrikoso ziapewywyky iwatahi Sesus soho ziwatahaka.

¹ Uta Teopiro bo piwatahaka. Kyze tapara sizubarêtsa kytsa papeu humo botu ziwatahanaha katsa mybaze hawa tsynynaha ziwatahabanaha.

² Tapara zynynahatsa kino mybo nitsasobanaha Deus harere kino niwatihi nitsasobanaha. Ikiá tsahyrinymyrêta botu wasaniha soho niy.

³ Abaka uta kino tubabatu kahyrinymyrêta. Iwatahi uta kytsa iksipeha:
– Hawa skaraba niy – iky. Kabo sizubarêtsa nitsasobanaha. Iwatahi uta ikiá bo pykyhytu piwatahaka.

⁴ Iwatatu tsipinymyry wasani tsimy. Kytsa ikiá bo botu nitsasokonaha wasani hỹ. Tapara mopamykyso Sakarias soho ioke niwatihi.

Suão Batista nipuruk naha soho.

⁵ Kyze Erodes pehatsa Sudeutsa hudikhudikwy eze tuze Sakarias niy. Deus wahoro zubata eze ziknapamykysokota niy. Abias astsabarêtsa niy Deus wahoro zubata eze nikara. Abias atsatubarêtsa tsekokatsa ziknapamykysokonahatsitsa niwatihi. Atatsa ioke Arão tsekokatsa ikny niy. Arão niwatihi Deus wahoro eze ziknapamykysokota. Isabeu inarokotatsa.

⁶ Isukzakata zikzuruku harape tuk Deus harere bo hyỹ ziknakaranaha iwatahi Deus isukzakata soho tihi:
– Wasani mynakaranaha – niy. Kytsa isukzakata soho humo wasani nikaranaha.

⁷ Batu ihyrytsa ka. Iwatatsahi ibykyhy byitatsa zikzuruku. Ihyrytsa ahabyita tu nitsaikbanaha.

⁸ Kyze Sakarias Deus wahoro zubata bo niy. Anaeze Deus tuk tarabaja nikara. Ziknapamykysokota humo tarabaja nikara. Abias astsabarêtsa tarabaja nikara.

⁹ Tapara ustsá ziknapamykysokonahatsitsa ibo nitsasokonaha:
– Abaka ikiazakta! Ikiá hi Deus wahoro zubata bo tsimytsuk. Tsimytsukze anaeze Deus bo jokmorênikia ty tyziwezoko – niaha. Hyỹ niy.

¹⁰ Deus wahoro zubata bo nitsuk. Jokmorênikia ziwezokoze aparakbahatsa isturupeze Deus bo nipamykysokonaha.

¹¹ Niytahi atsoko bijoikpe iknykta Deus tsumuêhĩtsa ibo inasik. Iwezowy baze jokmorênikia niriktohoko.

¹² Sakarias ibo nikozoze ihyrinymyrybyita nikara. Iwatahi ipokso nipyby.

¹³ Bijoikpe iknykta Deus tsumuêhĩtsa ipe niy:
– Apyby byitykta! Ikiá tsikzapykykynaha Deus ziwaby. Aba aoke tabykyhy. Atse mopurukze Suão ty tsipinaro niy.

¹⁴ Ikiá atse mopurukze akurêta tsimozik. Kytsa kino niwatihi atse humo sakurêtsa moziknaha.

¹⁵ Deus okze ka maku myhyrizikwani mozik. Iwatahi duabohotsa tsik ty ka tsõ tsõbyity my, tsõsĩ humo kino niwatihi tsõ tsõ byity. Taje arakozeze tuze Deus ituk mynapykyry. Deus hyrikoso piakse, mopurukze tu Deus hyrikoso ituk mynapykyryk hỹ – niy.

¹⁶⁻¹⁷ – Atse taypykze Sudeutsa Deus bozo mysioktyhyryk. Atse Erias wata mozuruku. Erias Deus hyrikoso tuk zikzuruku. Atahi Deus zikwy ziwatawy. Deus harere ziwatawyky. Atse niwatihi Deus zikwy piwatawyky. Atahi

kytsa Deus zipehata weryk pizozikbawy. Izotsa mytsatyziu maha. Sihyrytsa bo mytsaty maha iwatsatu niharapepehakanaha nakokozonaha atse harere humo mykaranaha. Abaka kytsa Deus harere bo hyỹ maha. Iwaze Deus zipehata mozumuze ityryktsa botu piperykynaha – niy.

Iwaze bijoikpe iknykta Sakarias bo itse soho nitsaso.

¹⁸ Niytahi Sakarias ipe niy:

– Iwaze sa kaoke tabykyhy tsimy. Hawa sa aharene baba. Utakta ba iktsaikba kaoke kino niwatihi nitsaikba. Iwatatsatu sa tabykyhy – niy.

¹⁹ – Utakta Deus tsumuẽhĩtsa Deus tuk mynapykyryk. Utakta kano Kabarieu. Deus zikpehata hi abo iknasik. Iwatahi wasania ty mopamykysoko.

²⁰ Iwatahi ikia wabyziutykta kaharere bo yhy ahabyita hi iwatahi tsimyharenebyri. Atse mopurukze tsipaharenezo. Kaharere ka wasaniha – niy.

²¹ Kyze aparakbaha Deus isturupeze ziperykynaha. Sakarias Deus wahoro ekze izoik ziperykynaha. Aparakbaha paikpa iktsa nikaranaha.

– Amy skaraba atahi Deus wahoro eze tu batu aidy puke ziky – nikaranaha.

²² Izoize niharenebyri. Sakarias Deus wahoro eze tuze itsotospyk waha zinyhik. Mytsotospyk waha ana hi zinymyrynaha. Bijoiikpe iknyktsa bo iktsa niy. Myzubaha okze tu niharenebyri iwatahi tatsyhyrypetsa ty zuba pawyk nikara. Taharek ty zuba zikziwatawyky.

²³ Iwaze zuba Sakarias tarabaja Deus wahoro zubata eze zepykze tawahoro bo ziksizo.

²⁴ Taoke zityrykzuwyze tabykyhy. Estuba tsyhyrywa byzoje zetsuze tawahoro eze tu ziknapykyryk. Isabeu tihi:

²⁵ – O Deus tsiksapywyky. Kahumo tsimypokzitsiukrẽta. Taparaka kasikpybyrẽtatsa. Kabykyhy byizeka kasikpybyrẽtatsa. Abaka batu. Batu kasikpyby. Iwatatsahi ikbykyhy hy. Abaka aparakbaha humo batu kasikpyby. Iwa ikbykyhy tatsatu Deus ziksikpybybyri – Isabeu nikara. Iwatatsahi Sakarias oke tabykyhy. Ibykyhyhuk byitatsa tu tabykyhy niy.

Sesus Kiristu nipuruk naha soho.

²⁶ Kyze usta byzoje eze Deus bijoikpe iknykta Maria bo izipeha. Bijoiikpe iknykta Deus tsumuẽhĩtsa Maria bo inatakaha Kabarieu inarokota. Deus zipehata. Deus ipe niy:

– Maria pe nawa tykta Kabarieu atatsa Nasare ezektatsa bo – niy.

Hyỹ niy.

²⁷⁻²⁸ – Maria ityrykduwyhybyitatsa tu tabykyhy. Ika atatsa bo wasania ty tsimy – niy. Iwaze byri puẽtsikze Sose atatsa piakse. Sose Dawi tsekoka niy. Iwaze atatsa bo bijoikpe iknykta inasik. Atahi:

– O Deus atuk mynapykyryk – niy.

²⁹ Tsipybyrẽtatsa iharene pokso nikara. – Hawa ha skaraba – niy.

³⁰ – O apyby byityktsa Maria. Deus ahumo papokzitsiki. Ika tuk mynakara. Aba tsipabykyhy.

³¹ Atse mopurukze Sesus ty tsipinaro. Taypykze maku myhyrizikwani mozik.

³² Aparakbaha isoho humo “Deus tse” maha. Deus tyryktsa tuk mynapykyry ba zikpyk – niy. Deus hi Sesus Sudeutsa pehatsa mozik Dawi wata, ahadiri mypehatsa wata.

³³ Sesus Sako tsekokatsa pehakatsa. Sesus Deus tyryktsa tuk mypehatsa tawahi mynapykyryk.

³⁴⁻³⁵ Maria ipe niy:

– Hawa sa katyrykduwyhybyitatsa tu sa pikbykyhy – niy.

– O atyrykduwyhybyitatsa tu tsipabykyhy Deus hyrikoso humo tsi-pabykyhy. Iwatatsahi atyrykduwyhybyitatsa tu tsipabykyhy niy. Iwatsahi kytsa atse soho humo. “Deus tse” maha – niy.

³⁶ – Wabyty! Ajetsy Isabeu ibykyhyhuk byitatsa tu abaka tabykyhy nitsaikbatatsa tu tabykyhy hỹ. Tapara kytsa tsasowy “batu ibykyhyhuk” nikaranaha. Abaka tabykyhy tatsa estuba tsyhyry wa byzoje zetsuze.

³⁷ Aba itse mopuruk. Deus tuk batu amy tohi ihokdaha – niy.

³⁸ – O nawa my. Deus pikpehaze hyỹ my. Katyrykduwyhybyitatsa tu katse mopuruk. Ikza hyỹ my – niy.

Niytahi bijoikpe iknykta hokda zuba niy. Batu ity nyzo.

Maria Isabeu bo inakozore.

³⁹ Bykyze Maria Isabeu bo harakoso bo atsoko niparak. Isabeu wahoro bo zumu. Ana hi hudikhudikwy Sudejaka.

⁴⁰ Sakarias wahoro bo paku niy. Isabeu ziharapyryk. Nipamykysoko.

⁴¹ Atatsa Maria harere ziwabyze ibykyhy iarakokeze tsakurẽta nikara iwatahi kuanare kuanare nikara. Deus hyrikoso Isabeu tuk mynapykyryk.

⁴² Iwatatsahi Maria bo opykani nipamykysoko:

– Deus pasapywyky. Ikia hi akurẽtatsa tynapykyryk. Awaky wytykyryk tynasiyzikwyky. Abykyhy niwatihi tsakurẽta.

⁴³ Parakbaha okze tu ikza myhyrizikwanibyitatsa tu my. Hawa tsikytatsa ikia kapehatsa je kabo tsimynakozore.

⁴⁴ Aksoho iwabyze atakta kaharakokeze tu kuanare kuanare nikara. Tsakurẽta iwatahi kuanare kuanare nikara.

⁴⁵ Ikia bijoikpe iknykta Deus tsumuẽhĩtsa harere humo hyỹ tsiky. Iwatatsahi akurẽtatsa. Iwaze Deus harere humo aspirikporẽtatsa akurẽtatsa tsimy – Isabeu niy.

Maria Deus bo nisakibazikik.

⁴⁶ Niytatsahi Maria Deus bo nipamykysoko:

– Ikza tihi: O Deus ikia zuba tsamysapyrẽta.

Ikia humo kakurẽtatsa.

⁴⁷ Deus bo mykara zeka ipokzi kakurẽtatsa.

⁴⁸ Iwatahi kabo mytsaty niy. Nanabyi humo kanamybyitatsa tu sa atsumuẽhĩtsata mozik.

Abaka myzubaha kape maha Deus atatsa humo tsimypokzitsiarẽta mykaranaha.

Wabyty! Myzubaha eze mopamykysokonaha “Deus ziktsumuẽhĩkĩ” mykaranaha niy.

Abaka aparakbaha sitsekokatsa niwatihi kasoho

“Deus atatsa humo zisapywyky” mykaranaha.

⁴⁹ Deus kino atatsa tsyhyryze tsihokdahařena zik niy.

Atahi tsizikwyrẽta. Atahi mekywata.

⁵⁰ Deus aparakbaha humo tsimypokzitsiarẽta. Iwatsahi sispirikporẽtsa moziknaha.

Abaka aparakbaha,

sitsekokatsa kino niwatihi

Deus sihumo tsimypokzitsiarẽta.

⁵¹ Deus ziwatahaka tsihyrinymyrẽta hiba. Sizubarẽtsa mytsaty maha zeka “uta zuba mypehatsa” sisopykyktsa asahi mysipykik.

Iwaze kytsa siharere tsihikbyitsa moziknaha.

⁵² Ispehatsa sihudikhudikwy ezektsa niwatihi mysipykik. Myhyrizikwyby-itsa hi

myhyrizikwanitsa moziknaha.

⁵³ Siarapanikitsa disahawy ka tsizubarēna mopykyryknaha.

Sinamynikitsakta mysinamybyri. Batu amy tohi mykaranaha.

⁵⁴ Iwa Deus Sudeutsa mysitsumuēhīkī.

Tatyryktsa mysitsumuēhīkī.

⁵⁵ Tubabatu Deus harere mydiritsa ispirikze niy.

Abaka wasani niy. Sibō nitsasoko: “Ikiahatsa humo kamypokzitsiarēta” niy.

Mydiritsa bo Abarão tsekokatsa bo iwa.

Deus taharere humo ba zikspiriktsokda

Iwa Maria Deus soho humo nikara.

⁵⁶ Iwaze byzoje harakykbyihi zitsuze Maria Isabeu tuk niapykyk. Iwaze tawahoro bo ziksizo.

Suão Batista purukwy.

⁵⁷ Iwaze Isabeu bykyhy nipuruk.

⁵⁸ Itukytsa, iututsa pauktsitsa kino niwatihi sakurētsa niapykyryknaha. Isabeu tse humo sakurētsa. Ziwabynahaze Deus atatsa humo tsimypokzit-siarēta, iwatsahi sakurētsa niyziknaha.

⁵⁹ Niahatsahi izumukunaha. Iwatsahi ibykyhy tsibik pipiakzyknaha. Kyze ibykyhy tsibik mytsyhyrytsa asiba nisipykze kytsa izumunaha. Zinaro tsihikiknaha Sakarias ty izo naro ty zinaro tsihikiknaha.

⁶⁰ Ije ispe niy:

– Batu zik. Sakarias humo batu inaro tsihik. Inaro babaka Suão – niy.

⁶¹ Iwaze ipe niaha:

– Ikiatsakta zik anahumo ka batu atukytsa naro kok – nikaranaha.

⁶² Niahatsahi izo pe niaha.

– Askirywy sa tsipinaro – niaha. Sakarias niharerebyitahi iwaze kytsa ibo tahatsyhyrypetsa ty ziwatawykynaha zuba.

⁶³ Niytahi Sakarias kino:

– Kabo iwatahawy ty nynytnaha – niy. Hyỹ niaha. Iwaze ziwataha – Inaro ka Suão. – Aparakbaha paikpa iktsa nikaranaha sipybyrētsa nikaranaha.

⁶⁴ Iwazebabatu Sakarias inataharerezo. Tsakurēta. Iwaze nipamykysokozo. Deus pe niy:

– O Deus ikiahi tsamysapyrēta – niy. Iwa Deus bo nipamykysoko.

⁶⁵ Iututsa pauktsitsa iwaha pokso hi sipybyrētsa nikaranaha. Nanabyitaba wasaniha Suão soho nitsasokonaha. Harakoso Sudeja eze tuze Suão soho ty nipamykysokonaha.

⁶⁶ Ziwabynahaze mytsaty nikaranaha:

– Hawa sa ibykyhy mozik Deus zikwy ituk mynapykyryk – nikaranaha.

Sakarias Deus soho nitsasokota niy.

⁶⁷ Iwaze niytahi nipamykysoko. Deus hyrikoso ituk ziknapykyryk. Iwatahi nipamykysoko. Atahi:

⁶⁸ – Ikiahatsa Deus bo tsimypamykysokonaha. “Ikia hi tsamysapyrēta.

Ikia zuba wasani tsimy kara. Iwaze ikia soho humo myharereziurētsa tsimaha” niy.

Kyze Isareu tsekokatsa, Sudeutsa Deus humo myspirikporētsa.

Katsakta Deus humo myharereziurētsa. Deus tyryktsa tsimoziknaha.

Ata kino tatyryktsa bo mymyoktyhyryk – niy.

⁶⁹ Deus mymyoktyhyrykta mybo myzipeha.

Mymyoktyhyrykta Dawi tsekokatsa iknykta.

Dawi mydiri Deus tsumuēhĩtsa.

⁷⁰ Tubabatu Deus simysapyrētsa bo nitsasokonaha
asahi Deus harere sohokotsa nitsasoko:

⁷¹ – Deus ispirikze iharerebaba mymyoktyhyryk. Iwatahi mysukyrytsitsa ba
zik mybanaha.

Iwaze kytsa myhumo siakryiukrētsa ba zik mybanaha.

⁷² Deus mydiri humo tsimypokzitsiukrēta.

Katsa myhumo niwatihi tsimypokzitsiarēta.

⁷³ Tubabatu Deus Abarão bo taharere baba ty niy.

Abarão taparakta mydiri niy.

⁷⁴ “Ikiahatsa pahaoktyhyrykta pipeha” niy.

Abaka taharere bo mytsaty niy.

⁷⁵ Mymyoktyhyrykta pipehahik my nikara.

Mymyoktyhyrykta pipeha iwatsahi mysapyrētsa tsimoziknaha.

Mysukyrytsitsa ba zik mybanaha.

Mysukyrytsitsa pokso batu mypyby.

Niahatsahi tyzibytuhukunahatu Deus tsipitsumuēhĩnaha.

Deus pokso batu mypyby – niy.

⁷⁶ – Ikia kaskyrywy Deus sohokotsa tsimozik.

Ikia mymyoktyhyrykta haraze tsimy.

Kiristu Deus bo mymyoktyhyryk.

⁷⁷ Iwaze mozumuze sizubarētsa ahumo mytahazozikymybanaha.

Mymyoktyhyrykta humo mokymynaha.

Iwaze hi aparakbaha bo mopamykysoko:

“Deus sisopyksapybyikitsa nikaranaha iwatsatu mysiokzohik. Deus
kino mysioktyhyryk.

Iwatsahi Deus soho humo sispirikporētsa.”

Ikia humo Deus soho aparakbaha sispirikporētsa myziknaha niy.

⁷⁸ Iwaze Deus myhumo tsimypokzitsiarēta.

Tsimysapyrēnikita my.

⁷⁹ Abaka atakta mybo bjoikpe iknykta okoro hyritywaka katsa mybo myzi-
haramweke.

Haramwe humo iktsa mahatsa watsa mypobyri katsakta mymyokty-
hyrykta humo myspirikporētsa.

Taparaka miwa ahaburuk ziknaukurunahaze ky waha.

Abaka haramwe waha niyzik.

Iwatsahi kytsa mohyrikosokdanahaze batu sipyby.

Katsa batu mykyriuk. Katsa mykurētsa – niy.

⁸⁰ Iwaze Sakarias Deus harere nitsasoko niy. Itse taypykykze Deus harere
bo hyĩ mykara. Tsipaikrēta mozik jerukbara bo niparak. Atazuba zikziu-
ruku. Aiba zuba Deus tyryktsa bo niy.

2

Sose, Maria ahatsa tahahudikhudikwy Berēhe bo niukurunaha.

¹ Sesus Kiristu purukwy. Deus zipehata mymyoktyhyrykta. Kuirini Sirija
ezektsa pehatsa. Aukusto sizubarētsa pehatsa niy. Homa ezektsa pehatsa
ityryktsa tuk niy. Aukusto tihi:

– Ikiahatsa ahazubarētsa nabo pāotaha! niy.

² Taparakta ahadiritsa hudikhudikwy bo tsiksizonahaktsa! Anaeze aty
ahanaro piwataha – niy.

³ Hyĩ niaha. Iwaze kytsa sizubarētsa ziksikinaha.

⁴ Sose Nasare ezekta. Nasare Karireja eze tu niy. Iwaze Berēhe bo zumu. Tubabatu Sose taparaktsa idiritsa Berēhe eze nipupurukuknaha. Dawi inarokota. Iwatsahi Berēhe bo zumunaha. Maria ituk zumuku.

⁵ Puētsikze zuba Sose atatsa piakse. Maria tabykyhytatsa Berēhe bo zumu. Anabo zumunahaze wahoro inahareknaha. Batu iwewehe. Pikuzatsa parik zuba asa wanu sapy zuba.

⁶ Anaeze, Berēhe eze ibykyhy nipuruk. Ibykyhywzytykta nipuruk.

⁷ Nipurukze panu ty zikwaraka. Pikuzatsa disahawy suk eze tyhoek niy. Iwaze nipurukze Sose taskyrywy zinaroko Sesus niy.

Bijoikpe iknyktsa hozipyrykzatsa perykysitsa bo nitsasokonaha.

⁸ Kyze Berēhe baze tu hozipyrykzatsa perytsitsa. Unata eze hozipyrykzatsa nisiperykynaha.

⁹ Iwaze unata bijoikpe iknykta Deus tsumuēhĩtsa sibo natakaha. Deus tsumuēhĩtsa bo nikozonaha. Sibaze okoro ziky waha niukuru. Sipybyrētsa nikaranaha. Bijoikpe iknykta:

– Ahapybyyihuktsa Deus hi izikpeha, ahabo wasaniha motsasoko. Tsipi-wabynahaze ahakurētsa tsimoziknaha.

¹⁰ Aba Berēhe eze Kiristu nipuruk.

¹¹ Ibo tynakozorenaha! Ibykyhy panu eze iakwarahata. Pikuzatsa disahawy suk eze mohoeke.

¹² Iwaze hi ikiahatsa tu tsimyzinyrenaha yhỹ tsimaha – niy.

¹³ Nitsasobaze bijoikpe iknyktsa sizubarētsa ibo atsoko inatakanaha. Deus bo sizubarētsa sakurētsa nisakibazikiknaha.

¹⁴ Asahi Deus bo:

– O ikia humo ka mykurētsa. Ikia hi tsamysapyrēta Deus wasani tsimykara. Ikia hi taparata bijoikpe ezekta. Mybarawy ezektsa niwatihi sakurētsa mykaranaha. Ikia tynasipokzitsiki iwatsahi sakurētsa moziknaha – niaha.

¹⁵ Kyze bijoikpe iknyktsa ziksizonahaze hozipyrykzatsa perytsitsa kino:

– Aidyktsa! Berēhe bo tsimynakozorenaha! Deus katsa mybo nitsaso. Deus tatsumuēhĩtsa mybo zipehaka. Tsimynakozorenaha! – nikaranaha. Yhỹ niaha.

¹⁶ Iwaze atsoko anabo niukurunaha. Maria Sose ibykyhy iwatsa bo zumunaha.

¹⁷ Ibykyhy pikuzatsa disahawy suk eze nihoeke. Hozipyrykzatsa perytsitsa Berēhe ezektsa bo nitsasokonaha.

¹⁸ Berēhe ezektsa bo wasania ty nipamykysokonaha. Sakurētsa nikaranaha.

¹⁹ Nipybynaha. Maria kino siharere ziwabytatsa tu mytsatyziu nikara. Bykyze hozipyrykzatsa perytsitsa ziksizonaha. Sakurētsa nikaranaha.

²⁰ Deus bo nisakibazikiknaha. Asa kino:

– O ikia humo ka mykurētsa. Bijoikpe iknytsa humo mykurētsa. Jaba Berēhe eze Kiristu Deus zipehata nipuruk. Nitsasokoze wasani niy – nikaranaha.

Bijoikpe iknykta harere ty asta hareretu nikaranaha. Iwa ziksizonaha.

Sose Sesus ty zinaro.

²¹ Kyze estuba mytsyhyrytsa asiba nipykze Sose, Maria tahatse zipiakzyknaha taparaktsa sopykwy ty nikaranaha. Sesus ty zinaronaha. Tapara tu bijoikpe iknykta Deus tsumuēhĩtsa Maria pe niy:

– Bykyze abykyhy mopurukze Sesus ty tsipinaro – niy. Iwa bijoikpe iknykta ipe niy. Iwatsahi Sesus ty zinaronaha.

Izo ije ahatsa Sesus Deus wahoro zubata bo ziokyhyryknaha.

22-23 Niahatsahi izotsa Serusarēhe bo Sesus zioқтыhyryknaha. Tubabatu Moises Deus harere ziwatahaka Sudeutsa bo:

– Kyze estuba byzoje zirahaze makuskyry nipuruk, ikiahatsa ziknapamykysokota bo siraratsa ty nyny tsimaha. Ziknapamykysokota siraratsa ty Deus okze mysiba – niy. Iwaze makuskyry je wasani niyzikzo. Tabykyhy humo tsakurētatsa. Iwatsahi Sose Maria iwatsa Serusarēhe bo tahatse Deus wahoro zubata bo zibykyknaha. Iwatsahi ziknapamykysokota bo zibykyknaha. Deus bo Sesus ziwatawykynaha.

24 Isukzata amy tudutsa petoktsa ty ziknapamykysokota bo nyny niaha. Iwaze ziknapamykysokota amy tudutsa Deus okze tysiba. Tubabatu Moises Deus harere Sudeutsa bo nitsasoko:

– Wytık tapara makuskyry pepurukze. Deus makuskyry soho motsaso: “Abykyhywzytykta, atakta metutu kabo nyny tsimy. Katsewata. Kabo metutu abykyhywzytykta humo” mykara.

Iwatsahi Sose Maria ahatsa Sesus ziknapamykysokota bo zibykyknaha. Siraratsa ziknapamykysokota bo nyny niaha. Deus harere humo amy tudutsa petoktsa ty nyny niaha. Siraratsa ty nyny niahaze iwatsahi aparakbaha sihyrinymyrētsa, Maria wasani mozikzo – niaha. Moises Deus harere Sudeutsa bo nitsasoko:

– Ziknapamykysokota bo siraratsa ty nyny tsimaha. Ziknapamykysokota Deus okze siraratsa mysiba. Taparakta bykyhy nipuruk – niy.

Iwa Moises Deus harere ziwatahaka.

Simeō soho.

25 Aba ikia bo Simeō soho piwatahaka. Kyze maku Simeō inarokota. Atahi Serusarēhe eze ziknapykyk. Tubabatu Deus harere humo nispirikpota. Deus harere bo hy̆ ziknakara. Atahi mymyoktyhyrykta piperyky. Mymyoktyhyrykta Sudeutsa bo myze sakurētsa moziknaha. Deus hyrikoso ituk tu h̆.

26 Tapara Deus hyrikoso Simeō pe niy.

– Deus myzipehata tsipiny. Iwaze Deus myzipehata tsipinyze tu tsimyhyrikosokda – niy.

27 Iwaze izotsa ibykyhy tsibik tuk Deus wahoro zubata bo inapupunahaze. Deus hyrikoso Simeō pe:

– O ikia Deus wahoro zubata bokta – niy. Ata kino Deus wahoro zubata bo nitsuk. Izotsa Deus wahoro zubata bo Sesus zibykyknaha iwatsahi Deus harere bo hy̆ niaha.

28 Niytahi Simeō Sesus ziny. Iwatahi zebykyk. Deus soho humo tsiharerez-iurēta. Nitsasoko:

29 – Abaka kakurēta. O Deus aharere humo wasani my.

Hawa atsumuēh̆tsa pe tsiky atsatu tsikykara.

Uta abaka kakurēta tu mohyrikosokda.

30 Abaka zipehata mymyoktyhyrykta iny – niy. Simeō ibykykhy soho nitsasohozo:

31 – Atahi kytsa okzetu zipehata zumu.

32 Atahi haramwe hyrity wata.

Hawa haramwe humo kytsa ske buruk mokozonehaha.

Katsa bipyritsa ahatsa niwatihi Deus ske bo mymyoktyhyrykta humo aparakbaha sihyrinymyrētsa.

Bipyritsa bo izumu.

Deus aparakbaha humo tsimypokzitsiarēta iwatahi mybo izumu.

Iwatahi zipehata bipyritsa bo niwatihi izumu.

Atahi haramwe hyrity wata ahatyryktsa Sudeutsa bo zumu.

Haramwe wata Sudeutsa bo

iwatsahi kytsa okze ka siharereziurētsa moziknaha – niy.

³³ Iypyktsa ije niwatihi paikpa mytsaty nikaranaha. Hawa ha ty Simeõ ibykyhy soho nitsasoko ana humo hi nipybybaiknaha.

³⁴ Niytahi Simeõ Sesus je pe niy:

– Wabyty! Deus abykyhy ziny. Sudeutsa sizubarẽtsa ihumo Deus harere bo batu yhỹ zikaha. Utsa Sudeutsa ihumo Deus harere bo hỹ zikaha. Sizubarẽtsa ihumo ba siakparawy. Deus atakta abykyhy ziwatawy iwatsahi hawa ha ty kytsa mytsaty mykaranaha ana humo hi tsihyrinymyrẽta. Iwaze kytsa Deus humo sispihkrẽtsa ihumo jokpitsĩhĩbara.

³⁵ Iki niwatihi ba asukatsihik. Abykyhy taypykze kytsa humo sinini mykara. Iki kino niwatihi sinini tsimykara. Sinini ty sokorotsapu wata ty paskoik naha sinini tsimy – niy.

Iwa Simeõ Maria bo nitsasoko.

Ana inarokotatsa soho.

³⁶ Kyze Deus wahoro eze Deus sohokotsata niy. Atatsa Deus wahoro eze ziknapykyryk. Ana inarokotatsa. Panuweu ste. Ase astsabarẽtsa. Nitsaikbatatsa oitẽta kwatero anos.

³⁷ Tubabatu ibarikta nihyrikosokda. Ata tuk mytsyhyry wa ziytyk tseheze iwaze maku nihyrikosokda iwaze atatsa hi nipytsabyri iwatatsahi Deus wahoro eze ziknapykyryk. Iwatatsahi Deus bo ziknapamykysoko. Atatsa tu ziknatadukutu Deus bo ziknasakibaziki.

³⁸ Iwaze baba tu izotsa Deus wahoro zubata bo inapupunahaze atatsa kino niwatihi izumu. Iwaze Deus bo nipamykysoko:

– O kazo mykurẽtsa, iki humo kakurẽtatsa. Iki hi myhumo tsimypokzit-siarẽta – niy.

Atatsa Sudeutsa sizubarẽtsa bo nitsasoko. Deus zipehata ziperykynaha. Asahi Deus tyryktsa moziknaha. Asahi Deus zipehata ibo mysioktyhyryk.

Nasare bo ziksizonaha.

³⁹ Deus wahoro eze zipykbanahaze tahahudikhudikwy bo ziksizonaha. Sose, Maria, Sesus ahatsa, Karireja bo ziksizonaha. Nasare bo zumunaha.

⁴⁰ Iwaze Sesus tsiupyhyritorykrẽta taypykyk. Tsihyrinymyrẽta. Deus tatse humo tsakurẽta nikara. Ihumo iakparawy. Iharereziuwu.

Sesus Deus wahoro zubata eze nitare.

⁴¹ Pororo ziknakara Sose Maria iwa ahatsa Sudeutsa myikaha bo nikozore-naha. Serusarẽhe bo niukurunaha. Simyikaha bo nikozore kozorekenaha. Deus taparaktsa nisitsumuẽhĩkĩ mytsaty ziknakaranaha.

⁴² Sesus niskyrybyrize Serusarẽhe bo zioқтыhyryknaha.

⁴³ Kyze simyikaha nepykze ziksizonaha. Sesus Serusarẽhe eze nitare. Iypyktsa ije ahatsa tahatse ty batu ityny.

⁴⁴ – O kytsa tuk ja naukuru – niaha. Batu meky watu. Bykyze zunubaze, tahatykytsa bo situktsa kino niwatihi ispe niaha:

– O mytse ja Sesus sa ikiahatsa tuk – niaha. Situkytsa kino:

– O batu. Katsa batu ityny – niaha.

⁴⁵ Iwaze itynybyitsa hi Serusarẽhe bo ziksizonaha. Tahatse ziberikinaha.

⁴⁶ Kyze harakykbyihi zurunahaze. Deus wahoro zubata eze ibo zumunaha. Taparaktsa baze nidyhyky. Sihyrinymyrẽnikitsa harere ziwabyky. Situk zinymyryky.

⁴⁷ Taparaktsa tihi:

– O atakta tsihyrinymyrẽta – nikaranaha. Ije iypyktsa ahatsa nipybynaha.

⁴⁸ Ije tihi:

– O katse hawa sa tsimykara. Iki pokzi batu myku. Botua tsikzaberikinaha – niy.

⁴⁹ Sesus tihi:

– Amo sa tsimozikberikinaha Utakta kazo wahoro eze iktare. Kazo zikpehata, nawa kasopyk – my.

⁵⁰ Ipyktsa ije:

– Amy skaraba – niaha. Batu sihyrinymyry.

⁵¹ Iwaze Sesus situk Nasare bo ziksizonaha. Zikzibytuhukutu hyĩ ispe nikara. Iwatatsahi ije tatse soho humo mytsatyziu nikara.

⁵² Iwaze Sesus zinymyrybaba. Itaypykze tsipaikrēta niyzik. Deus ihumo tsakurēta. Aparakbaha niwatihi ihumo siakparawy.

3

Suão Batista Deus wasania ty ziknatsasoko.

¹ Iwaze Deus Suão bo nitsasokoze. Tiberias Sesa Homa pehatsa niapykyryk, Põtsio Piratus Sudeja ezektsa pehatsa, Erodes Karireja ezektsa pehatsa, Piripi Itureja ezektsa pehatsa, Piripi Tarakoita ezektsa pehatsa niwatihi. Atahi Erodes tsy. Iwaze Deus Suão bo nitsaso. Anas Kajapas taparaktsa Deus wahoro eze ziknapamykysokonahatsitsa. Risanian Abirene ezektsa pehatsa niy. Iwa.

²⁻³ Suão Sakarias tse jerukbara eze Deus ipe niy:

– Sizubarētsa pihik ty tysihasarusu – niy. Iwatsahi sispirikporētsa moziknaha. Ikiahi:

– O kytsa ahasopyksapybyri tsimoewybaiknahaktsa Deus harere bo hyĩ tsimahaktsa – tsimykara. Pihik ty pahahasarusu zeka ahaspirikporētsa tsimoziknaha. Ikia tsipahaharusuze kytsa mekywatsatu tsimoziknaha iwatawy. Niytahi Deus ahasopyksapybyritsa ky pahaokzohik.

Iwatahi Suão buburu sak bo niukuru. Buburu Sorodão inarokota. Nanabyitaba Deus wasania ty ziknapamykysoko.

⁴ Taparaka Deus Isaijas bo nitsasoko. Isaijas Deus sohotsa. Deus harere Isaijas ziwatahaka:

– “Maku jerukbara buruk hua mykara. Opykani mopamykysoko:

‘Pykyhytuty Deus ske bo tsimy’.

Tsipiskezoze buruhuwa tsipiske.

⁵ Wytyk hoke taharatõtõ. Hara buruk piskezozikiknaha.

Iske myiha humo tsihokdahařena buruhuwa tsizoziknaha.

Batu iske sapy iwaze tiskeziurēta mozik.

Hawa kytsa iske pizozikiknaha nawaha Suão Deus zipehata haraze aparakbaha mysispirikpo

iwatsahi kytsa Deus zipehata piperykynaha.

⁶ Aparakbaha Deus mykaraze iktsa maha. Deus bo ityryktsa mysioktyhyryk” niy.

Nawa myske Deus zipehata mozumuku.

⁷ Kyze myzubaha Suão bo zumukunaha. Aparakbaha mysihararusukuze. Ispe nikara:

– Ikiahatsaktsa pyryhyktsa myrawy watsa – niy. Pyryhyktsa pokso tytuturukiknaha. Ikiahatsa niwatihi. Aty sa ahape:

– O ahasopyksapybyitsa tu tsikykaranaha iwatsahi Deus iakyriwy pokso tsimytuturukiknahaktsa – niy.

⁸ Aba ikiahatsa Deus harere bo hyĩ tahaktsa. Kytsa bo batu ahamyi tsihikik tsihiwatawynaha. Aparakbaha tsiwatawynahaktsa. Ikiahatsa mytsaty ahabyitsa tsimykaranaha:

– O Abarão taparakta mydiri. Iwatahi Deus myhumo bazik takyri – tsimaha. Batu ba. Ikiahatsa tihi:

– Katsa zuba myhyrizikwani – tsimaha. – Ikiahatsa batu ahahyrinymyry. Deus haraharetsa tuk Abarão tsekokatsa mysisukni ziky.

⁹ Ikiahatsa wiharatatsa, aba botu wywyk zizowy. Iharatatsa buruk mysikakarenahaze. Hwi iharasapybyita tu izo bo pioktsokik – nikara. Hawa kytsa hwi isapybyitakta piwenaha nawa aty imysapybyikitsa tu mykara sinini ykarawy bo pipehaka.

¹⁰ Iwatsahi parakbaha ipe niaha:

– Hawa skaraba tsimaha – nikaranaha.

¹¹ Iwaze ispe niy:

– Aty petok suk zeka estuba nynyty isukbyita bo. Aty idisahawykyta zeka disahawybyita bo nynyty – nikara.

¹² Asaktsa ispehatsa tsyhyryze okyryrsarobyktsitsa izumunahaze – O tymyharasusukta! – Suão pe nikaranaha:

– O myhyrinymyrykytsa! Hawa skaraba tsimaha – niaha.

¹³ Suão tihi:

– Okyryrsaro ahapehakatsa ahape maha atsatu tsipiaksenaha. Ana ty zuba wabehyryk tsimaha! niy. Batu amy tohi tsimaha – nikara.

¹⁴ Sodadutsa niwatihi ipe niaha:

– Hawa skaraba katsa kino tsimaha – niaha. Suão tihi:

– Batu kytsa okyryrsaro ty ka okok okok byitaha ikiahatsaktsa ahapaikrëtsa humo batu tsiaksenaha. Ahakyriukrëtsaktsa paik paik byitaha. Sipybyrëtsa ikiahatsa pokso batu okyryrsaro zebyknaha. Batu okyryrsaro humo mybarapetu tsimaha. Ahapehatsa okyryrsaro ty ahabo nyny my. Anahumo hi ahakurëtsa tynakaranaha – nikara.

¹⁵ Niytahi aparakbaha batu sihyrinymyry. Suão harere humo. Sihyrinymyrybyitsa tu nikaranaha:

– Aty skaraba Suão, Suão Deus zipehata ja. Tozeka ja Kiristu – nikaranaha.

¹⁶ Suão aparakbaha pe nikara:

– Utakta pihik ty zuba pahaharasusuku. Usta mozumuta. Atahi tsimysapyrëta myhyrizikwani. Utakta batu. Ipyrysuktsa mysibokik zeka kasikpybyrëta. Utakta pihik ty zuba aparakbaha mysiharasusuku. Atakta maku hi Kiristu Deus zipehata Deus hyrikoso ahabo mynasik myzipeha. Deus hyrikoso rika wata ahabo mynasik. Hawa miwa rika humo amypubryri nawa Deus hyrikoso humo tsimysapyrëna ty zuba pahahyrinymyry myspirikporëtsa tsimoziknaha. Deus hyrikoso mynasikze ikiahatsa tuk mynapykyryk.

¹⁷ Kiristu mozumuze maku dua ty wabe mozikta wata. Mektsaktsa is-pawaha pipapara. Siriktsa mysizozekeze ispa zipaparakanaha. Anawahi Kiristu aparakbaha metutu my. Izo bo mysisapywy. Asaktsa simysapybyitsaktsa sinini ykarawy bo mysipehahik. Anaeze izo ba zikbe naha byikia bo. Utsaktsa simysapyrëtsaktsa ituk tahawahi mynapykyryknaha. Iwa aparakbaha metutu mykara – Suão niy.

¹⁸ Kyze Suão niukuru, wasania ty aparakbaha bo nipamykysoko. Niukuruze wasania ty kytsa bo nipamykysoko.

¹⁹ Iwaze Erodes sipehakatsa Karireja eze zikniapykyryk. Suão tsipa humo tyzioktyhyk. Sakyriukrënikitsa hurukwy bo motsahuruk tsihikik. Nezeba Suão Erodes zipehaka. Erodias soho nitsasoko: Suão ipe niy:

– Ikia atsy oke tsioktyhyryk batu iktsa zuba ziky. Ikia batu amysapy. Usa amysapybara ty tsiky kara – niy.

²⁰ Erodes zisapybyikik nikara. Aba usta imysapybara ty niy. Suão sakyriukrënikitsa hurukwy bo zipehahik niy.

Sesus harasuwy.

²¹ Kyze Suão aparakbaha nisiharasusubaze Sesus ibo izumu ipe niy:
– Tsikarasusukta – niy.

Iwaze Suão Sesus hi ziharasusu. Sesus Deus bo nipamykysokoze bijoikpe sakpare niy.

²² Deus hyrikoso inasik. Deus hyrikoso amyudu hyrity wata inasik. Amyudu ipapyry bete inazo. Iaksoho bijoikpe iknyky ziwaby:

– Ikiakta katse baba tahi. Iki humo kamypokzitsiarêta. Iki humo kakurêta – niy. Iwa Deus Sesus pe niy.

Taparaktsa Sesus diritsa.

²³ Sesus kino taypykze tirîta anos Deus soho ty sizubarêtsa nisihyrinymyryky. Iwaze Deus hyriziktsokzawy humo ziakbataze. Aparakbaha nipamykysokonaha:

²⁴ – O atakta Sose tse ja – nikaranaha. Batu ba Deus tse babata zuba. Sose ta Eri tse niy. Eri ta Matate tse. Matate ta Rewi tse. Rewi ta Meki tse. Meki ta Sanai tse.

Sanai ta Sose tse. Sose ta Matatias tse.

²⁵ Matatias ta Amos tse. Amos ta Naũ tse. Naũ ta Esri tse.

Esri ta Nakai tse.

²⁶ Nakai ta Marate tse. Marate ta Matatias tse. Matatias ta Semei tse. Semei ta Sose tse.

Sose ta Soda tse.

²⁷ Soda ta Soana tse. Soana ta Resa tse. Resa ta Sorababeu tse. Sorababeu ta Sarateu tse.

Sarateu ta Neri tse.

²⁸ Neri ta Mereki tse. Mereki ta Adi tse. Adi ta Kosã tse. Kosã ta Emadã tse.

Emadã ta Er tse.

²⁹ Er ta Sosue tse. Sosue ta Eriesa tse. Eriesa ta Sorĩ tse. Sorĩ ta Matate tse.

Matate ta Rewi tse.

³⁰ Rewi ta Simeõ tse. Simeõ ta Suda tse. Suda ta Sose tse. Sose ta Sona tse.

Sona ta Eriakĩ tse.

³¹ Eriakĩ ta Merija tse. Merija ta Mena tse. Mena ta Matata tse. Matata ta Natã tse.

Natã ta Dawi tse.

³² Dawi ta Sese tse. Sese ta Obede tse. Obede ta Boas tse. Boas ta Saro tse.

Saro ta Nasõ tse.

³³ Nasõ ta Aminadabe tse. Aminadabe ta Ami tse. Ami ta Esrõ tse. Esrõ ta Peres tse.

Peres ta Suda tse.

³⁴ Suda ta Sako tse. Sako ta Isake tse. Isake ta Abarão tse. Abarão ta Tera tse.

Tera ta Nako tse. Nako ta Seruke tse.

³⁵ Seruke ta Rakau tse. Rakau ta Pareke tse. Pareke ta Ebe tse.

Ebe ta Sara tse.

³⁶ Sara ta Kaina tse. Kaina ta Arapakasade tse. Arapakasade ta Sê tse. Sê ta Noe tse.

Noe ta Rameke tse.

³⁷ Rameke ta Metuserẽ tse. Metuserẽ ta Enoke tse.

³⁸ Enoke ta Sarete tse. Sarete ta Marereu tse.

Marereu ta Kaina tse. Kaina ta Enos tse. Enos ta Ses tse. Ses ta Adão tse. Adão ta Deus tse. Iwa niaha.

4

Satanas Sesus ziazobyriki naha soho.

¹ Sesus tuk Deus hyrikoso ziknapykyryk iwatatu buburu Sorodão inarokota bo ziksizo. Ziksizoze Deus hyrikoso jerukbara bo zioptyhyryk. Anaenze hyrikoso sapybara pehatsa Sesus bo zumuku. Diabo inarokota niy. Sesus bo izumuze atahi Sesus Deus harere bo ka yhỹ yhỹ byitykta ana nizihikik.

² Sesus iharere humo batu yh̄y niy. Iwa estuba byzoje zirahaze Sesus hauk ahabyitatu niapykyryk. Byzoje estuba zirahaze irapa izumu. Hauk ahabyitatu zikzurukutahi irapa izumu.

³ Iwaze Diabo ipe niy:

– Ikiā Deus tse tihi zeka ta harahare pe. “Atsikara tuziktykta” – niy.

⁴ Batu Sesus niy. Tubabatu taparaktsa Deus harere papeu humo ziwatahakanaha:

– Kytsa batu mydisahawy humo zuba mozurukunaha. Sizubarētsa disahawy hauk maha zeka sispitu zuba mykaranaha. Sizubarētsa Deus harere bo hȳy maha zeka sakurētsa moziknaha. Sakurētsa – niaha. Iwa taparaktsa ziwatahakanaha.

⁵ Iwaze Diabo Sesus hara joboni tabo zioqtyhyryk.

⁶ Ipe niyzo:

– Nanabyi bo iktsa tykta – niy. Atsoko mybarawy tsizubarēna nizokparaka. Aidy sityryktsa tuze niwatihi natakaha.

⁷ Diabo kino:

– Uta anaty abo nynybaik my. Ikiā hi sipehakatsa tsimozik. Sityryktsa ikiā sopyk abazubata maha. Ikiā asoho mynatsasokonaha “Atakta tsimysapyrēta” mynakanaha. Aba uta kapitāo mybarawy ezekta myzubaha katyryktsa. Aty kakparawy zeka ibo mybarawy ty nyny my. Ikiā kaokeryk aekaratsa humo puruk puruk zuba tsimy zeka kabo tsimytsaso zeka, “Ikiā tsamysapyrēta” iwa tsimy zeka mybarawy ty abo nyny my. Anamy mozik – niy. Iwa Diabo Sesus pe nikara.

⁸ Sesus:

Batu niy. Tubabatu taparaktsa papeu iwatahaha humo. Deus harere ziwatahakanaha tihi:

– Deus bo zuba tynapamykysokonaha “Ikiā tsamysapyrēta”. Ata kino zipehakaze ikiahatsa iharere humo zuba hȳy tsimykanaha – ziwatahakanaha. Iwa de.

⁹ Iwaze Diabo Sesus bo izumuzo. Diabo Serusarēhe bo Sesus zioqtyhyryk. Anaeze Deus wahoro zubata hara bete ziriktohohikare. Joboniha bo zioqtyhyryk. Niytahi ipe niy:

– Ikiā Deus tse tihi zeka nabo wytyk bo tukutyny. Tyk bo tynapurukta! Taparaktsa wataha:

¹⁰ “Bijoikpe iknyktsitsa Deus tsumuēh̄itsitsa ikiā bo mynasipeha. Paperykynaha. Ikiā humo simypokzitsiukrētsa” niaha. Ziwatahakanahazo.

¹¹ “Haraharetsa bete tsimynaraha zeka bijoikpe iknyktsa aty paik maha. Iwatahi ba zikahyrikywy” niaha – niy.

¹² Sesus:

Batu niy. – Tubabatu taparaktsa Deus harere ziwatahakanaha. “Deus ta ba ziakszobyrinaha”. Hawa ha ty ikiā tsimyzihikik Deus bo batu tsizipeha. Iwa taparaktsa ziwatahakanaha – niy.

¹³ Iwaze Diabo Sesus bo imysapybyikia ty zipehaka. Sesus iharere humo batu yh̄y niy. Diabo nipamykysobaze zerekekspyk.

Sesus tahyriktsokzawy humo ziakbata Karireja eze.

¹⁴ Sesus Karireja bo ziksizo. Deus hyrikoso ituk ziknapykyk. Myzubaha paikpa isoho ziknatsasokonaha. Isohowy ziwabybanaha.

¹⁵ Sesus Deus wahoro eze ziakbataze nisihyrinomyryky. Myzubaha iharere siakparawy.

Sesus Nasare eze niapykyrykspyk.

¹⁶ Kyze Sesus Nasare bo ziksizo. Anaeze itaypyk. Iwaze mybyrykywy eze Sesus Deus wahoro bo pororo ziknakara. Deus wahoro bo nitsuk.

¹⁷ Niytahi ziknapamykysokota perytsa Deus harere ty papeu ty Sesus bo nyny niy. Iwaze kyik niy. Deus harere iwatahaha nitsasoko. Opykani haty nikara, sizubarētsa ziwabykynaha. Tubabatu Deus harere Isaijas ziwatahaka. Isaijas Deus sohokotsa Sesus papeu ty zoksapare niy. Niytahi papeu zikaha. Iwatahaha:

¹⁸ – Deus hyrikoso katuk mynapykyryk. Iwatahi uta sinamybyitsa bo zikpeha.

Sinamybyitsa bo wasaniha motsasoko.

Sihurukuhutsa bo zikpeha. Tysisapare.

Sihyryzikubyitsa bo zikpeha. Tysizororowyta! Iwaze mokozonehaha.

Sipokzitsiukbyikitsa bo zikpeha. Ahapybywysitsa bo aidy pāotaha!

¹⁹ Uta sizubarētsa bo zikpeha. Ispe my “Deus tsimysapyrēta.

Myzubaha mysisapywyky. Sitsyhyryze Deus bo maha”.

Iwa papeu humo ziwatahakanaha. Abaka iharere wasani mykara – niy.

²⁰ Sesus iwatahaha opykani haty nikara. Papeu zihokbohik, iperykytsa bo nynyrezo niy. Iwaze dyhyzo niy. Kytsa Deus wahoro eze nidyhydyhykynahatsa nikozotoktonaha.

²¹ Iwaze ispe niy:

– Isaijas Deus harere ziwatahaka. Jabasykyri tsiwabykynaha. Abaka iwahi mykara – niy.

²² Sizubarētsa Deus wahoro eze ziwabykynahaze, Sesus humo siharereziurētsa. Iharere siakparawy. Ziwabykynahaze ihumo sipybyrētsa. Iwatsahi asa zuba nipamykysokonaha:

²³ – Aty skaraba Sose tse ja – nikaranaha. Sesus ispe niy:

– Tozeka ja ikiahatsa hi aharere tsimytsasokonaha “O mozororowykytsa ikia arahwiwy tsiku!” Amy ty ikia tsiky kara botu tsiwabynaha hỹ. Kaparanaũ eze tuze ikia soho botu tsiwabynaha hỹ. Aba atsatu ahudikhudikwy eze tu tsimy. Ikia ahudikhudikwy eze niwatihikta kabo tsimy – nikara.

²⁴ Uta ikiahatsa pe:

– Hawa motsasoko wasani mykara. Deus sohokotsa tahahudikhudikwy eze tu zeka batu wasani sisopyk. Wasani habyitsa tu kytsa batu siakparawy – niy. Wasani mykarazo.

²⁵ – Tubabatu Isareu eze hyritsikbyrize. Hyritsik baratu harakykbyi niytyk tseheze. Sirapa izumu. Iwaze Deus Erias haramukuka bo zipeha.

²⁶ Atatsa Sarepata eze niapykyryk. Sidō eze niapykyryk. Atatsa Sudeubyitatsa. Bipyri. Erias Deus sohokotsa atatsa bo zipeha. Haramukukaka sizubarēza Isareu eze. Deus Erias zipeha haramukuka bipyri bo – Sesus nikara.

²⁷ – Tubabatu Eriseu niwatihi Deus sohokotsa Isareu eze tu. Nama takōrōrōtsa ty nibibibakata. Sizubarētsa Isareu eze nibibibakanahatsitsa. Eriseu batu isty zororowy. Nama zuba zizororowy. Nama bipyri zuba – Sesus nikara.

²⁸ Ana ziwabykynahaze kytsa Deus wahoro eze tahasakanikinaha. Tahakyrikinaha.

²⁹ Inakyikyikbaiknaha, Sesus itsipa humo ziokyhyryknaha. Zikyrikinaha tahahudikhudikwy ekze ziokyhyryknaha. Tahahudikhudikwy hara bete nikaranaha. Hara joboni tabo ziokyhyryknaha. Iharatsupetowy bo tapetohikta nikaranaha.

³⁰ Batu zikaha. Sesus sitazahara buruk niukuru.

Maku ihyrikoso sapybara ibo pororo ziknakarata.

³¹ Sesus Kaparanaũ bo niukuru. Kaparanaũ Karireja eze ky. Anaeze Sudeutsa zinymyrykynahatsa wahoro bo nitsuk. Anaeze kytsa nisispirikpoko.

³² Mybyrykywy eze Deus wahoro eze nisispirikpoko. Paikpa iktsa nikaranaha:

– O wasani nikara. Tsihyrinymyrëta babata – nikaranaha. Sesus humo sispirikporëtsa.

³³ Anaeze estuba maku ata bo hi hyrikoso sapybara pororo ziknakaranaha. Sesus bo iktsa niyze ibo huahua niy.

³⁴ Nipukaraka:

– Hawa sa myty tsimy Sesus Nasare ezekta. Amy bo sa tsikzumu. Tsimymyiksiwyhik tsihikik sa. Ikia soho humo kahyrynymyrëta. Ikia Deus zapehata – niy.

³⁵ Sesus hyrikoso sapybara zipeha:

– Aksobyity! Nabo pãoty – niy. Maku wytyk bo inaraha. Hyrikoso sapybara humo kytsa okze tu inaraha. Batu nabaze taty hyrikywy ahabyita. Sesus harere humo ziponaha.

³⁶ Iwatsahi kytsa sizubarëtsa ibaze tu nikozotoktokozonaha:

– O amy skaraba Sesus hyrikoso sapybara pe: “Nabo pãotaha” myze hyÿ sisopyk – niaha.

³⁷ Iwaze nanabyitaba Sesus soho ziwabykynaha.

Sesus sizubarëtsa nisizororowyky.

³⁸ Sesus kyikyky niy. Deus wahoro ekze izoik. Iwaze Simaõ wahoro bo nitsuk. Anaeze Simaõ wapyry niapykyryk. Atatsa ityrykani ihumuëzumu. Wahoro ezektsa Sesus bo nitsasokonaha.

³⁹ Niytahi Sesus iwanu baze rikto niy. Ityryk ykzo pe niy. Iwaze ityrykani ihumuëzumu iwatasta tu mahani. Iwaze atsoko kyik niy, kytsa nisidisa-hawyky.

⁴⁰ Iwaze zunabazoze sizubarëtsa ituktsa simyitsapyritsa Sesus bo nasioktykynaha. Nanabyi nazukmuwykynahatsa Sesus bo nasioktykynaha. Iwaze simyitsapyritsa tatsyhyrypetsa ty sihumo paik nikaranahaze nisizororowybaik.

⁴¹ Hyrikoso sapybara kino niwatihi nisiksiwyhik. Asa kino kytsa ekze nisiksiwyhikze huahua niaha:

– Ikiakta Deus tse hi. Deus pehaha hi – niaha. Iwatahi Sesus hyrikoso sapybara nisibetsakik:

– Ahakso byitaha! – niy. Sihyrynymyrytsa Sesus hi Deus tse babata. Sesus Deus pehaha sihyrynymyrëtsa iwatahi anatyhi – batu tyso – niy. Iwaze Sesus harere humo niaksohobyrynaha.

Sesus wasaniha nitsasoko.

⁴² Iwaze inakyokze Sesus nio. Atazuba jerukbara bo niukuru. Kytsa sizubarëtsa Sesus ziberikinaha. Zihobyknahaze ipe niaha:

– Amo sa tsipiksikiri, mytuk tutarekta – niaha.

⁴³ Sesus ispe niy:

– Batu zik. Aba utakta ustsahudikhudikwy ezektsa bo Deus harere humo mysispirikpo. Iwatahi ikzumu – niy. Deus soho ty mysispirikpo. Deus tyryktsa moziknaha.

⁴⁴ Sudeutsa zinymyrykynahatsa wahoro bo anabo wasania ty nipamykysoko. Nanabyitaba ziknapamykysoko.

5

Sesus tuk zinymyrykynahatsa nisiwatawy.

¹ Sesus zitsikpaparakanahatsa bo zumu. Asahi pinymyrynahatsa. Kyze Sesus pihikzotsabyri sak eze niriktohoko. Kenasere pihikzotsabyri inarokota. Myzubaha harape baze tu niriktotohokonaha. Zihyrizabaiknaha. Deus harere ziwabykynaha. Sesus Deus harere humo nisispirikpoko. Sizubarëtsa ziwabykynaha.

² Iwaze petoktsa tsarahatsa bo nikoze. Tsarahatsa nimyra eze niapykyknaha. Zitsikpaparakanahatsa botu ziponaha. Niahatsahi tahatõhõryk nit-sapikiknaha.

³ Sesus Simaõ tsaraha bo takoro. Ipe niy:
– Nabo pihik itsikpukte tohi bo zuk tykta! – niy. Yhỹ niy. Niytahi tsaraha eze dyhy niy. Sizubarëtsa tsaraha eze tu nisispirikpoko.

⁴ Iwaze nisispirikpobaze Simaõ pe niy:
– Tsaraha ty nabo maporik bo zoktykta! Anabo ahatõhõryk ty tsioktsoktsokzonahaktsa kytsa! – niy.

⁵ – O myhyrinymyrykytsa katsa dik botu tsitsikpaparakanaha. Unata batu istyzo. Iwatsatuza ikia harere zehita hyỹ my. Mytõhõryk taoktsotsokokzo – niy.

⁶ Iwaze Peduru tuktsa piknutsazokowy pihik bo ziochtsotsokzonaha. Piknutsa estuba zubabyitsa nasizokonaha. Tõhõryk piknutsa inahareknaha, piknutsa humo asiba niaktsawakba.

⁷ Tahatõhõryk asiba zitsawakbanaha tahatuktsa bo huahua niaha. Tahatuktsa usta tsaraha ezektsa bo hua nikaranaha.

– Pany. Aidytahaktsa. Nawazekta! Tymytsumuëhĩnaha – niaha. Izumunahaze tsarahatsa petoktsa piknutsa ty inasihareknaha. Piknutsa tsakyrik ty asiba nitaboknaha.

⁸ Anabo Simaõ Peduru nikozoze Sesus okeryk taekaratsa humo puruk puruk niy. Sesus humo ispirikporëta hi iwatahi taekaratsa humo puruk puruk niy. Ipe niy:

– O ikiakta ëryktohitu ziktotykta. Uta kamysapybyita mykara – niy.

⁹ Nipybybaiknaha. Piknutsa bo paikpa iktsa nikaranaha. Iwa kytsa kino niwatihi nipybybaiknaha. Piknutsa bo paikpa iktsa nikaranaha.

¹⁰ Tsiaku, itsy Suão ahatsa Sebedeu hyrytsa piknutsa estuba zubabyitsa humo nipybybaiknaha. Sesus ispe niy:

– Ahapyby byihu ja! Tapara zikzitsikpaparakanahaze piknutsa ziknasionkonaha. Abaka ikiahatsa katuk mektsa ty tysitsumuëhĩnaha. Kytsa bo Deus soho tynatsasokonaha. Ahaharere humo ka sizubarëtsa Deus harere bo hyỹ maha – niy.

¹¹ Iwaze tahatsaraha ty bybybyuhikare niaha. Tahatõhõryk zerekbaiknaha. Tahanamy kino niwatihi zerekbaiknaha. Iwaze Sesus hapik niukurunaha.

Sesus inakõrõrõbaikta zizororowy.

¹² Nakõrõrõbaikta asiba nibibibata tu zizororowy.

Kyze Sesus hudikhudikwy eze tuze maku ibo izumu. Nakõrõrõbaikta. Atahi Sesus okeryk wytyk bo inaraha. Sesus humo tspirikporëta iwatahi inaraha. Wytyk bo hok bohyk ahata inaraha iwaze ipe:

– O tsahyrinymyrynikita, tsipitsihikik zeka tsipikzorowy – niy.

¹³ Sesus ihumo paik niy. Ikia pe – Yhỹ my. Uta pazororowykta – niy. Atsoko iakõrõrõtsa nihokdanaha.

¹⁴ Iwatahi Sesus ipe niy:

– Sasabyitsa bo kaja sosobyity. Aba ikia Deus wahoro ezekta bo tsi-pawatawy! Hawa taparakta Moises papeu humo ziwatahaka atsatu ikia Deus bo nyny tsimy. Iwaze sizubarëtsa azororowy piwabynaha – niy.

¹⁵ Iwatatu Sesus maku pe – Sosobyity. – Nanabyitaba Sesus soho nitsasoko. Iwatsahi kytsa Sesus bo zumunaha ziwabykynaha. Simyitsapyritsa kino niwatihi ziknasizororowyky.

¹⁶ Sesus kino jerukbara bo atazuba niparak. Anaeze Deus bo ni-pamykysoko.

Sesus ityryk niakbabata zizororowy.

¹⁷ Kyze Sesus nisispirikpoko. Sizubarëtsa ibo zumunaha. Pariseutsa, Moises harere ty nisihyrinymyrykynahatsa iwatsa zumunaha. Karireja iknyktsa, Sudeja iknyktsa, Serusarëhe iknyktsa sizubarëtsa iwatsa izumubanaha. Deus zikwy Sesus tuk ziknapykyryk. Iwatahi simyitsapyritsa nisizororowyky.

¹⁸ Kyze kytsa ityryk niakbabata zebykyknaha. Iwanu bete tu Sesus bo zebyk tsihikiknaha. Sesus bo ityryk niakbata zihoeck tsihikiknaha. Batu dik.

¹⁹ Wahoro inahareknaha. Iwatsahi ityryk niakbabata tatuk batu paku niaha. Sizubarëtsa humo batu paku aha. Iwatsahi wahoro hara bo zidokoronaha. Iziwy zipeksykiknahaze ityryk niakbabata wanu bete inaripiknaha. Sesus okeryk kytsa tazahara bo inaripiknaha.

²⁰ Iwaze Sesus iharereziuwysitsa pe niy:

– O kytsa “Sesus myhumo tsimypokzitsiukrëta” tsimaha. Iwatahi ikiahatsa humo kakurëta – niy. Iwaze ityryk niakbabata pe niy:

– O ikia tihi “Kasapybyita Deus humo batu yhy mykara” tsimy. Iwatatu paokzohik. Amysapybyita tu tsimy kara tatu paokzohik inakokozo – niy.

²¹ Iwaze Pariseutsa, Moises harere humo zinymyrykynahatsitsa niwatihi mytsatyziu nikaranaha. Sesus harere humo tahakyrikinaha.

– Amy skaraba. Hawa sa nitsasoko. Deus zuba mymyokzohik. Ata zuba isapybara ty piokzo mykara – mytsaty nikaranaha. Kytsa iwa mytsaty nikaranaha.

²²⁻²³ Sesus tsihyrinymyrëta tu iwaze ispe niy:

– O hawa skaraba kytsa. Iwahatu pahaokzohik my zeka tsihokdaharëna. Batu zikozonaha. Uta kyiktykta my zeka ana humo kino tsihokdaharëna. Nizororoze kazikwybaba humo ahahyrinymyrëtsa. Iwatu utakta wyzik niwatihi my – niy.

²⁴ Ityryk niakbabata pe niy:

– O uta ape “kyiktykta! Awanu ty pohyrykty! Tsiksikta” – niy.

²⁵ Atsoko inatarikto. Iwaze tawanu ty kokpuhyryk niy. Tawahoro bo ziksi. Deus bo nisakibaziki:

– O ikia humo ka kakurëta. Ikia hi tsikzororowy – nikara.

²⁶ Sizubarëtsa ziny nahaze nipybybaiknaha. Deus bo nipamykysokonaha:

– O Deus ikia humo ka mykurëtsa. Niwa ha ty ka katsa batu tyny – niaha.

Rewi Sesus tuk ziny myrykyta niyzik ituk niukuru.

²⁷ Kyze Sesus niparak. Maku pehatsa tsyhyryze siokyr sarobykyktsa bo iktsa niy. Rewi inarokota. Siokyr sarobykwy sapy eze nidyhyky. Iwaze Sesus:

– Pany kapikta! – niy. Hyhy niy.

²⁸ Kyikyky niy. Tanamy ka zerekbaik. Iapik niparak.

²⁹ Niytahi Rewi tawahoro eze tamyikahaka. Kytsa siokyr sarobykyktsa sizubarëtsa, usts a kino niwatihi, ituk tahadisahanaha.

³⁰ Pariseutsa, Moises harere soho humo sihyrinymyrëtsa kino niwatihi tahakyrikinaha. Asahi zinymyrykynahatsa nisibetsakaknaha:

– Hawa skaraba – tsikykaranaha. – Ikiahatsa siokyrysarobykyktsa tuk tsipahadisahakanaha. Ikiahatsa simysapybyitsa tuk tsipahadisahakanaha – niaha.

³¹ Iwaze Sesus ispe niy:

– Simysapybyitsa simyitsapyritsa watsa. Sakurëtsaktsa mozororowykytsa bo ba zikumunaha. Simyitsapyritsa zuba mozororowykytsa bo pomonaha.

³² Iwatahi ikzumu simysapyrëtsa bo ka ba. Utakta simysapybyikitsa bo hi ikzumu iwaze simysapybyitsa kahumo simysapyrëtsa moziknaha. Iwaze imysapybyri pimoewynaha – niy.

Sesus myzuwy nitsasoko.

³³ Niahatsahi nipamykysokozonaha:

– Suão Batista tuk zinymyrykynahatsa hauk ahabyitsa ziknakaranaha. Iwaze Deus bo ziknapamykysokonaha. Pariseutsa tuk zinymyrykynahatsa kino niwatihi hauk ahabyitsa ziknakaranaha. Ikia tuk zinymyrykynahatsa batu. Asa hi mynatahadisahakanaha mozikukunaha niwatihi. Amy humo sa atuk zinymyrykynahatsa tahadisahakanaha – nikaranaha.

³⁴ Sesus ispe niy:

– Maku tasukzaze tatuktsa tuk tamyikaha niy. Tummy mytakuku. Tahadisahanaha – niy.

³⁵ – Iwaze isukzata myserekze kytsa batu siaku iwaze hauk ahabyitsa mykaranaha. Iwaze utakta kazo bo myziksizoze zinymyrykynahatsa batu siaku iwaze hauk ahabyitsa mykaranaha – niy. Iwaze Sesus Pariseutsa bo nitsasoko, myzuwy soho nitsasoko.

³⁶ Niytahi Sesus nipamykysokozo. Panu soho humo ziwatawyky. Iwa nisihyrinymyryky. Sesus tihi:

– Ba aty tohi panu ezytyk ty zizyzyka, isuk ibyky myzutsuku. Iwa my zeka isuk mysykbaik. Panu ibykta tu ezytyk humo mymyibaik – niy.

³⁷ Nipamykysokozo. – Kyze ba aty tohi duabohotsa tsik ezytyk ty siraratsa hwyk ibykta bo pisisu iwa my zeka duabohotsa tsik ezytyk mynapytoze ibykta tsasuk mytok mypokbaik – niy. Duabohotsa tsik tsasuk ibykta bo susu tsimy zeka pimiyibaik.

³⁸ Duabohotsa tsik taweba. Duabohotsa tsik ezytyk tsasuk ezytyk eze tu tsipisisu eze ka.

³⁹ Iwaze duabohotsa tsik isuk kino tisapyrëna maha. Bykyze atahi duabohotsa tsik ezytyk batu iakparawy. Asahi:

– O duabohotsa tsik ziperyky jokboha niy – nikara.

6

Sesus Sudeutsa byrykywy soho humo nisihyrinymyryky.

¹ Sudeutsa byrykywyze zinymyrykynahatsa Sesus tuk waratok buruk niukurunaha. Zinymyrykynahatsa tirikotsa inasibakanaha nisityhyktyhykyknaha iwaze nisiborokonaha.

² Pariseutsa nipamykysokonaha:

– Amy skaraba niwa tsimykaranaha. Nawa zuruze mybyrykywyze kat-saktsa batu tarabaja mysopyk – nikaranaha.

³ Sesus ispe niy:

– Ikiahatsa batu ahahyrinymyry Dawi soho ziwatahaka.

⁴ Taparakta Dawi itukytsa taharapaspykze hawa nikaranaha. Deus wahoro bo nitsuk. Atsikara zibykyknaha. Atsikara Deus bo nyny niy ana

hi ziokok. Iwaze itukytsa kino niwatihi ziokoknaha. Atsikara humo Deus wahoro eze ziknapamykysokonahatsa zuba zikziokoknaha. Kytsaktsa batu zikaha. Anaka papeu Dawi soho batu ahahyrinymyry ja – niy.

⁵ – Utakta Deus zikpehata ikiahatsa wata. Uta hi mybyrykywy tsihitsa niwatihi my. Uta zuba mybyrykywy eze pipehaka. Myzubaha kaharere bo yh̄y maha – niy.

Sesus itsyhyrype noikta zizororowy.

⁶ Kyze Sesus itsyhyrype noikta zizororowy. Usta mybyrykywyze Sesus Deus wahoro bo nitsuk. Anaeze nisispirikpoko. Atsokyka itsyhyrype noikta bo iktsa niy.

⁷ Kytsa taparaktsa zinymyrykynahatsitsa, Pariseutsa kino niwatihi Sesus bo iktsaziu nikaranaha. Ibo nikozotoktokonaha:

– O mybyrykywyze hawa pizororowy ja – nikaranaha. Hawa Deus sohokotsa botu ziwatahakanahatsa siharere bo ka Sesus batu yh̄y my niz-ihikiknaha.

⁸ Sesus tsihyrinymyrēta. Hawa taparaktsa mytsaty nikaranaha, Sesus zinymyry. Iwaze Sesus itsyhyrype noikta pe niy:

– Kyiktykta! Mytazahara eze riktotykta – niy.

Itsyhyrype noikta atsoko kytsa tazahara eze tarikto.

⁹ Niytahi Sesus taparaktsa nispehaka:

– Utakta ikiahatsa pehatsa. Hawa skaraba mybyrykywy eze ahasopyk. Mybyrykywy wasani ja tsipisapyky zeka, yh̄y tsimaha. Mybyrykywy eze hawa ja tsipisapybyri zeka wasani ja tsimaha. Mybyrykywy eze kytsa hawa ja tsipitsumuēhikī zeka, yh̄y tsimaha. Mybyrykywy eze kytsa hawa ja tsipimiywy zeka wasani ja tsimaha – niy.

¹⁰ Sesus sizubatsa bo iktsaziu niy. Iwaze itsyhyrype noikta pe niy:

– Atsipa ty kabo nynyty! – niy. Maku tatsipa ty nyny niy. Iwaze nizororohik.

¹¹ Iwatsahi kytsa Sesus humo tahakyrikinaha. Iharere ziwabykynahaze asa zuba nipamykysokonaha:

– Hawa sa Sesus ty tsimaha tabezehik sa – nikaranaha. Iwa ihumo tahakyrikinahatsa nikaranaha.

Sesus tuk zinymyrykynahatsa nisiwatawyky.

¹² Kyze Sesus hara bo nido. Unata Deus bo nipamykysoko. Inakyokze Sesus tuk zinymyrykynahatsa bo nisiwatawyky.

¹³ Zinymyrykynahatsa sizubarētsa dose ahatsa bo. Sesus kino nisiwatawyky.

¹⁴ Ituk zinymyrykynahatsa: Simaō ta Peduru ty zinaroko, itsy Ādere kino niwatihi. Tsiaku, Suāo Tsiaku tsy. Piripi, Baratoromeu,

¹⁵ Mateus, Tome, usta Tsiaku Arapeu tse,

¹⁶ Tadeu, Simaō, bipyritsa batu iakparawy Sudas usta Iskariotses inarokota iwatsa, Sesus watawyhytsa. Aibani Sudas Iskariotses Sesus humo isopyksapybyita nikara.

Sesus nisihyrinymyryky iwatatu nisizororowyky.

¹⁷ Sesus hara zikarape bo zinymyrykynahatsa tuk nisik. Amytsī eze pykpyk niaha. Iwaze sizubarētsa Sesus bo izumunaha. Sizubarētsa ituk niukurunahatsitsa Sesus bo izumunaha. Sudeja ezektsa, Serusarēhe ezektsa, Tiro ezektsa, Sidō ezektsa, iwatsa izumukunaha.

¹⁸ Nanabyi ezektsa izumukunaha. Sesus harere ziwaby tsihikiknaha. Nizororo tsihikiknaha iwatsahi izumukunaha. Mektsaktsa hyrikosotsa sapybaratsa situktsa izumukunaha asahi Sesus nisiksiwyhik.

¹⁹ Myzubaha Sesus zibyby tsihikiknaha. Iwatsahi Sesus zikwy humo nizororokonaha. Deus harere humo nisizororoko. Sesus zikwy humo nisizororowyky.

Sesus mykuwy soho mysukatsihikwy ana soho humo nisihyrinymyryky.

²⁰ Sesus tuk zinymyrykynahatsa bo iktsaziu niy. Sakurēnikitsa soho nitsasoko ispe niy:

– Ahakurētsaktsa ikiahatsa batu amy tohi tsimaha.

Ahanamybyitsa Deus tyryktsa tsimoziknaha – niy.

²¹ – Ahakurētsaktsa abaka aharaparētsa.

Bykyze ikiahatsa ahadisahawynikitsa tsimaha – niy.

– Ahakurētsaktsa ikiahatsa abaka tsimopukakaranaha ahamysapybyri humo tsikykaranaha

iwaze hi bykyze hazi tsimykaranaha kawatsa tsimoziknaha.

²² Ahakurētsaktsa kytsa ikiahatsa humo tahakyrikinahaze ahape:

“Nabo pāotaha!” mykaranaha. Katuktsa humo takyrikinaha. Iwaze ikiahatsa Deus tyryktsa tsimoziknaha. Siharerewabymybarētsa, ahaharere pisapybyrikinaha zeka ahakurētsaktsa! – niy.

²³ – Ahakurētsaktsa, kytsa mymysapybyrikinahaze ikiahatsa soho humo ahakurētsa tsimoziknaha. Ahayzitrētsaktsa! Deus tukze ahanamy tsizubarēna tsimaha. Tubabatu taparaktsa iwa Deus sohokotsa sisopyk niaha. Deus sohokotsa atsatu sisopyk – Sesus niy.

²⁴ Niytahi Sesus sinamynikitsa bo nipamykysokozo. Sininiwy soho nitsasoko.

– O ahawahi sinini tsimynakaranaha. Aba ahanamyrētsa. Tapara tu ahayzitrētsa tsimykaranaha.

Ahanamy mopykze sinini tsimykaranaha.

²⁵ O ahawahi sinini tsimynakaranaha.

Abaka ahadisahawyrētsa. Ahadisahawy bo zuba mytsaty tsimykaranaha zeka sinini tsimykaranaha.

Bykyzehu aharapa zeka tsimopuziukunaha.

O ahawahi sinini tsimynakaranaha abaka ahayzitrētsa,

bykyze ahamysapybyri humo mytsaty tsimykaranahaze ana humo hi sinini tsimynakaranaha. Tsimypukakaranaha.

O ahawahi sinini tsimynakaranaha.

²⁶ Sizubarētsa nanabyitaba ikiahatsa humo siharereziurētsa. Iwaze taparaktsa Deus sohobyitsa tu siharereziurētsa. Kytsa “Katsaktsa Deus sohokotsa” mybarapetu ziknakaranaha. Asatu kytsa ziknataharereziu tsihikiknaha. Iwaze sizubarētsa ahahumo siharereziurētsa pykyhytutaha ikiahatsa siwatsa tsimaha – niy.

Mysukyrytsitsa mysipokzitsinaha.

²⁷ Kaharere tsipiwybykynahatsitsa. Uta ikiahatsa pe my:

– Ahasukyrytsitsa tysipokzitsinaha! Ahasukyrytsitsa tysisapywykynaha zeka wasani tsimykaranaha.

²⁸ Deus bo tsimypamykysokonahaze:

“O Deus kasukyrytsitsa bo wasanitykta. O Deus kasukyrytsitsa humo tysisapywyky”. Iwa ahasukyrytsitsa tsyhyryze Deus bo typamykysokonaha – niy. Niytahi sisukyrytsitsa sopyk nisiwatawy niy. Sesus nisispirikpozo:

²⁹ – Aty paokpyk zeka usta taba kino niwatihi tsimy. Aty akpyzazawy pibok zeka asuk humo niwatihi nyny taha. Iwa zeka wasani tsimykara.

³⁰ Ba zikakyri aty ape:

“ka bo ja” my zeka ibo nyny tsimy. Aty anamy piakse zeka ba kabo tyzisizokta tsimy wasani tsimaha.

³¹ Sizubarëtsa ahabo wasani maha tsimyzihikiknaha. Iwaze ikiahatsa sibo tsipisapywykynaha atsawatu sisopyk. Atsawatu kytsa bo wasani sisopyk tsimaha.

³² Ikiahatsa ahatukytsa humo zuba ahamypokzitsiukrëtsa zeka Deus okze “ahasopyksapybyitsa tsimykaranaha” my. Kytsa simysapybyitsa kino niwatihi. Simysapybyitsa situkytsa humo simypokzitsiukrëtsa. Kytsa ykparawytsa mysipokzitsikinaha.

³³ Ikiahatsa kytsa humo wasania ty zuba tsimykaranaha zeka asa kino ahawa tu munaha ikiahatsa sisapybyikitsa watsa. Deus okze ka ahamysapybyitsa tsikykaranaha. Iwatsaze kytsa simysapybyitsa kino niwatihi sisopyk. Simysapybyitsa kytsa bo wasania ty zuba, kytsa sibo sisopyk wasani mykaranaha.

³⁴ Ikiahatsa ahanamy ty kytsa bo nynyspyk tsimaha zeka kyze myzisonaha iwa mytsaty tsimaha. Deus okzeka ahamysapybyitsa tsimaha. Kytsa simysapybyitsa kino niwatihi iwa mykaranaha. Tahanamy ty nyny mykaranaha zeka bykyze sinamy pisizonaha. Iwaze hi sinamy sibo myzisonaha.

³⁵ Ahasukyrytsitsa tysipokzitsikinaha! Tysisapywykynahaktsa! Ahanamy ty nynyspyktaha! Iwaze ahanamy ja myzisizo. Ba ahanamy ziperynaha. Iwaze ahanamy baba Deus tuk tsizubarëna. Deus hyrytsa tsimoziknaha.

³⁶ Deus myzubarëtsa bo mymysapywyikik. Asa kino iharere humo batu yhÿ mykaranaha, asa bo hi mysisapywyikik, simysapyrëtsa niwatihi mysisapywyikik. Abazubatsa mysisapywyikik. Ikiahatsa ahamypokzitsiukrëtsaktsa! Ahazo wata atsawatu tsimypokzitsikinaha – Sesus niy.

Zinyziukunaha maktsa humo tu ispe nikara.

³⁷ – O atakta “batu imysapy ba zikaha” iwaze ba ziktsasonaha. Iwa tsimaha zeka ustsaha ahasoho kino niwatihi “O atakta batu imysapy” maha. Iwaze batu tyso: “Atakta batu wasani ba zikaha”. Iwa tsimaha zeka ustsaha ahasoho kino niwatihi: “Atakta batu wasani” maha. Ikiahatsa kytsa simysapybyiri humo tysiokzonaha Deus kino niwatihi ahamysapybyiri humo pahaokzo – Sesus nikara. Iwa Sesus nisispirikpoko.

³⁸ Niytahi ispe niyzo:

– Harape bo nynyntaha! Iwaze ustsaha kytsa kino ahabo nyny maha. Hawa ha ty nyny tsimaha zeka abazuba tsipiaksenaha. Kytsa ahabo nyny mahaze peryk inaharek zektawa. Mytöbaik zekywa. Mysidydyky. Tsizubarëna ty nyny tsimaha zeka, abazuba tsipiaksenaha. Tsikaeni zuba nyny tsimaha zeka, iwaze tsikaeni zuba ahabo kytsa nyny maha – Sesus nikara.

³⁹ Sesus nipamykysokozo. Ihyrizikubyritya soho humo nitsasoko. Nisi-hyrinymyryky:

– Harape hyrizikubyritya tu zeka ba zikarapeoktynaha. Iwa zeka wytyk hoke bo mynaharazuknaha.

⁴⁰ – Pinymyrykyta tsikaeni zuba zinymyryta. Ihyrinymyrytsa abazuba izinymyry. Pinymyryziyu zeka tahyrinymyrytsa watu mozik. Tahyrinymyrywy pepykyze tahyrinymyrytsa watu mozik.

⁴¹ – O kytsa amo skaraba ikia aziky hyrizik oke bo hwi upa tsibik bo tsimykozoze. Hwi puho ahyrizik okeze tuze batu zikozo. Ahany byizeka hwi puho ahyrizik okeze tu tsimy.

⁴² Hawa tsimaha aziky pe tsimy:

“Byri kaziky, uta ahyrizik okebo humo hu my” tsimy – niy. – O ikia myziharawatahanaha ziktawa niy. Batu ahahyrinomyry. Tapara hwi puho ahyrizik eze taty hyrybokty iwaze iktasaziu tsimy iwaze aziky tsipitsumuēhĩ. Niytahi hwi upa ty aziky hyrizik okeze ky bo hu tsimy – niy. Sesus nikarazo. Iwaze ikia wasani tsimy zeka aziky tsipitsumuēhĩ.

Hwi ihara aha niwatihi nisispirikpoko.

⁴³ – Kyze hwi tisapyrēta zeka ihara kino niwatihi tisapyrēta. Wihara sapybyi my zeka hwi batu isapy my. Hwi isapy byizeka wihara kino batu isapy mozik – niy.

⁴⁴ – Ihara bo tsimykozonzahaze hwi tsinynaha. Wihara humo hwi tsinynaha. Hwitsa sinyhytsa anahi wihara baba – niaha. – Hwi inikoso eze zeka ba umaha hara zikzibanaha. Kytsa umaha hara ty zykyzyk maha, batu duabohoharatsa kino niwatihi bazyk zikaha. Hwi initsa eze zeka batu duabohotsa haratsa ty zykyzyk zikaha. Kytsa duabohoharatsa mytsihikiknaha zeka duabohotsa sisakatsa ty zykyzyk maha.

⁴⁵ Kytsa wihara watsa niy. Aty tisapyrēna bo mytsaty nikara ana humo hi imysapywyky zuba. Imysapybyita hawa mytsaty nikara ana humo hi imysapybara ty nikara. Hawa mytsaty tsimykaranaha, ana humo kino tsimoziknaha – niy.

Petok wahoro humo nisispirikpoko.

⁴⁶ – Aty ja kape: “O mypehakatsa” my. Iwatsa tu kaharere bo batu ma tsimaha – niy. Ikiahatsa kape mypehakatsa tsimaha zeka iwaze kaharere bo hyỹ tsimaha.

⁴⁷ Aty kabo zumu. Kaharere ziwaby atahi hyỹ nikara. Hawa iwata humo pawatawy.

⁴⁸ Atahi maku wata atahi wahoro nizuknize. Harahare eze ziukuru. Ihoke zihiboani ziuku. Iwaze zopoktsa mynabybyknahaze. Hyritsik nawōze. Pihik mynapokze wahoro bo mozumuze baziknatsehepetok. Iwa maha zeka ba ziknazuru. Atakta kaharere ziwabyze iwaze kaharere bo hyỹ nikara.

⁴⁹ Atakta kaharere ziwabykyze kaharere bo batu yhyỹ ziky. Hawa iwata humo pawatawy. Atahi maku wata wahoro nizuknize tawata. Nimyra eze tu ziukuru. Jokboha zuba jowy batu ioketsehezeze. Iwaze zopoktsa mynabybyknahaze. Hyritsik nawōze. Pihik mynapokze wahoro bo mozumuze. Wahoro myzitsehepetokyk. Natōbaik. Atakta maku kaharere ziwabyta tuze batu yhyỹ isopyk. Iwa Sesus tuk zinymyrykynahatsa nisispirikpoko hawa kytsa iharere bo batu yhyỹ sisopyk.

7

Sesus sodadutsa pehatsatsumuēhĩtsa zizororowy.

¹ Kyze Sesus sizubarētsa bo nipamykysobaze niukuru. Kaparanaũ bo zumu. Anaeze sodadu tsumuēhĩtsa zizororowy.

² Kyze maku sē sodadutsa nisipeha, atakta sodadu Homa ezekta. Estuba tsumuēhĩtsa humo tsimypokzitsiukrēta. Ata hi imyitsapyrita iwatahi asiba nihyrikosokda.

³ Niytahi taparakta sodadutsa Sesus bo, Sudeutsa taparaktsa ypykyhytsa nisipeha. Ikiahatsa Sesus pe taha:

– Panykta! Uta katsumuēhĩtsa tsizororowykta tsimaha – niy. Hyỹ niaha. Iwa Sesus bo nisipeha.

⁴ Niukurunaha. Zumunahaze Sesus bo nizapykykynaha. Sesus pe niaha: – Ikia mytukta! Taparakta sodadutsa bo tynakozore. Iwaze itsumuēhĩtsa tsipizororowy. Sodadutsa pehatsa Sudeutsa humo tsimypokzitsiukrēta.

⁵ Atahi katsa mytsyhyryze Deus wahoro nizukni. Tsimysapyrëta humo ikia mytukta! – nikaranaha.

⁶ Iwatahi Sesus situk niparak. Tykareze tuze taparakta sodadutsa wahoro bo nikaranaha. Sodadutsa pehatsa ituktsa zihobyknaha.

⁷ Nezeba taparakta sodadutsa ispe niy:

– Katuktsa aidyktsa! Sesus bo tsinakozorenaha. Katsyhyryze Sesus pe tsimaha: “O kapehatsa. Ikiahatsa kawahoro bo paku pakubyity, kamysapybyita tu mykara iwatahi ba ziktsuk. Kasikpybyrëta. Iwatahi batu kabo paku tsimy. Tytsasozubakta! Aharere ty zuba katsumuëhïtsa tsipizororowy.

⁸ Aharere soho humo kahyrinymyrëta. Uta niwatihi kapehatsa harere bo hyÿ kasopyk. Sodadutsa kaharere bo hyÿ sisopyk. Mysipehaze: ‘Nabo pãoty!’ Ana humo kino moparak. Usta pe ‘Pany!’ Ana humo kino mozumu. Katsumuëhïtsitsa iksipehaka: ‘Nawa tykta!’ Ana humo kino hyÿ maha” Nawa sodadutsa pehatsa tuktsa bo nitsasoko. Ikia kawata tsimy zeka katsumuëhïtsa tsipizororowy – niy. Niahatsahi sodadutsa pehatsa tuktsa iharere Sesus bo nikaranaha.

⁹ Ana Sesus ziwabyze paikpa mytsaty nikara. Sizubarëtsa bo Sesus nitsasoko:

– Wabytaha! Sudeutsa batu kahumo sispirikpo maha. Sodadutsa pehatsa watsa. Atahi kahumo ispirikpota babata Sudeutsa batu – niy.

¹⁰ Kyze ituktsa sodadutsa pehatsa wahoro bo ziksizonaha. Iwaze nipupunahaze nizororota bo nikoizonaha. Itsumuëhïtsa botu nizororo. Iwa Sesus sodadutsa pehatsa tsumuëhïtsa zizororowy.

Sesus haramukuka tse izihyrikizikpowy.

¹¹ Iwaze Sesus niukuruzo. Zinymyrykynahatsa ituk niukurunaha. Sizubarëtsa tuk niukurunaha.

¹² Sesus Naï hudikhudikwy bo zumubahaneze kytsa sizubarëtsa zihobyknaha. Asahi iytyk bo niukurunaha. Haramukuka tse itaypykze nihyrikosokda. Kytsa iytyk bo zebykyknaha. Ata babata zuba itse. Atatsa zuba kytsa sizubarëtsa atatsa tuk niukurunaha.

¹³ Kyze Sesus haramukuka zinyze ihumo imypokzitsi izumu. Niytahi atatsa pe:

– Asukabyityktsa – niy.

¹⁴ Niytahi ihyrikosokdata bo zumu. Isukpesuk bete zebykyknaha. Iwaze ibyktsitsa ske pokteze pykpyk niaha. Sesus ihyrikosokdata pe niy:

– O kyitykta! – niy.

¹⁵ Iwaze atsoko ihyrikosokdata kyik tsiharadyhy niy. Atsoko nipamykysokozo. Sesus ije bo zisi.

¹⁶ Kytsa sizubarëtsa zynahatsa sipybyrëtsa niapykyknaha. Iwaze Deus bo nipamykysokonaha:

– O Deus ikia hi tsamysapyrëta. Ikia zuba wasanita – nikaranaha. Asa zuba nipamykysokonaha – Deus sohotsa natakata mybo izumu. Deus mybo izumu katsa ityryktsa tsimoziknaha – nikaranaha.

¹⁷ Nanabyitaba sizubarëtsa ziwabykynaha. Sesus tahawatu ziwabykynaha. Sudeja ezektsa nawatsatu isoho ziwabykynaha. Haramukuka tse inahyrikizikpo naha ziwabykynaha.

Suão Batista tsumuëhïtsa Sesus bo niaha.

¹⁸ Suão Batista tuk zinymyrykynahatsa ziwabykynaha. Asa hi Suão bo nitsasokonaha.

¹⁹ Ziwabyze petoktsa pe niy:

– Pany pãotyny. Sesus boktsa! – niy. Niytahi zinymyrykynahatsa petoktsa Sesus bo nisipeha. Ikiahatsa ipe tsimaha:

– Ikiahi sa Deus zapehata. Usta za tapery tsimaha – niy.
Yh̄y nikaranaha. Iwatsahi Sesus bo nitururuknaha.

²⁰ Ibo zumunahaze ipe niaha:

– Suão Batista nimypeha. Iwatsahi tsiknatururuknaha. “Ikiahi sa Deus zapehata. Usta za tapery.” Nezeba Suão mype niy – nikaranaha.

²¹ Jabasykyri Sesus sizubarētsa nisizororowyky. Kytsa hyrikoso sapybara situkoktsa pororo nakaranahatsa nisiksiwyhik. Utsa sihyrizikubyitsa kino niwatihi nihyrizikzororonaha.

²² Sesus:

– Suão bo tsiksizonaha! Tsinykynaha, tsiwabykynaha anaty Suão bo tytsasonaha! Sihyrizikubyitsa nihyrizikzororonaha. Siekbyritsa nizororobanaha. Tahakōrōrōtsa humo asiba nibibibanahatsa tu nizororobaiknaha. Siharawitsa tu ziwabykynaha. Niakbakanahatsa inahyrizikpobanaha. Sinamybyitsa Deus wasaniha piwabykynaha. Sakurētsa mykaranaha iwa Suão bo tytsasonaha – niy.

²³ Sesus:

– Aty kahumo tispirikporēta zeka iwatahi tsakurēta mozik – niy.

²⁴ Suão Batista nisipehanahatsa petoktsa nitururuknahaze Sesus kytsa sizubarētsa bo nipamykysoko.

²⁵ Suão soho nitsasoko:

– Amo skaraba ikiahatsa jerukbara bo tsikukurunaha. Amo sa tsinykynaha, hwi tsibik zopok humo wākwāk nikara. Batu ba. Suão batu hwi tsibik wabyita niy. Amo tsiny tsihikiknaha. Tisuksapyrēta ja. Batu, sisuksapyrētsa ispehatsa wahoro sihezōje taeze mopykyknaha. Sinamyrētsa. Suão inamybyita niy.

²⁶ Amo skaraba tsiny tsihikiknaha za Deus harere sohokotsa ja. Suão Deus sohokotsa babata.

²⁷ Suão soho botu ziwatahakanaha:

“Iktsa katsumuēh̄itsa kaharaze iakzohota. Ske pizozik kahumo pykyhytuty my. Hawa kytsa ske zizozikbanaha siwatsa Suão kytsa nisihyrinymyryky iwa zeka zipehata humo piperykynaha. Sizubarētsa Suão harere humo kabo pikymynaha”.

²⁸ Iwa Suão soho Deus harere ziwatahakanaha – niy.

– Kytsa tapara nipupurukbanahatsaktsa myhyrizikwanibyitsa. Suão zuba myhyrizikwanikita niy. Iwatatu aty Deus tyryktsa tuk my, atahi myhyrizikwanikita h̄y. Suão batu – niy.

²⁹ Aparakbaha okyrysaro bykyktsitsa kino niwatihi ana humo hi ziwabykynahaze:

– O Deus wasani tsimykara – nikaranaha.

³⁰ Tapara Suão nisiharasusuku Deus harere bo yh̄y nikaranaha. Pariseutsa sihyrinymyryktsitsa ahatsa Deus harere bo batu yh̄y niaha. Suão humo siharasusu tsihikbyitsa nikaranaha.

³¹ Niytahi Sesus kytsa bo nipamykysokozo:

– Kytsa abaktsa sa hawa – Sesus nikara. Uta mysiwatawy niy.

³² Asahi jabyitsa watsa. Jabyitsa mowakyrikinaha kōpara ykarawy eze modyhydyhykynaha. Paikpa harape bo hua hua mykaranaha:

– Katsaktsa isukzata myikaha bo tsimopamykyzukunaha ikiahatsa ba zikarinaha.

Katsaktsa tsikziharawatahakanaha iytyk eze tsikpukarakanaha. Ikiahatsa ba mytuk huehue zikaha niaha – niy.

³³ Suão Batista izumuze hauk ahabyita niapykyryk. Duabohotsa tsik batu tsō. Suão soho humo mybarapetu tsikykaranaha:

– O ihyrikoso sapybara Suão tuk mynapykyryk tsikykaranaha – niy.

³⁴ Utakta Deus zikpehata ahawata ikyzik. Uta ahabo ikzumu. Myzikdisa-haikik. Myzikuikik iwa ikykaraze kasoho humo mybarapetu tsikykaranaha:
 – Iktsa taha! Atakta titsaurēta tsikaha. Okyrysaro byktsitsa tuk tadisa-haka. Utsa kytsa simysapybyitsa tu nikaranaha iakparawy tsimaha – niy.

³⁵ Kytsa:

– O katsa zuba myhyrinomyrētsa. Wasani my tsimaha – maha. – Batu ba. Batu sihyrinomyry Deusta koikny bakta hyrinomyryhy tu aty hyỹ my zeka wasani mykara – nikara.

Sesus Simaõ Pariseu wahoro eze tadisahaka.

³⁶ Niytahi maku Pariseu Sesus pe niy.

– Pany! Pakutyny kawahoro eze tsimymydisahanaha – niy. Yhỹ niy. Sesus Pariseu wahoro bo nitsuk. Iwaze mydisahawyzozowy baze tadyhy.

³⁷ Kyze wytyk imysapybyitatsa Sesus bo inatsuk. Atatsa anaeze zikzuruku-tatsa. Imysapybara ty zuba ziknakaratatsa kytsa ykparawy. Ana ziwabyze Sesus Pariseu wahoro eze niytatsahi ibo izumu. Iwatatsahi jokmorēnikia bykyhy tuk netsukuk. Jokmorēnikia ty taoporosuk eze tsipokzitsarēna tu zibykyk.

³⁸ Atatsa Sesus bo zumu. Sesus sukpe baze niriktohoko. Ipyrytsa baze babatu okmymyhātatsa. Nipuziuku. Tahyritsik tyty zipyrypikik. Taharadi tyty zipyrywikik. Ipyrytsa sukpe ty piok piok nikara. Jokmorēnikia ty zipyrysusuku.

³⁹ Pariseu ibo nikozoze mytsaty niy:

– O Sesus Deus sohokotsa babata ja. Deus sohokotsa babata zeka wytyk soho humo tsihyrinomyrēta. Imysapybyitatsa tu ipyrytsa humo paik nikara anahi zinymyryky – mytsaty niy.

⁴⁰ Niytahi Sesus Pariseu pe niy:

– O Simaõ ikia tuk mopamykyso tsihikik – niy.

– O myhyrinomyrytsa tytsaso – niy.

⁴¹ Sesus:

– Kyze makutsa petoktsa tsinamyrēta okyrysaro ty batu tysirezo. Estuba okyrysaro tsizubarēna batu isty sirezo. Kījētos okyrysaro batu isty sirezo. Usta okyrysaro tsikaeni zuba sīkuēta zuba batu isty sirezo. Kytsa petoktsa batu okyrysaroko nikaranaha. Tsinamyrēta bo okyrysaro ty batu nyny zikaha. Kytsa batu amy tohi niaha.

⁴² Iwaze tsinamyrēta tihi:

“Uta kaokyrysaro soho humo ikspiritsokda. Okyrysaro ikiahatsa kabo batu tysizo. Kyzekta niwatihi” niy. Iwaze sa aty ihumo iakuta babata mozik – Sesus nikara.

⁴³ Simaõ ipe niy:

– Atakta okyrysaro tsizubarēna zisirezo. Atahi tsinamyrēta tihi:

“Kījētos okyrysaro ikspiriktsokda” niy. Atahi tsakurēta atahi kok iakuta babata my – niy.

Sesus ipe niy:

– Wasani tsikykta – niy.

⁴⁴⁻⁴⁶ Iwaze Sesus wytyk bo iktsa niy. Simaõ pe niy. – Atatsa wytyk bo iktsa tykta. Uta awahoro bo iknatsukze ikia pihik ty batu kabo nyny tsiky. Iwatahi pihik ty kapyrypikwy ty batu nyny tsiky. Atatsa hi tahyritsik ty zikpyrypikik. Taharadi ty zikpyrywiki. Ikzumuze ikia batu katy hapyryk aha. Atatsa zuba kapyrytsa ty piok piok nikara. Ikia oreo ty kaharek bo batu nyny tsiky. Atatsa hi jokmorēnikia ty zikpyryharasusuku.

⁴⁷ Wasani nikara. Atatsa hi imysapybyitatsa tu nikara iwatatsa tu Deus ziokzo. Atatsa kahumo tsimypokzitsirētatsa iwaze Deus ziokzohik niy. Atatsa kahumo tsimypokzitsiarētatsa niyzik – niy. Kytsa tahape:

– O mymysapybyitsa tsikykaranaha tsikaeni zuba iwaze Deus myhumo mymyokzo mytsaty ahabyitsa tsimykaranaha. Iwaze Deus maku imysapybyita ty puētsik zuba mysiokzo atahi kytsa humo puētsik zuba imypokzitsi – niy.

⁴⁸ Iwaze Sesus atatsa pe niy:

– Amysapybyiri humo Deus ziokzohik – niy.

⁴⁹ Kytsa nidyhydyhykynahatsa asazubatsa tuk nipamykysokonaha.

– Aty skaraba niwa isopykta nikaranaha. Mysapybyitsa tu tsimykaranaha mymyokzo – nikaranaha.

⁵⁰ Sesus atatsa pe niy:

– Ikia kahumo aspirikporētatsa. Abaka akurētatsa tsimozik. Tsiksi – niy.

Iwa Sesus Simaõ bo wytyk soho nitsasoko. Nezeba imysapybara ty zuba ziknakaratatsa Deus ziokzohik, meky watu niyzik.

8

Wytykyryk Sesus tuk ziknaukurunahaze.

¹ Aibani Sesus niparak. Sihudikhudikwy taba paikpa zikzumuku. Deus tyryktsa soho nitsasoko. Zinymyrykynahatsa dose ahatsa ituk niukurunaha.

² Wytykyryk kino niwatihi ituk niukurunaha. Ihumo nizororokonahaza. Nezeba hyrikoso sapybara sibo pororo ziknakaranahaze hi, Sesus nisiksiwyhik. Iwazahi wytykyryk Sesus hapik niukurunaha.

³ Nawa ahaza niukurunaha: Maria, Soana, Susana sizubarēza. Ustatsa Maria Madarena inarokotatsa. Atatsa kino Sesus hyrikoso sapybara sete nisiksiwyhik. Soana Kusa oke. Ibarikta Erodes namy perytsa iwa ahaza niukurunaha. Wytykyryk tahanamy ty Sesus bo zinymyrykynahatsa bo kino niwatihi nyny nikaranaha.

Nisiparikikta soho niy.

⁴ Nanabyitaba sihudikhudikwytsa sizubarētsa Sesus bo inauzuzukbanaha. Myzubaha Sesus bo zumunaha. Iwatahi nisihyrinymyryky. Waratok pariktsa soho humo nipamykysoko:

⁵ – Kyze amata riktsa nisiparikikta. Nisipaparikikze mektsaktsa wastuhu ske sak bo siriktsa natsukunaha. Kytsa nisipaparibaiknaha. Piyktsa niwatihi nisihorozukbaiknaha.

⁶ Utsa riktsa harahareziktsa bo inatsukunahatsa. Iwatsa tu iziponahaze harahareziktsa humo niparabaiknaha. Pihikbyitsahi siharapyryryky niakbabaiknaha.

⁷ Utsa riktsa inikoso bo inatsukunahatsa. Tahapykyknahaze taha-zozikiknahaze ini humo batu tahatypyk ty niakbabaiknaha.

⁸ Utsa riktsaktsa mahani. Asaktsa jytykziuha bo inatsukunaha tsahi sisapyrētsa taypyknaha tahasukuknaha nipopobanahaze. Sisukbozuarētsa niyziknaha Sesus nikara:

Kaharere tsipiwaby tsihikiknaha zeka wabytaha – niy.

Iwaze Sesus waratok pariktsa soho humo ziwatawyky, ana humo kytsa nisispirikpoko.

Riktsa pariktsa soho humo nisispirikpoko.

⁹ Niahatsahi zinymyrykynahatsa Sesus pe niaha.

– Amy sa aharere ty mytsyhyryze tsipiwatawyky – niaha. Sesus ispe niy:

– Deus ikiahatsa bo kaharere ty piwatawy tsihikik. Kaharere Deus tyryktsa soho pahawatawyky niy.

¹⁰ Ikiahatsa bo pahawatawy tsihikik. Utsa bo ka batu. Kaharere ziwabykynaha zuba. Hawa ha ty ziwabykynaha batu yh̄y niaha iwatsahi batu sispirikpo. Kaharere ziwabynahaze ana soho humo batu mytsaty niaha. Iwatsahi kaharere bo batu yh̄y zikaha batu sihyrinomyry – Sesus nikara.

¹¹ – Kaharere ty pahawatawyky. Riktsa Deus harere hyrity watsa niy.

¹² Aparakbaha Deus wasania ty piwabykynaha. Asahi riktsa ske sak bo inatsukunahatsa watsa. Deus harere piwabykynaha zuba. Piwabykynahaze Satanas sibo myzumuze, Deus harere pimiywy. Iwatsahi batu zinymyry-naha. Deus harere humo batu sispirikpo. Deus harere Satanas pimiywy piyktsa watsa.

¹³ Utsa Deus harere piwabykynaha. Asa hi riktsa harahareziktsa bo inatsukunahatsa watsa. Asahi wasania ty piwabynahaze sakurētsa. Riktsa siharatatsa zuba byitsa watsa asahi tsikaeni zuba zinymyrykynaha. Zi-wabyziubynahatsa tu Deus harere tsihokdarēna humo iwaze imysapybyitsa tu mykaranaha iharere humo myspiriktsokdabanaha.

¹⁴ Utsa Deus harere piwabynaha. Asahi riktsa ini tazahara bo inatsukunahatsa watsa. Deus wasania ty piwabykynaha. Tahanamy bo zuba mytsaty mytsaty nikaranaha. Tahanamy tsihikiknaha. Deus harere humo sakubyrizumu. Asahi wihara watsa ba zikjakuk byitawa.

¹⁵ Utsa Deus harere piwabykynaha. Asahi sisapyrētsa. Deus tihi:

“Asaktsa wasanikitsa” nikara. Deus harere piwabyziukunaha. Deus wasania ty humo sispirikporētsa moziknaha. Deus harere bo hȳy mykaranaha. Iwatsahi wihara nijakuk naha watsa – Sesus niy.

Rika soho nitsasoko.

¹⁶ Niytahi Sesus nipamykysokozo. Sesus:

– Rika soho humo pahawatawyky – niy. – Ba aty tohi rika napokze peryk pukezi zik ziky. Batu aty tohi rika wanu pukezi zik ziky. Rika isapy eze tu joboni zik my. Iwaze hi mynapupunahaze amypubyri mozik.

¹⁷ Iwaze hi amy jokpitsiha zeka amypubyri mozik. Aba myhyrinomyrybara humo bykyze kino wasani tsimaha. Ana watawy niyzik.

¹⁸ Wabyziutaha! Pinymyrytohitakta. Aty kahumo mospirikpo zeka mektsa namy ty nyny my. Aty kahumo ispirikpo zeka tsikaeni zuba pinymyryky ana hi mospiriktsokda zuba – Sesus niy.

Sesus je itukytsa kino niwatihi iwa ibo zumunaha.

¹⁹ Sesus je itukytsa ahatsa Sesus bo zumu tsihikiknahatsa tu batu ibo zuk niaha. Myzubaha pokso batu zuk niaha.

²⁰ Iwaze tohi Sesus pe niy:

– Aje atukytsa ahatsa izumunaha ape baze moriktotohokonaha. Atuk mopamykyso tsihikiknaha – niy.

²¹ Niytahi Sesus aparakbaha bo nipamykysoko:

– Asaktsa Deus harere piwabykynaha, iwaze iharere bo hȳy mykaranaha. Asahi kaje babaza, katukytsa babatsa maha – Sesus niy.

Sesus zopoktsa nisipykik.

²² Kyze Sesus tsaraha bo takorohyk. Zinymyrykynahatsa tuk kokokorohyk niaha. Sesus:

– Koikny! Tsinaporenahaktsa! – niy.

Satsuky niaha. Ziturikinaha.

²³⁻²⁴ Amykta taba zitsikzakanahaze iwaze Sesus kino tsapukteze iotutsa izumuta zurubaka. Iwaze zopoktsa inabybyknaha. Pihik humo tsaraha asiba inaharek. Ihiridawy wa niukuru. Asiba nitaboknaha. Iwatsahi zinymyrykynahatsa Sesus zitudutudukunaha iwaze inapopo ipe niaha:

– O mypehakatsa batu iktsa ziky. Tsimymybabakanaha – niaha. Inapopoze kyik niyze:

– O zopoktsa niwazuba pyktahaktsa. Pihik pyktykta – niy. Zopoktsa atsoko pañ niaha. Pihik atsoko nitsykyrituhudibyri. Ihiridawy jakara zikbohota bo mahani itsikpepepe zuba.

²⁵ Iwatahi Sesus zinymyrykynahatsa pe:

– Amy skaraba Deus humo batu ahaspirikpo – niy. Sipybyrëtsa. Paikpa iktsa nikaranaha. Iwatsahi asa zuba nipamykysokonaha:

– Aty skaraba atakta zopoktsa pihik aha ihumo ziwabynaha. Aty skaraba Sesus – niaha.

Sesus maku hyrikoso sapybara nisiksiwyhik.

²⁶ Iwaze amakta taba bybybyu niaha. Amakta taba Kerasa bo zumunaha.

²⁷ Sesus byu niyze maku ibo izumu. Hyrikosotsa sapybaratsa ityryk bo pororo ziknakaranaha nipupunaha anaeze ziknapykyryknaha. Iwatahi tubabatu isuk byitatu wahorobara bo tu zikzuruku. Mytyk eze zinapykyryk. Atazuba zikzuruku.

²⁸ Maku Sesus bo iktsa niyze opykani kakaik niy. Taekaratsa humo iokeryk puruk puruk niy:

– Hawa skaraba Sesus, ikia Deus tse. Amy skaraba kabo tsimyzumuku. Sinini ykarawy bo ka myty pehapehabyity – niy.

²⁹ Iwaze Sesus hyrikoso sapybara nisiksiwyhik. Tapara hyrikoso sapybara maku nizokbatsinaha. Itsipa ziboro. Tsipaikrëta. Kytsa karikutsitsiwytsa ty zikzipawarakanahaze kino batu. Ziknasitsawakbaka. Zikzipyrytsawarakanahaze kino ziknasitsawakbaikik. Sasabyitsa kino ba ipaikwa sukni ahabyitsa. Hyrikoso sapybara jerukbara bo zioқтыhyryknaha. Iwatahi nezeba Sesus hyrikoso sapybara pe:

– O nabo pãotaha hyrikoso sapybara! – niy.

³⁰ Sesus:

– Amy skaraba anaro – niy.

– O kanaro myzubaha iwatatu katsa myzubarëtsa – niy. Iwaze hyrikoso sapybara sizubarëtsa maku tuk ziaksenaha.

³¹ Niahatsahi:

– O batu ihoketsihirizezebara bo ka myty peha peha byity! Katsaktsa pazaharezatsa bo tsimypupunaha anaeze mynapykyryknaha – niaha.

³² Iwa nizapykykynaha. Pazaharezatsa sizubarëtsa hara sukpetara bo tahadisahakanaha – Sibbo tsimypupunaha! – niaha. Sesus yhỹ niy.

³³ Iwaze hyrikoso sapybara pazaharezatsa bo nipupunahaze pazaharezatsa iharatsupetohowy bo nitururukiknaha. Pihik bo niharazukzukbaiknaha. Tahababaiknaha. Batu ibo zukzo niaha. De.

³⁴ Iwaze pazaharezatsa perytsitsa iktsa niahaze nitururukiknaha. Nanabyitaba myzubaha bo nipamykysokonaha. Sihudikhudikwy bo niwatihi ziknatsasokonaha.

³⁵ Iwatsahi kytsa Sesus bo inakozorenaha. – O hawa skaraba – nikaranaha. Ibo zumunahaze maku bo nikozonehaha. Astatu. Taparaka hyrikoso sapybara ituk ziknapykyryknahata dyhyhabyita inaukuru zuba. Abaka Sesus baze nidyhyky. Abaka tasukukta. Taparaka batu isuku. Abaka wasani nizororobaba. Tahabyi niapykyryk. Ibo nikozonehaze sipybyrëtsa nikaranaha.

³⁶ Inytsitsa tihi:

– Nawa niyta tihi maku nizororota nikara – niaha.

³⁷ Nipamykysobanahaze kytsa tihi:

– O tsiksizokta Sesus. Ikia pokso mypybyrëtsa – nikaranaha. Niparak tsaraha bo takorohyk.

³⁸ Iwaze izororota Sesus bo zumu:

– O uta ikia hapik – niy.

³⁹ Sesus:

– O batu. Awahoro bo tsiksikta! Atukytsa pe tsimy: “O Deus kahumo tsimypokzitsiarëta. Abaka ikzororo” tykta – niy.

Hyÿ niy. Ziksizo. Iwatahi Sesus soho myzubaha bo nitsasoko:

– O abaka ikzororo. Sesus zikzororowy – nikara. Iwa hÿ.

Sesus imyitsapyritatsa zizororowy iwaze jypykyhyzytyktatsa zihyritzikpowy iwa.

⁴⁰ Kyze Sesus ziksikizoze jakara zikbohota zitsikzakazoze aparakhaha sakurëtsa. Sesus ziperykynahatsa hi sakurëtsa.

⁴¹ Maku Sairu inarokota Sesus bo zumu. Kytsa nisipehaka Deus wahoro eze tu niy. Atahi Sesus okeryk taekaratsa humo puruk puruk niy. Sesus humo ispirikpo tahi iwatahi puruk puruk niy.

⁴² Ipe niy:

– Pany päotyny Sesus! Tupakta kawahoro bo. Kaste ikatatsahi pomozaka. Asiba zumuza. Aidytykta! – niy.

Yhÿ niy.

Sizubarëtsa iapik niukurunaha. Zihyritzabaiknaha. Iwewehebara botu niukurunaha.

⁴³ Wytyk kino niwatihi situk niukuru. Atatsa ispubyri ahabyitatsa. Ispu ba ziknapyk. Okyrytsik zikukuze kino batu pyk aha. Zikukuze kino hawa ja zuba nikara. Okyrysaro zipykbaik. Iwatatsahi Sesus bo zuk niy.

⁴⁴ Isuk tsihara humo kytsa papatu paik niy. Iwaze atsoko ispu inapyk. Zizororowy.

⁴⁵ Iwaze Sesus pyk niy. Iwaze:

– Aty sa kasuk humo paik niy – niy.

Batu harere ahabyitsa nikaranaha. Peduru tihi:

– O mypehatsa aparakhaha abaze tu tsimyriktotohokonaha – niy.

⁴⁶ Iwatahi Sesus niyzo:

– Aty sa kasuk humo paik niy. Deus zikwy kaikze zipo – niy.

⁴⁷ Iwaze wytyk ipapatu zinykyze zumuku. Atatsa izororotatsa ibo zumuku. Tsipybyrëtsa. Nitydydykyk atatsa tu ibo zumuku. Taekaratsa humo puruk puruk niy. Niytatsahi sizubarëtsa okze hawa nizororoze nitsasoko. Sesus suk humo paik niyze atsoko nizororobaba.

⁴⁸ Sesus iwa atatsa pe niy:

– O aspirikporëtsa “Sesus pikzororowy” my tsiky. Ikia aharereziutat-sawy azororowy. Akurëtsa tsikyzyk Abaka tsiksiktsa! Tsikzororo baba – niy.

⁴⁹ Iwaze nitsasobaze maku sibo zumu. Sairu tsumuehÿtsa ipe niy:

– Aste zuba botu nihyrikosokda. Kyzekta! Iwa zeka Sesus mytakni! – niy.

⁵⁰ Sesus ziwabyta tu Sairu pe niy:

– Apyby byihukta! Uta kahumo aspirikporëta iwatasta tu mozororo tsakurëtsa myzikzo. Tupakta! – niy.

⁵¹ Kyze Sesus Peduru, Tsiaku, Suão, Sairu, Sairu oke, iwatsa zuba wahoro bo inapupunaha.

⁵² Anaeze aparakbaha nipuziukunaha. Sesus ispe niy:
 – Ahasuka byitaha! Hawa hatsa sa tsimopuziukunaha. Iste ba mahani ihyrikosokda zuru zuba – niy.

⁵³ Iwaze ziwabynahatsa ihumo hazi nikaranaha. Sispirikpobyitsa hi Sesus humo hazi nikaranaha.

⁵⁴ Iwaze Sesus Sairu ste nihoekék wanusapy bo zumu. Iwaze itsyhyrype pe humo paik niy. Opykani ipe niy:

– Jypykyhyzytyktatsa kyikty! – niy.

Iwaze atsoko inahyrizikpo. Inatariktozo.

⁵⁵ Sesus:

– Atatsa tsidisahawynaha! – niy.

⁵⁶ Izotsa paikpa iktsa nikaranaha. Ispe niy:

– Sosobyijataha. Aste soho ty ka soso byitaha – Sesus niy.

9

Dose zinymyrykynahatsa nispeha.

¹ Kyze Sesus dose zinymyrykynahatsa nisiwatawy. Tazikwy ty sibo nyny niy. Iwatsahi simyitsapyritsa mysizororowynaha. Hyrikoso sapybara mysiksiwyhiknaha. Iwaze Sesus tazikwy ty sibo nyny niy.

² Iwatahi nisipehakaze Deus tyryktsa soho tytsasokonaha simyitsapyritsa tysizororonaha. Nisipehakaze:

– Aparakbaha tysizororowykynahaktsa! Hyrikoso sapybara tysiksiwyhiknahaktsa!

³ Nanabyitaba tsipomokonaha zeka nanabyi ty ka pu pu byitaha! Azozowy humo kino niwatihi wabe wabe byitaha! Boroho ty pu pu byitaha! Ahadisahawy humo kino niwatihi pok pok byitaha! Okyrysaro ty pok pok byitaha! Ahasuk ty kino pok pok byitaha! Ahahumo ky ty zuba.

⁴ Tshipomonahaze wahoro bo tsinapupunahaze anaeze zuba tsimypykyknaha.

⁵ Myzubaha bo tsipomonahaze ahahumo yhỹ ahabyi zeka. Meko hudikhudikwy botu tsimytururuknaha. Anabo ahaharere ty waby byizeka mekybotu tykurunaha. Tsimyzonahaze ahapyrysuktsa ty bok boktaha. Wytyk tazy natõze. Myzubaha ezektsa Deus harere bo batu yhỹ niaha piwatawy – niy. Iwa Sesus tuk zinymyrykynahatsa bo nitsasoko.

⁶ Niahatsahi zinymyrykynahatsa niukurunaha. Paikpa zikzumukunaha. Nanabyitaba Deus wasania ty ziknapamykysokonaha. Simyitsapyritsa ziknasizororowykynaha.

Erodes paikpa mytsaty nikara.

⁷ Erodes Karireja ezektsa pehatsa niy. Zinymyrykynahatsa soho ziwabyze batu iaku. Sesus soho ziwabyze batu iaku. Erodes tsipybyrẽta. Kytsa harere humo batu ihyrinymyry. Kytsa wastuhu nikaranaha:

– O Suão Batista inahyrizikpo – nikaranaha.

⁸ Utsa iwa nikaranaha:

– O Erias mydiri zumuzo – nikaranaha. Mektsatu kino:

– O taparaktsa Deus sohokotsa nahyrizikponaha – nikaranaha.

⁹ Iwatahi Erodes tapetu niy:

– O uta tu Suão Batista sodadutsa pe tsiharekzykiknahakta iky. Aty skaraba maku kytsa soho piwabyky – niy.

Niytahi Erodes Sesus ziny tsihikik.

Sesus sizubarẽtsa nisidisahawyky.

¹⁰ Sakzohotsa Sesus bo ziksizonahaze ibo nitsasobanaha. Zinykynaha ty nipamykysokonaha. Iwatsahi Sesus tuk niukurunaha. Betesaida bo niaha. Asa zuba Sesus jerukbara bo nisioktyhyryk.

¹¹ Myzubaha ziwabynahaze Sesus tuk zinymyrykynahatsa jerukbara bo niukurunaha. Ana humo kino ziwabynahaze Sesus hapik jerukbara bo nitururuknaha. Sesus sibo nikozoze sihumo tsimypokzitsiarêta. Deus tyryktsa soho humo nisihyrinymyryky. Simyitsapyritsa nisizororowyba.

¹² Kyze zunubakaze zinymyrykynahatsa ibo zumunaha:

– O Sesus tykara eze ka batu mydisahawyky. Jerukbara eze ka batu mydisahawyky. Abaka punubaka kytsa tysipehakta! Ziksinaha – niaha – “Ahadisahawy tyziskyknahaktsa! Anaeze wahoro tsarawybara bo tsipomonaha!” tsimy – niaha. Batu niy.

¹³ Sesus tihi:

– O ikiahatsa zakta sidisahawy ty sibo nynytaha! – niy. Iwatsahi:

– O batu. Atsikara mytsyhyry wa zuba. Piknutsa petok zuba niaha. Batu sidisahawy ty kôpara zikaha – niaha. Iwa nikaranaha. Sîko miutsa ahatsahi nikaranaha.

¹⁴ Iwaze Sesus tuk zinymyrykynahatsa pe niy.

– Ikiahatsa kytsa pe:

“Tyk humo dyhy dyhytahaktsa!” – niy.

Yhÿ niaha.

¹⁵ Iwaze metutu tahadyhydyhykynaha! Yhÿ niaha. Sizubarêtsa itahadyhydyhybanahaze,

¹⁶ Sesus atsikara ty okok niy. Piknutsa ty kino petoktsa okok niyze bijo bo iktsa Deus pe niy:

– Ikia humo ka mykurêtsa – niy.

Niytahi atsikara zitsakze tatuktsa bo nyny niy.

– O sibo nynytahaktsa! – niy. Piknutsa petoktsa sizubarêtsa niyziknaha sibo nyny niy. Kyze zinymyrykynahatsa myzubaha bo zibiakaknahaze tsizubarêna niyzikik iwa sizubarêtsa tahadisahakanaha.

¹⁷ Itahasuruknaha. Tahadisahabanahaze itsatsakyhy jerehe peryktsa bo zipupukunaha. Dose peryktsa inasihareknaha.

Peduru Sesus pe niy: – Ikia hi Deus zapehata – niy.

¹⁸ Kyze Sesus atazuba Deus bo nipamykysoko. Zinymyrykynahatsa ibo zumukunaha. Niytahi Sesus zinymyrykynahatsa bo nipamykysoko. Sesus:

– Hawa skaraba kahumo maha myzubaha mytsaty mykaranaha – niy.

¹⁹ Zinymyrykynahatsa ipe niaha:

– O wastuhu “O ikia pe Suão Batista mykaranaha”. Ustsaktsa ata hi “Erias” mykaranaha. Mektsatu batu niaha. “Ikia taparakta Deus sohokotsa inahyrikpota ja” mykaranaha – iwa nikaranaha.

²⁰ Sesus ispe niy:

– Ikiahatsa ja. Aty skaraba uta ahaokze ka – niy.

– O Deus pehaha babata – Peduru niy.

Sesus tabzewy soho nitsasoko iwaze tahyrikpowy soho niwatihi nitsasoko.

²¹ – Kytsa bo soso byitaha! Utakta Deus zikpehata – Sesus nikara. – Kytsa bo ka ja soso byitaha!

²² Tapara utakta Deus zikpehata iknasikta maku babata ahawatihi sinini my. Sudeutsa taparaktsa kapitãotsa kaharere bo batu yhÿ zikaha. Taparaktsa ziknapamykysokonahatsa Deus wahoro batu kahumo yhÿ mykaranaha.

Siwatahakatsitsa kino niwatihi batu kahumo yh̄y mykaranaha. Uta pik-bezenaha. Petok puruze mynahyritzikpo – nikara.

²³ Niytahi Sesus aparakbaha bo nipamykysokozo:

– Aty katuk babata mozihikik. Atakta piyituhukutu ta humo tu mospirik-tsokda. Piyituhukutu takparawybara humo kino yh̄y mynakara Deus pokzi mohyrikosokda tawata. Iwa tsikahazozikymybanahaktsa! Hawa sinini mykara atakta niwatihi katuk babata mozik zeka kawata sinini mynakara, iwatsahi tsikahazozikymybanahakta kytsa – niy.

²⁴ – Aty tapokzitsihikik zuba zeka Deus okze ka mohokda. Aty ziktapokzitsi byizeka ata kino Deus tuk tawahi mynaopykyryk.

²⁵ Ahanamyrētsa zeka tsimyhyrikosokdanahaze ahanamy ka mohokdaba. Ikiahatsa kino niwatihi ahahyritzikarawy mohokda. Kahumo tispirikporēta ziknakara zeka, katuk tawahi mynapykyryk – niy.

²⁶ – Utakta Deus zikpehata. Myziksizoze kazo zikwy katuk mynapykyryk. Deus tisapyrēta katuk mozumuzo. Bijoikpe iknyktsa Deus tsumuēh̄tsa katuk mozumunaha. Myziksizoze: “Aty kahumo tisikpybyrēta zeka uta kino ihumo kasikpybyrēta. Aty kaharere humo tisikpybyrēta zeka. Uta kino iharere humo kasikpybyrēta.” iwa my – niy.

²⁷ Ikiahatsa tazaharaeze tu sihyrikosokda byizetu Deus pehatsa parakbaha moziknaha. Deus tyryktsa mysynaha.

Moises Erias ahatsa Sesus tuk inatakahanaha.

²⁸ Kyze estuba mytsyhyrytsa nisipyk naha sapy bo Sesus Peduru, Tsiaku, Suão ahatsa nisioktyhyryk. Asa zuba hara bijobonita bo nidokoroknaha.

²⁹ Deus bo nipamykysokoze meky watu tahyryty tsukbarazarēta tsimok-sapyrēta niyzik.

³⁰ Kytsa petoktsa ibo inatakahanaha. Erias, Moises ahatsa.

³¹ Taparaktsa Deus sohokotsa. Nihyrikosokdanahatsa ituk nipamykysokonaha. Sesus Serusarēhe eze sinini mykara. Kytsa pibezena, mohyrikosokdaze Deus myzihyrizikpowy iwaze Deus bijo bo mydozo iwa Deus mozihikik ana soho ty hi nipamykysokonaha.

³² Peduru tatuktsa tuk tahaōtutsaspyk zurubakanaha. Inapoponahaze Sesus tisapyrēta bo nikozonaha. Sesus tisapyrēta niyzik.

³³ Kytsa petoktsa ahatsa bo nikozonaha. Iwaze Peduru:

– O mypehatsa tykara eze harakykbyihi ahaparik tsipizinaha! Estuba ikia bo, estuba Moises bo, usta Erias bo iwa tsimaha – niy.

Ihyrinymyrybyita tu nitsasoko.

³⁴ Nitsasokoze joktsĩ haramwe ziharasu. Bijo satata nasiharak bo. Bijo satata pokso sipybyrētsa nikaranaha.

³⁵ Bijo satata buruk iaksoho ziwabynaha Deus nikara:

– Tah katse, uta iwatawyta. Ihumo kakurēta. Iharere bo wabyziutaha! – niy.

³⁶ Nitsasobaze Sesus zuba nitare. Paikpa iksa nikaranaha. Batu aty tohi niy. Sesus bo zuba nikozonaha. Zinymyrykynahatsa batu harere. – Iwahahi tsynaha tyka kytsa bo soso byitaha – Sesus niy.

Sesus jypykyhyzytykta zizororowy.

³⁷ Kyze hinip̄y are niahaze hara jobonita ekze inasiknahaze sizubarētsa Sesus zihobyknaha.

³⁸ Maku estuba myzubaha tazahara eze hua nikara:

– O myhyrinymyrykytsa katse humo tsiktsumuēh̄kta. Katse tohi zuba. Iktsaziu tsimy.

³⁹ Hyrikoso sapybara ibo mozumukunahaze opykani ka mynakara niy. Hyrikoso sapybara humo ziknatahyrikywyky. Atsoko itsipa myziboro. Isake saraporo mozipo atsoko mynaraha hyrikoso sapybara pokso, asahi ibo pororo mynakaranaha.

⁴⁰ Zinymyrykynahatsa pe iky:

“Hyrikoso sapybara tysiksiwyhiknahaktsa” iky. Sihyrinymyrybyitsa hi iwatsahi batu katy tsumuēhĩ – niy.

⁴¹ Sesus ispe niy:

– Ikiahatsa batu kahumo ahaspirikpo. Iwatsa tu ahabaze mynapykyryk. Ikiahatsa ahaharere bo zuba hyỹ tsimykaranaha, kaharere bo ka batu yhỹ zikaha – niy.

Iwaze Sesus izo pe niy:

– Atse tyzioktyhyrykta – niy.

⁴² Izumuze atsoko ihyrikoso sapybara inapapykzo. Itsipa ziborozyo wytyk bo inaraha. Sesus ihyrikoso sapybara zipedahik:

– Nabo pãoty! – niy. Kyze jypykyhyzytykta zizorororwy izo bo zisizo.

⁴³ Aparakbaha Deus zikwy humo sipybyrētsa niyziknaha.

Sesus tabezewy soho nitsasokozyo.

⁴⁴ Kytsa sizubarētsa nisipybybaiknaha Deus zikwy humo sipybyrētsa. Kyze Sesus tuk zinymyrykynahatsa pe niy:

– Wabyziutaha utakta Deus zikpehata ahawata ikyzik. Kasukyrytsitsa bo pikoktyhyryknaha – niy.

⁴⁵ Iharere tsihokdarēna. Iwaze zinymyrykynahatsa batu sispirikpo. Iwatsahi amy ty iharere piwatawy batu siwabyziuhu. Sisikpybyrētsa. Iwatsatu batu ipe aha.

Aty sa myhyrizikwanita Deus tuk niy.

Bykyze zinymyrykynahatsa asa zuba nipamykysokonaha.

⁴⁶ – Aty skaraba myhyrizikwanita mytuk mynapykyryk – nikaranaha.

⁴⁷ Hawa zinymyrykynahatsa mytsaty nikaranaha. Ana humo ka Sesus zinymyryba iwatahi jabastatsa tsibik tahatazaha eze tyrikto niy.

⁴⁸ Sesus ispe niy:

– Jabyitsa humo tsinasipokzitsiki zeka niwaha humo ka kakurēta. Utakta ikiahatsa humo kakurēta zeka Deus kino niwatihi. Atahi zikpeha. Ituktsa tsimypokzitsiukrēta atahi myhyrizikwanita mozik. Tsimypokzitsiukrēta Deus mytsaty my “O atahi myhyrizikwanita kytsa mysitsumuēhĩ” niy. Atahi katyryktsa tukta Sesus nikara. Aty ahatukze kytsa mysipokzitsiki atahi myhyrizikwanita – niy.

Aty ahahumo ahabyizeka atahi ahahumo iakparawy.

⁴⁹ Niytahi Suão Sesus pe niy:

– O myhyrinymyrykytsa katsa maku hyrikoso sapybara azikwy humo nisiksiwyhikta tsinynaha niy, iwaze katsa tsispehakanaha: “Kyzekta niwazubakta tsikaha. Ikiakta mytyrykbyita tsikaha” – Suão niy.

⁵⁰ Sesus ispe niy:

– O awatutaha. Atahi ahahumo ahabyi zeka iwatahi mytuk moziknaha. Ikiahatsa tysioktyhyryknaha katuktsa moziknaha.

Samarija ezektsa Sesus humo batu yhỹ niaha.

⁵¹ Kyze Sesus tazo bo piksi naha soho zumukuze iwaze:

– O tapara Serusarēhe bo hi my – niy.

⁵² Niytahi kytsa taharaze nisipeha. Iwatsahi niukurunaha.

⁵³ Zumunahaze siwanu sapy ziberikinaha Samarija ezektsa batu yh̄y niaha. Sesus Serusarēhe bo niukuruze iwatsahi kytsa batu yh̄y niaha. Samarija ezektsa, Serusarēhe ezektsa humo batu siakparawy iwatsahi batu yh̄y niaha.

⁵⁴ Suāo, Tsiaku iwatsa nikozonehaze ipe niaha:

– O izo bijoikpe iknyky tynazipikta iwaze tysiharazohikta – niaha.

⁵⁵ Sesus uwok niyze nisibetsakik.

⁵⁶ Kyze usa hudikhudikwy bo niaha.

Sesus tuktsa niyziknahatsa soho humo nisihyrinymyryky.

⁵⁷ Iwatsahi mekybotu niukurunaha. Ske buruk niukurunahaze. Estuba maku Sesus pe niy:

– Uta kino ikia tuk. Ikia tuk paikpa mynakara – niy.

⁵⁸ Sesus ipe niy:

– Tsoromamatsaktsa tahahoke eze tu mynapykyryknaha. Piyktsa kino niwatihi tahasuk eze tu mynapykyryknaha. Utakta Deus zikpehata ahawata ikyzik batu kawanu sapyky. Ba haneze tohi zikuru – niy.

⁵⁹ Niytahi Sesus usta pe niy:

– Pany katukta! – niy. Maku ipe niy:

– Byrikta tapara kazo myziytykare – niy.

⁶⁰ Sesus tihi:

– Nihyrikosokdata ty ka arekety. Mohyrikosokdaze itukytsa tu piytyknaha. Ikia kino Deus wasania ty ityryktsa soho tytsasoko. Tapara Deus tsyhyryze tarabaja tsimy – niy.

⁶¹ Niytahi usta niwatihi niy.

– O mypehatsa uta ikia tuk mozihikik. Tapara katukytsa nasipehare “Aba mokuru my” – niy.

⁶² Sesus tihi:

– Ikia maku wata. Atahi wywyk myzibykyze iwaze tasukpe bo iktsa mykara. Paikpa iktsa mykara. Batu tarabaja ziky. Tarabaja ziky byizeka iwa mytakta ba Deus tukta zikyzyk. Iwa my zeka ba katukta babata zikyzyk – Sesus niy.

10

Sesus setēta doistsa nisipeha.

¹ Bykyze Sesus kytsa sizubarētsa nisipeha. Setēta doistsa nisipeha. Petok petokohotsa nisipehaka. Iharere sohowy tuk sihudikhudikwy taba niukurunaha. Iharaze niukurunaha. Deus wasania ty ziknapamykysokonaha. Bykyze Sesus siapik pomo sihudikhudikwy taba my.

² Sesus ispe niy:

– Katyryktsa mysizozikiknahatsa watsa. Wihara myzibakanaha. Waratok eze idisahawy niobara. Wihara nijakuk. Katsumuēhītsitsa batu sizuba. Iwatsahi waratok tsihitsa pe: “Ikiakta atsumuēhītsitsa wihara bo tysiakzokta!” Zisizoziknaha. Niobaranaha iwatsahi mysizoziknaha – niy.

³ – Aba tsimykurunaha. Uta pahapehaka. Kytsa ahahumo batu siakparawy. Ikiahatsa hozipyrykzatsa watsa. Hozipyrykza parinita tazaha eze tawata tsmoziknaha. Parini hozipyrykzatsa myzukbatsi tsihikik naha watsa kytsa pahasukyrykynaha. Kytsa ikiahatsa humo ba h̄y zikaha.

⁴ Iwaze ske buruk okyrysaro suk ty batu wabehyryktaha! Ahanamy ty ka pok pok byitaha! Ahapyrysuk byitsa tu tsimaha! Ske buruk pyk byitaha! Kytsa tsimysihobyknaha zeka, pamykyso pamykyso byitaha! Aidyktsa tsimaha! – nikara.

⁵ – Wahoro bo tsimypupunahaze wahoro eze ktsa pe tsimaha: “Deus ikiahatsa humo pahasapywyky” tsimaha – niy.

⁶ – Anaeze maku tsakurēta aharere bo yh̄ mykara. Wasani my. Aharere piakse wasani my. Anaeze kytsa zuba simysapybyikitsa maha zeka aharere bo hȳ ahabyi zeka. Deus ikiahatsa zuba pahasapywykyzo.

⁷ Wahoro tsimypupunahaze anaeze tsimypykyknaha. Tahadisahawy ty ahabo nyny mahaze, tsipahadisahanaha. Tahaopowy ty nyny mahaze niwatihi tsipikunaha. Kytsa sitsumuēh̄itsitsa bo tahadisahawy ty sihyrizik-tsokzawy humo nyny maha. Iwatsahi kytsa ahadisahawy ty ahabo nyny maha. Ahahyriktsokzawy humo ahadisahawy ty nyny maha. Mekta wahoro bo ka p̄o p̄o byitaha ataeze zuba tupykyknaha – niy.

⁸ – Sihudikhudikwy bo tsipomonahaze kytsa ahahumo sakurēta mykaranaha. Iwaze tahadisahawy ty nyny maha. Tsipahadisahanaha.

⁹ Anaeze simyiziubyitsa tyszororowynaha. Anaeze sihudikhudikwy eze ktsa pe: “O Deus tyryktsa ikiahatsa bo mozumunaha tsimaha” – niy.

¹⁰ – Sihudikhudikwy bo tsipomonaha zeka kytsa ahahumo batu siaku mykaranaha. Tsiksinaha.

¹¹ Tapara siwahoro eze ktsa pe tsimaha:

“Ahahudikhudikwy eze ky jytyk tazyk mypyrysuktsa humo pyryk my zeka. Wytyk tazy ty ka dydydy aretaha ‘Deus tyryktsa ikiahatsa bo zumu. Ikiahatsa Deus harere bo batu waby tsimaha’ tsimaha” – niy. Wytyk tadydy kino natōze ana humo ziwatawy.

¹² Sesus wasani nikara iwaze ahape:

– Kytsa Sodō eze ktsa sisopyksapybyikitsa tu nikaranaha iwatsahi sinini mykaranaha. Nawa puruze Deus sisopyksapybyitsa pe my “O ikiahatsa hi batu ahamysapy” my. Sodō eze ktsa sinini mykaranaha. Ahahudikhudikwy eze ktsa abazuba haty sinini tsimykaranaha. Kytsa anaeze sinini mykaranahatsa. Deus harere humo waby ahabyitsa hi sinini mykaranaha – niy.

Sihudikhudikwy eze ktsa simysapybyitsa nikaranaha iwatsahi batu sispirikpo.

¹³ – O Tsoatsī inarokoha sihudikhudikwy eze ktsa sinini mykaranaha. Kaharere bo batu yh̄ mykaranaha iwatsahi sispirikpobyitsa tu sinini mynakananaha – niy.

– O Beseza inarokoha anaeze hudik mykaranahatsa sinini mykaranaha. Kaharere bo yh̄ ahabyitsa hi sinini mynakananaha. Anahi kazikwy zynynaha. Atsawatu zeka Tiro hudikhudikwy eze ktsa bo mykaranaha. Atsawatu zeka Sodō hudikhudikwy eze ktsa niwatihi tubabatu Deus harere bo hȳ nikaranaha. Simysapybyitsa nikaranahatsa kino pimoewynaha. Asahi kazikwy zynynaha zeka simysapybyitsa tu nikaranaha pimoewynaha. Iwaze izohyri ty tahapiakwatahakanaha tahasopyk tihi nikaranaha. Kytsa bo ziwatawykynaha simysapybyitsa tu nikaranaha ana hi zimoewybaiknaha. Nawa zuruze Deus simysapybyitsa pe:

“O ikiahatsa batu ahamysapy tsimaha” my.

¹⁴ Nawa zuruze kytsa Tiro eze ktsa jokboha zuba sinini mykaranaha. Kytsa Sodō eze ktsa niwatihi jokboha zuba sinini mykaranaha. Ikiahatsa hi sininitohi tsimykaranaha niy.

¹⁵ Ikiahatsa Kaparanaū eze sihudikhudikwytsa. Anaezektsa tihi:

“O katsa zuba myhyrinymyrētsa” iwatsahi bijo bo ahabyitsa mytsaty tsimykaranaha. Batu ba. Ikiahatsa izo bo pahaoktsoktsokik iwaze sininitohi tsimykaranaha – niy.

¹⁶ Zinymyrykynahatsa pe nikarazo:

– Aty ahaharere piwaby zeka atahi pikwaby. Aty ahaharere ty waby byizeka uta kaharere humo kino niwatihi ba waby zikaha. Aty kaharere bo yhy ahabyi zeka atsawatu zikpehata harere bo batu yhy ziky – nikara.

Nisipehanahatsa sizubarętsa setęta doistsa ziksizonahatsa.

¹⁷ Kyze Sesus nisipehakanahatsa sizubarętsa setęta doistsa ziksizonaha. Sakurętsa nikaranaha. Sesus bo nipamykysobanaha:

– O mypehatsa hyrikoso sapybara myharere humo hyhy nikaranaha. Ikia naro humo tsiksiakzonahaze tsiksisiwyhiknaha. Azikwy humo zipobaiknaha – niaha.

¹⁸ – Yhy niy. Iwaze hi Satanas bijoikpe ikny wytyk bo inasik inyhyk bijo papaizo niaha waha.

¹⁹ Wabytaha! Uta ikiahatsa bo kazikwy ty botu nyny iky. Ikiahatsa pyryhyk bete tsimyzonaha zeka ba zahasisi. Ikiahatsa pikzaha bete tsimyzonaha zeka ba zahahohoro – niy. – Batu amy tohi ahamyiwyky. Ahasukyrytsitsa humo ba zahamyiwynaha – niy.

²⁰ – Ikiahatsa hyrikoso sapybara ahaharere humo yhy mykaranaha ana humo kino ahaku byitaha. Ikiahatsa ahakurętsa ahanaro bijoikpe eze Deus botu ziwatahaka, ana humo hi ahakurętsa tsimykaranaha – niy.

Sesus sihumo tsakuręta nikara.

²¹ Kyze Deus hyrikoso humo tsakuręta. Deus bo nipamykysoko:

– O kazo ikia zuba abazubata. Ikia hi bijoikpe ezektsa pehatsa. Ikia hi mybarawy ezektsa pehatsa. Ikia zuba wasani tsinakarata. Iwatahi sihyrinymyřętsa bo hawa tsimykara ziokpitsi. Batu isty watawy. Sihyrinymyřętsa papatu batu isty watawy. Sizubarętsa sihyrinymyrybyikitsa hawa tsimykara tsiksiwatawyky. Kytsa jabasitsa watsa hi tsiksiwatawyky. O Deus kazo yhy my. Wasani tsimykara. Iwa tsimyzihikik ana humo hi tsimysiwatawyky – niy.

²² – O kazo ikia hi anamy ty kabo nyny tsiky. Ba aty tohi taja itse ziky ikatahi zuba. Kazo zuba. Niwatihi ba aty tohi taja kazo ziky ikatahi atse babata zuba zany. Asa kino mysiwatawy tsihikik. Iwa hy – niy.

²³ Niytahi Sesus tuk zinymyrykynahatsa asa bo zuba nipamykysokozo.

²⁴ – Kytsa ikiahatsa wa pinynaha zeka sakurętsa moziknaha. Tubabatu Deus sohokotsa ziny tsihikiknaha hawa Deus mykaranaha batu sinyhy. Ikiahatsa botu tsiknynaha. Ispehatsa kino niwatihi zinytsihikinaha amy ty tsipinykynaha batu sinyhy. Hawa ha ty tsipiwabykynaha, ziwaby tsihikiknaha batu siwabyhy – Sesus nikara. Iwa zinymyrykynahatsa bo nipamykysoko.

Samarija ezekta asiba nihyrikosokdata humo tsimypokzitsiaręta nikara.

²⁵ Deus harere watahatsa Sesus bo zumu. Sesus zispirikpobyisohoko ata tihi nikara. Iwaze ipe niy:

– O myhyrinymyrytsa, hawa skaraba my iwaze mohyrikosokdaze uta Deus bo kawahi mynapykyryk – niy. Iwa nipamykysoko Sesus zispirikpobyisohoko.

²⁶ Sesus:

– Deus harere botu ziwatahaka. Hawa ty skaraba iwatahaha tsinymyryky – niy.

²⁷ Sesus pe niy:

– Botu ziwatahakanaha. Deus humo tsamypokzitsiukręta! Deus humo aspirikporęta zeka iharere bo hyhy tsimykara. Deus bo mytsatzyiu tsimykara. Deus iakparawy. Deus tsyhyryze tarabajaziu tsimykara. Tsapaikręta tu itsyhyrypeze ahyriziktsokzawy humo tsimykara. Tsipinymyry zuba hawa

Deus mytsaty nikara. Aotutsa pauksitsa tynasipokzitsiki, ahumo tu tawata tsinakara nahawa tihi. Iwa tsimyzuruku – niy.

²⁸ Sesus ipe niy:

– Wasani tsimy. Nawaze kytsa sisopyk niytahi Deus tawahi mynapykyk – niy.

²⁹ Deus harere watahatsa mytsaty nikara:

– Uta zuba wasani – my. Ta maku ustsya kytsa batu iakparawy. Ta bo zuba mytsaty mykara. – Myzubaha pe batu katukytsa ziky – mytsaty nikara.

³⁰ Iwatahi Sesus pe nikara:

– Amatsa sa kaotutsa pauksitsa – niy. Sesus zispirikpoko:

– Kyze estuba maku Serusarēhe iknykta ske buruk Serikoho bo inaukuru. Inaukuruze sityhyryboarēnikitsa maku nizukbatsihiknaha. Isuk zibobobaiknaha. Nitsakikinaha. Maku zipypykyknaha iwa asiba zibezena. Inamy zebykbaiknaha. Iwaze zerekeknaha.

³¹ Iwaze maku Deus wahoro eze ziknapamykysokota Serikoho bo niukuru niwatihi. Ibo nikozone ziharamu zuba. Tatuky asiba nihyrikosokdata ziharamu. Batu ibo iktsa niy. Usta ske buruk ziharapuwyhik.

³² Iwaze Deus wahoro eze ziknasitsumuēhīkīta zumu. Usta ituky zumu. Asta buruk tu inaukuru ata kino asiba nihyrikosokdata zinyze ziharamu zuba. Usta ske buruk ziharapuwyhik. Iwaze ske buruk niukuru.

³³ Iwaze usta maku Samarija ezekta inaukuru. Atakta bipyri asiba nihyrikosokdata zinyze ihumo tsimpokzitsiarēta nikara.

³⁴ Iwaze asiba nihyrikosokdata bo tadyhy. Ikiwytsa sapy panu ty ziaakwaraka. Zihipepeke. Oreo ty ikiwy sapy bo zitsykykyk. Ziharasusuku. Duabohotsa tsik ty zipiakurukuk iwa. Iwaze tarara bete zihwiky. Sisukmotsa wahoro bo ziokyhyryk. Maku asiba nihyrikosokdata humo tsimpokzitsiukrēta. Sisukmotsa wahoro bo niy.

³⁵ Byi zuruze sisukmotsa wahoro tsihita petok okyrysaro parata ty ibo nyny niy. Asiba tabezewyta iwahoro eze zereke. Iwaze wahoro tsihita pe niy:

“Tsiwokzitsiki ja. Okyrysaro tsišpepyk zeka myziksizoze okyrysaro ty puētsik abo nyny my” niy. Iwaze tsihita yhī niy, okyrysaro ziaakse – iwa Sesus nipamykysoko.

³⁶ Iwatahakatsa pe niy:

– Aty sa asiba nihyrikosokdata tukta my. Aty sa iotutsa pauksitsa – niy.

³⁷ Iwatahakatsa:

– O atahi imypokzitsiukrēnikita niy. Atahi itukta babata – niy. Sesus:

– Yhī niy. Iki tsiksikta. Bipyri wata tsimykara. Samarija ezekta wata tsimykara – niy.

Iwa Sesus bipyri soho ty nipamykysoko. Bipyritsa itukbabata niy.

Sesus Mata Maria ahaza bo nikozore.

³⁸ Kyze niukurunaha. Sesus zinymykyrynahatsa tuk niukurunahaze myzubahabara bo izumunaha. Anaeze Mata wahoro bo nitsuk.

³⁹ Maria Mata tsy niy. Atatsa hi Sesus harere ziwabyzi. Ipyrytsa baze nidyhyky. Atatsa iharere ziwabytoktoko.

⁴⁰ Ieky katsa bu nikara. Mydisahawy humo tsihyriziktsokzaharētatsa nikara. Iwatatsahi Sesus bo zumu. Ipe niy:

– O mypehatsa. Iki batu iktsa ziky. Katsy ba ziktsumuēhī. Ikza zuba mynakara, iki katsy pe tsimy: “Aiky tsitsumuēhīktsa” tsimy – niy.

⁴¹⁻⁴² Sesus atatsa pe niy:

– O batu, ikia hi paikpa mytsaty tsimy kara, tsahy rizi ktsokdaha rētatsa hi. Maria zuba wasani my kara. Tisapy rēna piwabyky. Hawa pinymy ryky ba aty tohi jekze zia kse – Sesus niy.

11

Sesus Deus bo mopamykyso naha soho humo nisihyrinymyryky.

¹ Kyze Sesus Deus bo nipamykysoko. Nepy kze zinymyrykyta ipe niy:

– O myhyrinymyrytsa katsa tymyhyrinymyry. Hawa Deus bo tsimypamykysokonaha tymyhyrinymyry. Deus bo tsimypamykyso tsihikiknaha. Tymyhyrinymyry Suão wata. Suão tatuktsa nisihyrinymyryky. Hawa Deus bo mopamykysonaha nisihyrinymyryky.

² Sesus ispe niy:

– Deus bo tsimypamykysonaha zeka nawa tsimaha.

“O myzo! Atyryktsa parakbaha abo mytsaty mykaranaha

‘O atahi imysapyrēnikita batu aty tohi humo asapyzēkyhu.

Ikia zuba abazubata. Aparakbaha atyryktsa moziknaha.

O ikia zuba tsamysapyrēta’ tsimaha” maha.

Mybarawy ezektsa aharere bo hyỹ mahaktsa!

³ Mydisahawy humo tyzibytuhukutu

mybo nyny tynakara.

⁴ Mysapybyitsa tu tsimykaranahaze iwatsa tu tymyokzo.

Katsa kino niwatihi. Kytsa mybo simysapybyitsa mykaranahaze batu

mytsaty tsimaha,

sihumo tsimyokzonaha.

Katsa aharere bo batu ma tsimaha zeka tynamytsumuēhikta iwatsahi isapybara bo ka batu yhỹ tsimaha.

Iwa tsimaha. Deus bo ikiahatsa tsimypamykysonahaze iwa tsimaha – Sesus nikara.

Niytahi Sesus nisihyrinymyryky. Kyze isukmota soho humo ziwatawyky.

⁵ Sesus tihi:

– Amo skaraba tsimy. Unopokte ikia atukta bo ja tsimykuru. Ipe tsimy: “O katukta atsikara ty harakykbyi kabo nynytyny.

⁶ Aba usta katukta izumu tahi mykara. Isukmota kawahoro bo zumu. Batu amy tohi ty ibo nyny ziky” tsimykara.

⁷ Atukta tawahoro eze tu hawa ja kape my:

“O batu tsipikykniki. Iwatahi hokbowy zihokbohik. Uta kahyrytsa tuk purubaka. Ba kyik ziky. Ba kadisahawy ty abo nyny ziky” niy. Iwa sa my – Sesus nikara.

⁸ – Iwaze atakta atukta humo batu kyik. Iwata tu kyik my. Pikykniki naha humo kyik my. Ata bo atsikara ty nyny my – niy. Iwa Sesus isukmota soho humo nisihyrinymyryky.

⁹ Sesus tihi:

– Iwatsahi tsimyzapykykynaha zeka Deus ahabo nyny my. Deus bo tsipiberikinaha zeka tsimozikahanaha. Hokbowy eze huahua tsimaha zeka hokbowy ty zoksapare my.

¹⁰ Kytsa Deus bo myzapykykynaha zeka asahi piaksenaha. Kytsa Deus piberikinaha zeka mozikahanaha. Kytsa hokbowy baze huahua mahaze hokbowy zoksapare my. Deus bo tsizapykykynaha zeka, kytsa watsa asahi hokbowy baze huahua maha – nikara. Sesus nipamykysokozo.

¹¹ – Aty ahatukze izo zeka iwaze atse ape my zeka “O kazo piknu ty kabokta!” myze, ikia atse bo pyryhyk ty ba nyny ziky.

¹² Atse ape my zeka “O kazo kokuaro kare ty kabokta” myze ikia atse bo pikzaha ty ba nyny ziky.

¹³ Ikiahatsa ahasapybyitsa tu tsimykaranaha zeka iwatsa tu amy ty tisapyrēna ty ahyrytsa bo nyny tsimaha. Myzo hi bijoikpe eze tuze atahi imysapyrēnikita babata. Atahi ikiahatsa bo isapyhanikia ty zuba ahabo nyny mynakara. Deus bo ihyrikoso tsimyzapykykynaha zeka iwaze tahyrikoso ahabo myzapikso iwaze ahatuk mynapykyryk my hỹ – nikara.

¹⁴ Iwa Sesus sibo nitsasoko.

Kytsa Sesus Beresebuhu humo ihyrikoso sapybara ziksiwyhik mybarapetu nikaranaha.

Niytahi Sesus ihyrikoso sapybara ziksiwyhik. Maku iharerebyita, ihyrikoso sapybara humo batu harere ziky. Sesus zizororowyze nizororota nitsasoziuku. Kytsa sizubarētsa paikpa iktsa nikaranaha siwastuhutsa nitsasokonaha.

¹⁵ – Beresebuhu, Satanas usa naro hyrikoso sapybara pehatsa zikwy humo hi Sesus iharerebyita zizororowy. Satanas humo hyrikoso sapybara nisiksiwyhik. Iwatahi maku zizororowy.

¹⁶ Utsa nimysapykykynaha:

– Ikia mytsyhyryze azikwy Deus ikny mybo tsipiwatawyky. – Nimysapykykynahaze Sesus harere zisapybyi tsihikiknaha. Sesus humo sispirikpobyitsa tu iwatsahi iharere zisapybyi tsihikiknaha. Sesus sisoho humo tsihyrinymyrēta mytsaty nikaranaha.

¹⁷ Ana humo hi mysihyrinymyryky. Niytahi Sesus sibo nipamykysoko:

– Ikiahatsa kazikwy humo batu ahaspirikpo. “Deus zikwy ty batu ibo nyny niy” tsimaha. Iwa ikiahatsa tsikpamykysokonaha. Deus zikwy ty kabo nyny my hỹ. Satanas kazikwy nyny my zeka hawa piwatahawy.

¹⁸ Ityryktsa myharape banaha zeka mopyknaha. Nawaze kytsa metutu mokmyinaha iwaze mysiakbabaiknaha. Niwatihi wahoro ezektsa myharape banaha zeka mopyknaha. Iwaze asahi metutu mokmyinaha. Niwatihi Satanas tuktsa myharape banaha zeka mopyknaha. Myakbabaiknaha. Ikiahatsa tsimyspihikbatakanaha “O tahi hyrikoso sapybara nisiksiwyhik Beresebuhu zikwy humo tsimaha” niy.

¹⁹ Atuktsa ja. Aty zikwy humo atuktsa hyrikoso sapybara mysiksiwyhiknaha Utakta wasani mynakara. Hyrikoso sapybara mysiksiwyhikze Deus zikwy humo zuba my. Anahi atuktsa piwatawykynaha.

²⁰ Abaka Deus tyryktsa ikiahatsa bo mozumuku ana hi piwatawyky. Kazikwy abazubata. Maku tsipaikrēta wata.

²¹ Maku tsipaikrēta tsiparakyrēta tawahoro ty pykyhytu taparakytsa tuk. Sitsyhyryboarētsa batu ibo paku zikaha.

²² Usta maku ipaikanikita tu zeka iwahoro bo inatsukze taparakytsa humo taspiahikik iwata tu batu ipaikik. Iwaze usta hi inamy pebykba. Zepykyk. Inamy pibiakba. Iwaze utakta ipaikanikita wata kazikwy abazubata – Sesus niy.

²³ – Aty batu katuk zeka, atahi kape batu yhỹ my. Aty katy tsumuēhĩ byizeka atahi kytsa metutu myokmyinaha – Sesus niy.

Hyrikoso isapybara ziksizota.

²⁴ Sesus nipamykysokozo:

– Hyrikoso isapybara maku ekze poize pitabaka zuba. Ata taty byryhabyita tu pitabaka zuba. Hyrikoso isapybara itseheha bo pitabaka. Tasapy piberiki. Tawanu sapy ty batu tykaha. Iwatahi ihyrikoso sapybara tapetu isopyk:

“Kawahoro bo piksizo. Nezeba maku ekze ikoik tabo tu piksizo” niy. Hyrikoso isapybara izoihikze maku tsakurêta. Hyrikoso isapybara nihok-daze tsakurêta nikara. Kyze ihyrikoso sapybara maku bo ziksizo.

²⁵ Zumukuze maku wahoro wata. Wahoro tsiziurêna. Zizozoko itsytsykyha niy. Ta humo tuk mytsaty niy.

²⁶ Tisapyrêna. Niytahi niparakzo. Utsa hyrikoso sapybara sete hyrikoso sapybara nisihobyk. Hyrikoso sapybara iwanu sapy bo mynasioktyhyryk. Maku bo mozumunaha. Ituk mynapykyryknaha.

Tapara ihyrikoso sapybara estuba ituk maku batu iaku. Abaka hyrikoso sapybara sizubarêtsa ibo pororo mykaranaha iwatahi tisukatsihikrêta babata mynapykyryk – Sesus nikara.

Hawa mykusukninaha baba naha humo nisihyrinymyryky.

²⁷ Sesus nipamykysokoze atatsa hi myzubaha tazaha eze opykani Sesus okze nipamykyso nawa ipe niy:

– Aje tsakurêtatsa. Atatsahi tabykyhy humo tsakurêtatsa atatsahi ikia pykyhytu ziknakara. Ikia humo tsakurêtatsa – niy.

²⁸ Sesus atatsa pe niy:

– O asahi Deus harere piwabyziukunaha. Iwaze iharere bo hỹ mykaranaha, asahi sakurêtsa babatsa mynakaranaha – Sesus nikara.

Sizubarêtsa iwatahawy nizapykykynaha.

²⁹ Kytsa sizubarêtsa harape bo inakypykyknahaze Sesus ispe niy:

– Abaktsa kytsa batu simysapy nikaranaha. Kahumo batu sispirikpo. Iwatsahi iwatahawy myziberikinaha. “Deus zipehata mybo tyziwatawykta!” mykaranaha. Batu yh̃ my. Sonas wata mysiwatawy.

³⁰ Sonas wata pahawatawy – niy. – Tubabatu Sonas Deus zikwy Ninewe ezektsa bo ziwatawy. Tapara Deus Sonas Ninewe ezektsa bo ziakezo ziwatawy. Iwata utakta Deus zikpehata ahawata ikyzik abaktsa kytsa Deus zikwy piwatawyky. Tapara Deus zikykezo abaktsa kytsa bo piwatawy – niy.

³¹ Niytahi Sesus nikara. – Uta kahyrinymyrêta ikzumu, ikiahatsa kahumo batu ahaspirikpo. Kytsa mynahyryzikpobanahaze Deus simysapbyitsa pe my:

“O ikiahatsa batu ahamysapy iwatsahi sinini tsimynakaranaha” my. Niytahi atatsa Seba tyryktsa tuk ispehatsata niyzik. Atatsa hi mynahyryzikpoze. Abaktsa kytsa niwatihi aiba tohi mynahyryzikponahaze. Atatsa tihi:

“O asahi simysapybyikitsa tu nikaranaha, ana hi piwatawyky. Tubabatu ikza nokponi ikukuru. Soromao ihyrinymyryta babata harere myziwabyre. Tsihyrinymyrêta harere piwaby tsihikik” – niy. Sesus:

– O abaktsa kytsa kaharere bo batu yh̃ maha. Uta abazubata myhyryzikwyta kaharere bo batu yh̃ niaha – nikara. – Kytsa mynahyryzikpobanahaze aiba tohi Deus simysapybyikitsa bo “O ikiahatsa kahumo batu ahamysapy” my. Ahamysapybyitsa tu tsikykaranaha iwatsahi sinini ykarawy bo tsimynakaranaha my – niy.

³² – Niytahi Ninewe ezektsa mynahyryzikponahaze asahi abaktsa kytsa pe:

“O ikiahatsa batu ahamysapy tsikaha” mykaranaha. Ahamysapybyitsa tu tsikykaranaha tsipiwatawynaha. Iwatsahi Ninewe ezektsa tamysapybara ty nikaranahatsa zimoewyhiknaha. Deus harere ziwabynahaze imysapybara zimoewynaha Sonas harere humo. Deus harere bo hỹ nikaranaha – niy.

– Abaktsa kytsa hi kaharere bo batu yh̃ mykaranaha. Uta myhyryzikwanita babata kaharere bo batu yh̃ zikaha – Sesus nikara.

Rika soho humo nisispirikpoko.

³³ Sesus rika soho humo nisispirikpoko.

– Myhyriziktsa rika watsa – niy. – Ba aty tohi rika mozipokze miha papa ba okpitsĩ ziky. Ba peryk pukezi zik ziky. Rika mozipok zeka jo baze zik my. Aty mynatsukze mypubyĩ mozikze zinytokto – niy.

³⁴ – Myhyriziktsa rika watsa ahanamy bo sihumo iktsa tsimaha. Ahahyriziktsa humo tuzu byizeka ikiahatsa okze mypubyri mozik. Ahahyriziktsa sisapy byizeka ikiahatsa miwa ezektsa watsa. Ba zikozonaha unata ky wa. Maku ihyriziktsa humo tuzu byizeka tsakurēta mykara maku wata atahi mypubara buruk mokuru.

³⁵ Iwatsahi pykyhytu tynakaranaha rika mypubara ahatukze ba miwa ziky.

³⁶ Kyze ikiahatsa mypubyri mozik zeka ba miwa ziky. Ikiahatsa atawahi mypubara buruk mokuru tawata. Atawahi zeka rika wata amypubyrizo. Nakyoknahaze kywa – nikara.

Sesus Pariseutsa iwaze tapara Moises harere humo zinymyrykynahatsitsa soho humo nitsasoko.

³⁷ Sesus nipamykysobaze Pariseu ziazkoko:

– Kawahoro bo tsikadisahakta! – niy.

Yh̃ niy. Sesus iwahoro bo nitsuk. Idisahawyzozowy baze nidyhyky. Pariseu Sesus bo nikozotoktoko. Sesus itsyhyrype pikihybyita tu tadisahaka. Iwatahi ibo nikozotoktoko.

³⁸ Niytahi Sesus ipe niy:

– Ikiahatsa Pariseutsa ahamypewytsa ahaokporosuktsa kino niwatihi sisupetaba zuba tsinasipikknaha.

³⁹ Ikiahatsa Pariseutsa mypewytsa watsa. Mypewytsa isupetaba zuba tsibabarētsa. Joke tabaka nioktsirōrō. Hawa mytsaty tsimykaranaha batu wasani tsikaha. Simysapybyikitsa tu tsikykaranaha. Ahazokdiharētsa.

⁴⁰ O ahatyryksapybyitsa tu tsimaha. Atakta isupetaba tsispeharazyky, zikino ioketaba niwatihi tsimaha – niy.

⁴¹ – Ahadisahawy ty sinamybyitsa bo nyny tsimaha. Sihumo ahamypokz-itsirētsa hi iwatsahi sibo nyny tsimaha. Anahi wasani my. Iwaze Deus ahape my: “O atakta tsimysapyrēta mozik” – my.

⁴² – O Pariseutsa sinini tsimykaranaha – Sesus nikara. – Ahanamy tsihohokrēnaha zeka estuba Deus bo nyny tsimaha. Wasani tsimaha. Iki-ahatsa ahadisahawykykywy ty Deus bo nyny tsimaha. Kytsa humo batu ahamysakihiky tsimaha. Iwatsahi Deus harere bo batu yh̃ zikaha – niy. – Ahanamy tsihohokrēna zeka estuba Deus bo nyny tsimaha. Iwa tsimaha zeka wasani tsimykaranaha. Utsa humo kino niwatihi tsimaha! Ahanamy tsihohokrēnaha zeka sinamybyitsa bo nynytaha. Sizubarētsa humo ahamysakihikrētsa. Iwa tsimykaranaha – niy.

⁴³ – O Pariseutsa sinini tsimykaranaha. Batu ahaku tsimoziknaha. Iki-ahatsa Deus wahoro eze ahadyhydyhywytsa sisapyrētsa zuba ahakparawy tsimaha. Kytsa pahahobyknahaze ahahumo siharereziurētsa ana hi ahakparawy. Kytsa mynakaranaha bo zuba mytsaty ahasopyk – niy.

⁴⁴ – O Pariseutsa sinini tsimykaranaha. Ikiahatsaktsa mytyk watsa. Mytyk iokpitsĩha niaha. Kytsa sinymyrybyitsa hi mytyk humo nipaparekenaha iwatsahi batu wasani aha – nikara.

⁴⁵ Niytahi estuba Deus harere ihyrinymyrykyta Sesus pe niy:

– O myhyrinymyrykytsa iwaze ikia za tsimymysapybyikikta – niy.

⁴⁶ Yh̃ Sesus niy. – Ikiahatsa niwatihi. Ikiahatsa sinini tsimykaranaha. Kytsa paikpa tysiakzo: “O taparaktsa harere bo pykyhytutaha! tsimahaktsa.” tsimykaranaha. Ikiahatsa taparaktsa harere bo batu yh̃ tsikaha. Ikiahatsa

kytsa bo yh̄y ahabyi zeka, Deus ahahumo batu imypokzitsi tsimaha. Iki-ahatsa ja. Kytsa taparaktsa harere bo batu zikahaze, ikiahatsa batu isty tsumuēh̄. Iwatsahi sinini tsimykarana — niy.

⁴⁷ — Ikiahatsa Deus sohokotsa siytyk sapyrētsa tsinazoknikinaha. Asatu taparaktsa ahadiritsa nisibabaiknaha.

⁴⁸ Iwatsahi tsipiwatawykynaha hawa taparaktsa nikaranaha ikiahatsa yh̄y tsimykarana. Ana kino tsipiwatawykynaha Deus tsihyrinymyrēta.

⁴⁹ Iwatahi tubabatu Deus tihi:

“Kapehatsitsa, kasohokotsitsa kino niwatihi sizubarētsa bo nisipehaka.” Wastuhu nisibakanaha. Mektsaktsa nisisukyrykynaha.

⁵⁰ Tapara nisibakanaha. Abaktsa kytsa kino Deus sohokotsa mysiba tsihikiknaha. Taparaktsa tuk yh̄y maha. Tapara Abeu tabezewy. Ziharawy Sakarias Deus wahoro eze zibezena.

⁵¹⁻⁵² — O Deus harere sihyrinymyrykytsitsa sinini tsimykarana. Iki-hatsa imysapyha tsiokpitsikinaha. Iwatsahi Deus humo batu ahaspirikpo. Ikiahatsa isapyha humo batu ahakparawy iwatsahi ustsya kytsa bo ba nyny zikaha. Iwatsahi asahi ahahumo batu sihyrinymyry. Ikiahatsa humo batu sispirikpo — niy.

⁵³ Sesus niparakze Pariseutsa, sihyrinymyrykynahatsitsa ahatsa Sesus humo tahakyrikinaha. Iharere ziwabyziukunahaze. O Sesus batu imysapy nipamykyso tsihikiknahaze iwatsa tu batu zikaha.

⁵⁴ Iwatsahi Sesus tsipa humo ziocky tsihikiknaha.

12

Myspihikbatawy soho humo nisihyrynymyryky.

¹ Myzubaha Sesus bo inauzuzukbanaha, iwaze niharapebakanahatu. Niy-tahi Sesus tuk zinymyrykynahatsa pe niy:

— Pykyhytutaha! Pariseutsa harere humo pykyhytutaha! Pariseutsa tihi: “katsaktsa zuba wasani tsimaha” iwaze mytsaty ahabyitsa nikaranaha. Batu ba, mybarapetu nikaranaha.

² Hawa ha ty kytsa papatu tsimahaze iwaha humo tu kytsa pinymyryrynaha. Hawa ha ty tsiksakzikinaha humo tu kytsa pinymyryrykynaha.

³ Hawa ha ty ikiahatsa miwa eze tsikpamykysokonaha ana hi kytsa mypubara piwabykynaha. Hawa ha ty awahoro eze tsiktsasokonaha iwahatu ahahudikhudikwy eze opykani mopamykysonaha — niy.

Aty pokso sa mypyby.

⁴ Sesus nipamykysokozo:

— O katukytsa! Ahapyby byihu ja! Kytsa pahabanaha sipokso ahapyby byihu ja! Asaktsa pahabanaha zeka iwaze batu zikaha. Batu amy tohi zikaha.

⁵ Ahahyryzikararawy ba ziksibanaha iwaze sipokso batu ahapyby Deus pokso zuba ahapybyrētsaktsa! Atahi kytsa mohyrikosokdanahaze sinini ykarawy bo mymypeha ziky. Iwatsahi Deus pokso ahapybyrētsa!

⁶ Kyze nawa mytsyhyry wa piyktsa hana wa skaraba sihuak ty okyryrsaro ty nyny maha “O tsikaeni zuba nyny tsimaha”. Deus ta piyk tsibik humo ba zikspiriktsokda.

⁷ Deus tsihyrinymyrēta sihumo tsimypokzitsiarēta. Iozeka tsipokzitsarēna. Ikiahatsa ja. Deus hi ahasoho humo tsihyrinymyrēta atahi ahahumo tsimy-pokzitsiukrēta — Sesus nikara.

Kiristu katukta my. Kiristu batu kanyhy my, ana soho humo nisihyrynymyryky.

⁸ Sesus ispe niy:

– Utakta Deus zikpehata ahawata ikyzik. Ikiahatsa kytsa okze: “Uta Sesus tukta my. Sesus iny” tsimaha. Ikiahatsa tsimytsasokonaha zeka uta niwatihi my. Bijoikpe iknyktsa Deus tsumuëhĩtsitsa okze uta tihi: “Atakta katukta atahi iny” my.

⁹ Ikiahatsa kytsa okzeka: “Sesus batu kanyhy tsimaha”. Nawa tsimytsasokonaha zeka uta niwatihi. Bijoikpe iknytsa Deus tsumuëhĩtsitsa okze: “Atakta batu kanyhy” my.

¹⁰ Aty kasocho humo tsiharerewabymybarëta zeka imysapybara tu mynakaranaha iwatsa tu Deus mysiokzohik. Aty Deus hyrikoso humo tsiharerewabymybarëta zeka imysapybara tu mynakaranaha atahi Deus ba zikokzowy my – niy.

¹¹ – Kytsa ahatsipa humo pahaoktyhyryknaha zeka ispehatsitsa okeryk tsimytsasonaha, Deus wahoro bo pahaoktyhyryknaha zeka ispehatsitsa okze tsipahabetesanaha.

¹² Iwatsahi ba paikpa mytsaty zikaha. Iwatahi Deus pahatsumuëhĩ pahahyrinomyry. Ahaharere Deus hyrikoso humo mytsaty tsimaha iwatsahi atahumo ahahyrinomyrëtsa iwa pahatsumuëhĩ – Sesus niy.

Tsinamyrëta imytsatyhybyita.

¹³ Maku estuba myzubaha tazahara eze Sesus bo nipamykysoko:

– O myhyrinomyrykytsa kaziky pe tykta “Azo nihyrikosokda. Aba azo hyrikyky ty tsapukte buruk atsy bo nynyty tsimy” – niy.

¹⁴ Sesus ipe niy:

– Batu aty tohi kape nawaty aha. Ikia hi myharere bo wabyty tsimy, mynamy soho tsimytsasoko – niy.

¹⁵ Wabyziutaha! Ispe niy:

– Pykyhytutaha! Ahasorokbyihu ja! Pykyhytutaha ahanamybyihuktsa. Nanabyi humo tsipahanamy tsihikinaha zeka batu Deus tuk zikykykyknaha. Deus kytsa nisisukni iwatsahi Deus tuk mynapykyryknaha. Kytsa mynamy bo zubabyitsa Deus nisisukni – niy.

¹⁶ Niytahi Sesus nipamykysoko. Tsinamyrëta soho kytsa bo ziwatawyky ispe niy:

– Kyze maku estuba tsinamyrëta waratok tadisahawy ziubara niy.

¹⁷ Iwatahi tsinamyrëta tatuk tuka mytsaty nikara:

– Hawa sa my. Hana bo sa kadisahawy pidodo.

¹⁸ Iwatahi kadisahawyzozowy piparahik. Iwaze ustsahawy zozowy mozukni. Disahawy zozowy zuba puëtsikbyita mozukni. Iwaze hi kadisahawy pidozik. Kanamy niwatihi wahoro zuba tabo pidodo – niy.

¹⁹ Iwatahi tapetu nikara:

– O abaka kakurëta. Pikybyry pikuikik kakurëta mozik! Kadisahawy tsizubarëna ty hauk my. Kanamy kino tsizubarëna ba zikpykba – niy.

²⁰ Deus hi tsinamyrëta pe niy:

– O ityrykmyita. Ikia mytsatybyita tu kyze unata tsipomoza. Tsipomozaze ahyrikoso sa hana bo my. Anamy ja. Aty baze sa anamy motare. Nezeba anamy tsidodoko. Aty baze sa anamy mopykyk – niy.

²¹ Sesus tihi:

– Kytsa ustsahawy mysisapywyknaha zeka sinamy Deus baze dodo maha. Asaktsa ba tahanamy pidodonaha zeka asahi tsinamyrëta wata imytsatyhybyita – niy.

Deus humo sispirikporëtsa babatsa.

²² Iwaze Sesus sibo mynamy soho nisispirikpoko. Zinymyrykynahatsa pe niy:

– Ahanamy bo ka mytsaty mytsaty byitaha. Iwa zeka paikpa mytsaty tsimykarana “O amy ty sa tsimymydisahanaha ba zikaha. O amy ty sa mysuk tykorobyk tsimaha ba zikaha.” Ahadisahawyky zeka wasani tsimaha. Ahasukok zeka wasani tsimaha.

²³ Ikiahatsa hi iwatsa tu tsimyzokonaha Deus baze mywahi tsimynapykyryknaha zeka mysapyrēnikia baba niy.

²⁴ Piyktsa bo iktsaziutaha! Piyktsa tahadisahawy ba ziksipariknaha, ba tahadisahawy zizoziknaha ba ziktahatsohoknaha. Wahoro eze batu sidisahawy zozowyky. Deus piyktsa humo tsimypokzitsiarēta sidisahawy ty sibo nyny isopyk. Piyktsa bo sidisahawy ty nyny mynakara.

²⁵ Deus ikiahatsa humo tsimypokzitsiarēta. Amy skaraba ana bo hi mytsaty tsimykarana. Mytsatyziu tsimaha zeka ja usta puruze mynakubazo. Batu ba. Mytsaty tsimaha zeka ja ba zikara

²⁶ Iwatsahi ikiahatsa tsikaeni zuba ba zikaha zeka amy skaraba disahawy humo mytsaty tsimykarana. Amy skaraba ahasuk humo kino niwatihi mytsaty tsimykarana – Sesus nikara.

²⁷ Sesus ispe niyzo:

– Isazik bo iktsataha amytsi bo iktsataha. Iktsaziutaha! Isazik taypykze, anatu ba ziktatsazik ba anatu pyryryk pyryryk ziky, anatu zeka tasuk ba ziwowo. Wasani mykarana. Tapara Saromao tsinamyreta. Inamy tisapyreña. Isuk tsiziuwyrēna ty zuba korobyk ziknakara. Nanabyi sazik ka abazuba tsiziurēna baba.

²⁸ Iwaze Deus nanabyi sazik humo tsimypokzitsiarēta. Abaka okyry saro ispitu byriri ka mohokda. Izo bo mokoroba. Ikiahatsa ja. Deus ikiahatsa humo tsimypokzitsiukrēta.

²⁹ Iwaze Deus ahasuk ty ahabo nyny my. Ikiahatsa Deus humo jokboha zuba ahaspirikpo zeka atahi ahanamy ty ahabo nyny my – niy. – Iwatsahi mytsaty mytsaty byitaha. Batu tyso:

“Amy ty sa tsimymydisahanaha. Amy sa tsipikunaha” niy.

³⁰ Kytsa Deus humo batu sispirikpo iwa mytsaty nikarana. Deus ahazo tsihyrinymyreta. Ahasuk ty ahabo nyny my. Ahazo bijoikpe eze tuze ahasoho humo tsihyrinymyreta. Atahi ikiahatsa bo ahadisahawy ty nyny mykara. Ahasuk humo kino niwatihi nyny mykara.

³¹ Ikiahatsa Deus tyryktsa bo mytsaty tsimykarana. Iwa mytsaty tsimykarana zeka Deus ahanamy ty nyny my. Deus ikiahatsa bo ahanamy ty nyny mykara – niy. Iwa Sesus sizubarētsa namy soho humo nisispirikpoko.

Sinamy bijoikpe eze ky.

³² Sesus tihi:

– O kahyrytsa ahapyby byihu ja! Ahazo tyryktsa tsimoziknaha zeka ana hi mozikik. Amy humo ahaku byri zeka nyny my!

³³ Ikiahatsa ahaokyrarsaro ty sinamybyitsa bo nyny tsimaha! Iwatsahi ahanamy baba tsizubarēna bijoikpe eze. Anaeze ahanamy ba hawa tohi ziky. Ahanamy bijoikpe eze niy. Anaeze sitsyhyryboabyitsa ba zibyknaha. Anaeze ka ahanamy ba wazazatsa ziworonaha.

³⁴ Ahanamy bijoikpe eze tu zeka, ikiahatsa bijoikpe bo mytsaty tsimykarana. Ahanamy bo bijoikpe eze iwaze bijoikpe soho bo mytsaty tsimykarana – niy.

Sitsumuēhītsa botu tazozikba.

³⁵ Kyze Sesus myziksizo naha humo kytsa piperykynaha. Nisi-hyrinymyryky:

– Tsikahazozikbanahaktsa kytsa! Ahasuk ty opyk haıtaha! Rika ty pok-taha!

³⁶ Kytsa watsa tahapehakatsa piperykynahaze ky wa. Ispehakatsa mysukzawy bo zumukuta myziksizoze tawata. Kytsa pehakatsa piperykynahaze hokbowy humo tototo maha piwabynahaze atsoko zoksapare niaha.

³⁷ Inatsukze sitsumuēhītsitsa sakurētsa. Sitsumuēhītsitsa ziperykynahatsa hi ispehakatsa ziksizo sakurētsa. Wasani nikaranaha. Sitsumuēhītsitsa dishawyzozowy baze dyhy niy. Iwaze atahi tsakurēta nikara. Ispehakatsa tsakurēta nikara kytsa taperytsitsa humo. Iwatahi sidisahawy ty sibo nyny my.

³⁸ Sispihikrētsa nikaranaha tozeka ja ispehakatsa unopokte ja mozumu. Tozeka ja iwariknakyryze ja mozumu Sitsumuēhītsitsa piperykynaha zeka sakurētsa mykaranaha – Sesus niy.

Sesus:

– Aparakbaha katy peryhabyize watu myziksizo.

³⁹ Kyze wahoro tsihitsa nawa taeze itsyhyryboanikita mynatsuk zeka iwahoro bo ba ziktsuk. Tsihyrinymyrēta zeka itsyhyryboarēta iwahoro bo ba ziknatsuk. Aparakbaha ba sihyrinymyry wahoro tsihitsa wata. Uta niwatihi kytsa katy pery ahabyitu myziksizo – niy.

⁴⁰ Sesus nikarazo:

– Tsipiperynaha. Utakta Deus zikpehata ahawata ikyzik atsoko myziksizoze iwatsahi tsipiperynaha! – niy.

Sitsumuēhītsitsa wasani isopykta usta pykyhytu zikybyikita iwatsa humo nisi-hyrinymyryky.

⁴¹ Peduru Sesus pe niy:

– O mypehatsa, aty bo sa aharere tsipiwatawyky. Katsa mybo zuba sa tsipiwatawyky. Sizubarētsa bo tihi sa tsipiwatawyky – niy.

⁴² Sesus nipamykysokozo. Sitsumuēhītsitsa soho ty nipamykysoko.

Ipehakatsa tatsumuēhītsitsa pe niy:

– Kawahoro ja typery niy hawa kytsa dishawy ty wasani eze zuba sibo nyny ty ka – niy.

⁴³ Sitsumuēhītsitsa imyperyziuta zeka ipehakatsa ihumo tsakurēta. Ata soho hi nitsasoko. Hawa mykara nisihyrinymyryky. Atahi:

– Sitsumuēhītsitsa pehakatsa harere bo yhy mykara zeka tsakurēta.

⁴⁴ Wasani mykara. Ipehatsa namy tsizubarēna perytsa mozik – niy.

⁴⁵ – Tozeka ja sitsumuēhītsitsa tapetu isopyk my:

“O kapehatsa azymyny batu aidy erete ziky” niy. Iwaze tawa kytsa mysikiki. Sitsumuēhītsitsa kino niwatihi mysikiki. Tadisahaikik. Siopuwy pikuikik iwatahi tsiopyryrykrēta. Atsoko ipehatsa ipapatu iziksi.

⁴⁶ Sitsumuēhītsitsa nispihikbyize. Haramwe hana eze ja batu ihyrinymyry. Ihyrinymyrybyita tu ipehatsa atsoko ziksi. Ipehakatsa sitsumuēhītsitsa zizukutu niy. Sinini ykarawy bo pipehahik. Kytsa Deus harere bo hyyhabyi zeka anabo mysipehahik.

⁴⁷ Amakta tsumuēhītsitsa sininiwy my. Tsihyrinymyrēta tu ipehatsa harere bo “batu yhy” niy. Pykyhy izozikbyitu. Atahi Deus namy perytsa wata. Deus ibo iktsa niyze: “O atakta ‘batu imysapy’ ” my. Niytahi sitsumuēhītsitsa tisikpybyrēta. Tsihyrinymyrēta humo tisikpybyrēta. Sinini tynakara.

⁴⁸ Usta tsumuēhītsitsa tsikaeni zuba sinini tynakara. Ipehatsa harere ihyrinymyrybyita tu, iwatahi tsikaeni zuba sinini tynakara. Iktsataha!

ahanamy tsizubarēna zeka nyny tahaktsa. Deus kytsa bo sinamy nyny niy zeka asahi ustsā bo nyny ahabyi zeka sisikpybyrētsa. Iwaze Deus tihi:

“Uta ahabo tsizubarēna ty nyny my iwaze ikiahatsa kytsa bo batu nyny tsimaha, kaokze ikiahatsa batu ahamysapy tsimykaranaha” – niy.

Sesus humo meky watu niyzikiknaha.

⁴⁹ Sesus ispe niyzo:

– Utakta mybarawy ezektsa bo ikzumu niy. Ikzumuze izo waha. Izo waratok pipopokoknaha ziktawata iwaze tisapyrēna mozik. Ikiahatsa ahamysapybyitsa tu tsikykaranaha Deus mysiokzohik. Kytsa pikbezenahaze iwaze simysapybyitsa mykaranahatsa Deus mysiokzohik. Botu mohyrikosokda zeka kakurēta. Bykyze zuba.

⁵⁰ Tapara sinini my. Iwatahi batu kaku. Nawa humo hi mykara – niy.

⁵¹ Ikiahatsa mytsaty ahabyitsa tsimykaranaha. – O Sesus mybarawy ezektsa bo izumu iwatsahi kytsa harape wa metutu byinahatsa – iwa mytsaty ahabyitsa tsimykaranaha. Utakta mybarawy ezektsa boze kytsa kahumo meky watu mytsaty mykaranaha.

⁵² Iwaze kytsa mytsyhyrytsa wa wahoro eze tuze mopykyryknaha. Harakykbyihi mytsaty maha:

– O ta batu wasani – maha. Petoktsahatsa:

– O na wasani – maha. Iwaze harakykbyihi petoktsa bo mysimiyjakanaha. Petoktsa harakykbyihi bo mysimiyjakanaha. Wastuhu – O Sesus tsimysapyrēta – mykaranaha. Ustsā – O batu ba – mykaranaha. Iwa metutu moziknaha.

⁵³ Sizotsa tahahyrytsa humo batu siakparawy. Sihyrytsa tahazotsa humo batu yh̄y zikaha iwatsahi metutu mopaparahanaha. Sijeza tahahyryza humo batu siakparawy. Sihyryza tahaje za humo batu yh̄y zikaha iwazahi metutu mopaparahanaha. Sipyijeza tahahyrytsa okeza humo batu siakparawy. Sihyrytsa okeza tahapyje humo batu yh̄y zikaha iwazahi metutu mopaparahanaha.

Iwatawy soho humo nitsasoko.

⁵⁴ Sesus kytsa bo nipamykysokozo.

– Ęryk ioktsā bo iktsa tsimahaze ikiahatsa atsoko: “O hyritsik kok mynawō” wasape ahasopyk. Hyritsik mynawō h̄y.

⁵⁵ Zopok nabybykykze. Ikiahatsa:

“O na haramwe zeka tsizōhanina mozik” wasani ahasopyk. Tsizōhanina mozik h̄y.

⁵⁶ Ahaharawatahatsitsa! Iwatawy bijoikpe eze humo ahahyrinymyrētsa. Iwatawy mybarawy eze kino niwatihi ahahyrinymyrētsa. Kawatahawyo humo ka batu ahahyrinymyry niy. Deus watahawyo ahabo nyny my. Kawatawy humo hi ikiahatsa ba ahaspirikpo – niy.

Mykyriwysitsa humo batu zikaha.

⁵⁷ – Amy skaraba batu wasani tsimykaranaha. Wasani tsimaha zeka aba kahumo ahaspirikpo. Ikiahatsa batu wasani tsimaha zeka maku wata atahi niharapesohometukuta.

⁵⁸ Iske buruk tsimokurunahaze kytsawabytsitsa bo sisukmobyi tu harape humo tsimynakokonaha. Iske buruk kokoha byizeka maku itsipa humo pioktyhyryk. Ikia sakyriukanikitsa hurukwy bo tsipahurukwy.

⁵⁹ Aokyrysaro ty nyny ahabyizeka ba zikzoik. Aokyrysaro ty nynybaik ahabyizeka ba zikzoik.

13

Ahamysapybyity moewy ahabyizeka tsimyhryikosokdanaha.

¹ Kyze wastuhu kytsa Sesus bo zumukunaha. Piratus soho ty nipyamykysokonaha. Piratus sodadutsa nisipehanahatsa wastuhu Karireja ezektsa nisibabakanaha. Kytsa Deus wahoro eze nisibabakaranaha. Deus bo siraratsa ty nyny nikaranahaze kytsa nisibabakanaha.

² Sesus ispe niy:

– Ahaokze ka asaktsa simysapybyikitsa tu iwatsahi sinini niaha. Batu ba.

³ Wasani ahape mykara. Ikiahatsa ahamysopyksapybyiri ty moewy ahabyizeka tsimyokbabanaha. Karireja ezektsa wa tsimyokbabanaha.

⁴ Deus harere bo yhỹ ahabyi zeka tsimyokbabanaha.

Kytsa Siroã eze tu anaeze wahoro zuba kytsa bete inakzuruhukze inasipyk. Ahaokzeka asaktsa simysapybyitsa tu iwatsahi sinini niaha. Batu ba.

⁵ Ikiahatsa ahasopyksapybyiri ty moewy ahabyizeka siwa tsimyokbabanaha.

Umaha iharabyita humo ziwatawyky.

⁶ Sesus nipamykysokozo. Umaha soho humo ziwatawyky. Nipyamykysoko simysapybyitsa moewy ahabyizeka hawa my niy. Umaha humo mytsatyziutaha.

– Maku estuba umaha waratok eze ziparik. Kyze ihara ziberikize batu iharaka niy.

⁷ Iwatahi waratok perytsa pe niy:

“Hwi tsiwehikta! Amy skaraba iharahokbyitatu mopykyk. Tsiwehikta” niy.

⁸ Waratok perytsa ipe niy:

“Kapehatsa niwatihikta! Aba hwi mytyktsehezoze piokpyrytete siraratsa tsitsi ty myziokpyry haratõtõ.

⁹ Kyze mytyktsehezoze tahara zeka wasani. Ziktahara byizeka tsikpipehazo zeka uta piwehik” niy – Sesus nikara.

Sesus Sudeutsa byrykywy eze wytyk zizororowy.

¹⁰ Kyze mybyrykywy eze Sesus Deus wahoro eze nisihyrinomyry.

¹¹ Iwaze wytyk izumu. Tubabatu sinini ziknakara. Hryrikoso isapybara humo batu iaku. Okmymyhuk ahatatsa tu zikzitabaka.

¹² Sesus zinyze atatsa pe niy:

– Ikia botu tsikzororotsa – niy.

¹³ Ibete tatsyhyrype ty paik niy. Atsoko buruhuwa niyzikzo. Deus bo nisakibaziki:

– O Deus ikiahi kahumo tsamysapyrëta – nikara.

¹⁴ Taparaktsa Deus wahoro eze. Sesus humo tahakyrikinaha. Sesus mybyrykywy eze wytyk zizororowy. Iwatsahi taparaktsa tahakyrikinaha. Kytsa pe niaha:

– Utsa tsyhyrype humo estuba zuba tarabaja tsimaha! Tarabaja mybyrykywy eze batu imysapy. Katsa mybyrykywy eze batu tarabaja Deus harere humo nikaranaha. Usta nawa zuruze tsimyzumunaha. Mybyrykywy eze ka batu isty zororo ziky – nikaranaha.

¹⁵ Sesus ispe niy:

– Ahaharawatahatsitsa! Mybyrykywy eze tarabaja tsimaha. Ikiahatsa pikuza buhu kino niwatihi isparik ikny tsipisatsuknaha. Pihik bo tysioktyhyknaha.

¹⁶ Uta hi wasani my mybyrykywy eze atatsa izororowy. Atatsa Abarão tsekoka. Tubabatu Satanas ziporokmyitatsa iwatatsahi ba buruhuwa zik-toziky niy – Sesus nikara.

¹⁷ Sesus nipamykysokoze sisukyrytsitsa hi sisikpybyrëtsa niyziknaha. Kytsa sizubarëtsa Sesus humo sakurëtsa niapykyknaha.

Mostarada rik tsibik soho humo nisispirikpoko.

¹⁸ Sesus sizubarëtsa bo nipamykysokoze. Deus tyryktsa soho humo nisi-hyrinymyryky. Sesus tihi:

– Deus tyryktsa hawa sa maha Pahawatawyky.

¹⁹ Hawa rik tsibik taypykze Deus tyryktsa sizubarëtsa moziknaha. Deus tyryktsa rik tsibik wata. Mostarada rik wata mysiubaraka niy. Taparaka maku waratok eze ziparikik iwaze taypykze hwi puëtsikbyita mozik. Piyktsa isarapatsa bete tahasukuknaha tahasuk pizozokonaha. Isarapatsa watu tahasukuknaha.

Hawa mostarada wata mysiubara Deus tyryktsa mysiubara.

Ipytowy soho humo nisispirikpoko.

²⁰ Sesus nipamykysokoze:

– Deus tyryktsa hawa sa maha. Pahawatawyky. Deus tyryktsa ipytowy hyrity waha.

²¹ Tapara atatsa ipytowy tsikaeni zuba tiriko mytsakyky pok niy. Napytoze piharazo. Hawa atsikara napyto, nahawa Deus tyryktsa sizubarëtsa moziknaha.

Tapara Deus tyryktsa hudikhudikwy estuba zuba bo maha. Aibani nan-abyitaba maha – Sesus niy.

Hawa Deus bo pomonahaka jakebyita buruk tu mytsuk.

²² Sesus Serusarëhe bo niukuru. Nanabyitaba sihudikhudikwy bo zikzumuku. Anaeze sizubarëtsa nisihrinymyryky. Nanabyitaba nisi-hyrinymyryky.

²³ Niytahi amata Sesus pe niy:

– O hawa skaraba mypehakatsa sizubabyitsa sa Deus bijoikpe bo mysiok-tyhyryk – niy.

²⁴ Sesus ipe niy:

– Bijoikpe ka hokbowy wata. Hawa kytsa hokbowy buruk mopupunaha anawahi kytsa bijoikpe bo mopupunaha. Bijoikpe hokbowyta batu jakebyita tu. Iwatsahi sizubarëtsa mopupu tsihikiknaha. Ba zikpupunaha. Nawa zuruze kytsa ba ziknapupunaha. Bijoikpe ske tsihokdaharëta.

²⁵ Wahoro tsihitsa kyik niyze zihokbowyhik. Ikiahatsa ape baze tototo tsimykaranaha. Ape baze hua hua tsimykaranaha. “O kapehatsa hokbowy ty zoksoparety” tsimaha. Iwaze ahape my. “O ikiahatsaktsa kanyhybyitsa. Hana iknytsa skaraba” my. Iwaze hi ikiahatsa ipe tsimaha:

²⁶ “Katsaktsa ikia tuk ziknamydisahakanahatsa. Ikia tuk zikzikukunahatsa ikia myhudikhudikwy eze katsa tsikmyhrinymyryky.” tsimaha.

²⁷ Ipe myzo:

“Ikiahatsaktsa kanyhybyitsa. Hana iknyktsa skaraba tsimykaranaha. Ahamysapybyitsa tu tsikykaranaha iwatsahi ba ziknapupunaha. Nabo päotaha paku paku byitaha” my.

²⁸ Deus tyryktsa tsimysinynaha zeka ahasukatsihikrëtsa. Tsimypuziukunaha. Abarão, Isake, Sako, Deus sohokotsa iwatsa tsimysinynahaze tahat-saputsa ty dydydy tahakyri humo iwatsahi tsimopuziukunaha. Ikiahatsa hi Deus tyryktsa byitsa tsimaha – niy.

²⁹ Kytsa sizubarētsa nanabyitaba mozumunahatsa. Deus tyryktsa tazaha eze dyhy dyhy maha.

³⁰ Wabytaha! Aba kytsa ziharawytsa myharazektsa moziknaha. Abaka siapikwaktsa hi Deus tyryktsa moziknaha.

Sesus Serusarēhe ezektsa humo tsimypokzitsiarēta.

³¹ Iwazektsahi wastuhu Pariseutsa zumukunaha, Sesus pe niaha:

– O nibo tihi tsiksita. Erodes pabezetsihikik – niaha.

³² Sesus ispe niy:

– Aidy Erodes tsoromama wakata, ipe tsimaha:

“Aba, byiri kino niwatihi hyrikoso sapybara mosiksiwyky. Sizubarētsa mysizororowy. Kyze kahyrikzitsokzawy pepykze mohyrikosokda.

³³ Iwaze harakykbyihi puruze kaske buruk mokuru. Deus sohokotsa Serusarēhe eze nisibabaiknaha. Uta kino niwatihi Serusarēhe eze mohyrikosokda.” Iwa Erodes pe tsimaha – niy.

³⁴ Sesus tihi:

– O Serusarēhe ezektsa ikiahatsa Deus sohokotsa tsiksibanaha. Deus nispehanahatsitsa haraharetsa ty tsiksibanaha. Hawa ahahumo tsimypokzitsiarēta kokuaru watatsa. Kokuaru tahyrytsa tasara paik puke bo mysihuruk ezektatsa watatsa. Iwa uta ahahumo kamypokzitsiarēta. Ikiahatsa kabaze batu yhy tsikaha.

³⁵ Wabytaha! Uta piksi maku tawahoro perikik tawata. Kytsa wahoro inakarabaik. Deus tihi hudikhudikwy soho nakarakbaik niy. Uta ape my ikiahaka ba ziknyzonaha. Ikiahatsa tsimytsasokonaha zeka, “Atakta Deus zipehata myziksizo tsimaha ihumo mykurētsa tsimoziknaha, iharere bo hyhy tsimaha. Iwaze ihumo mykurētsa tsimoziknaha” iwaze tsipiknyzonaha – niy.

14

Sesus imyiziubyita zizororowy.

¹ Mybyrykywy eze Sesus Pariseu wahoro bo nitsuk. Taparakta ppykyhyta Sesus ituk tadisahaka. Anaeze kytsa sizubarētsa Sesus bo nikozotoktonaha.

² Iwaze maku Sesus bo izumu. Tsimyitsapyrēta. Natsipatsawiwibaik tahi ihyrypyrytsa humo kino niwatihi iwatahi asiba nira. Kytsa Sesus bo nikozotoktonaha.

– Tozeka ja mybyrykywy eze Sesus pizororowy – mytsaty nikaranaha.

³ Iwatahi Sesus Pariseutsa, Moises harere humo zinymyrykynahatsa kino niwatihi ispe niy:

– Hawa skaraba mybyrykywy eze botu ziwatahakanaha. Pizororowy ja tsimykarana – niy.

⁴ Iwatsahi batu pykpyk zuba niaha. Batu ibo tyso. Niytahi Sesus maku humo paik niyze zizororowy. Iwaze tsiksita niy. Niytahi izororohota tawahoro bo ziksi.

⁵ Bykyze Sesus ispe niy:

– Ikiahatsa ja. Ikiahatsa tihi: “O mybyrykywy eze tsipizororowynaha zeka batu sapy tsimaha.” Sesus kytsa mysizororowyze batu sapy tsimaha. Mytsatziu tsimaha. Aty ahatuk hyrizikzitsokzawy my. Kyze mybyrykywy eze pikuzo wytyk hoke bo mynaraha zeka aidy sukyhyporok. Atse wytyk hoke bo mynarahazuk zeka aidy sukyzotaha – niy.

⁶ Iwatsahi Pariseutsa nihareretsihikbyrinaha.

Sakzohotsa soho humo nisihyrinymyryky.

⁷ Kyze Sesus sakzohotsa bo iktsa niyze, asahi sisapyrëtsa bete zuba itahadyhydyhykynaha. Iwatahi sisoho humo nitsasoko, simyikaha soho humo ziwatawyky.

⁸ – Mysukzawy myikaha bo pakzo zeka. Mydyhydyhywytsa tisapyrëtsa bete ka ba dyhy zikaha.

⁹ Tozeka ja maku myhyrizikwanita mozumu zeka iwaze tamyikahakata ape my: “Kyiktykta! Ikiakta meky botu dyhy tykta!” my. Iwaze isapybyita bete dyhy my. Zihitsa nitsasokoze ikia asikpyby tsipiyyk. Ikia pakzo zeka pykyhytuty myhyrizikwybyitsa tuk dyhy ty.

¹⁰ Iwaze hi zihitsa ikia pe my: “O ikiakta katsa mytuk tsikadisahata my. Yhÿ” tsimy. Taparaka isapybara bete tu dyhy tsimy. Pakzo zeka pykyhy myhyrizikwybyitsa baze dyhy tsimy. Zihitsa myikaha adyhywy bo mozumu. Iwaze hi: “Katukta, anaeze dyhy tyny” my. Iwaze maku myhyrizikwanita baze dyhy tsimy niy. Nitsasokoze kytsa okzeka ikia aspirikporëta. Kytsa ahatuk tahadisahanahaze ahumo sispirikporëtsa iwatsahi kytsa okzeka wasani tsimy.

¹¹ Iwaze hi aty mytsaty “Utakta myhyrizikwani my zeka” atahi tisikpybyrëta mozik. Aty tapetu isopyk “O aty utakta myhyrizikwybyita my zeka pykyhy tu isopyk” my. Iwa mytsaty mykara zeka wasani my. Atahi myhyrizikwani mozik – Sesus niy.

¹² Kyze Sesus zihitsa pe:

– Ikia tsipamyikahaze atukytsa, ahaõtutsa pauksitsa ahaharereziuwyttsa sinamynikitsa ka asa ty ka ykzo ykzo byity. Bykyze pakzonaha iwaze situk tsipadisaha. Iwa ikia botu nynyrezo maha. Iwatahi batu isty ykzo.

¹³ Ikia tsipamyikaha zeka sinamybyikitsa ty siekbyritsa ty sihyrizikubyitsa ty iwatsa zuba tynasiakzo.

¹⁴ Iwaze hi tsakurëta. Iwaze asaktsa kytsa ikia batu aty ykzozo. Batu ikia bo ka nyny zikaha. Deus zuba ikia bo nyny my. Iwa puruze simysapyrëtsa mynahyryzikponahaze Deus ihuak ty abo nyny my.

Myikaha zubarëna soho humo nisihyrynimyryky.

¹⁵ Maku estuba disahawyzozowy baze nidyhyky ana ziwabyze Sesus pe niy.

– O Deus tyryktsa aparakbaha sakurëtsa. Deus tyryktsa tuk tahadisahanahaze sakurëtsa.

¹⁶ Kyze iwatahi Sesus nipamykysoko.

– Kyze estuba maku myikaha zihitsa mozik. Sizubarëtsa nisiakzoko.

¹⁷ Imyikaha inakymyze itsumuëhÿtsa sakzohotsa bo nisipeha ispe niy: “Pany kamyikaha inakymy” nikara. Yhÿ niy. Iwaze sakzohotsa bo niparak. Kytsa batu zuk.

¹⁸ Sakzohotsa batu yhÿ niaha. Tapara estuba itsumuëhÿtsa pe niy:

“O uta zik batu, waratok iakse. Tapara uta katsuhuk bo mynakozore.” niy. Iwatahi ikia zihitsa pe tsimy. “Waratok iakse tahi batu pão my” niy.

¹⁹ Iwaze usta itsumuëhÿtsa pe niy:

“Uta zik batu, pikuzatsa mytsyhyrytsa wa iksiakse. Aba sibo iktsa my, hawa ja mykaranaha. Iwatahi imyikaha bo ba zikparak” niy.

²⁰ Usta ziharawy niwatihi tsumuëhÿtsa pe niy: “Jaba iksukza iwatahi ba imyikaha bo ba zikumu” niy.

²¹ Iwaze itsumuëhÿtsa ziksizo. Tamyikahakata bo nitsasobaik. Tamyikahakata ana ziwabykytahi taokaniki. Niytahi tatsumuëhÿtsa pe niy:

“Aidykta! Nanabyitaba sihudikhudikwy taba! Ske buruk tykuru! Sinamybyikitsa siekbyritsa sihyrizikubyitsa pãozikahabyitsa iwahatsa tynasioktyhyryknaha” niy! Hyỹ niy.

²² Ziksizoze itsarawybara kino anatu niy.

²³ Kyze zihitsa ipe niyzo:

“Nabo pãozotyкта! Ske buruktsa bo tsimy. Hỹbyri mykaranahatsa tuktu tynasioktyhyk. Iwaze kawahoro mynahareknaha” niy. Iwaze itsumuẽhĩtsa sihudikhudikwy taba niparakzo. Iwaze tamyikahakata wahoro bo nasioktyhyryk. Abaka mydyhydyhywytsa tsarawykytsa zuba. Batu iwewehe bara eze tu nikara – niy.

²⁴ – Uta tapara baba iksiakzonahatsa hi kadisahawy ty batu hauk zikaha – Sesus niy. Iwa kytsa soho asaktsa Deus harere bo batu yhỹ niaha ana humo hi nisiwatawyky.

Aty sa uta katukta babata mozik niy.

²⁵ Kyze myzubaha Sesus tuk niukurunaha. Sesus tasukpe bo iktsa nikara. Nipamykysoko.

²⁶ – Aty katukta babata mozihikik zeka. Kaharere humo zinymyrykyta mozik. Atakta kahumo tsimypokzitsiarẽtakta my. Uta tsipikpokzitsiziu zeka uta kino wasani my. Bykyze zuba itukta, izo, ije, ioke, ihyrytsa itukytsa iwatsa mysipokzitsi.

²⁷ Tapara kahumo pikpokzitsi baba. Bykyze itukytsa zuba. Iwa myzeka katukbabata mozik – niy. Sesus tihi:

– Ikiahatsa sinini tsimykaranaha zeka ja ana hi tsipazoziknaha. Maku iharapatawyhyta pebykyrykze mohyrikosokda atawahi tsimaha. Aty maku harapatawyhyta zebykyrykta wata atahi katukta mozik. Atakta iharapatawyhyta puhyryk ahabyizeka ba katukta zikyzyk. Katukta babata sinini mykara tsipazoziknaha maku harapatawyhyta zebykyrykta wata my atatu hawazyi – niy. Iwatahi Sesus nipamykysokozo.

²⁸ – Zihyrinymyrykyta my zeka taparaka mytsatyziu tsimaha. Aty wahoro mozukni zeka tapara mytsatyziu my. Kyze maku wahoro jobonita mozukni tsihikik zeka tapara dyhy my iwaze tatuk zuba mytsatyziu mykara. Kaokyrysaro tsizubarẽna zeka. Iokyrysaro izubabyizeka myziakbata zuba iwazeka ba zikymy.

²⁹ Iwaze kytsa sizubarẽtsa wahoro bo iktsa maha zeka pimiyjanaha.

³⁰ Asahi:

“O atakta ziakbata tatu batu ikymyhuk” nikaranaha. Hawa maku taparaka wahoro soho bo mytsatyziu niy, ikiahatsa niwatihi katuk tsinymyrykynahatsa tsimaha zeka mytsatyziutaha – Sesus niy.

³¹ Sesus nipamykysokozo tasoho humo nisihyrinymyryky. Ispehatsa wata mytsatyziutahaktsa! – Kyze aty sodadutsa pehakatsa des miutsa sodadutsa tuk mowatsoronahaze takyriwytsitsa bo maha. Tapara aparakbyitu mytsatyziuty. Sihyrinymyrykytsa pe my:

“Mysukyrytsitsa sodadutsa tozeka ja abazuba” my. Sihyrinymyryrẽtsa pehatsa bo motsasonaha zeka:

“O mypehakatsa mysukyrytsitsa sodadutsa wĩte miutsa abazubatsa maha. Iwatsahi katsa ba zikwatsoronaha” maha.

³² Iwaze hi ẽryktsa botu takyriwytsitsa bo kytsa mysipehaka. Ispe niaha:

“O pão pão byitahaktsa tsimaha” maha. Ba zikwatsoro – iwa Sesus nikara.

³³ – Iwa ikiahatsa ahanamy ty arek ahabyizeka ikia batu katukta babata zikyzyk. Hawa ispehatsa sodadutsa soho humo mytsatyziu nikaranaha ikiahatsa niwatihi katuk zinymyrykynahatsa tsimaha zeka mytsatyziu tsimaha – Sesus niy.

Poro itsarŷkbara soho humo nisispirikpoko.

³⁴⁻³⁵ – Zinymyrykyta babata poro waha. Poro titsarokrēna my. Iwa poro waha tsimahaktsa. Poro itsarŷk byizeka batu tykykyzo my. Batu zik. Poro itsarŷk byizeka wytyk tuku zeka isapybara mozik. Poro itsarŷk byizeka tsipipaparanaha itsarŷk byizeka itsitsi humo batu isapy iwatahi itsitsi ty batu tyharatoto. Tsipipaparabaiknaha zuba.

Ikiyahatsa kaharere ty wabyziu ahabyizeka poro itsarŷkbara waha tsi-moziknaha, ahamysapybyitsa tsi-moziknaha. Iwatsahi ikiahatsa kaharere tsipiwabytoktonaha. Pykyhytu tahaktsa! Tsipiwabyziunaha zeka kaharere bo yhŷ tsimaha. Niahatsahi katuk zinymyrykynahatsa babatsa tsi-moziknaha – Sesus nikara.

15

Hozipyrykza nizarata soho humo nitsasoko.

¹ Kyze okyrysaro bykyktsitsa, tahapehatsa tsyhyryze zebykyryknaha. Asahi Sesus bo zumukunaha. Simysapybyitsa nikaranaha niwatihi ibo zumukunaha. Myzubaha Sesus harere ziwaby tsihikiknaha.

² Pariseutsa kytsa Deus harere nisihyrinymyrykynahatsitsa kino niwatihi Sesus zisapybyrikinaha.

– Atakta simysapybyikitsa tuk iakparawy. Kytsa simysapybyikitsa nikaranaha situk tadisahaka – nikaranaha.

³ Sesus ana ziwabytahi kytsa bo nipamykysoko:

⁴ – Kyze aty hozipyrykzatsa humo tsiraratsahohokrēta zeka. Iwaze nubaze taokarawy bo myziksintahaze estuba nikyrybyri iwa nizarata. Iwatahi nizarata pokzi piberiki tisukatsihikrēta kyzekta ustsya tyka amytsi eze nisierekek. Nokponi hozipyrykza arara nizarata piberiki. Ustsya ty ka erekek niy. Tapara nizarata piberi. Hana bo skaraba my. Tyberi beri ibo typiktumuzo niy.

⁵ Myzikahazoze arara hozipyrykza isukyriki buruk korohyk my. Nizarata tu zisihykzo. Nizarata humo tsakurēta nikara.

⁶ Atsoko iwahoro bo piksi. Taotutsa pauktsitsa bo piksizoze ispe my: “Ikiyahatsa katuk ahakurētsa tykaranaha karara hozipyrykza nizarata tu ikzikahazo” my. Wasani nikaranaha.

⁷ Iwaze bjoikpe iknytsitsa sizubarētsa sisopyksapybyitsa nikaranaha Deus botu nisiokzohik anahumo hi sakurētsa. Maku estuba tapara imysapybyita nikara iwaze Deus harere bo hyŷ nikara. Atakta hozipyrykza nizarata zikahazo tawata. Atahi Deus harere bo hyŷ my zeka bjoikpe iknyktsitsa ihumo sakurētsa nikaranaha. Aparakbaha humo sakurētsa. Deus imysapybyita tu ziknakarata ziozkohikze bjoikpe iknyktsitsa kino ihumo sakurētsa – Sesus niy.

Mytsozikewy zihokzahik naha soho humo nitsasoko.

⁸ Sesus nikarazo sizubarētsa bo atsawatu nitsasokozo:

– Estuba wytyk mytsozikewy tsizubarēna niy. Mytsozikewy mytsyhyrytsa waha parata hi. Estuba pihokda zeka iwatahsahi mytsozikewy piberi.

⁹ Wahoro ke bo piberiki. Tykahabyize rika ty hupok my. Tawaharo pioketsyktyk. Itsozikewy humo tahi zikwatu piberiki, itsozikewy izikahaze

atatsa tatukykyryk pe niy: “O katuk ahakurēza ky. Katsozikewy nihokdata tu ikzikahazo. Wasani mykara” niy.

¹⁰ Atatsa tatsozikewy zikaha atatsa tsakurētatsa. Maku estuba tapara imysapybyikita ziknakara iwaze Deus harere bo hyŷ mykara zeka bijoikpe iknyktsitsa Deus tsumuēhītsitsa ihumo atatsa watatsa sakurētsa.

Itse tazo zerikikta soho nitsasoko.

¹¹ Deus kytsa humo tsimypokzitsiukrēta niy. Sesus nipamykysoko.

Maku petoktsahatsa ihyrytsa.

¹² Iypykziubyitahi:

– O kazo mybo anamy ty nynytykta! Kaziky bo, uta kabo tsimy – niy.

Hyŷ niy. Tanamy ty sibony niy.

¹³ Byri puētsik iypykziubyita tanamy zizozoko. Iwatahi meky botu niukuru. Mektsa botu tasapy. Anaeze isopyksapybyita nikara. Tanamy ziwebaik zuba.

¹⁴ Kyze nepykbaze ba amy tohi humo ba ziktadisaha, ata kino niwatihi batu idisahawyky. Tarapaspyk. Iwatahi anaeze sihudikhudikwy eze estuba zuba tabo paku niy.

¹⁵ Atakta:

– O nabo pazaharezatsa tysidisahawykyta! – niy. Iypykziubyita iarapa zumuze.

¹⁶ – O karaparēta. Utakta pazaharezatsa disahawy ty pikdisaha tsihikik – niy. Batu. Ba aty tohi ibo nyny ziky.

¹⁷ Kyze mytsaty nikara.

– O nabo kazo baze zuba mydisahawy momoewyky zuba.

¹⁸ Kazokta tsidisahawyrēta. Karapaspyk mohyrikosokdaka. Piksizoze. Kazo pe my:

“O kazo utakta kasopyksapykybyita ikykara. Ikiakta ba kape katse tsimy.

¹⁹ Atsebyitatu zeka abaze zuba atuktu my. Iwatatu tarabajaziu my” – niy. Iwatahi ziksizo. Tazo zerekek tatu iwatatu ziksizo.

²⁰ Kyze izo ziperyky. Itse zumukuze waratok sak eze tatse bo nikoze, nokponi eze tu izo ibo nikoze. Isukziubyita nikorotso. Iwaze izo ihumo impokzitsi izumu. Iokeryk niparak tatse zihapyrykyk.

²¹ Itse:

– O utakta kasopyksapybyita ikykara kazo Deus okze kamysapybyita ikykara. Iki kape ba katse tsimy – niy. Iwaze izo.

²² – O kytsa aidyktaha katsumuēhītsitsa katse suk ty iziuha ty zuba wabehyrytnaha! Katse humo korobyktaha. Inahatsa ipyrysuktsa humo kino niwatihi wabehyryktyny – niy.

²³ Aidytaha pikuzza tsibezena. Kamyikaha nakymy. O kakurēta. Atakta katse asiba nihyrikosokdata tu atatu.

²⁴ Nokponi tasapyta tu kabo ziksizo niy. Yhŷ O mykurētsa wahoro ezektsa kino niwatihi nikaranaha.

²⁵ Kyze usta ziky taparakta ppykyhy waratok ikny ziksita. Berekzetsa suka ziwaby kytsa nikarikinaha.

²⁶ Iwaze tazo tsumuēhītsa pe niy:

– “O niytahi amy skaraba” niy.

²⁷ “O atsy ziksizo. Azo pikuzza zibeze tamyikaha bete zibeze. Tsakurēta. Atsy batu ihyrikosokda ibo ziksizo. Tsakurēta” niy.

²⁸⁻³⁰ “O batu imysapy. Utakta ba ziktsuk. Kaokanirēta” niy. Bykyze sizo izoize ipe niy:

“O ikia kino pakutynykta katse. Tsikadisaha” niy.

“Batu. O atuk mynapykyryk ta tu. Tsimyzikpehakaze uta hyĩ mynakara. Iwatatu batu katy myikaha. Batu pikuzza ty tybeze. Atse anamy ziaksebaikta tu iwaze wytykyryk humo ziwebaik, iwaze anamy zipykta tu sa ziksizoze tumy tsipikuku itsyhyryze pikuzza tsibeze” niy.

³¹⁻³² Izo ipe niyzo:

“O katse ikiakta katuk hi tsimynapykyryk. Uta kanamy atsatu natawihikik. Niwatsa tu abaka mykurẽtsa tsimykarana. Tummy takuku. Wasani my. Atsy asiba nihyrikosokda iwatatu atatu. Nizarata wata ziksizo” niy. Aty imysapybara ty nikaratatu zimowey, Deus humo tspirikporẽta iypykbyita wata. Maku imysapybyita tu my zeka pimowey Deus bo myziksizo iwaze Deus mysiokzohik. Ipykziubyita wata tazo bo ziksizo – iwa Sesus nisispirikpoko. Deus myzubaha humo tsimypokzitsiukrẽta nisispirikpoko.

16

Ispehatsa pykyhytu ziknybyita soho nitsasoko.

¹ Kyze Sesus tuk zinymyrykynahatsa pe niyzo. Kytsa Deus harere bo batu yhy nikaranaha iwatsa tu sihyrinymyrẽtsa, tahananmy soho humo zuba sihyrinymyrẽtsa. Sisoho nisiwatawyky.

– Kyze estuba maku inamyrenikita niapykyryk. Itsumuẽhĩtsa inamy ziperyky. Atahi inamyrenikita tsyhyryze okyrysaro zikzibykyk, ana hi ihyriziktsokzawy. Iwaze kytsa inamyrenikita bo zumukunaha. Ipe niaha:

“O atsumuẽhĩtsa ba aokyrysaro bykyktsa hi anamy ziakseke. Atahi anamy piwebaka. Aokyrysaro humo batu wasani zeky, mybarapetu mykara” niaha.

² Iwaze maku inamyrenikita iperykytsa pe niy:

“Hawa skaraba wasape hi sa asoho humo nikaranaha” niy. “Kaokyrysaro ty kabo zozoty. Ikiak kaokyrysaro ty kabo tysirezoty. Ikiakta paiksiwyhik kanamy perytsa ba zikziksizo. Mektatu maku kanamy perytsa mozik” niy.

³ Iperytsa tapetu isopyk:

“O maku inamyrenikita kape niy ‘Nabo pãotykyta’ niy. Mektatu maku inamyperytsa mozik. Iwaze uta sa hawa my. Uta wytyk piu naha humo batu kapaik. Kytsa bo okyrysaro humo kamykzasikpybyrẽta.

⁴ Uta kahyrinymyrẽta. Iwatatu myperybyitatuze kytsa inamyrenikita bo okyrysaro pisirezona haze siharereziuwuy mozik. Asa wahoro bo hi mytsuk. Kytsa:

‘O mywahoro bo paku tsimy. Ikiak katsa mytuk tynapykyrykspyk’ maha” niy.

⁵ Iwatahi kytsa sizubarẽtsa nisipeha. Kytsa inamyrenikita bo okyrysaro zisirezona haka. Iwaze tapãbabakta pe niy. “Hawa sa maku inamyrenikita bo okyrysaro ty nynyrezo tsimy” niy.

⁶ “O situtawy tsizubarẽna, tsihohokrẽna” niy.

Yhy nikara. “Iktsa ty apapeu ty abo nyny my. Anaenze dyhyty! Aidyty! Tsapukte eze zuba apapeu humo tsipiwatahaka. Nawa zuba tysirezo tsimy” niy. Yhy niy.

⁷ Kyze iperytsa usta pe niy:

“Ikiak ja. Hawa sa maku inamyrenikita nynyrezo tsimy” niy:

“O wanatsitsa sizubarẽtsa tsihohokrẽtsa” niy.

Yhy nikara.

“Iktsa ty apapeu ty abo wabehyrykty. Ikiak za tsapukte zuba apapeu humo tsipiwatahaka. Nawa zuba tysirezo tsimy” niy. Iwaze iharereziuwuy niyzik.

⁸ Iwatahi maku inamyrenikita tatsumuẽhĩtsa soho bo mytsaty mykara:

“O atakta kanamyperytsa tsihyrinymyrëta babata. Iwatatu imysapy byitatu tsihyrinymyrëta” – niy. Iwa mytsaty nikara inamyperytsa soho niy.

⁹ Iwaze Sesus tuk zinymyrykynahatsa bo nitsasokozo, okyrysaro soho humo nisispirikpoko. Sesus ispe niy:

– Abaktsa kytsa tahanamy bo zuba mytsaty mynakaranaha iwatsahi sihyrinymyrëtsa. Katyryktsa asahi Deus harere bo hyÿ mykaranaha. Okyrysaro soho humo batu sihyrinymyryziu iwatsahi tsinymyrykynaha – niy. – Kytsa tsyhyryze ahaokyrarsaro ty natawihikik. Iwaze tsimhyrykosokdanahaze ahanamy Deus tuk tsimaha. Bykyze Deus tsipihobyknahaze asa humo ahaokyrarsaro tsiwihiknaha ahahumo sakurëtsa iwatsahi ahabo wasani tynakaranahaktsa.

¹⁰ Kyze ikiahatsa ja ahanamy zuba tsikaeni tsimaha zeka situk wasani tsimykaranaha iwaze ikiahatsa ahanamy tsizubarëna tsimaha zeka situk niwatihi wasani tsimykaranaha. Ikiahatsa ja ahanamy zuba tsikaeni tsimaha zeka situk batu wasani tsimykaranaha. Iwaze ahanamy tsizubarëna tsimaha zeka niwatihi situk batu wasani tsimykaranaha – niy.

¹¹ – Ikiahatsa namy zuba tsikaeni tsimaha zeka situk mybarapetu tsimykaranaha. Kytsa ahaokyrarsaro humo tsimysispihikbatakanaha zeka ba zikspirikponaha. Ikiahatsa ahaspirikpo byizeka Deus isapyrënikia ty ba ahabo nyny ziky.

¹² Ikiahatsa mektsa namy ty pykyhytu ahabyizeka, batu aty tohi ahanamy ty nynyzo ziky.

¹³ Kyze ba aty tohi petoktsahatsa ipehatsitsa bo ziky myhyriziktsokzawy humo my zeka. Itsumuëhÿtsa petoktsa hatsa bo ba zikaha. Petoktsa hatsa tsimysitsumuëhÿnaha zeka estuba hi akparawy mozik. Ustakta akparawybyita mozik. Sitsumuëhÿtsa mytsaty nikara:

“O estuba zuba kakparawy. Ustakta batu kakparawy” Iwa mytsaty nikara. Sesus ispe niy ikiahatsa niwatihi. Deus harere bo hyÿ tsimaha zeka iwaze okyrysaro ty iokboha zuba ahakparawy. Ikiahatsa okyrysaro humo zuba ahakparawy zeka iwaze Deus harere bo batu yhyÿ tsimaha – Sesus niy.

Sesus nisispirikpoko.

¹⁴ Pariseutsa Sesus harere ziwabynahaze iharere okyrysaro soho humo tahakrykinaha. Asahi okyrysaro siakparawy iwatsahi zimiyjakanaha.

¹⁵ Niytahi Sesus Pariseutsa bo nipamykysokoze ispe niy:

– Ikiahatsa kytsa okze tsinakaranaha:

“O katsaktsa wasani tsimykaranaha” ahasopyk. Deus ahahumo tsihyrinymyrëta. Wasanibara humo tsihyrinymyrëta. Hawa mytsaty tsimykaranaha humo tsihyrinymyrëta. Kytsa ahasoho bo mytsaty mykaranahaze:

“O wasani mykaranaha” mytsaty ahabyitsa nikaranaha. Deus okzeka anaka imysapybara ty tsimykaranaha. Iwa Deus mytsaty nikara.

¹⁶ Taparaktsa Moises harere zahahyrinymyryky Deus harere bo yhyÿ nikaranaha. Taparaktsa Deus sohokotsa botu ziwatahakanaha ana humo hi sizubarëtsa yhyÿ nikaranaha. Iwatsa tu ziknapykyryknaha. Niytahi Suão Batista nipuruk. Iwaze Deus wasaniha nitsasoko. Kytsa bo wasaniha nitsaso:

“Deus tyryktsa tuk mynapykyk. Taharere ba zimyi” niy. Abaka Deus sohokotsa atsatu mopamykysokonaha. Kytsa sizubarëtsa Deus tyryktsa moziknaha. Sizubarëtsa Deus harere ba zimyinaha – niy.

¹⁷ Sesus nisihyrinymyrykyzo Deus harere soho, Deus harere tawahi mynapykyryk niy.

Amy ty taparaktsa, Deus sohokotsitsa botu ziwatahakanaha, ba zikokza. Bijoikpe mopyk naha humo ba ihokdaha wytyk mopyk naha humo kino ba ihokdaha. Deus iwatahaha ba zikokda. Ziwatahaka naha tsikaeni zuba ba zikokda. Mybarawy mopykze kino siwatahaha tawahi mynapykyk. Deus harere mynapykyk. Iwa Sesus nisihrinymyrykzyoze niy.

¹⁸ – Maku tasukza zeka ba mektatsa tu ziakse. Aty taoke pimoewy zeka mektatsa tu piakse zeka Deus okzeka batu imysapy. Iwaze wytyk kino niwatihi. Atatsa kino tabarikta pimoewy zeka mektatu piakse zeka Deus okzeka batu imysapy. Atatsa batu imysapy – Sesus ispe niy.

Inamyrēnikita Rasaru ahatsa soho nitsasoko.

¹⁹ Sesus nisispirikpokozi. Abaka kytsa Deus harere bo hyỹ mykaranaha. Aiba ka iharere bo ba yhyỹ zikaha. Sesus tihi:

– Kyze maku estuba inamyrēnikita tadisahawy humo zikzibytuhukutu isapyha ty zuba ziknakara. Tasuk ty ka ipokzitsia ty zuba ziknakara. Iwaze hi ziknatamyikahaka.

²⁰ Iwaze usta maku inamybyita. Rasaru inarokota inakōrōrōbaikta. Atahi inamyrēnikita hokbowy baze ziknadyhyky.

²¹ Tadisahawy zikziperyky. Inamyrēnikita tisorekrēta hi batu ibo nyny ziknakara. Tadisahawy tshizik humo kino ba nyny ziknakara. Iwaze inamybyikita itsuhaha ty zuba ziknatadisahaka. Tsikuparinita iakōrōrōtsa ziknasihierokok.

²² Iwaze Rasaru nihyrikosokda. Bijoikpe iknytsitsa Abarão bo ziockyhyryknaha. Abarão Deus baze mynapykyryk. Anabo bijoikpe iknytsitsa inamybyikita ziockyhyryknaha. Inamyrēnikita kino niwatihi nihyrikosokda kytsa ziytyknaha. Iwaze inamyrēnikita hyrizikararawy sinini ykarawy bo tasapy, anaeze sinini mynakara.

²³ Inamyrēnikita kytsa simysapybyikitsa sapy bo zumu. Iwaze nokponi Abarão bo iktsa niy. Rasaru kino ituk niapykyryk. Abaka inamyrēnikita sinini mynakarata Abarão bo iktsa niy.

²⁴ Iwaze Abarão bo huahua niy:

“O kazo kahumo amypokzitsiukta! Ikia Rasaru kabo tyzipehakta. Tatsyhyry humo pihik ty sokyk ziyk. Sok my zeka bykyze atahi kastiārik bo tsikziny itsikwarika ty. Uta izo humo mokorobaka. Sinini mynakara” niy.

²⁵ Abarão ipe niy:

“O batu ba. Ikia mytsatytykta! Ikia aokzetuze anamyrēta ziknakara. Rasaru inamybyikita niy. Abaka Rasaru tsakurēta. Ikia batu aku sinini tsimynakara” niy.

²⁶ “Nawahi ihoketsihirizezebara nisihiza my mytazaharaze. Aparakbaha usta taba batu zikaha. Ihoke ba zikskaputabanaha niaha. Aparakbaha katuk ikia bo batu koikny zikaha. Ikiyahatsa kino niwatihi mybo ba zikziskaraputabanaha” niy.

²⁷ Inamyrēnikita tihi:

“O kazo ikia pe my:

‘Rasaru kazo wahoro bo tsipehakta’

²⁸ Anaeze uta katukytsa mytsyhyry wa mopykyryknaha. Iwatahi ty-nasipehare. Iwa tsimyzeka katukytsa sinini ykarawy bo ba zikzumunaha” niy.

²⁹ Niytahi Abarão ipe niy:

“O Rasaru ba zipeha. Atukytsa Deus harere Moises ziwatahakanaha isohotsitsa kino niwatihi botu ziwatahakanaha nisisupehekenaha. Iwatahaha

humo yh̃y maha zeka ba sinini ykarawy bo ba zikumunaha. Ana harere bo hỹy mykaranaha zeka sinini ykarawy bo ba zikumunaha” niy.

³⁰ “O batu ba kazo. Maku nihyrikosokdata iwaze nahyrizikpo sibo mozumu zeka iwaze Deus harere bo hỹy mykaranaha. Simysapybyitsa nikaranaha pimoewynaha” niy.

³¹ Abarão: “Batu ba” niy. “Atukytsa Deus harere bo ma ahabyi zeka. Hawa ha ty Deus sohokotsa ziwatahakanaha bo kino niwatihi ma ahabyizeka. Niahatsahi amata nahyrizikpo zeka Deus harere bo batu yh̃y maha ihumo batu sispirikpo maha.” niy – Sesus nikara.

17

Imysapybyiwy mykara ana hi pimoewyze Deus piokzo.

¹ Kyze Sesus tuk zinymyrykynahatsa bo nipamykysokozo.

Kytsa usts mysimiwykynaha ana soho ty hi nipamykysoko. Kytsa simysapybyikitsa nikaranaha iwa nikaranaha. Atakta usta maku pimiywyze sinini mykara.

² Sesus:

– Atakta harahare ty pisoikañhiknaha zeka buburu zuba bo mopapyknaha iwaze moharazuk, ana wa zeka batu sapy. Kytsa kahumo jokboha sispirikpo iwaze amata pimiywyky iwatahi kahumo ispirikpobyrithi sinini ykarawy bo pipehahik tawahi sinini mynakara – niy.

³ Sesus nisihrinymyrykyzo. Usts kytsa pahasapybyinaha zeka tysiokzohik:

– Pykyhytutaha! Atukytsa simysapybyitsa mykaranaha zeka ikia tsipipeha. Atahi imysapybyita nikara zeka anahumo hi tisukatsihikrēta zeka tsiokzohik.

⁴ Niwatihi amata myzisapy byrikizeka ana humo hi batu iaku iwaze tsiokzohikzo. Imysapybyri ty ana nikara naha humo ba mytsaty tsimy kara – niy.

Deus humo sispirikporētsa.

⁵ Sesus nisihrinymyryky. Deus humo sispirikporētsa. Sesus ykzohotsa ipe niaha. Asahi:

– O katsakta ikia humo myspirikporētsa. Aba katsa puētsik tymospirikpo – niaha.

⁶ Iwaze Sesus ispe niy:

– Deus zikwy humo amy tsimyzapykykynahaze Deus ana humo hi hỹy my. Tsimyzapykykynaha zeka umaha ataharatatsa tysibokbokyknaha iwaze buburu zuba bo piparik. Niytahi hwi zibokyk buburu zuba bo piparik. Ikiahatsa Deus humo tsimyspirikpobabanaha zeka iwatahi hwi zibokyk buburu zuba bo piparik. Ikiahatsa Deus humo ahaspirikporētsa mostarada rik wa. Niytahi Deus zikwy humo hwi zibokyk buburu zuba bo piparik – niy. Ahaspirikpo kino mostarada rik wa zeka iwazehi zeka umaha pe tsimaha. Aidy ikia tu hyrykokytyze buburu zuba bo piparik. Iwatahi my zeka hỹy mykara.

Sitsumuēh̃tsa hawa my.

⁷ Sesus nisihrinymyryky:

– Ikia atsumuēh̃tsa waratok buruk ja mysiparikik. Hozipyrykzatsa ja mysisuparaka. Waratok ikny ziksize ikia ipe tsimy: “Aidytykta na bete dyhy ty! Tsikadisahakta” tsimy.

⁸ Iwa ba ziky. Atsumuēhĩtsa hi papokzitsiki. Ikia ipe: “Asuk ty korokbykty! Kadisahawy ty! Mypewytsa ty wabehyrykty! Uta tapara pikdisaha bykyze ikia kasapy bo tsipadisaha” niy.

⁹ Atsumuēhĩtsa aharere bo hyĩ my zeka ikia ba ziktsaso. “O tsamysapyrēta”. Ba ziky. Atsumuēhĩtsa zuba.

¹⁰ Ikiyahatsa iwata tsimaha. Ikiyahatsa Deus harere bo hyĩ tsimaha zeka “kamysapyrēta ba ziky.” Ikia atsumuēhĩtsa wata. Tsimytsasokonahaze: “Utakta Deus tsumuēhĩtsa my iharere bo hyĩ ikykara” tsimaha. Iwa tsimaha – Sesus nikara.

Sesus mytsyhyrytsa watsa siakōrōrōtsa nisizororowy.

¹¹ Niytahi Sesus Serusarēhe bo niukuruze Karireja ziharamu. Samarija buruk ziharamu.

¹² Izumuze kytsa mytsyhyrytsa watsa Sesus zihobyknaha. Kytsa tahakōrōrōtsa humo nibibibakanahatsa tu. Ęryk tu pykpyk niaha.

¹³ Sesus bo opykani hua nikaranaha:

– O Sesus mypehatsa myhumo amypokzitsiuhukta – nikaranaha.

¹⁴ Sibō nikozone ispe niy:

– Nabo tsiksizonahaktsa! Deus wahoro eze ziknapamykysokonahatsa bo tsikahawatawynaha. Ziknapamykysokonahatsitsa pahapiaksukparanaha nawa taha – niy.

Yhĩ niaha. Nitururuknaha ske buruk niukurunahaze nizororobaiknaha. Kytsa tahakōrōrōtsa humo asiba nibibibanahatsa tu nizororobaiknaha.

¹⁵ Estuba nizororota ziksizo. Atahi Samarija ezekta bipyri niy. Nizororota Sesus bo ziksizo. Nizororota Deus bo nipamykysoko. – O Deus ikia hi tsikzororowy. Iwatahi kakurēta – niy.

¹⁶ Sesus bo zumuze iokeryk taekaratsa humo puruk puruk niy. – O Sesus ikia hi tsamysapyrēta – nikara. Atakta maku bipyri, Samarija ezekta.

¹⁷ Niytahi Sesus ipe niy:

– Mytsyhyrytsa watsa zuba tsikzororonaha. Utsa sa hana bo nizororona-hatsa. Ustsaktsa sa batu eretezo niy. Estuba zuba Deus bo nipamykysoko. O Deus ikia hi tsamysapyrēta. Ikia tsikzororowy hĩ – niy.

¹⁸ Utsa Deus bo batu pamykyso.

¹⁹ Iwaze Sesus ipe niy:

– Kyiktykta! Nabokta! Ikia kahumo tsikspirikpotawy azororowybaba – niy.

Hawa kytsa Deus tyryktsa moziknaha.

²⁰ Kyze Pariseutsa Sesus pe nikaranaha.

– Hawaze sa kytsa Deus tyryktsa moziknaha niaha. Nawa puruze Deus tyryktsa mozumunaha – niaha. Sesus ispe niy:

– Deus tyryktsa bo ka ba zikozonaha. Kytsa iwatawy piberikinaha zeka ba zikozonaha niy.

²¹ Ba aty tohi naeze Deus tyryktsa ziky. Nabo Deus tyryktsa. Wabyziutaha! Abaka kytsa Deus harere bo hyĩ mykaranaha zeka asahi botu Deus tyryktsa moziknaha iwa Deus tyryktsa ahatuk tu my – nikara.

²² Sesus tuk zinymyrykynahatsa pe niy:

– Uta myziksizoze pareparezo mozikta wata my. Bijoikpe eze tu nanaby-itaba pareparezo mykaraze tawata iwaha bo myzubatsa kabo iktsa maha. Taparaka sinini mykara. Abaka kytsa kahumo batu sispirikpo – iwa Sesus tuk zinymyrykynahatsa zuba nipamykysoko. Sesus:

– Bykyze Deus bo piksizoze ikiahatsa tsipikny tsihikiknaha. Utakta Deus zikpehata ahawata ikyzik. Bykyze tsimytsasokonaha. “O uta Sesus piny

tsihikik. Sesus mytazahare zeka tsimysapyrēta. Uta Sesus pe tyziksizota mykara.” Batu ba, mohokda tsimaha – nikara.

²³ Wastuhu ikiahatsa pe maha:

– Nabo iktsataha! Sesus mozumuku. Tabo iktsataha Sesus mozumuku iwa maha zeka tyberi beri byitaha! Kytsa harere bo ka ma ahabyitaha!

²⁴ Myziksizoze tsipiknynaha. Bijoikpe buruk nanabyitaba mypubyri pare parezo waha. Aparakbaha kabo tsimykozonaha. Utakta Deus zikpehata myziksizoze iwahi my – niy.

²⁵ Sesus:

– Tapara sinini mykara. Abaka kytsa kahumo batu sispirikpo.

²⁶ Myziksizoze kytsa Noe okze ziknakaranaha ky watsa. Zikzibytuhukutu ziknatahadisahakanaha, zikzikukunaha aha ziknatahasukzakanaha.

²⁷ Iwa my. Iwaze Noe tsaraha puētsikbyita bo nitsukze nahawa. Takoroze atsoko hyritsik inawō. Utsa kytsa pihik humo tahababaiknaha. Iwatsa sispirikpobyitsa tahababaiknaha.

²⁸ – Ro okze tu niaha wa tihi niy: Zikzibytuhukutu kytsa ziknatahadisahakanaha, zikzikukunaha, ziknasiparikiknaha, wahoro zikzitset-sikiknaha, sinamy ty nyny ziknakaranaha sinamy ziaксеkenaha. Ro Sodō hudikhudikwy ezektsa iwa ziknakaranaha.

²⁹ Iwaze Ro Sodō ekze niparakze. Atsoko Deus izo hyritsik waha bijoikpe ikny tu izo inawōkō. Izohyri tywaha inawōkō anaezektsa nisibabaik.

³⁰ Iwahi myziksizoze atsawatu my.

³¹ Uta myziksizoze aty ape baze rikto zeka tanamy bo ba zitsuk. Tanamy ba zebyk. Aty waratok eze mopykyryk zeka ba tawahoro bo baziksizo!

³² Ro oke bo mytsatytaha atatsa niparakze tasukpe bo iktsa niytatsa. Nihyrikosokda izo bo niharakoro.

³³ Iwaze aty mowak zeka tanamy pihokzaba tahi wasani habo tasapy. Aty Deus humo tispirikporēta zeka inamy zuba mohokda atahi tawahi Deus tuk mynapykyryk. Wasani mykara.

³⁴ Myziksizoze petoktsa harape tuk atsa bete tu purubakanaha zeka estuba katuk pioktyhyryk. Ustakta perikik.

³⁵ Petokzahaza wanatsitsa mysiwazikinaha zeka estuba katuk pioktyhyryk. Ustata katsa perikik.

³⁶ Kytsa petoktsa waratok piwekenaha zeka estuba katuk pioktyhyryk ustakta perikik – niy. Zinymyrykynahatsa ipe niaha:

– Hana eze sa iwa tsimy – niaha. Niytahi Sesus harere pinymyrykynaha. Mytsatyziu mykaranaha.

³⁷ Sesus tihi:

– Hawaze nirata zeka urubutsa nakypyknaha. Piborobanaha. Urubutsa Deus bo mytsaty zikahabyitsa sihorotsa zuba nasiborokonaha. Kytsa Deus bo mytsaty zikahabyitsa ihumo sispirikpobyitsa iwatahi babyitatu uta myziksizoze kaharere zuba wasani my – Sesus niy.

18

Haramukuka kytsaharerewabytsa aha humo nisispirikpoko.

¹ Sesus haramukuka soho nitsasoko. Zinymyrykynahatsa nisihrinymyryky. Hawa kytsa Deus bo myzapykykynaha, ibo mopamykysoikiknaha ba pyk zikaha. Iwaha humo zinymyrykynahatsa nisihrinymyryky. Iwatahi haramukuka soho nitsasoko.

² Atahi:

– Kytsaharerewabytsa hudikhudikwy eze niy. Ata kino Deus humo batu ipyby. Kytsa humo batu ma isopyk sihumo batu imypokzitsiu.

³ Anaeze niwatihi haramukuka ziknapykyryk. Atatsa ibo pororo ziknakara. Ibo ziknatsasoikik:

“O tsiktsumuēhī ky” nikara. “Kasukyrytsa humo kaharere bo wabyty. Ata kino moziksapybyriki. Kaharere tsipiwaby zeka kasukyrytsa sakyriukrēnikitsa hurukwy bo tsimytsahurukik” niy. Iwa atatsa nipamykysoikik.

⁴ Batu aidy ahabyita ziknakara kytsaharerewabytsa batu yh̄y niy. Bykyze ta humo tu mytsaty niy. “Iwatatu utakta Deus humo batu kapyby. Kytsa humo batu ma kasopyk sihumo batu kamypokzitsiu.

⁵ Abaka haramukuka pikykniki. Iwatahi haramukuka pitsumuēhī. Atatsa tasukyrytsa harere soho piwaby. Uta hi atatsa pibetesaka. Iharere ty waby byizeka pikyknizo. Kakubyri mozumu zeka kakidipyk mynaparak” niy – Sesus nikara.

⁶ Iwaze Sesus aparakbaha bo nipamykysoko.

– Kytsaharerewabytsa harere bo wabytahaktsa! Atakta imysapybyitatu nikara. Iwatatu atatsa zibetesaka.

⁷ Deus ta abazuba tsimysapyrēta. Ikiahatsa ahatuktu zuba:

“O Deus ja mymytsumuēhī tsimaha” iwa ba ziktsasonaha. Mymytsumuēhī tsihikik h̄y. Iwatsahi ibo tynapamykysoikiknaha. Unata okoroze ahaeze Deus bo tynapamykysokonaha.

⁸ Atahi pahatsumuēhī h̄y. Deus tatyryktsa mysitsumuēhī. Atsoko mysitsumuēhī h̄y. Sihumo tsimypokzitsiarēta. Utakta Deus zikpehata ahawata ikyzik. Myziksizoze kytsa kahumo sispirikporētsa moziknaha ana hi mozihikik. Deus bo mynapamykysoikiknaha hi mozihikik. Iwatsahi Deus bo tynapamykysoikiknahaktsa kytsa! – niy.

Pariseu okyrysaro bykyktsa ahatsa soho nitsasoko.

⁹ Kyze Sesus nipamykysokozo. Wabytaha simyspihikbatatsa soho humo nisihrinymyryky. Asaktsa:

– “O katsa zuba wasani Deus okze tsimykaranaha” nikaranaha. Utsa humo ka tahasupewykynaha – niy. Iwatahi Sesus sisoho nitsasoko.

¹⁰ – Kyze makutsa petoktsa Deus wahoro zubata bo inapupunaha. Iwaze Deus bo nipamykysokonaha. Estuba Pariseu. Usta okyrysaro bykyktsa iwa ahatsa.

¹¹ Pariseu ata zuba niriktohoko. Atazuba Deus bo nipamykysoko nawa nikara.

“O Deus ikia humo ka kakurēta. Ikia kasoho bo wasani mytsaty tsimy. Utsa kytsaktsa sinamy siakparawy. Utakta batu. Utsa kytsaktsa mektsaktsa okeza nasipyrirykyknaha. Utakta batu, niwa kasopykbyita. Utakta tohi okyrysarobykyktsa byitawata mynakara.

¹² Pororo mynakara petok mozurukuze hauk ahabyita mynakara. Ikia bo kanamy ty nyny kasopyk. Kanamy tsapukte buruk iwaze abo nyny kasopyk” niy. Iwa tatuktu zuba nipamykysoko. Atahi imysapybyikita nikara isukatsihikbyita nikara.

¹³ Iwaze okyrysaro bykyktsa nokponi tu rikto ahata. Bijoikpe bo iktsa ahabyita tu nikara. Wytyk bo zuba okmymy ahata nikara. Tarok humo zuba baybay nikarata. Iwaze hi Deus bo nipamykysokota iwa nikara:

“O Deus kahumo amypokzitsihukta! kamysapybyita tu mykara” nikara.

¹⁴ Niahatsahi makutsa petoktsa tahawahoro bo ziksizonahaze – Sesus nikara. Iwaze Sesus nitsasokozo:

– O Pariseu wasanibara ty mykara. Atakta okyrysarobykyktsata ziksi wasani nakarata. Aty: “O utakta wasani” my zeka. Deus ipe:

“O atakta batu wasani isopyk.” Aty: “O kamysapybyita tu mykara ana humo hi kasukatsihikrēta” my zeka Deus ipe my:

“O atahi wasani isopykta” my – Sesus nikara. Iwa nisihyrinymyryky.

Sesus jabyitsa ahatsa niy.

¹⁵ Kyze mektsaktsa kytsa tahahyrytsa Sesus bo nisioktyhyryknaha. Iwatsahi nisiharekpyyikiknaha. Iwaze zinymyrykynahatsa tahasakparekenaha. Nisibetsakaknaha.

¹⁶ Sesus ana ziwabyze taokaniki iwaze ispe niy:

– Kyzehu tahaktsa jabyitsa uta kabo tynasioktyhyryknahaktsa! – niy. Zinymyrykynahatsa pe niy:

– Siypyktsa humo ka tsihokdaharēna jabyitsa humo ka mahani ihokzaha. Iwaze Deus tyryktsa hi jabyitsa watsa maha.

¹⁷ Jabyitsa hi: “Kytsa harere bo ma sisopyk”. Jabyitsa wa tsimaha zeka Deus harere bo: ma tsimaha. Deus bo ma ahabyi zeka ityryktsabyitsa tsimaha – niy.

Tsinamyrēta Sesus bo zumu.

¹⁸ Niytahi ispehatsa hudikhudikwy ezektsa tuk tsinamyrēta Sesus bo zumu. Sesus pe nikara:

– O myhyrinymyrykytsa wasani tsimynakarata. Hawa sa mykara iwatahi mohyrikosokdaze uta Deus tuk kawahi mynapykyryk – niy.

¹⁹ Sesus:

– Amo skaraba ikia kape wasani tsimynakarata tsiky. Deus zuba wasani mynakara.

²⁰ Amy ty Deus sohokotsa botu ziwatahakanaha ahyrinymyrēta. Deus harere tihi nitsasoko: Mektsa okeza ba ziksipyrirynaha. Ba zibezenaha. Usta namy ty hyryk hyryk byitaha. Ba zik spihikbatanaha. Ahazotsa humo awatu taha – Sesus niy.

²¹ – O mypehatsa jabasize tu Deus harere humo wasani ziknakara ana humo ka botu ikspirikpoba ziknakara – niy.

²² Sesus ziwabyze nitsasokozo:

– Ikia aba estubaha tsimy. Anamy ty sinamybyitsa bo nyny tsimy. Aokyrysaro humo kino niwatihi nynybaik tsimy. Iwaze hi anamy baba Deus sapy eze tu my. Anamy baba ty mynapykyk. Bykyze pany! Kapik tynao – niy.

²³ Atakta ana ziwabyze iaku byri ta. Tsinamyrēta hi tanamy pokzi tsiwy tuk batu hyŷ niy.

²⁴ Sesus tisukatsihikrēta bo nikozoze atahi zinymyrykynahatsa pe niy:

– Iwaha hiba tsihokdaharēna sinamyrētsa Deus tyryktsa moziknaha.

²⁵ Tsihokdaharēna siraratsa kamero inarokota mysukwowowy ispioke buruk mytsuk. Ihokdahanikia tsinamyrēta Deus tyryk mozik – Sesus niy.

²⁶ Sizubarētsa ana ziwabynahaze asahi nipamykysokonaha.

– Hawa hatsa sa Deus tyryktsa moziknaha. Aty skaraba Deus myzioktyhyryk – nikaranaha.

²⁷ Sesus:

– Kytsa tuk ka ba zikaha. Deus tuk batu amy tohi ihokzaha – niy.

²⁸ Niytahi Peduru Sesus pe niy:

– Katsaktsa mywahoro tsikzerebaiknaha. Iwatsahi ikia tuk tsiknamysapy-naha – niy.

²⁹ Yhŷ my. Sesus:

– Uta kaharere wasani my. Ahawahoro tsiperekeknaha zeka Deus usa wahoro ty ahabo nyny my. Niwatihi ikiahatsa tatukytsa tsimyserekeknaha

zeka, tahyrytsa, tazotsa, tsimyserekbanaha zeka iwa abakta ustsá itukytsa moziknaha.

³⁰ Abakta ustsá tatukytsa, ustsá hyrytsa, ustsá zotsá iwatsá Deus ahabo nyny my. Bykyze ikiahatsá tsimyhyrikosokdanahaze Deus tuk ahawahi tsimynapykyryknaha – niy.

Sesus tabezewy soho mynahyryzikpo naha humo kino nitsasokozo.

³¹ Sesus tuk zinymyrykynahatsá meky botu nisioktyhyryk. Anaeze ispe niy:

– Wabytaha! Serusarēhe bo tsimykurunaha. Utakta Deus zikpehata ahawata ikyzik. Kytsá hawa ja katy maha. Hawa Deus sohokotsá botu ziwatahakanaha kasoho atsatu maha. Botu ziwatahakanaha abaka mykaranaha.

³²⁻³³ Bipyritsá bo pikoktyhyryknaha. Pikspihikbatanaha. Piksapybyri-naha. Pikpyriryknaha. Pikezozoknaha. Pikpypyknaha. Iwaze pikbezenaha iwa katy maha. Iwaze petok puruze mynahyryzikpo – Sesus niy.

³⁴ Zinymyrykynahatsá iharere humo sihyrinymyrybyitsá nikaranaha. Iharere tsihokdaharēna. Hawa ha iharere piwatawyky naha humo batu sihyrinymyry.

Sesus ihyryzikubyríta zizororowy.

³⁵ Sesus Serikoho bo niukuru. Zumubahanize ihyryzikubyríta ske sak eze nidyhyky. Kytsá ziharamukunahaze ispe nikara:

– Uta kabo ja – ziknakara.

³⁶ Niytahi kytsá sizubarētsá ziharamukunaha. Kytsá sizubarētsá nisi-wabyze ispe nikara:

– Amo skaraba – niy.

³⁷ – O Sesus Nasare ezekta mozumu – nikaranaha.

³⁸ Niytahi ihyryzikubyríta Sesus bo huahua niy:

– Sesus, Dawi tsekoka kahumo amypokzitsiukukta! – niy. Iwa hua nikara.

³⁹ Iwatsahi kytsá ziharamukunaha tsahi zibetsakaknaha:

– O aksobyitykta – niaha. Tybyi zuba nikara. Opykani hua nikara:

– Sesus Dawi tsekoka kahumo amypokzitsiuhukta – niy.

⁴⁰ Sesus ske pokteze pyk niy.

– Pany! Kabo pāotyny kabo tyzioktyhyryknaha – niy.

⁴¹ Iwaze izumuze Sesus tihi:

– Amy skaraba hawa sa abo my – niy.

– O kapehatsá ba zikozonaha. Kahyryziktsá tysizororowykta – niy.

⁴² Sesus ipe niy:

– Uta kahumo tsaspirikporētawy iwatahi tsikzororo – niy.

⁴³ Kyze atsoko ihyryzikubyríta nikozozo. Nihyryziktsá zororo Sesus hapik niukuru. – O Deus ikia humo kakurēta – nikara. Kytsá niwatihí Deus bo nipamykysokonaha. – O Deus ikia hi tsamysapyrēta – nikaranaha.

19

Sakeu Sesus humo meky watu niyzik.

¹ Sesus Serikoho bo zumukuze.

² Kyze Sakeu Serikoho ezekta okyryrsaro bykyktsá. Tsinamyrēta. Kytsá namy zikziakseke. Imyspihikbatanikita. Tsiokryrsarozubarēta tu iwata-tu batu nyny ziky.

³ Atakta:

– Sesus ziny tsihikik tahi nikara. Iwatahi isoho piwaby – niy. Batu ibo zikozo. Ipykzezebyita hi nikara. Kytsa sizubarētsa zihirizabanaha iwatahi Sesus ty batu tyny.

⁴ Tsihokdaharēta. Iwatahi ske buruk siharaze niparak. Hwi ske sak eze tu buruhua tabo nido.

– O abahi Sesus tykara tabo mozumu kaopuke buruk harakmo myze ibo mokoze – mytsaty niy.

⁵ Kyze Sesus iopuke buruk izumuzakaze jo bo iktsa niy. Sesus:

– O aidytynykta. Tynasikta! Sakeu pe niy. Aba uta awahoro bo mynakozore. Abaze dyhy my – niy.

Yh̄y niy.

⁶ Iwaze Sakeu aidy sarapuruk niy. Tsakurēta iwahoro bo zumunahaze.

⁷ Utsa kytsa tihi:

– O Sesus tisorekrēta baze tu modyhyky. Batu imysapy – nikaranaha.

⁸ Kyze wahoro eze Sesus nipamykysobaze Sakeu kyik niy. Sakeu:

– O nezeba kytsa okyrysaro iaksebaik. Iksispihikbataikik Sesus. Abaka mahani kasorok. Kaokyrysaro ty tsapukte buruk pinyny. Siakubyrinikitsa bo nyny my. Sinamybyikitsa bo nyny my – niy.

⁹ Sesus:

– Iwa wasani. Jaba ikia apokzi ikzumu. Ikia bo iknakara patsumuēh̄i iky. Mekywatu tsimozik.

¹⁰ Utsa ikia wata sisopyksapybyikitsa tu mykaranaha. Iwatahi mybarawy bo ikzumu. Sisopyksapybyikitsa tu nikaranaha asahi meky watu moziknaha zeka Deus bo mysiockyhyryk – niy.

Maku tatsumuēh̄itsa bo okyrysaro zisirezo ana soho humo Sesus nisi-hyrinymyryky.

¹¹ Ziwabynahatsa bo nipamykysokozo. Aba Serusarēhe zumubahanikinahaze iwatahi Sesus aparakbaha nisihrinymyryky. Kytsa – Aba ja Deus tryryktsa mozumunaha – mytsaty ahabyitsa nikaranaha.

¹² Iwaze Sesus ispe niy:

– Kyze maku myhyrizikwanita nokponi mokuru. Meko botu mokuru. Myzumuze ispehatsa mozik tsihikik niy. Bykyze myziksizoze.

¹³ Ijobyitu tatsumuēh̄itsitsa mytsyhyrytsa watsa tuk mopamykysoko. Ispe niy:

“Uta ikiahatsa bo ouro ty ahawa tu nyny my. Ouro mytsyhyrytsa waha ty nyny my. Ahawatu nyny nyny my” iwa nyny mykara. Ouro humo tarabaja tsimahaze puētsik tsiapiaksenaha. Iwataha – niy. Iwa ispe niyze niparak.

¹⁴ Meko botu niukuru. Kyze itukytsa ihumo batu siakparawy. Kytsa sakyriukrētsa. Iwatsahi wastuhu kytsa maku myhyrizikwani bo niukurunaha. Iwaze ibo zumunahaze. Kytsa tihi:

– O katsaktsa batu ikia humo makparawy. Kyzekta ikia abaka mypehatsa byita tuzik – niaha.

¹⁵ Iwatatu maku myhyrizikwani ispehatsa niyzik. Iwaze tahudikhudikwy ziksizoze tatsumuēh̄itsitsa bo nisihuahua. Iwaze sitsumuēh̄itsitsa ibo zumunaha ispe niy:

– Hawa sa ouro ty tsikykaranaha – niy.

¹⁶ Tapara estuba zubata tapehatsa pe niy:

– O kapehatsa ikia estuba ouro ty kabo nyny tsiky. Ta humo katsyhyrytsa wa iakse – niy.

¹⁷ Myhyrizikwanita tihi:

– O katsumuēhĩtsa tsamysapyrēta ikia wasani tsikykara. Ouro ty estuba zuba abo nyny ikyta tu abazuba tsisararawy. Iwatahi ikia bo hudikhudikwy mytsyhyrytsa watsa nyny my. Iwaha tyziperyky tsimy. Ikia ispehatsa tsimozik – niy.

¹⁸ Usta tsumuēhĩtsa ipe niy:

– O kapehatsa ikia kabo ouro ty estuba nyny tsiky ta humo mytsyhyry wa iakse – niy.

¹⁹ Iwatahi maku myhyrizikwanita tihi:

– Ikia hudikhudikwy mytsyhyry wa tyziperyky. Ikia ispehatsa tsimozik – niy.

²⁰ Usta tsumuēhĩtsa ipe niy:

– O kapehatsa ouro ty estuba kabo nyny tsikahaty taty abo nynyzo my. Utakta panu eze iakwaraka, jokpitsĩhik. Aba kino estuba zuba my.

²¹ Ikia pokso kapybyrēta hi ikykara. Ikia batu amy tsumuēhĩ tsihikik. Ikia humo hi kytsa sinamybyitsa. Ikia namy tsizubarēna. Ikia kino nyny nynybyity. Ikia waratok sizonita bo batu ziksiparik. Tsinasizozeke zuba. Kyrizykybitatu tsinasizozeke zuba. Iwa sitsumuēhĩtsa nitsasoko – Sesus niy.

²² Iwaze myhyrizikwanita zibetsakak ipe niy:

– O batu amysapy. Ikia katsumuēhĩtsa batu apasara tsihik. Batu imysapy aharere humo zuba piwatawy. Ikia mytsaty tsimy utsa kytsa tysinamybyi-wyky. Ikia mytsaty tsimy nyny ahabyitatuze kanamy ziaксе zuba. Ikia mytsaty tsimy kapairikihibara tu pizozeke zuba.

²³ Iwatahi amy skaraba maku okyrysaro perytsa bo ouro ty batu nyny tsiky. Iwazeka abaka ouro puētsik zuba tsiipiakse niy. Iwa myhyrizikwanita – niy.

²⁴ Iwaze sinytsitsa pe niy:

– Ouro ty estuba zubataty okoktaha! Iwaze maku katsyhyrytsawa ibo nyny tahaktsa – niy.

²⁵ Sinytsitsa tihi:

– O mypehatsa, atakta botu ouro katsyhyrytsawaha niy – niaha.

²⁶ Myhyrizikwanita tihi:

– Utakta wasani mykara. Maku tsinamyrēta tu namy ty abazuba ibo nyny my. Maku inamybyita tsikaeni zuba my zeka piakseba – niy.

²⁷ Abaka kasukyrytsitsa kabo tynasioktyhyknaha. Kahumo siharere-wabymybarētsa. Niahatsahi kape niaha:

– O ikia batu mykparawy. Ikia mypehatsa byita tuzik niaha. Aba kaokze tu tysibanaha – niy! Iwatsahi sisukyrytsitsa nisibaiknaha.

Sesus Serusarēhe bo zumuku.

²⁸ Kyze Sesus Serusarēhe bo zinymyrykynahatsa haraze niukuru,

²⁹ Bytykara wa sihudikhudikwy zumubahaninahaze Betipake myzubaha bara. Betanija hara jobonikita Oriwereja inarokoha pauk baze niy. Sesus zumuze tatuktsa petoktsa nispeha.

³⁰ Iwa ispe niy:

– Sihudikhudikwy bo pāotaha kytsa! Atsezubaha tsimypupunahaze pikuza tsibik tsipipiktumunaha. Atahi isoikāihikta niy. Ibete dyhyhukbyita niy. Satsukyktaha! Kabo tyzioktyhyknaha!

³¹ Aty ahape: “Amo maha zeka”. Myhyrinymyrykytsa tihi mype tyoktyhyrykspyk. Niahatsahi tsimykaranaha. Bykyze ahabo tasirezo tsimaha – niy.

³² Kyze zumunahaze wasani pikuza bo zumunaha. Sesus nikara nahawa tihi ibo zumunaha.

³³ Zisatsuknahaze zihitsa ispe niy:

– Hawa skaraba tsimykaranaha – niy.

³⁴ – O myhyrinymyrykytsa mype kabo tyzioktyhyknahaktsa niaha tsahi tsimykaranaha – niaha.

³⁵ Sesus bo ziokythyryknaha, tahasuk pikuzza bete zizozokonaha. Iwaze Sesus ibete nido.

³⁶ Kytsa ske buruk tahakpyzazawy zipaparakanaha. Sesus ykparawytsa tahakpyzazawy zipaparakanaha.

³⁷ Oriwereja tsahara inasikze iapiktsa sizubarëtsa sakurëtsa. Siaksoho opykrëtsa inakaranaha:

– O Deus tsamysapyrëta. Sesus zuba awata mynakara – nikaranaha.

³⁸ – Deus Sesus zipehaka. Deus pauk bazekta tu katsa mybo izumu. Atakta tsimysapyrëta. Atahi abazubata bijoikpe eze tu niy. Bijoikpe iknyktsitsa ihumo sakurëtsa – nikaranaha.

³⁹ Pariseutsa sitazahara eze Sesus bo nipamykysokonaha. Ipe niaha:

– O myhyrinymyrykytsa zinymyrykynahatsa pe aksobyitahatykta! Siharere ka batu imysapy – niaha.

⁴⁰ Sesus tihi:

– Aparakbaha soso ahabyizeka haraharetsa kaka maha – nikara.

Sesus Serusarëhe ezektsa humo nipuziuku.

⁴¹ Sesus Serusarëhe zumubahaneze nipuziuku. Nawa nikara.

⁴² – O Serusarëhe ezektsa! Tsinymyrykynaha zeka aty ahahumo tsimynakoko. Awatutaha. Abaka batu ahahyrinymyry.

⁴³ Bykyze ahasukyrytsitsa mozumunaha. Ahudikhudikwy myzipykbaiknaha. Pahahurukwybaiknaha. Ahudikhudikwy pok taba piukunaha, paikpa piukunaha.

⁴⁴ Nanabyitaba ahasukyrytsitsa zuba. Ahawahoro myzipykba. Wahoro ezektsa niwatihi nasipyk. Haraharetsa harape betektsa mynatsubanaha. Ikiahatsa Deus mozumuze pahaoktyhyryk ana humo hi batu ahahyrinymyry.

Sesus Deus wahoro zubata isturupeze bo nitsuk.

⁴⁵ Kyze Sesus Deus wahoro zubata isturupeze bo nitsuk. Anaeze kytsa bo niko. Kytsa tahanamy zihuakaknaha. Okyrysaro ty kytsa bo nyny nikaranaha. Iwatahi nisiksiwyky Sesus ispe niy:

– Nabo pãotaha! niy.

⁴⁶ Deus harere niy:

“Atakta uta kawahoro zubata Deus bo mynapamykyso.” Iwa botu ziwatahakanaha. Ikiahatsa hi kawahoro sityhyryboarëtsa parik wa tsikzoknihiknaha – niy.

⁴⁷ Zibiyituhukutu Sesus Deus wahoro zubata isturupeze nisihyrinymyryky. Taparaktsa ziknapamykysokonahatsitsa, Deus harere humo sihyrinymyrytsitsa iwatahatsitsa iwatsa Sesus humo batu siakparawy.

⁴⁸ Iwatsahi taparaktsa Sesus zibezekzykynaha. Utsa kytsa pokso sipybyrëtsa nikaranaha tsahi batu. Kytsa sizubarëtsa Sesus ziwabytoktonaha.

20

Aty harere humo Sesus kytsa mysipeha. Aty sa ipe: – Natihiktsa – my.

¹ Kyze usta okoro eze Sesus Deus wahoro zubata isturupeze kytsa nisihyrinymyryky. Deus wasania ty nitsasoko Deus soho ty kytsa bo nipamykysoko. Iwaze taparaktsa Deus wahoro eze ziknapamykysokonahatsitsa, ziwatahakanahatsitsa, kapitaõtsa iwatsa zumubanaha.

² Sesus bo zumukunahaze. Ipe niaha:

– Aty sa ikia pe kytsa tysihyrinymyrykta niy. Aty sa zapeha – niaha.

³ Ispe niy:

– Uta kino ikiahatsa pe my.

⁴ Aty sa Suão Batista pe:

“Kytsa tysiharasusu” niy. Tozeka ja kytsa ipe niaha. Tozeka ja Deus ipe niy.

Aty sa Suão Batista pe:

“Kytsa tysiharasusu” – niy.

⁵ Taparaktsa asa zuba nipamykysokonaha.

– Katsaktsa sa hawa tsimaha. Tsimytsasonaha zeka Deus ipe niy iwatahi Sesus mype:

“Amo sa Suão humo batu ahaspirikpo” my.

⁶ Tsimytsasonaha zeka kytsa ipe niy. Iwaze kytsa sizubarëtsa katsa harahareziktsa mybo mynasipaparanaha. Suão hi Deus sohokotsa mytsaty mykaranaha – nikaranaha. Iwa asa zuba nipamykysokonaha.

⁷ Iwatsahi Sesus pe niaha.

– Katsaktsa batu myhyrinymyry aty sa Suão Batista pe:

“O kytsa tysiharasusu!” niy – niaha.

⁸ Sesus:

– Uta kino niwatihi. Uta ahabo ba ziktsaso, aty ja kape:

“Kytsa tysihyrinymyrykykta!” – niy. Iwa Sesus Pariseutsa bo nipamykysoko.

Duabohotsa perytsitsa sisopyksapybyitsa soho humo nitsasoko.

⁹ Kyze Sesus aparakbaha bo nipamykysokozo. Duabohotsa perytsitsa sisopyksapybyitsa soho humo ziwatawyky.

Maku estuba duabohotsa nisiparikik. Waratok tsihitsa tsumuëhïtsa pe:

– Duabohotsa tysiperynahaktsa! – niy. Iwaze nisierekek. Mekybotu niparak.

¹⁰⁻¹¹ Iwaze nisizozikiknahaze, usta tatumuëhïtsa duabohotsa mysiperyky-nahatsa bo zipeha. Hwiharatsa itsapukte buruk piakse. Duabohotsa perytsitsa itsumuëhïtsa nitsakikinaha. Batu amy tohi ty ibo nyny niaha. Niytahi sizihitsa mektatu ziakzo. Duabohotsa perytsitsa ata kino niwatihi nitsakikinaha. Sisopyksapybyitsa nikaranaha. Batu amy tohi ty ibo nyny niaha.

¹² Iwatahi zihitsa usta tsumuëhïtsa zipeha duabohotsa perytsitsa bo zipehazo. Waratok perytsitsa ata kino nitsakikizonaha. Zisukehekzonaha. Batu amy tohi ty ibo nyny niaha. Zihyrikywykynaha.

¹³ Duabohotsa zihitsa mytsaty nikara – Hawa sa my. Katse kahumo tsipokzitsiarëta iwatahu pipeha. Ata humo ka ja ba zikaha – nikara.

¹⁴ Iwaze itse niparak. Kyze duabohotsa perytsitsa zihitsa tse bo nikozonahaze asa zuba nipamykysokonaha:

– O duabohotsa zihitsa tse tabezehikta kytsa nikaranaha, iwaze inamy takse. Atakta izo mohyrikosokdaze atahi tazo namy piakse. Atahi duabohotsa mynasitsihitsa mozik, ana pokso iwatsahi tabezehikta kytsa! Iwaze katsa hi duabohotsa tsihitsitsa tsimoziknaha. Iwa asa zuba nipamykysokonaha – Sesus niy.

¹⁵ – Itse sibo zumuze waratok ekze ziksiwyhiknaha. Zibezehiknaha. Duabohotsa zihitsa hawa sa waratok perytsitsa humo my

¹⁶ Niytahi zihitsa perytsitsa bo mozumuku. Mysibaik. Iwazeka waratok ty mektsa bo tu nyny my. Utsa perytsitsa bo nyny my – Sesus nikara.

Ana ziwabynahaze asahi Sesus pe:

– O batu ba – niaha.

¹⁷ Iwaze Sesus sibo iksaziu nikara. Ispe niy:

– Deus harere botu ziwatakanaha. “Kytsa wahoro nizoknikinahaze nitsasonaha ‘O ana harahare batu isapy’ iwa maha zeka mopapyknaha.” Ata hi harahare hi abazubata niyzik. Anahi harahare tisapyrēta humo ustsaharahareziktsa buruhuwa niaha – niy.

¹⁸ Harahare bete mynarahanaha zeka nisipaparabaik. Atahi harahare kytsa bete mynaraha zeka iwaze wytyk tazy moziknaha.

Kytsa okyrysaro humo Sesa abazubata bo nyny mykaranaha ja.

¹⁹ Taparaktsa Deus wahoro eze ziknapamykysokonahatsitsa, ziwatahakanahatsitsa sihyrinomyrētsa iwatsa soho humo Sesus nitsasoko. Hawa mykaranaha anahi ziwatawy niaha tsahi itsipa humo zioқтыhyrynaha. Batu zik kytsa pokso sipybyrētsa.

²⁰ Iwatsahi kytsa Sesus bo nisipehakanaha. Kytsa – O Sesus myhyrinomyrykytsa! – mybarapetu nikaranaha. Asaktsa siharerewabymybarētsa. Kytsa Sesus nizokparakanaha iharere ziwabytoktokonaha. Bykyze isoho humo – “O atakta batu imysapy” maha hi – nizihikiknaha. Iwatsahi ispehatsa bo pioktyhyryknaha.

²¹ Iwatsahi siharereziutsa wa niukurunaha nizokparakanaha tu iwatsahi Sesus pe nikaranaha.

– O ikia tsahyrinomyrēta ikia hi kytsa bo tsimypamykysokota wasani tsimy kara. Deus harere humo tsinomyry wasani tsimy kara. Wasani nisihyrinomyryky.

²² Kapitāo Sesa Homa ezektsa pehakatsa okyrysaro ty ibo nyny tsimaha zeka wasani ja – nikaranaha.

²³ Asaktsa simysapybyitsa tu mykaranaha ana humo hi Sesus tsihyrinomyrēta.

²⁴ Iwatatu ispe niy:

– Pany okyrysaro ty kabo nyny taha! Aty naro sa okyrysaro humo iwatahaha. Aty hyrikoso sa okyrysaro humo ziwatahaka – niy. – Sesa hyrikoso okyrysaro humo niy.

Sesa naro iwatahaha okyrysaro humo niwatihi – nikaranaha.

²⁵ Sesus tihi:

– Ikiahatsa kapitāo namy ty ka ibo nyny taha! Okyrysaro ty kapitāo bo tsisizonaha. Deus humo kino niwatihi. Deus namy baba ty ka ibo nyny tahaktsa! Deus namy tsisizonaha – niy.

²⁶ Sesus harere pisapybyri naha hi mozihi kik naha batu zik. Aparakbaha okzeka Sesus harere batu tymyi. Iwatsahi batu tyso. Sesus harere humo paikpa mytsaty nikaranaha.

Mynahyryzikpo naha soho humo nitsasoko.

²⁷ Kyze Sadusitsa Sesus bo zumunaha. Asahi kytsa myhyryzikosokdanahaze ba ziknahyryzikponaha mykaranaha. Iwatsahi Sesus bo nipamykysokonaha.

²⁸ – O myhyrinomyrykytsa Moises mytsyhyryze papeu humo ziwatahakaze: “Taparakta maku ihyrytsa byitatu nihyrykosokdaze itsy hara mukuka ziake! Iwaze atatsa tabykyhyze mopurukze kytsa tihi: ‘O iziky tse nipuruk’ maha.

²⁹ Nawaze tuk itukytsa sete ahatsa nikaranaha. Taparakta tasukza. Hyrytsa ahabyita tu nihyrykosokda.

³⁰ Niytahi itsy haramukuka ziake. Itsy kino niwatihi itybykyhybyitatu nihyrykosokda.

³¹ Bykyze ustsahatsa tu batu sihyrytsa byitsa tu niakbakanaha. Iwaze itukytsa mytsyhyry

wa atatsa ziaksenaha, estuba nihyrikosokdaze iwaze itsy ziaксе siwatu atatsa zioкtyhyryknaha. Iwa niaha. Kytsa sete itukytsa sihyrytsahabyitsa tu niakbakanaha.

³² Bykyze atatsa kino niwatihi nihyrikosokda.

³³ Nawa puruze myzubaha mynahyryzikponaha aty sa ibarikta babata” nikaranaha, sete itukytsa ahatsa atatsa ziaksenaha – iwa Sesus bo nikaranaha.

³⁴ Iwaze Sesus ispe niy:

– Abaktsa kytsa tahasukzanaha.

³⁵ Iwatsa tu mohyrikosokdanahaze mynahyryzikponaha. Mynahyryzikponahaze ba zik mysukzazonaha. Iwaze Deus tihi:

“Ikiahatsa tsimynahyryzikponaha zeka bijoikpe bo tsimaha, ba zik karazonaha ba zik mysukzazonaha.”

³⁶ Iwatsahi bijoikpe iknyktsitsa watsa tsimoziknaha. Deus hyrytsa tsi-moziknaha.

³⁷ Tsimyhyrikosokdanaha zeka tsinahyryzikponaha iwatsahi ahahyrinymyrëtsa niy. Tubabatu Moises niwahi ziwatahaka. Mytsatyta! Moises okyryrsaro mokorobaka soho ziwatahaka. Hana eze okyryrsaro ikny Moises Deus yksoho ziwaby Deus tihi:

“Utakta Deus my, Abarão kahumo tispirikporëta. Isake niwatihi ka humo tispirikporëta. Adiri Sako kahumo tispirikporëta” iwa.

³⁸ Kytsa siakbatsa Deus humo batu sispirikpo. Kytsa asatu zuba Deus humo sispirikporëtsa. Iwatsahi taparaktsa asatu maha. Deus okze ka myzuba asatu – niy.

³⁹ Estuba iwatahahatsitsa ipe niy:

– O myhyrinymyrykytsa ikia tsiktsasozu niy.

⁴⁰ Iwatsahi batu amy tohi ziktsasonaha. Sesus harere humo sipybyrëtsa – nikaranaha. Nihareretsihikbyrinaha.

Deus myzipehata mywata mozikta soho.

⁴¹ Sesus ispe niy:

– Amy skaraba kytsa nitsasokonaha Kiristu, Deus zipehata ahawata Dawi tsekokatsa tu nikaranaha.

⁴² Deus hyrikoso humo Dawi babata Samo papeu humo ziwatahakaze:

“Deus kapehatsa pe: ‘Kapanuryk taba dyhyty

⁴³ Bykyzehu uta Deus asukyrytsitsa ty apyrytsa pukezi

tysipykwy apokso sipybyrëtsa.’”

Iwa Samo papeu humo iwatahaha.

⁴⁴ Dawi hi Kiristu pe niy “Kapehatsa”. Iwa Dawi pehatsa. Dawi tsekokata atsatu sa. Atsatu hiba – Sesus nikara.

Sesus iwaze Moises harere humo zinymyrykynahatsitsa tuk nipamykysoko.

⁴⁵ Kytsa sizubarëtsa Sesus ziwabykynaha iwaze atahi zinymyrykynahatsa pe niy.

⁴⁶ – Pykyhytutaha! Moises harere humo zinymyrykynahatsitsa humo pykyhytutaha! Asaktsa tahasuk humo isapyha ty zuba siakparawy. “Katsaktsa wasani tsimaha” mytsaty ahabyitsa tu nikaranaha. Kytsa nisihobyknahaze sibo nipamykysoziukunaha. Deus wahoro eze ziknadyhydykynahaze tisapyrëna zuba mynazihikiknaha. Tahamyikaha eze isapyhazuba mynazihikiknaha.

⁴⁷ Kytsa mohyrikosokdanahaze haramukukaka okyrysaro piaksekenaha. Iwaze aparakbaha okzeka Deus bo mopamykysoikiknaha. Simysapybyikitsa tu nikaranaha iwatahi Deus sinini ykarawy bo mysipehahik. Sihyrinymyrykytsitsa tu sinini tynakaranaha – niy.

21

Haramukuka okyrysaro ty ikatyhi Deus bo nynybaik niy.

¹ Sesus Deus wahoro zubata isturupeze anaeze kytsa okyrysaro suk bo pokpok nikaranaha. Iwaze hi Sesus sinamynikitsa tahaokyrysaro typok pok nikaranaha ana bo hi Sesus nizoko.

² Iwaze Sesus haramukuka bo iktsa niy. Atatsa inamybyitatsa tu petok zuba pok niy.

³ Sesus tatuktsa pe niy:

– Atatsa hi wasani mykara. Okyrysaro ty ikatyhi nynybaik niy. Sinamynikitsakta okyrysaro ty nynytohi nikaranaha. Deus okze ka atatsa abazuba nyny niy.

⁴ Sinamynikitsakta okyrysaro ty tsizubarēna zerekeknaha. Atatsa katsa batu. Atatsa inamybyitatsa tu okyrysaro ty tadisahawy huakzetu haty nynybaik niy. Atatsa katsa okyrysaro ty nynybaik niy. Sinamynikitsa Deus okze ka tsikaeni zuba nyny niaha – Sesus niy.

Sesus Deus wahoro zubata mynakbi naha soho nitsasoko.

⁵ Kyze kytsa Deus wahoro zubata soho humo nipamykysokonaha:

– O haraharetsa taparaka siziurētsa niaha. Iktsa taha. Haraharetsa watahawytsa zuba Deus bo nyny niy. Haraharetsa siwatahawy zuba tisapyrēna – niaha. Nipamykysokonahatsa tu Sesus ispe niy:

⁶ – Haraharetsa bo iktsataha. Haraharetsa sisapyrētsa bo iktsa taha. Aibatohi haraharetsa ba harape betektsa mynatsubanaha. Mopaparahaibaiknaha harahareziktsa natsubanaha. Deus wahoro zubata eze haraharetsa mytōtōbanahaze iwaze mopykba.

Hawa sa kytsa mysininiwykynaha ana soho humo Sesus nisihyrynyryky.

⁷ Zinymyrykynahatsa tihi:

– O myhyrynyrytsa hawaze skaraba Deus wahoro zubata mopykba. Hawaha humo sa mybo tsipiwatawy – nikaranaha.

⁸ Niytahi Sesus iwatawy soho nitsasoko:

– Pykyhytutaha! Kytsa pahaspikhbatakanaha. Kytsa sizubarētsa mozunahaze:

“O utakta Kiristu. Aba Deus zipehata kytsa mysioktyhyryk” maha. Pahaspikhbatakanaha zeka situk ka pão pão byitaha!

⁹ Nanabyi soho tsipiwabynaha zeka kytsa ěryktsa mowatsoronaha. Kytsa bytykara eze kino niwatihi mowatsoronaha ana hi tsipiwabynaha zeka ahapyby byihu ja! Tapara niahawatihi. Mybarawy pykbara tu.

¹⁰ Sasabyitsa myharape banaha. Kytsa sizubarētsa mowatsorokonaha.

¹¹ Nanabyitaba wytyk mytydydyky tu morapa humo kino niwatihi. Iwat-sahi kytsa sizubarētsa tarahapapiyknaha. Kytsa sizubarētsa sinini maha. Bijoikpe eze mypybywy natakaha.

¹² Tapara ana bo zuk ahabyizetu kytsa ikiahatsa ahasukyrytsitsa bo pahaoktyhyryknaha. Ikiahatsa kino sihumo sinini tsimykaranaha. Deus wahoro bo pahaoktyhyryknaha iwaze sakyriukrēnikitsa hurukwy bo pahahuruknaha. Kahumo pahasukyrykynaha.

¹³ Ispehatsa okze pahasukyrykynaha. Pahasukyrykynahaze ikiahatsa wasaniha soho ty tsimypamykysokonaha.

¹⁴ Aba ahahyrinomyrëtsa. Kytsa ispehakatsa okeryk pahaoktyhyryknahaze ahaharere soho bo batu mytsaty tsimykaranaha. Mytsaty mytsaty byitaha!

¹⁵ Uta kino ahare ty ahabo nyny my. Ahahyrinomyrëtsa tsimoziknaha. Kaharere ikiahatsa bo motsaso. Ahasukyrytsitsa ahaharere humo ba zikaha.

¹⁶ Iwaze ahazotsa siharereziubyitsa tu ahasukyrytsitsa bo pahaoktyhyryknaha. Ahazikytsa ahatukytsa kino niwatihi siharereziubyitsa tu ahasukyrytsitsa bo pahaoktyhyryknaha. Wastuhu pahabanaha. Atyryktsa tuk pahabanaha.

¹⁷ Ikiahatsa kahumo ahaspirikporëtsa iwatsahi kytsa ahahumo batu siakparawy.

¹⁸ Iwatsatu ahabyri typykyknaha. Deus pahapokzitsiki. Aharadi estuba mohokda zeka tsihyrinomyrëta.

¹⁹ Ikiahatsa sinini tsimaha zeka, awahi Deus tuk tynapykyryknaha. Ikiahatsa Deus tuk tsimynaopykyryknaha – Sesus niy.

Sesus Serusarëhe mynakbi ana soho nitsasoko.

²⁰ Sesus ispe niy:

– Kyze sodadutsa Serusarëhe myziharapyryryknahaze tsimykozonahaze atsoko naktsihyripetoktokba iwazeka ahahyrinomyrëtsa. Serusarëhe naktsihyripetoktokba.

²¹ Iwaze asaktsa Sudeja eze mopykyryk zeka hara bo tywaknaha! Asaktsa tahahudikhudikwy eze mopykyknahatsaktsa aidy päotaha! Asaktsa jeruk bara eze mopykyryknahatsaktsa sihudikhudikwy bo erete erete byitaha.

²² Iwahaty sinini mykaranaha. Deus sohokotsitsa botu ziwatahakanaha atsatu mysisininiwyknaha.

²³ Wytykyryk sihyryzahaza sisukatsihikrëza moziknaha. Sijeza kino niwatihi tahabykytsa tuk sisukatsihikrëza moziknaha. Nawa puruze kytsa sizubarëtsa sinini mykaranaha. Deus kytsa sisopyksapybyikitsa humo sinini ty ka niy.

²⁴ Sizubarëtsa sokorotsaputsa ty mysibezenaha. Utsa meky botu mysioktyhyryknaha. Bipyritsa asaktsa Deus humo batu sispirikpo Serusarëhe bo mozumunaha. Anaeye tuze Serusarëhe pisapybyrinaha. Serusarëhe ezektsa bipyritsa pokso sipybyrëtsa mykaranaha. Kyze Deus tihi: “O niwazubakta!” my – Sesus nikara.

Sesus Deus zipehata mywata myziksizo.

²⁵ – Bijoikpe eze myziwatawy nanabyi piwatawy. Iwatawy haramwe eze byzoje eze byrisoiktsa eze iwahatsa natakaha. Mybarawy ezektsa sinyhybyitsahi iwatsahi sipybyrëtsa. Iwatawy pokso sipybyrëtsa. Buburu zuba ykpyri waha humo. Aparakbaha sipybyrëtsa.

²⁶ Batu siaku sipybyrëtsa zuba. “Hawa sa my” maha. Bijoikpe ezektsa mytydydykyknahaze mokurunaha. Iwatsahi sipybyrëtsa babatsa. Kytsa babyitsa tu mynatsunaha.

²⁷ Iwaze uta Deus zikpehata ahawata myziksizo iwaze aparakbaha tsipiknynaha. Bijoikpe zatata eze tu mynasik. Iwa uta myziksizoze kasapyrëta kazikwyrëta my.

²⁸ Iwa myze ahakurëtsa tsimoziknaha! Ahapyby byihu ja. Ahapunihikrëtsa tsimoziknaha. Atsoko uta katyryktsa bo pahaoktyhyryk.

Umaha soho nitsasoko.

²⁹ Kyze Sesus kytsa bo nipamykysoko. Myziksizo ana soho humo hi ziwatawyky. Iwa nisihyrinomyryky.

³⁰ — Umaha bo iktsatahaktsa! Utsa hwitsa bo iktsatahaktsa! Okryrsaropoktsa myponahaze ikiahatsa ahape tu ahasopyk. “O takarasapyky” tsimaha.

³¹ Iwa ahahyrinymyrētsa. Iwa my zeka ahahyrinymyrētsa. Iwata iwatawy tsizubarēna bijoikpe bo tsimykozonahaze ikiahatsa ahape tu ahasopyk. “O abahi zuba Sesus tatyryktsa tuk myziksizo. Atahi abazubata mozik tsimaha”.

³² Wasani tsimykaranaha. Wastuhu abaktsa kytsa anabo hi iktsa maha. Kaharere ty atsatu mykara, bykyzehu zuba mohyrikosokdanaha

³³ Bijokpe mohokda. Mybarawy kino niwatihi mohokda. Kaharere zuba ba zikokza. Kaharerebaba ka tawahi mynapykyk — Sesus niy.

Tsikasuparakanahaktsa iwaze iktsaziutaha.

³⁴ Sesus ispe niyzo:

— Iktsaziutaha! Ahadisahawy bo mytsaty mytsaty byitaha. Ahamyitsapyri humo mytsaty mytsaty byitaha. Ahamyikaha bo kino mytsaty mytsaty byitaha. Iwaze nawa puruze sizubarētsa sinini mykaranahaze anahumo ja ahapyby byihu.

³⁵ Iwa puruze atsoko mozumu. Hawa siraratsa taokarawy bo mynapupunaha sinyhybyitsa tu mynapupunaha ikiahatsa batu siwatsa tsikahasukparanahaktsa iwatsahi nawa puruze mozumuze batu ahapyby.

³⁶ Iwaze ahabyi ahaspihik tsiwabykynaha. Tsipiperykynahaktsa Deus bo tsimypamykysoikiknaha “O Deus ikia tymytsumuēhīkta! Kytsa mymysinini-wykynaha humo ikia mybo iktsa tsimyeze tymytsumuēhī iwatsahi mypuni-hikrētsa tsimoziknaha. Katsa tsimywaknaha iwaze Sesus myziksizoze mypuni-hikrētsa” tsimaha — Sesus nikara.

³⁷ Kyze zikzibytuhukutu Sesus Deus wahoro zubata isturupeze nisi-hyrinymyryky, zunubakaze hara Oriwereja inarokota bo nidoko.

³⁸ Miwa botu Deus wahoro zubata bozo niy. Kytsa sizubarētsa Deus wahoro zubata bo niukurunaha. Sesus natawabyhyk niahatsahi ziwabykynaha.

22

Hawa kytsa Sesus zibeze tsihikiknaha.

¹ Kyze Sudeutsa myikaha zumubahanikize, anawaha eze Deus taparaktsa nisitsumuēhī mytsaty ziknakaranaha. Atsikara ipytowybara ty pororo ziknakaranaha.

² Kytsa myikaha inakymyze taparaktsa Deus wahoro eze ziknapamykysokonahatsitsa sihyrinymyrykytsitsa kino niwatihi Sesus ziberikinaha. Iwatsahi zibeze tsihikiknaha. Aparakbaha pokso sipbyrētsa. Iwaze sipapatu Sesus zibeze tsihikiknaha.

Sudas Sesus sukyrytsitsa bo zumu.

³ Niytahi Satanas Sudas tuk niapykyryk. Sudas usa naro Iskariotses inarokota. Sudas Sesus tuk zinymyrykyta.

⁴ Iwatatu taparaktsa bo niparak. Taparaktsa Deus wahoro eze ziknapamykysonahatsitsa iwaze Deus wahoro perykytsitsa ahatsa bo niparak. Atahi Sesus sukyrytsitsa bo zumu. Iwatahi situk nipamykysoko:

— O Sesus batu ahakparawy. Tsipibeze tsihikiknaha. Uta pahatsumuēhī. Bykyze uta hi ibo pahaoktyhyryk — niy.

⁵ Iwaze ziwabynahatsitsa sakurētsa niapykyryknaha.

— O ikia tsimymytsumuēhī zeka okryrsaro ty abo nyny tsimaha — niaha.

⁶ — Yh̄y. Bykyzehuta! Aba ibo piksizo — niy.

— Yh̄y. Tsipiksi za — niaha.

Kyze Sudas mytsaty nikara. — Hawa sa Sesus bo mysioktyhyryk. Yh̄y ja, bykyzehu — niy. Ziperyky zuba.

Sesus tamyikaha bo nisiakzo.

⁷ Kyze Sudeutsa myikaha inakymy. Nawa puruze atsikara ipytowybara ty ziokikiknaha. Sudeutsa hozipyrykzatsa zipyryktsa ty nisibakanaha.

⁸ Niytahi Sesus Peduru Suão ahatsa nisipeha. Sesus:

— Nabo kytsa mydisahawy humo bubutaha — niy.

⁹ — Hana eze sa mydisahawy humo bubu tsimaha — niaha.

¹⁰ Sesus ispe niy:

— Wabytaha! Sihudikhudikwy bo tsipomonahaze maku pihik suk bykyhy tuk tsipihobyknahaze ata hi iapik tu wahoro bo mytsukze paku paku tsimaha

¹¹ Zihitsa pe:

“O Sesus hana eze skaraba mymyikaha ty katuktsa tuk hauk tsimaha tsimahaktsa!”

¹² Ata ahape: “Iktsatahaktsa my”. Wahoro jobo tsimydoknaha. Ipokpedawy bo pykyhytu mydyhywytsa bo iktsa tsimaha. Anaeze hi mymyikaha ty tsimymydisahanaha — niy.

Yh̄y niaha.

¹³ Iwatsahi petoktsa zinymyrykynahatsa nitururuknaha. Sihudikhudikwy izumunahaze Sesus nikara naha watu niy. Iwaze tahamyikaha zikymynaha. Anaeze hozipyrykza tsibik zizokonaha.

Sesus tatuktsa tuk tadisahaka.

¹⁴ Zunubaze Sesus zumu. Zinymyrykynahatsa tuk tahadisahakanaha

¹⁵ Sesus ispe niy:

— Uta ahatur pikdisaha tsihikik zetu. Ahahumo kahyrizikbarëta. Aba sinini my iwatahi ahatur pikdisaha tsihikik.

¹⁶ Aba na waha ty ikiahatsa tuk ba zikdisahazo. Deus tyryktsa mozumunahaze bykyze zuba pikdisahazo. Bijoikpe eze zuba pikdisahazo — niy.

¹⁷ Iwaze Sesus taopowysuk ty okok niy. Deus pe niy:

— Ikia humo ka mykurëtsa — niy. Iwaze sibo nyny niy:

— Paiktahaktsa! Tsõtahaktsa — niy.

¹⁸ — Uta aba zuba duabohotsa tsik pikuku. Ba zikuzo Deus tyryktsa mozumunahaze zuba pikuzo. Bijoikpe eze tu zuba piku — niy.

¹⁹ Bykyze Sesus atsikara ty okok niy. Deus pe niy:

— Ikia humo ka mykurëtsa — niy. Atsikara zitsatsakara. Iwaze sibo nyny niy:

— Hauk tahaktsa! Atsikara kanury my. Anaty hauk tsimaha zeka kanury soho bo mytsaty tsimaha.

“Sesus mysapyzekenihyrikosokda tsimaha” — niy.

²⁰ Niytahi duabohotsa tsik soho ty nipamykysoko. Zikuze duabohotsa tsik soho nitsasoko.

— Anaka kaharere ezytyk. Tsipikunahaze kaspu waha tsipikunaha. Kaspu aparabaha bo mozipoko ana soho bo mytsaty tsimaha — niy.

²¹ — Mytazahaeze estuba “O Sesus kaharereziuwbyita. Abaka batu Sesus tukta my” niy. Atahi kasukyrytsitsa bo pikoktyhyryk.

²² Utakta Deus zikpehata ahawata ikyzik. Tubabatu kytsa botu ziwatahakanaha. Deus harere “Uta mohyrikosokda nikaranaha. Atakta kasukyrytsitsa bo pikoktyhyryk. Atahi sinini mykara” — niy. Tisukatsihikrëta mozik.

²³ Iwaha ziwabynahatsa hi batu siaku.

— O aty skaraba! Utakta batu. Utakta batu — nikaranaha.

Aty sa myhyrizikwanita mozik.

²⁴ Iwaze zinymyrykynahatsa asa zuba nipamykysokonaha. Aty sa myhyrizikwani babata nikaranaha.

– Utakta mypehakatsa wata ahazubarëtsa tyziktsumuëhñaha.

O batu, utaza. Batu, utazakta! Uta ja – nikaranaha.

²⁵ Iwa nipamykysokonahaze Sesus tihi:

– Ispehatsa bipyritsa tuk asahi kytsa nisipehakanaha. Kytsa tarabaja ziknakaranaha. Tadisahawy supesapy humo nisiakzokonaha, iwatsahi nizekezokonaha kytsa sisoho pe mykaranaha. “O asahi myharereziuwytza maha mybetesatsitsa” mytsaty ahabyitsa tu nikaranaha.

²⁶ Ikiahatsaktsa meky watu. Ikiahatsa kytsa tuk “O ustsya kytsa tysitsumuëhñahaktsa” tsimaha.

²⁷ Deus tihi: “Aty myhyrizikwanita atahi ituktsa tsumuëhñtsa babata. Atahi mypehatsa wata. Atahi katyryktsa tukta my” niy. Aty sa abazubata tozeka ja tadisakata ustaza sidisahawybykyktsa ja mytsatytaha. Tadisahakata hiba tsimaha. Atahi myhyrizikwanita. Uta hiba ahatazahaeze mydisahawybykyktsa wata – niy. Iwa zinymyrykynahatsa nipamykysokozo.

²⁸ – Uta sinini mykaraze. Ikiahatsa katuktu tsinapykyryknaha.

²⁹ Kazo zikwy humo mypehatsa mozik. Niwatihi uta pahany.

³⁰ Iwatuze ikiahatsa mypehatsa tsimoziknahaze kadisahawy zozowy baze tsipadisahanaha. Iwa Isareu ezektsa harere tsipiwabynaha – niy.

Sesus Peduru nisupeheke.

³¹ Kyze Sesus Simaõ Peduru pe niyzo.

– Simaõ wabyziutykta! Satanas kape niy:

“O uta ikia tuktsa zinymyrykynahatsa mysiakpy zeka ikia yhñ tsimy. Simaõ Peduru piakpy zeka yhñ tsimy” niy.

Yhñ ahumo za tsipiakpy – iky. Iwa Satanas botu niy. Hawa hahauktsa karetsawakatsa dua eze siriktsa mysidydykynahaze ky iwaze Satanas pakpy zeka amy ty isapyrënikia motare my. Satanas tapetu nikara:

– O tozeka ja Simaõ Peduru Sesus humo ispirikpota babata iwatahi piakpy – niy.

³² Iwaze utakta Deus bo atsyhyryze botu ikpamykysoko:

– O Deus Simaõ Peduru tsikaeni zuba kahumo ispirikpo tsipitsumuëhñ iwatahi atahi kahumo tspirikporëta babata mozik – niy. Iwaze Sesus Peduru pe niy. – Kahumo tsimyspirikpozozze atukytsa tynasipunihikwyky. Iwaze tysitsumuëhñ. Asahi ahumo sispirikporëtsa moziknaha – niy.

³³ Peduru ipe niy:

– Utakta atukta babata katsipa humo pikoktyhyryknaha zeka yhñ my. Uta kino atuk tu mohyrikosokda – niy.

³⁴ – O Peduru, kyze kokuaro ipobyi tu harakykbyi hi “Batu Sesus kanyhy” tsimy – niy.

Sesus tuk zinymyrykynahatsa nisisupeheke.

³⁵ Iwaze Sesus tuk zinymyrykynahatsa pe niy:

– Ahapehaze iky ahaperykbyitsa tu ahaokyrysaro anabyitsatu ahapyrysuktsabyitsa tu, amy humo ahakubyri zika – niy.

– Batu amy tohi mykubyri – niaha.

³⁶ Abaka meky watu. Peryk tsibyknaha! Okyrysaro ty wabehyryktaha! Ahasokorotsapu byizeka ahakpyzazawy humo tsipihuaknaha iwaze sokorotsapu tsipiakse.

³⁷ Ziwatahakanahatsitsa ikiahatsa pe my. Tubabatu kasohe ziwatahakanaha. Amy ty botu ziwatahakanaha atsatu kytsa mykaranaha. Ziwatahakanaha:

– Deus zipehata isopyksapybyita wata maha – niaha. – Kytsa kasoho humo nawa pahaspihikbatakanaha – niy.

³⁸ Iwaze zinymyrykynahatsa ipe:

– O mypehatsa sokorotsapu petoktsa – niy. – Niwazuba – niy.

Sesus Oriwerejatsa hara bo nido.

³⁹ Sesus hara bo niparak. Atsa botu ziknakara. Iwaze Oriwerejatsa hara bo nido. Zinymyrykynahatsa niwatihi ituk niukururunaha.

⁴⁰ Hara bo zumunahaze ispe niy:

– Deus bo typamykysonahaktsa! Iwaze kytsa pahasapybyinaha zeka batu tsimaha. Ikiahatsa isapybara humo ba yh̄ȳ tsimaha – niy.

⁴¹ Iwaze Sesus bytykarawatu tirīta meteros niapykyryk. Iwaze Sesus taekaratsa humo puruk puruk niy. Deus bo nipamykysoko.

⁴² Atahi:

– O kazo nawa tsimyzihihik zeka sinini my kasukyrytsitsa pikbezenaha. Uta tu zeka ba kahyrikosokda tsihik. Ikia hi: “Tyhyrikosokdakta” tsimyzeke mohyrikosokda. Ikia harere bo yh̄ȳ my – niy.

⁴³ Atsoko bijoikpe iknykta Deus tsumuēh̄tsa ibo inasik zitsumuēh̄kī iwatahi tsipunihikrēta niyzik.

⁴⁴ Sesus Deus bo nipamykysoko. Tisukatsihikrēta nikara. Itsizuk ispu hyritywaha zipoko wtyk bo inatsuku.

⁴⁵ Deus bo nipamykysobaze nikyikykyzo. Zinymyrykynahatsa bo zumuzo. Sibozumuze sisukatsihikrētsa hi zurubakanaha.

⁴⁶ Ispe niy:

– Amo sa tsipurubakanaha. Kyiktaha! Deus bo typamykysonaha! Iwa ahabyi zeka imysapybara ty tsimykarana – niy.

Isukyrytsitsa Sesus ziokyhyryknaha.

⁴⁷ Sesus nipamykysokoze kytsa sizubarētsa zumukunaha. Sudas siharaze zumuku. Atahi zinymyrykynahatsa tukta kytsa haraze inaukuru. Iwaze Sesus kytsa bo piwatawy nikara tahi. Iwaze Sesus bo izikeba ziharapyrykik.

⁴⁸ Sesus ipe niy:

– Tsipikarapyryk zeka sibozesipikwatawy. Ikia hi kasukyrytsitsa bo tsipikoktyhyryk. Imyspihikbatanikita tsimy. Utakta Deus zikpehata ahawata ikyzik. Ikia tsipikarapyrykyk nawa kasukyrytsitsa bo tsipikwatawy.

⁴⁹ Iwaze zinymyrykynahatsa Sesus sukyrytsitsa bo nikozonahaze ipe niaha:

– O mypehakatsa kinsa kino sa mykuwytsa natahaboboknaha – niaha.

⁵⁰ Niytahi ipaukbazekta zinymyrykyta hi taparaktsa tsumuēh̄tsa zispizykik.

⁵¹ Sesus ipe niy:

– O awatu tykta! – iwaze Sesus ispi ty okokzo niyze atsoko zispizororowy.

⁵² Kyze Sesus Deus wahoro zubata ziknapamykysokonahatsitsa ispehatsa, Deus wahoro perytsitsa iwatsahatsa pe niy:

– Amy skaraba ahaupetsa, ahakuwytsa iwatsa tsiknasebykyknaha awatutaha. Utakta katsyhyryboabyita. Batu kakyri.

⁵³ Ahatuk zikzibytuhukutu. Deus wahoro zubata eze kytsa iksihyrinymyryky iwatsa tu sa batu katsipa humo katy oktyhyryk. Abaka ikiahatsa hawa tsimyzihihiknaha naha humo tsimykarana iwatsahi katsipa humo tsikoktyhyryknaha. Hawa ha ty Satanas hyrikoso sapybara pehatsa zahapeha iwa tsimaha. Ikiahatsa Satanas harere bo yh̄ȳ tsimykarana.

Peduru Sesusta batu kanyhy nikara.

⁵⁴ Kytsa Sesus isukyrytsitsa bo zioқтыhyryknaha. Deus wahoro zubata eze ziknapamykysokonahatsa tuk myhyrizikwanita wahoro bo zioқтыhyryknaha. Peduru ɛrykani tu iapik niukuru. Atazuba niukuru.

⁵⁵ Kyze niaha tsahi izo zipoknahaze taparakta wahoro peze nidyhydyhyknaha. Peduru situk nidyhyky.

⁵⁶ Estuba itsumuēhĩtsata ibo nikozo. Izo baze niakpyzazakata iwatatsahi nikozo. Atatsahi:

– O ikia hi sa Sesus tukta – niy.

⁵⁷ – O Batu. Batu kanyhy – niy.

⁵⁸ Bykyze usta ipe niy:

– O ikia hi kok Sesus tuk tsinymyrykyta – niy. Iwaze:

– O batu ba, batu kanyhy – niy.

⁵⁹ Bykyze mekta tu ipe niy:

– O hawa skaraba ikia hi sa Sesus tukta. Ikia kino sa Karireja ezekta. Ikia hi Sesus tukta – niy.

⁶⁰ Peduru ipe niy:

– Batu kanyhy. Aty skaraba Sesus – niy.

⁶¹ Iwa nitsasokoze kokuaro nipo. Peduru mytsaty niy. Nezeba Sesus kape niy:

– O kokuaro ipobyize ka “Batu Sesus kanyhy” tsimy – niy. Atsoko Sesus Peduru bo nikozo.

⁶² Iwaze Peduru niparak. Nipuziuku.

Sodadutsa Sesus nitsakikinaha.

⁶³ Kytsa Sesus ziperykynahatsa zimyijakaranaha. Nitsakikinaha.

⁶⁴ Zihyryzikwarakanahaze ipe nikaranaha:

– Ikia ahyrinymyrēta zeka aty skaraba zaki – nikaranaha.

⁶⁵ Asahi Sesus zisapybyrikinaha.

Kytsa Sesus kytsaharerewabytsitsa bo zioқтыhyryknaha.

⁶⁶ Miwa botu taparaktsa inakypykyknaha. Ispihaktsa, sihyrinymyrykytsitsa, kapitaōtsa iwatsa inakypykyknaha. Bykyze Sesus taparaktsa bo zioқтыhyryknaha.

⁶⁷ Iwatsahi ipe nikaranaha:

– Ikia hi Deus zapehata zeka mybo tytsasokta – niaha. Sesus hi:

⁶⁸ – Uta yh̄y my zeka, ikiahatsa batu kahumo ahaspirikpo. Ikiahatsa kaharere bo batu yh̄y zikaha. Uta hiba Deus zikpehata my.

⁶⁹ Abaka Deus tuk modyhyky. Deus zikwyrēnikita tuk modyhyky – niy. Niahatsahi nipamykysokonaha.

⁷⁰ – O ikia hi sa Deus tse – nikaranaha.

– Iwa ikiahatsa ziknatsasokonaha – Sesus niy.

⁷¹ – Amy skaraba kytsa tsimysiberikinaha iwaze hi Sesus harere soho mot-sasokonaha. Katsa kino iharere imysapybara ty tsiwabykynaha. Niwazuba – taparaktsa nikaranaha.

23*Kytsa Sesus Piratus bo zioқтыhyryknaha.*

¹ Niahatsahi aparakbaha kyikyik niaha. Sesus Piratus bo zioқтыhyryknaha.

² Piratus bo zumunahaze Sesus amybara humo tu zisohometukunaha. Iwa nikaranaha.

– Atakta kytsa bo nipamykysoko. “Homa ezektsa pehatsa bo okyrysaro ty batu nyny tsimaha” zispihikbatakanaha. Atakta “Deus zikpehata mypehatsa mozik” – mybarapetu nikaranaha. Iwa Piratus bo zisohometukunaha.

³ Iwatahi Piratus Sesus pe niy:

– Ikia hi sa Sudeutsa pehatsa babata – niy. – Yh̄y. Wasani tsiky – niy.

⁴ Piratus kytsa sizubarētsa bo, taparaktsa Deus wahoro eze ziknapamykysokonahatsitsa kino niwatihi ispe niy:

– Atakta wasanita. Tsimysapyrēta mynakara batu amytohi ty ziky – niy.

⁵ Kytsa tahaharere ty harapubetehe nikaranaha.

– Atakta batu imysapy – mybarapetu nikaranaha.

– Kytsa Sudeja eze Karireja eze kino niwatihi kytsa nisihyrinymyrykyze nisimiwyky. Aba tykara bo izumu. Kytsa nisimiwyky iharere humo – nikaranaha. Iwa zisohometukunaha.

Kytsa Sesus Erodes bo ziockyhyryknaha.

⁶ Piratus ana ziwabyze ispe niy:

– Hawa skaraba atakta hi sa Karireja ezekta – niy.

Yh̄y nikaranaha. Iwatahi Piratus Erodes pehatsa bo zipehahik.

⁷ Sesus Karireja ezekta tu Erodes bo zipehahik. Atahi Karireja ezektsa pehatsa. Iwaze Serusarēhe bo inakozore. Iwatahi Piratus Sesus Erodes bo zipehahik.

⁸⁻⁹ Erodes Sesus bo nikozoze tsakurēta nikara. Nezeba Sesus humo ziwaby iwatahi Sesus ziny tsihikik. Sesus zikwy piny tsihikik. Amy ty kytsa batu zikaha Sesus mykara ana humo hi piny tsihikik. Sesus batu ibo harere.

¹⁰ Taparaktsa Deus wahoro eze ziknapamykysokonahatsitsa tuk iwatahatsitsa kino niwatihi niriktotohokonaha. Asahi zisohometukunaha. Siharere-wabymybarētsa.

¹¹ Erodes sodadutsa tuk Sesus zimijakanaha. Sesus myzisykyrykiknaha. Iwaze isuk tisapyrēta ty ihumo korokbyk niaha. Iwaze zimijakanaha. Niahatsahi Piratus bo zisihyrykzonaha.

¹² Iwaze Erodes Piratus iharereziuwiy niyzik. Nezeba sakyriwytsa ziknakanaha. Abaka siharereziuwiytsa niyziknaha.

Sesus tabezewy.

¹³ Piratus myhyrizikwanikita, Deus wahoro eze ziknapamykysokonahatsitsa tuk, kytsa Sudeutsa hudikhudikwy pehatsitsa iwatsa inakypykyknaha. Piratus hi:

Tynazuzuknahaktsa!

¹⁴ Iwaze ispe niy:

– Atakta kabo tsiziockyhyryknaha. Ikiahatsa tihi:

“O atakta isopyksapybyita” tsikykanaha. Batu ba. Ikiahatsa okze ituk ikpamykysoko. Utakta batu amy tohi ihumo iky. Atahi batu tymyi. Tsikt-sasokonaha batu sapy niy.

¹⁵ Erodes niwatihi isoho “Batu tymyi” niy.

¹⁶ Iwatahi katsa mybo zipehahikzo. Atahi batu tabeze my. Uta pipeha hwi ty tytsakikta. Bykyze piksiwyhyk – Piratus niy.

¹⁷ Tubabatu Paskoa myikaha eze Piratus estuba ziknazukekenaha.

¹⁸ Iwaze Piratus hi:

– O Sesus myzuke. Tapara tytsakikta bykyze myzuke – niy.

Aparakbaha opykani kadi nikaranaha:

– Sesus tabezehikta! Bahabas tyzukehikta – nikaranaha. Kytsa sizubarētsa sakyriukrēnikitsa hurukwy eze tu niapykyryknaha.

¹⁹ Situkta estuba nizukenaha. Sakyriukrēnikitsa hurukwy eze Bahabas niapykyryk. Kytsa bakatsa. Iwatsahi nitsahuruknaha.

²⁰ Piratus Sesus nizuke tsihikik iwaze kytsa bo nitsasokozo:

– O Sesus myzukehik tsimaha – niy.

²¹⁻²² Aparakbaha opykani kadi nikaranaha:

– Tabezehikta! Iharapatawyhyta humo tabezehikta – nikaranaha. Iwaze Piratus nitsasokozoze:

– Hawa skaraba nikara. Batu amy tohi ihumo. Batu tymyi. Tybeze beze byitaha. Iwatahi uta pipeha tytsakinaha bykyze myzukeze – niy.

²³ Batu ba. Aparakbaha opykani kadi nikaranahazo. Hỹ byri nikaranaha:

– Tabezehikta! Tabezehikta! – nikaranaha.

²⁴ Iwaze Piratus hi:

Yhỹ niy. Siharereze Bahabas nizuke.

²⁵ Bahabas kytsa bakatsa nizuke. Maku iharereziubyikita nizuke. Sesus ty zuba sibo nyny niy. Iwaze siharereze tabezewy.

Iharapatawyhyta humo zihyrizikiknaha.

²⁶ Kyze sodadutsa Sesus zioқтыhyryknahaze ske buruk maku zihobyknaha. Simaõ inarokota. Sireni ezekta. Tatsuhuk ikny ziksikirita. Simaõ nizokbatsinaha. Ipe niaha:

– O iharapatawyhyta tsebykta – niaha. Niytahi iharapatawyhyta tasukyriki bete ziskik. Sesus hapik niukuru.

²⁷ Aparakbaha iapik niukurunaha. Wytykyryk kino niwatihi iapik niukurunaha. Kykyry zipokzitsikinaha iwazahi nipukarakanaha.

²⁸ Sesus sibo uwok niy ispe niy:

– O Serusarēhe eze kykyry katy pokzi pokzi byitaha. Ikiyhaka zuba ahapokzi iwaze ahahyrytsa pokzi tynapukarakanaha.

²⁹ Iwatuktu puruze kytsa tihi:

“Sakurēza sibikyhybyiza. Sakurēza sibikyhyhuk byiza. Sakurēza tahabykyhytsa ba ziksiwazuknaha.” Kytsa sinini mykaranaha, ana pokso hi mohyrikosokda tsihikiknaha.

³⁰ Iwaze aparakbaha mykaranaha “Hara mybete mynaraha. Hara-hare katsa mymyokpitsī” mykaranaha. Mysinini humo iwa ty mytsaty mykaranaha.

³¹ Iktsa tsimaha. Hawa kytsa kahumo mykaranaha. Kamysapyrēta tuzeka hawa mykaranaha. Ikiyhatsa ja, ahasopyksapybyitsa tu tsikykaranaha hawa sa ahamo mykaranaha – niy.

³² Kyze petoktsa kytsa Sesus tuk nisioktyhyryknaha. Kytsa bakatsitsa. Kytsa tahapehatsa harere bo batu yhỹ nikaranaha. Sesus tuk mysibezenaha.

³³ Zumunahaze isapy bo niaha. Iharekpokoso inarokoha bo izumunahaze Sesus iharapatawyhyta bete zitsyhyrysoikare eze nisihyrizikiknaha. Ipyrytsa ty kino niwatihi zihyrizikiknaha. Nikymynahaze iharapatawyhyta jobo ziriktōhiknaha. Ituk kytsa petoktsa siharapatawyhytsa humo nisihyriziknaha. Nataba nataba aha.

³⁴ Sesus Deus bo nipamykysoko:

– O kazo kytsa sihyrinymyrybyitsa kahumo mykaranaha ba ziktsapusare. Sisopyksapybyitsa tu tysiokzohik – niy.

Iwa Deus bo nipamykysoko. Niahatsahi Sesus suk zibokiknahaze hi sodadutsa zibiakaknaha.

³⁵ Kytsa ibo iktsa nikaranaha. Taparaktsa niwatihi zipyrirykyknaha. Asahi:

– Utsa kytsa tsiksitsumuēhīkī. Aba ikia tu tsikatsumuēhīkta! Ikia hi Deus zapehata zeka tynasikta! Ikia hi Kiristu zeka ja – nikaranaha.

³⁶ Sodadutsa niwatihi zipyrikyknaha. Iopukeze duabohotsa tsik ty itsārākbara ty ibo nyny nikaranaha. Iwa zimyjakanaha.

³⁷ Ipe nikaranaha:

– Ikia hi Sudeutsa pehatsa babata zeka tynasikta! – nikaranaha.

³⁸ Iharapu bete botu ziwatahakanaha: SUDEUTSA PEHATSAaha iwatahaha.

³⁹ Estuba sibakatsa ituk zumuzakaze Sesus zisapybyriki:

– Ikia Deus zapehata zeka ikiatu tsikatsumuēhīkta iwaze katsa tymytsumuēhī. Ikia zikwy tu zeka tymytsumuēhīkta – niy. Iwa zisapybyriki ta nikara.

⁴⁰ Usta iharere ziwabyze takyriki. Zibetsakik.

– Iwa Sesus pe ka niwazubakta niy ikia sa Deus humo batu apyby katsa hiba ituk tsimykanaha. Katsa kino sinini tsimykanahaze wasani.

⁴¹ Mysapybyitsa hi tsimykanaha. Atakta batu amy tohi byitatu – niy.

⁴² Iwaze Sesus pe niy:

– O Sesus kabo mytsaty tsimy. Abazubata tsimozikze kabo mytsatytykta – niy.

⁴³ Sesus ipe niy:

– Yh̄y kyzetu. Ikiakta katuk tu bjoikpe bo tsipasapy – niy.

Sesus nihyrikosokda.

⁴⁴ Kyze tokbaha niyzikze miwa niyzik. Haramwe bawa niyzik unata ky wa nio bykyze iharakibikia eze inaharamwezo.

⁴⁵ Panu ipamaba ipokpedawy Deus wahoro zubata eze ky nisykbaik. Tsapukte buruk nisyk.

⁴⁶ Iwaze Sesus opykani kaka niy:

– O kazo kahyrizikarawy ty abo nyny my – niy. Iwa Deus pe niy. Iwaze zumuza.

⁴⁷ Sodadutsa pehakatsa ibaze niriktohokota nikozoze, ta tihi:

– O atakta tsimysapyrēta hi – niy. Iwa Deus bo nipamykysoko.

⁴⁸ Kyze kytsa sizubarētsa: – Hawa ha sa – nikaranaha. Iwatsahi nipuziukunaha. Iwatsahi tahawahoro bo tahasukatuk tu ziksikinaha. Sisukatsihikrētsa nikaranaha.

⁴⁹ Sesus tuktsa ēryktsatu nikozokonaha. Wytykyryk Karireja eze kykyry iapik niukurunaha. Asiza kino jērykzatu nikozokonaha.

Sesus nury nitsahoroknaha.

⁵⁰ Kyze nubaze maku Sose inarokota Piratus bo zumu. Sose Arimeteja ezekta Arimeteja Sudeja eze niy. Kytsaharerewabytsa tsimysapyrēta. Wasani zuba ziknakara.

⁵¹ Taparaktsa tukta batu yh̄y niy. Mektatu. Utsa Sesus tabezekta nikaranahaze, Sose batu yh̄y niy. Atakta Deus tyryktsa tukta.

⁵² Atahi Piratus bo zumu. Sose hi:

– O Piratus Sesus nury ty uta kabokta. Uta iytyk bo mytsahorok – niy. Piratus:

Yh̄y niy.

⁵³ Niytahi Sesus nury nazipikze, panu ty zikwaraka. Tubabatu harahare hoke bo anabo hi nitsahorok. Batu aty tohi iytyk ezytyk bo nitsahorok.

⁵⁴ Tahabyrykywy harazetu nikymynahaze iwatahi Sose Sesus nury ty atsoko babatu ity hoekare niy. Anaeze tyhoek niy.

⁵⁵ Wytykyryk iapik niukurunahaza. Karireja eze kykyry inaukurunaha. Iytyk haneze nitsahorok naha bo zinykynaha. Harahare yktaba nitsahorok zinykynaha.

⁵⁶ Bykyze tahawahoro bo ziksizonaha. Jokmorēnikia ty inury bo susu nikaranaha.

Byriri Deus harere humo tahabyrykynaha. Iwaze domiko pomoze zuba jokmorēnikia ty myziskyknaha. Iwa nikaranaha.

24

Deus Sesus zihyrizikpowy.

¹ Kyze petok zuruze miwa botu domiko eze wytykyryk niukurunaha. Iytyk bo zumukunaha. Jokmorēnikia itsakykyha tuk niukurunaha. Kykyryk hi:

– Inury bo jokmorēnikia tsipiokmorēnaha ky – nikaranaha.

² Harahare hoke bo iktsa niaha. Harahare puētsikbyita ty meky botu zikare niy.

³ Iwaze iytyk bo nipupunaha. Anaeze Sesus nury ty batu ityny:

– Hana bo sa inury – nikaranaha.

⁴ Atsoko makutsa petoktsa sibaze natakahanaha. Sisukbarazarētsa.

⁵ Iwazahi sipokso nipybybaiknaha, wytyk bo ziktsutsu niaha. Tahahiki-ubobohiknaha. Sipybyrēza nikaranaha.

⁶ Kytsa ispe niaha:

– Amo skaraba siakbatsa ytyk botu ispita tsipiberikinaha inahyrizikpo. Batu aty tohi tykarezeka. Hana bo ja. Mytsatytaha!

⁷ Nezeba Sesus ikiahaka pe niy:

“Utakta Deus zikpehata kytsa kasukyrytsitsa bo pikoktyhyryknaha. Ihara-patawyhyta humo pikpyryknaha. Myhyrikosokda. Petok puruze mynahyrizikpo” niy – niaha.

⁸ Niahaza hi Sesus harere bo mytsaty niahaza hi iytyk ekze puke puke niaha.

⁹ Ziksizonahaze zinymyrykynahatsa bo iytyk tsarywybara soho nitsasokonaha.

¹⁰ Niahaza hi Maria Madarena, Soana, ustatsa Maria Tsiaku je, situkza iwaza zinymyrykynahatsa bo nitsasokonaha. Zinymyrykynahatsa wytykyryk harere humo batu ma niaha.

¹¹ Kytsa mytsaty nikaranaha. Paze! nikaranaha. Wytykyryk harere bo batu ma niaha.

¹² Iwaze Peduru kyik niy. Iytyk bo niparak. Ziktsutsu iktsa niy. Iytyk bo inakozore. Panu zuba zinyhikare. Anaeze tapanu metutu zerekik. Iwatahi tawahoro bo ziksizo. Inury hana bo ja, isapy bo nekpa iwatsahi paikpa mytsaty nikara!

Emaus ske buruk Sesus inatakaha.

¹³ Kyze asta okoroze tu Sesus tuktsa petoktsa niukurunaha. Emaus bo niukurunaha. Serusarēhe ekze niukurunaha. Emaus jokboha botu des kirometeros niy. Emaus bo ziksizonaha.

¹⁴ Iwatsahi ske buruk inapamykysokonaha. Hawa skaraba nikaranaha. Tahatuk tuka inapamykysokonaha.

¹⁵ Iwaze Sesus sibo izumu. Kytsa tahatuk tuka nipamykysokonahaze Sesus situk ske buruk niukuru.

¹⁶ Kytsa petoktsa Sesus batu sinyhy bipyri ja nikaranaha.

¹⁷ Iwaze Sesus ispe niy:

– Amo skaraba ske buruk tsimypamykysokonaha – niy. Siakubyitsa tu pykpyk niaha.

¹⁸ Estuba Kereopas inarokota atahi ipe niy:

– Ikia sa asukmota Serusarēhe ezekta sa tsimynakozore zuba niy. Ikia zuba hi “hawa sa niy” batu sa awabyhy – niy.

- 19 – Hawa sa niy – Sesus niy. Iwatsahi ibo nitsasokonaha. Ipe niaha:
 – O Sesus soho niaha. Nasare ezekta. Atahi Deus sohokotsa babata. Tsihyrinymyrēta. Hawa kytsa zikahabara ty Sesus ziknakara. Kytsa okze amy tohi batu iokdaha nikara. Iharere tisapyrēna. Deus okze ka zikzisyapywyikik.
- 20 Taparaktsa Deus wahoro eze ziknapamykysokonahatsitsa, mypehakat-sitsa hudikhudikwytsa ezektsa iwatsa bipyritsa bo Sesus zioқтыhyryknaha. Iwatsahi asa hi: “Atakta tabezehikta!” nikaranaha. Iwaze isukyrytsitsa harapatawyhyta humo zipyrykiknaha. Iwaze nihyrikosokda.
- 21 Katsaktsa Sudeutsa atahi mymybetesakatsa. Iwa mytsaty tsikykaranaha. Abaka harakykbyi hi ziharamu.
- 22 Miwa botu wytykyryk iytyk bo inury sapy bo zumunaha.
- 23 Batu ityny niaha. Hana bo ja. Bijoikpe iknyktsa Deus tsumuēhītsa bo nikoizonaha. Asahi: “O Sesus ispituzo” nikaranaha. Sipybyrēza nikaranaha. Iwaze ziksizonaha.
- 24 Kyze katsa ituktsa iytyk bo tsiktururuknaha. Hawa skaraba wytykyryk nitsasokonaha atsatu tsinykynaha – niaha.
- 25 Kyze Sesus ispe niy:
 – Hawa skaraba Deus harere humo batu ahaspirikpo. Hawa ha ty Deus sohokotsa botu ziwatahakanaha humo batu ahaspirikpo. Ikiahatsa batu ahahyrinymyry. Hawa ha ty Deus sohokotsa ziwatahakanaha tsikaeni zuba tsinymyrykynaha.
- 26 Deus zipehata sinini mykara. Bykyzehu zuba bijoikpe bo modozo – niy.
- 27 Niytahi nisihyrinymyryky. Hawa ha ty Deus sohokotsa botu ziwatahakanaha anahi nisihyrinymyryky. Moises harere humo ziaakbataze iwaze hawa haty ustsahokotsa ziwatahakanaha nisihyrinymyryky.
- 28 Zumubahaninahaze Sesus asiba harakmo zuba niy.
- 29 – O bytykareze tukta katsa mybo pakutynykta niaha. Abaka punubaka miwa moku – niaha.
 Yh̄y niy. Iwaze nitsuk. Petoktsa baze nitare.
- 30 Sesus nidyhyky. Atsikara ty okok niy. Deus bo nipamykysoko:
 – O myzo ikia tsamysapyrēta. Ikia hi mydisahawy ty mybo nyny tsimykara – niy. Bykyze atsikara ty zuktsak niyze sibo nyny niy.
- 31 Atsikara zitsatsakarake atsoko Sesus zinynaha. Iwaze babyita tu hokda zuba niy.
- 32 Iwaze asa zuba nipamykysokonaha.
 – Katsaktsa batu mytsaty tsikaha. Ske buruk nimyhyrinymyrykyze katsa batu mytsaty tsikaha. Taparaktsa Deus sohokotsa watahaha nimyhyrinymyrykyze mykurētsa tsikykaranaha – niaha.
- 33 Niahatsahi Serusarēhe bo niukuruzonaha. Anabo zukzuk niaha. Zinymyrykynahatsa bo zumunaha. Iwaze inahapekypykbanaha.
- 34 Kytsa sibo nitsasokonaha:
 – O Sesus inahyryzikipota Simaō Sesus iny – nikaranaha.
- 35 Iwaze petoktsa ske buruk hawa sa niaha nitsasokonaha.
 – Hawa Sesus atsikara zitsatsakarake tsinynaha – nikaranaha.
- Sesus tuk zinymyrykynahatsa bo babyita tu natahaha.*
- 36 Ana nitsasokonahaze tu Sesus natahaha. Atsoko istazaha eze kaha zuba niy. Ispe niy:
 – Ahakurētsaktsa tsimoziknaha – niy.
- 37 Sipybyrētsa nikaranaha. Nipybybaiknaha. Ihyrikoso zuba zinynaha mytsaty ahabyitsa nikaranaha.
- 38 Iwatahi Sesus ispe niy:

– Amy skaraba tsikpybybaiknaha. Amo skaraba paikpa mytsaty tsimykaranaha. Amo skaraba kahumo batu ahaspirikpo.

³⁹ Katsyhyrype bo iktsatahaktsa! Kapyrytsa bo kino niwatihi iktsatahaktsa! Uta hiba. Kanury bo bubutaha! “O Sesus babata” tsimaha. Nihyrikosokdata itsanibyita ipoiktsa byita iwa – niy.

⁴⁰ Nipamykysokoze tatsyhyrype ziwatawyky. Tapyrytsa humo kino niwatihi ziwatawyky iwatsahi sakurëtsa nikaranaha.

⁴¹ Sesus humo sispirikpohuk byitsahi nipybybaiknaha.

⁴² Iwaze hi Sesus ispe niy:

– Hawa sa ahadisahawy – niy. Iwaze piknu izohota ty ibo nyny niaha.

⁴³ Siokze tu piknu ziboroko.

⁴⁴ Ispe niy:

– Utakta ahatuk tuze ziknapamykysoko. Hawaeze Moises botu kasoho ziwatahaka. Hawa ha ty isohokotsa botu ziwatahakanaha ty hi atsatu ty mynakara.

⁴⁵ Hawa eze kytsa Samo papeu humo botu kasoho ziwatahakanaha. Aba kino atsatu mynakara. Isohokotsa, kasoho botu ziwatahakanaha aba kino atsatu mynakara – niy.

⁴⁶ Niahatsahi nisihyrinymyryky. Iwaze Deus harere papeu humo ky zinymyryziukunaha. Tubabatu papeu humo ziwatahaka:

– Deus zipehata mohyrikosokda. Harakykbyihi puruze mynahyritziko, ispitu mozikzo.

⁴⁷ Iwatahi Deus wasania ty aparakbaha bo tytsasokonahaktsa! Zipehata humo wasania ty tsimypamykysokonahaktsa! Tsipamykysokonahaze aparakbaha bo:

“Ahamysapybyri tsmoewynaha awatutaha! Niytahi Deus ahamysapybara humo pahaokzohik” niy. Tapara Serusarëhe ezektsa bo tsimytsasokonaha.

⁴⁸ Niahatsahi mektsa tyryktsa bo tsimytsasokonaha. Ikiahatsa pahatsumuëhĩ. Ikiahatsa kazikwy humo tarabaja tsimaha. Iwaze kytsa bo tsimypamykysonaha.

⁴⁹ Wabyziutahaktsa! Tapara kazo harere kabo nitsasoko. Utakta iharere ahabo iktsasoko. Byi puëtsik Deus hyrikoso ahabo myzipaha.

Iwaze Serusarëhe eze tsiperynaha. Deus hyrikoso ikiahatsa bo myzipaha. Deus zikwy pahapeha my – niy.

Sesus bjoikpe bo nido.

⁵⁰ Betanija bo Sesus tuk zinymyrykynahatsa nisioktyhyryk.

⁵¹ Anaeze sitsyhyryze Deus bo nipamykysoko:

– O kazo tysipokzitsikikta! – niy. Iwaze jo bo nidoko. Nisereke. Bjoikpe bo nitsuk.

⁵² Zinymyrykynahatsa Deus bo nisakibazikiknaha. Iwaze Serusarëhe bo ziksizonaha. Sakurëtsa nikaranaha.

⁵³ Zikzibytuhuku naha tu Deus wahoro zubata isturupeze nikaranaha. Deus bo ziknasakibazikiknaha:

– O Deus ikia zuba tsamysapyrëta – nikaranaha. Iwa Deus bo nisakibazikiknaha.

O Teopiro niwa zuba botu iwatahaba De.

14 – Deus harere baba zuba – mywata niyzik. Sesus Kiristu maku babata niyzik. Ata zuba Deus tse. Atahi mybo inasik. Mytuk zikzuruku niy. Kytsa tuk ziknapykyryk. Sesus Kiristu sihumo tsimypokzitsiarêta ziknakara, nisitsumuêhĩ tsihikik tsimyzihikrêta wasania ty nisihyrinymyryky. Deus harere ty nisihyrinymyryky. Isoho tsimaha:

– O atahi imysapyrênikita ipunihikrênikita – tsimaha.

15 Suão Batista Sesus soho ziwatawyky iwatahi myzubaha bo hua nikara. Atahi:

– O Sesus imysapyrênikita. Utakta batu. Atahi tazikwy tsizubarêna my. Utakta batu. Kazikwy tsikaeni zuba. Uta kapurukbyizetu atakta koikny baktatu mykara. Tawahi koikny baktatu my.

16 Katsakta mysopyksapybyitsa tsimykaranaha. Sesus myzibytuhukutu mymysapywyky. Katsakta mysopyksapybyitsa tsimykaranaha atahi myhumo tsimypokzitsiarêta my, iwatahi myzibytuhukutu mymysapywyky hỹ.

17 Tubabatu Moises Deus harere ziwatahaka. Ana harere humo hyỹ tsimykaranahaze, wasani tsimaha, Moises niy. Sesusta mype niy:

– O ikiahatsa humo kamypokzitsiarêta. Ahasopyksapybyitsa tsikykaranaha iwaha humotu Deus ahahumo tsimypokzitsiukrêta.

Deus harere ty nisihyrinymyryky.

18 Ba aty tohi Deus iny. Ikatahi itse zuba ziny. Ata Deus ihumo tsimypokzitsiarêta. Atahi mybo inasikze, mytuk zikzuruku iwatahi Deus mybo ziwatawy – niy.

Suão Batista isoho nitsaso.

19 Iwaze kytsa Sudeja ezektsa taparaktsa ziknapamykysokonahatsa sistsumuêhĩtsa iwatsa Suão Batista bo kytsa nisipeha. Aty skaraba ikia Suão Batista pe taha. Iwaze Suão Batista bo zumunahaze asahi:

– Aty skaraba ikia. Tozeka ja ikia Deus zapehata. Tozeka ja usta ja. Katsa batu myhyrinymyry – nikaranaha.

20 Iwaze Suão tihi:

– O batu. Utakta Deus humo kapehabyita atahi kytsa mymyokhyrykta – niy. Iwa nitsasoko.

21 Iwaze kytsa ipe niahazo:

– Aty skaraba ikia. Ikia hi sa Erias – niaha.

– Erias byitatu – niy.

– Ikia hi sa Deus sohokotsa – niaha. – Tubabatu Moises nitsaso Deus sohokotsa mozumu. Ikia hi sa isohokotsa – niaha.

Batu niy.

22 – Iwaze Suão pe niaha mypetykta aty skaraba ikia. Katsa mybo tytsasokta iwaze taparaktsa bo tsimaha. Hawa ikia soho mytsaty tsimykaranaha. Tsinymyry tsihikiknaha – nikaranaha.

23 Suão tihi:

– Utakta jerukbara eze hua mykara niy. Opykani motsasoko. Hawa Isaijas Deus sohokotsa tubabatu ziwatahaka atsatu mynakara. Deus harere tsiwabyziukunahaktsa. Iharere bo hyỹ tynakaranahaktsa kytsa mykara – niy. Iwa Suão niy.

24-25 Kytsa zumukunahatsa Suão pehatsitsa, Pariseutsa maha. Ipe niaha:

– Ikia Kiristu byitatu Erias byitatu. Deus sohokotsa byitatu tsiky. Iwatatu sa kytsa pihik ty tsimysiharasusuku – niaha.

26-27 Suão ispe niy:

– Utakta pihik ty kytsa mysiharasusuku. Usta ahatuk mykarata. Aba ikiahatsa batu ahany hỹ. Utakta Deus harere ty pahahyrinymyry. Abahi ata kino niwatihi pahahyrinymyry. Izikwyrênikita. Utakta tsikaeni zuba

kahyrinomyrytatu. Atahi tsihyrinomyrëta hÿ utakta batu. Iwaze utakta ihumo kasikpybyrëta. Ipyryksuktsa mysibokik zeka kasikpybyrëta mozik utakta iwabyita tu my. Atahi imysapyrënikita iwatahi utakta kasikpybyrëta – niy.

²⁸ Iwa Suão nitsasoko. Kytsa asahi ibo izumukunaha iwa nitsasoko. Betanija eze nisiharasusuku. Betanija koiknykta sak eze buburu Sorodão inarokoha.

Deus hozipyrykza wata izumu.

²⁹ Byi izokorozoze iwaze Suão Sesus bo nikoze jokeryk inaukuru. Iwaze Suão kytsa pe niy:

– Iktsaziutahaktsa kytsa. Ta maku bo iktsaziutahaktsa. Atahi Deus zipihata. Ziknapamykysokonahatsa hozipyrykzatsa ziknasibakanaha kytsa sisopyksapybyitsa ziknakaranaha, sisapyzeken hozipyrykzatsa ziknasibakanaha. Iwaze Deus sisopyksapybyitsa nikaranaha nisiokzohik. Nawa ata kino mysapyzeken mohyrikosokda. Mysopyksapybyitsa tsimykaranaha atahi mysapyzeken mohyrikosokda. Hozipyrykzatsa watsa – Suão niy. Sesus soho iwa nitsasoko.

³⁰ Tapara isoho iktsasoko. Ahape iky: – Atahi izikwyrënikita ana hi iwaby niy. Uta batu. Kazikwy tsikaeni zuba. Utakta kapurukbyize atakta niwata tu atahi koikny baktatu. Tawahi mynapykyryk – iky.

³¹⁻³³ – Sesus tsimysapyrëta izikwy tisapyrëna. Taparaka batu kahyrinomyry. Aba kahyrinomyrëta. Tapara Sesus zikwy ty batu tyny. Jatu tu Deus zikpeha:

“Myzubaha tysiharasusu” niy ana humo hi zikpeha. Myzubaha pihik eze iksiharasusuku.

Deus zikpehaze tihi: “Atahi tsimysapyrëta izikwy tsizubarëna tsipiny” niy. Iwa tsipiny.

“Utakta kahyrikoso myzipiha. Kahyrikoso mynasik amytydu wata mynasikke maku papyry bete inazok. Ata kino tsimysapyrëta izikwy tisapyrëna tsipiny. Atahi pahatsumuëhĩ. Atahi kahyrikoso pipehaze ahatuk mynapykyry hÿ” niy. Iwa Deus kabo nitsasoko. Zikpehaze iharere bo hyÿ iky – Suão niy. Kyze Suão nitsasokozo.

³⁴ – Iwaze jobo iktsa iky. Deus tahyrikoso amytydu wata inasikke iktsa iky. Amytydu Sesus papyry bete inazoze ikoze. Sesus Deus zipihata kahyrinomyrëta. Iwatahi ahabo: “Sesus Deus tse babata tsimysapyrëta izikwy tsizubarëna”. Iwa ikiahatsa bo mykara – niy.

Tapara babatsa Sesus tuktsa.

³⁵ Iwaze Suão Batista Sesus bo nikozozo. Suão zinomyrykynahatsa petoktsa tuk niriktohoko.

³⁶ Iwaze Sesus ziharamuze.

– Iktsaziu tahaktsa – Suão niy. – Atahi Deus zipihata. Hozipyrykzatsa wata myzubaha pibezanaha. Sisopyksapybyitsa sapyzeken mohyrikosokda – niy.

³⁷ Niahatsahi Suão zinomyrykynahatsa iharere ziwabynahaze zerekiknaha. Sesus hapik niukurunaha.

³⁸ Sesus tasukpe bo uwok niyze sibo iktsa niy. Ispe niy:

– Amo sa kapik tsinakurunaha. Amy sa tsipiberikinaha – niy.

– O myhyrinomyrytsa haneze sa awanu sapy – petoktsa iapik niukurunahatsa nikaranaha.

³⁹ – Pany! Katuk tyzinyre – niy.

Iwaze Sesus hapik niukurunaha. Iwanu sapy bo zumukunaha. Tyk boze niy. Ibaze nidyhydyhykynaha. Ituk nipamykysokonaha. Ibaze tu zunubaiknaha.

⁴⁰ Ādere inarokota. Atahi Simaõ tsy niy. Suão ziwabyze Sesus hapik niukuru.

⁴¹ Kyze zokorobyi tu atsoko taziky bo niukuru. Zihobykze ipe niy:

– O kaziky Deus zipehata Kiristu tsinynaha. Atahi Deus bo mymyoktyhyrykta my – niy.

⁴² Iwaze taziky Sesus bo zioptyhyryk. Izumuze Sesus ibo iktsaziu niy. Ipe niy:

– O ikia hi Simaõ Suão tse. Abaka mekytu anaro myzik. Sepas ty pinaroko. Sepas Peduru atsatu maha. Petok inarohota atsatu piwatawyky. Atahi harahare wata – mykara.

Sesus Piripi Natanieu iwa ahatsa nisipeha.

⁴³ Iwaze izokoroze Sesus:

– Utakta Karireja bo moparak – niy.

⁴⁴ Tapara jubyi tu Piripi ziberiki ipe niy:

– Aidykta katuk – niy. Piripi Betesaida ezekta niy. Anaeze Ādere Simaõ ahatsa zikzurukunaha Betesaida ezektsa niaha. Sesus Piripi zihobykze ipe:

– O katukta – niy.

Piripi hyỹ niy.

⁴⁵ Kyze Piripi Natanieu iberiki zihobykze. Ipe niy:

– O Natanieu katsakta Deus zipehata tsinynaha. Tubabatu Moises isoho ziwatahakata. Tapara Deus sohotsitsa niwatihi isoho ziwatahakanahatsa. Abaka tsinynaha. Sesus inarokota. Sose. Nasare ezekta – niy.

⁴⁶ Niytahi Natanieu ipe niy:

– Anahi batu kanyhy niy. Tyzeka ja amy Nasare eze ja tisapyrēna – niy.

– Pany katuk iktsa tsimy! – Piripi niy.

⁴⁷ Iwaze Sesus Natanieu bo nikoze. Izumuze Sesus kytsa pe niy:

– Iktsataha. Atahi mozumuku Isareu ezekta. Maku mospihikbatabyikita tsimysapyrēta – niy. Iwa Sesus Natanieu soho nitsaso.

⁴⁸ Iwaze Natanieu Sesus pe niy:

– Haneze sa tsikny – niy.

– O tapara Piripi zaberiki, uta botu any, ikia umaha pukezi tsikdyhykyze anaeze any – Sesus niy.

⁴⁹ Natanieu ipe niy:

– O ikia Deus tse babata. Ikie Isareu ezekta tu abazubata tsimy – niy.

⁵⁰ – O ikia kahumo tsaspirikporēta. Tapara umaha pukezi tsikdyhykyze any tawy iwatahi kahumo tsaspirikporēta. Kazikwy hi abazuba bo iktsa tsimy.

⁵¹ Utakta maku babata iknasikta ahawata ikyzik, ikiahatsa bjoikpe zoksapare naha bo iktsa tsimy. Kyze tsipinynaha bjoikpe iknyktsa Deus tsumuēhītsitsa kabo nasik nasikknaha. Iwaze neduk nedukknaha. Ana hi tsipinynaha – Sesus niy.

2

Sesus mysukzawy bo niukuru.

¹⁻² Kyze petok zuruze Sesus mysukzawy bo niukuru. Mywanu horokwy mykaha Kanaã eze. Kanaã Karireja eze niy. Sesus je imyikaha bo niukuru. Sesus tuk zinymyrykynahatsa kino niwatihi imyikaha bo niukurunaha. Tapara zihitsa ispe niy:

– Pany! Kamyikaha bo tynaha – niy.

Yhỹ niaha. Iwaze simyikaha bo niaha.

³ Kyze duabohotsa tsik zikukunaha. Iwaze duabohotsa tsik nipykze Sesus je tihĩ tatse pe niy:

– Katse duabohotsa tsik nepykba – niy.

⁴ – Kaje amykzo byihuktsa. Abaka Deus zikwy piwatawy zeka batu wasani ziky – niy.

⁵ Niytatsahi zihitsa tsumuẽhĩtsa pe niy:

– O kytsa katse ahape my zeka hyỹ tsimaha – niy.

⁶ Bytykareze tu pihik suk niapykyryk. Napetok napetok napetok pihik suk niy. Pihik suk morosuk ibuzoinikia zuba tsipomobyitsa. Sudeutsa tapara tahadisahakanaha tahatsyhyrypikiknaha. Bykyze tahatsyhyrypikikzonaha simypewytsa niwatihi nisiokipikiknaha. Siwahoro eze pihiksuk tsizubarẽna.

⁷ Iwaze Sesus zihitsa tsumuẽhĩtsa pe niy:

– Pihik ty susutaha! Pihiksuk tyzihareknahaktsa! – niy.

Hyỹ niaha.

– Pihik ty zak bo tu tyharektaha.

⁸ Iwaze pihik ty zihitsa bo nyny tsimaha – ispe niy.

Hyỹ niaha. Iwaze pihiksuk ty okok maraksu maraksu nikaranahaze iwaze zihitsa bo wabehyryk niy.

⁹ Pihik tu duabohotsa tsik niyzik. Zihitsa ziakpy. Zihitsa batu inyhy. Aty sa pihik duabohotsa tsik nizuknihik anahi batu inyhy. Sitsumuẽhĩtsa zuba zinymyrykynaha. Niytahi zihitsa tasukzakata pe niy:

¹⁰ – Taparaka kytsa bo duabohotsa tsik tisapyrẽna situksa bo nyny ziknakaranaha. Bykyze tahasoroknahaze zuba duabohotsa tsik isapybara ty situksa bo nyny ziknakaranaha. Ikiakta batu. Aba zuba ikia duabohotsa tsik tisapyrẽna tsipokzitsarẽna mybo nyny tsiky – niy.

¹¹ Iwaze Sesus zinymyrynahatsa ihumo sispirikporẽtsa.

– O atahi Deus zikwy ziwatawy – nikaranaha. Tapara Deus zikwy Kanaã ezektsa bo ziwatawyky. Kanaã Karireja eze niy. Anaeze hi Deus zikwy Sesus tuk niapykyryk niy.

¹² Niahatsahi Kaparanaũ hudikhudikwy bo niaha. Sesus, taje, tatukytsa, zinymyrykynahatsa ahatsa Kaparanaũ bo zumukunaha. Anaeze niapykyrykspyknaha.

Sesus Deus wahoro zubata bo zumu.

¹³ Kyze Sesus zinymyrykynahatsa tuk Serusarẽhe bo niukuru. Sudeutsa myikaha bo pororo ziknakaranaha. Tubabatu Deus taparaktsa Esito ekze mekybotu nisioktyhyryk ana bo hi mytsaty ziknakaranaha. Myikaha paskoa inarokoha niy.

¹⁴ Deus wahoro zubata isturupeze bo zumuze nitsuk. Anaeze kytsa sizubarẽtsa bo nikoze. Wastuhutsa pikuzatsa ty, hozipyrykzatsa ty, amytudutsa ty iwatsa ty nisihuakaknaha. Utsa kytsa okyrysaro humo harape bo zihuakaknaha. Anaeze nidyhydyhykynaha. Kytsa inapupunahaze siokryrsaro ty zihuakzonaha.

¹⁵ Sihumo Sesus taokaniki. Pikuzatsa hwyk tsaziki ty tsizezerẽna ty wabe niy. Kytsa ipokso zipobaiknaha. Aidy nitururuknaha. Kytsa tahapybyspyk niwakbaiknaha. Hwibihitsa nisitsihpetotokbaik. Okyrysaro tsizubarẽna zitõbaik.

¹⁶ Sesus opykani huahua niy:

– Ahanamy ty ka wabehyryktaha! Ikiahatsa kazo wahoro zubata eze ahanamy zozowy tsikzukninaha ba zikaha. Niwazubaktsa. Nabo pãotaha – niy.

¹⁷ Iwaze zinymyrykynahatsa ibo iktsa nikaranahaze mytsaty nikaranaha. Tubabatu Deus harere papeu humo ziwatahaka ana bo hi mytsaty nikaranaha.

– O Deus awahoro zubata kytsa ataeze hi simysapybyikitsa mykaranaha. Iwatahi taokaniki – niy. Iharere bo mytsaty nikaranaha.

¹⁸ Iwaze Sudeutsa taparaktsa Sesus pe niaha:

– Aty sa ape niy: “Kytsa Deus wahoro zubata eze tysiksiwyhiktsa!” Aty sa anaharere ape niaha. Deus zikwy ty mybo tsiwatawykta! Deus zikwy mybo tsiwatawy zeka wasani – niaha.

¹⁹ Sesus ispe niy:

– Ikiahatsa Deus wahoro zubata tsipitsehepetotokbaiknaha zeka usta wahoro mektatu mozoknizo. Mektatu ezytyk mozoknizo. Harakykbyihi puru nahatuk tu pikymy hỹ – niy.

²⁰ – Batu ba niaha. Harakykbyihi puru nahatuk tu Deus wahoro zubata mektatu ba zikukni mybarapetu tsimy kara – niaha. – Mytukytsa tubabatu tawahoro nizuknikinaha, kuarêta seis niytyk tseheze zikymynaha. Paze harakykbyihi puru nahatukta zuba mektatu ba zikzuknizo – niaha.

²¹ Sesus harere humo batu sihyrinymyry. Iharere tsihokdaharêna. Nitsasokoze wahoro tanury humo ziwatawyky. Inury wahoro wata niy. Mohyrikosokdaze petok puruze mynahyryzikpo mykara. Anahi ziwabykynahatsa batu sihyrinymyry.

²² Sesus nahyryzikpoze anaharere bo mytsaty nikaranaha. Iharere ty zinymyrykynahatsa mytsaty nikaranaha. – Deus harere wasani my, hawa ha ty Sesus nitsasoko inury soho atsatu niy – nikaranaha. Iwaze iharere bo hyỹ nikaranaha ihumo sispirikporêtsa niyziknaha.

Sesus mywatu nimynyba.

²³ Sesus Serusarêhe eze tuze kytsa sizubarêtsa ihumo sispirikporêtsa moziknaha. Paskoa myikaha myze sizubarêtsa ihumo sispirikporêtsa moziknaha. Deus zikwy ty ituk iktsa nikaranahaze iwatsahi iharere bo hyỹ nikaranaha ihumo sispirikporêtsa niyziknaha.

²⁴ Sesus sibo tasoho ty batu watawy sihumo tsimytsatyharêta nikara.

²⁵ Kytsa mytsaty mykaranaha ana humo hi Sesus tsihyrinymyrêta. Sesus batu tyso:

– Hawa takta sa mytsaty my – my. Iwa batu tyso. Amy ty kytsa mytsaty mykaranaha humo tsihyrinymyrêta hỹ.

3

Nikodemus Sesus bo nikozore.

¹⁻² Unata eze Nikodemus inarokota Sesus bo zumu. Taparakta Pariseutsa Sudeutsa niy. Atahi unata wahoro hara bo nidoko. Atahi:

– O myhyrinymyrytsa! Ikia mopyktsa babata tsihyrinymyrêta. Deus zikwy ty kytsa bo tsiwatawyky. Ikia zuba Deus harere bo hyỹ tsimy kara iwatahi Deus zikwy ty mybo tsiwatawyky. Iwaze katsa tsimytsasokonaha Deus ikia zapehaka tsimykarana – niy.

³ Sesus ipe niy:

– Tsiwabytotokta! Hawa haja motsasoko wasani my. Ikia kyripuruzo ahahabyizeka batu Deus tyryk zikyzyk. Deus tyryk tsimozik tsihikik zeka tsimypurukzokta – niy.

⁴ Iwaze Nikodemus hi:

– Hawa sa maku taypykta tu mopurukzo. Taje harakoke bo ba ziktsukzo – niy.

⁵ Niytahi Sesus ipezo niy:

– Hawa motsasoko wasani my. Maku pihik ikny nipurukze niy. Maku mopurukzoze Deus hyrikoso ituk mynapykyryk iwaze Deus tyryk mozik. Iwa mopurukzo zeka Deus tyryk mozik.

⁶ Tsikpuruknahaze myje ikny katsa myzotsa hyrytsa zuba tsimaha. Katsa tsimypupurukzonahaze Deus hyrikoso humo iwatsahi katsa Deus tyryk tsimoziknaha.

⁷ Iwatahi ape my:

“Tsimypupurukzonahakta” my. Iwaze ikia batu apyby Deus tyryk tsi-mozikta iwa abo motsasokoze mytsaty mytsaty byity tsimy.

⁸ Zopoktsa nabybykyknahaze hana ikny ja batu myhyrinymyry siakpyri zuba piwabynaha. Hana bo mokurunaha batu myhyrinymyry. Ba nabo myku zikaha. Atsawatu hawa Deus tyryk tsimozik batu ahyrinymyry, Deus hyrikoso kino zopoktsa waha nabybykyk my. Hana ikny ja batu myhyrinymyry. Hana bo ja batu myhyrinymyry. Katsa Deus hyrikoso humo ityryk tsimoziknaha iwa ahahyrinymyrëtsa zuba – niy.

⁹ Iwaze Nikodemus ipe niy:

– Hawa sa my. Aharere humo batu kahyrinymyry – niy.

¹⁰ Sesus niy:

– Ikiakta Isareu ezekta sihyrinymyrykytsa iwata tu sa batu ahyrinymyry.

¹¹ Amy ty inymyryky hi anahi motsasoko. Amy ty botu iwaby anahi zuba motsasoko. Tanyhyhi motsasoko. Ikiatsa kaharere batu ahakparawy – niy.

¹² – Ikiatsa Deus tyryktsa tsimoziknaha ana soho hi motsasoko. Anahi motsasokoze kaharere humo batu yhyë tsimaha. Kaharere bo hyë tsimaha zeka hawa Deus tuk ahawahi tsimynapykyknaha anatyhi yhyë tsimaha – my.

– Kaharere Deus tuk ahawahi tsimynapykyryknaha soho anatyhi hyë tsimaha. Batu ahahyrinymyry mytsaty my.

¹³ Uta zuba bijoikpe ikny iknasik. Iwatahi kytsa bo motsasoko. Ziknynaha tahi kytsa bo motsasoko. Utakta Deus zikpehata ahawata ikyzik niy.

¹⁴ Tubabatu Moises pyryhyk hyrikoso barõse nizukni. Na pyryhyk hyrikoso hwi humo typu niy. Kytsa simyitsapyrëtsa pyryhyk hyrikoso bo iktsa nikaranahaze nizororokonaha. Atawahi utakta Deus zikpehata kytsa wata ikyzik iwaze kytsa iharapatawyhyta humo pikyriknaha.

¹⁵ Kytsa kaharere bo hyë mykaranaha zeka kahumo sispirikporëtsa maha. Kytsa kahumo mospirikponaha zeka Deus tuk tahawahi mynapykyryknaha. Kahumo sispirikporëtsa Deus tuk tahawahi mynapyrykyknaha hë

¹⁶ Yhyë, Deus mybarawy ezektsa humo tsimypokzitsiarëta. Nawatsa humo tsimypokzitsiarëta babata. Iwatahi tatse zipaha. Estuba zuba itse babata. Asaktsa kahumo mospirikponaha zeka Deus tuk mynapykyryknaha, ituk tahawahi mozurukunaha. Deus tuk mynapykyryknaha ba zikykbazonaha.

¹⁷ Deus tatse izipehaze myhumo iakyri byita. Ba kaeze ëryk zikahasapynaha. Iwatahi uta mozumuze kazo bo pahaoktyhyryk niy iwaze mybarawy ezektsa humo batu iakyri.

¹⁸ Aty Deus tse babata humo ispirikpo zeka Deus bo mymyoktyhyryk. Deus ihumo ba ziktaokani. Aty kaharere bo hyë ahabyi zeka atahi Deus bo ba zikmyoktyhyryk Deus ihumo tsiakyriukrëta.

¹⁹ Deus tatse zuba zipaha. Sizubarëtsa sisopyksapybyitsa tu nikaranaha nisiwatawyky. Wasani mykara nisiwatawyky. Atahi okoroze ky wa. Myzubatsa ihumo batu siakparawy. Sisopyksapybyitsa nikaranaha iwatsahi ihumo batu siakparawy. Asahi miwa ha nizihikiknaha. Iwatsahi batu ihumo sispirikpo.

²⁰ Sizubarëtsa sisopyksapybyitsa tu nikaranaha ana humo hi kaharere bo batu yhy zikaha. Sisikpybyrëtsa ustsya kytssa humo. Asahi kytssa papatu nikaranaha, asaktsa sibo iktsa mykaranaha zeka sisikpybyrëtsa. Miwa ezektsa watsa ustsya ba ziksinyaha. Iwa humo hi sisikpybyrëtsa.

²¹ Ustsya kytssa kaharere bo hyhy mykaranaha simysapyrëtsa, kahumo sispirikporëtsa iwatsahi tisapyrëna ty mykaranaha. Ihumo wasani mykaranaha ana humo hi kytssa sihyrinymyrëtsa. Iwororoha ezektsa watsa ustsya mysinyaha batu sisikpyby – niy. Iwa Sesus Nikodemus tuk nipamykysoko.

Sesus Suão ahatsa.

²² Kyze Sesus tuk zinymyrykynahatsa ituk Sudeja bo niukurunaha. Anaeze niapykyrykspyk naha kytssa nisiharasusuku.

²³ Suão Batista niwatahi myzubaha nisiharasusuku. Eno eze. Eno Sarĩ pauk baze niy. Pihik tsizubarëna eze hi nisiharasusuku.

²⁴ Suão ihurukuhubyzetu myzubaha nisiharasusuku. Aiba tohi zuba kytssa sakyriukanikitsa hurukwy bo nitsahuruknaha.

²⁵ Suão Batista tuk zinymyrykynahatsa Sudeu ziphakanaha. Asahi:

– Aty sa wasanita nikaranaha Suão nisiharasusukuze ja nikaranaha. Sesus nisiharasusukuze ja. Aty sa wasani – nikaranaha.

²⁶ Iwatsahi Suão pe niaha:

– O myhyrinymyrytsa! Botua ikia amakta taba buburu tsiky. Mytuk maku nipykyrykspyk. Botua isoho ty mybo tsiktsasoko, Sesus my. Atahi myzubaha nisiharasusuku. Sizubarëtsa iapik mokurunaha. Ikie hapik ba ziktururuknaha – niaha.

²⁷ Iwaze Suão ispe niy:

– Ana humo hi kakurëta my. Deus zuba tazikwy ty myzubaha bo nyny my. Asaktsa Deus humo Sesus harere piwabytotokonaha asa bo hi izikwy ty sibo nyny my – niy.

²⁸ Botua ahabo iktsasoko.

– Utakta Kiristu byita atakta Deus ziphata my. Taharaze zuba zikpeha – niy. Iwaze isoho motsasoko.

²⁹ – Maku tasukzata tsakurëta my. Itukta kino niwatihi ihumo tsakurëta. Tasukzata mokozoze itukta ihumo tsakurëta. Utakta itukta wata my. Myzubaha Sesus tuk mokurunaha, ana bo hi mokozoze kakurëta. Isukzata tukta wata my.

³⁰ Sesus zinymyrykynahatsitsa sizubarëtsa. Katuk zinymyrykynahatsa batu sizuba. Wasani my iwatahi kakurëta – my. Iwa Suão zinymyrykynahatsa pe niy.

Atahi bijoikpe iknykta inasik tsimysapyrëta.

³¹ Atahi bijoikpe iknykta tsimysapyrëta my. Ata zuba tispirikporëta. Mybarawy ezektsa batu. Aparakbahatsa tsikaeni zuba sihyrinymyryrëtsa maha. Mybarawy soho eziky ty zuba mopamykysokonaha.

³² Atakta bijoikpe iknykta ihyrinymyrënikita hy. Ata kino nikozo naha zuba motsasoko. Ziwaby naha zuba motsasoko. Batu sizuba iharere bo hyhy mykaranaha.

³³ Kytsa iharere bo hỹ mykaranahaze asahi – Deus tsimysapyrēta wasape mykara – mykaranaha

³⁴⁻³⁵ Deus tihi:

– Utakta katse Sesus pipehaka. Ihumo kamypokzitsiarēta. Kahyrikoso ituk tawahi mynapykyryk. Kahyrikoso hi izikwy kazikwy hi atsatu my. Ata kino wasaniha zuba natsasoko. Kahyrikoso humo zikwy tsizubarēna – niy.

³⁶ Iwaze aty Deus tse harere bo hỹ mykara, atahi meky watu mozik, atahi tawahi Deus tuk mynapykyryk. Aty Deus tse harere bo yh̃ ahabyi zeka, atahi Deus tuk ba zikykykyryk. Deus ihumo takyri, iharere bo yh̃ ahahabyizeka iwatahi ihumo Deus takyri. Atahi Deus tuk batu tawahi mynapykyk niy, sinini ykarawy bo myzipeha.

4

Sesus Samarija ezektatsa tuk nipamykysoko.

¹ Kyze Sesus niukuru Sudeja bo Pariseutsa pokso niparak. Tapara kytsa Pariseutsa pe niaha:

– O kytsa Sesus hapik sizubarētsa. Atahi kytsa sizubarētsa nisihara-susuku. Suão Batista tuk zinymyrynahatsa batu sizuba maha – mybarapetu nikaranaha.

² Sesus kytsa batu isty harasusu. Zinymyrykynahatsa zuba kytsa nisihara-susuku naha.

³ Anahi Sesus ziwabyze Sudeja ikny niparak. Karireja bo ziksizo. Zinymyrykynahatsa ituk niukurunaha.

⁴ – Samarija bo koiknyktsa kytsa! – Sesus niy.

Yh̃ nikaranaha.

⁵ Niahatsahi Sikare myzubaha bo zumunaha. Tubabatu taparakta Sako nihyrikosokdaze tahudikhudikwy Sose bo nyny niy itse ziaксе. Sose ni-hyrikosokdaze niwatihi itsekokatsa tahudikhudikwy ziaksenaha. Sikare myzubaha baze tu nihyrikosokdata Sako hudikhudikwy niy.

⁶⁻⁸ Iwaze Sesus pihik zokowy bo izumu. Tapara Sako tykoke nizukninaha. Tokbaha niyzikikze Sesus iakubyrizumu tahi pihik zokowy baze nidyhyky. Zinymyrykynahatsa myzubaha bo niaha. Tahadisahawy bo nitururuknaha.

Iwaze wytyk Samarija ezektatsa nabo izumu. Pihik zotsata niparaktatsa Sesus zihobyk iwaze ipe niy:

– O kaboktsa pihik ty uta piku – niy.

⁹ – Batu ikiakta Sudeja ezekta h̃. Ikza Samarija ezektatsa. Iwaze amo sa “Kabo pihik ty maraktyktsa” tsimy kara – niy. Sudeutsaktsa ba Samarija ezektsa opowysuk eze ka ba zikunaha iwatatsahi h̃byi nikara.

¹⁰ Sesus:

– O amy tisapyrēna zuba Deus abo nyny my h̃. Ana humo hi ja tsahyrinymyrētatsa “Kaboktsa pihik ty” botu ape iky – niy. Amy tsa ty h̃ zeka iwatahi Sesus niy. – Iki ba batu kabo nyny tsimy. Tsikny zeka ikia kino “kabo ky pihik ty” tsimyze. Yh̃ my. Utakta Deus pihik baba ty abo nyny my. Ana tsipikuze mekywa tu tsimozik. Tsimyhyrikosokdaze tsinahyrikipoze, Deus baze awahi tsimynapykyryk – Sesus niy.

¹¹ Niytatsahi:

– O ikia sa batu apihikzowyky pihik zowy tsiokitsihizezerēna batu izowyky. Hawa sa pihik ty marak tsimy – niy.

¹² – Tubabatu mydiri nihyrikosokdata Sako tykoke ziuku. Iwatahi pihik atsaenze ky zikzikuku. Ihyrytsa niwatihi pihik zikzikukunaha. Siraratsa kino niwatihi pihik zikzikukunaha. Niytahi pihik hoke itsekokatsa ziaksenaha.

Mybo nizapikso. Sako harere kytsa ziwabyziunaha. Maku abazubata niy, pihik zikuku. Hawa skaraba ikia hi ja abazubata – niy.

¹³ Niytahi Sesus ipe niy:

– Aty na pihik piku zeka tsiarupukrētazo.

¹⁴ Uta pihik ty abo nyny maha tsipiku zeka ba iarapuruk zikzumuzo. Pihik mekywaha ty abo nyny my. Hawa pihik pupuputsa watsa pihik batu zepyk pihik ty abo nyny my zeka awahi tsimynapykyk iwatatsahi ba iarapuruk zikzumuzo. Ba ziktsehezo pupuputsa watsa iwaze mekywa tu tsimyzuruku. Tsimyhyrikosokdaze tsimynahyrisikpo iwaze awahi Deus tuk tsimynapykyryk – niy.

¹⁵ Ana ziwaby tatsahi:

– Ana pihik ty kabo nynyty ky niy. Iwaze ba karapuruk ziyk. Ana pihik ty kabo nyny tsimyzeka pihik ba zikzizozo – niy.

¹⁶ Niytahi:

– Abarikta kabo tyzioktyhyktsa! – niy.

¹⁷ – Batu ba. Ikza ba kabarikta ka – niy.

– Ikia wasape tsiky niy. Tsiktsasoze “Ikza batu kabarikta ka” wasape tsiky.

¹⁸ Ikia kytsa katsyhyrytsa watsa tu tsiksiakse. Abakta abariktabyitatu aktaba hañ niy. Deus okzeka batu amysapy iwaze kape tsikyze:

“Ikza batu kabarikta ka” wasape tsiky – niy.

¹⁹ Iwaze ipe niy:

– Ikia Deus sohokotsa babata tsimy.

²⁰ Katsa tsimypamykysokonaha anaeze hara bete Deus pe “O ikia tsamysapyrēta” tsimykaranaha. Iwa mydiritsa nihyrikosokdanahatsa nymyhyrinymyrykynaha. Ikiahatsa Sudeutsa tsimypamykysokonaha, nabo Serusarēhe eze zuba Deus pe. “O ikia tsamysapyrēta” tsimykaranaha. Aty sa wasani mykara – niy. Iwa atatsa Sesus pe niy.

²¹ Niytahi:

– Aibani hara bete Deus bo batu tyso “O Deus myzo ikia zuba tsamysapyrēta” tsimaha. Serusarēhe eze Deus bo batu tyso.

“O Deus myzo ikia zuba tsamysapyrēta” tsimaha – niy.

²² – Ikiahatsa Samarija ezektsa tsimaha. Deus soho humo ahahyrynymyry byitsa tu ikiahatsa tihi:

“O Deus ikia tsamysapyrēta” tsimykaranaha. Ikiahatsa batu ihumo ahaspirikpo. Katsaktsa Sudeutsa tu. Ihumo myspirikporētsa. Deus Sudeutsa nisinyky. Deus bo mymoktyhykta niyzik.

²³ Kyze abaka ikiahatsa Deus tyryktsa tsimoziknaha. Iharere bo hyñ tsimykaranaha. Amy motsasoko anaty hi tsimykaranaha. Wasani tsimaha. Iwaze Deus ahahumo tsakurēta. Iwa tsimyzurukunaha zeka tsakurēta – Sesus niy.

²⁴ – Deus inurybyita ihyrikoso zuba my. Batu zinynaha. Kytsa Deus humo sakurētsa maha zeka wasani mozurukunaha. Hawa wasani zuba motsasokonaha. “O Deus ikia zuba tsamysapyrēta mykaranaha” – niy.

²⁵ Kyze atatsa ipe niy:

– Deus myzipehata mywata mybarawy bo mynasik. Kiristu mozumuze ihumo myspirikporētsa tsimoziknaha, atahi Deus bo mymyoktyhyryk niy. Ana humo hi kahyrynymyrytatsa – niy.

²⁶ – Uta hiba Deus zikpehata. Utakta abo mopamykysoko Deus zikpehata my – niy.

²⁷ Iwaze babatu zinymyrykynahatsa sidisahawy tuk ziksikizonaha. Sesus atatsa tuk iktsa niahaze paikpa mytsaty nikaranaha. Batu tyso niaha – O

Sesus amo sa ituk tsikpamykysoko. Hawa sa ituk tsiky kara – iwa batu tyso nikaranaha.

²⁸ Niytatsahi taopowysuk zerekik atsoko myzubaha bo niy.

²⁹ Myzubaha ezektsa pe niy:

– Pany. Maku bo ky niy. Atahi pihik zowy baze nidyhyky. Hawa ha ty ziknakara naha ty kabo nitsasoko. Kiristu Deus zipehata ja iky. Pany ibo ky – niy.

³⁰ Yh̄y nikaranaha. Iwatsahi myzubaha ezektsa Sesus bo zumukunaha.

³¹ Iwaze batu sibo zukbyize zinymyrykynahatsa hi:

– O myhyrinymyrytsa amy ty haukykta – nikaranaha.

³² – O batu ba. Uta kino meky watu kadisahawy. Ahanyhybara – niy.

³³ Zinymyrykynahatsa asa zuba nipamykysokonaha:

– Aty kok idisahawy ibo ziby kare nikaranaha. Mypapatu kok idisahawy ty ibo nyny niy – nikaranaha.

³⁴ Sesus ispe niy:

– Pikdisaha zeka kakurēta my – niy. – Atsawatu kazo harere bo yh̄y my zeka kakurēta babata mykara. Kazo zikpehatawy iharere humo yh̄y ikykaraze kakurēta. Iharere nihawatu my zeka kakurēta mykara kasorok-tawa mokuru.

³⁵ Iki ahatsa hi: “Napetok napetok nawaze byzoje morahaze kyze arosta moakuknahaze. Mydisahawysa mokymynahaze arosta tahazyzyknaha!” tsimaha. Iwa tsimytsasokonaha. Utakta ahape my: “O batu. Abatu nikymy”. Atsawatu mytsaty tsimykaranaha “O kytsa batu sizuba Sesus humo sispirikporētsa maha” tsimaha. Ahape my. Iktsa tsimahaktsa! my. Kytsa asahi kaharere bo hȳy mykaranaha kahumo sispirikporētsa sibo iktsa tsimahaktsa! Abatu kahumo sispirikporētsa maha. Ba byri hu tsimaha. Arosta moakuknahaze tsa watsa abatu kytsa kaharere bo hȳy mykaranaha kahumo sispirikporētsa maha – niy.

³⁶ – Maku siriktsa nisiparikik niy. Mektatu arosta nisizyzykyk niy. Kytsa petoktsa arosta humo sakurētsa. Atsawatu maku kasoho motsasoko, mektatu kasoho humo mysihyrynymyry iwatsahi kytsa kahumo sispirikporētsa, ana humo hi kytsa petoktsahatsa sakurētsa. Iwatsahi kytsa kahumo sispirikporētsa sakurētsa h̄y. Asahi nahyritzikonahaze katuk tahawahi mynapykyryknaha ana humo hi sakurētsa h̄y – Sesus niy.

³⁷ – Estuba maku atazuba mysiparik iwaze maku mektatu mysizozek mykaranaha. Wasani maha.

³⁸ Atsawatu estuba maku hi kasoho kino motsasoko mekta tu kytsa kahumo mysihyrynymyryknaha. Iwatsahi kytsa sizubarētsa kahumo sispirikporētsa. Kaharere tsimytsasokonaha zeka ana humo hi kytsa kaharere bo hȳy mykaranaha. Kahumo sispirikporētsa zeka mekywatsatu moziknaha. Utsa kytsa botu kasoho nitsasokonaha iwatsahi siharere humo kaharere bo hȳy mykaranaha iwaze sispirikporētsa moziknaha iwatsahi ahakurētsa tsimaha – niy.

³⁹ Kyze Sikare ezektsa Sesus bo zumukunaha. Ihumo sispirikporētsa. Atatsa harere ziwabynahaze Sesus harere bo hȳy mykaranaha iwatsahi ihumo sispirikporētsa moziknaha. Atatsa nitsasokoze:

– Hawa ha ty ziknakara naha ty kabo nitsasoko – atatsa harere ziwabynahaze. Iwatsahi Sesus humo sispirikporētsa h̄y.

⁴⁰ Iwaze Samarija ezektsa zumukunahaze ipe niaha:

– Pany mywahoro bo paku tyny – nikaranaha. Yh̄y niy. Anaeze situk petok zurure.

⁴¹ Mektsatu ihumo sispirikporëtsa. Sibbo nitsasokoze myzuba ihumo sispirikporëtsa.

⁴² Asakino atatsa pe niaha:

– Tapara katsaktsa Sesus bo hyÿ tsimaha ihumo myspirikporëtsa aharere humo tsikykaranaha. Abaka katsa ihumo myspirikporëtsa iharere humo. Atahi mybarawy eze ktsa mysioktyhykta – nikaranaha. Iwa atatsa bo nipa-mykysokonaha.

Sesus taparakta tse zizororowy.

⁴³ Kyze petok zuruze Sesus Karireja bo ziksizo. Samarija ekzekta niparak Karireja bo niukuru.

⁴⁴ Tapara Sesus ziknatsasoko – O Deus sohokotsa tahudikhudikwy eze ktsa okzeka iharere bo batu waby zikaha. Utsa kytsa iharere bo piwabyziukunaha, tahudikhudikwy eze ktsa batu – Sesus niy:

⁴⁵ Kyze Sesus bo zumuze Karireja eze ktsa Sesus humo sakurëtsa nikaranaha. Asahi Serusarëhe amyikaha bo niaha. Anaeze Sesus bo nikozonaha. Deus hyrikoso ituk mynapykyryk zinynaha. Deus zikwy ituk zinynaha. Iwatsahi sibbo zumukuze sakurëtsa nikaranaha.

⁴⁶ Iwaze Kanaã bo ziksizo. Pihik duabohotsa tsik nizukni nahaeze, Kanaã Karireja eze tu niy. Kyze taparakta Kaparanaũ myzubaha eze ktsa Kanaã eze tu niy. Atahi:

– Katse tsimyitsapyrëta. Asiba zumuzata atahi Kaparanaũ eze nihoeke, asiba nira – niy.

⁴⁷ Iwaze kytsa taparakta pe niaha:

– Sesus izumu Sudeja iknykta. Karireja bo. Mybo izumu – niaha. Iwaze taparakta Sesus bo zumuze ipe niy:

– O Sesus tupakta kawahoro bo tsimy, katse moraka. Pany katse tyzizororowykta! – niy.

⁴⁸ Sesus ipe niy:

– Kytsa kahumo batu sispirikpo. Tapara Deus zikwy humo piwatawyky. Anabo hi iktsa mykaranahaze iwatsahi kaharere bo hyÿ maha iwaze kahumo sispirikporëtsa – Sesus niy.

⁴⁹ – O pany Sesus! Aidytykta, katse irabyitu – niy.

⁵⁰ – Tsiksizokta! Awahoro bo atse botu nizororo. Tsakurëta niyzik – Sesus niy.

Maku Sesus harere bo hyÿ nikara ihumo tispirikporëta nikara. Iwatahi tawahoro ziksikizo.

⁵¹ Atazuba tawahoro bo ziksikirize ske pukteze tu itsumuëhÿtsitsa zihobyknaha. Ipe niaha:

– Atse nizororo. Iwatahi tsakurëta – nikara.

⁵² – Katse sa nizororo haramwe haneze ja – niy.

– O jatu tokbaha eze atsoko jokboha niyzik. Abaka iakzobyita mopykyryk baba zizororo niy – niaha.

⁵³ Jatu kino haramwe tokbahaze Sesus tihi:

– Atse botu nizororo – niy. Iwa Sesus kape niy. Anabo hi mytsaty nikara. Iwatahi Sesus humo tispirikporëta niy. Iwahoro eze ktsa kino niwatihi Sesus humo sispirikporëtsa niyziknaha.

⁵⁴ Iwahatu Sesus Deus zikwy ziwatawyky. Sizubarëtsa bo Deus zikwy ziwatawykyzo niy. Karireja eze ktsa bo Deus zikwy ziwatawy. Sudeja ekze niparakze Deus zikwy petok ziwatawy niy.

5

Sesus ityryk niakbabata zizororowy.

¹ Iwaze Sesus Serusarêhe bo niukuru. Sudeutsa myikaha bo Serusarêhe bo zumuku.

²⁻³ Serusarêhe eze zarape waha eze niy. Zarape Betesda inarokoha Sudeu harere niy. Betesda zarape waha eze Serusarêhe hokbowytsa baze niy. Hokbowy hozipyrykzatsa ty inapupukunaha inarokota zumubahani. Iwa katsyhyry watsa iwatsa hokbowytsa iwa niaha. Anaeze kytsa sizubarêtsa ziknakpykyryknaha. Simyitsapyrêtsa niaha. Sihyryzikubyitsa, siekbyritsa, sityryktsa niakbabatsa, pãozikahabyitsa iwatsa anaeze ziknapykyryknaha. Sizubarêtsa ziknasisperyknaha.

⁴ Bijoikpe iknykta Deus tsumuêhîtsa pihik wastuhu ziknasikik. Pihik zikziktsik pepepewyky. Pihik zikzitsikpepepewykyze kytsa pihik bo ziknautsotsokoknaha. Aty tapara ziknahazukukze zikzizororowy ky.

⁵ Anaeze hi Sesus zumu. Maku bo iktsa niy. Atahi tubabatu tsimyitsapyrêta sinini ziknakara niy. Tirîta oito anos niytyk tseheze sinini ziknakara.

⁶ Sesus ibo iktsa niy. Tubabatu ziknahoekek ana humo hi tsihyrinymyrêta. Iwaze ibo iktsa niyze ipe niy:

– Ikia skaraba hawa tsimy tsimyzororo tsihikik sa – niy.

⁷ – Yhÿ niy. Myzororo ikykarazetu – niy. – Batu aty tohi katukta ziky. Batu aty tohi zikmokty pihik bo niy. Uta zuba zeka batu pihik bo ziksi. Iwatahi mektsatu katy haraze mykaranaha hÿ pihik bo. Utakta batu. Mektsatu zuba nazororoko naha – niy.

⁸ Iwaze Sesus ipe niy:

– O kyikykykta! Awanu ty kokpuhykykta. Tsiksikta – niy.

⁹ Atsoko itarikto. Tawanu ty kokpuhyryk niy. Niparak niy. Tsakurêta nikara hÿ. Nawazuruze Sudeutsa byrywy zumuze hÿ nikara.

¹⁰ Iwatsahi Sudeutsa izororowyhyta pe niaha:

– Aba katsa Sudeutsa tsimymybyryknaha niaha. Ikia tarabaja tsimy kara. Wasanibara tsimy. Ikia awanu tsipisik, iwatahi tarabaja tsimy kara – niaha. Myhyrinymyrywy tihi:

– Mybyrywy pumuze batu tarabaja zikaha – niy.

¹¹ Iwaze izororowyhyta ispe niy:

– Zikzororowyta tihi kape niy: “Awanu ty kokpuhyrykykta tsiksikta” – niy.

¹² Niahatsahi ipe niaha:

– Aty skaraba ape. “Awanu ty kokpuhykykta tsiksikta!” niy – niaha.

¹³ – Batu kanyhy. Inaro batu kawabyhy – niy. Kytsa batu ity nyzo. Kytsa sizubarêtsa anaeze niy. Iwatahi Sesus niparak. Iwatahi maku naro batu iwabyhy.

¹⁴ Kyze Sesus izororowyhyta. Deus wahoro zubata eze zihobyk. Ipe niy:

– Abaka ikia tsikzororo hÿ awatu ty. Tsimynamysapybyi zeka sinini tsimy kara – niy.

¹⁵ Iwaze izororowyhyta Sudeutsa bo ziksizo ispe niy:

– Maku Sesus inaro atahi zikzororowy – niy.

¹⁶ Iwatsahi Sudeutsa Sesus nizokyryknaha. Sesus maku zizororowy zuruze tahabyryknaha ana humo hi tahakyrikinaha. Iwatsahi Sesus zimy-ijakaranaha.

¹⁷ Sesus ispe niy:

– Kazo tarabaja mynakara, batu pyk ziky. Uta kino niwatihi tarabaja mynakara – niy.

¹⁸ Iwaze Sudeutsa taparaktsa zibeze tsihikiknaha. Tapara maku zizororowy. Sudeutsa byrykywy eze tuze maku zizororowy. Bykyze nitsaso Deus kazo isopyk niy. Nitsasokoze Deus kazo my, tazikwy Deus zikwy atsatu my nikara. Iwatsahi ihumo tahakyrikinaha.

Aty sa Deus tse ipehawy.

¹⁹ Iwaze Sesus taparaktsa pe nitsasoko:

– Hawa motsasoko wasi my. Deus tse babata my. Atazuba batu. Atazuba batu mykara. Hawa Deus mykara naha ty zuba mykara. Hawa Deus motsasoko naha atsatu motsaso. Kazo tsizubarēna mykara atsatu mykara pisopykzuku – niy.

²⁰ – Iwahatu Deus kahumo tsimypokzitsiarēta. Tatse humo tsimypokzitsiarēta. Iwatahi hawa mykaraze tatse bo piwatawyky. Utakta ihumo myzisopykzuku. Nawa kasoho mytsaty mykara. Jaba maku ityryk niakbabata izororowy anabo hi iktsa tsikaha. Abahi kazo tsizubarēna kabo piwatawyky. Kabo piwatawyky zeka pahawatawyky. Ikiahatsa hi: “O tisapyrēna tsimaha.” Tsimypybynaha – niy.

²¹ – Kyze Deus siakbatsa mynasyhyrizikpobawy. Uta kino niwatihi. Kahumo itsihitsa mysihyryzikpowyzo. Deus tse humo mynasyhyrizikpoba.

²² Deus mybarawy ezektsa bo batu tyso “O ikia wasani tsimykar. Usta pe batu amysapy tsimykar” my. Batu. Uta zuba mybarawy ezektsa pe: “Ikia wasani” mykara. Usta pe: “Ikia batu amysapy” mykara – iwa Deus harere kape niy.

– Ikia zuba mybarawy ezektsa soho tsipiwatawyky. Aty ja imysapybykita tsimytsasoko. Aty tsimysapyrēta tsimytsasoko – niy.

²³ – Iwatsahi sizubarētsa kasoho humo maha “O ikia Deus tse babata. Aharere tsipiwabynaha. Tsimyharerewabyrēta tsimy” maha. Asa kino niwatihi Deus harere piwabykynaha. Kaharere bo yhy ahabyi zeka kytsa okzeka Deus harere bo niwatihi batu yhy maha. Iharere kino batu ziwabykynaha. Atahi zikpehahik iharere siwabyhybyitsa hi batu ma zikaha – niy.

²⁴ – Amy sa motsasoko wasani my. Aty kaharere bo hyhy mykara zeka meky watu mozik. Tawahi ispituzo Deus tuk mynapykyryk. Atahi zikpehakata humo tispirikporēta. Iwatahi tawahi ispitu mynapykyryk. Deus batu tyso ipe. “O ikia batu amysapy. Sinini ykarawy bo tsimy” my. Iwa batu tyso, batu sinini ykarawy bo ba zipaha.

²⁵ Amy wasani motsasoko. Utakta Deus tse. Abaka sizubarētsa simysapybyitsa mykaranaha. Asahi kaharere piwabyziukunaha siakbatsa watsa maha. Abahi kaharere bo hyhy maha zeka meky watu moziknaha. Kahumo sispitu tahawahi Deus tuk mynapykyryknaha.

²⁶ Deus zuba mynasyhyrizikpo. Kazo kape tynasyhyrizikpo iwatahi uta kino niwatihi siakbatsa mynasyhyrizikpo.

²⁷ Utakta kytsa wata Deus zikpehata. Deus humo kytsa pe my: “Ikia Deus okzeka wasani” mykara. Utsa kytsa pe: “Ikia batu amysapy” mykara. Deus harere humo iwa motsasoko.

²⁸ Batu paikpa mytsaty tsimykaranaha. Bykyze siakbatsa kaksoho piwabynaha. Kaksoho piwabynahaze tahaytyk ekze myzipunaha.

²⁹ Asaktsa wasani ziknakaranaha. Nahyryzikpobanahaze tahawahi Deus tuk mynapykyryknaha. Iwaze asaktsa batu simysapy ziknakaranaha nahyryzikponaha kino niwatihi. Simysapybyitsa ziknakaranaha mybara botu tahasapynaha. Tahawahi sinini mynakaranaha. Deus bara botu zitahasapynaha Deus pokso tahawahi mynapykyryknaha. Batu siaku maha – niy.

Aty sa Sesus zipeha.

³⁰ – Motsasoko nahaka kaharere bara tu my.

Tapara kazo harere piwaby iwaze motsaso. Tapara kazo mykara bykyze atsatu mykara iwa mozihikik. Botu zikpehata kabo nitsasoko anahi motsasoko. Iwatahi kytsa pe my: “Ikiahatsa ahamysapyrëtsa.” Utsa kytsa pe: “Ikiahatsa batu ahamysapy” mykara. Iwa motsasoze wasani mykara – niy.

³¹ – Utatu kasoho motsaso zeka batu sapy. Iharere batu wasani tsinakaranaha.

³² Iwa batu tyso. Usta kasoho motsasoko. Kazo kasoho motsasokoze iharere kino tisapyrëna hÿ iharere humo wasani mykara.

³³ Tubabatu ahatuktsa Suão Batista bo tsipehakanaha. Ata kino kasoho nitsasoko. Hawa ha nitsasoko wasape niy.

³⁴ Iwa Suão Batista kasoho ahabo nitsasoko. Utakta pahaoktyhyryk my, iwa Suão Batista kasoho nitsasoko. Iharere batu kasoho tsihikik ahabo zuba kasoho nitsasoko – Sesus niy.

³⁵ – Rika inapokze amypubyri mozik. Iwaze parakbaha mokozoneha. Haneze miwa bo mokozoneha. Suão Batista rika wata nikara. Deus harere nitsasoko. Iwaze Deus okzeka wasani ahahyrinymyrëtsa. Anahi Suão harere humo ahahyrinymyrëtsa.

³⁶ Hawa ha Suão nitsasoko tisapyrëna nikara. Hawa ha uta motsasoziuku tisapyrëna hÿ. Uta Deus zikpehata kytsa wata piwatawyky. Iwatu kytsa kape maha:

“O azo mybo zapeha. Deus zikwy tsiwatawyky” mykaranaha.

³⁷ Kazo zikpeha kino kasoho motsasoko. Ikiahatsa iharere batu ahawabyhy. Iwaze ihumo batu ahaspirikpo – niy.

³⁸ – Kazo mybarawy ezektsa bo zikpeha. Iharere bo tsikaeni zuba yhÿ tsimykaranaha. Kahumo batu ahaspirikpo tsihik iwatsahi iharere bo tsikaeni zuba yhÿ tsimykaranaha – niy.

³⁹ – Deus harere botu ziwatahanaha anaty hi tsipinymyrykynaha. Ana humo ja Deus tuk mywahi tsinapykyryknaha ba zikaha. Deus kasoho motsasoko.

⁴⁰ Tsinahyrizikponahaze Deus tuk ahawahi tsimynapykyryknaha. Kahumo ahaspirikporëtsa. Iwa Deus papeu humo nitsasoko. Ikiahatsa kino kahumo batu ahaspirikpo iwatsahi tsinahyrizikponahaze Deus tuk ba ahawahi tsipahasapynaha. Ikiahatsa kaharere bo batu yhÿ tsimaha.

⁴¹ Kytsa kasoho zuba motsasokonaha. Kasoho motsasokonaha zeka. “O atakta tsimysapyrëta my” maha. Mybarapetu sisopyk. Asahi kahumo tsikaeni zuba siakparawy “O atakta tsimysapyrëta maha” zeka mybarapetu mykaranaha.

⁴² Ikiahatsa Deus humo batu ahapokzitsi ana humo hi kahyrinymyrëta – niy.

⁴³ – Uta aparakbahatsa bo kazo harere humo my. Zikpeha iharere bo hyÿ ikykara. Ikiahatsa kahumo batu ahaspirikpo. Usta mozumu zeka ipehabyitatu taharere humo zuba mozumu, ikiahatsa iharere bo yhÿ tsimykaranaha.

⁴⁴ Deusta atababata zuba my. Batu ustaka. Ikiahatsa Deus ahape my: “O ahamysapyrëtsa tsimaha” anahi batu ahatsihik. Kytsa ahasoho motsasokonahaze “O ahamysapyrëtsa.” Anahi zuba ahakparawy. Iwatsahi kaharere bo batu yhÿ tsimykaranaha kahumo batu ahaspirikpo – niy.

⁴⁵ – Utakta kazo bo myze ikiahatsa soho batu tyso. “O batu simysapy maha” my. Ikiahatsa Moises nihyrikosokdata harere humo tsimyzurukunaha iwaze “O katsa wasani tsinakaranaha” tsimaha. Batu ba.

⁴⁶ Moises nihyrikosokdata kasoho ziwatahaka. Iwaha hi ikiahatsa iharere bo hyỹ tsinakaranaha zeka kaharere bo niwatihi hyỹ tsimynakaranaha.

⁴⁷ Iharere ziwatahaka naha bo yhỹ ahabyi zeka kaharere bo kino niwatihi ba hỹ tsimaha – niy.

Iwa Sesus Sudeutsa taparaktsa bo nitsasoko.

6

Sesus sizubarẽtsa nisidisahawky.

¹ Kyze Sesus pihik amakta taba zitsikza. Pihikzotsabyri Karireja inarokota niy. Usa inaro Tiberias niy.

² Kytsa sizubarẽtsa iapik niukurunaha. – O Sesus simyitsapyrẽtsa nisizororowyky. Ata bo hi iktsa tsimaha – nikaranaha. Iwatsahi iapik niukurunaha.

³ Iwaze Sesus hara bo nido. Zinymyrykynahatsa tuk nidyhydyhykynaha.

⁴ Paskoa zumukunahatsa hi Sudeutsa myikaha niy. Paskoa inarokoha myikaha bo pororo ziknakaranaha. Hawa Deus taparaktsa nisitsumuẽhĩĩ anahumo mytsaty ziknakaranaha.

⁵ Iwaze Sesus aparakbaha inazuzuknahaze sibo iktsa nikara. Ęryktsa tu izumukunaha niy. Iwaze Sesus Piripi pe niy:

– Haneziky ty sa mydisahawy sizubarẽtsa bo nataskyryk. Haneziky ty sa atsikara nataskyryk – niy.

⁶ Sesus ta zuba mytsaty nikara.

– Utakta mysidisahawy. Hawa Piripi mytsaty mykara ana humo hi pinymyryky. Tozeka ja kahumo tspirikporẽta nikara iwatahi Piripi pe iky. “Haneziky ty sa mydisahawy nataskyryk” – niy.

⁷ Iwaze Piripi Sesus pe niy:

– Batu kahyrinymyry. Myokyrysaro byizeka ihuak bara ty ba zioknaha. Pibytuhukutu mytyktseheze tarabaja my zeka batu atsikara ba zioknaha. Tarabajaziu mykara zeka ba zikpyk atsikara tsikaeni zuba aparakbaha bo nyny my – niy.

⁸ Iwaze Ādere zinymyrykyta Simaõ Peduru tsy tihi niy:

⁹ – O ta zito jabasta mybo izumu. Atahi mytsyhyry wa zuba atsikara, piknutsa petoktsa zuba aha niy. Myzubarẽtsa mydisahawy panytu – niy.

¹⁰ Sesus ispe niy:

– Ikiahatsa kytsa pe tsimaha “Tyk bo dyhy dyhy tahaktsa tsimaha” – niy. Nabo towahaditsa tisapyrẽna. Kytsa sizubarẽtsa tadyhydyhynaha, Sĩko miutsa kytsa nidyhydyhykynaha. Wytykyryk sihyrytsa ahatsa niwatihi nidyhydyhykynaha.

¹¹ Iwaze Sesus atsikara ty okok niyze Deus pe niy:

– Ikiã humo ka mykurẽtsa – niy. Iwaze atsikara ty zinymyrykynahatsa bo nyny niy. Nyny nikaraze tsizubarẽna niyzikzik. Ibiakyrybarawa niukuru. Kytsa sizubarẽtsa bo nyny nynyzo nikaranaha. Piknutsa kino niwatihi kytsa bo nyny nikaraze sibiakyhybyitsa wa niukurunaha. Nyny nikaraze tsizubarẽtsa niyzikiknaha. Iwaze nyny nynyzo niy kytsa sizubarẽtsa bo niy. Kyze kytsa tihi:

– O mysorokrẽtsa tsikahasorokbyrynaha – niaha.

¹² Tahadisahanahaze Sesus tuk zinymyrykynahatsa pe niy:

– Itsatsakyha ty jerehe peryk bo tsipupunahaktsa! Tsipupunaha zeka wasani my – niy.

¹³ Iwaze itsatsakyhy ty arehe ty peryk bo zipupukunaha. Dose mytsyhyry tsawa peryktsa mysipyk naha wa Sesus atsikara ziubara piknutsa tsizubarẽtsa nisiubara aha.

¹⁴ Iwaze aparakbaha izikwy bo iktsa niahaze asa zuba nipamykysokonaha:

– Aty skaraba Sesus. Atahi kok tubabatu tsisperykynaha. Atahi Deus sohokotsa babata – nikaranaha.

¹⁵ Iwatsahi Sesus zioqty tsihikiknaha. Ipe maha:

– Ikia mypehatsa tsimozik – maha. Sesus hawa mytsaty nikaranaha tsihyrinymyrëta. Iwatahi atazuba niparak. Hara bo nido niy.

Sesus pihik tsiksukpe buruk niukuru.

¹⁶ Kyze zunubaze zinymyrykynahatsa pihikzotsabyri bo nisiknaha.

¹⁷ Niahatsahi tsaraha sihezõni taeze kokokorohyk niaha. Kaparanaũ bo pihikzotsabyri ziksikzakanahaze, miwa buruk tu asa zuba niukurunaha. Sesus batu sibo zuk niy.

¹⁸ Ziturikinahatsa tu atsoko zopoktsa inabybyknaha. Pihik zopoktsa humo atsoko ihiridawy waha.

¹⁹ Turi turi turi nikaranaha. Nokponi turi nikaranaha. Sïko kirometero ziturikinahaze. Kyze atsoko Sesus bo iktsa niaha. Atahi sibo izumuku. Pihik tsiksukpe buruk inaukuru. Harazuk ahabyita inaukuru. Sibo izumubahanikize sipybyrëtsa nikaranaha.

– Aty skaraba – nikaranaha.

²⁰ Kyze Sesus ispe niy:

– Ahapyby byihuktsa – niy. Uta hiba Sesus ispe niy.

²¹ Iwatsahi Sesus pokso batu sipyby. Ipe niaha:

– Pany! Tsaraha bokta! – niaha. Atsoko tsaraha amykta taba niukurunaha bybyby niaha.

Kytsa sizubarëtsa Sesus ziberikinaha.

²² Iwaze kytsa sizubarëtsa asa kino pihik amykta taba nitarenaha Sesus ziberikinaha. Asa zuba nizapykykynaha Sesus sa hana bo. Jatuka tsaraha estuba zuba hÿ niaha. Zinymyrykynahatsa tsaraha eze kokokorohyk niaha. Asa zuba koikny niukurunaha. Sesus situk batu ityny niy.

²³ Nipamykysokonahaze ustsã tsarahatsa bybyby niaha. Tsarahatsa Tiberias iknyktsa. Haneze Sesus kytsa nisidisahawyky naha bazebabatu tsarahatsa bybyby niaha.

²⁴ Iwaze Sesus bo batu zuk ituk zinymyrykynahatsa kino batu niaha tsarahatsa tsihitsã kytsa pe niy:

– Sesus sa hana bo zinymyrykynahatsa kino hana bo sa – niy.

– Pihikzotsabyri botu zitsikzanaha – niaha.

– Yhÿ. Tupakta! Katsã kino siapik tatsikza – niaha. Tsarahatsã eze kokokorohyk niaha. Turi turi turi. Kaparanaũ bo bybyby niaha. Sesus ziberikinaha iwatsahi pihikzotsabyri zitsikzanaha.

Sesus atsikara hyrity wa.

²⁵ Myzubaha iziberikinaha. Iwaze zihobyknahaze ipe niaha:

– O mypehatsã hawa eze sa tsikzumu. Katsã tsikaberikiknaha hÿ – nikaranaha.

²⁶ – Hawa motsasoko wasani my – Sesus niy.

– Ikiahatsã atsikara tsioknahatsawy tsimozikberikinaha. Ana iwatawy naha humo batu ahahyrinymyry – niy.

²⁷ – Ahadisahawy bo zuba mytsaty tsinakaranaha hÿ. Ahasorokrëtsã tsikaha. Usa mydisahawy humo meky watu tsimoziknaha. Ana ty kino hauk tsimaha zekã Deus tyryktsã tsimoziknaha. Tsimyhyrikosokdanaha zekã Deus myzahahyrykpowyzo iwaze ituk tsimynapykyryknaha. Ahawahi

Deus tuk tsinapykyryknaha. Utakta inasikta ahawata ikyzik Deus hi kazo. Atahi:

“Kaharere bo hyỹ tsimykarana. Iwatahi tadisahawy kino kytsa bo nyny tsimykarana” niy. Ikiahatsa kino niwatihi Deus harere bo hyỹ tahaktsa – Sesus niy.

²⁸ Iwaze Sudeutsa ipe niaha:

– Hawa skaraba katsa Deus harere bo hyỹ tsimykarana hawa skaraba Deus mozihikik – niaha.

²⁹⁻³¹ Deus hi:

– Atahi ahabo ipehata humo tyspirikponahaktsa! – niy. – Utakta Deus zikpehata. Kahumo tsimyspirikponaha zeka Deus harere bo hyỹ tsimaha – Sesus niy. Kytsa Sesus pe niaha:

– Taparaktsa myzotsa jerukbara eze atsikara waha ty tahadisahakanaha. Deus harere papeu humo ziwatahaka “Moises bo nipamykysokoze atsikara waha kytsa bo inatsuku. Atsikara waha bijoikpe ikny kytsa nisidisahawyknaha” – iwa Moises Deus zikwy sibo ziwatawyky.

– Iki ja. Azikwy ty sa mybo tsiwatawy tsimykarana. Iwaze zuba ahumo myspirikporẽtsa tsimoziknaha – tsimykarana.

³² – Hawa utakta motsaso wasani my. Moises atsikara ty zuba kytsa bo nyny nikara. Ana atsikara morapa hwiwy zuba niy. Kazo hi atsikara babata kytsa bo nyny mykara. Ana atsikara baba humo kytsa meky watu moziknaha. Deus tyryktsa moziknaha atsikara baba humo – niy.

³³ – Deus atsikara ty mybo nyny my bijoikpe iknyky. Utakta atsikara waha, uta hi bijoikpe iknykta. Uta kino kytsa kahumo meky watu moziknaha niy. Mynahyryzikponaha kahumo tahawahi Deus tuk mynapykyryknaha – niy.

³⁴ Kytsa ipe niaha:

– Anaty mybo nyny tykta! Ana hi mydisahawy mozik. Mydisahawy ty mybo nyny tynakara – nikarana.

³⁵ Sesus niy:

– Uta hiba atsikara baba niy. Deus myzubaha bo nyny mykara. Ikiahatsa kaharere bo hyỹ tsimykarana. Kahumo tsimyspirikponaha zeka ahakurẽtsa tsimoziknaha iarapa byitawata tsakurẽta. Ikiahatsa kahumo tsimyspirikponaha zeka aharapabyitsa watsa tsimoziknaha. Ahakurẽtsa tsimykarana.

³⁶ Ikiahatsa kaharere bo batu yhyỹ tsimaha. Utakta kazikwy iwatawyky anabo hi tsinyaha. Iwa humo kabo batu yhyỹ zikaha.

³⁷ Aparakbaha kahumo mysipirikpoko ana hi kazo mozihikik. Iwatsahi kahumo sispirikporẽtsa mykarana. Aty skaraba kahumo tispirikporẽta atahi batu tyso “O iki kahumo batu spirikpo, iwahi ba ziktsaso” – niy.

³⁸ – Utakta bijoikpe ikny iknasikze Deus harere bo zuba hyỹ mynakara. Hawa sa mozihikik naha humo batu yhyỹ iki iwa humo batu zuk. Atahi zikpeha iwatahi iharere bo zuba hyỹ mykara.

³⁹ Hawa sa Deus mozihikik. Kytsa asahi kahumo mospirikponaha mysipokzitsiki. Iwatsahi kahumo sispirikporẽtsa ba ziksiere. Mybarawy mopykze kahumo sispirikporẽtsa mynahyryzikponahaze Deus tuk tahawahi mynapykyknaha.

⁴⁰ Yhyỹ kazo harere bo mykara. Aty skaraba katse harere bo hyỹ mykarana asahi ituk tahawahi mynapykyryknaha. Mybarawy mopykze kahumo ituk mynahyryzikponaha. Ana kino Deus harere bo my hyỹ – Sesus niy.

⁴¹ Kyze Sudeutsa asa zuba isoho zisapybyrikinaha. Nitsasokoze:

– Uta hiba atsikara waha, uta hiba bijoikpe iknykta nikara – ana humo hi zisapybyrikinaha.

⁴² – Iwatsahi nikaranaha hawa skaraba. O atahi sa Sesus zuba. Sose tse sa nikaranaha. Ije niwatihi tsinynaha. Hawaha ta sa “Utakta bijoikpe iknykta” nikara. Atahi mybarapetu nikara – nikaranaha. Iwa asa zuba zisapybyrikinaha.

⁴³ Iwaze Sesus ispe niy:

– Awatutahaktsa ahamysapybyrihuktsa! – niy.

⁴⁴ Kazo zikwy humo zuba kytsa kahumo sispirikporëtsa. Ata kino zikpeha iwaze kytsa kahumo mysispirikpoko. Mybarawy mopykze asahi mynasyhyrizikpo iwa Deus tuk tahawahi mynapykyryknaha.

⁴⁵ Tubabatu Deus sohokotsa iharere papeu humo ziwatahakanaha:

– Aparakbaha Deus mysihyrinymyryky – niy. Iharere hi kasoho my. Kytsa kahumo mospirikponaha zeka ana kino Deus kazo ihyrinymyrywy. Ana humo hi mysihyrinymyryky.

⁴⁶ Batu aty tohi Deus ityny my. Uta zuba iny atahi zikpeha.

⁴⁷ Motsasoko wasani my. Aty skaraba kahumo tispirikporëta atahi mynahyryzikpoze Deus tuk tawahi mynapykyryk niy.

⁴⁸ Sesus tihi:

– Utakta atsikara baba my. Kahumo kytsa meky watu mozurukunaha. Deus tyryktsa moziknaha. Kahumo simysapyrëtsa moziknaha.

⁴⁹ Taparaktsa ahazotsa niakbakanahatsa jeruk bara eze atsikara waha ziokoknaha. Iwatsa tu niakbakanaha.

⁵⁰ Aba atsikara baba soho ahabo motsasoko. Ana ty tsimymydisahanaha zeka ba zikumuzanaha ana hi bijoikpe iknykyry. Deus tuk mywahi tsimynapykyryknaha – niy.

⁵¹ Utakta hi bijoikpe iknykta my. Mybarawy ezektsa bo iknasik. Myzubaha mekywatsatu ziyziknaha iky. Kytsa kahumo sispirikporëtsa mohyrikosokdanahaze Deus tuk tahawahi mynapykyryknaha. Atsikara ty sibo nyny my ana hi katsani. Katsani ty mybarawy ezektsa bo nyny my. Iwatsahi mynahyryzikponaha asahi Deus tuk tahawahi mynapykyryknaha.

⁵² Iwaze Sudeutsa asa zuba nipamykysokonaha.

– Hawa skaraba Sesus tatsani ty mybo nyny my. Hawa skaraba inury taboro – nikaranaha.

⁵³ Sesus ispe niy:

– Hawa motsasoko wasani mykara. Utakta Deus zikpehata ahawata ikyzik. Ikiahatsa katsani ty hauk ahabyizeka batu Deus tyryktsa zikyzyknaha. Batu meky watu zikyzyknaha. Ikiahatsa kaspu ty tsõ ahahabyizeka batu Deus tyryktsa zikyzyknaha. Batu meky watu zikyzyknaha.

⁵⁴ Aty katsani pihauk zeka Deus tyryk mozik. Mekywatu mozuruku. Aty kaspu piku zeka Deus tyryk mozik. Mekywatu mozuruku. Tsimysapyrëta mozik. Mybarawy mopykze mynahyryzikpo.

⁵⁵ Iwatahi katsani mydisahawy baba my. Kaspu mypowy baba my.

⁵⁶ Aty katsani ty tadisaha zeka atahi katuk mynapykyryk. Aty kaspu piku zeka atahi katuk mynapykyryk. Kahyrikoso zikwy situk mozuruku. Uta kino situk niwatihi mozuruku – niy.

⁵⁷ – Kazo humo myspitu tsinakaranaha. Uta zikpehata kazo humo kaspitu. Kazo mozikyryzikpozo my. Atsatu kytsa asahi katsani ty tahadisahanahaze nasihyryzikpo – Sesus niy.

⁵⁸ – Utahi atsikara baba bijoikpe iknykta inasik niy. Tubabatu taparaktsa niakbakanahatsa atsikara waha ty ziknatahadisahanaha. Atsikara waha

bijoikpe ikny inatsukunaha. Aparakbaha atsikara tisapyrëna ty tahadis-ahakanaha asahi niakbabaiknaha. Utakta atsikara wata. Uta bijoikpe iknykta iknasik. Kytsa katsani ty tahadisahakanaha zeka Deus tuk tahawahi mynapykyryknaha – niy.

⁵⁹ Iwa Sesus Sudeutsa zinymyrykynahatsa wahoro eze nisihyrinymyryky. Kaparanaũ eze nikara.

Hawa katsa Deus tuk mywahi tsimynapykyknaha.

⁶⁰ Kyze kytsa Sesus tuktsa iharere ziwabykynahaze betsakze nikaranaha. Asa tihi:

– O iharere batu mykparawy. Iharere tsihokdaharëna hỹ. Batu aty tohi yhỹ my – nikaranaha.

⁶¹ Upyk harere ahabyitsa tu iwatatu Sesus tsihyrinymyrëta nikara. Imyspirikpowy soho humo taokanikinaha. Iwaze ispe niy:

– Kaharere tsihokdaharëna niy. Kaharere batu ahakparawy iwatsahi kaharere bo batu ma zikaha – niy.

⁶² – Utakta iknasikta ahawata ikyzik. Kahumo batu ahaspirikpo iwatahi kaharere tsihokdarëna. Utakta bijoikpe bo kazo bo piksizoze anabo hi iktsa tsimaha ja kaharere bo yhỹ tsimaha.

⁶³ Deus hyrikoso humo aparakbaha meky watu moziknaha. Aparakbaha ihumo Deus tuk siwahi mynapykyryknaha. Kytsa zuba zeka batu Deus tuk mynapykyknaha. Batu zikaha. Iwa zeka kaharere bo hyỹ tsimaha zeka Deus hyrikoso ahatuk my. Iwaze ikiahatsa Deus tuk ahawahi tsimynapykyknaha.

⁶⁴ Wastuhu kaharere bo ba hỹ zikaha ana humo hi kahyrinymyrëta – niy. Iharere iakparawy byitsa soho humo botu zinymyry. Estuba sisukyrytsitsa bo zioқтыhyrykta humo kino tsihyrinymyrëta. Zinymyrykynahatsa nisi-naropykykze tsihyrinymyrëta.

⁶⁵ Iwatahi ahape iky.

– Tapara kazo yhỹ my iwaze kytsa kahumo sispirikporëtsa. Asa zuba kazo harere bo hyỹ mahaze asahi kahumo sispirikporëtsa moziknaha – niy.

⁶⁶ Iwa Sesus tuktsa sizubarëtsa iharere bo batu yhỹ niaha. Batu iapik pãozo.

⁶⁷ Kyze Sesus tuk zinymyrykynahatsa dose tsa pe niy:

– Ikiahatsa ja. Ikiahatsa kino sa tsipikarikiknaha – niy.

⁶⁸ Iwaze Simaõ Peduru ipe niy:

– Mypehatsa aty hapik sa tsimaha. Iki humo mekywa tu tsimoziknaha. Hawa tsimhyrikosokdanahaze Deus tuk mywahi tsimynapykyknaha anahi ikia zuba tsikmyhyrinymyryky.

⁶⁹ Iwatsahi aharere humo myspirikporëtsa. Iki zuba Deus zahapehata tsimaha. Tsamysapyrëta – niy. Iwa Simaõ Peduru niy.

⁷⁰ Iwaze Sesus ispe niy:

– Utakta dose mytsyhyrytsa hawa zinymyrykynahatsa iksiwatawyhik. Estuba ahatukta Satanas mozik – niy.

⁷¹ Sesus Sudas soho nitsasoko. Sudas Simaõ Iskariotses tse niy. Atahi Sesus sukyrytsitsa bo piokтыhyryk niy.

7

Sesus tatukytsa tuk.

¹ Kyze Sesus Karireja bo niukuru. Sudeja bo ka batu pão. Sudeutsa taparaktsa zibeze tsihikiknaha. Iwatahi Sudeja bo batu pão. Karireja eze zuba niapykyryk.

² Tapara Sudeutsa myikaha bo pororo ziknakaranaha. Taparaktsa jerukbara eze tahaparik zizikinaha naha bo hi mytsaty ziknakaranaha. Iwaze amyikaha bytykara isiparik bo niapykyryknaha.

³ Iwaze Sesus tukytsa ipe niaha:

– Sudeja bo ikiakta tsiksikta. Anabo tsimyzeka hawa tsimykara atuktsa iktsa maha. Azikwy bo iktsa maha.

⁴ Tsipany tsihikik zeka ba okpitsĩĩ ziky. Atahi izikwy ty sizubarẽtsa bo mysiwatawyky. Iwatahi Sudeja boktsa – niaha.

⁵ Itukytsa kino ihumo sispirikpobyitsa nikaranaha iwa ipe nikaranaha.

⁶ Sesus ispe niy:

– Uta aba amyikaha bo ba zikumu. Ikiahatsakta myikaha bo zeka wasani my tsimykaranaha.

⁷ Aparakbaha asahi Deus harere bo batu yhỹ zikaha kahumo tahakyrikinaha. Ikiahatsa humo ka batu siakyri. Uta kahumo zuba sakyriřẽtsa nikaranaha. Utakta ispe my: “Ikiahatsa ahamysapybyitsa tsikykaranaha” my iwatsahi kaharere humo tahakyrikinaha.

⁸ Ikiahatsakta simyikaha boktsa! Utakta ba zikparak. Abaka ba zikumu. Bykyze zuba my – niy. Iwa Sesus tatukytsa pe niy.

⁹ Iwaze itukytsa simyikaha bo niukurunaha. Sesus Karireja eze nitare.

Sesus simyikaha bo.

¹⁰ Kyze Sesus niwatihi simyikaha bo niy. Kytsa bo batu tyso. Ity sohabyita tu simyikaha bo niukuru. Kytsa batu sihyrinomyry. Sipapatu niparak.

¹¹⁻¹³ Sudeutsa taparaktsa simyikaha bo niukurunaha. Asahi myikaha eze Sesus ziberikinaha. Asahi:

– Sesus sa hana bo – nikaranaha. Aparakbaha isoho nitsasokonahaze Sudeutsa taparaktsa batu siwaby tsihik. Iwatsahi akbyibatu zuba nipamykysokonaha. Asakta:

– O tahi tsimysapyrẽta – nikaranaha. Utsa kytsa:

– O batu. Batu imysapy. Atahi kytsa bo nispiphikbataka – mybarapetu nikaranaha. Iwa Sesus soho nitsasokonaha.

¹⁴ Iwaze Sesus zumu. Deus wahoro zubata bo nitsuk. Anaeze iziakbata kytsa nisihyrinomyryky. Simyikaha asiba nepykze nisihyrinomyryky.

¹⁵ Taparaktsa Sudeutsa iharere batu siakparawy. Asa kino:

– Hawa hãta skaraba Deus papeu humo zinomyryba. Nimyhyrinomyryky-nahatsitsa batu tyhyrinomyry iwata tu tsihyrinomyrẽta. Batu wasani my – nikaranaha.

¹⁶ Iwaze Sesus ispe niy:

– Amy ty pahahyrinomyryky kaharere bara zikpehata harere zuba pinomyryky. Iharere zuba sizubarẽtsa mysihyrinomyryky – Sesus niy.

¹⁷ Ikiahatsa hi:

– O amy ty nisihyrinomyryky iharere zuba ja – tsimykaranaha. Utakta ahape my:

– Aty sa Deus harere piwaby tsihikik anahi kaharere baba hi pihyrinomyryky. Atahi kaharere Deus kabo zinyny niy ana humo hi tsihyrinomyrẽta.

¹⁸ Wastuhu kytsa tahaharere ty zuba nisihyrinomyrykynaha. Utsa kytsa batu. Deus harere humo zuba nisihyrinomyrykynaha. Asahi tahaharere ty zuba nisihyrinomyrykynaha. – Ziwabynahatsa sisoho:

– O siharere wasani my, myhyrizikwanitsa moziknaha – nikaranaha. Iwa kytsa sisoho motsasokonahaze anahi mozihikiknaha. Kytsa Deus harere ty zuba nisihyrinomyrykynaha. Aparakbaha hi:

– O Deus harere tisapyrēna – nikaranaha. Ana soho humo hi sakurētsa nikaranaha. Anahi Deus harere soho piwaby tsihikiknaha. Asa zuba wasani mykaranaha. Batu mybarapetu mykaranaha.

¹⁹ – Tubabatu Moises nihyrikosokdata ahadiritsa bo Deus harere ty nisi-hyrinymyryky. Batu aty tohi iharere bo hyŷ ziknakara. Amy humo sa ikiahatsa tsipikbeze tsihikiknaha – niy. Aparakbaha Deus wahoro zubata eze tu Sesus harere ziwabykynaha.

²⁰ – O ikia paikpa mytsaty tsimy kara. Hyrikoso isapybara atuk my. Aty sa pabezetsihikik – nikaranaha. Iwa kytsa sisukmotsa nikaranaha. Serusarēhe ezektsa sihyrinymyrētsa. Sudeutsa taparaktsa Sesus pibeze tsihikiknaha anahi sihyrinymyrētsa.

²¹ – Sudeutsa byrywy eze kazikwy ty pahawatawyky. Kazikwy humo nipybybaiknaha. Kazikwy bo iktsa tsimykarannahaze, “O batu amysapy my. Atahi byrywy eze tarabaja niy” tsimykarannaha – Sesus niy.

²² Tubabatu Moises Deus harere ziwatahaka – Ahahyrytsa makuskyrytsa tysipiakzyzyknaha. Siwatahawy mozik atahi Deus tyryk niyzik ziwatawy. Ikiahatsa ahabykyhytsa tabyrywy eze tsinasipiakzyzykyknaha.

²³ Tabyrywy ahaskyrywytsa tysipiakzyzykyknaha Moises harere humo. Iharere bo yhyŷ tsimyzihikiknaha iwatsahi tysipiakzyzykyknaha.

Uta maku izororo baba mybyrywy eze ana humo hi ja tsikahakyrikinaha. Amo humo ja tahakyrikinaha – niy. – O atahi mybyrywy eze tarabaja my. Maku zizororowyze tarabaja nikara. Batu amysapy tsimy – tsikykarannaha.

²⁴ Sizubarētsa tsimytsasokonaha:

– Atahi batu wasani my mybarapetu tsimykarannaha niy. Hawa tohi mykara batu tyso “O atahi batu imysapy my”. Awatutaha – Sesus niy.

Sesus hi Deus zipehata.

²⁵ Serusarēhe eze wastuhu kytsa nipamykysokonaha:

– Atahi sa pibeze tsihikiknaha – nikaranaha.

²⁶ – Atahi kytsa okze motsasoko. Batu aty tohi ity sohometu. Tozeka ja taparaktsa Sesus humo sispirikporētsa. Tozeka ja Sesus Deus zipehata ana humo hi yhyŷ mykaranaha – nikaranaha.

²⁷ Iwa wastuhu Serusarēhe ezektsa nikaranaha. – Deus zipehata mozu-muze batu aty tohi hana iknykta ja zikaha. Katsa zuba ihumo myhyrinymyrētsa iwatahi batu Deus zipehata my – nikaranaha.

²⁸ Iwaze Sesus sizubarētsa Deus wahoro zubata isturupeze nisihyrinymyryky. Opykani haty nisihyrinymyryky:

– Ikiahatsa batu ahanyhyŷ. Ikiahatsa hana ikny ta ja izumu ba tsimykarannaha. Deus kazo zikpehatawy ikzumu hŷ. Ba ahabyizeka ba zikzumu. Atahi wasani mykara. Ikiahatsa batu ahahyrinyhy.

²⁹ Uta zuba iny. Ibaze iknapykyry tatu my. Atahi mybarawy bo zikpehatawy – Sesus niy.

³⁰ Iwaze kytsa nizokbatsi tsihikiknaha. Sisukyrytsitsa bo itsipa humo tsioktyhyknaha nikaranaha, batu nabaze ity paik ahabyitsa. Deus – Batu yhyŷ. Katse Sesus ba zioktynaha – niy. Iwatsahi itsipa humo batu ity oktyhyryk.

³¹ Kytsa sizubarētsa ziwabynahaze iharere bo yhyŷ nikaranaha ihumo sispirikporētsa. Ziwabynahatsa hi:

– Deus zipehata zikwy tsipinynaha. Iwatsahi Deus zipehata my mytsaty tsimykarannaha – niaha.

Deus wahoro zubata perytsitsa Sesus pioktykyzykynaha.

³² Iwaze Pariseutsa parakbaha Sesus nizekerykynaha. Kytsa sizubarëtsa Sesus soho nitsasokonahaze iwatsahi ziockyhyryk tsihikiknaha. Pariseutsa parakbaha, Deus wahoro zubata eze ziknapamykysokonahatsa taparaktsa iwatsa asahi Deus wahoro perytsitsa nisipehakanaha. Sesus itsipa humo tyzioktyhyknaha nisipehakanaha.

³³ Iwaze Sesus niy myzubaha bo:

– Utakta ahabaze jokbohatu mopykyrykspyk. Aiba zuba kapehatsa bo piksizo.

³⁴ Iwaze tsipikberinaha ba zik zikahanaha. Kazo bo piksizoze ba kapiktu zikaha – niy.

³⁵ Sudeutsa asa zuba nipamykysokonaha:

– Hana bo skaraba mykara katsa ba zik zikahanaha. Tozeka ja ustsya kytsa bo my. Bipyritsa bo ja mykara. Sudeutsa nanabyitaba mynapykyryk Kerekatsitsa baze mynapykyryk. Tozeka ja Kereka ezektsa mysihyrinomyryky – nikaranaha.

³⁶ Tapara mype niy:

– Tsiplikberikinaha bazik zikaha naha. Piksizoze ba kapiktu zikaha niy. Iharere myhumo tsihokdaharëna – nikaranaha.

Deus hyrikoso myhumo pupuputsa hyrity wa.

³⁷ Kyze Sesus sizubarëtsa bo nipamykysokozo. Opykani haty nipamykysoko. Simyikaha nepysohokoze nisihyrinomyrykyzo. Nawa zuruze ispe niy:

– Aty tsiarapukrëta zeka pihik piku. Aty meky watu mozik tsihikik zeka kabo tyzumukta. Iwaze tsipikuze hi kahumo tispirikporëta tsimysapyrëta mozik – Sesus niy.

³⁸ – Pihik waha ituk mynapykyryk. Pupuputsa wa mykara. Asahi kaharere bo hyÿ mykaranaha kahumo sispirikporëtsa. Hawa kytsa pihik pikuikiknaha utakta situk mynapykyryk. Iwatsahi mekywa tu moziknaha. Simysapyrëtsa. Iwa Deus harere papeu humo botu iwatahaha – Sesus niy.

³⁹ Sesus iwaze nitsasoko Deus hyrikoso soho ziwatawyky. Deus hyrikoso Sesus tuktsa tuk mynapykyryk. Deus sibo myzipeha tsihikik. Tapara Deus hyrikoso myzipeha iwaze Sesus tuktsa isoho motsasoko. Mybarawy bo mynasik. Tapara Sesus Deus bo piksizoze iwaze hi Deus hyrikoso mybarawy bo atsoko mynasik. Tapara Sesus Deus bozo my. Bykyze Deus hyrikoso mybarawy bo myzipeha niy.

Kytsa sizubarëtsa metutu nikaranaha.

⁴⁰ Kytsa sizubarëtsa asa zuba Sesus soho humo nipamykysokonaha. Mekt-satu nitsasokonaha. Wastuhu kytsa nikaranaha:

– Atakta Deus sohokotsa babata, atahi taperyky hÿ – nikaranaha.

⁴¹ Ustsya nikaranaha:

– Atakta Deus zipehata Kiristu my – nikaranaha. Ustsya:

– O batu, Deus zipehata Karireja ezekta ja nikaranaha.

⁴² Deus harere papeu humo Sesus soho botu iwatahaha nikaranaha. Zi-watahaka:

“Deus zipehata Dawi tsekoka my Berëhe eze mopuruk. Sudeja eze my.” Iwa Deus harere niy – nikaranaha.

⁴³ Iwaze kytsa isoho humo niharapehakanaha. Meky watu siharere nikaranaha.

⁴⁴ Iwaze Deus wahoro perytsitsa Sesus ziocky tsihikiknaha. Asahi batu itsipa humo ity okty.

Sudeutsa taparaktsa Sesus humo batu sispirikpo.

⁴⁵ Kyze Deus wahoro perytsitsa. Pariseutsa bo ziksizonaha. Zumukunahaze nisipehakanahatsitsa ispe niaha:

– Amo sa Sesus ty batu tyoktyhyryk – niaha.

⁴⁶ Deus wahoro perytsitsa hi:

– O batu aty tohi iharere wata my. Iharere tisapyrëna hÿ. Iwatsahi itsipa humo batu tyoktyhyryk – nikaranaha.

⁴⁷ Pariseutsa tihi:

– Ikiahatsa kino niwatihi. Iharere humo ja zahaspirikpoko – niaha.

⁴⁸ Sodusitsa aparakbaha taparaktsa ihumo batu sispirikpo. Batu estuba zikino ihumo batu ispirikpo. Pariseutsa niwatihi ihumo batu sispirikpo.

⁴⁹ Kytsa sizubarëtsa Moises harere humo batu sihyrinymyry. Asa zuba ihumo sispirikporëtsa. Deus ispe niy:

– Ikiahatsa batu ahamysapy tsimaha. Sinini ykarawy bo pahapeha my – Pariseutsa niaha.

⁵⁰ Maku Nikodemus ituktsa niapykyryk. Tapara atahi unata Sesus bo nikozone.

⁵¹ Atahi tatuktsa pe niy:

– Katsaktsa Sesus harere batu mywabyhy. Iharere ty waby ahahabyizeka ba ibete hÿ zikaha. Batu ziktsasonaha: “Atakta batu imysapy my. Iwatahi sinini ykarawy bo Deus pipeha” niy. Iwa tubabatu nihyrikosokdata Moises mydiritsa nisihyrynymyry – niy.

⁵²⁻⁵³ – O ikia niwatihi hazi nikaranaha. Ikia kino ja Karireja ezekta nikaranaha. Iwa tsimytsasokoze Deus papeu humo ihyrynymyrybyita wata – nikaranaha. Taparaktsa hi:

– Deus sohokotsa batu Karireja ikny ta my. Deus papeu humo tsinyziukukta tsimy. Iwatahi atakta Sesus batu Deus sohokotsa my – nikaranaha. Kyze tahawahoro bo ziksibanaha.

8

Wytyk sizubatsa oke.

¹ Sesus Oriwerejatsa hara bo niukuru.

² Miwa botu Deus wahoro zubata bozo niy. Kytsa sizubarëtsa Deus wahoro bo niaha. Sesus ziwabykynaha iwatsahi izumukunaha. Kytsa sizubarëtsa izumunahaze isitazahaeze nidyhyky. Iwaze nisihyrynymyryky.

³ Iwaze Deus harere watahatsitsa Pariseutsa niwatihi iwatsa Sesus bo zumunaha. Wytyk ibo ziokyhyryknaha. Atatsa ipyitsakatatsa tu sizubarëtsa ziknasihewabykyryk. Pariseutsa nizokparakanahaze sibo iktsa niaha. Iwatsahi wytyk ziokyhyryknaha. Kytsa sizubarëtsa tazahaeze atatsa Sesus bo ziokyhyryknaha. Niritohoko.

⁴ Iwaze Sesus pe niaha:

– O myhyrynymyrykytsa atatsa wytyk usta ibarikta byita tu zipyryrykyknahaze sibo iktsa tsikaha. Iwatsahi atatsa abo tsikziokyhyryknaha.

⁵ Tubabatu nihyrikosokdata Moises myzotsa bo nitsasoko. Papeu humo ziwatahaka. “Wytyk usta maku zikzipyryrykyk zeka atatsa ty ka bohitaha. Haraharetsa ty tsibezenaha” iwa Moises botu myzotsa nisihyrynymyry. Ikia ja, Hawa sa tsimy – nikaranaha.

⁶ Ana hi nitsasokonahaze – Tahaharere tsyhyryzehe nikaranaha iwatsahi nizapykykynaha – mytsaty ahabyitsa nikaranaha. Asa zuba ni-pamykysokonaha:

– O iharere meky watu my. Amy ty Moises botu ziwatahaka batu yhÿ my iwaze batu imysapy my – iwa mytsaty nikaranaha.

Iwaze Sesus okmymy hātatu wytyk bo tatsyhyry tyty tapauk baze ziwatahaka. Atatsa bo ka batu iktsa niy.

⁷ Hawa sa tsimy ipe nikaranaha. Kyze niziktsutsuhuku tatu kyik niy sibo iktsa niy. Ispe niy:

– Ikiahatsa baze aty imysapyrēta zeka atahi harahare tapara mopapyk – niy.

⁸ Iwaze wytyk bo okmymyzo niy tatsyhyry ty ziwatahakazo.

⁹ Kytsa Sesus harere ziwabynahaze sisikpybyrētsa nikaranaha. Iwatahi taparakta maku puke niy. Iwaze estuba estuba zuba zipokonaha. Ziharawyta iypykybyita puke niy. Sizubarētsa puke puke niaha. Iharere humo sisikpybyrētsa iwatsahi zipobaiknaha. Atatsa zuba Sesus tuk nitare, niriktohoko.

¹⁰ Sesus kyikzo atatsa bo iktsaziu niy. Ipe niy:

– O wytyk kytsa sa hana bo. Asahi ape “Ikia batu amysapy” nikaranaha. Asahi haraharetsa ty zabezekyzykynaha. Kytsa sa hana bo – niy.

¹¹ – O mypehatsa zipobaiknaha. Aba batu aty tohi kabo “Ikia batu amysapy” mykaranaha – niy. Sesus ipe niy:

– Uta kino niwatihi. Abo batu tyso “Ikia batu amysapy my” iwa abo batu tyso. Tsiksiktsa abaka awatu tynakara! – Sesus niy.

Sesus harere humo kytsa meky watu moziknaha.

¹² Kyze Sesus kytsa sizubarētsa, Deus wahoro zubata eze nisi-hyrinymyrykyzo. Ispe niy:

– Deus harere ty pahahyrinymyryky Deus harere bo hyỹ tsimykarana zeka wasani tsimoziknaha. Asahi kahumo mospirikponaha zeka imysapybara pimoewynaha Deus mysiokzo. Asa kino kahumo tisapyrēna mynakaranaha, meky watu moziknaha hỹ – nikara. Iwahatyhi ispe niy.

¹³ Kyze Pariseutsa tihi:

– O ikia asoho zuba tsimytsasoko. Asoho tsimytsasoko zeka batu amysapy tsipimyiki – mybarapetu nikaranaha.

¹⁴ Sesus ispe niy:

– Utakta wasani mykara. Kasoho motsasoko zeka wasani my. Ikiahatsa hana ikny tsikzumunaha humo batu ahahyrinymyry. Hana bo tsimykurunaha humo batu ahahyrinymyry. Utakta kahyrinymyrēta. Hana ikny ikzumuku naha humo kahyrinymyrēta. Hana bo moparak naha humo kahyrinymyrēta. Iwatahi wasani mykara – niy.

¹⁵ – Kytsa harere ty tsiwabyziu zeka ikiahatsa tihi: “O tahi batu wasani” tsimykarana. Iharere tsihokdahařena humo iwa tsimykarana. Utakta batu ka moso. Iwata humo hi batu tyso kytsa harere zuba.

¹⁶ Motsaso zeka ikahatsa batu ahamysapy kaharere ahasoho ty wasani mykara. Atakta zikpeha atahi astsatu motsasoko. Uta zuba byita tu mykara. Kazo zikpeha katsakta harapetok tsimykarana

¹⁷ Moises taparaka ziwatahakaze. Kytsa petoktsa atsatu motsasonahaze siharere piwabynahatsa siharere soho: “O wasani mykaranaha” maha.

¹⁸ Uta hi kasoho motsasoko. Kazo kino niwatihi. Atahi zikpeha kasoho motsasoko. Kasoho tsimytsasokonaha. Iwa atsatu petoktsa kasoho motsasokonaha – niy.

¹⁹ Kyze ipe niaha:

– Haneze skaraba azo – niaha.

– Uta batu ahanyhy tsimykarana. Kazo kino niwatihi batu ahanyhỹ. Tsipikynaha zeka kazo kino niwatihi tsipinynaha. Iwaze katsa tsimymynynaha – niy.

²⁰ Anaharere humo kytsa sizubarëtsa bo nitsasoko. Sesus Deus wahoro zuba eze kytsa sizubarëtsa okyrysaro suk baze nisihrinymyryky. Sisukyrytsita itsipa humo batu ity oktyhyryk. Deus sibo batu yhỹ niy iwatsahi Sesus tsipa humo batu ity oktyhyryk.

Aty skaraba Sesus.

²¹ Sesus ispe niyzo:

– Uta piksi. Ikiahatsa tsipikberinaha zeka ba zikzikahanaha. Uta pahatsumuëhĩ tsihikik. Ba zikzikahanaha. Tsimyhyrikosokdanahaze Deus ahasapybyitsa tsimykaranaha ba ziksiokzohik. Ikiahatsa ba kapik pão tsimaha.

²² Sudeutsa asa zuba nipamykysokonaha:

– Ata mybo nitsasoko “hana bo sa piksi batu iapik pão zikaha” nikara. Tozeka ja atatu tabeze. Tabeze zeka katsa batu iapik pão zikaha – nikaranaha. Iwa asazubatsa tu nikaranaha.

²³ Sesus nikarazo:

– Ikiahatsakta mybarawy ezektsa. Utakta Deus iknykta ikzumu. Hawa kytsa mytsaty mykaranaha ikiahatsa niwatihi atsatu mytsaty tsimykaranaha. Utakta batu. Kazo mytsaty mykara naha ty zuba mytsaty mykara kazo wata my.

²⁴ Botu ahabo iktsasoko. Tsimyhyrikosokdanahaze Deus ahamysapybyi ty tsikykaranaha ba zahaokzo. Kahumo ahaspirikpo ahabyizeka tsimyhyrikosokdanaha katuk batu tsimynapykyryknaha. Utakta Deus zikpehata. Kawahi mynapykyryk. Kaharere bo yhỹ ahabyi zeka iwaze tsimyhyrikosokdanahaze ahamysapybyi ty tsikykaranaha ba zahaokzohik – niy.

²⁵ – Aty skaraba ikia – niaha. – Uta botu ahabo iktsaso – Sesus niy.

²⁶ – Ahabo puëtsik motsaso tsihikik. “Ahaharere hi batu wasani tsimaha” anahi motsaso tsihikik. Atahi zikpeha iharere zuba motsasoko. Iharere wasani my. Batu mybarapetu ziky. Anaty hi zikyrinymyryky atsatu kytsa sizubarëtsa bo motsaso – niy.

²⁷ Nitsasokoze zikpehata tazo soho nitsasoko. Sudeutsa ana humo hi batu siwabyziuhu. Iharere sihumo tsihokdaharëna my.

²⁸ Utakta kytsa wata Deus zikpehatawy. – Iharapatawyhyta humo tsi-bezenahaktsa! – tsimykaranaha. Iwa tsipikbezenaha. Bykyze tsipikbezenahaze ikiahatsa tihi:

– O ataktsa wasape mykara tawahi mynapykyryk tsimykaranaha. O atakta Deus zipehata tsimykaranaha. Atahi tazo harere zuba aparakbaha nisihrinymyryky – tsimykaranaha. – Hawa tazo nitsasoko yhỹ niy. Taharere ty ka batu tyso. Tazo harere zuba nitsasoko anahi nisihrinymyryky – tsimykaranaha.

²⁹ Tahy zikpeha katuk mynapykyk. Iharere bo hỹ kasopyk – atahi kapokzitsikitsa. Ba zikare – niy.

³⁰ Iwatsahi kytsa sizubarëtsa iharere bo hỹ nikaranaha ihumo sispirikporëtsa nikaranaha. Asahi ziwabykynahatsa ihumo sispirikporëtsa nikaranaha.

Kytsa hawa sakurëtsa moziknaha.

³¹ Iwaze Sesus Sudeutsa pe niyzo ihumo sispirikporëtsa asa bo hi nitsasoko ispe niy:

– Kaharere bo hỹ tsimykaranaha zeka katyryktsa tsimoziknaha. Katuk zinymyrykynahatsa babatsa tsimoziknaha.

³² Amy ty wasani tsipinymyryknaha, iwatsahi meky watu tsimoziknaha. Taparaka ahapokzitsiukbyitsa tu ahamysapybyitu tsikykaranaha. Abaka

mahani ahapehatsa myzahapokzitsiki iwatsahi ahapunihikrëtsa tsimoziknaha – niy.

³³ – O batu aty tohi mypehatsa humo mymypokzitsiubyitsa. Katsaktsa nihyrikosokdata Abarão tsekokatsa tsimaha. Amy humo sa mybo tsimy. “Kytsa mypehatsa humo mymypokzitsiubyitsa” tsimy kara. Batu – nikaranaha.

³⁴ Sesus ispe:

– Kaharere wasani my. Wabyziutaha! Hawa batu mysapy tsimykaranaha. Ahasopyksapybyitsa tsimykaranaha zeka iwatsahi ahapokzitsiukbyitsa tsikyzyknaha. Ahapehatsa Satanas mozik. Iharere bo ma tsikykaranaha iwatsahi ahasopyksapybyitsa tsimykaranaha. Ba hawa tohi zikaha. Iwatsahi ahahumo ahapokzi byitsa niy.

³⁵ Mypehatsa kytsa nasipokzitsizo. Asahi sipokzitsiuk byitsa itukytsa nymyhyrybyita mykaranaha. Bipyritsa zuba. Tatse batu, atahi mymypokzitsiki. Mypehatsa tse humo mymypokzitsiki.

³⁶ Utakta Deus tse my. Iwatahi kahumo tsimyspirikpokonahaze Deus tyryktsa tsimoziknaha. Iharere bo zuba hyỹ tsimykaranaha. Tapara Satanas ahapehatsa tserikiknaha, iharere bo ka batu yhyỹ tsimaha iwatsahi ahasopyksapybyity tsikykaranaha tsimoewynaha – tsimykaranaha. – Uta ahapehatsa mozik kahumo ahapunihikrëtsa tsimoziknaha.

³⁷ Ikiahatsa nihyrikosokdata Abarão tsekokatsa tsimaha ana humo hi kahyrinymyrëta. Kaharere bo batu yhyỹ tsimykaranaha. Amo sa tsikbeze tsihikiknaha. Iwatsa tu Abarão tsekokatsa tu tsikbeze tsihikiknaha.

³⁸ Kazo zikwatawyky atsatu motsasoko. Ikiahatsaktsa Satanas tyryktsa tsikyzyknaha. Atahi ahazo my. Hawa mykara atsatu tsimykaranaha – Sesus niy.

³⁹⁻⁴⁰ Kytsa tihi:

– O batu, katsaktsa Abarão tsekokatsa. Nihyrikosokdata Abarão mydiri mysopyk – niaha. Sesus ispe niyzo:

– Deus harere kabo nitsasoko. Iharere humo zuba zahahyrinymyryky. Ikiahatsa tsikbezekyzykynaha kaharere humo batu ahakparawy niy. Deus harere baba batu ahakparawy. Nihyrikosokdata Abarão Deus harere bo hyỹ ziknakara. Ikiahatsa Abarão tsekokatsa tsimaha zeka iwata Deus harere bo hyỹ tsimaha. Ikiahatsa Satanas wata tsikyzyknaha.

⁴¹ Hawa nikara atsatu tsimykaranaha – niy.

– O katsa batu Satanas watsa tsimaha Deus zuba myzo. Iharere bo zuba hyỹ tsimykaranaha – mybarapetu niaha.

⁴² Sesus:

– Deus zikpeha. Uta mybarawy bo iknasik – niy. Deus ahazo my zeka ikiahatsa tihi:

– O zipehata tsimysapyrëta tsimykaranaha – niy.

⁴³ – Kaharere bo batu yhyỹ tsimykaranaha. Kaharere bo batu ma zikaha. Iwatsahi batu wabyziu zikaha aha humo kaharere tsihokdaharëna my niy.

⁴⁴ Ikiahatsaktsa Satanas hyrytsa tsikyzyknaha. Hawa mykara ikahatsa kino niwatihi tsimykaranaha. Tahi imysapybyita mynakara. Ikiahatsa ahasopyksapybyitsa tsinakaranaha. Hawa mykara yhyỹ ahasopyk. Ataharere humo hi kytsa naharapebakanaha. Deus bijoikpe mybarawy nizuknize ata harere humo hi naharapebakanaha. Aba kino niwatihi kytsa nasiakzokotu. Deus harere babata bo batu yhyỹ mykara. Batu wasani ziky tsimyspihikbatarëta. Pispihikbatakaze hawa mozihikik atsatu mykara. Kytsa mymyspihikbatakanahaze ihyrytsa moziknaha – Sesus niy.

⁴⁵ – Uta wasani motsasoko. Iwatsahi ikiahatsa kahumo batu ahaspirikpo – nikara.

⁴⁶ Ba amy tohi ziksonaha:

– O ikia tsimymysapybyriki – my. – Kaharere wasani ziky iwatsa tu kaharere bo batu yhỹ zikaha tsimykaranaha.

⁴⁷ Deus tyryktsa iharere bo hỹ mykaranaha. Ikiahatsaktsa Deus tuktsabyitsa tsimaha. Iwatsahi Deus harere bo batu yhỹ tsimynakaranaha – nikara. Iwa Sesus taparaktsa bo nitsasoko.

Sesus iwaze Abarão.

⁴⁸ Sudeutsa Sesus pe niaha:

– O ikia hyrikoso sapybara humo tsimytsasoko. Batu amysapy tsimy. Paikpa mytsaty tsimykarana. Samarija ezektsa wata batu amysapy tsimy – mybarapetu nikaranaha.

⁴⁹ Sesus tihi:

– Aharere batu wasani my. Hyrikoso sapybara humo batu tyso. “Kazo zuba wasani mykara”. Ikiahatsa tsiziksohometukunaha.

⁵⁰ Batu katyso “Utakta wasani my.” Deus zuba moziksapywyky “Atakta wasani” mykara. Kytsa kasoho humo piksohometukunahaze Deus tihi: “O ahaharere batu ahamysapy tsimykaranaha” – niy.

⁵¹ – O kaharere tsiwabytoktonahaktsa. Aty kaharere bo hỹ mykara zeka atakta kazo tuk tawahi mynapykyryk – niy.

⁵² Iwatsahi Sudeutsa ipe niaha:

– Abaka tanymyryky h̃y. Ikiahi hyrikoso sapybara humo tsimy-pamykysoko. Tubabatu taparakta Abarão nihyrikosokda. Deus sohokotsa kino niwatihi nihyrikosokdanaha. Niakbabanaha. Ikia hi motsasoko “Aty kaharere bo hỹ mykara Deus tuk tawahi mynapykyryk. Siakbatsa ba zikakpykyknaha kaharere humo hỹ my” tsimy – nikaranaha.

⁵³ – Tubabatu Abarão mydiri nihyrikosokda. Abarão atatuze nitsasokoze kytsa iharere ziwabyziukunaha. Tubabatu siakbatsa Deus sohokotsitsa nihyrikosokdanaha. Asahi nitsasokonahaze kytsa siharere ziwabyziukunaha. Ikia ja. Tozeka ja tsimytsasokoze kytsa aharere piwabyziukunaha. Aty skaraba tsimy – nikaranaha.

⁵⁴ Sesus ispe niy:

– Utakta kasoho tu motsasoikik zeka “O uta zuba wasani hi mykara” Anahi mykara zeka batu aty tohi kaharere piwabytoktokoro. Kazo kasoho humo moziksapywyky. “O wasani h̃y mykara” – my. Ikiahatsa kazo soho tsimykaranaha zeka – O atakta mypehatsa my tsimykaranaha. Iwa kazo soho tsimykaranaha – niy.

⁵⁵ – Ikiahatsa hi batu Deus ahanyhy tsimykaranaha. Utazuba iny. Motsasoko zeka “batu kanyhy my” mybarapetu mykara. Ikiahatsa watsa mozik. Utakta iny. Iharere bo hỹ mykara h̃y – Sesus niy.

⁵⁶ – Ahadiri Abarão kasoho humo tsihyrinymyrêta. Mybarawy bo mynasik ana humo hi tsihyrinymyrêta ziknakara. Iwatahi kahumo tsakurêta – niy.

⁵⁷ – O ikiakta batu atsaikba. Sīkuêta anos ahabyitatu. Iwatahi ikiakta Abarão batu anyhy. Tubabatu nira iwatahi batu anyhy. Tsimymyspihik-bataka – niaha.

⁵⁸ Sesus ispe my:

– Kaharere tsiwabytoktonahaktsa. Taparakta Abarão purukbyitu utakta nawa tatu – niy.

⁵⁹ Iwaze kytsa haraharetsa ty nasibyknaha. Iwaze zibeze tsihikiknaha. Sesus sipokso taokpitsī. Kytsa sizubarêtsa papatu izoihik. Batu ity nyzo. Iwaze Deus wahoro zubata isturupeze inawakik.

9

Sesus ihyrizikubyritya zizororowy.

¹ Maku ihyrizikubyritya zizororowy. Kyze Sesus niukuruze zinymyryky-nahatsa tuk maku ihyrizikubyritya bo iktsa niy. Atahi koikny bakta tu ihyrizikubyritya nipuruk.

² Zinymyrykynahatsa tihi:

– O mypehakatsa amo sa maku ihyrizikubyritya nipuruk niaha. Tozeka ja imysapybara humo nihyrizikubyritya. Tozeka ja izotsa simysopyksapybyitsa nikaranaha ana humo hi ja nihyrizikubyritya – niaha.

³ Sesus:

– O batu izotsa simysopyksapybyitsa nikaranaha ana humo hi nihyrizikubyritya. Abaka Deus zikwy piwatawy. Iwatahi ihyrizikubyritya nipurukze my. Deus zikwy humo piwatawyky niy.

⁴ Deus zikpehaka. Abaka Deus pokzi tarabajaziu mynakara. Bykyze Deus pokzi tarabaja mykara batu zik.

⁵ Uta mybarawy eze tuze aparakbaha mysihyrinymyryky. Deus harere bo hyỹ mynakara hawa wasani my mozuruku anaty hi mysihyrinymyryky – niy.

⁶ Kyze Sesus tasaytsik ty wytyk bo hezok niy. Tshãrã ty tysukni iwaze ihyrizikubyritya hyriziktsa bo tshãrã ty pepetohi niy.

⁷ Ipe niy:

– Zarape Siroã inarokoha bo tyzakpikykyta tsimy – niy.

Siroã Sudeja harere zipehata motsaso. Iwaze ihyrizikubyritya zarape bo niparak. Taty hopik hopikby niy. Atsoko nikozo. Nizororobaba.

⁸ Iwaze kytsa iotutsa pauksitsa asa zuba nipamykysokonaha:

– Tohi sa ske eze ziknadyhykyta. Batu ty ba iktsa ziky. Kytsa ziknasi-akzaikik “O kabo ja kabo ja” ziknakara. “Kadisahawy ty kabo nyny tsimy” nikara.

⁹ Ata hi sa – Iotutsa pauksitsa nikaranaha. Ata hiba nikaranaha. Wastuhu nikaranaha:

– O batu. Maku ihyritywata hi zuba – niaha. Iwa asa zuba nipamykysokonaha. Iwaze tapara ihyrizikubyritya sibo taso:

– Uta hiba kahyrizikubyritya niy. Tapara ske eze ziknadyhyky. Okyrysaro kadisahawy humo niwatihi kytsa bo ziknazapyikik. Uta tihi ba – niy.

¹⁰ – Hawata skaraba abaka iktsa asopyk – niaha.

¹¹ – Sesus inarokota kabo izumu. Atahi tshãrã ty sukni kahyriziktsa bo tsikaeni zuba tsyk niy. Kape “Siroã zarape bo hopikty!” – niy. Yhỹ iky. Siroã zarape bo ikparak. Ikokpikze atsoko iktsa iky.

¹² – Haneze sa Sesus – niaha.

– Yhỹ ja. Batu kanyhy – niy.

Pariseutsa ihyrizikubyritya pe: – Hawa skaraba abaka iktsa tsimykyara – nikaranaha.

¹³ Iwaze iotutsa pauksitsa tapara ihyrizikubyritya Pariseutsa bo ziocky-hyryknaha.

¹⁴ Sesus Sudeutsa byrykywy eze ihyrizikubyritya zizororowy. Tshãrã sukni ty ihyriziktsa bo pepe niyze tabyrykywy eze zizororowy.

¹⁵ Iwaze Pariseutsa niwatihi ipe niaha:

– Hawa ta skaraba abaka iktsa asopyk – niaha.

– Atahi tshãrã sukni ty kahyriziktsa bo tsikaeniha zuba pepe niy. Uta kino hopik hopikby ikytahi atsoko iktsa iky – niy.

¹⁶ Pariseutsa nikaranaha:

– Atakta zizororowy mybyrykywy eze tarabaja nikara. Aty niwa myzeka Deus iknybyita tarabaja humo – wastuhu nikaranaha. Utsa tihi:

– O batu. Hawa skaraba maku imysapybyita nikara Deus zikwy ty ziwatawy – nikaranaha. Iwaze Sesus zisohometukunaha.

¹⁷ Iwaze ipezo niaha:

– Ikia tsikykara. Ahyrizikubyri humo zazororowyhik hawa isoho mytsaty tsimy – nikaranaha:

– O atahi Deus sohokotsa my hỹ – niy.

¹⁸ Pariseutsa iharere humo batu sispirikpo niaha. Iharere bo batu yhỹ niaha. Iwatsahi kytsa izotsa nasioktyhyryknaha.

¹⁹ Zumunahaze ispe niaha:

– Hawa skaraba ahatse hi sa. Atahi sa ihyrizikubyrita nipuruk. Ihyrizikubyrita niy zeka hawa hãta skaraba abaka iktsa mykara – nikaranaha.

²⁰ – O atakta katse my izo niy. Nipurukze ihyrizikubyrita hỹ niy.

²¹ Abaka iktsa mykara batu kanyhy izo niy. Aty sa zizororowy batu kanyhy. Katse botu taypyk iwatsahi ituk typamykysonaha. Hawa iktsa mykara anahi ituk typamykysonaha – izo niy.

²² Iwa izo Pariseutsa pokso nitsasoko. Tapara Pariseutsa tihi:

– Aty skaraba Sesus Deus zipehata my zeka atahi Sudeutsa wahoro bo ba ziktsukzo – nikaranaha.

²³ Iwatahi izo nitsasoko:

– Katse botu taypyk. Hawa abaka iktsa mykara anatyhi ipe tsimaha – nikaranaha. Sudeutsa pokso sipybyrẽtsa nikaranaha.

²⁴ Kyze Pariseutsa tapara ihyrizikubyrita ziooktyhyrykzonaha. Sibbo izumuze ipe niaha:

– Katsakta Deus okze tu tsimaha. Aharere wasania ty mybo tytsaso. Atahi zazororowyta batu imysapy my ana humo hi myhyrinymyrẽtsa – mybarapetu nikaranaha.

²⁵ – Atahi zikzororowyta imysapybara ty mynakara zeka batu isoho kawabyhy. Uta taparaka kahyryzikubyrita abaka iktsa mykara hỹ. Ana humo hi zuba kahyrynymyrẽta – niy.

²⁶ Ipezo niaha:

– Hawa sa niy. Hawa skaraba ahyriziktsa nisizororowy – niaha.

²⁷ – Botu iktsaso. Kaharere humo batu ahaspirikpo. Hawa skaraba kaharere tsipiwaby tsihikikzonaha niy. Tozeka ja ikiahatsa kino niwatihi ituktsa tsimoziknaha – niy. Iwa zizororota Pariseutsa pe niy.

²⁸ – Batu ba – nikaranaha. Sisakparẽtsa nikaranaha. Zizororowyta humo tahakyrikinaha:

– Ikia hi itukta tsimy. Katsa Moises harere bo zuba hyỹ tsimykaranaha. Katsa Moises tuktsa tsimaha.

²⁹ Moises Deus harere nitsasoko ana humo hi myhyrinymyrẽtsa hỹ. Azororowyta ja. Aty harere sa motsasoko. Hana iknykta sa izumu batu myhyrinymyry – niaha.

³⁰ Zizororowyta niy:

– Paze. Atahi zikzororowy. Uta kahyryzikubyrita tu zikzororowy. Iki ahatsa hi isoho humo batu ahahyrynymyry. Hana ikny sa izumu batu ahahyrynymyry niy.

³¹ Katsa myhyrinymyrẽtsa. Kytsa simysapybyitsa mykaranaha iwaze Deus bo mopamykysokonahaze batu siwabyhy nikara. Ba ziksitsumuẽhĩ. Asakta Deus harere bo hyỹ mykaranaha asahi Deus bo mopamykysokonahaze piwabyziuku. Mysitsumuẽhĩkĩ.

³² Batu aty tohi ihyrizikubyrita ty “tyzororowy” iwahaty batu tyso. Batu zik nikaranaha. Abaka atahi kahyriktsa nisizororowy abaka iktsa kasopyk.

³³ Deus harere bo hyÿ habyi zeka kahyriktsa bazik sizerorowy. Deus humo ipeha ahabyizeka kahyriktsa ba zik isizerorowy hÿ – niy.

³⁴ Kytsa ihumo tahakyrikinaha. Asahi:

– Ikia amysapybyi ty tsimykara. Tsikpurukze ahyrizikubyrita amysapybara humo mybarapetu nikaranaha. Ikia tsimyhrynymyry tsihikik nikaranaha. Nabo pãoty. Sudeutsa wahoro bo ba ziktsukzo – niaha. Tahakyrikinaha zizerorowyta humo niaha.

Hawa kytsa Sesus humo sispirikpobyitsa ihyrizikubyrita watsa maha.

³⁵ Kyze Sesus isoho ziwabyze. Kytsa nizukeheknaha Deus wahoro bo ba ziktsuk niaha ana hi ziwaby. Iwaze zihobykze ipe niy:

– Ikia Deus zipehata kytsa wata niyzik ihumo aspirikporëta sa – niy.

³⁶ – Aty sa Deus zipehata mywata niyzik. Ikia kabo tsipiwatawy zeka ihumo kaspirikporëta hÿ my – niy.

³⁷ – Aba ibo tsimykozoko. Atakino abo mopamykysoko atsatu Deus zipehata ahawata ikyzik – niy.

³⁸ Iwaze zizerorowyta taekaratsa humo puruk puruk niy.

– O kapehatsa abaka ahumo kaspirikporëta my – niy. Aba motsasoko – Ikia zuba tsamysapyrëta. Ikia zuba wasani tsimykara – niy.

³⁹ Sesus tihi:

– Mybarawy bo iknasik. Iwaze kahumo kytsa meky watu moziknaha. Asahi katuktsa moziknaha. Deus sisoho “O simysapyrëtsa maha” my. Utsa batu. Kahumo batu sispirikpo. Iwaze asahi Deus tihi: “O batu simysapy mykaranaha” my. Wastuhu Deus harere soho “katsa batu myhyrynymyry. Iharere tsinymyry tsihikiknaha”. Asahi katuktsa moziknaha. Utsa tihi “O katsaktsa Deus harere botu tsinymyrybanaha” mytsaty ahabyitsa nikaranaha. Asahi kahumo batu sispirikpo – Sesus niy.

⁴⁰ Pariseutsa iharere ziwabykynahaze ipe niaha:

– Katsaktsa Deus harere humo myhyrynymyrëtsa. Iwa tsimytsasokona-haze tahaspihikbatakanaha ja – nikaranaha.

⁴¹ Sesus ispe niy:

– Tsimytsasokonaha zeka: “O Deus harere batu myhyrynymyry, katsa iharere bo tsinymyry tsihikiknaha” Iwa tsimytsasokonaha zeka Deus okzeka ahamysapyrëtsa tsimoziknaha hÿ. Ikiahatsa hi: “O Deus harere myhyrynymyrëtsa.” Iwatsahi Deus okzeka batu ahamysapy tsimaha – niy. Iwa Sesus Pariseutsa bo nitsasoko.

10

Kytsa hozipyrykzatsa watsa soho nitsasoko.

¹ Sesus nisihrynymyryky. Hozipyrykzatsa soho humo nisiwatawyky. Kytsa hozipyrykzatsa hyrity watsa nisiwatawyky. Iwa nisihrynymyryky:

– O kytsa wabyziutaha! – niy. Aty hozipyrykzatsa okarawy hokbowybyita buruk tu mytsuk zeka isoho humo:

– O atakta tityhyryboarëta. Atahi hozipyrykzatsa mysibykyryk iwatahi inatsuk hokbowybyita buruk tu – tsimykaranaha.

² – Atahi hozipyrykzatsa okarawy hokbowy buruk tu paku my tahi sithitsa babata my – tsimykaranaha.

³ – Hozipyrykzatsa tsihitsa mozumuze hokbowy bazekta. Atahi hokbowy ty zoksapare myraratsa bo mytsuk. Hozipyrykzatsa tsihitsa iaksoho piwabynahaze sakurëtsa moziknaha iwaze mysinaropykze estuba estuba zuba zipokonaha. Tahanaro piwabykynahaze ape bo mosisakpare.

⁴ Hozipyrykzatsa sizubarëtsa ape bo pipokonahaze sitsihitsa siharaze mynaukuru. Hozipyrykzatsa iapik ziknaukurunaha. Iaksoho humo zinymyrynahatsa hi mykaranaha.

⁵ Sitsihitsabyitsa tu zeka batu iapik zikaha. Iaksoho humo batu sihyrinomyry iwatsahi iapik batu zikaha. Tahatsihitsabyita yksoho piwabykynaha zeka paikpa mynatururukunaha. Sipybyrëtsa moziknaha – Sesus niy.

⁶ Kytsa Sesus harere hozipyrykzatsa soho humo batu sihyrinomyry. Amy piwatawy naha humo tsihokdaharëna.

Sesus hokbowy wata my.

⁷ Iwaze Sesus ispe niyzo:

– O kytsa wabyziutaha! Hozipyrykzatsa siokarawy eze tu zeka batu aty tohi ziksiba. Batu aty tohi ziksiakse. Anaeze batu aty tohi ba ziksiboro. Uta katuktsa mysiperyky. Katuktsa hozipyrykzatsa watsa uta hi mysipokzitsiki niy.

⁸ Hozipyrykzatsa tahatsihitsa byitsa yksoho humo batu sihyrinomyry. Katuktsa niwatihi. Asaktsa zispikhbatakanahatsitsa humo batu sispirikpo. Tapara kaharaze izumukunahatsa wasanibara ty nisihyrynyrykynaha. Iwatsahi batu siwabyziuhu.

⁹ Utakta hokbowy wata my iburuk mynapupunaha. Zoksapare mahaze tahadisahawy bo mynakaranaha bykyze mynapupuzonaha. Siokarawy eze batu aty tohi ba ziksiba. Asaktsa kahumo sispirikporëtsa mysipokzitsiki.

¹⁰ Sitsyhyryboanikitsa mozumunahaze hozipyrykzatsa humo tahatsyhyryboanaha mysiba tsihikiknaha. Utakta meky watu my. Izkumuze aparabaha kahumo sispirikporëtsa simysapyrëtsa moziknaha. Sakurëtsa moziknaha katuk mynapykyrykynaha.

Sesus hozipyrykzatsa tsihitsa wata my.

¹¹ Katuktsa mysipokzitsiki hÿ. Hozipyryktsa tsihitsa wata my. Uta katuktsa sapyzekeny mohyrikosokda.

¹² Aty hozipyrykzatsa tsihitsa tsumuëhÿtsa atahi okyryrsaro soho humo zuba tarabaja mykara. Batu istsihitsa babata byita tu. Sitsumuëhÿtsa zuba. Parini mozumuze tsipybyrëta ipokso moparakik. Hozipyryktsa myserekek. Iwaze parini mozumuze hozipyrykzatsa paikpa motururukunaha. Nanabyitaba motururukunaha. Parini hozipyrykzatsa mysiboro mykara tahi iwatsahi ipokso sipybyrëtsa mykaranaha.

¹³ Tsumuëhÿtsa niparakik. Okyryrsaro humo tarabaja mykara. Iwaze hozipyrykzatsa batu sipokzitsinymyhy.

¹⁴⁻¹⁵ Utakta hozipyrykzatsa tsihitsa wata my. Kamypokzitsiukrëta. Kazo humo kahyrynyryrëta kazo kahumo tsihyrynyryrëta. Nawatu katuktsa kahumo sihyrynyryrëtsa. Utakta katuktsa iksinyba. Katuktsa pokzi mohyrikosokda. Estuba katuktsa pibeze zeka sisapyzekeny mohyrikosokda – niy.

¹⁶ – Nanabyitaba ustsizubarëtsa my. Usa okarawy eze mopykyrykynaha. Asahi Deus bo mysioikyhyryk kaharere bo hÿ mykaranaha. Sizubarëtsa kaharere bo hÿ mykaranaha. Utakta sizubarëtsa kazo bo mysioikyhyryk hÿ.

¹⁷ Katuktsa pokzi mohyrikosokda. Mohyrikosokda bykyze mynahyryzikpo. Iwaze kazo kahumo tsimypokzitsiarëta. Katuktsa pokzi mohyrikosokda kazo kahumo tsimypokzitsiarëta.

¹⁸ Utakta mohyrikosokda ahabyi zeka ba zikbezenaha. Tubabatu kazo tihi:

“Tsimyhyrikosokda zeka tsinahyritzikpo”. Iwatahi tsimyhyrikosokda tsihikik yhỹ tsimy. Bykyze tsimynahyritzikpo tsihikikze yhỹ tsimy kazo niy. Iwa – Sesus niy.

¹⁹ Sudeutsa iharere soho niharapepehakanaha.

²⁰ Wastuhu:

– O atakta hyrikoso sapybara ituk napykyryk. Iwatahi paikpa mytsaty nikara. Amy sa tsipiwabykynaha – nikaranaha.

²¹ Utsa Sudeutsa tihi:

– O batu. Maku hyrikoso sapybara ituk mopykyryk zeka ba ziktsaso. Maku hyrikoso sapybara ituk mynapykyryk zeka ihyritzikubyrta bazizororowy batu zik – nikaranaha.

Sudeutsa Sesus harere bo batu yhỹ ahabyitsa nikaranaha.

²² Kyze Sudeutsa Sesus bo niaha. Serusarēhe ezektsa myikaha niaha. Pororo ziknakaranaha, nawa Deus wahoro zubata nizukninahaze mytsaty ziknakaranaha. Hyritzikze imyikaha bo pororo ziknakaranaha.

²³ Sesus Deus wahoro zubata zikarazik buruk paikpa nikaranaha. Tubabatu ispehatsa Soromao sapy zinaroko.

²⁴ Anaenze Sudeutsa Sesus pauk baze niriktotohokonahaze ipe niaha:

– Ikia hisa Deus zipehata ja Kiristu. Hawaze sa mybo asoho tsipiwatawyky. Ikia Deus zipehata tsimyzeka mybo tytsaso – niaha.

²⁵ Sesus hi:

– Botu kasoho iktsaso. Ikiahatsa kaharere humo batu ahaspirikpo. Hawa mykara Deus zikwy humo iwaze utakta Deus zikpehata mykara ana hi piwatawyky.

²⁶ Ikiahatsa kaharere humo batu ahaspirikpo.

²⁷ Katuktsa kaharere bo hỹ mykaranaha. Asahi hozipyrykzatsa watsa mykaranaha. Hawa hozipyrykzatsa tsihitsa hapik mokurunaha. Katuktsa niwatihi kaharere bo hỹ mykaranaha. Kaksoho piwabynahaze sispirikporētsa. Uta kino mysiny. Katuktsa mynamopykyryknaha niy.

²⁸ Kahumo simysapyrētsa moziknaha. Batu aty tohi ziksiakse. Batu estuba kino ba ziaksenaha. Tahawahi katuk mozurukunaha h̃y, mohyrikosokdana-haze Deus sihumo tsimpokzitsiukrēta ituk tahawahi mynapykyryknaha

²⁹ Kazo atahi zikpehahik iwatsahi sizubarētsa kahumo sispirikporētsa. Kazokta abazuba zikwy. Ba aty tohi iekze ziksiokty. Ba aty tohi katuktsa ziksiokty – niy.

³⁰ – Kazikwy kazo zikwy kino atsatu my – Sesus niy.

³¹ Iwa Sesus niyze Sudeutsa haraharetsa ty inasikyknaha iwatsahi ity zibezezykynaha.

³² Sesus ispe niy:

– Uta kazo zikwy humo tisapyrēna ty mykara. Amo sa haraharetsa ty tsipikbeze tsihikiknaha. Hawa sa ikykara – niy.

³³ Sudeutsa:

– Amy ty isapyha ty tsimyzeka ba zabezenaha. Hawa Deus zikwy tsipiwatawy anahumo hi ba zabezenaha. Aharere batu imysapy mytsaty tsimykaranaha. Ikiakta maku zubata. Maku tuze “Kazikwy kazo zikwy kino atsatu” tsimy. Iwatsahi haraharetsa ty tsipabeze tsihikiknaha – niaha.

³⁴⁻³⁵ Sesus:

– Amy ty Moises ziwatahaka wasani niy. Deus harere ziwatahakaze wasani niy. Botu ziwatahaka Deus harere papeu humo “Ikiahatsa deustsa watsa tsimaha” botu ziwatahaka. Iwa kytsa bo asahi sinarohotsa.

³⁶ Deus hi zikpeha. Aparakbaha Deus bo mysioktyhyryk my. Utahi mymyoktyhyrykta. Amy skaraba tsimaha: “O iharere ty Deus okzeka batu

imysapy my.” Mytsasokoze “Utakta Deus tse my”. O iharere ty batu imysapy mybarapetu tsimykaranaha – niy.

³⁷ – Utakta Deus zikwy humo watawy abyizeka kahumo batu ahaspirikpo wasani tsimykaranaha. Utakta Deus zikwy piwatawyky iwatsahi batu ahamysapy tsimykaranaha.

³⁸ Kaharere humo ahaspirikpo ahabyizeka hawa mykara anahumo hi ahaspirikporëtsa. Tsimyspirikponaha zeka ikiahatsa:

“O Sesus zikwy izo zikwy kino atsatu my” tsimaha – niy.

³⁹ Iwatsahi Sudeutsa itsipa humo asiba zioқтыhyrykzonaha. Batu zik hawa tohi zikaha Sesus niwakik.

⁴⁰ Iwaze Sesus buburu Sorodão inarokoha koikny zitsikzazo. Anaeze tapara Suão Batista sizubarëtsa nisiharasusuku. Anabo hi Sesus niukuru.

⁴¹ Sizubarëtsa ibo zumunaha. Asahi nipamykysokonaha:

– O Suão Batista Deus zikwy ty batu mybo tywatawy. Amo ata maku soho botu nitsasoko wasani nikara – nikaranaha.

⁴² Iwaze kytsa sizubarëtsa iharere bo hyÿ nikaranaha. Asahi amykta taba buburu Sorodão ezektsa ihumo sispirikporëtsa niaha.

11

Rasaru nihyrikosokda naha soho.

¹ Kyze Rasaru tsimyitsapyrëta. Sinini nikara. Tatukykyryk tuk Betanija eze hudik ziknakaranaha. Maria inarokotatsa, ustatsa Marata inarokotatsa iwaza.

² Maria katsa Rasarutsy hi iokmorënikia tsipokzitsarëna Sesus zipyryhara-susuku. Taharadi ty zipyrywiki. Maria atatsa tihi.

³ Iwaze wytykyryk maku Sesus bo zipehahiknaha. Sesus bo zumuze ipe niy:

– O ikia aharereziuwyy tsimyitsapyrëta – niy.

⁴ Ana ziwabyze Sesus ipe niy:

– Botu kahyrinymyrëta. Rasaru tsimyitsapyrëta hiba. Mohyrikosokdaze niakbanahatsa tuk ba zikapykyryk. Deus zikwy humo mynahyryzikpo. Kytsa isoho motsasokonaha. Rasaru “Deus tse zikwy humo inahyryzikpo” mykaranaha – niy.

⁵ Sesus Marata Maria Rasaru iwatsa humo tsimypokzitsiarëta ziknakara.

⁶ Sihumo tsimypokzitsiarëta tasapy eze inapykyryk iwaze petok zuruze ibo niukuru.

⁷ Kyze zinymyrykynahatsa pe niy:

– Tupaktsa kytsa! Sudeja boktsa – niy.

⁸ – O mypehatsa Sudeutsa zabeze tsihikiknaha. Botua haraharetsa ty zabeze tsihikiknaha. Iwatatu sa tsipiksikirizo – niaha.

⁹⁻¹⁰ – Yhÿ niy. Abaka Deus tarabaja mynakara. Okoroze kytsa haramwe humo amypubyri iktsa mykaranaha. Maku unata pitabakaze mynaraha. Batu iktsa zikaha. Maku okoroze pitabakaze wasani my. Haramwe humo ske buruk iktsa my. Aty Deus tsyhyryze tarabaja my zeka maku okoroze pitabakaze tawata. Bykyze batu zik maku unata pitabakaze tawata. Tupaktsa! Kytsa ba zikbezenaha Deus batu yhÿ mykara. Iwatsahi bazik bezenaha. Tapara Deus hyryziktsokzawy pepykba. Abaka ba zikbezenaha Deus kabete batu hÿ ziky. Aibani zuba pikbezenaha – niy.

¹¹ Zinymyrykynahatsa pezo niy:

– Myharereziuwyy Rasaru purubaka. Abahi mozipopo – niy.

¹² – O purubaka zeka mozororozo hÿ – nikaranaha.

¹³ Rasaru botu nihyrikosokda ana humo hi Sesus tsihyrinymyrëta. Iwatatu – “Rasaru purubaka” niy iwatsahi Rasaru purubaka tu ja – mytsaty nikaranaha.

¹⁴ Iwaze Sesus mypubara ty nitsasoko. Ispe niy:

– Rasaru nihyrikosokda – niy.

¹⁵ Iwatatu ibo batu pão. – Aba Deus zikwy pahawatawyky. Kazikwy humo iktsa tsimahaze kahumo ahaspirikporëtsa tsimoziknaha. Iwatahi kakurëta. Nihyrikosokdata boktsa kytsa! Tupaktsa – niy.

¹⁶ – O katsa ituk tsimykurunahaktsa kytsa! Sesus pibezenaha zeka katsa niwatihi ituktu tsimhyrikosokdanaha – Tome niy. Tome beketsa petok inarohota nikara. Iwaze Sesus tuk zinymyrykynahatsa nihyrikosokdata bo zumukunaha.

Sesus niakbanahatsa nasihyrizikpo.

¹⁷⁻¹⁸ Betanija bo zumunaha. Betanija Serusarëhe bazebabatu. Harakykbyi kirometero zuba. Nihyrikosokdata sapy bo zumunaha. Kytsa:

– O Rasaru nihyrikosokda. Harakykbyihi zuruze Rasaru harahare oke eze ziytyknaha – nikaranaha.

¹⁹ Marata itsy Maria niwatihi Rasaru pokzi nipuziukunaha. Sudeutsa kytsa situk Rasaru pokzi nipuziukunaha.

²⁰ Iwaze Marata Sesus sukmo soho ziwabyze atatsa ibo niukuru. Sesus zihobyk. Maria wahoro eze tu niapykyryk.

²¹ Marata Sesus zihobykze ipe niy:

– O ikia mytuk tu zeka kaokaha ba zikumuzo.

²² Amy Deus bo tsimyzapykyky atsatu abo nyny my. Ikia Deus bo tsimypamykysoko zeka kaokaha soho amy tsimyzapykyky anahi abo nyny my – niy.

²³ – Aokaha mynahyrizikpo – niy.

²⁴ – Yhÿ niy. Atahi mynahyrizikpo ana humo hi kahyrinymyrëtatsa. Deus myzo siakbatsa sizubarëtsa nasihyrizikpoze kaokaha kino niwatihi mynahyrizikpo – niy.

²⁵ Sesus:

– Uta hiba siakbatsa hyrizikpokotsa. Kahumo nahyrizikponaha. Kytsa kahumo sispirikporëtsa asahi mohyrikosokdanahaze nahyrizikponaha asahi Deus tuk tahawahi mynapykyknaha.

²⁶ Asahi kahumo sispirikporëtsa tuze niakbanahatsa tuk ba zikykykyknaha. Asahi Deus tuk mynapykyryknaha. Kaharere bo sa hyÿ tsimy – niy.

²⁷ – Yhÿ niy. Ikia hi Deus zapehata mywata tsikyzyk. Ikia hi Deus tse babata. Tahy tsipiperyknaha – niy.

Sesus kytsa pokzi nipu.

²⁸ Iwaze Marata nitsasobaze tatsy bo ziksizo. Tatsy bo nisakzihiki tu. Utsaktsa batu siwabyhy:

– O katsy mypehatsa izumu ikia zasapykyky. Ske puk teze tu – niy.

²⁹ Iwaze Maria ziwabyze Sesus bo niparak. Aidy kyikyky niy.

³⁰ Izumubahaneze pyk niy. Marata zihobyk anaeze ibo zumu.

³¹ Sudeutsa atatsa hapik niukurunaha. Asahi Rasaru pokzi nipuziukunaha. Atatsa bo iktsa niahaze:

– O iytyk bo ja moparakak – mytsaty ahabyitsa nikaranaha. Iwatsahi iapik niukurunaha.

³² Atatsa Sesus bo zumu. Ibo iktsa niyze taekaratsa humo puruk puruk niy:

– O mypehatsa ikia mytuk zeka kaokaha ba zikumuzo – niy.

³³ Maria taokaha pokzi nipuziuku atatsa bo Sesus iktsa niy. Sudeutsa kino ituk nipuziukunaha. Sizubarētsa nipupuziukunaha. Sisukatsihikrētsa. Sesus sihumo tsimypokzitsiarēta. Iwatahi sihumo tisukatsihikrēta niyzik.

³⁴ – Iytyk sa hana eze – niy.

– O mypehatsa panykta anaeze – niaha.

³⁵ Sesus sipokzi nipu.

³⁶ Iwatsahi Sudeutsa ihyritsik bo iktsa niahaze:

– O Rasaru humo tsimypokzitsiarēta – nikaranaha.

³⁷ Utsa kytsa:

– Tapara ihyrizikubyritya zizororowy. Tozeka ja Rasaru ty iwa my tawata hỹ – nikaranaha. Asa zuba nipamykysokonaha.

Sesus Rasaru zihyrizikpowy.

³⁸ Iwaze Sesus ihumo tsimypokzitsiarēta iytyk bo zumu. Tisukatsihikrēta nikara anaeze harahare hok eze niapykyryk. Sesus Mata Maria Sudeutsa kytsa sizubarētsa iwatsa iytyk bo zumukunaha.

³⁹ Sesus ispe niy:

– Harahare tsispetunahaktsa! – niy.

– Mypehatsa ba hawa tohi zikaha! Abaka inury mobibibaka harakykbyihi zuruze anaeze nitsahok. Tsihōhōrēta – Marata niy.

⁴⁰ – Uta zuba botu iktasaso ikia kahumo aspirikporētatsa zeka Deus zikwy piwatawyky. Ana humo hi ma tsimy – Sesus niy.

⁴¹ Iwaze kytsa harahare zipetuhiknaha. Sesus Deus bo nipamykysoko:

– O kazo kaharere tsiwabyikik. Iwatahi “Ikia tsamysapyrēta” mykara.

⁴² Kaharere tsiwabyikik. Anahi kahyrinymyrēta. Kytsa kapauk bazektsa okze abo mopamykysoko. Iwatsahi kahumo sispirikporētsa moziknaha. Ikia hi tsikpeha ana humo hi sihyrinymyrētsa – niy.

⁴³ Sesus tazo bo nipamykysobaze opykani huahua niy:

– Rasaru pany puketyny – niy.

⁴⁴ Rasaru nihyrikosokdata tu atsoko izoihik. Panu ty takwarawytuk tu zizoi. Sesus ispe niy:

– Iakwarawy tsipararanahaktsa iwaze pitaba! – niy.

Sudeutsa taparaktsa: – Hawa sa Sesus tabeze – nikaranaha.

⁴⁵ Iwaze mektsaktsa Sudeutsa Maria bo inakozorenaha Sesus humo sispirikporētsa moziknaha. Asahi Rasaru inahyrizikpo naha zynynaha Sesus humo sispirikporētsa.

⁴⁶ Utsa kytsa ihumo batu sispirikpo. Asahi Pariseutsa bo nitsasokonaha. Ispe niaha:

– O Sesus nihyrikosokdata Rasaru zihyrizikpowy – niaha. Iwa Pariseutsa bo nikaranaha.

⁴⁷ Iwaze Pariseutsa, taparaktsa ziknapamykysokonahatsa iwatsa izumubanaha. Asa zuba Sesus soho ty nipamykysokonaha:

– Hawa sa Sesus ty tsimaha. Atakta tazikwy myzubaha bo ziwatawyky. Hawa sa Sesus ty tsimaha

⁴⁸ Ata tazikwy piwatawyikik zeka kytsa sizubarētsa ihumo sispirikporētsa moziknaha. Situktsa moziknaha. Sesus ispehatsa mozik zeka Homa taparaktsa Sesa sodadutsa mymyoktyhyryk mysipeha Deus wahoro zubata pipaparabanaha. Mytyryktsa mokbabanaha. Myhyrytsa nihyrikosokdata Moises harere ty ba ziksihyrinymyrnaha – iwa asa zuba nipamykysokonaha.

⁴⁹ Iwaze taparaktsa ziknapamykysokota Kajapas inarokota ispe niy:

– Ikiahatsa batu ahahyrinymyry niy.

⁵⁰ Sesus tsipibezenaha zeka Homa sodadutsa mytyryktsa ba ziksibanaha. Iwatsahi katsa Sesus tsipibezenaha zeka wasani my. Kaharere ahahumo tsihokdaharëna iwa zeka Homa sodadutsa mytyryktsa ba ziksibanaha – Kajapas niy.

⁵¹ Deus tapara tihi:

– Sesus kytsa sapyzekeny mohyrikosokda – niy. Ana hi Kajapas batu hyrinymyry. Nitsasokoze:

– Katsa Sesus tsipibezenaha zeka wasani my – niy. Deus harere soho batu ihyrinymyry. Ihyrinymyrybyita tu Deus harere bo yhy niy. Hawa mytsaty nikara batu tyso. Sesus Sudeutsa tyryktsa sapyzekeny mohyrikosokda Deus botu nitsasoko.

⁵² Utsa kytsa bipyritsa sapyzekeny kino niwatihi mohyrikosokda. Iwatsahi sizubarëtsa Deus tyryktsa sakurëtsa moziknaha. Iharere bo hyhy mykaranaha. Iwatahi Sesus mohyrikosokda Deus niy.

⁵³ Iwa zeka Sudeutsa taparaktsa asa zuba nipamykysokonaha:

– Hawa sa Sesus tabeze – nikaranaha.

⁵⁴ Iwatahi Sesus Sudeutsa pokso mekybotu niparak. Eparã bo niy. Eparã jerukbara bo tasapy. Anaeze Sesus tuk zinymyrykynahatsa tuk niapykyryk.

⁵⁵ Sudeutsa kytsa sizubarëtsa Serusarëhe bo niukurunaha. Sudeutsa myikaha bo Serusarëhe bo pororo ziknakaranaha. Paskoa mokymyze anaeze Deus taparaktsa nisitsumuëhiki ana bo mytsaty ziknakaranaha. Sizubarëtsa Serusarëhe bo niukurunaha. Tapara simyikaha kymybyitu taha-sopyk tyty nikaranaha.

– Katsa meky watu tsimoziknaha zeka Deus okzeka wasani tsimaha – nisisopykyknaha.

⁵⁶⁻⁵⁷ Iwaze sizubarëtsa Sesus ziperykynaha. Asahi Deus wahoro zubata sturupe eze ziberikinaha. Asahi:

– Mymyikaha bo ja mozumu – nikaranaha. Asa zuba ziperykynahaze nipamykysokonaha. Pariseutsa, taparaktsa Deus wahoro zubata eze ziknapamykysokonahatsa iwatsa aparakbaha nisipehaka. – Aty Sesus piny zeka mybo tytsaso! – niaha. Iwa nitsasokonaha Sesus tsipa humo zioiky tsihikiknaha hy.

12

Sesus Betanija eze.

¹ Kyze Sesus Rasaru bo zumu. Atahi zihyrikpowyta ibo zumu. Rasaru Betanija ezekta niy. Tapara Sudeutsa myikaha Paskoa inarokoha zumubahanize. Iwaze hi zuba simyikaha nakymy. Iwaze Sesus tuk zinymyrykynahatsa tuk Rasaru bo zumunaha.

² Anaeze Marata sidisahawy humo bu nikara. Rasaru zinymyrykynahatsa tuk tadisahanaha.

³ Maria jokmorënikia zebykyk niy. Jokmorënikia ty tsasuk tisapyrëna eze narado inarokoha ipokzitsanikia. Atatsa jokmorënikia tsizubarëna ty zibykyryk niy. Iwatatsahi Sesus zipyrytsa harasusuku. Iwaze atatsa taharadi tyty zipyrywiki niy. Iwahoro tsiokmorëna niypykyryk. Atatsa Sesus humo tsimypokzitsiarëtsa iwatatsahi Sesus zipyrytsa harasusuku. Iwa Maria nikara.

⁴ Sudas Iskariotses Sesus tuk zinymyrykyta tisakparëta mozik. Atakta Sesus humo tsiharerewabymybarëta, sisukyrytsitsa bo myzioktyhyrykta. Atahi zibetsakak ipe nikara:

⁵ – Amy skaraba jokmorënikia ty batu ity huak. Tsipihuak zeka okyrysaro tsizubarëna tsimaha. Iwaze okyrysaro sinamybyitsa bo nyny tsimaha zeka wasani my – niy.

⁶ Sudas Iskariotses zinymyrykynahatsa okyrysaro suk zikziperyky. Ustsa papatu okyrysaro zikziakseke. Tatsyhyryze hi okyrysaro ziaakseke ustsa papatu ziknakara. Nitsasokoze – Amy skaraba jokmorënikia ty batu ity huak – okyrysaro humo niy. Ata kino okyrysaro ziaakse tsihikik. Imypokzitsiukbyita tu okyrysaro ziaakse tsihikik. Batu sinamybyitsa bo nyny ziky.

⁷ – O awatu betsak betsak byity! – Sesus niy. – Atatsa hi jokmorënikia ty zipyryktsa harasusuku. Atatsa hi kaokzeka tsimysapyrëtsa jokmorënikia ty pikarasusuku my niy.

⁸ Sinamybyitsa bo nyny tsimykaranaha zeka wasani my. Utakta ahatuk batu mopykyryk kabo ka ba nyny zikaha. Jokboha kyritoktok ahatuk mopykyryk. Aba kabo ty nyny tsimaha zeka wasani my – niy.

Sudeutsa taparaktsa kino niwatihi nikaranaha: – O Rasaru niwatihi tabezekta! – nikaranaha.

⁹⁻¹⁸ Kyze Sudeutsa sizubarëtsa Sesus bo zumunaha. Sesus Betanija eze niapykyrykspyk. Ana ziwabynahaze Sesus Rasaru ahatsa bo niukurunaha sibo inakozorenaha. Atahi Sesus zihyryzikpozota bo inakozorenaha. Sudeutsa sizubarëtsa taparaktsa Deus wahoro eze ziknapamykysokonahatsa ihumo batu sispirikpo. Rasaru inahyryzikpoze kytsa Sesus humo sispirikporëtsa. Iwaze taparaktsa Deus wahoro eze ziknapamykysokonahatsa nitsasokonaha:

– O Rasaru niwatihi tabezehikta kytsa – nikaranaha. Kyze aparakbaha Sesus bo iktsa nikaranaha. Sesus Rasaru zihyryzikpoze ziwabykynaha. Hawa ipe niy:

– Rasaru pany – niy. Iwaze Rasaru harahare ioke ikny zoihik.

Iwaze Sesus Serusarëhe bo niukuruze pikuzza bete tadyhyhyk. Tubabatu Deus harere papeu humo tubabatu ziwatahaka atsatu Sesus nikara. Iwatahi pikuzza bete tadyhyhyk. Deus harere papeu humo tihi:

– O Serusarëhe ezektsa ahasukatsihik byihuja! – niy. –

Ahapehatsa mozumuze pikuzza bete tadyhy – niy.

Iwa tubabatu Deus harere papeu humo ziwatahaka. Iwatahi Sesus pikuzza bete tadyhyky. Iwa Serusarëhe bo niy.

Sesus Serusarëhe bo zumuku.

Kyze kytsa sizubarëtsa Serusarëhe bo niukurunaha tahamyikaha bo asahi Sesus bo niaha. Ziwabykynahaze:

– O Sesus mozumuku – nikaranaha. Iwaze ibo niukurunaha.

– O Sesus tazikwy ty mybo tsipiwatawyky – nikaranaha. Tazikwy ziwatawykyze Rasaru zihyryzikpowy niy. Anahi ziwabykynaha. Iwatsahi Sesus haraze niukurunaha. Iwaze tsarakzapatsa nasibykyknaha ske buruk nisipaparkanaha. Sizubarëtsa nikaranaha. Sesus ispehatsa wata humo.

– Sesus Deus tuk niapykyryk. Mywata niyzik. Deus tukta katsa mybo inasik.

Atakta mypehakatsa my, katsa Isareu tsekokatsa ikia hi mypehakatsa.

Atakta Deus ihumo mymysapywyky hÿ. “O mykurëtsa” – nikaranaha.

Sesus Serusarëhe bo niy. Pikuzza bete tadyhyhyk iwa Serusarëhe bo zumuku. Hawa tubabatu Deus harere papeu humo ziwatahaka atsatu Serusarëhe bo zumu. Wasani niy. Sesus Serusarëhe bo niyze hawa tubabatu ziwatahaka. Ana humo hi zinymyrykynahatsa batu sihyrinymyry tsihokdaha. Ana harere batu siwabyhy. Aiba zuba mytsaty nikaranaha. Sesus bjoikpe bo nidoze tahapetu sisopyk:

– O Sesus Serusarêhe bo zumuze Deus papeu humo botu ziwatahaka tawata hawa tubabatu ziwatahaka atsatu niyze Serusarêhe bo zumu – iwa Sesus soho bo mytsaty nikaranaha.

¹⁹ Kyze Pariseutsa asa zuba nipamykysokonaha:

– Kytsa sizubarêtsa ihumo sispirikporêtsa nikaranaha. Kytsa myharere bo batu yh̃ zikaha. Katsa tsimytsasokonaha zeka “ihumo batu ahaspirikpo” kytsa “ihumo sispirikporêtsa” – nikaranaha. Asa zuba Pariseutsa nipamykysokonaha.

Kerokotsa Sesus bo mynakozore tsihikiknaha.

²⁰ Kyze Kerokotsa Sesus bo mokozorenaha. Asahi ustsya tyryktsa meky ezektsa tu niaha. Asahi Serusarêhe myikaha bo niukurunaha. Sudeutsa tuk Deus bo nipamykysokonaha:

– O ikia zuba tsamysapyrêta. Deus zuba atahi tsipunihikrêta bijoikpe eze my tsimaha – nikaranaha.

²¹ Piripi bo nikaranaha. Atahi Betesaida ezekta. Betesaida Karireja eze ky. Ata bo hi niukurunaha. Ipe niaha:

– O Sesus bo tsimynakozore tsihikiknaha – nikaranaha.

²² Iwaze Piripi ãdere pe niy atahi Peduru tsy ipe niy:

– O Kerekotsa Sesus bo mynakozore tsihikiknaha – niy. Kyze Piripi ãdere ahatsa Sesus pe niaha. Asahi:

– O Kerekotsa abo mynakozore tsihikiknaha – mykaranaha. Iwa Sesus bo nitsasokonaha.

²³ Sesus ispe niy:

– Utakta iknasikta maku babata ahawata ikyzik. Aibani mohyrikosokda. Mohyrikosokdaze kytsa piksohonaha! Atakta tsimysapyrêta tsizikwyrêta my – mykaranaha.

²⁴ – Wabytoktotaha niy. Katsaktsa tapara riktsa tsimysipariknaha. Tsimysipariknahaze wytyk bo pokpok tsimykaranaha. Estubaze zuba wytyk eze my, ata hi taypykze riktsa tsiriktsazubarêta mozik. Hawa riktsa mysiubara iwata tabezewy ziwatawyky. (Iwa nitsasokoze tabezewy soho ziwatawyky.) Tapara mohyrikosokda bykyze mynahyrikpo my. Iwaze kytsa sizubarêtsa kahumo sispirikporêtsa. Rik soho iktsasokoze hawa rik mysiubara iwa tabezewy soho ziwatawyky – niy.

²⁵ – Aty Deus harere bo yh̃ ahabyizeka mohyrikosokdaze Deus tuk ba zikapyyk. Aty Deus harere bo hỹ mykara zeka mohyrikosokdaze tawahi Deus tuk mynapyykyryk.

²⁶ Aty katukta mozik zeka kaharere bo hỹ mykara. Kaharere bo zuba hỹ mykara, katuk tawahi mynapyykyryk. Kazo ihumo mykara: O atakta tsimysapyrêta mykara – niy.

Sesus tabezewy soho nitsasoko.

²⁷ Sesus tihi:

– Abaka paikpa mytsaty mykara. Hawa ha ty ja Deus bo mopamykysoko “O kazo kabezetsihikbyita mykara” my. Iwa Deus bo batu tyso. Utakta mybarawy eze sinini mykara naha humo tsimyzihikik zeka yh̃ my. Iwa ibo mopamykysoko – my.

²⁸ Kyze Deus bo mopamykysozo:

– O kazo kytsa bo tysisapywyky. Iwatsahi asoho motsasokonaha “O Deus tsamysapyrêta. Azikwyrênikita tu tsimypokzitsiukrêta” nikaranaha – iwa asoho motsasokonaha. Iwa babatu iaksoho bijoikpe ikny iwaby. Deus tihi:

– Botu kasoho ziwatawyky. Aparakbaha botu kahumo piksohokonaha “O Deus tsamysapyrêta, azikwyrênikita tu tsimypokzitsiukrêta”. Ikihi hi

myhyrizikwanikita kasoho piwatawykyzo. Kytsa sizubarëtsa kasoho tihi: “O Deus tsamysapyrëta, azikwyrënikita tu tsimypokzitsiukrëta” mykaranaha – Deus niy.

²⁹ Kytsa sizubarëtsa Sesus baze niriktotohokonaha iaksoho ziwabynahaze. Wastuhu kytsa nikaranaha.

– O nitotokoro – nikaranaha. Utsa kytsa batu.

– Bijoikpe iknyktsa Deus tsumuëhïtsa ibo nitsaso – nikaranaha.

³⁰ Kyze Sesus ispe niy:

– Iaksoho tsiwabynahaze bijoikpe ikny ahatsyhyryze niy. Batu kahumo ka. Ikiyahatsa bohi Deus harere tsiwabynahaze – niy.

³¹ Abadisihi Deus kahumo sispirikpobyitsa bo motsaso ispe my:

– O ikiahatsa batu ahamysapy tsimykaranaha. Sesus humo tsimyspirikpobyrikinaha zeka batu ahamysapy tsimykaranaha. Ahapehatsa Sesus humo mypunihikbyinaha. Batu aty tohi ityryk zikyzyk. Sesus zuba ipunihikanikita my – niy.

³² – Sizubarëtsa kahumo batu siakparawy. Iwatsahi pikbezenaha. Ihara-patawyhyta humo pikyrikinaha iwa mohyrikosokda. Ihara-patawyhyta pit-sekna-haze pikbezenaha. Iwa mohyrikosokdaze kytsa nanabyitaba kahumo sispirikporëtsa moziknaha – nikara.

³³ Sesus tasokoze niy iwaze ihara-patawyhyta humo pihyrizikiknaha. Hawa mohyrikosokda mysihyrinomyryky niy.

³⁴ Sizubarëtsa ipe niaha:

– Tubabatu Deus harere papeu humo Kiristu soho ziwatahaka. Tubabatu nihyrikosokdata Moises ziwatahaka. Kiristu, Deus zipehata ba zihyrikosokda. Tawahi mynapykyryk – niy. – Ikiya “Utakta iknasikta maku babata ahawata ikyzyk” tsimy. Atahi inasikta maku babata mywata mohyrikosokda bykyze mynahyrikyryk tsimy. Atakta ja Deus zipehata niwatihi atsatu sa – nikaranaha.

³⁵ Sesus ispe niy:

– Utakta Deus harere myzubaha bo mysihyrinomyryky. Aba mysihyrinomyryky. Aibani mohyrikosokda iwatsahi kahumo ahaspirikporëtsa tsimoziknaha. Abaka kahumo ahaspirikporëtsa zeka wasani my. Kahumo ahaspirikpo ahabyizeka sinini ykarawy bo tsimaha. Kytsa unata eze batu pão maha. Hana bo mykaranaha miwa humo batu sihyrinomyry. Iwa kytsa kahumo batu sispirikpo miwa ezektsa watsa mykaranaha. Asahi sinini ykarawy tahasapy humo hi batu sihyrinomyry. Kytsa miwa haburuk tu mokurunahatsa watsa.

³⁶ Utakta ahatukze kahumo ahaspirikporëtsaksa! Iwaze katyryktsa tsimoziknaha. Ahamysapyrëtsa tsimoziknaha. Meky watu tsimoziknaha. Kytsa iwororoha buruk pitabakanahaze ana bo hi pinynaha ikiahatsa siwatsa tsimoziknaha – niy. Iwaze nitsasobaze niparak. Kytsa sizubarëtsa papatu niparak.

Sudeutsa Sesus humo batu sispirikpo.

³⁷ Kyze Sesus zikwy myzubaha bo ziwatawyky. Asahi ihumo batu sispirikpo. Iwaze iwatawy bo iktsa nikaranahaze ihumo batu sispirikpo.

³⁸ – Tubabatu Deus sohotsa Isaijas botu ziwatahaka:

“O mypehakatsa ahare ty kytsa sizubarëtsa bo iktsasoko. Kytsa ahare humo batu sispirikpo.

Ikiya azikwy soho humo batu sihyrinomyry.

Ikiya azikwy soho sihumo tsihokdaharëna” niy.

Iwa nihyrikosokdata Isaijas kasoho ziwatahaka. Iwaha humo hi kytsa batu kahumo sispirikpo mahaze Isaijas harere wasani my nikaranaha. Isaijas papeu humo ziwatahaka – niy. Asa watsa nikaranaha.

³⁹ Sudeutsa Sesus humo batu sispirikpo. Hawa Isaijas tubabatu ziwatahaka nikaranaha. Isaijas nihyrikosokdata:

⁴⁰ – Deus hawa kytsa mytsaty mykaranaha tsihyrinymyrëta ihumo paikpa mytsaty mykaranaha. Deus zikwy humo batu sispirikpo.

Izikwy bo iktsa nikaranahaze batu ihumo sispirikpo. Deus harere ziwabynahaze batu ihumo sispirikpo. Ihumo sispirikpobyritsa tu simysapybyitsa nikaranaha Deus batu mysiocko.

Simysapybyritsa situk niapykyknaha.

Batu ihumo sispirikpo iwatsahi simysapybyitsa nikaranaha Deus ba zisiokzo – niy.

Iwa tubabatu Deus sohokotsa Isaijas ziwatahaka.

⁴¹ Tubabatu ziwatahaka iwatsa tu Sesus harere ty kytsa batu siwabyhy, ana humo hi tsihyrinymyrëta. Iwatahi ziwatahakaze Sesus soho ziwatahaka. Aibani zuba aparakbaha ana humo hi sihyrinymyrëtsa.

⁴² Sudeutsa taparaktsa sizubarëtsa ihumo sispirikporëtsa. Batu tyso:

– Katsaktsa Sesus humo myspirikporëtsa tsimoziknaha. Ana ty hi batu tyso. Pariseutsa pokso sipybyrëtsa ba ziktsasonaha. Sudeutsa wahoro tozeka ja kytsa ispe nabo pãotaha. Iwaze ba ziknapupunaha ana pokso sipybyrëtsa iwatsahi batu tyso “Sesus humo myspirikporëtsa” – mykaranaha.

⁴³ Pariseutsa harere bo mytsatziu nikaranaha. Kytsa harere humo zuba sakurëtsa. Deus humo ka batu. Deus harere humo tsikaeni zuba sihyrinymyrëtsa nikaranaha.

Sesus harere tsimysapyrëna baba. Izumuze kytsa Deus bo nasioktyhyryk humo iwatahi izumu.

⁴⁴ Sesus sizubarëtsa opykani nisihuahua:

– Kytsa kahumo mynakaranaha zeka kahumo sispirikporëtsa. Ata humo zikpehaka sispirikporëtsa niwatihi – niy.

⁴⁵ – Aty pikny zeka kazo kino piny. “O atakta Deus tse” my zeka Deus zikpehaka niwatihi yhÿ my – Sesus niy.

⁴⁶ – Uta mybarawy bo ikzumu. Deus harere ty pahahyrinymyry iwatahi ikzumu. Kytsa kahumo sispirikporëtsa iwatsahi simysapyrëtsa moziknaha. Kytsa iwororo ha buruk pitabakanahatsa watsa pinynaha siwatsa moziknaha. Hawa wasani mykaranaha sihyrinymyrëtsa, meky watu moziknaha. Simysapyrëtsa hi.

⁴⁷ Aty kaharere piwabykyze iwaze batu yhÿ my. Uta kino batu tyso: “O ikia Deus okzeka batu amysapy tsimy” iwa batu tyso. Utakta mybarawy bo ikzumu kytsa sizubarëtsa bo my. Sizubarëtsa simysapybyitsa nikaranaha kahumo meky watu moziknaha zeka Deus bo mysiockyhyk. Iwatahi ikzumu.

⁴⁸ Asaktsa kahumo batu sispirikpo. Kaharere bo batu yhÿ mykaranaha. Usta ispe: “Ikiahatsa Deus okzeka batu ahamysapy tsimykaranaha” my. Deus aparakbaha mynasihyrikpoze ispe my: “Ikiahatsa Deus okzeka batu ahamysapy tsimykaranaha”. Utakta ahasoho ty batu tyso. Usta iwa motsasoko. Kytsa kaharere bo batu yhÿ mykaranaha zeka iwa ispe my.

⁴⁹ Hawa motsasoko kazo harere my. Iharere hi ahabo motsasokoro. Hawa pahahyrinymyryky iharere zuba mykara. Usta harere ty ka batu tyso. Kazo harere zuba motsasoko.

⁵⁰ Iharere bo hyĩ tsimaha zeka meky watu tsimoziknaha. Ahamys-
apyrẽtsa tsimoziknaha. Tsimyhyrikosokdanahaze Deus tuk ahawahi tsimy-
napykyryknaha. Ana humo hi kahyrinymyrẽta. Iwatahi iharere zuba
motsasoko – Sesus niy.

13

Sesus tuk zinymyrykynahatsa nisipyrypikik.

¹ Byriri Paskoa maha taeze myikaha nakymy. Sesus zinymyrykyna-
hatsa tuk tadisahaka. Sesus sihumo tsimypokzitsiarẽta. Abahi mo-
hyrikosokda naha humo tsihyrinymyrẽta. Tazo bo piksizo ana humo hi
tsihyrinymyrẽta. Iwatahi tahadisahanahaze hawa sihumo tsimypokzit-
siarẽta mysiwatawyky. Sihumo tsimypokzitsiarẽta nikara.

² Zinymyrynahatsa tuk tadisahaka. Sudas Iskariotses Sesus sukyrytsitsa
bo pioktyhyryk. Sesus soho sukyrytsitsa bo motsasoko. Sudas Iskariotses
Simotse my. Hyrikoso sapybara pehakatsa Satanas humo Sudas Iskariotses
Sesus isukyrytsitsa bo pioktyhyryk isopyksapybyita nikara.

³ Sesus ana humo hi tsihyrinymyrẽta nikara. Atahi:
– O Deus tazikwy ty kabo nynyty niy. Deus kazo zikpeha. Aba Deus bo
piksizo – niy. Ana humo kino Sesus tsihyrinymyrẽta.

⁴ Kyik niyze takpyzazawy ty zukata niy. Iwaze takwiwy ty okok niy.
Tazikuoik humo haĩ niy.

⁵ Iwaze pihik ty mypewy bo zisusuku niy. Maraksu maraksu nikara.
Zinymyrykynahatsa nisipyrytsapikik. Tapara zipyrypikik iwaze zipyrywiki.
Usta bo zipyrypikik iwaze zipyrywiki. Siwatu nisipyrytsapikik.

⁶ Iwaze Simaõ Peduru bo zumuze. Peduru:
– O hawa sa tsimy tsipikpyrytsapik sa – niy.
⁷ – Yhĩ my. Aba nawa humo papyrytsapikik batu ahyrinymyry. Aibani
zuba tsipinymyry amy humo papyrytsapik iwatahi aibani zuba tsipinymyry
– Sesus niy.

⁸ – O batu ba niy. Ikiakta ba zikpyrytsapik – Peduru niy. Sesus ipe niy:
– Aty pyrytsapik ahabyizeka batu katuktsa tsimy – niy.
⁹ – Tsipikpyrytsapik zuba taziwazy. Katsyhyrypetsa tuk tu iwaze kaharek
tuk tu tsimy hĩ – niy.

¹⁰ – Tsinamurukunahaze batu ahakpiaktsĩ. Tsahabarazarẽtsa. Deus aha-
sopyksapybyitsa tu tsikykarahanahaze pahaokzohik iokzeka nimuruku tawata
tsimoziknaha. Deus botu ahamysapybara ty tsikykarahanahaze iwata tu pa-
haokzo iwatahi inamuruhuknahatsa watsa tsimoziknaha. Estuba zuba
ahatuk imysopyksapybyita tu nikara ba ziokzo. Imysopyksapybyita tu
nikara tsiaktsiarẽta wata niy.

¹¹ Estuba sisukyrytsitsa bo moparak isopyksapybyita mykara ana humo
hi tsihyrinymyrẽta iwatahi “Estuba ahatuk imysopyksapybyita tu mykara ba
ziokzo” – niy.

¹² Nisipyrytsapikbaze takpyzazawy ty korobykzo niy. Hwibihi mydisa-
hakawy bo zinymyrynahatsa tuk tadyhyzo niy. Ispe niy:
– Ahapyrytsa pikbaze ahahumo ka sa tsihokdarẽna niy.

¹³ Ikiahatsa kape tsimykarana: “Mypehakatsa myhyrinymyrykytsa” tsimykarana. Wasani
tsimykarana. Ahapehakatsa. Ahahyrinymyrytsa my.

¹⁴ Iwaze pahatsumuẽhĩkĩ iwatsahi ikiahatsa kino niwathi ustsya kytsa
tysitsumuẽhĩnahaktsa!

¹⁵ Ikiahatsa kawatu tynakaranahaktsa! Ahapyrytsa pikiknaha wa. Iki-
hatsa ustsya tysitsumuẽhĩnahaktsa! Utakta batu tyso:

“O uta sipehakatsa my. Iwatahi batu isty tsumuẽhĩ.” Utakta ahatsumuẽhĩkĩ. Ikiahatsa kawatu ahamytsumuẽhĩhuktsa! Tyharape tsumuẽhĩnahaktsa tsimykaranaha.

¹⁶ Kaharere tsiwabyziukunahaktsa! Sitsumuẽhĩtsa pehatsa wa sukni ahabyita my. Zipehata tohi zipehaka harapewa sukni ahabyita my – niy.

¹⁷ – Abaka ahahyrinymyrẽtsa tsimaha. Kaharere bo tsimykaranaha zeka ahakurẽtsa tsimoziknaha hỹ.

¹⁸ Ikiahatsa bo motsasoko. Asahi nisiwatawyhik. Estuba ahatuk kasukyrytsitsa bo pikoktyhyryk. Imyspihikbatanikita iwatsahi pikbezenaha ana humo hi kahyrinymyrẽta. Hawa ha ty Deus papeu humo tubabatu ziwatahaka atsatu my:

“Estuba maku katukta isopyksapybyita mykara. Atakta kadisahawy ty katuk hauk my ata hi isopyksapybyita my” niy.

¹⁹ Byri puẽtsik kytsa pikbezenaha ana kino ahabo motsasoko. Iwaze pikbezenahaze kaharere humo tsimyspirikponaha.

²⁰ Kaharere tsiwabyziunahaktsa! Atakta pipehahik ihumo tsikspirikpokoze kahumo tsaspirikporẽta hỹ. Atahi kahumo tsikspirikpoze atakta zikpehahik niwatihi ihumo tispirikporẽta hỹ – niy.

Sesus ispe niyzo: – Estuba maku ahatukta kasukyrytsitsa bo pikoktyhyryk – niy.

²¹ Iwa nitsasoze tisukatsihikrẽta niy. Zinymyrykynahatsa pe mypubaraty niyzik.

– Tsiwabyziukunahaktsa! Estuba maku ahatukta kasukyrytsitsa bo pikoktyhyryk. Imyspihikbatanikita – iwa sizubarẽtsa bo nitsasoko.

²² Iwaze ziwabynaha tsahi paikpa mytsaty nikaranaha. Asa zuba ni-pamykysokonaha:

– O aty skaraba. Aty sisukyrytsitsa bo sa pioktyhyryk – nikaranaha.

²³ Zinymyrykta hi Sesus ihumo tsimypokzitsiarẽta. Atakta ibaze tu nidyhyky.

²⁴ Iwaze Simaõ Peduru tatsyhyrype ty pawyk niy, zinymyrykta pe niy.

– “Aty skaraba asukyrytsitsa bo paoktyhyryk” iwa Sesus pe tsimy – niy.

²⁵ Iwaze zinymyrykta hi Sesus bo okmymy niy. Akbyibatu ipe niy:

– Aty skaraba asukyrytsitsa bo paoktyhyryk – niy. Sesus:

²⁶ – Estuba katuk tamihi ty tumy bo sok my tahi kasukyrytsitsa bo pikoktyhyryk atsatu tsakyhy ty ibo nyny my – niy.

Iwaze atsikara ty okok niy. Zitsakze tumy bo sok niy. Iwaze atsikara tsakyhy ty Sudas Iskariotses bo nyny niy.

²⁷⁻²⁹ Sudas atsikara tsakyhy zioke Sesus ekze niparak. Satanas harere bo hỹ niy. Iwatahi hyrikoso sapybara ituk mynapykyryknaha. Sesus ipe niy:

– Aidytykta! Hawa tsimyzeka aidytykta – niy.

Sudas zinymyrykynahatsa okyrysaro zikziperykta. Iwaze wastuhu kytsa mytsaty ahabyitsa nikaranaha.

– O mydisahawy bo ja – nikaranaha. Utsa kytsa:

– O sinamybykitsa bo okyrysaro ty nyny my. Ana humo hi Sesus ipe niy: “Aidytykta”. – mytsaty ahabyitsa nikaranaha.

Batu aty tohi Sesus harere bo siwabyhy. Sihyrinymyrybyitsa tu Sudas niparak. Amy humo nitsaso – Aidytykta! Hawa tsimyzeka aidytykta – niy. Anahi nitsasoze zinymyrykynahatsa batu sihyrinymyry. Iharere sihumo tsihokdaharẽna.

³⁰ Sudas atsikara tsakyhy zioke eze zoihik. Zunubaze niparak.

Kaharere ezytyk ahape: – Tyharape pokzitsinahaktsa kytsa! – niy.

³¹ Iwaze Sudas niparakze Sesus ispe niy:

– Utakta ikzumuta maku babata ahawata ikyzik. Abahi mohyrikosokda. Aba kazo piwatawyky “Ikia azikwyrënikita tu tsamypokzitsiukrëta tsamysapyrëta awa suknihabiyita” mykara. Kytsa sizubarëtsa kahyrikosokzawy humo Deus bo mosakibazikiknaha. “O Deus azikwyrënikita tu tsimypokzitsiukrëta. Tsamysapyrëta” mykaranaha.

³² Mytsasokoze “O Deus azikwyrënikita tu tsimypokzitsiukrëta tsimysapyrëta”. Deus kino niwatihi kasohe motsasoko “Katse zikwyrënikita tu tsimypokzitsiukrëta tsimysapyrëta”. Abahi iwa piwatawyky – niy.

³³ – O kahyrytsa watsa bykyhyze ahatuk zikurubyita tu. Abahi tsikpikberinahaze ba zik zikahanaha. Hana bo my ikahatsa kapik ba zik zikahanaha tsimaha. Iwa botu Sudeutsa bo iktsaso. Atsatu ahabo motsasoko – niy.

³⁴ Puëtsik pahahyrinymyryky – Nawa ahahumo kamypokzitsiarëta ikiahatsa niwatihiktsa. Pahasapywyky ziknakara. Ikiahatsa niwatihiktsa. Utsa bo tsisapywykynaha tyharape pokzitsikinahaktsa! – niy.

³⁵ – Tsinaharape pokzitsikinaha zeka kytsa tihi: “O Sesus tyryktsa” mykaranaha – Sesus niy.

Sesus Peduru nizukpeheze – O batu Sesus kanyhy tsimy – niy.

³⁶ Iwaze Simaõ Peduru ipe niy:

– Hana bo sa ikia tsimykuru – niy.

– Aba hana bo my ikiakta ba kapik zikykta. Ikiakta pyktohitykta kapik tynao – niy.

³⁷ Peduru Sesus pe niyzo:

– Hawata sa uta batu apik my. Abaka ikia apik my. Hawa ikia apik batu yhy tsimykara. Uta kino atuk tu apokzi mohyrikosokda – niy.

³⁸ – Paze! kapokzi tsimyhyrikosokda ja niy. Kaharere bo mytsatytykta! Kokuaro ipobyize harakykbyi “Batu Sesus kanyhy” mybarapetu tsimykara – Sesus niy.

14

Sesus humo hi Deus hyrytsa tsimoziknaha, atahi myske wata.

¹ Sesus tuk zinymyrykynahatsa pe niy.

– O mytsaty mytsaty byijataha. Ahasukatsihikbyihu ja tynakaranaha! Ikiahatsa Deus humo ahaspirikporëtsa. Kahumo kino niwatihi ahaspirikporëtsaktsa kytsa!

² Wahoro zuba kazo baze my. Ikiahatsa tsyhyryze wahoro tsizubarëna. Wahoro ahabyizeka ikiahatsa bo ba ziktsaso. Abaka ahatsyhyryze pahawanusapy. Ba ahabyizeka ahape ziky.

³ Aba piksi. Ahawanu sapy pikymy zeka ahabo myziksizo. Pahaoktyhyryk. Iwaze katuk tsinapykyryknaha. Ahawahi katuk tsinapykyryknaha. Katuk tu tsipahasapynaha.

⁴ Ske tsinybanaha. Hana bo mokuru naha bo hi tsinymyrykynaha hÿ – niy.

⁵ Tome:

– Hana bo sa tsimykara katsaktsa batu myhyrinymyry. Asapy sa haneze katsaktsa batu myhyrinymyry. Iwatsahi hawa sa nabo tsimykurunaha ana humo hi batu myhyrinymyry hÿ – niy.

⁶ Sesus ispe niy:

– Uta hiba ahaske wata buruk kazo sapy bo pahaoktyhyryk. Utakta Deus harere baba ty pahahyrinymyryky kahumo zuba meky watu tsimoziknaha. Ahamysapyrëtsa kahumo tsimoziknaha. Ikiahatsa kahumo zuba Deus bo tsipomonaha.

⁷ Abaka ikiahatsa botu tsiknynaha hỹ iwatsahi kazo kino niwatihi tsiny-naha. Hawa ikykara naha bo iktsa tsikykaranaha zeka anawa hi kazo mykara ahahyrinymyrẽtsa hỹ – Sesus niy.

⁸ Piripi Sesus pe niy:

– Azo ty mybo tsiwatawykta! Azo bo iktsa tsimaha zeka mykurẽtsa tsimaha – niy.

⁹ – O Piripi tubabatu ahatuk ziknapykyryk. Iwatatu sa batu katyny. Ahatuk tu ziknapykyrykta tu batu katyny niy. Aty pikny zeka ata kino niwatihi kazo ziny. Iwatahi amo humo sa tsimytsasoko. “Azo ty mybo tsiwatawykta! tsimy” – niy.

¹⁰ – Uta kazo wata anatyhi yhỹ tsimaha katsa harapewatsa tu. Batu kaharere zuba ahawabyhy. Kazo harere kino ahabo motsasoko. Hawa kazo nitsasoko naha hi motsasoko.

¹¹ Uta kazo wata. Harapewatsatu tsimaha. Kaharere bo tsikaeni zuba yhỹ tsimaha zeka iwaze kazikwy humo tsimyspirikpotohinaha – niy.

¹² – O wabyziutahaktsa kytsa. Katuktsa kahumo sispirikporẽtsa kawa tu sisopyk. Uta kazo bo piksize izikwy piwatawy. Hawa kytsa bo kazikwy humo iwatawy katuktsa kino niwatihi kazikwy humo kytsa bo piwatawynaha. Kazo bo piksize iwatsahi katuktsa kazikwy tsizubarẽna kytsa bo piwatawykynaha.

¹³ Kabo tsinapamykysokonaha zeka “Hawa ha ty tsimyzehikiknaha ana hi tsinazapykykynaha” tsimykaranaha. Iwaze hawa ha tsinazapykykynaha anatyhi ahabo nyny mynakara. Kytsa tihi: “O Deus amysapyrẽnikita” mykaranaha. Hawa ha ty tsikzapykykynaha ty ahabo nyny myze kytsa Deus soho “imysapyrẽnikita” – mykaranaha.

¹⁴ Ikiahatsa kabo tsimypamykysokonaha zeka:

– Hawa ha tsimyzehikiknaha ty zuba tsimykaranaha. Iwaze anahi tsimyzapykykynaha atsatu ahabo nyny mynakara. Tsizubarẽna ty ahabo nyny mynakara – niy.

Sesus tazo pe: – O kazo usta atsumuẽhĩtsa kawata katuktsa bo tyzipehahikta – niy.

¹⁵ Sesus tihi:

– Ikiahatsa kahumo ahamypokzitsi zeka kaharere bo hyỹ tsinakaranaha – my.

¹⁶ Kazo pe my zeka:

– O kazo usta tsumuẽhĩtsa katuktsa bo myzipeha. Usta tsumuẽhĩtsa kawata tyzipehakta my. Iwaze ihyrikoso myzipeha. Pahahyrinymyry, tawahi ahatuk mynapykyryk.

¹⁷ Kytsa kahumo batu sispirikpo asahi iharere bo batu yhỹ zikaha. Iharere sihumo tsihokdahaarẽna. Iharere humo ka batu sihyrinymyry. Ikiahatsaktsa tsahyrinymyrẽtsa. Iharere kino ikiahatsa humo batu ihokzaha – niy.

¹⁸ – Bakta kawahi paharekta ziwazy. Ahabo myziksizo.

¹⁹ Aba nurũbabatu kytsa kahumo sispirikpobyitsa ba ziknyzonaha. Ikiahatsa iwatsa tu tsipiknyzonaha. Ikiahatsa niwatihi tsimynahyrizikponaha. Iknahyrizikpo naha humo ahamysapyrẽtsa tsimoziknaha.

²⁰ Uta kazo harere bo hyỹ mynakara. Ikiahatsa kaharere bo hyỹ tsinakaranaha. Uta kino niwatihi ikiahatsa tuk yhỹ mykara. Iwa mysopyk tsimykaranaha. Bykyze ana hi tsipinymyrykynaha.

²¹ Aty kaharere bo hyỹ my zeka atahi kahumo tsimypokzitsiarẽta mykara. Atahi kazo mozipokzitsiki. Uta niwatihi mozipokzitsiki. Kasoho humo pinymyryky. Kasoho humo tsihyrinymyryrẽta mozik – niy.

²² Sudas Tadeu tihi:

– Hawa skaraba mybo zuba asoho tsipiwatawyky Asaktsa ahumo sispirikpo ahabyizeka asoho batu tsipiwatawy. Hawa tsimy – niy. Iwa Sudas nitsaso. Atakta batu Sudas Iskariotses. Usta Sudas Tadeu inarokota.

²³ Sesus nitsasokozo:

– Asaktsa kahumo simypokzitsirêtsa kaharere bo hyÿ mykaranaha. Kazo sihumo tsimypokzitsiukrêta, iwatahi situk mynapykyryk. Kazo situk mynapykyryk. Uta niwatihi katsa situk mywahi tsinapykyryknaha.

²⁴ Sispirikpobyitsaktsa kaharere bo batu yhyÿ zikaha. Kaharere kazo botu nitsasoko ana kino tsipiwabynaha. Kazo zikpeha iharere hi motsasoko.

²⁵ Ikiahatsa tuk tihi motsasoko.

²⁶ Kyze kazo hyrikoso ahabo pipehahik. Kaharere humo tahyrikoso ahabo myzipeha. Atahi ahatsumuêhÿtsa mozik. Pahahyrinymyry. Uta ahahyrinymyryky ana humo hi batu ahaspiriktsokdahu. Kaharere ty pa-haspirikpoziuku. Deus hyrikoso tsimysapyrêta hÿ.

²⁷ Kytsa kahumo batu sispirikpo paikpa mytsaty mykaranaha. Katuktsa batu sispirikpobyitsa watsa. Utakta batu paikpa mytsaty mykara. Iwatahi ikiahatsa kawata mytsaty mytsaty byitaha. Ahakurêtsa tsimaha. Kahumo ahapyby byihu ja. Kahumo ka ahasukatsihik byihuja. Kahumo tyspirikpokonahaktsa iwatsahi tsahapunihikrêtsa tsimoziknaha – niy.

²⁸ Botu tsiwabykynaha:

– Utakta piksi. Bykyze myziksizoze ahatuk mynapykyryk. Anahi motsasokoze tsiwabykynaha. Uta kazo bo. Kaharere bo ma tahaktsa. Kazokta abazubata my. Iwatsahi ahakurêtsa tsimahaktsa kytsa! Kazo humo ahamy-pokzitsirêtsa. Tsiplikpokzitsikinaha zeka ahakurêtsa tsimoziknaha.

²⁹ Aba motsasoko kyze piksi.

“Piksi zeka kahumo ahaspirikporêtsa” – mytsaty mykara. – Aba piksi hawa ahabo iktsasoko, ana humo hi ahaspirikporêtsa.

³⁰ Aba Satanas harere humo kytsa kahumo batu sispirikpo ispehatsa atahi kabo mozumu. Iwatahi ahabo tsikaeni zuba motsaso. Atahi batu kakzotsabyita. Iharere bo yhyÿhabyita ziknakara – niy.

³¹ – Uta kazo harere bo zuba hyÿ mynakara. Kazo humo kamypokzitsiarêta mykara. Iwatahi iharere bo zuba hyÿ mykara. Kytsa kahumo batu sispirikpo asa bo hi piwatawyky. Utakta Deus harere bo zuba hyÿ mynakara anabo hi mysiwatawyky – niy.

– Kyikyitahaktsa. Tupaktsa kytsa! – niy.

15

Sesus hi duabohotsa sa wata.

¹ Kyze Sesus:

– Uta hi duaboho taypykze mytahara tawata my. Kazo waratok tsihitsa wata my. Waratok eze duabohozatsa nisiparikik.

² Katukytsa duabohotsa sakatsa watsa maha. Asahi kazo harere bo batu zikahabyitsa sisakatsa watsa, asaktsa ziktaharanaha ahabyizeka tahasazyzykykwynaha. Utsaktsa siharahoktsa tsihitsa duaboho taypykze sisupesapy mysisakakare zeka iwatsahi nataharasukbabyinaha. Iwa kazo tihi mykara. Katuktsa iharere bo batu yhyÿ mysisakakareke tawata. Kazo katuktsa situk mynapamykysoko iwatsahi simysapybyitsa nikaranaha pimowynaha iwa mysitsumuêhÿkÿ. Hawa sibo mykara wasani my ana humo hi simysapyrêtsa tohi mykaranaha hÿ.

³ Kazo ahamysapybyitsa tsikykaranaha botu zahaokzohik. Kaharere bo hyÿ tsimykaranaha zeka ahamysapybara ty botu zahaokzohik.

⁴ Kaharere bo hyĩ tynakaranahaktsa kytsa! Kaharere bo hyĩ tsimaha zeka uta ahatuk mynapykyryk. Atsa botu mytsaty tsimykarana. Mykurētsa tsimoziknaha. Duabohotsa sa ypyk ahabyizeka ba ziktaharanaha. Ikiyahatsa niwatihi. Kaharere bo yhyĩ ahabyi zeka kazo tuk kino niwatihi batu yhyĩ tsimaha. Hawa kazo mozihikik batu ahahyrinymyry – Sesus niy.

⁵ – Uta duabohotsa sa taypyknahaze mytaharanahaze tawata. Ikiyahatsa duabohotsa sa watsa tsimaha. Kaharere bo hyĩ tsimaha zeka Deus okzeka ahamysapyrētsa tsimaha. Uta kino niwatihi ahatuk yhyĩ mykara. Katsa mykurētsa hi. Ikiyahatsa kaharere bo batu yhyĩ ahabyizeka hawa tsimaha Deus okzeka batu ahamysapy. Hawa tsimaha Deus okzeka mahani tsimaha – niy.

⁶ – Asaktsa kaharere bo yhyĩ ahabyi zeka sipaparahatsa watsa. Waratok tsihitsu siharabyitsa nisizyzykyk izo bo nisiwezohik. Mynaparanahaze izo bo piwezona. Ikiyahatsa niwatihi katuk tsimynapykyryknaha ahabyizeka ahakubyitsa tsimaha – niy.

⁷ Iwatsahi kaharere bo hyĩ tynakaranahaktsa katuk tsimykarana, katuk tsinapykyryknaha zeka amy ty Deus bo tsinazapykykynaha atsatu ahabo nyny my.

⁸ Ikiyahatsa kazo harere bo hyĩ tsimykarana zeka kytsa kazo pe maha:
– O ikia tsamysapyrēta – mykarana. Iharere humo hyĩ tsimykarana zeka kytsa ahasoho motsasokonaha:

– O asahi Sesus tuktsa maha – mykarana.

⁹ – Uta ikiahatsa humo kamypokzitsiarēta. Kazo wata atahi kahumo tsimypokzitsiukrēta my. Ahakuhuktsa kytsa! Sesus myhumo tsimypokzitsiukrēta. Iwatsahi ahakurētsa.

¹⁰ Kazo harere bo hyĩ mynakara. Iwatahi kazo kahumo tsimypokzitsiukrēta. Iwaha bo hi mytsaty mykara zeka kakurēta hi. Ikiyahatsa kino niwatihi kaharere bo hyĩ tsimykarana zeka ahakurētsa tsimoziknaha. Sesus katsa myhumo tsimypokzitsiukrēta. Iwaha bo hi mytsaty tsimykarana zeka ahakurētsa tsimoziknaha – niy.

¹¹ – Iwa motsasoko iwaze kahumo ahakurētsa tsimoziknaha. Uta kakurēta hỹ. Ikiyahatsa tsikaeni zuba ahaku zeka batu myzehikik. Ikiyahatsa ahakurētsa babatsa tsimoziknaha zeka iwa hi myzehikik. Kawatsa tsimaha. Kakurēta hi – Sesus niy.

¹² Ahape mykara:

– Tynaharape pokzitsikinaha! Ahakyri byihuja. Uta pahapokzitsiki ikiahatsa kawa tihi tynakaranahaktsa.

¹³ Aty tatuktsa pokzi mohyrikosokda zeka kytsa mykarana:

“O atakta itukta humo tsimypokzitsiarēta”. Myhyrikosokdaze iwa itukta humo tsimypokzitsiukrēta hiba – nikarana.

¹⁴ – Ikiyahatsa kaharere bo hyĩ tsimykarana zeka ikiahatsa katuktsa babatsa – my.

¹⁵ Ahasoho ty batu tyso – O asahi katsumuēhĩtsitsa mykarana. Hawa tsihitsu mykara tatsumuēhĩtsitsa bo batu tyso. Ahahumo meky watu kasopyk. Ikiyahatsa kaharereziuwyttsa tsimoziknaha. Nawa kazo kabo nitsasoko atsatu ahabo motsasoko. Iharere ahabo botu iktsasoba.

¹⁶ Ikiyahatsa humo ka batu kawatawyhy “O katsaktsa atuktsa tsimoziknaha” tsikaha. – Iwa batu tyso. Uta hi ahawatawyhik.

– Asahi katuktsa moziknaha – iky. Iwa motsasoko.

– Utsa bo pahapehahik iwatsahi kahumo sispirikporētsa ahaharere humo. Asahi kahumo sispirikporētsa hi. Amy ty Deus kazo bo tsinazapykyknaha zeka kaharere humo iwatsa tu ahabo nyny my.

¹⁷ Ahatuk napykyknahaze tynaharape pokzitsikinaha – iwa mykarazo.

Kytsa Sesus humo sispirikpobyitsa hi iwatsahi Sesus tuktsa nasisukyrykynaha.

¹⁸ Sesus nipamykysokozo:

– Kytsa kaharere bo yh̄y ahabyi zeka asahi kahumo tahakyrikinaha iwatsahi ahabo kino niwatihi batu siakparawy. Pahamyijakanaha. Pahasukyrykynaha. Taparaka batu kahumo siakparawy ana bo hi mytsatyziu-tahaktsa kytsa – niy.

¹⁹ Ikiyahatsa mekywatsa tu tsimoziknaha. Asahi Deus humo batu siakparawy siwatsa batu tsimykaranaha. Uta hiba ahawatawyhik katyryktsa tsimoziknaha iwatsahi kytsa ahahumo batu simypokzitsiu. Iwatsahi tahakyrikinaha. Pahamyijakanaha. Pahasukyrykynaha. Ikiyahatsa siwatsa tsimyzurukunaha zeka ahahumo siakparawy.

²⁰ Kaharere bo wabyziutaha! Ahatuk tu ka tysosobyijataha:

– O kapehatsa zisukyrykynaha. Katsaktsa batu. Batu myty myija – mytsaty ahabyitsa tsimykaranaha. – Kytsa kahumo batu sispirikpo zikapikiknaha. Iwatsahi aha humo kino niwatihi pahapikiknaha. Kaharere bo ma ahabyitsa ziknakaranaha ahaharere bo niwatihi batu ma zikaha – niy.

²¹ – Kapokzi ikiahatsa sinini tsimykaranaha. Kytsa kaharere bo yh̄y ahabyizeka pahasukyrykynaha. Deus zipehata humo batu sispirikpo iwatsahi pahasukyrykynaha.

²² Uta sibo zuk ahabyi zeka Deus okzeka wasani mykaranaha tsawatsa. Deus harere ty sibo tyso ahabyizeka Deus okzeka wasani mykaranaha tsawatsa. Uta ikzumutawy. Kaharere bo batu yh̄y mykaranaha iwatsahi Deus okzeka batu simysapy mykaranaha – niy.

²³ – Kytsa kahumo batu siakparawy. Kahumo tahakyrikinaha kazo humo kino niwatihi tahakyrikinaha. Asahi ihumo tahakyrikinaha iwatsahi batu siakparawy.

²⁴ Kazikwy tsizubarēna bo iwatawyky. Utsa zikwy tsikaeni zuba. Utakta kazikwy tsizubarēna. Batu aty tohi zikwykyta. Kazikwy ty tyny ahabyizeka wasani mykaranaha. Kazikwy zynynaha. Zynynahatsa tu kahumo batu sispirikpo. Iwatsahi Deus okzeka batu simysapy mykaranaha. Batu wasani mykaranaha kazo batu siakparawy. Uta kahumo kino niwatihi batu siakparawy mykaranaha – niy.

²⁵ Deus papeu humo sisoho botu ziwatahaka:

– Batu isty myi. Batu aty tohi humo ykyrisukni. Iwatsa tu kahumo ziknatakyrikinaha – niy.

²⁶ Kazo bo piksizoze ipe my:

– O kazo ahyrikoso tsipehahikta. Katuktsa bo tsipeha – my.

– Iwaze ikiahatsa bo pipeha. Atahi pahatsumuēhīkī. Hawa wasani atsatu pahahyrinymyryky. Kasoho ty pahahyrinymyryky.

²⁷ Ikiyahatsa kino niwatihi. Kasoho humo kytsa tysihyrinymyrykynaha. Ikiyahatsa katuk tapara tu tsikapykyrykynaha. Iwatsahi kasoho humo kytsa ty tysihyrinymyrykynaha – niy.

16

¹ Sesus:

– Kyze iwa ahabo tsizubarēna iktsasoko. Bykyze kytsa ahape mykaranaha:

“O Sesus harere bo batu yh̄y tsimaha! Ihumo niwazuba tsimahaktsa!” mykaranaha. Iwaze kaharere bo mytsaty tykaranahaktsa. Iwatahi tsizubarēna ahabo motsasoko.

² Kytsa ahahumo tahakyrikinaha. Asahi ahape: “Sudeutsa wahoro bo ba zikpupuzonaha” mykaranaha. Pahaba tsihikiknaha. Pahabanahaze iwa mytsaty mykaranaha. “O Deus okzeka wasani tsimykaranaha” mybarapetu mykaranaha.

³ Zahasukyrykynahaze kazo humo batu sispirikpo. Kahumo niwatihi batu sispirikpo iwatsahi pahasukyrykynaha.

⁴ Iwatahi ahabo motsaso. Aibani kaharere bo mytsaty tsimykaranaha. Pahasukyrykynaha zeka ahatur zuba tsimypamykysokonaha “O tapara mypehatsa iksibyize mybo botu nitsaso. Kytsa mymysukyrykynaha anahi botu nitsaso tsimaha” – niy.

Deus hyrikoso pahatsumuēhĩ.

⁵ Sesus nitsasokoze:

– Abaka zikpehata bo piksizo. Batu aty tohi kape ziky hana bo sa tsimy. Iwa batu tyso.

⁶ Piksizo zeka ana humo hi ahasukatsihikrētsa. Iwa motsasoko ahasukat-sihikrētsa.

⁷ Hawa tisapyrēna motsasoko. Erete ahabyizeka Deus hyrikoso ba ziknasik. Ahatsumuēhĩtsa ba zikzumu. Piksi zeka ahabo myzipeha. Iwatsahi ahakurētsaktsa kytsa. Kazo bo piksizo ana humo hi ahakurētsa tsimoziknaha – niy. Atsatu tsinakaranaha. Iwatahi taparaka ahape ziknakara.

⁸ Myzumuze kytsa kaharere humo batu sispirikpo atahi ispe my:

– Kytsa kahumo batu sispirikpo Deus okze batu simysapy mykaranaha. Deus zuba kytsa humo nasisyapywyky. Ihumo zuba simysapyrētsa moziknaha. Kytsa simysopyksapybyitsa nikaranaha humo pisininiwyky iwa Deus hyrikoso mynasikze motsaso.

⁹ Kytsa kahumo batu sispirikpo iwatsahi Deus okze batu simysapy mykaranaha ziknaharapesapybyrikinaha. Kahumo batu sispirikpo iwatsahi simysapybyitsa mykaranaha. Kaharere bo batu yhĩ zikaha iwatsahi ziknaharape sapybyrikinaha batu simysapy mykaranaha.

¹⁰ Kazo bo piksizoze ba ziknywyzo. Jobo kazo bo myzo ba ziknywyzo. Deus hyrikoso kytsa pe: “Sesus tisopyksapyrēta wasani isopyk” – mykara.

¹¹ Deus botu nitsaso. Taparakta kytsa Sesus harere bo batu yhĩ niy Satanas inarokota sininiwy mykara. Iwatahi Deus hyrikoso kytsa pe simysapybyitsa nikaranaha asahi Deus mysisininiwyky.

¹² Ahabo motsaso tsihikik tsizubarēna my. Abaka ba ziktsasozo. Ahasukat-sihikrētsa iwatahi ahabo ba ziktsaso.

¹³ Hawa wasani Deus hyrikoso pahahyrinymyryky. Myzumuze hawa wasani motsasoko. Taharere ka ba ziktsaso. Tapara botu ziwaby ana kino ahabo motsasoko. Hawa aiba tohi mykara ana humo kino pahahyrinymyryky.

¹⁴ Pahahyrinymyryze Sesus tisopyksapyrēta wasani mykara iwa kytsa ihumo motsasokonaha. Wasaniha ty zuba ahabo motsasoko.

¹⁵ Kazo mykara naha ty uta kino niwatihi mynakara. – Deus hyrikoso harere ahabo motsasoko – niy.

Ahasukatsihikrētsa tsimoziknaha. Bykyze ahakurētsa tsimozikzonaha.

¹⁶ Sesus nitsasokoze:

– Abanurybabatu piksi, kabo ba ziknynaha. Aiba zuba kabo tsipiknyzonaha – Sesus niy.

¹⁷ Zinymyrykynahatsa asa zuba nikaranaha:

– Hawa skaraba mykara. “Abanurybabatu piksi. Kyze kabo ba ziknynaha. Utakta kazo bo my niy.” Hawaha skaraba mybo nitsasoko. Iharere tsihokdaha-rēna.

¹⁸ Amy humo “aiba zuba tsipiknyzonaha”. Iharere myhumo tsihokdaha-rēna – nikaranaha.

¹⁹ Sesus amo zinymyrykynahatsa mytsaty nikaranaha ana humo kino tsihyrinymyrēta. Iwaze ispe niy:

– Ahabo motsasokoze “abanurybabatu piksi. Kabo ba ziknyzonaha. Aiba zuba kabo tsipiknyzonaha hỹ”. Ana hi ja tsimytsasokonaha – niy.

²⁰ Ikiyahatsa bo motsasoziuku:

– Mohyrikosokdaze tsimopuziukunaha. Kytsa kahumo batu sispihik asahi batu sisukatsihik ikiahatsa zuba ahasukatsihikrētsa tsimoziknaha. Iwaze puētsik zuba ikiahatsa tsimysukatsihikbyrinaha. Tsahakurētsa tsimoziknaha.

²¹ Wytyk ibykyhy natapyrize tisukatsihikrētatsa. Itsapyri humo tisukatsihikrētatsa. Ibykyhy mopurukze myitsapyripykze tsakurētatsa. Iwatatsahi tabykyhy humo tsakurētatsa iwatatsahi itsapyri humo nispiriktsokda.

²² Ikiyahatsa atatsa watsa tsimaha. Abaka ahasukatsihikrētsa. Utakta piksiki ana humo hi ahasukatsihikrētsa. Aiba ahabo myzumuze, ahakurētsa tsimozikzonaha. Batu aty tohi isukatsihik. Ahawahi ahakurētsa tsimoziknaha.

²³ Deus hyrikoso mozumuze pahahyrinymyryky. Iwatsahi kabo batu tyso “katsa mymyhyrinymyry”. Kaharere ba zikokza my. Deus hyrikoso kaharere pahahyrinymyry. Wabyziutaha! Amy ty Deus bo tsimyzapykykynaha zeka kaharere humo, ana ty hi ahabo nyny my. Deus bo tsimyzapykykynaha zeka kaharere humo wasani my ana humo hi ahabo nyny my.

²⁴ Deus bo batu tysapykyk kaharere humo yhỹ tsimaha my. Tyzapyky-nahaktsa! Hawa ha ty Deus myzehikik ana hi tsimyzapykykynahaze ana ty hi ahabo nyny my. Kazo ahabo nyny my zeka ahakurētsa tsimoziknaha. Ahakurētsa hỹ.

Sesus Satanas zikwy zipyk iwatsahi tsikahapunihiknahaktsa kytsa!

²⁵ – Taparaka kaharere tsihokdaha-rēna. Iktsasokoze kaharere tsihokdaha-rēna. Kaharere iokpitsihĩ hawa ziknaukuru. Aibani zuba kazo harere ahabo motsasoze, mahani ihokdaha. Kazo harere motsasokoze batu ihokdaha.

²⁶ Mytsasokoze iokpitsihibara wa mozik. Kazo bo hawa kaharere bo yhỹ my ana hi tsimyzapykykynaha. Utakta kazo bo batu ahatsyhyryze ba zikzapyky ikiahatsa tu kazo bo tsimyzapykykynaha hỹ.

²⁷ Ikiyahatsa hi tsimyzapykykynaha. Kazo ahaharere piwaby hỹ. Ikiyahatsa humo tsimypokzitsiukrēta iwatahi pahawaby. Ikiyahatsa kahumo ahamypokzitsirētsa iwatahi kazo ahahumo tsimypokzitsiukrēta my. Tsimytsasokonaha zeka “O Deus Sesus tsikzipeha tisapyrēna” tsimaha. Iwatahi ahahumo tsimypokzitsiukrēta.

²⁸ Kazo ikny ikzumu. Mybarawy bo iknasik. Mybarawy ezeiksa bo ikzumu. Mohyrikosokdaze kazo bo piksizo – niy.

²⁹ Zinymyrykynahatsa ipe niaha:

– Abaka tsiwabyziukunaha. Aharere mahani ihokdaha. Abaka ipitsihibara ty tsimytsasoko.

³⁰ Ikiahi tsihyrinymyrēta. Tsizubarēna humo tsahyrinymyrēta hỹ. Amy bo mytsaty tsimykarannahaze anahumo hi tsahyrinymyrēta. Iwatsahi “Hawa tsimykara” batu tyso, amy ty tsinymyrykynaha ana hi mybo tsimytsasoko. Iwatsahi “Deus zipehata babata tsimy” – tsimytsasokonaha.

³¹ – Abaka ja kahumo ahaspirikporëtsa – Sesus niy.

³² – Aba nanabyitaba tsimopaparahanaha. Kasukyrytsitsa pokso paikpa mytsaty tsimykaranaha. Ahapybyrëtsa. Kytsa pahabezenaha pokso iwatsahi tsimywakbaiknaha. Ahapybyrëtsa hÿ. Uta zuba motare. Tsipikarekbanaha zeka uta zuba motare. Iwaze kazo zuba katuk. Kazo zuba ba zikare – niy.

³³ – Iwa motsasoko iwatsahi mytsaty mytsaty byitahaktsa kytsa kahumo ahaspirikporëtsa. Kytsa kahumo batu sispirikpo asahi pahasukyrykynaha. Utakta sispirikpobyitsa pehatsa zikwy pepykbaik. Iwatsahi ahapunihiKrëtsa tsimoziknaha – Sesus niy.

17

Sesus tazo bo nipamykysoko.

¹ Kyze Sesus bijoikpe bo iktsa niy, tazo bo nipamykysoko:

– O kazo utakta atse babata my. Nawa ty botu tsiktsasoko kaso ho ana hi myzubaha bo iky uta kamysapyrënikita kapunihiKrënikita tsiky ana hi tsiwatawyky. Uta kino niwatihi my. Myzubaha bo iky “O Deus kazo imysapyrënikita ipunihiKrënikita iwa iksiwatawy”.

² – O Deus azikwy ty botu kabo nyny tsiky iwatsahi kytsa kahumo sispirikporëtsa. Iwatsahi kytsa meky watu moziknaha. Kahumo simysapyrëtsa moziknaha.

³ Ikia zuba Deus babata. Utakta atse babata. Ikia tsikpeha. Mybarawy bo tsikpeha. Utakta Sesus Kiristu, mybarawy bo iknasik. Kytsa kaharere bo hÿ mahaze simysapyrëtsa moziknaha. Kytsa ahumo mospirikponahaze simysapyrëtsa moziknaha. Myhumo sispirikporëtsa. Myhumo simysapyrëtsa moziknaha.

⁴ Ikia aharere botu kabo tsiktsaso, ana kino myzubaha bo iktsasoko. “Deus imysapyrënikita ipunihiKrënikita” ana kino myzubaha bo iktsasoko. Abaka kahyriziktsokzawy nepykba.

⁵ – O kazo tapara ikia tukze bijoikpe iknyktsa atsumuëhÿtsitsa kaso ho ziknatsasokonaha:

“O Sesus imysapyrënikita ipunihiKrënikita” ziknakaranaha. Tapara ikia bijoikpe mybarawy aha tsikzukni bijoikpe iknyktsitsa atsumuëhÿtsitsa kaso ho humo. “O atakta imysapyrënikita” ziknakaranaha. Abaka abo piksizoze iwa motsasozonaha hÿ – niy.

⁶ Iwaze zinymyrynahatsa tsyhyryze tazo bo nipamykysoko:

– O kazo ikia wastuhu kytsa tsiksiakzoko. Asahi atyryktsa niyzikiknaha. Ikia kytsa tsiksiakzohikze iwaze ikia humo katyryktsa niyzikiknaha. Azikwy sibo iwatawyky. Aharere bo hÿ mykaranaha.

⁷ Sihyrinymyryrëtsa mykaranaha. Hawa ha iktsasoko aharere zuba my, ana humo kino sihyrinymyryrëtsa mykaranaha.

⁸ Hawa ha ty botu kabo tsiktsasoko kytsa kahumo sispirikporëtsa atsatu iktsasoko. Aharere humo wasani mykaranaha. Ikia tsikpeha ana hi zinymyrykynaha. Ikia tsikpeha ana humo hi wasape mykaranaha.

⁹ – O kazo kakzohotsa tsyhyryze abo mopamykysoko. Utsa kytsa kahumo batu sispirikpo batu tyso. Asahi katyryktsabyitsa tu. Kakzohotsa iksihyrinymyryky sitsyhyryze zuba abo mopamykysoko.

¹⁰ Kytsa kahumo sispirikporëtsa atyryktsa moziknaha. Iwatsahi katyryktsa kino niwatihi moziknaha. Mytyryktsa moziknaha – Sesus niy.

– Kaharere humo simysapyrëtsa niyziknaha. Iwatsahi usts a kytsa kahumo sispirikpobyitsa pe maha: “O atakta imysapyrënikita ipunihiKrënikita my ityryktsa simysapyrëtsa humo maha” mykaranaha. Iwa motsasokonaha.

11 – O kazo ikia zuba wasani tsinakara. Azikwy ty botu kabo nyny tsiky. Iwatahi azikwy hi kazikwy mozik. Abaka abo piksizo. Mybarawy eze ka ba mynapykyryk. Ikia bozo my. Katuktsa mybarawy eze mynapykyryk-naha tysipokzitsiki. O kazo tysipokzitsikikta. Uta atukze atsabotu mytsaty tsimykaranaha abaka asa kino niwatihi atsa botu mytsaty mykaranaha kazo – my.

12 – Uta situk ziknakaraze kytsa kaharere bo hyĩ ziknakaranaha. Uta ziknasipokzitsiki iwatsahi kahumo sispirikporẽtsa. Myzubaha abo mysioktyhyryk. Estuba zuba katuk ba ziocky atakta batu isopyksapy. Atakta batu imysapy nikara iwatahi ba ziocky. Botu apapeu humo ziwatahaka niy. Nawa batu isopyksapy nikara, botu papeu humo ziwatahaka atsatu nikara.

13 Abatu abo piksizo. Zinymyrykynahatsa situk abo mynapamykysoko. Kaharere humo sakurẽtsa moziknaha. Uta kakurẽta asa kino niwatihi kawatsa sakurẽtsa moziknaha. Sakurẽtsa babatsa mysitsihikik!

14 Aharere botu sibo iktsasoko. Kasopyk humo sispirikpobyitsa meky watu sisopyk. Katuktsa niwatihi. Asahi sispirikpobyitsa sopyk humo meky watu mykaranaha. Iwatsahi sispirikpobyitsa katuktsa humo tahakyrikinaha. Mekywatsa humo sispirikpobyitsa tahakyrikinaha.

15 – O kazo “katuktsa mybarawy ekze ka ba ziksiokty” Katuktsa mybarawy ezektsa humo tysipokzitsikikta kazo! Hyrikoso sapybara pehatsa Satanas inarokota katuktsa ipokso sipybyrẽtsa iwatahi tysipokzitsikikta, katuktsa ikia hi tysipokzitsiki.

16 Kasopyk humo ka batu sispirikpobyitsa watsa. Katuktsa kino niwatihi. Nawa katuktsa sopyk humo batu sispirikpobyitsa watsa maha. Mekywatu mykaranaha. Kahumo simysapyrẽtsa moziknaha.

17 Aharerebaba wasani my. Aharere tisapyrẽna. Aharere piwabykynahaze ahumo hyĩ mykaranaha. Ikia harere bo zuba hyĩ mykaranaha.

18 Ikia tsikpeha mybarawy ezektsa bo tsiky. Tsikzipehaze mybarawy ezektsa iksihyrinymyryky iwatahi zikpeha. Uta kino niwatihi, katuktsa zinymyrykynahatsa mysipeha. Utsa bo mysipeha. Iwaze mysihyrinymyrynaha. Aharere baba myzubaha bo mysihyrinymyrynaha iwatahi mysipehaka.

19 Abaka katuktsa sapyzeky mohyrikosokda. Kytsa pikbezenaha zeka yhĩ my. Katuktsa pokzi yhĩ my. Mohyrikosokdaze abo hyĩ maha niwatihi. Mohyrikosokda humo katuktsa kino niwatihi aharere bo hyĩ mykaranaha.

20 Zinymyrykynahatsa soho abo motsasoko. Abaka ustsá kytsa zinymyrykynahatsa harere piwabykynahaze kahumo sispirikporẽtsa, sityhyryze abo niwatihi mopamykysoko.

21 O kazo tsimysitsumuẽhĩze sakurẽtsa moziknaha mytsaty mytsaty byijataha iwatsahi atsa botu mytsaty mykaranaha. Mywatsa sisopyk. Mywatsa sisopyk zeka sispirikpobyitsa tihi:

– Deus Sesus zipeha – mykaranaha.

22 Kazo tapara azikwy ty kabo nyny tsiky. Ikia wata uta kino kazikwy katuktsa bo nyny iky. Asahi kahumo sispirikporẽtsa iwaze kazikwy ty sibo nyny iky. Iwaze mywatsa moziknaha, asa zuba sakurẽtsa mykaranaha mywatsa kazo.

23 Utakta situk yhĩ my. Ikia katuk yhĩ tsimy. Iwatsahi sisopyk mywatsa mykaranaha. Mywatsa sisopyk zeka sispirikpobyitsa pe maha:

– Deus kino Sesus zipeha – mykaranaha. Hawa Deus Sesus humo tsimypokzitsiarẽta. Deus Sesus tuktsa kino niwatihi tsimypokzitsiarẽta iwa motsasokonaha. Mywatsa sisopyk zeka iwa motsasokonaha.

²⁴ O kazo ikia nanabyri izuknihibyize ikia zikzipokzitsiki. Tapara mybarawy nizukni kape tsiky:

– Kazikwy ty abo nyny my – tsiky. Abaka zinomyrykynahatsa kaharere piwabykynaha:

– Kazikwy ty abo nyny my – tsimy. Iwa piwabykynaha mytukze mynapykyryknaha.

²⁵ O kazo ikia zuba wasani tsimykara. Tisopyksapyrêta amysapyrênikita iwatahi kamysapyrênikita tsimy. Kytsa sispirikpobyitsa tu ikia humo batu sihyrinomyry. Uta zuba any, zinomyrykynahatsa kasoho humo sihyrinomyrêtsa. Ikia tsikpehahik tahi kahumo sihyrinomyrêtsa.

²⁶ Botu sibo iktsasoko:

– Kazo ikia kahumo tsikpokzitsiki nawa tihi asa bo kino niwatihi tsimy. Asa zuba simypokzitsirêtsa tyharape pokzitsikinaha. Iwa sisopyk. Katsa mywata ahasopyk uta situk kasopyk mytsaty mytsaty byijataha atsa botu mytsaty mykaranaha – Sesus niy.

Iwa Sesus nipamykysoko tsizubarêna tazo tuk zinomyrykynahatsa tsyhyryze nikara. Iwa.

18

Sesus tahirukwy.

¹ Kyze Sesus tazo bo nipamykysobaze niparak. Zinomyrykynahatsa tuk itsipa tsibik Kederõ inarokota zitsikzakanaha. Ana hwitsa sazik ziparikiknaha ana bo zumukunaha.

² Ana hi zinomyrykynahatsa zinyaha. Ana bo hi Sesus zinomyrykynahatsa tuk pororo ziknakara. Sudas kino ziny. Isopyksapybyita isukyrytsitsa mysioktyhyryk.

³ Atakta Sesus bo niy. Kederõ tisaziksapyrêna ibo niy. Sodadutsa, Deus wahoro perytsitsa kino niwatihi Sudas nisioktyhyryk. Taparaktsa Deus wahoro eze ziknapamykysokonahatsitsa, Pariseutsa niwatihi sodadutsa Sesus bo nisipehakanaha. Sudas isopyksapybyita iwatahi sodadutsa Deus wahoro perytsitsa kino niwatihi ibo nisioktyhyryk. Sodadutsa tahatanoratsa tahabototsa iwa inasibykyknaha. Rika izo tupyriri humo hopok nikaranaha niwatihi zibykyknaha. Sesus bo sizubarêtsa izumukunaha.

⁴ Sesus hawa mykaranaha botu tsihyrinomyrêta. Iwatahi kytsa nisi-hobykze ispe niy:

– Aty sa tsipiberikinaha – niy.

⁵ – Sesus tsipiberikinaha. Nasare ezekta – nikaranaha.

– Uta hiba Sesus – niy. Sudas imyspihikbatanikita sisukyrytsitsa tuk niriktohoko.

⁶ Nitsasokoze – Uta hiba Sesus – niyze sodadutsa. Iharere ziwabynahaze wytyk bo natsubaiknaha.

⁷ Iwaze Sesus ispezo niy.

– Aty sa tsipiberikinaha – niy.

– Sesus Nasare ezekta – niaha.

⁸ – Batu kawabyhy botu iktsaso uta hiba Sesus – niy. – Tsipikberi tsihikiknaha zeka katuktsa ty ka paik paik byitaha iwaze piksinaha – niy.

⁹ Iwa nitsasoko. Nawa botu nitsaso tazo bo:

– Uta iksipokzitsiki asahi kahumo sispirikporêtsa – niy. Iharere wasani atsatu nikara. Iwaze kytsa Sudas tuktsa tihi – O zinomyrykynahatsa ty ka paik paik byitaha – niaha.

¹⁰ Iwaze Simaõ Peduru tasokorotsapu tsizezerêta zibokik. Ziknapamykysokota Deus wahoro zubata tsumuêhĩtsa zispizykik. Ispipyryburuk niy. Marakos inarokota.

¹¹ Iwaze Sesus Peduru pe niy:

– Asokorotsapu ty ipesuk bo koroktykta! – niy.

– Niwazubakta katy pokzitsi pokzitsi byity. Uta sinini mynakara. Tubabatu Deus papeu humo ziwatahaka iwa sinini mynakara. Iwa Deus kazo botu nitsaso iwa sinini mynakara – niy.

Sesus Anas bo zioқтыhyryknaha.

¹² Iwaze kytsa Sudas tuktsa Sesus tsipa humo zioқтыhyryknaha. Sodadutsa pehatsakta Deus wahoro zubata perytsitsa sizubarêtsa iwatsa itsipa humo zioқтыhyryknaha. Zipawarakanaha.

¹³ Niahatsahi Anas taparakta bo zioқтыhyryknaha. Anas Kajapas tsere niy. Kajapas Deus wahoro zubata eze ziknapamykysokonahatsa taparakta my.

¹⁴ Atakta botu nitsaso Sudeutsa pe niy.

– Estuba zuba tsipibezenaha zeka wasani maha. Iwatsahi mytyryktsa ba zik mymybanaha estuba zubata tsipibezenaha zeka wasani my – niy.

Peduru Sesus soho: – Batu kanyhy – mybarapetu nikara.

¹⁵ Kyze Simaõ Peduru Sesus hapik niukuru. Usta zinymyrykyta Peduru tuk Sesus hapik niukurunaha. Taparakta ziknapamykysokota ziny. Atahi iwahoro pe zumu Sesus hapik wahoro isturupeze zumu.

¹⁶ Peduru batu paku ape baze tu hokbowy baze niriktohoko. Iwaze usta izoizo. Wytyk hokbowy perytsata pe niy:

– Katukta tynatsukta! tsimy – niy.

Yhỹ niy.

– Anaenze paku tsimy – perytsata Peduru pe niy. Iwaze nitsuk.

¹⁷ Inatsukze atatsa ipe niy:

– O ikia sa niwatihi Sesus tukta – niy.

– Batu kanyhy – mybarapetu niy.

¹⁸ Tsiwarikrêna. Kytsa sodadutsa tsumuêhĩtsitsa niwatihi izo zipokoknaha. Kytsa izo baze niakpyzazakaranaha. Peduru situk niriktohoko niakpyzazaka.

Sesus taparakta ziknapamykysokonahatsa bo zioқтыhyryknaha.

¹⁹⁻²¹ Iwaze taparakta ziknapamykysokonahatsa Sesus bo nipamykysoko:

– Hawa sa zinymyrykynahatsa mykaranaha Hawa ha ty sa tsiksihyrinymyryky – niy. Sesus:

– Amy humo sa kaspirikpowy soho tsimy kara Zikwabykynahatsa sihyrinymyrêtsa. Uta iksihyrinymyryky iwatsahi ispetaha. Iktsasokoze aparabaha kaharere ziwabykynaha, anatyhi iksihyrinymyryky. Batu okpitsĩ. Sudeutsa wahoro eze ziknasihyrinymyryky, Deus wahoro zubata eze ziknasihyrinymyryky. Batu amy tohi ty okpitsĩ. Iwahatu kaharere soho zikwabykynahatsitsa bo tsimy – niy.

²² Anas nitsasohoze estuba maku Deus wahoro perytsa ibaze niriktohokota tatsyhyrype ty zioкpykik. Ipe niy:

– Iwa taparakta ziknapamykysokonahatsa bo batu tyso. Batu wasani my – niy.

²³ Sesus:

– Kaharere ty wasani ahabyizeka kytsa bo tsimytsasoko. Kaharere wasani my zeka amy skaraba tsikokpykik – niy.

²⁴ Anas Sesus Kajapas bo zioқтыhyryknaha. Itsipatsa waraha tatu ibo zioқтыhyryknaha.

Peduru Sesus soho: – Batu kanyhy – mybarapetu nikarazo.

²⁵ Iwaze Peduru izo baze niakpyzazaka kytsa baze nidyhykyze wytyk ipe niy:

– O ikia niwatihi Sesus tukta sa – niy.

– O batu. Batu kanyhy – niy.

²⁶ Iwaze usta Peduru pe niy. Atahi taparakta tsumuëhĩtsa. Atahi Peduru zispizykikta tsy. Atahi ipe niy:

– Uta tisaziksapyrëna eze ikozo tawata. Sesus tukta sa ikia bo ikozo – niy.

²⁷ Peduru:

– Batu ba. Batu kanyhy. Aty skaraba Sesus – niy.

Iwa niyze hi kokuaro nipo.

Kytsa Sesus ispehatsa Piratus bo zioқтыhyryknaha.

²⁸ Iwaze Kajapas Sesus tuk nipamykysobaze ispehatsakta wahoro bo zioқтыhyryknaha. Sipehatsa Piratus inarokota iwahoro bo miwa botu zioқтыhyryknaha. Sudeutsa Piratus wahoro bo batu paku zikaha. Mynapupunaha zeka Paskoa eze Sudeutsa ba zik tahadisahanaha. Iwaze hi – Deus okzeka batu simysapy tsimykarana – nikarana. Maku Sudeutsa byitatu wahoro bo ba zikpupunaha sihumo batu simysapy maha. Paskoa myikaha batu tahadisahanaha mykarana. Iwatsahi Piratus wahoro bo ka batu paku zikaha.

²⁹ Iwaze Piratus sibo zoihik. Ape baze tu ispe niy:

– Amy humo sa Sesus kabo tsikzioқтыhyryknaha. Atakta sa batu imysapy tsimykarana – niy.

³⁰ Yhÿ nikarana.

– Atahi batu imysapy mytsaty tsimykarana. Moises harere bo batu yhÿ niy, iwatahi ikia kino ity tsipibeze tsimykarana – nikarana.

³¹ Piratus:

– Ikiahatsa zuba isoho tsimytsasokonaha. Hawa Moises harere bo batu yhÿ niy ahahyrinymyrëtsa iwatsahi isoho tsimytsasokonaha – niy.

– Batu. Katsazuba ziky iharapatawyhyta humo ba zibezena. Katsakta iharapatawyhyta humo ba zihyriziknaha. Batu tybeze. Ikia zuba tsipibeze katsakta batu – nikarana.

³² Iwa nipamykysokonaha. Sesus botu nitsaso:

– Kytsa iharapatawyhyta humo pihyrizik tsihiknaha iwa pikbezena – niy. Sudeutsa iharere humo batu sihyrinymyry iwa Piratus bo nipamykysokonaha. Sesus harere atsatu nipamykysokonaha.

³³ Iwaze Piratus tawahoro bo pakuzo niy. Kytsa pe niy:

– Sesus kabo tyzioқтыhyknaha – niy. Zioқтыhyryknahaze ipe niy:

– Ikia hi ja Sudeutsa pehatsa – niy.

³⁴ Sesus:

– Aharere pe sa tsimykara. Mekta harere pe tu sa tsimykara – niy.

³⁵ Piratus tihi:

– Hawa ha usta mytsaty mykara motsasoko. Utakta Sudeutsa byitatu. Sudeutsa taparakta hi ikia kabo zaokтыhyryknaha. Hawa amysapybyita tu tsimykara. Ikia Sudeutsa pehatsa ja hawa tsimy – Piratus niy.

³⁶ Sesus:

– Hawa ikia kytsa tysipeha utakta batu. Hawa apehatsa Sesa inarokota kytsa mysipeha utakta batu. Utakta pipeha zeka ikia wata katyryktsa takyrikinaha, iwaze kasukyrytsitsa mowatsorokonaha iwaze Sudeutsa ba zikoktynaha. Katyryktsakta mekywatsa tu maha. Batu Homa tyryktsa byitsawatsa tu – niy.

³⁷ Piratus:

– Ikia hi sa ispehatsa – niy.

– Yh̃y uta hi ispehatsa. Mybarawy ezektsa bo wasania ty mysi-hyrinymyryky. Asahi ana ty hi hỹ mykaranaha zeka asahi kaharere bo kino niwatihi hỹ mykaranaha – niy.

³⁸ – Amy sa wasape – Piratus niy.

Kytsa tihi: – Sesus tabezekta! Iharapatawyhyta humo tabezekta! – nikaranaha.

Iwaze nipamykysobaze Piratus tawahoro ikny zoizo. Sudeutsa pe niy:

– Atakta batu amy tohi ziky iwatahi ba zibeze – niy.

³⁹ Tubabatu tahamyikahakanahaze maku estuba myzuke ziknakara iwa sisopyk. Kytsa sizubarẽtsa sakyriukrẽnikitsa hurukwy eze tu mykaranaha. Iwaze ispe niy:

– Aty sa myzuke, Sudeutsa pehakatsa Sesus za myzuke – niy.

⁴⁰ – Batu ba – kazi nikaranaha.

– Atakta batu myzuke – Opykani kaziu nikaranaha.

– Bahabas tyzukekta – nikaranaha.

– Bahabas sakyriukrẽnikitsa hurukwy ezektsa tyzukehikta tsimy tawata h̃y – nikaranaha. Bahabas kytsa bakatsa niy.

19

¹ Iwaze Piratus sodadutsa pe niy:

– Sesus tytsakihiknahaktsa. Sirara hwyk tsarikihhi tsizezerẽna ty tytsakinaha – niy.

Yh̃y niaha. Isukpetara buruk nitsakikinaha.

² Iwaze sodadutsa inisaha ty zitsorikeknaha. Zikymy nahaze iharek humo pu niaha. Iwa nikaranaha. Ispehatsa mekywa tu sitsorik Sesus zimyi-jakanaha. Isuk tsahirita ty zuba korobyk ispehatsa hyritywata nikaranaha.

³ Iwaze ibo ibaba botu ipe niaha:

– O Sudeutsa pehatsa ja tsimy – zimyjakanaha. Ziokpypykyknaha.

⁴ Iwaze Piratus zoizo. Kytsa pe niy:

– Iktsa tahaktsa. Ikiahatsa boktahi myzioktyhyryk. Atakta batu amy tohi nikara batu ziky – niy.

⁵ Iwaze Sesus puke niy. Zoize inisaha ty zitsorikiknaha Isuk tsazirita tsizezerẽta niy. Iwa kytsa sizubarẽtsa bo ziokytyhyryk. Piratus ispe niy:

– Iktsa tahaktsa kytsa! Tahy ihumo batu ahamypokzitsiuk – niy.

⁶ Ibo iktsa niahaze kazi nikaranaha:

– Tabezekta! Iharapatawyhyta humo tabezekta! – nikaranaha.

Taparaktsa Deus wahoro eze ziknapamykysokonahatsa, Deus wahoro perytsitsa kino niwatihi opykani kazi nikaranaha.

– Tabezehikta tybezehik tsimaha – nikaranaha. Piratus tihi:

– Ikiahatsa kino kabo tsikziokytyhyryknaha. Ikiahatsa hi tsipibezena. Atakta wasani mytsaty mykara. Iwatahi batu pibeze. Tsimysapyrẽta hi batu pibeze – niy.

⁷ – Katsa tabeze zeka wasani h̃y. Iharere batu imysapy my. “Utakta Deus tse” botu nitsasoko iwatsahi tabeze zeka wasani my. Moises harere humo wasani my – nikaranaha.

⁸ Nitsasokonahaze:

– Atakta Deus tse – Piratus ana ziwabyze iharere pokso tsipybyrẽta.

⁹ Iwaze tawahoro bo pakuzo niy. Iwaze Piratus Sesus pe niy:

– Hana iknykta sa ikia – niy. Sesus batu harere.

¹⁰ – Amo skaraba batu harere ziky – niy.

– Hawa motsasoko kytsa kaharere bo hỹ mykaranaha. Mysipeha zeka kytsa pasukenaha atsipatsa warawy ty satsuk maha niy. Mysipeha zeka

“Tabezekta”. Kytsa iharapatawyhyta humo pahyriziknaha iwa pabezenaha. Ana humo hi tsihyrinymyrêta – Piratus niy.

¹¹ Sesus:

– Amy ty tsimytsasoko kytsa aharere bo hyỹ mykaranaha. Aharere wasani my. Deus humo kytsa aharere bo hyỹ mykaranaha. Deus abo yhỹ ahabyi zeka aharere bo kytsa batu ma zikaha. Batu kabo tsimy. Tsiplikbezenaha zeka Deus okze ka batu amysapy tsimy. Kytsa asahi abo zikoktyhyryknaha Deus okzeka simysapybyitsa babatsa mykaranaha – niy.

¹² Ana ziwabykyze nizuke tsihikik. Sudeutsa taparaktsa kazi nikaranaha.

– Sesus tsimyzuke zeka Sesa pehatsa harere bo batu yhỹ tsimy, Sesa pehatsa nanabyitaba zipeha. Aparakbaha motsasokonahaze “Ikia mypehatsa”, Sesa Homa ezektsa pehatsa takyri, iwatahi Sesus tsimyzuke zeka Sesa pehatsa harere humo batu yhỹ. Tsimyzuke zeka Homa pehatsa ikia humo takyri – nikaranaha.

¹³ Siharere ziwabyze Sesus ape bo ziooktyhyrykzo. Myzubaha bo zoizo. Iwaze Piratus kytsa harerewabykywy bo niy anaeze tadyhywy bete nidyhyky. Anaka Kabata Sudeutsa harere inarokoha.

¹⁴ Tokbaha niyzikze sesta-peira eze niy. Sudeutsa myikaha nakymysohoze niy. Iwaze Piratus tihi:

– Atakta ahapehatsa – niy. Iwa Piratus Sudeutsa pe niy.

¹⁵ – Batu, tabezehik nikaranaha. Ihumo tahakyrikinaha “Tabezekta” kazi nikaranaha. Iharapatawyhyta humo tabezekta! – nikaranaha.

– Ahapehatsa iharapatawyhyta humo pihyrizikik iwa pibezzenaha. Iwa sa tsimyzehikiknaha – niy.

– Yhỹ. Katsa mypehatsa estuba zuba. Sesa zuba mypehatsa – nikaranaha.

¹⁶ Iwatahi Piratus sodadutsa pe niy – Sesus iharapatawyhyta humo tsipibezzenaha – niy. Iwaze ziooktyhyrykzonaha.

Sodadutsa Sesus iharapatawyhyta humo zihyriziknaha iwa zibezzenaha.

¹⁷ Myzubaha pauk baze hara bo ziooktyhyryknaha. Hara iharekpokoso inarokota Sudeutsa harere kokokta my. Sesus iharapatawyhyta tasukara bete zibykyryk. Hara bo zumunaha.

¹⁸ Anabo izumunahaze iharapatawyhyta humo itsyhyry soik eze zihyriziknaha. Ipyrytsa humo niwatihi zihyrizikiknaha iwa niaha. Zikymynahaze iharapatawyhyta zitseknaha. Ituk makutsa petoktsa nisibanaha. Siharapatawyhytsa humo nisibanaha. Nataba natabaha.

¹⁹⁻²⁰ Kyze Piratus usta pe:

– Tsiwatahakta! niy. SESUS NASARE EZEKTA SUDEUTSA PEHATSA – niy. Anahi Sudeutsa harere hi ziwatahaka. Kereko harere niwatihi ziwatahaka. Ratĩ harere kino niwatihi ziwatahaka. Ziwatahabaze iharapatawyhyta Sesus harapu bete zihyrizik. Ana parakbaha pinynaha. Iharapatawyhyta Serusarêhe pauk baze parakbaha iwataha zinykynaha. Siharere ziwatahaka – Sesus Nasare ezekta Sudeutsa pehatsa – niy.

²¹ Iwaze taparaktsa Deus wahoro zubata eze ziknapamykysokonahatsa Piratus pe niaha:

– “Sudeutsa pehatsa” tsiwatahakanaha batu mykparawy tsimaha. Tsi-piwataha zeka. “Atakta botu nitsaso Sudeutsa pehatsa niy” iwa zeka yhỹ tsimaha – niaha.

²² Piratus:

– Batu. Hawa botu iwataha nahaka niwatihi – niy.

²³ Kyze sodadutsa Sesus iharapatawyhyta humo zihyrizikbanahaze isuk botu zibokiknahaze ziaksenaha. Jokboha zisysykyryknaha napetok napetok niaha. Estuba isuk tisapyrêta ana hi sodadutsa nizihikiknaha.

²⁴ Iwatsahi asa zuba nipamykysokonaha:

– Na ty ka syk syk byitaha! Haraharezipyryktsa tahapaparanahaktsa kytsa, aty ja isuk piakse tsahi mybo piwatawy – iwa asa zuba nipamykysokonaha. Asahi yhy nikaranaha. Iwaze haraharezipyryktsa nisipaparanahaze estuba zuba isuk tisapyrêta ziaксе. Tubabatu Deus harere papeu humo botu ziwataha:

– Kasuk ty metutu nikaranaha.

Estuba kasuk ty haraharezipyryktsa mysipaparanaha – niy. Iwa tubabatu ziwatahaka, aba atsatu sodadutsa niaha.

²⁵ Iwaze kykyryk iharapatawyhyta pauk baze niriktotohokonaha Sesusje, atatsa taeky tuk. Karapas oke Maria inarokotatsa niwatihi. Maria Madarena niwatihi situk niriktohoko. Sizubarêza iharapatawyhyta pauk eze niriktotohokonaha.

²⁶ Sesus taje bo iksa niy. Zinymyrykyta atahi Sesus ihumo tsimypokzitsiarêta atatsa baze niriktohoko. Iwaze Sesus taje pe niy:

– Atahi atse mozik. Atahi taje zipokzitsiki nahawahi papokzitsi hy – niy.

²⁷ Iwaze zinymyrykyta pe niy:

– O atatsa aje. Ikia aje baba tatsa wa tsipokzitsi – iwa niy. Sesus nihyrikosokdaze zinymyrykyta Sesusje tawahoro bo zioқтыhyryk. Iwahoro eze ziknapykyryk, ije watatsa niyzik.

Sesus nihyrikosokda.

²⁸ Kyze Sesus tahyrikzitsokzawy zepykbase ana humo hi tsihyrinymyrêta. Iwaze hawa tubabatu Deus papeu humo isoho ziwatahaka, atsatu nitsasoko:

– Karapukrêta – niy.

²⁹ Anaeze duabohotsa tsik itsârâkbara ty morosuk eze ky ty tsikok niy. Kytsa mazori waha ty humo duabohotsa tsik bo tsikuk tsikuk niaha. Iwaze mazori hyritywaha ty hwi humo zitsihibunaha iwaze zidokonaha. Iparikiha sazik ty isope inarokoha. Iwaze jobo Sesus sak bo tsyk tsyk nikara.

³⁰ Iwa duabohotsa tsik itsârâkbara tu ziku. Iwaze nitsaso.

– Aba pomozaka. Kahyrikzitsokzawy zipykba. Deus kape nikara naha zipykba. O Deus mohyrikosokdaze wasani my ikia kahumo tsamypokzitsiarêta – niy.

Iwaze taharek ty tyk bo harapusiri niy. Iwa nihyrikosokda.

Sodadu tanora hyritywata ty ipektsa baze ziskoik.

³¹ Kyze taparaktsa Sudeutsa Piratus pe niaha:

– Kytsa asahi siharapatawyhytsa humo nisihyrikziknahaze mybyrykywy pomoze ba zik sereknaha siharapatawyhytsa humo mysereknaha zeka batu isapy mytsaty tsimykaranaha. Iwatahi sodadutsa pe tsimy. “Asahi siharapatawyhytsa humo tsikyrikziknahaze tyseksaharakiknahaze” iwaze atsoko ziakebanaha. Iwa byiri sabado siharapatawyhytsa humoktsa mahani. Sinurytsa ty mysibykyknaha mybyrykywy sabado sukmobyitu – nikaranaha. Iwa nitsasokonaha sesta-peira eze. Byriri sabado zumuze tabyrykywy Sudeutsa myikahakawy zumu. Iwatsahi asahi siharapatawyhy humoktsa nasispik tsihikiknahaze sabado sukmobyitu my.

³² Iwatsahi sodadutsa siharapatawyhy humoktsa bo niukurunaha. Sibozumunahaze tapara estuba maku zeksaharakiknahaze. Usta ty kino niwatihi zeksaharakiknahaze.

³³⁻³⁷ Iwaze Sesus bo zumunahaze. Botu zumuza.

– Atakta botu zumuza – asa zuba nipamykysokonaha. Iwatsahi batu tyektsaharak. Tubabatu Sesus soho Deus harere papeu humo ziwatahaka:

– Batu typoiktsa harak. Estuba zuba batu typoiktsa harak – niy.

Iwa tubabatu ziwatahaka. Hawa ha ty botu ziwatahaka atsatu sodadutsa nikaranaha. Iwaze sodadu tanora ty ipektsa baze ziskoik. Ziskoikze ispu zipoko niy. Pihik tuk tu zipoko niy. Tubabatu Sesus soho Deus harere papeu humo ziwatahaka:

– Kytsa iskohokta bo iktsa mykaranaha – niy.

Iwa ziwatahaka. Sodadutsa ziskoiknahaze ana soho humo hi batu sihyrinymyry iwatsa tu Deus harere bo hyŷ nikaranaha.

Utakta Sesus nihyrikosokdaze ibo iktsa iky. Ana hi pykyhytu iktsasoko. Wasani niy. Ikiahatsa bo nihyrikosokdata soho iktsasoko iwahatu ikiahatsa kino niwatihi ihumo ahaspirikporëtsa. Ana hi iktsasoko wasani hiba. Kahyrinymyrëta hŷ.

Sose, Nikodemus ahatsa Sesus nury nitsahoroknaha.

³⁸ Kyze Sose Arimeteja ezekta Piratus bo zumu. Sose Sesus humo tispirikporëta zinymyrykyta. Batu tyso. – Utakta Sesus harere bo hyŷ ikykara ihumo kaspirikporëta – Sudeutsa pokso batu tyso. Tsipybyrëta. Atahi Sesus zispirikpoko. Atahi Piratus pe niy:

– O Sesus nury ty uta kabokta! – niy.

– Yhŷ. Inury tynazipikta – niy. Kyze inury inazipikze iytyk bo zibykyknaha.

³⁹ Nikodemus Sose tuk, atahi jokmorënikia tsizubarëna zebykyryk. Tirïta sïko kiros jokmorënikia zebykyryk. Jokmorënikia mira hwi soporo iwaze aroes wihara soporo itsakykyha. Tsokmorëna. Anahi zibykyknaha. Tubabatu Nikodemus Sesus bo nipamykysoko. Sesus atazuba tabo unata eze inakozoreze.

⁴⁰ Sesus nury nazipiknahaze panu ty ziakwarakanaha. Inury bo jokmorënikia ty ziharasusunaha. Iwa Sudeutsa sopykwy.

⁴¹ Sesus iharapatawyhyta humo zihyrizikiknaha eze hwitsa sisazik-sapyrëtsa my. Anaeze iytyk ezytyk niy. Batu aty tohi humo iwihihukbara.

⁴² Nubaze sesta-peira Sudeutsa tahadisahawy humo nikaranaha sabado sukmboyitu nikaranaha. Sabado eze ka tahabyri nepykyryknaha. Byri zik-tahabyryknaha. Iwaze iytyk ezytyk tykarawa tu anaeze nitsahukarenaha. Sesus iytyk bo zihoeKarenaha.

20

Sesus ytyk tsarawybara niapykyryk.

¹ Kyze zokorobyitu Maria Madarena iytyk bo niukuru. Miwa botu domiko eze atatsa iytyk bo zumuku. Zumuze harahare ihokbowy hana bo ja, sukyhy zikare niy.

– O aty sa inury zibykyk – mytsaty nikara.

² Iwatatsahi atsoko Peduru bo ziksizo. Utakta Sesus zinymyrykyta kahumo tsimypokzitsiarëta kabo niwatihi ziksizo. Ziksizoze. Atatsa:

– Kytsa Sesus nury zibykyryknaha. Hana bo ja. Iytyk batu tsarawyky niy. Hana bo sa zebykyryknaha – niy. Iwa makutsa petoktsa bo nitsasoko.

³ Iwaze Peduru itukta iwa atsoko iytyk bo nitururuknaha.

⁴ Petoktsa iytyk bo nitururuknaha. Uta hi Peduru haraze ikpararakak. Tapara iytyk bo ikumu.

⁵ Ikumuze iytyk bo iktsa iky, okmymy ikyze panu iakwarawy zuba nizozohoko ana bo zuba iktsa iky. Utakta batu paku.

⁶ Iwaze Simaõ Peduru iytyk bo zumuze. Atsoko iytyk bo zekeba. Panu bo iktsa niy.

⁷ Usa panu bo iktsa niy. Panu nihyrikosokdata iharekwarawy bo iktsa niy. Usa panu ka meky botu niapykyryk. Inury ykwarawy ka bara botu niapykyryk. Inury hana bo ja niy.

⁸ Utakta tapara iytyk bo ikumu. Iwaze uta kino niwatihi iktsuk. Ikozoze:
– Inury hana bo ja Sesus inahyrizikpo – atatuke iky. Iwatahi Sesus humo kaspirikporêta.

⁹ Tubabatu Deus harere papeu humo botu ziwatahaka:
– Sesus siakbatsa tukze Deus zihyrizikpowy – niy. Zinymyrykynahatsa anaharere humo tsihokdaharêna niy.

¹⁰ Kyze katsa zinymyrykynahatsa bo tsiksizonaha.

Sesus Maria Madarena bo natakaha.

¹¹ Kyze Maria Madarena iytyk bo niukuruzo. Atatsa iytyk baze nipuziuku. Nipuziukutatsa tu iytyk bo ziktsutsu niy.

¹² Bijoikpe iknyktsa Deus tsumuêhîtsa petoktsa bo iktsa niy. Sisukbarazarêtsa. Sesus nury sapy eze nidyhydyhykynaha. Estuba iharek sapy taba nidyhyky. Usta ipyrytsa sapy taba nidyhyky.

¹³ Ipe niaha:

– Amo skaraba tsimopuziuku – niaha. – Kapehatsa nihyrikosokdata nury zibykyknaha. Hana bo ja zibykyknaha – niy. Iwatatsahi pipokzitsiki.

¹⁴ Iwa nitsasokoze tasukpe bo uwok niy. Sesus ibaze niriktohoko. Ibo iktsa niy. Ihyritsik humo inyhybyitawa nio. Sesus batu inyhy.

¹⁵ Atahi ipe niy:

– Amo skaraba tsimopuziuku. Aty sa tsipiberiki – niy. Atatsa kino isazikperytsa ja niy. Iwatatsahi ipe niy:

– O aty sa zibykyk tsibykyryk zeka ikza kabo ky. Ikza mekybotu piytykzo – niy.

¹⁶ – O Maria – niy.

Iwaze zinyziu.

– Raboni – niy. Sudeutsa harere ka. – Kapokzitsitsa – piwatawyky.

¹⁷ Sesus ipe niy:

– Katy paik paik byityktsa! Kazo bo ka batu kado. Katuktsa bo tynakozorektsa! “Sesus jobo modo. Kazo bo modo.” Kazo Deus ikiahatsa kino niwatihi ahazo Deus tihi “Myzo Deus”. Iwa katuktsa bo tsimy – niy.

Yhỹ niy.

¹⁸ Iwaze Maria Madarena niparak. Zinymyrykynahatsa bo zumuze ispe niy:

– O Sesus iny. Inahyrizikpo. Abahi jo bo Deus bo modo. Ata hi ipokzitsihi. Katsa kino niwatihi Deus myhumo tsimypokzitsiukrêta – niy.

Sesus tuk zinymyrykynahatsa bo natakaha.

¹⁹ Zunubakaze Sesus tatuktsa bo. Domiko eze sibo zumu. Asahi wahoro bo inakypykbanahaze. Tahahokbowy zitsykykiknaha. Sudeutsa taparaktsa pokso sipybyrêtsa nikaranaha. Iwaze Sesus sibo natakaha ispe niy:

– Ahapybybyihuktsa. Ahapunihikuktsa kytsa! – niy.

²⁰ Tapapepe humo ky ziwatawyky. Tapektsa humo ky ziwatawyky. Zinymyrykynahatsa sakurêtsa nikaranaha. Tahapehakatsa bo nikozonehaze sakurêtsa niyziknaha.

²¹ Ispezo niy:

– Ahapunihikuktsa ahapyby byihu ja kytsa! Tapara kazo mybarawy ezektsa bo zikpeha. Uta kino niwatihi, utakta myzahapehaka. Myzubaha bo kasoho tsimytsasonaha iwatahi myzahapehaka – niy.

²² Iwaze Sesus sibo huhu nikara. Ispe niy:

– Deus hyrikoso ikiahatsa tuk mynapykyryk.

²³ Tsimytsasonaha zeka sizubarëtsa pe: “Ahamysapybyri Deus pahaokzohik” tsimykaranaha. Deus simysapybyri siokzohik. Tsimytsasonaha zeka kytsa pe: “Deus ahamysapybyri batu pahaokzo” tsimykaranaha. Deus simysapybyri ba ziksiokzo. Deus simysapybyitsa tu ba zikspiriktsokda my – niy.

Sesus Tome iwa.

²⁴ Iwaze zinymyrykyta Tome inarokota niy. Usta inarokota beketsa niy. Atahi Sesus batu inyhy. Sesus zinymyrykynahatsa bo izumuze Tome batu situk dyhy niy. Sesus inahyryzikpoze Tome batu inyhy.

²⁵ Iwatsahi ustsá ipe niy:

– O Tome katsaktsa mypehakatsa tsinynaha – niaha.

– Batu ma. Ipapepehyryzikwy sapy bo kasyhyry ty kuruk ahabyizeka ba ma ziky. Nataba tanora sapy bo kasyhyry ty kuruk ahabyizeka ba ma ziky – iwa ustsá zinymyrykynahatsa bo Tome nitsaso.

²⁶ Kyze mytsyhyrytsa wa zuruze Sesus tuktsa wahoro bo izumubazonaha. Tome situk niapykyryk. Wahoro tahahokbowy zitsykykiknaha. Atsoko Sesus sibo natakaha. Sesus zinymyrykynahatsa pe:

– Ahapunihiktsa kytsa. Ahapybybyihuktsa! – niy.

²⁷ Iwaze Tome pe niy:

– Pany! Kasyhyrype bo iktsa tykta. Na kasyhyrype hyryzikwy sapy bo atsyhyry ty kuruktykta. Na kaskowy tanora sapy bo atsyhyry ty kuruktykta. “Sesus nihyrikosokdata ba ziknahyryzikpo” ana ty hi sosobyity tsimy. Kahumo aspirikpokta! – niy.

²⁸ Tome:

– Ikia kino kapehatsa tsimy. Ikia humo kaspirikporëta hÿ. Ikia hi Deus babata – niy.

²⁹ Sesus ipe niy:

– Tsikny taowy kahumo aspirikporëta. Wasani my. Ustsá kytsa katy nyahabyitsatu kahumo sispirikporëtsa. Asa hi sakurëtsa babatsa – niy.

Abaka pepykbaka.

³⁰ Sesus tazikwy ziwatawyky. Zinymyrykynahatsa izikwy bo iktsa nikaranaha. Izororohotsa bo iktsa nikaranaha. Anasoho ba ziwataha. Papeu humo sisoho ty batu tywataha.

³¹ Hawa Sesus zikwy zororotsa soho tsikaeni zuba ziwatahaka. Anasoho ziwatahaka iwatahi pahaspirikpoko Sesus Deus tse. Deus Sesus zipehata pahaspirikpoko. Ana humo hi ahaspirikporëtsa zeka mekywatsa tu tsimoziknaha. Ihumo ahamysapyrëtsa tsimoziknaha. Ihumo ahaspirikporëtsa zeka tsimhyrykosokdanahaze tsinahyryzikponaha. Iwaze Deus tuk ahawahi tsimynapykyryknaha.

21

Sesus sete zinymyrykynahatsa bo natakaha.

¹ Kyze Sesus tuk zinymyrykynahatsa bo inatakahazo. Pihikzotsabyri baze sibo izumu. Pihikzotsabyri Tiberiades inarokoha. Anaeze sete ahatsa ituktsa zitsikpaparakanaha.

² Peduru, Tome, Natanieu, Suão, Tsiaku, ustsá petoktsa iwatsa situk nikaranaha.

³ Peduru ispe niy:

– Pihik pitsikpapara – niy.

– Yh̄y! Katsa ikia hapik – niaha. Haramwe zunubakaze kokorohyk. Turi turi turi niaha. Zitsikpapakana. Batu istyzo.

⁴ Kyze zokorobyitu Sesus pihik sak eze niriktohoko. Tsaraha bytykarawa tu niy, Sesus pihik sak eze niriktohoko. Zinymyrykynahatsa nikozonehaze:

– O aty skaraba.

O batu mynyhy – nikaranaha.

⁵ Iwaze Sesus huahua niy:

– Tsiknasizokonaha sa kytsa! – niy.

Batu niaha.

⁶ – Tõhõryk ty nataba tsioktsokzonahaktsa! Abaka tsinasizonaha ty – niy. Iwaze tõhõryk ziooktsoknaha. Abaka tõhõryk piknutsa tsakyririk humo, ba zikzizonaha.

⁷ Iwaze uta inymyrykya Sesus kahumo tsimypokzitsiarëta Peduru pe iky: – O mypehakatsa Sesus – iky. Peduru ziwabyta takpyzazawy ty korobyk niy. Tahyryziktsokzawy humo awani nikarata iwaze takpyzazawy zikorobykze pihik bo nioktsok. Sesus bo atsoko uruk uruk nikara.

⁸ Ustsaktsa mahani. Tõhõryk zikyrikinaha. Titsakyririkrëna. Tsaraha imyrazata bytykara wata nowëta meteros zuba niy. Nakpo bybybyu niaha. Tahatsaraha piknutsa ty nasihareknaha.

⁹ Nakpo tsaraha ekze nizuknahaze izo bo nikozonehaha. Sesus izo bete piknutsa nisizoko sizubabyitsa tu. Atsikara niwatihi.

¹⁰ Sesus tihi:

– O piknutsa ty puëtsik kabo wabehyryk tynaha – niy.

Yh̄y Peduru niy.

¹¹ Iwaze Peduru tsaraha bo takoro, piknutsa tõhõryk eze inasikyriki:

– O inahareknaha – niy. Piknutsa sizubarëtsa nasizokonaha. Sëto sïkuëta teres piknutsa sizubarëtsa nikaranaha. Inahareknahatsa tu tõhõryk batu tuzu.

¹² Sesus:

– Parany! tyzahadisahanaha kytsa! – niy.

Yh̄y niaha. Zinymyrykynahatsa batu – Aty sa – niaha.

¹³ Mynyhy tihi Sesus atsikara ty sibo nyny niy. Piknutsa ty kino niwatihi. Tahadisahanaha.

¹⁴ Abaka Sesus tuk zinymyrykynahatsa bo harakykbyi inahyryzikpota inatakaha.

Sesus Peduru ahatsa.

¹⁵ Kyze Sesus Simaõ Peduru pe niy, atahi Suão tse iwaze Sesus ipe niy:

– Simaõ ikia sa kahumo tsamypokzitsiarëta – niy.

– Yh̄y. Uta atukta babata my – niy.

– Kaharere ty katuktsa tysihyrynymyrykta. Hawa hozipyrykzatsa tsihitsa siraratsa tysipokzitsiki iwa ikia katuktsa humo tynasipokzitsiki.

¹⁶ Sesus ipe niyzo:

– Simaõ kahumo sa tsamypokzitsiarëta babata tsimy – niy.

– Yh̄y utakta atukta babata my – niy.

– Kaharere katukytsa bo tysihyrynymyrykta! Hawa hozipyrykzatsa tsihitsa siraratsa tysipokzitsiki iwa katukytsa humo tysipokzitsi – niy.

¹⁷ Sesus ipe niyzo:

– Simaõ ikia sa kahumo tsamypokzitsiarëta babata tsimy – niy.

Iwaze Sesus nitsasokoze – Ikia sa kahumo tsamypokzitsiarëta – atsa tyty harakykbyi Peduru pe niyze tisukatsihikrëta niyzik. Peduru:

– O kapehakatsa tsahyrynymyrykta hiza. Ikiakta tsiknyba h̄y. Utakta ahumo kamypokzitsiarëta. Ana humo hi ahyrynymyrykta – niy. Sesus:

– Kaharere ty za katukytsa tysihrinymyrykta! Hawa hozipyrykzatsa tsihitsa siraratsa tysipokzitsiki ikia iwa katukytsa humo hi tysipokzitsiki hỹ.

¹⁸ Wabyziutykta. Simaõ mykyryburukta zikzurukuze asuk ty korobykyk ziknakaraze paikpa ziknakara hỹ. Ikia tsimytsaikbaze usta atsipatsa mysakwara. Akparawy bara bo paoktyhyryknaha – niy.

¹⁹ Iwa Peduru pe niy. Peduru mora naha soho nitsasoko. Ipe niy:

– Tsimyhyrikosokdaze kytsa sizubarẽtsa motsasokonaha “Deus hi Peduru zipunihikwyky hỹ. Iwatahi mohyrikosokdaze batu ipyby. Deus imysapyrẽta hỹ” mykaranaha – niy. Hawa Peduru mohyrikosokda naha soho botu ibo nitsasoko.

Iwaze ipe niyzo:

– Kaharere bo hyỹ tsimykta! Kapik tynao – niy.

Hawa Sesus kasoho nitsasoko.

²⁰ Kyze Peduru uwok niyze kabo iktsa niy. Utakta zinymyrykyta Sesus kahumo tsimypokzitsiarẽta. Uta Peduru sukpe baze ikziktohoko. Tapara Sesus nihyrikosokda katsa ituk amyikaha eze tuze uta zuba ipe iky:

– Aty skaraba asukyrytsitsa bo paoktyhyryk – ikykara. Aba Peduru kabo iktsa niyze ta tihi:

²¹ – Hawa sa ipe tsimy – niy.

²² Sesus:

– Batu ityso. “Hawa sa ipe tsimy”. “Uta sa Deus harere bo zuba yhỹ my” tsimy. Iwa tsimy hỹ – niy. – Utakta motsasoko zeka “Atakta ba zikyrikosokda, atahi myziksizoze motare”. Wasani my. Ikia kino kaharere bo zuba hyỹ tsimykara. Utsa soho bo batu paikpa mytsaty tsimykara. Kaharere bo zuba hyỹ tsimykara. Ikia humo wasani tsimyzeka kaharere bo zuba hyỹ tsimykara.

²³ Kyze Sesus tuktsa asa zuba nipamykysokonaha:

– Atakta ba zikyrikosokda, Sesus myziksizoze ispitu my – nikaranaha.

Iwa Sesus batu tyso. – “Atakta ba zikyrikosokda” tapara nitsaso “motsaso zeka atakta ba zikyrikosokda atahi myziksizoze motare” – iwa nitsaso. Batu siwabyziuhu.

²⁴ Zinymyrykyta Sesus kahumo tsimypokzitsiarẽta piwatahaka. Hawa ha ty piwatahaka naha wasani my. Utakta Sesus harere ahabo motsasoko.

Abaka nepyk.

²⁵ Sesus tsizubarẽna ty nikara. Iokboha zuba papeu humo ziwataha. Nanabyi soho ziwataha zeka abazuba papeu humo ba zikpyk. Ziwatahaba zeka papeu zikpykba. Niwazuba. Suão.

Hawa ha ty sakzohotsa nikaranaha

Sesus tazo bo ziksizoze Deus tahyrikoso Sesus tuk zinymyrykynahatsa bo zipaha. Iwatsahi paikpa ziknakaranaha, wasania ty ziknahape spirikpokonaha. Kytsa zikahabara ty asahi ziknakaranaha iwaha zinynahatsa hi Sesus humo sispirikporētsa niyziknaha. Deus Rukas ziapewywyky iwatahi papeu humo ziwatahaka. Abaka katsa kino niwatihi Deus hyrikoso humo tanymyryky.

Sesus bijoikpe bo niy.

¹ Teopiro uta papeu humo ikia bo botu iwataha. Anatyhi Sesus kytsa nisihyrinymyryky anatyhi Sesus nikara atsatu ikia bo iwataha.

² Iwaze Sesus mytuk zikzurukuze ziknakara. Tapara papeu humo iwataha. Tapara Sesus bijoikpe bo nido. Kytsa dose sakzohotsa ituk zinymyrykynahatsa niaha. Sesus sinini nikara. Nihyrikosokda. Inahyrizikpo. Inahyrizikpoze sakzohotsa bo tanywyre. Tapara kytsa zinymyrykynahatsa ituk zikzurukunaha. Sibō hi tanywyre.

³ Sesus nikara atahi sibō tawatawykyzo. Wasape ispitu tahi tawatawyky. Nahyrizikpoze estuba byzoje ziharahaze situk zikzuruku. Sakzohotsa bo Deus tyryktsa soho nitsasoko. Deus mypehakatsa niyzik ana soho hi kytsa bo nitsasoko. Tapara ispe niy:

– Kaharere myzubaha bo tytsasonahaktsa! Deus hyrikoso ahabo myzipaha – niy. Kyze bijoikpe bo nido.

⁴ Sakzohotsa baze tuze Sesus ispe niy:

– Serusarēhe eze tsiperynahaktsa kytsa! Anaeze ahabyri typykyknaha Deus hyrikoso tsiperynaha Deus hyrikoso ahabo myzipaha. Deus botu nitsaso:

“Kahyrikoso ahabo myzipaha”. Iwatsahi ikiahatsa Deus hyrikoso tsiperyknaha.

⁵ Tapara Suão kytsa pihik ty nisiharasusuku. Iwaze hi Deus hyrikoso ahabo myzipaha. Deus hyrikoso ahatuk mynapykyk. Hawa kytsa pihik ty nisiharasusuku astatu Deus hyrikoso kytsa bo myziakzo niy iwatahi mytuk mynapykyryk. Abanury tu Deus hyrikoso ahabo myzipahahik – Sesus nikara.

Deus Sesus bijoikpe bo ziokyhyryk.

⁶ Sakzohotsa inakypykyknahaze Sesus bo nizapykyknaha:

– O mypehakatsa abaka sa aharere humo Isareu ezektsa bipyritsa tysiksiwyhiknaha. Utsa kytsa tysiksiwyhiknaha – nikaranaha.

⁷ Sesus ispe niy:

– Hawa mykaraze kazo zuba tsihyrinymyrēta. Hana wa puruze kazo zuba tsihyrinymyrēta.

⁸ Ikiahatsa hi Deus hyrikoso tuk tsimypykyryknaha. Deus hyrikoso ahabo mynasik. Hawaze mozumuze ahapunihikrētsa tsimoziknaha. Kazikwy ahatuk mynapykyryk. Iwatsahi kaharere ty kytsa bo tytsasonaha. Uta ahatuk zikzurukuze kaharere zikziwabyknaha. Anatyhi kytsa bo tytsasonaha! Anatyhi Serusarēhe ezektsa bo tytsasonaha. Anatyhi Sudeja ezektsa bo tytsasonaha. Anatyhi Samarija ezektsa bo tytsasonaha. Mektsa tyryktsa bo nokponi kaharere tytsasonaha. Iwaze nanabytaba kaharere paikpa tytsasonaha – niy.

⁹ Sesus harere nipykbaze jobo nido. Bijo satata buruk nitsuk. Kytsa batu ity nyzo.

¹⁰ Iwaze kytsa bijoikpe bo iktsaziu nikaranahaze makutsa petoktsa sibo inasiknaha. Bijoikpe iknyktsa Deus tsumuêhĩtsa sibaze niriktotohokonaha. Sisukbarazarêtsa.

¹¹ Ispe niaha:

– O Karireja ezektsa amo skaraba bijoikpe bo tsimykozokonaha. Abaka hana bo ja niy. Aibani zuba atakta jobokta tu myziksizo. Atsawatu do myziksizo – niaha.

Matias Sudas sapyzeken ziyakse.

¹² Niahatsahi Serusarêhe bo ziksizonaha. Hara inarokota Oriwerejatsa ikny nitururuknaha. Serusarêhe bo niaha. Bytykareze tu estuba kirometero zuba niy.

¹³ Sesus sakzohotsa Serusarêhe bo ziksizonahaze kytsa ipokpedawy jo bazeky bo nipupukunaha. Anaeze nitarespyknaha! Asaktsa Peduru, Suão, Tsiaku, Âdere, Piripi, Tome, Baratoromeu, Mateus, usta Tsiaku Arapeu tse, Simaõ bipyri pehakatsa batu iakparawy, Sudas, Tsiaku tse iwatsa izumubanaha. Jobo ipokpedawy bo nipupunaha.

¹⁴ Asahi Sesus humo sispirikporêtsa. Zibytuhukutu Deus bo nipamykysokonaha. Sesus zinymyrykynahatsitsa wytykyryk tuk Maria Sesusje tuk, tatukytsa tuk iwatsa Deus bo nipamykysokonaha.

¹⁵ Iwaze Peduru Sesus tuktsa bo nipamykysoko. Sesus tuktsa sizubarêtsa. Sêto wĩte niy. Peduru ispe niy:

¹⁶ – O katukytsa, wabytahaktsa! Tapara nihyrikosokdata kadiri Dawi Sudas soho botu ziwataha. Deus hyrikoso humo Dawi Sudas soho ziwatahawy. Tubabatu Samo papeu humo ziwatahaka. Ana hi Dawi botu ziwataha atsatu Sudas nikara – niy.

¹⁷ – Sudas katsa mytuk niukuru. Atahi Sesus sukyrytsitsa ibo inasioktykyryk. Sisukyrytsitsa okyryrsaro ty Sudas bo nyny niaha.

¹⁸ Iwaze Sudas okyryrsaro ty itsuhuk zihuak. Anaeze wytyk bo inaraha. Pỹ niy. Inatapewohik. Itsitsihi izoihik niy. Iwatahi atatu tabeze – niy.

¹⁹ – Serusarêhe ezektsa Sudas soho ziwabynaha. Iwatsahi itsuhuk Akedema zinarokonaha.

²⁰ Siharere piwatawy “Ispusapy eze niapykyryk” niy. Dawi Samo papeu humo botu ziwataha:

“Isapy hana bo ja. Batu aty tohi isapy ziyakse. Mektatu nazapyzeken” niy. Iwahi Samo papeu humo ziwataha.

²¹ – Iwatahi usta katsa tuk mokuru. Tahawatawynahaktsa kytsa! – niy. Iwaze Peduru ispe niy:

²² – Aty sa katsa mytuk mynaukuru. Aty sa katsa mytuk Suão Sesus ziharasusu nikozo. Aty sa katsa mytuk Deus Sesus bijoikpe bo zioikyhyk nikozo. Atahi Sesus harere katsa mytuk ziwaby. Abaka atahi katsa mytuk Sesus inahyrizikpo mykara. Tsiwatawynahaktsa kytsa! Mytsatzyutahaktsa! Maku wasani mykara. Iwatahi aty sa Sudas sapyzeken piakse – Peduru niy.

²³ Iwaze makutsa petoktsa nisioktyhyryknaha. Estuba maku Sose Barasabas inarokota usa naro Sustas. Usta maku zioikyhyryk, Matias inarokota nikaranaha.

²⁴ Niahatsahi Deus bo nipamykysokonaha. Sesus tuktsa Deus bo nipamykysokonaha.

– O myzo ikia hi hawa katsa mytsaty tsimykaranaha humo tsahyrinymyrëta. Sudas nihyrikosokdaze tahyritzokzawy zerekik. Iwaze sinini ykarawy bo niy.

²⁵ Anabo hi tasapy sinini mykara. Aty sa maku petoktsa katsa mytuk ana humo hi tymywatawy. Aty sa Sudas sapyzky mozik! Mybo tsipiwatawy aty tuza mozik – nikaranaha. Iwa Deus bo nipamykysokonaha.

²⁶ Niahatsahi sinaro harahareziktsa humo ziwatahakanaha, iwaze nisi-paparakanahaze Matias ziwatawy. Iwatahi Deus akzohota niyzik. Õse sakzohotsa tuk ziknapykyryknaha.

2

Deus hyrikoso Sesus tuktsa bo inasik.

¹ Deus hyrikoso myzubaha bo Sesus nisiwatawynahatsa bo izumu. Pëtekoste bo zumuze Deus hyrikoso izumu. Pëtekoste zumuze Sesus tuktsa si-watawyhytsitsa inaharapekypykbanaha. Nawa zuruze Pëtekoste inarokoha Sudeutsa myikaha niy. Iwaze Deus hyrikoso sibo inasik.

² Inaharapekypykbanahaze atsoko iakpyri ziwabynaha. Iakpyri bijoikpe ikny inakara. Zopoktsa pyri waha inabyby, opykani inabybykynaha. Wahoro eze nidyhydyhykynahatsa hi ziwabykynaha.

³ Niahatsahi izo hyrizik waha inasik. Izo waha siwatu izumuku.

⁴ Iwatahi Deus hyrikoso sizubarëtsa bo inasik. Asa kino Deus hyrikoso situk mynapykyryk. Niahatsahi Sesus tuktsa ustsaharere ty nipamykysokonaha. Deus hyrikoso humo ustsaharere ty nipamykysokonaha. Tahaharere baba humo ka batu tyso ustsaharere ty zuba nipamykysokonaha. Iwa Deus hyrikoso humo nitsasokonaha hÿ.

⁵ Iwaze kytsa sizubarëtsa Serusarëhe bo inakozorenaha. Kytsa ustsaharere nanabytabaktsa anabo inakozorenaha. Asahi Sudeutsa kino niwatihi Deus harere bo hÿ nikaranaha.

⁶ Ana ziwabynahatsa hi inauzuzukbanaha.

⁷ Simytsatyharëtsa nikaranaha. Asa zuba nipamykysokonaha:

– Wabytaha! Nipamykysokonahatsitsa Karireja ezektsa ja. Asahi taharere baba humo ka batu pamykyso. Asahi katsa myharere ty zuba mopamykysokonaha.

⁸ Hawa myharere tsiwabykynaha. Myzotsa myharere ty nymyhyrinymyrykynaha. Asahi myharere motsasokonaha nikaranaha – nikaranaha.

⁹ Wastuhu zuba Patia ezektsa tsimaha. Ustsaharere Mede ezektsa, Sudeja ezektsa, Kapazosia ezektsa, Pöto ezektsa, Asia ezektsa iwatsa tsimaha.

¹⁰ Ustsaharere Piria ezektsa, Panipirija ezektsa, Esito ezektsa, Ribija ezektsa, Sirene ezektsa iwatsa tsimaha. Ustsaharere Homa ezektsa.

¹¹ Ustsaharere Sudeutsa babatsa. Ustsaharere batu. Anatyhi Sudeutsa Deus soho nitsasokonaha katsa yhÿ tsimykaranaha. Aba myharere tsiwabynaha kytsa tihi:

– “O Deus tsamysapyrëta azikwy mybo tsipiwatawyky”. Anaty hi myharere baba nitsasokonaha – nikaranaha.

¹² Sipybyrëtsa nikaranaha. Iwatsahi asa zuba nipamykysokonaha.

– Amo skaraba – nikaranaha.

¹³ Ustsaharere nisimiyjakanaha:

– O tsösi zikukunaha tsahi ja mykaranaha – nikaranaha. Sihyrinymyrybyitsa tu mybarapetu nikaranaha.

Peduru Deus harere wasania ty myzubaha bo nitsasoko.

¹⁴ Iwaze Peduru Sesus ykzohotsa istazaha eze niriktohoko. Myzubaha bo ziakbataze opykani nipamykysoko. Iwaze niriktohoko:

– O katukytsa Sudeja ezektsa tsiwabytoktonaha! Serusarēhe ezektsa niwatihi wabyziutaha!

¹⁵ Kytsa tsōsī zikukunahatsa hi mytsaty ahabyitsa tsimykaranaha. Batu ba. Jobetehaneze zuba. Batu hauk iwatsahi tsōsī ty batu tsō niaha.

¹⁶ Tshipinymyry tsihiknaha hawa ty sa kytsa tahaharere ty nitsasokonaha. Uta ahabo motsaso. Hawa ha ty nihyrikosokdata Soe botu nitsaso.

¹⁷ Tubabatu nihyrikosokdata Soe, Deus sohokotsa nitsasoko. Deus tihi: “Tapara mybarawy mopykze kahyrikoso myzubaha bo myzipeha. Situk mynapykyk.

Isteokatsa kaharere motsasokonaha. Mykyryburuktsa mytsotospyk waha pinynaha. Sistsaikbatsa sitsotospykrētsa”.

¹⁸ Iwaze kahyrikoso kahyrytsa bo myzipeha, myzubaha bo mynasikze. Ihumo kaharere motsasokonaha.

¹⁹ Siwatawytsitsa bijoikpe eze mynakozokonaha. Mybarawy eze kazikwy piwatawyky. Siwatawytsitsa izo ispu zatata iwaha mykaranaha.

²⁰ Haramwe miwa mozik. Byzoje myspu hyritywa mozik. Iwaze tapara mypehatsa myziksizo.

Myziksizoze myzubaha pe: “O asaktsa wasani mykaranaha”. Utsa pe “O asaktsa batu wasani zikaha” my. Iwa mypehatsa zikwy piwatawy.

²¹ Aty Deus bo mopamykysoko: “O Deus tsiktsumuēhīkta” my. Yh̄y my. “Atakta kabo myzioktyhyryk. Sinini ykarawy bo ba zapeha my” – nikara.

²² Peduru nitsasokozo: – O Isareu ezektsa wabytaha! Sesus Nasare ezekta ahatukze zikzuruku. Atahi Deus zikwy humo iwa ziknakara. Siwatawytsitsa iwa ziknakara. Siwatawytsitsa sizubarētsa bo iaktsa tsikaha. Deus zikwy Sesus tuk tsinyaha. Ana humo hi ahahyrinymyrētsa – Iwa Peduru niy.

²³ – Deus tsihyrizikporēta tsimysapyrēta iwatatu kytsa harere bo yh̄y niy. Iwatsahi kytsa simysapybyitsa Sesus ziooktyhyryknaha. Deus tapara zinymyry kytsa Sesus ziooktyhyryknaha. Ikiyahatsa hi uksa kytsa simysapybyikitsa tsiksipehakanahatsa. Sesus ty tsibezehiknaha. Iharapatawyhyta humo zihyrikosokdata iwaze tsibezehiknaha. Niytahi nihyrikosokda.

²⁴ Deus hi zihyrikosokdata tu mahani. Ni-hyrikosokdata tahi ba zikyrikosokdazo.

²⁵ Tubabatu nihyrikosokdata Dawi Sesus soho nitsasoko. Sesus soho ty ispe niy:

“Kapehatsa katuk tu kapauk baze atatu mynapykyk. Piktsumuēhīkī. Iwatahi kytsa pokso batu kapyby. Iwatahi kakurēta”.

²⁶ Motsasoko “O Deus ikia hi tsamysapyrēta” my. “Mohyrikosokdaze Deus humo kaspirikporēta.

Tsipikoktyhyryk katsyhyryze pisapywyky.

²⁷ Kahyrikoso sakbatsa baze tu batu katy arek. Ikiya kanury ba zikbibi. Atse humo iwatahi kanury ba zikbibi ziky.

Ikiya tsimozikyrikosokdazo.

²⁸ Kaspituzo mozikzo ikia tuk mynapykyk. Ikiya baze tuze kakurēta.”

Iwa Dawi tapara nitsasoko. Tasohe nitsasoko Sesus kino niwatihi nitsasoko – Peduru niy.

²⁹ Peduru ispe niyzo:

– O katukytsa mysihyrinymyryky, tubabatu mydiri Dawi nihyrikosokda. Iytyk bo nitsahorok. Abaka iytyk bo iksa tsimaha. Ana bo hi nihyrikosokdata Dawi nitsahoroknaha. Iytyk tykareze tu niy.

³⁰ Dawi ispituze Deus sohokotsa niy. Tapara Deus Dawi pe niy: “O estuba tsekoka Deus zipehata my. O Kiristu my” niy.

³¹ Dawi Deus harere tsekokatsa soho humo tsihyrinymyrëta. Tapara mykara tsihyrinymyrëta. Iwatahi nitsasoko:

“Deus Kiristu hyrizikararawy siakbatsa tuk batu arek inury ba zikbibi”.

³² – Deus Sesus zihyrikopowy. Atahi ispitu niyzikzo. Ana humo hi ahahyrynymyrëtsa iwatsahi ana hi tsimytsasokonaha. Deus Sesus bijoikpe bo zidohyrykzo ana bo hi tsimykaranaha.

³³ Abaka Sesus Deus apanuryk taba mopykyryk. Deus hyrikoso Sesus bo nyny niy. Abaka Sesus Deus hyrikoso mybo zipehahik. Hawa Deus botu nitsaso zipehata hi Deus hyrikoso inasik. Abaka Deus hyrikoso humo ana kino tsinykynaha tsiwabykynaha niwatihi – Peduru niy.

– Nihyrikosokdata Dawi ata kino batu tyso. Sesus soho nitsasoko.

³⁴ Dawi nury bijoikpe bo batu ido. Iwatahi tapara nihyrikosokdata Dawi nitsaso:

Deus mypehatsa pe niy.

“O kabaze dyhy ty!

³⁵ Bykyze kazikwy humo asukyrytsitsa aharere bo hyÿ mykaranaha niy” – niy.

³⁶ – Isareu ezektsa wabyziutahaktsa! – niy sibo nitsasoziuku:

– Ikiatsa hi Sesus iharapatawyhyta humo tsihyrizikiknaha. Tsi-bezenaha. Atahi Deus zikwy humo mypehakatsa mozik. Deus zikwy humo Kiristu Deus zipehata mozik. Iwa motsaso iwaha humo hi tsipinymyrynahaze wasani tsimykaranaha – Peduru niy.

³⁷ Iwaze myzubaha Peduru harere humo sisukatsihikrëtsa. Asa tihi:

– O mytukytsa hawa sa tsimaha – nikaranaha. Iwa Peduru ustsasakzohotsa bo mykaranaha.

³⁸ Peduru tihi:

– Ahasopyksapybyri tsikykaranaha tsimoewynahaktsa! Tsikaharasusunahaktsa! Kytsa pahaharasusunahaze ikiahatsa tihi:

“O Sesus Kiristu tukta myzehikik” tsimaha. Iwa tsimaha zeka Deus ahamysapybyi humo pahaokzohik iwaze hi Deus hyrikoso ahatuk mynapykyk.

³⁹ Ata kino Deus ahabo myzipeha. Tubabatu Deus tihi: “Utakta kahyrikoso ahabo myziakzo tsihikik” niy. Deus ahahyrytsa bo tahyrikoso myziakzo. Mektsa tyryktsa bo myziakzo. Kytsa nokponi asahi Deus mysiakzoko myzubaha bo tahyrikoso myziakzo – Peduru niy.

⁴⁰ Iwa Peduru kytsa sizubarëtsa, Isareu ezektsa bo nitsasoko. Ni-pamykysoikik. Mysiakzoikik:

– O ahamysapyrëtsa tsimoziknahaktsa! Abaka kytsa simysapybyitsa mykaranaha sinini ykarawy bo mykaranaha. Ikiatsa sinini ykarawy bo ka pão pãobyitahaktsa – niy.

⁴¹ Iwatsahi sizubarëtsa Peduru harere bo yhÿ nikaranaha. Nawa zuruze kytsa sizubarëtsa Peduru harere bo yhÿ nikaranaha. Harakykbyihi miutsa sizubarëtsa hiba. Sesus tuktsa niyziknaha iwaze kytsa nisiharasusunaha.

⁴² Sesus tuktsa sakzohotsa tuk zinymyry tsihikiknaha. Utsa kytsa tuk siharereziuwysitsa sakurētsa nikaranaha. Utsa Sesus tuktsa siakparawy. Deus bo nipamykysokonaha. Paikpa siwahoro bo tahadisahakanaha. Atsikara zibiakaknahaze:

– Sesus mysapyzekeny nihyrikosokda – ana bo hi mytsaty ziknakaranaha.

Hawa Sesus tuktsa zikzurukunahatsa.

⁴³ Sesus sakzohotsa ihumo sispirikporētsa iwatsahi amy ty kytsa ba zikaha anaty hi nikaranaha. Ihumo sakurētsa niyziknaha. Iwaze inakypykyryknahaze asahi kytsa bo Deus zikwy ziwatawykynaha. Iwaze sizubarētsa paikpa iktsa nikaranaha.

⁴⁴ Sesus tuktsa tahanamy ty utsa bo nyny nikaranaha. Simysakihikrētsa.

⁴⁵ Tanamy huak humo okyrysaro zebykyknaha bykyze sinamybyitsa bo nyny nikaranaha.

⁴⁶ Pibytuhukutu Deus wahoro zubata bo izumubanaha. Tahadisahakanahaze sakurētsa nikaranaha.

⁴⁷ Deus bo nisakibazikiknaha:

– O Deus ikia hi tsimymysapywyky. Tsimymytsumuēhīkī iwatsahi mykurētsa. Ikia zuba tsamysapyrēta – nikaranaha.

Serusarēhe ezektsa Sesus tuktsa humo siakparawy. Iwatsahi pibytuhukutu Deus humo sizubarētsa Sesus tuktsa naubarkanaha. Sesus harere bo hȳ nikaranaha. Asahi Sesus tuktsa tuk izumubanahaze sakurētsa nikaranaha. Iwaha humo hi ziwabykynaha iwatsahi hȳ nikaranaha.

3

Iekbyrita zororowy.

¹ Kyze iharakibikia bo zoize Peduru Suão ahatsa Deus wahoro zubata bo niy. Sudeutsa Deus bo ziknapamykysoikiknaha iwatsahi Deus wahoro bo nipupunaha.

² Maku iekbyrita zikzibytuhukutu itukytsa Deus wahoro zubata hokbowy bo zikzioktyikiknaha. Hokbowy tisapyrēta inarokota. Iekbyrita anaeze kytsa bo okyrysaro ziknazapykyky. Kytsa Deus wahoro bo ziknapupukunahaze okyrysaro ziknazapyky.

³ Iekbyrita Peduru, Suão ahatsa bo iktsa niy. Deus wahoro bo inapupunahaze iktsa niy.

⁴ Iwaze Peduru pe niy:

– Okyrysaro ty kabo nynytykta – niy. Peduru ipe niy:

– Mybo iktsaziu tykta – niy.

⁵ Iekbyrita sibo nikozotoktok – O okyrysaro ty ja kabo nyny maha iky – mytsaty nikara.

⁶ Peduru ipe niy:

– Batu kaokyraroko – niy. Utakta Deus zikwy humo ape my:

– Kyiktykta Sesus humo kyiktykta. Atahi Nasare ezekta humo pāotykta – Peduru niy.

⁷ Niytahi Peduru iekbyrita tsyhyrype humo paik niy. Tykyik niy. Atsoko ipyrybotoziktsa niaksutsukbaiknaha nizororobaiknaha.

⁸ Iwatahi paikpa nipupuruku. Niytahi Deus wahoro zubata isturupeze situk zitabakanaha. Iwatahi tsakurēta nikara paikpa nipupuruku. Nitsasoko – O Deus ikia hi tsamysapyrēta – nikara.

⁹ Myzubaha okze nipurukze ibo nikozokonahaze nitsasokonaha – O Deus ikia hi tsamysapyrēta – nikaranaha.

¹⁰ Asa zuba nipamykysokonaha:

– Ata maku iekbyrita hi sa – nikaranaha.

– Yh̄y. Atahi Deus wahoro zubata hokbowy eze ziknadyhykyta. Hokbowy isapyr̄enikita inarokota niy. Okyrysaro mybo ziknazapyikik tahi ja – nikaranaha.

– Hawa sa niy – nikaranaha. Paikpa iktsa nikaranaha. Iekbyrita zorowoy humo nipybybaiknaha.

Peduru Deus wahoro zubata eze nitsasoko.

¹¹ Tapara iekbyrita Peduru tuk niapykyk tsihikik. Paikpa nikara. Peduru, Suão taparaka iekbyrita ahatsa nikaranaha. Peduru Suão Deus wahoro zubata zikarazik bo nipupunaha. Kytsa anahi Soromao wahoro inarokota.

¹² Peduru zinyze sizubar̄etsa izumubanaha sibo nipamykysoko:

– O Isareu ezektsa katukytsa wabyziutaha! Amo skaraba mybo paikpa iktsa tsimykaranaha. Atahi pitabaka mozikwy humo ja mytsaty tsimykaranaha. Atahi pitabaka katsa mysapyr̄etsa humo ja iwa mytsaty tsimykaranaha.

¹³ Batu ba. Nawa ahabo batu h̄y tsikaha.

Deus taparaktsa mydiritsa tuk ziknapykyk. Deus taparakta mydiri Abarão tuk niy, Deus taparakta mydiri Isake tuk niy, Deus taparakta mydiri Sako tuk niy, atahi kytsa mytsatyta my. Sesus myhyrizikwanita niyzik. Ikiahatsa hi sisukyrytsitsa bo itsipa humo tsikzioktyhyryknaha. Piratus sakyriukr̄enikitsa hurukwy ikny nizukekyzyky.

¹⁴ Ikiahatsa batu ba. Sesus imysapyr̄enikita. Atahi Deus harere bo hȳy ziknakara. Piratus okzeka ahamyhareresapybyikitsa tsikykaranaha.

¹⁵ Ikiahatsa Bahabas kytsa bakatsa sakyriukr̄enikitsa hurukwy ezetu tsipisuke tsihikiknaha. Atakta mybarawytsa hi tsibezehekna. Deus hi zihyryzikpowy. Ispituzoze tsinynaha.

¹⁶ Iwatahi ikiahatsa bo tsimytsasokonaha. Abaka taparaka iekbyrita tu tsimykozokonaha Deus hi zizorowoy. Sesus humo mysyrikpor̄etsa. Iwatsahi ikiahatsa okze tu zizorowoy.

¹⁷ Abaka katukytsa ikiahatsa batu ahahyrinomyry. Sesus tsibezehekna-haze Sesus Deus tse humo batu ahahyrinomyry. Taparaktsa kino niwatihi, Sesus Deus tse humo batu sihyrinomyry

¹⁸ Tubabatu Deus sohokotsa nitsasokonaha, “Kiristu sinini mykara” nikaranaha. Deus humo iwa nitsasokonaha. Abaka anatyhi atsatu nikaranaha.

¹⁹ Ikiahatsa ahamysapybyri tsimoewybanahaktsa! Deus bo tsimy-pamykysonaha. Iwatahi ahamysapybyitsa tsikykaranaha Deus pahaokzohik.

²⁰ Iwa tsimykaranaha zeka ahakur̄etsa tsimoziknaha. Deus pahahyryzikwyky. Hawa myrapukr̄etsa zeka tsipikukunahaze mykur̄etsazo tsimoziknaha. Deus ahamysapybyitsa tsikykaranaha pahaokzohik zeka ikiahatsa ahakur̄etsa tsimoziknaha.

²¹ Bykyze Deus Sesus myzipehazo. Deus ziwatawyta ahapehatsa mozik. Aba bijoikpe eze tu mynapykyryk niy. Bykyze Deus Sesus mybarawy bo myzipehazo. Niytahi Deus nanabyi humo piharabokzo. Iwaze Deus harere sohokotsitsa botu nikaranaha – niy.

²² Tubabatu nihyrikosokdata Moises hi:

– Deus sohokotsa ikiahatsa bo myzipeha. Atahi Deus harere ahabo motsasoko. Kawata zipeha. Nawaze maku sohokotsa myzipeha. Iharere bo wabytaha! Iharere humo hȳy tsimykaranaha. Iwaze tubabatu nihyrikosokdata Moises nitsasoko – Peduru niy.

²³ Tubabatu nihyrikosokdata Moises nitsasoko:

– Asahi kaharere bo batu hÿ mykaranaha. Asahi mopyknaha. Batu katyryktsa tuka hudikhudik zikaha iwatsahi mekybotu mytahasapynaha. Deus harere sohokotsitsa sizubarëtsa astsatu ziknapamykysokonaha.

²⁴ Bykyze ustsá Deus sohokotsitsa atsatu ziknapamykysokonaha. Ni-hyrikosokdata Samue kino niwatihi atsatu ziknapamykysoko. Zina-pamykysokonahaze aba kino anatyhi mykaranaha.

²⁵ Ikiahatsa taparaktsa Deus harere sohokotsa sitsekokatsa wa. Deus harere taparaktsa bo nitsasokonaha. Taparakta mydiri Abarão niy. Ikiahatsa taparakta Abarão tsekokatsa hi. Iwatahi Deus harere ahabo nitsasoko. Deus tihi: “Aparakbaha itsekokatsa humo pisapywyky” niy.

²⁶ Iwaze Deus tatse Sesus ahabo izipeha. Iwatsahi ahamysapybyi ka tsimoewybanaha. Deus aha humo pisapywytasihikik – Peduru niy. Iwaze Peduru myzubaha bo nipamykysoko. Iwatsahi sizubarëtsa ana humo hi tahaku ziwabykynaha.

4

Kytsa Peduru Suão ahatsa kytsawabytsitsa bo nisioktyhyryknaha.

¹ Peduru myzubaha bo nipamykysokoze ziknapamykysokonahatsitsa sibo zumukunaha. Suão zitsumuëhíkí iwaze kytsa sibo zumukunaha. Wastuhu ziknapamykysokonahatsitsa, taparaktsa Deus wahoro eze ustsá Sadusitsitsa iwatsa sibo zumukunaha. Peduru Suão ahatsa humo tahakyrikinaha. Si-harere batu siakparawy iwatsahi tahakyrikinaha.

² Peduru kytsa nisihyrinymyryky. Sesus inahyryzikpo iwatsahi katsa kino niwatihi tsimhyrykosokdanahaze tsimonahyrykpozonaha. Iwa Suão Peduru ahatsa nitsasokonaha ana humo hi tahakyrikinaha.

³ Sitsipatsa humo nisioktyhyryknaha. Sakyriukrënikitsa hurukwy bo nisi-hurukiknaha. Nubaze anaeze unata eze nisihurukikarenaha.

⁴ Kytsa sizubarëtsa siharere ziwabykynahaze Sesus harere bo hÿ nikananaha. Sizubarëtsa myobarkanaha. Aba Sesus tuktsa sîko miutsa niyziknaha.

⁵ Estuba zurunahaze Serusarëhe Ezektsa taparaktsa kapitaõtsa wa tsa sihyrinymyrytsitsa Moises harere soho, iwatsa Serusarëhe bo izumubanaha kytsawabytsitsa izumubanaha

⁶ Anas niwatihi izumu. Taparakta ziknapamykysokonahatsitsa tuk Ka-japas, Aresãdere, Suão ustsá taparakta tukytsa iwatsa izumubanaha.

⁷ Iwaze Peduru Suão ahatsa nasioktyhyryknaha. Asa tihi:

– Ikiahatsa myokeryk riktotaha! – niaha. Niytahi estuba tihi:

– Aty zikwy humo sa iekbyrita tsizororowynaha. Aty sa tazikwy ty ahabo nyny niy iwatahi maku tsizororowy – niy.

⁸ Niytahi Peduru Deus hyrikoso humo tsiharereziurëta niyzik iwaze taparaktsa pe niy:

– O taparaktsa kapitaõtsa watsa myhudikhudikwy mype.

⁹ “Hawa sa iekbyrita tsizororowy” nikananaha. Tsipinymyry tsihikiknaha ja

¹⁰ Mopamykysoko. Sesus zikwy humo izororowy. Nasare Ezekta humo izororowy. Ikiahatsa Sesus iharapatawyhyta humo tsihyryzikiknaha. Deus hi zihyryzikpowy. Iwatahi iekbyrita ahabaze niriktohoko. Deus harere botu ziwataha Sesus soho my.

¹¹ “Harahare batu sapy mytsaty ahabyitsa tsimykaranaha taharahare kino ipamabikia mozik.”

Ziwatahakaze Sesus harahare wata niy. Atahi batu imysapy kytsa mytsaty ahabyitsa nikaranaha, atahi myhyrizikwani niyzik.

¹² Atahi myzubaha humo mymysapywyky. Atahi zuba Deus bo mymyoktyhyryk. Ustsaktsa batu zikaha. Sesus zuba Deus bo myzubaha mymyoktyhyryk iwaze simysapyrêtsa moziknaha. Ihumo sizubarêtsa mysizororowy iwatsahi simysapyrêtsa moziknaha – niy.

¹³ Iwa Peduru Sudeutsa taparaktsa bo nitsasoko. Taharere humo batu isikpyby, iwatsahi taparaktsa paikpa iktsa nikaranaha. Taha bo zuba mytsaty nikaranaha:

– Amo sa atakta batu isikpyby mybo nipamykysoko. Peduru, Suão ahatsa papeu humo tsikaeni zuba sihyrinomyry. Sinamybyitsa asahi Sesus tuk zikzurukunaha – mytsaty nikaranaha.

¹⁴ Taparaka niekbyrita tu sibaze niriktohoko. Iwatsahi taparaktsa batu harere. Anahi nitsaso tsihikiknaha batu zikaha. Tapara niekbyrita humo batu amy tohi iharere ziktsasonaha.

¹⁵ Iwatsahi Peduru itukta ape baze nisipehaka. Niahatsahi taparaktsa asa zuba nipamykysokonaha:

– Hawa sa tsimaha – nikaranaha.

¹⁶ – Hawa sa tsimaha kytsa tuk. Anatyhi kytsa batu zikaha asaktsa niaha. Serusarêhe ezektsa sihyrinomyrêtsa. Taparaka niekbyrita tu zizororowy naha humo hi zihyrinomyrykynaha. Iwatsahi batu tyso “O maku ty batu tyzororowy” mybarapetu tsimykaranaha zeka sizubarêtsa Sesus soho piwabykynaha. Iwaze hawa sa tsimaha

¹⁷ Iwaha hi kytsa batu tywaby. Mytahabetsakiknahaktsa! – niaha. Katsa tihi:

– Sesus soho ty sosobyitaha. Sesus soho tsinapamykysozo naha zeka tsipahasininiwykynaha! – mykaranaha. Iwa asa zuba nipamykysokonaha.

¹⁸ Iwaze Peduru itukta Suão bo hua huazo niaha. Nisibetsakaknaha:

– Kytsa batu isty hyrinomyry zikaha Sesus soho ty tysoso byitaha! Sesus soho tsimypamykysokozonaha zeka tsipahasininiwynaha – nikaranaha.

¹⁹ Peduru tatukta tuk sibo nitsasokozo:

– Hawa sa wasani mytsaty tsimykaranaha. Deus harere bo yhÿ tsimykaranaha. Ahaharere bo yhÿ tsimykaranaha. Hawa sa wasani tsipi-watawykynaha. Hawa sa Deus okzeka wasani mykara. Sesus soho kino tsimypamykysokonaha hÿ – niy.

²⁰ – Sesus nihyrikosokdaze tsinynaha. Iharere tsiwabynaha. Iwatsahi tyso byizeka batu wasani tsimaha. Iwatsahi Sesus soho tsimypamykysokonaha hÿ – niy.

²¹ Taparaktsa kapitaõtsa watsa ziknapamykysokonahatsa kino niwatihi ispezo niaha:

– Sesus soho ty soso byitaha! Sesus soho tsimypamykysokonaha zeka tsipahasininiwykynaha – nikaranaha. Niahatsahi:

– Nabo pãotaha! – niaha. Kytsa pokso batu mysininiwykynaha batu zikaha nisisukehik zuba niaha. Myzubaha Deus bo nipamykysokonaha. – O Deus ikia hi tsamysapyrêta – nikaranaha. Nipamykysokonahaze taparaka niekbyrita tu Deus humo zizororowy.

²² Maku taparaka niekbyrita tu nitsaikbata. Nizororota kuarêta anos. Iwaze Peduru itukta Suão ahatsa Sesus tuktsa bo ziksizonaha.

Sesus tuktsa Deus bo nipamykysokonaha.

²³ Ziksizonahaze Sesus tuktsa bo nipamykysokonaha. Hawa zikna-pamykysokonahatsitsa taparaktsa kapitaõtsa watsa kino niwatihi sibo nipamykysokonaha. Iwaze Peduru harere ziwabykynahaze sizubarẽtsa Deus bo nipamykysokonaha.

²⁴ Asa hi:

– O Deus myzo ikiahi nanabyri tsikzukniki wytyk, bijoikpe, buburu zuba iwa tsikzukni. Tsizubarẽna ikiahi tsikzukni. Mybarawy tsikzukniki.

²⁵ Tubabatu taparakta mydiri Dawi aharere humo tispirikporẽta. Atahi atsumuẽhĩtsa niyzik. Tubabatu ahyrikoso humo nitsasoko:

“Amy humo sa Sudeutsabyitsa tahakyrikinaha.

Utsa tyryktsa niwatihi zimyijakanaha Deus zihudidukyzykynaha.

²⁶ Sipehakatsitsa inazuzukuknahaze Deus zihudidukyzykynaha,

Kiristu apeha niwatihi iharere bo batu hỹ nikaranaha”.

²⁷ Iwatahi Erodes, Piratus, Sudeutsa, ustsá tyryktsa iwatsa tahudikhudikwy eze inaharapekypykbanahaze simysapybyitsa nikaranaha. Atsumuẽhĩtsa Sesus tsimysapyrẽta ihumo tahakyrikinaha. Atahi iwatawyhyta Kiristu apehata my.

²⁸ Taparakta nihyrikosokdata mydiri Dawi botu nitsasoko abaka atsatu nikaranaha.

²⁹ Abaka myzo myharere tsiwaby. Taparaktsa kytsaharerewabytsitsa my-humo tahakyrikinaha. Mymysininiwykynaha. Katsaktsa atsumuẽhĩtsitsa. Ikiá hi tsinamysukparaka. Iwatahi tymytsumuẽhĩkta! Tsimymytsumuẽhĩ zeka aharere ty tsimypamykysokonaha. Mypunihikrẽtsa tsimoziknaha.

³⁰ Batu mypyby iwaze aharere tsimytsasonaha. Azikwy tsiwatawy iwatahi simyitsapyritsa tsimysizororowykynaha. Kytsa ahyrikoso humo azikwy bo iktsa mykaranaha. Sesus imysapyrẽnikita azikwy sizubarẽtsa bo mysiwatawy – nikaranaha. Nawa Deus bo nipamykysokonaha.

³¹ Deus bo nipamykysobanahaze sisapy nitydydykyk tu, Deus hyrikoso situk mynapykyrykzo. Niahatsahi Deus harere nitsasokozonaha. Nipybybyrinahatsa hi nipamykysokozonaha.

Sesus tuktsa tahapokzitsiwyziunaha.

³² Sesus tuktsa atsatu mytsaty nikaranaha. Sihyrikporẽtsa nikaranaha. Batu aty tohi:

– O naka kanamy zuba – niy. Batu sisorek. Tahanamy ty nyny nikaranaha. Tahanamy zibiakaknaha.

³³ Sakzohotsa myzubaha pe:

– Sesus nihyrikosokda kyze inahyrikipo. Ispituzo! – nikaranaha. Deus nisitsumuẽhĩkĩ. Nitsasokonahaze Deus nisitsumuẽhĩkĩ. Iwaze Serusarẽhe ezektsa sihumo siakparawy.

³⁴ Situk tuka sinamyrẽtsa zuba. Kytsa tahatsuhuk huak ty iwaze okyrysaro ziaксеkenaha. Tahawahoro huak ty niwatihi iwaze okyrysaro ziaксеkenaha.

³⁵ Iwaze okyrysaro ty sakzohotsa bo nyny niaha. Asahi sinamybyikitsa bo nyny niaha. Iwa zikzurukunaha. Batu aty tohi inamybyita niy.

³⁶ Niytahi Sose okyrysaro ty sakzohotsa bo nyny niy. Tatsuhuk huak ty okyrysaro ziaксе. Sose petok inaro, usa inaroka Baranabe. Inaro iwatawy kytsa mysipunihikik. Atahi Rewi astsabarẽtsa. Nipurukze tsikzikdihi sihezõje Sipire inarokota.

³⁷ Itsuhuk huak okyrysaro ziaксеhikze, okyrysaro ty sakzohotsa bo nyny niy. Niahatsahi sinamybyikitsa bo nyny nikaranaha. Iwa Sesus tuktsa zikzurukunaha.

5

Ananias Deus bo zispihikbata.

¹ Estuba maku Sesus tuktsa tuk, Ananias inarokota. Ioke Sapira inarokotatsa. Itsuhuk huak okyrysaro ziaксе.

² Okyrysaro ty ituk jokboha nitare. Ioke okyrysaro humo tsihyrinymyrētatsa. Okyrysaro ituk nitare atatsa yh̄y nikara. Sisorokrētsa. Niahatsahi jokboha zuba sakzohotsa bo okyrysaro ty wabehyryk niy. Iwaze Ananias sakzohotsa bo niy. Ispe niy:

– Anaka okyrysaro ty ahabo nyny my. Katsuhuk huak ikyze na zuba okyrysaro ty kytsa kabo nyny niaha – niy. Iwa nispihikbataka.

³ Niytahi Peduru ipe niy:

– Amo sa Satanas harere bo hȳy tsiky. Amy humo sa Deus hyrikoso bo zispihikbata tsihikik. Amy humo okyrysaro jokboha zuba tsiky.

⁴ Tapara atsuhuk hi niy. Atsuhuk huak ty mybo nyny tsimyzeka wasani my. Atsuhuk huak ty mybo nyny habyi zeka wasani my niwatihi. Batu aty tohi humo apehahuk byitatu. Iwatahi amy humo sa amysapybyita tsimykara. Mybo mybarapetu tsiky kara. Ikiā Deus pe kino niwatihi mybarapetu tsiky kara – niy.

⁵ Siharere ziwabyze Ananias wytyk bo inaraha nihyrikosokda. Kytsa sizubarētsa sipybyrētsa nikaranaha.

⁶ Mykyryburuktsa izumunaha. Nihyrikosokdata panu ty ziakwakanaha. Zibykyknaha. Iytyk bo nitsahorokiknaha.

⁷ Iwaze Sapira Peduru bo zumu. Ibarikta nihyrikosokda ana humo hi atatsa batu ihyrinymyry.

⁸ Peduru iwa atatsa pe niy:

– Anaty zuba okyrysaro abarikta kabo nyny niy. Ahatsuhuk huak humo ziakehikze. Na zuba sa kytsa ahabo nyny niaha – niy. – Yh̄y niy. Atsatu nyny niaha – niy. Iwa atatsa zispihikbataka.

⁹ Peduru tihi:

– Amy humo sa ikiahatsa Deus hyrikoso tsiptakpynaha zuba. Tsikpamykysokonaha “Deus hyrikoso bo mybarapetu tsimaha zeka batu sinini tsimaha” tsikaha. Mykyryburuktsa abarikta ytyk bo nitsahoroknaha asahi mozumuzonaha. Ikiā kino niwatihi pabykyryknaha – niy.

¹⁰ Niytatsahi atsoko nira. Peduru niritohoko naha bo inaraha. Niahatsahi nihyrikosokdatatsa nikozonahaze inury zebykyryknaha. Iytyk bo ibarikta baze tu nitsahoroknaha. Sesus tuktsa sizubarētsa ziwabykynaha. Ananias ioke ahatsa sisoho ziwabykynaha.

¹¹ Utsa kytsa ziwabykynahaze sipybyrētsa nikaranaha.

Deus hyrikoso humo hawa kytsa batu zikaha Sesus sakzohotsa nikaranaha.

¹² Sakzohotsa Deus watawyhytsa nikaranaha. Siwatawytsitsa ty hawa kytsa batu zikaha anaty hi nikaranaha. Deus zikwy humo ziwatawykynaha. Deus wahoro zubata isturupe zikarazik eze izumubanaha anaeze kytsa Saroma inarokota. Anaeze inakypykyknaha.

¹³ Batu aty tohi situk zuk. Utsa kytsa Sesus tuktsabyitsa tu situk batu dyhy. Iwatsatu Serusarēhe ezektsa Sesus tuktsa siakparawy. Sisoho nitsasokonaha – O asaktsa simysapyrētsa – nikaranaha.

¹⁴ Kytsa sizubarētsa, wytykyryk kino niwatihi Sesus tuktsa niyziknaha. Sesus tuktsa niobaranaha.

¹⁵ Niahatsahi kytsa simyitsapyritsa ske sak bo inasioktyhyryknaha. Anaeze simyitsapyritsa tahawanu eze tahahoekwytsa eze niwatihi nihoekeknaha. Peduru zitabakaze ihyrikoso simyitsapyrētsa haraputaba

harakmo niy. Peduru hyrikoso simyitsapyritsa haraputaba nisiharamuze nisizororowyky.

¹⁶ Myzubaha bo izumukunaha. Kytsa nabytykara eze tu Serusarêhe bo zumukunaha. Asa kino simyitsapyritsa inasioktykyryknaha. Hyrikoso sapybara sizubarêtsa bo zumuikiknaha. Asahi inasioktyhyryknaha. Sizubarêtsa nisizororowynaha. Hyrikoso sapybara nisiksiwyhiknaha. Iwa Deus hyrikoso nikara.

Kytsa sakzohotsa nisiaknikinaha.

¹⁷ Taparaktsa ziknapamykysokonahatsitsa sakzohotsa humo sizokdirêtsa niyziknaha. Tahatuktsa kino niwatihi sizokdirêtsa Sadusitsa nikaranaha.

¹⁸ Iwatsahi sakzohotsa sitsipa humo nisioktyhyryknaha. Sakyriukrênikitsa hurukwy bo nisihurukiknaha.

¹⁹ Niytahi unata bijoikpe iknykta Deus tsumuêhîtsa sibo inasik. Sakyriukrênikitsa hurukwy hokbowytsa ty nisisaparehik niy. (Hokbowy titsakyrikrêtsa nizapare.) Ape bo nisisukehyryk.

²⁰ Ispe niy:

– Deus wahoro zubata botaha! Anaeze kytsa Sesus soho tysihrinymyrynaha! – niy. Yh̄y niaha.

²¹ Miwa botu sakzohotsa Deus wahoro zubata bo nipupunaha. Anaeze kytsa Sesus soho humo nisihyrinymyryknaha. Kyze kytsaharerewabytsitsa sakzohotsa nisipehakanaha. Taparaktsa ziknapamykysokonahatsitsa sipehakatsa, taparaktsa kapitaôtsa wakatsa sizubarêtsa iwatsa izumubanaha. Asahi kytsaharerewabytsitsa sodadutsa nisipehakanaha. Asahi:

– Sakyriukrênikitsa hurukwy boktsa! Sakzohotsa bo tynasioktyhyryknahaktsa – niaha.

Yh̄y niaha.

²² Niahatsahi sakyriukrênikitsa hurukwy bo nitururuknaha. Zumunahaze sakzohotsa hana bo ja. Batu isty ny. Iwaze taparaktsa bo ziksizonaha. Sodadutsa ispe niaha:

²³ – O Sesus ykzohotsa hana bo ja. Sakyriukrênikitsa hurukwy eze batu tsarawyky. Anaeze sisuparatsitsa zuba. Asahi hokbowy titsakyrikrêta baze niriktotohokonaha, hokbowy ihizikpyrykyhyta. Hokbowy ty zoksapare tsikahaze batu sakzohotsa tsarawybara niapykyk – nikaranaha. Iwa kytsaharerewabytsitsa bo nikaranaha.

²⁴ Iwatsahi kytsaharerewabytsitsa paikpa mytsaty nikaranaha. Taparaktsa ziknapamykysokonahatsitsa, sodadutsa pehatsa kino niwatihi ana ziwabynahaze paikpa mytsaty nikaranaha.

²⁵ Iwaze babatu amata sibo izumu. Ispe niy:

– Wabytaha! Kytsa ikiahatsa tsiksioktyhyryknahatsa, asahi Deus wahoro zubata isturupeze kytsa mysihyrinymyrykzonaha – niy.

²⁶ Niahatsahi sodadutsa pehakatsa tuk nitururuknaha. Deus wahoro zubata bo zumunahaze sakzohotsa petoktsa nisioktyhyrykzonaha. Sodadutsa kytsa sizubarêtsa pokso sipybyrêtsa nikaranaha. Asahi:

– O katsa tsimysisapybyrinaha zeka kytsa sizubarêtsa haraharetsa mybo nasipaparanaha – mytsaty nikaranaha. Iwaze kytsaharerewabytsitsa bo nisioktyhyryknaha.

²⁷ Kytsaharerewabytsitsa sapy bo nisioktyhyryknaha. Niahatsahi taparaktsa ziknapamykysokonahatsitsa sakzohotsa nisibetsakaknaha.

²⁸ – Tapara ikiahatsa pe Sesus soho “kytsa bo soso byitaha” tsikaha. Sesus harere ty isty hyrinymyry byitaha tsikaha. Ikiahatsa myharere bo batu h̄y

tsikaha. Serusarēhe ezektsa tsiksihyrimymyrykynaha. Kytsa pe tsikaha. “Kytsaharerewabytsitsa Sesus zibeze tsihikiknaha” tsikaha – niy.

²⁹ Niytahi Peduru ustsā sakzohotsa tuk siharere soho nipamykysoko. Peduru ispe niy:

– Katsaktsa Deus harere bo hyŷ tsimykaranaha. Kytsa harere meky watu zeka batu hŷ tsimaha.

³⁰ Ikiyahatsa Sesus iharapatawyhyta humo tsihyrizikiknaha. Itsyhyry soik eze humo, ipyrytsa humo kino niwatihi tsihyrizikiknaha. Iwaze nihyrikosokda. Ikiyahatsa tsibezehiknaha.

³¹ Deus izihyrizikpowy. Taparaktsa kapitaōtsa watsa mydiritsa Deus harere bo hyŷ ziknakaranaha. Abaka Deus Sesus myhyrizikwani niyzik. Iwatahi Deus tuk atatu mynapykyryk. Atahi myoktykytsa mozik. Iwa Deus niy. Iwatahi Isareu ezektsa tahamysapybara ty pimoewynaha. Sesus humo Isareu ezektsa tahamysapybara ty pimoewynaha zeka Deus mysiokzohik – niy.

³² – Hawa Deus nikara tsinymyrykynaha. Iwatsahi tsinapamykysokona. Deus hyrikoso niwatihi. Hawa Deus nikara ihyrikoso piwatawyky. Wasani mykara. Deus hyrikoso ty kytsa bo nyny niy. Kytsa iharere bo ma mykaranaha zeka ihyrikoso situk mynapykyryk – niy. Iwa kytsaharerewabytsitsa bo Peduru nitsasoko.

³³ Ziwabykynahaze ana humo hi sakyrirētsa niyziknaha. Sakzohotsa humo nisibakzykynaha.

³⁴ Niytahi maku estuba rikto niy. Estuba kytsaharerewabytsitsa tu niy. Pariseu niy. Pariseutsa Deus harere nisihyrinymyrykynaha. Kamarieu inarokota. Serusarēhe ezektsa ihumo siharereziurētsa nikaranaha. Iwaze itukytsa bo nitsasoko:

– O katukytsa sakzohotsa ty ka isty suksespyk tsimaha. Iwaze katsa zuba tsimypamykysonaha – niy.

Yhŷ nikaranaha. Sakzohotsa ape bo nisisukehiknaha. Iwaze Kamarieu kytsaharerewabytsitsa bo nitsasoko. Atahi:

³⁵ – Taparaktsa Isareu ezektsa wabytaha! niy. Hawa tsimaha kytsa petoktsa bo pykyhytutaha! Mytsatyziutaha.

³⁶ Jokboha tu maku izumu Teudas inarokota. Atahi kytsa bo nitsasoko “Uta apehatsa wata” nikara. Kytsa sizubarētsa kwatero sētos kytsa ituk niukurunaha ituktsa niyziknaha. Iwaze Teudas ibezehita. Iwatsahi ituktsa nanabyitaba nipaparahabaiknaha. Ihyriziktsokzawy nepyk.

³⁷ Niytahi usta maku Sudas inarokota. Karireja ezekta niy. Ata humo kino mytsaty tsimaha. Nawa zuruze maku taparaktsa humo kytsa naro ziwatahaka. Atakta niwatihi kytsa sizubarētsa iapik niukurunaha ituktsa niyziknaha. Kyze botuhi ibezehita. Ituktsa nanabyitaba nipaparahabaiknaha. Ihyriziktsokzawy nepyk – niy.

³⁸ Atahi:

– Aba niytahi kytsa petoktsa inasioktyhyryknaha. Batu amy tohi humo zikaha niy. Sihyriktsokzawy kytsa zikwy humo my zeka mopyk.

³⁹ Sihyriktsokzawy Deus zikwy humo my zeka ikiahatsa ba zikpyk batu zikaha. Deus hyriziktsokzawy humo kino iwatsahi ba zikpykba. Tsipepyk tsihikiknaha zeka ikiahatsa batu Deus tuk zikaha. Deus mymysininiwy – niy.

⁴⁰ Kytsaharerewabytsitsa Kamarieu harere siakparawy. Iharere bo yhŷ nikaranaha. Niahatsahi sakzohotsa bo huahua niaha. Inasihyrykzonaha sodadutsa pe niaha:

– Sakzohotsa tysikinaha – niaha.

Hyŷ nikaranaha. Sakzohotsa pikuzā hwyk ty nisikikinaha.

– Sesus soho ty ka soso byitaha isty hyrinymyry byitaha – nikaranaha. Iwaze isty suketaha.

⁴¹ Niahatsahi sakzohotsa ziponaha iwatsahi sakurëtsa nikaranaha. Deus pe nikaranaha:

– O Deus mybo iktsaziu tsiky. Kytsa nimyकिनahaze Deus wasani nikara. Sesus humo sinini tsikykarannahaze mykurëtsa tsikyziknaha – nikaranaha.

⁴² Zikzibytuhukunaha tu sakzohotsa Deus wahoro zubata isturupeze kytsa Sesus soho ty nisihyrinymyrykynaha. Tahawahoro eze kino niwatihi Sesus soho ty nisihyrinymyrykynaha. Ziknapamykysoikiknaha kytsa bo Sesus Kiristu niy. Sesus ta Deus pehata babata mywata niyzik nikaranaha.

6

Sete kytsa sakzohotsa nisitsumuëhĩknaha.

¹ Aibani Sesus tuktsa niobaranaha. Sizubarëtsa niyziknaha. Iwaze asizahi Kereko harere nitsasokonaha betsakziu nikaranaha. Harere Eberaiko tsasohokotsa tuk betsakziu nikaranaha. Kereko harere sohokotsiza hi:

– O Eberaiko harere sohokotsiza batu wasani nikaranaha. Haramukukaka asizahi Kereko harere sohokotsiza tsikaeni zuba namy niaha. Zikzibytuhukutu kytsa okyrysaro ty nyny mahaze tsikaeni zuba sibo nyny maha. Haramukukaka Eberaiko harere sohokotsiza sizubarëna namy niaha. Zikzibytuhukutu kytsa okyrysaro ty nyny mahaze sizubarëna ty sibo nyny maha – iwazahi betsakziu nikaranaha. Niahatsahi dose sakzohotsa Sesus tuktsa aparakbaha inakypykbanaha.

² Izumubannahaze ispe niaha:

– O katukytsa katsa Deus harere tsimytsasokonaha. Anahi myhyrizikt-sokzawy tsimykarannaha. Myhyriziktsokzawy tarekek zeka iwaha hi hara-mukukaka bo okyrysaro tsipibiakaknaha batu wasani tsimaha.

³ Iwatsahi ikiahatsa sete kytsa tsumuëhĩtsitsa tysiawatawynaha katukytsa niaha. Kytsa ahatuk tu tysiawatawynaha. Kytsa sihyrinymyrëtsa. Sispirikporëtsa kytsa Deus hyrikoso inamykse tsimysiawatawynaha. Asahi hara-mukukaka okyrysaro sibo tabiak iwa sihyriziktsokzawy mykarannaha.

⁴ Katsaktsa Deus bo tsimypamykysoikiknaha. Iharere tsimytsasoikiknaha. Niwazuba tsimaha – niaha.

⁵ Sizubarëtsa sakzohotsa harere bo yhy nikaranaha. Niahatsahi Sesus tuktsa sete kytsa tsumuëhĩtsitsa nisiwatawykynaha. Kytsa Estewã, Piripi, Pirokoro, Nikano, Timo, Paramenas, Nikorai iwatsa nisinyaha. Estewã Deus harere humo tispirikporëta hi. Deus hyrikoso ituk ziknapykyryk. Nikorai Ætiokia eze nipuruk. Sudeu byitatu Deus harere bo hyy ziknakara Sudeu wata. Tapara Sesus tuktsa niukuru Deus bo hyy nikara. Asahi kytsa Sesus tuktsa nisiwatawynaha.

⁶ Niahatsahi Sesus tuktsa sete kytsa tsumuëhĩtsitsa sakzohotsa bo nisioktyhyryknaha. Iwaze sakzohotsa sete kytsa tsumuëhĩtsitsa sitsyhyryze Deus bo nipamykysokonaha. Tahatsyhyrypetsa ty tsumuëhĩtsitsa harektsa humo paik paik nikaranaha. Siwatu iwa tahatsyhyrypetsa ty tsumuëhĩtsitsa harektsa humo paik paik nikaranaha sisopykwy humo. Iwaze sihyriziktsokzawy ty nisiakzohik.

⁷ Iwa Sesus tuktsa niobaranaha kytsa sizubarëtsa Deus harere bo hyy nikaranaha, Sesus tuktsa niyziknaha. Serusarëhe Ezektsa Sudeutsa ziknapamykysokonahatsitsa niwatihi Deus harere bo hyy nikaranaha.

Taparaktsa Sudeutsa Estewã ziockyhyryknaha.

⁸ Estewã Deus zikwy humo amy ty kytsa batu zikaha atsatu nikara. Deus ihumo tsimypokzitsiukrêta zikzitsumuêhîkî. Estewã Deus zikwy kytsa bo ziwatawyky, ituk zitsumuêhîkîze Deus zikwy ziwatawyky.

⁹ Iwatsahi wastuhu kytsa Sudeutsa ihumo batu siakparawy nizokyryky-naha. Asahi Deus wahoro bo inauzuzukikiknaha. Anasapy eze kytsa zinarokonaha – Deus wahoro kytsa sihyritsokzawybyitsa. – Iwa kytsa Deus wahoro zinaroko. Sudeutsa Sireni ezektsa, Aresãdere ezektsa, asahi Sirisia ikny, Asia ikny niwatihi. Sizubarêtsa Estewã tuk niharapepehakanaha.

¹⁰ Atahi tispirikporêta ziknapykyryk. Deus hyrikoso humo tsiharerezi-urêta. Iwaze kytsa Estewã batu siakparawy. Iwatsahi kytsa bo okyrysaro ty nyny niaha. Siharerewabymybarêtsa bo nyny niaha. Ispe niaha:

– O ikiahatsa kytsa bo Estewã soho tsiwabymybarêtnaha – nikaranaha. Ikiahatsa hi:

¹¹ – “O Estewã harere batu imysapy. Nisihrinymyrykyze Deus soho zimyiki. Moises Deus tsumuêhîtsa kino niwatihi isoho zimyiki iwaze batu isty hyrinymyryziu” mybarapetu tsimaha – nikaranaha.

¹² Niahatsahi Estewã soho mybarapetu nikaranaha. Iwatsahi kytsa ihumo tahakyrikinaha. Taparaktsa kapitãotsa watsa, Moises harere zihyrinymyrykynahatsitsa iwatsa tahakyrikinaha. Iwaze Estewã kytsa-harerewabytsitsa bo ziockyhyryknaha. Anaeze isoho humo mospihik-batakanaha.

¹³ – Atakta Deus wahoro zubata soho zisapybyrikik. Moises harere niwatihi zisapybyrikik – mybarapetu nikaranaha.

¹⁴ Iharere zikziwabykynaha, botu nitsaso – Sesus Nasare ezekta Deus wahoro zubata naktsipetok. Tapara nitsasoko Deus harere anahi Moises ziwatahaka Sesus meky watu mysisopyk. Tsiwabykynaha – mybarapetu nikaranaha. Iwa Estewã soho zispihikbatakanaha.

¹⁵ Niahatsahi kytsaharerewabytsitsa Estewã bo iktsaziu nikaranaha. Iok bo iktsaziu nikaranahaze bijoikpe iknykta wata niyzik, iwa kytsaharere-wabytsitsa zinyaha.

7

Estewã atatu tabetesaka.

¹ Niytahi taparakta Deus wahoro eze ziknapamykysokota ipe niy:

– Hawa kytsa aharene soho nitsasohokonaha wasape hi sa – niy.

² Niytahi Estewã kytsa bo nipamykysoko:

– O katukytsa, kazotsa wabytahaktsa! – niy. – Tubabatu Deus taparaktsa mydiri bo ziwatawy. Mydiri nihyrikosokdata Abarão. Mesopotamia eze tuze ziwatawy. Bykyze Harã bo niy. Deus ipe niy:

³ “Abarão ikiakta nabokta! Asapy tsierekekta. Atukytsa tyserekekta! Meky botu tsipasapy. Ahudikhudikwy ezytyk piwatawy. Ana bo tsipomoze, uta ikia pe na hi wasani my”

⁴ Iwatahi mydiri Karadeja ikny nikara. Harã eze niapykyryk. Kyze izo nihyrikosokdaze mydiri mysapy bo niukuru. Deus mysapy bo ziwatawy tsihikik. Kanaã bo izumu.

⁵ Deus tasapy ty Abarão bo batu nyny niy. Deus: “Kasapy tsizubarêna atsekokatsa bo nyny my. Tsimyhyrikosokdaze atsekokatsa bo nyny my” niy. Deus nitsasokoze mydiri batu ihyrytsaka:

⁶ Deus nikarazo: “O atsekokatsa bipyritsa sapy bo mysioktyhyryknaha. Anaeze kwatero sêtos anos mynapykyryknaha. Kytsa atsekokatsa mysisykyrykiknaha. Tarabaja mykaranaha tsahi okyrysaro ty batu sibo

nyny zikaha. Tarabaja ahabyi zeka mysikikinaha. Nawa atsekokatsa hi mykaranaha ba ziksisakihiknaha.

⁷ Kytsa atsekokatsa mysisukyrykynaha sibo hi sinini mykaranaha. Bykyze atsekokatsa bipyri sapy nitururuknaha. Asahi kabo nitsasokonaha ‘O Deus ikia hi tsamysapyrêta mykaranaha’ niy.” Iwa Estewã nipamykysokozo

⁸ Deus mydiri Abarão pe niyzo: “Maku skyrytsa sipiakzyzykyktsa. Iwatahawy mozik. Iwatahawy bo iksa tsimyze kaharere bo mytsaty tsimykara” niy. Aibani Isake. Abarão tse nipuruk. Mytsyhyrytsa wa zuruze Abarão tse tsibik ipiakzykyhyta. Hawa Deus nitsaso nikara. Isake taypykze itse nipuruk. Sako inarokota atakta mytsyhyry wa zuruze Isake tatse tsibik ipiakzykyhyta. Sako taypykze dose hyrytsa nikara. Sako hyrytsa isipiakykyhytsa. Kyze Sako hyrytsa taypyknahaze taparaktsa hi niyziknaha – Estewã niy.

⁹ – Kyze estuba Sako tse Sose inarokota. Itukytsa ihumo sizokdirêtsa nikaranaha. Iwatsahi tahatsy Esito ezektsa bo zioqtywyhyknaha iwaze ihuak ty sibo okyrysaro ty nyny niaha. Sakparawybyritsa hi tahatsy ty kytsa bo nyny niaha. Iwa Sose Esito bo zioqthyryknaha.

¹⁰ Deus hi Sose tuk ziknapykyryk ihumo tsimypokzitsiarêta. Sinini nikaraze Deus zitsumuêhîkî. Iwaze tsihyrinymyrêta niyzik. Iwaze Parao kytsa pehatsa tihi:

“O atakta tsihyrinymyrêta babata” niy. Iwatahi Sose pe niy:

“Ikia Esito ezektsa pehatsa tsmozik. Kawahoro kino niwatihi atsa eze tsimynapykyryk” nikara.

¹¹ Kyze sizubarêtsa nidisahawybyrinaha. Esito eze Kanaã eze kino niwatihi myzubaha nidisahawybyrinaha. Siaraparêtsa ziknakaranaha. Sidisahawy nepykba. Kytsa sizubarêtsa siaraparêtsa nikaranaha.

¹² Niytahi aibani Sako sidisahawy soho Esito eze ky ziwaby. Iwatahi tahyrytsa taparaktsa Esito bo nisipeha. Iwaze taparaktsa hi Esito bo niukurunaha. Petok baba Esito bo niukurunaha. Tiriko tahadisahawy bo niukurunaha.

¹³ Nikuruzonahaze Sose sibo tawatawy: “O uta hiba ahatsy” nikara. Bykyze Parao Sose tukytsa nisiny.

¹⁴ Iwatahi Sose ispe niy: “Kazo, katukytsa iwatsa kabo tynasioktyhyknaha. Katuk tynapykyryknaha” niy. Yhÿ nikaranaha. Sizubarêtsa Esito bo. Setêta sîko kytsa iwatsa.

¹⁵ Esito bo niukurunaha. Sose baze niapykyryknaha. Aibani Sosezo anaeze nihyrikosokda. Niahatsahi taparaktsa Esito eze tuze nihyrikosokdanaha.

¹⁶ Aibani sizotsa poiktsa, Sako sapy bo nisiskyryknaha. Isapy bo Kanaã inarokoha. Tubabatu Abarão ana sapy bo hi tasapy okyrysaro humo ziaксе. Emore hyrytsa anasapy Abarão bo zinynyhiknaha. Anaeze itukytsa poiktsa nisytykyryknaha. Anaeze taparaktsa poiktsa nisytykyryknaha.

¹⁷ Kyze mydiritsa Esito eze tuze sizubarêtsa inaubaranaha. Bykyze babatu Deus tyryktsa mysioktyhyrykze Sudeutsa inaubaranaha hi.

¹⁸ Kyze Esito ezektsa usts pehakatsa niyzik. Batu Sose inyhy. Tubabatu Sose nihyrikosokda iwatahi sipehatsa batu ityny.

¹⁹ Esito ezektsa mydiritsa nisikikinaha nisispihikbataikiknaha. Sinini wykynaha. Sipehakatsa ispe niy:

“Ikiahatsa ahabykyhytsa ty mopupuruknaha zeka tysirekeknaha! Ahabykyhytsa maku skyrytsa zeka tysimiwynaha” niaha.

²⁰ Niytahi Moises nipuruk. Tisapyrêta tsibik. Byzoje harakykbyi zitsuze tahi taje tuk niapykyryk. Tazo wahoro eze tu niapykyryk.

²¹ Bykyze ape baze pihik sak eze iokpitsihik. Iwaze hi Parao ste Moises zikaha. Parao pehakatsa Esito ezektsa tuk, iste Moises zikaha. Atatsa tawahoro bo zibykyryk. Itse wata niyzik. Ippykyhy niyzik.

²² Iwatahi Moises zinymyryky. Esito ezektsa hyrinymyrywy anatyhi zinymyryky. Tsihyrinymyrëta hi. Maku myhyrizikwani niyzik. Iharere humo kytsa ziwabytoktonaha.

²³ Kyze Moises tatukytsa bo inakozore. Tatukytsa hawa ja zikzurukunaha inakozo tsihikik. Atahi botu kuarëta anos ziytyk tsehe. Tatukytsa bo inakozoreze. Sisapy bo zumuze Esito ezekta bo iktsa niy.

²⁴ Atahi tatukytsa nisisukyryky niy. Iwatahi tatukytsa nisibetesaka. Esito ezekta humo tatsapusare iwaze Esito ezekta zibeze iwatahi tatukytsa nisitsumuëhikĩ Moises mytsaty ahabyita nikara:

“O katukytsa mysitsumuëhĩ zeka tozeka ja pinymyrykynaha.”

²⁵ Batu ba. Batu sihyrinymyry. Atahi mysiockyhyryk batu sihyrinymyry nikaranaha.

²⁶ Niytahi estuba zuruze Moises tatukytsa bozo niy. Makutsa petoktsa nisihobyk. Niharapehudizukunaha. Iwaze nisipyk tsihikik iwaze sibo zumu. Ipe niy:

“O mykyryburuktsa ikiahatsa atukytsa hehỹ tsimaha. Amy humo sa tsimyharape hudizukunaha”

²⁷ Nitsakikita zipetuhikze Moises pe niy:

“Amo skaraba mybo tsikzumu. Aty sa ikia zapehaka iwatahi mypehatsa wata tsimozik. Batu imysapy tsimy.

²⁸ Jatu Esito ezekta tsibezehik. Esito ezekta wata tsipikbeze sa” niy.

²⁹ Ana ziwabyze hi Moises Esito ekze niwakik. Niytahi Moises Midiã bo niparakik. Anaeze niapykyryk tasukza. Atatsahi ioke niyzik. Aibani itse nipuruk, niytahi usta itsy nipuruk. Iwa Moises petoktsa hyrytsa. Anaeze nitare. Kuarëta anos niapykyryk.

³⁰ Kyze kuarëta anos ziharamuze bijoikpe iknykta Deus tsumuëhĩtsa Moises bo inasik. Atahi jerukbara bo niy. Hara Sinija inarokoha bytykareze tu niy. Ana bo hi bijoikpe iknykta ibo inasik. Moises izo bo iktsa niyze erekaratsibik humo inapokok ba zikoro.

³¹ Tsipybyrëta. Iwatahi iktsaziu niy. Erekaratsibik bo niy. Izumuze Deus yksoho ziwaby. Deus hi:

³² “Utakta Deus, adiritsa kahumo sispirikporëtsa. Adiritsa Abarão Isake Sako iwatsa kahumo sispirikporëtsa” niy. Moises nitydydykyk tu tapybyspyk tu nitydydykyk. Tsipybyrëta nikara iwatahi batu iktsa niy. Deus nitsasokozo. Ipe niy:

³³ “Apyrysuktsa ty isty bok bokaretykta! Kahumo aspirikpohukta iwatahi apyry suktsa ty bok bokarety. Anaeze tsimyriktohoko kahumo tsakurëna.

³⁴ Utakta Deus Esito ezektsa katyryktsa nisisukyrykynaha. Sinini nikaranaha ana humo hi kahyrinymyrëta. Sisuka piwabyky. Esito ekze mysiwakbahyknaha hỹ. Ikia papeha. Iwatahi ikia katyryktsa botykta! Esito bo tsipiksizokta! Iwatahi katyryktsa mekybotu tsimysiockyhyryk.” Iwa Deus Moises bo nitsasoko – Estewã niy.

³⁵ Nitsasokozo:

– Kyze Deus Moises Esito bo zipeha. Iwatahi ityryktsa Sudeutsa mekybotu nisioktyhyryk. Bijoikpe iknykta Deus tsumuëhĩtsa zazata koso buruk ibo nitsasoko. Tapara Sudeutsa iharere bo batu hỹ nikaranaha iwatatu zipehahik. Tapara Sudeutsa ipe nikaranaha:

“Aty sa ikia zapeha iwatahi tsimypehaka zeka batu amysapy” nikaranaha. Deus humo atahi sipehatsa niyzik. Iwatahi Sudeutsa mekybotu nisioktyhyryk.

³⁶ Kyze Moises Esito eze tuze siwatawyhytsa nikara. Hawa kytsa batu zikaha atsatu nikara. Pihik tsizubarēna zitsikzanahaze niwatihi inymyryhywy ziknakara. Pihik tsizubarēna “Pihik tsikyiriri” inarokoha. Iwa Sudeutsa Esito ekze niwakbaiknaha. Niahatsahi jerukbara bo niukurunaha. Kuarēta anos anaeze niapykyryknaha. Anaeze hi Moises inymyryhywy ziwatawy. Hawa kytsa batu zikaha ziwatawyky. Atahi Isareu ezektsa pe niy:

³⁷ “Deus harere sohokotsa ahabo myzipeha. Hawa Deus zikpehaka nawa iharere sohokotsa pipeha. Atahi atukytsa harere sohokotsa” my. Moises Isareu ezektsa tatukytsa tuk jerukbara eze niapykyryk.

³⁸ Isareu ezektsa Sinja jerukbara eze inauzuzuknaha. Anabo hi Isareu ezektsa mydiritsa bo nitsasoko. Deus harere sibo nitsasoko. Bijoikpe iknykta Sinija hara bete Moises bo nitsasoko. Deus harere nitsasoko. Hawa kytsa mozurukunaha anahi Moises nitsasoko. Ana hi Moises ziwatahaka iwatahi katsa tsinymyryknaha – Estewā niy.

³⁹ Nitsasokozo:

– Kyze mydiritsa Moises harere bo batu hỹ nikaranaha. Moises batu siakparawy. Asaktsa:

“O katsa Esito bo tsipiksizo tsihikiknaha” iwa mytsaty nikaranaha. Moises hara jobonita bo nidokoze kytsa Arão Moises ziky bo nitsasokonaha.

⁴⁰ Ipe niaha:

“Ikia mytsyhyryze hyrikosotsa ty tsimykta! Hyrikosotsa mydeutsa moziknaha. Asahi deus hyritywatsa myharaze pomonaha. Asahi myske piwatawynaha. Moises ja. Atahi Esito ikny inamyoktyhyryk. Hana bo my. Batu katsa mynyhy” niaha. Iwa Arão bo nitsasokonaha.

⁴¹ Niahatsahi pikuzatse wata nizukninaha, ihyrikoso mydeutsa hyritywata niaha. Kyze zikiehe hozipyrykzatsa zibezenahaze hyrikoso ty taha okeryk sibão niaha. Sakurētsa. Sihyrikoso humo sakurētsa. Simyikaha hyrikoso humo nikaranaha. Hyrikoso humo tahi nizukninaha sakurētsa niyziknaha.

⁴² Deus hi sihumo batu iaku. Asahi sihyrikoso pikuzatse wata humo siakparawy. Iwatahi Deus tihi.

“Ikiahatsa pikuzatse wata humo ahakparawy. Pikuza wata humo ahakparawy za” niy.

Iwatsahi zisapybyriwyknaha. Niahatsahi haramwe, byzoje, byrisoiktsa iwatsa sihumo siakparawy.

Hawa katsa Deus humo myspirikporētsa asahi byrisoiktsa humo siakparawy.

Tubabatu Deus sohokotsa papeu humo ziwatahakanaha. Deus hi: “Isareu ezektsa ikiahatsa jerukbara eze tuze siraratsa ty nisibakanaha.

Siraratsa ty batu kabo nyny tsikaha.

Batu kaokeryk siraratsa ty tsikaha, ahahyrikosotsa ana hi tsikzokninaha sibo hi siraratsa ty nyny tsikykaranaha”.

⁴³ Ahahyrikosotsa ty tsikzokninaha ispe tsikaha: “Ikia mydeus” mybarapetu tsikykaranaha, “Ikia humo makparawy” mybarapetu tsikykaranaha.

Morok ahadeus niy. Repã usta Deus mybarapetu tsikykaranaha. Morok isparik ty tsikzibykyknaha.

Anaeze Morok hyrikoso eze tu aokokyk tsikaha.

Byrisoik hyritywata humo ahakparawy. Kytsa Deus humo spirikporētsa nawatsa hi byrisoik hyritywata humo ahakparawy.

Repã inarokota. Iwatahi pahasininiwyky. Mekybotu pahaoktyhyryk.

Mekybotu ikiahatsa pahapehaka, usta taba Babarão sapy nokponi niy.

⁴⁴ — Kyze mydiritsa jerukbara eze tuze Deus parik zebykyryknaha. Sir-aratsa hwyk nizukninaha atsatu zebykyryknaha. Anaeze Deus sapy my atahi kytsa tuk mynapykyryk ziwatawyky. Tapara isparik hawa mozokninaha Deus sibo nitsasoko. Botu Deus Moises bo nitsasoko hawa isparik nikaranaha iwatsahi astatu nizukninaha — Estewã niy.

⁴⁵ Nitsasokozo:

— Bykyze Moises nihyrikosokdaze Sosue sipehatsa niyzik. Sosue mydiritsa pehatsa niyzik. Asahi jerukbara nitururuknahaze isparik Kanaã bo zebykyryknaha. Anaeze Sudeutsabyitsa niapykyryknaha. Deus hi Sudeutsabyitsa nisiwakbaik iwatsahi mydiritsa zuba niapykyknaha. Deus parik situk zibykyryknaha.

Bykyze Dawi sipehatsa niyzik. Mydiritsa Kanaã eze tuze sipehatsa niyzik. Deus ihumo tsimypokzitsiukrêta iwatahi itsyhyryze zisapybaka. Iwaze Dawi Deus pe niy:

⁴⁶ “Utakta awahoro mozukni tsihikik. Kadiri Sako ahumo tspirikporêta. Uta kino niwatihi ikia humo kspirikporêta. Iwatahi awahoro mozukni tsihikik” niy. Iwa Dawi Deus bo nipamykysoko. Deus iharere bo batu hỹ niy. Dawi Deus wahoro ty batu tysukni.

⁴⁷ Itse zuba Deus wahoro nizukni. Soromao Deus wahoro nizukniba.

⁴⁸ Deus wahoro eze batu hudikhudikwy ziky. Wahoro kytsa mozokninaha, anaeze Deus babata batu hudikhudikwy ziky niy.

⁴⁹ Deus sohokotsa botu ziwataha. Bijoikpe eze tu mynapykyryk. Deus: “Bijoikpe kadyhywy waha. Wytyk kapyry pe sapy waha.

Kytsa sizubarêtsa mysipehaka. Mybarawy iknyktsa mysipehaka. Wahoro ikiahatsa tsimyzukninaha anaeze ba zikapykyk.

Utakta estuba sapy bo zuba ba ziknatare.

⁵⁰ Tsizubarêna nizuknibaze iwatahi ba atsaenze tu zuba ziky.”

Iwa Deus nitsasoko — Estewã niy.

⁵¹ Nitsasokozo:

— O katukytsa wabytaha! Deus harere bo batu hỹ tsimaha. Aha-harekykrêtsa Deus harere bo batu hỹ tsimykaranaha. Ikiahatsa Deus harere batu ahawabyhy. Ikiahatsa kytsa watsa, asa wahi Deus humo batu sispirikpo. Ikiahatsa ahadiritsa watsa.

⁵² Asahi Deus sohokotsa sinini nikaranaha. Nitsasokonahaze “Atahi wasanita mozumu” ahadiritsa Deus sohokotsa nisisininiwykynaha. Iwaze Deus hyrikoso batu hỹ ziknakaranaha. Abaka atakta wasani ziknakarata ikiahatsa sisukyrykytsitsa bo tsioktyhyryknaha. Sesus inarokota. Iharap-atawyhyta humo zihyrizikiknaha. Deus harere ikiahatsa bo zahapeha.

⁵³ Sitsumuêhĩtsa ty taharere ikiahatsa bo nitsasonaha. Ikiahatsa hi iharere bo batu hỹ tsimaha — Estewã niy. Iwa kytsaharerewabytsitsa ziwabykynaha.

Estewã harere humo wabytsitsa tahakyrikinaha.

⁵⁴ Iharere wabytsitsa tahakyrikinahaze tahatsaputsa ty dydydy nikaranaha. Tahakyriwy humo tahatsaputsa ty dydydy nikaranaha.

⁵⁵ Deus hyrikoso Estewã tuk niapykyryk. Deus hyrikoso ituk tu bijo bo iktsa niy. Anaeze okoro zikywa Deus baze Sesus bo iktsa niy. Sesus Deus panuryk taba niriktohoko. Ibo iktsa niyze ispe niy:

⁵⁶ — O Iktsataha! Bijoikpe bo zoksapare Sesus mywata Deus baze niriktohoko ikozo — niy.

⁵⁷ Anahi ziwabykynahaze opykani kakaik niaha. Tahaspioke zuzuk niaha iwatsahi batu wabyha.

⁵⁸ Iwatsahi Estewã zikyrikinaha ape bo nizokehyryknaha. Tahakpyzawawy ty zibokbokoknaha. Sauro baze sikbãore niaha iwatahi nisiperyky. Sauro mykyryburukta.

⁵⁹ Niahatsahi Estewã haraharetsa ty pibezekenaha Estewã Sesus bo ni-pamykysoko:

– O kapehatsa Sesus kahyrizikarawy tsioktyhyryk – niy. Taekaratsa humo puruk puruk niy.

⁶⁰ Deus bo opykani huahua nikara:

– O kapehatsa Sesus, kytsa simysapybyri humo tysiokzo – niy. Niytahi nihyrikosokda. Sauro Estewã zibeze tsihikik, kytsa zibezenhaze wasani niy.

Bykyze kytsa Sesus tuktsa Deus harere bo hyỹ nikaranaha, Estewã nury zebkyryknaha. Iytyk bo nitsahoroknaha. Ipokzi nipuziukunaha.

8

Sauro Sesus tuktsa nisisukyryky.

¹⁻² Iwaze tihi Sesus tuktsa nisisukyryknaha iwatsahi meky botu tahasapynaha niwakbaiknaha. Wastuhu kytsa Sudeja bo niwakaknaha. Ustsa Samarija bo niwakaknaha. Sakzohotsa zuba Serusarẽhe eze nitarenaha.

³ Sauro Sesus tuktsa nisisukyry. Siwahoro watu nitsukurukze kytsa nisioktykyryk. Wytykyryk humo kino niwatihini nisioktykyryk. Sakyriukrẽnikitsa hurukwy bo nisioktykyryk. Iwa Sauro Sesus tuktsa nisisukyryky.

Piripi Samarija bo niparak.

⁴ Iwaze Sesus tuktsa asahi niwakbaiknaha Deus harere kytsa sizubarẽtsa bo nitsasokonaha. Iwatsahi Sudeja ezektsa bo Sesus soho nitsasokonaha. Samarija ezektsa bo niwatihini Sesus soho nitsasokonaha.

⁵ Sesus tuktsa Deus harere Samarija ezektsa bo kino nitsasokonaha. Piripi Samarija bo niparak. Anaeze Deus wasania humo nitsasoko. Iwaze Samarija ezektsa pe niy:

– Sesus Kiristu Deus zipehata mywata niyzik – niy.

⁶ Samarija ezektsa anahi ziwabytoktokonahaze iharere bo hyỹ nikaranaha. Siwatawyhytsa ziknakara nisinynaha. Siwatawyhytsa kytsa batu zikaha atahi ziknakara.

⁷ Hyrikoso sapybara nisiksiwyhik. Hyrikoso sapybara nisisukebaiknahaze opykani kakaik niaha. Kytsa pãozikahabyitsa nisizororowy. Sekbyritsa kino niwatihini nisizororowy.

⁸ Iwaze Samarija ezektsa sakurẽtsa. Sakurẽtsa niyziknaha.

⁹ Kyze tapara Samarija ezektsa Simaõ harere bo yhỹ nikaranaha. Atahi myrawy tsihitsa. Tsihyrinymyrẽta. Samarija ezektsa bo mybarapetu nikara:

– Utakta myhyrizikwani – mybarapetu nikara.

¹⁰ Iwatsahi sizubarẽtsa – atahi myhyrizikwani – mytsaty ahabyitsa nikaranaha. Sizubarẽtsa Simaõ harere bo ma nikaranaha. Zispihikbatakanaha:

– O atahi deus naro “Zikwy tsizubarẽna” Simaõ niyzik – mytsaty ahabyitsa nikaranaha.

¹¹ Tubabatu Simaõ siwatawyhytsa nisiwatawyky. Sipybyrẽtsa. Iwatsahi kytsa iharere bo ma nikaranaha. Iharere bo ziwabyziukunaha.

¹² Kyze Piripi Deus harere nitsasokoze Samarija ezektsa ziwabytoktokonaha. Deus tyryktsa soho ty nitsasoikik Deus wasania ty Sesus soho nitsasokoze ma nikaranaha. Iwatsahi kytsa Sesus humo sispirikporẽtsa ituktsa

niyziknaha. Nisiharasusuhiknahatsa wytykyryk kino niwatihi nisiharasusuhiknahaza

¹³ Simaõ niwatihi Sesus humo tispirikporëta iwatahi amata skyry ja ziharasuhik. Kyze Piripi tuk zikzuruku. Piripi watawyhytsa nikaraze Simaõ ibo iktsaziu nikara. Tsipybyrëta.

¹⁴ Kyze sakzohotsa Serusarëhe eze niapykyryknaha. Anaeze Samarija ezektsa soho ziwabynaha. Kytsa tihi:

– O Samarija ezektsa Sesus humo sispirikporëtsa – nikaranaha. Iwatsahi sakzohotsa Peduru itukta Suão ahatsa sibo nisipehahik.

¹⁵ Peduru Suão iwatsa Sesus tuktsa bo zumunahaze. Sesus tuktsa tsyhyryze Deus bo nipamykysokonaha.

¹⁶ Deus hyrikoso Sesus tuktsa batu zuk. Nisiharasusunahaze asa hi:

– O katsaktsa Sesus tuktsa tsimoziknaha – niaha. Deus hyrikoso Sesus tuktsa bo batu zuk. Iwatsahi sakzohotsa sitsyhyryze Deus bo nipamykysokonaha. – O Deus ahyrikoso ty Sesus tuktsa bo tyziakzo – niaha.

¹⁷ Niahatsahi tahatsyhyrypetsa ty siharek humo paik paik nikaranaha. Atsoko Deus hyrikoso sibo izumu. Sakzohotsa tahatsyhyrypetsa ty siharek humo paik paik niahaze Deus hyrikoso atsoko sibo izumu. Simaõ ana bo hi nikozyotokoto.

¹⁸ Simaõ nikozyoze Deus hyrikoso sibo zumu. Sakzohotsa tahatsyhyrypetsa ty nisiharekpyryriknahaze Deus hyrikoso sibo izumu. Iwaze Peduru pe niy:

¹⁹ – Uta kino niwatihi. Anatyhi tsinymyryknaha uta kino niwatihi tsipikyrinymyry. Kabo tsipikyrinymyry zeka uta okyrysaro ty ahabo nyny my. Katsyhyrypetsa ty kytsa harektsa humo paik my zeka Deus hyrikoso sibo mozumu. Tazikwy mozihihik my – niy.

²⁰ Peduru zibetsakik:

– O ikia aokyrysaro ty niwatihi sinini ykarawy boktsa! Ba zikanywyzo. Ikia tihi “O okyrysaro ty nyny my zeka iwatahi Deus hyrikoso atuk mynapykyryk” – mytsaty ahabyita tsiky. – Deus hyrikoso kytsa tuk mynapykyryk batu okyrysaro humo. Deus hyrikoso kytsa tuk mynapykyryk iwa Deus mozihihik.

²¹ Ikia Deus tsyhyryze batu tarabaja ziky. Ikia hi batu amysapy tsimy. Deus zany. Ikia amysapybara Deus zany. Amysapybyri ty ka tsipimoewy – niy.

²² – Deus bo typamykysokta! Ikia hi:

“O Deus kamysapybyita ikykara tozeka ja Sesus humo tsipikokzohik tsimy” niy. Amysapybyita tsikykara kahyrinymyrëta. Hawa sa batu imysapy ana humo hi zuba mytsaty tsimykara.

²³ Tsazokdirëta tsimynakara. – Iwa zuba mytsaty tsikykara.

²⁴ – Nawa Peduru zibetsakak. Niytahi Simaõ sakzohotsa pe niy:

“O Deus bo katsyhyryze typamykysonehaktas niy. Hawa ty ikia botu tsiktsasoko Deus batu kabo ziky” – niy.

Yhÿ niaha.

²⁵ Kyze Peduru Suão iwatsa Serusarëhe bo ziksizonaha. Niahatsahi hawa Sesus nikara, ana bo hi nikozonaha astsatu nipamykysohokonaha, ske buruk niukurunahaze Deus wasania ty Samarija hudikhudikwytsa bo nitsasokonaha. Kyze Serusarëhe bo ziksizonaha.

Piripi Etiopia ezekta bo nipamykysoko.

²⁶ Bijoikpe iknykta Deus tsumuëhÿtsa Piripi bo izumu. Ipe niy:

– Aidyty. Tsikymy, ske buruk tsimykuru! Serusarëhe ikny na ske Kasa burukta! niy. Ata ske jerukbara bo tykuru. Kytsa batu sizuba ata ske buruk mynakurukunaha – niy.

Yh̄y niy.

²⁷ Aidy ske buruk niukuru. Niytahi maku Etiopia ezekta ske buruk inaukuru. Tahudikhudikwy bo ziksikizo. Atakta isukzabyita tu Etiopia sipehatsata zitsumuēhī Kādasi inarokotatsa. Atahi Etiopia okyryrsaro perytsa. Atahi Serusarēhe bo iwatahi Deus pe: – Ikia hi tsamysapyrēta tsimy – nikara.

²⁸ Serusarēhe ikny inaparak. Etiopia hudikhudikwy bo ziksizo. Tsaraha wata eze niukuru. Pikuzatsa ske buruk inasitetekenaha. Tadyhywy bete tsaraha eze nidyhyky, Deus papeu zinyky opykani nikara. Niukuruze Deus papeu humo opykani nipamykysoko. Tubabatu papeu Isaijas Deus sohokotsa ziwatahaka anahi zinyky.

²⁹ Deus hyrikoso Piripi pe niy:

– Tsaraha za bokta – niy.

Yh̄y niy. Niparak tsaraha za bo zumu.

³⁰ Zumuze maku iaksoho ziwabyky. Deus papeu ty zinyky ana hi ziwabyky. Tubabatu Isaijas ziwatahaka anahi ziwabyky. Iwaze Piripi ipe niy:

– Amy sa tsipinyky, papeu humo sa tsipinymyryky – niy.

³¹ – Batu ba. Hawa ja. Kahyrinymyrybyitatu pinykyry. Batu aty tohi zikyrinymyry. Pany! Katsarahaza bo pakutyny kabaze dyhytykta. Nawa tsimykurunaha – niy.

Yh̄y niy.

³² Etiopia ezekta papeu zinyky. Isaijas Deus sohokotsa tubabatu ziwataha: – Hawa hozipyrykza batu kaka ziky. Zioktyhyryknahaze pibeze naha humo batu kaka ziky.

Izi zipurukunahaze batu kaka niy.

Atahi hozipyrykza wata. Batu tyso iwatahi hozipyrykza wata.

Zisukyrykynahaze iwatahu batu tyso. Kytsa batu ibo wasani nikaranaha.

³³ Atahi tsimysapyrēta. Batu aty tohi ibo wasani zikaha niy. Batu aty tohi itsekokatsa soho ty nipamykysoko.

Asahi zisapybyrikinaha. Asahi zibezenaha. Iwahi nepyk – niy.

Iwa papeu humo ziwatahaka.

³⁴ Etiopia ezekta papeu zinyze. Piripi pe niy:

– Deus sohokotsa tasoho sa nitsasoko. Usta ja. Batu kahyrinymyry. Ikia harere ty tsipikyrynymyry tsihikik – niy.

³⁵ Yh̄y niy. Niytahi papeu humo iwatahaha zihyrinymyryky. Anahi iharere Sesus soho ty inapamykysoko, ana ty hi nipamykysoziuku.

³⁶ Niahatsahi inaukurunahaze pihik bo iktsa niaha.

– Nabo pihik bo iktsa ty. Uta tsipikarasusu zeka batu aty tohi “O” ziky – niy.

³⁷ Piripi ipe niy:

– Ikia Sesus humo tsaspirikporēta zeka paharasusu za – niy. Atahi:

– Abaka Sesus Deus tse humo kaspirikporēta – niy.

³⁸ Iwaze Etiopia ezekta tsaraha wata pyk niy. Iwaze Piripi tuk inasiknaha. Pihik bo nioktsotsoknaha. Anaeze Piripi ziharasusuhik.

³⁹ Pihik ikny inazoknahaze Deus hyrikoso Piripi ziooktyhyryk. Iwatahi Etiopia ezekta batu ity nyzo. Ata kino ske buruk ahudikhudikwy bo niukuruze. Tsakurēta nikara.

⁴⁰ Atsoko Piripi Asoto eze niy. Niukuruze Deus wasani humo nipamykysoko. Niytahi Sesareja bo zumu niy.

9

Sauro Sesus tukta niyzik.

¹ Iwaze Sauro takyriki iwatahi taparakta Deus wahoro eze ziknapamykysokota izumu ipe niy:

– O Sesus tuktsa humo takyriki. Mysisukyryky kytsa sitsipatsa humo mynasioktyhyryk. Mysibatsihikik.

² Iwatahi ziknapamykysokota pe niy:

“Utakta Damasko bo mozhikik. Papeu ty kabo nyny tykta! Myhyrizikwanitsa kytsa Sudeutsa wahoro bo mynauzuzuknaha nasapy bo piwatawyky. Ana papeu humo ky kytsa Sesus tuktsa bo piwatawynaha iwatahi Sesus tuktsa inasikaha. Sesus tuktsa inasikahaze abo mynasioktyhyryk. Kytsa wytykyryk iwatsa sitsipatsa humo mynasioktyhyryk. Asahi abo mynasioktyhyryk” – Sauro niy.

– Yh̄y tykurukta – ziknapamykysokota niy.

³ Kyze Sauro Damasko bo niukuruze. Nahudikhudikwy jokbohaze ske buruk atsoko haramwe hyrity waha bjoikpe ikny ibo inasik. Ibo naharamwebaik. Iwatahi nihyrizikubyri haramwe hyrity waha pokso tsipybyrēta niyzik. Tapybyspyk inaraha.

⁴ Pikuza bete tatu inaraha. Tsipybyrēta. Niytahi bjo ikny Sesus yksoho ziwaby ipe niy:

– O Sauro amy humo sa ikia tsipiksukyryky – niy.

⁵ – O mypehatsa aty skaraba ikia tsimy kara – niy.

– Utakta Sesus. Iki tsipiksukyryky.

⁶ Kyikytkta! Hudikhudikwy botykta! Nabo tahi ikia bo hawa tsimy my – niy.

⁷ Iwa iaksoho bjo ikny Sauro bo nipamykysoko. Sauro tuktsa pykpyk niaha. Sipybyrētsa nikaranaha. Iwatsahi batu harere. Iaksoho ziwabykynaha atsahi batu aty tohi ityny.

⁸ Niytahi Sauro kyik niy. Tahyriktsa ty popo niyze batu iktsa ziky. Iwatsahi ituktsa itsipa humo Damasko bo ziockyhyryknaha.

⁹ Anaeze harakykbyi zuruze batu iktsa ziky. Batu hauk, batu tsō anaeze zuba nitare.

¹⁰ Kyze mypehakatsa maku Ananias inarokota ibo zipaha. Ananias Damasko ezekta. Sesus tukta. Iwaze zitsotospykyrykze atahi mypehakatsa ziny ipe niy:

– Ananias – niy.

– Amy skaraba kapehatsa tsikzumu – niy.

¹¹ Atahi:

– Kyikytkta! Aidy atyzozytkta! Sudas wahoro bokta! Sudas wahoro ske Buruhuwa inarokoha. Anaeze Sauro tsipiberiki. Atahi Taraso hudikhudikwy eze nipuruk niy. Atahi kabo nipamykysoko.

¹² Zitsotospykykze maku ziny. Ta maku ibo zumuze tatsyhyrypeta ty iharek humo paik niy. Iwatahi iktsazo niy. Iwa zitsotospykze zinyba – mypehakatsa niy.

¹³ Ananias:

– O kapehakatsa kytsa sizubarētsa isoho ty kabo botu nitsasobanaha. Atyryktsa Serusarēhe ezektsa nisisukyryikik.

¹⁴ Abaka katsa mybo izumu. Taparakta ziknapamykysokota Deus wahoro zubata eze papeu tuk iwaha humo hi atuktsa sitsipatsa humo mysioktyhyryk. Aty skaraba abo mopamykysoko asahi Sauro mysiberiki iwatahi mysioktyhyryk – niy.

¹⁵ Niytahi mypehakatsa ipe niyzo:

– Iki ibo tsimy. Uta Sauro iwatawyhik. Katsumuēh̄itsa mozik, katshyryze kahyriktsokzawy humo mykara. Kytsa sizubarētsa bo kasoho

motsaso. Sudeutsabyitsa myhyrizikwanitsa, Sudeutsa iwatsa kasoho ty motsaso. Iwaha ty kahumo sinini mykara.

¹⁶ Uta kino ipe my:

“Ikia kahyritzokzawy humo sinini tsimykara” my – nikara.

¹⁷ Niytahi Ananias niparak. Sudas wahoro bo. Nitsukze tatsyhyrypetsa ty Sauro harek humo paik niy. Ipe niy:

– O kaziky Sauro. Mypehakatsa abo zikpeha. Ta kino ikia Damasko ske buruk tsinyhik atahi abo zikpeha. Iwatahi ahyriziktsa mysizororowy iktsazo tsimy. Deus hyrikoso abo mozumu atuk mynapykyryk iwatahi zikpeha – niy.

¹⁸ Atsoko Sauro hyriziktsa piknu piakyridi tsa watsa inatsunaha. Iwatatu ebyk waha botu zoezo iktsazo niy. Zizororowy. Niytahi kyik niy. Sesus humo tispirikporëta iwaze Ananias ity ziharasusuhik.

¹⁹ Tadisahakazoze tsipaikrëta niyzikzo.

Sauro Damasko ezektsa bo Sesus soho nitsasoko.

²⁰ Sauro Damasko eze Sesus tuktsa tuk niapykyrykspyk. Iwaze ziaqbata Sesus soho nitsasoko. Sesus soho Deus wahoro eze nitsasoko. Atahi:

– Sesus Deus tse – nikara.

²¹ Ziwabykynahatsa sipybyrëtsa nikaranaha. Asahi nipamykysokonaha:

– Atahi ja Serusarëhe eze tuze Sesus tuktsa nisioktyhyryk. Atahi Damasko bo niukuru iwatahi Sesus tuktsa mysioktyhyryk ja. Bykyze ziknapamykysokonahatsitsa bo mysioktyhyryk. Ata hiba – nikaranaha.

²² Sauro Sesus soho nitsasoko. Iharere humo kytsa sizubarëtsa Sesus humo sipirikporëtsa. Atahi:

– Sesus Deus zipehata babata – nikara. Tsihyrinomyrëta kytsa iharere bo yhÿ nikaranaha. Nisihyrinomyrykyze wasani nikaranaha. Iwatsahi Sudeutsa batu sihyrinomyry iwatsahi hawa sa ibo mopamykysokonaha batu zikaha. Paikpa mytsaty nikaranaha.

²³ Bykyze Sudeutsa inazuzuknahaze nipamykysokonaha:

– Hawa sa Sauro tabezehik – nikaranaha.

²⁴ Sauro siharere ziwaby tahi hawa pikbeze tsihikiknaha anahi ziwaby. Zikzibytuhukutu Damasko hudikhudikwy hokbowy baze ziperykynaha. Okoroze unata kino niwatihi nizokparakanaha. Iwatsahi Sudeutsa pokso Sauro tuktsa ziooktyhyryknaha.

²⁵ Unata ziooktyhyryknaha. Tsoromapeza sihezõnikita eze tu zikorokyryknaha. Sauro tsoromapeza sihezõnikita eze inazipiknaha. Iwaze inazipiknahaze niparakik. Iwaze Sauro Damasko hudikhudikwy ekze niwakik.

Sauro Serusarëhe bo ziksizo.

²⁶ Kyze Sauro Serusarëhe bo ziksizo. Sesus tuktsa tuk tasapy tsihikik. Sauro Sesus tukta niyzik iwatsahi simytsatyharëtsa nikaranaha, ipokso sipybyrëtsa.

²⁷ Baranabe hi zitsumuëhîkî. Sakzohotsa bo ziooktyhyryk. Iwatsahi sibo itsyhyryze nipamykysoko:

– Sauro mypehakatsa ziny. Damasko bo niukuruze mypehakatsa ziny. Mypehakatsa ibo nipamykysoko itukta niyzik. Iwatahi Damasko eze tuze Sesus soho ty nipamykysokoze batu ipyby – nikara. Iwatsahi Sesus tuktsa Sauro humo batu sipyby.

²⁸ Iwaze Sauro situk inapykyk. Serusarëhe eze tu situk zikzuruku. Sesus soho ty ziknapamykysoko.

²⁹ Sudeutsa Kereka harere zinomyrykynahatsitsa bo ziknapamykysoko. Asahi ibo nahapepehakanaha. Sisakparëtsa nikaranaha. Zibeze tsihikiknaha.

³⁰ Sesus tuktsa anahi ziwabykynahaze Sauro Sesareja bo ziooktyhyryknaha:

– O ikia Taraso bokta! Tsikpuruk naha botu tsiksizokta – nikaranaha.

³¹ Iwaze kytsa Sesus tuktsa nanabyitaba zisapywykynaha. Sudeja eze Karireja eze Samarija eze iwaha eze zisapywykynaha. Sesus tuktsa niobaranaha sizubarëtsa niyziknaha. Deus hyrikoso humo niobaranaha. Deus hyrikoso nisitsumuëhĩkĩ iwatsahi Sesus humo sispirikporëtsa.

Peduruta Rida Sopa ahabo zumu.

³² Nanabyitaba Peduru paikpa ziknakara. Kyze Rida bo inakozore. Sesus tuktsa Rida eze sibo inakozore.

³³ Anaeze Aeneas bo niy. Atahi ityryk niakbabata niy. Tawanu eze tu ziknapykyryk zuba oito anos tawanu eze tu ziknapykyryk.

³⁴ Iwaze Peduru ibo zumu. Ipe niy:

– Aeneas Sesus Kiristu pazororowy. Kyiktykta! Awanu tyzozikykykta – niy.

Atsoko Aeneas kyik niy. Nizororo.

³⁵ Rida ezektsa nizororota bo nikozonehaze Sesus tuktsa niyziknaha. Saronu ezektsa kino niwatihi ibo nikozonehaha. Saronu Rida pauk baze tu niy. Asa kino niwatihi sizubarëtsa Sesus tuktsa niyziknaha. Sesus humo sispirikporëtsa.

³⁶ Sopa hudikhudikwy bytykareze tu niy. Anaeze Sesus tuktsa. Tabita inarokotatsa. Kereko harere humo ka Dorokas. Tsimysapyrëtsa, sinamybyikitsa ziknasitsumuëhĩkĩ.

³⁷ Atatsa hi ihumuëzumu iwaze nihyrikosokda. Niahaza hi Sesus tuktsa inury nitsapikiknaha. Inury zibykyryknaha. Isapy jobo zidokonaha ipokpedawy eze zihoeknaha.

³⁸ Rida hudikhudikwy Sopa bytykareze tu niy. Peduru anaeze niapykyryk-spyk anahi kytsa ziwabynaha. Niahatsahi petoktsa makutsa Peduru bo nisipehahik. Peduru bo zumunahaze ipe niaha:

– Aidyty. Pany mytuk tsimykyryk. Sopa boktsa! Batu hỹbyri – nikaranaha. Yhỹ niy.

³⁹ Peduru siapik niukuru. Dorokas bo izumu. Sesus tuktsa Peduru nihyrikosokdatatsa sapy bo ziokyhyryk. Anaeze ituktsiza nikaranaha. Haramukukaka anaeze nikaranaha. Nipuziukunaha. Nipukarakanahaze tahasuk ty tahakpyzazawy ty iwatsa ziwatawykynaha. Sisuk ty nihyrikosokdatatsa sityhyryze ziwowoko.

⁴⁰ Niytahi Peduru ispe:

– Ape bo tsiponahaktsa – niy. Ape bo zipobanahaze taekaratsa humo puruk puruk niy. Deus bo nipamykysoko. Niytahi nihyrikosokdatatsa pe:

– Tabita kyiktyktsa! – niy. Iwaze nihyrikosokdatatsa tu inapopozo. Peduru bo iktsa niy. Kyik tsihadyhy niy.

⁴¹ Peduru atatsa zitsumuëhĩkĩ itsyhyry humo paik niy. Tyrikto niy. Niytahi Sesus tuktsa haramukukaka kino niwatihi nisihuahuaka.

– Panytaha nihyrikosokdatatsa ahabo pisizo. Atatsa inahyryzikpo – niy.

⁴² Sizubarëtsa Sopa eze tu Dorokas soho ziwabykynaha. Hawa nihyrikosokdatatsa zihyryzikpozo iwaze sizubarëtsa Sesus humo sispirikporëtsa.

⁴³ Anaeze Peduru Simaõ wahoro eze niapykyryk atahi siraratsa hwyk perytsa nikara.

10

Peduru Koronerius bo inakozore.

¹ Bijoikpe iknykta Deus tsumuëhĩtsa Koronerius bo izumu. Koronerius Sesareja eze tu niy. Atahi sē sodadutsa nisipehaka, sinarotsa Itariano.

² Koronerius maku tsimysapyrëta. Deus tihi:

– Atakta wasani mykara – mytsaty nikara. Sudeubyitatu iwatatu Deus humo tispirikporëta. Iwahoro ezektsa kino niwatihi Deus humo sispirikporëtsa, Sudeutsa sinamybyitsa bo okyrysaro ty nyny ziknakara. Deus bo nipamykysoikik. Ata bo hi bijoikpe iknykta Deus tsumuëhĩtsa inasik.

³ Haramwe iharakibikia eze bijoikpe iknykta Koronerius bo inasik. Ipe niy. – Koronerius – niy. Koronerius ibo iktsa niyze tsipybyrëta nikara.

⁴ Tsipybyrëta tu niko-zoko.

– Amo skaraba – niy. Bijoikpe iknykta tihi:

– Deus aharere ziwaby. İkia aokyrysaro ty sinamybyitsa bo nyny tsiky kara ana hi ziny. Iwatahi tsakurëta mykara. Aharere soho bo mytsaty mykara niy.

⁵ Abaka wastuhu atsumuëhĩtsa Sopa hudikhudikwy bo tysiakzo. Nabo Peduru piberinaha. Kytsa ipe sisopyk Simaõ Peduru nikara.

⁶ Atahi usta Simaõ wahoro eze niapykyrykspyk. Atakta siraratsa hwyk perytsa nikara. Iwahoro pihik buburu zuba sak eze niy. Ata kino iwahoro bo natasapy iwaze Peduru myzioktyhyryk – niy.

⁷ Niytahi bijoikpe iknykta babyita tu hokda zuba niy. Batu ity nyzo. Iwaze Koronerius harakykbyi hi tatsumuëhĩtsa bo huahua niy. Petoktsa sitsumuëhĩtsa iwahoro eze tarabaja ziknakaranaha. Usta sodadu atahi Deus humo tispirikporëta. Iwaze sibo nipamykysoko.

⁸ Ana hi bijoikpe iknykta ibo nitsasoko atsatu sibo nitsasoko. Iwatahi Sopa bo nisipehahik. Iwaze kytsa harakykbyi Sopa bo nitururuknaha.

⁹ Iwaze kytsa Sopa hudikhudikwy bo izumubahanikinahaze Peduru Deus bo nipamykysoko. Wahoro hara bete nido. Tokbaha eze Peduru Deus bo nipamykysoko.

¹⁰ Tsiaraparëta. Tadisaha tsihikik mykara. Wytykyryk mydisahawy humo nikymynahaze Peduru itsotyspykwaha ziny.

¹¹ Bijoikpe naukwakbaka panu sihezõni inasikze ziny. Ana panu sihezõni ibo inasik.

¹² Anaenze siraratsa sizubarëtsa pyryhyktsa watsa sisarakatsa mekywat-satu iwatsa nikaranaha.

¹³ Niytahi Deus Peduru pe niy:

– O Peduru siraratsa tysibakta! Azohotsa tysibakta – niy.

¹⁴ – Batu ba. Asaktsa batu kawahatsa. Uta Sudeu my iwatahi siraratsa ty batu hauk my. Niwaha batu kazohotsa. Sudeutsa batu anahi sidisahawy. Abaka batu hauk myny – nikara.

¹⁵ Deus ipe niyzo:

– Asahi azohotsa hÿ. Uta hi azohotsa ty abo nyny mykara. Uta azohotsa ty abo nyny my zeka ikia azohotsa soho humo yhÿ tsimy niy. Uta azohotsa nyny my zeka ikia azohotsa tihi – niy.

¹⁶ Iwa Deus Peduru bo nipamykysoko. Harakykbyi harere zohotsa soho pamykysoko. Niytahi panu sihezõni waha bijoikpe bo zisihyrykzo. Batu ity nyzo.

¹⁷ Peduru itsotyspykwaha mytsatyziyu nikara:

– Amy ty sa pikwatawy mytsaty nikara! Hawa sa my – nikara. Abababatu kytsa harakykbyihi zumukunaha. Kytsa pe:

– Hãta wahoro eze sa Simaõ Peduru mopykyrykspyk – niaha. Niahatsahi izumukunaha. Hokbowy Simaõ wahoro peze pyk niaha.

¹⁸ Wahoro ezektsa pe niaha:

– Simaõ Peduru ja – niaha.

– Atatu – nikaranaha.

¹⁹ Peduru jobo wahoro harapu bete itsotyspykyk mytsatyziu nikaraze Deus hyrikoso ipe niy:

– Wabytykta! Kytsa harakykbyihitsa ikia paberikinaha.

²⁰ Kytsa Sudeutsabyitsa paberikinaha. Awanu sapy bo izumukunaha. Tsiksita! Siapik tsimykuru. Batu tyso “O mokuru wasani ja” Uta hi abo iknasisukmo – niy.

²¹ Niytahi Peduru inasik. Kytsa harakykbyihitsa bo niy. Ispe niy:

– O ikiahatsa tsipikberikinaha hỹ. Amy skaraba tsikzumukunaha – niy.

²² Asa tihi:

– Koronerius nimypehahik Koronerius sē sodadutsa nisipeha. Maku tsimysapyrēta. Deus harere bo hyỹ ziknakara. Sudeutsa sizubarētsa iharere ziwabytoktokonaha. Jokboha tu bijoikpe iknykta ipe niy:

“Peduru bokta! Ikia ipe tsimy: ‘Pany kawahoro bo paku tsimy’. Iharere tsipiwabykta!” – niy.

Yhỹ niy.

– Iwatsahi katsa nimypeha iwatsahi ikia bo tsikzumukunaha – nikaranaha.

Yhỹ niy.

– Pakutynahakta niy. Tsikahadisahanaha – Peduru niy.

Yhỹ nikaranaha. Iwatsahi ibaze zururenaha.

²³ Estuba zurunahaze Peduru tazozik ba. Koronerius sohokotsa siapik niukuru. Sesareja bo niukurunaha. Wastuhu Sesus tuktsa ituk niukurunaha. Sopa ezektsa nikaranaha.

²⁴ Estuba zurunahaze Sesareja bo zumukunaha. Anaeze Koronerius nisiperyky. Iwahoro bo izumubanaha. Koronerius botu tatukytsa tahareziuwysitsa iwatsa tawahoro bo nisiakzoko iwatsahi nisiperykynaha.

²⁵ Peduru izumukuze Koronerius ibo niy. Taekaratsa humo puruk puruk niy. Okmymy niy Peduru Deus wata mytsaty ahabyita nikara. Iwatahi taekaratsa humo puruk puruk niy.

²⁶ Aidytykta Peduru Koronerius izikyikik ziriktohik. Ipe niy:

– Ziktotykta! Uta kino maku tihi iwatahi kaokeryk puruk purukbyitykta – niy.

²⁷ Nipamykysokoze wahoro bo nitsukze kytsa sizubarētsa niapykyrykna-hatsa nisiny.

²⁸ Niytahi ispe niy:

– O kytsa wytykyryk iwatsa katsaktsa Sudeutsa tsimaha. Bipyritsa tuk tsimyzuzuknaha batu zikaha. Batu sibo ziknakozorenaha. Deus zikwatawy meky watu zik niy. Katsa bipyritsa soho “Batu wasani ahabyi zeka” batu imysapy tsimykaranaha. Anaty hi Deus pikyrinymyryky.

²⁹ Iwatahi uta ikiahatsa bo ikzumu. Iwatatu ikiahatsa bipyritsa ahabo ikzumu. Amy humo sa huahua tsiky – niy.

³⁰ Niytahi Koronerius ipe niy:

– Jatua haramwe iharakibikia eze kawahoro eze tu ikakpykykze Deus bo nipamykysoko. Atsoko bijoikpe iknykta Deus tsumuēhĩtsa kabo inasik. Tisukbarazarēta niy.

³¹ Atahi kabo nipamykysoko kape niy:

“O Koronerius aharere Deus ziwaby. Ibo nipamykysokoze ziwaby. Aokyrysaro ty sinamybyitsa bo nyny tsiky ana hi ziny.

³² Iwatahi atsumuēhĩtsa Sopa bo mysipeha. Tohi Simaõ Peduru inarokota myzioktyhyryk. Atakta usta Simaõ wahoro eze niapykyrykspyk, Simaõ siraratsa hwyk perytsa nikara. Iwahoro pihik buburu zuba sak eze tu niy.

Iwaze Simaõ Peduru myzioktyhyryk Peduru abo mozumuze Deus harere ahabo mopamykyso” niy.

³³ Iwatahi aidy iky katsumuëhĩtsa ikia bo iksipeha. Tsikzumu tahi tsamysapyrëta. Tsikzumu tahi kakurëta. Aba tsikzumubanaha Deus mytuk niy. Nezeba Deus ikia bo nipamykysoko anahi mybo tsimypamykyso – niy. Iwa Peduru bo niy.

Peduru Koronerius tatuktsa kino niwatihi Deus wasania ty nisispirikpoko.

³⁴ Niytahi Peduru bipyritsa bo nitsasoko. Ispe niy:

– Abaka Deus pikyrinymyryky. Hawa myzubaha mysisapywyky. Tapara mytsaty ikykara. “O Deus Sudeutsa humo zuba iakparawy, ustsá tyryktsa humo ka batu iakparawy” niy. Abaka pikyrinymyryky Deus tyryktsa sizubarëtsa humo wasani mykara. Deus tuk mekywatsa humo myzubaha wasani mykara. Iwatahi Sudeutsa mysisapywyky ustsá tyryktsa kino niwatihi mysisapywyky. Iwa Deus myzubaha humo wasani mykara.

³⁵ Kytsa sizubarëtsa iharere bo hyỹ mykaranaha zeka sihumo iakparawy niy. Deus sizubarëtsa bo mysisapywyky. Sudeutsa bo bipyritsa kino niwatihi sihumo wasani mykara.

³⁶ Taparaka Deus harere Sudeutsa bo wasania ty sibo nitsasoko anahi botu tsinymyrykynaha. Hawa katsaktsa Sesus Kiristu humo mysapyrëtsa tsimoziknaha. Iwatsahi wasani tsimykaranaha. Deus harere bo hyỹ tsimykaranaha. Mysapyrëtsa tsimoziknaha iwatsahi Deus humo batu ahapyby. Sesus hi kytsa sizubarëtsa mysipehaka.

³⁷ Isoho tsipinymyrykynaha Suão Batista Deus wasania ty Sudeja eze nitsasoko. Kyze Deus Sesus ziwatawyhik. Nasare ezekta niy.

³⁸ Deus hyrikoso ituk niapykyryk. Tazikwy ty ibo nyny niy. Iwatahi myzubaha bo nisisapywyky. Hyrikoso sapybara kytsa bo pororo ziknakaranaha tsahi nisiksiwyhik. Hyrikoso sapybara pehatsa kytsa bo nisipehaka asahi nisiksiwyhik. Deus Sesus ituk tu niy.

³⁹ Hawa Sesus ziknakara katsa tsinymyrykynaha. Hawa ziknakara Sudeja eze niukuruze katsa tsinymyrykynaha. Hawa ziknakara Serusarëhe eze kino niwatihi tsinymyrykynaha. Iwaze Sudeutsa hi Sesus iharapatawyhyta humo zihyrizikiknaha. Iwaze zibezehiknaha. Deus hi zihyrizikpowy. Anabo hi iktsa tsikaha niy.

⁴⁰ Petok zuruze inahyrizikpo katsa mybo inatakahazo.

⁴¹ Kytsa sizubarëtsa batu ityny. Katsa zuba tsinynaha. Katsa mybo zuba inatakaha. Deus katsa nimywatawyhik humo iwatahi katsa mybo inatakaha. Sesus inahyrizikpoze katsa mytuk tadisahaka zikuku niwatihi niy.

⁴² Tapara Sesus mype:

“Myzubaha bo kaharere tytsasonahaktsa. Utakta Deus zipehata ahawata ikyzik. Iwatahi hawa Deus okze uta zuba wasani mynakara. Niytahi hawa Deus okze batu wasani kahyrinymyrëta hawa Deus okze wasani kahyrinymyrëta. Bykyzehu kytsa sizubarëtsa bo hawa ziknakaranaha ana soho tyhi motsaso. Kytsa sispitutsa bo, siakbatsa bo kino niwatihi iwa motsaso. Anaty hi ikiahatsa kasoho tytsasonahaktsa” Sesus niy.

⁴³ Tubabatu Deus sohokotsa isoho nikaranaha. Ziwatahakanaha:

“Amata mozumu. Ihumo ka ahaspirikporëtsa zeka tsahi Deus ahamysapybara humo pahaokzohik” nikaranaha. Iwa Deus sohokotsa Sesus soho ziwatahakanaha – Peduru niy.

Deus hyrikoso bipyritsa bo izumu.

⁴⁴ Peduru nipamykysoko tuze Deus hyrikoso bipyritsa bo inasik. Zi-wabykynahatsa bo Deus hyrikoso zumu.

⁴⁵ Sudeutsa, Sesus tuktsa asahi Peduru tuk zumukunaha nipybynaha. Deus hyrikoso bipyritsa bo zumu. Iwatsahi sipybyrëtsa.

⁴⁶ Bipyritsa Deus bo nipamykysokonaha. Utsa harere ty Deus bo nipamykysokonaha. – O Deus ikia tsamysapyrëta – nikaranaha.

⁴⁷ Iwatahi Peduru tatuktsa pe niy:
– Deus hyrikoso sibo inasik. Tapara mybo inasik aba astatu sibo izumu. Iwatsahi katsa mysiharasusukunaha zeka wasani ja my. Batu aty tohi mype zeky:

“O isty harasusu byitaha ziky” – niy.

⁴⁸ Iwaze bipyritsa pe niy:
– Tsipahaharasusunahaktsa – niy. Tsipahaharasusunahaze ikiatsa tihi:
– O uta Sesus Kiristu tuktsa mozihihik tsimy – niy. Iwahÿ. Asa tihi:
– O ikiahatsa katsa mytuk tsimypykyrykspyk – nikaranaha.
Hyÿ niaha. Iwaze Peduru situk niapykyrykspyk. Iwa Deus hyrikoso bipyritsa bo zumu.

11

Peduru Sesus tuktsa bo Serusarëhe eze nipamykysoko.

¹ Sakzohotsa Sesus tuktsa kino niwatihi Sudeja eze tu bipyritsa Sesus humo sispirikporëtsa ziwabykynaha. Wastuhu Sudeutsa anahi ziwabykynahaze batu simyzihik. Sizubarëtsa Sesus tuktsa tahapiakzyzyk tsihikiknaha zetu mytsaty nikaranaha.

² Peduru Serusarëhe bo ziksizoze asaktsa zibetsakaknaha.

³ Ipe niaha:
– Hawa ta sa bipyritsa wahoro bo tsiktsukuruk. Hawa sa situk tsikadisa-haka – nikaranaha.

⁴ Niytahi Peduru sibo iwaha tyhi nitsasoko. Pykyhytu nipamykysobaik.

⁵ – O katukytsa wabytaha. Utakta Sopa eze tuze Deus bo ikpamykysoko. Katsotyspykwaha inyze. Panu sihezõni hyritywaha inyhik. Panu bijoikpe ikny inasik. Itsihara humo paik paik niaha. Panu sihezõni inasikze kabaze pyk niy.

⁶ Iktsaziu iky. Anaeze siraratsa sizubarëtsa, pyryhyktsa watsa sisarakatsa meky meky watsa tu iwatsa iksinyky.

⁷ Iwaze iaksoho iwaby:
“Peduru kyiktykta! Azohotsa ty tysibakta.”

⁸ Batu ba. Asaktsa batu kawahatsa. Sudeutsa batu niwaha ty ka hauk zikaha. Utakta Sudeu iwatahi ba zikboro.

⁹ Deus ipe niy:
“Asahi azohotsa niy. Utahi azohotsa ty ikia bo nyny my zeka azohotsa soho ty ka sosobyity niy. Uta wasani my zeka wasani mykara” niy.

¹⁰ Nawa Deus kabo nitsasoko. Harakykbyihitsa harere kabo atsatu nitsasoko. Iwaze panu sihezõni bijoikpe bo ziskyrykzo. Batu ity nyzo.

¹¹ Iwaze kytsa harakykbyihitsa izumunaha. Wahoro eze ikapykyrykspyk. Niahatsahi izumunaha. Koronerius kabo nisipeha Sesareja ikny kabo izumunaha.

¹² Deus hyrikoso kabo nitsasoko:

“Tysosobyity sibo mokuru wasani ja batu kanyhy iwa mytsaty mytsaty-byijaty. Situk tsimykyrykspyk” niy. Iwatahi ikparak. Koronerius wahoro bo bipyritsa tuk ikukuru. Seis Sesus tuktsa Sopa ezektsa katuk niukurunaha. Myzubarëtsa Koronerius wahoro bo tsikpupunaha.

¹³ Tsiknapupunahaze Koronerius katsa mybo nipamykysoko:

“Jatua bijoikpe iknykta iny. Kawahoro eze niriktohoko. Kape niy: ‘Atsumuēhītsitsa Sopa hudikhudikwy bo tysipehahik. Anabo hi Simaõ Peduru abo tyzioktyhyk.

¹⁴ Atahi wasania ty mopamykysoko ty tsipiwabyze ikia Sesus humo aspirikporēta tsimozik. Ikia awahoro ezektsa niwatihi Sesus humo sispirikporētsa moziknaha’ niy.” Iwa bijoikpe iknykta Koronerius bo nitsaso.

¹⁵ Iwabyze hawa bijoikpe iknykta harere Koronerius bo niy uta kino niwatihi. Sesus soho sibo iktsasoko. Sudeutsabyitsa tu Sesus soho ty iktsasoko. Ziakbataze Deus hyrikoso sibo inasik. Katsa mywata Deus hyrikoso astatu sibo inasik.

¹⁶ Iwatahi Sesus harere bo mytsaty ikykara. Tapara Sesus mybo nitsasoko:

“Nihyrikosokdata Suão ikiahatsa pihik ty zahaharasusu. Deus hyrikoso ikiahatsa bo izumu. Nawaty pahaharasusuhik wata atahi ahatuk mynapykyryk.”

¹⁷ Deus hyrikoso sibo zipehahik. Katsa mybo niwatihi Deus hyrikoso zipehahik. Hawa Deus mykara kakparawy Deus wasani mykara – Peduru niy.

¹⁸ Peduru nipamykysokoze ziwabynahatsitsa batu tyso zikaha. Ba zikta-hokaninaha, Deus bo nipamykysokonaha:

– O Deus ikia tsamysapyrēta. Ikia bipyritsa bo niwatihi tahamysapybyi humo pimoewynaha zeka ikia tsimysiokzohik. Iwatsahi Deus simysapybyitsa humo mysiokzohik. Iwazeka simysapyrētsa moziknaha. Asahi tahawahi ikia tuk mynapykyryknaha. Ikia tsamysapyrēta hỹ – nikaranaha. Iwa Deus bo nipamykysokonaha. Peduru harere humo Deus bo nipamykysokonaha.

Sesus tuktsa Ātiokia eze niaha.

¹⁹ Iwaze kytsa Estewã zibezenahaze Sesus tuktsa niwakbaiknaha. Kytsa nisisukyrykynaha iwatsahi nanabyitaba niwakaknaha. Penise, Sipire, Ātiokia iwatsa anabo niwakaknaha. Ske buruk niukurunahaze Sesus soho nipamykysokonaha. Sudeutsa bo zuba nitsasokonaha.

²⁰ Utsa Sipire ezektsa, Sireni ezektsa kino niwatihi Ātiokia bo nikaranaha. Asahi bipyritsa bo Sesus soho nipamykysokonaha. Kytsa Kereka harere humo zinymyrykynahatsitsa bo Sesus soho ty nipamykysokonaha.

²¹ Deus nisitsumuēhĩkĩ. Kytsa sizubarētsa Sesus humo sispirikporētsa niyziknaha. Tahadiri sopykwy ty ka zimoewynaha Sesus humo sispirikporētsa, meky watu niyziknaha.

²²⁻²⁴ Sesus tuktsa Serusarēhe eze ziwabykynaha. Kytsa Ātiokia eze Sesus tuktsa niyziknaha, ana hi ziwabynaha. Iwatsahi sakzohotsa Baranabe Ātiokia bo zipehahik. Baranabe tsimysapyrēta Deus hyrikoso ituk ziknapykyryk. Baranabe Deus hyrikoso bo hỹ ziknakara. Sesus humo tispirikporēta. Ātiokia bo zumuze Sesus tuktsa bo niy. Sihumo tsakurēta niyzik. Deus nisisapywyky, Deus harere nisihyrinymyryky. Iwaze ispe niy:

– Deus humo ahaspirikporētsa babatsa. Deus harere bo hỹ tsimykarana-haktsa – niy. Kytsa sizubarētsa Sesus tuktsa moziknaha.

²⁵ Iwaze Baranabe Taraso bo niparak. Sauro bo ziberiki. Sauro Taraso ezekta tahi ziberiki.

²⁶ Zihobykze ipe niy:

– O ikia Ātiokia bo katukta – niy.

Yhỹ niy. Ziksizonaha. Estuba zuba ziytyktseheze, Sesus tuktsa tuk izumubanahaze nisihyrinymyrykynaha. Ātiokia eze tuze kytsa Sesus tuktsa tsitsatsiwy – O Kiristu tuktsa – nikaranaha.

²⁷ Iwaze Deus sohokotsitsa sibo zumunaha. Serusarêhe ikny nitururuk-naha. Sesus tuktsa bo asahi Ātiokia eze tu maha.

²⁸ Estuba Deus sohokotsa maku Akabo inarokota. Atahi kytsa okze nirik-tohoko. Atahi:

– Hawa Deus hyrikoso kabo ziwatawyhik ana hi ahabo motsaso – niy. Iwatahi Sesus tuktsa ispe niy:

– O katukytsa! Bykyze mydisahawy mopykba. Sizubarêtsa taharapapyk-naha ba amy tohi ty hauk zikaha – niy. Karadio Homa pehatsa niyzikze iharere atsatu niy.

²⁹ Niahatsahi Sesus tuktsa inakypykbanahaze. – O myokyrysaro ty ustsā Sesus tuktsa bo nyny tsimaha. Sidisahawy ty hauk maha okyrysaro tuk. Asahi Sudeja eze tu niaha – nikaranaha.

³⁰ Yh̄y nikaranaha. Iwa sizubarêtsa tahaokyrysaro ziperykynaha. Niahatsahi Baranabe ituktsa Sauro Serusarêhe bo tahaokyrysaro zibykyryk-naha. Taparaktsa Sesus tuktsa tuk sibo okyrysaro ty zebykyryknaha. Iwa siokyrysaro ty ustsā Sesus tuktsa sakubyitsa bo nyny nikaranaha.

12

Kytsa Sesus tuktsa nisisukyrykynaha.

¹ Kyze Sudeutsa pehatsa Erodes niy. Wastuhu Sesus tuktsa nisisukyryky.

² Iwatahi zikbata sodadu zipedahik:

– Tsiaku tsibezehekta! – niy. Tsiaku Suão ziky ata hi zibezehek. Sokorot-sapuzeze ty zibezehek. Iwatahi Tsiaku nihyrikosokda.

³ Sudeutsa, asahi Sesus humo batu sispirikpo, Tsiaku zibezenahaze sakurêtsa niyziknaha. Iwaze Erodes Peduru sakyriukrēnikitsa hurukwy bo zioқтыhyryk.

⁴ Sudeutsa myikaha eze Peduru sakyriukrēnikitsa hurukwy bo nitsahurukik. Sudeutsa myikaha eze atsikara ipytowy bara ty ziokoknaha pororo ziknakaranaha. Peduru sakyriukrēnikitsa hurukwy bo zioқтыhyryknaha. Erodes tapetu ziknakara.

– Sudeutsa myikaha napykze Peduru kytsa sizubarêtsa bo pioқтыhyryk. Iwaze iharere tawaby ibo iktsa mykaranaha – niy. Sodadutsa Peduru nizukparakanaha. Diseseis sodadutsa nisipeha. Anaeze petoktsa naeze petoktsa Peduru nizukparakanaha. Bykyze sapetoktsa sapetoktsa.

⁵ Iwatsa sodadutsa Peduru nizukparakanaha. Sesus tuktsa Peduru tshyryze Deus bo nipamykysoikiknaha.

Bijoikpe iknykta Peduru sakyriukrēnikitsa hurukwy eze nizapare.

⁶ Mynakoksohoze Erodes Peduru myzioktyhyryk bijoikpe iknykta unata eze ibo izumu. Peduru zurubaka. Sodadutsa tazaha eze zurubaka. Karikut-sitsitsa ty ipawaraharêta sodadutsa nataba nataba ziperykynaha. Ustsā sodadutsa hokbowy baze ziperykynaha.

⁷ Atsoko bijoikpe iknykta inasik. Ibo inatsuk sakyriukanikitsa hurukwy eze tu okoro eze ky waha niyzik. Atahi Peduru isukara bete tuzu tuzu nikara. Popotyкта iwaze ipe niy:

– Aidy kyitykta! Iparawarawytsa niaksatsuknaha.

⁸ Asuk ty zikpiziwy ty pypyrykty. Apyry suktsa ty korokbykty – niy.

Hȳy niy. Peduru tasuk zikorobyk. Bijoikpe iknykta ipe niy:

– Akpyzazawy ty korobyktykta. Kapikta! – niy.

⁹ Niahatsahi ziponaha. Peduru bijoikpe iknykta hapik sakyriukanikitsa hurukwy ekze ape bo ziponaha. Peduru batu ihyrinymyry. Bijoikpe iknykta babata humo batu ihyrinymyry.

– O piktsotyspykyk ja – mytsaty nikara.

¹⁰ Sodadutsa nisiharamunaha. Utsa sodadutsa nisiharamunaha. Hokbowy ziharawy zumunaha. Hokbowy sihezōnita. Pehoro hi niy. Ata hokbowy hudikhudikwy bo niy. Zumunahaze hokbowy atatu zoksapare niy. Ziponaha. Ape bo niriktotohokonaha. Iwaze hudikhudikwy ske buruk niukurunaha. Atsoko bijoikpe iknykta Peduru iske eze zerekek.

¹¹ Iwatahi Peduru mytsatyziu nikara.

Abaka kahyrinymyrēta. Deus bijoikpe iknykta izipeha. Iwatahi uta sakyriukanikitsa hurukwy ezekta tu ziksukehyrykzo. Ikzoitahi iwaze Erodes ba zikbeze. Sudeutsa sizubarētsa pikbeze tsihikiknaha. Deus zikoktyhyryk. Nawatyhi mytsaty nikara.

¹² Iwaze atahi Maria wahoro bo, Suão Marakosje bo niy. Sesus tuktsa sizubarētsa anaeze izumubanaha. Peduru tsyhyryze Deus bo ni-pamykysokonaha.

¹³ Peduru wahoro hokbowy bo zumu. Tototo nikara huahua niy. Itsumuēhītsata hokbowy bo iktsa niy.

– Aty sa hua mykara – niy. Atatsa Hoda inarokotatsa.

¹⁴ Atatsa Peduru yksoho ziwabyze. O Peduru sakyriukanikitsa hurukwy eze izoihik mytsaty nikara. Tsakurētatsa nikara. Hawa sa my batu ihyrinymyry iwatatsahi Sesus tuktsa bo atsoko niyzo. Ispe niy:

– Peduru hokbowy eze moriktohoko – niy.

¹⁵ Asahi:

– Batu ba. Ikia akedepyktatsa Peduru byitatu nikaranaha. Ikia tsimymyspihikbataka – Peduru tihi ba nikara.

– Batu ba. Ihyrikoso zuba – nikaranaha.

¹⁶ Peduru hokbowy baze hua nikara. Iwatsahi Sesus tuktsa hokbowy ty zoksapare niaha. Peduru zinyaha. Nipybynaha.

¹⁷ Peduru tatsyhyrype ty wyk niy.

– Akso byitaha – niy. Niytahi Peduru bijoikpe iknykta soho nitsasoko. Hawa Deus sakyriukanikitsa hurukwy eze zioқтыhyryk naha nitsasoko.

– Tsiaku bo tytsasonahaktsa. Utsa Sesus tuktsa bo niwatihi – niy.

Kyze mekybotu niparak.

¹⁸ Iwaze inakyokze sodadutsa Peduru ty batu ity kaha. Paikpa mytsaty nikaranaha. Peduru sa hana bo nikaranaha. Batu aty tohi ityny. Sakubyitsa niapykyryknaha.

¹⁹ Kyze Erodes tihi:

– Peduru tyzioktyhyk! – niy. Sodadutsa Peduru ziberikinaha. Batu ity kaha. Niytahi Erodes kytsa Peduru nizukparakanahatsa pe niy.

– Hawa ta sa Peduru sakyriukanikitsa hurukwy eze inawakik – niy.

– Yh̄y ja – nikaranaha. Iwatahi Erodes sodadutsa Peduru nizukparakana-hatsitsa nisibabaiknaha.

Kyze Erodes Serusarēhe ekze niparak. Sesareja bo niukuru. Anaeze niapykyryk.

Erodes hyrikosokdawy.

²⁰ Erodes takyriki. Tiro ezektsa Sidō ezektsa humo kino niwatihi takyriki. Tubabatu sidisahawy Erodes sapy ikny izumu niy. Abaka batu. Iwaze Erodes sihumo takyriki niy. Wastuhu Tiro ezektsa utsa Sidō ezektsa inauzuzuknaha. Barasto Erodes tsumuēhītsa bo izumunaha. Atahi situkta iwatsahi Barasto bo nikaranaha. Erodes bo sitsyhyryze nipamykyso tsihikiknaha iwatahi niakyriryriki.

²¹ Kyze:

– Erodes estuba zuruze ahabo motsaso – nikara. Nawa zuruze kytsa sizubarëtsa inauzuzuknaha. Erodes harere wabytsitsa inauzuzuknaha. Iharere wabytsitsa inauzuzukbanahaze Erodes suk tsiziurëna ty korobyk niy. Mypehatsa dyhywy bete nidyhyky. Kytsa bo nipamykysobaik.

²² Nitsasokoze kytsa kazi nikaranaha:

– O atakta mybo nitsasoko batu maku zuba, atahi deus my – mytsaty ahabyitsa zikaha.

²³ Erodes siharere iakparawy. Inaro myhyrizikwani niyzik. Kytsa bo – Uta deus byitatu – batu tyso. Iwatahi atsoko bijoikpe iknyktsa Erodes zihyrikosokdawyhik. Itsitsihikyritsa ziborobanaha. Iwa nihyrikosokda.

²⁴ Iwaze kytsa sizubarëtsa Deus harere ziwabynaha. Nanabyitaba Deus harere sizubarëtsa ziwabykynaha iwaze kytsa Sesus humo sispirikporëtsa.

²⁵ Iwaze Baranabe, Sauro ahatsa okyrysaro ty Sesus tuktsa bo nyny niaha. Serusarëhe Ezektsa bo okyrysaro ty nyny niaha. Bykyze Ætiokia bo ziksizonaha. Suão Marakos situk Ætiokia bo niukuru. Iwaze sizubarëtsa Deus harere ziwabynaha.

13

Sauro Baranabe ahatsa Deus nisiwatawy kytsa bo wasania ty motsasonaha.

¹ Kyze Deus harere sohokotsitsa, Deus harere ty kytsa nisihyrinymyryky-nahatsa kino niwatihi, Ætiokia eze tu niaha. Sinaro Baranabe, Simaõ usa inarokota nioktsirõrõ, Rusio Sireni Ezekta, Manae atahi Erodes tukta taypykta. Sauro iwatsa niaha. Erodes Karireja Ezektsa pehatsa niyzik.

² Asahi izumubanaha Deus bo nipamykysokonaha, ibo nipamykysokona-haze hauk ahabyitsa tu nikaranaha. Asahi:

– O Deus ikia zuba tsamysapyrëta – nikaranaha. Iwaze Deus hyrikoso ispe niy:

– Baranabe itukta Sauro iwatsa mysiwatawy. Ikiahatsa kino niwatihi tsimysiwatawynaha. Iwatsahi kahyritzokzawy mykaranaha. Kahyritzokzawy mysipeha. Amy ty botu mytsaty icy atsatu mahaktsa! – niy.

Yhỹ nikaranaha.

³ Niahatsahi Deus bo nipamykysokonahaze Baranabe Sauro iwatsa nisipeha. Hauk ahabyitsa tuze tahatsyhyrypetsa ty Baranabe Sauro ahatsa siharektsa bete paik paik nikaranahaze iwa nisipehakanaha. Hawa Deus hyrikoso nitsasoko atsatu nikaranaha.

Baranabe Sauro ahatsa hi Sipire tsikzikdihi bo niukurunaha.

⁴ Niahatsahi tsikzikdihi bo niukurunaha. Tsikzikdihi Sipire inarokota. Deus hyrikoso Sipire bo nisipehahik. Tapara Serusia bo niukurunaha, iwaze tsaraha puëtsikbyita bo tahakokorohyknaha. Iwaze tsikzikdihi bo tsaraha puëtsikbyita eze niukurunaha.

⁵ Kyze Saramis bo zumunaha. Anabo zumunahaze Sudeutsa wahoro bo nipupunaha. Deus harere nitsasokonaha. Suão Marakos inarokota siapik niukuru, nisitsumuëhĩkĩ.

⁶ Tsikzikdihi buruk niukurunaha. Iwaze Papos bo zumunaha.

Anaeze myrawy tsihikanikita zihobyknaha. Barosesus inarokota. Usa inarokota Erimas. Erimas Kereka harere inaro niy. Atahi myrawy tsihikanikita Sudeu niy, kytsa bo nisispihikbataikik:

– Utakta Deus harere ty mopamykysoikik – mybarapetu ziknakara. Atahi pehatsa tukta niy.

⁷ Tsikzikdihi ezektsa pehatsa Serisio Pauro inarokota niy. Tispirikporêta. Atahi Deus harere piwaby tsihikik iwaze Baranabe itukta Sauro nisiakzoko niy. Atahi:

– Deus harere ty kabo tytsaso – niy. Serisio Pauro Deus harere piwaby tsihikik. Barosesus batu hỹ niy.

⁸ Tapetu mynakara:

– O Serisio Pauro Deus harere humo batu waby – niy. Iwatahi Baranabe itukta Sauro iwatsa nisiakniki, sihumo takyriki niy. Serisio Pauro Sesus humo tispirikporêta my zeka batu hawa tohi zikaha. Iwatahi Baranabe tukta Sauro ahatsa sihumo batu iakparawy.

⁹ Iwaze Deus hyrikoso Sauro tuk niy. Sauro usa inaro Pauro. Pauro Kereko harere inaro. Deus hyrikoso ituktu babatu iwatahi Erimas bo nikozeptokoko. Ipe niy:

¹⁰ – Ikia Diabo wata atahi hyrikoso sapybara nasipehaikik. Hawa ty tisapyrêna ty ikia batu akparawy. Amysapybyitsa tsimynakara. Ikia hi mospihikbatanikita tsimy. Hawa ty wasani Sesus soho ikia hi. “O batu wasani ziky” mybarapetu tsimykara. Abaka Deus pasininiwyky.

¹¹ Tsimyhyrizikubyri ba zikozo. Iwa okoro bazinyzo – niy.

Iwa Pauro Erimas pe niy.

Atsoko imyrawy tsikanikita nihyrizikubyri. Haramwe bo ba zikozo. Kytsa nisiberiki iwatahi aty sa katsipa humo paik my nikara.

¹² Sipehatsa Serisio Pauro ana bo nikozepto nipyby. Sesus harere bo hỹ nikara iwatahi Sesus humo tispirikporêta. Anawahi Pauro itukta Baranabe Deus harere kytsa nisihyrinymyrykynaha.

Baranabe Sauro ahatsa Pisidia bo niaha.

¹³ Kyze Pauro tatuktsa tuk Papos bo niukurunaha. Pereka Pâpiria buruk niukurunaha. Tsaraha puêtsikbyita eze niukurunaha. Niytahi Suão Marakos Serusarêhe bo ziksizo.

¹⁴ Niukurunaha. Ātiokia zumukunaha. Ana Ātiokia hudikhudikwy Sudeja bara tu niy. Anaka Pisidia eze tu niy. Sudeutsa mybyrykywy eze Sudeutsa wahoro bo inapupunaha. Kytsa tuk nidyhydyhykynaha.

¹⁵ Sudeutsa papeu humo iwatahaha opykani nitsasokonaha. Deus harere Moises ziwataha anatyhi nikaranaha. Papeu Deus harere sohokotsa ziwatahakanaha anatyhi nitsasokonaha. Niahatsahi myhyrizikwanitsitsa izumubanahatsa Pauro itukta Baranabe ahatsa hi ispe niy:

– O mytukytsa katsa mybo tsimypamykysokonaha zeka aba tu tytsasonahaktsa! Aharere ty tynamyspirikpo – niy.

¹⁶ Niytahi Pauro kyik niy. Tatsyhyrype ty pawyk niy. Iwatsahi kytsa sizubarêtsa tahabyripykpyk zuba niaha. Nipamykysoko ispe niy:

– O katukytsa Sudeutsa, usts tyryktsa Deus humo sispirikporêtsa kino niwatihi wabytaha! niy.

¹⁷ Tubabatu Deus Sudeutsa nisiwatawy. Taparaktsa mydiritsa Esito eze niapykyryknahaze Deus nisiwatawyze. Sitsyhyryze nisisapywyky. Deus zikwy humo Esito ikny nisioktyhyryk, jerukbara bo niukurunaha.

¹⁸ Anaeeze kuarêta anos eze paikpa ziknakaranaha. Deus sihumo tsimypokzitsiukrêta.

¹⁹ Kytsa Kanaã tsayrytsitsa nasepykwynaha. Sete tsayrytsitsa nasepykwynaha iwatahi Kanaã mektsa tu ziaksenaha. Iwatahi Kanaã sisapy niyzik.

²⁰ Niytahi Deus sibetesatsitsa sibo nisiakzo. Kanaã eze taparaktsa mydiritsa bo nisiakzo. Nawaze kwatero sêto sêkûeta anos niapykyryknaha. Sibetesakatsitsa nisipeha. Iwa Deus niy.

²¹ Samue izumu. Kyze taparaktsa mydiritsa Deus bo nizapykykynaha. “O Deus mypehatsa tsimyzihikiknaha, ustsya tyryktsa watsa” nikaranaha. Iwa Deus bo nikaranaha. Iwatahi Deus Sauro zipeha atahi sipehatsa niyzik. Taparaktsa mydiritsa tsyhyryze Deus Sauro zipeha atahi sipehatsa niyzik. Sauro Kis tse niy. Bēsami itukytsa niy. Kuarēta anos Kanaā ezektsa pehatsa niyzik.

²² Bykyze Deus Sauro pe: “ikia sipehatsabyita” niy. Iwaze Dawi ziwatawy sipehatsa niyzik. Dawi Sese tse niy. Deus Dawi sipehatsa niyzik taparaktsa mydiritsa tuk Deus Dawi soho nitsasoko. “Dawi kaharere bo hȳ ziknakara. Atahi kakparawy” niy.

²³ Tubabatu Deus Dawi tsekokatsa soho nitsasoko: “Estuba Dawi tsekoka uta ahabo pipeha. Ahaoktykytsa mozik. Isareu ezektsa bo pipeha” niy. Niytahi Deus Sesus zipeha. Iharere botu nitsaso astatu nikara. Sesus estuba Dawi tsekoka niyzik.

²⁴ Tapara Suão Sesus sukmo byitu iakzohota. Isareu ezektsa nisi-hyrinymyryky. Nisiharasusuku. Sudeutsa pe niy:

“Ahamysapybyitsa tsikykaranaha tyszimoewyhiknahaktsa! tsikahaharasusunahaktsa!” niy.

²⁵ Suão hyriziktsokzawy asiba nepykze kytsa pe niy:

“Aty skaraba utakta mytsaty tsimykaranaha. Atahi ja tsipiperykynaha. Batu Deus myzipehabyita. Aibatohi zuba mozumu. Atahi myhyrizikwani. Utakta pykyhy myhyrizikwybyitatu ipyrysuktsa mysibobokzeka kasikpy-byrēta. Batu myhyrizikwani iwaze ipyrysuktsa hyrykok my zeka kasikpy-byrēta” Suão niy – Iwa Pauro niy.

²⁶ Pauro nitsasokozo:

– O katukytsa Abarão tsekokatsa, bipyritsa kino niwatihi Deus harere bo yh̄ ziknakaranaha. Wabytaha! Deus harere hawa mymysapybyitsa tsikykaranaha Deus mymyokzohik katsa anaty hi mybo zipeha.

²⁷ Serusarēhe ezektsa Sesus Deus zipehata mywata batu sihyrinymyry. Taparaktsa kino niwatihi Sesus Deus zipehata batu sihyrinymyry. Sudeutsa nawa zuruze mybyrywy eze kytsa Deus harere ty opykani nitsasokonaha iwatsa tu batu ity nymyry. Deus sohokotsa botu ziwatahakanaha astatu zinymyrybakanaha. Sudeutsa wahoro eze zinymyrybakanaha. Asahi ana papeu humo hi batu sihyrinymyry. Sihyrinymyrybyitsa tu hawa Deus sohokotsa botu ziwatahakanaha atsatu nikaranaha.

²⁸ Nimyspihikbatakanahaze:

“O Sesus batu wasani mykara tabezekta!” nikaranaha. Anatyhi Deus sohokotsa harere ziwatahakanaha atsatu nikaranaha.

²⁹ Kytsa Piratus bo nitsasokonaha. Sesus tabezehikta nikaranaha. Imys-apyrēnikita tu pibeze tsihikiknaha. Tubabatu hawa Deus sohokotsa ziwatahakanaha atsatu nikaranaha. Nikaranahaze Sesus tuktsa inury iharap-atawyhyta inazipiknaha. Harahare iytyk bo nitsahoroknaha.

³⁰ Deus hi zihyrizikpowy

³¹ Niahatsahi Sesus tuktsa zinyzonaha. Byzoje estuba ziharahaze zinyzonaha. Asahi tapara Sesus tuk Karireja buruk niukurunahatsa Serusarēhe bo ituk niukurunaha. Abaka asahi amy sa zynynaha myzubaha bo ni-pamykysokonaha. Wasani nitsasokonaha.

³² Katsaktsa niwatihi tsiktsasokonaha. Wasania humo tsimypamykysokonaha. Sesus soho ty tsimypamykysokonaha.

³³ Tubabatu Deus taparaktsa mydiritsa bo nitsasoko. Aba kino atsatu mynakara. Anaty hi ahabo tsimypamykysokonaha. Deus Sesus zihyrizipowyo

ba zik hyrikosokdazo. Tapara nitsasoko aba anatyhi mynakara. Mytsekokatsa bo mynakara. Tubabatu Deus harere Samo papeu humo ziwatahaka:

“Ikiahi katse. Abaka utakta azo mozik kasopyk.”

Iwa Samo papeu humo ziwatahaka.

³⁴ Tubabatu Deus nitsasoko.

– “Utakta Sesus myhyrizikpowyzo iwatahi ba zik hyrikosokdazo niy. Ahat-syhyryze pisapywyky. Dawi wata.

Uta ihumo zisapywyky. Ikiahatsa humo kino niwatihi pahasapywyky” niy. Dawi wata.

³⁵ Usa Samo papeu ziwatahaka. Dawi Deus bo nitsasoko:

– “Atsebabata ikia bo hyĩ ziknakara ba zerek.

Anury ba zerek iwatahi ba zikbibi. Tsamysapyrēta ba zikbibi” niy.

³⁶ Pauro nikarazo wasani my:

– Dawi Deus harere bo hyĩ ziknakara. Ispituze Deus harere bo hyĩ ziknakara. Isareu ezektsa sipehatsa wasani nikara. Iwaze nihyrikosokda. Iytyk bo nitsahoroknahaze inury nibibibaik.

³⁷ Sesus nury ba zikbibi iwaze Deus zihyrizikpowy.

³⁸ O katukytsa, ahamysapybara humo Deus pahaokzohik Sesus pokzi pahaokzohik. Sesus zikwy humo Deus ahamysapybyitsa tsikykaranaha pahaokzohik anahi tsipinymyrynahaktsa. Iwatahi katsa Sesus soho ahabo tsimytsasokonaha. Iwatsahi ahamysapybara tsmoewynahaktsa! Sesus humo zuba Deus ahamysapybara humo pahaokzohik. Tubabatu Deus harere Moises bo nitsasoko. Anaharere humo ahamysapybyitsa tsikykaranaha ba zahaokzo.

³⁹ Sesus humo zuba ahaspirikporētsa zeka Deus pahaokzohik.

⁴⁰ Tubabatu Deus sohokotsa ziwatahakanaha. Deus nisiwatawy. Asahi:

⁴¹ “Ikiahatsa Deus humo batu ahaspirikpo. Deus harere humo ahapyrirykrētsa tsimykaranaha.

Tsisisapybyrikinaha zuba. Tsikpybybaiknahaktsa! ‘Kahumo ahaspirikpo byizeka tsimyhyrikosokdanaha’ Deus mykara.

Kytsa sihumo pisapywyky. Ikiahatsa hi kahumo batu ahaspirikpo.

Kytsa ahabo motsasoziukunahaze ikiahatsa batu ahaspirikpo” nikaranaha.

Iwa botu ziwatahakanaha – Pauro niy.

Iwaze ispezo niy:

– Pykyhytutaha! Hawa Deus sohokotsa botu ziwatahakanaha ikiahatsa batu yhy ahabyitsa – niy.

Iwa Pauro Sudeutsa bo nipamykysoko.

⁴² Iwaze Pauro itukta Baranabe zipokonahaze kytsa ispe niaha:

– O usta Sudeutsa mybyrywy eze ana soho ty hi tsimypamykysokozonaha – niaha.

⁴³ Kytsa inauzuzuknahatsa nepyknahaze Sudeutsa Pauro Baranabe ahatsa bo inakaranaha. Utsa kytsa niwatihi asahi Deus harere bo yhy nikaranaha sakzohotsa bo inakaranaha. Sizubarētsa bo nipamykysokonaha. Nisitsumuēhikīnaha. Hawa Deus mybarawy ezektsa bo mysisapywyky nisi-hyrynymyryknaha nikaranaha.

⁴⁴ Iwaze usta mybyrywy eze Ātiokia ezektsa izumubanaha. Sizubarētsa hi izumubanaha. Deus harere piwaby tsihikiknaha anabo hi izumubanaha.

⁴⁵ Sudeutsa sizubarētsa bo nikozonahaze sizokdirētsa niyziknaha. Pauro zisapybyrikinaha. Iharere batu isapy nikaranaha. Atahi mybarapetu zuba nikaranaha. Pauro soho siharerewabymybarētsa nikaranaha.

⁴⁶ Iwatsahi Pauro, Baranabe iwatsa nipamykysokozonaha. Asahi sipybybyitsa tu ispe niaha:

– Wasani katsakta ikiahatsa hi Sesus soho tsimypamykysokonaha. Iki-ahatsa Sudeutsa tsimaha, tapara Deus harere tsipiwabykynaha. Iki-ahatsa hi Deus harere bo batu hỹ tsimykaranaha. Iki-ahatsa Deus tuk batu aharere tsihik. Sesus pahasapywykyze ikiahatsa batu hỹ zikaha. Iwatsahi katsa ahabo ba ziktsasonaha. Abaka bipyritsa bo tsimaha.

⁴⁷ Tubabatu Deus nitsasoko:

“Zahawatawy iwatahi kaharere myzubaha bo tsimypamykysokonaha, zahawatawy iwaha hi aty ja kaharere bo yhỹ mykara, atahi Deus tyryktsa tuk mozik.

Asakta kaharere bo yhỹ mykaranaha asahi Deus tyryktsa moziknaha” niy. Iwa tubabatu Deus sohokotsa ziwatawykynaha. Iwatahi katsa Deus harere Sudeutsabyitsa bo tsimypamykysokonaha – Pauro niy.

Iwatsahi Sudeutsabyitsa sakurẽtsa niyziknaha.

⁴⁸ Asa hi:

– O Deus harere tisapyrẽna. Tisapyrẽna hỹ – nikaranaha. Deus humo sispirikporẽtsa. Asahi Deus nisiwatawy ituk tahawahi mynapykyryknaha sispirikporẽtsa niyziknaha.

⁴⁹ Nanabyitaba Sesus tuktsa Deus harere tsimypamykysokonaha. Sizubarẽtsa wasania ty Sesus soho ziwabykynaha.

⁵⁰ Iwatsahi Sudeutsa tahakyrikinaha. Pauro Baranabe ahatsa humo tahakyrikinaha. Iwatsahi wytykyryk tuk nipamykysokonaha. Wytykyryk myhyrizikwanikiza. Asizahi Deus bo hyỹ nikaranaha. Taparaktsa hudikhudikwy sizubarẽtsa sibo nipamykysokonaha. Iwaze Pauro Baranabe ahatsa siharerewabymybarẽtsa iwatsahi nisisukyrykynaha. Tahakyrikinaha nisimiyjakanaha. Anahudikhudikwy eze nisihuruknaha. Iwatsahi Pauro itukta Baranabe nisisukehiknaha.

⁵¹ Niukurunahaze tahapyryksuktsa ty wytyktazyty dydydy nikaranaha isopykwy humo. Iwa iwatawyky niaha. Kytsa Deus harere bo batu hỹ niaha anaty hi ziwatawykynaha niaha. Niahatsahi Pauro itukta Baranabe Ikonio hudikhudikwy bo niukurunaha.

⁵² Sesus tuktsa kino Ātiokia eze sakurẽtsa. Deus hyrikoso situk mynapykyryk hỹ.

14

Ikonio eze Deus wasania ty nitsasokonaha.

¹ Pauro Baranabe ahatsa Ikonio bo niukurunaha. Hawa ty nikaranaha Ātiokia eze nikaranaha tihi Ikonio bo atsatu mykaranaha. Sudeutsa wahoro bo inapupunaha. Sesus soho myzubaha bo nitsasokonaha. Iwatsahi sizubarẽtsa Deus harere bo hyỹ nikaranaha iwaze Sesus humo sispirikporẽtsa. Sudeutsa Sudeutsabyitsa kino niwatihi Sesus humo sispirikporẽtsa.

² Sudeutsa asahi Sesus humo batu sispirikpo Pauro Baranabe ahatsa soho siharerewabymybarẽtsa. Sudeutsabyitsa bo sakzohotsa nisisohometukunaha. Iwatsahi Sudeutsabyitsa Deus harere bo batu waby zikaha.

³ Sakzohotsa Ikonio eze tu niapykyryknaha. Tahapehatsa bo Sesus soho nitsasotsasokonaha. Ziwabykynahatsa pokso batu sipyby nikaranaha. – Deus myzubaha humo mymysapywyky – nikaranaha. Sakzohotsa siwatawyhytsa nikaranaha. Amy ty kytsa batu zikaha ana kino Deus zikwy humo nikaranaha. Deus hi Pauro harere wasani my ziwatawy. Siwatawyhytsa humo wasania ty ziwatawy.

⁴ Ikonio eze ktsa metutu niaha. Wastuhu zuba:

– O Sudeutsa zuba wasani maha – nikaranaha. Utsa kytsa:

– O batu nikaranaha. Asa hi sakzohotsa wasani maha – nikaranaha. Niahatsahi asa zuba nipamykysokonaha.

⁵ Iwaze Sudeutsa Sudeutsabyitsa myhyrizikwanitsa iwatsa nipamykysokonaha:

– O Pauro Baranabe ahatsa tsiksisukyrykynaha! Haraharetsa ty tahabaiknahaktsa – nikaranaha.

⁶ Pauro Baranabe ahatsa ana hi ziwabykynaha. Iwatsahi Ikonio ikny inawaknaha. Risitera bo zumunaha, Derebe bo niwatihi zumunaha. Rikaonia bo paikpa niukurunaha.

⁷ Anabo wasania ty Sesus soho nitsasokonaha.

Ipyrytsamyita zizororowy.

⁸ Kyze Risitera bo zumunaha. Anaeze maku estuba ziknadyhykyta. Atahi koikny batu ipyrytsamyita tu niwata tu nipuruk. Batu pão ziky.

⁹ Atahi Pauro harere ziwabyziu. Iharere bo yh̃ niy. Ana humo hi Pauro tsihyrinymyrêta iwaze ibo iktsaziu niy, tapetu isopyk:

– O atakta Deus harere humo tispirikporêta iwatahi pizororowy – mytsaty nikara. Iwaze maku bo iktsaziu niyze opykani ipe niy:

¹⁰ – Kyiktykta. Riktotykta – niy. Iwaze pãozikybyita tu tuku niy atsoko rikto niy zitabaka.

¹¹ Kytsa sizubarêtsa hawa Pauro niy nikozonahaze tahaharere baba ty hua nikaranaha. Pauro siharere humo batu ihyrinymyry. Asahi:

– Deutsa mybo inasiknaha. Kytsa hyritywatsa niyziknaha. Asaktsa mydeutsa maha – hua nikaranaha.

¹² Baranabe Supitero zinaropykyknaha. Amakata mydeus niwatihi. Pauro Merkurio zinaropykyknaha. Pauro nitsasoikik iwatsahi Merkurio ty zinarokonaha.

¹³ Kyze tohi sakzohotsa bo zumu. Atahi taparakta Supitero wahoro eze tu niy. Pikuzatsa nasioktyhyryk. Sitsohorik wihara sazik ty wabehyryk niy. Sihudikhudikwy hokbowytsa bo zebykyryknaha. Pikuzatsa Pauro Baranabe ahatsa tsihyryze nisiba tsihikiknaha. Kytsa tihi:

– Asahi mydeutsa maha – nikaranaha. Iwatsahi pikuzatsa nisiba tsihikiknaha niaha.

¹⁴ Pauro Baranabe ahatsa hawa sa nikaranaha zinymyrykynaha sisukatsihikrêtsa nikaranaha.

– O batu wasani tsimykaranaha – nikaranaha. Iwatsahi tahasuk zisysykbainaha – batu wasani – iwa ziwatawykynaha isopykwy humo. Sisukatsihikrêtsa ziwatawykynaha.

¹⁵ Pauro Baranabe ahatsa sitazaha bo nipupunaha ispe niaha:

– O kytsa hawa sa tsimykaranaha. Niwazubakta! Katsa ahawatsa hi h̃ kytsa tihi. Katsa tsikzumunaha Deus wasania ty tsimytsasokonaha. Tsikzumukunaha iwatsahi ikiahatsa ahadeusbyitsa tyserekeknaha.

– Ahadeusbyitsa tyserekenahaktsa. Deus babata humo zuba ahaspirikporêtsaktsa! Atahi bijoikpe, mybarawy, buburu zuba iwa nizukni. Deus koikny baktatu abazubaha nizukni.

¹⁶ Tapara kytsa sizubarêtsa hawa wasani mytsaty nikaranaha, astsatu nikaranaha. Hawa mytsaty nikaranaha, Deus sibo yh̃ nikara. Deus nisisapywyky.

¹⁷ Hawa Deus babata mynakara namywatawyky. Atahi ahatsyhyryze hyritsik myzipeha. Ahatsyhyryze ahaparikihitsa tahaypyknahaze mysiobaranaha. Mysizozekeknaha. Atahi ahadisahawy ty ahabo nyny mynakara.

Tsimysakihikrēta. Ihumo ahakurētsa. Iwa nikara iwatsahi ihumo ahaspirikporētsa tsimoziknaha – niy.

¹⁸ Pauro Risitera ezektsa bo nitsasoko iwatsahi pikuzatsa ty batu tybeze. Iwatsa tu wastuhu kytsa pikuzatsa nasiba tsihikiknaha sakzohotsa humo.

¹⁹ Iwaze Šudeutsa izumunaha. Asaktsa Sudeutsa Sesus humo batu sispirikpo. Ātiokia ikny, Ikonio ikny kino niwatihi izumunaha. Risitera bo zukzuk niaha. Siharere Risitera ezektsa nizihikiknaha. Asaktsa ispe niaha:

– Pauro tabezekta kytsa! Haraharetsa ty tabezehiktsa. Iwaze hi mohyrikosokda – nikaranaha.

Yhỹ nikaranaha. Iwatsahi Pauro haraharetsa ty ziharawowokonaha.

– Tsibezenaha ja – nikaranaha. Iwatsahi inury zikyrikinaha. Myhyrizikwybara bo zikyrikinaha. Anaeze zerekeknaha.

²⁰ Iwaze Sesus tuktsa ipauk baze natahariktoriktonahaze nakyikzo niy. Tahudikhudikwy bo ziksizo. Estuba zuruze Pauro Baranabe ahatsa nitururukzonaha. Derebe bo niukurunaha.

Ātiokia Sirija ikny ziksizonaha.

²¹ Anabo Sesus soho nitsasokonaha. Ahamysapybyitsa tsikykaranaha Sesus humo Deus mysiokzohik. Ana hi nitsasokonaha. Kytsa sizubarētsa Sesus humo sispirikporētsa iwaze zinymyrykynahatsa moziknaha. Iwaze sakzohotsa ziksizonaha. Risitera, Ikonio, Ātiokia bo iwaha bo ziksizonaha Sesus tuktsa inakozorenaha. Pauro Sesus tuktsa nisitsumuēhikī.

²² Ispe niy:

– Ikiahatsa Sesus humo ahaspirikporētsa. Ahaspirikporētsa hi batu paikpa mytsaty zikaha. Deus harere bo hyỹ tsimaha zeka kytsa pahasininiwyknaha. Wasani my. Deus tyryktsa tsimoziknahaze iharere bo hyỹ tsimynakaranaha. Iharere ty tsimysihyrinymyrykynahaze sinini tsimykaranaha – iwa nitsasokonaha. Nanabyitaba niukurunaha iwa nitsasokonaha. Niahatsahi kytsa nisiwatawyky.

²³ Kytsa Sesus tuktsa nisispirikpokonahatsa. Tahasapy eze tu nisispirikpokonahatsa niapykyryknaha. Sesus tuktsa kytsa nisispirikpokonahatsa nisiwatawyhik. Hauk ahabyitsa tuze Deus bo nipamykysokonaha:

– O Sesus kytsa asahi atuktsa mysisopykyknahatsitsa ikia tysipokzitsiki! Ahumo sispirikporētsa iwatahi tysipokzitsikikta – nikaranaha.

²⁴ Kyze Pauro Baranabe ahatsa niukuruzonaha. Pisidia buruk niukurunaha. Pāpiria bo zumunaha.

²⁵ Bykyze Pereka bo Sesus soho nitsasokonaha. Niahatsahi Ātaria piske bo niaha.

²⁶ Anabo tsaraha puētsikbyita bo tahakokorohyknaha. Ātiokia bo ziksizonaha. Tapara Ātiokia ikny inatururuknaha. Anabo ziksizonaha Sesus tuktsa anaeze Deus bo sitsyhyryze nipamykysokonaha. Sihyriziktsokzawy humo Deus bo nipamykysoikiknaha.

²⁷ Kyze zumunahaze Sesus tuktsa izumubanaha asahi Pauro ziwabyknaha. Niytahi Pauro nitsasoko. Hawa Deus sitsyhyryze nikara:

– O Deus mytsyhyryze zisapywyky. Sudeutsabyitsa sizubarētsa Sesus humo sispirikporētsa hỹ – niy.

²⁸ Iwa Pauro Sesus tuktsa bo nitsasoko. Anaeze Sesus tuktsa tukniapykyryk.

15

Taparaktsa myhyrizikwanitsitsa Sesus tuktsa iwatsa Serusarēhe bo izumubanaha.

¹ Wastuhu Sudeutsa Ātiokia bo zumunaha. Serusarēhe ikny inatururuk-naha. Sesus tuktsa nisihrinymyryknaha. Asahi:

– Tubabatu Moises taparakta mydiritsa pe. “Ahahyrytsa tsiptakzykik-nahaktsa!” niaha. Deus nisitsumuēhī ziwatawy iwatsahi ikiahatsa kino niwatihi tsikapiakzyzyknahaktsa! Ahapiak ty iykzyk zikaha byizeka Deus ba zahatsumuēhī. Ahawyhy byizeka Deus tuk ba ahawahi zikahasapy-naha iwatsahi kytsa sizubarētsa Sesus humo sispirikporētsa ba zikapykyryk tsimaha – nikaranaha.

² Pauro Baranabe ahatsa siharere bo batu yh̄y aha. Iwatsahi niharapepehakanaha.

– Batu ba. Batu wasani tsimaha – niaha. Iwaze Sesus tuktsa pe:

– Siharere humo batu ahaspirikpo – niaha. Niahatsahi Serusarēhe ezektsa tuk mymybetsakaknaha. Iwatsahi Serusarēhe bo niukurunaha. Sesus tuktsa Pauro Baranabe ustsā Sesus tuktsa iwatsa Serusarēhe bo nisipehakanaha. Anabo taparaktsa sakzohotsa sispirikpokotsitsa Sesus tuktsa tuk kino niwatihi nipamykysokonaha. Ispe niaha:

– Katsaktsa mypiak tazyzyk sa tsimaha – nikaranaha.

³ Iwa Sesus tuktsa Ātiokia ezektsa nisipehakanaha. Kyze niukurunaha. Niukurunahaze Penise bo inakozorenaha. Samarija bo niwatihi inakozorenaha. Anaeze Sesus tuktsa bo nipamykysokonaha. Hawa Sudeutsabyitsa Sesus humo sispirikporētsa nipamykysokonaha. Sakurētsa niapykyryknaha. Samarija ezektsa Penise ezektsa iwatsa ana humo hi sakurētsa.

⁴ Kyze Serusarēhe bo zumunahaze taparaktsa myhyrizikwanitsa Sesus tuktsa sihumo sakurētsa nikaranaha. Izumubanhaze sakzohotsa sispirikpokotsitsa iwatsa izumubanaha. Niytahi Pauro nitsasobaka. Hawa Deus wasania ty nitsasohokonahaze.

⁵ Wastuhu Pariseutsa iharere batu siakparawy. Asahi Sesus tuktsa batu iharere siakparawy. Iwatsahi ipe nikaranaha:

– Sudeutsabyitsa Sesus humo nisispirikponahaze Moises harere ty mykaranahaktsa! Katsa mywata Moises harere bo hȳy mykaranaha. Tsimysihyrinymyryknahaktsa! Tahahyrytsa mysipiakzyzyknaha mysopykwy tsimykaranaha – nikaranaha.

⁶ Kytsa paikpa mytsaty nikaranaha. Pauro Baranabe ahatsa niwatihi batu yh̄y aha. Iwatsahi inauzuzukunaha. Sakzohotsa Sesus tuktsa sispirikpokotsa kino niwatihi inauzuzukunaha.

– Amy skaraba Sudeutsabyitsa tahyrinymyryknaha. Moises harere bo yh̄y sisopyk katsa mywatsa wasani ja mykaranaha. Asahi Moises harere bo batu h̄y wasani ja my. Batu myhyrinymyry – nikaranaha.

⁷ Iwatsahi asa zuba nipamykysokonaha. Niharapepehabanahaze Peduru kyik niy ispe niy:

– Katukytsa wabytaha! Tubatu Deus zikwatawy, Sesus soho ty nipamykysoko Sudeutsabyitsa bo zikwatawyhik. Ana humo hi ahahyrinymyrētsa. Deus Sudeutsabyitsa wasania ty ziwaby tsihikik iwatahi zikwatawy. Deus myzubaha bo inymyryky.

⁸ Hawa kytsa mytsaty mykaranaha inymyryba. Atahi tahyrikoso Sudeutsabyitsa bo zipedahik. Katsa mywatsa Deus hyrikoso Sudeutsabyitsa bo inasik. Iwa Sesus humo sispirikporētsa babatsa hi ziwatawy.

⁹ Simysapybyitsa nikaranaha Deus nisiokzohik. Tapara Deus katsa mymysapybyitsa tsikykaranaha nimyokzohik. Iwa Sudeutsabyitsa niwatihi simysapybyitsa nikaranaha nisiokzohik. Sesus humo sispirikporētsa iwatahi Deus simysapybyitsa nikaranaha nisiokzohik. Deus tuk kytsa sizubarētsa astsatu niy. Aty Deus harere bo yh̄y mykara zeka pisapywyky.

¹⁰ Amy humo sa ikiahatsa Deus humo tsipahaokanikinaha. Deus harere tsiksispirikpokonaha ikiahatsa kino batu ahakparawy. Taparaktsa mydiritsa Moises harere myspirikpowy humo batu hỹ ziknakaranaha. Katsa kino Moises harere myspirikpowy humo batu hỹ tsimykaranaha. Asa kino niwatihi Moises harere myspirikpowy humo batu hỹ mykaranaha. Iwatsahi anatyhi batu tyso tsimaha – niy.

¹¹ – Katsakta Sesus humo myspirikporẽtsa iwatahi Deus mysapybyitsa tsinakaranaha mymyokzohik. Sudeutsabyitsa niwatihi. Asahi Sesus humo sispirikporẽtsa Deus simysapybyitsa ziknakaranaha mysiokzohik. Kytsa sizubarẽtsa humo Deus mysisapywyky – Peduru niy.

¹² Kytsa sizubarẽtsa tahabyripykpyk zuba niaha. Baranabe Pauro ahatsa harere ziwabykynaha. Hawa Deus nikara situk nipamykysokonaha. Deus Sudeutsabyitsa bo nimypehahik. Iwatsahi Sesus soho Sudeutsabyitsa bo tsiktsasokonaha. Amy ty kytsa zikahabara ty Deus mytsyhyryze nikara. Deus amy ty kytsa zikahabara ty katsa nisiwatawyky. Sudeutsabyitsa bo nisiwatawyky. Iwa Deus zikwy humo nisiwatawyky. Iwa Pauro inauzuzukuknahatsa pe nikara.

¹³ Iharere nepykze Tsiaku ispe niy:

– O katukytsa wabytaha!

¹⁴ Simaõ Peduru harere botu tsiwabynaha. Tapara Deus Sudeutsabyitsa nisiwatawy tsihikik. Sihumo tsimypokzitsiarẽta. Kyze Deus Sudeutsa nisiwatawyhik asahi ihumo sispirikporẽtsa. Asahi ihyrytsa niyziknaha.

¹⁵ Tapara Deus sohokotsa botu ziwatahakanaha. Atsatu nikaranaha. Deus harere papeu humo ziwatahaka:

¹⁶ Utakta Deus bykyze myziksizo. Kytsa kabo mosakibazikiknaha kahumo sakurẽtsa.

Tubabatu taparakta nihyrikosokdata Dawi kabo nisakibazikik aba niwatihi kytsa kabo mosakibazikiknaha atsawatu mykaranaha.

¹⁷ Iwatsahi kytsa nanabyitaba kahumo sispirikporẽtsa.

Sizubarẽtsa kahumo sispirikporẽtsa niyziknaha kahyrytsa moziknaha, Sudeutsabyitsa kahyrytsa moziknaha. Iwa Deus nitsasoko.

¹⁸ Tapara Deus sohokotsa ziwatawykynaha.

Taharere papeu humo ziwatahakanaha – Tsiaku niy.

¹⁹ Tsiaku ispezo niy:

– Sudeutsabyitsa Deus humo sispirikporẽtsa katsa batu istykni mytsaty mykara – niy.

²⁰ Sudeutsabyitsa bo tawatahaktsa! Iwa tsipiwatahakanaha:

– Ikiahatsa ahazoho botu deusbyitsa bo nyny my zeka hauk hauk byitaha. Kytsa usta oke ba ziaксе, aoke zuba tyzibykyhyky. Wytykyryk kino niwatihi usta maku bo iksa zuba tynakaranaha. Ahazoho spu ty ka tsõ tsõ byitaha. Siraratsa soik ty pyryrykty iwa mysiba naha zeka hauk hauk byitaha. Iwa katsa Sudeutsabyitsa bo tsimaha. Sudeutsabyitsa Sesus humo sispirikporẽtsa iwa tsimahaktsa – niy.

²¹ – Iwa wasani sibo tsimypamykysokonaha. Moises harere myspirikpowy myzubaha bo niy. Mybyrywy eze Moises spirikpowy ziwabykynaha. Sudeutsa wahoro bo Moises spirikpowy ty opykani nipamykysokonaha. Niwazuba sibo tsimypamykysokonaha – niy.

Yhỹ nikaranaha. Aharere wasani tsimaha. Sakzohotsa Sesus tuktsa sispirikpokotsa kino niwatihi Tsiaku harere siakparawy.

Sakzohotsa papeu humo Sudeutsabyitsa Sesus tuktsa bo zipehakanaha.

²² Kyze niaha tsahi sakzohotsa Sesus tuktsa sispirikpokotsa kino niwatihi papeu humo ziwatahakanaha. Sudeutsabyitsa Sesus tuktsa bo ziwatahakanaha. Asahi Ātiokia eze niapykyryknahatsa bo ziwatahakanaha. Kytsa petoktsa papeu iwatahaha zebykyryknaha. Sesus tuktsa sihumo sispirikporētsa. Estuba Siras inarokota usta Sudas. Sudasta petok narohota. Usaka mekywata inaro Barasabas. Asahi Pauro Baranabe ahatsa tuk Ātiokia bo niukurunaha.

²³ Papeu zebykyryknaha. Papeu humo iwatahaha:

– Katsakta Sesus ykzohotsa taparaktsa Sesus tuktsa sispirikpokotsa kino niwatihi ahatukytsa ikiahatsa bo tsiptiwatahakanaha. Katsa ikiahatsa humo myhyrizikbarētsa. Ikiahatsa bo Ātiokia ezektsa asahi Sirija ezektsa Sirisia eze tu niwatihi iwa tsiptiwatahakanaha. Sudeutsabyitsa tu tsiptiwatahakanaha.

²⁴ Tubabatu kytsa Serusarēhe ezektsa zahayknikinaha iwatsahi paikpa mytsaty tsikykaranaha. Aba amy ty wasani ha humo batu ahahyrinymyry. Kytsa ahape niaha:

“Tsiptiakzyzykiknahaktsa! Ahahyrinymyrywy hi” niaha. Katsakta batu ahabo isty peha. Asahi ahabo zumu tsihikiknaha.

²⁵ Bykyze katsa zuba tsikpamykysokonaha. Katsa myzubarētsa bo yhỹ tsimykaranaha. Iwaze kytsa petoktsa ahabo mysipehanaha. Tsiksiwatawykynaha Pauro tuktsa Baranabe iwa siapik mynakurunaha.

²⁶ Asahi mytukytsa sihumo tsimypokzitsirētsa. Tarabaja Sesus tsyhyryze humo kytsa nisibakzyzykynaha. Asa tuk hi kytsa petoktsa mynakurunaha.

²⁷ Myharere ahabo tsimytsasokonaha. Hawa ha ty tsiptiwatahakanaha anaty hi ahabo mopamykysokonaha.

²⁸ Tsikzumubanhaze Deus hyrikoso katsa nimytsumuēhĩkĩ. Niwazuba tsimykaranaha.

²⁹ Anatyhi ahazoho botu deusbyitsa bo nyny my zeka hauk hauk byitaha! Azoho spu ty ka tsō tsō byitaha. Ispu ty ka tsō tsō byitaha. Siraratsa tsimysisoikpyryryk pyryrykyknaha iwa tsimysibanaha zeka hauk hauk byitaha. Kytsa usta okeza ba ziaksenaha. Wytykyryk niwatihi usta maku bo iktsa zuba tynakaranaha. Iwa tsimykaranaha zeka tsipisapykynaha. Ahazubarētsa ahakurētsaktsa! tsimoziknaha – tsimykaranaha.

Iwa Sudeutsabyitsa bo ziwatahakanaha. Sakzohotsa Serusarēhe ezektsa Sesus tuktsa Sudeutsabyitsa bo ziwatahakanaha.

³⁰ Niahatsahi sipehatsa papeu hi zebykyknaha. Iwaze Siras, Sudas iwatsa papeu zibykyryknaha. Ātiokia zumunahaze Sesus tuktsa sizubarētsa inakypykbanaha. Asahi papeu ty sibo nyny niaha.

³¹ Taparaktsa papeu humo iwatahaha ty opykani nipamykysokonaha. Iwaze sakzohotsa harere ziwabykynahaze sakurētsa. Papeu humo ky soho ziwabynahatsa inakokonaha.

³² Sudas, Siras iwatsa nisihyrinymyrykynaha. Asahi Deus sohokotsa niaha iwatsahi Sesus tuktsa nisihyrinymyrykynaha. Siharere humo Sesus tuktsa batu sipyby. Sipunihikrētsa moziknaha. Kytsa situk niapykyrykspyknaha.

³³ Niahatsahi:

– Katsakta tsipiksinaha – niaha. Kyze Sesus tuktsa tihi:

– Yhỹ tsiksinaha za. Deus ahatuk mokuru. Katsakta Deus harere bo hyỹ tsimykaranaha! – nikaranaha. Niahatsahi Serusarēhe bo niukuruzonaha. Sakzohotsa bo ziksizonaha.

³⁴ Siras zuba Ātiokia eze nitare. – Utakta anaeze mynapykyryk – niy. Iwaze nitare.

³⁵ Kyze Pauro Baranabe iwatsa Ātiokia eze niapykyrykspyknaha. Asahi usts Sesus tuktsa tuk Deus harere nitsasokonaha. Kytsa nisihyrinymyryknaha.

Pauro Baranabe ahatsa niharapepehakanaha.

³⁶ Kyze aibani Pauro Baranabe pe niy:

– O katsaktsa Sesus tuktsa bo tsimynakozorenahaktsa! Myzubaha bo botu tsiknakurunaha sibo tsimynakozorezonahaktsa! Sesus tuktsa bo iktsa tsimaha. Iwaze wasani maha zeka ja myhyrinymyrētsa – niy.

³⁷ Baranabe ipe niy:

– Yh̄y. Suāo Marakos mytukta mozihihikik – niy.

³⁸ – O batu. Suāo Marakos atakta kyzekta ziktare. Batu h̄y iky. Tapara katsa Pāpiria eze tuze nimyereke. Tarabaja humo nikara batu iakubyrisorok ziksihi. Iwatahi ba ziokytkzo, batu wasani my. Batu h̄y iky – niy.

³⁹ Niharapepehakanaha batu h̄y niaha. Iwatsahi metutu tahasapykynaha. Niytahi Baranabe Suāo Marakos ziokythyryk. Asahi Sipire tsikzikdihi sihezōni bo ziksizonaha. Tsaraha puētsikbyita eze kokorohyk niaha. Buburu zuba zitsikzanaha. Sipire tsikzikdihi bo niukurunaha.

⁴⁰ Pauro usta ty tatyk ykpyriwyhyk niy. Siras ziwatawy Siras ty tatyk ykpyriwyhyk Sesus tuktsa sitsyhyryze Deus bo nipamykysokonaha:

– O Deus sihumo amypokzitsiukta – nikaranaha.

⁴¹ Niahatsahi niukurunaha. Sirija Sirisia aha bo inakozorezonaha. Sesus tuktsa nisihyrinymyryknaha, inasiakusuknizonaha. Sakurētsa niyziknaha.

16

Timoteo Pauro Siras ahatsa niukurunaha.

¹ Pauro Derebe Risitera iwatsa zumukunaha. Siras itukta niy. Risitera eze maku Sesus tukta niy. Timoteo inarokota. Ije Sudeutatsa. Atatsa Sesus harere bo hȳy ziknakara ihumo tspirikporētatsa. Izokta Kereko.

² Sesus tuktsa Ikonio Ezektsa Risitera Ezektsa kino niwatihi Timoteo siakparawy:

– O atakta tsimysapyrēta – nikaranaha.

³ Pauro Timoteo tahatuk pioktyhyryk tsihikik. Tatsumuēh̄itsa bete piokty tsihikiknaha. Iwatahi tapara Timoteo tapiakzykik niy. Sudeutsa sopykty. Ipiak zyzykyhybyita tu izo Kereko Ezekta humo iwatahi aba zuba tapiakzykik. Iwa Pauro niy.

⁴ Iwaze niukurunahaze haneze kytsa Sudeutsa niapykyryknaha Timoteo zipiakzykik sihyrinymyrētsa. Niahatsahi Pauro, Siras, Timoteo iwatsa niukurunaha. Sizubarētsa bo zumukunaha. Sesus tuktsa bo inakozorenaha. Hawaha ty sakzohotsa Sesus tuktsa sispirikpokotsa iwatsa Serusarēhe eze nitsasokonaha Sudeutsabyitsa soho nitsasokonaha. Anatyhi Sesus tuktsa bo nipamykysokonaha:

– Anaharere bo yh̄y tynakaranahaktsa kytsa – nikaranaha. Nanabyitaba nipamykysokonaha.

⁵ Iwatsahi Sesus tuktsa ihumo sispirikporētsa niyziknaha. Zikzibyituhukutu usts kytsa Sesus tuktsa moziknaha, iwa nasiubara.

Pauro Toroad eze Masedonia Ezekta ziny itsotospyk waha eze ziny.

⁶ Kyze niukurunaha Pauro, Siras, Timoteo iwatsa niukurunaha. Deus hyrikoso kytsa Asia bo niukurunahatsa humo h̄ybyri nikara. Iwaze Karatas Pirusia baze tu niukurunaha.

⁷ Niahatsahi Misia bo nikaranaha. Bitinija bo niukurunaha zetu Deus hyrikoso h̄ybyri nikara.

⁸ Niahatsahi Misia buruk ziharamunaha. Iwaze Toroade bo izumunaha. Toroade ske myporokwy eze buburu zuba sak baze tu niy.

⁹ Anaeze unata zurubakaze Pauro zitsotospykykze maku ziny. Masedonia ezekta niriktohoko ziny. Atahi ipe niy:

– Aidytyktsa buburu zuba tatsikza Masedonia boktsa! Katsa tynamytsumuēhīnahaktsa – niy! Iwa maku zitsotospykyk eze nitsasoko.

Utakta niwatihi Toroade eze tu iky. Rukas papeu piwatahaka, utakta niwatihi kytsa tuk mokuru.

¹⁰ Pauro zitsotospykykze aidy tsimykurunaha. Deus nimywatawyky iwatsahi Masedonia bo iharere ty tsimypamykysokonaha. Iwaze Masedonia bo tsimykurunaha.

Ridia Sesus tuktatsa niyzik.

¹¹ Kyze tsaraha puētsikbyita taeze kokokorohyk. Toroade ikny tsikukurunaha. Buburu zuba tsitsikzakanaha. Tsikzikdihi tsiharamunaha. Estuba tsikurunahaze Neapolis bo tsikumunaha.

¹² Kyze Piripos bo tsikumunaha Masedonia eze tu niy. Piripos tsizubarēna. Homa ezektsa tahawahoro zikymybanaha. Anaeze tsinapykykspyknaha.

¹³ Sudeutsa mybyrywy buburu sak bo tsikukurunaha. Sudeutsa anaeze Deus bo nipamykysokonaha. Wytykyryk tsiksihobyknaha. Sibaze tsikdydyhyknaha. Iwaze Deus harere ty sibo tsikpamykysokonaha.

¹⁴ Estuba wytyk Ridia inarokotatsa. Atatsa Tiatira ezektatsa niy. Atatsa panu tsaririha ty zihuakak. Panu tsipokzitsarēna. Sudeubyitatsa tu Deus harere bo ma ziknakara. Atatsa Pauro Sesus soho nitsasokoze ana hi ziwabyziu. Iwatatsahi zinymyryky.

¹⁵ Iwatatsahi Pauro harere humo hyŷ nikara. Sesus humo tispirikporētatsa. Iwatatsahi taharasusu. Iwahoro ezektsa kino niwatihi nisiharasusuhiknaha. Iwaze atatsa mybo nitsasoko:

– Ahaokze ka ikza Sesus harere bo hyŷ mykara zeka iwatatsahi Sesus humo kaspirikporētatsa. Abaka kawahoro eze tsimynapykyryknaha ky – niy.

Iwatsahi atatsa wahoro eze tsimypykyryknaha. Piripos eze tsiktarenahaze Ridia wahoro eze tsikakpykyknaha.

Kytsa Pauro Siras ahatsa sakyriukanikitsa hurukwy bo nisioktyhyryknaha.

¹⁶ Kyze iypykyhyzytyktatsa inamyhobyk. Atatsa kytsa bo tarabaja bobatu ziknakara. Kytsa atatsa bo okyrysaro ty batu nyny zikaha. Katsa ske buruk tsikukurunahaze atatsa inamyhobyk. Kytsa Deus bo nipamykysokonaha ana bo tsikukurunahaze atatsa inamyhobyk. Pyryhyk hyrikoso atatsa bo pororo ziknakara. Hyrikoso sapybara batu simysapy atatsa tuk ziknapykyryk. Iwaze kytsa ipe niaha:

– Hawa sa maha – nikaranaha iwatatsahi sibo nitsasoko. Kytsa ipokzitsikitsa atatsa harere humo hi okyrysaro tsizubarēna ty ziaksenaha.

¹⁷ Zikzibytuhukutu mapik niukuru. Hawa ziknakara:

– Asaktsa kytsa Deus tsumuēhītsitsa maha. Deus abazubakata. Hawa Deus kytsa simysapybyitsa nikaranaha mysiokzohik ahabo mopamykysokonaha – nikara. Opykani hua ziknakara.

¹⁸ Zikzibytuhukutu mapik atatsa hua ziknakara. Iwaze atatsa Pauro ziokanityikik. Tasukpe bo iktas niy. Iwaze ihyrikoso sapybara pe niy:

– Sesus zikwy humo nabo pāotyktā! – niy. Atsoko ihyrikoso sapybara ziksiwyhyk.

¹⁹ Atatsa pokzitsitsa ihyrikoso sapybara ziksiwyhykze zinyana ana humo hi tahakyrikinaha. Hyrikoso isapybara ziksiwyhykze Pauro Siras ahatsa

humo tahakyrikinaha. Okyrysaro hana bo ja iwatsahi tahakyrikinaha. Iwaze Pauro itsipa humo zioқтыhyryknaha. Siras kino niwatihi itsipa humo zioқтыhyryknaha.

²⁰ Kytsa uzuzukukwy bo nisikyrikinaha. Sipehakatsa bo nisioktyhyryknaha.

²¹ Homa ezektsa sipehakatsa pe niaha:

– Asaktsa kytsa Sudeutsa maha. Katsa mybo mymykyritykynaha. Hawa mytsaty nikaranaha atsatu nimyhyrinymykyrynaha. Batu wasani maha. Katsaktsa Homa pehatsa harere bo yhȳ tsimykaranaha. Asahi meky watu nimyhyrinymyrykynaha – mybarapetu nikaranaha.

²² Niahatsahi hudikhudikwy ezektsa Pauro Siras ahatsa humo tahakyrikinaha. Iwaze sipehakatsa sodadutsa pe niaha:

– Sisuk tysibobonahaktsa! Hwi ty tysikinahaktsa – niaha.

²³ Nisikibanahaze sakyriukanikitsa hurukwy bo nisikyrikinaha. Sakyriukanikitsa hurukwy tsihitsa pe niaha:

– Tysiperyziukukta iwatsahi batu isty suke – nikaranaha.

²⁴ Sakyriukanikitsa hurukwy tsihitsa ana hi ziwabyze isapy nabo patu tohi nisioktyhyryk. Ipyrytsa humo hwi ty puētsikbyita ty nisipyrytsa okpyrikiknaha. Anaeze ba zikoinaha mytsaty niy.

²⁵ Unopokte Pauro Siras ahatsa Deus bo nisakibazikiknaha. Deus bo nipamykysokonaha. – O Deus ikia zuba tsamysapyrēta – nisakibazikiknaha. Kytsa sizubarētsa sakyriukanikitsa hurukwy eze ziwabykynaha.

²⁶ Atsoko wytyk nitydydydykyk tu. Iwatahi sakyriukanikitsa hurukwy nitydydydykyk tu. Atsoko hokbowytsa ty zoksapare niaha. Karikutsitsitsa sitsipa humoktsa inarahanaha. Sipawarawytsa niaktsawakbaiknaha.

²⁷ Niytahi sakyriukanikitsa hurukwy tsihitsa inapopo. Hokbowytsa ty zoksapare niyze nikoze.

– O sakyriukrēnikitsa niwakbaiknaha kok – mytsaty nikara. Niytahi sokorotsapuzezety okok niy. Tasokorotsapu okok niyze atatu asiba tabeze.

²⁸ Niytahi Pauro ibo nikozoze huahua niy.

– Aty beze bezebyity. Iktsa tsimy. Katsa anaeze tsimypykyryknaha. Iwatahi apyby byihu ja – niy.

²⁹ Niytahi sakyriukanikitsa hurukwy tsihitsa tihi:

– Pany rika ty tyzebykykta – niy. Anabo atsoko nitsuk. Pauro Siras ahatsa bo zumu. Tsipybyrēta nitydydydykyk tu, siokeryk taekaratsa humo puruk puruk niy. Sihumo tsipybyrēta nikara iwatahi taekaratsa humo puruk puruk niy. Niytahi ape bo nisisukehyryk.

³⁰ Iwaze ispe niy:

– O katuktsa kamysapybyita ikykara meky watu mozik tsihikik hawa sa wasani mykara – niy.

³¹ – O ikia Sesus harere bo hȳ tsimy zeka ihumo aspirikporēta tsimozik! Ikia awahoro ezektsa kino niwatihi ahamysapyrētsa tsimoziknaha mekywatsa tu tsimoziknaha. Nawa tihi awahi tsimyokzo – niaha.

³² Niahatsa sakyriukanikitsa hurukwy tsihitsa bo Deus harere nitsasokonaha. Iwahoro ezektsa kino niwatihi Deus harere sibo nitsasokonaha

³³ Iwaze unopokte sakyriukanikitsa hurukwy tsihitsa sakzohotsa nisisukpetara pikik nisipokzitsiki. Kyze sakzohotsa sakyriukanikitsa hurukwy tsihitsa, iwahoro ezektsa kino niwatihi sizubarētsa nisiharasusuhik.

³⁴ Iwaze Pauro Siras ahatsa tawahoro bo nisioktyhyryk, tadisahawy ty sibo nyny niy. Sakurētsa nikaranaha. Sizubarētsa Sesus humo sispirikporētsa iwatsahi sakurētsa. De.

³⁵ Miwa botu Piripos ezektsa sipehatsa sodadutsa nisipeha. Ispe niaha:

– Sakyriukanikitsa hurukwy tsihitsa boktsa! Ipe tsimaha:
 “Kytsa petoktsa tynasisukekta tsimy” – nikaranaha. Iwaze sakyriukanikitsa hurukwy bo niaha. Ana ty hi nitsasokonaha.

³⁶ Sakyriukanikitsa hurukwy tsihitsa Pauro Siras ahatsa ispe niy:

– Piripos ezektsa pehatsa sakyriukanikitsa hurukwy tsiponahaktsa niy. Iwatsahi tsiksinaha. Ahabyri ja typykyknaha – niy.

³⁷ Pauro siharere bo batu hỹ niy. Iwatahi sodadutsa pe niy:

– Katsaktsa Homa hudikhudikwy ezektsa ty zuba nawa sa ahasopyk. Iki-ahatsa kytsa okze tsikmykikinaha. Tapara kytsa harerewabytsa bo batu mytyoktyhyryk. Hawa tsikykaranaha batu ahahyrinymyry. Sakyriukanikitsa hurukwy eze tsiknamykyrikinaha. Abaka katsaktsa sipapatu tsipik-sikyzyknaha. Kytsa papatu tsipiksikyzyknaha zeka batu wasani tsimaha. Asatu katsa zimyoktyhyryknaha. Kytsa okeryk mymyoktyhyryknaha – niy. Iwatsahi sodadutsa Pauro harere humo ziksizonaha.

³⁸ Pauro harere sipehatsa bo nitsasokonaha. Asaktsa zinymyryknahaze Pauro Siras ahatsa Homa hudikhudikwy ezektsa maha sipybyrẽtsa niyziknaha.

³⁹ Iwatsahi sakyriukanikitsa hurukwy bo niaha. Pauro pe niaha:

– O batu wasani tsikykaranaha mymysapybyitsa tsikykaranaha tymokzo tyspiriktsohdanaha – nikaranaha. Iwaze sakyriukanikitsa hurukwy ikny nisioktyhyryknaha.

– O mytsyhyryze tsipisapyknaha zeka mekybotu tsikahasapynaha – niaha. Iwa Pauro Siras ahatsa bo nipamykysokonaha.

⁴⁰ Pauro Siras ahatsa sakyriukanikitsa hurukwy ekze ziponahaze Ridia wahoro bo nipupunaha. Anaeze Sesus tuktsa bo nipamykysokonaha. Bykyze niukurunaha.

17

Pauro tuktsa Tesaronika eze niaha. Anaeze kytsa nisibakyzyknaha.

¹ Pauro Siras ahatsa niukurunaha. Apiporos Aporonia iwatsa ziharamunaha. Iwaze Tesaronika bo zumunaha. Anaeze Sudeutsa wahoro bo nipupunaha.

² Pauro siwahoro bo nitsuk. Iwaze Sudeutsa mybyrywy eze siuzuzukukwy bo nipupunaha. Sudeutsa mybyrywy eze harakykbyihize siwahoro bo nipupunaha. Anaeze kytsa tuk Sesus soho nipamykysokonaha. Amy ty Deus sohokotsa ziwatahanaha ana soho ty hi nipamykysoko.

³ Tapara Deus harere humo sohokotsa ziwatahanaha:

– “Kiristu Deus zipehata sinini mykara Kiristu mohyrikosokda. Bykyze mynahyryzikpo nikaranaha”. Iwa Deus harere humo botu ziwatahanaha. Anatyhi Sesus atsatu niy. Atahi mybo nipamykysoko. Atahi Deus zipehata babata – Pauro nikara.

⁴ Wastuhu kytsa anahi ziwabynahaze Pauro harere bo yhỹ nikaranaha iwatsahi Sesus humo sispirikporẽtsa niyziknaha. Pauro Siras ahatsa tuk niharapikykyknaha. Kytsa Kereko harere ituktsa niwatihi Sesus harere bo yhỹ nikaranaha ihumo sispirikporẽtsa. Tapara Deus soho tsikaeni zuba sihyrinymyrẽtsa. Wytykyryk taparakykyry myhyrizikwaniza. Sesus harere bo hyỹ nikaranaha ihumo sispirikporẽza. Sizubarẽtsa Sesus tuktsa niyziknaha. Aparakbaha izumubanaha.

⁵ Iwaze ustsá Sudeutsa, Sesus harere bo batu hỹ nikaranaha ihumo batu sispirikpo. Sizokdirẽtsa nikaranaha, Pauro Siras ahatsa humo sizokdirẽtsa. Iwaze simysapybyitsa nikaranaha. Kytsa batu sipasaratsihik sihumo nisiaknikinaha. Asahi Pauro Siras ahatsa soho nisisapybyrikinaha. Kytsa

izumubannahaze pikyknikinaha. Siharere humo tahakyrikinaha iwatsahi Pauro Siras ahatsa bo nisiberikinaha. Iwaze Sasō wahoro bo nikaranaha. Wahoro hokbowy ziharakbaik niahatsahi nipupunaha. Iwaze Pauro Siras ahatsa zuba hana bo ja zipoiknaha.

⁶ Sibo zukbyitsa tu ustsā kytsa nisioktyhyryknaha. Nisikyrikinaha. Sasō, Sesus tukta niwatihi zikyrikinaha. Tesaronika ezektsa sipehatsa bo nisioktyhyryknaha. Kakaik niaha Pauro tukta Siras soho ispe niaha:

– Asa hi myhudikhudikwy bo izumunaha. Nanabyitaba kytsa nisiaknikinaha.

⁷ Asahi Sasō wahoro eze niapykyryknaha. Mypehatsa Sesa Homa ezektsa pehatsa iharere bo batu ma aha. Iharere bo ka batu hỹ zikaha. Asa hi “Sesata mypehatsa byita tu. Usta mypehatsa babatakta. Sesus inarokota. Atahi myhyrizikwanita mykara”. Iwa mybo nitsasokonaha – nikaranaha.

⁸ Taparaktsa hudikhudikwy siharere ziwabynahaze paikpa mytsaty nikaranaha. Kytsa kino niwatihi Pauro Siras ahatsa humo tahakyrikinaha. Sizubarētsa sakyrirētsa niapykyryknaha.

⁹ Iwatsahi hudikhudikwy taparaktsa okyrysaro ziaksenaha. Sasō Sesus tuktsa kino niwatihi tahaokyrysaro ziaksenaha, iwaze ispe niaha:

– Nabo pāotaha! – niaha. Iwatsahi Sasō tatuktsa tuk ziksizonaha.

Kytsa sizubarētsa Berija eze Pauro harere bo yhỹ nikaranaha.

¹⁰ Nakaramitsitsikze Sesus tuktsa Pauro Siras ahatsa Berija bo nisipehahiknaha. Iwaze Berija bo niukurunaha.

Niahatsahi Pauro Siras ahatsa Berija bo zumunaha. Sudeutsa wahoro bo inapupunaha. Anaenze Deus harere humo nisihyrinymyryky.

¹¹ Berija ezektsa mekywatsa tu, batu Tesaronika ezektsa watsa. Asahi Pauro harere piwaby tsihikiknaha. Zikzikbyituhukutu Deus harere papeu humo ky iwatahaha ty estuda nikaranaha iwatsahi Pauro harere wasani my pinymyryknaha.

¹² Iwaze kytsa sizubarētsa Sesus harere bo hyỹ mykaranaha ihumo sispirikporētsa moziknaha. Sudeutsa Sesus humo sispirikporētsa maha. Kereko iknyktsa Sesus humo sispirikporētsa niwatihi. Wytykyryk myhyrizikwaniza Sesus humo sispirikporēza.

¹³ Kyze Sudeutsa Tesaronika ezektsa ana hi ziwabynahaze. Hawa Pauro Deus harere Berija eze nipamykysoko ziwabykynaha. Iwatsahi anabo izumukunaha. Izumubannahaze Pauro harere zisapybyrikinaha. Kytsa Pauro harere bo batu hỹ zikaha iwahi mozihikiknaha. Kytsa Sesus humo batu sispirikpo iwahi mozihikiknaha.

¹⁴ Kyze Sesus tuktsa Pauro Berija ekny iziksiwy zipehahiknaha. Wastuhu kytsa buburu zuba sak bo ziooktyhyryknaha. Niahatsahi Atenas bo niukurunaha. Siras Timoteo ahatsa zuba Berija eze nitarenaha.

¹⁵ Sesus tuktsa Berija bo ziksizonahaze Siras Timoteo pe niaha:

– Aidytaha! Atenas bo tykurunahaktsa! Pauro pahatsihikik niy – nikaranaha.

Pauro Atenas eze.

¹⁶ Kyze Pauro Atenas eze tuze Siras Timoteo ahatsa nisiperyky. Atenas ezektsa mektsatu deustsabyitsa botu yhỹ nikaranaha. Deustsabyitsa sizubarētsa bo yhỹ ziknakaranaha, Pauro ana humo hi taokaniki. Nisipihikbatakanahatsa bo yhỹ ziknakaranaha iwatahi sihumo tisukatsihikrēta niyzik.

¹⁷ Niytahi Pauro Atenas ezektsa bo nipamykysoko. Sudeutsa wahoro eze Sudeutsa bo nipamykysoko. Sudeustsabyitsa asahi Sudeutsa sopykwy

ty yh̄y nikaranaha asa kino niwatihi nipamykysoko. Zikzibytuhukutu anaeze hi simyharere wabykywy eze kytsa bo nipamykysoko. Asahi ibo nipamykysokonaha niwatihi iwaha humo hi sihyrinymyr̄etsa niyziknaha.

¹⁸ Kytsa nihyrikosokdata Epikurus tuktsa niaha. Utsa Estoikos asahi Seno tuktsa niaha. Kytsa sihyrinymyr̄etsa. Asa zuba Pauro soho ty nipamykysokonaha.

– Atakta maku amy ty ja katsa mybo motsaso tsihikik.

Tsihyrinymyr̄eta ja. Usta Deus soho ja motsaso tsihikik – nikaranaha. Iwa sihyrinymyr̄etsa asa zuba nipamykysokonaha. Pauro Sesus soho nitsasoko. Kytsa Sesus wata mynahyrikonaha nitsasoko. Iwatsahi asa zuba Pauro soho nipamykysokonaha.

¹⁹ Niahatsahi Pauro siuzuzukukwy bo Areopako inarokoha zioқтыhyryknaha. Anaeze hi inaharapekypykyknaha.

²⁰ Ipe niaha:

– Tupakta! Aharere katsa mybo tytsaso! Abaka aharere tsipiwaby tsihikiknaha. Aharere meky watu iwatsahi tsipiwaby tsihikiknaha. Aharere tsipinymyry tsihikiknaha – nikaranaha. Iwa Pauro bo nitsasokonaha.

²¹ Atenas Ezektsa ezytyk soho siakparawy.

– O aharere ezytyk soho ty katsa mybo typamykyso – nikaranaha. Zikbyituhukutu ezytyk soho ty nipamykysokonaha. Zikbyituhukutu ezytyk soho ty ziwabykynaha. Nawa zikzurukunaha. Iwatsahi Pauro pe niaha – Aharere ty katsa mybo tytsaso! – nikaranaha.

²² Niytahi Pauro rikto niy. Anaeze Areopako siuzuzukukwy eze rikto niy. Ispe niy:

– O Atenas Ezektsa wabytahaktsa! Ahadeustsa humo ahapybyr̄etsa tsimykaranaha.

²³ Ahahudikhudikwy taba zikzumukuze ahadeustsabyitsa ziknasinykyry, ahadeustsabyitsa haraharetsa bo iktsa iky. Estuba harahare humo iwatahaha. “Usta Deus mynyhybyita” niy. Iwa harahare humo ziwatahaha. Ata hi ikiahatsa bo motsaso. Ata humo hi ikiahatsa batu ahaspirikpo ata hi pahayrinymyryky. Taharere ahabo motsasoko. Utakta ihumo kaspirikpor̄eta.

²⁴ Deus bijoikpe mybarawy iwa nizukni. Anaeze sispitutsa nisisuknibaik niwatihi. Atahi wahoro eze ba zikuru. Wahoro kytsa sukniheze ba zikuru.

²⁵ Katsaktsa Deus bo batu tytsumuēh̄i. Inamyr̄enikita. Ata humo hi myspitutsa nisisukni. Ata humo hi mysysokehanitsa tsinakaranaha. Ihumo mykur̄etsa.

²⁶ Taparaka petoktsa zuba nisisukni asahi Deus humo inamybarawynaha. Iwaze kytsa sizubar̄etsa itsekokatsa niyziknaha. Deus taparaktsa nisisukni. Abaka kytsa itsekokatsa maha. Nanabyitaba sisopykwy humo tsihyrinymyr̄eta. Kytsa sisapy ziwatawyky. Wastuhu kytsa taba nisisapyky. Utsa kytsa usta taba nisisapyky. Tapara sisuknihybyize sisapy zinykyry.

²⁷ Myzubahatsa nisisukni iwatsahi ibo myziberikinaha. Tozeka ja Deus mozikaha. Ata hiba mytuk mynapykyk. Nokponi byitatu tsipiberikinaha zeka tsmozikaha.

²⁸ Katsa ihumo mysysokehanitsa tsmoziknaha. Ihumo tsmyzitabakanaha. Ihumo tsmyzurukunaha – Pauro niy. – Wastuhu kytsa ahatuk botu ziwatakanaha. Asahi papeu humo ziwatahakanaha. Asahi:

“Katsaktsa Deus hyrytsa atahi nimysukni. Myzubaha Deus hyrytsa maha” nikaranaha.

²⁹ Deus hyrikoso harahare nizukninahaze batu wasani niaha. Deus harahare hyritywabyita, parata hyritywabyita, ouro hyritywabyita. Amy ty kytsa nizukninaha Deus hyritywabyita niy.

³⁰ Tapara kytsa batu sihyrinomyry. Deus sisoho humo tsihyrinomyrëta. Batu isty sininiwyky. Abaka meky watu my. Deus myzubaha pe niy:

“Ahamysapybyitsa tsikykaranaha tsimoewyhiknahaktsa! Iwatahi Deus kytsa simysapybyri humo mysiokzo” niy.

³¹ Deus nawa puruze ziwatawy iwaze myzubatsa ibo tsinamykahabanaha Deus Sesus ziwatawy. Nawa puruze Sesus myzubahatsa soho motsaso. Atahi asaktsa simysapyrëtsa my. Asaktsa batu simysapy maha. Iwa Sesus mysoho motsaso. Deus Sesus ziwatawy iwatahi hawa ty wasani ha humo tsihyrinomyrëta niy. Deus Sesus zihyryzikpowy. Ana humo hi niyze myzubatsa bo Sesus ziwatawy. Sesus nihyryzikosokda kyze Deus zihyryzikpowyze atahi ziwatawy – niy. Iwa Pauro Atenas ezektsa bo Sesus soho nitsasoko.

³² Pauro Sesus hyryzikpowy nitsasokoze ana humo hi kytsa zimyjikanaha. Ustsaktsa mahani. Asahi:

– O aibani katsa mybo tytsasozo – nikaranaha.

³³ Iwaze Pauro sapuwak zuba niy.

³⁴ Wastuhu kytsa Sesus harere bo hyÿ nikaranaha asaktsa iharere humo sispirikporëtsa. Pauro tuk nihapikyrykbahyknaha. Estuba maku Dionisio inarokota, Sesus humo tispirikporëta niyzik. Atahi Aeropako inazuzuknahaze kytsaharerewabytsa. Ustatsa Damaris inarokotatsa Sesus humo tispirikporëtsa niyzik. Utsa niwatihi Sesus harere bo hyÿ nikaranaha ihumo sispirikporëtsa niyziknaha.

18

Pauro Korîtio eze niapykyryk.

¹ Kyze Pauro Atenas ekze inaparak Korîtio bo izumu.

² Anaeze a bo izumu. Atakta Homa ikny inaparak. Taoke tuk inatururuknaha. Atatsa Pisisira inarokotatsa Sudeutsa maha. Pôto eze nipuruknaha. Homa Itaria ekze inatururuknaha. Homa ezektsa pehakatsa Kaudio inarokota ispe niy:

– Sudeutsa ahahudikhudikwy bo tsiksizonaha – niy. Iwatsahi nitururuknaha. Pauro sibo izumu.

³ Akuiro siraratsa hwyk ziwowoko isparik hyrity waha nikara. Pauro niwatihi siraratsa hwyk isparik hyrity waha ziwowoko sihyryzikporëtsa iwaze okyrysaro ty zihuaknaha. Iwaze tahaparik huak humo hi tahadisahawy zibykyryknaha. Pauro Akuiro harape tuk tarabaja ziknakaranaha. Iwatahi Pauro iwahoro eze niapykyryk.

⁴ Sudeutsa byrykywy eze Pauro Sudeutsa wahoro bo inatsuk pororo ziknakara. Anaeze Deus harere Sudeutsa bo ziknapamykysoko. Sudeutsabyitsa kerokotsa bo kino niwatihi nipamykysoko. Sesus Deus zipehata mywata niyzik nisihyrinomyryky. Ana bo hi yhyÿ maha mozihihik.

⁵ Kyze Siras Timoteo iwatsa Pauro bo izumunaha. Sudeutsa bo Deus harere ty nipamykysokonaha. Zikbyituhukutu Pauro Sudeutsa bo zuba nipamykysoko. Sudeutsa bo pykyhytu nitsasoko. Hawa Sesus Deus zipehata mywata niyzik nikara.

⁶ Sudeutsa iharere bo batu hÿ nikaranaha. Zisapybyrikinaha. Iwatahi siekze izoihik. Asaktsa Deus harere humo batu siakparawy iwaze ba ziksitsumuëhÿ. Niytahi tasuk zidydyky. Tasuk zidydykyze isopyk ty ba ziksitsumuëhÿ nisiwatawyky. Ispe niy:

– Utakta ba zahatsumuëhÿzo. Deus harere bo wabyziu ahabyi zeka batu ahatuk zikapykyk. Botu Deus wasania ty ahabo nitsasoko. Abaka Sudeutsabyitsa bo my. Deus wasania ty sibo motsaso. Ahawahoro eze ba ziktsaso – niy. Iwa nikara.

⁷ Kyze Pauro Tisio Sustas wahoro bo niy. Iwahoro Sudeutsa wahoro pauk baze tu niy. Atahi Deus harere bo hyĩ ziknakara. Anaeze Pauro Sudeutsabyitsa bo Deus wasania ty nipamykysoko. Niytahi Sesus soho ty nipamykysokoze Kirispu Sesus harere bo hyĩ nikara ihumo tispirikporēta.

⁸ Tapara atakta Sudeutsa wahoro myhyrizikwanita. Aba Sesus humo tispirikporēta, iwahoro eze ktsa kino niwatihi Sesus humo sispirikporēta. Utsa Korĩtio eze ktsa Deus wasania ty ziwabynahaze Sesus harere bo hyĩ nikaranaha ihumo sispirikporēta. Iwaze nisiharasusuhik.

⁹ Kyze unata Pauro zitsotospykyk. Mypehatsa Sesus ibo izumu ipe niy:

– O apyby byihu ja. Kytsa bo kaharere tytsasotohi. Pykpykbyijaty.

¹⁰ Uta atuk tu my. Ahumo kamypokzitsiukrēta. Batu aty tohi zika-hasapybyriki. Kytsa sizubarētsa tahudikhudikwy eze tu kaharere bo hyĩ mykaranaha kahumo sispirikporēta maha. Katuktsa moziknaha – niy. Iwa Pauro zitsotospykykze mypehatsa ibo nitsaso.

¹¹ Iwatahi Pauro ziknapykyrykspyk. Anaeze petok ziytyktseheze Sesus soho ty kytsa nisihyrinomyryky.

¹² Niahatsahi wastuhu Sudeutsa Pauro harere humo batu siakparawy. Iwaze itsipa humo Karijo bo zioқтыhyryknaha. Karijo Akaija eze ktsa pehatsa niy.

¹³ Ipe niaha:

– Atakta kytsa nisihyrinomyryky. Iwatsahi sizubarētsa Deus harere bo hyĩ mykaranaha. Mysopykbara ty nisihyrinomyryky – iwa mybarapetu nikaranaha.

¹⁴ Pauro nipamykyso tsihikik tatu batu. Karijo Sudeutsa pe niy:

– O Sudeutsa utakta batu waby kasopyk. Homa tsasopyk ty zuba my zeka piwabyziu. Taparaktsa ahadiritsa sopyk humo ka batu waby kasopyk. Utakta kahudikhudikwy eze zuba mypehatsa my.

¹⁵ Hawa ha ty ahasopyk soho ty tsipiwabyziunaha. Ikiatsa zuba anaty hi tsipiwabyziunaha – niy.

¹⁶ Niytahi siharerewabykywy ekze nisiksiwyhik.

¹⁷ Iwatsahi Sosenes nizokbatsinaha. Atahi Sudeutsa wahoro myhyrizikwanita nitsakikinaha. Siharerewabykytsitsa okeryk nitsakikiknaha. Karijo ibo iktsa byita tu nikara.

Pauro Ātiokia bo ziksizo.

¹⁸ Kyze Pauro Korĩtio eze niapykyrykspyk. Aibani Sesus tuktsa nisierekek Korĩtio ekze niparak. Tsaraha puētsikbyita eze tahakokorohyknaha. Sirija bo niparak. Pisisira tabarikta Akuiro situk niukuru. Kēkereja bo zumunahaze, Pauro taharabihik. Taharabihikze sisopyk ty nikara iwa iharere Deus bo nipamykysoko ziwatawyky. Niukuruzonaha. Tsaraha puētsikbyita eze tahakokorohyknaha, niahatsahi Epeso bo zumunaha.

¹⁹ Zumunahaze Pauro nisierekek. Niytahi Sudeutsa wahoro bo nitsuk. Anaeze Deus wasania ty Sesus soho ty nipamykysoko. Kytsa ipe niaha:

²⁰ – O ikia katsa mybaze tytarekta – niaha. Pauro sibo batu hĩ niy.

²¹ Deus pikpehazo zeka myziksizo niy.

Iwaze nisierekek. Niytahi tsaraha puētsikbyita eze takorohyko niy.

²² Epeso ekze niparak Sesareja bo bybybyuzo. Iwaze Serusarēhe bo niukuru anaeze Sesus tuktsa bo niy sihumo tsihyrizikbarēta. Kyze niukuruzo. Ātiokia bo niy. Ātiokia Sirija eze tu niy. Anaeze niapykyrykspyk.

Aporo Epeso eze Deus harere nitsasoko.

²³ Niytahi niukuruzo. Harataba niukuru. Karatas hudikhudikwy bo niukuru. Pirusia hudikhudikwy bo niukuru. Nanabyitaba Sesus tuktsa nisi-hyrinomykyry. Nisitsumuēhĩkĩ sakurētsa niyziknaha. Sesus humo sispirik-porētsa niyziknaha.

²⁴ Estuba maku Epeso bo izumu. Aporo inarokota Sudeu niy. Aresādere eze nipuruk. Deus harere papeu humo tsihyrinomyrēta. Tsihareresapyrēta.

²⁵ Tapara myzubatsa Deus harere humo nisihyrinomyryky. Nitsasokoze kytsa piwabytoktonaha. Deus humo tispirikporēta. Kytsa bo nipamykysoko. Deus harere humo nisihyrinomyry. Tapara hawa Suão kytsa nisiharasusuze ana humo zuba nisihyrinomyryky. Sesus inahyrikpo ana humo hi batu ihyrinomyry. Kytsa Sesus tuktsa humo nisiharasusu ana humo kino batu ihyrinomyry.

²⁶ Sudeutsa wahoro eze nipamykysoko. Kytsa humo batu ipyby iwa nisihyrinomyry. Anaeze Pirusira Akuiro iwatsa ibo ziwabykynaha. Iwatsahi tahawahoro bo zioctyhyryknaha. Anaeze zitsumuēhĩkĩnaha. Sesus soho ty ibo nipamykysokonaha Sesus soho ziwabyze iharere bo hyĩ nikara ihumo tispirikporēta niyzik. Amy ty wasania ty zihyrinomyrykynaha. Iwatahi ihyrinomyryta babata niy.

²⁷ Kyze Aporo Sesus tuktsa pe niy:

– Abaka utakta Akasia bo pomo tsihikik – niy.

– Yhĩ. Tsiyono za – niaha. Niahatsahi papeu humo ziwatahakanaha. Utsa Sesus tuktsa bo ziwatahakanaha. Asahi Akasia eze tu niaha. Asa hi:

– O ikiahatsa Aporo tsiyokzitsikinahaktsa! – ziwatahakanaha. Kyze Aporo Akasia bo zumuze Sesus tuktsa ity zitsumuēhĩkĩnaha. Atahi Sudeutsa bo nitsasoko nisihyrinomyryky.

²⁸ Kytsa siokeryk Sudeutsa bo nipamykysoko. Nipamykysoziuku.

– Hawa haty mytsaty tsimykanaha batu wasani my. Sesus Deus ziphata hi mywata niyzik. Ihumo kytsa simysapybyikitsa ziknakaranaha Deus mysiokzohik – niy.

Iwa sibo nipamykysoko. Amy ty nitsasoko Deus harere papeu humo iwatahaha atsatu nikara. Kytsa iharere bo batu huahua. Iwa Aporo Sesus tuktsa nisitsumuēhĩkĩ. Asahi Akasia eze tu niaha.

19

Pauro Epeso eze Suão tuktsa bo nitsasoko.

¹ Aporo Korĩtio eze tuze Pauro paikpa niukuru. Iwaze Epeso bo zumu. Anaeze wastuhu Sesus tuktsa. Dose ahatsa kytsa nisihibyk.

² Pauro ispe niy:

– Ikiahatsa Sesus harere bo hyĩ tsikahaze Deus hyrikoso ahabo ja mynasik – niy.

– Batu. Deus hyrikoso batu mywabyhuk – nikaranaha.

³ – Hawa ty sa tsikarasusunaha. Amy ty sa ziwatawyhik – niy.

– Hawa Suão kytsa nisiharasusuku atsatu katsa kino nimyharasusuku – nikaranaha.

⁴ – Suão kytsa nisiharasusukuze tahamysapybyi zimoewynaha ana hi ziwatawyky. Kytsa nisiharasusuze nitsasoko. “Atakta bykyze mozumu ihumo ahaspirikporētsaktsa!” nikara. Atahi botu izumu Sesus kino niy – niy. Ana hi ziwabynahaze nisiharasusuhik.

⁵ Nisiharasusukuze:

– Abaka Sesus tuktsa babatsa – niaha. Iwaze Pauro tatsyhyrypetsa ty siharek humo paik niy.

⁶ Tatsyhyrypetsa ty siharek humo paik niyze Deus hyrikoso sibo inasik. Iwatsahi ustsaharere Deus zikwy humo nipamykysokonaha. Deus wasania ty nitsasokonaha ihyrikoso humo. Ihyrikoso situk mynapykyryk.

⁷ Dose Sesus tuktsa niaha.

⁸ Harakykbyihi byzoje zirahaze Pauro Sudeutsa wahoro bo pororo ziknakara. Anaeze Deus tyryktsa soho nitsasoikik. Ipybybyita nitsasoko. Nisihrinymyryky niharapepehaikiknaha.

⁹ Wastuhu iharere bo hŷbyri nikaranaha. Sioktsukanikitsa iwatsahi Sesus humo batu sispirikpo. Sispirikpobyitsa hi sizubarĕtsa okzeka zisapybyrikinaha.

Niytahi Pauro usta wahoro bo nitsuk. Sesus tuktsa ituk usta wahoro bo nipupunaha, anaeze kytsa hyrinymyrykywy bo nipupunaha. Zihitsa Tirano inarokota. Anaeze Pauro zikbyituhukutu Sesus soho nitsasoko.

¹⁰ Petok niytyk tseheze Pauro nisihrinymyryky. Iwatahi myzubaha Sesus soho ziwabykynaha. Sudeutsa, Sudeutsabyitsa kino niwatihi isoho ziwabykynaha. Asia ezektsa sizubarĕtsa isoho ziwabykynaha.

Sewa hyrytsa hyrikoso sapybara nisiksiwykyzykynaha.

¹¹ Niytahi Deus siwatawytsa nikara. Kytsa zikaha bara ty atsatu Deus nikara. Pauro tuk nikara. Deus zikwy Pauro tuk niyze iwaze Pauro siwatawytsa nikara.

¹² Iwatsahi Sesus tuktsa panu Pauro harek humo kyty ziaksenaha. Anahumo hi simyitsapyritsa paik nikaranahaze nizororonaha. Hyrikoso sapybara kino niwatihi nisiksiwybaiknaha.

¹³ Wastuhu Sudeutsa sisukmotsa niukurunahaze hyrikoso sapybara nisiksiwyhiknaha. Sesus naro humo motsasokyzykynaha iwatsahi hyrikoso sapybara mysiksiwyhiknaha. Pauro hi zisopykzu tsihikiknaha. Pauro hyrikoso sapybara pe niyze:

Sesus naro humo nabo pāoty nikara iwa nisiksiwyhik asaktsa iwa motsasokyzykynaha.

¹⁴ Sete kytsa nitsasokonaha. Itukytsa tahazo Sewa inarokota, Sudeu niy. Myhyrizikwanita Deus wahoro eze ziknapamykysokota niy. Iwaze hyrikoso sapybara nisiksiwykyzykynaha ispe nikaranahaze.

¹⁵ Hyrikoso isapybara hi ispe nikara:

— Sesus iny. Pauro kino niwatihi iny. Ikiahatsa ja amakatsa skaraba — ihyrikoso sapybara niy.

¹⁶ Niytahi maku atahi ihyrikoso sapybara izumuikik ihumo tsipaikrĕta niyzik iwatahi tuku niy kytsa bo nisisukbatsi. Iwaze tykbo kytsa inarahana nisikiki. Sisuk zisisykbaik iwaze niwakiknaha. Wahoro ekze sisukbyitsa tu niwakiknaha.

¹⁷ Epeso ezektsa ana hi ziwabynahaze Sudeutsa, Sudeutsabyitsa kino niwatihi sipybyrĕtsa nikaranaha. Myzubaha Sesus soho humo siharereziurĕtsa.

¹⁸ Tapara simyrawykytsa tu abaka batu. Sesus humo sispirikporĕtsa niyziknaha. Imysapybara ty nikaranaha Pauro bo nipamykysokonaha. Hawaha ty taparaka ziknakaranaha ka zimoweybaiknaha. Sesus humo sispirikporĕtsa niyziknaha.

¹⁹ Niahatsahi papeu ty zozozo nikaranaha. Ana papeu humo myrawy ziwatahakanaha zozozo nikaranaha. Iwatsahi papeu hi ziwezobaiknaha. Kytsa sizubarĕtsa sibo iktsa niahaze papeu tsipokzitsiarĕna ty ziwezobaiknaha. Okyrysaro ty sĭkuĕta miu ahatsa parata hi niaha.

²⁰ Iwaze ustsaharere Deus zikwy humo nipamykysokonaha. Deus wasania ty nitsasokonaha ihyrikoso humo. Ihyrikoso situk mynapykyryk.

Epeso eze kytsa nisiaknikinaha.

²¹ Kyze hawa niyze Pauro Serusarēhe bo nizihikik. Tapara Masedonia bo niukuru iwaze Akasia bo inakozore. Deus hyrikoso iwa ty mytsaty niy. Pauro tihi:

– Utakta Serusarēhe bo mynakozore. Aibani zuba Homa bo mozihikik mytsaty mykara – niy.

²²⁻²⁴ Niytahi petoktsa tatsumuēhĩtsa nisipehaka. Masedonia bo taharaze nisipeha Timoteo Erasto iwatsa nisipeha. Paurota Asia eze nitarespyk Deus wasania ty nitsasoko. Nanabyitaba kytsa Deus harere ziwabykynaha. Sizubarētsa Sesus tuktsa niyziknaha.

Kyze niytahi maku Demetirio inarokota. Deus wasania ty batu hỹ niy. Iwatahi Pauro humo takyriki. Atahi Diana wahoro hyrikoso waha nizukni. Kytsa sizubarētsa atsatu nikaranaha. Sinamy hi zihuakaknaha. Kytsa sibo okyrysaro tsizubarēna ty nyny nikaranaha. Epeso Ezektsa Diana humo siakparawy.

– O Diana mydeus tsimy – mybarapetu nikaranaha. Iwatahi Demetirio kytsa sizubarētsa sinamy humo tahakyrikinaha. Atahi tahatuktsa nisibetsakaknaha, nisiaknikinaha.

²⁵ Asahi izumubanaha. Niytahi Demetirio ispe niy:

– O katuktsa katsa mynamyrētsa myhyriziktsokzawy humo tsimykaranaha, katsa Diana wahoro tsibik waha tsipihuaknahaze kytsa okyrysaro tsizubarēna ty mybo nyny nikaranaha.

²⁶ Atakta Pauro nanabyitaba niukuru. Kytsa bo nipamykysoko. Hawa ty ja kytsa nizuknikinaha deusbyitatsatu niy. Deus babata byitatsatu niy. Iwatsahi kytsa sizubarētsa Diana humo batu siakparawy. Diana zimoewybaiknaha. Abaka Epeso Ezektsa Pauro harere bo hỹ nikaranaha.

²⁷ Myhumo batu imysapy. Kytsa Diana pimoewyhiknaha zeka mynamybyitsa tsimoziknaha. Batu okyrysaroko. Kytsa tyso byizeka.

“O Diana wahoro zubata my. Mydeus wahoro zubata” mykaranaha. Niwaze Diana humo batu siakparawy. Myhyrizikwybyitatsa niyzik – niy.

²⁸ Iwatsahi kytsa anahi ziwabykynahaze Pauro humo tahakyrikinaha. Niahatsahi kazi nikaranaha:

– Diana myhyrizikwanitatsa. Atatsa hi mydeus – Opykani kazi nikaranaha.

²⁹ Anatyhi Epeso Ezektsa kazi nikaranaha. Diana mydeus mybarapetu nikaranaha. Ziaknikinaha. Asatu tahabetsakaknaha. Kytsa Kaijo, Aristarakus iwatsa petoktsa makutsa Pauro tuktsa niaha. Masedonia Ezektsa niaha. Kytsa sitsipatsa humo nisioktyhyryknaha. Nisikyrikinaha. Atsoko sizuzukukwy sihezōjena bo nisioktyhyryknaha.

³⁰ Pauro myzubaha bo pomo tsihikik. Batu. Sesus tuktsa batu hỹ niaha.

³¹ Utsa kytsa niwatihi papeu ty Pauro bo ziskyryknaha. Myhyrizikwanitsa Asia eze ipe niaha:

– Siuzuzukwy bo ka pão pãobyity. Katsa mybo ka tysosobyity – nikaranaha.

³² Niahatsahi kytsa kazi nikaranaha. Mekywatu nikaranaha. Sakyrirētsa niapykyryknaha. Paikpa mytsaty nikaranaha. Wastuhu kytsa:

– Hawa ha bo skaraba tsinauzuzukuknaha – nikaranaha.

³³ Sizubarētsa Pauro tuktsa maha. Sudeutsa niwatihi sihumo tahakyrikinaha. Iwatsahi Sudeutsa Aresādere kytsa okze zipedahiknaha. Atatu tabetesa tsihikik. Iwaze tatsyhyrype ty pawyk niy. Iwaha humo hi kytsa pyk ahabyitsa nikaranaha.

³⁴ Maku Sudeu zinyahaze opykani kazi nikaranaha.

– O Diana myhyrizikwatatsa mydeus. Atatsa Epeso ezektsa mydeus my – mybarapetu nikaranaha. Iwa kazi nikaranaha. Diana mydeus zispihik-batakanaha. Aibani niakakapykyknaha opykani duas oras kazi nikaranaha.

³⁵ Niytahi maku kytsa sizubarëtsa tahabyripykpyk zuba niaha. Estuba kytsaharere motsasokota. Ispe niy:

– O Epeso ezektsa wabytaha! Katsaktsa Diana wahoroze nataperyky ana hi kytsa sizubarëtsa sihyrinymyry. Harahare tsibik bijoikpe ikny inasik taperyknaha.

³⁶ Batu aty tohi mype ziky:

“Batu wasani my. Iwatsahi batu kaka tsimaha. Akso byitaha. Mytsatziyu tsimaha” niy.

³⁷ Amy skaraba kytsa tsiknasioktyhyryknaha Diana wahoro namy batu ziaksenaha. Batu sitsyhyryboa. Diana soho ty batu tyso. Batu siharere-wabymybara.

³⁸ Kytsa Diana wahoro hyrikoso tsibik waha nizuknikinahatsa my-taokanikinaha zeka myhyrizikwanitsa bo maha. Pisapybyrikinaha zeka kytsa harerewabytsa bo maha. Bytykareze kytsa ba zikmybetsakaknaha, ana bo zuba kytsa pibetsakaknaha. Kytsa harerewabytsa inazuzukknaha.

³⁹ Inauzuzuknahaze ana humo hi sibo tsimypamykysokonaha zeka wasani my.

⁴⁰ Abaka katsa batu wasani tsimykaranaha. Batu isapy tsimykaranaha. Tozeka ja Homa ezektsa sipehatsa mype maha:

“Tsinazuzuknahaze batu wasani tsimaha. Hawa tsimaha ahabete sa nymyryhybyitsa tsimoziknaha. Iwatsahi tsinauzuzuk tsihikikzonaha batu hÿ ziky”.

Iwa zeka myty sinini mykaranaha mype tysoso byitaha – niy.

⁴¹ Niytahi kytsa pe:

– Nabo pãotaha! – niy.

Yhÿ nikaranaha. Ziksizonaha.

20

Pauro Masedonia Keresia iwaha bo niukuru.

¹ Zipykbaiknahaze Pauro Sesus tuktsa inasikypykykze ispe niy:

– Utakta aba piksi. Masedonia bo mokuru. Sesus humo tyspirikpotohina-haktsa! – niy. Iwazehi inakubaiknaha.

² Kyze Epeso ekze niparak. Niytahi Masedonia bo niukuru. Sizubarëtsa Sesus tuktsa bo inakozore. Pauro harere bo yhÿ nikaranaha. Sesus humo nisispirikpoko. Niytahi Keresia bo zumu.

³ Anaeze harakykbyihi byzoje zitsuze iwaze buburu zuba sak bo nipara tsihikik iwaze Sirija bo niparak. Sudeutsa Pauro pibeze tsihikiknaha. Asa zuba nipamykysokonaha:

– Pauro tsaraha puëtsikbyita eze tu tabezehik – nikaranaha. Pauro ana soho ziwaby. Hawa pibeze tsihikiknaha anahi ziwabyky. Iwatahi buburu zuba bo batu pão tsaraha bo batu koro. Niytahi Pauro hara taba niukuru. Masedonia bo ziksizo.

⁴ Utsa Sesus tuktsa ituk niukurunaha. Sopataro Pihotse atahi Berija eze nipuruk, Aristarakus, Sekũdo niwatihni Tesaronika ezektsa, Kaijo Derebe ezekta, Timoteo, Tikiko, Toropimo Asia ezektsa iwatsa Pauro tuk niukurunaha.

⁵ Asaktsa myharaze niukurunaha. Toroadde zumunahaze nimyperyknaha.

⁶ Iwaze Sudeutsa myikaha sapy bo. Nawa zuruze atsikara ziokoknaha nipykze katsa Toroade bo tsimykurunaha. Mytsyhyrytsa wa zuruze tsikurunahaze Toroade bo zukzuk tsikaha. Anaeze mytukytsa tsikasihobykzonaha. Anaeze nawa zuruze mytsyhyrytsa wa estuba ziharamu tsikapykykspyknaha.

Pauro Sesus tuktsa Toroade bo inakozore.

⁷ Nubaze Sudeutsa byrykywy sizubarëtsa Sesus tuktsa tuk tsikypykyryknaha. Katsaktsa atsikara ty tsitsatsakaknaha iwaze Sesus bo mytsaty tsinakaranaha. Iwaze Pauro nisihrinymyryky. Miwa botu moparak iwatahi nisihrinymyryky. Unopokte nisihrinymyryky yzuzukukwy jobo ipokpedawy niy.

⁸ Anaeze rikatsa tsizubarëna. Zipopokoknaha amypubyri niyzik.

⁹ Mykyryburukta Eutiko inarokota atahi Pauro harere ziwaby. Ihyrizikokwy baze nidyhyky. Iotutsa izumu Pauro nitsasokoze atsoko inaraha. Jo bo ipokpedawy ezektatu inaraha. Iwaze ziwabykynahatsitsa tyk bo inasiknaha. Mykyryburukta bo izumunaha. Botu zumuza iwaze Pauro niwatihi jobo ipokpedawy ikny inasik.

¹⁰ Niytahi Pauro ibo zumu. Ibaze taekaratsa humo puruk puruk niy ziharapyrykik iwaze Sesus tuktsa pe niy:

– Ahasukatsihikbyihu ja mynahyrizikpo – niy.

¹¹ Kyze Pauro jobo ipokpedawy bo nidozo. Atsikara zitsatsakaknaha iwa hawa Sesus mysapyzëky nihyrikosokda mytsaty tsikykaranaha. Tsiokoknahaze Sesus mysapyzëky nihyrikosokda mytsaty tsikykaranaha. Pauro nisihrinymyry nakyokzoze iwaze niparak.

¹² Niytahi mykyryburukta tawahoro bo ziksizo. Sizubarëtsa ihumo sakurëtsa nikaranaha.

Pauro Toroade bo niparak Miretus bo niukuru.

¹³ Pauro mype niy:

– Aba uta mokuru. Asos bo harataba mokuru. Anaeze ikiahatsa tsikperyknaha. Ikiahatsaktsa tsaraha puëtsikbyita eze tsimykurunaha – niy.

Yhÿ tsimykaranaha. Iharaze tsikukurunaha. Tsaraha puëtsikbyita eze kokokorohyk tsikaha. Asos bo tsikukurunaha.

¹⁴ Anaeze Pauro mytuk usta tsaraha puëtsikbyita kokokorohyk tsikaha. Myzubarëtsa Miterene bo tsikukurunaha.

¹⁵ Estuba tsikurunahaze tsikzikdihi bo bybybyu tsikaha. Tsikzikdihi Kois inarokoha. Estuba tsikurunahazoze usta tsikzikdihi bo bybybyu tsikaha. Samo inarokoha. Estuba tsikuruzonahaze Miretus myskeporokwy bo tsikumunaha.

¹⁶ Epeso batu kozore, Pauro Asia eze batu hÿbyri nikara. Aidy Serusarëhe bo pomo tsihikik. Tapara Pëtekoste myikaha Serusarëhe bo pomo tsihikik.

Pauro Sesus tuktsa sispirikpohonahatsa Epeso ezektsa bo nipamykysoko.

¹⁷ Pauro Miretus eze tuze mektatu zipëha. Ipe niy:

– Epeso bokta! Sispirikpohotsa Sesus tuktsa pe tsimy.

“Pany Pauro bo tsinakozorenahaktsa! Miretus bo tsimahaktsa!” tsimy – niy.

Yhÿ niy. Miretus Epeso harape pauk baze tu niy.

¹⁸ Sispirikpohonahatsa Sesus tuktsa zumunahaze Pauro ispe niy:

– O katukytsa, tapara ikiahatsa tuk ikapykyrykspyk. Hawa ikykara naha humo ahahyrinymyrëtsa. Mypehatsa tsyhyryze ihyriziktsokzawy humo ikykaraze hawa kasopyk humo ahahyrinymyrëtsa.

¹⁹ Ikiahatsa baze batu katyso “Utakta myhyrizikwy puhuk byitatu”. Kytsa simysapybyritsa tu nikaranaha ana humo kasukatsihikrēta. Simysapybyitsa nikaranaha ana bo iktsa ikyze batu kaku. Sudeutsa zikbeze tsihikiknaha iwatahi sinini ikykara. Deus harere wasania ty zuba ikpamykysoikik.

²⁰ Amy ty wasani ahabo ikpamykysoko. Ahauzuzukukwy eze ikpamykysoko, ahawahoro eze kino niwatihi ikpamykysoko, Sesus soho sizubarētsa bo ikpamykysoko.

²¹ Sudeutsa, Sudeutsabyitsa bo kino niwatihi ikpamykysoko.

“Ahamysapybyri tsmoewyhiknahaktsa! Deus bo tynapamykysonahaktsa kytsa! Sesus harere bo zuba yh̄y tsimykaranaha ihumo tyspirikponahaktsa kytsa iky.”

Iwa zahahyrinomyryky. Iwa humo hi ahaspirikporētsa tsimoziknaha.

²² Abaka Serusarēhe bo mokuru. Deus hyrikoso humo piksi. Atahi zikpehaka Serusarēhe eze tuze hawa ja kape my batu kahyrinomyry.

²³ Anaeze sinini mykara ana humo hi kahyrinomyrēta. Sakyriukrēnikitsa hurukwy bo pikoroknaha. Pikpawaranaha. Sihudikhudikwytsa bo iknako-zoreze Deus hyrikoso ana humo hi kabo nitsasoko. Iwa Deus hyrikoso kabo nitsasoko. Batu kapyby.

²⁴ Pomoza zeka mahani my. Kahyriziktsokzawy pepykbaka. Ana hi mozihikik. Kahyriziktsokzawy Sesus kabo nyny niy. Anahi pepyk tsihikik h̄y. Sesus kape niy: “Kytsa bokta! Ispe tsimy:

‘Ahamysapybyri tsmoewyhiknahaktsa! Iwaze Deus pahaokzohik Deus harere bo zuba yh̄y tsimykaranahaze Deus ahamysapybyri pahaokzohik’ tsimy” niy. Iwa kape niy. Iwaha hi kahyriziktsokzawy pepyk tsihikik.

²⁵ Tapara ikiahatsa bo hawa Deus tyryktsa tsimoziknaha nitsasoko anatyhi nipamykysoko. Kyzeka ikiahatsa ba ziknyzonaha.

²⁶ Wasani mykara. Aty ahatuk Deus harere bo habyi zeka atahi batu h̄y my.

²⁷ Hawa Sesus humo ahaspirikporētsa tsimoziknaha anasoho iktsasoko. Tsizubarēna ty zuba ikpamykysoko. Deus kape nikara anahi ikpamykysobaik.

²⁸ Pykyhytutaha tsiapybakanaha ja! Sesus tuktsa humo ahamypokzitsiukuktsa niy. Deus hyrikoso zahawatawy. Iwatahi Sesus tuktsa tahapokzitsikinaha. Asahi Sesus tuktsa niaha. Sesus sisapyzeken nihyrikosokda iwatsahi Sesus tuktsa niyziknaha.

²⁹ Myparakze simysapybyikitsa ahabo mozumukunaha. Simyspihikbatanikitsa. Ahape mybarapetu mykaranaha. Sesus harere bo batu h̄y niaha, ihumo batu sispirikpo. Iwatsahi mybarapetu mykaranaha. Parinita hyritywatsa hozipyrykzatsa mysiboronaha wa. Hawa parini hozipyrykza piboro nawa kytsa Sesus humo batu yh̄y niaha iwatsahi ikiahatsa humo kino pahakse tsihikiknaha. Barapetu mykaranaha iwa pahamyi tsihikiknaha.

³⁰ Ikiahatsa tuk mybarapetu tsimykaranaha. Iwaze ustsas Sesus tuktsa metutu anaeze mykaranaha.

³¹ Iwatsahi pykyhytutaha. Tysiperyziukunahaktsa. Harakykbyihi niytyk tseheze zahahyrinomyryky, okoroze unata kino niwatihi Deus wasania ty ikpamykysoikik. Sinini ikykara. Iwa mytsatyziu tsimaha.

³² Deus ahamo tsimypokzitsiukrēta. Deus harere bo hȳy tsimykaranaha, batu ahapyby. Deus harere bo hȳy tsimykaranaha zeka Sesus humo tsimyspirikpotohinaha. Deus kytsa sizubarētsa ityryktsa moziknaha tsipinomyryknaha. Isapy ha ty zuba tsiptaksekenaha. Ikiahatsa niwatihi situk tsimyharapekypyknaha.

³³ Utakta ahatukze batu ahanamy tyhyryk. Ahanamy parata ouro ahaty batu hyryk. Ahasuk ty batu hyryk.

³⁴ Kahyriziktsokzaha ty zuba ikykara. Iwaha hi mynamy inynyhik ikykara. Niwatihi zahawatawy hawa ty sinamybyikitsa bo tysitsumuēhīnaha.

³⁵ Hawa ahatsumuēhīkī iwa ahahyrinymyryky. Tapara mypehatsa tihi: “Kytsa mybo nyny maha zeka wasani my. Katsa hi ustsya kytsa bo nyny tsimaha zeka mykurētsa babatsa tsimoziknaha” niy. Tubabatu Sesus nitsasoko. Iharere bo mytsaty tynakaranaha – niy. Iwa Pauro sispirikpohotsa bo Epeso ezektsa nipamykysoko.

³⁶ Iharere nipykbaze taekaratsa humo puruk puruk niy. Deus bo nipamykysoko.

³⁷⁻³⁸ Iwaze sizubarētsa nipuziukunaha. Pauro niparakze ipokzi nipuziukunaha. Ity ziharapyryknahaze sisukatsihikrētsa nikaranaha. Pauro ispe niyze:

– Ba ziknyzonaha – niy iwatsahi sisukatsihikrētsa niyziknaha. Niahatsahi ituk tsaraha puētsikbyita bo nikurunaha.

21

Pauro Serusarēhe bo niukuru.

¹ Iwaze tsikserikiknaha. Tsikukurunaha. Tsaraha puētsikbyita eze kokorohy tsikaha. Iwaze tsikebanaha. Tsikzikdihi Kos inarokoha tsikumunaha. Petok zuruze tsikukuruzonaha Hodes peske myporokwy bo tsikumunaha. Iwaze usta hudikhudikwy bo Patara inarokoha tsikukurunaha.

² Anaeze usta tsaraha puētsikbyita tsihobyknaha ataeze kokorohy tsikaha. Iwaze Penise bo tsikukurunaha. Tsikzikdihi bo tsikozonaha.

³ Tsikzikdihi Sipire inarokoha. Tsikebakanaha. Iwaze Sirija wataba tsikukurunaha. Iwaze Tiro bo bybybyu tsikaha. Anaeze tsaraha puētsikbyita kytsa namy zizukuknaha sinamy Tiro eze zerekeknaha. Iwa Tiro bo tsikumunaha. Tsiperykynaha.

⁴ Iwaze Sesus tuktsa tsiksihobyknaha. Mytsyhyrytsa wa zurunahaze situk tsikypykyryknaha. Pauro bo Deus hyrikoso humo nitsasokonaha ipe nikaranaha:

– O Serusarēhe bo batu pāo – nikaranaha. Tapara Deus hyrikoso sibo nitsaso hawa ty Pauro bo mykara.

⁵ Mytsyhyrytsa wa zurunahaze tsikukuruzonaha. Sesus tuktsa mytuk pihik sak bo inaskiknaha. Kytsa wytykyryk tahyrytsa tuk iwatsa mytuk nimyra bo izumubanaha. Anaeze myekaratsa humo puruk puruk tsikaha. Deus bo tsikpamykysokonaha.

⁶ Kyze ispe tsikaha:

– Abaka katsa tsipiksinaha – tsikaha.

– Yhỹ. Tsipiksinaha za. Deus ahatuk tu napykyryk. Tsipiksinaha – niaha. Iwaze tsaraha puētsikbyita eze kokorohy tsikaha. Asa hi tahawahoro bo ziksizonaha. Iwa Tiro bo tsikukuruzonaha.

⁷ Tsikukurunaha. Pytoromaida bo tsikumunaha. Anaeze Sesus tuktsa tuk estuba tsikururenaha.

⁸ Byriri tu Sesareja bo tsikumunaha. Piripi wahoro bo tsikpupunaha. Atahi Deus harere wasania ty ziknatsasokota. Tubabatu sete kytsa Serusarēhe eze iwatawyhyta, Piripi situk estuba niy. Iwahoro eze tsikapykyrykspyknaha.

⁹ Ihyryza sizapetok sizapetok aha. Sipyitsabyriza niaha. Deus harere nitsasokonahaza.

¹⁰ Kyze maku Sudeja ikny ta izumu. Deus harere nitsasokota niy. Akabo inarokota.

¹¹ Hawa Deus mykara ibo nitsasokoro. Atahi katsa mybo izumubahaneze Pauro izikwoekaĩwy ziaксе. Iwaze tapyrytsa nisihãihãihik. Tatsyhyrypetsa iwa nisihãihãihik. Izikwoekaĩwy ty nisihãihãiki. Iwaze ispe niy:

– O Deus hyrikoso tihi:

“Aty sa zihitsa izikwoekaĩwy piakwaraka. Atsatu kytsa ibo piakwaraka. Serusarêhe eze tu my Sudeutsa ity pipyrywarakanaha. Sudeutsabyitsa bo pioktyhyryknaha” – niy. Nawa Akabo Pauro bo nitsasoko.

¹² Iharere tsiwabykynahaze Pauro pe tsimaha:

– Serusarêhe bo ka pão pãobyitykta! – tsimytsasoikiknaha. Sesus tuktsa sizubarêtsa atsatu nitsasokonaha. Iksikirize ana humo hi nipuziukunaha.

¹³ Pauro ispe niy:

– Amo skaraba tsimopuziukunaha. Ikihatsa tsipiksuka tsihikiknaha. Pikykwaranaha zeka Serusarêhe eze ana humo batu kapyby. Pikbezenaha zeka Sesus humo wasani my – niy.

¹⁴ Iwa Pauro mytsaty mykara batu hawa tohi zikaha tsikykaranaha. Iwaze pão pãobyity batu tysozo. Ipe tsikaha:

– Deus humo wasani tsimy – tsikykaranaha.

¹⁵ Kyze mynamy tsizozokonahaze Serusarêhe bo tsikukuruzonaha.

¹⁶ Wastuhu Sesus tuktsa Sesareja ezektsa mytuk niukurunaha. Nimyoktykyryknaha Menaso wahoro bo nikaranaha. Atahi tubabatu Sesus tukta nikara. Sipire tsikzikdihi eze nipuruk. Iwahoro eze tsikapykyryksyknaha.

Pauro Tsiaku bo inakozore.

¹⁷ Serusarêhe bo tsikumunahaze Sesus tuktsa myhumo sakurêtsa niyziknaha.

¹⁸ Iwaze byiri tu Tsiaku bo tsinakozorenaha. Sispirikpohotsa Sesus tuktsa Serusarêhe ezektsa anabo hi izumubanaha.

¹⁹ Pauro sibo pykyhytu nipamykysoko. Hawa Deus nikara tahyrizikt-sokzawy humo nipamykysoba. Hawa Sudeutsabyitsa Deus harere bo ziwabynaha ana soho ty hi nipamykysobaik.

²⁰ Ana humo hi ziwabynahaze sizubarêtsa Deus pe niaha:

– O Deus ikia zuba tsamysapyrêta – nikaranaha. Niahatsahi Sesus tuktsa Pauro bo nitsasokonaha:

– O myziky wabyty. Sudeutsa sizubarêtsa Sesus tuktsa niyziknaha. Iwatsatu Moises harere bo yhÿ mykaranaha.

²¹ Sizubarêtsa situk ka: “O Pauro Sudeutsa harere meky watu nisi-hyrinomyryky. Asaktsa Sudeutsabyitsa tahahudikhudikwy ba eze tu zুরুkunaha iharere meky watu nisihyrinomyryky. Iwatahawy tahahyrytsa piak ty zyzykbyitaha nisihyrinomyryky taparaktsa Sudeutsa sisopykwyty batu hÿ nisihyrinomyryky iwatsahi mysopyk zimoewy nikaranaha.” Iwa asoho ziwabynaha.

²² Iwaze hawa sa tsimaha. Sizubarêtsa ikia Serusarêhe bo tsikumu naha humo botu ziwabybanaha.

²³ Iwa tsimy. Tykareze tu kytsa sapetoktsa sapetoktsa niaha. Deus bo tahaharere ty nyny niaha. Iwatsahi asaktsa atuk tysioktyhyk. Amy ty wasani Sudeutsa sopyk wy humo ikia tsimykara.

²⁴ Kytsa situk tsimy. Kytsa tahaharabikinaha. Myraratsa ty Deus bo nyny mykaranaha. Sibo okyrysaro ty nyny tsimy zeka tsipisapyky mytsaty tsimaha. Okyrysaro ty nyny tsimy zeka tsiharabinaktsa. Anaty hi tsimyzeka Sudeutsa sihyrinomyrêtsa. Iki Moises harere bo yhÿ tsimykara ana humo hi sihyrinomyrêtsa.

²⁵ Sudeutsabyitsa bo botu tsiktsasokonaha. Sibo botu tsikwatahakanaha. Sesus tuktsa bo tsiwatahakanaha hi:

“Ahazoho botu Deusbyitsa tu okeryk nyny niy zeka hauk hauk byitaha. Kytsa ustsā okeza bo ka ba ziaksenaha. Taoke zuba tyzibykyhyky. Wytykyryk kino niwatihi usta maku bo iktsa zuba tynakaranaha. Ahazoho spu ty ka tsō tsō byitaha. Siraratsa tsmysisoikpyryrykpyryryknaha zeka hauk hauk byitaha. Iwa sibo tsiwatahakanaha. Ustsā sopyk ty zuba batu hỹ mykaranaha zeka wasani maha” – niaha. Iwa myhyrizikwanitsa Pauro bo nitsasokonaha.

Yhỹ niy.

²⁶ Niytahi Pauro atsatyty nikara. Iwaze estuba zuruze kytsa tuk Deus wahoro zubata bo niy. Ziknapamykysokota niyze wasani my. Pauro Deus wahoro zubata isturupeze bo nitsuk. Kytsa tuk nipupunahaze ziknapamykysokonahatsa bo nikaranaha. Siraratsa nisibanahaze ziknapamykysokonahatsa bo nitsasokonaha. Siraratsa ty Deus bo nyny niaha. Pauro hi siraratsa ty kytsa tsyhyryze nyny niy. Mytsyhyrytsa wa puruze sete ziharamuze siraratsa ty Deus bo nyny niaha. Anaty hi ziknapamykysokonahatsa bo nitsasokonaha.

Kytsa Pauro Deus wahoro zubata isturupeze itsipa humo zioқтыhyryknaha.

²⁷ Pauro Deus wahoro zubata bo nitsuk. Mytsyhyrytsa wa zurunahaze asiba nepykze Sudeutsa kytsa nisiaknikinaha. Tapara Pauro Deus wahoro zubata isturupeze ibo iktsa nikaranaha iwatsahi nisiaknikinaha. Kytsa ihumo tahakrykinaha. Iwatsahi Pauro nizokbatsinaha.

²⁸ Tahaksoho ty opykani kazi nikaranaha. Asahi:

– Sudeutsa aidytsa tymytsumuēhīnahaktsa. Atakta tyzokbatsinahaktsa! Nanabyitaba kytsa ziknasyhyrinymyryky hawa isapybara ty ziknasyhyrinymyryky. Atahi kytsa pe:

“Sudeutsa batu simysapy maha. Moises harere bo batu hỹ zikaha. Deus wahoro zubata humo batu iktsa zuba zikaha Sudeutsabyitsa Deus wahoro zubata bo nisioktyhyryk” – nikaranaha. Iwa Sudeutsa Pauro soho mybarapetu nikaranaha. Asahi Asia ikny niaha.

²⁹ Ana hi nitsasokonaha Teropemo humo niy. Teropemo Epeso ezekta niy. Serusarēhe eze Pauro tuk niukuru. Sudeutsa zinyndaha. Pauro Teropemo Deus wahoro zubata bo zioқтыhyryk mytsaty ahabyitsa nikaranaha.

³⁰ Iwatsahi kytsa sizubarētsa aidy inauzuzukuknaha. Niharapehudizukunaha Pauro tsipa humo zioқтыhyryknaha. Deus wahoro zubata isturupeze zikyrikinaha. Aidy hokbowytsa nisihyrizikpyryrykbaiknaha.

³¹ Zibeze tsihikiknaha zetu. Iwaze sodadutsa pehatsa isoho ziwaby amakata ipe niy:

– O kytsa sizubarētsa myzokyrykynaha. Maku pibeze tsihikiknaha – niy.

³² Iwatahi sodadutsa pehatsa atsoko niparak. Sodadutsa sizubarētsa nisioktyhyryk Pauro bo izumunaha. Sodadutsa izumunahaze kytsa Pauro nitsakikinahatsa pyk niaha.

³³ Sipehatsa sodadutsa pe niy:

– O pany tyzioқтыhyknahaktsa niy. Iwatahi kytsa batu tybeze. Karikutsitsiwytsa petoktsa tsiakwaranahaktsa! tsimaha – niy.

Iwaze kytsa pe niy:

– Aty skaraba niy. Hawa sa nikara – niy.

³⁴ Niahatsahi sizubarētsa kazi nikaranaha. Wastuhu kytsa kazi nikaranaha. Ustsā meky watu kazi nikaranaha. Sakyrirētsa niapykyryknaha.

Iwatahi sodadutsa pehatsa batu ihyrinymyry. Hawa hatsa kytsa Pauro nitsakikinaha batu ihyrinymyry. Iwatahi sodadutsa pe niy:

– Mywahoro bo tsioktyhyryknaha – niy. Iwaze sodadutsa tahawahoro bo ziooktyhyryknaha.

³⁵ Siwahoro bo izumubahaninahaze zibykyryknaha. Tazukurukwy bo zebykyryknaha. Sizubarëtsa humo tahapepyry bete zebykyryknaha.

³⁶ Kytsa tahakyrikinaha siapik niukurunaha. Tahakyrikinaha babatu.
– Tabezehikta tabezehikta! nikaranaha.

Pauro atatu tabetesaka.

³⁷ Sodadutsa wahoro bo asiba napupunahaze Pauro sipehatsa pe niy. Kereko harere ty nipamykysoko:

– Utakta ikia bo mopamykysoko zeka wasani my – niy. Sipehatsa ipe niy:
– Ikia Kereko harere humo tsahyrinymyrëta sa.

³⁸ Ikia sa atakta maku Esito iknykta niy. Amakata kytsa nihapikypykyknaha iwatsahi Homa ezektsa nisisukyryknaha. Amakata kwatero miutsa kytsa ipehakatsa ja nikara. Asahi kytsa nasibakanahatsa. Jerukbara eze niapykyryknaha. Tozeka ja ikia hi ja – niy.

³⁹ – Batu. Atabyita tu. Utakta Sudeu, Sirisia iknyta. Taraso eze ikpurukta, Taraso puëtsikbara. Uta myzubaha bo mopamykyso zeka yhÿ tsimy – niy.

⁴⁰ – Yhÿ typamykysokta – niy. Pauro sodadutsa wahoro tahazukurukwy bete niriktohoko. Tatsyhyrype tyhi pawyk niy. Iwaze nipykbaiknaha. Pykyk zuba niaha. Eberaiko harere ispe niy:

22

¹ – O katukytsa myzotsa iwatsa kaharere bo wabytaha! Utakta wasani mykara iwatahi pikbetesaka – niy.

² Sudeutsa tihi:

– O myharere motsasoko – nikaranaha. Tahabyri ziwabyknaha.

³ Iwaze Pauro nitsasokozo:

– Utakta Sudeu. Sirisia iknyta. Taraso eze ikpuruk. Jabasize Serusarëhe eze iknapykyk. Anaeze Kamarieu kahyrinymyrytsa niy, zikspirikpoko. Moises harere ty zikyrinymyryky. Taparaktsa myzotsa harere ty inymyryky. Deus Moises zihyrinymyryky ana humo hi uta kino inymyry tsihikik. Iwa ikykara. Aba ikiahatsa kino niwatihi atsatu tsimykaranaha.

⁴ Iwatahi Sesus tuktsa humo ikykyriki. Iksisukyryky. Kytsa wytykyryk iwatsa sakyriukrënikitsa hurukwy bo iksiooktykyryk. Ziknasiba tsihikik.

⁵ Iwaze taparakta ziknapamykysokonahatsa kytsaharerewabytsitsa iwatsa hawa sisopykwy humo zikzururuku sihyrinymyrëtsa. Asahi papeu ty Sudeutsa tsyhyryze kabo nyny niaha. Iwaze Sudeutsa Damasko ezektsa kasoho humo sihyrinymyrëtsa. Sesus tuktsa mysimyija tsihikik iwaze Damasko bo niukuru. Sesus tuktsa mysioktyk tsihikik sakyriukanikitsa hurukwy bo mysioktyhyk. Karikutsitsiwytsa ty mysiakwaraka. Iwatahi Damasko bo niukuru.

Pauro Sesus tukta niyzik naha soho nitsasoko.

⁶ – Ske buruk ikukuruze Damasko bo. Ikumukuze tokbaha nayzikze ske buruk haramwe hyrity waha iny. Atsoko haramwe hyrity waha bijoikpe ikny kabo inasik. Iwaze wytyk bo iknaraha.

⁷ Niytahi myksoho waha iwaby. Kape niy:

“Sauro amy humo sa ikia tsipiksukyryky” niy.

⁸ “O kapehatsa aty skaraba tsimykara” iky.

“Utakta Sesus. Nasare ezekta mykara. Ikia tsipiksukyryky” nikara.

⁹ Asaktsa katuktsa nipybybaiknaha. Haramwe hyrity waha bo iktsa niaha. Sesus harere ty batu waby.

¹⁰ “O kapehatsa hawa sa my” iky.

“O kyiktykta Damasko bokta! Anaeze maku ikia bo hawa tsimy abo motsaso. Hawa uta mozihikik, ana kino abo motsaso.”

¹¹ Kyze haramwe jekyrikoso humo ikyrizikubyri. Iwaze katuktsa ikyrizikubyrira humo zikoktyhyryknaha. Iwa Damasko bo tsikumunaha.

¹² Niytahi Ananias inarokota kabo zumu. Sudeutsa sopyk ty ziknakara. Tsimysapyrēta. Sudeutsa tihi:

“O atakta wasani mykara” mytsaty nikaranaha. Kabo ezekebaka.

¹³ Kabaze niriktohoko. Kape niy:

“O kaziky iktsazoty” niy.

Atsoko iktsazo iky. Ibo ikozo. Kakurēta Ananias kape niy:

¹⁴ “Tubabatu Deus zawatawy. Myzotsa ihumo sispirikporētsa atahi zawatawy. Iwatahi iharere ty tsinymyry ana humo hi zawatawy. Ikia Sesus bo iktsa tsiky. Atahi imysapyrēnikita my. Abaka Sesus bo iktsa tsiky, iharere tsiwaby. Ikia hi iharere baba tsiwaby. Deus harere sohokota tsimozik ana humo hi zawatawy niy.

¹⁵ Taharere kytsa sizubarētsa bo tsimypamykysoko. Amy bo skaraba iktsa tsiky, kytsa bo tsimypamykysoko. Amy ty skaraba tsiwaby kytsa bo tsimytsasoko.” Iwa Ananias kape niyzo.

¹⁶ “Amy humo sa batu aidy ziky. Kyikty. Paharasusuhik mypehatsa pe tsimy. ‘O ikia utakta atukta babata mozihikik tsimy’ niy.”

Iwaze Deus amysapybyikia ty tsiky kara naha humo paokzohik. Iwa Ananias kino kabo nitsasoko.

Deus Pauro ziwatawy iwatahi Sudeutsabyitsa Deus wasania ty piwaby-naha.

¹⁷ – Serusarēhe bo tsikziksizonaha. Deus wahoro zubata bo iktsukze Deus bo ikpamykysoko atsoko katsotyspykwaha iny.

¹⁸ Mypehatsa iny. Niytahi kape niy:

“Aidy Serusarēhe ikny pāoty. Asahi aharere bo batu hỹ mykaranaha. Hawa kasoho ty tsimytsaso batu hỹ mykaranaha” niy.

¹⁹ Uta ipe iky:

“O kapehatsa kytsa sizubarētsa piknynaha. Nanabyitaba Sudeutsa wahoro bo ziknatsukuk, iwatahi Sesus tuktsa sakyriukanikitsa hurukwy bo ikioktykyryk. Serusarēhe ezektsa ana humo hi zinymyrynaha.

²⁰ Nihyrikosokdata Estewā asohokotsa niy. Kytsa kaokze tu zibezenhaze tsahi wasani ikykara. Estewā zibezenhaze kytsa suk iperyky. Ana hi sizubarētsa sihyrinymyrētsa” iky.

²¹ Kapehatsa kape niy:

“Tsiksikta! Nokponi. Sudeutsabyitsa bo papehaka” niy. Iwa mypehakatsa kape niy. – Iwa Pauro sizubarētsa bo nipamykysoko.

²² Kyze Pauro nitsasokoze Deus Sudeutsabyitsa bo zipeha tsihikik ana humo hi kytsa batu hỹ niaha. Opykani kazi nikaranaha.

– Atakta tabezehikta. Ispitu zeka batu wasani my – nikaranaha.

²³ Opykani kazi nikaranaha. Tahasuk ka zizyzykynaha. Tahakyrikinaha tsahi tahasuk zizyzykynaha. Wytyktazy jobo zipaparakanaha tahasopyk ty tahakyrikinaha ziwatawykynaha.

²⁴ Iwaze ipehakatsa sodadutsa nisipehaka.

– Mywahoro boktsa! Nabo Pauro tsioktyhyryknaha! Nabo tytsakinaha! Myraratsa hwyk ty tsizezerēna tuk tytsakinaha – niy. Hawa ha humo skaraba kytsa sizubarētsa kazi mykaranaha ana hi piwaby tsihikik.

²⁵ Iwaze sodadutsa zitsipatsawarahiknaha, zipyrytsawarahiknaha. Niytahi Pauro perytsa pe niy:

– Utakta Homa ezekta. Homa ezekta mytsakiki ja Ana humo hi mysopyk ja – niy.

Kytsaharerewabytsitsa kaharere batu siwabyhy. Hawa ikykara batu sihyrinomyry. Sihyrinomyrybyitsa katy kiki byitaha.

²⁶ Iwaze sodadutsa perykytsa ipehatsa bo niy. Hawa Pauro nitsasoko atsatu nipamykysoko:

– Atakta atahumo ka awatutaha! Homa ezekta mypehakatsa – niy.

²⁷ Sodadutsa pehakatsa kino Pauro bo zumu. Ipe niy:

– Wasani tsimykara, ikia mypehakatsa Homa ezekta sa – niy.

Yh̄y niy.

²⁸ – Uta kino niwatihi niy. Okyrysaro tsizubarēna ty nyny iky. Iwatahi ispehakatsa Homa ezekta ikyzik – niy.

Pauro:

– Uta kazo humo Homa pehakatsa ezekta my – niy.

²⁹ Atsoko sodadutsa zikykwakanaha nisiharerepyk. Sodadutsa pehakatsa kino niwatihi tsipybyrēta. Pauro Homa ezekta ispehakatsa ezekta humo tsipybyrēta. Tapara atahi sodadutsa pe:

– Tytsakinahaktsa – nikara iwatahi tsipybyrēta. Iwaze sizubarētsa niokanibyrikinaha. Sipybyrētsa nikaranaha.

Pauro kytsaharerewabytsitsa bo zumu.

³⁰ Kyze sodadutsa isipehakatsa. Amy humo sa Sudeutsa Pauro soho zisapybyrikinaha ana hi piwabytsihikik. Iwaze estuba zuruze kytsa nisipehaka.

– Karikutsitsitsa ty satsuktaha – niy. Iwaze Sudeutsa simyhyrizikwanitsa tynazuzuknaha. Taparaktsa ziknapamykysokonahatsa, kytsaharerewabytsitsa iwatsa tynazuzuknaha. Inazuzukbanahaze sodadutsa pe niy:

– Pauro mybo tyzioktyhyryknaha – niy.

23

¹ Kyze Pauro izumukuze kytsaharerewabytsitsa bo iktsaziu niy. Ispe niy: – O katukytsa mysopyk tisapyrēna my ana humo kino yh̄y ikykara. Wasani ikykara ana humo hi Deus tsihyrinomyrēta – niy.

² Taparakta ziknapamykysokota ana hi ziwabyze tsakyrirēta niyzik. Taparakta Ananias inarokota. Asaktsa Pauro baze tu ispe niy:

– Tsisakipykikta – niy.

³ Pauro ipe niy:

– Deus ikiahi bo atsatu my. Ikia myziharawataha naha hyrity wata. “O katsaktsa wasani tsimykanaha” mybarapetu tsimykara. Anaeze tsimydyhyky iwatahi kaharere tsipiwaby. Taparakta myzotsa mybo nitsasokonaha iwa kaharere tsipiwaby. Hawa mysopyk zeka nitsasoko atsatu tsimy. Ikia hi tsiksakipykik niwa batu mysopyk – niy.

⁴ Aty Pauro pe niy:

– Ikia taparakta ziknapamykysokonahatsa ituk tsimysapybyriki atahi Deus tsumuēh̄tsa – niy.

⁵ – O katukytsa atakta taparakta ziknapamykysokonahatsa batu kahyrinomyry. Ana humo hi zihyrinomyryky zeka iwa batu tyso. Deus papeu humo botu ziwataha: “Katyryktsa taparakta bo ka isty myija myija byitaha” niy. Iwa Deus papeu humo ziwataha – niy.

⁶⁻⁸ Iwaze Pauro mytsaty niyze wastuhu kytsaharerewabytsitsa Pariseutsa niaha. Utsa kytsa Sadusitsa mektsa tu niaha. Pariseutsa tihi:

– Tsimyhyrikosokdanahaze tsinahyrikonaha. Asa hyrikosotsa hi, Deus bijoikpe iknyktsa iwatsa sisoho sihyrinomyrētsa Sadusitsa batu. Asahi:

“Tsimyhyrikosokdanahaze batu myhyrizikpozo. Hyrikosotsa Deus bi-joikpe iknyktsa iwatsa mahani ba.” Kytsaharerewabytsitsa meky watu iwatsahi metutu nikaranaha – Iwaze Pauro kytsa bo iksaziu niy. Niytahi opykani nitsasoko:

– O katukytsa utakta Pariseu my. Kazo kino niwatihi Pariseu niy. Aba kaharere tsipiwabynaha. Tsimyhyrikosokdanaha zeka Deus mymyhyrizikpowyzo ana humo hi kahyrinymyrêta. Iwatahi ikiahatsa kaharere tsipiwabynaha – niy. Iwa nitsasoko.

⁹ Myzubaha metutu nikaranaha. Pauro harere ziwabykynahaze ni-harapepehakanaha metutu nikaranaha. Paikpa nikaranaha. Wastuhu Pariseutsa opykani nitsasokonaha. Sudeutsa sopyk humo sihyrinymyrêtsa. Asahi:

– O atahi wasani my, ibo tsipisapykynaha. Tozeka ja hyrikoso tisapyrêta ibo nitsasoko. Tozeka ja Deus bijoikpe iknykta ibo nitsasoko – nikaranaha.

¹⁰ Kytsaharerewabytsitsa puêtsik niharapebetsakaknaha. Niharapehudizukunaha. Iwatsahi Pauro pibeze tsihikiknaha. Iwaze sodadutsa pehatsa tapetu isopyk:

– O asaktsa Pauro pibeze tsihikiknaha mytsaty mykara. Pauro pokso kapybyrêta – my. Iwatahi sodadutsa nisipehaka:

– Pauro mywahoro bo tsioktyhyryknahaktsa! – niy.

Yhÿ niaha.

¹¹ Kyze unata eze Sesus Pauro bo natakaha, ibaze niriktohoko. Ipe niy:

– Apyby byihu ja niy. Ikia kasoho Serusarêhe eze tsimytsasoko. Aibani kasoho Homa bo tsimytsaso niwatihi – niy.

Kytsa Pauro pibezekyzykynaha.

¹² Miwa botu wastuhu Sudeutsa inauzuzukuknaha.

– Pauro tabezehikta kytsa! Tybeze ahabyi zeka ba hauk zikaha, ba tsõ zikaha nikaranaha. Tybeze ahabyi zeka Deus mymyitsapyriwy zeka wasani tsimaha – nikaranaha. Deus siharere ziwaby ana humo sihyrinymyrêtsa.

¹³ Kytsa sizubarêtsa kuarêta ahatsa Pauro pibeze tsihikiknaha.

¹⁴ Asa zuba nipamykysokonahaze taparakta ziknapamykysokonahatsa bo niaha. Kytsa pehatsa bo kino niwatihi niaha. Hawa sa nikaranaha sibo nipamykysokonaha. Katsa tihi:

– Deus myharere ziwaby tsiktsasokonahaze Pauro tybeze ahabyi zeka ba hauk tsimaha. Ba tsõ tsimaha tsimykaranaha. Abaka tymytsumuêhînahaha.

¹⁵ Ikiahatsa kytsaharerewabytsitsa hi sodadutsa pehatsa bo tsimaha. “Pauro mybo tyzipehakta! tsimaha. Iharere tsipiwabyzonaha. Iharere tsipiwabytoktonaha.” tsimaha. Yhÿ my zeka iwaze ahabo nataoktyze tsipibezena. Ske sak eze tsimyparahanaha iwa tabeze – Iwa kytsa Pauro pibeze tsihikiknaha asahi taparaktsa bo nitsasokonaha.

¹⁶ Iwaze mykyryburukta siharere ziwaby. Atahi Pauro izawytse. Hawa kytsa Pauro piparahakanaha iwaze hi tabeze anahi ziwaby. Iwaze sodadutsa wahoro bo nitsuk. Tazopo bo nitsasobaik.

¹⁷ Iwatahi Pauro sodadutsa perykytsa bo hua hua niy.

– Ta mykyryburukta sodadu pehatsa bo tyzioktyhyk. Atakta ibo motsaso tsihikik – niy.

¹⁸ Iwaze mykyryburukta ziockyhyryk. Isperykytsa:

– Atakta Pauro kabo hua hua niy. “Mykyryburukta sodadu pehatsa tsioktyhyrykta. Tsasoho humo piwaby” niy. Iwaze mykyryburukta ziockyhyryk. Isoho abo motsaso tsihikik – niy.

¹⁹ Sodadu pehatsa Karadio Risias inarokota. Atahi mykyryburukta tsyhyrype humo paik niy. Kytsa batu waby zikaha bara botu zioқтыhyryk:

– Amy sa kabo tsimytsaso – niy.

²⁰ Mykyryburukta ipe niy:

– Sudeutsa asa zuba nipamykysokonaha. Byriri ikia pe maha: “O Pauro mybo tyzipehakta! Iharere tawaby tsihikik” mybarapetu mykaranaha.

²¹ Siharere bo ba hỹ tsimy. Kuarēta kytsa ske sak eze Pauro piuparakana-hatsa pibezenaha. Kytsa tihi: “Pauro tybeze ahabyi zeka Deus mybo mymy-itsapyriwy. Katsa tybeze ahabyi zeka katsa ba hauk zikaha. Ba tsō zikaha” nikaranaha. Iwa Deus bo botu nitsasokonaha. Abahi aharere piwaby tsihikinaha. Aharere zuba piperykynaha. Ikia sibo yhỹ tsimy zeka Pauro myzioktyhyryknaha anahi mozihikiknaha – iwa mykyryburukta Homa pehatsa bo nitsasoko.

²² Niytahi ispehatsa ipe niy:

– Hawa ty kabo tsiktsasoko batu aty tohi bo tytsaso – niy. Niytahi mykyryburukta tawahoro bo ziksizo.

Pauro usta ispehatsa Peris inarokota bo niy.

²³ Kyze ispehatsa Homa Ezektsa sodadutsa perykytsa petoktsa bo huahua niy:

– Aidytsa dusētos sodadutsa tsikahazoziknahaktsa, Sesareja boktsa. Ponokaraze tsimytururuknaha. Setēta pikuzatsa bete mokurunahatsa. Dusētos sodadutsa tanoratsa tuktsa niy.

²⁴ Pikuzatsa ty Pauro bo tysizoziknaha. Pykyhytuty Peris ispehatsa sihudikhudikwy bo tsioktynaha – niy.

²⁵ Kyze niytahi sodadu pehatsa papeu humo ziwatahaka. Peris pehatsa bo ziwatahaka.

²⁶ Atahi:

– Peris ikia hi myhudikhudikwy pehatsa my. Karadio Risias kanarokota. Ikia aspirikporēta pinymyryky.

²⁷ Estuba maku ikia bo zipeha sodadutsa pioktykyrynaha. “Sudeutsa nizokbatsinaha. Pibeze tsihikiknaha. Atahi Homa hudikhudikwy Ezekta. Anaty hi zinymyrykyze sodadutsa ikcipeha tyzioktyhyknaha. Amo Sudeutsa pibeze tsihikiknaha batu kanyhy.

²⁸ Iwatahi Sudeutsa kytsaharerewabytsitsa bo zioқтыhyryk. ‘O atakta mysopykwy batu hỹ ziky nikaranaha. Hawa myzotsa nitsasokonaha batu hỹ ziky’ niaha.

²⁹ Atahi batu amy tohi ziknakara Sudeutsa sopykwy humo batu hỹ ziky. Utakta sakyriukrēnikitsa hurukwy bo my zeka batu wasani mykara. Kytsa tybeze habyzeka batu sapy my.

³⁰ Sudeutsa pibeze tsihikiknaha. Anahi ziwabyze abo ipeha. Siharere-wabymybarētsa ispe iky:

‘Utakta Pauro Peris bo ipeha. Anabo zuba Pauro soho tsipispihik-batakanaha Peris pehatsa ahaharere piwabyky’ iky.” Iwa papeu humo ziwatahaka – iwa my.

Kaudio Risias

Iwaze papeu ty sodadutsa bo nyny niy. Iwaha tyhi Peris bo nyny niaha.

³¹ Niahatsahi sodadutsa Pauro Sesareja bo zioқтыkyryknaha. Hawa sodadu pehatsa nitsasoko atsatu nikaranaha. Unata niukurunaha. Miwa eze Anitipatiride zumunaha. Anaeze ka sodadutsa batu pikuzatsa byitsaktsa, Serusarēhe bo ziksizonaha.

³² Niahatsahi kytsa asaktsa pikuzatsa bete niukurunahatsa. Sesareja bo izumunaha. Ispehatsa Peris bo izumunaha

- ³³ Karadio Risias papeu ty Peris bo nyny niaha. Ipe niaha:
 – Atakta Pauro my. Abaka atuk mopykyryk – niaha.
- ³⁴ Peris papeu iwatahaha zinyky. Niytahi Pauro pe niy:
 – Hana ikny ta sa tsimy – niy.
 – Sirisia iknykta – niy.
- ³⁵ – Siharerewabymybaranikitsa mozumunahaze pawaby. Hawa tsiky kara piwaby – niy. Niytahi sodadutsa ispe niy:
 – Erodes wahoro bo tsioktyhyryknaha – niy.
 Yh̄y. Ata wahoro ispehatsa kytsaharere bo ziwabyky. Anaeze Pauro niapykyryk.

24

Peris okeryk Sudeutsa Pauro harere soho pispihikbatakanaha.

¹ Kyze mytsyhyry wa zuruze taparakta ziknapamykysokota. Ananias inarokota niy. Peris kytsa pehatsa bo zumu. Sesareja bo niy. Myhyrizikwanitsa Sudeutsa ituk zumunaha. Usta maku Tereturo inarokota ituk zumu. Atahi Homa sopykwy humo zinymyryziuku iwatahi izumu. Pauro bo nitsaso tsihikik iwatahi izumu. Peris bo izumunaha. Niytahi Pauro sibo ziooktyhyryk.

² Iwaze Peris Tereturo pe niy:

– Aba tsimytsasokokta! – niy. Tereturo tihi:

– O Peris ikia hi myhudikhudikwy pehatsa. Ikia amyhyrizikwanikita. Mytsyhyryze tsipisapywyky. Ahumo mykurētsa tsimaha. Ahyrinymyrēta mytsyhyryze tsipisapywyky.

³ Abaka ahumo batu zasukyryzo. Iwatsahi mykurētsa tsimykaranaha. Ikia humo myspirikporētsa tsimoziknaha.

⁴ Kaharere tsikaeni zuba motsaso. Iwatahi tsiwabyziukukta!

⁵ Atakta maku zibytuhukutu kytsa nisiakniki. Paikpa zumukuze kytsa nisiakniki. Mekywatu Sudeutsa nisihyrinymyryky. Myhyrizikwanita Sesus tuktsa tuk niy. Sesus Nasare ezekta niy. Asahi Sesus harere bo hȳy mykaranaha tsahi ihumo sispirikporētsa.

⁶ Pauro Deus wahoro zubata bo batu iktsa zuba ziky Sudeutsabyitsa mysiokty tsihikik. Iwatsahi kytsa nizokbatsinaha. Tsiwaby tsihikiknaha mysopyk humo tsipiwaby tsihikiknaha zeka wasani my.

⁷ Iwa batu zikaha sodadu pehatsa Karadio Risias inarokota Pauro bo zumu. Iwaze sodadutsa nizokbatsinaha zikyrikinaha. Sipaikanikitsa ziooktyhyryknaha. Sodadu pehatsa mype niy:

“Ikiahatsa Peris pehatsa boktsa! Anaeze Pauro soho ahamysapybyi tytsasonaha” niy.

⁸ Ikia kino Pauro bo tsimypamykysoko zeka atahi atsatu motsaso iwaze ja ahyrinymyrēta – niy. Iwa Tereturo Pauro soho Peris bo zispihikbataka.

⁹ Iwaze Sudeutsa Tereturo tuktsa yh̄y nikaranaha, hawa ha nitsaso wasani my nikaranaha.

Pauro atatu tabetesaka.

¹⁰ Peris tatsyhyrype ty pawyk niyze Pauro atatu itabetesaka atahi:

– Tubabatu ikia myharerewabykytsa iwatahi kakurēta. Aokeryk kasoho tabetesawy humo kakurēta.

¹¹ Botua dose zuruze Serusarēhe bo ikzumu. “O Deus ikia hi tsamysapyrēta my” iky iwatahi ikzumu. Wasape my ana humo hi ahyrinymyrēta.

¹² Batu aty tohi bo mysopyk soho batu mytuk peha. Deus wahoro zubata eze batu kytsa ty istykni. Deus wahoro eze niwatihi batu kytsa ty istykni. Serusarêhe ezektsa niwatihi batu kytsa ty istykni.

¹³ Sudeutsa batu katyny. Iwatsahi siharere kasoho batu wasani my. Deus humo kaspirikporêta. Myzotsa ihumo sispirikporêtsa.

¹⁴ Deus wasania ty ezytyk humo kaspirikporêta. Sudeutsa wasania ty ezytyk batu yh̄ niaha ana hi wasanibaba humo kahyrinymyrêta. Anatyhi Deus sohokotsa botu ziwatahakanaha hi yh̄ ikykara. Moises tasopyk ty mybo nyny niy ana humo hi yh̄ ikykara. Mywatu tsimyhyrikosokdanahaze tsimynahyrizikponaha.

¹⁵ Simysapybyikitsa mynahyrizikponaha. Simysapyrêtsa kino niwatihi mynahyrizikponaha. Sudeutsa sizubarêtsa anasoho humo hi yh̄ nikaranaha.

¹⁶ Iwa yh̄ ikykara pisapywy tsihikik. Hawa haty zikzuruku ana hi Deus zinyba. Kytsa niwatihi sihyrinymyrêtsa niy.

¹⁷ Tubabatu utakta mekybotu ikukuru. Niytahi kahudikhudikwy bo ikzik-sizo. Botua ikziksizeze, iwaze okyrysaro ty Sudeutsa sinamybyitsa bo nyny iky. Siraratsa Deus bo iksibaka nyny iky. Iwa Serusarêhe bo ikziksizeze. Tapara ziknapamykysokota Deus wahoro zubata eze kabo yh̄ nikara.

¹⁸ Iwaze Deus wahoro zubata bo iknatsuk. Niahatsahi wastuhu Sudeutsa, Deus wahoro zubata isturupeze ziknynaha. Asahi Asia iknyktsa nikaranaha. Mysopyk ty ikyze ziknynaha. Batu sizuba katuk niaha. Kytsa ty batu istykni.

¹⁹ Asahi ziknynaha Asia ezektsa nikaranaha. Asahi batu zuk niaha. “Tsipisapybyriki” maha zeka aokeryk mozumunaha ja. Asahi kaharere ty pisapybyriwykynaha zeka aokeryk mozumunaha. Asahi kahumo mytaokanikinaha.

²⁰ Hawa sa kamysapybyita mykara. Kytsaharerewabytsitsa bo ikzumuze amatsa kytsa hi kasoho aokeryk tu mopamykysokonaha zetu.

²¹ Ikriktohokoze kytsaharerewabytsitsa okeryk opykani ispe ikykara:
“Jaba kaharere tsipiwabynaha. Tsimyhyrikosokdanaha zeka tsimynahyrizikponaha ana harere bo yh̄ mykara. Iwatahi aba kaharere tsipiwabynaha wasani my. Tsimynahyrizikponaha ana humo yh̄ mykara iwatsahi kaharere humo tsipisapybyrikinaha” niy. — Iwa Pauro Peris bo nitsasoko.

²² Kyze Peris Sesus tuktsa soho humo tsihyrinymyrêta. Iwatahi batu aidy ziky.

— Atahi Karadio Risias sodadu pehatsa mozumuze aharere bo zuba piwabytsihikik. Nawa zuruze ikia wasani tsimyzeka yh̄ my. Ikia wasani ahabyi zeka batu h̄ my — niy.

²³ Niytahi sodadu perykytsa pe niy.
— Atakta ihumo tsimypokzitsiukrêta! Wahoro eze mopykyrykspykta. Iharereziuwyttsa ibo mynakozenaha zeka yh̄ tsimy. Sinamy ty ibo nyny maha zeka yh̄ tsimy — niy. Iwa isopyk niy.

Peris ioke Derusira inarokotatsa ahatsa Pauro ziwabykynaha.

²⁴ Kyze Peris oke Derusira inarokotatsa ahatsa Pauro bo izumukunaha. Sudeu ezektatsa niy. Iwaze Pauro sibo ziokyhyryk. Hawa kytsa Sesus Kiristu harere bo hȳ mykaranaha iwatsahi ihumo sispirikporêtsa moziknaha piwaby tsihikiknaha. Iwaze Pauro sibo nipamykysoko.

²⁵ Deus soho ispe niy Deus tihi:
— Kaharere bo zuba yh̄ tsimykaranaha. Iwaze aharere bo batu h̄ tsimaha. Pahasapywyky iwatsahi ahamysapybyi ty tsimoewynaha niy. Aibani zuba myzubaha Deus okeryk tsinamykahanaha. Nawa puruze Deus

tihi: “Atakta tsimysapyrēta. Usa batu imysapy mykara” – niy. Iwa Pauro sibo nipamykysoko. Ana humo hi Peris tsipybyrēta nikara. Isapybara ty nikara ana humo hi tsipybyrēta. Niytahi ipe niy:

– Aba tsiksita. Amy tohi humo ziky byizeka panyty zumuzokta – niy.

²⁶ Pauro batu tysuke. Sodadutsa Pauro piperykynaha. Peris sodadutsa pehakatsa tapetu nikara:

– O tozeka ja Pauro okyrysaro ty kabo nyny my, iwazehi poi ja – mytsaty ahabyi nikara. Izioto ituk ziknapamykysoko.

²⁷ Iwa petok ziytyk tseheze mektatu Peris nizapazeky, Porokos Pestus atahi isapyzeky niyzik. Tapara iparak byize Sudeutsa ihumo sakurētsa moziknaha iwatahi Pauro sakyriukanikitsa hurukwy eze zerekek. Iwatsa Sudeutsa inakubaiknaha.

25

Pauro Homa hudikhudikwy pehatsa bo my. Sesa inarokota ibaze tabetesaka.

¹ Pestus Sesareja bo zumu. Harakykbyihi zuruze atahi Serusarēhe bo niukuru.

² Iwaze Sudeutsa ibo izumunaha. Taparaktsa ziknapamykysokonahatsa Sudeutsa taparaktsa iwatsa ibo nipamykysokonaha. Pauro soho zisapybyrikinaha siharerewabymybarētsa.

³ Asahi:

– O Pauro mybo tyzipaha. Serusarēhe bo tyzioktyhykta! Iharere tawaby tsihikizonaha – niaha. Botu asa zuba nipamykysokonaha. Pauro ske buruk mynaparak zeka tabezehik nikaranaha.

⁴ Iwaze Pestus ispe niy:

– Aba Pauro sakyriukanikitsa hurukwy Sesareja eze tu niy. Abahi utakta anabo piksizo.

⁵ Ikiahatsa katuk tsimunaha. Wastuhu taparaktsa katuk tsimykurunaha zeka Pauro imysapybara ty niy zeka Sesareja eze zuba kabo tsimytsasonaha – niy. Iwa taparaktsa bo nitsasoko.

⁶ Kyze mytsyhyrytsa wa zuruze Pestus Sesareja bo niukuru. Wastuhu Sudeutsa ituk niukurunaha. Sesareja bo zumubanahaze estuba zuruze kytsaharerewabykywy bo niaha. Pauro sibo tyzioktyhyk niy.

⁷ Anaeze Sudeutsa, asahi Serusarēhe ezektsa izumubanaha. Pauro zumuze zihareresapybyrikinaha.

– Pauro imysapybyikia ty nikara iwa ihumo taokanikinaha. Ana hi nitsasokonaha – mybarapetu nikaranaha.

⁸ Niytahi Pauro tabetesaka:

– Batu amy tohi Moises harere ty ikykara. Sudeutsa sopykwy ty yhỹ ikykara. Deus wahoro zubata humo kamyzepykybrytsihik. Homa ezektsa pehatsa Sesa niwatihi ihumo kamsapybyrihuk ihumo batu kasopyk – niy.

⁹ Pestus Sudeutsa nasikoko tsihikik. Iwatahi Pauro pe niy:

– Serusarēhe bo ikia tsimyzihikik. Anaeze zuba hawa tsikykara piwaby. Anaeze piwabyba – niy.

¹⁰⁻¹¹ Pauro ipe niy:

– Batu. Ikiahatsa Sesa tsyhyryze tarabaja tsimykaranaha. Ata zuba kasoho piwaby Serusarēhe eze kasoho ty tsipiwaby zeka batu wasape tsimy. Sudeutsa piksapybyrikinaha. Asahi piksukyrykynaha. Ana humo hi tsihyrinymyrēta asaktsa pikbeze tsihikiknaha. Siharere batu wasani my iwatsahi batu aty tohi katy sibo nyny my. Katy sibo nyny tsimy zeka batu wasani my. Homa pehatsa Sesa inarokota ata zuba pikwaby uta tu pikbetesa.

Homa pehatsa ituktsa ahatsa kaharere piwabynaha – niy. Iwa Pauro Pestus pe niy.

¹² Iwaze Pestus tuktsa tuk nipamykysoko. Asa zuba nipamosokonaha. Niytahi Pauro pe niyzo:

– Ikia tihi:

“Sesa Homa ezektsa pehatsa kaharere piwaby iwatahi atatu tabetesaka” tsiky. Iwatahi uta Sesa bo papehaka – niy. Iwa Pestus Pauro pe nikara.

Pauro Akiripa pehatsa, itsy kino niwatihi ahatsa tuk nitsasoko.

¹³ Usta aibatohi eze usta pehatsa, Akiripa inarokota, Sesareja bo tatsy tuk izumu. Berenisi inarokotatsa Pestus bo inakozorenaha. Anaeze niapykyryk-spyknaha.

¹⁴ Niytahi Pestus Pauro soho Akiripa bo nipamykysoko niy:

– Estuba maku Peris sakyriukanikitsa hurukwy eze zereke. Ispehatsa ikyzikze anaeze tu niy.

¹⁵ Uta Serusarēhe bo ikzumuze taparaktsa ziknapamykysokonahatsa myhyrizikwanitsa Sudeutsa iwatsa Pauro soho kabo nipamykysokona. Batu ihumo siakparawy.

“Atakta imysapybyita tu ziknakara zispihikbatakanaha. Tabezekta!” nikaranaha.

¹⁶ Iwaze ispe iky:

“Amata tsipibezena zeka batu wasani my. Tapara katsa Homa pehatsa tuktsa iharere tsipiwabynaha. Tapara kytsaharerewabytsitsa iharere piwabynaha. Iwa tabetesaka kytsa isoho pisapybyrikinaha niwatihi piwaby-naha”. Iwa humo hi tsinymyryknaha.

¹⁷ Niahatsahi Sudeutsa tykareze tutsa izumukunaha. Byri zuruze atsoko iksiwaby. Kytsa harerewabytsitsa sapy bo iky. Iwaze Pauro tyzioktyhyknaha iky.

¹⁸ Niahatsahi Pauro harere zisapybyrikinaha: “O atakta Sesa Homa ezektsa pehatsa iharere bo batu ma ziky” mytsaty ahabyitatu iky.

¹⁹ “Atakta Sudeutsa sopyk ty ka batu hỹ nikara” nikaranaha. Usta maku Sesus inarokota nipamykysokonaha. Asa tihi:

“Atahi nihyrikosokda” nikaranaha. Pauro batu niy atahi “Inahyrizikpo” nikara.

²⁰ Iwatsahi Pauro soho ty niharapespihikbatakanaha. Hawa mykara batu kahyrinymyry. Iwaze Pauro bo ikpamykysoko ipe iky:

“Serusarēhe bokta! Anaeze sa tabetesa.”

²¹ Iwaze Pauro kape niy:

“Batu. Homa ezektsa pehatsa Sesa kasoho piwaby tsihikik” niy. Iwatahi sodadutsa pe iky:

“Atakta maku wahoro eze tsipiperykynahaktsa. Bykyzehu Sesa bo pipeha” – niy. Iwa Pestus Akiripa bo nipamykysoko.

²² Niytahi Akiripa tihi:

– Uta kino niwatihi tohi piwabytsihikik – niy.

– Yhỹ. Byri za tsipiwabynaha – Pestus niy.

²³ Estuba puruze Akiripa Berenisi ahatsa kytsaharerewabytsitsa sapy bo izumunaha. Sisuk tisapyrēna.

– O atakta myhyrizikwanita – kytsa nikaranaha. Sodadu pehatsa tuk zumukunaha. Taparaktsa Sesareja ezektsa tuk zumunaha. Kytsa myhyrizikwanitsa tuk izumunaha. Iwaze Pestus sodadu pe niy:

– Pauro tyzioktyhyk – niy.

²⁴ Pestus izumubanahatsitsa pe niy:

– Akiripa ispehatsa mytuktsa kino niwatihi ata maku bo iktsa tsimaha. Uta Serusarêhe eze tuze sizubarêtsa kabo izumunaha. Ata soho zisapybyrikinaha. Sudeutsa tykarezektsa kino niwatihi izumunaha zisapybyrikinaha. “O atakta tabezekta” nitsasoikiknaha.

²⁵ Batu amy tohi zikaha iwatahu sa pibeze tsihikiknaha mytsaty mykara. Tapara Pauro kape niy:

“Homa ezektsa pehatsa Sesa kaharere piwaby zuba. Myhudikhudikwy pehatsa atahi zuba kaharere piwaby! Iwatahi Sesa bo tsimyzipeha” – niy.

²⁶ – Amy ty sa isoho piwataha batu kahyrinomyry. Amy ty imysapybara ty nikara batu kahyrinomyry. Aba Pauro ikia bo myzioktyhyryk. Ikia kino iharere tsipiwaby. Tozeka ja iharere tsipiwabyze tsipiktsumuêhĩ. Iwaze hawaha piwataha papeu humo pinomyryky.

²⁷ Batu wasani my tohi Sesa bo pipeha. Amy ty humo sa pipeha batu kahyrinomy iwaze batu wasani my. Sudeutsa isoho zisapybyrikinaha. Nawaze tohi pipeha, batu wasani my mytsaty ikykara – niy. Iwa Pestus Akiripa pe niy.

26

Pauro Akiripa okze tu tabetesaka.

¹ Niytahi Pauro Akiripa okze tu tabetesaka. Tapara Akiripa ipe niy:

– Aba ikia tu tsikabetesakta – niy.

Iwaze Pauro tatsyhyrype ty pawyk niy.

² Niytahi tabetesaka:

– O Akiripa pehatsa utatu pibetsa. Sudeutsa tihi: “Atakta imysapybyita tu nikara” nikaranaha. Ana harere soho abo uta tu pibetsa zeka kakurêta.

³ Ikia hi Sudeutsa sopyk humo ahyrinomyrêta. Hawa ziknakaranaha humo ahyrinomyrêta. Iwatahi kaharere tsiwabytokto.

⁴ Jabastuze Sudeutsa sopyk ty yh̃ ikykara. Ikypykze kahudikhudikwy eze tuze hawa zikzurukuze Sudeutsa sihyrinomyrêtsa. Serusarêhe eze tuze niwatihi inomyrykyze sihyrinomyrêtsa.

⁵ Utakta Pariseutsa tukta. Asaktsa Moises harere bo pykyhytu h̃y mykaranaha. Uta kino niwatihi Moises harere bo h̃y ikykara. Ana humo hi sihyrinomyrêtsa.

⁶ Aba kaharere bo tsipiwabyky. Deus kytsa mynasihyryzikponahaze ana harere humo tsipiwabyky. Tubabatu Deus mydiritsa pe niy:

“Siakbatsa Deus mynasihyryzikpowy.” Sudeutsa sizubarêtsa ana humo hi yh̃ mykaranaha. Mydiritsa taparaktsa dose ana humo hi yh̃ nikaranaha.

⁷ Iwatsahi Sudeutsa Deus bo mosakibazikiknaha. Okoroze, unata kino niwatihi itsyhyryze tarabaja mykaranaha. Sudeutsa kahumo siharere-wabymybarêtsa. Deus siakbatsa mynasihyryzikpowy yh̃ ikyze iwatsahi kahumo zisapybyrikinaha niy.

⁸ Amy humo sa Deus siakbatsa mynasihyryzikpowy batu h̃y tsimykaranaha – niy.

⁹ – Tapara Sesus tuktsa iksisukyryky wasani mytsaty ikykara. Sesus Nasare ezekta ituktsa iksisukyryk kahumo sinini nikaranaha.

¹⁰ Serusarêhe eze tuze ziknasioktykyry. Sakyriukanikitsa hurukwy bo ziknasihurukuk. Sesus harere bo batu yh̃ ikykara ihumo batu kaspirikpo iwatahi ziknasisukyryky. Taparaktsa Sudeutsa kabo yh̃ nikaranaha. Asahi kytsa pe ziknatsasokonahaze Sesus tuktsa “tysibanahaktsa!” nikaranaha. Uta yh̃ ikykara.

¹¹ Sesus tuktsa bo ikykara, nanabyitaba ikukuru. Sudeutsa wahoro bo iktsuk. Anaeze atsatu ikykara. Ikykyriki. Iwatahi siapik paikpa ikykara. Utsa hudikhudikwy bo iksiberiki iwatahi iksisukyryky. Iksipektumuze sakyriukanikitsa hurukwy bo iksioktykyryk. Asahi: “O Sesus harere bo batu hÿ tsimaha” iwa mozihihik.

Pauro Sesus tukta niyzik iwa nitsasoko.

¹² – Iwaze Damasko bo ikukuru. Taparaktsa ziknapamykysokonahatsa papeu ty kabo nyny niaha. Sesus tuktsa iksisukyryky ana humo hi ikukuru.

¹³ Hawa kabo niy ikpamykysoko. Ske buruk ikukuruze tokbaha nayzikze haramwe ekoso hyritywaha bo ikozo. Bijoikpe ikny tu inasik. Naharamwe babatu tsihirikuarêta. Katuktsa haramwe ekoso hyritywaha eze itazahara eze tsikapykyryknaha.

¹⁴ Katsa wytyk bo tsiknatsubaiknaha. Niytahi mypehatsa kabo ni-pamykysoko. Kaharere eberaiko nipamykysoko tahi:

“Sauro amo sa tsipiksukyryky niy. Iwaze anaty tsimyykaraze ikia pikuzahyrity wata. Pikuza tarara tykure kure nikaraze iwaze sinini nikara. Ikiawatihi katuktsa tsimysisukyrykyze ikia pikuzahyrity wata ikiatu sinini mykara. Uta kino abo mopamykysokoze katuktsa soho ikia batu waby ziky, waby byizeka pamiwy. Iwa ikia pikuzahyrity wata”.

¹⁵ “Aty skaraba tsimyykara” iky.

“Utakta Sesus tsimoziksukyryky” mypehatsa niy.

¹⁶ “Kyikty pawatawyhik iwatahi kaharere sohokotsa tsimozik. Jabatu tsikny anatyhi kytsa bo tsimypamykyso. Hawa pawatawy anaty hi kytsa bo tsimypamykysoko.

¹⁷ Utakta ahumo kamypokzitsiukrêta. Iwatahi Sudeutsa ba zabezenaha. Sudeutsabyitsa kino niwatihi ba zabezenaha. Iwa ahumo papokzitsiki.

¹⁸ Abaka Sudeutsabyitsa bo papehaka. Amy ty wasani tsihyrinymyryky. Aba miwa waha eze mynapykyryknaha. Satanas harere bo yhÿ mykaranaha. Batu imysapy my. Okoroze waha eze tu mynapykyk tsihikik. Iwa tisapyrêna my. Ikiawatihi kaharere tsihyrinymyryky zeka asahi sihyrinymyrêtsa moziknaha, kytsa okoroze waha eze tu maha. Niahatsahi kaharere bo hyÿ mykaranaha. Iwaze simysapybyitsa ziknakaranaha iwatsa tu Deus mysiokzohik. Tahasopyksapybyi mysimoewynaha zeka Deus mysiokzohik. Deus tyryktsa moziknaha.” Sesus kape nikara – niy.

Tahyriziktsokzawy soho nitsasoko.

¹⁹ – Iwatahi Sesus harere bo hyÿ ikykara. Amy ty Sesus nikara katsotopykwahaze anatyhi ikykara. Sesus soho nitsasoko.

²⁰ Tapara Damasko bo ikpamykysoko. Bykyze Serusarêhe bo ikukuru. Anaeze Sesus soho ty ikpamykysoko. Nanabyitaba Sudeja eze Sesus soho ty ikpamykysoko. Sudeutsa bo ikpamykysoko. Sudeutsabyitsa bo kino niwatihi ikpamykysoko. “Ahamysapybyitsa tsikykaranaha tsimoewynahaktsa! Sesus harere bo hyÿ tsimaha ihumo tspirikponahaktsa! Tsi-sapybakanaha!” ikykara. Iwaze kytsa sihyrinymyrêtsa. Tahamysapybyri nikaranaha pimoewykynaha zeka meky watu sispirikporêtsa mozikiknaha iwa kytsa bo ikpamykysoko.

²¹ Iwatsahi Sudeutsa katsipa humo zikoktyhyryknaha. Anatyhi ikpamykysokoze zikbeze tsihikiknaha. Deus wahoro zubata isturupeze tuze zikbezekyzykynaha.

²² Deus hi piktsumuêhîkî. Aba Sesus soho ty ikpamykysoko. Myzubaha bo ikpamykysoko. Myhyrizikwanikitsa bo ikpamykysoko. Myhyrizikwanibyitsa bo kino niwatihi ikpamykysoko.

Tubabatu amy ty Deus sohokotsa botu ziwatahakanaha atsatu ikpamykysoko. Deus harere Moises ziwatahaka atsatu ikpamykysoko.

²³ Batu meky watu pamykysoko, wasani ikykara. Tubabatu Moises ziwatahaka. “Deus zipehata tapara sinini mykara. Deus zipehata Kiristu mywata mozik. Mohyrikosokda. Mynahyryzikpo. Atahi katsa mytuk tapara mynahyryzikpo. Ata kino Sudeutsa bo piwatawy. Atahi Sudeutsabyitsa bo kino niwatihi piwatawy. Kytsa iwa mynahyryzikponaha iksiwatawy. Kytsa ihumo mynahyryzikponaha.” Tubabatu iwa ziwatahaka – Iwa Pauro Pestus pe nikara.

²⁴ Pauro tabetesakaze Pestus opykani kakaik niy:

– Ikia tsiktyrykmyi. Ikia papeu humo estudaziu tsikykara iwatahi paikpa mytsaty tsimykara – niy.

²⁵ – O batu paikpa mytsaty mykara. Uta hiba wasani mytsaty mykara.

²⁶ Akiripa ikiahi tsihyrinymyrēta. Iwatahi ikpamykysoko ahumo batu kapyby. Amy ty ikia bo ikykara wasani my. Kytsa okze tu ana hi ziwatawyky. Kytsa papatu habyyita tu nikara.

²⁷ Niytahi Akiripa pe niy:

“Deus sohokotsa botu ziwatahakanaha anabo sa yhỹ tsimykara. Sipapeu humo yhỹ tsimykara ana humo hi kahyrynymyrēta” – niy.

²⁸ Akiripa ipe niy:

– Iwa tsipamykysospyk utakta Sesus harere bo hỹ my tozeka ja ihumo kaspirikporēta. Nawa mytsaty tsimy – niy.

²⁹ – Ikia aidy tsimy zeka Sesus humo tispirikporēta tisapyrēna my. Aidy habyyi zeka niwatihi Sesus humo tispirikporēta tisapyrēna my. Sizubarētsa kaharere piwabynaha tsahi Sesus harere bo hỹ mykaranaha ihumo sispirikporētsa maha zeka tisapyrēna hỹ. Ikiahatsa kahyrytywa tsimyzihihiknaha zeka tisapyrēna. Tsikspirikpokonaha zeka anahi mozihihik. Karikut-sitsitsa ba kawata haī haī zikaha – Pauro nikara.

³⁰ Niytahi Akiripa izoihik. Pestus, Berenisi, ustsā iwatsa zipokonahaze asa zuba nipamykysokonaha.

³¹ – O atakta tsimysapyrēta. Batu amy tohi nikara. Sakyriukanikitsa hurukwy bo ba ziktsuk. Ba zikbezewy – nikaranaha.

³² – Ata tihi:

“Sesa kaharere piwaby tsihikik” iwa nikara. Ana humo hi tysoho byizeka. “Sakyriukanikitsa hurukwy eze tysukehikta tsimy” – niy. Iwa Akiripa Pestus pe nikara.

27

Sodadutsa Pauro Homa bo ziokyhyryknaha.

¹⁻² Kyze Pestus Pauro Homa bo zipeha tsihikik. Tsaraha puētsikbyita ziperyky. Niytahi Pauro ustsā kytsa kino niwatihi sodadu bo nyny niy. Atahi ustsā sodadutsa ziperykyta ibo nyny niy. Surio inarokota. Sesa sodadutsa maha. Uta niwatihi Pauro tuk ikukuru. Iwa Homa bo tsikukurunaha. Aristarakus mytuk niukuru. Atahi Masedonia iknykta niy. Tesaronika eze niy. Tsaraha puētsikbyita eze kokorohyk tsikaha. Tsaraha puētsikbyita Adaramito pupuwy ikny inao. Asia tsarahatsa pupuwy bo mynakozore. Sesareja bo tsikukurunaha. Buburu zuba tsitsikzanaha.

³ Byriri tuk Sidō bo tsikumunaha. Surio Pauro humo zisapywyky ipe niy:

– Aharereziuwytša boktsa! Amy ty tsipitsihikik abo nyny maha. Patsumuēhiknaha – niy. Iwa hỹ.

⁴ Iwaze tsikukuruzonaha. Zopoktsa myokeryk inabybykyknaha. Iwatsahi tsikzikdihi baze Sipire inarokoha ipyrytaba tsiharamukunaha.

⁵ Buburu zuba tsitsikzanaha. Sirisia tsikziharamunaha. Pāpiria niwatihi tsikziharamunahaze Miha bo zukzuk tsikaha. Miha Risias eze tu niy.

⁶ Anaeze tsaraha puētsikbyita eze tsikmykokorohygzonaha. Sodadutsa perykytsa usta tsaraha puētsikbyita bo izumu. Ataeze hi Aresādere ikny inaukuru. Itaria bo niukuru, iwatsahi katsa kokorohygz tsikaha iwaze tsikukuruzonaha.

⁷ Tsikukurunaha myhyrizikwatu tsikukurunaha. Tsihokdahaṛēna hiba iwaze Kido hudikhudikwy tykarawa tu tsikziharamunaha. Zopoktsa myokeryk inabybykyknaha humo batu myhyrizik watu tsikukurunaha. Iwaze ziharataba Saramona baze tsikziharamunaha. Iwatsahi tsikzikdihi baze tsikukurunaha. Tsikzikdihi Kereta inarokoha bo iwaze zakbaze tu tsikukurunaha.

⁸ Tsihokdahaṛēna Kereta tsikzikdihi jokboha tsikukurunaha. Kyze tsarahatsa pupuwy tsikzikdihi bo tsikzumunaha. Ana pupuwy – Ispupuwy tisapyṛēna – inarokoha. Raseja bytykareze tu niy.

⁹ Anaeze tsikapykyryksyknaha. Sudeutsa zukuwy zumuze Deus simysapybyitsa ty nikaranaha mysiokzohik mytsaty ziknakaranaha nawa zuruze botu ziharamu. Iwatsahi tsaraha puētsikbyita eze tsimuzonaha zeka tsimhyrikoharēna niy. Zikbyituhukutu zopoktsa inabybykyknaha, hyritsik nawōkō ba ziknapyk.

¹⁰ Niytahi Pauro:

– O kytsa buburu zuba tsimykurunaha zeka tsimhyrikoharēna. Pāo pāobyi tsimaha. Tsimunaha zeka mynamy tahokzaba. Tsaraha puētsikbyita moharazuk, iwa zeka katsa kino niwatihi tsimybabanaha – niy.

¹¹ Sodadutsa perykytsa iharere bo batu yh̄y niy. Tsaraha tsihitsa harere bo zuba ziwaby. Tsaraha puētsikbyita perykytsa kino niwatihi iharere bo zuba ziwaby.

¹² Iwatahi:

– Ipupuwy batu sapy. Anaeze tsaraha puētsikbyita tsimynapykyryknaha zeka batu sapy – niy. Kytsa tihi:

– O tsimyzonahaktsa! Penise boktsa – nikaranaha. Penise Kereta tsikzikdihi eze niwatihi niy. Anaeze tsimypykyryknaha mytsaty nikaranaha. Yh̄y niy.

– Tsimynahaktsa! Tsaraha puētsikbyita Penise boktsa – nikaranaha. Iwaze tsikukuruzonaha.

Zopoktsa inabybyknaha.

¹³ Tapara zopok inabybykze wasani. Zopok mysukpetaba nabybykyk. Iwatsahi asa zuba nipamykysokonaha:

– O abaka zopoktsa wasani tsimyzonahaktsa! Penise boktsa – nikaranaha. Iwaze mopykwy zizonaha. Iwaze tsikzikdihi baze tsikukuruzonaha.

¹⁴ Atsoko zopoktsa inabybykyryknaha. Zopoktsa tsikzikdihi ikny inabybyknaha. Zopoktsa Norodeste inarokoha inabybyknahaze, tsaraha puētsikbyita ziokykyryk.

¹⁵ Iwatsahi paikpa nimyoktykyryk. Zopoktsa tsaraha puētsikbyita ziokykyryk.

¹⁶ Tsaraha usta tsikzikdihi Kauda inarokoha baze ziharamu. Anabo zopok jokboha niyzikze tsaraha tsibik haī tsikaha iwaze bykyze tsikzizonaha. Tsihokdahaṛēna h̄y. Tsaraha tsibik tsaraha puētsikbyita bo tsikoronaha. Iwaze sukyhykorok niaha tsazikihia ty tsihāinaha.

¹⁷ Tsaraha tsibik myboboronaha pokso tsazikihia ty tsihāinaha. Sirete tykareze tu niy. Itsakwarabara bo tasapynaha pokso nikaranaha. Imyra

pokso sipybyrëtsa nikaranaha. Tsaraha puëtsikbyita imyra bo tazik na pokso sipybyrëtsa. Iwatsahi panu putokwy humo zipaiknaha. Ana panu huzi-uwytza humo zopok tsaraha niukuru anaty hi zozozo niaha.

¹⁸ Niytahi tsaraha puëtsikbyita niukuru zopoktsa tuk nitubaka. Zopoktsa inabybykyknaha. Estuba zurunahaze tahanamy pihik bo zipaparakanaha.

¹⁹ Estuba zurunahaze tsaraha tarabaja ziknakaranahatsitsa tsarahaeze ky zuba inamy puëtsik zipaparakazonaha. Tahatsyhyrypetsa ty wastuhu panu huziuwytza iwatsa nisipaparakanaha iwaze tsiwozorëta niyzik.

²⁰ Iwaze mytsyhyry wa tsikurunahaze haramwe bo ba zikozonaha. Byrisoiktsa kino niwatihi ba zikozonaha. Zopoktsa zuba inabybykyknaha. Hyritsik nawökö. Iwatsahi katsa tihi:

– O tsimyokbabanaha – tsikaha.

²¹ Iwa tsikurunahaze haukbyitsa tu tsikurukunahaze. Niytahi Pauro kytsa tazahaeze tarikto ispe niy:

– O kytsa tapara ikiahatsa kaharere bo batu yhy tsikaha. Anaty hi Kereta tsikzikdihi eze tuze tsimypykyryknaha zeka wasani tsimaha. Nawa iktsaso naha batu ahakparawy. Tsimykurunaha byizeka mynamy ba zikokza – niy.

²² – Abaka ahape ahapyby byihu ja, mytsaty mytsaty byitahaktsa. Tsaraha puëtsikbyita pitabokwyhy hy. Katsa tsimymarazuknaha zeka ba zikyrikosokdanaha. Batu aty tohi mohyrikosokda.

²³ Jaba unata eze bijoikpe iknykta Deus tsumuëhïtsa kabo inasik. Deus kabo zipedahik. Utakta niwatihi Deus tsumuëhïtsa ihumo tarabaja ikykara. Bijoikpe iknykta tihi:

²⁴ “O Pauro apyby byihukta! niy. Iki Sesa, Homa Ezektsa pehatsa bo tsimyakta! Deus pahasapywyky. Iwatahi asaktsa atuk mukurunahatsa batu mohyrikosokdanaha. Deus pahasapywyky batu aty tohi mohyrikosokda” niy. Iwa bijoikpe iknykta kape nikara.

²⁵ Iwatsahi ahapybybyihuktsa kytsa! Ahapunihikrëtsa tsimoziknaha! Uta Deus harere bo hyhy mykara ihumo kaspirikporëta. Hawa nitsasoko atsatu mykara.

²⁶ Zopoktsa humo tsikzikdihi bo tsimypupubanaha – niy. Iwa Pauro kytsa bo niy. Asahi tsaraha puëtsikbyita eze nikaranaha.

²⁷ Kyze unata eze tsikurunahaze nawa zuruze mytsyhyrytsa watsa ziharamuze niaha. Unopokte zopoktsa humo tsiktubakanaha. Buburu zuba Adiria inarokoha. Paikpa tsiktubakanaha iwaze tsaraha puëtsikbyita eze tarabaja ziknakaranahatsitsa tihi:

– O abaka wytyk iokboha tsimaha – mytsaty nikaranaha.

²⁸ Iwatsahi tsaraha tsitsiwy tsakyrikwy ziochtsoknaha. Pihik tsihiri bo tadik iwa zeka tirïta seis meteros. Tsikukuruzonaha. Kyze kytsa tsaraha tsitsiwy tsakyrikwy ziochtsokzonaha. Pihik tsihiri bo tadik iwa zeka wïte sete meteros.

²⁹ Haraharetsa pokso sipybyrëtsa nikaranaha. Tsaraha puëtsikbyita haraharetsa humo moboborok naha pokso sipybyrëtsa nikaranaha. Iwatsahi sapetoktsa sapetoktsa sipykwytsa nisiharazuzuknaha. Itsihiripyry bo sipykwytsa ty nisiharazuzuknaha. Tsaraha puëtsikbyita pyk niy, anaeze mynakyoknahaze tsiperyknaha.

³⁰ Kyze kytsa tsaraha puëtsikbyita eze tarabaja ziknakaranahatsa niwak tsihikiknaha iwaze tsaraha tsibik pihik bo ziochtsokzonaha.

– O usta mopykwy tsaraha pihik bo tsiziochtsoknaha – mybarapetu niaha. Niwak tsihikiknaha,

³¹ Iwaze Pauro sodadutsa perykytsa bo nitsasoko. Sodadutsa niwatihi ispe niy:

– Tsaraha tarabaja ziknakaranahatsitsa areha byizeka pihik bo tsimokba-banaha – niy.

³² Iwatsahi sodadutsa tsazikihia ty zizykiknaha. Iwaze tsaraha tsibik pihik bo ziochtsok. Nabo nitubaka.

³³ Nakyokzoze Pauro kytsa pe niy:

– Aba tsimymydisahanahaktsa! Tsizubarēna tsikurunahaze ikiahatsa batu ahaty disaha iwatsahi paikpa mytsaty tsikykarana.

³⁴ Aba tsimymydisahanahaktsa iwaze ahapaikrētsa tsimoziknaha. Ahapy-bybyihuktsa! Batu aty tohi mohyrikosokda – niy.

³⁵ Niytahi Pauro atsikara ty paik niy. Kytsa okze tu atsikara humo Deus bo nipamykysoko:

– O Deus ahumo kakurēta ikia mydisahawy ty mybo nyny tsiky – niy. Iwaze atsikara zitsatsaka. Iwaze tadisahaka. Utsa kytsa kino niwatihi tahadisahanaha.

³⁶ Tahadisahanahaze sipunihikrētsa niyziknaha.

³⁷ Sizubarētsa tahadisahanaha. Sizubarētsa tsaraha puētsikbyita eze nikaranaha. Kytsa dusētos setēta seis sizubarētsa.

³⁸ Tahadisahanahaze tiriko pihik bo zipaparakana iwaze tsaraha tsiwozorēta niyzik.

Sizubarētsa nimyra bo zumunahaze. Tsaraha puētsikbyita niboborobaik.

³⁹ Miwa botu tsaraha tarabaja ziknakaranahatsitsa wytyk zinyaha. Nimyra bo iktsa niahaze, anabo tsaraha puētsikbyita zipu tsihikiknaha.

⁴⁰ Iwatsahi mopykwy hāiwytsa ty nisizyzykiknaha. Ihāiwytsa mytoriwyttsa ty satuk satsuk nikaranaha. Niahatsahi panu estuba ikputokwy bo zikyikikzonaha. Iwaze tsaraha nimyra wataba niukuru. Ana panu tsaraha zopok humo niukuru.

⁴¹ Tsaraha puētsikbyita nimyra humo tazik. Zopoktsa inabybyknahaze iwatahi tsaraha tazik. Tsaraha tsuno humo niputazik. Anaeze nimyra pihik pukezi tsaraha nipyri. Batu hawa tohi zikaha. Iwaze pihik ihiridawy wa niukuru. Tsaraha itsihipyry taba niaktsatsakak. Iwatahi tsaraha puētsikbyita niboborobaik.

⁴² Sodadutsa kytsa mysiba tsihikiknaha. Asahi sodadutsa sakyriukrēnikitsa hurukwy ezektsa mowaknaha pokso mysiba tsihikiknaha.

⁴³ Sodadu perykytsa Pauro pokzi batu yhỹ niy, iwatahi sodadutsa kytsa mysibabyrikinaha. Ispe niy:

– Nimyra bo tsuk tsuktaha! Pihik bo tuharazuknahaktsa – niy.

⁴⁴ Kytsa sitsuksukbyitsaktsa peka:

– O ikiahatsa hwi bete paiktaha – niy. Iwatsahi katsa myzubarētsa nimyra bo tsikpupukunaha.

28

Hawa Pauro Marata tsikzikdihi eze nikara.

¹ Tsikzikdihi bo tsikumunaha. Marata inarokoha tsinymyrykynaha. Marata ezektsa simysapyrētsa.

² Zisapykynaha. Hyritsik nawōbaik. Mykparētsa tsikykarana. Iwaze izo zibawakanaha. Mytsyhyryze izo zipokoknaha.

³ Pauro izo zibykyryk. Zipokokze izo eze pyryhyk izoihik. Niytahi Pauro zitsyhyrysi.

⁴ Iwatsahi Marata ezektsa asa zuba nipamykysokonaha:

– O atakta maku kytsa bakatsa hỹ. Pihik eze tuze batu pomoza. Aba pyryhyk zisisi naha humo mohyrikosokda. Imysapytawy kyzeakta zira – mytsaty ahabyitsa nikaranaha.

⁵ Pauro tatsyhyrype ty wywyk nikara pyryhyk izo bo ziochtsokik. Mahani itsapyri. Tsakurēta niapykyryk.

⁶ Iwatsahi kytsa Pauro bo iktsaziu nikaranaha. Ziperykynaha. Itsipa wiwi ziperykynaha. Atsoko ja mohyrikosokda mytsaty nikaranaha. Ziperykynaha ziperykynaha. Sinini ahabyita napykyryk. Iwatsahi meky watu mytsaty nikaranaha.

– Atakta batu maku niy. Atahi deus my – mybarapetu nikaranaha.

⁷ Niytahi Pubiro mybo hua hua niy. Pubiro tsikzikdihi ezektsa ispehakatsa niy. Isapy tykarawa niy. Haneze izo baze tsikykyzazakanaha isapy niy. Atahi mybo huahua niy:

– Kawahoro bo paku tsimaha – niy. Katsaktsa iwahoro bo tsikpupunaha. Anaenze harakykbyihi tsikurunaha. Nimyoktyhyryk. Mydisahawy ty mybo nyny nikara.

⁸ Izo tsimyitsapyrēta, ihumuēzumu. Zikaraikik. Iwaze Pauro Deus bo itsyhyryze nipamykysoko. Tatsyhyrypetsa ty ihumo paik niy. Iwaze Deus zizororowyhik, tsakurēta niyzik.

⁹ Ana soho sizubarētsa ziwabynaha asahi simyitsapyritsa Pauro bo nasioktyhyknaha. Tsikzikdihi ezektsa asahi simyitsapyritsa ibo inasioktykyryknaha. Nizororobanaha.

¹⁰ Iwatsahi sinamy ty mybo nyny niaha. Amy ty tsimyzihikiknaha mybo nyny niaha.

Aibani usta tsaraha puētsikbyita eze tsikmykokorohyknahaze amy ty tsimyzihikiknaha mybo nyny niaha. Tsaraha bo sinamy ty zipupukunaha. Iwaze tsikukuruzonaha.

Pauro Homa bo izumu.

¹¹ Byzoje harakykbyihi tsitsunahaze Homa bo tsikukurunaha. Marata tsikzikdihi ekze tsikukurunaha. Usta tsaraha puētsikbyita eze tsikukurunaha. Tatsaraha Marata tsikzikdihi eze hyritsik pokteze niapykyryk. Tapara atahi Aresādere pupuwy ikny inakuru. Tsaraha tsuno humo beketsa hyrikoso nisisukni. Estuba Kasito inarokota usta Poros inarokota niy. Iwaze tsikukuruzonaha.

¹² Iwaze Sirakuse bo bybybyu tsikaha.

¹³ Anaenze harakykbyihi tsikururenaha. Niahatsahi zaktaba tsikukurunaha. Resio bo bybybyu tsikaha. Estuba zuruze zopok wasani inabybykyk. Haramwe sukewy taba inabybykyk iwaze tsikukuruzonaha. Petok zuruze Poteroi bo tsikumukunaha.

¹⁴ Anaenze Sesus tuktsa tsikshobyknaha. Sibaze tsikurukunaha. Estuba mytsyhyry wa situk tsikykykykspyknaha. Niahatsahi tsikukuruzonaha. Harataba ske buruk Homa bo tsikukurunaha.

¹⁵ Sesus tuktsa Homa ezektsa katsa mysoho ziwabynaha. Katsa Homa ske buruk tsikukurunaha ziwabynaha. Iwatsahi katsa inamyhobyknaha. Homa jokbohaze inamyhobyknaha. Sihuakyriwy Apijo baze tsikshobyknaha. Utsa huakyriwy Harakykbyihi tsinamy yksikewy inarokoha ana eze kino niwatihi tsikshobyknaha. Pauro sibo nikozoze tsakurēta niyzik. Atahi:

– O Deus myzo ikia katsyhyryze tsipiksapywyky ahumo kakurēta hỹ – niy.

Pauro Deus wasania ty Homa ezektsa bo nipamykysoko.

¹⁶ Iwaze Homa bo tsikumunaha. Sodadutsa pehatsa Homa taparaktsa bo Pauro ty nyny niy. Niahatsahi Homa taparaktsa Pauro pe niaha:

– Sakyriukanikitsa hurukwy ba ziktsuk. Wahoro eze tsimypykyryk. Sodadu estuba zuba ikia tuk mynapykyryk – niy. Iwaze Pauro wahoro eze sodadu tuk niapykyryk.

¹⁷ Kyze harakykbyihi zuruze Pauro wastuhu myhyrizikwanitsa Sudeutsa nisiakzoko. Inauzuzuknahaze Pauro ispe niy:

– O katukytsa! Batu amy tohi mytyryktsa humo Sudeutsa mysopyk ty yh̄y ikykara. Hawa mydiritsa nimyhyrinymyrykynaha anatyhi yh̄y ikykara. Iwatatu Sudeutsa Serusarēhe eze katsipa humo zikoktyhyryknaha. Myhyrizikwanitsa Homa sibo hi katy nyny niaha. Asahi katuk nipamykysokonaha. Amy humo sa Sudeutsa pabeze tsihikiknaha nikaranaha. Iwa pinymyry tsihikiknaha. Batu amy tohi zikaha. Kamysapybara ty ka humo batu ity kaha. Sudeutsa kasoho ty mybarapetu nikaranaha.

¹⁸ Homa ezektsa pehatsa sakyriukanikitsa hurukwy ekze ziksuke tsihikiknaha.

¹⁹ Sudeutsa batu h̄y niaha. Anaeze zikare tsihikiknaha. Iwatahi utakta: “Sesa Homa ezektsa pehatsa kaharere piwaby!” iky. Sudeutsa katyryktsa soho ty batu tyso.

²⁰ Iwatahi ikiahatsa pe kabo tsimahaktsa iky. Ikiahatsa tuk mopamykyso tsihikik. Tubabatu Sudeutsa Deus zipehata ziperykynaha. Ata harere bo kino yh̄y ikykara. Ihumo kaspirikporēta my. Ana humo hi karikutsitsitsa ty ziktsipawarakanaha – niy. Iwa Pauro Sudeutsa bo nitsasoko.

²¹ Kyze ipe niaha:

– O katukta Sudeja ezektsa papeu ty batu nyny niaha. Papeu asoho batu mybo ziwatahakanaha – nikaranaha.

– Sudeutsa sukmoza niwatihi mybo inakozorenahaze asoho ty batu tyso.

²² Iwaze katsa aharere tsiwaby tsihikiknaha. Nanabyitaba sizubarētsa Sesus tuktsa nisimiyakaranaha. Kytsa siharere humo batu siakparawy. Iki Sesus humo aspirikporēta iwatahi mybo tsimytsaso – nikaranaha.

²³ Yh̄y niy. Niahatsahi estuba zuruze ziwatawynaha. Nawa zuruze Sudeutsa sizubarētsa Pauro wahoro bo izumubanaha. Miwa botu ziakbata tatu zunubaze zuba nepyk Pauro Sesus soho ty nipamykysoko. Hawa kytsa Deus tyryktsa moziknaha anasoho ty hi nipamykyso. Amy ty Moises botu ziwatahaka, Deus sohokotsa botu ziwatahakanaha iwa ana soho nisihyrinymyryky. Deus harere papeu ty botu ziwatahakanaha nisiwatawyky. Hawa Sesus Deus zipehata mywata niyzik nisispirikpoko.

²⁴ Wastuhu Pauro harere bo yh̄y nikaranaha iwatsahi Sesus humo sispirikporētsa niyziknaha. Utsa batu, asahi Sesus harere bo batu hȳy zikaha iwatsahi batu sispirikpo.

²⁵ Niahatsahi zipobaiknaha. Asa zuba nipamykysokonaha. Tapara zipokonahatsa Pauro ispe niy:

– Tubabatu Deus sohokotsa mydiritsa taparaktsa bo nitsasokonaha. Deus hyrikoso humo Isaijas nipamykysokoze:

²⁶ Sudeutsa bo tsimy. Sibo tsimytsasoko Deus tihi:

“Wabyziutaha! Iwatsatu batu ahahyrinymyry tsimaha.

Iktsaziutaha! Amy ty iktsa tsimaha batu iktsaziu zikaha.

Amakatsa kytsa kahumo batu h̄ybyri mykaranaha.

²⁷ Batu kaharere ziwabynaha. Tahaspioke satyknaha iwatsahi kaharere humo batu waby zikaha,

tahahyriktsa ty hini mykaranaha iwatsahi ba zikozonaha

tahaspirikpobyi humo h̄ybyri mykaranaha iwaze batu iktsaziu zikaha.

Tahamysapybyi pimoewynaha zeka iwatahi Deus mysiokzohik.

Kytsa sakurētsa moziknaha.

Anaty Isaijas Deus harere humo botu ziwatahaka” niy.

²⁸⁻²⁹ – O katukytsa anaty botu tsihyrinymyrykynaha. Abaka Deus wasania ty Sudeutsabyitsa bo mopamykysoko. Asaktsa piwabyziukunaha. Deus

harere bo yh̃y mahaze ityryktsa moziknaha – niy. Iwa Sudeutsa bo nitsasoko.

³⁰ Niytahi Pauro Homa ezektsa bo Sesus soho ty nipamykysoko. Petok niytyk tseheze wahoro eze niapykyryk. Okyrysaro ty wahoro tsihitsa bo nyny nikara, iwaze hi iwahoro eze niapykyryk. Kytsa sizubarẽtsa ibo izumunaha.

³¹ Mypehakatsa Sesus Kiristu soho sibo nitsasoko. Deus tyryktsa soho sibo nitsasoko. Batu ipyby nisisopykyryk. Batu aty tohi itykni. Batu aty tohi ipe: – Aksobyity – niaha. Iwa Sesus soho kytsa bo nipamykysoko.

Pauro Homa ezektsa bo ziwatahaka

Pauro Homa ezektsa bo ziwatahaka asahi Sudeutsabyitsa iwatahi ispe niy:
 – Taparaka Deus Abarão ziwatawy itsekokatsa humo kino niwatihi nisiwatawy, iwatsahi ityryktsa niyziknaha. Sudeutsa Abarão tsekokatsa. Tubabatu Deus taharere ty Moises bo nyny niy iwahahi ziwatahaka, iwaze Sudeutsa ana humo hi yh̃ ziknakaranaha. Taparaka Sudeutsa zuba Deus tyryktsa. Aiba eze zuba Deus meky watu niy, Sesus Kiristu iharapatawyhyta humo nihyrikosokda, mysapyzeyki nihyrikosoda iwatahi Deus mysopyksapybyri humo mymyokzo. Abaka kytsa ihumo sispirikporētsaktsa ityryktsa myziknaha. Taparaka Sudeutsa abaka Sudeutsabyitsa kino niwatihi ityryktsa myziknaha – niy. Homa ezektsa ana humo hi batu sihyrinymyry iwaze Deus Pauro ziapewywyky iwatahi ziwatahaka. Abaka katsa kino niwatihi Pauro wataha humo tanymyryky.

Deus wasania ty myzubaha bo my.

¹ O Homa ezektsa ahabo piwatahaka. Utakta Pauro. Sesus Kiristu tsumuēh̃tsa Deus zikwatawy niy. Ata hi:

– O Pauro ikia afehata tsimy. Wasaniha ty nanabyitaba tynatsasokokta! – niy.

Hỹ iky.

² Tubabatu Deus sohotsa tihi:

– Deus wasania ty mybarawy ezektsa myzubaha bo mysipeha. Asaktsa Deus harere kytsa sizubarētsa bo mykaranaha – nikaranaha. Ana kino botu ziwataha iharere papeu humo ziwataha. Iharere wasani my. Ana ty hi botu ziwataha abaka atsatu wasani mykara, Deus wasania ty motsasokonaha.

³ Deus wasania ty tatse soho. Sesus Kiristu mypehakatsa. Atahi mybarawy bo inasik Dawi tsekokatsa niyzik. Deus tse mywata niyzik.

⁴ Deus hyrikoso ituk mynapykyryk. Atahi mybarawy bo inasikze atakta wasani haty ziknakara. Tsimysapyrēta ziknakara. Nihyrikosokda. Bykyze Deus zikwy humo inahyryzikpo. Ispitu niyzikzo. Ana humo hi kytsa sizubarētsa:

– O atakta Deus tse babata. Iktsazubatahaktsa – niaha.

⁵ Ihumo Deus piksapywyky. Deus hi zikwatawy wasania ty iakzohota kytsa sizubarētsa bo motsasoko ana humo hi zikpeha. Iwatsahi kytsa sizubarētsa Sesus Kiristu harere piwabykynahaze hỹ mykaranaha. Ihumo sispirikporētsa moziknaha h̃.

⁶ Ikiatsa Homa ezektsa kino niwatihi Deus tyryktsa tsimoziknaha. Ana kino Deus mozihikik.

⁷ Iwaze ahabo piwatahaka, ikiaatsa Homa ezektsa. Deus ahahumo tsimypokzitsiarēta h̃, ityryktsa tsimoziknaha anahi nizihikik. Deus myzo. Sesus Kiristu mypehakatsa. Utakta ahatsyhyryze ispe my:

– O Deus myzo Homa ezektsa tysisapywykykta! Sesus Kiristu humo sakurētsa babatsa moziknaha h̃ – my. Iwa myh̃.

Pauro Sesus Kiristu humo ka tsakurēta iwaze Deus bo Homa ezektsa tsyhyryze mopamykysoko.

⁸ Iwaze myzubarētsa ahasoho humo tihi:

– O Homa ezektsa Sesus harere bo hỹ – mykaranaha. Ana humo hi piwabykyze kakurēta h̃. Deus pe my:

– O Deus myzo ikia zuba tsamysapyrēta ikia Homa ezektsa botu tsiksitsumuēh̃ iwatsahi ahumo sispirikporētsa moziknaha – my. Iwa Deus pe my.

⁹ Pibytutuhukutu ahasoho bo mytsaty mykara. Ahatsyhyryze Deus bo mopamykysoikik. Deus zikwatawy iwatahi itsyhyryze tarabaja mykara. Nanabyitaba Deus wasania ty tatse soho motsasoko ana hi kahyrikiziksokzawy. Uta ahahumo kamypokzitsiarêta iwatahi Deus bo mopamykysokoze hi:

¹⁰ – O myzo Homa ezektsa bo mynakozore zeka kakurêta mykara. Tsipikpeha zeka sibo mynakozore! – my.

¹¹ Ikihatsa humo kahyrikizibarêta. Ahabo mynakozore tsihikik. Hawa Deus zikyrinymyryky atsa tu pahahyrinymyry tsihikik iwaze Sesus harere bo hyÿ tsimykaranaha hÿ.

¹² Iwa uta hi pahakuwyky. Ikihatsa kino niwatihi tsipikykuwykynaha. Katsaktsa Sesus harere bo hyÿ tsimykaranahaze tsimyharapekuwykynahaktsa.

¹³ O katukytsa ahabo mynakozore tsihikikze batu zik, tsihokdaharêna iwatahi batu pão. Kytsa Sesus harere bo hyÿ mykaranaha ana humo hi mozihikik. Ahatukytsa Sesus humo sispirikporêtsa ana hi mozihikik iwatahi ahabo mynakozore tsihikik hÿ. Utsa kytsa Sudeutsabyitsa Sesus humo sispirikporêtsa ikiahatsa tuk Sesus harere bo hyÿ mykaranaha asa watsa hi mozihikik.

¹⁴ Deus myzubaha bo zikpeha. Iwaze bipyritsa bo mykara. Bipyritsabyitsa bo kino niwatihi. Utsa papeu humo sihyrinymyrêtsa bo mykara. Asaktsa papeu humo sinyhy byitsa bo mykara. Myzubaha bo mykara, sibo Deus wasania ty motsasokoro Deus zikykozô tahi mykara.

¹⁵ Iwatahi Homa bo pomo tsihikikze tu, ahabo Deus harere motsaso tsihikik hÿ.

Deus wasaniha humo mekywa tu tsimoziknaha.

¹⁶ Aty zeka Deus harere bo hyÿ mykara atakta Deus zikwy humo ityryk mozik Deus tuk mozuruku. Tapara Sudeutsa Sesus harere bo hyÿ nikaranahaze ityryktsa niyziknaha. Kyze Sudeutsabyitsa Sesus humo sispirikporêtsaze ityryktsa niyziknaha. Ana humo hi kakurêta. Iharere humo batu kasikpyby.

¹⁷ Deus wasania ty tsipiwabynahaze isoho humo myhyrinymyrêtsa. Hawa kytsa simysapyrêtsa moziknaha ihumo tsipinymyrykynaha. Deus hi:

– Asa zuba Sesus harere bo hyÿ mykaranaha asahi kaokzeka wasani mykaranaha. Pibytutuhukutu Sesus harere bo ma mykaranaha – my. Deus harere papeu hi:

– Aty zeka Deus humo tsimysapyrêta mozik iwatahi pibytutuhukutu Sesus harere bo hyÿ mykara – niy.

Kytsa sisopyksapybyitsa tu nikaranaha ana humo hi Deus taokaniki.

¹⁸ Deus ta bjoikpe eze tu my. Kytsa sisopyksapybyitsa tu nikaranaha humo Deus taokaniki. Atahi:

– Kaokzeka ikiahatsa batu ahasopyksapy – my. Kytsa Deus harere humo batu hÿ zikaha, utsa kytsa mysisapybyikinaha. Kytsa Deus wasania ty motsasokonahaze utsa kytsa mysiaknikinaha, kytsa Sesus bo hyÿ mykaranaha ihumo sispirikporêtsa moziknaha ana humo kino batu hÿ mykaranaha. Iwatsahi Deus okzeka batu sisopyksapy maha.

¹⁹ Hawa Deus mykara anatyhi mybarawy ezektsa bo botu nisihyrinymyry. Iwaze hawa Deus mykara kytsa mysihyrinymyrykynaha tsahi batu hÿ zikaha. Iwatsahi ihumo batu siakparawy. Iwatahi Deus mysisininiwyky.

²⁰ Katsa Deus ba zynynaha. Deus koikny bakta tu mybarawy nizukni. Nizukni naha bo iktsa tsimahaze. Katsa hi:

– O mybarawy sukniŝa zikwykyta my. Atahi Deus babata – tsimykarana. Uŝta kytsa hawa Deus soho mytsaty mykaranaha batu taharere ty harapubeteheke nikaranaha. Ba zikŝaso:

– Hawa Deus mykara myhumo tsihokdahaŝena – maha. Iwaha hi ba zikŝaso.

²¹ Hawa Deus mykara sihyrinymyŝeŝa. Iwatsatu batu ipe niaha:

– O ikia zuba wasani tsimykara. Ikie zuba tsamysapyŝeta – maha. Iwaha hi ba zikŝaso. Paikpa mytsaty nikaranaha. Simytsatyhybyiŝa tu kytsa watsa asahi miwaha buruŝ nizaranaha.

²² Tahapetu sisopyk:

– O kaksakŝa myhyrinymyŝeŝa – mytsaty ahabyiŝa tu nikaranaha. Deus okzeka batu aty tohi sinymyryhy.

²³ Deus zuba koikny baktatu my. Asakŝa Deus bo ba zinynaha iwatsahi iharere bo batu yhyŝ nikaranaha. Ihumo batu simyharerewaby batu ikt-sazuba zikaha. Iwaze asahi:

– Kaksakŝa kytsa hyrikoso watsa tahasuknikinaha! Siraratsa hyrikoso tsawatsa nisisuknikinaha. Sissarakatsa hyrikoso tsawatsa nisisuknikinaha! Pyryhykŝa hyrikoso tsawatsa nisisuknikinaha. Deus myhyrikoso hyrity wa ta bo zuba – mytsaty nikaranaha. Asa kino siharerewabymyŝeŝa ikt-sazuba sisopyk.

²⁴ Asakŝa sakmyiŝeŝa watsa nikaranaha iwaze simysapybyiŝa zuba mozihiŝiknaha atŝatu mynakanaha. Iwatahi Deus nisierekek hawa mozihiŝiknaha aŝta tu mykaranaha. Tyhapemyijaikiknaha, tyharapesapybyikiknaha.

²⁵ Asakŝa Deus harere bo batu yhyŝ zikaha. Wasaniha humo ka batu hyŝ zikaha. Hawa ha ty batu mysapy ana humo ka hyŝ mykaranaha batu sispirikpo. Myspihikbatawy bo zuba yhyŝ mykaranaha. Deus nizukni naha humo siakparawy nikaranaha. Deus babata batu siakparawy nikaranaha. Batu sispirikpo, ata bo hi kaksakŝa siakparawy tsimaha iharere bo ma tsimahakŝa! Iwa tsimaha. Ata hi tawahi mynapykyk iwatsahi kaksakŝa hi:

– O ikia zuba tsapunihikŝeta. Ikie tsamysapyŝeta – tsimaha. Iwa tsimaha hyŝ.

²⁶ Iwatsahi asakŝa Deus humo simyharerewabybyiŝa tu Deus nisierekek. Zimyi tsihiŝiknaha atŝatu mykaranaha. Iwa Deus kytsa nisierekek. Wytykyryk tahabarikŝa tuk batu hyŝ zikaha asiza zuba tahawaky wytykyryk humo zuba ziknakanaha.

²⁷ Kytsa kino niwatihi wytykyryk waza tahaokeza ba ziksipyryrykna. Tahawakytsa humo zuba mozihiŝiknaha ana humo hi batu sisopyksapy my. Ziknahaŝape wowokonaha sisapybyiŝa tu nikaranaha ana humo hi siakmyiŝa niyziknaha. Deus hi nisisininiwyky, iharere bo zimyiwykynaha.

²⁸ Hawa ha ty Deus soho wasaniha bo hybyri nikaranaha, iwatsahi simysapybyiŝa soho bo zuba mytsaty ziknakanaha. Iwaze Deus nisierekek iwaze hawa nizihikiknaha atŝatu mynakanaha.

²⁹ Iwatsahi wasanibyiŝa mozurukunaha. Pibytuhukutu sisopyksapybyiŝa mykaranaha. Uŝta kytsa namy zuba mozihiŝiknaha. Taha bo zuba mytsaty sisopyk. Okyrysaro tsihiŝa moziknaha. Myzokdiwy mynakanaha. Mysukyrywy. Simyspihikbatakŝa. Sissakimyiŝanikitsa.

³⁰ Siharerewabymyŝeŝa. Deus humo tahakyrikinaha. Siharereziubyikitsa. Asahi:

– Kaksakŝa zuba myhyrinymyŝeŝa nikaranaha. Kaksakŝa mymysapyŝeta – mytsaty ahabyiŝa nikaranaha. Pibytuhukunaha tu tahapetu sisopyk:

– Hawa ha sa batu imysapy tsimaha – iwa mytsaty mynakanaha. Tahazotsa harere bo batu yhyŝ zikaha.

³¹ Wasaniha baba humo batu sihyrinomyry tsihikbyitsa. Motsasokona-haze batu wasani zikaha. Utsa kytsa ty batu isty tsumuēhĩ nymyryhỹ. Batu aty tohi humo ba zipokzitsi.

³² Deus hi:

– Asaktsa simysapybyitsa tu mynakaranaha sinini ykarawy bo mysipeha. Anaeze tahawahi mynapykyryknaha – my. Ana harere humo sihyrinomyrētsa. Iwatsa tu batu ma zikaha. Utsa kytsa mysimywykynahaze sihumo tahaydikiknaha. Iwa my.

2

Deus myzubarētsa huak ty sibo nyny my.

¹ Kaharereziuwytza ikiahatsa ja. Sozeka ja ahatuk tsimypamykysonaha.

– Asaktsa Deus okzeka batu sisopyksapy mykaranaha. Katsaktsa batu siwatsa – tsimykaranaha. Ikiahatsa siwatsa hi tsimykaranaha iwaze aharere ty harapubeteheke tsimykaranaha.

² Deus zuba wasani haty mynakara. Deus tihi:

– Aty imysapybara ty mykara zeka atakta sinini ykarawy bo pipehahik – my. Anaharere wasani my.

³ O kaharereziuwytza. Ahape tu ahasopyk zeka:

– Deus utsa simysapybyikitsa tu nikaranaha humo mysininiwyky. Katsaktsa batu – mytsaty ahabyitsa tsikykaranaha. Ikiahatsa kino atsatu tsimykaranaha. Ikiahatsa Deus harere humo ka ba zikwaknaha iwaze sinini tsimykaranaha!

⁴ Ikiahatsa Deus humo tsimysapybyrikinaha. Deus ahahumo tsiakubyrisorokrēta. Ahahumo tsimypokzitsiukrēta. Pahasapywyky. Ahamysapybara ty tsmoewynaha iwa mozihikik. Ahamysapybara ty tymoewy ahabyizeka pahasininiwyky. Ikiahatsa hi:

– O mysapybyitsa tu tsimykaranaha Deus mybo ba zikmysininiwy – mybarapetu tsimykaranaha.

⁵ Iwatahi sihumo Deus taokaniki. Asaktsa simysapybyitsa tu mynakaranaha mysininiwyky. Hanawa puruze Deus simysapybyikitsa sinini ykarawy bo mysipehahik. Wasani my simysapybyitsa tu nikaranaha. Ikiahatsa ahamysapybyitsa tu tsikykaranaha batu tymoewy. Tahatsiktu nikaranaha iwatsahi pahasininiwyky hỹ.

⁶ Bykyze Deus kytsa atsehezubaha bo ihuak ty sibo nyny my. Hawa mozurukunahaze ihuak ty sibo nyny my.

⁷ Wastuhu mybarawy ezektsa utsa kytsa nisisapywykynaha. Iwa Deus sisoho wasani haty motsasoko anahi mozihikiknaha. Tahawahi Deus tuk mynapykyryk tsihikiknaha ana hi taperyky. Deus harere bo zuba hỹ mozihikiknaha iwaze Deus tyryktsa moziknaha. Myhyrikosokdanahaze Deus tuk tahawahi mynapykyryknaha hỹ.

⁸ Ustsaktsa batu. Deus harere bo batu yhỹ ziknakaranaha. Sisopyksapybyitsa tu nikaranaha Deus taokaniki iwatahi ihuak ty sibo nyny my ana hi wasani my.

⁹ Deus mysininiwyky mysimyitsapyriwyky. Sudeutsa, Sudeutsabyitsa bo kino niwatihi kytsa sizubarētsa asaktsa pimiyikinaha simysapybyitsa tu nikaranaha humo ihuak ty sibo nyny my, ana hi wasani my.

¹⁰ Asaktsa utsa kytsa bo mysisapywykynaha ihuak ty sibo nyny my. Sudeutsa Sudeutsabyitsa bo kino niwatihi myzubaha bo my. Simysapyrētsa

tu Deus mysisoziuku. Simyharerewabynikitsa moziknaha. Ba paikpa mytsaty zikaha ihumo sakurētsa moziknaha Sudeutsa, Sudeutsabyitsa bo kino niwatihi mykara.

¹¹ Deus okzeka atsezubaha nimysukni, myzubaha humo tsimypokzitsiukrēta iwaze Sudeutsa, Sudeutsabyitsa humo kino niwatihi ihuak ty Deus sibo nyny myze wasani.

¹² Sudeutsabyitsa Moises sopykwy ty humo batu sihyrinomyry. Iwatsahi Deus harere Moises ziwatahakanaha batu tyny. Iwatsa tu mysapybyitsa tu nikaranahaze Deus sinini ykarawy bo mysipehahik. Batu ispe my:

– Moises sopykwy humo ka batu yh̄y tsimykaranaha – my. Iwa batu tyso. Moises sopykwy humo ka batu tyny. Sudeutsa zuba Moises sopykwy humo sihyrinomyrētsa. Iwatsa tuze simysapybyitsa tu nikaranaha Deus sinini ykarawy bo mysipehahik. Ispe my:

– Ikiahatsa kaharere bo batu yh̄y tsikaha. Kaharere Moises ziwatahakanaha batu yh̄y zikaha – my.

¹³ Asaktsa Moises sopykwy humo hȳy mykaranahaze wasanihatsa mykaranaha. Deus ispe my:

– O ikiahatsaktsa ahamysapyrētsa – my. Asaktsa Moises sopykwy humo waby zuba sisopyk, iwaze ana harere bo batu h̄y mykaranaha Deus okzeka batu simysapy iwatahi ba ziksibetesaka.

¹⁴ Sudeutsabyitsa batu Moises sopykwy sinyhy. Iwatsatu wastuhu kytsa sinyhybyitsa tu ana papeu humo hi hȳy mykaranaha kytsa watsa asahi papeu humo sihyrinomyrētsa. Nawa ha ty wasanikia ty Sudeutsabyitsa sihyrinomyrētsa.

¹⁵ Hawa mozurukunaha, ustsas kytsa sibo iktsa mykaranahaze asahi:

– Asaktsa batu Moises sopykwy. Sinyhybyitsa tu iwatsa tu wasani sihyrinomyrētsa. Hawa imysapybara ty sihyrinomyrētsa – maha. Iwa h̄y. Tahapetu sisopyk:

– Ana hi wasani. Ana hi batu mysapy – maha. Sispirikporētsa maha. Iwa ustsas kytsa sisoho mytsaty mynakanaha.

¹⁶ Bykzyehu ana humo kino nawa my. Hawa kytsa mozurukunaha Sesus Kiristu sihuak ty sibo nyny my. Deus wasania ty motsasokoro anahumo kino hȳy mykara. Hawa mytsaty tsimykaranaha ustsas kytsa batu sihyrinomyry, Deus zuba mysoho humo tsihyrinomyrēta iwatahi ihuak ty mybo nyny my.

Sudeutsa Deus harere ibyky Moises ziwataha ana bo batu h̄y nikaranaha.

¹⁷ Ikiahatsa ja:

– O katsaktsa Sudeutsa tsimaha. Deus harere ibyky Moises ziwataha ana bo hȳy tsimykaranaha ana humo hi mysapyrētsa. Deus taparaktsa humo nisiwatawy iwatsahi ityryktsa tsimoziknaha – tsimykaranaha. Iwa tsinapamykysokonaha.

¹⁸ Katsa hi:

– Hawa Deus mozihikik myhyrinomyrētsa. Moises harere humo wasani haty tsinomyrykynaha imysapybara tyka kino niwatihi tsinomyrykynaha Moises sopykwy humo ka myhyrinomyrētsa, tsinomyrykynaha – tsimaha.

¹⁹ Ustsas kytsa Moises sopykwy humo batu sihyrinomyry. Iwaze ikiahatsa hi:

– Katsa zuba iharere humo myhyrinomyrētsa. Katsaktsa ustsas kytsa tahahyrinomyry tsihikik. Asahi sihyrizikubyitsa watsa, iwatsahi mysitsumuēh̄naha. Katsaktsa rika watsa myhyrinomyrētsa tu ustsas kytsa bo wasania ty sibo tsimytsasokonaha. Katsa kytsa mysihyrinomyrynahaze sispirikporētsa moziknaha iwatsahi rika watsa tsimaha.

²⁰ Sihyrinomyrybyitsaktsa tahahyrinomyrykynaha. Asahi tsikaeni zuba sihyrinomyrëtsa. Katsaktsa Moises sopykwy humo tsinomyrybanaha iwatsahi sispirikpobyitsa bo tahahyrinomyrykynaha – tsimykaranaha.

²¹ Utsa kytsa bo ahaspirikpowy tsimysihyrinomyrykiknaha. Ahape tu batu ahasopyk. Ahaspirikpowy humo batu hÿ tsimykaranaha. Ikiahatsa hi:

– Utsa namy humo ba zikmytsyhyryboanaha – tsikykaraha. Ikiahatsa ja. Utsa namy humo tsikahatsyhyryboakanaha.

²² – Utsa okeza ba ziksihuahuanaha – tsikykaranaha. Ikiahatsa ja. Utsa okeza tsimysihuakuanaha.

– Deustsabyitsa bo ka ahanamy ty batu nyny zikaha! – tsikykaranaha. Ikiahatsa ja. Deustsabyitsa wahoro bo tsimypupunaha iwatsahi sinamy ty tsikahatsyhyryboakanaha. Iwa tsimykaranaha ahamysapybyitsa siwatsa tsimykaranaha. Asaktsa batu imysapy maha ikiahatsa kino niwatihi batu ahamysapy tsimaha

²³ Kytsa sizubarëtsa pe tsimaha:

– Katsaktsa Moises spirikpowy humo tsinomyrybanaha – tsimaha. Ana harere ty batu hÿ tsimykaranaha, iwatsahi Sudeustsabyitsa ahahumo Deus harere bo batu ma zikaha.

²⁴ Iwaze Deus harere papeu humo botu ziwataha:

– Sudeustsabyitsa Sudeusta humo, Deus soho pisapybyikinaha Sudeusta nisimyinahatsa iwatsahi Sudeustsabyitsa Deus soho pisapybyikinaha – niy.

²⁵ Katsaktsa Sudeusta mypiak humo tsizyzykyknaha. Wasani tsimaha. Tubabatu Moises tihi:

– Ahapiak tyzyzyknaha anahi awatawy Deus hyrytsa tsimaha – niy. Iwaze mypiak tsizyzyknaha Moises mype niwatihi hawa tsimyzurukunaha, ana ty hi mymyhyrinomyryky.

– Ikiahatsa Moises spirikpowy tsizubarëna bo yhÿ ahabyi zeka iwaze ahahyrytsa ty zyzykybitaha mahani iwatawywy. Ikiahatsa Sudeustsabyitsa watsa, asahi Moises spirikpowy batu ahawabyhy asahi Deus harere humo batu sihyrinomyry.

²⁶ Sudeustsabyitsaktsa batu sipiak zyzykyhyk. Iwatsatu pisapywykynaha iwa Moises spirikpowy humo mykaranaha zeka Sudeusta watsa moziknaha. Deus okzeka ihyrytsa moziknaha, iharere bo hyÿ mykaranaha humo. Sipiakzyzykykbyitsa kino Deus okzeka ihyrytsa moziknaha.

²⁷ “Katsaktsa Sudeusta tsimaha mypiak tsizyzyknaha Moises spirikpowy humo myhyrinomyrëtsa. Iwatsahi nawa tsimyzurukunaha zetu tsinomyrykynaha.” Iwa batu tsimykaranaha Deus harere bo batu hÿ tsimykaranaha. Sudeustsabyitsa sipiakzyzykykbyitsa. Moises spirikpowy humo batu sihyrinomyry. Wastuhu wasani mozurukunaha ana harere bo hyÿ mykaranaha iwaze Deus okzeka simysapyrëtsa moziknaha. Sihyrinomyrybyitsa tuze iharere humo wasani mykaranaha. Ikiahatsa Sudeusta tsimaha iharere bo batu hÿ tsimykaranaha iwatsahi Deus okzeka batu ahasapy tsimaha.

²⁸ Katsaktsa tsipisapykynaha Deus harere bo hyÿ tsimykaranaha zeka ihyrytsa tsimoziknaha. Katsaktsa mypetu mysopyk zeka:

– O katsaktsa Deus tyryktsa iwatsahi myhyrytsa piak tsizyzyknaha. Moises spirikpowy humo myhyrinomyrëtsa iwa Deus hyrytsa tsimaha – mybarapetu mysopyk. Ikiahatsa iharere bo hyÿ zikahabyitsa tu iwatahi Deus batu tyso:

– Ikiahatsa kahyrytsa tsimaha – iwa batu tyso.

²⁹ Uta ahape:

– Aty sa Sudeu babata my. Aty sa Deus hyrytsa maha. Atahi Deus harere bo hyỹ mykara, atakta Deus harere mozihikik – my. Deus hyrikoso ituk mynapykyryk. Wastuhu sipiakzyzykykbyitsa Deus harere bo hyỹ mykaranaha. Iwaze Deus ispe my:

– O ikiahatsa ahamysapyrẽtsa – my. Kytsa sisoho humo batu siharereziu Deus zuba sisoho mysiharereziuku. Kytsa sizubarẽtsa Sudeutsa, Sudeutsabyitsa kino niwatihhi Deus harere bo hyỹ mykaranaha zeka, asaktsa Deus hyrytsa babatsa moziknaha hỹ.

3

¹ Kytsa sizubarẽtsa Deus harere bo hyỹ mykaranahaze Deus hyrytsa moziknaha. Iwahu wastuhu ahaturke tihi:

– Amy skaraba Sudeutsa tsimaha. Amy skaraba myhyrytsa piak tsiksizyzyknaha. Tymytsumuẽhĩnaha ja – tsimaha. Iwa batu tyso.

² Uta tihi:

– Pahatsumuẽhĩnaha hỹ. – Mydiritsa zizyzyknaha humo Deus hyrytsa ziwatahawy iwaze Deus Moises bo nitsasoko, atahi taparaktsa mydiritsa bo nitsasoko. Ata humo hi Moises spirikpowy ziwataha. Iharere Sudeutsa taparaktsa bo zuba nitsasoko aiba zuba ustsya kytsa iharere piwabytnaha.

³ Sozeka ja ikiahatsa kape:

– Mydiritsa Moises harere bo yhỹ nikaranaha. Wastuhutsa taparaktsa mydiritsa Deus harere bo batu hỹ nikaranaha. Iwa zeka Deus harere sibo batu hỹ my – tsimaha. Batu ba Deus wasani mynakara.

⁴ Hawa ha ty Deus motsasoko atsatu isopyk. Deus ba zikmyspihikbata. Kytsa sizubarẽtsa mospihikbatakanaha zeka Deus batu. Deus harere papeu humo botu ziwataha:

– Tsimytsasokoze kytsa sizubarẽtsa tihi “O Deus aharere wasani my” maha. Asahi tihi zeka iharere batu isapy maha asahi zimyikinaha siharere batu wasani my

Deus zuba wasani

Deus papeu niy.

⁵ Tozeka ja wastuhutsa kytsa motsasokonaha:

– Katsaktsa wasanihabyitsa tu tsimykaranaha zeka kyze kytsa mybo iktsa maha zeka “O Deus zuba pisapyky” mykaranaha, iwatsahi mysapybyitsa tu tsimykaranaha Deus soho kytsa mysihyrinomyryknaha – maha. Asahi:

– Mysapybyitsa tu tsimykaranaha zeka Deus zuba tsimysapyrẽta kytsa mysihyrinomyry. Iwatahi Deus ihuak ty mysapybara ty humo batu nyny ziky batu wasani ziky – maha. Mybarawy ezektsa watsa mytsaty mykaranaha asahi iwa mopamykysonaha.

⁶ Niwazuba! Deus siwa batu mytsaty ziky myhumo wasani isopyk. Atahi tisopyksapyrẽta mybarawy ezektsa mywatu ihuak ty mybo nyny my. Hawa mozurukunaha humo ihuak ty nyny my. Wasani byitatu zeka ana kino batu ziky, atahi imysapyrẽnikita tu iwatahi mybarawy ezektsa bo ihuak ty nyny my.

⁷ Tozeka ja kape tsimaha:

– O utakta wasani ahabyizeka asaktsa kabo iktsa mahaze tihi: “O Deus zuba wasani mykara” maha. Kamysapy byizeka kytsa tihi: “O Deus ikia zuba amysapyrẽnikita” maha. Iwatahi kytsa Deus soho kahumo sihyrinomyrẽtsa. Deus sinini ykarawy bo pikpeha zeka batu isopyksapy kaokzeka batu wasani – my. Iwa batu tyso.

⁸ Ana humo kino wasape tsimaha zeka ikiahatsa tihi:

– O mysapybyitsa tu tsimykaranahaktsa kytsa! Iwa kytsa sizubarẽtsa Deus harere bo hyỹ mykaranaha, atahi imysapyrẽnikita maha – tsimaha. Batu

ba. Ana harere hi asaktsa kytsa kahumo batu siakparawy motsasokonaha. Iwa piksohometukunaha – ana soho hi Pauro motsasokoro – mybarapetu mykaranaha. Asaktsa Deus mysisininiwyky. Atahi ispe my:
– Ikiahatsa batu ahamysapy – my.

Batu aty tohi Deus okzeka tisopyksapyrēta.

⁹ Kyze wastuhutsa tihi:

– O katsaktsa Sudeutsa wasani tsimaha Deus harere mybo nitsaso. Sudeutsabyitsa batu, Deus sibo ba ziktsaso. Iwa Deus okzeka batu sapy maha – mykaranaha. Katsaktsa Sudeutsabyitsa watsa myzubarētsa. Tsimysapybyi tsihikiknaha mysapybyitsatu tsimykaranaaha batu tymoewy. Iwa botu iky.

¹⁰ Deus harere botu papeu humo ziwatahaka:

– Mybarawy ezektsa batu wasani zikaha. Batu aty tohi isopyksapy.
Kytsa sizubarētsa batu wasani zikaha.

¹¹ Wasaniha humo batu sispirikpo,

batu aty tohi tawahi Deus tuk mopykyryk tsihikik

¹² Kytsa sizubarētsa Deus soho bo batu mytsaty mykaranaha.

Imysapybara zuba mozihikiknaha.

Batu aty tohi tsimysapyrēta. Suknihabyitsa.

¹³ Siharere batu imysapy. Siharerewabymybarētsa.

Pibytuhukunaha tu mybarapetu mynakanaha mysispihikbataikiknaha zuba.

¹⁴ Sisakparēnikitsa tu ustsas kytsa mysimyijaikiknaha iwa motsasokonaha.

¹⁵ Mysisukyrykynaha.

¹⁶ Ustsas kytsa namysapybyrikinaha nasimyitsapyriwykynaha.

Kytsa mysitsapyriwykynaha.

¹⁷ Siakubyitsa tu ustsas kytsa mysiaknikinaha.

¹⁸ Deus humo batu simyharerewaby. Ihumo batu siakparawy.

Iwa maha – niy. Iwa Deus harere papeu humo mysoho nitsasoko.

¹⁹ Iwa Moises spirikpowy ziwatahaka. Ana papeu humo Sudeutsa Deus soho ty nisihyrinomyryky. Iwaze Sudeutsa batu tyso:

– Katsaktsa Moises spirikpowy humo yhȳ tsinakaranaha – maha. Ana harere tyhi batu hȳ zikaha. Sudeutsabyitsa niwatihi iharere bo batu hȳ zikaha. Iwatsahi myzubaha tahaharere ty harapubeteke ba zikaha. Sudeutsa Sudeutsabyitsa kino niwatihi tahaharere ty harapubeteke ba zikaha.

²⁰ Iwatatu Deus batu ziky:

– O ikia Moises harere bo yhȳ tsimy iwatahi tsamysapyrēta tsimozik – Iwa ba ziktsaso ba ziky. Atahi:

– Moises sopykwy tsipihyrinomyryky zeka amysapybyitsa tu tsimykara tsimoewy iwatahi kahumo aspirikporēta tsimozik – niy.

Hawa Deus okzeka mymysapyrētsa tsimoziknaha.

²¹ Aba zuba hawa Deus humo mybarawy ezektsa simysapyrētsa moziknaha nitsasoko. Deus hi:

– Ikiahatsa ahamysapyrētsa tsimoziknaha. Batu Moises sopykwy humo ahamysapyrētsa tsimoziknaha ba zikaha – niy. Ana kino botu Moises nisihyrinomyryky. Tubabatu Deus sohokotsa kino niwatihi atsatu nisihyrinomyryky.

²² Deus hi:

– Asa zuba Sesus Kiristu harere bo hȳ mykaranaha asahi kaokzeka simysapyrētsa moziknaha. Sudeutsa, Sudeutsabyitsa kino niwatihi Sesus harere bo hȳ mykaranaha zeka kaokzeka simysapyrētsa moziknaha – my.

²³ Batu aty tohi imysapyrēnikita Deus wata my. Astsabanitsa mysapybyitsa tsimynakaranaha. Batu aty tohi Deus wata my.

²⁴ Deus mymysapywyky. Mymysapybyitsa tu tsikykaranaha ana humo hi Sesus Kiristu nihyrikosokda atahi mysapyzekenziakse iwatsahi mysapybyitsa tsikykaranaha ana humo hi batu sinini tsimaha. Sesus Kiristu mysapyzekenzi nihyrikosokda iwatahi Deus mype wasani tsimaha. Deus hi:

– Ikiahatsa Sesus Kiristu harere bo hỹ tsimykaranaha iwatsahi ahamysapyrētsa tsimoziknaha – my. Iwa mymysapywyky atahi myhumo tsimypokzitsiarēta.

²⁵ Deus hi Sesus Kiristu mybarawy bo zipaha. Mybarawy bo inasikze mybarawy ezektsa sapyzekenzi nihyrikosokda ana bo izumuze. Kytsa huak ty simysapybyitsa tu nikaranaha ana humo hi nihyrikosokda. Iwaze katsaktsa Sesus Kiristu harere bo hỹ tsimykaranaha mysapybyitsa tu tsikykaranaha Deus nimyokzohik h̃. Sesus Kiristu nihyrikosokdaze iwa kytsa simysapyrētsa moziknaha, iwa Deus kytsa nisihyrinomyryky. Tubabatu Deus tsiakubyrisorokrēta tu simysapybyitsa tu nikaranaha sinini ykarawy bo ba ziksipeha. Tapetu isopyk:

– Bykyze katse babata sisapyzekenzi mohyrikosokda iwaze asaktsa kaharere bo hỹ mykaranaha sinini ykarawy bo ba mysipeha – my.

²⁶ Abaka meky watu kytsa simysapybyitsa tu nikaranaha ana soho mytsaty mykara. Kytsa sizubarētsa bo simysapybyitsa tu nikaranaha humo ihuak ty sibo nyny my. Asaktsa Sesus harere bo hỹ mykaranaha simysapybyitsa tu nikaranaha batu mytsatyzo ziky.

– Ikiahatsa kaokzeka ahamysapyrētsa tsimoziknaha katse babata ahasapyzekenzi nihyrikosokda iwatahi pahaokzohik – my. Iwa sispirikporētsa mykaranaha.

²⁷ Iwatsahi – katsaktsa wasani tsimaha – ba ziktsasonaha. Mysoho ba ziktsasoziukunaha batu aty tohi tsimysapyrēta my. Deus okzeka Moises sopykwy humo yh̃ tsimykaranaha iwaze – mymysapyrētsa tsimaha – batu zikaha. Katsaktsa Sesus humo zuba mymysapyrētsa tsimaha. Ata humo hi myspirikporētsa tsimoziknahaze Deus mysoho tihi:

– Asaktsa katse humo zuba simysapyrētsa moziknaha – my.

²⁸ Katsaktsa Sesus harere bo hỹ tsimykaranahaze Deus okzeka mysapyrētsa tsimoziknaha. Katsaktsa Moises sopykwy bo yh̃ tsimykaranaha zeka Deus okzeka batu mysapy tsimaha. Iwa h̃.

²⁹ Deus Sudeutsa zuba ja iakparawy. Tozeka ja asa zuba mysisapywyky iwaze simysapyrētsa moziknaha. Batu ba. Deus kytsa sizubarētsa mywatuze Sudeutsa Sudeutsabyitsa bo kino niwatihy mysisapywyky, sizubarētsa Sesus harere bo hỹ mykaranaha zeka simysapyrētsa moziknaha.

³⁰ Deus kytsa sizubarētsa bo mysisapywy tsihikik. Sudeutsa Sesus harere bo hỹ mykaranahaze iwatsahi simysapyrētsa moziknaha. Sudeutsabyitsa kino Sesus harere bo hỹ mykaranahaze iwatsahi simysapyrētsa moziknaha. Mekywatu moziknaha.

³¹ Wastuhu kytsa ahatukze:

– Katsaktsa Moises sopykwy “O iharere mybo batu imysapy” tsimaha – iwa batu tyso, Sesus harere bo hỹ tsimykaranahaze Moises sopykwy humo niwatihy tsimyziwabykynaha.

4

Hawa Abarão nikara.

¹ Kyze Abarão soho bo mytsaty tsimaha. Atahi taparakta mydiri. Katsaktsa tsekokatsa tsimaha. Deus okezeka tsimysapyrēta niyzik ana hi motsasoko.

² Deus Abarão pe niy:

– Ikia tsimysapyrêta – niy. Atahi zisapywyky ja iwatahi Deus ipe niy:
 – Ikia tsamysapyrêta – niy. Batu ba. Nawa ha ty wasani nikara batu ana humo hi nitsasoko. Iwaze Abarão tapetu isopyk batu tyso:

– Utakta kamysapyrêta – my. Batu ziky.

³ Hawa Deus okzeka tsimysapyrêta niyzik ana ka motsasoko. Atahi Deus harere bo hyĩ ziknakara iwatahi Deus okzeka tsimysapyrêta niyzik. Iwa Deus harere papeu humo botu isoho mybo ziwatahaka.

⁴ Aty ipehatsa humo tarabaja mykara zeka ana humo hi ihuak ty okrysarowaka ty nyny niy. Itarabaja humo zuba okrysarowaka ty nyny niy. Wasani my. Deus iwa batu isopyk mykara.

⁵ Atahi myhumo iakparawy iwatahi iharere bo hyĩ tsimykaranaha zeka mymysapywyky. Asaktsa pisapywykynahaze ana humo hi batu sisoho:

– Ikiyahatsa ahamysapyrêta – iwa batu tyso. Batu ba. Asa zuba Sesus Kiristu harere bo hyĩ mykaranaha. Iwaze ispe my:

– Ikiyahatsa Deus harere bo hyĩ tsimykaranahaze ana humo hi ahaspirikporêta tsimoziknaha iwatahi aha pe “tsahamysapyrêta” – my. Tapara simysapybyitsa tu nikaranaha iwatsatu Deus harere bo hyĩ mykaranaha tsahi Deus okzeka simysapyrêta moziknaha.

⁶ Aty zeka Deus okzeka tsimysapyrêta, atakta tsakurêta hỹ. Ba zikmysapybyi iwatahi ja tsakurêta mopykyryk mytsaty ahabyita tsimykaranaha. Sesus harere bo hi hyĩ nikaraze tu iwatahi Deus ipe niy:

– Ikia tsamysapyrêta – nikara, ana harere humo hi tsakurêta niapykyryk. Taparakta mydiri Dawi atsatu nitsasoko:

⁷ – Asaktsa Deus harere ibyky Moises ziwataha ana humo batu hỹ nikaranaha batu zikaha.

Asaktsa sisopyksapybyitsa tu nikaranaha Deus Sesus humo zuba nisiokzohik iwatsahi sakurêta.

Simysapybyitsa nikaranahaze ana hi Deus nispiriktsokda tawata iwatsahi sakurêta.

⁸ Deus humo simysapybyitsa tu nikaranaha batu mytsaty ziky iwatsahi sakurêta.

Iwa Dawi taparakta mydiri botu nitsaso – Dawi niy.

⁹ Paze ja asaktsa tahapiak zizyzyknaha asa zuba sakurêta. Batu ba. Kytsa kino niwatihi sipiakzyzykyhybyitsa sakurêta niyziknaha. Iwaze Abarão soho bo mytsatyzo tsimahaktsa. Deus harere papeu humo isoho ziwatahaka:

– O Abarão Deus harere bo hyĩ ziknakara iwatahi Deus ipe niy: “Ikia tsasopyksapyrêta” niy. Iwa Deus harere papeu humo niy.

¹⁰ Anaharere nitsasokoze Abarão ipiakzyzykyhybyita aibatohi zuba tapiakzyk – iwa nitsasoko. Iwatsahi mypiakzyzykwy humo kytsa sakurêta ba zikaha. Deus kytsa pe my zeka:

– O ikiyahatsa ahasopyksapyrêta – my ana humo hi sakurêta.

¹¹ Tapara Abarão Deus harere bo hyĩ nikara iwaze Deus ipe niy:

– Ikia tsasopyksapyrêta – niy. Bykyze zuba tapiakpezyk, Deus humo tispirikporêta iwatahi ityryktsa niyzik. Iwa tahi:

– Utakta Deus harere bo hyĩ ikykara iwaze Deus kape niy: “Ikia tsasopyksapyrêta” – niy. Iwata Sudeutsabyitsa kino niwatihi sizyzykyhybyitsa tu Deus harere bo hyĩ mykaranaha zeka Deus ispe my:

– Ikiyahatsa ahasopyksapyrêta – my. Abarão Deus harere bo hyĩ nikara Sudeutsabyitsa kino niwatihi Deus harere bo hyĩ nikaranaha iwaze Abarão tahadiri wata niyzik.

¹² Sudeutsabyitsa sipiakzyzykyhybyitsa tu Abarão watsa maha. Sipi-akzyzykyhybyitsa tuze Deus harere bo zuba hyĩ nikaranaha. Sudeutsa ni-watihi Abarão watsa mozurukunaha Deus harere bo zuba hyĩ mykaranaha iwaze Deus ispe niy:

– Kaharere bo hyĩ tsimykaranaha zeka ahasopyksapyrëtsa – my. Asahi mydiri Abarão watsa maha.

Abarão Deus harere humo hyĩ ziknakara.

¹³ Tubabatu Deus Abarão pe:

– Mybarawy ty abo nyny my. Atsekokatsa nanabyitaba sizubarëtsa hudikhudikwy pehatsitsa moziknaha – niy. Abarão ana soho bo hyĩ niy. Batu sisopykwy bo pykyhy habyyitatu. Atahi Deus harere bo zuba hyĩ nikara iwatahi Deus ihumo zisapywyky.

¹⁴ Kytsa asahi sisopykwytsa humo zuba pykyhytu yhyĩ mykaranaha zeka ana humo hi Deus mysisapywyky iwa zeka mytsaty ahabyitsa tu mykaranaha. Kytsa Deus harere bo hyĩ mykaranahaze isapyrënikia ty sibo nyny my. Iwa Deus mykara iharere wasani my.

¹⁵ Aty Deus harere ibyky pykyhytu yhyĩ mykara Deus okzeka tsimysapyrëta tawata my atahi batu imysapy my. Batu aty tohi iharere ibyky humo yhyĩ zikaha. Iwatahi Deus batu iakparawy.

¹⁶ Iwatahi Abarão Deus harere bo hyĩ ziknakara ana humo Deus ipe niy:

– Utakta pasapywyky hyĩ iwa mozihikik – niy. Deus nikaraze pasapywyky iwaze atsatu mykara. Iwatsahi kytsa sizubarëtsa Deus harere bo hyĩ mykaranaha Abarão watsa iwaze Deus mysisapywyky. Abarão mydiri wata. Abarão Deus harere bo hyĩ nikara, katsa kino niwatihi iharere bo hyĩ tsimykaranaha, iwatsahi ihumo myspirikporëtsa tsimoziknaha.

¹⁷ Tubabatu Deus tapetu nikara:

– Kaokzeka Abarão aparakbahazo wata my. Atakta kaharere bo hyĩ mynakara asaktsa niwatihi nanabyitaba kaharere bo hyĩ mykaranaha iwata moziknaha – niy. Iwa Deus Abarão bo mytsaty niy. Deus ba hawa tohi zikzukninaha. Siakbatsa mynasihyrizikpowy. Ana ty hi mybarawy isuknihyize taharere humo inatakaha. Kyze Deus Abarão pe:

– Ikiya izo tsimozik. Atsekokatsa sizubarëtsa maha. Kytsa sizubarëtsa nanabyitaba ape mydiri mynakaranaha – niy.

¹⁸ Kyze Abarão tapetu nikara:

– Hawa Deus kape niy atsatu mykara – nikara. Nitsaikbata tu ihyrytsa byita. Iwatatu ziperyikik Deus harere bo hyĩ nikara, iwaze Deus harere humo tatse ziperyky.

¹⁹ Abarão nitsaikbata. Asiba sē anos niytyk tseheze itse nipuruk nitsaikbabaze. Ioke Sara kino niwatihi nitsaikbatatsa tu. Iwatatu tapetu ziknakara:

– O utakta katsebyita. Kaoke niwatihi itsaikbatatsa ba ziktabykyhy. Iwatatu Deus harere bo hyĩ mykara iwatahi katse mopuruk – niy.

²⁰ Iwatahi batu tyso:

– Tozeka ja Deus katse kabo myzipeha ja – iwa batu tapetu ziknakara. Atahi:

– Utakta iktsaikba iwatahu Deus harere humo katse mopuruk. Deus pe niy “ikia zuba amysapyrënikita. Piksapywyikik” – nikara. Pibyituhukutu Deus harere bo hyĩ ziknakara.

²¹ Abarão hi:

– Kytsa zikahabara ty atsatu Deus mykara, iwatahi izikwy humo katse mopuruk – my. Iwa tapetu ziknakara.

²² Iwatahi Deus ipe niy:

– O kaokzeka wasani tsimy – niy. Iharere bo hyÿ mykaraze tu Deus okzeka tisopyksapyrêta niyzik.

²³ Deus harere papeu humo botu ziwatahaka:

– Abarão Deus okzeka tisopyksapyrêta – niy.

²⁴ Ana harere myhumo kino niwatihi ziwatahaka. Taparaktsa papeu humo ziwatahanahaze:

– Ikiahatsa ahasopyksapyrêtsa tsimoziknaha. Deus harere bo hyÿ tsimykaranaha zeka Abarão wata – iwa taparaktsa nimityrinymyryky-naha. Deus humo Abarão oke tatse zipuruk.

Deus tse Sesus Kiristu inahyrikizipowy iwatsahi katsakta iharere bo hyÿ tsimykaranhaze Deus mypehatsa mozik. Sesus Kiristu zihyrikizipowy ata bo hi hyÿ tsimykaranaha.

²⁵ Deus tse Sesus Kiristu mybarawy bo inasik. Mysapybyitsa tu tsikykaranaha humo nihyrikosokda. Mysapy zeky nihyrikosokda ana hi. Myhuak niyzik, abaka mysapybyitsa tu tsikykaranaha katse humo mymokzohik. Deus zihyrikizipowyze mype my:

– Ikiahatsa Sesus harere bo hyÿ tsimykaranaha zeka katse humo ahasopyksapyrêtsa tsimoziknaha – niy.

5

Deus harere bo hyÿ tsimykaranaha zeka ana humo hi myspirikporêtsa tsimoziknaha.

¹ Abaka katsa Sesus harere bo hyÿ tsimykaranhaze mykurêtsa tsimoziknaha. Batu paikpa mytsaty tsimykaranaha. Taparaka Deus myhumo taokaniki abaka mahani. Sesus harere bo hyÿ tsimykaranaha iwatsahi Deus harereziuwytza tsimoziknaha.

² Sesus Kiristu hi:

– Asakta kaharere bo hyÿ mykaranaha – niy. Iwaze Deus myhumo mymysapywyky iwatahi mymytsumuêhĩkĩ iwa tsimyzurukunaha. Ana humo hi mykurêtsa, aibatohi Deus watsa tsimoziknaha anahi taperykynaha.

³ Abaka tsihokdaharêna humo sinini tsimykaranaha zeka mykubyrisorokrêtsa tsimoziknaha. Mypunihikrêtsa tsimoziknaha. Iwatsahi mykurêtsa hÿ.

⁴ Mykubyrisorokrêtsa zeka Deus mype:

– O ikiahatsa ahamysapyrêtsa – my. Iwa myhumo mymybetesakaze. Iwatsa tsimoziknaha ana hi taperykynaha.

⁵ Aibatohi Deus watsa tsimoziknaha anahi wasani hÿ. Ana hi taperykyze wasani mytsaty tsimykaranaha, Deus myhumo tsimypokzitsiukrêta tahyrikoso humo kino mymyhyrinymyryky.

⁶ Katsakta mysapybyitsa tsikykaranhaze Kiristu mypokzi mysapyzeky nihyrikosokda. Nawa zuruze Deus botu ziwatawyze Kiristu nihyrikosokda.

⁷ Batu aty tohi usta sapyzeky ba zikyhyrikosokda. Aty zeka ja sisopyktsa pykyhytu yhÿ mykara tsihokdaharêna isapyzeky mohyrikosokda batu aty tohi mohyrikosokda tsihikik. Atakta ustsya kytza humo mysisapywykik tozeka ja aty zeka isapyzeky mohyrikosokda.

⁸ Kiristu ta meky watu my. Katsakta mysapybyitsa tu tsikykaranhaze iwaze hi Kiristu mysapyzeky nihyrikosokda. Kiristu mysapyzeky nihyrikosokda ana bo hi mytsaty tsimykaranaha. Deus myhumo tsimypokzitsiukrêta babata ana humo hi myhyrinymyrêtsa.

⁹ Kiristu mysapyzeky nihyrikosokda abaka iharereziuwytza tsikyziknaha. Ihumo Deus mype:

– O ikiahatsa ahamysapyrëtsa – mykara. Iwatahi Deus sinini ykarawy bo ba zikmypeha iwa hỹ.

¹⁰ Tapara tuze katsaktsa Deus sukyrytsitsa tsikykaranaha. Abaka mahani. Katsaktsa iharereziuwyttsa tsimaha, Kiristu mysapyzemy nihyrikosokdaze iwatsahi Deus harereziuwyttsa ihumo tsikyzyknaha. Abaka katsa Deus harereziuwyttsa tuze Kiristu ispituu niyzikzo mymytsumuëhĩkĩ hỹ. Hawa mozihihikik izikwy humo hi tsimykaranaha.

¹¹ Sesus Kiristu mypokzi nihyrikosokda iwaze Deus harereziuwyttsa tsikyzyknaha. Ana humo kino Deus hi:

– O ikiahatsa kaharereziuwyttsa – niy. Iwatsahi mykurëtsa hỹ.

Taparakta Adão Kiristu ahatsa soho mytsatyziuu tsimykaranaha.

¹² Taparakta Adão Deus nizukni atahi isopyksapybyita nikaraze nihyrikosokda. Abaka katsa mywatu mysopyksapybyi humo tsimykaranahaze Adão watsa tsimyhyrikosokdanaha.

¹³ Taparaktsa Deus harere ibyky Moises ziwataha humo sihyrinymyrybyitsa tu iwatsa hi sisopyksapybyitsa tu nikaranaha ana humo hi nihyrikosokdanaha.

¹⁴ Iwaze mybarawy ezektsa sisopyksapybyitsa nikaranaha nihyrikosokdanaha. Simysapybaratsa nikaranaha batu atsatu Adão sapybyri waka niy. Kytsa sizubarëtsa simysapybyitsa tu nikaranaha humo mohyrikosokdanaha.

Adão soho bo mytsaty tsimykaranaha. Itsekokatsa iwata sisopyksapybyitsa tu nikaranaha. Asaktsa Sesus Kiristu harere bo hyỹ mykaranahaze ityryktsa moziknaha iwata moziknaha simysapyrëtsa moziknaha.

¹⁵ Asaktsa petoktsa meky watu maha, Adão Kiristu ahatsa. Adão estuba zubata atahi Deus harere bo batu hyỹ ziky iwaze isopyksapybyita tu nikara itsekokatsa kino niwatihi iwata sisopyksapybyitsa tu nikaranaha, iwatsahi sinini nikaranaha.

Kiristu ata zubata niwatihi atahi Deus harere bo hyỹ ziknakara. Deus imysapyrënikita tu isapyrënikia ty kytsa bo nyny isopyk. Mymysapywyikik. Atahi Kiristu mybo inasik mysopyksapybyitsa tu mykaranaha ihumo mymyokzohik. Iwaze Kiristu ata zubata tu nimysapywyiky atahi nihyrikosokda anahumo kino kytsa sizubarëtsa ihumo simysapyrëtsa moziknaha.

¹⁶ Deus kytsa bo mysisapywyiky ahabo motsasoko. Kytsa sisopyksapybyitsa tu mykaranaha Adão humo ahabo motsasoko. Adão Kiristu ahatsa meky watu maha. Adão isapybyita niyze Deus ipe niy:

– Kaokzeka batu amysapy – niy. Mybarawy ezektsa, Adão tsekokatsa tu simysapybyitsa tu mykaranaha iwatahi Deus ispe my:

– Kaokzeka batu ahamysapy tsimykaranaha – niy. Sisopyksapybyitsa tu nikaranaha iwatatu asaktsa Sesus Kiristu harere bo hyỹ mykaranaha Deus ispe my:

– Kaokzeka ahamysapyrëtsa – my.

¹⁷ Taparakta Adão imysapybyita tu nikara. Itsekokatsa niwatihi iwatu sisopyksapybyitsa tu nikaranaha. Iwatsahi mybarawy ezektsa mohyrikosokdanaha. Sesus Kiristu tsimysapyrëta tu nihyrikosokda. Iwatsahi ihumo Deus mymysapywyikik. Kytsa Sesus Kiristu harere bo hyỹ mykaranahaze Deus ispe my:

– Kaokzeka ahasopyksapyrëtsa – my. Iwatsahi asaktsa Deus tuk tahawahi mynapykyryknaha, Kiristu zikwy humo sipunihikrëtsa moziknaha.

¹⁸ Iwaze taparakta Adão isopyksapybyita tu nikara. Deus harere bo batu hyỹ niy. Itsekokatsa niwatihi iwata sisopyksapybyitsa tu nikaranaha. Iwatsahi Deus ispe niy:

– Ikiahatsa batu ahamysapy iwatsahi ahawahi sinini tsimykaranaha – niy. Sesus Kiristu Deus harere bo hỹ ziknakara iwazehi mybarawy ezektsa iharere bo hỹ mykaranahaze Deus tuk tahawahi mynapykyryknaha.

¹⁹ Estuba maku Adão inarokota Deus harere bo batu hỹ niy. Iwatahi ihumo mybarawy ezektsa Deus okzeka batu simysapy niyziknaha. Adão watsa zimyikinaha. Sesus Kiristu atahi Deus harere bo hỹ ziknakara. Iwatahi Deus kytsa sizubarëtsa pe:

– Kaokzeka ahamysapyrëtsa tsimoziknaha. Kaharere bo hỹ tsimynakaranaha Kiristu watsa batu mymyiwy – my.

²⁰ Tubabatu Moises Deus harere ziwatahaka. Ataharere humo Moises sopykwy nisihyrinomyry. Mybarawy ezektsa ana harere humo batu h̃ niaha, iwaze sisopyksapybyitsa naobaranaha. Kytsa sisopyksapybyitsa tu nikaranaha niubara iwaze Deus isapyrënikia kino niwatihi niubara. Atahi imysapyrënikita my.

²¹ Iwaze mybarawy ezektsa sisopyksapybyitsa ziknakaranaha mohyrikosokdanahaze sinini ykarawy bo maha. Deus hi imysapyrënikita nimysapywyky, iwatahi Kiristu mybarawy bo inasik mysopyksapybyitsa tsimykaranaha Deus ihumo mymyokzohik. Mysopyksapybyiri tawahi tamoewy iwatsahi Sesus harere bo hỹ tsimykaranaha zeka tsimyhrikosokdanahaze Deus tuk mywahi tsimynapykyryknaha h̃.

6

Mysopyksapybyika tamoewy. Deus harere bo hỹ tsimahaktsa.

¹ Kyze mysopyksapybyitsa tu tsimykaranahaze iwa zeka Deus mymysapywytohi. Ana humo hi tozeka ja wastuhu kytsa tihi:

– Mysopyksapybyitsa tu tsimahaktsa kytsa! Iwaze Deus isapyrënikia ty mybo nyny my h̃ – maha.

² Nawa batu tyso. Nihyrikosokdata batu amy tohi ty ziky. Iwatsa katsa Sesus Kiristu harere bo hỹ tsimykaranaha zeka mysopyksapybyitsa tu tsikykaranaha batu tsihik.

³ Nimyharasusunahaze Kiristu tuk tsinapykyryknaha, iwatsahi iwata at-satu mytsaty tsimykaranaha ana hi ahahyrinomyrëtsa h̃. Kytsa nymyharasusunahaze mysopyksapybyi tsmoewynaha, nihyrikosokdata wata mysopyksapybyity ka ba zikahazonaha.

⁴ Nimyharasusunahaze:

– O hawa Kiristu mozhikik naha wa zuba hỹ tsimykaranaha – maha ana hi ziwatawy. Kiristu nihyrikosokda izo hi nizihikik Deus zikwy humo inahyrizikpo. Iwata hawa Kiristu mozhikik ana humo hi hỹ tsimykaranaha, iwaze mysopyksapybyritsa tu tsimykaranaha tamoewynaha Sesus watsa mytsatyo, meky watu tsimyzurukunaha. Sesus zikwy humo meky watu tsmoziknaha.

⁵ Kiristu mysapyzeken iharapatawyhyta humo nihyrikosokda. Ana hi nizihikik. Katsaktsa mysopyksapybyiwy tamoewyba. Ana hi tsimyzihikiknaha. Deus zikwy humo Kiristu inahyrizikpo. Katsa meky watu tsmoziknaha Sesus Kiristu zikwy humo mekywa tu tsimyzurukunaha. Ihumo zuba mysapyrëtsa tsmoziknaha.

⁶ Tapara hawa ha ty batu imysapy tsikykaranaha. Abaka hawa haty imysapybara ty batu typeha zikaha. Mysopyksapybyitsa tu tsikykaranaha mysukatsihikrëtsa tsikaha. Abaka meky watu tsmoziknaha, meky watu tsimyzurukunaha tisapyrëna humo zuba tsimyzihikiknaha. Kiristu nihyrikosokdaze izikwy zuba mytuk mynapykyryk, izikwy humo zuba meky watu tsimyzurukunaha, katsaktsa tasapywyky myzo wata tsimaha.

⁷ Aty mohyrikosokda zeka batu amy tohi bo mytsaty zikaha. Iwaze atakta nihyrikosokdaze, tasapybyi ty ziknakara batu ziky, imysapybara ba zikzihik.

⁸ Iwatsahi Kiristu tuk tsinapykyryknaha. Kiristu mysapyzekenihyrikosokda iwahahi nizihikik. Katsakta mysopyksapybyitsa tu tsimykaranaha tamoewy tsihikik iwatsahi Kiristu tuk mywahi tsinapykyryknaha, iwa mytsaty tsimykaranaha.

⁹ Kiristu nihyrikosokdaze petok zuruze Deus zihyrikopowy. Abaka ba zikyrikosokdazo. Tawahi mynapykyryk. Ba hawa tohi zikzoninaha.

¹⁰ Nihyrikosokdaze mysopyksapybyiwy ihumo nisiokzohik. Estuba zuba nihyrikosokda ba zikyrikosokdazo. Abaka Deus tuk tawahi mynapykyryk, Deus mozhikik naha ty zuba mynakara.

¹¹ Iwatsahi ikiahatsa ahasopyksapybyiwy tsimoewynaha kytsa meky watu tsimoziknaha. Kiristu harere bo zuba hỹ tahakta ana humo hi mytsatziu taha!

¹² Iwatsahi imysapybara ba zikzihiknaha. Imysapybara bo ka mytsaty mytsaty byitaha! Batu tyso – Estuba zuba imysapybara piakpy tsihikik – iwa ba zikaha.

¹³ Ikiahatsa Deus tyryktsa. Deus zuba ahapehatsa. Iwatsahi ahasopyksapybyitsa tsimykaranahaze niwazuba pyktaha! Tapara imysapybara ty tsikykaranaha iwaze hi sinini tsikykaranaha. Abaka mekywa tu tsimyzurukunaha, Deus tuk ahawahi tsinapykyryknaha. Iwatsahi Satanas harere bo batu h̃ tsimaha. Mekywa tu tsimaha iwaze tu tyzisapywykynahakta! Ikiahatsa tihi:

– O Deus myzo ikia zuba tynamypehakakta. Ikia zuba tymytsumuēh̃kta iwaze azikwy humo wasani tsimyzurukunaha – tsimaha. Iwa Deus pe tsimahakta!

¹⁴ Abaka Deus mype:

– Ikiahatsa ahasopyksapyr̃tsa – my. Iwa mybo motsasoko atahi mymysapywyky iwatsahi ihumo zuba wasani tsimykaranaha. Tapara katsakta Moises sopykwy bo yh̃ tsikykaranaha zeka iwa batu tyso. Iwaze Deus mymysapywyky ana humo hi Satanas harere bo batu h̃ mysopyk. Imysapybara ty ka ikiahatsa ba ziaksenaha.

Abaka Deus harere bo zuba hỹ tsimykaranaha.

¹⁵ Katsakta Deus okzeka mysapyr̃tsa tsimoziknaha. Deus hi Kiristu zipedahik mybarawy bo inasik atahi mypokzi nihyrikosokda nawa Deus mybo zisapywyky. Moises sopykwy bo yh̃ tsikykaranahaze ana humo hi mysopyksapybyitsa tu tsikykaranaha, sisopykwy bo yh̃ tsikykaranaha. Abaka Sesus harere bo hỹ tsimykaranaha zeka ana humo hi Deus okzeka mysapyr̃tsa tsimoziknaha. Tozeka ja ana humo hi wastuhu kytsa tihi:

– Katsakta mysopyksapybyitsa tu tsimykaranaha zeka wasani tsimaha – iwa motsasokonaha zeka batu imysapy.

¹⁶ Ikiahatsa aty bo tsimaha zeka:

– O ikia kapehatsa – tsimaha.

Yh̃ atakta ahapehatsa mozik. Iharere humo zuba ma tsimykaranaha. Batu petoktsa ahapehatsa, estuba zuba ahapehatsa. Aty zeka imysapybara ty myzihikik atsatu mykara, atahi mohyrikosokdaze sinini ykarawy bo my. Aty zeka Deus harere bo hỹ mykara Deus ibo pisapywyky hawa tisapyr̃nikia ty mozhikik, iwatsahi wasani mykaranaha, mohyrikosokdanahaze Deus tuk tahawahi mynapykyryknaha. Anaharere botu ahahyrinymyr̃tsa batu petoktsa ahapehatsa ana humo hi mytsatziutahakta kytsa tsimaha.

¹⁷ Taparaka mysapybyitsa tu tsikykaranaha batu pyk tsikaha. Iwaze Deus soho wasania ty tsiwabynaha. Tsiwabytokto nahaze ana myhyrinymyrywy wasani baba iwatsahi hyĩ tsikykaranaha. Iwaze Deus pe:

– O ikia zuba amysapyrēnikita – tsimykaranaha.

¹⁸ Deus zikwy humo amy ty sa tisapyrēnikia ty zuba tsimyzihikiknaha. Deus zikwy humo imysapybara tamoewynaha.

¹⁹ Taparaka tsikmysapybyrikinaha. Imysapybara ty tsikykaranaha. Abaka Deus okzeka ahamysapyrētsa tu iwatsahi isapyrēnikia ty zuba tsimykarana-haktsa!

²⁰ Tsipimiwynahaze batu wasani tsimyzurukunaha. Ahamysapybyitsa tu tsikykaranahaze Deus harere bo ma ahabyitsa tsikykaranaha.

²¹ Tsimysapybyikinahaze imysapybara ahahuak mozik. Imysapybyikia ty zuba tsipiaksenaha. Kytsa simysapybyikitsa sinini ykarawy bo maha. Iwatsahi ahamysapybara humo mytsaty tsimykaranahaze ahasikpybyrētsa tsimoziknaha.

²² Abaka meky watu tsimaha. Deus hyrikoso botu ahatuk mynapykyryk iwatsahi ahamysapybyitsa tu tsikykaranaha ba ziktsihiknaha. Imysapybara humo kazekta niwazuba Sesus Kiristu wata tsimoziknaha ana hi ahahuak mozik. Tsimyhyrikosokdanahaze Deus tuk ahawahi tsimynapykyryknaha.

²³ Asaktsa sisopyksapybyitsa mynakananaha humo mohyrikosokdana-haze Deus tuk ba zikokpykyryknaha, sisapy metutu batu Deus tuk zikaha. Utsaktsa Sesus harere bo hyĩ mykaranaha Deus tuk tahawahi mynapykyryknaha. Simysapyrētsa iwaze Deus mysisapywyky ana humo hi ituk mynapykyryknaha. Asahi Sesus Kiristu tuktsa iwata mytsaty mykaranaha. Iwaze Deus kytsa bo mysisapywyky. Sesus namy huak mahaka kytsa ba kōpara zikaha, Deus hi Sesus tuktsa bo nyny isopyk ituk tahawahi mynapykyryknaha.

7

Maku tasukzazeky ana humo hi mymyspirikpowyky.

¹ O katukytsa aokze tuze zuba mybarawy ezektsa sopykwy ty yhĩ tsimykaranaha. Tsimyhyrikosokdanaha zeka sisopykwy bo batu hĩ zikaha. Ana humo hi ahahyrinymyrētsa.

² Iwa wytyk ipytsakatatsa tuze tabarikta tuk napykyryk, ibarikta atatu zeka atatsa kino ituk napykyryk. Iwa mybarawy ezektsa sopykwy. Ibarikta mohyrikosokda zeka meky watu maha. Atatsa haramukuka mozik iwatat-satu mektatu piakse wasani my. Mybarawy ezektsa sopykwy.

– Ikia usta maku piakse wasani my – maha.

³ Atatsa ibarikta atatu zeka mektatu ba ziaksenaha, pihuahua zeka mybarawy ezektsa sopykwy tihi:

– Atatsa batu imysapy – maha. Ibarikta mohyrikosokda zeka mektatu piakse zeka wasani my. Ibo tahyrikwy zeka mybarawy ezektsa sopykwy humo wasani my.

⁴ O katukytsa ikiahatsa atatsa watsa tsimaha. Tapara ikiahatsa hi:

– Deus harere Moises sopykwy bo yhĩ tsikykaranaha iwatsahi mysapyrētsa – iwa mytsaty ahabyitsa tu tsikykaranaha. Ana harere batu wasani my. Moises sopykwy bo hyĩ batu zikaha iwatsahi iharere tsmoewykbaiknaha atatsa watsa. Atatsahi ibarikta nihyrikosokdaze zerekik iwaze usta tuk mynapykyrykze wasani my. Abaka ikiahatsa Sesus tuk mynapykyryk ihumo ahamysapyrētsa tsimoziknaha. Atahi mysapyzeky nihyrikosokda, iwatsahi iharere bo zuba hyĩ tsimykaranaha, ihumo myspirikporētsa tu zeka

mysapyrētsa tsimoziknaha. Iharere bo zuba hỹ tsimykarana ha iwaze usts a kytsa bo izikwy humo tysisapywykynaha.

⁵ Taparaka nawaha zuba katsaktsa tsikzihikiknaha astsatu tsikykarana ha. Mybo zuba mytsaty tsikykarana ha. Deus harere tsiwaby nahaze imysapybara humo tsinymyrykynaha. Iwatsatuze mysapybyitsa tu tsikykarana ha Deus mytuk ba zikykyryk, sinini ykarawy bo tsimaha.

⁶ Tapara Moises sopykwy bo yhỹ tsikykarana hatsa watsa katsaktsa ana kino iharere bo hỹ batu zikaha. Abaka Deus namykse, iwatsahi izikwy humo Deus harere bo hỹ tsimynakarana ha. Mekywatsatu tsimoziknaha Deus hyrikoso mytuk mynapykyryk. Iwaze Deus mozihikikze ana ty hi yhỹ tsimykarana ha ihyrikoso humo. Moises sopykwy ana kino Deus harere ibyky papeu humo botu ziwatahaka ana humo ka batu h̃y tsimaha, ana humo hi simysapybyitsa nikarana ha.

Moises Deus harere ibyky ziwataha ana humo nimyspirikpoko.

⁷ Tozeka ja wastuhu kytsa tihi:

– Moises sopykwy, Deus harere ja. Hawa sa Moises nimyhyrinomyky batu sapy ja – maha. Batu ba. Iwa batu tyso. Ana harere humo hi Deus okzeka batu sapy nimyhyrinomyryky. Deus harere Moises ziwatahaka:

– Usts a namy humo ahazokdibyrhuktsa – my. – Usta namy ty mozi-hikik zeka ana harere bo hi mytsaty mykara, hawa batu imysapy mykara pihyrinomyryky. Moises sopykwy humo kaspirikporēta.

⁸ Ana watahaha zinyze usts a kytsa namy mozihikik zeka Deus okzeka batu imysapy. Iwatatu usta namy ikzihikik ana watahaha humo hi. Ana harere tisapyrēna iwaze hawa Deus okzeka batu kasapy pikwatawy. Deus harere tisapyrēna. Amy ty sa mozihikik ana ty hi batu imysapy.

⁹ Taparaka Deus harere humo batu kahyrinomyry mytsaty habiyta ziknakara.

“Utakta Deus okzeka kamysapyrēta” – ziknakara. Kyze iharere humo ikspirikpokoze amy ty batu imysapy kahyrinomyrēta. Iwaze kapetu kasopyk:

– O utakta kamysapybyita tu mykara. Deus okzeka batu imysapy – ikykara.

¹⁰ Deus harere mybo nitsasoko iwaze mymytsumuēh̃k̃i iharere humo hỹ tsimykarana ha zeka mywahi ituk tsimynapykyryknaha. Ana harere humo hi kapetu kasopyk:

– Utakta kamysapybyita tu ikykara iwatahi Deus tuk kawahi ba zik kapykyryk. Kamysapybyita tu ziknakara ana humo hi Deus tuk ba zik kapykyryk – ikykara.

¹¹ Taparaka katuktu zuba mytsaty ziknakara:

– Utakta kamysapyrēta – mybarapetu ikykara. Kamysapybyita tu ikykara. Kapetu kasopyk zeka kamyspihikbatarēta mykara. Kyze Deus harere ty zinymyrykyze kamysapybyita tu ikykara ana humo hi kahyrinomyrēta ikzyzik. Kamysapybyita tu ikykara Deus tuk kawahi ba zik kapykyryk zinymyryky.

¹² Iwaze Deus harere ibyky anatyhi Moises ziwataha isopykwy wasani my. Anahi mybo nizapiksoko Deus harere my. Ana harere humo hi amy ty wasani mymywatawyky iwatahi kytsa mysitsumuēh̃. Ana harere hi isapyrēnikia h̃y.

¹³ Aty zeka ja:

– Ana harere humo Deus tuk kawahi ba zik kapykyryk kamysapybyi humo iwatahi iharere batu imysapy – my. Deus harere isapyrēnikia zuba. Ana

harere humo mybarawy ezeiksa simysapybyitsa tu nikaranaha soho mysi-hyrinymyrykynaha. Kytsa ana harere tyhi sihyrinymyrybyitsa tu iwatsahi tahapetu sisopyk:

– Katsaksa mysapyrētsa tsimykaranaha – mytsaty ahabyitsa nikaranaha. Utakta Deus harere iwabyze kapetu kasopyk:

– Utakta Deus okzeka kamysapybyita tu ziknakara – iky.

Moises Deus harere ibyky ziwatahaka naha humo mytsatyziyu ikykara.

¹⁴ Kyze tubabatu Deus harere ty mybo niy. Ihyrikoso humo iharere ziwataha. Deus harere ibyky Moises nimyspirikpoko. Anatyhi isapyrēnikia ty tsipinymyrykynaha. Utakta zuba batu kamysapy mynakara, kasapybyita tu mynakara. Amy ty sa batu imysapy ana kino yh̄y mynakara iwatahu batu ity tsihik. Tabo zuba mykara zeka iwaze Deus hyrikoso bo batu h̄y ziky.

¹⁵ Amy ty batu imysapy mykaraze kapetu kasopyk:

– Amy skaraba kamysopyksapy mykara. Ana kino batu ity tsihik – my. Kamysapybyita tu mykaraze kapetu kasopyk:

– Amy skaraba ana ty hi iky. Isapyrēnikia ty zuba kakparawy, iwatahu batu kamysopyksapy iky – my.

¹⁶ Iwatahi kamysopyksapybyita tu kapetu kasopyk:

– Utakta kamysopyksapybyita tu Deus harere zuba tisapyrēna – mykara. Amy skaraba batu imysapybara h̄y mozhikikze anatihi mykara.

¹⁷ Amy skaraba batu imysapy batu ity tsihik. Hawa mozhikikze wasanikia ty ana kino kakparawy. Iwatahu hawaha batu imysapy mykara. Wasanibyikia ty yh̄y ikykara iwatahi pimysapybyriwyky.

¹⁸ Uta pisapywy tsihikik batu ziky. Hawa wasanikia ty mozhikik batu ziky. Isapyrēnikia batu katuk my.

¹⁹ Wasaniha ty mozhikik. Kyze imysopyksapy mykara. Hawa wasanibyikia ty batu ity tsihik iwatahu atsatu mynakara.

²⁰ Hawa mozhikik ana humo hi batu mynakara. Amy humo wasanibyikia ty katuk mynapykyryk ana humo hi kamysopyksapybyita tu ziknakara.

²¹ Iwaze wasanikia ty mozhikik zeka ana kino batu ziky. Wasanibyikia ty zuba mynakara. Iwa mozuruku.

²² Uta hiba Deus harere humo kakurēta mynapykyryk.

²³ Pisapywy tsihikikta tu imysapybara ty zuba mynakara. Imysapybara zuba katuk mynapykyryk iwatahi kamysapybyita tu mynakara. Kapunihikbyita iwatahi yh̄y zuba kasopyk. Iwatahi batu kaku.

²⁴ Kasukatsihikrēta h̄y.

– Aty sa piksumuēhī. Utakta sinini ykarawy bo my. Aty sa pikykse – mykara.

²⁵ Sesus Kiristu mypehakatsa pikykse h̄y. Ata hi ipunihikanikita, iwatahi izikwy humo kapunihikrēta mozik. Iwaze uta Deus pe my:

– O ikia zuba amysapyrēnikita – mykara. Uta zubaze imysapybara ty zuba mynakaraze, Kiristu zikwy katuk byizeka imysapybara ty mynakara.

Utakta Kiristu zikwy humo Deus harere bo yh̄y mynakara, iwaze imysapybara humo ka ja katy peha peha byity. Niwazuba mynakara.

8

Deus hyrikoso mytuk mynapykyrykze meky watu tsimyzurukunaha.

¹ Iwatsahi abaka asakta Sesus Kiristu zikwy humo mozurukunaha simysapyrētsa moziknaha. Iwatsahi Deus batu sibo tyso:

– Sinini ykarawy bo pahapeha – iwa batu tyso.

² Deus hyrikoso pikpehaka iwaze izikwy katuk mynapykyryk, ihyrikoso pikpehaze ba zimyi. Iwatahi wasanibara humo ka ja katy peha peha byity. Deus sinini ykarawy bo ba zikpeha.

³ Katsakta mypunihikbyitsa tu Deus harere bo batu yhỹ tsimykaranaha. Iwatsahi Deus okzeka batu imysapy h̃y, iharere bo ka batu hỹy ziknakaranaha. Iwaze Deus tatse mybarawy bo zipeha, mywata niyzik. Atahi tsimysapyrēta mybarawy bo inasik mywata niyzik. Ata zuba mybarawy ezektsa tuk imysapyrēnikia ty ziknakara. Iwatahi mysapyzesty nihyrikosokda. Mysapybyikitsa tu tsikykaranaha iwatahi nimysapyzesty abaka izikwy humo mysapybyikitsa tu tsikykaranaha tsmoewynaha. Ihumo batu mymyi.

⁴ Deus iwa niy, imysapyrēnikia bo zuba tsimykaranaha. Abaka Deus zikwy humo iharere bo hỹy tsimykaranaha. Ihyrikoso hi mytuk mynapykyryk iwatsahi Deus harere bo ma tsimykaranaha.

⁵ Asakta taha bo zuba mytsaty mynakaranaha iwahi mozihikiknaha zuba mykaranaha. Ustsakta Deus hyrikoso bo yhỹ mynakaranaha Deus harere zuba mysipehaka iwa Deus mozihikik ana ty hi zuba mykaranaha.

⁶ Asakta taha bo zuba mytsaty mynakaranaha sinini mykaranaha. Deus tuk ba ziktahasapynaha. Ustsakta Deus hyrikoso mozihikik ana bo hi mytsaty mynakaranaha atahi mysiakuwyky. Ba paikpa mytsaty zikaha. Deus tuk tahawahi mynapykyryknaha.

⁷ Aty zeka ta humo zuba mytsaty ziknakara zeka tsiakyriukrēta mozik. Deus harere bo batu hỹy my ana harere bo ka ba h̃y ziky.

⁸ Aty zeka tahumo zuba mozihikik ana ty hi mykaraze Deus ihumo batu iaku.

⁹ Iwaze ikiahatsa hi Deus hyrikoso bo hỹy tsimykaranaha. Iwaze hawa skaraba taha humo pahapehakanahaze batu h̃y tsimaha Deus hyrikoso humo pahatsumuēh̃kī. Deus hyrikoso ahatuk zikykykyk byizeka batu Deus hyrytsa zikyzyknaha.

¹⁰ Kiristu ahatuk mynapykyrykyk zeka ihyrikoso pahapehaka iwa ihumo meky watu tsmoziknaha. Ahamysapybyitsa tu tsikykaranaha anahumo hi tsimyyhyrikosokdanaha iwatsatu Deus hyrikoso humo myspitu tsmozikzonaha. Iwa Kiristu nikara. Kiristu mysapyzesty nihyrikosokdaze Deus okzeka ahamysapyrētsa tsmoziknaha, iwatsahi Deus hyrikoso humo myspitu tsmozikzonaha.

¹¹ Deus hi Kiristu zihyrizikpowy. Deus hyrikoso ahatuk mynapykyryk zeka tsimyyhyrikosokdanahaze ana humo kino niwatihi mynamyyhyrizikpowy Sesus Kiristu wata. Iwa my ihyrikoso humo, atahi ahatuk mynapykyryk. Izikwy humo mynury ezytyk mozikzo tsimaha.

¹² O katukytsa hawa Deus hyrikoso mozihikik naha humo tahaktsa! Deus mymysapywyky iwatsahi mysapybyiwy tsmoewynaha.

¹³ Ikiahatsa ahabo zuba tsimynakaranaha zeka Deus tuk batu ahawahi tsimynapykyryknaha. Ikiahatsa hi ahape tu ahasopykze:

– Mysapybyitsa tu tsimykaranaha zeka Deus zikwy humo imysapybara tsmoewynaha – tsimaha. Iwaze Deus tuk ahawahi tsimynapykyryknaha.

¹⁴ Asakta Deus hyrikoso mysipehaka iharere bo zuba hỹy mynakaranaha asahi Deus hyrytsa babatsa maha.

¹⁵ Deus hyrikoso inamykse. Ihyrikoso humo Deus myzo mozik, katsa ihyrytsa tsmoziknaha. Ana humo hi batu mypyby, batu ba, katsakta Deus pe mysopyk:

– O kazo ikia myzo babata – tsimykaranaha. Deus hyrikoso mytuk zeka iwa tsimytsasokonaha h̃y.

¹⁶ Ihyrytsa babatsa tsimoziknahaze Deus pe:

– Myzo – tsimaha. Ihyrikoso atsatu mynakara. Atahi mype:

– Ikiahatsa Deus hyrytsa babatsa – mynakara.

¹⁷ Iwaze katsa Deus hyrytsa tsimoziknahaze Deus isapyrēnikia ty mybo nyny my ihyrikyky wata. Deus isapyrēnikia ty Kiristu bo botu nyny niy. Katsa kino niwatihi Kiristu tuk isapyrēnikia ty mybo nyny my. Abaka kytsa humo sinini tsimykarana, asaktsa Sesus harere bo batu h̄y zikaha mymysukyrykynaha. Aiba zuba Kiristu atsaesubaha mysipehaka katsa kino niwatihi itukytsa mysipehanaha, batu sininizo zikaha.

Sesus Kiristu humo Deus tsizubarēna ty nizukni mymysapywyky.

¹⁸ Katsaktsa mybarawy eze tu sinini tsimykarana. Aiba zuba mysapyrētsa tsimoziknaha h̄y. Batu amy tohi anawata hawa sinini tsiknakanaha mopykbaik. Amy ty imysapynikia ty tsizubarēna ezytyk mozik. Iwatsahi batu paikpa mytsaty tsimahaktsa!

¹⁹ Tsizubarēna Deus nizukni ana hi aparakbaha taperyky. Deus hi:

– O asaktsa kahyrytsa. Asahi katse babata watsa – my. Ana harere hi tapery.

²⁰ Mybarawy Deus nizukni tisapyrēna my kytsa humo zuba zimiywy. Aiba zuba mybarawy ezytyk mozik. Taparakta Adão isopyksapybyita nikara ihumo hi mybarawy zimiywy. Deus hi mybarawy nizukni Adão imysapybara humo batu imysapy niyzik. Iwatsahi tsizubarēna Deus nizukni taperykynaha. Deus mybarawy ezytyk mozuknizo ana hi taperykynaha.

²¹ Katsaktsa Sesus Kiristu wata tsimoziknahaze mybarawy ezytyk mozik. Ba zikpyk isapyrēnikia mozik h̄y.

²² Abaka tsizubarēna Deus nizukni sinini mykara, batu ezytyk bara hi iwaha hi mybarawy wytyk watatsa, atatsahi tabykyhy piperykyze tsimiytsapyrētatsa. Itse mopurukze zuba tsakurētatsa mozik. Katsa kino niwatihi mybarawy ezytyk taperyky bykyze mykurētsa h̄y.

²³ Katsa niwatihi tsipiperykynaha. Deus myzo abaka katsa batu mymypykyhy, myraparētsa, myrapukrētsa imysapybara mytu mynapykyryk. Iwatsahi batu myku. Aiba zuba mykurētsa tsimoziknaha botu Deus mymysapywyky abaka Deus hyrikoso mytuk mynapykyryk atahi mymyhyrinomyryky. Atahi:

– Aiba zuba Sesus Kiristu wata tsimoziknaha. Deus ahasoho “asaktsa kahyrytsa babatsa” my. Ahanury ty ezytyk ty ahabo nyny my – Deus hyrikoso my. Mekywatu tsimoziknaha. Iwa mymyhyrinomyryky ana hi taperyky.

²⁴ Deus inamykse. Iharere bo h̄y tsimykarana h̄y inamykse ata humo hi meky watu tsimoziknaha ana humo hi myhyrinomyrētsa h̄y. Abaka meky watu tsimoziknaha, aiba zuba Kiristu wata tsimoziknaha ana humo hi mykubyrisorokrētsa.

²⁵ Zikozo naha bara zuba taperyky. Iwatsahi makubyrisorokrētsa tu Deus isapyrēnikia ty taperyky.

²⁶ Mypunihikbyitsa tu Deus hyrikoso mytsyhyryze ibo mynapamykysoko. Katsaktsa mypetu mysopykze:

– Hawa sa Deus bo tsimypamykysokonaha. Amy sa ibo tsimyzapykynaha. Yh̄y ja – tsimaha. Iwaze Deus hyrikoso mytsyhyryze ibo mopamykysoko, katsaktsa Deus bo mopamykysonaha humo batu myhyrinomyry ana hi Deus bo mopamykysoko.

²⁷ Deus koikny baktatu zinomyryba. Katsakta Deus hyrytsa tu ihyrikoso mytsyhyryze mopamykysoko. Mymykuburiwy na humo kino inomyryba, amyty Deus mybo myzinyny tsihikik ihyrikoso tsihyrinomyrēta.

²⁸ Amy skaraba mybo mykara ana humo hi Deus mymysapywyky, iwata tu batu imysapybara ty mykara ana humo kino Deus namysapywyky, katsakta Deus humo mymypoکزitsirētsa hỹ. Tubabatu Deus nimywatawyhik iwaze isoho bo hyỹ tsimykarana.

²⁹ Deus nanabyi ty tysuknihabyize hawatsa ihyrytsa moziknaha ana humo botu zinomyryba. Atahi:

– Kytsa sizubarētsa katse babata tukytsa moziknaha. Atahi taparakta. Asakta katse babata watsa moziknaha. Utakta kytsa sizubarētsa iwata mozihikik – niy. Iwatsahi katsa ihyrytsa tsimoziknaha hỹ. Iwa nizihikik.

³⁰ Asakta sakzohotsa ihyrytsa bo nisiwatawy. Siwatawyhytsa pe:
– Kaokzeka wasani tsimaha. Katse babata watsa tsimoziknaha. Katuk ahawahi tsimynapykyryknaha – my. Iwatsahi amy skaraba mybo mykara, ana kino mymysapywyky ihumo wasani my hỹ.

Deus Sesus Kiristu humo tsimypokzitsiukrēta.

³¹ Niwazubakta! Iwa mytsaty tsimykarana Deus isapyrēnikia ty tsizubarēna mybo nyny my. Iwatsahi hawa tsimytsasonaha. Deus zikwy hi mytuk mynapykyryk, iwatsahi aty zeka mymykniki Deus zikwy humo batu ziky.

³² Deus hi tatse babata mybo zipeha mybarawy bo inasik. Mysapyzekenihyrikosokda. Kytsa Kiristu zibezenhaze Deus yhỹ zuba niy, iwatahi Kiristu myhumo sinini nikara. Iwa niyze isapyrēnikia ty tsizubarēna mybo nyny mykara hỹ.

³³ Deus watawyhytsa soho:
– Ikiahatsa kaokzeka ahamysapyrētsa – mykara. Iwatahi batu aty tohi iwatawyhytsa soho ba zikmysapybyiki. Deus zikwy humo siharere pyk niy.

³⁴ Batu aty tohi ba zikmyso:
– O ikiahatsakta ahamysapybyitsa tu tsikykarana ana humo hi tsimhyrikosokdanaha zeka wasani – my. Kiristu nawa mybo batu tyso. Atakta mysapyzekenihyrikosokda, iwatsahi mysapybyitsa tu tsikykarana ty batu tywabyzo hỹ. Deus zihyrikpowy iwaze ituk tawahi mynapykyryk. Myhumo tsiharereziurēta, Deus bo mytsyhyryze mynapamykysoikik, iwaze Kiristu myhumo tsimypokzitsiarēta hỹ. Iwatsahi batu aty tohi ahamysapybyitsa tu tsikykarana humo tsimhyrikosokdanaha zeka wasani my.

³⁵ Kiristu mymysapywyikik hỹ. Amy skaraba mybo mykara Kiristu myhumo tsimypokzitsiukrēta. Tozeka ja kytsa Kiristu harere bo batu hỹ zikaha mymyitsapyriwynaha. Mymymyijaikiknaha. Sihumo sinini tsimykarana. Myraparētsa. Mynamybyikitsa. Asiba tsimhyrikosokdanaha simypybytyrētsa pokso. Mymybanaha. Iwa mybo mykarana zeka iwata tu Kiristu myhumo tsimypokzitsiukrēta. Katsakta:

– O Kiristu myhumo tsimypokzitsiukrēta hỹ – tsimykarana. Iwatsatu Deus tyryktsa sinini ziknakarana.

³⁶ Deus harere papeu humo botu ziwataha:
– O Deus pibiyituhukutu kytsa sakyriukrēnikitsa mymybakyzykynaha, kytsa mymysukyrykiknaha.

Katsa hozipyrykzatsa watsa tsimaha.

Hawa kytsa hozipyrykzatsa mysibanahatsa watsa kytsa mymybakyzykynaha.

Iwa mymysukyrykynaha – niy.

Ana kino botu ziwataha. Deus harere papeu humo ityryktsa soho ziwatahanaha.

³⁷ Amy skaraba namysapybyrikinahaze Deus hyrikoso humo mypuni-hikrêtsa tsimoziknaha. Kiristu myhumo tsimypokzitsiukrêta iwatsahi meky watu tsimoziknaha hỹ. Izikwy humo mypuni-hikrêtsa tsimoziknaha.

³⁸ Deus mymysapywyky hỹ. Atahi myhumo tsimypokzitsiukrêta. Tsimy-hyrikosokzanaha zeka myhumo tsimypokzitsiukrêta. Myspituze myhumo tsimypokzitsiukrêta. Bijoikpe iknyktsa sipehatsitsa abazubatsa sizubarêtsa niwatihi bijoikpe eze tu iwa Deus mymysapywyky ba zikpyk. Abaka amy ty mybo mykara byriri kino niwatihi amy ty mybo mykara, Deus mymysapywykik ba zikpyk. Deus tawahi mymysapywyky hỹ.

³⁹ Batu amy tohi mybarawy bijoikpe ba mekytu ziky Deus zuba mymysapywykik ba zikpyk. Pihik humo kino niwatihi ba mekytu ziky Deus zuba mymysapywykik ba zikpyk. Deus tsizubarêna nizukni iwatahi batu amy tohi ba mekytu ziky Deus zuba mymysapywykik ba zikpyk. Deus myhumo tsimypokzitsiukrêta babata. Katsaktsa Sesus harere bo hyỹ tsimykaranahaze iwatahi mymysapywykik. Katsaktsa Sesus tuk estuba zubata wata iwaze Deus tatse bo iktsa mynakaraze katsa kino niwatihi mybo iktsa mynakara iwatahi mymysapywykik. Iwatahi batu amy tohi ba mekytu ziky Deus myhumo tsimypokzitsiukrêta ba zikpyk.

9

Deus myhumo tsimypokzitsiarêta ana tyhi katukytsa mysihyrinymyryky. Aba Sesus harere bo batu hỹ nikaranaha.

¹⁻² Kyze utakta batu kaku. Katukytsa pokzi kasukatsihikrêta hỹ. Sudeutsa humo mopuziuku batu pyk icy. Wasani motsasoko. Sesus harere bo hyỹ mykara iwatahi batu mybarapetu kasopyk. Deus hyrikoso katuk mynapykyryk iwatahi batu kamyspihikbata. Iwatatu ahape:

– Sudeutsa humo kamypokzitsiarêta – my. Kaharere wasani mykara.

³ O katukytsa pahatsumuêhĩ tsihikik iwatahi Deus pe:

– O kazo katukytsa humo kamypokzitsiarêta sipokzi utakta Kiristu tuk batu mynapykyrykyzyky iwa zeka sisapyzekenini mykara – my. Ana harere hi ba ziksitsumuêhĩ.

⁴⁻⁵ Katukytsa Sudeutsa taparakta Isareu tsekokatsa tsimaha. Tubabatu Deus taparaktsa mydiritsa nisiwatawy. Abarão iwaze itse Isake inarokota iwaze Sako Isake tse iwatsa nisiwatawy. Asaktsa ityryktsa niyziknaha. Sibohi Deus tazikwy ziwatawy. Ispe niy:

– Isapyrênikia ty ahabo nyny mykara. Ahahudikhudikwy ty ahabo nyny mykara. Ahatsekokatsa sizubarêtsa mynaubaranaha – niy. Aiba zuba iharere mypehatsa Moises bo nitsasoko, iwaze hawa sisopyk mykaranaha sihyrinymyrêtsa. Nawa Deus harere mysihyrinymyry mykaranaha zetu. Deus hi:

– Taparaktsa ahadiritsa Abarão, Isake, Sako iwatsa sihyrytsa ahatukytsa niyziknaha. Estuba zuba ahatsekokatsa tuk kapehata mozik, atahi kabo pahaoktyhyryk – niy. Kiristu Deus zipehata mybarawy bo inasikze Sudeu niyzik. Atakta imysapyrênikita tu iwata humo hi katsa:

– O ikia zuba amyharerewabyrênikita tsimaha hỹ. Ikia zuba tsamysapyrêta tsimykaranaha. Ihumo kytsa sizubarêtsa Deus bo mykaranahaktsa! “O Deus ikia zuba amysapyrênikita” – mykaranaha. Iwa Deus Sudeutsa nisiwatawy.

⁶ Hawa ha ty Deus nitsasoko atsa tu ty mykara. Iwatsahi batu tyso:

– Deus harere batu wasani. Sudeutsa sizubabyitsa zuba Deus harere bo hyỹ mykaranaha, iwatsahi Deus humo batu siwatahawhyhy – iwa batu

tyso. Taparakta Isareu tsekokatsa sizubarëtsa, Deus situk sizubabyitsa tu nisiwatawy ihyrytsa niyziknaha, ustsya kytsa kino niwatihi Deus nisiwatawy iwaze ihyrytsa niyziknaha.

⁷⁻⁹ Abarão mydiri itsekokatsa sizubarëtsa. Deus okzeka batu sizuba itsekokatsa babatsa zuba Deus tyryktsa niyziknaha. Deus okzeka asaktsa Isake humoktsa Abarão tsekokatsa babatsa zuba, Deus tyryktsa niyziknaha. Tapara Deus Abarão pe niy:

– Usta mytyktseheze aoke Sara tabykyhy aibaeze zuba atse mopuruk hỹ – niy. Iwa Deus Abarão pe niy, iharere wasani niy. Abarão tse nipuruk, iwatsahi Abarão tsekokatsa sizubarëtsa tuze sizubabyitsa zuba Deus nisiwatawy ihyrytsa niyziknaha.

¹⁰ Abarão tse Isake soho bo mytsaty tsimykaranaha. Deus Isake oke Hebeka bo nitsaso. Ana humo kino pahahyrinymyry Deus sizubabyitsa zuba nisiwatawy. Atatsa hi beketsa ty tabykyhyze iwaze beketsa nisipupuruk. Taparakta Isake hyrytsa niaha. Tapara nipurukta izo Esau zinaropyk, ibete tatu nipurukta izo Sako zinaropyk iwatsa.

¹¹⁻¹² Tapara beketsa nipupuruknahaze Deus tihi:

– Iykykybyita humo kamypokzitsiarëta. Taparakta taypykze iykykybyita batu iakzoho. Iykykybyita tsyhyryze tarabaja my – niy. Iwa Deus niy. Tapara sipupurukbyize asahi naka tisapyrëna iwaze naka mysapybara ahabyitsa tu mykaranaha. Tapara sipupurukbyize tu Deus estuba ziwatawyhik, iwa nizihikik hỹ iwatahi iykykybyita ziwatawy. Hawa nikaranaha ana humo hi batu ziwatawy, estuba zuba ziwatawy iwa nizihikik.

¹³ Deus harere papeu humo:

– Sako tsekokatsa nisiwatawy iky. Esau tsekokatsaktsa batu – niy. Iwatsahi Hebeka beketsa humo Deus soho tsinymyrykynaha.

¹⁴ Aty ja:

– Estuba zubata Deus ziwatawy iwa batu wasani my – maha. Nawa motsasokonahaze batu imysapy my.

¹⁵ Tubabatu Deus Moises pe niy:

– Aty humo zeka kamypokzitsiukrëta ata humo hi kamypokzitsiukrëta. Aty humo hi kamyzehikik zeka ihumo kamypokzitsiarëta hỹ – niy.

¹⁶ Iwatahi amy ty sa tsimyzihikiknaha Deus batu ziky ana humo mymywatawy. Amy ty sa tsipisapywykynaha Deus batu ziky ana humo mymywatawy. Deus myhumo tsimypokzitsiukrëta iwa myzehikik. Hawa mozihihikik naha humo zuba nimysapywyky. Iwa hỹ.

¹⁷ Deus harere papeu humo iwatahaha, Deus Parao kytsa pehakatsa pe niy:

– Uta kahumo kytsa sipehatsa tsikyzyk. Kytsa sizubarëtsa tsiksipeha, kabo batu hỹ ziky. Kazikwy ty abo ziwatawy, iwatahi ikia humo kytsa sizubarëtsa kasoho humo sihyrinymyrëtsa. Utakta abazubata hi ba hawa tohi ziksukninaha ana ty hi zinymyrykynaha – niy. Iwa Deus harere papeu humo iwatahaha.

¹⁸ Iwatahi asaktsa Deus iakparawy sihumo tsimypokzitsiarëta. Asaktsa iharere bo batu hỹ zikaha. Iwatsa batu ma zikaha.

Hawa Deus tatyryktsa tuk nikara.

¹⁹ Deus nawa zeka aty ja kape my:

– Aty Deus harere bo yhỹ ahabyizeka iwaze Deus sinini ykarawy bo myzipeha zeka batu wasani my. Deus mozihihikik ba hawa tohi zikaha tu atakta sinini ykarawy bo myzipeha zeka batu wasani my – tsimy.

20 – O kaharereziuwu iwa Deus bo batu tyso. Apetu ja asopyk. “Utakta myhyrizikwanita tuze iwaze Deus pisapybyiki.” Iwa batu tyso. Katsakta morosuk watsa batu ipokzitsi. Morosuk mozukni nahaze batu harere zeky “Iwa tsimyzuknikize batu wasani my” my. Iwa morosuk tsihitsa bo batu tyso my. Katsa kino niwatihi Deus pe iwa batu wasani my – iwa batu tyso.

21 – Aty zeka morosuk mozuknize hawa mozihikik nahawa mozokniki. Aitsekni tsizubarēna zeka petok morosuktsa mysisukni. Estuba tisapyrēta mozik ustakta isapybyita eze natapatsikik tawahoro eze zuba mynakara.

22-24 Hawa Deus niy morosuk tsihitsa wata Deus Sudeutsa humo tsimypokzitsiarēta. Asakta iharere bo batu hỹ mykaranaha tazikwy ziwatawy. Asakta iharere bo batu hỹ mykaranaha iwatahi taokaniki. Ba zik tatsapusare, asakta iharere bo batu hỹ mykaranahaze ba zik simyitsapyriwy. Tsiakubyrisorokrēta ustsya kytsa kino nisiwatawy. Iwa myze Sudeutsa asakta iharere bo batu hỹ mykaranaha ba zik simyitsapyriwy. Katsakta ihyrytsa tsimoziknaha, asakta nisiwatawy. Wastuhu Sudeutsa ahamysapyrētsa tsimoziknaha ana humo hi nimywatawy. Ustsya Sudeutsabyitsa kytsa sizubarētsa ihyrytsa tsimoziknaha, sizubarētsa nisiwatawy. – Deus tapetu nikara:

– Asakta katse babata harere bo hyỹ mykaranaha iwata simysapyrētsa moziknaha. Asahi: “O Deus myzo ikia zuba amysapyrēnikita, ikia zuba apunihikrēnikita” maha. Iwa kabo mosakibazikiknaha – niy. Iwa sihumo tsimypokzitsiarēta hỹ.

25 Tubabatu Hosea Deus sohokotsa Deus harere papeu humo ziwatahaka: – Taparaka asakta kahyrytsabyitsa tu abaka mysipeha “O katyryktsa tsimaha” pahawatawy iwatsahi katyryktsa tsimoziknaha.

Tapara asa humo batu kakparawy abaka ispe my:

“Ahahumo kamypokzitsiukrēta” my – niy.

26 Haneze Deus tihi: – Ikiahatsa katyrytsabyitsa tsimaha.

Kyze anaeze ispe sopyk: “kahyrytsa tsimaha” my.

Deus koikny baktatu asahi kahyrytsa tsimoziknaha – niy.

Iwa botu Hosea ziwatahaka. Sudeutsabyitsa soho, hawa asa kino niwatihi Deus hyrytsa moziknaha.

27-28 Isaijas Deus sohokotsa niwatihi nikara Deus harere papeu humo botu ziwatahaka:

– Taparakta Isareu tsekokatsa sizubarētsa niobaranaha nimyra watsa maha.

Deus situk sizubabyitsa tu mysiwatawy.

Sizubarētsa asakta Deus harere bo batu hỹ zikaha mybarawy eze mysimyitsapyriwyky.

Batu imysapy tsimykaranaha zeka pahasininiwy – niy.

Nawa botu nitsaso atsa tu mykara.

29 Tubabatu taparakta Isaijas Deus harere papeu humo ziwatahaka:

– Deus mybarawysa ba hawa tohi zikzukninaha.

Wastuhu mytukytsa nitarenaha niwa byizeka, katsakta Sodoma ezektsa watsa,

asahi tahamysapybara humo niakbabaiknaha katsa kino niwatihi tsimokbanahatsa.

Komora ezektsa watsa niwatihi tsimokbanahatsa.

Sudeutsa batu sizuba Deus bo mysioktyhyryk – niy.

Iwa Deus harere papeu humo botu ziwatahaka.

Deus wasania ty bo Sudeutsa batu hỹ nikaranaha.

³⁰ Sudeutsabyitsa batu tahapetu sisopyk:

– Amy ty tsimykaranaha iwatsa tu Deus okzeka mysapyrëtsa tsimoziknaha – iwa batu tyso. Asaktsa Sesus harere bo hỹ mykaranaha ana humo hi Deus tihi:

– Kaokzeka wasani tsimaha katse harere bo hỹ tsimykaranaha iwatsahi ahaspirikporëtsa tsimypykyryknaha – niy.

³¹ Sudeutsa tihi:

– O katsaktsa Deus sopykwy ty tsimykaranaha iwatahi Deus mymypeha: “Ikiahatsa ahamysapyrëtsa” my – mytsaty ahabyitsa nikaranaha. Deus sisoho:

– Ikiahatsa ahamysapyrëtsa – iwa batu tyso. Niwazuba iharere bo zuba batu hỹ zikaha, iwatsahi Deus harere bo batu hỹ mahaze Deus okzeka batu wasani zikaha.

³² Deus harere bo batu hỹ mahaze hawa wasani mykaranaha ana humo hi tapetu sisopyk Deus mype niy:

– O kaokzeka ahamysapyrëtsa – iwa mytsaty ahabyitsa nikaranaha. Deus okzeka ata harere bo hi hỹ mykaranaha ana kino aba zuba my. Sesus Kiristu harere bo batu hỹ mahaze iwatahi Deus ispe my:

– Kaokzeka batu ahamysapy – niy.

³³ Iwatahi Deus harere papeu humo:

– O kytsa mytsatzyiutahaktsa! Harahare wataty zik iky.

Ata humo hi Sudeutsa inarahanaha.

Kiristu hi harahare wata, asaktsa iharere bo hỹ mykaranaha batu sisikpyby tahawahi Deus tuk mynapykyryknaha – niy.

Deus harere papeu humo niy.

– Asaktsa Sesus Kiristu harere bo batu hỹ maha asaktsa kytsa watsa asahi harahare bete inarahanaha.

Iwatsahi Sudeutsa Sesus Kiristu harere bo batu hỹ mykaranahaze

Kiristu sihumo harahare wata mozik,

iharere bo batu hỹ zikaha iharere batu siakparawy

iwatsahi kytsa watsa harahare bete inarahanaha

Iwa Deus harere papeu humo niy, hawa Sudeutsa sizubabyitsa Deus hyrytsa moziknaha.

10

¹ O kytsa! Deus katukytsa sihumo kamypokzitsiarëta mysitsumuëhĩ tsihikik. Deus bo mopamykysoikik:

– O myzo katukytsa tysitsumuëhĩkĩkta! Tysiockyhyk – my.

² Deus mozihihikik ana humo hi pitsihikiknaha zuba batu zikaha. Sispirikpobyitsa tuze Deus okzeka wasani ha humo batu sihyrinymyry.

³ Hawa mytsaty mykaranaha ana humo ka nikaranaha. Ana ty hi Deus okzeka wasani ja mykaranaha iwa tahapetu sisopyk. Sispirikpobyitsa tu paikpa mytsaty wasani ja mynakaranaha iwatsa tu mybarapetu sisopyk. Sesus harere bo hỹ tsimykaranaha zeka iwatsahi Deus okzeka mysapyrëtsa tsimoziknaha ana ty hi batu hỹ zikaha.

⁴ Kiristu zumuze Deus harere ibyky ana hi Moises ziwataha nepykbaik. Abaka Kiristu harere bo hỹ tsimykaranaha zeka iwaze Deus okze mysapyrëtsa tsimoziknaha. Ana humo hi Sudeutsa batu hỹ zikaha.

Deus myzubarëtsa nimywatawy iwatahi Sesus ibo mysiockyhyryk tsihikik.

⁵ Tubabatu Moises ziwatahaka, kytsa soho asahi isopykwy bo hỹ nikaranaha. Asa soho ziwatahaze:

– Ikiahatsa Deus harere ibyky Moises ziwataha tsizubarēna bo hỹ tsimykaranaha zeka iwaze Deus okze ka wasani tsimyzurukunaha, ahawahi ituk tsimynapykyryknaha. Iharere humo estuba zuba yh̃ ahabyi zeka batu wasani tsimyzurukunaha iwatsahi Deus tuk ba ziknapykyryk. Iwa Moises sopykwy bo yh̃ batu zikaha – niy.

⁶ Deus hi:

– Sesus Kiristu harere bo hỹ tsimykaranaha zeka ahamysapyrētsa tsi-moziknaha iwa kaokze ka wasani tsimaha – niy. Wastuhu ahatuktsa:

– Batu zikaha! Batu aty tohi bijoikpe bo iwaze Kiristu ba zikziokty.

⁷ Batu aty tohi siakbatsa sapy bo iwaze Kiristu mybarawy bo ba zikziokty-hyryk. Katsa iwa batu zikaha.

Kiristu botu mybarawy bo inasik, mysapyzeken botu nihyrikosokda. Atahi mytuk mynapykyryk.

⁸ Deus harere papeu humo botu ziwatahaka:

– Kaharere bo hỹ tsimykaranaha zeka kaokzeka ahamysapyrētsa tsi-moziknaha. – Anaharere humo kino:

– Kaharere bo hỹ tynakaranahaktsa! Ana kino botu tsiwabynaha. Ana humo kino botu mytsaty tsikykarana – niy. Iwaze ahabo tihi:

– Kiristu harere bo hỹ tahaktsa! – my. Kaharere awa tu ahabo mot-sasokozo.

⁹ Kytsa aparakbaha bo ikiahatsa tihi:

– Sesus Kiristu mypehakatsa – tsimaha. Ana harere tsimytasokonaha zeka Deus pahabetesaka. Deus Kiristu zihyrykpowy ata harere bo hỹ tsimaha zeka Deus pahabetesaka h̃, iwa Deus bo pahaoktyhyryk.

¹⁰ Katsaktsa Sesus harere bo hỹ tsimykaranahaze Deus mype niy:

– Kaokze ka Kiristu humo ahamysapyrētsa tsi-moziknaha – my. Tsimyt-sasokonaha zeka Sesus Kiristu mypehakatsa my iwazeka Deus mobetesaka, mymysapyrētsa tsi-moziknaha.

¹¹ Deus harere papeu humo iwatahaha:

– Aty zeka Sesus harere bo hỹ mykara atakta batu sikpyby ihumo tispirikporēta mozik – niy.

¹² Kytsa sizubarētsa iharere bo hỹ mykaranaha tsahi batu sisikpyby. Sudeutsa Sudeutsabyitsa kino niwatihi asaktsa Deus okzeka astsabani maha. Sizubarētsa Sesus humo sispirikporētsa moziknaha. Asahi:

– Ikia zuba mypehakatsa – mykaranaha.

¹³ Deus harere papeu humo iwatahaha:

– Aty zeka Deus bo myzapykyky zeka: “O tsipiktsumuēh̃” atahi Deus piwaby tahi pioktyhyryk, kytsa sizubarētsa Deus bo mysioktyhyryk – niy.

¹⁴ Iharere mywaby byizeka batu Deus pe:

– O tsipiktsumuēh̃ – Deus wasania ty tywaby ahabyizeka batu iharere bo yh̃ tsikaha. Ustakta Deus wasania ty tyso byizeka ba ziwabynaha.

¹⁵ Deus ykzohotsa sipeha ahabyizeka iharere ba ziktsasonaha. Deus harere papeu humo iwatahaha:

– Deus ykzohotsa humo mozumukunaha, iwaze wasania ty motsasokonaha ana humo hi mykurētsa h̃ – niy.

¹⁶ Iwaze – Deus wasania ty nitsasokonahaze sizubabyitsa tu iharere bo hỹ – nikaranaha. Iwa tubabatu Deus sohokotsa Isaijas botu ziwatahaka.

¹⁷ Kytsa Deus wasania ty piwabykynahaze iwaze zuba asaktsa iharere bo hỹ mykaranaha. Iwaze ana harere humo sispirikporētsa moziknaha. Kiristu soho piwabykynahaze iharere bo hỹ mykaranaha iwatsahi ihumo sispirikporētsa moziknaha.

¹⁸ Kyze aty zeka:

– Sudeutsa Sesus harere bo batu hỹ mykaranaha. Tozeka ja Deus wasania ty batu waby. Batu ba, Deus wasania ty ziwabykynaha hỹ. Deus harere papeu humo iwatahaha:

Nanabyitaba kytsa sizubarẽtsa Deus soho humo sihyrinymyrẽtsa niapykyryknaha.

Mybarawy ezektsa sizubarẽtsa hudikhudikwy ezektsa iwatsa siharere ziwabynaha – niy.

Iwa Deus harere papeu humo iwatahaha.

¹⁹ Aty zeka ja:

– Isareu tyryktsa sihyrinymyrybyitsa watsa – my. Batu ba. Sihyrinymyrẽtsa hi. Kiristu soho sihumo batu ihokdaha. Taparakta Moises Deus tsyhyryze tihi:

– Ikiahatsa Sudeutsa tsimaha.

Deus ustsá kytsa mysiwatawyze sihumo ahazokdiharẽtsa tsimoziknaha. “Katsa zuba Deus hyrytsa” tsimykaránaha paikpa mytsaty tsimykaránaha iwatsahi Sudeutsabyitsa asaktsa sihyrinymyrybyitsa tu mysiwatawyze iwaze sihumo ahazokdiharẽtsa tsimoziknaha – niy.

Iwa Deus harere papeu humo botu iwatahaha.

²⁰ Taparakta Isaijas Deus sohokotsa isikpybyyitatu Deus tsyhyryze:

– Asaktsa katy beri ahabyitsa iwatahi sibo kahazuba iky, asaktsa batu katy sapyky ahabyitsa tu sibo utatu ikwatawy – niy.

Iwa tubabatu taparakta Isaijas ziwatahaha.

²¹ Isaijas Sudeutsa soho kino niwatihi ziwatahaka Deus tsyhyryze tihi:

– Pibiyituhukunaha tu kaharere bo hỹ tsimahaktsa kytsa! mykara.

Ikiahatsa batu. Kaharere bo batu yhỹ tsikykaránaha – niy.

Iwa Isaijas niy.

11

Deus tatyryktsa Sudeutsa humo tsimypokzitsiarẽta.

¹ Iwaze hawa skaraba my:

– Deus tatyryktsa Sudeutsa nisimoewy ja – my. Batu ba. Deus tatyryktsa Sudeutsa ba ziksimoewy. Uta hiba Isareu ezekta tu. Taparakta Abarão kadiri, utakta Bẽsami tukytsa iknyta. Deus ba zikmoewy.

² Deus isuknihyize Sudeutsa nisiwatawy iwatahi tatyryktsa ba ziksimoewy. Taparakta Erias Sudeutsa soho Deus bo zisapybyriki, ana harere Deus papeu humo ziwatahaka ana humo tsikspiriktsokdanaha ja.

³ Deus sohokotsa Erias tihi:

– “O Deus sohokotsa nisibabaiknaha. Asapy haneze siraratsa wezowytsa zipaparabaiknaha hana bo ja isapy zuba. Uta zuba iktare. Asahi pikbeze tsihikiknaha” mytsaty ahabyitatu ikykara – niy.

⁴ Hawa Deus Erias pe niy:

– O batu, ikia zuba kaharere bo hỹ tsimykara batu ba. Kytsa sizubarẽtsa sete miutsa sipunihikrẽtsa asa kino niwatihi deusbyitsa Bara inarokota iharere bo batu hỹ nikaranaha. Asahi kaharere bo hỹ mykaranaha. Ustsá kytsa zuba Bara ikia deus my mytsaty ahabyitsa nikaranaha – niy. Iwa Deus Erias pe niy.

⁵ Abaka Sudeutsa wastuhu kytsa Sesus harere bo hỹ mykaranaha. Tubabatu Erias okze tuze wastuhu kytsa Deus harere bo hỹ nikaranaha aba kino niwatihi Deus Isareu tsekokatsa nisiwatawy, sihumo tsimypokzitsiukrẽta iwatahi nisiwatawy.

⁶ Asaktsa taparaktsa sopykwy bo yhỹ nikaranaha iwaha humo Deus batu isty watawy. Moises harere bo yhỹ nikaranaha iwa zikzurukunaha ana

humo hi batu isty watawy. Batu ba. Sihumo tsimypokzitsiarēta ana humo hi nisiwatawy. Deus nisiwatawy zeka taparaktsa sopykwy humo zuba zikzurukunaha, iwa zeka sihumo batu imypokzitsi.

⁷ Niwazuba amy ty Isareu ezektsa ziberikinahaze ana hi batu ity kaha. Deus okzeka simysapyrētsa niyzik tsihikiknaha batu simysapybyitsa tu nikaranaha. Batu sizuba Deus okzeka simysapyrētsa niyziknaha asaktsa botu nisiwatawy. Hawa Deus okzeka kytsa simysapyrētsa moziknaha ana hi wastuhu Isareu ezektsa piwaby tsihikiknaha. Utsaktsa Sesus harere humo batu sispirikpo iharere bo batu hỹ zikaha. Iwaze Deus tihi:

– Ikiahatsa kaharere bo batu h̃ tsihykaranaha – niy.

⁸ Deus harere papeu humo sisoho ziwatahaka:

– Deus harere ziwabynahaze sibo tsihokdaharēna.

Simytsatyhybyitsa tu iharere humo batu sihyrinomyry.

Aba kino atsawatu iharere batu siwabyziu – niy.

⁹ Taparakta Dawi niwatihi Deus harere papeu humo sisoho ziwatahaka:

– Asaktsa tahapetu sisopyk mybarapetu mykaranaha.

Simyspihikbatanikitsa Deus mysizukutu iwaze wasani my.

Tahamyikaha burukze mahape myijaikiknaha mybarapetu mykaranaha.

Hawa sasabyitsa tahawerekywy bo mynapupunahaze tawata tahamyikaha pimyikinaha.

¹⁰ Sihyrizikubyitsa watsa mozurukunaha.

Deus batu mynyhy mykaranaha.

Asaktsa maku wata titsakyrirēta piskyrik eze tawata mozurukunaha.

Deus mysitsumuēh̃ tsihikik asaktsa ipe: “O batu h̃” mykaranaha Iwa Deus harere papeu humo ziwatahaka.

¹¹ Iwaze Sudeutsa zimyikinahaze simysapybyitsa tu nikaranahaze jokboha zuba zimyikinaha. Sudeutsa mytsatyspyk mykaranaha. Sudeutsa Deus harere bo batu h̃ nikaranahaze iwaze Deus Sudeutsabyitsa nisibetesaka. Sudeutsabyitsa Deus bo mysioktyhyrykze Sudeutsa sihumo sizokdirētsa niyziknaha. Abaka Sudeutsabyitsa Deus bo mysioktyhyryk ana humo hi sozeka ja Sudeutsa tihi:

– Katsa tihiktsa kytsa! Katsaktsa Deus bo tymyoktyhyryknahaktsa! Sudeutsabyitsa watsa – mykaranaha.

¹² Sudeutsa Sesus harere bo batu h̃ nikaranahaze Deus Sudeutsabyitsa tabo mysioktyhyryk. Sudeutsa iharere bo batu h̃ mykaranaha. Iwatsahi Sudeutsabyitsa iharere bo hỹ mykaranaha ihumo sispirikporētsa moziknaha. Deus nisisapywky aiba zuba Sudeutsa Sesus harere bo hỹ mykaranahaze Deus isapyrēnikia ty myzubatsa bo nyny my h̃.

Sesus Kiristu Sudeutsabyitsa Deus bo mysioktyhyryk.

¹³ Abaka Sudeutsabyitsa zuba motsasoko. Deus zikpeha my. Wasaniha ty ahabo motsasoko ana humo hi zikpeha. Kahyrikosokzawy humo kakurēta mynapykyryk.

¹⁴ – Tozeka ja kahyrikosokzawy humo katukytsa Sudeutsa ahahumo sizokdirētsa moziknaha iwaze situk wastuhu kytsa Deus bo mysioktyhyryk. Tozeka ja ikiahatsa bo iiktsa mahaze “O katsaktsa niwatihiiktsa” – maha

¹⁵ Sudeutsa Sesus harere bo batu h̃ nikaranahaze sizubarētsa Sudeutsabyitsa humo ka wasani niy. Sudeutsabyitsa Deus harereziuwyttsa niyziknaha. Deus Sudeutsa mysiwatawyzoze kytsa sizubarētsa bo tisapyrēna h̃. Sudeutsa iharere bo hỹ mykaranahaze myzubatsa humo tisapyrēna. Sizubarētsa bo pisapywyky h̃. Aty zeka inahyrikpo zeka tisapyrēna my nawata, Deus myzubatsa mysisapywyky h̃.

¹⁶ Atsikara estuba zuba Deus bo nyny my zeka nitare naha kino niwatihi wasani. Hwiharatatsa sisapyrētsa zeka isarapatsa kino niwatihi sisapyrētsa anahumo hi ahahyrinymyrētsa. Taparaktsa Deus harere bo hỹ nikananaha sihumo tsimypokzitsiukrēta. Aba kino niwatihi kytsa iharere bo hỹ mykaranaha sihumo tsimypokzitsiukrēta h̃y.

¹⁷ Oriwereja soho bo mytsaty tsimaha, ihumo tsinymyrykynaha. Oriwereja wastuhu sarapatsa niakaraknaha. Kyze hwisarapatsa jakara iknykta mekta sarapa tu tasutsuk tsikykananaha, aibani zuba tahappyknaha. Iwata Sudeutsa hwisarapatsa watsa asaktsa sikakarehetsa niaha. Sesus harere bo batu h̃y mykaranahaze tu Deus hyrytsa batu zikyziknaha iwatsahi metutu tahasapynaha. Ikiahatsa Sudeutsabyitsa tu Sesus harere bo hỹ tsimykananahaze iwatsahi ihumo ahaspirikporētsa tsimoziknaha, iwatsahi ikiahatsa hwisarapatsa watsa asaktsa jakara iknykta hwi humo nezutsukuk niy.

¹⁸ Iharatatsa humo hwi taypyk. Batu sarapatsa humo hwi taypyk. Iwatsahi pykyhytutaha nawa tsimytsasokonaha. Batu tyso.

– O Deus Sudeutsa batu iakparawy iwatahi katsa zuba tsikmywatawy – iwa batu tyso.

¹⁹ Ikiahatsa:

– Hawa katsa hwisarapatsa jakara iknykta hwi humo nezutsuk tsimaha, Deus Sudeutsa sapy mybo nyny mykara – tsimaha.

²⁰ Wasape tsimytsasokonaha wasape my. Sudeutsa hwisarapatsa sikakarehetsa watsa Sesus harere bo batu h̃y zikaha. Ikiahatsa hi sisapy tsiapiaksenaha. Sesus harere bo hỹ tsimykananahaze ana humo hi sisapy tsiapiaksenaha. Pykyhytutaha kytsa! Batu tyso:

– Katsa zuba Deus hyrytsa tsimaha – iwa batu tyso. Pykyhytutaha! Sesus harere bo zuba hỹ tsimykananahaktsa batu pyk zikaha!

²¹ Sudeutsa Sesus harere bo batu yh̃y mykaranahaze iwatahi Deus metutu nisisapyspyk niy. Hwisarapatsa sikakarehetsa watsa. Iwatuze Sudeutsa hwisarapatsa babatsa watsa. Ikiahatsa ja. Ikiahatsa iharere bo yh̃y ahabyizeka pahatyryktsapyriwy.

²² Iwaze tsiwabytoktonaha! Sudeutsa Sesus harere bo batu h̃y mykaranaha iwaze Deus nisityryktsapyriwyky. Katsa tihi:

– O hawa Deus mykara wasani my – tsimaha. Deus Sudeutsabyitsa Sesus harere bo hỹ mykaranahaze tu asa humo tsimypokzitsiukrēta h̃y. Katsa tihi:

– O hawa Deus mykara wasani my – tsimaha. O kytsa pykyhytutaha! Sesus harere bo yh̃y ahabyizeka ikiahatsa hwisarapatsa watsa tsimoziknaha, asaktsa sikakarehetsa watsa niaha.

²³ Sudeutsa Sesus harere bo batu h̃y niahaze hwisarapatsa watsa niyziknaha asaktsa sikakarehetsa h̃y niaha. Aiba zuba Sesus harere bo hỹ mykaranaha iwatsahi ihumo sispirikporētsa moziknaha iwaze Deus hyrytsa mozikzonaha. Ana kino Deus zikwy humo batu ihokdaha.

²⁴ Iwaze ikiahatsa Sudeutsabyitsa hwisarapatsa watsa jakara iknykta niaha, iwaze oriwereja hwi humo nezutsuk niy. Tapara ikiahatsa Deus hyrytsa yrik ahabyize. Abaka iharere bo hỹ tsimykananaha tsahi ihyrytsa tsimoziknaha. Sudeutsa iharere bo hỹ maha zeka ihyrytsa mozikzonaha. Hawa hwisarapatsa hwi humo nezutsukze, Sudeutsa oriwereja sarapatsa watsa Deus hyrytsa mozikzonaha. Iharere bo hỹ maha zeka ihyrytsa mozikzonaha. Ana kino Deus zikwy humo batu ihokdaha.

Deus myzubatsa humo mysisapywyky.

²⁵ O katukytsa pahahyrinymyry tsihikik Sudeutsa Kiristu harere bo batu hỹ mahaze tahaoktsĩspyknaha maha. Asaktsa Deus bo batu tyso mynakaranaha:

– O katsaktsa Sesus Kiristu harere bo batu hỹ tsimaha iwa batu hỹ tsimaha – maha. Iwa tawahi batu tyso.

– Deus ustsya kytsa Sudeutsabyitsa nisiwatawy. Asaktsa Deus bo mysioktyhyryknaha Sudeutsa Sesus harere bo batu hỹ zikaha. Iwa tubabatu Deus nizihikik. Ana humo hi batu myhyrinymyry. Hawa Sudeutsa Sesus harere bo hyỹ mykaranaha batu myhyrinymyry. Abaka ahabo motsasoko ikiahatsa “O katsa zuba Deus nymywatawy ihyrytsa tsimoziknaha” – iwa batu tyso. Katukytsa mypehawya mytsaty mytsaty tsimahaktsa!

²⁶ Sudeutsa sizubarẽtsa Deus bo mysioktyhyryk. Tubabatu Deus harere papeu humo ziwatahaka:

– Mymyoktyhyrykta Siã ezekta.

Sako tsekokatsa Sudeutsa simysapybyitsa tu nikaranahaze nisiokzohik ispiriktsokdata wata.

²⁷ Simysapybyitsa tu nikaranaha Deus nisiokzoba.

Hawa Deus botu nitsasoko atsatu mykara – niy.

Iwa Deus harere papeu humo botu ziwatahaka.

²⁸ Aba Sudeutsa Kiristu harere bo batu hỹ maha iwaze Deus sukyrytsitsa niyziknaha. Wasaniha ty batu hỹspyk nikaranaha. Ana ty hi Sudeutsabyitsa mysitsumuẽhĩ. Ana humo hi Sesus Kiristu harere bo hyỹ tsimykarana iwatsatu Sudeutsabyitsa tsimaha. Tapara Deus Sudeutsa nisiwatawy ihyrytsa niyziknaha. Taparaktsa Sudeutsa Abarão, Isake, Sako iwatsa ispe niy:

– Ikiahatsa kahyrytsa tsimaha – niy. Iwatsahi Sudeutsa Deus harerezi-uwya, sihumo tsimypokzitsiukrẽta hỹ.

²⁹ Iwatahi Deus ba meky watu ziksisapywy ba paikpa mytsaty ziky. Mytsaty mynakara tasopyk ty zuba mynakara. Tapetu isopykze:

– Asaktsa nisiwatawy, iwatahi mysisapywyky – my. Iwaze asaktsa nisiwatawy iwatahi mysisapywyky hỹ.

³⁰ Iwatahi Deus ahahumo tsimypokzitsiarẽta. Taparaka ikiahatsa iharere bo batu hỹ tsikykarana abaka batu. Abaka iharere bo hyỹ tsimykarana Sudeutsa iharere bo batu hỹ niaha, ana humo hi Deus ahahumo tsimypokzitsiarẽta.

³¹ Aiba zuba Deus sihumo tsimypokzitsiarẽta aha watsa. Abaka Kiristu harere bo batu hỹ maha byri zuba niaha, iwatahi Deus sihumo tsimypokzitsiarẽta.

³² Sudeutsa Sudeutsabyitsa kino niwatihi Deus okzeka sizubarẽtsa iharere bo batu hỹ zikaha. Iwahatuze Deus sizubarẽtsa humo tsimypokzitsiarẽta, Sudeutsa Sudeutsabyitsa humo kino niwatihi, nawatsa tu myzubahatsa humo tsimypokzitsiarẽta mopykyryk.

Deus bo tsimysakibazikiknahaktsa.

³³ O Deus bo tsimysakibazikiknahaktsa! Ipe tsimahaktsa!

– Ikia zuba amysapyrẽnikita. Ikia zubata tsamyhyrizikwyrẽta. Batu amy tohi ahumo ihokdaha. Tsinymyryba. Hawa mytsaty tsimykara katsaktsa batu myhyrinymyry. Hawa tsimyzuruku katsaktsa batu myhyrinymyry ikia zuba ahyrinymyrẽta babata – tsimaha.

³⁴ Deus harere papeu humo botu ziwatahaka:

– Batu aty tohi Deus bo zipeha my.

Hawa Deus mytsaty mynakara batu aty tohi zikmyhyrinymyry.

³⁵ Batu amy tohi Deus bo nyny zikaha.

Batu aty tohi isapyrēnikia ty ibo nynyspyk myze ba zikzihuak.
Tsizubarēna ituk – niy.

Iwa Deus harere papeu humo ziwatahaka.

³⁶ Deus koikny baktatu tsizubarēna nizukni. Usa bo mytsaty niy ana hi nizukni. Iwatsahi mybarawy tsizubarēna kytsa myzubatsa kino niwatihi ipe mykaranaha:

– Ikia zuba wasani tsimykara, ikia zuba tsamyhyrizikwyrēta – maha. Katsa niwatihi ibo tsimysakibazikiknaha!

– O ikia zuba amysapyrēnikita. Ikia apunihikrēnikita. Ba hawa tohi zikzukninaha. Myokzeka ikia tsamyharerewabyrēta hỹ – tsimaha. Iwa hỹ.

12

Deus tsyhyryze hyrizikosokdawy tsimykaranhaze mykurētsa tsimoziknaha.

¹ Iwatsahi katukytsa Deus tawahi mytuk mynapykyryk mymysapywyikik iwaze – ikia zuba mypehakatsa – ipe tsimahaktsa! Amy ty sa mozihikik ikiahatsa tihi:

– Katsaktsa anatyhi tsimykaranhaha, aharere bo zuba hỹ tsimyzihikiknaha hỹ – tsimaha. Iwa tsimyzurukunaha zeka ahakurētsa tsimoziknaha. Iwaze wasani tsimykaranhaha.

² Mybarawy ezektsa sopyk tsmoewybaiknahaktsa! Hawa mytsaty tsimykaranhaha Deus mekywaha tu mozihikik. Iwaze hawa Deus mozihikik tsipinymyrykynaha. Nawa wasani tsimykaranhaha. Nawa tsapyrēnikia ty tsipinymyrykynaha. Hawa Deus okzeka tsimyzurukunaha ana humo hi tsipinymyrykynaha, hawa Deus mozihikik ana humo hi ahahyrinymyrētsa tsmoziknaha.

³ Deus zikwy botu katuk mynapykyryk ihyriziktsokzawy humo. Ana tarabajawy humo hi wasania ty motsasokoro. Ana humo hi ahape:

– Ahatuk batu tyso “utakta abazubata” – iwa batu tyso. Ahasoho bo mytsatziutaha! Amy ty ihokdaha byizeka anaty kino tsimahaktsa! Tarabajau tahaktsa. Deus hi ahyriziktsokzawy humo zahapeha. Amy skaraba ahatarabajawy Deus pahapeha, ana bo hi tsimahaktsa kytsa!

⁴ Katsaktsa mynury nanabyi meky watu, mytsyhyrypetsa, mypyrytsa, myhyriziktsa, myhyrytsa iwatsa tsizubarēna tsimaha.

⁵ Iwata katsaktsa Sesus harere bo hỹ tsimykaranhaha inury wata tsmoziknaha. Katsaktsa myzubarētsa tsimaha, hawa ha tsimyzihikiknaha estuba zubata watsa atsatu mytsaty tsimykaranhaha. Amy ty Kiristu mozihikik ana humo hi tsimynakaranaha. Estuba estuba zuba tahahyrizitsokzawy humo mynakaranaha katsaktsa tsinaharapetsumuēhĩkĩnaha hỹ.

⁶ Deus myhumo tsimypokzitsiarēta isapyrēnikia ty mybo nyny mynakara. Ihyriziktsokzawy humo izikwy mytuk mynapykyryk. Iwatsahi estuba estuba zuba izikwy mymypehaka ana humo kino tsimahaktsa! Wastuhutsa izikwy ty mynapykyrykze Deus wasania ty motsasoziukunaha. Asaktsa wasania ty tytsasokonaha za.

⁷ Utsa izikwy situk mynapykyryk iwatsahi Sesus tuktsa bo mysitsumuēhĩkĩ iwaze asaktsa Sesus harere bo hỹ mykaranaha, asa bo hi tysitsumuēhĩkĩnaha. Utsa izikwy situk mynapykyryk iwatsahi Sesus tuktsa mysihyrinymyrynaha. Iwaze asaktsa Sesus humo sispirikporētsa. Asa bo hi tysihyrinymyrynaha.

⁸ Utsa izikwy situk mynapykyryk iwatsahi sipehawy kytsa bo mynasiakuwyky. Asaktsa sipehawy tytsasokonaha. Utsa izikwy situk mynapykyryk iwatsahi sinamyrētsa moziknaha batu taha bo zuba mykaranaha,

asaktsa Deus zikwy humo sinamybyitsa bo nyny mykaranaha. Utsa izikwy situk mynapykyryk iwatsahi kytsa humo mysipokzitsikinaha, iwaze asaktsa ustsya kytsa humo tysipokzitsikinaha. Utsa simypokzitsiukbyitsa bo mysitsumuēhīkīnaha iwatsahi asaktsa sakurētsa Deus zikwy humo wasani mykaranaha.

⁹ Tyharape pokzitsikinahaktsa! Iwa tsimykaranaha zeka ba zikmyspihikbata. Isapyrēnikia ty ahakparawy! Ahasopyksapybyri tsimoewybaiknahaktsa!

¹⁰ Ikiahatsa Sesus humo ahatukytsa tsimaha. Iwatsahi tyharape pokzitsikinahaktsa! Ahawahoro ezektsa watsa humo ahamypokzitsirētsa. Tyharape pokzitsinahaktsa. Iktsazubataha tsimahaktsa!

¹¹ Deus harere bo yh̄y tahaktsa! Ihyriziktsokzawy humo tsimykaranaha. Ahazikara byihu ja. Ahakurētsa tu Deus harere bo yh̄y tahaktsa!

¹² Kiristu taperyky iwatsahi ahakurētsaktsa! Utsa kytsa pahaknikinahaze ahapunihkrētsaktsa! Deus bo typamykysoikiknahaktsa!

¹³ Utsa kytsa Sesus harere bo hȳy mykaranaha batu sinamyky ahanamy ty sibo tsibiaknaha nyny nyny tahaktsa! Ahabo mozumunaha zeka ikiahatsa tihi:

– Pany pakutynaha. Mytuk tyzadisahanaha. Kawahoro eze tu ahawanu tsihahañnaha – tsimaha.

Kytsa sizubarētsa mysipokzitsikinaha. Mysukyrytsitsa humo kino niwatihi tysipokzitsikinaha.

¹⁴ Asaktsa pahasukyrikiknahaze sitsyhyryze batu Deus bo:

– O Deus myzo tysitsapusarekta – iwa batu zikaha. Ikiahatsa tihi:

– O myzo asahi nimysukyrykynahatsa tu tysisapywyky – tsimaha.

¹⁵ Kytsa sakurētsa tuk zeka ikiahatsa kino ahakurētsa tsimoziknaha! Siakubyitsa tuk mykaranaha zeka ikiahatsa kino batu ahaku.

¹⁶ Kytsa sizubarētsa tysipokzitsikinahaktsa! Tyhapepokzitsikinahaktsa! Sinamybyitsa kino ahaharereziuwyttsa moziknaha. Batu tyso:

– Katsaktsa myhyrinymyrētsa – iwa batu abazubatsa tsimaha.

¹⁷ Asahi simysapybyitsa tu ahabo nikaranaha zeka batu isty tsapusare. Hawa kytsa okzeka wasani tsimykaranaha. Iwaze kytsa ahasoho ty batu tyso:

– O asaktsa batu simysapy maha – iwa batu zikaha.

¹⁸ Aha humo batu ihokdaha byizeka kytsa tuk yh̄y tsimaha, batu ahamyiki. Tsahamykpyriziurētsa.

¹⁹ Batu aty tohi ba ziktatsapusare. Kytsa imysapybara ty mykaranaha Deus zuba tsihyrinymyrēta, atahi sinini ykarawy bo mysipeha. Deus harere papeu humo ziwatahaka:

– Utakta kytsa bo asaktsa kytsa nisisapybyrikinaha, mysitsapusare, simysapybyitsa nikaranaha humo mysisininiwy sihuak waha humo mysisininiwyky – niy.

²⁰ Usta Deus harere papeu humo ziwatahaka:

– Asukyrytsitsa saraparētsa zeka, adisahawy ty sibo nyny tsimy.

Sarapurukrētsa zeka pihik ty sibo nyny tsimy.

Iwa tsimy zeka sisikpybyrētsa moziknaha – niy.

Iwa Deus harere papeu humo ziwatahaka.

²¹ Iwaze simysapybyikitsa ahape maha zeka:

– Katsa mywatu tahaktsa! – maha. Ikiahatsa ispe tsimaha:

– Batu h̄y – tsimaha. Ahatsapusarebyitsa tu kytsa tysisapywykynahaktsa.

Iwa tsimyzurukunahaktsa kytsa!

13

Mybarawy ezektsa ahapehatsa harere bo yh̄y tahaktsa.

¹ Kyze mybarawy ezektsa ahapehatsitsa sitsumuēh̄itsa kino niwatihi siharere bo yh̄y tahaktsa! Ahapehatsitsa pahapehanaha Deus harere humo zuba – ikiahatsa tysipehanaha – my iwatsahi pahapehakanaha. Iwa Deus mykara.

² Iwaze aty zeka ipehatsa tsumuēh̄itsa harere bo yh̄y ahabyizeka atakta Deus harere bo kino niwatihi yh̄y ahabyizeka iwatahi sinini mykara.

³ Asaktsa wasani mykaranaha tahapehatsa humo batu sipyby. Asahi batu sopyksapy mykaranaha zeka tahapehatsa pokso sipybyr̄etsa. Ahapybybyi zeka mypehatsa tysisapywykynahaktsa kytsa! Iwa tsimykaranaha zeka asahi:

– O ikiahatsa wasani tsimaha – maha.

⁴ Ahapehatsa tsumuēh̄itsitsa ahahumo simypokzitsiukr̄etsa moziknaha. Siharere bo yh̄y ahabyizeka ahamysapybyitsa ty zuba tsimykaranaha. Deus pahamyitsapyriwyky siharere humo, asaktsa sitsumuēh̄itsa babatsa maha iwatsahi mysapybyitsa tu tsimykaranaha zeka ahapehatsa pokso ahapybyr̄etsa tsimoziknaha ana kino wasani my.

⁵ Iwatsahi apehatsa tsumuēh̄itsa siharere bo hȳy tahaktsa! Siharere bo yh̄y ahabyizeka sipokso tsahapybyr̄etsa, sinini tsimaha humo tsahapybyr̄etsa. Siharere bo hȳy ahabyizeka iwaze sinini tsimykaranaha Deus okzeka wasani my, iwatsahi ikiahatsa siharere bo hȳy tsimaha.

⁶ Ana humo hi ahaokyr̄ysaro ty tsapukte bo apehatsa bykytsa bo nyny taha. Tarabaja mykaranaha zeka Deus harere humo sihyriziktsokzawy mykaranaha.

⁷ Amy ty sa ihuak ty sibo nyny tsimaha zeka anaty kino sibo nynyzo tsimaha. Apehatsa tsumuēh̄itsitsa harere bo tsiwabytoktonahaktsa! Siharere bo yh̄y tahaktsa!

Tyharape pokzitsikinahaktsa.

⁸ Batu aty tohi bo ihuak ty ibo nynyzo zikaha. Ahahuak humo tsipykbanaha! Tyhapepokzitsikinaha zubaktsa! Ana kino tsimaha zeka myhuak watsa kytsa bo botu nyny tsikaha. Utsa kytsa bo tsipisapywyikiknaha zeka iwaze Moises sopykwy bo tsizubarēna tsimykaranaha.

⁹ Deus harere isopyk tihi:

– Mektsa okeza ba ziksipyryr̄yknaha. Ba zibezenaha. Usta namy ty hyryk hyryk byitaha. Harape namy bo ka iktsa zubataha – niy. Iwaze ipehawy tihi:

– Aotutsa pauksitsa humo tynasipokzitsikinahaktsa ahumo tsinakara nahawa tihi tysipokzitsiki – niy. Ana humo kino yh̄y tsimaha zeka taparaktsa harere niwatihi yh̄y tsimykaranaha.

¹⁰ Aty zeka ipytowybara ty pauksitsa mysisapywyky zeka ba zimyi. Iwatsahi ahamyibyitsa tu zeka Deus harere bo hȳy tsimykaranaha h̄y.

Wasani tsimyzurukunahaktsa kytsa!

¹¹ Iwaze kapehawy ty hawa tsimyzurukunaha wa tynakaranahaktsa kytsa! Sesus myziksizo. Ikiahatsa Sesus harere bo hȳy tsimykaranaha zeka hanawa puruze taperyky. Iwatsahi ahaōtutsabyihu ja. Sesus taperyky!

¹² Hanawa puruze Sesus Kiristu myziksizoze nakyoksohoze kywa. Iwatsahi mysapybara tsikykaranaha mytamoewybaik! Asaktsa mysapybyitsa tu mykaranaha miwa zuba siakparawy. Kytsa sibo batu iktsa zikaha. Sipapatu nikaranaha. Ikiahatsa batu siwatsa tsimahaktsa! Deus mozihikik ana ty hi tsimykaranahaktsa kytsa!

Sodadutsa sibotoarëtsa iwatsahi tahasukyritsitsa weryk tu tahazozikbanaha. Siwatsa katsakta Kiristu zikwy mytuk mynapykyryk zeka wasani tsimoziknaha. Ba zikmyizonaha.

¹³ Iwa wasani tsimyzurukunaha zeka batu mysikpyby. Kytsa watsa asahi okoroze mynakurunaha iwaze kytsa sizubarëtsa sibo iksa maha. Siopuwy tsõsĩ ty ka tsõ tsõ byitaha. Tsipikukunaha zeka tsimyyharape sapybyikinaha siopuwy tsõsĩ humo. Utsa okeza humo ba ziksityrykzuwynaha! Sibo hua hua byitahaktsa! Usta maku bo harape tyka wowo byitaha iwa zeka pahamyiba! Ahazokdibyihu ja! Harape tyhudiduhudu byijataha!

¹⁴ Katsa hawa sa tsimyzihikiknaha ana ty hi tsimyykaranaha zeka mysapybyitsa tu tsimyykaranaha. Hawa tsimyzihikiknaha ana humo kino awatutaha! Sesus Kiristu zikwy mytuk mynapykyryk iwaze imysopyksapybara humo batu hỹ tsimaha. Sodadutsa sibotoarëtsa maha iwatsahi tahasukyritsitsa weryk tu tahazozikbanaha. Siwatsa Sesus Kiristu zikwy mytuk mynapykyryk iwaze mysapybyitsa tu tsimyykaranaha batu hỹ tsimaha ihumo tahamoewy. Iwatsahi katsa hi:

– O Kiristu azikwy mytuk mynapykyryk! – tsimaha. Iwa hỹ.

14

Atukytsa ba zikarapepeha.

¹ Iwaze kytsa Sesus harere bo hyỹ mykaranaha sihumo ahakubyrisoroku ja tsimaha. Asahi:

– Hawa skaraba Deus okzeka wasani my. Katsakta tsikaeni zuba myhyrinymyry – maha. Sihumo ahakubyrisoroku ja! Ba zikarapepehanaha iwatsatu meky watu mytsaty mykaranaha. Mysitsumuëhĩnaha!

² Wastuhu kytsa Sesus tuktsa:

– Katsakta siraratsani humo mysiborokonaha zeka Deus okze ka wasani – mykaranaha. Utsa Sesus tuktsa:

– Katsakta myzohotsa tahaborokonaha zeka Deus okzeka batu wasani. Iwatsahi wihara ty zuba tsinamydisahakanaha – mykaranaha.

³ Asakta siraratsani humo mysiborokonaha batu tyso:

– Asahi wihara ty zuba natahadisahakanaha batu sihyrinymyry – mykaranaha. Iwa tsimyytsasokonaha zeka tsisisapybyrikinaha. Siwatsa asakta wihara ty zuba tahadisahakanaha batu tyso:

– O asahi siraratsani humo piboronahaze simysapybyitsa tu mynakaranaha – mykaranaha. Iwa tsimyytsasokoronaha zeka tsisisapybyrikinaha.

⁴ Aty ipehatsa tsipisapybyiki zeka batu wasani my, ipehatsa zuba isoho pisapybyiki. Katsa Sesus tuktsa Deus mypehakatsa. Atakta Sesus tuktsa mypehakatsa Deus harere humo zuba hyỹ mynakara. Hawa mykara Deus ipe:

– O nawa tsimyykara wasani – my. Ata hi zuba awatu mynakara. Imysapybyita tu mykaraze Deus ipe:

– O nawa tsimyykara batu amysapy – my. Mypehakatsa zikwy ituk mynapykyryk nawa wasani mozuruku hỹ.

⁵ Aty:

– Nawa puruze tabyryky Deus okzeka tisapyrëna iwatahi ba amy tohi humo zikaha – my. Usta batu:

– Pibytuhukutu atsatu maha iwatahi kahyrikosokzawy humo mykara – mykaranaha. Estuba estuba zuba tahapetu sisopyk:

– Hawa ha ty mozuruku zeka wasani – mykaranaha. Deus okzeka kytsa meky watu mytsaty mykaranaha zeka wasani my.

⁶ Aty zeka:

– Nawa puruze tabyryky iwatahi ba amy tohi humo zikaha iwa Deus pokzi mynakara. Aty tazoho piboro zeka:

“O Deus myzo kakurēta, ikiakta kazoho ty kabo nyny tsiky” – my iwa Deus bo mynapamykyso. Aty wihara ty tadisaha zeka:

– O Deus myzo kakurēta, ikiakta kadisahawy ty kabo nyny tsiky my – iwa Deus bo mynapamykyso.

⁷ Batu aty tohi tabo zuba mynakara. Myokzetuze hawa tsimyzurukunaha zeka Deus mynamysukparaka. Tsimyhyrikosokdanahaze Deus mynamysukparaka iwatsahi mywahi Deus tyryktsa tsimoziknaha.

⁸ Iwatsahi myokze tuze Deus mypehakatsa harere bo yh̄y tsimykaranaha. Tsimyhyrikosokdanaha zeka Deus tuk tsimynapykyryknaha. Iwatsahi kat-saktsa mywahi Deus tyryktsa tsimaha.

⁹ Kiristu mypehakatsa anahumo hi nihyrikosokda. Iwaze zuba Deus zihyrizikpowy ispitu niyzikzo. Abaka mypehakatsa niyzik, Kiristu tuktsa botu nihyrikosokdanaha atahi sipehatsa niyzik. Katsa kino niwatihi iharere bo hȳy tsimykaranaha atahi mypehakatsa. Myzubarētsa mypehatsa niyzik.

¹⁰ Ikiahatsa ja. Wastuhu kytsa ahatuk ahatukytsa tsimysisapybyikinaha. Batu imysapy tsimaha. Utsa ahatuk ahatukytsa tsimysisapybyikinahaze ispe maha:

– Ikiahatsa batu wasani tsimaha – tsimykaranaha. Ikiahatsa mytsatyzit-utahaktsa amy wa taba parakbaha Deus okze tsinamykahabanahazo iwaze myhuak ty mybo nyny my, hawa haty tsikzurukunaha mybo ihuak ty nyny my.

¹¹ Deus harere papeu humo botu iwatahaha:

– Mybarawy ezektsa na watsa tu kaokeryk tahaekaratsa humo puruk puruk maha,
(kahumo iktsazuba mykaranaha humo puruk puruk maha).

Mywatu: “Ikia zuba Deus babata” maha.

Sizubarētsa mybarawy ezektsa iwa mykaranaha – niy.

¹² Mywatu Deus bo tsimaha. Hawa mybarawy eze zikzurukunaha ana hi Deus bo tsimyzasonaha, iwaze myhuak ty mybo nyny my.

Atukytsa soho ba zisapybyirinaha.

¹³ Iwatsahi mytukytsa ba zik soho metunaha! Mytukytsa okzeka wasani tsimyzurukunahaktsa kytsa! Mypetu mysopyk:

– “Hawa hasa mytukytsa pimysapybyikinaha iwaze asahi batu h̄y zikaha” tysitsumuēh̄i – tsimaha.

¹⁴ Hawa Sesus mytsaty mykara uta kino niwatihi mytsaty mykara. Disahawy tsizubarēna kabo ty wasani ana humo kahyrinymyrēta. Ustsaktsa hi:

– O ana disahawy kahumo batu wasani – mykaranaha. Iwaze asaktsa ana disahawy ty tahadisahakaranaha zeka sihumo ka batu sapy. Iwatsahi pimysapybyikinaha.

¹⁵ Ikiahatsa ahazoho tsipiborokonaha zeka ahatukytsa bo batu sapy my, iwa zeka ahahumo batu siaku. Ahazoho tsipiborokonahaze ahatukytsa ana bo hi iktsa maha zeka ahahumo tahasapybyikinaha. Iwa tsimyzurukunaha zeka ahatukytsa ba ziksipokzitsi. Ahazoho humo zuba ahatukytsa tsiksisapybyikinaha. Kiristu sisapyzeken nihyrikosokda ikiahatsa humo hi Deus tuk ba zik kapykyryk naha.

¹⁶ Iwatsahi ahaokze ka tisapyrēna ana kino ustsā kytsa pisapybyikinaha. Sibō batu imysapy my zeka batu tyso – O mahani, ana ty hi wasani – iwa batu tyso. Nawa tisapyrēna pisapybyikinaha.

¹⁷ Katsaktsa Deus tyryktsa tsimaha. Amy ty sa hauk tsimykarānaha, amy ty sa tsipikukunaha nawa humo hi Deus tyryktsa batu zikyzyknaha. Batu ba. Deus hyrikoso humo ityryktsa tsimoziknaha. Ata humo hi Deus harere bo hỹ tsimykarānaha. Ata humo hi mytukytsa ba zikmybetsaknaha tysiyyikwykynahaktsa. Ihumo mykurētsa h̃y.

¹⁸ Iwa tsimyzurukunaha zeka Deus myhumo tsakurēta mozik. Ustsā kytsa kino:

– Deus situk mynapykyryk iwatsahi ityryktsa moziknaha wasani mykarānaha – maha.

¹⁹ Iwatsahi tyharape pokzitsikinahaktsa kytsa! Kytsa tysiipunihiwykynahaktsa tsimaha. Iwaze ustsā kytsa ahahumo Sesus harere bo hỹ mykarānaha.

²⁰⁻²¹ Ikiahatsa siraratsani natahaborokonaha. Ahabo tisapyrēna. Ustsā Sesus tuktsa sizoho meky watu zeka batu hauk zikaha, sihumo ka batu isapy maha, iwaze ikiahatsa kino niwatihi situkze ahazoho ty batu hauk tsimaha. Ahazoho ty siokze hauk tsimaha zeka ahatukytsa ahahumo Sesus harere bo batu h̃y mykarānaha. Iwatsahi ahazoho ty hauk hauk ahabyitaha! Duabohotsa tsik siokze tsō tsō byitaha! Iwa tsimaha ty zeka ahatukytsa tsimysisapybyrikinaha batu zikaha! Iwa ahatukytsa tysiipokzitsiki. Sihumo imysapybara ty ka hauk hauk ahabyitaha! Iwaze ahatukytsa ba zisimiywy.

²² Ahaokze ka sizoho ty sasabyitsa kino niwatihi wasani my. Deus bo zuba ana soho ty tsimytsasokonaha. Ustsā kytsa bo ba ziktsasonaha. Asaktsa batu paikpa mytsaty zikaha iwatsahi sakurētsa mopykyryknaha. Asahi amy ty tisapyrēna mykarānahaze batu tyso:

– Ana kino tisapyrēna yh̃ja – iwa batu tyso. Iwaze asaktsa sakurētsa h̃y. Hawa batu isapy mytsaty mykarānaha zeka awatutaha.

²³ Aty zeka izoho ty sasabyitsani kino niwatihi piboro zeka:

– Ana ha azoho ty Deus okzeka tisapyrēna ja. Yh̃ja – my. Deus isoho:

– Hawa tsimykarā batu isapy – my. Sihyrinymyrybyitsa tu hauk maha zeka iwaze sibō batu isapy my. Hawa tsimykarānaha ana soho ty:

– Hawa tsimykarānaha wasani my ana humo hi myhyrinymyrētsa – tsimaha. Iwaze wasani my. Katsaktsa hi hawa tsimykarānaha ana soho ty:

– Hawa tsimykarānaha wasani ja. Yh̃ja – tsimaha. Iwaze Deus okzeka imysopykbara ty tsimykarānaha.

15

Ustsā bo tysiakuwyky.

¹ Katsaktsa Sesus harere bo hỹ tsimykarānaha h̃y mytukytsa Sesus tuktsa bo tysiakuwykynaha. Ahakubyrisorokuja! Mytukytsa asa hi:

– Amy skaraba Deus okzeka wasani my. Katsaktsa batu myhyrinymyry – mykarānaha. Asaktsa tsikaeni zuba Sesus harere bo hỹ mykarānaha. Iwaze katsaktsa mybo zuba batu mytsaty zikaha, sibō hi mytsatyahaktsa!

² Mytuktsa pauksitsa Sesus tuktsa tysiakuwykynaha! Tysisapywykynaha iwaze Sesus harere bo hỹ maha.

³ Kiristu soho bo mytsaty tsimahaktsa! Ihumo zuba batu mytsaty ziknakara ustsā kytsa bo zuba mytsaty ziknakara h̃y. Iwatsahi ikiahatsa iwata niwatihiaktsa kytsa! Deus harere papeu humo ziwatahaka:

– Asaktsa ziksapybyikinaha anahi Deus bete zizozoko naha – niy. Iwa ziwatahaka Sesus soho niy.

⁴ Deus harere papeu humo mytsyhyryze ziwataha. Ana ty hi mymyhyrinomyryky, ana humo tsipinomyrynahaze mykubyrisorokrētsa tsimoziknaha. Tsipinomyrynahaze ihumo mypunihikrētsa tsimoziknaha. Iwatsahi isapyrēnikia ty taperyky, Deus papeu humo mymykuwyky.

⁵ Deus bo ahatsyhyryze mopamykysoikik ipe mykara:

– O myzo ikia zuba tsimymypunihikwyky, ikia zuba tsimymozikwyky, ana kino Homa ezektsa bo nyny tsimy. Hawa moziknaha zeka estuba zuba wata moziknaha, ikia humo mysitsumuēhīkī iwa tsimy. Nizihiknahatsa hi Sesus Kiristu wata maha. Hawa Sesus Kiristu zikzuruku asa kino niwatihi iwata mozurukunaha – iwa Deus bo ahatsyhyryze mopamykysoko.

⁶ Iwaze ikiahatsa ahazubarētsa Deus bo tsimysakibazikiknaha:

– O Deus myzo ikia zuba mypehakatsa. Ikie zuba amysapyrēnikita – tsimykaranaha. Iwaze Deus Sesus Kiristuzo bo tsimysakibazikiknaha.

Deus wasaniha Sudeutsabyitsa bo motsaso.

⁷ Iwatsahi tyharapehapokzitsikinahaktsa kytsa! Hawa Kiristu ahahumo tsimypokzitsiarēta ikiahatsa atsatu harape bo tsimykaranahaktsa! Kyze kytsa tihi:

– O Deus tsimysapyrēta ihyrytsa bo iktsa tsimaha. Hawa ihumo zuba myharape pokzitsikinaha, iwatahi Deus tsimysapyrēta hỹ – mykaranaha.

⁸ Kiristu mybarawy bo inasik. Sudeutsa Deus bo mysioktyhyrykta anahumo hi inasik. Izumuze nisihyrinomyryky hawa ha ty Deus botu nitsasoko nisihyrinomyryky atsatu mykara. Taparaktsa mydiritsa hawa ha ty Deus sibo botu nitsasoko atsatu Sesus nikara, izumuze Sudeutsa Deus bo mysioktyhyryk.

⁹ Mybarawy bo inasikze Sudeutsa mysioktyhyrykta Deus bo my, Sudeutsabyitsa kino niwatihi Deus bo mysioktyhyryk. Asa hi:

– O Deus ikia tsamysapyrēta myhumo kino niwatihi tsamypokzitsiarēta, Sudeutsabyitsa tsimaha – mykaranaha. Tapara Deus harere papeu humo ziwatahaka:

– Iwatahi utakta Sudeutsabyitsa situkze Deus pe “Ikia zuba wasani tsimy. Ikie zuba amysapyrēnikita my”
Sudeutsabyitsa ana hi piwabykynaha, abo iksakibazikikze ana hi piwabykynaha – niy.

¹⁰ Usa papeu humo:

– O Sudeutsabyitsa ikiahatsa Deus watawyhytsa
Sudeutsa tuk ahakurētsaktsa! – niy.

¹¹ Usa papeu humo:

– O Sudeutsabyitsa sizubarētsa Deus bo tsimysakibazikiknahaktsa!
Mybarawy ezektsa nanabyitaba sizubarētsa kino niwatihiktsa! “O ikia zuba wasania ty zuba tsimykara.” tsimahaktsa – niy.

¹² Deus sohokotsa Isaijas usa papeu humo ziwatahaka:

– Taparakta mydiri Sese estuba tsekoka
Sudeutsabyitsa pehakatsa mozik.

Deus bo mysioktyhyryk, isapyrēnikia
humo piperykynaha hỹ – niy.

Sese tsekoka Kiristu my.

¹³ Iwatahi Deus ahatsyhyryze ipe my:

– O Deus myzo ikia hi isapyrēnikia ty taperyky atuk mywahi mynapykyryknaha ana kino taperyky. Ikie tysiakuwyky hỹ batu paikpa mytsaty zikaha. Aharere bo hỹ mykaranaha iwatsahi ahumo sispirikporētsa moziknaha

ahyrikoso humo mospirikpotohinaha, azikwy humo sispirikporëtsa hÿ – my. Iwa Deus bo mopamykyso.

Pauro Homa ezektsa bo mypubara ty motsasoko.

¹⁴ O katukytsa utakta ahasoho humo inymyryba ahamysapyrëtsa hÿ. Ahahyrikporëtsa ana humo hi kahyrinymyrëta. Tyhapehyrinymyryky-naha.

¹⁵ Iwatatuze papeu humo ahabo piwatahaka wasania ty piwatahakazo batu kasikpyby ana humo ahaspiriktsokdabyihu ja. Deus harere motsasoz-iuku iwaze anasoho bo hi mytsaty tsimykaranaha. Iwa my Sesus Kiristu humo atahi kahyritsokzawy humo zikpeha.

¹⁶ Utakta Sesus Kiristu tsumuëhÿtsa, ana bo hi zikwatawy. Uta Sudeutsaby-itsa bo zikwatawy. Deus harere wasania ty sibo motsasoko ana humo hi zikwatawy. Utakta Deus wahoro zubata eze ziknapamykysokota wata asa humo ka Deus tsakurëta. Hawa Deus nizihikik ziknakaranaha ana humo hi Deus tsakurëta. Iwatatu Deus wasania ty Sudeutsabyitsa bo motsasoko, kyze Sudeutsabyitsa Sesus harere bo hyÿ mykaranahaze Deus ana humo hi tsakurëta hÿ. Asaktsa meky watu moziknaha, Deus hyrikoso humo simysapyrëtsa moziknaha, Deus tyryktsa moziknaha.

¹⁷ Deus tsyhyryze tarabajaziu mynakara, hawa Kiristu mozihikik naha humo zuba mynakara iwatahi kahyritsokzawy humo kakurëta.

¹⁸ Kiristu kahumo Sudeutsabyitsa Deus harere bo hyÿ mykaranaha izikwy kahumo hi katuk mynapykyryk. Iwatsahi Sudeutsabyitsa Deus harere bo hyÿ mykaranaha. Batu kasikpyby. Hawa iktsasoko naha humo batu kasikpyby. Hawa ikykara ana humo hi batu kasikpyby iwatahi Sudeutsaby-itsa Deus harere bo hyÿ mynakaranaha. Hawa skaraba Kiristu mozihikik ana humo hi yhÿ mynakara iwaze Sudeutsabyitsa Sesus harere bo hyÿ mynakaranaha hÿ.

¹⁹ Deus zikwy katuk mynapykyryk, ihyrikoso humo amy ty kytsa batu zikaha utakta ikykara. Deus hyrikoso katuk mynapykyryk iwatahi kytsa iksizororowy. Iwatsahi kytsa kabo iktsaziu nikaranaha iksi humo kyokbaik. Iwatawytsa humo Deus wasania ty bo yhÿ mykaranaha. Nanabyitaba Deus wasania ty Sesus soho iktsasoko, taparaka Serusarëhe eze iktsasoko, iwaze ikparakzo nokponi ikukuru. Iriria bo ikzumu.

²⁰ Utakta Deus wasania ty motsaso tsihikik asa hi Sesus soho batu si-wabyhy. Asaktsa isoho batu siwabyhy ihumo sispirikpobyitsa sibo hi Deus wasania ty iktsasoko.

²¹ Hawa Deus harere papeu humo botu ziwatahaka anawa ha ikykara papeu humo:

– Asaktsa Deus zipehata soho batu siwabyhy isoho piwabykynaha.

Deus wasania ty isoho piwabyziukunaha – niy.

Pauro Homa bo mynakozore tsihikik.

²² Kyze utakta ahabo mynakozore tsihikik batu zik. Deus wasania ty siwabyhybyitsa bo motsasoko iwatahi ahabo batu pão.

²³ Abaka hyriziktsokzawy nabytykara eziky nepykbaik. Iwa niytyk tse-heze tsizubarëna ahabo mynakozore tsihikik.

²⁴ Ahabo moparakze ahatuk pyryspykare my mokozore. Espanija bo moparakze ahaburuk my. Iwaze Espanija bo moparakze ikiahatsa hi tsipik-tsumuëhÿnaha.

²⁵⁻²⁶ Abaka Serusarëhe bo mokuru. Masedonia ezektsa, Akaija ezektsa ahatsa niwatihi siokyrysaro waka ziperykynaha. Ana okyrysaro ty Serusarëhe ezektsa Sesus tuktsa sinamybyitsa bo pinyny tsihikiknaha.

Iwatahi ana okyrysaro waka sityhyryze wabehyryk my sinamybyitsa bo nyny my.

²⁷ Asaktsa Masedonia ezektsa, Akaija ezektsa ahatsa niwatihi Sudeutsabyitsa maha. Sesus harere bo hỹ mykaranaha iwatsahi ihumo sispirikporētsa. Sudeutsa hi Deus wasania ty sibo nitsasokonaha anahumo hi batu sispiriktsocka. Iwatsahi siokyrysaro ty ziperykynaha ana ty hi Sudeutsa sinamybyitsa bo nyny maha iwa moziknaha. Sudeutsabyitsa Sudeutsa mysitsumuēhīnahaze wasani my iwa sinamybyitsa bo mysitsumuēhīnaha. Sesus humo situkytsa moziknaha.

²⁸ Anahyrikosokzawy nepyke, ana okyrysaro ty tsizubarēna sinamybyitsa bo nyny my, iwaze Espanija bo moparakze ahaburuk mynakozore.

²⁹ Ahabo pomoze hawa Kiristu pahasapywy tsihikik ahatuk motsasoko. Kabo piksapywyky ahabo niwatihi pahasapywyky. Kaharere isoho humo ahakurētsa tsimoziknaha.

³⁰ O katukytsa katsaktsa Sesus harere bo hỹ tsimykarana iwatsahi ihumo myspirikporētsa, Deus hyrikoso humo tsimyarape pokzitsikinaha iwatsahi kasyhyryze Deus bo typamykysonahaktsa kytsa! Iwa moziknaha h̃. Ipe tsimaha:

– O myzo ikia Pauro tsitsumuēhīkta! Ahumo tsipunihikrēta mozik. Moku-ruze typokzitsikta.

³¹ Asaktsa Sudeutsa aharere bo batu h̃ maha, Pauro ty ka beze beze byitaha, ity ykni ykni byijataha. Ikia Pauro tsipokzitsikta! Serusarēhe ezektsa Sesus tuktsa tysitsumuēhīkta! Sudeutsabyitsa siokyrysaro piaksekenaha, ana humo kino amytsatyhy byihuja ahumo sakurētsa moziknaha – tsimaha iwa Deus bo kasyhyryze tsimypamykysokonaha.

³² Ana humo kino tsimykarana zeka kakurēta mozik. Iwaze Deus moziknaha zeka ahabo mynakozore. Kakurēta h̃. Ikiahatsa tsipikykykynaha niwatihi ana humo hi kahyrinymyrēta.

³³ Deus bo ahatsyhyryze mopamykysoko:

– O Deus myzo Homa ezektsa tysipokzitsikta! Batu paikpa mytsaty mykaranaha ahumo sakurētsa moziknaha – my. Iwa h̃.

16

Sizubarētsa humo kahyrizikbarēta.

¹ Kyze Pebe inarokotatsa myzawy pe:

– Ikia tsamysapyrētatsa – my. Atatsa Sesus tuktsa izumubanahaze Deus harere piwabykynaha mysitsumuēhīkī. Asaktsa Kēkereja ezektsa mysitsumuēhīkī.

² Ahabo mozumuze ikiahatsa hi:

– O myzawy pany pakutyny. Mytuk tsikadisaha mywahoro eze tsikuru – tsimaha. Iwa Sesus tuktsa sizubarētsa tynahapepokzitsikinahaktsa. Atatsa kino sizubarētsa nisitsumuēhīkī atatsa ziktsumuēhīkī. Iwatsahi hawa itsyhyryze tsimaha ana ty kino tsimahaktsa!

³ Kytsa sizubarētsa Homa ezektsa sihumo kahyrizikbarēta Pisisira, Akuiro ibarikta kino niwatihi sihumo kahyrizikbarēta. Asahi katuk Sesus Kiristu tsyhyryze tarabajaziu ziknakaranaha.

⁴ Kapokzitsiwytu asiba tahabawynaha. Sisoho motsasoko:

– Tsahamysapyrētsa – mynakara. Iwa ustsya kytsa Sudeutsabyitsa mykaranaha. Sesus tuktsa nanabyitaba atsatu motsasokonaha. Asaktsa izumubanahaze Deus harere piwaby tsihikiknaha.

⁵ Sesus tuktsa niwatihi siwahoro bo izumubanahaze sihumo kahyrizikbarēta.

Epeneto inarokota kaharereziuwu humo kahyrizikbarēta. Atakta taparakta Sesus harere bo hỹ nikara Asia ezekta my.

⁶ Maria humo kahyrizikbarēta niwatihi. Atatsa ahatuk Deus pokzi tarabaja ziknakara.

⁷ Katukytsa Āderoniko, Sunias ahatsa niwatihi sihumo kahyrizikbarēta. Katuk sakyriukrēnikitsa hurukwy eze niapykyryknaha. Asaktsa Deus nisipeha Deus harere nitsasokoronaha ana humo kino siakzohotsa sihyrinyrētsa. Utakta batu Sesus tukta tuze ihumo batu kaspirikpobyize asaktsa botu Sesus tuktsa niaha.

⁸ Āpiriato humo kahyrizikbarēta. Atakta kaharereziuwu h̃y ata kino Sesus harere bo hỹ ziknakara niwatihi.

⁹ Urubano humo kahyrizikbarēta atahi katuk Sesus soho nitsasoko. Estakis kino niwatihi kaharereziuwu humo kahyrizikbarēta.

¹⁰ Aperes humo kahyrizikbarēta atakta tsakubyrisorokrēta tu Kiristu tuk mynapykyryk. Aristoburo wahoro ezektsa kino niwatihi sihumo kahyrizikbarēta.

¹¹ Katuky humo Erodião humo kahyrizikbarēta. Naresiso wahoro ezektsa humo niwatihi asaktsa Sesus tuktsa sihumo kahyrizikbarēta.

¹² Myzawy Tiripaena, Tiriposa kino niwatihi asiza Sesus Kiristu tsyhyryze tarabaja ziknakaranaha asiza humo kahyrizikbarēta. Myzawy Periside kaharereziuwu atatsa humo kamypokzitsiarēta atatsa humo kahyrizikbarēta, atatsa hi Sesus tsyhyryze tarabaja ziknakara.

¹³ Hupo atahi Kiristu ziwatawy ihumo tsipunihikrēta h̃y. Ije humo niwatihi, sihumo kahyrizikbarēta. Atatsahi ziksapywyky itse wata ikyzik kasopyk.

¹⁴ Asīkiritō, Perekōte, Eremes, Patorobas, Eremes, iwatsa mytukytsa situk niwatihi sizubarētsa humo kahyrizikbarēta.

¹⁵ Piroroko, Suria, Nereu izawy Orīpas iwatsa Kiristu tyryktsa situk sizubarētsa humo kahyrizikbarēta.

¹⁶ Kytsa ahahumo ahamypokzitsiukrētsa tsimymywatawynaha iwatsahi tuharapeharapyryknahaktsa. Sizubarētsa Sesus tuktsa nanabyitaba asahi mozumubanaha Deus harere piwabykynaha, asaktsa ahahumo sihyrizikbarētsa h̃y.

Asiba nepyk kapehawu bo wabytoktotahaktsa.

¹⁷ Iwaze katukytsa kapehawu bo tsiwabytoktonahaktsa! Asaktsa myharape sakbyrikinahatsa ihumo ahasopykziuhu! Hawa botu tsinymyrynaha anahi pimyi tsihikiknaha. Pahaknikinaha. Sibara botu tahaktsa!

¹⁸ Asaktsa hawa Kiristu mozihikik batu h̃y zikaha. Taha bo zuba sisopyk. Asahi:

– Myharere baba. Hawa wasani ana tihi tsimykaranaha – iwa mybarapetu mykaranaha. Kytsa sispirikpobyitsa tu mysisapybyikinaha iwatsahi sihumo paikpa mytsaty mykaranaha.

¹⁹ Ikiyahatsa humo kakurēta h̃y. Kytsa sizubarētsa nanabyitaba ahasoho piwabykynaha hawa Sesus Kiristu harere bo zuba hỹ tsimykaranaha iwatsahi ihumo ahaspirikporētsa tsimoziknaha ana hi ziwabynaha. Iwatsahi isapyrēnikia ty zuba tahaktsa kytsa! Imysapybaraka tsimoewybaiknaha.

²⁰ Deus ba hawa tohi zizukninaha iwaze Satanas zikwy myzipapykik iwaze ba zahayknizo iwatsahi ikiahatsa Satanas bo ka mytsaty mytsaty byitahaktsa! Iwaze Deus bo ahatsyhyryze ikpamykysoko:

– O Deus myzo tysisapywykykta! – mykara.

²¹ Katukta Timoteo ahahumo tsihyrizikbarēta. Katuk tarabaja mynakara. Mytukytsa Rusio, Sasō, Sosipataio iwatsa ahahumo sihyrizikbarētsa.

²² Uta Terisio amy ty Pauro motsasoko anahi papeu humo piwatahaka, uta kino niwatihi ahahumo kahyrizikbarēta, katsaktsa Sesus harere bo hỹ tsimykananaha iwatsahi ihumo myspirikporētsa iwatahi ahahumo kahyrizikbarēta.

²³⁻²⁴ Kaijo ahahumo tsihyrizikbarēta. Uta Pauro iwahoro eze ikapykyryk. Anaeze Sesus tuktsa mozumubanaha asa kino niwatihi ahahumo sihyrizikbarētsa. Erasto ahahumo tsihyrizikbarēta, Korītio ezektsa atakta okyrysaro perykytsa. Mytsy Kuarato niwatihi ahahumo tsihyrizikbarēta.

Deus bo tsimysakibaziknahaktsa.

²⁵ O kytsa Deus bo tsimysakibaziknahaktsa! Katsaktsa:

– O Deus ikia zuba apunihikrēnikita h̃y. Ikie zuba amysapyrēnikita h̃y – tsimahaktsa! Atahi tisokpykziurēta h̃y. Ata humo hi mypunihikrētsa tsimoziknaha, katsaktsa Sesus harere bo hỹ tsimykananaha izikwy humo tsikspirikpotohinaha. Deus wasania ty hawa Sesus kytsa Deus bo mysioktyhyryk motsasoikik. Kytsa sizubarētsa bo ana harere nitsasoko. Tubabatu anaharere mybarawy ezektsa bo tsihokdaharēna. Abaka batu ihokdaha.

²⁶ Deus harere mybarawy ezektsa sizubarētsa bo motsasoko, kytsa mysipeha wasania ty motsasokonaha iwaze asa kino niwatihi Deus harere bo hỹ mykananaha, iwatsahi ihumo sispirikporētsa moziknaha. Deus koikny baktatu isohowy humo iwa iharere papeu humo tapara tu ziwatahakanaha aba kino atsatu mykara.

²⁷ Iwatsahi Deus bo tsimysakibaziknahaktsa kytsa!

– O Deus myzo ikia tsahyrinymyrēta babata ahyrinymyrywy wasani h̃y ikia zuba asopykziurēta h̃y iwatsahi aharere bo hỹ tsimaha. Ikie hi Sesus Kiristu katsa mybo tsikzipeha iwatahi inasik iwatsahi atuk mywahi tsimynapykyryknaha. Ikie humo zuba mykurētsa tsimynapykyryknaha – tsimaha.

Iwa tsimysasonahaktsa kytsa h̃y. Niwazuba.

Pauro

Pauro Korītio ezektsa bo ziwatahaka

Pauro Atenas niparakze Korītio ezektsa bo niukuru sibo Sesus soho nitsasoko, anaeze nisispirikpoko, sizubarētsa Sesus humo sispirikporētsa niyziknaha. Iwaze sihumo ky ziwaby estubaka isopyksapybyri ty nikara. Iwatahi Pauro sibo ziwatahaka wasaniha ty nisispirikpoko. Deus hyrikoso ituk ziknapykyryk tahi iwatsahi katsa kino niwatihi tanymyryky.

¹ Uta Pauro. Papeu ikiahatsa bo piwatahaka. Mytuky Sostenes tuk ahabo piwatahaka. Tubabatu iakzohota Deus zikpeha kape niy:

– Ikia aparakbaha bo tsimy. Wasaniha ty kytsa sizubarētsa bo tsimytsaso – niy. Hyŷ iky.

² Ikiahatsa Korītio ezektsa asaktsa Sesus harere humo ziknapykyryknahatsa Deus harere piwabynaha, ahabo piwatahaka. Ikiahatsa kino Sesus Kiristu humo wasani tsimaha. Ikiahatsa hi:

– Sesus Kiristu mypehakatsa – tsimaha. Katsa kino niwatihi. Nanabyitaba kytsa tihi:

– Sesus Kiristu mypehakatsa – mykaranaha. Ikiahatsa bo piwatahaka. Ikiahatsa Deus tyryktsa iwatsahi ibo tsimypamykysokonaha Sesus harere bo hyŷ tsimykaranaha ihumo ahaspirikporētsa tsimoziknaha.

³ Deus hi myzo. Sesus Kiristu mypehakatsa my. Iwatahi ahatsyhyryze Deus bo mopamykysoko:

– O myzo Korītio ezektsa asahi Sesus humo sispirikporētsa tysisapywyky. Ikia Sesus Kiristu tuk tysipunihikwyky – my. Iwa Deus bo my.

Kiristu humo Deus Korītio ezektsa mynasisapywyky.

⁴⁻⁵ Ahasoho bo mytsaty myze Deus bo mynapamykysoko:

– O Deus ikia zuba amysapyrēnikita. Korītio ezektsa tysisapywyikik tysipokzitsi. Sesus Kiristu humo siharereziurētsa. Hawa wasania ty mot-sasoko ana hi pinymyrykynaha. Iwatsahi ahumo sihyrinymyrētsa. Aharere humo ba zikspiriktsokdanaha. Iwatahi kakurēta – my.

⁶ Tapara Kiristu soho ahabo nitsasokoroze tsiwabytoktonaha iwatsahi iharere bo hyŷ tsimykaranaha.

⁷ Iwatsahi amy humo ahaku byri zeka ahabo nyny my. Ihumo ahaspirikporētsa. Ihyrikoso ty ahabo nyny my. Sesus Kiristu mybo myziksizo. Deus tatse mybarawy bo myzipehazo, ana hi taperyky. Tsipiperykynahaze amy humo ahaku byri zeka Deus hyrikoso ahabo nyny my.

⁸ Deus pahapunihikwyky iwatsahi ihumo ahaspirikporētsa tsimoziknaha. Iwaze hi Sesus Kiristu myziksizoze ahakubyrisorokrētsa hŷ. Iwatsahi Deus harere humo batu ahaspiriktsokdahu, iharere bo yhŷ tsimykaranaha.

⁹ Sesus Kiristu myziksizoze iokzeka ahamysapyrētsa tsimoziknaha iwatahi pahatsumuēhĩ.

Korītio ezektsa taharere ty harapubeteheke nikaranaha.

¹⁰ Hawa Deus mytsaty mykara naha atsatu mykara iwaze pahatsumuēhĩ. Atahi zahawatawy Sesus Kiristu tuk tsimyzurukunaha iwatahi pahatsumuēhĩ. Deus tse Sesus Kiristu kino mypehakatsa my iwaze Deus harere bo hyŷ tsimykaranaha.

¹¹ O katukytsa Karoe tukytsa tihi:

– O kytsa Korītio ezektsa asahi Sesus humo sispirikporētsa mopaparahakanaha – nikaranaha.

Iwa zeka katukytsa ahape my:

– Kaharere tsiwabytoktonahaktsa! Sesus Kiristu pokzi ba taharere ty harapubeteheke zikykara – tsimaha. – Sesus pokzi ahahokanibyrihu ja. Ahasakimyi ja byitsa tu ustsā harere bo yh̄y tsimykaranaha. Tyhāpepokz-itsikinahaktsa! Hawa wasani my atsatu tynakaranahaktsa! – my.

¹² Wastuhu kytsa tihi:

- O katsaktsa Pauro harere bo zuba yh̄y tsimaha – nikaranaha. Ustsā kino:
- O katsaktsa Aporo harere bo zuba yh̄y tsimaha – nikaranaha. Mektsatu:
- O katsaktsa Peduru harere bo zuba yh̄y tsimaha – nikaranaha. Ustsā:
- O katsaktsa Kiristu tuktsa tsimaha – nikaranaha.

¹³ Iwa tsimykaranaha zeka Kiristu metutu tsimaha. Utakta iharapatawyhyta humo batu ahasapyzēky hyrikosokda aha. Kiristu zuba ahasapyzēky nihyrikosokda. Kapokzitsibara humo tu zaharasusuhiknaha. Sesus Kiristu ahāpehatsa mozik iwatsahi kytsa zaharasusukunaha. Iwatsahi batu taharere ty harapubetehe ba zikaha tsimaha. Ahasopyksapyhu ja. Katsaktsa myzubarētsa Sesus harere bo hȳy tsimykaranaha iwatsahi ityryktsa tsimoziknaha.

¹⁴ Wastawyzik sizubabyitsa zuba iksiharasusuhik iwatahi kakurēta. Kirispu Kaijo ahatsa zuba iksiharasusuhik.

¹⁵ Iwaze kytsa batu tyso:

- Katsa Pauro humo nimyharasusu – iwa batu tyso.

¹⁶ Abaka mytsaty iky Estepanus ituk kytsa iksiharasusuhik. Asa zuba iksiharasusuhik.

¹⁷ Kiristu wasania ty mopamykysoko niytahi zikpeha. Kytsa ba ziksiharasusu niytahi batu tpeha. Wasaniha ty motsasokoze:

– Sesus Kiristu iharapatawyhyta humo ahasapyzēky nihyrikosokda – my. Wastuhu kytsa sihyrinomyrētsa iwatsa tu sispirikpobyitsa tu anaharere humo batu siakparawy. Kiristu harere bo batu h̄y zikaha, iwatsahi ana humo hi Sesus harapatawyhyta soho batu siakparawy. Asahi:

- Anaharere humo hi batu sihyrinomyry – mybarapetu mykaranaha.

Korītio ezektsa Kiristu humo sispirikporētsa moziknaha.

¹⁸ Deus harere wasaniha tsiwabynahaze:

– Sesus Kiristu iharapatawyhyta humo nihyrikosokda – tsimaha. Asahi Deus humo sispirikporētsa:

– O wasani. Deus tazikwy humo mymyoktyhyryk, Sesus nihyrikosokda naha humo hi mytsapuhyripyrywy niyzik – tsimaha. Ustsā kytsa asahi Sesus humo batu sispirikpo:

– Amy skaraba Sesus nihyrikosokda. Iwa byizeka tisapyrēna ja – mybarapetu mykaranaha. Asaktsa sinini ykarawy bo maha.

¹⁹ Tubabatu Deus harere papeu humo ziwatahaka:

– Sihyrinomyrētsa tahaokze tu zuba sihyrinomyrētsa.

Mybarawy ezektsa tihi:

“O sihyrinomyrētsa babatsa” mytsaty ahabyitsa mykaranaha.

Kaokzeka batu sihyrinomyry. Sihyrinomyrytsa hi mohokdanaha my – niy.

²⁰ Sihyrinomyrētsa Deus okzeka batu simyharerewaby. Siharereharētsa, sihyrinomyrētsa kino niwatihi Deus okzeka batu simyharerewaby. Deus okzeka sihyrinomyrybyitsa tu zikzurukunaha. Mybarawy ezektsa tihi – sihyrinomyrētsa – mytsaty ahabyitsa mykaranaha.

²¹ Iwaze sispirikpobyitsa sispirikpobyiza kino niwatihi mypeka:

– Batu ahahyrynymyry h̄y. Sesus mysapyzēky nihyrikosokda tsimykaranaha. Anahi batu wasani – mybarapetu mykaranaha. Deus hi tsihyrinomyrēta h̄y. Katsa ibo mymyoktyhyryk Sesus harere bo hȳy

tsimykarana i watsahi ihumo myspirikporētsa. Katsa batu myhyrinomyry Deus zuba tsihyrinomyrēta. Iwaze iharere bo zuba hỹ tsimykarana iwatahi mymyoktyhyryk.

²² Sudeutsa mype iwatawy ty tsimaha zeka iwaze myspirikporētsa tsi-moziknaha. Sudeutsabyitsa mype iharere humo tanymyry tsihikik iwaze myspirikporētsa tsi-moziknaha. Hawa Deus zikwy mykara ana bo hi iktsa tsimaha ana humo hi hỹ tsimaha.

²³ Iwaze katsaktsa Sesus iharapatawyhyta humo nihyrikosokda naha tsikt-sasokonaha. Anaharere humo hi Sudeutsa batu siakparawy. Sudeutsabyitsa kino niwatihi ana humo hi batu siakparawy. Anaharere Sudeutsabyitsa batu siwabyhy. Mype:

– Ikiahatsa ahatyrykmyitsa anaharere kytsa mysimiwy – mybarapetu mykaranaha.

²⁴ Katsaktsa Deus nimywatawy Sudeutsa, Sudeutsabyitsa kino niwatihi mybo iharere Sesus iharapatawyhyta humo nihyrikosokda ana humo hi tisapyrēna. Anahi mybo Deus wasania ty my. Sudeutsa, Sudeutsabyitsa kino niwatihi Sesus Kiristu nihyrikosokdaze Deus tazikwy ziwatawy. Tsihyrinomyrēta babata nimywatawy.

²⁵ Kytsa tsikaeni zuba sihyrinomyry Deus zuba ihyrinomyryta babata. Katsa mypunihik tsikaeni zuba Deus ba hawa tohi zikzuninaha. Sesus nihyrikosokdaze aparakbaha:

– O Deus batu takta batu zibetesa – ahabyitsa tuja mytsaty mykaranaha. Hawa Deus mykara kytsa okzeka batu punihik baija mytsaty ahabyitsa tuja mykaranaha.

²⁶ Katukytsa mytsatziutaha! Tapara Deus zahawatawy batu ahahyrinomyry. Mybarawy ezektsa ahasoho humo:

– O batu sihyrinomyry – nikaranaha. – Ahatuk batu myhyrizikwytsit-saka. Batu ahatuk ahanamyrētsa. Batu ahahyrinomyrētsa.

²⁷ Deus zahawatawyze ihyrytsa tsi-moziknaha iwaze mybarawy ezektsa sisikpybyrētsa. Asaktsa mybarawy ezektsa batu myhyrizikwytsa asahi Deus nisiwatawy iwaze mybarawy ezektsa sisikpybyrētsa. “Katsaktsa myhyrinomyrētsa, myharerewabyrētsa iwatahi Deus nimywatawy” – mytsaty ahabyitsa tuja nikaranaha.

²⁸ Asaktsa mybarawy ezektsa myhyrizikwybyitsa asahi Deus nisiwatawy ihyrytsa moziknaha iwatsahi mybarawy ezektsa sisikpybyrētsa. Iwaze amy ty mybarawy ezektsa mytsaty nikaranaha, aty soho humo – O atakta abazubata tsimaha – mybarapetu nikaranaha. Deus okzeka anahi mahani.

²⁹ Iwaze batu aty tohi kasoho ty Deus myharereziuw.

³⁰ Deus hi myhumo tsimypokzitsiarēta. Sesus Kiristu mymyoktyhyryk iwaze iharere humo tanymyry ituk tsinapykyryknaha. Ihumo myspirikporētsa atahi mymybetesaka. Iharere bo zuba hỹ tsimykarana iwaze Deus myhumo:

– O asaktsa simysapyrētsa moziknaha – my. Kiristu humo myspirikporētsa. Iwa Sesus Deus bo mymyoktyhyryk ityryktsa tsi-moziknaha.

³¹ Iwaze mysoho ty ba zikmyziuwynaha. Deus harere papeu humo ziwataha:

– Tahasoho ty sobyizeky ahasopyksapyhu ja mypehatsa soho zuba tynat-sasokonaha – Deus papeu humo niy.

2

Uta ahabo ikzumuze kapetu ikykara – O Sesus iharapatawyhyta humo nihyrikosokda – ana hi motsasoko.

¹⁻² – O Sesus Kiristu soho zuba sibo iktsasoko. Hawa iharapatawyhyta humo mysapyzeken nihyrikosokda iwa kapetu ikykara. Iwatatu ahabo ikzumu iwatahi Sesus Kiristu soho zuba ahabo iktsasoko. “Utakta kahyrinomyrēta” sasabyitsa harere humo ka ba ziktsaso, kasoho baba humo ka ba ziktsaso, Sesus Kiristu soho humo zuba iktsasoko.

³ Ahabo ikzumuze kapybyrēta ikykara. Kaharere humo ja Deus ba iakparawy ikykara tahi ana pokso hi kapybyrēta ikykara iwatahi iktydydykyk tu.

⁴ Deus harere ahabo iktsasokoze ba ihyrinomyry taziwazy. Siharere hokdahaarētsa kaharere amypubara. Iwa ikpamykysoko Deus hyrikoso katuk mynapykyryk atahi tazikwy ty kabo nyny niy iwatahi wasani ikykara.

⁵ Iwaze Sesus humo ahaspirikporētsa. Kaharerebara humo tu ahaspirikporētsa, Sesus humo ahaspirikporētsa Deus hyrikoso humo tsikspirikpokonaha hỹ –.

Sesus Kiristu humo zuba myspirikporētsa tsimoziknaha.

⁶ Kytsa Deus hyrikoso bo hỹ maha Deus hyrinomyrywy baba humo sihyrinomyrētsa asa bo hi motsasoko. Kytsa batu sispirikpo anaharere humo hi batu sihyrinomyry. Kytsa ustsā pehatsa siharere humo batu tyso. Aba zuba siharere piwabykynaha iwa zeka aibaka baziwabyzonaha. Deus siharere zepyk. Kytsa siharere humo myspiriktsokdanaha.

⁷ Deus ihyrinomyrēnikita. Deus harere ahabo motsasoko iwaze iharere tsiptaksenaha. Deus ta koikny baktatu mype niy:

– Katse iharapatawyhyta humo mohyrikosokda iwaze hi kytsa kabo mynasioktyhyryk – niy. Taparaka ana harere tsihokdahaarēna abaka mahani. Anatyhi zahawatawyky.

⁸ Taparakta mypehatsitsa ana harere ka batu siwabyhy. Zinomyrynaha zeka Sesus Kiristu harapatawyhyta humo ba zihyrikznaha. Ata zuba imysapyrēnikita. Ata zuba wasanikita.

⁹ Tubabatu Deus harere papeu humo ziwatahaka:

– Deus isapyrēnikia ziperyky, kytsa bo zinyny tsihikik eze tu.

Abazuba isapyrēnikia. Batu aty tohi isapyrēnikia inyhy maha. Batu aty tohi isapyhanikia soho ty waby.

Batu mytsaty zikaha isapyhanikia wata batu nawaha ja ziky – niy.

¹⁰ Ana humo hi Deus nymywatawy. Taparaka tsihokdahaarēna abaka batu ihokdaha. Deus hyrikoso hi mytuk mynapykyryk iwatsahi myhyrinomyrētsa. Deus hyrikoso ihyrinomyryta babata. Hawa Deus mozihikik naha humo tsihyrinomyrēta. Tsizubarēna humo inomyryky atahyrikoso hi Deus isapyrēnikia ty mywatawyky hỹ.

¹¹ Katsa myhyrikoso zuba, myhumo tsihyrinomyrētsa. Ustsā kytsa batu sihyrinomyry. Atsawatu hawa Deus mozihikik ihyrikoso zuba tsihyrinomyrēta ihyrikoso zuba isapyrēnikia soho humo tsihyrinomyrēta.

¹² Asakta Sesus humo batu sispirikpo Deus hyrikoso situkbyitsa hi. Katsa myspirikporētsa hi Deus hyrikoso mytuk mynapykyryk iwatahu Deus wasania ty mykaranaha humo tsipinomyrykynaha. Mybarawy ezektsa iharere bo ba hỹ zikaha, asahi Deus sapynikiaty batu tyso zikaha.

¹³ Iwatahi iharere humo zahayrinomyryky atsatu Deus hyrikoso zikyrynyryky. Kaharere zuba bara humo ba zahayrinomyry. Deus

harere humo pahahyrinymyryky, iwaze ikiahatsa ana harere bo hỹ tsimykarana.

¹⁴ Aty Deus hyrikoso ituk byizeka Deus harere batu ziwaby. Iharere tsihokdahaena iwaze batu h̃ mykaranaha. Deus hyrikoso bo batu h̃ zikaha. Kytsa Deus hyrikoso situk mynapykyryk nahatsahi asa zuba Deus harere bo yh̃ mykaranaha.

– O iharere wasani – maha. Deus hyrikoso humo ka.

¹⁵ Aty Deus hyrikoso ituk mynapykyryk atakta tsimytsatyhyziurēta. Wasaniha humo tsihyrinymyrēta. Imysapybara humo tsihyrinymyrēta. Asaktsa kytsa harere zuba piwabykynaha asahi batu sispirikpo. Asaktsa kytsa Deus hyrikoso bo hỹ mykaranaha nisimijakanaha sihumo batu sihyrinymyry. Deus harere tsihokdahaena iwatsahi iharere humo ziso-hometukunaha.

¹⁶ Deus harere papeu humo:

– Deus mytsaty mykara naha humo batu aty tohi ihyrinymyry.

Ba aty tohi Deus zihyrinymyry – niy.

Katsaktsa Kiristu watsa mytsaty tsimykarana, ihyrikoso mytuk mynapykyryk. Iwa my.

3

Deus tsumuēh̃tsitsa.

¹ – O katukytsa ikiahatsa bo ikpamykysoko eze tu asahi Deus harere bo hỹ mynakanaha iwa ahabo ikpamykyso tsihikik. Batu zik. Ikiahatsa Deus harere bo tsikaeni zuba hỹ tsimaha iwaze jabyitsa watsa Deus harere bo tsikaeni zuba hỹ tsimaha. Iwaze Deus harere bo batu ma zikaha. Ikiahatsa jabastsa watsa.

² Iwatsahi zahahyrinymyryky jabastsa watsa tsikaeni zuba tsipinymyrykynaha. Siypyktsa watsa zahahyrinymyryky batu ziky. Abaka batu wabyziu tsimaha jabastsa watsa tsimaha. Deus harere bo tsikaeni zuba hỹ tsimaha iwa batu ahahyrinymyry. Sibykhytsa tahaopuwysa zuba mynasikzukunaha siraratsani ba ziboronaha, siwatsa tsimykarana iwatahi Deus harere tsikaeni zuba pahahyrinymyryky. Deus harere ba ziakse tsihiknaha.

³ Ikiahatsa ahatuk tu zeka tsahazokdirētsa. Ahatuk tu zeka tsimyhapepehaikiknaha tsahasakimijarētsa.

Iwa sisopik tsa humo ka tsimykarana zeka sispirikpobyitsa watsa tsimyzurukunaha iwa Deus hyrikoso situk batu mynapykyryk. Iwatahi batu pahahyrinymyry Deus soho tsikaeni zuba tsinymyrynaha.

⁴⁻⁷ Wastuhu kytsa tihi:

“Katsaktsa Pauro tuktsa tsimaha” nikaranaha. Utsa kytsa kino:

“Katsaktsa Aporo tuktsa tsimaha” nikaranaha. Iwa tsimytsasokonahaze sispirikpobyitsa watsa tsimyzurukunaha. Iwatahi aty zeka Kiristu soho ahabo nitsaso batu myhyrizikwy. Aty zeka Deus harere zahahyrinymyryky batu myhyrizikwy. Deus abazubata iwata humo hi tsahspirikporētsa tsikyziknaha izikwy humo. Atakta imysapyrēnikita. Aporo pykyhy myhyrizik byita my.

Uta kino niwatihi pykyhy myhyrizik byita my. Sesus Kiristu zuba abazubata my. Katsa Sesus Kiristu soho tsimytsasokonaha. Deus mytsumuēh̃tsitsa tu wasania ty Sesus Kiristu soho ty ahabo tsiktsasokonaha iwaze ihumo ahaspirikporētsa. Mypehatsa nimepaha iwatsa tu tsimykarana. Hawa tsimykarana mytsuhuk wata tsimaha. Anaeze siriktsa katsa mysiparinahaze. Uta ahabo Kiristu iktasokoze anahi siriktsa watsa, iharere ahatuk

iparikik, bykyze Aporo ahabo izumu. Deus harere humo zahahyrinymyryky atakta hyritsik waha humo zahahyrinymyryze.

Deus humo zuba siriktsa myzepobaiknaha, izikwy humo riktsa tahapyknaha. Iwa Deus Sesus humo ahaspirikporētsa tsimoziknaha izikwy humo, siriktsa watsa mozipobaiknaha ikiahatsa izikwy humo ahaspirikporētsa. Hawa siriktsa ty waratok buruk nisiparikik tawata Deus harere bo mytsatziu tsimykaranaha iwaze wasani tsimykaranaha.

⁸ Deus okzeka aty Kiristu soho motsasoko bykyze usta Deus harere humo mysihyrinymyryky atsatu maha. Hawa wasani mykara ana ty hi anahuak ty ibo nyny my. Aty tarabajawy humo wasani my zeka sizubarēna ty nyny my. Aty tarabajawy humo pykyhytu ziky byizeka ihuak ty tsikaeni zuba nyny my. Wasani my zeka anatyhi ibo nyny my – niy.

⁹ Katsaktsa Deus tuktsa. Izikwy humo mytarabajawy humo mysopykziurētsa. Ikiahatsa Deus tsuhuk watsa iwa botu nitsasoko.

Ikiahatsa niwatihi Deus wahoro watsa atahi zihitsa wata pahapokzitsiki.

¹⁰ Kytsa wahoro uruktsa. Suwy tsioketsihezizirēta zeka ba ziknaktsehepetok. Uta Kiristu soho ahabo iktsasoko, ana harere bo hyŷ tsimaha iwatatu ikiahatsa batu sinini ykarawy bo tsimaha. Deus hyrikoso katuk mynapykyryk iwaze sispirikpobyitsa bo Sesus Kiristu motsasokoro. Deus wasania ty motsasokoze wahoro uruktsa tsawata, iwatahi wahoro ba ziknatsehepetok. Abaka usta pahahyrinymyryky, atakta pykyhytu pahahyrinymyrykyta! Atahi maku wahoro mozoknikize tawata my.

¹¹ Sesus Kiristu mybarawy bo botu izumu Deus hi:

– Katse humo zuba ahaspirikpohuktsa! – niy. Wahoro mozokninahaze tawata zisapybaik iwazeka wahoro ba ziknatsehepetok. Anawahi Deus tse mybarawy bo zipeha iwaze katsa batu sinini ykarawy bo tsimaha. Ata humo zuba Deus bo mymyoktyhyryk.

¹² Atakta pahyrinymyryky wahoro sukntsitsa watsa. Wastu zuba wahoro tisapyrēna niaha. Utsa batu, tahastuwy zuba mozoknikinaha. Wahoro sukntsitsa harahare sipokzitsihikitsa iwa anatyhi mozoknikinaha. Asahi sihyrinymyrētsa watsa. Ustsaktsa tahastuwy zuba watsa mozoknikinaha. Asahi hwitsa ty waharazipaty, towahaditsa iwahaty mozoknikinaha. Asahi sihyrinymyrybyitsa watsa maha.

¹³ Izo wahoro zipa zihi humo mynapokze mokorobaik. Wahoro haraharetsa suknihi zuba zeky ba zikoro. Aty zituwy mozokni zeka kytsa pinynaha tahastuwy mokorobaiknaha humo. Kytsa sisoho humo maha:

– O asaktsa batu pykyhytu zikaha – maha. Siwatsa hi Sesus Kiristu myziksizoze asaktsa pahahyrinymyryziuku zeka asa humo hi myhyrinymyrētsa. Utsa batu sihyrinymyryziuku asa humo hi myhyrinymyrētsa. Pahahyrinymyryziuku zeka Sesus humo ahaspirikporētsa tsimoziknaha. Ahaty sihyrinymyryziuku byitsazeka tsikaeni zuba Sesus humo sispirikporētsa.

¹⁴ Aty Deus harere humo zahahyrinymyryziuku zeka ata zuba Deus itarabaja huak ty nyny my.

¹⁵ Aty itarabajawy humo ahahyrinymyryziuku byizeka batu ihuak ty nyny my. Deus hi:

– Atakta kaharere humo batu imyhyrinymyryziuku iwaze batu ihuak ty ibo nyny my. Maku iwahoro mokoro zeka izo pokso mowakik inamy mokorobaik zuba. Atakta batu ihyrinymyryziubyita wata my – niy.

¹⁶ O mytsatziutahaktsa kytsa! Deus hyrikoso ahatuk mynapykyryk iwatsahi ikiahatsa Deus wahoro zubata ezektsa watsa tsimaha. Ana humo hi asiba tsikspiriktsokdanaha.

¹⁷ Deus wahoro zubata tisapyrēta. Iwa mytsaty my. Ikiahatsa iwahoro watsa tsimaha. Iwatahi ikiahatsa ahamysapyrētsa mytsaty mykara. Asahi pahamyiwykynaha Deus mysininiwyky. Asaktsa kytsa pahamyiwykynaha Deus mysipeha sinini ykarawy bo my.

¹⁸ Kyze batu zikaha pe spihikbatanaha. Batu tyso – Katsaktsa myhyrinomyrētsa. Sispirikpobyitsa okzeka myhyrinomyrētsa hỹ – mytsaty ahabyitsa tsimaha. Ahaharere ty pyktaha. Ahaokze ka ahahyrinomyrētsa watsa Deus okzeka batu wasani tsimaha. Ahaokze ahahyrinomyry byitsa eze ka Deus okzeka ahahyrinomyryrētsa tsimaha.

¹⁹ Mybarawy Ezektsa asahi:

– Katsaktsa myhyrinomyrētsa – mybarapetu maha. Deus sisoho humo:
 – Ikiahatsaktsa ahahyrinomyrybyitsa. Batu amy tohi humo ahahyrinomyry – my. Deus harere papeu humo ziwatahaka:
 – Mybarawy Ezektsa sihyrinomyrētsa mybarapetu sisopyk mykaranaha – niy.

Iwa niy.

²⁰ Deus papeu humo ziwatahaka:

– Mybarawy Ezektsa siharere batu imysapy my. Siharere zuba. Siokze zuba siharere tisapyrēna Deus okzeka batu sapy, atahi tsihyrinomyrēta – niy.

²¹ Iwaze batu aty tohi Deus okzeka ihyrinomyryta. Iwatatu kytsa soho humo batu tyso – O atakta iktsazuba mynakarata tsimiharerewabyrēta tsimy – nawa batu tyso.

²² Ikiahatsa tsizubarēna tsimaha Kiristu ahapehakatsa humo. Utakta batu. Utakta ahatsumuēhĩtsa zuba. Aporo, Peduru iwatsa ahatsumuēhĩtsitsa. Deus mybaratsa mybarawy bijoikpe iwa nizukni ahatsyhyryze nizukni. Abaka pahapokzitsiki. Tsimyhyrikosokdanahaze pahapokzitsi. Iwaha buruk tu tsimyzurukunaha zeka pahapokzitsiki. Iwa myzahapokzitsiki.

²³ Deus hi Kiristuzo babata. Ikiahatsaktsa Kiristu tyryktsa tsimaha. Iwatahi ahabo tsizubarēna ty nyny my hỹ.

4

Kiristu ykzohotsa.

¹ Uta, Aporo ahatsa niwatihi katsa Kiristu tsumuēhĩtsa tsimaha. Ahasoho bo kytsa mytsaty mykaranaha. Taparaka Deus harere tsihokdaharēna abaka batu ihokzaha, ana hi mybo ziwatawy anahi ahabo tsimytsasokonaha. Katsa Kiristu tsumuēhĩtsa iwatsahi myhumo ahamypokzitsiuhuktsa kytsa!

² Ipehatsa tatsumuēhĩtsa pe:

– Kaharere bo zuba hỹ tynakarata – my. Ata wahi niaha Deus mype my:
 – Kaharere bo zuba hỹ tahaktsa – my. Yhỹ tsimykaranaha. Iwa hỹ.

³ Kytsa kasoho humo:

– O Pauro wasani mykara – mykaranaha. Ana humo batu kawabyhy. Utsa kasoho humo:

– O Pauro batu wasani mykara – mykaranaha. Ana humo kino batu kawabyhy. Kapetu my zeka – O utakta wasani mokuru – my. Kamysatyhybyitatu batu kahyrinomyry Deus zuba kasoho humo tsihyrinomyrēta.

⁴ Kaokzeka wasani mozuruku tawata iwatatu sizubatsa batu kape zikaha:

– O Pauro Deus okzeka wasani my – iwa batu zikaha. Kapehatsa Sesus okzeka:

– Pauro wasani mykara – my. Iwa motsasoko zeka kamysapyrēta mozik. Ata zuba mytsatziyu mykara.

⁵ Iwaze abaka ustsah soho ty soso byitaha – O asaktsa Deus okeze batu simysapy maha – tsimaha. Iwa batu tyso. Sesus Kiristu myziksizoze

ata zuba kytsa soho motsasoko. Ata zuba mytsatyziu. Hawa kytsa papatu tsinakaranaha humo tsihyrinymyrēta. Tsinazihikiknaha humo tsihyrinymyrēta. Atahi mytsatyziu mykara atahi mype:

– O ikiahatsa wasani tsimykarana – my. Ahamysapyrētsa zeka iwa motsaso. Iwatahi iharere taperyky.

⁶ Ikiahatsa tsimaha zeka – O Pauro tsimiharerewabyrēta iharere humo waby zuba my. Aporo humo ka batu. Iharere bo ka waby waby byitaha – tsimaha. Iwa tsimytsasonaha zeka Deus harere papeu humo ziwatahaka batu hỹ tsimaha. Iharere tihi:

– Deus aparakbaha nimysukni. Iwatsahi astsabarētsa tsimaha. Myzubaha bo iktsa zuba mysopyk tsimaha – niy. Mytsasokoze kasoho Aporo kino niwatihi, anaharere hawa kytsa ahasopyk tsimaha pahawatawyky.

⁷ – O katukytsa Deus okzeka astsabarētsa maha. Ba aty tohi ihumo meky watu my. Iwatsahi astsabarētsa tsimyzurukunaha. Isapyrēnikia ty Deus hi ahabo nyny my. Iwatsahi ahaokze ka:

“O katsaktsa myharerewabyrētsa” tsimaha zeka, ahape tu ahasopyk mytsaty ahabyitsa tsimykarana. Iwaze isapyrēnikia ty Deus ahabo nyny my zeka batu tyso:

“Mysapyrētsa humo Deus isapyha ty mybo nyny my” – mybarapetu tsimykarana.

⁸ Ikiahatsa hi:

– O katsaktsa tsizubarēna tsimaha. Katsa zuba myhyrinymyrētsa. Katsa zuba mynamyrētsa tsimaha. Deus tuk ustsas kytsa bo mysiakzonaha Pauro ta batu. Aporo kino batu. Katsa zuba – iwa mybarapetu tsimykarana. Ikiahatsa ustsas bo tsimymykozokonaha zeka kakurēta my. Ustsas bo tsimysiakzokonaha zeka katsa niwatihi ahatuk ustsas bo tsimysiakzokonaha hỹ. Iwa batu my.

⁹ Kaokzeka Deus humo kytsa mysoho mytsaty mykarana:

– O saktas batu siakparawy – maha. Deus ykzohotsa tu kytsa okzeka batu mykparawy tsimaha. Iwatsahi kytsa ahamo batu simyharerewaby. Kytsa sakmyitsaktsa ustsas sisopyk:

– O tysibaiknaha – maha. Iwa mysopyk maha. Kytsa myhumo mymysupehekeknaha. Sizubarētsa mybo iktsaziu mykarana. Paikpa iktsa mykarana. Mybarawy ezektsa bijoikpe ezektsa kino niwatihi mybo iktsaziu mykarana

¹⁰ Sispirikpobyitsa mysoho tihi:

– O asaktsa Kiristu pokzi sityrykmyitsa mykarana. Ikiahatsa ahahyrinymyrētsa – tsawatsa mytsaty ahabyitsa tsimykarana. Kiristu humo ahaspirikpobyitsa iwatsahi ikiahatsa tihi:

– O Katsaktsa mypunihikrētsa, ikiahatsa myokzeka batu ahapunihiktsa – mytsaty ahabyitsa tsimykarana. Ikiahatsa ahamyharerewabyrētsa katsaktsa batu. Katsaktsa batu mykparawy. Iwa mytsaty ahabyitsa tsimykarana. Hawa mytsaty tsimykarana batu wasani my.

¹¹ Abaka myraparētsa, myrapukrētsa, mysukbyitsa, mywahorobyitsa. Ustsas kytsa mymykikinaha mymymyijaikiknaha. Iwa tsimyzurukunaha.

¹² Mydisahawy huak bete tarabaja tsimykarana. Mysuk huak humo niwatihi. Katy parabyry ahabyita ikykara. Kytsa mysoho humo nimysapybyrikinahaze batu myty tsapusare. Katsaktsa Deus bo sitsyhyryze tsimypamykysokonaha, iwaze hi Deus mysipokzitsiki. Mymysukyrykynahaze batu tyso myakubyrisorokrētsa.

¹³ Kytsa sisakparēnikitsa mysoho humo mymysapybyrikinaha katsaktsa batu isty myija tahasapywykynaha zuba. Asaktsa Sesus humo sispirikpobyitsa siokzeka katsa ykpyri watsa tsimaha. Abaka iwa mytsaty mykaranaha.

¹⁴ Iwa ahabo motsasokoze batu ahasikpyby, kapehawy zuba tsipiwabytoktonaha anahi mozihikik. Uta ahahumo kamypokzitsiarēta. Ikiyahatsa kahyrytsa watsa tsimaha, iwatahi pahasapywyky.

¹⁵ Sizubarētsa pahahyrinymyrykynaha iwatsatu estuba zubata ahazo my. Tapara Sesus Kiristu humo ahaspirikporētsa tsimoziknaha kaharere humo. Uta Deus wasania ty ahabo iktsaso iwaze Kiristu humo ahaspirikporētsa. Iwatahi uta ahazo wata my.

¹⁶ Iwatahi kapehawy tihi:

– Kasopykwatu tuzurukunahaktsa kytsa! – my.

¹⁷ Iwatahi Timoteo ahabo pipeha. Atahi katse wata. Wasani mozuruku. Uta ihumo kamypokzitsiarēta. Kiristu harere humo meky watu mozuruku iwa pahahyrinymyryky. Timoteo hi:

– Nanabyitaba Pauro mysihyrinymyryky – my. Asaktsa inakypyknahaze Sesus tuktsa humo atsatu pahahyrinymyryky iwaze kaharere humo ba zikspiriktsokdanaha.

¹⁸ Wastuhu kytsa ahatuk:

– Katsa zuba wasani tsimaha. Mysapyrētsa tu Pauro mybo ba zikziksizo – tsimaha. Iwa mytsaty tsimykarannahaze ahaokze ka sihyrinymyrytsa hyritywatsa mytsaty ahabyitsa tsimykarannaha.

¹⁹ Deus kape my zeka aba ahabo mynakozore. Asaktsa tahaokzeka sihyrinymyrētsa sibo mynakozore. Kapetu kasopyk:

– Asaktsa sihyrinymyrētsa ja. Deus zikwy humo mozurukunaha ja. Siharere bo zuba mykaranaha – my.

²⁰ Katsa Deus tyryktsa tsimoziknaha zeka iharere bo zuba hyỹ tsimykarannaha iwaze hi izikwy humo tsimyzurukunaha. Tsimytsasonaha zeka – O Deus mypehatsa tsimaha, iwaze iharere humo batu hỹ tsimaha – mybarapetu tsimykarannaha.

²¹ Iwaze ahabo mynakozoreze pahabetsak. Hawaha humo tsimyzurukunaha zeka pahabetsak. Hawa skaraba ahapokzitsi tuktu ahabo pomo tsimyzihikiknaha iwaze ahasapybyitsatu tsimykarannaha, niwazuba pyktahaktsa. Ikiyahatsa tsipinymyrynaha. Iwa my.

5

Korītio ezekta imysapybyita nikara.

¹ Kyze Korītio ezekta tazo oke ziaксе atahi Sesus tukta iwatatu tazo oke ziaксе. Ana harere iwaby batu isapy my. Sudeutsabyitsa asahi Sesus humo batu sispirikpo iwa ba zikaha, sisikpybyrētsa. Hawa niy ha ikiahatsa batu hỹ tsimahaze iwaze Deus okzeka batu isapy my.

² Ikiyahatsa ja. – O katsaktsa mysapyrētsa – tsimaha. Iwa batu tyso. Batu ahaku! Imysapybyita nikara ihumo typukarakanahaktsa! Atahi isapybyitahi ahabo ba zikumu! Tsinakypyknahaze ipe tsimaha:

– Nabo pāoty Deus wahoro bo mytuk ba ziktsuk – tsimaha.

³ Abaka batu ahatuk mynapykyryk iwatuze ahasoho bo mytsaty mynakara. Atakta imysapybyita nikara botu isoho ziwabybanaha:

– Atakta Deus okzeka batu imysapy my. Deus harere humo botu ipe my nabo pāoty ahatuk ba zikumuta! Ahasopyksapyziuhuja – my.

⁴ Tsinakypyknahaze Sesus Kiristu hyrikoso ahatuk mynapykyryk. Izikwy ahatuk mynapykyryk. Uta niwatihi ahatuk mopykykze tawata ahabo mytsaty mynakara.

⁵ Iwa tsiknakypyknahaze imysapybyita pe:

– Satanas harere bo zuba ma tsimy atahi apehatsa mozik – tsimaha. Iwa tsimaha zeka tozeka ja mohyrikosokdaze. Tozeka ja tamysapybyri pimoewy. Tamysapybyi pimoewy zeka Sesus myziksizoze iwaze ihyrikoso Deus bo pioktyhyryk.

⁶ Ba ahape tu tynakaranaha – O katsakta mysapyrētsa – tsimaha. Ba zikaha. Hawa tsimyzurukunaha humo anahi wasanibara. Ahasapybyitsatu tsimykaranaha atsikara pytowy waha my. Ipytowy tsikaeni zuba tiriko eze mytsakyyknahaze atsikara nawerekbaik. Anawahi estuba maku ahatuk imysapybyita nikara iwaze ustsā kytsa ituk pisapybyikinaha.

⁷ Ahamysapybyitsatu tsikykarana ana hi tsimoewynaha! Hawa Sudeutsa myikaha eze ipytowy ibyky zipaparakbaiknaha zuba anawahi ahamysapybyity tsimykaranaha tsimoewybaiknaha. Ahamysapybyitsa tu tsikykarana tsipimoewynaha zeka atsikara ipytowy ezytyk ziky waha tsimaha. Atsikara ipytowy byizeka my wasani tsimaha.

Tubabatu taparakta Sudeutsa Esito ekze niukurunahaze hozipyrykzatsa nisibakanahaze sispu ty tahatsuehe humo tsuku tsuku nikaranahaze hi wahoro ezektsa basibahuk. Hozipyrykza hi sisapyzēky iwaze zibezēnaha nikaranahaze hi ba zikykbanaha. Anawahi Sesus mysapyzēky nihyrikosokdaze mysapybyitsatu tsikykarana humo Deus ihumo ninyokzohik. Sudeutsa tahamyikaha bo pororo ziknakaranaha. Ana bo hi taparakta mytsaty ziknakaranaha. Iwata Sesus mysapyzēky nihyrikosokda ibo mytsaty tynakaranahaktsa!

⁸ Sesus nihyrikosokda iwa humo hi katsa mywahi ba zikyrikosokda. Iwatsahi mysapybyi tsimoewybaiknaha! Atsikara ibyky zipaparakbaiknaha waha. Wasani haty tuzurunahaktsa! Wasaniha ty zuba tynapamykysonahaktsa! Iwa tsimyzurukunaha zeka Sesus mysapyzēky nihyrikosokda naha humo mytsaty tsimykaranaha. Sudeutsa hozipyrykzatsa sisapyzēky ziknasibakanaha wa mytsaty ziknakaranaha katsa siwatsa tsimaha, Sesus mysapyzēky nihyrikosokda naha humo mytsaty tsimykaranaha.

⁹ Botu ahabo simysapybyitsa soho iwatahaka. – Asaktsa ustsā okeza humo sisoho wabymybaranikitsa batu ahatuktsa zikaha. Kytsa nisipyrykyknaha ba ahatukytsa zikaha – iky.

¹⁰⁻¹¹ Kamyspirikpowy batu wabyziū. Iwatahakaze myzubaha bo simysapybyitsa nikaranaha sibo batu metutu tsimaha. Asaktsa Sesus humo batu sispirikpohuk situk tsimyzurukunaha. Situk tsimyzuruku nahabyizeka ikiahatsa zuba tuzurukunaha iwa tsimaha zeka batu ahamysapy. Ata hi:

– Utakta Sesus humo kaspirikporēta – my. Iwa ustsā okeza mysihuahua zeka tsisoho wabymybarēta. Ituk ba zikmydisahanaha. Wastuhu kytsa:

– O katsa Sesus tuktsa – mykarana simysapybyitsa mykarana. Simyspihikbatanikitsa. Siharerewabymybarētsa. Ustsā namy pebyk tsihikiknaha. Deusbyita hyrikoso zuba siakparawy. Tsōsī mozikuikiknaha. Asaktsa ispehatsa harere bo batu hỹ zikaha. – Aty iwa mozuruku zeka Sesus humo ispirikpobyita iwatsahi batu ipe: “katsy” ahasopyk ituk ba zikmydisahanaha – my.

¹²⁻¹³ Kytsa Sesus humo batu sispirikpo utakta batu ispe my:

– O ikiahatsa batu ahamysapy tsimyzurunaha – my. Iwa batu tyso. Deus zuba ispe:

– O ikiahatsa batu ahamysapy tsimyzurunaha – my. Utakta batu. Atakta Sesus humo tspirikporēta imysapybyita tu mykara zeka ipe tsimaha:

– O ikia batu imysapy – tsimaha. Iwa tsimysasonahaze wasani my tsimaha hỹ. Deus harere papeu humo ziwatahaka:

– Ahatuk Sesus tuktsa imysapybyita tu mykara zeka nabo pāoty – ipe tsimaha.
Iwa my.

6

Korītio ezektsa myharapepehaīkiknahaze asaktsa sispirikpobyitsa ba zikaha.

¹ Kyze ikiahatsa katukytsa tsimaha. Sesus humo ahaspirikporētsa iwatsahi Deus tuktsa tsimoziknaha. Hawa ha skaraba tsimyarapepehanahaze Sesus humo sispirikpobyitsa kytsaharerewabykytsitsa bo tsimaha. Ahasikpybyrētsaktsa kytsa! Ahasopyksapybyi hỹ! Kytsaharerewabykytsitsa ahatuktsa petu tsimaha. Asahi pahatsumuēhīkīnaha iwaze meky watu mytsaty tsimykaranaha, ikiahatsa tyharapepokzitsizonaha.

² Katsa Deus tyryktsa. Mybarawy mopykze iwaze katsa kytsaharerewabykytsa tsimoziknaha iwaze Kiristu tuk tsimysasonaha mybarawy ezektsa pe tsimaha:

– Ikiahatsa Deus okzeka ahamysapyrētsa tsimoziknaha – tsimaha. Utsa kytsa pe:

– Ikiahatsa Deus okzeka batu ahamysapy – tsimaha. Iwa tsimaha anahumo kok tsikspiriktsokdanaha. Iwaze ana bo mytsaty tsimykaranaha iwaze tsikahapepehaīkiknaha kok ahabetakyhytsa ahahumo myharereziurētsa tsimozikzonaha.

³ Bijoikpe iknyktsa Deus tsumuēhītsitsa soho tsimysasonaha. Wastuhutsa pe:

– O ikiahatsa Deus okzeka ahamysapyrētsa tsimaha. Utsa pe:

O ikiahatsa Deus okzeka batu ahamysapy tsimaha – iwa tsimaha. Ana-soho humo hi tsikspiriktsokdanaha. Iwaze bijoikpe iknyktsa bo mytsatyziu tsimykaranaha zeka abaka tsikahapepehaīkiknahaze ahapehawy wasani tsimaha.

⁴ Iwatsahi tsimyhapepehaīkiknaha zeka ahaspirikpobyitsa tsimaha. Asaktsa Sesus humo sispirikporētsa maha siokzeka batu ahamysapy tu iwatsahi batu sibo tsimaha.

⁵ Ahasikpybyrētsa! Ikiahatsa ispirikpobyita bo zeka ahasikpybyrētsa! Ahatuk estuba zuba ipehawy wasani my. Tozeka ja sizubarētsa ispehawy wasani maha. Iwa hỹ iky. Sihyrinymyrētsa hỹ. Asahi tsimyhapepehaīnikitsa soho mytsatyziu maha, ikiahatsa ahatukytsa tsimaha. Iwa tsihokdaharēna ja.

⁶ Iwatsa tu ahatukytsa sispirikpobyitsa bo nisioktyhyryknaha. Batu wasani tsimaha. Asahi sispirikpobyitsa batu siaku. Ahasopyksapybyrihuja kytsa!

⁷ Ahatukytsa ispirikpobyita bo tsipioptyhyknaha zeka wasani byitsa tsimykaranaha. Ikiahatsa sispirikpobyitsa watsa tsimaha. Sispirikpobyitsa ahatukytsa ahahumo mysapybyrikinaha iwatsahi ikiahatsa Deus harere bo batu hỹ tsimaha. Sispirikpobyitsa ahanamy piaksenaha zeka kyzehu ziaksenaha. Sispirikpobyitsa pahasapybyikinaha kyzehu zahasapybyikinaha.

⁸ Wastuhu ikiahatsa ahatukytsa namy tsiziaksenaha. Ikiahatsa hi ahatukytsa tsimysisapybyikinaha. Anahi ikiahatsa ba zikspiriktsokdanaha.

⁹⁻¹⁰ Asaktsa simysapybyitsa tu zikzurukunaha batu Deus tyryktsa zikyzyknaha. Asaktsa ustsā okeza mynasihuahuakanaha, ustsā kytsa mynapewohiknaha deusbyita hyrikoso bo yh̄y mynakaranaha, sityhyryboanikitsa, sisopyksapybyitsa, mymyijaikiknahatsa, tahaopuwy tsōsī zikuikiknahatsa, ustsā namy ziaksenahatsa, ziwerykynahatsa iwa asaktsa Deus tyryktsa ba zikyzyknaha. Iwa ba zikahapespihikbatanaha!

¹¹ Jatuba tu wastuhu ahatuk iwa zikzurukunaha abaka batu. Abaka Sesus Kiristu humo ahaspirikporētsa iwatsahi meky watu mytsaty tynakaranaha. Ahamysapybyity tsikykaranaha zeka Deus zahaokzohik. Deus zahawatawy ityryktsa tsimoziknaha iwaze iharere bo zuba hȳy tsimykaranaha! Sesus humo ahaspirikporētsa iwaze Deus ahasoho humo my:

– O asaktsa simysapyrētsa – my. Iwa mozik, ihyrikoso ahatuk mynapykyryk h̄y.

Hawa tsimykaranaha Deus okzeka wasani zuba tsimykaranaha.

¹² Tozeka ja estuba ahatukta kape my:

– Hawa mozhikik naha ty zuba mykara batu amy tohi kahumo byitatu zik – my. Amy ty motsasokonaha zeka wasapehe mykara. Nanabyi ba zik tsumuēhī iwatahi nawa mozhikik batu mykara. Nanabyi my zeka mozikyke.

¹³ Mydisahawy myworozik bo zuba my. Myworozikta mydisahawy suk zubata. Aiba mohyrikosokdanahaze myworozik eze ky mydisahawy mohokda. Iwa my. Mynuryta meky watu my. Ustsā okzeka ba ziksihuahua harape makutsa humo kino ba zikaha, Deus anawa bara humo nizukni. Deus nimysukni ihyrikoso mytuk mynapykyryk. Deus hyrikoso humo batu h̄y tsimahaze ihyrikoso batu mytuk mynapykyryk. Katsa Deus hyrikoso mytuk mynapykyryk zeka mysapyrētsa tsimoziknaha.

¹⁴ Sesus nihyrikosokda iwaze Deus zihyryzikpowy inury ispituzo. Iwata katsa tsimyhyrikosokdanahaze Deus mynamyhyryzikpowy iwaze mynury ispituzo. Izikwy humo tsinahyryzikponaha.

¹⁵ Sesus humo myspirikporētsa zeka mynury Kiristu nury hokyk watsa tsimoziknaha. Simysapybyiza asiza ba sipyrirykok. Kiristu nury hi mynury hokyk iwatsahi imysapybyitatsa bo zeka batu imysapy h̄y. Deus okzeka batu imysapy iwaze imysapybyitatsa bo ba ziktsuknaha.

¹⁶ Imysapybyitatsa bo piakse zeka estuba zuba wata tsimozik. Deus harere papeu humo ziwataha:

– Maku wytyk piakse zeka, astsatu moziknaha – niy.

¹⁷ – Atakta Sesus tuk mynapykyryk iharere bo zuba hȳy mykara zeka atakta ihyrikoso astsatu moziknaha – my.

¹⁸ – O kytsa usta oke bo ka hua hua byitaha. Wytykyryk usiza bariktsa bo kino hua hua byitaha. Iwa tsimaha zeka ahanury tsipisapybyikinaha. Ustsā ahamysapybyitsa ty tsikykaranaha, ahanury batu zikmyiwy.

¹⁹ Anahumo hi ba zikspiriktsokdanaha! Mynury eze Deus hyrikoso mynapykyryk ikytahi Deus zuba mypehatsa my. Mypehabyitsa tu atahi zuba iakzohota my.

²⁰ Deus humo mysapybyitsa tu tsikykaranaha Sesus humo mymyokzohik. Sesus Kiristu mysapyzekenihyrikosokdaze Deus mysapybyi humo nimityokzohik. Iwatsahi isapyha tyzubatahaktas kytsa! Ihyrikoso humo ahapunihikrētsaktsa! Ahamysapyrētsaktsa iwaze kytsa Sesus humo sispirikpobyitsa ahasopyk bo iktsa mahaze:

“O Deus zuba imysapyrēnikita” – maha.

7

Tsipahasukzanaha zeka hawa tsimykarana.

¹ Iwaze ana papeu humo kabo botu tsiwatahakanaha.

– O katsa mysukza byizeka ja wasani tsimaha – tsikykarana. Yh̃ my.

² – Ahahyrinymyr̃tsa. Sizubar̃tsa wytykyryk bo taokezabyiza bo my-nakaranaha. Siokezabyitsa tu wytykyryk mysipyryrykiknaha. Kytsa simyit-sihikr̃tsa iwatsahi estuba zuba ioke babatatsa zeka wasani my. Wytykyryk kino niwatihi tahapytsa tuk zuba mynapykyknaha zeka wasani my. Iwa usiza pytsa ba ziksihuahua. Iwa simysapybyi batu zikaha.

³ Kytsa taokeza mysiakzanaha zeka atatsa yh̃ my zeka wasani my. Wytykyryk tabariktsa mysiakzanaha zeka atahi yh̃ my zeka wasani mykara.

⁴ Wytykyryk ikiahaka ahapytsa tuk myzahapyryrykyknaha zeka hỹ tsimaha. Kytsa niwatihi tahaokeza mysipyryry tsihiknaha zeka hỹ taha! Iwaze tuze ziksipyryryknaha byizeka atatsa humo hỹ tsimaha – my.

⁵ Isukzata taoke pe my zeka:

– Aba ahanury tuk ka bazapyryryk! Tapara Deus bo zuba tsimy-pamykysonaha – tsimaha. Iwa tsimaha zeka wasani my. Atakta taoke tuk yh̃ maha zeka wasani tsimaha. Deus bo tsimypamykysobanahaze aoke tsipyryrykzo! Iwa ahabyi zeka Satanas wytyk pe: Usta tsioktyryk! Kyze maku pe:

– Ustata tsipyryryk! – my. – Iwa anaharere bo ba wabytaha iwatsahi tyharape pyryryknahatsa! – my.

⁶ Kaharere ba mykzohowybara tu. Hawa kaokzeka tisapyr̃na ty zuba mykara.

⁷ Utakta kasukzahukbyita. Kaokzeka ikiahatsa ahasukzabyitsa my tisapyr̃na my. Asukzahukbyita zeka Deus patsumũh̃ wasani tsimyzuruku. Ustakta batu. Atakta isukzabyita zeka tsihokdabar̃na. Wytykyryk mysipyryry zeka imysapybyita mykara. Iwatahi Deus ata pe my:

– Tsikasukzakta! Niwahi mozihihikik – my. Iwa my.

⁸ Sisukzabyitsa haramukukaka pe my:

– Ahasukzabyitsa tsimyzurukunaha zeka wasani! Uta tyzikwatukunahaktsa! – my.

⁹ Ahasukzabyize tsihokdar̃na zeka tsikahasukzazonahaktsa! Deus okze wytykyryk tsimysipyryryk tsihikiknaha zeka batu ahamysapy my. Iwa zeka tsipasukza zeka wasani my.

¹⁰⁻¹¹ Aba sisukzakatsa bo mopamykysoko. Deus harere ty ispe my:

– Kytsa ahaokeza ty ka moewy moewy byitaha! Wytykyryk kino niwatihi ahapytsa ty moewy moewy byitaha! Tabarikta moewy zeka usta maku ba ziakezo my. Apyitsabyitatsa tsimyzuruku. Maku bo batu h̃ tsimy. Abarikta bo tsimyziksizo zeka tisapyr̃na h̃ – my.

¹² Abaka kamypehawy ty zuba ahape my. Sesus ta anaharere humo batu tyso. Asaktsa Sesus harere bo hỹ tsimykarana iwatsahi ihumo ahaspirikpor̃tsa my. – O katukytsa wastuhu ahatuk Sesus humo sispirikpobyiza humo botu tahasukzanaha. Atatsa atuk mynapykyryk zeka batu tyso nabo p̃oty ba zikaha ity arek arek byitaha! – my.

¹³ – Wytykyryk kino niwatihi! Wastuhu ahatuk Sesus humo sispirikpobyitsa botu zahaoktyhyryknaha. Abarikta atuk mynapykyryk zeka ity arek arek byitaha! – my.

¹⁴ Ahabariktsa Sesus humo sispirikpobyitsa tu isty arek ahabyi zeka Deus ahahumo mysisapywyky. Ahatuk mopykyryknaha humo Deus mysisapywyky. Iwata Sesus sispirikpobyiza tuze tahabariktsa tuk mopykyryknaha iwaze Deus ahahumo mysisapywyky. Iwa byizeka ahahyrytsa sispirikpobyitsa hyrytsa watsa. Batu ba. Ahahyrytsa niwatihi Deus hi mysisapywyky Sesus humo ahaspirikpobyitsa tu tsimypykyryknaha humo mysisapywyky hỹ.

¹⁵ Deus wytykyryk pe niy:

– Ahapytsa harere bo yhỹ tahaktsa! – my. Kyze katsa mype:
 – Ahaokeza harere bo yhỹ tahaktsa! Harape ty betsak betsak byitahaktsa!
 – my. Iwatahi Sesus humo ispirikpobyita ikia tuk zikapyk tsihikik byizeka yhỹ tsimy. Ihyrity watatsa ispirikpobyitatsa ikia tuk zikapyk tsihikik byizeka atatsa pe yhỹ tsimy. Metutu tsimaha.

¹⁶ Iwatahi ahape my:

– O katukytsa ahaokeza tuk typykyknahaktsa! Tozeka ja ahahumo Sesus harere bo hyỹ maha iwazahi ihumo sispirikporēza moziknaha. O katukykyryk ahabariktsa tuk typykyknahaktsa. Tozeka ja ahahumo Sesus harere bo hyỹ maha iwatsahi ihumo sispirikporētsa moziknaha

Deus harere bo hyỹ tsimynakaranaha.

¹⁷ – Deus hyrikoso mytuk mynapykyrykze hawa skaraba tsimaha izikwy humo tsahasopykziurētsaktsa! Deus zahawatawy zeka tarabaja tsimykaranaha. Ana humo kino tarabajaziu tykaranahaktsa! Mekyllatu tarabajabyitahaktsa! Ana hi Deus mozihikik. Anaka mypehawy Sesus humo sispirikpotsa bo mykara.

¹⁸ Deus maku piakzykyhyta piwatawy zeka ipiak humo Sudeutsa iwatawy humo batu ipiktsĩhĩ. Iwa Deus ipiakzykyhybyita piwatawy zeka atakta batu ipiakzykyhy! – my.

¹⁹ Deus batu mype aha:

– Tsikahapiakzyknahaktsa – ana humo batu tyso. Atahi mype niy:
 – Kaharere bo hyỹ tynakaranaha! – iwa hi motsaso.

²⁰ Deus zahawatawyze tarabaja tsimaha. Ana tarabaja kino tsimykaranaha.

²¹ Deus zahawatawyze tarabajaziu tykaranaha batu okyrysaro humo ka. Ana soho humo hi mytsaty mytsaty byitaha! Apehaktsa tsinamyrēta it-syhyryze tarabajaziu tsimahakta! Apehaktsa tsinamyrēta ape tsiksita my zeka wasani tsimoparak iwaze tarabaja okyrysaro humo tsimaha.

²² Iwatatuze kytsa ispehatsa tsinamyrēta tsyhyryze tarabajaziu my batu okyrysaroko tsinamyrēta harere bo zuba hyỹ mykaranaha. Wasani my. Deus bo nisiwatawyze iharere bo zuba hyỹ mykaranaha iwa sakurētsa babatsa batu tahapetu sisopyk maha. Kytsa asaktsa tahaharere humo zuba hyỹ mykaranaha. Deus nisiwatawyze iharere bo zuba hyỹ mykaranaha iwatsahi Deus mozihikik naha ty zuba mykaranaha.

²³ Deus hi botu ahahuak ty ahahumo nyny niy. Iwatsahi atahi zuba ahapehaktsa mozik. Iwa kytsa ahapehaktsa mozihikiknaha batu hỹ tsimahaktsa!

²⁴ O katukytsa Deus zahawatawyze tarabaja tsimaha. Ana humo kino tarabaja tahaktsa! Iwa tsimyzurukunaha.

Sipyitsabyiza, sisukzabyitsa ahatsa soho humo mymyspirikpoko.

²⁵ Kyze apapeu humo kabo botu tsiwatahakanaha kape tsikaha:

– Asaktsa sisukzabyitsa sipyitsabyiza kino niwatihi hawa mypehawy sibo tsimaha – tsikaha. Ana ty hi Deus kabo batu tyso. Kaharere zuba ahabo

motsaso. Deus kahumo tsimypokzitsiarēta ana humo kino ahaspiriktsokda byihuja! Ata humo hi wasani kahyrinymyrēta. Uta Deus harere bo pykyhytu hyỹ mykara iwaze kapehawu humo yhyỹ tsimaha, kapehawu wasani my.

²⁶ Asaktsa Sesus harere bo batu hyỹ zikaha sisukyrytsita tu mymysinini-wykynaha. Ana humo hi sisukzabyitsa wasani maha.

²⁷ Botu tsikasukza zeka ahaokezaty isty moewy moewy byitaha! Ahasukza byizeka ahawahi tyzurukunaha! Ana kino tisapyrēna.

²⁸ Tsipasukza zeka batu imysapybara ty tsimy. Ipykyhyzytyktatsa aty pioktyhyryk zeka batu imysapybara ty my. Abaka mysukyrytsita pokso batu sisukza iwatsahi batu paikpa mytsaty tsimaha. Tsipasukza zeka aoke soho bo zuba mytsaty mytsaty tsimy. Ahasuk bo, ahadisahawu bo, ahahyrytsa bo iwaha bo mytsaty tsimykaranaha. Ahasukza byizeka ba paikpa mytsaty zikaha anahi mozihikik iwatahi kapehawu ahabo my.

²⁹ Katukytsa aibani zuba Kiristu myziksizo. Niwazuba mybarawy mopykze mohokda. Iwatsahi asaktsa sisukzatsa sisukzabyitsa watsa tsimyzurukunaha ahamytsaty mytsaty byijataha!

³⁰ Asaktsa sisukatsihikrētsaze sakurētsa moziknaha. Asaktsa siydikrētsa batu siakubyitsa. Asaktsa sinamy zuba ziaксеkenaha sinamybyitsa watsa mozurukunaha.

³¹ Asaktsa okyrysaro bo zuba paikpa mytsaty mynakananaha okyrysaro humo mytsaty mytsaty byitaha. Mybarawy mopykze okyrysaro mohokze. Mybarawy eze ka mohokdaba iwatsahi ahanamy bo ahamytsaty mytsaty byihuja! Deus soho bo zuba mytsaty tynakananahaktsa!

³² Utakta ahahumo mozihikik ahanamy humo ka mytsaty mytsaty byitaha! Atakta batu isukza Deus soho bo zuba mytsaty mynakara. Atahi:

– Hawa sa my. Deus humo tsakurēta my hawa sa my – mynakara. Iwa mytsaty mynakara.

³³⁻³⁴ Isukzata hi:

– Tanamy tsizubarēna bo zuba mytsaty mykara iwaze kaoke tsakurētatsa mozik mynakara nahumo hi mozihikik – ana bo mytsaty mynakara. Paikpa mytsaty mykara, Deus harere mozihikik ioke niwatihi tsiydikrētatsa mozihikik. Tsihokdahaarēna. Iwatatsa ipykyhyzytyktatsa haramukukaka kino niwatihi Deus bo zuba maha. Ihumo sityhyryrēza. Azahi:

– Hawa sa tsimaha. Deus tsakurēta my hawa sa tsimaha – mykaranaha. Iwa mytsaty mykaranaha. Atatsa ipyitsakatatsa tapyta soho bo mytsaty mykara. Tsakurēta mozihikik. Tadisahawu soho humo. Tahanamy soho humo kino niwatihi mytsaty mykara.

³⁵ Ana kino motsaso pahatsumuēhī. Batu tyso:

– Ahasukzabyitsaktsa! Iwaze ahahumo tsihokdahaarēna zeka batu ahatsukza zikaha! – ana humo hi batu tyso. Deus bo zuba tsimaha, iharere bo zuba pykyhyty hyỹ tsimykaranaha iokzeka wasani tsimyzurukunahaktsa! Tsizubarēna soho humo mytsaty mytsaty byitahaktsa!

³⁶ Maku isukza byita zeka tapetu isopyk zeka – Kaharerewabyhy humo kamypokzitsiarēta my zeka taharerewabyhy piakse – my. Wasani my. Atatsa mozihikik zeka pisukzawy. Tsipasukza zeka wasani mykaranaha.

³⁷ Usta maku isukza byita zeka tapetu isopyk:

– Utakta Deus bo zuba mozuruku iwatahi batu kasukza tsihik uta zuba mozuruku – my. Iwa mytsaty my zeka ba ziktasukza. Ipykyhyzytyktatsa bo amo ahabyi zeka wytykyryk batu mysihuahua iwaze ba ziktasukza. Wasani my.

³⁸ Iwatsahi atakta ipykyhyzytyktatsa piakse zeka wasani my. Atakta ipykyhyzytyktatsa ba ziaксе wasani. Ana kino tisapyrēna.

³⁹ Abaka wytykyryk pe my:

– Abarikta atatu zeka ituk awahi tsimynapykyryk. Ba zerek. Abarikta mohyrikosokdaze zuba mektatu tsiptakse. Ikiā usta maku tsimyzihikik zeka wasani tsimykarā, usta maku tsiptakse zeka wasani tsimykarā. Sesus humo ispirikpota zuba tsiptakse.

⁴⁰ Haramukukaka tahawahi mypytsabyinaha zeka siakurēza moziknaha. Deus bo zuba mytsaty mykaranaha. Kaokzeka atatsa zuba mopykyryk zeka tsakurētatsa. Imysapyrēnikitatsa. Deus hyrikoso katuk mynapykyryk. Iwatahi kaharere tsiwabytoktonahaktsa kytsa! – my.

8

Mydisahawy deusbyita suknihi bo nyny ziknakaranaha hawa sa tsimykarānaha.

¹ Aba apapeu humo kabo botu tsikziwatahakanaha kape:

– Mydisahawy deusbyita hyrikoso suknihi bo zikzinynyknaha bykyze tsipiboronaha zeka wasani ja tsimykarānaha – tsikaha. Aba uta ahape my. Ikiāhatsa tsikykarānaha:

– Katsaktsa tsinymyrybanaha – tsikaha. Yh̄y my tsinymyrynaha. Amy ty abazuba tyharapehapokzitsikinaha ana hi wasani. Ikiāhatsa hi my:

– Katsaktsa myhyrinymyrētsa ikiāhatsa batu ahahyrinymyry iwa tsimaha zeka ustsā bo mysiakubyriwyky. Ahasopyksapybyrihu ja. Tyharape hapokzitsikinaha zeka ustsā bo tysiakuwyknaha. Iwatsahi tyharape hapokzitsikinaha – tsikaha.

² Wastuhu ahaturktsa:

– Katsaktsa tsinymyrybanaha. Myhyrinymyrētsa h̄y – tsikaha. Deus okzeka batu. Ahape tu tsimynakaranaha humo iwaze batu ahahyrinymyry tsimaha.

³ Katsa Deus humo mymypoکزitsirētsa zeka Deus mymyny. Atahi myhumo tsimypoکزitsiukrēta, katsa ituk kytsa tsimoziknaha h̄y. Ana humo hi tsihyrinymyrēta katsa batu.

⁴ Abaka mydisahawy deusbyita hyrikoso suknihi bo zuba zikzinynyknaha ana soho hi motsaso. Deusbyitakta mahani awatutatu Deus babata ta estuba zubata, ana humo hi myhyrinymyrētsa.

⁵ Mybarawy ezektsa okzeka:

– O deustsabyitsa humo astsatu tsa watsa Deustsabyitsa sasabyitsa byrisoiktsa watsa. Deustsabyitsa sasabyitsa hwitsa watsa. Iwatsatu – mytsaty ahabyitsatu mykaranaha.

⁶ Katsaktsa Sesus tuktsa Deus estuba zubata tsimaha. Ana humo hi myhyrinymyrētsa h̄y. Atapehe myzo tsimykarānaha. Ihumo tsimyzurukunaha. Atahi mybarawy nizukni. Sesus Kiristu mypehaktsa harere humo Deus mybarawy nizukni, ihumo hi tsimyzurukunaha. Iwa h̄y.

⁷ Wastuhu hani zuba Sesus humo sispirikporētsa tahasopyk humo deusbyitsa sispitu maha iwa ziknakaranaha. Iwatsahi mydisahawy deusbyita hyrikoso suknihi bo nyny ziknakaranaha zeka deusbyita disahawy maha. Mytsaty ahabyitsa tu mykaranaha. Iwatsahi ba ziktahadisanaha. Abaka iwa mytsaty mykaranaha, deusbyita mahani ana humo kino batu sihyrinymyry iwaze ana sidisahawy pihauknaha zeka batu siaku moziknaha.

⁸ Deus mymysapywyky. Batu mydisahawy humo zuba zikmysapywyky. Mydisahawy ty tsipahadisahanahaze kino iokzeka wasani, mydisahawy ty haukbyize kino iokzeka wasani atsatu. Iokzeka batu mydisahawy humo mysapyrētsa tsimoziknaha.

⁹ Ahatukytsa humo pykyhytu tahaktsa kytsa! Asahi Sesus humo tsikaeni zuba sispirikpotsa hi:

– O deusbyita hyrikoso suknihi disahawy humo ka batu hauk zikaha, ana sidisahawy ty hauk zeka batu wasani my – maha. Iwatsahi ikiahatsa siokzeka batu sidisahawy ty hauk zikaha. Tsipiboronaha zeka mysimiywynaha iwa ahasopyksapybyi tsimaha.

¹⁰ Ikiahatsa hi:

– O katsa deusbyita wahoro bo zeka ana mydisahawy deusbyita bo nyny nikaranaha ana ty hi mymydisahanahaktsa! Deusbyita hyrikoso mahani iwatsahi tsipiboronaha. Iwaze atakta Sesus Kiristu humo tsikaeni zuba tispirikporēta ahabo iktsa myze atahi:

“Uta niwatihi ana disahawy pihauk zeka wasani my” – my. Atakta batu, ihumo batu wasani my. Deusbyita hyrikoso zoknihi disahawy babaha mytsaty myze ihumo batu wasani pihauk. Ihumo deusbyita isopyk.

¹¹ Atahi zasopykduku iakubyita mozik. Tozeka ja tapetu mykara:

– Aba mohyrikosokda. Kamysapybyita ikykara anahumo hi mohyrikosokda tawata – my. Atakta Sesus humo tsikaeni zuba ispirikpo. Sesus isapyzekenihyrikosokda ahaspiriktsokdabyihu ja. Atakta ahamysapybyi humo batu iaku.

¹² Iokzeka ba hauk zikaha. Ahatuky humo ja ahasopyksapyhu. Tsipihauk naha zeka Kiristu okzeka batu isapy tsimaha. Ahamysapybyitsa tu tsimykaranaha.

¹³ Iwaze uta katuky humo kamypokzitsiarēta. Katuky pe:

– Deusbyita hyrikoso suknihi disahawy pihauk zeka batu wasani my. Uta niwatihi ba ziborozo hỹ. Ana sidisahawy ty hauk byizeka iwaze katuky tsakurēta. Ana sidisahawy pihauk zeka katuky pimiywyky ana kino batu imysapy. Iwatsatu ahatukytsa humo ahamypokzitsiuhu, batu simysapybyiwy sibo ahasopyksapybyrihu ja! – my.

9

Hawa Deus ykzoho mozurukuta.

¹ Kiristu humo tisapyrēna bo zuba ma iky, iwa mozihikik iwa mozuruku wasani my. Hawa mozihikik zeka katukytsa mysimiywyky zeka iwa utakta batu kasopyk, katukytsa humo. Utakta Deus humo kakzohota wasania tymotsasoko. Tapara Sesus kapehatsa iny. Ikiahatsa Sesus Kiristu humo ahaspirikporētsa, Deus soho ty ahabo iktsaso anahumo hi ahaspirikporētsa tsimoziknaha. Deus harere wasaniha tsiwabynahaze kaharere bo hỹ tsikykaranaha. Iwatahi Deus ykzoho babata ahahyrinymyrētsa.

² Utsa kytsa:

– O Pauro Deus zipehata ja. Deus sohokotsa ja. Deus watawyhy ja – maha. Ikiahatsa hi:

– O Pauro Deus wasaniha humo iakzohota. Atahi Deus zipehata my ana humo kino myhyrinymyrētsa. Katsa iharere humo Sesus humo mysipirikporētsa – tsimaha.

³ Wastuhu kytsa kasoho humo siharerewabymybarētsa. Uta kaharere humo harapubetehe mykara. Kasoho humo hi:

– Uta Deus wasaniha humo kakzohota atahi zikpeha – my.

⁴ Iwa ispe my:

Deus wasania ty motsasokoze kytsa mydisahawy ty mypuwy ty iwa kabo nyny my zeka wasani mykaranaha. Katarabaja huak humo. Wasani hỹ.

⁵ Utsa Deus ykzohotsa tahaokeza tuk mynakurunaha asiza hi Sesus humo sispirikporēza. Deus okzeka tisapyrēna. Mypehakatsa itukytsa tahaokeza tuk

mynakurunaha, Peduru niwatihi taoke tuk ziknaukuru. Utakta batu, Deus hyriziktsokzawy humo mykaratahi batu piksukza tsihik.

⁶ Ahaokzeka uta, Baranabe ahatsa katsa tu mydisahawy huak tarabaja tsimynakaranaha. Utsa Deus wasaniha humo sakzohotsa ana humo hi zuba mykaranaha, usa humo batu sihyriziktsokzawy. Uta zuba kadisahawy huak bete myparik iwowoko.

⁷ Ikihatsa botu ahahyrinymyrētsa sodadutsa mowatsorokonaha zeka sihuak ty nyny nikaranaha. Usa tarabaja nikaranaha humo batu. Aty waratok buruk mysiparik zeka asatyhi tadisahakanaha. Usa tarabaja mykara humo batu. Aty hozipyrykzatsa peryktsa sitsotsiktsa ytsik pikukuru. Usa tarabaja mykara humo batu. Batu aty tohi usa tarabaja mykara, amy ty tarabaja mykara ana humo kino ihuak ty nyny my.

⁸ Katsa niwatsa hi Deus wasania ty motsasonahaze myhuak ty nyny tahaktsa. Hana wa sa mydisahawy ty nyny tsimaha. Iwa kytsa sopyk humo tsimykarana. Deus harere Moises bo nitsasoko naha kino atsatu my.

⁹ Tapara Moises sopyk humo ka:

– Pikuza tirikotsa mysipyryk pyryk zeka kyze zitadisaha – tsimy iwa. Ana harere pikuzatsa bo zuba bara. Deus pikuza humo tsimypokzitsiarēta.

¹⁰ Ana kino ziwatahaze mysoho niwatihi atahi sizubarētsa humo tsimypokzitsiukrēta. Iwaze aty mysiparik zeka:

– Aibani zuba idisahawytza muanaha – mykara. Aty tirikotsa mysizyzyk zeka:

– Iwaze zuba idisahawytza mokymynaha – mytsaty mykara. Wasani my.

¹¹ Deus wasania ty ahabo iktsasoko. Tatsuhuk bo ziparikik tawata. Aibani tadisahawytza nisidydykykze isty tadisahakanaha. Katsa kino niwatihi siwatsa ahanamy tsipiaksenaha zeka tarabaja huak ty iwaze tsimydisahakanaha. Iwa wasani my. Katsaktsa ahapokso batu mypyby.

¹² Utsa Deus wasaniha ahabo motsasokonahaze ahanamy ty sibo nyny tsikaha. Katsaktsa ahanamy mybo tsikzapykykynaha zeka wasani my. Batu ba tsikaha.

Deus wasania ty motsasokoze kytsa Sesus humo sispirikpobyitsa tozeka ja:

– O Deus wasaniha batu mywabyhy. Pauro Deus wasaniha motsasoko okyrysaro humo. Okyrysaro waka zuba mozihikik hỹ – mybarapetu mykaranaha. Iwa nitsasokonaha zeka kasikpybyrēta batu pahatsumuēhĩ. Sesus humo ahaspirikporētsa iwatahi meky humo tu tarabaja ikykara, kadisahawy huak humo iwaze pidisaha.

¹³ Tsikspiriktsokdanaha asaktsa Deus wahoro zubata eze tarabaja ziknakaranaha sidisahawy ty kytsa sibo nyny nikaranaha. Asaktsa Deus wahoro zubata bo inapupunahatsa siraratsa nisibykyryknaha. Iwaze Deus wahoro zubata eze ziknapamykysonahatsa ziknasibakanahaze sizohotsa niyziknaha. Deus wahoro zubata eze ziknapamykysokonahatsa asaktsa disahawy ziaksenaha, ana sidisahawy tsapukte buruk zuktsa ziknakaranaha tsapukte buruk kyka Deus bo zikziwezokonaha usa tsapukte buruk kyka zikziborokonaha.

¹⁴ Iwata kapehatsa Sesus kape niy:

– Asaktsa wasania ty motsasokonaha anahuak humo sibo nyny tsimaha – niy.

¹⁵ Tapara utakta Deus wasaniha humo okyrysaro ty ba kabo nyny tsikaha, anahi mozihikik. Batu ahabo piwatahaka okyrysaro ty kabo nyny mykara tarabaja huak ty. Batu ba, kaokzeka mohyrikosokda zeka ana humo kino yhỹ my. Utakta okyrysaro ikiahatsa bo batu myzapyky na wata tu mohyrikosokda iwatahi batu aty tohi kasoho:

– Pauro okyrysaro zuba iakparawy – mytsaty ahabyi tatu mykara. Iwa batu tyso. Kahyritzokzawy Deus wasaniha motsasoikik ana humo hi kytsa okyrysaro kabo ba nyny zikaha iwa mozihikik.

¹⁶ – Deus hi zikwatawy ana humo hi zikpeha iwaze wasania ty tyso byizeka batu kaku. Ba “Uta zuba Deus wasania ty motsasoko ziky” batu kasopyk. Wasaniha ty tyso byizeka Deus isapyrēnikia ty kabo nyny habyi zeka kasukatsihikrēta mozik.

¹⁷ Uta hi tarabaja mozihikik zeka kytsa okyrysaro ty kabo nyny maha zeka wasani my, Deus hiba zikpeha iwatahi sitsumuēhītsa ikyzik. Deus kape niy: “Wasaniha ty kytsa sizubarētsa bo tytsasokota!” niy. Iharere humo zuba hỹ mykara.

¹⁸ Iwaze sa amy tarabaja maha humo myzihuak. Okyrysaro humo tarabaja humo myze batu kakparawy. Pikwabykynahatsa batu sibo tyso. “Okyrysaro ty kabo nyny taha!” my. Iwa batu kasopyk. Deus harere ahabo motsasoko zeka kakurēta mozik. Kakurēta zeka ana hi kahuak waha my – iwa h̃y.

¹⁹ Utakta amy ty isapyha bo zuba ma mynakara. Mybarawy ezektsa ba kape zikaha:

– O Deus harere tynatsasokokta! – ba zikaha. Uta kapetu kasopyk:

– O Deus wasaniha motsasoikik naha humo hi mozihikik. Deus harere humo zuba hỹ mynakara – my. Iwatahi Deus wasaniha motsasoikik tarabajaziu mykara, iwaze kahumo kytsa sizubarētsa Sesus Kiristu soho humo ziwabynaha ihumo sispirikporētsa niyziknaha.

²⁰ Sudeutsa tuk ziknapykyryk zeka sisopyk bo yh̃y ziknakara. Moises harere bo yh̃y ziknakara iwaze Sudeutsa kaharere humo Sesus soho bo hỹy mykaranaha. Uta situkze Sudeu wata ikyzik iwaze asahi kaharere ziwabykynahatsaktsa Deus wasania ty Sesus soho humo hỹy mykaranaha. Iwa sitsyhyryze mynakara.

²¹ Anawahi Sudeutsabyitsa tuk ziknapykyryk zeka Moises sopyk bo batu h̃y ziknakara. Iwatatu kaharere humo Sesus Kiristu harere humo mospirikpokonaha. Kiristu harere humo zuba hỹy mynakara. Iwatahi Deus kapehatsa bo hỹy mynakara.

²² Kytsa asahi Sesus humo tsikaeni zuba sispirikporētsa situk ziknapykyryk zeka sisopyk bo yh̃y mykara, iwatatu mysitsumuēhī. Sesus Kiristu humo sispirikporētsa moziknaha ana humo hi mysitsumuēhī tsihikik. Kaharere humo sipunihikrētsa moziknaha. Kaotutsa pauktsitsa tuk ziknapykyryk zeka sisopyk bo yh̃y ziknakara iwaze mysitsumuēhīkī simysapyrētsa moziknaha iwatahi iwa mozuruku.

²³ Iwa mozuruku zeka Kiristu harere piwabyziunaha. Deus wasaniha motsasokoze Deus myziwabykynahatsa bo ka mysisapywy. Kahumo niwatihi mysisapywyky.

²⁴ Kytsa mopaparakanahaze estuba pomota ata humo hi siharaze tapara kytsa itsorik okyrysaro ty iharek humo pu niaha, Ikihatsa asa watsa tsi-moziknaha. Sesus Kiristu harere bo hỹy tsimykaranaha iwaze Sesus ahape my:

– Wasani tsikykaranaha – my. Iwa ahape myze ahakurētsa tsimaha. Ahakurētsa tsi-moziknaha siharaze zumuta wata ikiahatsa ahakurētsa tsi-moziknaha.

²⁵ Kytsa mopaparakanahaktsa iwaze sipaikrētsa moziknaha. Myzibiyituhukunaha tu simysapybyikitsa myserekēknaha. Iwa sipaikrētsa moziknaha. Iwa sisopyk maha itsorik okyrysaro zuba nazihikiknaha. Iwa zeka okyrysaro hi itsorik moryryba. Sesus Kiristu harere bo hỹy tsimykaranaha zeka mywahi ituk tsinapykyryknaha.

²⁶ Atakta siharaze tapara zumuta atahi buruhuwa niparakta. Ba tasukpe bo iktsa ahabyita nipaparaka ity paranikita buruhuwa iparak. Atawatahi Sesus Kiristu harere bo pykyhytu hyĩ mykara iwa wasani mozuruku.

Asaktsa myharape huzizunahaze estuba wytyk bo mynarahaze iwatahi usta irahabyita ipaikanikita niyzik. Atawatahi kapunihikrēta my Deus harere bo hyĩ mykara.

²⁷ Kytsa myzuba pe mykara:

– Sesus Kiristu harere bo hyĩ tahaktsa kytsa! – mynakara. Iwaze kasopyksapybyita my zeka kasikpybyrēta myzik. Iwaze isapybara bo mytsaty mykaraze kapetu kasopyk awatu ty my iwa kasopyksapybyi pimoewy. Iwa my zeka Sesus batu kape my:

– O ikia batu amysapy, kaokzeka batu amysapy tsimy – iwa zeka niwazuba! Sesus sopyk zuba mynakara hĩ. Ikiyahatsa niwatihiktsa!

10

Deusbyita hyrikosotsa sisuknihitsa tyka areketahaktsa.

¹ Abaka katukytsa taparaktas mydiritsa soho bo mytsaty tahaktsa! Asaktsa isapy bara ty zuba ziknakaranaha. Asaktsa jerukbara eze bijo satata humo siske ziwatawy. Satata hapik niukurunaha. Deus bijo satata sibo zipaha iwaha hi siske ziwatawyky. Iwaze Deus pihik tsikpukte buruk ziske niy. Iwatsahi koikny zitsikzanaha. Buburu zuba pihik tsikyiritsa inarokota.

² Kytsa taparaktas mydiritsa bijo satata bo iktsa niahaze Moises harere bo hyĩ nikaranaha. Buburu zuba koikny zitsikzanahaze Moises harere bo hyĩ nikaranaha. Iwatsa katsa Sesus humo nymyharasusunahaze katsa tihi:

– O Sesus harere bo zuba hyĩ tsimykaranaha – tsimaha.

³ Taparaktas mydiritsa jerukbara buruk atsikara waha ty tahadisahanaha. Deus atsikara waha nisisakihikyky bijoikpe iknyky kytsa bo inatsoko ana ty hi kytsa tahadisahanaha mana inarokoha niy.

⁴ Jerukbara eze pihik zikukunaha. Kiristu hi pihik ty sibo nyny niy. Moises harahare humo bay bay niyze pihik atsoko natahaha. Kiristu zikwy humo harahare ikny pihik inasoko izikwy hi situk niukuru. Iwatahi Kiristu soho ty mopamykysokoze – ata harahare wata hi mytuk mozuruku – Kiristu situk mynapykyryk anawahi nitsasokonaha.

⁵ Asaktsa Deus bo ba ziksakibazikiknaha. – O Deus ikia zuba wasanikita – my. Iwa batu zikaha. Asaktsa Deus pe:

– O katsaktsa Moises harere bo tsimyzihihiknaha – nikaranaha. Kyze iharere bo batu hĩ niaha. Iwaze Deus sihumo batu iaku iwaze sizubarētsa niakbakanaha. Sipoiktsa zuba jerukbara eze nitarenaha. Katsa kino niwatihi tsimaha zeka:

– O Sesus harere bo zuba hyĩ – tsimaha, iharere bo zuba hyĩ tahaktsa.

⁶ Hawa nikaranaha ana hi Deus namysukpeheke. Ana humo hi tsinymyrynahaktsa! Simysapybyitsa tu nikaranaha anahi nizihikiknaha. Katsa siwabyitsa tsimyzurukunaha.

⁷ Kyze Deus harere babata bo batu hĩ nikaranaha. Hawa ha nizuknikinaha ana hi Deusbyita hyrikoso siakparawy. Siokeryk dyhy dyhy nikaranaha. Siokeryk tumy zikukunaha iwaze ispe nikaranaha:

– Katsa ahahumo myspirikorētsa tsimaha – mytsaty ahabyitsa nikaranaha. Deus harere papeu humo ziwatahaka:

– Deusbyita hyrikoso okeryk dyhy dyhy nikaranaha. Tamyikahakanaha. Deusbyita hyrikoso okeryk nikarikinaha – niy. Katsa Deusbyita hyrikoso humo mysopyksapybyritsa ty tsikykaranaha.

⁸ Asaktsa ustsā okeza ziknasiakzaikiknaha. Tahawaky wytykyryk bariktsa humo sisopyksapybyiza ziknakaranaha. Iwatsahi asta okoroze tu sizubarētsa, 23.000 miutsa ahatsa niakbakanaha tahasopyksapybyi humo. Katsaktsa ba asawa zikaha!

⁹ Asaktsa sisakimijarētsa ziknakaranaha. Asahi:

– Moises harere bo yh̄y habyi zeka Deus ba zikmysininiwy iwaze hi myhumo tsimypokzitsiarēta – mybarapetu nikaranaha. Iwaze imysapybara ty nikaranaha. Iwatahi Deus pyryhyktsa sibo nisiakzo, iwatsahi sizubarētsa nisibakanaha. Katsaktsa mysopyksapyrētsa tsimykaranaaha! Sesus harere humo zuba hȳy tsimykaranaaha.

¹⁰ Sisakimijianikitsa Deus zimijajaikiknaha. Iwatahi Deus sihumo taokaniki. Bijoikpe iknykta tatsumuēh̄itsa sibo ziazkohik. Deus harere humo niakbakanaha. Katsa asa watsa byitsa mosopysapybyri humo ba tsimaha!

¹¹ Ana wahi mysukpehewy niy. Ana kino taparaktsa mydiritsa bo Deus harere nisihyrinomyry. Ana kino Deus harere papeu humo ziwatahaka hawa nisisininiwyky simysapybyitsa humo nisisininiwyky. Katsa anapapeu humo tsinymyrynahaze Deus pehawy tsiwabynahaktsa! Tapara mydiritsa zikzurukunahawa byitaha. Aibani zuba mybarawy mopykba. Iwatsahi siwaba ahasopyk!

¹² Amata my zeka:

– O utakta kapunihikrēta – my zeka. Pykyhytutykta! Atakta tapetu isopyk:
– O Deus tsipiktsumuēh̄ikta iwaze batu kasapybyita tu mykara – my. Iwa my.

¹³ Satanas hyrikoso sapybara pehatsa ahamysapybyity tynakaranahaktsa ahabi mozhikik. Myzubaha bo mykara. Pahamyiwy tsihikik naha hi mozhikik. Deus ahahumo ba zikspiriktsokda. Mymytsumuēh̄ikī botu nymywatawy iwaze taharere ty mybo yh̄y my. Deus hi ahabo iktsa mynakara. Mypunihikbyize Deus tihi:

– Kahyrytsa humo ka awatu tykta! – my. Iwaze mypunihikbyitsa humo asiba mysapybyitsatu tsimykaranaaha. Deus humo hi mypunihikrētsa iwaze mysapybyri humo batu h̄y tsimykaranaaha. Deus zikwy humo h̄y, katsa ibo tsimaha zeka atahi mymytsumuēh̄i h̄y.

¹⁴ – O katukytsa deusbyita hyrikoso ty ka arekektahaktsa! – my.

¹⁵ Ikiyahatsa kaokzeka ahahyrinomyrētsa tsimaha. Kaharere bo mytsatyziu tsimykaranaaha. Pauro harere wasani ja iwa ahape tu ahasopyk.

¹⁶ Sesus Kiristu mysapyzekenihyrikosokda ana bo hi mytsaty tsimynakaranaha. Katsa tsimyzumubanahaze atsikara ty hauk tsimaha duabohotsa tsik takuze. Duabohotsa tsik tsipikunahaze Sesus spu bo mytsaty tsimykaranaaha. Hawa mysapyzekenihyrikosokda iwatsahi meky watu tsimoziknaha. Iwaze tsipikunahaze Deus pe:

– O myzo ikia zuba amysapyrēnikita – tsimaha. Iwa tsimaha atsikara tsiopioknahaze Sesus nury bo mytsaty tsimykaranaaha. Tazikwy ty mybo nyny my iwaze mypunihikrētsa tsimoziknaha, iwaze hawa nihyrikosokda naha mybo piwatawyky

¹⁷ Anawaze hi myzubarētsa atsikara estuba zuba tsiopioknaha. Anawahi katsa Sesus humo myspirikporētsa parakbaha atsatu tsimoziknaha. Hawa atsikara estuba zubahaze iwa katsaktsa inury wata tsimoziknaha.

¹⁸ Sudeutsa soho humo mytsaty tahaktsa. Tsapukte buruk harahare bete tahadisahawy Deus bo ziwezokonaha. Usa tsapukte buruk ky Sudeutsa tadisahakanaha. Tadisahabanahaze tu tahapetu sisopyk:

– O katsaktsa Deus tryktsa tsimaha, mymysapywyky h̄y – nikaranaha.

¹⁹ Ahahyrinymyrētsa deusbyita hyrikosotsa sipokzibyitsa. Asaktsa deusbyita hyrikosotsa asatu mytsaty mykaranaha disahawy sibo nyny niaha, iwaze sidisahawy humo mytsaty ahabyitsa tu mykaranaha.

²⁰ Sidisahawy deusbyita hyrikosotsa nyny nikaranahaze batu Deus bo nyny maha. Hyrikoso sapybara disahawy ty zuba ibo nyny mykaranaha. Satanas hyrikoso sapybara pehakatsa disahawy ty hi nyny mykaranaha. Iwaze siharere bo ba hȳ tahaktsa! Ahasopykziuhuktsa!

²¹ Duabohotsa tsik tsipikunahaze hawa Sesus mysapyzekenihyrikosokda naha bo mytsaty tsimykaranaha. Katsa ihumo Deus tyryktsa tsimoziknaha ana humo hi mytsaty tsimykaranaha. Iwatsahi usa tsik ba zikunaha anahi deusbyita hyrikosotsa bo nyny niaha, ana ty hi Satanas bo nyny mykaranaha. Iwatsahi ba petok kuha ba zikunaha. Atsikara tsipioknahaze:

– Sesus mysapyzekenihyrikosokda – naha bo mytsaty tsimykaranaha iwatsahi ana disahawy deusbyita hyrikosotsa nyny niaha ba zibiaknaha. Petok tsahatsa disahawyty ba zikaha, usaka disahawy Satanas disahawy iwatsahi anaty ka ba zik kahadisahanaha.

²² Iwa tsimaha zeka katsa mypehakatsa myhumo taokaniki ana pokso hi mykparawybyitsa. Wasani zuba tsimaha. Mypehakatsa ipunihikanikita ana humo ka ja ahaspiriktsokda byihuja. Iwatsahi pykyhytutaha! Iwa tsimaha zeka mypehakatsa ahahumo ba ziktaokani! Ikiahatsa humo tsizokdirēta mozik zeka batu myku tsimoziknaha. Iokzeka ikiahatsa hyrikoso sapybara pehakatsa ahakparawy iwatahi ahahumo tsizokdirēta mozik.

Utsa tysipokzitsinahaktsa.

²³ Katsa Deus tyryktsa tsimaha iwatsahi hawa tsimyzihikiknaha wasani my. Anaharere bo yh̄ mykara. Utakta:

– Amy ty mytsaty my zeka yh̄ mykara. Ba aty tohi zikyko, nanabyi ba zik tsumuēh̄ iwatahi iwaha ba zikzihikik iwatahi nanabyi humo ba ziky – my.

²⁴ Tyharape pokzitsikinahaktsa! Ba ahabo zuba mytsaty zikaha. Utsa kytsa humo ahamypokzitsihu!

²⁵ Nanabyi tyziborokonaha. Anazoho tsipisiknaha zeka ba ziktsasonaha:

– Naka deusbyita hyrikosotsa bo ky nyny niy – tsimaha. Iwa ba zikaha. Iwatsahi tsimaha zeka ba ahasikpyby ziyknaha.

²⁶ Paikpa mytsaty mytsaty byitaha! Deus zuba mybarawytza atahi abazubata. Mybarawy nizukni iwatahi nanabyi tisapyrēna nizukniki. Mybarawy ezektsa humo abazubata nanabyi humo kino niwatihi abazubata my Deus. Iwa Deus papeu humo botu ziwataha.

²⁷ Aty maku Sesus humo ispirikpo byita zeka ahape my zeka:

– Kawahoro bo paku tyny. Katuk tsikadisaha – my zeka. Iwahoro bo tsimytsuk tsihik zeka pakuty. Amy ty tadisahawy ty abo nyny my tsikadisaha. Iwa tsimaha zeka ba ahasikpyby ziyknaha. Soso byitaha:

– O naka ja. Deusbyita hyrikosotsa disahawy ba zikaha – tsimy.

²⁸ Ta maku Sesus humo tsikaeni zuba ispirikpo zeka ata wahoro eze tu zeka ape:

– O naka deusbyita hyrikosotsa zoho – my. Iwa my zeka anaty ka ba zikadisaha. Tsipiboro zeka atahi iakubyita mozik. Tisikpybyrēta mozik. Ity hauk byizeka tsakurēta mozik ahahumo kino niwatihi. Ba aty tohi iakubyita sukni ahabyitsa tsimoziknaha.

²⁹ Atahi Sesus humo tsikaeni zuba ispirikpo ahapokzitsikitsa. Ikiahatsa tsipahadisahanaha zeka ahaokze ka wasani tsimykaranaha harape pokso hi batu ziboronaha iwaze tsakurēta mozik. Batu asikpyby my. Wasani my iwa ihumo ahapokzitsiukrētsa tsimaha.

³⁰ Atyzeka ja piboro zeka tapara Deus pe my:

– O Deus kazo adisahawy humo kakurēta ikia hi kabo nyny tsiky – my. Iwa my zeka batu aty tohi kape:

– Azoho tsipiboroze batu wasani my. Kaokzeka ba wasani my – my.

³¹ O kytsa amy ty tsimykaranaha ty wasani tsimykaranaha. Tsipadisahanaha zeka tsipikunaha zeka nanabyi ty tsimykaranaha zeka Deus bo tsimykaranaha! Iwaze ustsya kytsa ahabo iktsa mahaze asahi:

– Deus zuba wasanita – maha. Ityryktsa bo iktsa mahaze iwa Deus soho maha.

³² Sizubarētsa okzeka ahamysapyrētsa tsimaha. Sudeutsa, Sudeutsabyitsa, Sesus humo sispirikporētsa iwa kytsa sizubarētsa okzeka wasani tsimyzurukunaha. Iwa tsimyzurukunaha zeka Sesus Kiristu bo yh̄y maha.

³³ Kawa tynakara. Uta ka wa kytsa tysitsumuēh̄i. Ustsya bo zuba ana humo hi mytsaty mykara. Kabo tisapyrēna bo ana humo hi batu mytsaty my. Iwa mozurukuze ustsya mysitsumuēh̄i. Sesus humo sispirikporētsa moziknaha ana humo hi mysitsumuēh̄i h̄y.

11

1 – Uta Kiristu wata kasopyk mykara. Iwatsahi kawa tynakananahaktsa kytsa! – my.

Tsimyzumubanhaze hawa wytykyryk nakaranaha.

² Ikiahatsa humo kakurēta. Kabo mytsaty tsimykaranaha humo tsimy. Zibytuhukunahatu hawa ha ty ahahyrinymyryky naha ty hi tsimykaranaha. Wasani tsimykaranaha.

³ Abaka kaharere wytykyryk soho humo tsiwabytoktonaha. Kiristu Deus zipehata myzubarētsa mysipehaka. Atahi kytsa pehakatsa mozik. Iwazahi wytykyryk tahapytsa harere bo yh̄y mykaranaha. Deus hi Kiristu pehatsa.

⁴ Iwatatu maku panu ty tatyharasuk iwa my zeka tasikpybyspyk mykara. Kytsa izumubanhaze maku itsorikbyita tu Deus bo mopamykysokoze Deus harere itsorikbyita tu motsasoko zeka wasani. Tatyharek bo my zeka Kiristu humo batu isopyksapy my.

⁵ Wytykyryk siza meky watu sisopyk tahaharek humo panu ty pu sisopyk. Deus bo tsimypamykysokonahaze ahaharek humo pupuhyryktahaktsa. Deus harere ty tsimytsasokonahaze ahaharek humo puzubataha. Ahaty harek bo ahabyi zeka ahasopyk humo batu wasani zikaha. Asiza siharabihiza waza iwazahi sisikpybyrēza. Atatsa taty harek bo ahabyi zeka tisikpybyrētatsa mozik.

⁶ Iwazahi asiza tahaty harek bo ka ha byizeka asiza pe my:

– Aharadi ty ka purubaiktaha – tsimaha. Iwa atatsa ahasopyk humo my zeka tisikpybyrētatsa mozik. Atatsa batu taharadi pokzi batu h̄y ziky taty harek bo hyk my zeka batu asikpyby. Iwa my.

⁷ Makuta Deus wata iwatahi tatsorik ty batu puhyryk ziky. Deus nisisukni iwaze iharere bo hȳh̄ mynakananaha, tawah̄i ituk mynapykyryknaha. Wytykyryk nisisukni tahabariktsa harere bo yh̄y mynakananaha.

⁸ Tapara Deus maku nizuknize batu wytyk ikny tybok. Wytyk Deus nizuknize maku pek tyhi wytyk nizukni.

⁹ Deus maku nizuknize ba wytyk humo. Deus wytyk nizuknize maku bo nizukni.

¹⁰ Iwaze Sesus humo sispirikporētsa izumubanhaze wytykyryk panuty taharek humo pu tahaktsa! Bijoikpe iknyktsa Deus tsumuēh̄itsa sibo iktsa mykaranaha. Sihareksuk tuze tahabariktsa harere bo yh̄y mykaranaha bijoikpe iknyktsa bo mysiwatawy iwa tsizubarēna wasani piwatawy.

¹¹ Katsa Sesus humo myspirikporētsa tuze batu taha zuba tsimyzurukunaha. Kytsa wytykyryk kino niwatihi tyharape pokzitsikinaha.

¹² Deus koikny baktatu tapara maku nizukni. Iwaze maku pek zibokze wytyk nizukni. Abaka jabyitsa wytykyryk tsaresuk ikny napupurukuknaha. Nanabyi Deus humo zuba mynapykyryknaha. Kytsa wytykyryk ahatsa Deus iknyktsa.

¹³ Sesus humo sispirikporētsa zumubanahaze wytykyryk Deus bo mopamykysonaha. Deus bo mopamykysonahaze itsorikbyiza ahaokze ka batu wasani tsimaha. Iwa mytsaty tsimaha.

¹⁴ Katsa mypetu mysopyk:

– O kytsa siharadizezerētsa zeka batu sapy – tsimaha. Iwa mytsaty tsimaha.

¹⁵ Wytykyryk meky watu maha. Siharadizezerēza zeka katsa hi:

– O asiza simoksapyrēza. Siharadi sapyrēza – tsimaha. Sipapiritsa tazahara buruk siharadi iwa.

¹⁶ Iwa my. Wytyk Deus bo mopamykysokoze ahaharekbowy ty puhyryktyktsa! Iwa my sizubarētsa kaharere bo yh̄y mykaranaha. Sispirikporētsa kaharere bo yh̄y mykaranaha. Kytsa ipehatsitsa myharapepehaikiknaha zeka kaharere sibo tsimytsasonaha.

Tsinauzuzukbanahaze hawa Sesus Kiristu bo mytsaty tsimykaranaha.

¹⁷ Kyze tsinauzuzukbanahaze wasani ahasopyk byitsa tsimykaranaha. Tsinauzuzukbakanahaze tahatukytsa ba ziksitsumuēh̄naha tsimysiaknikinaha. Sesus humo batu tsimysispirikpotohi tsimysiaknikinaha zuba. Iwaze ahahumo batu kaokanisorok kasakparēta mynakara.

¹⁸ Wastuhu kytsa kape nikaranaha:

– Korītio ezektsa mynauzuzukbanahaze myharapepehaikiknaha. Sasabyitsa mykaranaha – niaha. Tozeka ja anaharere humo wasani my.

¹⁹ Sasabyitsa humo pykyhytu tahaktsa. Batu wasaniha. Ikiyahatsa hi:

– Aty tsimysapyrēta zeka mymyhyrinomyrynaha – mytsaty ahabyitsatu tsimykaranaha. Iwa mytsaty tsimykaranaha zeka Deus okzeka batu imysapy my.

²⁰ Tsinauzuzukbanahaze mypehatsa Sesus nihyrikosokda nahabo mytsaty tsimykaranaha. Ahadisahawy tsizubarēna zeka Sesus harere bo batu hȳy zikaha iwaze tsipahadisahanahaze Sesus Kiristu ba ahapehakatza ziky.

²¹ Ikiyahatsa kino ahadisahawy tyty tsikahadisahanaha. Iwatsahi tapara mozumunahatsa siharaze tu nityryk nymyhyrybyiba naha mytahadisahanaha siapikwaktsitsa ba amy tohi ty hauk zikaha. Utsa kytsaktsa sit-sauziurētsa iwatsahi siapiktsa zumukunahatsaktsa siaraparētsa nikaranaha. Ikiyahatsa zikaha piperynahabyitsa ahadisahawy ty zuba tsikahazisanaha.

²² Ikiyahatsa humo kaokanirēta. Aharaparētsa zeka ahawahoro eze tu tsikadisahanaha. Deus tyryktsa tuk tsinazuzukbanahaze wasani ty-nakaranahaktsa! Asaktsa sinamybyitsa ahatuk zeka ba ziksimiwy. Ahadisahawy humo haukbaik tsimaha zeka sinamybyitsa ahahumo sisikpybyrētsa moziknaha. Iwa maha pokso hi ahasopykziuhu ja.

Sesus mysapyzekenihyrikosokda naha bo mytsaty tsimykaranaha.

²³ Sesus mypehatsa zikyrynomyryky naha ty pahahyrinomyryky. Ihyrikosokdawy soho bo mytsaty tahahaktsa! Tapara Sudas unata isopyksapybyita Sesus sukyrytsitsa ibo zioқтыhyrykze Sesus atsikara waha ty okok niy. Deus pe nikara:

²⁴ – Ikiya humo ka kakurēta – niy. Atsikara ty zuktsa niyze. Zinomyryky-nahatsa bo nyny niy:

– O na ty hauk tahaktsa! Anaty hauk tsimykarannahaze kanury soho bo mytsaty tynakaranaha. “Sesus mysapyzeken nihyrikosokda” tsimykarannaha – niy.

²⁵ Kyze tahadisahabanahaze taoporosuk ty okokzo niy. Iwaze hi:

– O naka kaspubaba. Mohyrikosokdaze Deus wasania ty mybarawy ezeke tsa bo motsaso. Tsõ tsimahaze kaspu soho bo mytsaty tynakaranahaktsa. Duabohotsa tsik tsipikunahaze kahyrikosokzawy bo mytsatytahaktsa – my! Iwa kapehatsa zikyrinymyryky niy.

²⁶ Iwatsahi katsa atsikara waha tyhauk tsimahaze Sesus mysapyzeken nihyrikosokda ana humo hi natawatawyky. Atsawatu duabohotsa tsik tsipikunahaze kino niwatihi Sesus hyrikosokdawy natawatawyky. Atahi taperyky. Iwa ibo mytsaty tsimynakaranaha, aiba zuba Sesus mybarawy bo myziksizo.

²⁷ Aty atsikara waha ty hauk my zeka batu wasani my atahi pimiyiki. Sesus hyrikosokdawy soho humo myzisapybyiki. Atahi duabohotsa tsik piku zeka batu wasani ziky atahi pimiyiki. Sesus hyrikosokdawy humo Deus batu ziokzo.

²⁸ Iwatsahi tapara atsikara waha ty hauk ahabyizetu mytsaty tsimaha duabohotsa tsik kino niwatihi tsõ ahabyizetu tapara mytsaty tsimaha. – Deus okzeka ja wasani mykara, iharere bo ja hyÿ mykara – tsimy. Iwa mytsatytahaktsa! Iwaze hauk tsimaha, iwaze tsõ tsimaha.

²⁹ Sesus Kiristu mysapyzeken iharapatawyhyta humo nihyrikosokda ana humo hi tsikspiriktsokdanaha zeka batu hauk tsimaha. Batu tsõ tsimaha. Pykyhytutaha! Tsipihauknaha zeka ahaspirikpobyitsa zeka Deus okzeka batu ahamysapy. Iwatahi pahasininiwy.

³⁰ Wastuhu mektsaktsa ahatuktsa botu zihauknaha asahi wasanibyitsa nikaranaha, iwatsahi simyitsapyrëtsa niyzikiknaha. Siakubyitsa niyzikiknaha. Wastuhu niakbakanaha.

³¹ Tapara atsikara ty hauk byizeka Deus pe tsimykara:

– O kazo aokzeka ja kamysapybyita ikykara – tsimykara. Ahamysapybyitsa tsimykarannaha zeka ibo tsimytsasonaha iwaze ahamysapybyi Sesus humo pahaokzohik. Mospiriktsokda. Iwatsahi batu sinini tsimaha.

³² Deus hi mymyspirikpowyky. Iwatsahi tsimysapybyikinaha zeka mymyitsapyrywy. Iwatsahi Sesus humo sispirikpobyitsa tuk ba sinini ykarawy bo ba zikmypeha. Botu iharere humo hyÿ tsikaha.

³³ Iwaze katukytsa tsinakypyknahaze, Sesus Kiristu hyrikosokdawy humo mytsaty tsimykarannaha tyharape perykynahaktsa. Sizubarëtsa mynauzuzuknahaze iwaze tsikadisahanaha my.

³⁴ Aty irapa zeka awahoro eze tu tsikadisaha iwaze hi Deus wahoro bo my. Iwaze Deus humo mynauzuzukbanahaze ba ziktsaso:

– O hawa tsimykarannaha humo ka wasanibyitsa tsimykarannaha – my. Iwa ba ziktsaso.

Kyze botu kabo tsiwatahakanaha anatyhi ahabo pomoze kapehawy ahape my. Iwa my.

12

Deus hyrikoso tisapyrëna ty mybo nyny my.

¹ Kyze – O katukytsa ahapapeu humo kabo tsiwatahakanaha:

“Hawa Deus hyrikoso mytuk mynapykyryk. Hawa Deus hyrikoso isapyha ty mybo nyny my” – tsikaha. Abaka ana humo hi pahahyrinymyry.

² Taparaka ahaspirikpobyitsaze deusbyitsa hyrikosotsa bo yh̄y tsik-nakaranaha. Deusbyitsa hyrikosotsa asaktsa ba ziktsasonaha, sihumo pa-haspihikbataikiknaha iwaze pahamyiwyikiknaha.

³ Abaka meky watu tsimaha. Ikiahatsa kytsa bo iktsa tsimykaranaha. Asahi:

– Hawa tsimykaranaha zeka Deus hyrikoso mytuk mynapykyryk ihumo zuba tsinakaranaha – nikaranaha. Ata my zeka:

– Sesus kapehakatsa my – Deus hyrikoso humo Sesus soho myharezeziuwu. Utsa Sesus soho humo myzisapybyrikinahaze asahi Deus hyrikoso ba situk mynapykyryk simyspihikbatanikitsa maha. Asaktsa Deus hyrikoso situk mynapykyryk tsinymyrykynaha. Asa kino niwatihi simyspihikbatanikitsa tsinymyrykynaha. Iwatsahi ahamytsatzyiuhuktsa kytsa.

⁴ Deus hyrikoso tisapyrēna ty nanabyi waha. Kytsa myziaksekenaha atsatu mybo nyny my, Deus hyrikoso ata zuba.

⁵ Katsaktsa mytarabajawy humo nanabyi humo mysopyk Deus bo zuba tarabajaziu tsimykaranaha. Mypehatsa estuba zubata ata bo hi tarabaja tsimykaranaha.

⁶ Deus zikwy humo katsaktsa meky watu tarabaja tsimykaranaha. Deus hyrikoso tisapyrēna ty mybo nyny my. Deus zuba mymyhyrinymyryky. Myzubarētsa mymyhyrinymyry. Mytytsumuēhī byizeka katsaktsa batu myhyrinymyry.

⁷ Deus hyrikoso mytuk mynapykyryk. Hawa my meky meky waha tu mytuk mynapykyryk. Mywatu estuba meky meky watu nyny my. Sesus humo sispirikporētsa Deus zikwy piwatawy, iwaze ustsā Sesus humo sispirikporētsa mysitsumuēhī iwa h̄y.

⁸ Iwaze wastuhu kytsa Deus hyrikoso zikwy humo ispirikpowy babata motsasoziuku. Usta Deus hyrikoso zikwy humo Deus harere kytsa mysihyrinymyryziuku.

⁹ Mektatu Deus hyrikoso zikwy humo Sesus humo mysispirikpotohinaha. Usta maku simyitsapyritsa mysizororowykynaha Deus hyrikoso zikwy humo zuba.

¹⁰ Usta amy ty kytsa zikahabara ty ana humo hi mykara Deus hyrikoso zikwy humo zuba. Mektatu Deus harere motsasoko. Usta Deus hyrikoso zikwy humo mymysatyhyky. Aty zeka motsaso Deus hyrikoso humo tsihyrinymyrēta. Aty zeka motsaso hyrikoso sapybara humo anatyhi mymysatyhyky. Usta Deus hyrikoso zikwy humo nanabyi siharere motsasoko, anaharere humo batu aty tohi ihumo ihyrinymyry hukbyita. Mektatu amy ty usta harere nitsasoko, anaharere humo tsihyrinymyrēta. Kytsa bo motsasoko kytsa harere sibo motsasoko.

¹¹ Iwa Deus hyrikoso tisapyrēna ty nanabyiwaha. Ihyrikoso mywatawyhytsa estuba tisapyrēna ty mybo nyny my iwa atahi mozihikik.

Sesus tuktsa mynury wata.

¹² Mynury estuba zuba. Mynury humo nanabyi iwatastu estuba zuba tsimaha. Iwata katsa Kiristu humo mysipirikporētsa tisapyrēna ty mybo nyny my iwatastu estuba zuba wata tsimaha.

¹³ Sizubarētsa Sesus humo sispirikporētsa. Asaktsa ihumo nymyharasusukunaha. Deus hyrikoso humo hi estuba zuba Sesus humo sispirikporētsa. Sudeutsa ihumo sispirikporētsa, Sudeutsabyitsa ihumo sispirikporētsa, kytsa sinamybyitsa sinamyrētsa kino niwatihi iwa kytsa aparakbaha Sesus humo sispirikporētsa. Deus hyrikoso situk mynapykyryk iwaze meky

watu niyzikiknaha. Sesus Kiristu wata niyzikiknaha. Sizubarētsa Sesus Kiristu nury wata niyzikiknaha estuba zuba tawa.

¹⁴ Kytsa ustsā kytsa mymytsumuēhīnaha. Hawa mynury estuba zubata tu myhumo nanabyi maha, myharek, mytsyhyrypetsa, myhyrytsa iwa iwahi kytsa Sesus humo sispirikporētsa tarabaja meky watu mykaranaha. Iwaze estuba zuba ispehakatsa my.

¹⁵ Mypyrytsa maha zeka:

– O katsaktsa itsyhyrype humo tsabyitsa iwatsahi batu inury humo – maha. Iwa zeka mynury eze tu maha. Ba zikpyk.

¹⁶ Myspiuke my zeka:

– O uta ihyrizik humo tabyita iwatahi batu inury humo – my. Iwa zeka mynury eze tu my. Ba zikpyk.

¹⁷ Mynury ihyrizik zuba zeka batu waby zikaha. Mynury ispi pamabyita zuba wata zeka batu nu zikaha.

¹⁸ Deus nimysuknize nanabyi meky watu nizukniki. Mynury estuba zuba.

¹⁹ Atsatu zuba zeka mynury ba zikyzyk.

²⁰ Mynury estuba zubata tu nanabyi myhumo tsihohokrēna.

²¹ Mynury eze sapybarasukni aha. Myharek humo mytsaty tsimykaranaha. Mypyrytsa humo natatabaka. Mytsyhyrypetsa humo tarabaja tsimynakaranaha. Myhyriziktsa humo iktsa tsimynakaranaha. Iwa nanabyi maha. Paikpa tyharape tsumuēhīnaha. Anawahi katsa Sesus humo myspirikporētsaktsa tyharape pokzitsikinahaktsa!

²² Myokzeka wastuhu nanabyi mynury eze batu pykyhy myhyrizikwybyita zeka mytsaty ahabyitsa tsimykaranaha. Ana nanabyi mohokda zeka tsimyitsapyrenaha.

²³ Wastuhu nanabyi humo mysikpybyrētsa. Iwatsahi mysuk natawaskik. Katsa nanabyi tapokzitsiki. Kytsa nanabyi bo iktsa mykaranaha zeka mysikpybyrētsa.

²⁴ Mynury nanabyi tisapyrēna tsikaeni zuba natapokzitsiki. Wastuhu zuba anahumo ka mysikpybyrētsa natapokzitsiki hÿ. Hawa mynury tasapywyky anawahi Sesus tuktsa myhyrizikwanibyitsa tysipokzitsikinahaktsa kytsa!

²⁵ Deus hi nanabyi mynury humo nizukniki. Mynuryta estuba zuba. Iwa katsa tsimyzurukunaha! Nanabyi metutu ba zikuru, katsa asta ske buruk tu tsimyzurukunaha tsa watsa iwa tsimyzurukunaha. Ustsā bo mytsaty taha.

²⁶ Mynurywatu mymyitsapyri zeka batu myku tsimaha. Mynury humo myitsapyri byizeka mykurētsa. Katsa Kiristu nury watsa tsimaha. Mytukytsa usta Sesus tuktsa simyitsapyri zeka katsa sihumo batu myku. Mytukytsa sakurētsa katsa niwatihi situk mykurētsa.

²⁷ Mynury nanabyi my iwatsa katsaktsa Kiristu nury nanabyi watsa tsimaha. Mywatu nanabyi meky watu katsaktsa inury estuba zuba tsimaha.

²⁸ Deus hi Sesus humo sispirikpotsaktsa mysipehaka situkytsa mysitsumuēhī. Ahatuktsa Deus nisiakzohokonahatsa nispeha. Iwaze ustsā Deus harere sohokotsa. Iwaze asaktsa Sesus humo sispirikporētsa mysihyrinymyry. Wastuhu Deus zikwy piwatawykynaha, amy ty kytsa zikahabara ty anatyhi mykaranaha iwa Deus zikwy piwatawykynaha. Ustsaktsa mozororokotsitsa. Ustsaktsa tisapyrēna ty mysitsumuēhīnahatsa. Iwaze asaktsa tahatukytsa Deus bo mysioktyhyryknaha. Iwaze ustsā meky watu siharerekitsa bo motsasokonaha. Deus tisapyrēna ty Sesus humo sispirikporētsa bo nanabyi humo nyny my. Iwa.

²⁹ Batu sizuba Deus ykzohotsa sizubabyitsa tu. Deus sohokotsa kino batu sizuba. Sihyrinymyrykytsa kino niwatihi batu sizuba. Deus zikwy humo piwatawynahaktsa kino batu sizuba.

³⁰ Simyitsapyritsaktša mysizororowy nahatsa batu sizuba. Meky harere humo tu motsasokonahatsa batu sizuba. Siharere humo zinymyrykynahatsa iwaze taharere ty motsasoko batu sizuba.

³¹ Deus tisapyrēna ty nanabyi ty mybo nyny my. Deus tisapyrēna humo puētsik tyzihikiknahaktsa kytsa. Iwatsahi Sesus tuktsa mysitsumuēhītohi ana hi tsimyzihihikiknaha ana hi ikiahatsa bo piwatawy.

13

Hawa tsimyharape pokzitsikinaha.

¹ Kytsa ustsā tynasipokzitsikinahaktsa! Uta sasabyitsa harere humo motsasoko siharere ty tynymyrybyitatu motsasoko zeka bijoikpe iknyktsa harere humo niwatihi motsasoko iwa zeka ustsā kytsa ba zikšipokzitsiki kaharere isuka zuba. Maku kariku humo zaza mykaraze tawata isuka zuba. Ata ykpyri wa zeka Deus okzeka utakta mysipihikwybyita mykara.

² Deus harere sohokotsa motsasoziukik zeka mykara. Iwaze kytsa sihyrinymyrētsa ana hi pinymyryba zeka hawa tsihokdaharēna ana hi pinymyryba. Iwa zeka Sesus humo kaspirikporēta mozik iwaze hawa kytsa zikahabara ty atsatu mykara. Iwa my zeka ustsā kytsa mysipokzitsi byizeka Deus okzeka utakta mysipihikwybyita mykara.

³ Kanamy tsizubarēna ty sinamybyitsa bo nyny myzeka. Iwaze sispirikpobyitsa kanury izo bo pioktsoknaha zeka mokorobaik, Sesus harere humo kaspirikporēta. Iwa zeka ustsā kytsa ba zikšipokzitsi ana humo kino batu kasopyksapy. Ustsā kytsa humo mysipokzitsi byizeka, Deus okzeka mysipihikwybyita mykara.

⁴ Katsaktsa ustsā kytsa humo mymypoکزitsiukrētsa tu zeka sihumo batu mysakpare mykubyrisorokrētsa tsimaha. Sibō nyny tsimaha. Sibō nynyzo tsimaha. Sihumo batu myzokdi. Katsaktsa batu mypetu mysopyk:

– O katsa zuba myhyrinymyrētsa. Katsa zuba abazubatsa tsimaha – iwa ba zikšaso.

⁵ Ustsā humo tahapokzitsikinaha zeka wasani tsimykaranaha. Batu mybo zuba tsimykaranaha ustsā bo mytsaty tsimykaranaha. Batu aidy mytysakani mysopyk tsimaha. Ustsā hawa myhumo sisopyk batu sihumo ziktahakyrikinaha.

⁶ Ustsā mysisapybyikinaha zeka anahumo hi batu myku tsimykaranaha. Asaktsa wasani mozurukunaha zeka mykurētsa tsimaha.

⁷ Ustsā kytsa humo tsimysipokzitsikiknaha zeka sisoho mymyharerezi-uwyyky. Katsa tihi:

– Deus abazubata ba hawa tohi zikzukninaha – tsimaha.

Ustsā humo makubyrisorokrētsa tsimoziknaha. Taperykynaha ustsā sihyrizikporētsa moziknaha ana hi taperyky. Batu myhyrizikbara.

⁸ Ustsā tahapokzitsikinaha zeka mywahi tsimynapokzitsikinaha. Ba zikpyk tsimaha. Deus tisapyrēna ty tasohotsitsa bo pepyk. Aba zuba Deus harere motsasokonaha aibapepyk. Deus isapyrēnikia ty kytsa bo ustsā harere motsasokonaha zeka, siharere humo ihyrinymyrybyita tu ana kino pepyk. Aba zuba mektsa harere ty zuba motsasokonaha aiba tohi pepyk. Deus tisapyrēna myhyrinymyrywy pe kino niwatihi pepyk.

⁹ Tsinymyrynaha humo tsikaeni zuba myhyrinymyry. Deus harere sokotsa tsikaeni zuba motsasoko.

¹⁰ Deus tuk mywahi tsimynapykyryknaha zeka tanymyry baba. Siso-hokotsa mohokdanaha katsa tsimytsasobanaha.

¹¹ Jabasize hawa jabasta ziknatsasoko nahawa ikšasoikik. Hawa jabasta tuze mytsaty ziknakara nahawa mytsaty ikykara. Hawa jabasta sopyk wa

uta kino niwatihi kasopyk. Abaka batu. Utakta abaka ikypyk hawa jabastuze ziknawakyrīki abaka batu kawakyrī ikzihokza.

¹² Abaka hawa Deus mykara tsikaeni zuba tanymyryky. Katsaktsa kytsa watsa asahi moknywy bo iktsa maha. Ba zikozozīunaha. Tsikaeni zuba iktsa maha. Katsa siwatsa tsimaha. Aba zuba Deus soho tsikaeni zuba tsinymyry-naha. Katsaktsa ituk mywahi tsimynapykyryknahaze iwaze tanymyryba. Aba Deus nimynyziu katsaktsa ituk mywahi tsimynapykyryknaha zeka tanymyryba niy.

¹³ Iwaze katsaktsa Deus humo myspirikporētsa. Ituk mywahi tsimynapykyryknaha ana hi tsimyzihikiknaha. Ana hi taperyky. Katsaktsa ustsā tahapokzitsikinaha. Deus okzeka Sesus humo myspirikporētsa tuze wasani tsimykaranaha. Ituk mywahi tsinapykyryk tsihikiknaha zeka ana kino wasani tsimykaranaha. Katsaktsa ustsā kytsa humo tahapokzitsikinahaze ana humo ka wasaniha zuba tsimykaranaha tisapyrēna ty tsimykaranaha.

14

Deus hyrikoso tisapyrēna ty nanabyi motsasohokozo.

¹ Deus bo mektsa harere ty tsimytsasokonaha zeka wasani, katsaktsa Deus harere ustsā kytsa bo tsimytsasokonaha zeka wasani tsimykaranaha iwahi tsimyzihikiknaha. Iwaze tyharape pokzitsikinahaktsa kytsa! Deus isapyrēnikia ty kino niwatihi tsimyzihikiknaha! Isapyrēnikia ty wasaniha zuba tynazihikiknaha wasaniha iharere tsimytsasonaha. Ana humo hi ipe tsimaha:

– O Deus ahyrikoso mytuk mynapykyryk iwaze aharere ustsā bo tsimytsasokonaha – tsimaha.

² Aty meky watu iharere zeka Deus zikwy humo atahi Deus bo zuba motsasoko. Katsaktsa batu myhyrinymyry. Iharere tsihokdahrēna. Deus hyrikoso humo motsasoko, kytsa humo ka iharere tsihokdahrēna.

³ Atahi Deus harere motsasoikik sizubarētsa bo motsasoko batu iharere hokdaha. Deus harere motsasoko iwa kytsa mysitsumuēhīkī. Motsaso zeka mysiakusukniwyky iwatsahi mysipunihikwyky. Iharere humo nipybybyri-naha.

⁴ Iwaze asaktsa mektsa harere tu motsasokonaha asatu tahatsumuēhīkīnaha. Ustsā kytsa Deus harere motsasokonaha Sesus tuktsa sizubarētsa mysitsumuēhīkīnaha iwatsahi mysitsumuēhītohinaha.

⁵ Ikiāhatsa mektsa harere humo tsimytsasokonaha zeka ahakurētsa tsimaha. Ikiāhatsa hi Deus harere tsimytsasokonaha zeka nawahi ahakparawy iwaze ahakurētsa. Asahi Deus hyrikoso humo mektsa harere humo motsasoikiknaha Deus bo tarabaja mykaranaha. Atakta Deus harere motsasoikik tarabajaziu mykara hỹ. Aty Deus zikwy humo mektsa harere tuk piny zeka wasani my, atahi siwabysitsa izumubannahaze iharere sibo motsaso. Batu aty tohi siharere humo sihyrinymyry byizeka atahi kytsa bo motsaso.

⁶ O katukytsa ikiāhatsa bo mynakozore zeka mektsa harere humo ahabo motsaso zeka ba zikatsumuēhī. Deus botu kape niy ana hi ahabo motsaso zeka ana hi pahatsumuēhī. Deus harere, ana ty hi Deus tahyrikoso humo botu kabo ziwatawy, ana kino pahatsumuēhī ahaharere humo motsaso zeka pahatsumuēhī.

⁷ Berekzetsa sisukapykrētsa. Byrzykuyktsa seroktsa ahatsa niwatihi sisukrētsa. Aty bereketsa humo pamykyzy byizeka katsaktsa tsimaha:

– O bereketsa batu mykparawy sisuka zuba – tsimaha.

⁸ Aty porawy eze isapybara pỹ mykaraze tawata batu wasani ziky iwa zeka sodadutsa ba ziktahazoziknaha.

⁹ Anawahi meky watu ahaharere tsimypamykysonaha zeka siwabytsitsa ahaharere humo batu sihyrinomyry, iwatsahi ahaharere bo batu waby zikaha. Sihyrinomyrybyitsa tu ahaharere bo batu waby zikaha.

¹⁰ Mybarawy eze nanabyi myharere. Aty mypubara ty iharere ty mopamykysoko zeka batu iharere hokzaha.

¹¹ Aty mekyharere humo motsasoko zeka atahi bipyri iharere humo batu kahyrinomyry. Uta kino niwatihi ihumo bipyri wata my kaharere kino meky watu tahi.

¹² Ikiahatsa Deus humo isapyrēnikia ty tsimyzihikiknaha zeka. Asahi Sesus humo sispirikporētsa mysiakusukniwyky, kytsa mysitsumuēhī ana hi tsimyzihikiknaha!

¹³ Aty taharerebara humo mopamykysoko zeka tapara Deus bo ty-pamykyso:

– O myzo azikwy humo tyziktsumuēhīkta iwaze kaharerewabytsitsa bo aharene motsaso. Amy ty mekywatsa harere motsasoko siharere motsasoko – my. Iwa tsimy!

¹⁴ Deus bo mekywatsa harere ty mopamykysoko zeka amy bara tu motsasoko kahyrinomyrybyita. Kahyrikoso Deus bo motsasoko.

¹⁵ Iwatahi kahyrikoso tuk Deus bo mopamykyso, kaharere niwatihi Deus bo mopamykyso anaharere kytsa nimyhyrinomyrykynaha. Kahyrikoso tuk Deus bo mosakibaziki, kaharere tuk niwatihi Deus bo mosakibaziki ana myharere kytsa nimyhyrinomyryky.

¹⁶ Ahyrikoso tuk zuba Deus bo tsimypamykysokoze mekywaha harere humo hi:

– O Deus myzo ikia zuba amysapyrēnikita – tsimy. Utsa sihyrinomyrybyitsa aharene bo batu yhỹ zikaha, aharene sihumo tsihokdaharēna my.

¹⁷ Hawa ha tsimytsasoko zeka Deus humo tisapyrēna my. Asaktsa ba atuk mynapykyknaha ba ziksitsumuēhī.

¹⁸ Wastuhu ahatuk Deus zikwy humo motsasoko. Utakta meky harere humo Deus bo abazuba motsasoko Deus bo kahyrikoso mynakara. Iwatahi ipe my:

– O Deus myzo isapyrēnikia ty kabo nyny ty my, anahumo kakurēta – my.

¹⁹ Sesus humo sispirikporētsa izumubanahaze situk my zeka, mekywaha harere humo ba ziktsaso. Asaktsa kaharere piwabynaha siharere zuba motsaso iwa mysitsumuēhī. Deus harere humo mysihyrinomyry. Mektsa harere tu motsaso zeka tsizubarēna harere batu aty tohi kaharere humo ihyrinomyry. Siharere humo motsaso zeka wastuhu pinomyrynaha, sizubabyitsa harere motsaso zeka, mysitsumuēhī.

²⁰ O katukytsa siypyktsa wa tynakaranaha! Hawa mytsaty tsimykaranaha zeka siypyktsa watsa tsimaha. Sihyrinomyrētsa. Kytsa asahi pahasapybyiki-nahatsa siwaka ba zikaha. Asahi jabyitsa watsa mykaranaha.

²¹ Deus harere papeu humo iwatahaha:

– Mybarawy Ezektsa bo motsaso.

Mektsa harere humo sibo motsaso.

Kytsa bipyritsa harere botu iktsaso.

Iwa iktsasoze batu kabo waby – niy.

²² Iwaze katsa mekywaha tu tsimytsasonaha zeka sispirikpobyitsaktsa sipybyrētsa. Anaharere humo Deus sibo ziwatawy. Sesus humo sispirikporētsaktsa batu sipyby. Deus harere tsihyrinomyrykynaha zeka anatyhi sispirikporētsa. Anaty hi sispirikpobyitsa bo my.

²³ Ahaspirikporētsaktsa tsimyzumubanhaze Deus harere tsiwabynaha. Tozeka ja ahazubarētsa mektsa harere tu ja tsimytsasonaha. Sispirikpobyitsa napupunaha zeka asahi:

– O asaktsa sityrykmyirētsa – maha.

²⁴ Deus harere tsimytsasonaha zeka iwaze sispirikpobyitsa napupunahaze ahaharere piwabykynahaze:

– O kaksaktsa mysapybyitsatu tsimykaranaha.

²⁵ Deus okzeka mysapybyitsa tsimykaranaha. Isapy bara bo mytsaty tsimykaranaha – maha. Sispirikpobyitsa humo hi Deus bo mopamykysokonaha. Asahi:

– O Deus myzo ikia zuba amysapyrēnikita. Iki hi inazuzuknahatsa tuk tsimypykyryk. Ana humo hi myhyrinymyrētsa tsimaha hỹ – maha.

Tsizumubanaha zeka wasani tsimaha.

²⁶ Iwaze katukytsa tsimyzumubanhaze tyharape tsumuēhīnahaktsa! Ustsa kytsa mysiakusukniwykynaha. Estuba Deus bo mosakibazi! Usta Deus harere humo kytsa mysihyrinymyry. Mektatu Deus ibo nitsasokonaha sizubarētsa bo motsasoko. Usta mekyharere humo tu motsaso iwaze mektatu iharere humo myharere baba humo motsaso iwaze sizubarētsa pinymyrykynaha. Ana humo kino sizubarētsa humo tyharapetsumuēhīnaha hỹ.

²⁷ Tozeka ja sizubarētsa mektsa harere humo motsaso tsihikiknaha. Petoktsa zuba tupamykysonaha. Hawa zeka harakykbyihitsa tupamykysonaha. Estuba tapara mopamykyso iwaze anaharere hi pinymyry atakta ustsa kytsa bo siharere humo motsaso. Atakta mopykze usta mektsa harere humo tu motsaso. Iwa hỹ. Batu sizuba mektsa harere motsaso.

²⁸ Ba aty tohi iharere humo ihyrinymyry byizeka ba opykani zikpamykyso. Myharere ustsa kytsa bo motsaso ba zikaha batu iharere my. Taha bo zuba motsasonaha Deus bo niwatihi motsasonaha iwaze ibo zuba motsaso. Tsinauzuzuknahaze batu harere ziky.

²⁹ Hawa ha Deus tasohotsa bo nitsasokonaha anahi petoktsa motsasokonaha. Tozeka ja harakykbyihitsa. Ustsa siharere ziwabyziukunahaktsa! Asahi:

– O anahi ja Deus hyrikoso mybo motsasoko. Iharere baba ja – maha. Iwa isohotsitsa harere bo mytsatyziutaha.

³⁰ Aty motsasokoze tozeka ja Deus harere usta my. Iwaze tapara maku harere niwazuba usta maku Deus harere kytsa bo motsasoko.

³¹ Sizubarētsa Deus harere motsasokonaha. Taparaka estuba zuba motsasoko, ata pepykze usta motsasokozo. Iwaze sizubarētsa mysiakusukniwykynaha. Deus harere humo mysihyrinymyrykynaha. Iwa tyharapetsumuēhīkīnaha.

³² Deus sohokotsa mozihikiknaha zeka motsaso naha. Ity tsihik byizeka ba ziktsasonaha ustsa kytsa mysiperynaha iwa zeka wasani my.

³³ Iwa ahasopyk zeka. Deus tsakurēta mozik katsa tsinauzuzuknahaze wasani tsimaha. Katsa wasani ahabyizeka Deus batu iaku.

³⁴ Kyze tsinauzuzukbanahaze ka wytykyryk siza piwabynaha zuba. Iwa nanabyitaba Sesus humo sispirikpowy maha. Wytykyryk taparaktsa harere bo hỹ ziknakaranaha. Iwazahi simywabykyza zubaza. Tubabatu Sudeutsa iwa ziknasispirikpokonaha.

³⁵ Hawaha ty tsihokdaharēna zeka iwazahi batu sihyrinymyryhuk ana humo hi tahawahoro bo myziksizonahaze tahapytsa pe maha:

– O atakta iharere humo batu kahyrinymyryziu amy sa niy – maha. Katsa mysopykik wytykyryk tsinauzuzuknahaze Deus harere tsipiwaby-naha wytykyryk motsasokonaha zeka tahasikpyby piyknaha.

³⁶ Tozeka ja kamypehawy ba ahakparawy. Deus harere ikia bo zuba ahabara sasabyitsa bo. Iwatsahi ba zikaha:

– Katsa zuba Deus harere humo myhyrinymyrētsa – tsimaha. Iwa ba zikaha.

³⁷ Asakta ahatuk Deus sohotsitsa kaharere bo yh̄y mykaranaha. Utsa ahatuk Deus zikwy piwatawynaha kaharere bo yh̄y mykaranaha. Asahi:

– O Pauro ziknakaranaha wasani my. Deus hi ipe niy – mykaranaha.

³⁸ Aty kaharere iakparawy byizeka iharere humo kino ba ahakparawy. Kaharere bo ba h̄y ziky. Iwatsahi Deus sohokotsa batu ahanyh̄y.

³⁹ Nawa katukytsa ikiahatsa Deus pe tsimaha:

– O Deus myzo azikwy mytuk mynapykyryk iwaze aharere kytsa bo tsimytsasonaha – tsimaha. Ikiahatsa ustsā kytsa batu tyso:

– Ba mektsa harere humo ba ziktsasonaha ba ziky – Iwa batu ustsā pe tsimaha.

⁴⁰ Tsimymyzuzuknahaze wasani tsimaha. Iwa Deus ahahumo tsakurēta my wasani tsimykaranaha.

15

Deus Kiristu zihyrizikpowy.

¹ O katukytsa Deus wasania ty botu ahabo iksaso ana bo hi mytsatyziutaha! Jatuba tu ana wasaniha humo tsikspirikpokonaha, anaharere bo hȳy tsikykaranaha, iwa ahasopyk.

² Anaharere Deus wasaniha iwatsahi anaharere bo zuba hȳy tsimykaranaha. Anaharere humo hi Deus pahaoktyhyryk usa harere humo ka Deus ba zimyokty. Deus harere humo hȳy ahabyi zeka batu Deus tuk zikopykyk. Deus wasaniha humo zuba pahaoktyhyryk.

³ Hawa Deus zikyrinymyryky naha ty atsatu zahahyrinymyryky. Kiristu mysapyzekenihyrikosokda ana hi Deus wasaniha. Ahamysapybyri humo nihyrikosokda iwaze ahamysapybyi tsimykaranaha zeka ihumo pahaokzohik mospiriktsokda. Deus harere botu papeu humo iwatahaha abo kino atsatu.

⁴ Nihyrikosokdaze ziytyknaha. Harahare hoke bo nitsahoroknaha. Iwaze petok zuruze Deus zihyrizikpowy. Harahare hoke ezekta izoihik inury ezytyk niyzik. Ana hi botu Deus harere papeu humo iwatahaha aba kino atsatu.

⁵ Peduru bo natakaha. Iwaze dose siakzohotsa bo natakaha niy.

⁶ Iwa asa itukze ziknakaranahatsa bo kahazuba ziknakara. Sizubarētsa bo natakaha niy 500 kījētostsa bo. Iwaze Sesus ispitu niyzikzo. Mektsakta botu niakbakanaha ustsakta asatutsa mynapykyryknaha asahi mybo motsasokonaha.

⁷ Iwaze Tsiaku bo natakaha kyze siakzohotsa sizubarētsa bo natakaha.

⁸ Iwaze uta sitsiharawybabata bo inatakaha. Tapara ustsā kytsa Sesus zinykynaha, uta kino niwatihi ziharawy babata tu Sesus iny.

⁹ Iwaze ustsā siakzohotsa kaokzeka myhyrizikwanitsa. Taparaka Sesus tuktsa ziknasisukyryky iwatahi kasikpybyrēta. Iwatahi utakta batu tyso:

– O utakta kamysapyrēta ba ziky iwatahi Deus zikwatawy iykzoho my – my. Iwaha humo kasikpybyrēta. Hawa Deus tyryktsa ziknasisukyryky naha humo kasikpybyrēta.

¹⁰ Iwatatu kasopyksapybyita ikykara Deus zikpokzitsiki. Atahi zikwatawy iakzohota ikyzik. Utakta ustsā siakzohotsa abazuba tarabajaziu mynakara.

Kahyrinymyrēta my. Deus zikwy humo zuba tarabajaziu ikykara, izikwy humo kahyrižikporēta. Deus hi pikpunihikwyky iwa hỹ.

¹¹ Uta kaharere ustsā Sesus ykzohotsa kino atsatu. Myzubaha sapyzēky Sesus nihyrikosokda iwaze Deus zihyrižikpowy tsimytsasokonaha. Katsa Deus wasania ty ahabo tsiktsasokonaha. Ana humo hi ahaspirikporētsa.

Katsa niwatihi Deus mynamyhyrižikpowy.

¹² Katsa tsimykarānaha:

– Deus Sesus Kiristu zihyrižikpowy tsimykarānaha. Ikiāhatsa ja. Wastuhu mynakanānaha:

“Siakbatsakta batu ziknahyrižikponaha” – mybarapetu mynakanānaha.

¹³ Iwa zeka – Deus Sesus Kiristu ba zikzihyrižikpowy – maha.

¹⁴ Deus Sesus Kiristu tyhyrižikpowy ahabyizeka iwa zeka Deus wasaniha tsimytsasokonaha zeka mybo zuba mysopyk. Myharere bo hỹ tsimykarānaha zeka baija tsimykarānaha.

¹⁵ Siharere humo wasani maha zeka, iwa motsasonahaze Deus Kiristu ba zikyrižikpowyzo iwa tsimaha zeka. Deus wasania ty tsimytsasonahaze myspihikbatarētsa tsimoziknaha.

¹⁶ Deus siakbatsa ty isty hyrižikpowyzo ahabyizeka ahumo kino Kiristu ty ba tyhyrižikpowyzo.

¹⁷ Kiristu hyrižikpo ahabyi zeka ahamysapybyi Deus ba zahaokzo. Nawa tsimykarānaha mytsaty ahabyitsa tu tsimykarānaha.

¹⁸ Kiristu hyrižikpozo ahabyi zeka ituk niakbakanahatsa batu Deus tuk tawahi mynapykyryknaha. Siakbatsa Sesus humo nispirikpokonahatsa kino niwatihi sinini ykarawy bo ziktahasapynaha.

¹⁹ Katsa myspituze zuba Sesus myhumo mymypoکزitsiki, katsa tsimyokbanahaze myty pokzitsi byizeka batu myku. Mysukatsihikrētsa. Ustsā kytsa sakurētsa katsa batu myku hỹ.

²⁰ Siharere kino ba wasape zikaha. Deus hi Kiristu zihyrižikpowyze mybarawy ezektsa bo ziwatawyky:

– Siakbatsa mynahyrižikponaha – my. Iwa ziwatawyky. Iwatsahi asahi Sesus humo sispirikporētsa inahyrižikponaha myhyrinymyrētsa.

²¹ Mybarawy ezektsa Adāo isopyksapybyita nikara iwatsahi tsinahyrikosokdakanaha. Iwatsa mybarawy ezektsa Sesus Kiristu humo mynahyrižikponaha atahi imysapyrēnikita my.

²² Katsaktu Adāo iknyktsa iwatsahi tsimyhyrikosokdanaha. Aba Sesus Kiristu humo myspirikporētsa myzubarētsa tsinahyrižikponaha hỹ.

²³⁻²⁷ Katsa Sesus humo Deus okzeka wasanitsa tsimaha. Tapara Kiristu zihyrižikpozo. Hawa eze Kiristu myziksizoze ituktsa mynahyrižikponaha. Asaktsa Kiristu humo sispirikporētsa asahi mynahyrižikponaha.

Kiristu abazubata mozik. Kytsa sizubarētsa iharere bo zuba hỹ mykarānaha. Deus sukyrytsitsa sizubarētsa sizikwy humo pepyk hỹ. Iwaze Kiristu harere bo zuba myzubarētsa hỹ mykarānaha. Isukyrytsa ziharawy babata pepyk. Abaka tsimyhyrikosokdanaha humo mypybyrētsa mysukyrytsa watsa my. Anahi mopyk. Sizubarētsa Kiristu harere bo zuba hỹ mykarānahaze batu mywahi zikyrikosokdanaha iwatsahi batu mypyby. Deus harere papeu humo botu ziwatahaka.

– Deus sizubarētsa sizikwy humo nepykbaik, Kiristu harere bo zuba kytsa hỹ mykarānaha. Izikwy zuba ba zikpyk – niy. Kiristu abazubata. Asahi Deus batu siakparawy sizikwy ty nepykbaik. Simygzotsa sizubarētsa siharere humo nepykbaik. Hyrikoso sapybara harere humo zipykbaik. Sipaikwy siharere humo nepykbaik. Batu aty tohi siharere bo

yh̄y mykaranaha. Deus harere bo zuba hȳy mykaranaha. Kiristu ituktsa pe my:

– Abaka ikiahatsa Deus tyryktsa tsimoziknaha. Katarabajawy nepykba – my. Iwa myh̄y.

²⁸ Myzubarētsa Kiristu harere bo hȳy mykaranahaze Kiristu kino Deus harere bo hȳy mykara. Kiristu tihi:

– O kazo ikia hi kytsa myzubarētsa azikwy humo kaharere bo hȳy mykaranaha. Abaka uta kino aharene bo hȳy mykara – my. Iwaze Deus abazubata my. Mybarawy ezektsa, bijoikpe ezektsa niwatihi atsaesubaha iharene bo zuba hȳy mykaranaha, tahawahi iharene bo hȳy mykaranaha. Deus hi mykzotsa babata mozik.

²⁹ Wastuhu ahatuk sisopyk maha. Asaktsa Sesus humo sispirikporētsa siharasusuhubiytsa tu nihyrikosokdanaha iwatsahi ikiahatsa siakbatsa tsyhyryze tsikaharasusunaha. Deus siakbatsa isty hyrizikpozo byizeka iwaze batu tsimaha. Motsasokonahaze Deus siakbatsa ba ziknasyhyrizikpowy mybarapetu mykaranaha. Ana harere bo yh̄y mykaranaha zeka amy humo sa siakbatsa tsyhyryze tsikaharasusukunaha.

³⁰ Katsa ja, myzibytuhukutu asiba nimyabanaha tsikyrikosokdanaha. Kytsa mymysukyrykynaha mymybeze tsihikiknaha Deus siakbatsa isty hyrizikpozo byizeka anawaze batu tsimyzurukunaha. Deus hi siakbatsa inasyhyrizikpowy.

³¹ Ikiahatsa Sesus tuk isopykwy tu tsimykaranaha iharene bo hȳy tsimykaranaha ana humo hi kakurēta. Iwaze katukytsa pibytuhukutu asiba ikyrikosokda. Katsaktsa Sesus Kiristu ihyrizikpowy soho tsimytsasokonaha ana humo hi kytsa mymysukyrykynaha ana kino my.

³² Anaeze Epeso eze asiba zikbezenaha. Kytsa asaktsa siererētsa zihudidukunaha asa hi asiba zikbezenaha. Kasukyrytsa parini watsa zikapikiknaha niy. Asaktsa sispirikpobyitsa tihi:

– Abaka tsipadisahanaha. Tsipikunaha zuba. Tozeka ja byiri tsimyyhyrikosokdanaha – maha. Iwa mykaranaha. Deus siakbatsa isty hyrizikpowyzo byizeka ana kino wasani my.

³³ Ikiahatsa tu ba zikahaspikbatanaha. Simysapybyitsa tuk mozurukunaha zeka ikiahatsa kino niwatihi siwatsa tsimyzurukunaha.

³⁴ Hawa Deus mykara ahahyrinymyry byitsa tu. Ana ty hi mot-saso kaharene humo ahasikpybyrētsa tsimoziknaha. Ahamysapybyity tsikykaranaha ka tsimoewynahaktsa! Wasani tahaktsa! Mytsaty mytsaty byitaha!

Mynahyryzikpo nahaze sa mynury ezytyk mozik.

³⁵ Iwaze aty kape my:

– Deus hawa sa siakbatsa mynasyhyrizikpo sinury ezytyk hawa sa my – nikara.

³⁶ Ikiahatsa ahasopyksapybyitsa. Mynury batu atsa tu maha meky watu moziknaha. Siriktsa wa meky watu moziknaha. Mytsuhuk bo riktsa mysipariknahaze tawatsa. Deus humo meky watu mozik kyze mozipobainahaze wiharawaha tsimoziknaha.

³⁷ Wihara ba zikparikiknaha riktsa zuba mysiparikik. Ahostsa ja mysiparikiknaha. Mekiwa tu siriktsa sizubarētsa mysipariknaha.

³⁸ Deus humo zuba siriktsa mozipobanaha, atahi riktsa mysipykwykyk. Iwaze wihara moziknaha ihumo hi mozipobainaha, iwaze wihara myzyk. Iwatsa tsimyyhyrikosokdanahaze mynury meky watu mozik iriktsa watsa maha.

³⁹ Abazubatsa sispitu maha batu estuba zuba. Myzohotsa meky meky watu maha. Kytsani estuba my. Sasabyitsa meky meky watu maha. Sissarakatsa meky meky watu maha. Piknutsa kino meky meky watu maha.

⁴⁰ Iwaze bijoboktsa rikatsa niwatihi. Asahi sisapyrētsa. Wytyk eze tu siharatsa asa kino niwatihi sisapyrētsa. Ana kino ba meky watu maha. Bijo ezektsa mekywa tu maha. Nanabyi tisapyrēna.

⁴¹ Bijoikpe ezektsa soho my. Haramwe karikpu karikpukrēta wytyk bo myzirikazowyky. Byzoje karikpu karikpukrēta wytyk bo myzirikazowyky. Byzoje karikpu karikpu niwatihi mekywa tu. Byrisoiktsa kino niwatihi sikarikpukarikpurētsa mekywa tu. Byrisoiktsa meky meky watu maha.

⁴² Siwatsa Deus siakbatsa mynasyhyrizikpowyze sinury meky watu moziknaha. Kytsa mymyhoroknahaze mynury mobibibaik. Deus mynahyryzikpowyze tawahi ba zikbibizo.

⁴³ Kytsa mymyhoroknahaze mypaikbyrinaha. Deus mynasyhyrizikpowyze mysapyrētsa tsimoziknaha. Mypunihikrētsa tsimoziknaha.

⁴⁴ Myhyrikosokdanahaze kytsa mynury mytsahoroknaha. Katsa mybarawy ezektsa mynury mysuk wa. Deus mynasyhyrizikpowyze meky watu tsimyziknaha. Deus hyrikoso humo myhyrizikararawy mynury ezytyk bo tasapy. Mybarawy ezektsa tu mynury mohyrikosokdanaha. Deus mynasyhyrizikpowy myhyrizikararawy mekywa tu tawahi tsimaha, ana humo kino Deus hyrikoso humo mybo nyny my.

⁴⁵ Deus harere papeu humo iwatahaha:

– Deus taparakta Adão inarokota Deus nizukni. Atakta wytyk tyty nizukni – niy. Iwaze usta izumu Kiristu inarokota. Atahi koikny baktatu my. Ata humo hi abazubatsa kytsa wytykyryk sihyrytsa iwatsa sispitu maha.

⁴⁶ Tapara mynury mybarawy ezektsa nury maha. Iwaze Deus hyrikoso humo ustsā nury ty mybo nyny my. Ana humo ka ba zikarazonaha.

⁴⁷ Deus Adão taparakta wytyk tyty nizukni. Usta bijoikpe iknykta tu inasik mybarawy ezektsa bo niy Sesus Kiristu inarokota.

⁴⁸ Katsa mybarawy ezektsa mynury taparakta Adão watsa. Mynury wytyk suknihi maha. Kytsa Sesus Kiristu harere bo hyŷ mykaranaha asaktsa meky watu sinury maha. Myhyrikosokdanahaze bijoikpe iknykta nury wata, Sesus Kiristu watsa sinury ezytyk myziknaha.

Hawa Sesus tuktsa tahawahi Deus tuk mynapykyryknaha.

⁴⁹ Abaka mynury Adão nury watsa. Wytyk tyty nimysukni. Iwa Deus nimysukni. Aiba zuba katsa bijoikpe ezektsa watsa tsimoziknaha. Kiristu nury watsa tsimoziknaha atahi bijoikpe ikny inasikta.

⁵⁰ O katukytsa kamyhyrinymyrywy bo wabyziutaha! Myni myspu mynury iwa ha ba Deus tuk ziknapykyryk. Mobibibanaha ka, ba Deus tuk ziknapykyryk. Deus tyryktsa mysipehakaze iwaze batu aty tohi zikyrikosokda, iwatsahi ituk mywahi tsimynapykyryknaha.

⁵¹ Taparaka iktasobara ana hi ahabo motsasoko. Hawa eze Sesus myziksize wastuhu botu niakbakanaha ustsaktsa batu. Myzubarētsa Deus humo mekywa tu moziknaha. Ata humo hi atsoko mekywa tu tsimoziknaha.

⁵² Atsoko pyriā zuba mahaze kywa katsa Deus atsoko meky watu mymysuknizo. Bijoikpe ikny porawy wata ziharawy ty pypy myze atsoko mymysuknizo. Deus Sesus humo sispirikporētsa ziknakaranahatsa mynasyhyrizikpoze sinury ezytyk moziknaha. Sinury ba zikbibizo. Katsa kino niwatihi myspitutsa tsimypykyryknahatsa porawy pypy myze meky watu tsimoziknaha. Mynury Deus humo ezytyk mozikzo.

⁵³ Mybarawy ezektsa myokbanahaze sinury mobibibanaha. Deus hi kytsa Sesus humo sispirikporētsa ziknakaranahatsa sinury ezytyk mozikzo Deus mymysuknizo, bijoikpe ezekta wata ba zikykbazonaha ba zikbibinaha mywahi ituk tsinapykyryknaha.

⁵⁴ Tubabatu Deus harere papeu humo iwatahaha:

– Myzubarētsa Deus harere bo hỹ tsimykarannahaze myhyrikosokdawy mohokda – niy.

Deus hi mybarawy ezektsa Sesus humo sispirikporētsa ziknakaranahatsa asaktsa sinury nibibinahatsa meky watu maha aba kino ana iwatahaha atsatu my.

⁵⁵ Iwaze mora naha pokso ja ahapyby byihu!

Myhyrikosokdawy Deus zipykwy atahi mynamyhyrizikpowy iwaze mypybybyitsa zika ba sinini zikaha.

Sinini ykarawy bo ba zikmysapynaha zikaha.

Iwa myhyrikosokdawy mohokda.

⁵⁶ Mysapybyiriwy humo hi tsimyhyrikosokdanaha. Deus harere mymywatawyky hawa ikiahatsa mysapybyi ty tsimykarannahaze Deus Sesus humo mymyokzohik.

⁵⁷ Ihumo tsimypunihikrētsa tsimoziknaha. Tsimyhyrikosokdanaha pokso ja ba ahapyby. Kiristu harere bo zuba hỹ tynakaranaha. Katsa hi:

– O Deus myzo Sesus Kiristu humo ka mykurētsa. Ata myhumo tsimypokzitsiukrēta – tsimaha.

⁵⁸ Iwatahi utakta ahape my:

– O katukytsa ahahumo kamypokzitsiarēta h̃y. Ana humo hi ahakubyrisorokuja! Batu paikpa mytsaty tsimaha. Ahatarabajawy humo Deus pahapehaze ana humo hi tarabajaziutahaktsa! Deus tarabajawy kytsa mysihyrinomyry wata. Tarabajaziu tsimykarannahaze zeka izikwy humo ahahyrinomyrētsa. Ahasopykziurētsa tsimoziknaha, Deus hi ahape “O kytsa tsipisapykynaha” – my.

16

Korītio ezektsa okyrysaro Sudeja ezektsa sinamybyikitsa bo nyny maha.

¹ Abaka okyrysaro soho humo pahahyrinomyry. Kytsa tarabaja maha humo okyrysaro ty ahabo nyny maha zeka, ana ty hi tsapukte buruk metutu tsimaha iwaha tapery! Deus tyryktsa pokzi ahaokyrysaro tsipiperykynaha. Asaktsa Sudeja ezektsa sinamybyitsa bo nyny tsimaha. Karasia ezektsa asaktsa Sesus humo sispirikporētsa botu sibo iktsaso.

² Domiko eze tsimynazuzuknahaze watu ahaokyrysaro ty tyzinynyknaha. Iwa tsipiperykynaha ahabo mynakozoreze ba ziktsasonaha. Iwa tsimaha zeka ba:

– O Pauro mozumuku myokyrysaro ty zozotahaktsa – ba zikaha. Wastuhu ahatuk okyrysaro tsizubarēna, asahi okyrysaro tsizubarēna ty nyny maha. Utsa ahatuk okyrysaro tsikaeni zuba zeka asaktsa okyrysaro tsikaeni zuba nyny maha.

³ Mynakozoreze kytsa Serusarēhe bo ahatsyhyryze mysipeha. Asahi mysiwatawynaha sibo papeu ty nyny my, ahawatawyhytsa soho piwataha. Kyze ahaokyrysaro kapapeu kino niwatihi pipeha Sudeja taparaktsa bo asahi Serusarēhe eze tu maha.

⁴ Wasani my zeka uta kino niwatihi situk Serusarēhe bo mokuru.

Pauro Korītio ezektsa bo mynakozore mykara eze tu.

⁵ Iwaze ahabo mynakozore. Tapara Masedonia buruk my, anaezeka ba ziktare piharamu zuba.

⁶ Ahabaze pyk my zeka. Aidy zikybyita kahyrizikwatu my. Hyritsik my-nawōze eze tozeka ja ahabaze motare. Iwaze tsipiktsumuēhīnaha moparak-zoze ahanamy ty kabo nyny tsimaha iwaha humo tsipiktsumuēhīnaha. Iwa Deus my zeka yh̄y my.

⁷ Ahabo mynakozore ahabaze pykare my.

⁸ Abaka Epeso eze mopykyryk. Pētekoste mymyikaha bo my. Bykyze zuba ikiahatsa bo moparak.

⁹ Anaeze kytsa sizubarētsa mysihyrinymyryky. Sizubarētsa Deus wasania ty ziwabytokonaha. Utsa batu. Kaharere humo tahakyrikinaha. Sizubarētsa pikyknikinaha. Pikmyijakanaha iwatazuze sizubarētsa Sesus harere bo hȳy mykaranaha.

¹⁰ Kyze Timoteo kaharaze ahabo pomoze ahapokso ba ziktapyby! Kawata Deus tarabajawy humo pahahyrinymyryky iwaze tsipokzitsinahaktsa!

¹¹ Atahi mykyryburukta ihumo awatutaha. Mytsy myziksi naha taperyky. Iwatsahi tsitsumuēhī ihumo ahamypokzitsihu ahanamy ty ibo nynyntaha iwaze taokara humo tybyizuba ziu.

¹² Aba Aporo soho. Motsasoikik ipe:

– O katsy ikia niwatihi kytsa tuk Korītio ezektsa bo tsimy – my. Atahi:

– Korītio ezektsa bo ka aba nurūtuka. Ba zikparak aibani zuba mynakozore. Tapara Epeso humo pepykze tu – niy.

Kaharere pepykyk.

¹³ Kapehawy bo hȳy tahaktsa. Iwaze ahapunihiktsaktsa! Sesus humo ahaspirikporētsa Deus harere bo zuba pykyhytu hȳy tsimykarana.

¹⁴ Tyharape pokzitsikinahaktsa!

¹⁵ O katukytsa Estepanus soho my. Estepanus tuktsa tsiksinyaha. Keresia ezekta atahi tapara anaeze Sesus humo tspirikporēta. Atatukytsa niwatihi Deus tyryktsa nisitsumuēhī ziknakaranaha.

¹⁶ Siharere bo yh̄y tsimykarana tyharapetsumuēhīnaha. Asaktsa Sesus humo tarabaja mykaranaha tsysitsumuēhīnahaktsa!

¹⁷ Estepanus, Fortunatus, Akaikus iwa ahatsa kabo zumunahaze, sihumo kakurēta ikykara. Ikiahatsa nokponitsa tu tsimaha asaktsa ahatsyhyryze ziktsumuēhīnaha.

¹⁸ Asahi pikykusukniwykynaha. Botu sihumo ahakurētsa abaka pikykusukniwykynaha. Kaokzeka wasanitsa maha, ahaokze kino niwatihi simysapyrētsa. Myziksizonahaze siharere bo ma tsimaha. Iwa h̄y tsimaha.

¹⁹ Iwaze Asia ezektsa asahi Sesus humo sispirikporētsa ahamo sihyrizik-barētsa. Asaktsa katuk maha Akuiro, Perisira kino niwatihi Sesus humo sispirikporētsa siwahoro bo inazuzuknahaze asaktsa ahamo sihyrizik-barētsa. Deus pe maha:

– O Deus Korītio ezektsa tsysipywyky – nikaranaha.

²⁰ Mytukytsa sizubarētsa astsatu ahabo maha.

Tyhapeharapyryknahaktsa iwa tsipiwatawynaha ahamo ahamypokzitsirētsa tsimaha.

²¹ Atakta katsumuēhītsa tu kaharere ziwatahaka. Abaka uta katsyhyrytsa ty ahabo piwatahaka.

Uta Pauro ahabo piwatahaka papeu humo my, ikiahatsa humo kahyrizik-barēta.

²² – Aty mypehatsa iakparawy byizeka atahi sinini my – my. Kaharere niwatihi:

– *Maranatá* O mypehakatsa aidy tyziksizo – my.

²³Utahi:

– O Deus myzo Korītio ezektsa Sesus humo sispirikporētsa tysisapy-
wykykta – my.

²⁴– O katukytsa katsa myzubarētsa Sesus humo myspirikporētsa iwatahi
ahahumo kamypokzitsiukrēta – my. Iwa hỹ. Nawa zuba my.

Pauro

Pauro Korītio ezektsa bo ziwatahakazo

Wastuhu Korītio ezektsa Pauro ziwatahaka naha humo batu siakparawy. Iwatahi ziwatahakazo tahyrikosokdawy soho humo nisispirikpoko. Deus Pauro tuk ziknapykyrykta hi iwatsahi katsa kino niwatihi Deus soho humo tanymyryky.

¹ Uta Pauro, Sesus Kiristu ykzohota iwa hi Deus nizihikik. Ikiahatsa Korītio ezektsa bo piwataha. Asaktsa Deus tyryktsa, Akaija ezektsa bo niwatihi piwataha. Asahi Sesus harere bo hyŷ nikaranaha. Timoteo humo katsa mymypoکزsirsirētsa mytsy wata atahi katuk ahabo piwatahaka.

² Deus myzo Sesus Kiristu mypehakatsa iwaze sibo mopamykysokoze utakta:

– O myzo Korītio ezektsa tysipokzitsihikikta! Sibo tysisapywyky iwaze batu paikpa mytsaty mykaranaha sakurētsa mykaranaha – my. Iwa Deus bo ahatsyhyryze mopamykysoko.

Pauro Deus humo tsakurēta nikara.

³ Katsaktsa Deus bo tihiktsa:

– O Deus myzo ikia zuba tsamysapyrēta ikia hi mypehakatsa Sesus Kiristuzo. Ikia zuba myhumo tsamypokzitsiukrēta, iwatahi myzo babata – tsimaha.

⁴ Atahi sinini tsimykarannahaze mymytsumuēhī. Paikpa mytsaty tsimykarannahaze mymykuwyky. Deus hi:

– Pahatsumuēhī ikiahatsa niwatihi ustsā kytsa sinini mykarannahaze tysitsumuēhīnaha iwahi natatsihikik – iwa myhyrinymyrētsa Deus hi nymyhyrinymyryky.

⁵ Kiristu mytsyhyryze sinini nikara. Katsa kino niwatihi Sesus Kiristu humo tsikspirikpokonahaze ihumo sinini tsimykarannaha. Iwatsa tu sinini tsimykarannaha zeka atahi mymykuwyky. Iwatsahi ihumo mypunihikrētsa tsimoziknaha.

⁶ Tapara ahabo iktsasoko Deus nymytsumuēhīkī nawa Deus mymypsapuhyripyrywyky Kiristu mysapyzēky nihyrikosokda iwatsahi sinini ykarawy bo batu zikaha. Kytsa asaktsa Deus batu siakparawy mymysukyrykynaha. Mymysukyrykiknahaze Deus mymytsumuēhī atahi mymykuwyky ana humo kino ahahyrinymyrētsa.

⁷ Iwaze uta ahasoho humo kaspihikrēta. Ikiahatsa hi:

– Hawa Deus kytsa mysitsumuēhīkīkze iktsa tsimaha, iwatsahi asaktsa Deus batu siakparawy mymysukyrykynahaze Deus mymytsumuēhī, ihumo mypunihikrētsa tsimoziknaha iwahi ustsā kytsa mysitsumuēhīkī niwatihi – tsimaha.

⁸ Katsaktsa Asia eze tuze hawa tsihokdaharēna imysapybara ty mybo nikara. Anahi ahabo motsasoko iwaze tsinymyrykynaha. Kytsa nymyit-sapyriwykynaha. Sinini tsikykarannaha. Iwaze mypetu tsikykarannaha:

– O abahi katsa tsimyokbanahatsa watsa.

⁹ Ustsā kytsa mymybanaha bo – mytsaty tsikykarannaha. Iwa mytsaty ahabyitsa tu tsikaha. Batu mypunihik. Iwaze myspihikbyitsa tu tsimykarannaha. Iwaze Deus zuba mymytsumuēhī ana humo hi myhyrinymyrētsa. Ata zuba siakbatsa mynasihyryzikpowy. Iwaze sinini tsimykarannahaze batu mytsaty tsimykarannaha – O katsa mypunihikrētsa tsimaha – iwa batu mypetu mysopyk. Ihumo zuba mypunihikrētsa iwa Deus nymyhyrinymyryky.

¹⁰ Ata pokzi hi kytsa nimbakzyzykynahaze nimitysumuēhīkī iwatsahi tsik-waknaha. Iwaze katsaktsa:

– O atahi mymytsumuēhīekik iwaze ihumo myspirikporētsa – tsimykaranaha.

¹¹ Ikiahatsa niwatihi Deus bo mytsyhyryze tsimypamykysonahaktsa! Mytsyhyryze Deus bo tsimypamykysonahaze Deus mymytsumuēhīkī. Is-apyrēnikia ty mybo nyny my. Myhumo tsimypokzitsiukrēta iwaze kytsa ipe:

– O myzo Pauro tuktsa humo niwatihi sihumo tysipokzitsiki, ikia zuba tsamysapyrēta – maha. Iwa kytsa sizubarētsa Deus humo sakurētsa maha.

Pauro ta soho humo meky watu nikara.

¹² Iwaze mypetu mysopyk katsaktsa wasani tsimykaranaha, Deus humo wasani mysopyk. Ikiahatsa humo hi tsimypokzitsiukrētsa iwatsahi mykurētsa. Deus humo ahabo simypokzitsirētsa batu ahabo zuba tsikykaranaha. Deus mymytsumuēhīkī iwatsahi wasani tsimyzurukunaha ana humo hi mykurētsa.

¹³ Iwatsahi ahabo tsiwatahakanahaze ihokdahabara ty tsikykaranaha ipiktshibara ty zuba tsikykarana naha tsimyspirikponaha. Abaka iwa ape iky hỹ tozeka ja tsimyspirikpo

¹⁴ Ikiahatsa tsikaeni zuba mysoho humo tsinymyrynaha. Uta hi: – Aibani tsinymyrybabanahaze myhumo ahakurētsa – iwa mozihikik. Sesus Kiristu mypehakatsa myziksizozze myhumo ahakurētsa mywatsa ahahumo mykurētsa.

¹⁵⁻¹⁶ Niytahi utakta ahabo mytsaty ikykaraze iknakozore tsihikik Masedonia bo moparakze:

– O Masedonia bo moparakze Korītio ezeaktsa bo mynakozore. Myziksizozze niwatihi Korītio ezeaktsa bozo my. Nawa petok babaha sibo mynakozore iwatahi mysihyrinymyryze sakurētsa. Sudeja bo my zeka piktsumuēhīnaha – iwa mytsaty ikykara.

¹⁷ Anasoho ty ba ziky. Ana humo hi tsipiksapybyikinaha. Ahaokze ka – O Pauro hawa sa mykara batu ihyrinymyry. Batu ispirikpo batu imysapy – tsimaha. Iwa kasoho humo mytsaty tsimykaranaha.

¹⁸ Iwa batu ba my. Deus ba zikmyspihikbata, Deus ta wasape zuba mykara. Uta kino niwatihi batu mybarapetu kasopyk. Wasape mykara iwata wasani mykara. Deus ana humo hi tsihyrinymyrēta. Ikiahatsa batu tyso:

– O Pauro hawa motsaso zeka wasani ja mykara – Iwa batu tyso.

¹⁹ Utakta Deus wasania ty Sesus Kiristu soho ahabo iktsasoko. Timoteo, Siras ahatsa katuk Sesus Kiristu Deus tse babata ziknatsasoikiknaha. Hawaha isoho ty tsiktsasonaha wasani ana harere humo hi wasape my.

²⁰ Deus mype:

– Hawa tisapyrēna my pahasapywyky – my. Sesus Kiristu humo hi imysapyrēna ty mybo nyny my. Katsaktsa:

– Hawa haty Deus mybo nitsasoko atsatu wasani mykara. Iharere mybo tsizubarēna. Kiristu humo zuba iharere bo yhỹ mynakara. Iharere baba zuba. Iwa kytsa sizubarētsa bo tsimysasonaha. Iwatsahi kytsa hi: “O Deus tsamysapyrēta” – mykaranaha.

²¹ Deus hi mymytsumuēhīekik. Katsaktsa ikiahatsa kino niwatihi Kiristu tyryktsa tsimoziknaha ana humo hi nimywatawy.

²² Mynaro mynamy humo tsipiwatahanaha iwatsahi kytsa mynamy humo sihyrinymyrētsa. Iwatahi Deus hyrikoso mytuk mynapykyryk Deus tihi: – Asaktsa kahyrytsa – mykara. Deus hyrikoso mytuk mynapykyryk zeka iwaze usa isapyrēnikia ty mybo nyny my.

²³ Deus okze ahabo motsasoko. Iokpyrykytatu batu. Ikiahatsa bo mynako-zore zeka pahabetsakak. Pahabetsakak zeka ahasukatsihikrētsa tsimozik-naha. Iwatahi batu ahabo zuk.

²⁴ Ikiahatsa botu Sesus harere bo hyĩ tsimykarana. Katsaktsa batu ahapehatsitsa, tsipahatsumuēhĩ tsihikiknaha. Sesus harere bo hyĩ tsimykarana zeka ihumo ahaspirikporētsa ana humo hi tsipahatsumuēhikīnaha, iwatsahi ahakurētsa tsimoziknaha.

2

¹ Iwaze kapetu kasopyk:

– Tapara Korītio ezektsa kaharere humo batu siaku iwatahi batu mysibetsakzo – iky iwatahi batu ahabo zuk.

² Kaharere humo ahasukatsihikrētsa zeka batu aty tohi pikykuwyky. Ikiahatsa pahasuka tsihikikwyky ikiahatsa zuba tsipikykuwykynaha.

³ Iwatahi batu ahabo zikumu papeu humo iwatahaka, kawataha papeu humo ky zahabetsakak:

– Ahamysapybyitsa tu tsikykarana tsimoewynahaktsa! – iky. Ahabo pomoze katy sukatsihikbyri zeka ba zikumu. Tsiykykuwykynahaktsa kytsa! Kakurēta zeka ikiahatsa kino niwatihi ahakurētsa tsimoziknaha hỹ.

⁴ Ahahumo kasukatsihikrēta iwatahi papeu humo ahabo iwatahaka. Ahapokzi ikpuziuku. Ahapokzi paikpa mytsaty mykara. Anapapeu humo iwatahakaze ahasukatsihik byihuja ahaspirikpowy bete pahahyrinomyryky. Ahahumo kamypokzitsiarēta tu iwahi papeu humo iwatahaka.

Deus mymysapuhrypyrywyky.

⁵ Atakta ahatuk imysapybyita ziknakara ihumo batu kaku. Wastuhu ikiahatsa tuk ihumo ahasukatsihikrētsa. Niwazubaktsa! Isoho botu ahabo iwataha hawa ipe my zeka mymybetsakak iwa botu iwataha.

⁶ Kytsa sizubarētsa ahatuk zibetsakaknaha iwatahi batu zimyizo. Niwazubaktsa.

⁷ Abaka imysapybara ty ziknakara naha ty tsiokzohiknaha. Tsitsumuēhīnahaktsa! Atahi tisukatsihikrēta zeka tsiakuwykynahaktsa kytsa! Tisukatsihikrēta tu Deus imysapybara tu ziokzohik. Ikiahatsa kino niwatihi tsokzonahaktsa anaharere humo tsimyspirikpo zeka ana ty tsitsumuēhīnahaktsa. Iwa zeka iaku byita mozik.

⁸ Ibo tsipisapywykynahaze iwa ikiahatsa ihumo ahamypokzitsiukrētsa ana humo hi tsihyrinomyrēta.

⁹ Ahabo iwatahaze – Kaharere bo hyĩ tsimaha ja. Batu kanyhy – iky. Iwaze iwatahaka. Abaka kahyrinomyrēta. Iwatatuze batu ahabo kozoreze kaharere ty papeu humo iwatahaka ana humo hi tykarana.

¹⁰ Atakta imysapybyita ziknakara ihumo batu kaku. Ikiahatsa imysapybyita tu mykara tsipiokzohiknaha zeka uta kino niwatihi, imysapybara ty nikara piokzohik. Kiristu okzeka imysapybara ty piokzohik. Abaka katsa batu mysukatsihik. Wasani my.

¹¹ Satanas mymysapybyiriki iwa botu mytsaty mykara, katsaktsa mysapybyitsa tu tsimykarana ana humo kino mymymywyky. Iwa myzihik zeka myhyrinomyrētsa iwatsahi batu yhỹ tsimaha.

Pauro Toroade eze paikpa mytsaty nikara.

¹² Toroade bo ikzumuze Deus wasania ty Sesus Kiristu soho Toroade ezektsa bo iktsasoko. Hawa maku ziskezozekba buruhuwa babatu zipoba anawaha mypehatsa Kiristu zikpeha, Deus wasania ty Toroade ezektsa bo

motsaso. Anaeze Deus harere piwaby tsihikiknaha iwaze Deus wasania ty kytsa bo iktsaso.

¹³ Iwa zeka paikpa mytsaty ikykara. Titu katsy wata batu tyhobyk Toroadē eze. Iwaze Toroadē ekze ikparak. Masedonia bo ikukuru anaeze Titu paikpa ikziberiki.

Kiristu izikwyrēnikita.

¹⁴ Kytsa niwatsorokonahaze aty ipaikanikita ustsā kytsa nisioktyhyryknahatsa. Isukyrytsitsa sitsipa humo nisioktyhyryknaha. Ihudikhudikwy bo izumunahaze isukyrytsitsa iapik nisioktyhyryknaha. Sizubarētsa isukyrytsitsa bo iktsa nikaranaha. Anawahi Deus zikwy humo mypunihikrētsa tsimoziknaha, ihumo zuba katsaktsa ipaikanikita watsa tsimoziknaha. Iwatsahi kytsa sizubarētsa mybo iktsa mykaranahaze katsaktsa Kiristu tuktsa tihi hỹ ana humo hi sihyrinymyrētsa. Iwatsa nanabyitaba tsimykurunaha. Deus wasania ty tsimytsasokonaha. Wasaniha ty tsimytsasokonahaze jokmorēnikia waha my. Kytsa jokmorēnikia okmore waha iwa Deus mymypeha wasania ty jokmorēnikia waha my nanabyitaba jokmorē. Iwatsahi Deus pe:

– O Deus ikia zuba tsamysapyrēta – tsimaha.

¹⁵ Tubabatu Deus wahoro zubata eze ziknapamykysokonahatsa jokmorēnikia ty zikoroko iwaze zatata tisapyrēna jobo Deus bo nido. Ana zatata waha tsizubarēna ty nu nikaranaha. Iwata katsaktsa Kiristu harere bo zuba hyỹ tsimykaranaha ana bo hi kytsa sizubarētsa iktsa mykaranaha. Asaktsa simysapybyitsa nikaranaha sihumo Deus mysiokzohik mybo iktsa maha. Ustsaktsa sinini ykarawy bo mykaranaha asa kino niwatihi mybo iktsa mykaranaha. Iwa sizubarētsa mybo iktsa mykaranaha.

¹⁶ Simysapybyitsa sinini ykarawy bo sisapy, katsaktsa Kiristu tuktsa sihumo zatata nihyrikosokdata hōrō wata.

Ustsā simysapybyikitsa tu nikaranaha iwaze Deus mysiokzohik asa humo kino niwatihi katsa Kiristu tuktsa zatata jokmorēnikia wa iwaze mysiakuwyky. Batu aty tohi Kiristu harere kytsa bo mysihyrinymyryziuku. Atakta Deus zikwy zuba ituk motsasoziuku.

¹⁷ Ata zikwy hi mytuk mynapykyk iwatsahi Deus harere tsimytsasoziukunaha. Deus mype niy:

– Wasaniha ty kytsa sizubarētsa bo tytsasokonahaktsa! Kahyrikoso ahatuk mynapykyryk iwa kaharere tsimytsasoziunaha – niy. Katsaktsa kytsa humo batu mospihikbata. Ustsā kytsa okyrysaro humo zuba Deus wasania ty motsasokonaha, katsaktsa batu. Kiristu sopyk humo ma tsimykaranaha iwaze iokzeka tsimytsasokonaha mypubaraty tsimytsasoz-iukunaha.

3

Aibaky Deus harere.

¹ Asaktsa pahamyikinaha katsaktsa mahani siwatsabyitsa. Asahi:

– Hana bo sa papeu, haneze sa iwatahaha ikiahatsa wasani ahasopyk – maha. Katsaktsa mysapyrētsa ana humo hi ahahyrinymyrētsa. Papeu mysoho batu tsimyzihikiknaha. Ikiahatsa ustsā kytsa bo ty moso tsipiwatahakanaha batu tsimyzihikik.

² Ikiahatsa mypapeu waha tsimaha. Kytsa iwatahaha pinymyrykynahaze iwaze anaharere humo sihyrinymyrētsa. Kytsa sizubarētsa ahabo iktsa mykaranahaze asahi:

– O Korītio ezektsa wasani zikzurukunaha. Pauro wasani nisihyrinymyryky mahani tymyi tsimysapyrēta – maha. Iwa maha

ahamysapybara tsimoewynaha ana bo hi iktsa mykaranaha ana humo hi kahyrinymyrēta.

³ Ikiahatsa papeu waha tsimaha. Kiristu papeu humo ziwatahaka nahawa. Utakta karata papeu wata zikpeha zuba. Atahi iharapuktsaytsikwaka ty iwatahabara. Harahare ukpe humo iwatahabara. Deus hyrikoso ata humo hi zuba katsaktsa Kiristu sopykyryktsa tsimyzurukunaha, atahi ispitu mykara. Ata humo hi zuba tsimyharape pokzitsikinaha. Katsaktsa Deus wasania ty ahabo nitsasoko, ata humo hi zuba Sesus harere bo hyỹ tsimykaranaha. Iwatsahi ahamysapyrētsa tsimoziknaha ana ty hi kytsa sizubarētsa bo karata waha ty.

⁴ Deus okze myspirikporētsa. Kiristu harere bo hyỹ tsimykaranahaze kino ihumo zuba myspirikporētsa tsimoziknaha, iwatsahi wasaniha tsimytsasoz-iukunaha.

⁵ Deus myty tsumuēhĩ byizeka wasaniha kytsa bo ba ziktsaso. Deus zikwy humo zuba wasania ty tsimytsasokonaha.

⁶ Ata hi tazikwy ty mybo nyny niy. Nanabyitaba izikwy humo Deus harere wasania ty tsimytsasoz-iukunaha. Mybarawy ezektsa bo sizubarētsa ityryktsa mozihikik iwatahi mynamytsumuēhĩkĩ. Deus wasaniha iharere ezytyk my. Anaharere ty mybo nitsasoko. Anaharere humo wasani tsimykaranaha. Tsimyhyrikosokdanaha zeka iharere humo mywahi Deus tuk tsimynapykyknaha. Deus hyrikoso anaharere humo mymyhyrinymyryky. Deus harere, Moises bo nitsasoko ipehawy iwaze kytsa zuba Deus tuk tawahi ba ziknapykyknaha. Kytsa tahaharere humo wasani nizihikiknaha. Batu ba. Taha bo zuba mybarapetu mykaranaha. Tahaharere humo mohyrikosokdanahaze batu tawahi Deus tuk ziknapykyknaha. Deus wasania ty zuba mykara. Ihyrikoso mytuk ana harere mymyhyrinymyryky ana humo hi zuba mysapyrētsa tsimoziknaha.

⁷ Moises Deus harere ibyky mymyhyrinymyry hawa batu mysapy tsimaha. Anaharere haraharetsa siokpeziurētsa humo ziwatahaka. Deus imysapyrēnikita tu anaharere Moises bo nitsasokoze hawa tisapyrēna natakaha. Iwatahi Isareu tsekokatsa Moises ok bo batu iktsa zikaha. Tsioksapyrēta niyze iwatsahi kytsa ibo batu iktsa zikaha. Bykyze iok karipu karipuk ityhỹwy hana bo ja niy. Katsaktsa iharere bo batu hỹ tsimykaranaha zeka tsimyhyrikosokdanahaze Deus tuk mywahi ba ziknapykyknaha. Iharere mymyhyrinymyryky katsaktsa batu mysapy tsimaha.

⁸ Abaka Deus hyrikoso mytuk mynapykyryk anahi wasanikia. Ihyrikoso mytuk mynapykyk atahi isapyrēnikia.

⁹ Deus harere Moises bo nitsasoze anaharere tisapyrēna. Anaharere humo hi Deus mype niy:

– O hawaha ty tsikykaranaha batu imysapy my – nikara. Myhyrikosokdanahaze Deus tuk tahawahi ba ziknapykyknaha. Deus okzeka batu mysapy anaharere humo hi tisapyrēna. Abaka Deus harere ezytyk, wasania ty aba zubaha anaharere bo yhỹ tsimykaranaha zeka Deus okzeka mysapyrētsa tsimoziknaha.

¹⁰ Tapara Deus harere Moises bo nitsasokoze tisapyrēna bo iktsa niy. Abaka Deus harere ezytyk wasania ty anaharere hi aba zuba tisapyrēnikia ty. Hawa anaharere mymyhyrinymyrykynahaze Deus okzeka mysapyrētsa tsimoziknaha iwaze anaharere ezytyk isapyrēnikia ty my.

¹¹ Iharere taparaka tisapyrēna. Deus tihi:

– Anaharere humo yhỹspyk tsimykaranaha anahi mozihikik. Bykyze kaharere ezytyk motsasoko anatyhi ahawahi yhỹ tsimykaranahaktsa kytsa! – niy. Deus wasania ty zuba isapyhababa motsasoko.

¹² Iwaze katsaktsa mywahi Deus tuk tsinapykyryknaha ana hi taperyky. Deus mymysapywyikik ana humo hi myhyrinymyrētsa. Iwatsahi batu mysikpyby, batu ba Deus wasania ty kytsa sizubarētsa bo tsimyzihikiknaha.

¹³ Katsaktsa batu Moises watsa. Atahi panu ty taty hasasuk ziknakara. Isareu ezektsa iok karipu karipuk humo ky ityh̄wytsa hana bo ja iwatsahi ibo batu iktsa niaha.

¹⁴ Isareu ezektsa Moises sopykwy tsikaeni zuba zinymyryknaha. Deus harere humo tsikaeni zuba sihyrinomy. Maku wata atakta panu ty taty hasasuk niy. Abaka atsatu. Deus harere sihumo tsihokdaharēna iwatuze iharere taparaka zinymyryikiknaha anaharere humo batu sihyrinomyry. Kiristu zuba mysitsumuēh̄i iwaze asahi iharere bo hȳ mykaranaha zeka anaharere mypubara ty pinymyrybanaha.

¹⁵ Abaka Moises sopykwy pinymyrynahaze tsikaeni zuba sihyrinymyrētsa asahi maku watsa panu ty taty hasasuk hasasuk sisopyk.

¹⁶ Aty zeka:

– Sesus mypehakatsa harere bo hȳ tsimykarā kyze Deus harere ty tsinymyrybaba. Deus papeu humo: “Deus panu ty Moises harek humo ky zihaktahik” – niy. Isareu ezektsa niwatihi Deus harere bo yh̄ maha zeka Deus sipanu waha pihaktahik iwa iharere ty pinymyrybabanaha. Katsaktsa mysapybyitsa tu tsikykarāna Deus mymyokzohik. Kyze amy ty panu waha ty hasasuk ty Deus pihaktahik iwaze ihumo myspirikporētsa tsimoziknaha.

¹⁷ Ana waha mypehakatsa Deus hyrikoso kino niwatihi atsatu maha. Ata humo hi meky watu tsimoziknaha iwatsahi Deus tuk mywahi tsimynapykyryknaha. Iharere humo ahapybybyihu ja! Deus okzeka ihumo mysapyrētsa tsimoziknaha. Wasani tsimykarāna Deus wasaniha humo meky watu tsimoziknaha.

¹⁸ Katsaktsa botu Sesus mypehakatsa harere bo hȳ tsimykarāna. Katsaktsa batu kytsa watsa asaktsa panu ty taharek nasihareksukuknaha. Batu ba. Mypehakatsa hyrikoso humo mysapyrētsa tsimoziknaha. Sesus wata tsimoziknaha. Katsaktsa moknywy watsa tsimaha. Kytsa mybo iktsa mahaze Sesus mypehakatsa hyrikoso mytuk pinyknaha moknywy wata. Iwatsahi mysapyrētsa tsimoziknaha pibytuhukutu Sesus wata mysapytohitsa tsimoziknaha.

4

Deus isapyrēnikia ty mybo nyny my.

¹ Deus mymysapywyky iwaze tarabaja humo nimypeha. Tubabatu mype niy:

– Nanabyitaba wasania ty myzubarētsa bo paikpa tynatsasokonahaktsa – niy. Iwatsahi mykurētsa. Mytarabajawy humo ba mykubyri zikzumu.

² Hawa batu mysapy kytsa papatu tsipireknaha. Hawa tsimyzurukunaha wasani tsimykarāna iwatsahi batu mysikpyby. Deus okzeka wasani tsimykarāna ana humo hi kytsa sihyrinymyrētsa. Hawa batu imysapy tserekbaiknaha. Katsa ba ziksispihikbatanaha, Deus harere humo batu mysimi. Wasaniha ty zuba tsimykarāna. Deus harere mypubara ty zuba tsimysasoziukunaha iwaze kytsa mysoho motsasonaha:

– O asaktsa wasani motsasokonaha siharere wasape – mykaranaha.

³ Katsa Deus wasaniha humo tsiktsasoikiknaha. Anaharere kytsa bo tsihokdaharēna zeka asaktsa sinini ykarawy bo maha, sihumo hi myharere tsihokdaharēna.

⁴ Asaktsa Satanas hyrikoso sapybara pehatsa sibo mybarapetu mykara. Atakta mybarawy ezektsa Deus wata isopyk mozihikik. Ihumo hi imysapybyikia bo zuba mytsaty mykaranaha. Asahi sihyrizikubyitsa watsa. Unata pyrik mykaranahatsa watsa. Deus wasania ty okoro eze kywa. Hawa mozurukunaha sihyrinymyrētsa batu pyik pyik zikaha. Kiristu imysapyrēnikita myhyrinymyrētsa. Deus wasania ty ana ty hi nimyhyrinymyryky. Kiristu Deus wata, wasaniha humo myhyrinymyrētsa. Asaktsa sinini ykarawy bo maha ana humo hi batu sihyrinymyry. Deus wasaniha humo batu sihyrinymyry. Sesus harere bo hỹbyri nikaranaha iwatsahi batu sispirikpo.

⁵ Katsaktsa mypetu ba zikaha:

– O myharere bo hyỹ tsimahaktsa! – iwa ba zikaha. Katsa hi:

– O Sesus Kiristu harere bo zuba hyỹ tsimahaktsa kytsa! Ipe: “Iki-ahi aba zubata” tsimahaktsa! Iwa pykyhytutaha iharere humo zuba hyỹ tsimykaranaha – tsimaha. Katsa ja. Kiristu mymysapywyikik iwatsahi ihumo tsipahatsumuēhĩnaha. Ipokzi ahatsyhyryze tarabajaziu tsimykaranaha. Iwa hỹ.

⁶ Isuknihyize iwororo babyize Deus tihi:

– Okoro tu zik – niy. Atsoko okoro yzik niy. Atahi okoroze tu waha isapyrēnikia ty mybo piwatawy. Mymyhyrinymyry. – Kamysapyrēnikita. Kapunihikrēta – anatyhi mymyhyrinymyryky. Kiristu iwata, imysapyrēnikita Deus wata, iwaze isoho humo tsinymyrykynaha. Kiristu humo tsinymyrykynaha iwatsahi Deus humo niwatihi tsinymyrykynaha.

⁷ Katsaktsa Deus wasania ty tsiktsasoikiknaha. Deus pokzitsihity. Katsa mypunihikbyitsa tu Deus zikwy mytuk mynapykyryk, iwatsahi izikwy humo zuba wasania ty tsimynatsasoikiknaha. Katsaktsa morosuk watsa. Morosuk batu isapy batu ihudi iwatahi myboboro iwata tu amy ty ipokzitsiaty morosuk eze pok pok tsimaha. Deus iwatu nimysukni iwatahi kytsa myharere ty piwabykynahaze:

– O asaktsa batu sipunihik iwa motsasokonahaze Deus zikwy humo zuba hỹ – mykaranaha.

⁸ Kytsa mymyknikinahaze Sesus mymytsumuēhĩ. Paikpa mytsaty tsimykaranahaze Sesus humo tsimyspirikpokonaha.

⁹ Mysukyrytsitsa sizubarētsa. Myharereziuwytša kino niwatihi sizubarētsa. Mysukyrytsitsa mymysukyrykiknaha iwatsatu Deus ba zikmyrek.

¹⁰ Pibiyituhukutu mysukyrytsitsa mymyba tsihikiknaha iwaze katsaktsa:

– Sesus sukyrytsitsa zibezenaha anawahi mymybanaha – tsimaha. Sesus izikwy hi mytuk mynapykyk ana kino kytsa sizubarētsa mymytsatykynaha.

¹¹ Kytsa Sesus harere bo batu hỹ mykaranaha asaktsa mymyba tsihikiknahaze Deus mype:

– Ahasukyrytsitsa pahamyitsapyriwykynaha zeka kahyrikoso ahatuk mynapykyryk ihumo ahapunihikrētsa tsimoziknaha – niy. Iwatsahi kytsa sizubarētsa hi:

– O asaktsa Deus zikwy humo zuba sipunihikrētsa, ihyrikoso situk mynapykyryk – mykaranaha.

¹² Sesus Kiristu harere tsimytsasokonahaze asaktsa Sesus harere bo yhỹ ahabyitsa tu mymyba tsihikiknaha. Ikiahatsa myharere bo yhỹ tsimykaranaha hỹ iwaze tsimyhyrikosokdanaha zeka Deus tuk ahawahi tsinapykykynaha. Katsa sinini tsimykaranaha iwatsahi ikiahatsa Deus tuk ahawahi tsinapykyrykynaha.

¹³ Tubabatu Deus harere papeu humo ziwataha:

– Deus harere humo hyĩ ikykara iwatahi iharere soho iktsasoko – niy. Katsa niwatihi Deus harere bo hyĩ tsimykaranaha iwatsahi iharere kytsa bo tsimytsasokonaha.

¹⁴ Sesus Kiristu nihyrikosokdaze Deus hi zihyrizikpowy. Katsa niwatihi tsimyhyrikosokdanaha zeka Deus mynamyhyrizikpowy Kiristu wata. Katsakta ituk mywahi tsimynapykyknaha. Ikiahatsa kino niwatihi ituk ahawahi tsimynapykyknaha. Deus bo mymyoktyhyryk anaeze mywahi tsimynapykyknaha hỹ. Ana humo hi myhyrinymyrẽtsa tuze Deus wasania ty tsimytsasoikiknaha.

¹⁵ Katsakta Deus harere ahabo tsiktsasokonahaze sinini tsikykaranaha. Ana bo hi iktsa tsikykaranaha. Iwatsahi Deus pahasapywyky iwatsahi sizubarẽtsa ahatuk Deus tyryktsa moziknaha. Iwaze kytsa sizubarẽtsa Deus bo nipamykysokonaha:

– O Deus myzo ikia zuba amysapyrẽnikita. Mybo tsipisapywyky iwatsahi katsakta ahumo ka mykurẽtsa – tsimykaranaha. Iwaze kytsa sizubarẽtsa Deus zuba imysapyrẽnikita sihyrinymyrẽtsa hỹ.

Sesus humo sispirikporẽtsa.

¹⁶ Iwatsahi batu mysukatsihik. Mynury humo batu mypaik tsimytsaikbanaha katsakta mypunihikrẽtsa tsimoziknaha hỹ. Deus hyrikoso mytukze iwaze Sesus harere humo zuba tsimyspirikpokonaha. Myzibytuhukutu izikwy humo meky watu tsimoziknaha.

¹⁷ Asakta Sesus harere bo yhyĩ ahabyitsa mymyknikinaha. Pahamyit-sapyriwykynaha aibani simysapybyitsa tu nikaranaha nepyknaha. Ana humo hi sininispik tynakaranaha. Bykyzehu Deus mybo pisapywyky. Katsakta iwa tsimoziknaha mysapyrẽtsa hỹ. Niwazubaktsa! Ana kino tawahi tsimynapykyknaha hỹ.

¹⁸ Iwatsahi hawa ha ty iktsaziu tsimykaranaha ana soho bo mytsaty mytsaty byitaha. Aibani mynapyk mopyk naha bo ka mytsaty mytsaty byitaha. Zikozonahabara bo hi mytsaty tsimykaranaha. Hawa Deus tuk mywahi tsimynapykyryknaha ana soho humo hi mytsaty tsimykaranaha. Amy bo iktsa tsimykaranaha bykyze hana bo ja. Amy bo batu iktsa tsimaha atatu tawahi mynapykyk. Iwa hỹ.

5

¹ Mynury myparik waha. Kaparik eze mopykyrykspyk bykyze mopykbaik iwahatu aba zuba atatu tsimaha, bykyze tsimyhyrikosokdanahaze mynury mobibiba. Tsimyhyrikosokdanahaze mynury wytyk eze tu motare. Deus hi ustsá nury ezytyk mysisukni mytsyhyryze pikymy. Bijoikpe eze mynury ezytyk mozokni anaka mywahoro waha tahawahi mynapykyknaha.

² Abaka mynury ezytyk humo botu myhyrizikbarẽtsa. Iwatsahi mynury bijoikpe eze tu taperyky. Ana hi tsimyzihikiknaha.

³ Anaeze bijoikpe eze tu mysuk wa tsimynapykyknaha. Mynury ezytyk mysuk wata maha.

⁴ Katsakta mybarawy ezektsa sinini tsimykaranaha. Mytsapyrẽtsa tsimaha. Kytsa tahaparik eze tu watsa, katsakta mynury eze tu tsimaha. Myhyrikosokdabyize mynury ezytyk zuba tsimyzihikiknaha hỹ. Deus mynury ezytyk ty mybo nyny myze mywahi ituk tsimynapykyknaha, ba zikyrikosokdazonaha iwa tsimyzurukunaha.

⁵ Deus hi mekywaha botu mymysapy naha humo hi nimysukni, ihyrikoso mytuk mynapykyryk ana kino mozihikik. Iwaze Deus usa nury ezytyk myhumo mokymy mytuk mynapykyryk ana hi tsipinymyrykynaha.

⁶ Iwatsahi mypunihikrētsa. Mybarawy eze tuze mynury tuk mypehatsa metutu tsimaha. Aibani zuba mywahi ituk tsinapykyryknaha ana humo hi mykurētsa.

⁷ Iharere bo hyĩ tsimykarana i watsahi ana hi taperyky. Ana humo hi batu iktsa tsimaha iharere bo hyĩ tsimykarana zuba. Sesus sopyk ty tsimyzurukunaha i watsahi ihumo myspirikporētsa tsimoziknaha.

⁸ Iwatsahi mykurētsa. Hawa ituk mywahi tsinapykyknaha mytsaty tsimykarana haze hi mykurētsa. Iwatsahi mynury tahaerek tsihikik.

⁹ Amy ty aba zuba Sesus myhumo tsakurēta mozik. Katsakta mynury suk eze tu myhumo tsakurēta tsimyzihikiknaha. Katsakta ituk mywahi tsinapykyknahaze myhumo tsakurēta mozik, iwa tsimyzihikiknaha.

¹⁰ Myzubarētsa Kiristu okeryk tsinamykahanaha. Hawa tsikykarana humo motsaso. Kiristu simysapyrētsa pe my: – Ikiahatsa mybarawy eze tuze tsikzisapykynaha hỹ. Iwaze isapyrēnikia ty ahahuak ty ahabo nyny – my. Kyze simysapybyitsa pe:

– Ikiahatsa mybarawy eze tuze ahamysapybyitsa tsikykarana. Iwa imysapybyiha ty ahabo ahahuak ty nyny my pahasininiwyky – my. Iwa hỹ.

Hawa Deus harereziuwytša tsimoziknaha.

¹¹ Kyze mypehatsa Sesus Kiristu tsazuba nakarata humo myhyrinyrētsa, ihumo ma tsimykarana zuba, ipokzi batu mysukatsihik. Atahi myhuak ty mybo nyny my mytsaty tsimykarana. Iwahu tu itsyhyryze tarabajaziu tsimykarana. Deus wasania ty Sesus soho tsimytsasokonaha iwaze kytsa iharere bo hyĩ mykarana. Tsimytsasokonahaze wasape mysopyk, wasaniha zuba kytsa mysihyrinyrinykynaha, Deus ana humo kino zinymyry. Ikiahatsa myhumo tsinymyrybabanaha.

¹² Ikiahatsa mysoho humo batu mymybetesazo. Ahape batu tysozo. – Katsa tsipahasapywykynaha i watsahi mybo hyĩ tsimykarana haktša! – my. Iwa batu tyso. Ikiahatsa myhumo ahakurētsa ana hi tsimyzihikiknaha. Wastuhu kytsa ahabo zumunaha asakta mymysapybyrikinahatsitsa. Siokzeka simysapyrētsa watsa maha amy ty ape bo zuba iktsa sisopyk. Asakta mektsatu maha batu sisopyksapy. Hawa tsimyzurukunaha wasani my, ana soho humo hi tsimymybetesana.

¹³ Tozeka ja katsakta ahaokze ka mytyrykmyitsa watsa. Katsakta Sesus pokzi tarabajaziu tsikykarana ana humo hi ahaokze ka mytyrykmyitsa mytsaty tsimykarana. Zimynahabyitsa tu zeka tsipahatsumuēhīnaha ana humo hi tsimyzurukunaha ana kino tsipinymyrykynaha iwaze ahatsyhyryze tarabajaziu tsimykarana.

¹⁴ Kiristu myhumo tsimypokzitsiarēta. Anaty kino kytsa sizubarētsa tysitsumuēhīnaha. Mytsatyziu tsimaha zeka maku estuba zuba mybarawy ezektsa sapyzky nihyrikosokda. Iwatsahi mybarawy ezektsa Sesus tuk tsimyhrikosokdanaha.

¹⁵ Mysapyzky nihyrikosokda i watsahi hawa ha tsimyzihikiknaha batu hỹ tsimykarana haze. Niwazuba mysapyzky nihyrikosokda i watsahi ana hi mozihikik ana bo hi hyĩ tsimykarana. Atahi mysapyzky inahyrikipo iwatahi ana hi mozihikik ana bo hi hyĩ tsimykarana iwa tsimyzurukunaha.

¹⁶ Abaka mybarawy ezektsa watsa batu mytsaty tsimykarana. Mypetu mysopyk:

– O atakta tsimysapyrēta wata – tsimaha.

– O ustakta imysapybyita wata my – iwa mytsaty byitaha! Tapara Kiristu soho nawa mytsaty tsikykarana abaka batu. Tsizakbatana zuba zeka

Kiristu mymyhyrinymyryky. Sesus Kiristu humo myspirikporētsa tuze kytsa ezytyk watsa tsimoziknaha.

¹⁷ Kiristu tuk tsinapykyknahaze meky watu tsimoziknaha. Deus mymysuknizo tawa iwatsahi ihumo meky watu tsimoziknaha. Hawa tapara tsikzurukunaha batu imysapy abaka mahani. Iwaha hi nepykbaik katsa meky watu tsimoziknaha.

¹⁸ Iwatsahi meky watu tsikyzyknaha. Deus humo zuba katsa meky watu tsimoziknaha, Deus hi nimysuknizo Kiristu mysapyzekenihyrikosokda naha humo katsakta meky watu tsimoziknaha. Tubabatu katsakta Deus humo batu mykparawy taparaka ihumo tsikmykyrikinaha. Abaka mahani. Ata humo hi abaka ahaharereziuwyt tsimoziknaha iwaze Deus mype niy:

– Utsa kytsa boktsa! – tsimaha. – Kytsa bo tsimytsasonaha kahumo hi kaharereziuwyt moziknaha, ahaokani byihuja tsimaha – Deus niy.

¹⁹ Kytsa sizubarētsa simysapybyitsa ty nikaranaha ana soho Deus bo ka batu mytsaty nikara. Kytsa simysapybyitsa ty nikaranaha Kiristu sisapyzekenihyrikosokda. Kiristu nihyrikosokdaze simysapybyitsa tu nikaranaha sihuak ziaксе. Iwatsahi ispe tsimaha:

– Sesus harere humo hȳ tsimykaranaha zeka Deus harereziuwyt tsimoziknaha. Kiristu ahasapyzekenihyrikosokda iwaze Deus ahamysapybyitsa tsikykaranaha ihumo zahaokzo – tsimaha. Sesus Kiristu mypehakatsa, iwatsahi iharere kytsa bo tsimytsasonaha.

²⁰ Iwatsahi Deus ykzohotsa tsimaha. Deus harere zuba ahabo tsimyt-sasokonaha. Katsa hi:

– Deus harereziuwyt tsimoziknaha ana hi mozhikik. Deus myzo ahasopyktsa – tsimaha. Deus hi mybarawy eze tu zeka atsatu ahabo motsasoko, katsakta iakzohotsa tsimaha.

²¹ Kiristu batu imyi ana humo hi ahahyrinymyrētsa. Katsa mysapybara ty ana hi Kiristu ziaксеhyryk niy. Nihyrikosokdaze mysapybara huak ty ziaксе niy. Iwaze mysapybyitsa ty tsikykaranaha Deus mymyokzohik abaka hana bo ja. Iwatsahi katsakta Kiristu tuk tsimyzurukunaha zeka isopyk watu tsimykaranaha iwatsahi Deus okzeka mysapyrētsa tsimoziknaha. Katsa meky watu tsimoziknaha. Iwa h̄y.

6

¹ Kyze katsakta Deus tuk tarabajaziu tsimykaranaha iwaze mypehawyt hi:

– Tapara Deus zahasapywyky, isapyrēnikia ty ahabo nyny niy ana humo kino ahaspiriktsokdaha byihuja! Deus harere bo hȳ tahakta iwatsahi isapyrēnikia ty arek arek byitaha ja! – tsikaha.

² Deus harere tsiwabytoktonaha! Deus hi:

– Zahasapywy tsihikikze amy kabo tsikzapykykynaha botu iwaby.

Ikiahatsa kabo ahasapybyitsa tsikykaranaha katse humo pahaokzohik.

Iwa zahatsumuēh̄i tsihikik – niy.

Abaka Deus pahasapywy tsihikik, abaka pahatsumuēh̄i tsihikik.

³ Wasani tsimyzurukunaha iwatsahi kytsa Sesus harere bo hȳ mozhikiknaha. Hawa batu imysapy tsimykaranaha zeka kytsa tihi:

– O Deus tsumuēh̄itsitsa batu wasani mykaranaha iwatsahi katsakta Sesus harere bo batu h̄y zikaha – mykaranaha. Nawa kytsa mysoho ba ziktsasonaha, batu zikaha, wasani tsimykaranaha.

⁴ Katsa hi Deus tsumuēh̄itsitsa tsimaha, ana kino usts bo tawatawykynaha. Asakta Sesus harere bo hȳ ahabyitsa tu mymyknikinaha. Katsakta

sihumo mykubyrisorokrētsa. Mymysukyryikiknaha, mykubyritywy kino niwatihi iwatsa tu mykubyrisorokrētsa.

⁵ Asahi nimykinaha nymyhuruknaha. Katsa tsiknazuzuknahaze nymysapybyrikinaha. Nymyhudizukunaha. Deus humo tsizubarēna ty tarabaja ba zikpyk, myrapa tsiykyknaha, mytutsa tsiykyknaha iwa tsikzurukunaha.

⁶ Iwaze ustsā kytsa mysoho zinymyrykynaha. Katsaktsa Deus tsumuēhītsa sihyrinymyrētsa. Wasani tsimyzurukunaha ana humo hi katsa Deus tsumuēhītsa zinymyrykynaha. Mysapyrētsa. Deus harere humo myhyrinymyrētsa iwatsahi iharere tsimytsasoziukunaha. Mykubyrisorokrētsa. Mysopykziurētsa. Deus hyrikoso mytuk mynapykyryk iwatsahi kytsa tsiksisapywykynaha. Tsiksipehapokzitsikinaha.

⁷ Deus harere zuba tsimytsasoziukunaha, Deus zikwy mytuk mynapykyryk. Wasani tsimyzurukunahatsa hi ana humo mybototsa watsa tsimaha. Mybototsa ty papyk papyk tsimaha mymybetesawya naha ziktsa watsa namybetesakanaha. Kytsa Sesus bo hyŷ ahabyitsa tu myhumo natahakyrikinaha. Mysapyrētsa tu Deus hyrikoso humo iwaze batu myharerewabymybara batu zikaha.

⁸ Wastuhu kytsa mysoho humo siharereziurētsa. Utsaktsa batu, mysoho humo batu siharereziu mymysapybyrikinaha. Mektsatu kytsa tihi:

– O Pauro tuktsa simysapyrētsa – maha. Ustsā:

– O Pauro tuktsa batu mykparawy – maha. Iwa my. Katsaktsa wasani tsimykarahaze batu isty myi, amy ty wasanikia ty zuba tsimytsasokonaha. Iwaze kytsa mysoho – asaktsa sispihikbataktsa – maha.

⁹ Kytsa nyhybyitsa watsa sisopyk. Utsaktsa mynyhytsa tihi hŷ maha. Wastuhu kytsa:

– Pauro tuktsa botu niakbabanaha – maha. Katsaktsa myspitu tsimaha. Kytsa mymyzuhunahaze ba zikmybanaha.

¹⁰ Kytsa ziknamykubyikinaha iwatsatu Deus humo mykurētsa tsimynapykyknaha. Kytsa tihi – asaktsa sinamybyitsa – maha. Katsaktsa Deus wasania ty tsimytsasokonahaze isapyrēnikia ty kytsa bo nyny tsimykarahaha, ikiahatsa niwatihiktsa ana harere humo hi sinamyrētsa watsa moziknaha. Kytsa okzeka mynamybyitsa watsa iwatsatu Deus okze mynamyrētsa watsa imysapyrēnikia ty mybo nyny niy.

¹¹ – O Korītio ezektsa myharereziuwysitsa ahahumo tsimypokzitsiukrētsa. Myharere ahabo batu iokdaha myharere mypubara. Hawa mytsaty tsimykarahaha ana kino ahabo tsimytsasokonaha ikiahatsa mykparawysa.

¹² Tsipahasapywykynaha ana hi tsimyzihikiknaha. Ikiahatsa ja. Myhumo hŷbyri tsimykarahaha.

¹³ Ahabo tsimytsasokonahaze myhyrytsa pe maha wa tsinakarahaha. Iki ahatsa mybo aha humo kyty tsiwatawynaha. Myhumo ahakrybyihu ja – tsimaha.

Pauro Korītio ezektsa bo nisisukpe.

¹⁴ Ikiahatsa kytsa Sesus harere bo hyŷ ahabyitsa tu ka pāo pāo byitaha. Kytsa simysapybyitsa mykarahatsa ba situk mynapykyknaha. Aty zeka okoroze pitabaka taske humo sihyrinymyrētsa. Aty zeka unata eze pitabaka pyrik pyrik mykara iwatsahi ituktsa batu zikaha. Asaktsa ahatuktsabyitsa. Iwatatu ikiahatsa Sesus tuktsa Sesus harere bo hyŷ zikahabyitsa tu ba situk tsinapykyryknaha. Batu ahamykpyriziu.

¹⁵ Kiristu Satanas ahatsa batu harape tuk zikaha. Iwatsa Sesus tuktsa Satanas tuktsa meky watu maha. Hawa Sesus tuktsa mytsaty mykarahaha

hawa Satanas tuktsa mytsaty mykaranaha meky watu mykaranaha. Batu atsatu mytsaty zikaha. Iwatsahi batu simykpyriziu. Iwa hỹ.

¹⁶ Deus wahoro zubata deusbyitsa wahoro mekywaha tu maha. Katsaktsa Sesus harere bo hyỹ tsimykarannahaze Deus wahoro wata tsimaha. Deus hyrikoso mytuk mynapykyryk iwaze Deus hi:

– Utakta situk mynapykyryk. Kape: “O Deus ikia zuba myzo” maha.

Ikiahatsa hi katyryktsa ispe my – niy.

¹⁷ Iwatsahi mypehatsa tihi niy:

– Sispirikpobyitsa ty ka arekiktahaktsa!

Hawa mysopyksapy byizeka tahaerekiknahaktsa!

Imysapybara tsiperekiknaha zeka kabo pahaoktyhyryk hỹ.

¹⁸ Utahi ahazo mozik.

Ikiahatsa kahyrytsa tsimoziknaha.

Kahyrytsa kahyryza ahape my – niy.

Iwa Deus nikara atahi izikwyrēnikita my ba hawa tohi zikzukninaha.

7

¹ – O myharereziuwyttsa ahahumo kamypokzitsiarēta. Deus mymysapywyky isapyrēnikia mybo pinyny tsihikik my ana tyhi Deus mybo motsasoko. Iwatsahi hawa ha ty mysapybyitsa tsimykarannaha ty ka tymoewytahaktsa! Isopyksapybara humo mytsaty mytsaty byitaha! Iwa tsimykarannaha zeka Deus hi mysapyrētsa mymysukni. Iwaze hawa ha ty Deus batu iakparawy ipokzi batu tsimykarannaha. Iwaze isoho zuba mytsaty tsimykarannaha – my.

Pauro tsakurēta mopykyryk.

² O kytsa myhumo ahamypokzitsihuktsa! Katsaktsa tsipahapokzitsikinaha hỹ. Katsaktsa batu aty tohi tymyi. Katsaktsa batu aty tohi humo myharerewabytsihik. Katsaktsa ahatukze batu mybarapetu aha. Mynamy humo zuba batu mybarapetu tsikykarannaha, aha humo wasani mysopyk.

³ Ana tyhi batu tyso iwaha ty ahamysapybyi humo. – O ikiahatsa kaokzeka batu ahamysapy – my. Ana ty hi batu mysopyk. Botu ahabo iksaso hawa ahahumo mypokzitsirētsa, mywahi ahahumo mypokzitsirētsa tsimaha. Abaka ahahumo mypokzitsirētsa, tsimhyrikosokdanahaze kino iwa hỹ ahahumo mypokzitsirētsa.

⁴ Utakta ahahumo kakurēta myspihikbatabyitsa tu tsimaha. Utsa kytsa bo pahaharereziuwyttsa. Kytsa mymysininiwykynahaze ahasoho bo mytsaty tsimykarannaha, iwaze tsimyziakuwynaha. Ahahumo hi kakurēta.

⁵ Masedonia bo tsikzumunahaze batu myty byry. Kytsa sizubarētsa nahape myijakanaha ana soho meky watu tsihokdaharēna. Mypybyrētsa tsikykarannaha.

⁶ Deus siakubyitsa mysiakuwyky mozihikik iwa mybo niy. Titu zumuze Deus ihumo mymykuwyky.

⁷ Zumuze atahi:

– O Korītio ezektsa kahumo simypokzitsiukrētsa hỹ. “O Pauro humo katsa myhyrizikbarētsa mybo mynakozore tawata” nikarannaha. Atakta imysapybara ty nikara, isoho humo batu siaku, ihumo sisukatsihikrētsa mykaranaha “O Pauro pehawy wasani” nikarannaha – niy. Iwa Titu mybo nipamykysoko. Hawa Korītio ezektsa pikbetesa tsihikiknaha iwatahi kakurēta babata mopykyryk. Iwa Deus nimykuwyky.

⁸ Iwaze kapapeu humo zahabetsakak ahaku byitsa tu tsikyppykyknahatsa tu iwaze ahasukatsihikrētsa tsikaha. Ana kino ziwatahaka wasani niy. Kapapeu humo batu ahaku wasani niy. Tapara kapetu ikykara:

– Anapapeu iwatahaka Korītio ezektsa iksibetsakak wasani ja – iwa kapetu kasopyk.

⁹ Kawatahaha humo ahasukatsihikrētsa ana humo hi wasani my. Kawatahaha tsinymyrynahaze ahamysapybyitsa tsikykaranaha tsmoewy tsihikiknaha ana humo hi kakurēta. Deus hi zahaokzohik ahamysapybyitsa tsikykaranaha humo batu ahaku tsikyziknaha abaka ahamysapybyitsa tsimykaranaha. Tsmoewybaiknaha. Iwatahi kawatahaha ty ahabo ikzinynyre wasani, abaka kaharere humo batu ahamyi iwatahi ahasapywyky.

¹⁰ Jokboha ahakubyitsa tu tsikykaranaha iwatsahi mysapybyitsa tsikykaranaha tamoewybaik, iwaze Deus zikwy humo meky watu tsmoziknaha. Ahasapyrētsa tsmoziknaha. Ahakurētsa. Asaktsa Deus humo batu siakparawy asahi pisuka tsihiknaha zeka simysapybyitsa nikaranaha ba ziksimoewynaha. Myhyrikosokdanahaze Deus tuk ba tahawahi ziknapykyryknaha asaktsa sinini ykarawy bo maha.

¹¹ Ahasukatsihikrētsa tsikykaranaha. Ahakubyrize Deus isapyrēnikia ty ahabo nyny niy. Ana bohi mytsaty tahaktsa kytsa! Iwatsahi kytsa wasani tsmoziknaha. Mybo batu ahaharere ty harapubetehe tsikykaranaha. Kawatahaha humo nepykba tsinymyrykynahaze tsikpybynaha! Atakta ahatuk imysapybyita tu nikara ihumo tsikahakyrikinaha iwaze ikiahatsa ipe: nabo pāoty tsikaha. Iwaze ahatuk zuba tsikpamykysokonaha:

– Hawa ja tsikykaranaha wasani ja. Tybyi zuba tsimaha ja. Pauro mytuk tsimyzihikiknaha iwa mymytsumuēhī – tsimykaranaha. Hawa tsikykaranaha wasani. Kytsa sizubarētsa ahasoho humo sispirikporētsa maha nikaranaha.

¹² Iwatahi tubabatu ahabo iwatahaka. Atakta ahatuk imysapybyita tu nikara awatu mahakta iwa ahabo ity wataha. Atakta sinini niyze zikyrynymyryky ana humo hi ahabo batu ity wataha. Deus okzeka kaharere bo hyỹ tsimykaranaha, kytsa bo mypubara ty mykaranaha ana hi iwatahaka hawa myhumo ahamypokzitsirētsa, ana humo hi ahabo iwatahaka ana hi tsinymyrynaha.

¹³ Iwatsahi katsa mykurētsa hỹ.

Abaka myhyrinymyrētsa. Ikiahatsa myhumo tsimypokzitsirētsa ana hi tsinymyrykynaha. Titu mybo zumuze atahi:

– O Korītio ezektsa zikpokzitsikinaha – niy. Wasaniha humo mykurētsa.

¹⁴ Tubabatu Titu ahabo asiba niparakze uta ipe iky:

– O Korītio ezektsa simysapyrētsa ahumo wasani maha papokzitsikinaha hỹ – iky. Kaharere wasani my. Ihumo tsimypokzitsikinaha ahasoho pe batu mybarapetu ikykara. Iwa ha ty wasani tsikykaranaha.

¹⁵ Titu hi:

– O Korītio ezektsa kaharere bo hyỹ nikaranaha. Ziktsumuēhīkīnaha kahumo simyharerewabyrētsa – niy. Iwatahi ahahumo tsimypokzitsiarēta.

¹⁶ – O kytsa ahahumo kakurēta hỹ, hawa tsimytsasokonaha atsatu tsimykaranaha iwaze ahahumo kakurēta hỹ – my.

8

Sesus tuktsa simykubiyihurētsa niyziknaha.

¹ O katukytsa Masedonia ezektsa asaktsa izumubanahaze Deus harere piwabynaha Deus nisisapywyky iwatsahi simykubiyihurētsa niyziknaha, ana soho hi tsinymyrynahaktsa.

² Sinini nikaranaha. Sinamybyitsa nikaranaha. Iwatsatu ustsa sinamybyitsa bo nynytohi nikaranaha. Sibonyny nikaranahaze sakurētsa.

³ Ana humo hi kahyrinymyrēta. Utsa kytsa bo zibiakaknaha. Uta batu isty peha nyny mykaranaha asa tu nyny nikaranaha.

⁴ Asahi:

– O mynamy ty myokyrysaro ty iwa ahabo nyny tsimykarana. Sudeja ezektsa Sesus harere bo hỹ mykaranaha asa bo hi nyny tsimykarana. Myokyrysaro ty mytsyhyryze wabehyryk tsimaha – nikaranaha. Iwa tsizubarēna nitsasokonaha.

⁵ Katsaktsa mypetu mysopyk:

– O asaktsa tsikaeni zuba nyny mykaranaha – mytsaty ahabyitsa tsikykarana. Tsizubarēna nyny nikaranaha. Taparaka tawaha ty Deus bo nyny niaha iharere bo zuba hỹ nizihikiknaha, iwaze myharere bo kino niwatihi hỹ nikaranaha.

⁶ Ana ty kino katsaktsa Titu pe:

– O Korītio bo tynakozorekta – tsikaha. Titu zahatsumuēhī. Ahape niy:
– Ahaokyrysaro ty sinamybyitsa bo nyny tahaktsa! Iwa tsipisapywykynaha – niy. – Iwaze Korītio ezektsa bo tsimy. Tysiakuwykyktsa – iky. Hỹ niy.

⁷ Ikiahatsa ahanamyrētsa watsa tsinakaranaha. Sesus humo ahaspirikporētsa h̃y. Deus wasania ty tsimytsasoziukunaha. Tsahyrinymyrētsa babatsa tsimaha. Utsa tsimysitsumuēhīkīnaha h̃y. Myhumo ahamypokzitsirētsa tsimaha. Iwaze uta ahape my: – Sinamybyitsa bo ahanamy ty nyny tahaktsa! Utsa kytsa sinamybyitsa bo nyny maha, ikiahatsa hi ahanamy tsizubarēna ty nyny tahaktsa kytsa sinamybyitsa bo! – my.

⁸ Ahabo motsasoko kahumo batu ahaty ykzo. Batu kaharere humo ahanamy ty nyny tsimaha. Masedonia ezektsa tsizubarēna ty nyny niaha. – Ikiahatsa tihi! – iwa tsimykarana zeka myhumo ahamypokzitsirētsa babatsa tsipiwatawykynaha.

⁹ Ikiahatsa botu mypehaktsa Sesus Kiristu soho bo mytsatyziu tahaktsa! Myhumo tsimpokzitsiarēta hi atakta Deus tuk bijoikpe eze tuze tsinamyrēta h̃y. Iwatatuze mybarawy bo izumuze inamybyita niyzik mypokzihi ninamybyiri. Iwaze hi katsa ihumo mykurētsa tsimoziknaha, sinamyrētsa watsa.

¹⁰ Kapehawy ty ahabo my. Jatukta omoro eze ikiahatsa tihi:

– O sinamybyitsa tsyhyryze myokyrysaro tsiperykynahaktsa! – ahatuk tsikpamykysokonaha. Taparaka ikiahatsa tsikzihikiknaha iwaze atsatu tsikykarana Sudeja ezektsa tsiksitsumuēhīnaha.

¹¹ Iwatsahi tybyizubatahaktsa! Sinamybyitsa tysitsumuēhīzonahaktsa kytsa! Batu mytsaty tsimaha:

– O myokyrysaro ty tsizubarēna mozik zeka iwaze sinamybyitsa tsyhyryze taperyky – iwa ba mytsaty tsimaha. Abaka ahaokyrysaro ty tsimaha ana kino sinamybyitsa bo nyny tsimaha.

¹² Ahakurētsaktsa! Katsaktsa myokyrysaro ty nyny tsimyzihikiknaha zeka ana kino Deus okze wasani my. Myokyrysaro tsikaeni zuba tsimaha zeka iwaze usts bo tsipinynaha zeka ana kino Deus okzeka wasani my. Iwatahi aty nyny myzeka Deus hỹ my. Mybaze byizeka Deus batu mype ziky:

– Utsa bo tsipinyny tsihikiknaha zeka ana kino kaokze wasani – my.

¹³⁻¹⁴ Ahanamybyitsa tsimoziknaha zeka batu mozihikik. Abaka ikiahatsa ahanamy tsizubarēna tsikaha asaktsa batu sinamy. Iwatsahi ahanamy sibo tsibiaknaha zeka wasani. Bykyzehu tozeka ja ikiahatsa ahanamybyitsa tsimoziknaha iwaze ahabo pibiakaknaha. Iwaze batu aty tohi inamybyita. Batu aty tohi inamyrēta. Ikiahatsa aharape watu tsimoziknaha ahatuk tsipibiakaknaha.

¹⁵ Deus harere papeu humo iwataha:

– Aty disahawy tsizubarēna zeka ba are ziky.

Aty zeka disahawy jokboha zuba atakta batu irapa – niy.
Iwa Deus watahaha nitsaso kytsa soho asahi pibiakaknaha.

Titu iwaze ituktsa ahatsa hawa mykaranaha.

¹⁶ Iwaze Titu kawata my. Atahi niwatihi pahatsumuēhī tsihikik iwaze utakta Deus pe:

– O myzo ikia zuba amysapyrēnikita. Ikia humo Titu Korītio ezektsa mysitsumuēhī tsihikik iwatahi kakurēta – mykara.

¹⁷ Titu kaharere bo piwabyziuku hawa ha ty ibo nizapykyky ana hi hyỹ niy.
Atahi:

– Utakta Korītio ezektsa bo mynakozore tsihikik – niy.

¹⁸ Ituk hi usta mytuky tapehaka nanabyitaba. Deus wasania ty natsakoro myzubaha bo. Sesus tuktsa sizubarētsa isoho tihi:

– O ata hi tsiwaby tsihikiknaha – maha.

¹⁹ Sesus tuktsa mytukta tu ziwatawynaha, Serusarēhe bo tsikukurunahaze mytukta ziwatawynaha. Ahaokyrysaro ty wabehyryk tsimaha ana kino sinamybyitsa bo nyny tsimahaze:

– Katsa ahahumo mypokzitsirētsa – sihyrinymyrētsa. Asaktsa Deus pe niaha:

– O Deus myzo ikia zuba tsamysapyrēta – maha. Ahanamy ty sibo tsipibiakaknaha humo tynamypehapokzitsikinaha iwatsahi Deus bo inapamykysokonaha.

²⁰ Okyrysaro tsizubarēna Serusarēhe ezektsa bo wabehyryk tsimaha. Hana wa sinamybyitsa bo okyrysaro ty nyny nyny tsimaha ana hi wasani tsimykaranaha, iwa zeka hawa okyrysaro ty kytsa bo nyny tsimaha pykyhytu tsimaha.

²¹ Hawa Deus okzeka wasaniha bo zuba mytsaty tsimyzihikiknaha. Deus okze ka wasani tsimykaranaha ikiahatsa okze kino niwatihi wasani tsimyzihikiknaha.

²² Iwatsahi usta Sesus tukta katsy piakzohik. Tapara hawa tsihokdharēna nikaraze kytsa nisitsumuēhīkī ana ty hi myhyrinymyrētsa. Ahahumo tispirikporēta iwaze tihi:

– O Korītio ezektsa okyrysaro ty sinamybyitsa bo nyny maha ana humo hi kahyrinymyrēta – mykara. Ahabo mynakozore tsihikik. Iwa hỹ. Kytsa harakykbyitsa ahabo mysiakzoko.

²³ Titu katukta pahatsumuēhīkī. Utsa Sesus tuktsa petoktsa ituk mokerunaha. Sesus harere bo hyỹ sisopyktsa asahi siwatawyhytsa niaha. Kiristu bo mosakibazikiknaha.

²⁴ Kyze ahabo mozumunahaze tysipokzitsikinahaktsa kytsa! Iwatsahi Sesus tuktsa sizubarētsa Korītio ezektsa soho humo maha:

– O asaktsa kytsa humo mysipokzitsikinaha hỹ – mykaranaha. Iwaze myharere ahasoho wasani my sihyrinymyrētsa.

9

Korītio ezektsa siokyrysaro ty Sesus tuktsa Sudeja ezektsa bo nyny niaha.

¹ Iwaze asaktsa Sudeja ezektsa Deus tuktsa tsimysitsumuēhī tsihikiknaha kahyrinymyrēta iwatahi batu ahabo papeu humo piwataha.

² Utakta botu Masedonia ezektsa pe:

– Sesus tuktsa Keresia ezektsa sinamybyitsa bo mysitsumuēhī tsihikiknaha jatukta niytyktseheze nisitsumuēhī tsihikiknaha – iky. Ana hi ziwabynahaze asahi:

– Katsaktsa niwatihi sinamybyitsa bo tahatsumuēhī tsihikiknaha – niaha.

³ Aba uta mytukytsa ahabo mysiakzoko. Ispe iky:

– O Korītio ezektsa botu tahaokyrysaro izikyppykyknaha. Ana hi mybo nyny mahaze iwaze katsaktsa siokyrysaro tabykyk sinamybyitsa bo nyny tsimaha – iky. Anawahi iktsasoikik. Ahaokyrysaro ty koro ahabyizeka kaharere ba wasani my, iwatahi katukytsa ahabo mysiakzoko, iwaze hawa ahabo botu iktsaso atsatu tsimykarana.

⁴ Masedonia ezektsa katuk maha zeka ahaokyrysaro ty koro habyizeka ahahumo mysikybyrētsa. Ikiahatsa kino niwatihi ahaokyrysarobyi humo ahasikybyrētsa. Kaharere ahasoho humo siokzeka batu wasani ana humo hi kasikybyrēta.

⁵ Iwatahi katukytsa kaharaze mysiakzo. Pahatsumuēhīnaha. Hawa ahaokyrysaro ty koro tsimaha zeka pahatsumuēhīkīnaha. Hawa botu tsik-tsasonaha anaharere bo yh̄y tsimaha ana kino pahatsumuēhīnaha. Bykyze mozumuze mokymyba iwaze ustsā kytsa tihi:

– O Korītio ezektsa tahaokyrysaro ty nyny niaha. Ba ustsā harere humo nyny niaha. Asaktsa tahaokyrysaro ty pinyny tsihikiknaha h̄y – mykaranaha.

⁶ Aty jokboha zuba mysiparik zeka jokboha zuba mysizozik. Aty mysiparik tohi zeka sizubarēna mysizozik. Iwa hawa nyny tsimykarana wata atsatu my. Ana bo hi mytsatziutahaktsa kytsa!

⁷ Aty tapetu isopyk zeka:

– Kaokyrysaro ty ustsā kytsa bo ba nyny ziky – my. Iwa zeka nyny byity. Usta ape my zeka: – Aokyrysaro ty kytsa bo nynyty – my. Iwa zeka nyny byity. Ikiahatsa ahaokyrysaro ty ustsā bo tsipinyny tsihikiknaha zeka iwaze ahaokyrysaro ty nyny ty. Ahakurētsa nyny tsimaha. Iwa nyny tsimykarana zeka Deus okzeka wasani tsimykarana. Deus ahahumo tsimypokzitsiarēta h̄y.

⁸ Deus hi isapyrēnikia ty ahabo nyny mykara. Deus tanamy ty tsizubarēna ahabo nyny my. Iwaze ikiahatsa hi ustsā kytsa bo ahanamy ty nyny tsimaha. Ahanamyrētsa ikiahatsahi:

– O mynamy ty tabiak tsihikiknaha – tsimykarana. Iwaze Deus humo ba ziknamybyi tsimaha.

⁹ Iwa Deus papeu humo ziwataha:

– Aty tsimysapyrēta tu zeka tanamy ty sinamybyitsa bo nyny mynakara.

Iwaze kytsa isoho “ataкта tsimykubiyhurēta” mynakarana iwa Deus harere papeu humo ziwatahaka.

¹⁰ Deus hi riktsa ty mybo nyny my. Riktsa jokboha tsimysipariknahaze puētsik zuba tsimysizoziknaha. Tsimysipariknahaze sizubarētsa tsimysizoziknaha iwa Deus mydisahawy ty mybo nyny mynakara. Nawa Deus isapyrēnikia ty mybo nyny mykara. Anawahi ahanamy ty tsizubarēna ustsā kytsa bo nyny tsimaha. Deus humo tsizubarēna kytsa bo nyny tsimaha! Iwaze ahahyryzikporētsa tsimoziknaha.

¹¹ Deus ahahumo tsimypokzitsiukrēta iwaze ustsā kytsa bo ahanamy ty nyny tsimaha. Iwaze sinamybyitsa Sudeja eze tihi:

– O myzo ikia zuba tsamysapyrēnikita, Korītio ezektsa sinamy ty mytsyhyryze Pauro tuktsa bo nyny niaha. Iwatsahi sihumo abo tsimysakibazikiknaha – maha.

¹² Sinamybyitsa mysitsumuēhīnahaze sakurētsa moziknaha. Asaktsa Deus bo mosakibazikiknaha. Asahi:

– O myzo ikia zuba amysakihikynikita tsimy – mykaranaha.

¹³ Iwa tsimykarana hazy sinamybyitsa Deus pe:

– O myzo ikia zuba wasani tsimykara. Korītio ezeiksa ahumo ka batu sisorek. Asahi Kiristu harere bo hyĩ mynakananaha. Kytsa sizubarētsa mysisapywykynaha mybo kino niwatihi nyny mykaranaha iwatsahi mykurētsa tsimozikzonaha – mykaranaha.

¹⁴ Asa hi Deus bo ahatsyhyryze napamykysokonaha, ahahumo simypokzitsirētsa. Asahi:

– O Deus myzo tsimysapywykik. Korītio ezeiksa batu sisorek mymypokzitsikinaha. Ikia sihumo tsimypokzitsiukrēta iwatsahi nymytsumuēhĩkĩnaha – maha.

¹⁵ Niwazuba! Deus myhumo tsimypokzitsiukrēta hỹ. Deus tse babata mybarawy bo zipaha. Atahi ipokzitsianikia waha iwatsahi mykurētsa hỹ. Katsa hi:

– O Deus myzo ikia zuba amysapyrēnikita – tsimykaranaha. Iwa tahaktsa kytsa!

10

Pauro Sesus Kiristu humo iakzohota kytsa mysipehaze pibetesaka.

¹ Uta Pauro kapehawy ahabo motsasokoro. Deus harere ty pahahyrinymyry, Kiristu wata kakubyrisorokrēta. Atakta kytsa nisihrinymyry uta iwata pahahyrinymyry batu kasakpare my. Ikiahatsa kasoho humo:

– O Pauro nokponi zeka mymybetsakak, ata hi mytuk tu zeka ba zikmybetsak ana pokso tsipybyrēta – tsikaha.

² Iwatahi ahabo pomo zeka ba zahabetsak. Tsipimyikinaha zeka pahabet-sak. Asaktsa kasoho tihi:

– O Pauro mybarawy ezeiksa harere bo zuba yhỹ nikara, iharere ka Deus harerebara – mybarapetu nikaranaha. Pykyhytuty asa bo pomo zeka mysibetsak.

³ Mybarawy eze tu tsimyzurukunahaze mybarawy ezeiksa watsa batu kasopyk hawa meky watu mytsaty mykara.

⁴ Tsinaharapesukyrykynahaze katsaktsa mybetesawytsa mybarawy ezeiktsa byitsa. Deus hi katsaktsa mybetesawy, mybarawy betesawytsaktsa jokbohatsa tu Deus betesawy ka, aba zuba ba zihokyknaha. Ana hi Satanas zikwy atsoko pihokdawy. Kytsa nahapepehakanahatsa metutu nipaparabaiknaha siharere atsoko pihokdawy. Deus zikwy humo mytuku mynapykyryk, iwaze siharere atsoko pihokdawy.

⁵ Asaktsa nahapepehakanahatsa aba zubatsa nizihikiknaha – mypehawy zuba Deus soho wasani my – mybarapetu mykaranaha. Iwa kytsa mysimiywykynaha, kytsa Deus harere bo hỹ byi mykaranaha. Katsaktsa Deus zikwy mytuk zeka siharere mohokda. Iwaze kytsa sizubarētsa Sesus harere bo hyĩ mykaranaha ihumo sispirikporētsa moziknaha.

⁶ Aty pimiyiwyzo zeka sinini my. Ikiahatsa Deus harere humo hyĩ tsimykaranaha ahatuk zeka estuba iharere bo hỹ habyi zeka atahi sinini my.

⁷ O kytsa wabyziutaha! Ikiahatsa mynury bo zuba iktsa ahasopyk. Aty ahape my zeka:

– Uta zuba Kiristu harere bo hyĩ mykara Pauro tuktsa ja batu kanyhỹ – my. Isoho bo mytsatzyiutaha! Katsaktsa Kiristu harere bo hyĩ tsimykaranaha iwata tsimaha.

⁸ Iwa tubabatu Deus zikpeha. Pahahyrinymyry naha humo zikpeha. Ana hi botu iktsasoko batu kasikpyby. Deus zikwatawy tahi pahatsumuēhĩkĩ. Iwaze kapehawy humo ahapunihrētsa tsimoziknaha, Sesus harere humo

ahaspirikporētsa tsimoziknaha iwatahi zikwatawy. Ba zahabetsak. Ba zahasukatsihik ana humo hi batu katy peha.

⁹ Ikiahatsa bo piwatahakaze papeu pokso ahapybyrētsa batu mozihihik.

¹⁰ Aty zeka:

– O Pauro mybo zikziwatahakaze ziubaraty papeu humo ziknamybet-sakak. Mytuk zeka mekta tu isopyk niy. Atahi:

“O Pauro ipunihikbyita tu iharere ba ziwabynaha. Motsasoikik hawa mybo motsaso wasani ja”. Batu amy tohi mykara tsimaha – niy.

¹¹ Atakta ana kino nitsasoko kaharere bo wabyziuty! – Ahabo tsimynakozorenahaze myharere papeu waha my. Hawa botu tsiwatahanaha atsatu motsasoko – my. Iwa hỹ.

¹² Wastuhu kytsa ahatuk:

– O katsaktsa mysapyrēnikitsa – mykaranaha. Katsaktsa siwatsa batu tyso. Ba sihyrinomyry. Simytsatyhybyritsa tu hawa wasani zuba mykaranaha mytsaty aha byitsa mykaranaha. Deus okzeka batu wasani zikaha.

¹³ Tsimytsasokonaha humo pykyhytu – katsa zuba myhyrinomyrētsa – batu tyso. – Deus hi botu ahabo nimypeha iwatsahi tsipahahyrynyky-naha iharere bo hỹ tsimykaranaha ana humo zuba tsimytsasokonaha – nawa mysopyk. Batu mybarapetu tsimykaranaha.

¹⁴ Katsaktsa tapara ahabo tsikzumunaha. Deus wasaniha ahabo tsikt-sasokonaha. Deus hi:

– O Korītio ezektsa bo taha – niy. Deus nimypehanahatsahi ahabo tsikzumunaha.

¹⁵ Bykyze ustsya kytsa ahabo izumunaha. Iwatsahi batu tyso:

– O katsa zuba Korītio ezektsa bo Sesus soho humo tsiksihyrinomyryky-naha – iwa ba zikaha. Ikiahatsa Sesus harere bo hỹ tsimykaranaha ana zuba tsimyzihihiknaha. Abahi tsipinomyrytohinaha iwatuze Deus harere humo zuba hỹ tsimykaranaha, mypehatsa harere bo zuba yhỹ tsimaha. Ana bo mymypeha anabo hi zuba tsimykurunaha.

¹⁶ Deus wasania ty ahabo tsimytsasobanahaze nokponi tsimykurunaha. Sasabyitsa bo tsimytsasokonaha nanabyitaba sihudikhudikwy eze tsinakaranaha. Iwatsahi kytsa batu tyso:

– Pauro tuktsa tuk Deus wasaniha kytsa bo motsasokonaha. Kytsa Deus harere botu ziwabynaha, sibo hi motsasokonaha – iwa batu tyso. Anaharere humo hi batu zikaha.

¹⁷ Deus harere papeu humo ziwataha:

– Katsaktsa mysapyrētsa tsimaha zeka. Katsa kytsa pe: “O Deus myzo atahi zuba tsimysapyrēnikita iwata tahaktsa kytsa!” – tsimaha.

¹⁸ Katsaktsa mypetu mysopyk zeka:

– O myokzeka wasani tsimaha – iwa tsimykaranaha zeka batu aty tohi yhỹ mykaranaha. Deus zuba mype zeka:

– O ikiahatsa wasani tsimykaranaha – my. Iwaze zuba wasani tsimaha iharere hi tisapyrēna atahi mymybetesaka niy hỹ.

11

Pauro iwaze siakzohobyitsa simyspihikbatanikitsa tuk mykara.

¹ Kyze motsasokoro ityrykmyita wata. Kaharere pykyhytu tsiwabyziunahaktsa! Kahumo ahakubyrisoroku ja.

² Deus ahahumo pahapokzitsiki nahawa tihi. Uta kino niwatihi pahapokzitsiki iwata my. Abaka ahahumo kasukatsihikrēta. Atatsa ityrykduwyhybyitatsa tuze iharerewabyhy zuba iakparawy ustsya mykyryburuktsa batu

iakparawy. Atatsa watatsa ikiahatsa Kiristu zuba ahakparawy, ikiahatsa tihi:

– O Kiristu zuba mykparawy. Ustsaktsa harerewabyhytsa batu mywabyhy – tsimaha. Iwa mozihihikik.

³ Ahasoho humo kasukatsihikrēta kytsa ahabo mybarapetu mykaranaha. Siharere tsiwabzyiunaha zeka batu imysapy mytsaty tsimykaranaha. Iwatsahi Kiristu harere humo batu hỹ zikaha siharere humo tsimiyiwykynaha. Satanas Ewa zispihikbataka naha wa asaktsa ahabo mybarapetu mykaranaha. Siharere bo yhỹ tsimykaranaha zeka kasukatsihikrēta.

⁴ Aty ahabo mozumuze iharere ezytyk motsasoze ikiahatsa hi:

– O ahawaha batu mynyhy – tsimaha. Tapara Sesus babata soho ahabo tsiktsasotsasokonaha. Asaktsa batu. Sesus babata soho ahabo batu tysoho. Tapara Deus hyrikoso soho ahabo tsiktsasotsasokonaha. Asaktsa batu, Deus hyrikoso babata ahabo batu tysoho. Tapara Deus wasania ty zuba ahabo tsiktsasotsasokonaha. Asaktsa siharere bo zuba yhỹ tsimykaranaha, siharere humo ahakurētsa. Hawa ha ty mektsatu motsasonaha. Deus wasania ty batu tyso. Asa hi ahabo mybarapetu mykaranaha.

⁵ Asahi ahabo mybarapetu mykaranahaze sihumo ahaharerewabymybarētsa tsimoziknaha. Deus zikwatawy atahi tazikwy ty kabo nyny niy pahamiwybyiki iwatsahi kahumo ahamyharerewabyrētsa!

⁶ Utakta kaharerehokzaharēta tu hawa ha ty iktsasoko wasani my. Utakta kahyrinymyrēta hỹ iwatsahi kytsa sizubarētsa kaharere humo yhỹ mykaranaha. Tsizubarēna ahabo ty iktsasoko ana humo hi ahahyrinymyrētsa.

⁷ Ikiahatsa bo ikzumuze Deus wasania ty iktsasoko iwaze ahaokyrysaro ty kabo batu nyny tsikaha. Ahatukze kanamy tsikaeni tsibik zuba iky, iwa humo hi zikzuruku iwatahi Deus isapyrēnikia ty iharere ahabo iktsasoko. Deus wasaniha humo ihuakbara ty ikykara. Hawa wasani ikykara. Ikiahatsa kaharere humo Deus tyryktsa tsikyzyknaha.

⁸ Deus wasania ty ahabo iktsasokoze ustsas Sesus tuktsa siokyrysaro ty kabo nyny nikaranaha. Sesus tuktsa ustsas hudikhudikwy ezektsa siokyrysaro ty kabo nyny nikaranaha. Ahatsyhyryze siokyrysaro iakse iwa Deus wasania ty ahabo iktsasoze iwaze ihuakbara ty iktsaso.

⁹ Utakta ahatuk zikzuruspykze batu aty tohi okyrysaro humo zikykybyikize batu ahatykda. Sesus tuktsa Masedonia ezektsa kabo izumunahaze tahanamy ty kabo nyny niaha. Ikzihihikik naha ty kabo nyny niaha. Ahabo batu ihuak ty ahabo tysapykyk iky ahabo kabokta batu aha.

¹⁰ Deus wasania ty Keresia ezektsa bo motsasoko. Iharere baba wasani motsasoko, Kiristu harere kakparawy iwaze batu mybarapetu kasopyk. Kahyriziktsokzawy kytsa Deus wasaniha motsasoko batu pyk kasopyk, ana humo hi ihuakbara ty ikykara. Batu kytsa siokyrysaro ty kabo nyny zikaha. Niwazuba!

¹¹ Ikiahatsa hi:

– O Pauro myhumo imypokzitsiubyita tu myokyrysaro ty batu ziakse – tsimykaranaha. Niwazuba! Deus hi tsihyrinymyrēta, utakta ahahumo kamypokzitsiarēta ana humo kino tsihyrinymyrēta hỹ.

¹² Asaktsa simysapybyitsa hi:

– O katsaktsa Pauro tuktsa watsa tsimaha – mykaranaha. Batu ba. Utakta Deus harere wasania ty ihuakbara ty motsasoko. Asaktsa batu mekywatsa tu nikaranaha. Asahi ahaokyrysaro ziaksekenaha iwatsahi batu mywa zikaha.

¹³ Asaktsa kytsa Kiristu humo sipe ahabyitsa maha. – Katsaktsa Kiristu ykzohotsa – mykaranahaze mybarapetu mykaranaha:

– O Deus wasaniha tsimytsasokonaha ana kino myhyriziktsokzawy – mykaranaha. Iwa mybarapetu mykaranaha.

¹⁴ Utakta kapetu kasopyk:

– Satanas myzihawatahakanahatsa watsa niyziknaha mysispihikbatakanaha. Hawa skaraba Korītio ezektsa siharere bo yh̄y mykaranaha – batu mykara. Nawa batu mytsaty mykara. Satanas hi karipu karipuwya wata niyzik iwaze kytsa bo mybarapetu mykara. Atahi bijoikpe iknykta Deus tsumuēh̄itsa wata mozik. Hawaha ta sa. Kytsa bo mybarapetu mykara ana humo hi mykara.

¹⁵ Iwatsahi sitsumuēh̄itsa kino niwatihi nispipihikbatakanahatsa:

– Katsaktsa mymysapyrētsa – mybarapetu mykaranaha. Iwa kytsa mysispipihikbatakanaha. Anasoho humo hi batu mypyby. Deus zuba mokozoko hawa isapybara ty sibo nyny my.

Pauro iakzohota Kiristu humo izuhuta nikara.

¹⁶ O kytsa ikiahatsa ba kape:

– Pauro ityrykmyita ana bo ka – mytsaty mytsaty byitaha. Ikiahatsa ahaokze ka ityrykmyita mytsaty tsimykarana zeka kaso ho bo zuba tsipiwabynaha. Sispipihikbatakanahatsa watsa – kamysapyrēta – mykara.

¹⁷ Hawa ahabo motsasokoro kaharere ty zuba motsasoko. Deus mozihikik naha humo ahabo batu motsaso hawa mozihikik naha humo zuba ahabo motsasoko, ityrykmyita tawata motsasoko.

¹⁸ Utsa kytsa botu ahape mykaranaha:

– O katsaktsa mysapyrētsa – niaha. Ana hi nitsasokonahaze sihumo ahamyharerewabyrētsa ana hi nizihikiknaha. Siwatsa uta kino niwatihi – Kamysapyrēta – my.

¹⁹ Ahape tu ahasopyk:

– Katsaktsa myhyrinymyrētsa h̄y – tsimykarana. Ikiahatsa sityrykmyitsa harere ahakparawy.

²⁰ Asaktsa pahakyzonahaze sihumo ahakparawy. Pahaspipihikbatakanahaze sihumo ahakparawy. Ahadisahawy piaksekenahaze ahakparawy. Sihumo ahanamybyitsa tu tsinakaranaha. Pahakikinahaze sihumo ahakparawy ahaspirikpobyitsa tu tsimykarana.

²¹ Katsaktsa sisopyk humo mysikpybyrētsa tsimykarana.

Wastuhu kytsa:

– O mysapyrētsa h̄y –. Utakta iwa niwatihi – O kamysapyrēta my – ityrykmyita wata motsasoko mybarawy ezektsa soho waha natasokonaha.

²² Asa tihi:

– Katsaktsa Ebereutsa – mykaranaha. Uta kino niwatihi Ebereu tihi. – Katsaktsa Isareu ezektsa – mykaranaha. Uta kino niwatihi Isareu ezekta tihi. – Katsaktsa Abarão tsekokatsa – maha. Uta kino niwatihi Abarão tsekoka tihi my.

²³ – Katsaktsa Kiristu tsumuēh̄itsa – mykaranaha. Uta kino niwatihi, Kiristu harere bo hȳy mynakara ana soho motsasoko zeka katyrykmyita wata my. Kiristu humo tarabaja abazuba ikykara itsumuēh̄ik̄i h̄y. Ihumo sakyriukrēnikitsa hurukwy bo kytsa zikoktyhyryknaha. Asaktsa batu sakyriukrēnikitsa hurukwy bo batu isty okty. Kytsa zikikinaha myraratsa hwyk ty tsizezerēna ty zikikinaha. Asaktsa batu skiok. Kytsa asiba zik-bezenaha zikikinaha. Asaktsa batu isty ba.

²⁴ Taparaktsa Sudeutsa zikihikiknaha. Mytsyhyry wa zikikinaha. Kasukpetara baze zikikinaha. Tirīta nowe zikikinaha.

²⁵ Homa ezektsa kino niwatihi zikikinaha. Harakykbyi kasukpetara baze hwi ty zikikinaha. Asaktsa siakyriukrēnikitsa harahare ezektsa ty zikarawowokonaha. Zikbeze tshikiknaha iwa nikaranaha. Harakykbyi buburu zuba buruk ikukuruze tsaraha puētsikbyita niharazuk. Estubaka buburu zuba buruk unata iknatsutsuku okoroze iwa pihik eze ikapykyryk nimyra bo batu zuk.

²⁶ Nanabyitaba ziknaukuruze kytsa asiba zikbezenaha. Buburu inapokze. Sitsyhyryboarētsa kanamy ziaksebaiknaha. Sudeutsa taparaktsa kasukyrytsitsa zikbezekyzykynaha. Sudeutsabyitsa kino niwatihi zikbezekyzykynaha. Sihudikhudikwy burukze kytsa zikbeze kzyzykynaha. Jerukbara bo niwatihi kytsa zikbezekyzykynaha. Buburu zuba bo asiba ikarazuk. Kytsa tihi:

– Katsaktsa aharezeziuwu tsimaha – mybarapetu nikaranaha. Sihumo asiba ikyrikosokda.

²⁷ Tarabaja tsizubarēna ikykara. Kahyriziktsokzawy humo batu kaōtutsa. Kadisahawy nepykze kadisahawybyita karapa zikzykyk. Karapukrēta ikykara. Batu kasuku. Kasukbyita iwarik zikzykyk.

²⁸ Iwa sinini mynakara. Pibytuhukutu Sesus tuktsa sizubarētsa soho mytsaty mytsaty mykara. Kapetu kasopyk:

– Kytsa asahi Sesus harere bo hȳ mykaranaha wasani ja mykaranaha – my. Sihumo kamypokzitsiarēta iwatahi mytsaty mytsaty mynakara.

²⁹ Aty Sesus harere bo hȳ mykara wasani baraty my zeka uta ituk kasukatsihikrēta. Batu myku tsimaha. Aty Sesus harere bo hȳ mykara imysapybyita mykara zeka uta ituk kasukatsihikrēta. Batu myku tsimaha.

³⁰ Kytsa sizubarētsa kaso ho humo sihyrinymyrētsa. Kazikwybyita sihyrinymyrētsa. Ana kino motsaso tshikik.

³¹ Deus hi kaharere piwabykyze atahi tsihyrinymyrēta h̄. Ikiatsa bo batu mybarapetu my atahi tsihyrinymyrēta. Deus mymypehaka Sesus Kiristuzo. Katsaktsa ipe tsimaha:

– O Deus ikia zuba koiknybaktatu h̄ amysapyrēnikita – tsimykarana.

³² Iwaze Damasko eze tuze sipehatsa Aretas inarokota atakta zikbeze tshikik. Iwatahi iperytsitsa Damasko hokbowy baze zikuparahakanaha katsipa humo zikokty tshikiknaha.

³³ Katukytsa ziktsumuēhīnaha. Unata eze zikoktyhyryknaha tsahi tsoromapeza eze tu iziksipikiknaha ape bo niaha. Hokbowy buruk iknasik. Iknawak. Iwaze Damasko ekze ikparakik, iwa ikwakik.

12

Pauro Deus hudikhudikwy zitsotospykykze ziny.

¹ Uta ahabo motsasokoro – kamysapyrēta my – ahape mykara. Anaharere batu imysapy iwatuze motsasoko. Mypehakatsa isapyrēnikia zikwatahawy, hinibyatatu zitsotospyk wa ha isapyrēnikia iny, ana soho ahabo motsasoko.

² Tubabatu katorise niytyk tseheze Deus hudikhudikwy bo zikoktyhyryk. Uta zikoktyhyryk ja. Zitsotospykyrykze zuba ja. Batu kanyhy. Deus zuba tsihyrinymyrēta.

³ Atsoko tasapy bo zikoktyhyryk tawa ihudikhudikwy bo iktsukze tisapyrēna. Utakta zikoktyhyryk ja. Zitsotospykykze ja. Batu kanyhy. Deus zuba tsihyrinymyrēta.

⁴ Anaeze iharere tisapyrēna iwaby. Anaharere ty kino batu tyso. Mybarawy ezektsa bo batu harere my.

⁵ Deus hi zikoktyhyryk iwatahi ustsā bo – Kamysapyrēta – my batu tyso. Uta kino kazikwybyita tu kytsa sihyrinymyrētsa ana humo hi motsasokoro. Kapunihikbyita tu ana hi motsasokoro.

⁶ Utakta – kamysapyrēta – my zeka wasani my. Batu katyrykmyita. Hawa ha ty wasania ty zuba ahabo motsasoko. Iwaze kaharere ty – kamysapyrēta – batu tyso. Ikiahatsa kasoho humo botu ahahyrinymyrētsa. Hawa zikzuruku naha humo ahahyrinymyrētsa. Hawa motsasoko ana humo kino ahahyrinymyrētsa. Kasoho tyka sosobyi my, hawa sa kasoho mytsaty tsimykarana ha wasani my batu meky watu mytsaty tsimykarana ha.

⁷ Deus tahudikhudikwy bo zikoktyhyrykze isapyrēnikia tsizubarēna ikzinyre. Tawata iwaze Deus tapetu isopyk:

– Pauro isapyrēnikia ty ziny. Ana humo hi tozeka ja “aba zubata ja” my – niy. Iwaze Deus ziksininiwyky. Iharere humo Satanas pikmyitsapryriwyky iwatahi kamyitsapyrēta mozik.

⁸ Kamyitsapryrize harakykbyihi Deus pe iky:

– O Deus myzo tsikzororowykta! – iky. Deus bo ikzapykykyk.

⁹ Iwaze Deus kape niy:

– Ba zazororowy. Kazikwy ty zuba abo nyny mykara. Akubyita tuze kazikwy ty puētsik abo nyny mykara ahumo kamypokzitsiarēta hỹ – niy. Iwatahi kamyitsapyrēta my ana humo hi kakurēta. Ustsā kytsa pe:

– Utakta kapunihikrēta – my. Iwa ba ziky. – Kamyitsapyrēta tuze kakurēta. Pibytuhukutu Kiristu zikwy ty kabo nyny mynakara – my.

¹⁰ Iwa ustsā kytsa pe mykara:

– Kamyitsapyrēta tuze kakurēta hỹ. Kiristu pokzi kamyitsapyrēta iwatahi kakurēta. Iwaze kytsa kahumo myziakaranaha, zikmyijaikiknaha, batu kanamyky, asaktsa Sesus harere bo batu yhỹ nikaranaha ziksukyrykynaha iwatahi sinini mykara iwata tu kakurēta. Kazikwybyita tu mypehakatsa zuba tazikwy ty kabo nyny mykara – niy.

Pauro Sesus tuktsa bo paikpa mytsaty nikara.

¹¹ Kaharere ityrykmyita wata. Ikiahatsa kahumo tsiharereziubyikinaha iwatahi pikbetesaka. Ahaokzeka utakta amy tohibyita wata. Asaktsa ahabo mybarapetu mykaranaha. Deus pehabyitsa tu mykaranaha sihumo ahakparawy asahi simyspihikbatanikitsa zuba mykaranaha. Ahaokzeka Deus pehakatsababatsa mytsaty ahabyitsa tsimykarana ha. Hawa mykaranaha utakta niwatihi mykara.

¹² Ahatuk ikapykyrykze hawa Deus pehaha mykara atsatu ikykara. Deus zikwy katuk ziknapykyryk ana kino ziwatawy. Amy ty kytsa batu zikaha Deus zikwy humo ikykara. Siwatawyhytsa humo ikiahatsa tsipybyaiknaha. Ahatukze kakubyrisorokrēta ikykara iwa Deus harere humo wasani zahahyrinymyryky ana kino ziwatawykyry.

¹³ Deus wasania ty ustsā Sesus tuktsa, asaktsa inazuzuknaha Deus harere bo piwabykynaha, sibo Deus pehatsa nitsasokoronahaze nisisapywykynaha ahatsa watsa bo ikykara. Asaktsa tahanamy ty sibo nyny nikaranaha. Ikiahatsa batu. Ahanamy ty kabo batu nyny aha. Iwa ikzihikik. Ana kino batu tyso – O Pauro myhumo batu iakparawy – batu tyso. Aha humo kakparawy.

¹⁴ Utakta petok baba ahabo iknakozore. Abaka asiba mokymyky ahabozo. Ikiahatsa ahaokryrsaro ty ba zikzihik. Ikiahatsa zuba Sesus harere bo hỹ tsimykarana ha mozihikik, ahanamy batu mozihikik. Ikiahatsa kahyrytsa watsa. Sizotsa tahahyrytsa okryrsaro humo pikorohyk. Sihyrytsa sinamy ty tahazotsa bo batu nyny zikaha, ana hi sizotsa batu simozihikik. Iwa hỹ.

¹⁵ Utakta pahatsumuēhī tsihikik, kanamy ty ahabo nyny my zeka ana hi mozikykuwyky. Kytsa ahatsyhyryze pikbezenaha zeka yh̄y my ahahumo kamypokzitsiarēta h̄y. Ikiatsa ja. Tsikaeni zuba kahumo ahakparawy.

¹⁶ Ikiatsa kasohe ty tsimypamykysonahaze:

– Pauro mytukze mynamy batu ziake iwatsatu myokyrysaro ty ihumo nepyk iwatahi mybo mybarapetu nikara, nimyspihikbataka – tsimaha.

¹⁷ Kaharereziuwytza ahabo iksipehahik batu zahaspikhikbatakanaha.

¹⁸ Kaharereze Titu ahabo zumu. Mytsy itukta niwatihi ahabo zumunaha. Asaktsa ahanamy ty batu tykse. Titu kawata, katsaktsa wasani tsimykarana. Katsaktsa ahahumo mysopyk tsimykarana h̄y.

¹⁹ Ikiatsa hi:

– O Pauro tuktsa asa tu tahabetesaha tsihikiknaha – tsimaha. Mytsaty ahabyitsa tsimykarana Deus okze ka tsimytsasokonaha. Ihumo zuba tsimybetsahakanaha. Kiristu nymwatawy ana humo hi tsimybetsahawynahaze ahatsyhyryze tsimytsasokonaha. Katsaktsa ahahumo mypokzitsirēta, iwatsahi pahatsumuēhī tsihikiknaha. Ahapunihikrēta tsimoziknaha ana hi tsimyzihikiknaha.

²⁰ Ahasoho bo mytsaty ziknakara. Ahabo pomoze ja mekywa tu tsimykarana. Iwa ha bo mytsaty mykara. Ikiatsa kino niwatihi. Kasoho bo mytsaty tsimykarana, meky watu sa my. Ahabo pomoze ja tsimyarape sapybyikinaha ja. Ahazokdiharēta ja. Awakytza humo ja tsipahaukaniknaha. Ahabo zuba ja mytsaty tsimynakaranaha. Tsikaharapehudizuikiknaha ja. Ahaharere wabymybarēta ja. Ahaharereziubyitsa tu metutu tsimopaparakana ja. Batu astsa bo tu mytsaty tsimykarana ja. Iwa tsimykarana zeka pahabetsak. Pahabetsakwynthaze ahasukatsihikrēta tsimoziknaha. Batu ahaku.

²¹ Ahasoho bo paikpa mytsaty mynakara. Ahabo mynakozoreze ahahumo kasukatsihikrēta. Kytsa ahatuk zeka simysapybyitsa tu nikarana. Ustsa okeza bo nisioktyhyryknaha. Wastuhu kytsa makutsa tu mynaharapeokorokona. Ustsa nisimybakanaha. Iwa tsikykarana zeka ana humo hi batu ahaku. Ahamysapybyitsa tu tsimykarana ty moewy byizeka kasikpybyrēta mozik. Deus okze ka ahahumo kasikpybyrēta.

13

Pauro Sesus tuktsa nisisukpehe.

¹ Abaka harakykbyihi ahabo mynakozore. Aba ahabo mynakozorezo. Deus harere papeu humo ziwatahaka:

– Aty zeka usta maku soho motsasoze: “O tohi batu mysapy my” ba h̄y taha. Petoktsa zuba harakykbyihitsa ja mopamykysokonaha iwa kytsa maha zeka: “O tohikta batu mysapy my” iwaze yh̄y tsimaha – niy. Iwa Deus harere papeu humo ziwatahaka.

² Utakta botu petok baba ahabo iknakozore. Asaktsa tahamysapybara ty batu moewy iwatahi iksibetsakak. Iwa mykarazo. Ahabo mynakozorezoze asaktsa tahamysapybara ty moewy ahabyizeka mysibetsakzo, sihumo kasakaniharēta mozik. Ustsa kytsa batu tysipeha niwatihi asa humo hi kasakaniharēta.

³ Utakta Kiristu harere zuba ahabo motsasokoro. Ana hi tsinymyry tsihikiknaha. Atahi ahatukze tsipunihikrēta niy, atahi zikwy ziwatawy h̄y, ana humo kino ahahyrinymyrēta. Utakta simysapybyitsa humo mysibetsakze ikiatsa hi:

– O anahi Kiristu harere h̄y – tsimykarana.

⁴ Kiristu mybarawy eze zikzurukuze tazikwy zerekik. Iwaze kytsa zibezenahaze iharapatawyhyta humo zihyrikiknaha izikwybyita zibezenaha. Deus zihyrikikpowy abaka izikwyrēnikita niyzikzo iwa ispituzo my. Katsa ituktsa tsimaha. Katsa kino niwatihi mybarawy ezektsa batu mypunihik. Abaka Kiristu harere bo zuba hȳ tsimykarannahaze Deus hyrikoso mytuk mynapykyryk. Katsa Korītio bo tsimopomonahaze izikwy humo mypunihikrētsa tsimoziknaha. Ahatsyhyryze izikwy katuk mynapykyryk iwatahi tsipahatsumuēhīekiknaha. Iwa h̄.

⁵ Ikiahatsa hi ahasoho ty mytsatziutahaktsa! Ahape tu ahasopyk:

– Sesus harere bo ja hȳ tsimykarannaha. Iharere humo ja ahaspirikporētsa. Deus hyrikoso ja mytuk mynapykyryk baba – tsimykarannaha. Iwa ahape tu ahasopyk. Ikiahatsa Sesus Kiristu harere bo hȳ tsimaha zeka iwaze ituktsa tsimoziknaha ana humo kino ahahyrinymyrētsa. Iharere bo hȳ ahabyizeka Kiristu batu ahatur ziknapykyryk.

⁶ Katsaktsa Kiristu humo myspirikporētsa babatsa tsimaha zeka, iharere bo zuba pykyhytu hȳ tsimykarannaha ana humo kino ahahyrinymyrētsa, ana hi tsimyzihikiknaha.

⁷ Ahatsyhyryze Deus bo tsimypamykysokonaha. Katsahi:

– O Deus myzo Korītio ezektsa tysitsumuēhīkta! Simysapybyitsa nikarannaha anahi pimoewynaha iwa tysitsumuēhīkta! – tsimaha. Ikiahatsa wasani tsimyzurukunaha ana hi mozihikik. Utsa kytsa tihi:

– O Pauro tuktsa Korītio ezektsa nisihrinymyryziukunaha iwatsahi siharere humo simysapyrētsa moziknaha – maha. Ana harere kino ba zikzihikik. Utsa kytsa tihi:

– O Pauro tuktsa Korītio ezektsa nisimyikinaha – maha. Ana harere kino batu waby iky.

⁸ Deus harere ba hawa tohi zikzukninaha. Ana harere bo hȳ tsimykarannaha iwaze ustsā kytsa bo tsimysitsumuēhīnaha zikaha, hawa wasani mykara ana ty kino hȳ mykarannaha tsimysitsumuēhīnaha.

⁹ Iwaze katsaktsa mypunihikbyize wasani tsimykarannaha. Iwaze ikiahatsa ahapunihikrētsa zeka mykurētsa tsimoziknaha. Iwaze ahatsyhyryze Deus bo tsimypamykysokonaha:

– O Deus myzo Korītio ezektsa tysitsumuēhīkta! Azikwy situk mynapykyryk iwatsahi tahamysapybara humo nimyzihikbyrinaha abaka simysapyrētsa babatsa moziknaha awatahaktsa – tsimaha.

¹⁰ Aba ahabo piwataha, papeu ty kaharaze pohyryktykta. Iwaze ahabo pomoze ba pahabetsakzo. Ahahumo batu kasakani Deus zikwy katuk mynapykyryk iwaze pahatsumuēhī ana hi mozihikik. Deus hyrikoso bo yh̄ tsimaha ana hi mozihikik. Atahi batu zaha my. Uta kino niwatihi. Ba pahabetsakzo iwatahi papeu ahabo ziskyryk. Hawa taeze ahabo pomo. Iwa h̄.

¹¹ O katukytsa kawatahaha ahabo asiba nepyk. Ahamysapyrētsa ty-nakaranahaktsa kytsa! Kaharere bo wabyziutaha. Tyharape pokzitsikinahaktsa! Sesus tuktsa atsawatu mysaty tsimykarannaha. Ikiahatsa tukyh̄ tsimykarannaha. Iwaze Deus ahahumo tsimypokzitsiarēta, atahi pahahyrinymyryky ihumo ahakurētsa tsimoziknaha. Deus ahatur tawahi mynapykyryk h̄.

¹² Tynaharape hapryrykknahaktsa iwa ustsā pe hawa taharapepokzitsikinaha tsimymywatawynaha. Asaktsa Sesus humo sispirikporētsa katuk hi:

– O Korītio ezektsa humo myhyrikbarētsa – mykarannaha.

¹³⁻¹⁴ Ahatsyhyryze Deus bo mopamykyso:

— O mypehakatsa Sesus Kiristu Korītio ezehta tysisapywyky. O Deus myzo sihumo tysipokzitsiukta! O Deus hyrikoso situk tawahi mynapykyrykta! — my. Niwazuba.

Pauro niy

Karatas ezektsa bo ziwatahaka

Taparaka Deus Sudeutsa zuba nisiwatawy iwaze hi ityryktsa niyziknaha, isopykwytza nisispirikpoko, sihyrytsa sipiakzyzykyhytsa. Iwa ityryktsa ziwatawy. Sidisahawy kino niwatihi ikaty hi ziknatahadisahakanaha sibo zuba ziknakara. Aiba Sesus Kiristu izumuze mysapyzeken nihyrikosokda iwaze asaktsa Sesus humo sispirikporētsa myziknaha zeka Deus tuk tahawahi mynapykyryknaha. Sesus Kiristu tazo bo ziksizoze ituk zinymyrykynahatsa paikpa tisapyrēna ty niharapespirikpokonaha. Sizubarētsa Sesus humo sispirikporētsa, Sudeutsabyitsa tuze iwatsahi Sudeutsa sopykwy batu aha tahyrytsa ty batu isty piakzyzyk. Pauro Karatas niparakze wastuhu Sudeutsa Sesus tuktsa pe niaha. – Ahahyrytsa piak tysizyzyktaha anahi Deus myzihikik – nikaranaha. Anahi Pauro ziwabyze sibo ziwatahaka ispe niy:

– Tsimyinaha tahahyrytsa ty batu isty piakzyzyk, Sesus humo ahaspirikporētsa tu zeka Deus harere bo zuba ma tsimykaranaha anahi Deus myzihikik – niy. Iwa Deus Pauro ziapewywy iwaze aparakbaha tanymyryky.

Tapara aparakbaha bo mytsaty mykara.

¹⁻² Uta Pauro. Ikiahatsa tsinakypykbanahaze Deus harere tsipiwabynaha ahabo iwatahaka. Deus zikwatawy. Kytsa humo ka batu. Deus myzo hi zikwatawy iykzoho mozik. Sesus Kiristu humo kino niwatihi zikwatawy atahi Deus zihyrizikpowy. Katukytsa kabaze modyhydyhykynahatsa, asa harere ahabo piwatahakanaha. Tynakypyknanahatsa Karatas eze tsimaha. Tsinazuzukbanahaze Sesus harere tsipiwabynaha.

³ Ahatsyhyryze Deus bo mopamykysoko:

– O Deus myzo Sesus tuktsa Karatas ezektsa tysisapywyky. O Sesus Kiristu mypehakatsa tysiakusukniwyky – my. Iwa ahatsyhyryze Deus bo mopamykysoko.

⁴ Kiristu mysapyzeken nihyrikosokda, kytsa zibezekenahaze hyŷ zuba niy, iwatahi mysapybyitsa tsikykaranaha ihumo Deus nimyokzohik. Kiristu nihyrikosokdaze Deus nawa hi nizihikik. Iwaze mymytsumuēhī. Abaka hawa kytsa sisopyk batu tsimykaranaha, katsaktsa Kiristu humo meky watu tsimoziknaha.

⁵ Iwatsahi Deus bo tynapamykysokonahaktsa! – O Deus ikia zuba wasani tsimykara. Ikia zuba tsamysapyrēta – tsimaha. Iwa hi tsimynakaranaha.

Deus wasania ty zuba my.

⁶ Kyze tubabatu Deus zahawatawy. Sesus Kiristu myzahasapywyky. Asiba Deus tsierek tsihikiknaha ana hi iwaby. Hawa tsimykaranaha batu isapy my, ana humo hi batu kahyrinomyry kapetu kasopyk:

– Nawa ha ty Karatas ezektsa soho piwabyky wasani ja. Batu kanyhy – my. Usta maku mekywaha humo pahahyrinomyryky anahumo hi yhŷ tsimykaranaha. Atahi:

– Kaharere wasani my – mybarapetu nikara. Ikiahatsa iharere bo yhŷ tsimykaranaha zeka kaharere bo batu hŷ tsimaha. Kaharere humo tsimyspiriktsokdabanaha ana humo hi kamytsatyharēta mykara.

⁷ Tohi harere humo batu mysopyksapy my. Deus harere ana zuba wasani my. Simyknianikitsa ustsaharere ahabo motsasokonaha iwa tihi:

– Myharere wasani – mybarapetu mykaranaha. Asahi Deus wasania ty hi myzapywak tsihikiknaha hỹ. Iwaze Deus wasania ty Sesus soho zisapybyrikinaha.

⁸ Aty zeka Deus wasania ty mekywaha tu pahahyrinymyry, iharere mysapybyri iwaze iharere meky watu my. Iwaze Deus ispe:

– O ikiahatsa batu ahamysapy tsimaha. Sinini ykarawy bo pahapehahik – iwa Deus motsasoko zeka wasani my. Uta, katukytsa, bijoikpe iknykta iwatsa Deus wasania ty mekywahatu pahahyrinymyry zeka Deus mysininiwy bo wasani mytsaty mykara.

⁹ Tubabatu tapehawu iktsaso. Abaka ahabo atsatu motsasokozo. Amakata ahabo mozumu zeka meky harere pahahyrinymyryky Deus hi:

– O atakta batu imysapy my. Sinini ykarawy bo pipehahik – niy. Deus wasania ty katsa botu ahabo tsiktsasokonaha ana bo hi zuba hỹ tsimykaranaha.

¹⁰ Iwaze kino Deus wasania ty motsasokoze kytsa hi – O atakta mykparawy – iwa batu mozihikik. Deus kape my zeka:

– O atakta tsimysapyrẽta – my ana hi mozihikik. Deus kasoho ty motsasoz-iuku zeka kakurẽta hỹ. Myzubaha kasoho motsasoz-iukunaha zeka anahi mozihikik iwa zeka batu Sesus tsumuẽhĩtsa babata ziky.

Hawa niyta Pauro Deus ykzoho niyzik.

¹¹ Kyze – O katukytsa Deus harere ahabo motsasoko kytsa harere ba ziktsaso. Ataharere bo ka kytsa batu mytsaty zikaha.

¹² Ataharere ty ka kytsa batu katy hyrinymyry. Sesus Kiristu hi zikyrinymyry hỹ.

¹³ Kasoho botu tsiwabynaha hỹ. Utakta Sudeu my. Iwatahi Moises harere bo zuba hỹ ziknakara. Sesus harere humo hỹ nikaranahatsa iksisukyryky. Asahi inauzuzukbanahaze Sesus harere ziwabykynaha asahi ziknasisukyryyikik. Iwa Sesus harere bo ka ja ba hỹ zikaha mytsaty ahabyitatu ikykara.

¹⁴ Taparaktsa myzotsa harere bo pykyhytu hỹ ikykara. Aparakbaha mysopyk humo zuba yhỹ ziknakara. Katsa zuba myhyrinymyrẽtsa mytsaty ahabyita tu iky, iwatahi nanabyi sisopyk humo hỹ ikykara.

¹⁵ Deus hi ziksapywy. Kapurukbyizetu Deus zikwatawy. Iwaze ikypykze Deus wasania ty ustsas kytsa bo zikpeha. Kakzohota tu Deus wasania ty ustsas kytsa bo motsasoko.

¹⁶ Deus tatse kabo ziwatawy iwaze Deus tse zikspirikpoziuku. Iwatahi aparakbaha Sudeutsabyitsa bo Sesus soho iktsasoko. Iwaze aparakbaha bo batu tyso: “O amy ty Sesus soho mysihyrinymyry” – my. Iwa batu tyso.

¹⁷ Damasko eze tuze batu Serusarẽhe bo zuk. Batu Sesus ykzohotsa bo kozore. Atazuba Arabija imyra zubaha bo inakozore. Aiba tohi eze zuba Damasko bo ikziksizo.

¹⁸ Nawa harakykbyi niytyk tseheze Serusarẽhe bo ikparak. Peduru bo ikumu, ituk ikapykyryksyky mytsyhyrytsa wa ikuruze iwaze Damasko bo iksizo.

¹⁹ Serusarẽhe eze tuze, ustsas Sesus ykzohotsa ty batu isty ny. Mypehakatsa Sesus tsy bo zuba ikozo. Tsiaku inarokota.

²⁰ Nawa ha ty ahabo piwatahaka wasapehe mykara. Deus okzeka piwatahaka batu kamyspihikbata.

²¹ Kyze Sirija bo ikukuru. Iwaze Sirisia bo ikukuru.

²² Kytsa Sesus tuktsa Sudeu ezektsa batu katyny niaha. Asaktsa batu katy nyhabyitsa maha.

²³ Iwaze zuba kasoho ziwabynaha:

– O atakta tubabatu katsa nimysukyryikik abaka Sesus harere bo hyỹ isopyk ihumo tispirikporēta niyzik. Atahi myzubaha bo motsasoko hawa Sesus harere bo hyỹ mykaranahaze hawa iharere bo zuba yhỹ mykaranaha iwa motsasoko – mykaranaha. Iwa kasoho ziwabykynaha.

²⁴ Iwaze Sesus tuktsa Deus bo mosakibazikiknaha:

– O Deus katsakta mykurētsa. Hawa tsimykara Pauro humo mykurētsa tsimoziknaha – nikaranaha.

2

Pauro ustsakzohotsa tuk my.

¹⁻² – Nawa niytyk tseheze kīsī ziharamuze Serusarēhe bo ikziksizo. Deus kape niy: “Ikiakta Serusarēhe bokta!” – niy.

Hyỹ iky. Iwaze Serusarēhe bo ikparakzo. Baranabe katuk niukuru. Katsa Titu pe tsikaha.

– Ikia tihikta! – tsikaha.

Hyỹ niy. Titu Sudeubyita. Iwaze katsa Serusarēhe bo tsikukurunaha. Tsikumunahaze myspirikpokotsa bo tsikaha. Katsa myspirikpokotsa bo zuba tsiktsasokonaha. Sudeutsabyitsa iksihyrinymyryky myspirikpokotsa bo iktsaso. Kaharere Sesus soho Sudeutsabyitsa bo iktsasoikik iwa sibo iktsasoko. Uta kapetu kasopyk:

– O kaharere Sesus soho bo yhỹ zikaha byizeka hawa ty iktsasoko na haka mohokda – mytsaty ikykara. Iwatahi kaharere ty sibo iktsaso.

³ Hawa niy tisapyrēna. Mytukta Titu Sudeubyita batu ipe niaha:

– O tsiptakzykikta! – maha. Iwa batu tyso.

⁴ Kytsa asahi Sesus harere bo batu hỹ zikaha iwatsahi sispirikpoziubyitsa tu:

– Tsiptakzykik zeka wasani my – nikaranaha. Asakta sisukparatsitsa. Kytsa papatu nipupunaha. Batu Sesus tuktsabyitsa maha. Katsakta Sesus tuk atsatu mytsaty tsimykaranaha ana hi nizokparakanaha. Sesus sopyk ty zuba tsimykaranaha iwatsahi mykurētsa hỹ. Asakta pykyhytu Moises sopyk bo zuba hyỹ mykaranaha katsakta nawa tihi ana hi nizihikiknaha.

⁵ Utakta siharere bo hỹbyri ziknakara. Katsahi:

– Deus harere ty Sesus soho wasani zuba tsimaha. Iharere bo zuba hyỹ tsimykaranaha – tsikaha. Iwaze siharere batu mywabyhy.

⁶ Asakta sihumo kytsa sizubarētsa myspirikpokotsa watsa mykaranaha. Asa harere ezytyk ty batu tyso. Deus okezeka kytsa batu abazubatsa maha ihumo myzubaha atsatu maha. Iwa utakta niwatihi mytsaty mykara.

⁷ Deus wasania ty Sesus soho nitsasoikik ana soho hi:

– Ikia Deus wasania ty Sudeutsabyitsa bo motsasoko atsawatu Peduru Deus wasania ty Sudeutsa bo motsasoko.

⁸ Deus hi ikia zapehahik iakzohota hi Sudeutsabyitsa bo, izikwy atuk mynapykyryk. Astatu Deus Peduru zipehahik iakzohota hi Sudeutsa bo izikwy ituk mynapykyryk. Abaka ana humo kino tsipinymyrykynaha – niaha.

⁹ Iwaze Tsiaku, Peduru, Suão iwatsa sispirikpokotsitsa Sesus tuktsa tuk mype niaha:

– O mytukytsa Deus hi Sudeutsabyitsa bo pahapehahik ana hi ahyrizikt-sokzawy izikwy ty ahabo nyny my. Tisapyrēna tsimaha – niaha. Iwatsahi mymykusukniwykynaha. Mytsyhyrypetsa humo paik niaha iwaze siharereziuwyttsa niyziknaha. Kyze mype niaha:

– O ikiahatsa mytuktsa babatsa. Ikia Baranabe kino niwatihi Sudeutsabyitsa boktsa! Utakta katyryktsa bo my. Iwa wasani my.

¹⁰ Tsimykurunahaze Sudeutsabyitsa bo katyryktsa sinamybyitsa bo ahamytsatyhu ja ispiriktsokda spiriktsoda byijataha! – niy.

– Yh̄y. Sinamybyitsa humo mymypokzitsirētsa – tsikaha. Botu sinamybyitsa tsiksitsumuēh̄ikīnaha.

Pauro Peduru Sesus tuktsa okze zipehaka.

¹¹ Kyze Peduru Ātiokia bo inakozoreze Sesus tuktsa okze tu zipehaka. Imysapybyita hi zibetsakak.

¹² Tapara Peduru zumuze Sudeutsabyitsa asahi Sesus tuktsa maha situk tahadisahakanaha. Kyze Tsiaku itukytsa Ātiokia bo nisipehahik. Peduru sibo nikoze tisikpybyrēta niyzik. Tapetu nikara:

– O asaktsa Tsiaku tuktsa asahi Sesus harere bo hȳy nikaranahaze sispirikporētsa. Sudeutsabyitsa mysipiakzyzykik tsihikiknaha iwaze kahumo siharerewabymybarētsa, iwatahi Sudeutsabyitsa tuk ba zikdisahazo metutu mozikdisahaka iky – niy.

¹³ Iwaze Sudeutsa Sesus harere bo hȳy nikaranaha iwatsahi ihumo sispirikporētsa Peduru humo sisikpybyrētsa niyziknaha. Sispirikporētsa nikaranaha iwatsa tu nawa ha ty batu simysapy nikaranaha. Peduru watsa nikaranaha. Hawa nikaranaha Baranabe kino niwatihi siwatu nikara.

¹⁴ Iwatahi Peduru ipehaka, Sesus harere humo batu h̄y niy iwatahi ibetsakak. Sesus tuktsa inazujukbanahaze ibetsakak. Ipe iky:

– Tsiwabytoktokta! Ikia Sudeu tsimy. Hawa skaraba Sudeutsabyitsa sopyk ty mykara atsatu asopyk tsimy. Sudeutsa wata batu tsimykara. Iwatahi myzubaha Sudeutsa watsa sisopyk mozihihik. Ana kino batu imysapy my. Asopyksapy byihuja – iky.

Sudeutsa, Sudeutsabyitsa niwatihi Sesus harere bo hȳy mykaranaha asahi zuba Deus bo mysiokyhyryk h̄y.

¹⁵ Kyze katsaktsa Sudeutsa tsimaha. Myzotsa Sudeutsa niaha. Utsa kytsa simysapybyitsa nikaranaha iwa Sētios mekywatsa soho nisinaropykyknaha.

¹⁶ Iwatsa tu katsa Moises harere ibyky bo zuba yh̄y tsimykarannahaze. Deus batu mytyso:

– O asaktsa simysapyrētsa maha – iwa batu tyso. Katsa Sesus Kiristu harere bo zuba hȳy tsimykarannahaze Deus mysoho tihi:

– O asaktsa simysapyrētsa maha – my.

Katsa Sesus harere bo yh̄y tsimykarannahaze humo Deus okzeka mymysapyrētsa tsimoziknaha. Batu aty tohi Moises harere ibyky bo yh̄y my zeka tsimysapyrēta mozik. Deus tatuk hi mymyoktyhyryk iwatsahi mysapyrētsa tsimaha. Moises harere ibyky bo hȳy tsimykarannahaze zeka Deus okzeka batu mysapy tsimaha, ana humo kino batu Deus bo mymyoktyhyryk.

¹⁷ Deus tatuk mymyoktyhyryk iwatsahi Moises harere ibyky tsimoewynaha. Sesus Kiristu harere bo zuba yh̄y tsimykarannahaze. Iwaze aparabaha mype:

– O ikiahatsa Sudeutsabyitsa watsa tsimoziknaha. Ahamysapybyitsa tsimykarannahaze – mybarapetu mykaranaha. Iwa zeka Sesus Kiristu humo ahamysapybyitsa tsimykarannahaze. Batu ba. Sesus Kiristu humo batu tymyi.

¹⁸ Kapetu kasopyk zeka:

– O Moises harere ibyky humo yh̄y mykarazo iwaze kasapybyita mykara zeka mohokda – my. Utatu pikspihikbataka. Iwa mytsaty mykara zeka iwatahi Moises harere ibyky batu h̄y mykara. Sizubarētsa kasoho tihi:

– O atakta batu imysapy my – mykaranaha.

¹⁹ Moises harere humo inymyrytohi iwa zeka iharere bo batu hỹ mykara. Iwatahi batu kasapy mozik iharere bo yhỹ mykara. Iwatahi Moises harere ibyky zimoewy. Abaka Kiristu harere bo zuba hyỹ mykara isopyk mykara. Kiristu kasapyzeken iharapatawyhyta humo nihyrikosokda. Kasapyzeken nihyrikosokdaze kasopykwy nepykba, abaka ituk mynapykyryk ihumo zuba kamysapyrēta mozik.

²⁰ Utakta Sesus zuba mozihikik mykara, atahi kasapyzeken nihyrikosokda iwatahi kahumo izihik bara ty ka pimoewy mykara. Kiristu hyrikoso katuk mynapykyryk ihumo zuba mozuruku, iwatahi abaka kasopykwy pimoewy. Abaka Deus tse humo kaspirikporēta. Atahi namykse nikara ana humo hi utakta batu kawahi zikara. Sesus kapokzi tsimypokzitsiarēta iwatahi ituk mynapykyryk.

²¹ Deus mymypsapywyky ana humo hi Kiristu mysapyzeken nihyrikosokda. Iwatahi kakurēta. Deus mype my zeka:

– O ikiahatsa ahamysapyrētsa Moises harere ibyky humo tsimykaranaha – Iwa batu tyso. Iwa niy zeka hawa hāta sa Kiristu nihyrikosokda. Nawa batu ba. Kiristu harere bo hyỹ ikykara ihumo zuba kaspirikporēta iwaze Deus tihi:

– Ikia tsamysapyrēta. Kiristu katse asapyzeken nihyrikosokda ana humo hi tsamysapyrēta – my.

3

Ikiahatsa Moises Deus harere ibyky naha bo ja yhỹ tsimaha. Deus wasania ty bo ja yhỹ tsimaha. Na waha sa tsimyzihikiknaha.

¹ – O Karatas ezektsa ahakedepyktsa zuba. Aty sa zahaspihikbataka. Ahape mybarapetu nikaranaha. Hawa kytsa Sesus Kiristu iharapatawyhyta humo zihyrikiknaha iwa zibezenaha, ana kino botu ahabo iktsaso.

² Ahabo motsaso zeka my:

“Hawa sa Deus hyrikoso ahatuk mynapykyryk. Ikiahatsa Moises harere ibyky bo yhỹ tsikykaranahatsa ja Deus hyrikoso ahatuk napykyryk my. Ikiahatsa tihi:

‘Batu ba.’ Katsaktsa Sesus Kiristu harere bo hyỹ tsikykaranahaze iharere humo myspirikporētsa, ana humo hi Deus hyrikoso mytuk mynapykyryk” – tsimaha.

³ – O ikiahatsa ahakedepyktsa. Sesus harere bo hyỹ tsikykaranahaze Deus hyrikoso ahatuk mynapykyryk. Abaka Deus hyrikoso tsiperek tsihikiknaha. Iwatsahi ahape tu tsimykaranaha: “Abaka myhumo zuba tsimyzurukunaha tsimaha” – my. Batu wasani my.

⁴ Hawa ahabo nikara ana bo hi batu mytsaty tsimykaranaha Deus hyrikoso ahatuk mynapykyryk iwatsahi ihumo arek arek byitaha!

⁵ Deus hi tahyrikoso ahabo zipeha iwatahi ahatuk mynapykyk. Ihyrikoso humo hawaha kytsa batu zikaha atahi ahatuk ziknakara. Iwa humo nikara. Sesus harere bo hyỹ tsikykaranahaze ahatuk nikara. Iwa hỹ. Moises harere ibyky bo yhỹ tsikykaranaha zeka Deus hyrikoso batu ahatuk mynapykyryk.

⁶ Aba Abarão soho bo mytsaty tahaktsa! Deus papeu humo isoho botu ziwataha:

– O atakta Deus humo tispirikporēta iwaze Deus tihi: “O Abarão kaharere bo hyỹ nikara kahumo tispirikporēta tsimysapyrēta niyzik. Isapybyikia ty nikara nisiokzohik ikspiritsokdatawy” – niy. Iwa Deus papeu humo botu ziwatahaka niy.

⁷ Iwatsahi asaktsa Sesus harere bo hyỹ mykaranaha iwatsahi Abarão watsa maha. Sispirikporêtsa Abarão tsekokatsa babatsa maha sisoho humo tsimaha.

⁸ Tubabatu taparaktsa botu Deus papeu humo ziwatahaba Sudeutsabyitsa soho botu ziwatahakanaha. Asaktsa Deus harere bo hyỹ mykaranaha iwatsahi ihumo sispirikporêtsa maha. Iwaze Deus tihi:

– O asaktsa Sudeutsabyitsa kahumo sispirikporêtsa iwaze ispe: “O ikiahatsa ahamysapyrêtsa tsimoziknaha” – my.

Iwa Deus papeu humo taparaktsa botu ziwatahakanaha. Hawa Deus wasania ty Abarão bo nitsasoko aibani zuba atsatu mykara. Iwaze nawa ha ty botu nitsasoko atsatu wasani my ana kino aparakbaha ziwatahakanaha. Deus tihi:

– O Abarão ikia kahumo tsaspirikporêta iwaze mybarawy sizubarêtsa ahumo mysisapywyky. Myzubaha nanabyitaba ahumo mysisapywyky – niy.

Iwa taparaktsa Deus papeu humo ziwatahakanaha.

⁹ Iwatahi Abarão Deus harere bo hyỹ nikara iwatahi ihumo tispirikporêta iwaze Deus zisapywyky. Aty Deus harere bo hyỹ mykara ihumo mospirikpo zeka ibo pisapywyky. Abarão wata nikara. Iwa myhỹ.

¹⁰ Iwaze aty zeka:

– O utakta Moises harere ibyky bo yhỹ my zeka iwaze kamysapyrêta mozik – my. Mytsaty ahabyita mykara atakta Deus isoho tihi:

– Atakta batu isapy my – my. Taparaktsa Deus papeu humo ziwatahakanahaze:

– Aty zeka Moises harere bo yhỹ mykara iwaze iharere bo estuba zuba batu hỹ my iwaze Deus ipe my: “Ikia batu amysapy” my – iwa Deus ziwatahaka.

¹¹ Taparaktsa Deus papeu humo ziwatahakanaha:

– Ata zuba Deus harere bo hyỹ mykara ihumo mospirikpoko ata soho Deus hi “O wasani tsimozik” my iwa ziwatahakanaha. Batu aty tohi Moises harere ibyky tsizubarêna humo hyỹ mykara, anatyhi batu zikaha. Ana humo kino myhyrinymyrêtsa.

¹² Aty zeka estuba Moises harere ibyky bo hyỹ my zeka batu atsa botu Deus harere bo hyỹ mykara, atakta ihumo batu ispirikpo. Aty Deus humo tispirikporêta tu meky watu niyzik. Aty Moises harere ibyky bo yhỹ mykara atahi iharere bo zuba mykara hỹ. Aty Deus harere bo yhỹ mykara iharere humo mospirikpoko – my. Ana kino meky watu mozik. Iwa my.

¹³ Tubabatu Deus papeu humo:

– Aty kytsa iharapatawyhyta humo pibezenaha atakta tamysapybyizikyty zibezenaha. Iwatsahi pibezenaha zeka wasani my – iwa ziwatahakanaha. Katsa niwatihi. Mysapybyitsa tsikykaranaha Kiristu hi mysapyzekeny nihyrikosokda.

¹⁴ Atahi kytsa iharapatawyhyta humo zihyrikiknaha iwatahi mysapyzekeny nihyrikosokda. Nihyrikosokdaze mysapybyikitsa tsikykaranaha ihumo Deus mymyokzohik. Deus hi:

– Ikiahatsa kaokzeka tsahamysapyrêtsa – my. Tubabatu Abarão Deus harere bo hyỹ ziknakara ihumo nispirikpokoze Deus isoho tihi:

– O ikia tsamysapyrêta – niy. Katsaktsa Abarão watsa tsimaha. Deus harere bo hyỹ tsimykaranaha ihumo tsimyspirikponaha iwaze Deus hyrikoso mytuk mynapykyryk. Iwahatu kytsa Sudeutsabyitsa iharere bo hyỹ mykaranaha zeka ihumo sispirikporêtsa moziknaha. Deus hyrikoso sibo zipeha, ihyrikoso situk mynapykyryk. Iwa myhỹ.

Moises Deus harere taparaky nitsasoko. Hawa Deus harere ty wasani mykara.

¹⁵ – O katukytsa hawa tsimyzurukunaha humo motsasoko. Kytsa petoktsa astsatu mozihikiknaha anasoho papeu humo piwatahakanaha. Zikspirikt-sokdanaha bara ty hi petoktsa naro ziwatahakanaha. Iwaze batu aty tohi papeu humo ba zimyi. Estuba zikino batu arek ziky. Utsa harere papeu humo piwatahaka batu ziky. Hawa ziwatahakanaha anaty zuba mykaranaha.

¹⁶ Iwata tubabatu Deus Abarão bo nitsasoko. “O ikia pasapywyky. Estuba zubata atsekoka iknykta ibo pisapywyky” nikara. Deus watahaha ty batu tyso atsekokatsa sizubarêtsa bo mysisapywyky iwatahaha tihi estuba zuba atsekoka iknykta ibo pisapywyky – niy. Abaka Kiristu soho humo myhyrinymyrêtsa hỹ.

¹⁷ Nawa ha ty motsasoko pahahyrinymyry. Tubabatu Deus Abarão bo nitsasoko. Ipe niy:

– O ikia pasapywyky. Kaharere humo yhỹ tsimy hỹ – niy. Iwaze kwatero sētos terĩta niytyk tseheze Deus Moises bo iharere nitsasoko. Nawa ha ty Deus Abarão pe wasani my. Nawa ha ty Deus Moises pe wasani my. Petoktsa hatsa bo nitsasoko. Tapara Deus Abarão pe niy:

– O ikia pasapywyky – niy. Iwaze usta harere Moises bo nitsasoko taparaky harere batu meky watu ana kino tapara tu ituk nitsasoko.

¹⁸ Iwatsahi hawa Deus mymysapywy tsihikik iharere humo zuba hyỹ tsimykaranaha. Katsa Moises harere ibyky bo yhỹ tsimaha zeka Deus isapyrēnikia ty batu mybo nyny my. Deus isapyrēnikia ty Abarão bo nyny niy. Amy humo niy. Iharere humo ipe niy iwatahi isapyrēnikia ty ibo nyny niyhy.

¹⁹ Iwaze kytsa mytsaty mykaranaha. Amo skaraba Moises harere ibyky nitsasoko. Moises harere puětsik ana hi Deus botu Abarão pe niy nimyhyrinymyryky, mysapybyitsa tsikykarana nimywatawyky. Abarão tsekoka Kiristu batu isukmo taziwazy iwaze Moises harere nitsasoko ana bo hi yhỹ tsimykaranaha. Kiristu izumuze Moises sopyk tsimoewynaha. Deus bijoikpe iknyktsa inasipeha iharere nitsasoko Moises bo niaha. Inasiknahaze nitsasokonaha maku estuba zubata bo niaha. Iwaze zikiehe atakta Moises myzubaha bo atsawatu nitsasoko.

²⁰ Deus Abarão pe niy ibo zuba nitsasoko. Bijoikpe iknyktsa bo batu tyso. Utsa kytsa bo batu tyso. Abarão bo zuba nitsasoko hỹ.

Amy sa Moises Deus harere taparaky nitsaso wasani niy.

²¹ Kyze kytsa tahapetu sisopyk:

– O Moises Deus iwatahaka zika Deus harere meky watu ja. Katsa Deus tuk mywahi tsinapykyryknaha Moises watahaha humo ja ana humo hi tsimykaranaha – maha. Batu ba. Moises watahaha bo hyỹ tsimahaze batu mysapy tsimoziknaha. Iwa hỹ.

²² Deus watahaha tihi:

– Aparakbaha mybarawy ezektsa imysapybara katsa mytuk. Asaktsa Deus humo sispirikporêtsa amy ty Deus botu nitsaso isapyrēnikia ty sibo nyny mynakara – niy.

²³ Tapara Moises harere ibyky bo yhỹ nikaranaha. Sihurukutsa watsa asahi ba zikwaknaha isopykwy batu zikaha. Bykyze Sesus harere bo hyỹ mykaranaha iwaze ihumo sispirikporêtsa moziknaha.

²⁴ Iwatahi Moises harere ibyky myhyrinymyrytsa wata my. Nawa ha ty batu isapy nimyhyrinymyry. Isopykwy humo kino mysapybyitsa tsikykarana nimyhyrinymyryky iwaze Kiristu izumuze katsaktsa iharere

bo hyĩ tsimykaranaha ihumo myspirikporẽtsa tsimoziknaha ana humo hi mymysapyrẽtsa tsimoziknaha.

²⁵ Abaka Kiristu harere bo hyĩ tsimykaranaha ihumo myspirikporẽtsa Deus okzeka mymysapyrẽtsa iwatsahi Moises harere ibyky tsimoewynaha.

²⁶ Ikiahatsa Kiristu Sesus harere bo zuba hyĩ tsimykaranaha iwatsahi ihumo ahaspirikporẽtsa iwatsahi Deus hyrytsa tsimoziknaha.

²⁷ Sesus humo ahaspirikporẽtsa kytsa zahaharasusuhiknaha niaha. Ikiahatsa Kiristu watsa puẽtsik tsimyzihikiknaha.

²⁸ Iwatsahi myzubarẽtsa Sesus tuktsa maha, Deus okzeka Sudeutsa Sudeutsabyitsa watsa my. Kytsa tarabaja batu okyrysaro humo sinamyrẽtsa watsa my. Maku kino wytykyryk wahaza my. Deus okzeka atsaesubaha maha. Sesus Kiristu humo sispirikporẽtsa Deus okzeka atsabarẽtsa maha.

²⁹ Iwatsahi Kiristu harere bo hyĩ tsimykaranaha ihumo myspirikporẽtsa katsa Abarão tsekokatsa watsa. Katsaktsa Abarão sapyzeken tsimaha iwaze Deus isapyrẽnikia ty ibo nitsasoko. Abaka atahi mybo nyny mykara.

4

¹ Makuskyry iykpykbyize batu ihyrinomyry. Batu inamyky. Puẽtsik pyk myze taypykze iwaze tisokpykziurẽta. Tsinamyrẽta. Iykpyk byizeka maku tarabaja batu okyrysaro wata, tahawatu zipehakanaha. Utsa kytsa harere bo yhy mynakara.

² Mytaypykze ihyrinomyrytsa zihyrinomyrykynaha. Amakata inamy perykytsa. Asaktsa ihumo simypokzitsiukrẽtsa. Iwa isopyk. Kyze izo tihi:

– Aba katse itaypyk niy abaka batu zipokzitsinaha – niy.

³ Iwata katsa deustsabyitsa harere humo yhy tsikykaranaha. Sipokso mypybyrẽtsa. Kyze Deus harere ty humo tsiwabyziunaha.

⁴ Kyze nawa zuruze Deus botu ziwatawy Deus tatse mybarawy ezektsa bo zipehahik. Atahi mybarawy eze nipuruk mywata niyzik. Mybarawy ezektatsa ije niyzik. Taypykykze Moises harere ibyky bo yhy ziknakara.

⁵ Iwaze myzubaha bo Deus bo mymyoktyhyryk. Katsaktsa Moises harere ibyky bo yhy tsimyzihikiknaha katsa kino mymyoktyhyryk. Mysapyzeken nihyrikosokda iwatahi mysapybyitsa tsikykaranaha Deus nimyokzohik iwatsahi ihyrytsa tsikyziknaha.

⁶ Iwaze Deus tse Sesus tazo hyrikoso mybo zipeha, mytuk tawahi mynapykyryk. Ata humo zuba katsa Deus bo mopamykysoikik:

– O myzo ikia humo ka mymypokzitsiarẽta – tsimaha.

⁷ Iwa Deus niy. Tapara ikiahatsa nawaha ty batu isapy tsikykaranaha. Ahasopyksapyhu ja. Abaka Deus hyrytsa tsimoziknaha, ihyrytsa tuze isapyrẽnikia ty botu nitsaso ahabo nyny my.

Pauro Karatas ezektsa humo paikpa mytsaty ziknakara.

⁸ Tubabatu Deus harere bo batu hy tsikykaranaha ahaspirikpobyitsa tsikykaranaha iwaze deustsabyitsa hyrikoso sapybara harere bo zuba yhy tsikykaranaha.

⁹ Abaka meky watu. Deus humo ahahyrinomyrẽtsa. Deus hiba zahany, iwatuze hawa skaraba deustsabyitsa harere bo yhy tsimykaranahazo. Siharere humo ahabyitsa tu ana humo hi tsimyzihikikzonaha.

¹⁰ Ikiahatsa hawaze ja, byzoje pirahanahaze niytyk tseheze iwa ana soho ty pykyhytu tsiwabytoktonaha.

¹¹ Hawa tsimykaranaha paikpa mytsaty tsimykaranaha. Iwaze kapetu kasopyk:

– Nawa ha ty Sesus harere iksihyrinomyryky batu ja – mykara.

¹² – O katukytsa! Ahabo myzapykyky. Tubabatu Moises harere ty pykyhty yhȳ ikykara. Kyze meky watu ikyzik. Ahawatu ikyzik. Abaka ikiahatsa Moises harere bo yhȳ tsimyzihikikzonaha iwatsahi Deus okzeka ahamysapyrētsa tsimoziknaha mytsaty ahabyitsa tsimykaranaha. Tsipimyikinaha zeka ba kahumo zikaha – my.

¹³ Ahaspiriktsokda byihuja tapara ahabo iknakozoreze kamyitsapyrēta ikykara iwatatu Deus harere ahabo iktsasoko.

¹⁴ Kamyitsapyre tuze kapokso batu ahasikpyby. Kaharere humo tsiwabytoktonaha. Bijoikpe iknykta Deus tsumuēhītsa Sesus Kiristu watihi ahabo my zeka ja hawa siharere tsipiwabynaha iwa kaharere tsiwabykynaha. Kahumo ka tsamyharerewabyrētsa h̄y.

¹⁵ Ahakurētsa tsikaha. Kahumo tsimypokzitsirētsa h̄y. Ahahyriktsa kabo tsiksibobokyzykynaha. Hawa ha ty ahabo ipokzitsia ty kabo tsinyny tsihikiknaha.

¹⁶ Utakta Deus harere baba humo ahabo iktsaso ana humo hi ja ahakuriokrētsa tsimykaranaha.

¹⁷ Asaktsa Deus soho ty mybarapetu mykaranaha siharere baba zuba tsiwabyziukunaha. Ahahumo sizokdirētsa. Ahaokzeka wasanitsa watsa mynapykyryknaha iwa zeka kaharere bo batu h̄y tsimaha, ana hi mozihikiknaha. Iwaze siharere bo zuba yhȳ tsimykaranaha mytsaty mykaranaha.

¹⁸ Aparakbaha ahaokzeka simysapyrētsa mahaze pahasapywykynaha zeka wasani myh̄y. Ahatukbyitsa tuze pahasapywykynaha zeka wasani my.

¹⁹ – O katukytsa ahahumo kamypokzitsiarēta. Utakta wytyk wata. Atywatatsa tabykyhy pepurukze tsimyitsapyrētatsa! Ikiahatsa Kiristu harere tsikaeni zuba ahahyrinymyrētsa iwatahi ahatsyhyryze sinini mykara. Hawa wytyk ibykyhy humo tsimyitsapyrētatsa wata ahatsyhyryze sinini mykara. Ikiahatsa Sesus tuktsa babatsa tsimoziknaha ana humo hi ahatsyhyryze sinini mykara.

²⁰ O katukytsa ahahumo kahyrikbarēta. Ahabo tsimypamykyso tsihikiknaha. Batu zik utakta nokponi mynapykyryk. Kaharere humo pahatsumuēhī tsihikik. Ahasoho bo paikpa mytsaty mykara – my.

Deus harere wytykyryk petokorok waza my. Sara Aka niwatihi.

²¹ Aty zeka:

– Utakta Moises harere ibyky bo yhȳ mozihikik iwatahi Deus okzeka kamysapyrēta mozik – my. Ikiupe my:

– O Moises harere ibyky tsiwabyziuku – my.

²² Tubabatu Abarão hyrytsa petoktsa niy. Taparaktatsa tsumuēhītsa Aka inarokotatsa atatsa humo estuba zuba nihyrytsa iwaze itse nipuruk. Bykyze ioke babatatsa Sara inarokotatsa humo niwatihi estuba zuba nihyrytsa iwaze itse nipuruk.

²³ Iwaze itse taparakta ije sitsumuēhītsa niy. Atahi nipurukze siza siza byiki hyrytsa wa tihi niy. Usta itse iykpykyhyzytykta batu. Deus harere hi nitsaso atsatu wasani niy. Abarão Sara ahatsa nipuruk sitsaikbatsa tu Deus harere humo zuba itse iykpykyhyzytykta.

²⁴⁻²⁵ Iwa piwataha iwaze pahahyrinymyry. Wytykyryk petokokzahaza Deus harere petok zuba waha. Tapara Deus harere Moises bo nitsasoko atahi Deus tyryktsa bo nitsasoko. Anaharere wytyk sitsumuēhītsa watatsa my. Bykyze Deus harere Sesus soho nitsasoko asahi ihumo sispirikporētsa Deus tyryktsa moziknaha. Usa harere wytyk ioke babatatsa watatsa my. Asiza harere wytykyryk petokokzahaza soho humo pahatsumuēhī.

Moises iwatahaha soho ty mykara. Anaka hara bijobonita ikny inasikze anaharere aparakbaha bo nitsaso. Aparakbaha Sudeutsa hara bijobonikiha Sinija inarokoha mykaranaha. Aparakbaha Arabija ezektsa ana hara bijoboniki ha Aka inarokoha mykaranaha. Ana hara bijobonikiha atatsa watatsa atatsa katsa sitsumuēhĩtsa niy my. Iwatatsahi itsekokatsa batu ziksibetasanaha. Serusarēhe soho bo mytsaty ziknakaranaha. Asahi Moises harere ibyky humo zuba hyĩ mykaranaha. Asaktsa Sesus Kiristu harere bo batu hĩ zikaha. Iwatsahi asahi Moises iwatahaha bo zuba hyĩ mykaranaha sitsumuēhĩtsa tsekokatsa watsa maha.

²⁶ Katsaktsa Deus harere bo hyĩ tsimykaranaha iwaze ihumo myspirikporētsa tsimoziknaha. Iwatsahi Deus okzeka mysapyrētsa tsimoziknaha Serusarēhe myjewa. Usa Serusarēhe ezytyk bijoikpe ikny mynasik anahi myjewa. Atatsa itsekokatsa Moises iwatahaha soho tsikaeni zuba mytsaty mykaranaha. Sesus harere bo zuba hyĩ mynakaranaha.

²⁷ Deus watahaha botu hi:
– O wytykyryk ikiahaka ahabykyhybyiza ahakurēza!
Ikiahaka ahabykyhybyiza hi ba itsapyriziyk ahakurēza!
Ikiahaka ahahyrytsa tsimysiubaranaha.

Ipytsakatatsa ihyrytsa sizubarētsa ikiahaka ahapyitsabyiza waza tsimoziknaha,
asiza hi simyiwyyhyza iwazatu ikiahaka ahhyrytsa tsimysiubaranaha.
Iwa Deus watahaha botu nitsasoko.

²⁸ Iwatahi katukytsa Deus hyrytsa tsimoziknaha. Sesus harere bo hyĩ tsimykaranaha iwatsahi ihumo ahaspirikporētsa iwatsahi Deus hyrytsa tsimoziknaha. Tubabatu Isake Abarão tse nipuruk, Deus harere humo zuba nipuruk. Abarão tse babata. Atsawatu ikiahatsa Deus hyrytsa tsimoziknaha. Sesus harere bo zuba hyĩ tsimykaranaha iwatsahi ahaspirikporētsa tsimoziknaha. Ahaspirikporētsa ziky Deus hyrytsa tsimoziknaha.

²⁹ Tubabatu Aka sitsumuēhĩtsa tse Abarão ioke babatatsa Sara tse nizukyryky. Abaka atsatu mykaranaha. Asaktsa Moises harere bo hyĩ mykaranaha asahi Sesus tuktsa mysisykyrikiknaha. Aparakbaha Sesus harere bo hyĩ mykaranaha Deus hyrikoso situk mynapykyryk asa hi mysisykyrykynaha.

³⁰ Deus watahaha hi:
– Sitsumuēhĩtsa tse humo kino mysiksiwyhik! Abarão oke babatatsa tse zuba tazo namy ty nyny mykara – iwa taparaktsa ziwatahakanaha.

³¹ Iwaze katukytsa katsa batu tsumuēhĩtsa tsekokatsa watsa tsimaha. Moises harere ibyky humo ka ba hĩ zikaha. Katsaktsa ioke babatatsa tse watsa tsimaha. Sesus harere bo hyĩ tsimykaranaha iwaze ihumo myspirikporētsa iwatsahi Deus hyrytsa babatsa tsimoziknaha.

5

Aty sopyk humo sa tsimaha.

¹ Kiristu humo mysapyrētsa iwaze taparaktsa harere bo batu mysopyk. Iwaze Moises harere bo zuba batu mytsatyziu tsimaha. Kiristu mymybetesaka zeka ituk mywahi tsimyzurukunaktsa! Kiristu zikwy mytuk mynapykyryk iwatsahi hawa tsimyzurukunaha wasani tsimykaranaha. Iwa tsimypykyryknahaze ustsya kyttsa ahabo motsasonaha zeka:

– O taparaktsa sopykwy ty tsimaha iwatsahi Deus okzeka ahamysapyrētsa tsimoziknaha. Siharere bo yhyĩ tsimaha! – mybarapetu mykaranaha. Siharere bo batu waby zikaha. Sitsumuēhĩtsitsa watsa batu tsimozikzonaha!

² Wabyziutaha! Uta Pauro ahape my:

– Ahanury ty myizyk myizyk byitahaktsa iwatsahi Deus okzeka ahamysapyrëtsa tsimoziknaha mytsaty ahabyitsa nikaranaha. Kytsa iwa maha zeka Kiristu ahasapyzekenihyrikosokdaze batu mysapy. Batu zahatsumuëhĩ.

³ Kaharere ty ahape myzo: “Aty zeka Moises harere ibyky humo tanury ty pizyzykik atakta Moises harere ibyky tsizubarëna bo hyÿ mykara. Batu estuba harere zuba, tsizubarëna mykara ziky”.

⁴ Ikiatsa Moises harere ibyky bo hyÿ tsimaha zeka iwatsahi Deus okzeka ahamysapyrëtsa tsimoziknaha mytsaty ahabyitsa nikaranaha, iwaze Kiristu metutu tsimypykyryknaha. Hawa tsimykaranaha humo batu pahasapywy batu ziky. Ikiatsa tsipahanury zyzykiknaha zeka Deus okzeka batu ahamysapy Deus ba zahasapywyky.

⁵ Katsaktsa Deus okzeka mysapyrëtsa Sesus harere bo hyÿ tsimykaranaha ihumo myspihikrëtsa. Deus hyrikoso mytuk mynapykyryk ana hi taperyky. Myakubyrisorokrëtsa tuze iwaze Deus mype tihi: “O ikiatsa ahamysapyrëtsa Sesus humo ahaspikrëtsa iharere bo hyÿ tsimykaranaha” – mykara.

Ana harere hi tsipiperykynaha hÿ. Myspirikporëtsa tu Deus zikwy humo anaharere hi ihyrikoso humo taperyky.

⁶ Iwatsahi Sesus Kiristu harere bo zuba hyÿ tsimykaranaha. Aty taty piak zyk zeka, usta taty piak zyk byizeka astsatu maha. Deus okzeka petoktsa harapewatu maha. Katsaktsa Sesus Kiristu harere bo hyÿ tsimykaranaha ihumo myspirikporëtsa tsimoziknaha iwatsahi tyharape pokzitsikinaha iwaze Deus mymysapywyky.

⁷ Tapara ikiatsa Sesus harere bo hyÿ tsimykaranaha iwaze ihumo tsisapyanaha. Amo skaraba Sesus harere humo batu ahakparawy. Mektsa harere zuba tsiwabyziukunaha iwatsahi tsimyikiknaha. Sesus harere bo hyÿzo tahaktsa.

⁸ Deus zahawatawy iwatahi mektsa harere ty ka batu ahabo tyso.

⁹ Ana kino atsikara pytowy waha. Hawa katsaktsa pytowy tsikaeni zuba tiriko tuk ikykywy bykyze nawerekbaik. Pytowy na waha estuba zubata mektsa harere bo yhÿ my zeka ustsamysimiywibaka.

¹⁰ Utakta ikiatsa humo kahyrinymyrëta hÿ. Katsaktsa Sesus harere bo hyÿ tsimykaranaha iwatsahi ihumo myspirikporëtsa kawata mytsaty tsimykaranaha. Hawa mytsaty tsimykaranaha kawatsa astsatu mytsaty tsimykaranaha. Atakta imysapybara ty zahayrinymyryky iwatahi zahamiwyky sinini mykara. Deus hi ipe my:

– O ikia batu amysapy tsimy, hawa batu sapy kahyrytsa nisihyrinymyry – my.

Iwa Deus isoho humo mykara.

¹¹ – O katukytsa kahumo mytsatziutahaktsa! Amo skaraba kytsa zikusyrykynaha. Ahabo zeka ahanury ty tysizyzyknahaktsa iwatsahi Deus okzeka ahamysapyrëtsa tsimoziknaha mykara iwa zeka ba zik sukyryknaha. Iwa batu tyso. Kaharere Kiristu soho ikykara ihumo ahaspirikporëtsa iwatsahi Deus okzeka ahamysapyrëtsa tsimoziknaha anahumo hi tahakyrikinaha. Hawa Sesus Kiristu ahasapyzekeniharapatawyhyta humo zihyrikiknaha, iwaze zibezena, anahumo hi katsa Deus okzeka mysapyrëtsa anaharere humo hi tahakyrityikiknaha.

¹² Asaktsa ahape ahanury tsizyzyknahaktsa iwatsahi Deus okzeka ahamysapyrëtsa tsimoziknaha. Asaktsa sokorotsapu siakparawy, asaktsa tahapiakzyzykbaiknaha iwatsahi tahamyitsapyrikiknaha ana humo kino mozihihik – my.

13 – O katukytsa Deus humo ahamysapyrētsa. Iwatsahi ahaspirikporētsa tuze batu tyso. “O abaka hawa katsa tsimyzihikiknaha at-satu tsimykaranaha. Mysapybyitsatu tsimykaranaha” – Iwa batu tyso. Ahaspirikporētsa tyharape pokzitsikinahaktsa!

14 Moises harere ibyky taparaktsa mydiritsa kino niwatihi sisopykwy tu maha. Siwatahaha tihi:

– Aotutsa pauksitsa humo tynasipokzitsikinaha, ahumo tu tsinakaranaha wa tihi tysipokzitsiki – niy.

15 Katukytsa pykyhytutaha! Siraratsa sirerētsa watsa asahi nahapeboroiikiknaha iwa ahasopyk zeka hawatsa tsimykaranaha ustsba zik-sipokzi tsihikik. Ikiahatsa ahaharerewabymybarētsa iwatsahi ustsba zik-sipokzitsi iwaze siraratsa watsa ahasopyk.

Deus hyrikoso mytuk mynapykyrykze mysapyrētsa tsimoziknaha.

16 Kaharere bo wabyziutaha! Deus hyrikoso ahatuk mynapykyryk zeka iharere bo zuba hyỹ tsimykaranaha. Iharere tawaby zeka ana hi Deus mozihikik. Hawaha tsimyzihikiknaha bo ka mytsaty mytsaty byitaha.

17 Hawa katsa tsimyzihikiknaha Deus hyrikoso batu hỹ niy. Hawa Deus hyrikoso mozihikik anatyhi katsa batu hỹ tsikaha. Deus hyrikoso harere bo zuba yhỹ tsimykaranaha zeka hawa tsimyzihikiknaha batu zikaha.

18 Deus hyrikoso harere bo hyỹ tsimykaranaha zeka Moises harere ibyky tsizubarēna bo batu mytsaty tsimykaranaha. Anaharere humo hi tsimykaranaha zeka Deus okzeka batu mysapy iwatsahi Moises harere ibyky bo batu hỹ ahasopyk.

19 Hawa katsa tsimykaranaha ana humo hi mysoho baba tsipiwatawynaha iwatsahi aparakbaha myhumo sihyrinymyrētsa. Iwa tsimykaranaha. Asaktsa Deus harere bo batu hỹ zikaha iwa mozurukunaha. Asaktsa usta oke bo hua mynakaranaha. Usta maku piwohiknaha. Kytsa wytykyryk mysipyryrikiknaha mowakryriwy waza sisopyk.

20-21 Kytsa deustsabyitsa bo napamykysoikiknaha. Asaktsa tahanamy zuba motsasoko:

– O atakta mydeus hi – mybarapetu mykaranaha. Ustsba kytsa namysukyrykynaha. Sisukyrytsitsa tu naharape huzeduikiknaha. Siokanirētsa simiywyhytsa tu mynasisuknikinaha. Sizokdirētsa. Sihyrikzorētsa. Myharapepehaikiknaha iwatsahi metutu mopapahabakanaha. Mysiaknikinaha. Tsōsī humo pypykbeze mykaranaha. Ustsba humo myharape huzezukunaha. Asaktsa iwa sisopyk batu Deus tyryktsa zikyriknaha. Deus harere humo batu siakparawy.

22-23 Deus hyrikoso mynamykse zeka mytuk mynapykyryk ihumo meky watu tsimoziknaha. Deus hyrikoso humo ustsba aparakbaha bo tyharape pokzitsikinaha. Atahi mymykusukniwyky iwatsahi mykurētsa tsimykaranaha. Ihumo batu paikpa mytsaty tsimykaranaha. Mysopykziurētsa. Mykubyrisorokrētsa. Aparakbaha tuk ba ziksimyiki myhyrizikporētsa mysapyrētsa tsimaha. Mysakikihikrētsa. Batu tyso katsa zubatsa ty wasani tsimykaranaha. Mypetu mysopyk iwatsahi mysapybara ty batu hỹ tsimaha. Deus mysoho tihi:

– O ahamysapyrētsa tsimoziknaha – my. Mysapyrētsa tu zeka batu aty tohi mype ziky:

– O batu ahamysapy – maha. Iwa batu tyso zikaha.

24 Katsaktsa Sesus tuktsa tsimaha. Ihumo myspirikporētsa hawa ha ty tsimyzihikiknaha ana kino batu myty peha my. Hawa batu mysapy ana humo kino batu hỹ tsimaha.

²⁵ Deus hyrikoso mytuk mynapykyryk zeka ata humo kino meky watu tsimoziknaha. Atahi mypehatsa mozik. Iwatsahi izikwy humo tsimyzurukunaha. Atazuba namypehaka iwatsahi iharere bo zuba ma tynakaranahaktsa! Hawa mymykzoze iwa tsimyzurukunaha.

²⁶ Batu tyso:

– O katsa zuba wasani tsimaha. Iwa batu tyso. Aparakbaha tuk ahasakpare byihujataha! Utsa aparakbaha simysapyrëtsa humo maha zeka aha-zokdi byihujataha! kytsa – my.

6

Tyharape tsumuëhñnahaktsa.

¹ – O katukytsa aty zeka imysapybyikia ty my zeka ikiahatsaktsa Deus hyrikoso myzahakse ibo tsitsumuëhñnaha – ipe tsimaha:

– O katsy amysapybyikia ty tsikapybywykta! – tsimaha. Ahaharereziu tuktu ja taha! Pykyhytutaha. Atsawatu tsimyzihikiknaha zeka ahamysapybyitsa tsimykaranaha.

² Aty zeka iakubyikita bo iksa tsimaha zeka ibo tsakusuknikinaha. Tyhapetsumuëhñnahaktsa kytsa! Iwaze anaharere humo Kiristu zahahyrinomyryky hyÿ tsimykaranaha.

³ Aty tapetu isopyk zeka:

– O utakta abazubata – mytsaty ahabyita mykara, myhyrizikwybyita tu tapetu isopyk mybarapetu mykara.

⁴ Hawa tsimykarana ana soho bohi mytsatyziyu tsimykarana. Tsipisapyky zeka tsakurëtakta! Apetu asopyk. – Wasani mykara iwatahi kakurëta – my. Hawa utsa mykaranaha sibo batu iksa tsimy. Batu tyso:

– Utsaktsa batu wasani mykaranaha iwatahi utakta wasani mynakara – my. Iwa batu tyso.

⁵ Ahazikara byihuja kytsa! Ahahyriziktsokzawy humo Deus ahabo nyny niy iwatsahi tsikahasopykziubanahaktsa!

⁶ Aty Deus harere ty pahahyrinomyryky tahanamy ty ibo nyny tahaktsa! Ahanamy isapyrënikia ty ibo tsipibiaknaha.

⁷ Deus harere ty katy myi myiwy byitaha! Tsimytsasonaha zeka: – O uta kamysapyrëta my zeka Deus piksapywyky hÿ – tsimy. Iwa batu tyso tapetu zuba isopyk mybarapetu tsimy. Deus ta ba zik mospihikbata, atahi tsihyrinomyrëta hÿ. Hawa tsimykaranaha humo tsihyrinomyrëta.

⁸ Aty zeka amytsa mysiparikik zeka astsatu zuba pusukuknaha. Batu mektsatu zikaha. Katsa niwatihi siriktsa mysiparikik nahatsa watsa tsimaha. Hawa ha ty mysapybyitsa tsimykaranaha zeka Deus tuk batu mywahi tsimynapykyryknaha. Katsaktsa Deus hyrikoso harere bo hyÿ tsimykaranaha Deus tuk mywahi tsimynapykyryknaha.

⁹ Iwaze tysapywykynahaktsa! Ahazikarabyitsa tu tsipisapywykynaha iwaze Deus isapyrënikia ty ahabo nyny mykara. Iwatsahi mykurëtsa tsimaha.

¹⁰ Iwatsahi tyharapetsumuëhññnahaktsa kytsa! Asaktsa mytukytsa Sesus tuktsa asa bo hi tsipisapywykynaha hÿ.

Abaka mopykykze katukytsa bo mytsaty mykara.

¹¹ Abaka kamywatahaw ty okok iky. Iwahahi ipamabara ty piwatahaka.

¹² Kytsa pahahyrinomyrykynaha asa hi:

– O ahanury ty tsizyzykiknahaktsa! iwa tsimaha zeka Deus okzeka ahamysapyrëtsa tsimoziknaha – mybarapetu mykaranaha. Iwa mot-sasokonaha kytsa harere humo zuba. Iwaze sizubarëtsa nisisokonaha:

– O simysapyrëtsa mykaranaha. Hawa ha ty mysihyrinymyryky wasani my, Sudeutsa sopykwy bo yhy mykaranaha – maha. Iwa aparakbaha sisoho motsasokonaha anawahi mozihikiknaha. Sesus iharapatawy humo mysapyzeken nihyrikosokda motsasokonaha zeka aparakbaha mysisykyrikiknaha ana pokso sipybyrëtsa iwatsahi ahanury tsizyzykiknahaktsa mykaranaha.

¹³ Asahi ahanury pizyzyk tsihikiknaha iwatsahi Deus okzeka ahamysapyrëtsa tsimoziknaha baija mytsaty ahabyitsa mykaranaha, asahi Moises harere tsizubarëna bo batu yhy mykaranaha. Aparakbaha mozihikiknaha tihi:

– O Karatas ezektsa sinury zizyzykiknaha myharere humo abaka Sudeutsa sopykwy bo hy mykaranaha – iwa mozihikiknaha hy.

¹⁴ Niwazubakta! Utakta Sesus Kiristu soho zuba motsasoko. Hawa mysapyzeken iharapatawyhyta humo zihyryzikiknaha iwa zibezena. Iwatsahi katsakta Deus okzeka mysapyrëtsa tsimoziknaha. Ana humo zuba motsaso tsihikik. Hawa ha ty aparakbaha bo ipokzitsianikia ty mytsaty mykaranaha kahumo ka hana bo ja batu waby. Anasoho ty hi batu hy my. Sisopykwy humo batu hy my.

¹⁵ Iwatsahi myty piak zyk zeka Deus mysoho humo ba mytsaty ziky. Myty piak zyk ahabyizeka mysoho humo ba mytsaty ziky. Sesus Kiristu harere bo hy tsimykaranaha ana humo zuba mytsaty mykara. Katsakta mysapyrëtsa tsimoziknaha Sesus humo ana humo hi zuba wasani my.

¹⁶ Ikiahatsakta kaharere bo yhy tsimykaranaha. Deus bo mopamykysokoze ahasoho tihi:

– O Deus myzo Sesus tuktsa Karatas ezektsa tysisapywyky. Aharere bo hy mykaranaha iwatsahi ahumo sispirikporëtsa moziknaha. Sispirikporëtsa tu ba paikpa mytsaty zikaha tysiakusukniki tsimy – my. Ana hi Sesus tuktsa sizubarëtsa mozihikik.

¹⁷ Abaka mopykyk. Batu aty tohi zikykni. Deus wasania ty iktsasoziuku. Utakta Sesus harere humo aparakbaha ziksukyrykynaha. Kapunihikrëta tu Sesus harere iktsasokoze sinini ikykara. Sesus pokzi sinini ikykara kanury humo iwatahawy, ana bo hi iktsa tsimykaranaha.

Deus pahasapywyky.

¹⁸ O katukytsa ahatsyhyryze Deus bo mopamykysoko:

– O Deus mypehakatsa Sesus Kiristu Karatas ezektsa tysisapywyky – my. Iwa mozihikik hy. Niwazuba. Deba.

Pauro

Pauro Epeso ezektsa bo ziwatahaka

Pauro Epeso ezektsa tuk niapykyrykspyk petok ziytyk tsehe. Sesus soho ty nisispirikpoko iwaze mekybotu niparakzo. Aibatohi Pauro sakyriukanikitsa hurukwy eze niapykyryk. Sesus soho kytsa nisispirikpoko iwatsahi kytsa sakyriukanikitsa hurukwy zioqtyhyryk anaeze hi Epeso ezektsa bo ziwatahaka, Deus soho ty nisispirikpoko. Deus hyrikoso ituk niapykyryk iwatahi Deus harere ziwatahaka, abaka katsa kino niwatihi iwatahaha humo tanymyryky.

¹ Uta Pauro. Deus zikwatawy iykzoho my ikiahatsa Epeso ezektsa bo piwatahaka. Ikiahatsa Sesus Kiristu harere bo hyỹ tsimykarana iwatsahi ahaspirikporẽtsa. Tubabatu Deus kape niy:

– Ikia myzubahatsa bo tsimy. Wasaniha ty sibo tytsasoko – niy.

Yhỹ icy.

² Uta tihi:

– O Deus myzo. Sesus Kiristu mypehakatsa my hỹ. Ikiahatsa Epeso ezektsa bo tysisapywyky. Ahahumo sakurẽtsa moziknaha hỹ – my. Iwa Deus bo ahatsyhyryze ikpamykysoko hỹ.

Kiristu humo Deus mymysapywyikik.

³ Kyze katsakta Deus Sesus Kiristuzo bo tsimypamykysoziukunahaktsa kytsa! Atahi isapyrẽnikia ty mybo nyny niy. Atahi ihyrikoso mybo zipaha atakta mytuk mynapykyryk hỹ. Iwatsahi katsa:

– O Deus ikia zuba tsamysapyrẽta. Ikia amysakihikynikita ahumo ka mykurẽtsa – tsimykarana.

⁴ Deus mybarawy nizukni. Isuknihibyize katsa ityryktsa nimywatawy. Nawa Sesus Kiristu tuk nimywatawy. Tubabatu katsa mysapyrẽtsa nimsukni tsihikik iwatahi nimywatawy. Deus tatyryktsa bete nimysukni iwa nizihikik asakta pisapywyikiknaha iwatahi Kiristu nimywatawy.

Tapara myhyrytykyhybyri eze myhumo tsimypokzitsiarẽta.

⁵ Atahi nimysukniwy iwatsahi ihyrytsa babatsa tsimoziknaha. Sesus Kiristu mymytsumuẽhĩ naha humo hi tsihyrinymyrẽta iwaze ihyrytsa babatsa tsimoziknaha iwa niyzihikik. Katsakta ihyrytsa babatsa tsimoziknaha iwa tatu tuka nikara.

⁶ Iwaze Deus bo tsimysakibazikiknahaktsa!

– O Deus myzo ikia myhumo ka tsamypokzitsiarẽta. Iwatahi Sesus mybo zipaha mymytsumuẽhĩ, iwaze mybarawy ezektsa bo inasik mywata niyzik. Ikia zuba tsamysapyrẽta. Batu aty tohi ikia wata. Katsa tynamysapywyikik batu ihuakbaratu tsimyzihikik iwatsahi ahumo mykurẽtsa. Ikia wasani hỹ – tsimykarana.

⁷ Deus tse babata myhumo tsimypokzitsiarẽta ituk hi tsimynapykyknaha. Iwatsahi mykurẽtsa. Atahi mysapyzekenihyrikosokda. Kytsa iharapatawyhyta humo zihyrikiziknaha iwaze zibezena. Iwaze Deus bo mymyoktyhyryk. Nihyrikosokdaze imysapybara ty tsikykarana ana humo hi Deus nimyokzohik ihumo nispiriktsokda. Hawa batu imysapy tsimykarana abaka batu mykparawy. Deus tse humo mymysapywyikik.

⁸ Iharere baba ana kino mybo nitsasoko ana humo hi hyỹ tsimykarana iwatsahi myspirikporẽtsa.

⁹⁻¹⁰ Iharere Sesus soho tisapyrẽna hỹ. Tubabatu Deus tihi:

– O Kiristu zipehata sizubarẽtsa pehatsa mozik. Nanabyitaba abazubata mozik. Bijoikpe ezektsa mybarawy ezektsa kino niwatihi iharere bo zuba

hyĩ mynakaranaha – niy. Abaka iharere tsinymyrynaha. Iharere mybo motsasoko. Nawa puruze piwatawy iharere Kiristu soho wasani my iwa botu nikara. Aba atsatu mybo motsasoko.

¹¹⁻¹² Tapara katsakta Sudeutsa tsimaha Kiristu taperyikik. Atahi Deus bo mymyoktyhyryk ata hi taperyky. Tubabatu Deus nimywatawy, Kiristu harere bo hyĩ tsimaha iwatsahi myspirikporẽtsa tsimoziknaha anahi nizihikik. Mysapyrẽtsa tsimoziknaha niyzihihikik. Iwaze kytsa sizubarẽtsa tihi:

– O Deus ikia zuba tsamysapyrẽta myzubatsa atyryktsa moziknaha. Simysapyrẽtsa moziknaha iwatahi tsamysapyrẽta – mykaranaha. Katsakta Kiristu humo wasani tsimykaranaha ana humo hi sihyrinymyrẽtsa iwaze Deus bo motsasoziukunaha. Hawa Deus motsaso atsatu mykara. Iwatsahi Sesus Kiristu harere bo hyĩ tsimykaranaha hĩ.

¹³ Ikiahatsa Sudeutsabyitsa mytuk mykaranaha. Ikiahatsa niwatihi Kiristu tuk tsimynapykyknaha hĩ. Deus wasaniha humo mymyoktyhyryk ana soho botu tsiwabynaha iwatsahi iharere bo hyĩ tsimykaranaha. Sesus Kiristu humo tsikspirikponahaze Deus hyrikoso ahabo zipeha. Ihyrikoso ahatuk mynapykyryk.

Kytsa tahanamy humo tahanaro ziwatahakanaha iwaze ustsá kytsa sinamy pinynahaze ana humo hi sihyrinymyrẽtsa. Ana wa hi Kiristu harere humo Deus hyrikoso ahabo zipeha iwaze ityryktsa tsimoziknaha ana humo hi ahahyrinymyrẽtsa hĩ.

¹⁴ Deus hyrikoso mytuk mynapykyryk bykyze Deus isapyrẽnikia ty mybo nyny my. Sesus tuktsa myzubarẽtsa bo Deus isapyrẽnikia ty botu ziperyknaha ana kino mybo nyny my. Iwa botu nitsaso. Iharere wasani my. Ana kino tsinymyrynaha. Deus hyrikoso mybo zipeha iwa iharere soho tsinymyryknaha. Imysapybyikia ty batu mykparawy iwaze isapyrẽnikia ty zuba mybo nyny my nawa botu nitsaso atsatu my. Iwatsahi katsakta:

– O Deus myzo ikia zuba tsamysapyrẽta. Ikia zuba tsapunihikrẽta – tsimykaranaha hĩ.

Pauro Epeso ezektsa tsihyryze Deus bo nipamykysoko.

¹⁵ Kyze kytsa ahasoho kabo nitsasokonaha. Siharere tisapyrẽna. Asahi:

– O Epeso ezektsa Sesus harere bo hyĩ mykaranaha iwatsahi sispirikporẽtsa maha. Tyhapepokzitsikinaha – nikaranaha.

¹⁶ Ana humo ziwabyze ahatsyhyryze Deus bo mopamykysoko. Deus pahasapywy tsihikik ibo hi mopamykyso. Kakurẽta ibo mopamykysoikik utahi:

¹⁷ – O Deus myzo. Sesus Kiristu mypehakatsa my. Ikia Sesus Kiristu pehatsa tsimy. Myzo ikia zuba tsamysapyrẽnikita. Epeso ezektsa tsumuẽhĩkta! Hawa ja mozurukunaha tsihyrinymyryky. Sihyrinymyrẽtsa zeka ahumo sispirikporẽtsa, ana humo kino myzapykyky.

¹⁸ Ikia isapyrẽnikia ty sibo nyny tsimy. Sesus tuktsa sizubarẽtsa isapyrẽnikia ty sibo nyny tsimy. Iwa botu tsiktsaso. Myzo isapyrẽnikia ty tsipiperyknaha. Tsipiperyknahaze tymytsumuẽhĩkta myzo, tsimaha.

¹⁹⁻²⁰ Ikia zuba tsapunihikrẽta ba hawa tohi zasukninaha. Kiristu nihyrikosokdaze ikia hi tsikzihyrizikpowyhykzo. Ikia humo bijoikpe bo nido abaze apanuryk taba modyhyky. Ikia tuk kytsa mysipehaka. Azikwy ty Epeso ezektsa Sesus tuktsa sisopyk azikwy tuk mozurukunaha.

²¹ Atakta abazubata my. Myzubatsa iharere bo hyĩ mykaranaha. Bijoikpe iknyktsa iharere bo hyĩ mykaranaha. Hyrikoso sapybara wakatsa kino iharere bo yhĩ mykaranaha. Mybarawy ezektsa pehatsa sizubarẽtsa iharere bo hyĩ mykaranaha. Atahi abazubata tsizikwyrẽta hĩ.

22-23 Sesus Kiristu hi mybarawy ezektsa iharere bo hyÿ mykaranaha. Atakta koikny bakta tu batu amy tohi mykara iwatahi tsihyrinymyrëta hÿ. Ihyrikoso nanabyitaba my. Ihyrikoso mytuk mynapykyryk. Iwatahi Sesus Kiristu mype niy:

“Ikiahatsa kanury wata” niy. Hawa kytsa tahanury nisipehakanaha nawa Sesus Kiristu ituktsa mysipehaka. Ikia Sesus Kiristu tuktsa humo tsamypokz-itsiukrëta. Iwaze ikia Sesus Kiristu humo tsimymysapywyikik myzo – my. Iwa ahatsyhyryze Deus bo mopamykysoko.

2

Kiristu humo mspirikporëtsa tsimoziknaha.

¹ Tapara ikiahatsa ahamysapybyitsa tsikykaranaha iwaze Deus okzeka batu ahaspirikpo iwatsahi siakbatsa watsa tsikykaranaha. Deus harere bo batu hÿ tsikaha. Hawa siakbatsa sityryk niakba naha tsa wa. Iwa batu ahaspirikpo. Deus zahasapywyky ihumo mekywa tu tsimoziknaha ihumo mekywa tu tsimyzurukunaha.

² Taparaka sispirikpobyitsa harere bo yhÿ tsikykaranaha. Asaktsa Satanas hyrikoso sapybara pehatsa harere piwabyziukunaha siharere bo kino yhÿ tsikykaranaha. Satanas bijoikpe ikny mybarawy bo izumu anaeze mozu-ruku.

³ Katsa Sudeutsa niwatihi ahawatsa zikzurukunaha. Mysapybyitsa tsikykaranaha, hawa mytsaty tsikykaranaha ana kino mysopyk. Taha bo zuba ziknakaranaha. Katsaktsa wasani tsimaha mytsaty ahabyitsa tsikykaranaha iwa mypetu mysopyk. Deus mype niy:

– Ikiahatsa Sudeutsa ustsya kytsa watsa tsimaha, kaokzeka batu ahamysapy tsimaha. Sinini ykarawy bo pahapehahik – niy.

⁴ Deus hiba myhumo tsimypokzitsiarëta. Katsaktsa iharere bo ma mysopyk byitsa tu iwatatu myhumo imysapyrëta mmysapywy tsihikik hÿ.

⁵ Katsaktsa tsikyhyrikosokdanahaze iwaze mspitu tsikyzikzonaha tsawatsa. Katsaktsa mysapybyitsa tsikykaranaha iwaze siakbatsa watsa Deus inamyhyrizikpowyhikzo. Sesus wata inamyhyrizikpowyhikzo iwatsahi iharere bo zuba hyÿ tsimykaranaha. Iharere zuba mykparawy iwa hawa Deus mozihikik katsa kino niwatihi tsimyzihikiknaha. Ana humo niyze mynamy batu ziaксе. Batu amy tohi ty zihuaknaha. Atahi myhumo tsimypokzitsiarëta babata iwa niy.

⁶ Deus Kiristu zihyryzikpowyze jobo bijoikpe bo nido. Anaeze ituk tawahi mynapykyryk. Katsa kino niwatihi iharere bo hyÿ tsimykaranahaze isoho bo mytsaty tsimykaranaha. Botu Sesus Kiristu tuk tsimynapykyryknaha, mybarawy ezektsa Deus hyrikoso botu namykse iwatsahi ituk tsinapykyryknaha hÿ.

⁷ Deus myhumo tsimypokzitsiarëta iwatahi Kiristu Sesus nimytsumuëhÿkÿ. Nymytsumuëhÿze hawa Deus mozihikik ziwatawyky. Isapyrënikia mybo pinyny tsihikik ana hi tsinymyrykynaha. Ustsya kytsa mysoho tihÿ:

– Hawa Deus msysapywyky – mykaranaha.

⁸ Deus myhumo tsimypokzitsiarëta iwatahi mmysapywyky. Sesus izumuze tazo bo mymyoktyhyryk niy. Katsa zuba zeka Deus bo ba zikumunaha. Iwatahi Deus myzo Sesus zipehahik atahi Deus bo mymyoktyhyryk ihumo zuba Deus tyryktsa tsimoziknaha hÿ. Katsa ibo batu amy tohi ihuak ty nyny zikaha. Deus zuba isapyrënikia ty zuba mybo nyny niy.

⁹ Katsaktsa Deus tyryktsa tsimoziknaha. Deus hi tatyryktsa nimysukniwy iwatsahi katsa batu tyso.

– O mysapyrëtsa iwatsahi Deus tyryktsa tsimoziknaha – tsimaha. Iwa batu aty tohi tyso. Deus zuba katsa ityryktsa nimysukniwy Sesus humo Deus bo mymyoktyryk my.

¹⁰ Abaka Deus tyryktsa tsimaha mekywa tu tsimoziknaha. Sesus Kiristu harere bo hỹ tsimykaranaha iwatsahi ihumo myspirikporëtsa mekywa tu tsimyzurukunaha. Sesus tuktsa sizubarëtsa ihumo simysapyrëtsa moziknaha. Tubabatu Deus tihi:

– O katyryktsa Sesus Kiristu watsa mozurukunahaze ana kino mozihikik. Utsa kytsa mysitsumuëhĩnaha iwa mozurukunaha h̃y – niy.

Iwaze mymytsumuëhĩnaha nawa kytsa bo mozihikik atsa tu mymytsumuëhĩkĩnaha h̃y.

Parakbaha Deus tyryktsa tsimoziknaha.

¹¹⁻¹² Tapara ahaspirikpobyitsa zikzurukunaha. Ana bo mytsatytaha Kiristu harere bo batu h̃y tsikaha isoho humo batu ahaspirikpo. Ikiyahatsa Sudeutsabyitsa tsimaha. Ahanury humo iwatawyhybyitsa Deus wasania ty batu ahawabyhy. Sudeutsabyitsa tu batu Isareu tsekokatsa ka. Bipyritsa tsikaha. Deus wasania ty Sudeutsa ziperykynaha ana kino batu ahawabyhy iwatsahi hawa tisapyrëna batu mytsaty tsikykaranaha. Deus kytsa mysitsumuëhĩ tsihikik ana humo hi batu ahahyrinomyry.

¹³ Abaka meky watu tsimaha. Wasani tsimykaranaha. Sesus Kiristu iharapatawyhyta humo zihyrizikiknaha iwaze zibezena. Mysapyzekenihyrikosokdaze Deus bo mymyoktyhyryk niy. Katsa ihumo myspirikporëtsa tsikyziknaha iwaze Deus bo mymoktyhyryk. Iwatsahi ahape mysopyk mytukytsa tsimykaranaha. Batu bipyritsaka tsimaha. Myzubarëtsa iharere bo zuba hỹ tsimykaranaha.

¹⁴ Taparaka katsa sisukyrytsitsa abaka myzubarëtsa Kiristu harere bo hỹ tsimykaranaha iwatsahi taharapepokzitsikinaha. Sudeutsa, Sudeutsabyitsa kino niwatihi ihumo myspirikporëtsa iwaze myharereziuwyttsa tsimoziknaha. Taparaka metutu ziknakaranaha ipokpedawy waha abaka ihumo nihokda. Katsaktsa ikiahatsa kino niwatihi Deus tyryktsa tsimaha.

¹⁵ Tubabatu Deus harere Moises bo nitsaso. Anaharere Moises ziwatahaka. Sudeutsa anaharere tsizubarëna bo yh̃y ziknakaranaha. Tsihokdaharëna. Anaharere bo yh̃y nikaranahaze simysapybyitsa nikaranahaze iwaze Deus nisiokzohik. Anaharere humo hi yh̃y nikaranahaze batu zikaha. Abaka Deus harere ezytyk wasani iwaze iokzeka mysapyrëtsa tsimoziknaha. Kiristu myzubaha sapyzekenihyrikosokda iwatsahi ihumo mekywa tu tsimoziknaha. Sudeutsa, Sudeutsabyitsa kino niwatihi abaka atsaezubaha tsimyzurukunaha. Iharere bo zuba yh̃y tsimykaranaha iwatsahi taharapepokzitsikinaha h̃y. Iwa Deus okzeka mysapyrëtsa tsimoziknaha. Katsa ikiahatsa kino niwatihi Deus tyryktsa tsimaha.

¹⁶ Kiristu iharapatawyhyta humo zihyriziknahaze nihyrikosokda kytsa sizubarëtsa sapyzekenihyrikosokda iwaze Deus simysapybyitsa nikaranahaze nisiokzohik. Abaka Deus Sesus tuktsa bo mysisapywyky. Asaktsa Sudeutsa, Sudeutsabyitsa kino niwatihi Sesus tuktsa sizubarëtsa mysisapywyky. Ihumo myspirikporëtsa Sesus harere bo zuba hỹ tsimykaranaha iwatsahi batu mysukyrytsitsa tsimaha. Ihumo taharapepokzitsikinaha, Sudeutsa Sudeutsabyitsa kino niwatihi, abaka atsaezubaha ityryktsa tsimaha.

¹⁷ Sesus Kiristu mybarawy bo inasik iwaze Deus wasania ty tsiwabynaha. Tapara ikiahatsa Sudeutsabyitsa Deus harere batu ahahyrinomyry abaka Deus wasania ty tsiwabynaha iwatsahi ahakurëtsa. Katsaktsa niwatihi

tapara Deus harere Moises ziwatahaka ana humo hi myhyrinymyrëtsa. Abaka Deus wasania ty tsiwabynaha iwatsahi mykurëtsa. Deus Sesus humo batu iakyri, myhumo batu iakyri iwa ityryktsa tsimoziknaha. Deus Sesus tuktsa sizubarëtsa mysisapywyky batu iakyri.

¹⁸ Kiristu mysapyzekenihyrikosokda iwatsahi mykurëtsa Deus myzo okzeka mysapyzekeniyzik. Ihyrikoso mybo natasapy. Sesus humo myspirikporëtsa iwatsahi Deus bo tsimypamykysonahaze myharere piwabyky.

¹⁹ Iwaze ahakurëtsa tsimoziknaha. Abaka Deus tyryktsa tsimaha. Iki-ahatsa taparaka bipyritsa abaka batu, Deus tyryktsa tsimoziknaha. Deus hyrytsa tsimaha.

²⁰ Ikiyahatsa Sesus Kiristu mypehakatsa tuktsa tsimaha. Katsaktsa Deus yk-zohotsa wasania ty ahabo tsinatsasokonaha iwatsahi Sesus humo ahaspirikporëtsa tsimaha. Deus sohokotsa niwatihi siharere bo hyÿ tsimykaranaha. Ikiyahatsa Sesus humo ahaspirikporëtsa iwatsahi katsaktsa mysopyk mytuk kytsa tsimaha. Hawa kytsa wahoro mozoknikinaha haraharetsa mysizozokonahaze kywa anawahi myharere Deus sohotsa sihyrinymyrykytsa kino niwatihi Sesus tuktsa siharere bo hyÿ mykaranahaze Deus tyryktsa moziknaha. Hawa kytsa wahoro mozoknikinahaze tapara harahare tsiziurëta zik mahaze ustsaharaharetsa ty ibaze zozo mykaranaha wa. Ata harahare tsiziurëta humo ustsaharaharetsa buruhuwa babatu zozozo mykaranaha. Sesus Kiristu hi harahare tsiziurëta wata atakta tapara piziknahaze tawata iwaze ituktsa haraharetsa watsa ihumo buruhuwa zozozo mykaranaha iwaze Deus tyryktsa tsimoziknaha. Sesus Kiristu humo atahi myhyrizikwanita.

²¹ Hawa kytsa haraharetsa iharahorokwytsa ty, hwitsa iwa wahoro humo zozozo mykaranaha ana waha Deus Sudeutsa, Sudeutsabyitsa kino niwatihi kytsa sizubarëtsa ityryktsa moziknaha.

²² Tapara Deus wahoro zubata anaeze ziknapykyryk. Abaka Sudeutsa, Sudeutsabyitsa sizubarëtsa situk mynapykyryk. Deus hyrikoso situk mynapykyryk iwatsahi sizubarëtsa Sesus harere bo hyÿ mykaranaha ihumo sispirikporëtsa moziknaha, situk mynapykyryk. Iwahoro zubata wata my. Ikiyahatsa Sesus harere bo hyÿ tsimykaranaha ihumo ahaspirikporëtsa tsimoziknaha iwaze ahasopyk mytukytsa. Deus hyrikoso mytuk atsaesubaha mynapykyryk katsa Deus wahoro zubata watsa tsimaha.

3

Pauro Sudeutsabyitsa bo tarabaja nikara.

¹ Iwaze uta Pauro ahatsyhyryze Deus bo mopamykysoikik. Ikiyahatsa Sudeutsabyitsa ahahumo kamypokzitsiarëta. Deus wasania ty ahabo iktsasoko iwatahi kytsa katsipa humo zikoktyhyryknaha, siakyriukrënikitsa hurukwy bo zikoktyhyryknaha.

² Deus imysapyrënikita my wasania ty ahabo zikpehahik ana soho botu ziwatahaka. Ana kino kok tsiwabynaha.

³ Tubabatu Deus tihi:

– O tapara Sudeutsa zuba katyryktsa abaka kytsa Sudeutsabyitsa kino niwatihi katyryktsa moziknaha mysitsihikik – niy. Ana harere humo hi batu kahyrinymyry. Batu aty tohi hawa nizihikikze batu ihyrinymyry. Kyze Deus kape niy:

– Pauro Sudeutsabyitsa bokta! Wasaniha ty sibo tytsasokta! Asahi katyryktsa moziknaha mozihikik, iwatahi sibo papeha my – niy.

⁴ Hyÿ iky. Deus soho kabo nitsasoko ana soho humo hi ahabo tsikaeni zuba botu ziwatahaka.

⁵ Deus Sudeutsabyitsa soho mozihikik kytsa batu sihyrinomyry. Aba zuba Deus ykzohotsa bo, isohotsitsa iwatsa taharere soho ihyrikoso humo nisihyrinomyryky hỹ.

⁶ Sudeutsabyitsa tu Deus wasania ty Sesus harere bo yhỹ mykaranaha zeka Sudeutsa atsatu maha. Sudeutsa sisopyk mytukytsa maha. Deus isapyrēnikia ty Sudeutsa bo botu nitsasoko, ana kino Sudeutsabyitsa bo niwatihi mysisapywyky. Iwaze Sudeutsa, Sudeutsabyitsa niwatihi asahi sizubarētsa Sesus harere bo hyỹ mykaranaha ihumo sispirikporētsa astsa watsatu maha sibo hi Deus mysisapywyky hỹ.

⁷ Deus wasania ty Sesus soho motsasoikik nawa kahyrikzitsokzawy my. Utakta Deus tsyhyryze tarabaja mykara. Kahyrikzitsokzawy humo ziktsumuēhĩkĩ. Izikwy humo zuba tarabajaziu mykara, Deus kahumo tsimypokzitsiarēta iwatahi zikpeha kytsa sizubarētsa bo wasania ty motsasoko.

⁸ Taparaka uta kamysapybyita tu ziknakara abaka mahani. Sesus tuktsa simysapyrētsa maha. Taparaka Sesus tuktsa humo kakyrirēta ziknakara. Deus hi kahumo tsimypokzitsiarēta iwatahi zikwatawy. Sudeutsabyitsa bo zikpeha iwaze wasania ty sibo motsasokoro. Kiristu koikny baktatu hawa tisapyrēna ituk zuba mynakara, ana soho humo batu myhyrinomyry. Abaka Deus harere wasania ty motsasoko. Kiristu isapyrēnikia ty myhyrinomyrētsa anahumo hi Deus zikpeha.

⁹ Tapara Deus mybaratsa harere ty batu tyso. Aiba zuba tsasohowy kytsa sizubarētsa bo msihyrinomyry tsihikik iwatahi zikpeha. Iharere motsaso ana humo hi zikpeha.

¹⁰ Iwa niy. Deus hyrinomyrywy baba ty myzubaha bo motsaso tsihikik. Sizubarētsa bo ihyrinomyrywy baba motsaso tsihikik. Bijoikpe iknytsitsa sitsumuēhĩtsitsa sibo motsaso tsihikik. Hyrikoso sapybara watsa niwatihi sibo motsaso tsihikik. Abazubatsa Sesus tuktsa bo iktsa mynakaranahaze Deus soho humo sihyrinomyrētsa. Sesus tuktsa sisapyrētsa moziknaha iwaze sizubarētsa Deus hyrinomyrywy baba humo sihyrinomyrētsa hỹ. Sesus harere bo hyỹ tsimykaranaha sibo Deus hyrinomyrywy baba motsasokona.

¹¹ Hawa Deus mytsaty nikara, atsatu wasani mykara. Abaka Sesus Kiristu harere bo hyỹ tsimykaranaha zeka Deus hyrytsa tsimoziknaha, Deus sohowy atsatu wasani my. Iwaze ihyrinomyrywy baba atsaesubaha bo ziwatawy.

¹² Iwaze mypehakatsa harere bo hyỹ tsimykaranaha iwa tsimyzurukunaha. Abaka batu mypyby. Iwatsahi Deus bo tsimypamykysoikiknaha. Atahi mymywabyky. Atahi mymykusukniki. Ibo hyỹ tsimykaranaha iwatsahi mspirikporētsa abaka batu mypyby.

¹³ Iwatsahi ahakurētsaktsa! Kaharere tsiwabyziukunahaktsa! Deus wasania ty ahabo iktsasoko iwatsahi kytsa piksukyrykynaha. Kahumo ahasukat-sihik byihuja! Deus pahasapywyky iwatahi kakurēta. Ahatsyhyryze sinini mykara ikiahatsa humo tisapyrēna iwatahi kakurēta my.

Hawa Kiristu myhumo tsimypokzitsiarēta.

¹⁴ Iwatahi ahatsyhyryze myzo bo mopamykysoikik.

¹⁵ Deus myzo koikny baktatu mynakara katsaktsa Sesus tuktsa ihyrytsa tsimaha. Asahi myzubaha bijoikpe eze tu mybarawy eze ktsa kino niwatihi ihumo sispitu maha. Myzubarētsa ihyrytsa tsimaha hỹ.

¹⁶ Ahatsyhyryze ipe my:

— O myzo ikia zuba tsapunihihrēta. Azikwy tisapyrēna. Ahyrikoso Epeso eze ktsa tuk mynapykyryk asa kino ihumo sipunihihrētsa moziknaha.

17-18 O myzo tysitsumuēhīkta. Iwa tsimykaraze aharere bo hỹ mykaranaha, iwa Sesus situk mynapykyryk ana kino myzapykyky. Hawa hwi puētsikbyita iharatatsa zihiboani iwatahi ba ziknatsihipetok. O myzo Epeso ezektsa Sesus tuktsa ikia humo sipunihikrētsa moziknaha. Iwa hwi iharatatsa zihiboani watsa asaktsa Sesus harere bo hỹ mykaranaha ikia humo sipunihikrētsa moziknaha. Iwaze asaktsa batu tyso Sesus myhumo tsimypokzitsiarēta ja. Batu mynyhy. Iwa batu tyso. Sesus myhumo tsimypokzitsiarēta ana kino myhyrinymyrētsa maha h̃y. Sispirikporētsa tybyi zubataha.

O myzo Sesus tuktsa myzubarētsa ahumo tsihyrinymyrytohihikta! Kiristu myhumo tsimypokzitsiarēta h̃y ana humo kino tsihyrinymyrytohihikta. Sesus mymypokzitsiki ba zipyk tawahi myhumo tsimypokzitsiarēta. Ana kino sihyrinymyrētsa h̃y ana humo hi mozihikik. Iwa batu aty tohi hawa Sesus myhumo tsimypokzitsiarēta tsihyrinymyrēta babata.

19 O kazo isapyrēnikia ty sibo tsinyiny tsihikik ana kino botu tsiktsaso. Aharere isapyrēnikia soho atsatu wasani sityhyryze myzapykyky – my.

Iwa Deus myzo bo ahatsyhyryze mopamykysoko.

20 O Epeso ezektsa Sesus tuktsa Deus bo tsimysakibazikiknahaktsa! Ipe tsimaha:

– O myzo ahyrikoso mytuk mynapykyryk h̃y. Iwaze ahyrikoso humo azikwy mytuk mynapykyryk iwatsahi mykurētsa h̃y. Ikia zuba tsamysapyrēta. Ikia zuba apunihikrēnikita. Ikia zuba amysakihikynikita. Hawa abo tsimyzapykykynahaze Sesus humo yh̃y tsimykara. Hawa mytsaty tsimykarannahaze ana humo hi tsihyrinymyrēta. Katsa tsimyzapykytohinahaze mymytsumuēhīkī azikwy tisapyrēna h̃y.

21 O myzo katsaktsa Sesus tuktsa ikia bo mywahi tsimysakibazikiknaha. Sesus Kiristu mymysapywyky iwatsahi atuk mywahi tsinapykyryknaha h̃y. Yh̃y tsimaha – iwa myzo bo tsiksakibazikiknaha h̃y.

4

Sesus tuktsa atsatu ty mytsaty mykaranaha.

1 Utakta Sesus soho iktsasoikik naha humo siakyriukrēnikitsa hurukwy bo zikoktyhyryknaha.

O kytsa kaharere bo wabyziutaha! Deus hi zahawatawy iwatsahi ihyrytsa tsimoziknaha iwaze wasani tahaktsa!

2 Katsa zuba myhyrinymyrētsa batu ahasopyk. Ahahokani byrihuja. Ahakubyrisorokuja! Batu ahabo zuba tsimykarannaha tyharape pokzitsikinahaktsa!

3 Myzo hyrikoso mymysapywyky iwatsahi mykurētsa tsimykarannaha. Katsaktsa atsa botu mytsaty tsimykarannaha iwatsahi aharape hahokbyitsa abaka tyharape pokzitsinaha. Ahape tu ahasopyk:

– Utakta Sesus tuktsa mysisapybaka. Yh̃y wasani mysisapy tsihikik – my. Iwa Deus myhumo mozihikik.

4 Myzo nimywatawy iwatsahi ituk mywahi tsimynapykyryknaha. Nimywatawyze Sesus humo myspirikporētsa tsimoziknaha, iwaze Deus hyrytsa tsimoziknaha. Kiristu harere bo zuba hỹ tsimykarannaha iwa tsimyzurukunaha. Deus hyrikoso estuba zubata atahi mytuk mynapykyryk. Deus hyrikoso estuba zubata atahi mytuk mynapykyk zeka Kiristu nury estuba zubata tsimaha. Iwatahi kytsa Kiristu tuktsa soho:

– Asaktsa Sesus nury maha – my.

5 Sesus Kiristu mypehaktsa atazubata my. Astatu mymyoktyrykta my. Kytsa nimyharasusuhiknahaze Sesus Kiristu mektsa botu nisiwatawy.

⁶ Deus zuba koikny baktatu atazubata my. Atahi mypehakatsa. Izikwy mytuk mynapykyryk iwa mymytsumuëhĩkĩ. Atahi tawahi mytuk mynapykyryk hỹ.

⁷ Kiristu myhyriziktsokzawy humo nimywatawy ana humo hi mymytsumuëhĩkĩ.

⁸ Tubabatu Kiristu mybarawy bo izumuze Deus sohokotsa botu ziwatahaka:

– Bijoikpe bo ziksizoze tasukyrytsitsa nisioktyhyryk.

Ipunihikrënikita tu tasukyrytsitsa sizubarëtsa tatuk nisioktyhyryk.

Abaka iharere bo zuba yhỹ nikaranaha.

Iwaze bijoikpe bo ziksizoze isapyrënikia ty tatuktsa bo nyny my – niy. Iwa botu ziwatahaka, aba zuba wasani my.

⁹ Hawa Kiristu nidoze Deus sohokotsa ziwatahaka. Tapara Kiristu mybarawy bo inasik iwaze nido.

¹⁰ Atakta Sesus bijoikpe ikny mybarawy bo inasik astatu bijoikpe bo nido. Nanabyitaba mypehakatsa myhyrizikwani mozik. Mypehatsa abazubata iwaze ihumo mybarawy tisapyrëna mozik.

¹¹ Atakta Kiristu wastuhu kytsa nisiwatawy. Ispe niy:

– Ikiahatsa kakzohotsa tsimaha iwatsahi Deus wasania ty tytsasonaha kytsa tsihyrinomyry – niy.

Kytsa Sesus humo sispirikpobyitsa bo Deus wasania ty motsasonaha. Iwa Deus tuk mynapykyknaha iharere humo sispirikporëtsa moziknaha. Nanabyitaba Deus wasania ty tsimytsasonaha.

Utsa kytsa nisiwatawy. Ispe niy:

– Ikiahatsa Deus sohokotsitsa kaharere Sesus tuktsa bo tytsasonaha – niy.

Utsa kytsa niwatihi nisiwatawy. Ispe niy:

– Ikiahatsa wasania ty ziknapamykysokonahatsa tsimaha. Nanabyitaba sizubarëtsa bo wasania ty tsimytsasonaha – niy. Utsa kytsa niwatihi nisiwatawy ispe niy:

– Ikiahatsa tsinyomyryknahatsa Sesus tuktsa tsihyrinomyry. Tysisapywyknaha sihumo tynasipokzitsikinaha – niy. Iwa my.

¹² Iwaze tyharape pokzitsikinaha. Siharere humo utsa Sesus tuktsa tynasitsumuëhĩ tsihikiknaha.

¹³ Katsakta Kiristu watsa tsimoziknaha, ana hi Kiristu mozihikik. Hawa tisapyrëna my Kiristu mykara. Kyze mopyk tsawa ihumo myhyrinomyrëtsa. Katsakta astatu tsawatsa mytsaty tsimykaranaha. Deus tse Kiristu isapyrënikia soho humo myhyrinomyrëtsa hỹ. Iwaze katsakta utsa Sesus tuktsa niwatihi atsaesubaha iwata tsimoziknaha hỹ.

¹⁴ Kyze Kiristu humo myspirikporëtsa tsimykaranaha iwatsahi iharere humo myhyrinomyrëtsa. Ihyrinomyrywy baba humo myhyrinomyrëtsa. Utsa mymypsikhikbatakanaha zeka batu waby tsimaha. Utsa mybarapetu mykaranaha zeka siharere humo hi batu hỹ tsimaha. Katsakta jabyitsa sopykbyitsa asahi paikpa mytsaty mynakaranaha. Katsakta Deus harere bo zuba hyỹ tsimykaranaha.

¹⁵ Ihyrinomyrywy baba humo zuba yhỹ tsimykaranaha. Iwa tyharape pokzitsikinaha. Sesus myharek wata tsimaha. Iwaze katsa wasanitsa tsimoziknaha.

¹⁶ Sesus Kiristu myhumo tsimypokzitsiarëta iwatahi mybo tawahi myzisapywyky. Parakbaha mysitsumuëhĩekik. Iwatsahi katsakta niwatihi utsa bo tahatsumuëhĩnahaktsa! Katsakta inury tsimaha. Myni mypoiktsa humo pyryk pyryk mahaze kyik rikto maha. Myni byizeka batu kyik rikto

zikaha. Anawata Sesus tuktsa estuba estuba zubata tahahyrikzitsokzawy tsimykarana i waze katsaktsa Sesus harere bo hyĩ tsimykarana ihumo myspirikporētsa tsimoziknaha. Kytsa simysapyrētsa moziknaha myharere humo iwa tahatsumuēhĩnaha hĩ. Iwatsahi taharapepokzitsinahaktsa!

Hawa Kiristu harere bo hyĩ tsimykarana ihumo myspirikporētsa, meky watu tsimoziknaha.

¹⁷ O katukytsa kaharere bo wabyziutaha! Mypehatsa Sesus harere ahape my. Kytsa Deus soho humo sispirikpobyitsa watsa batu ahasopyk. Asahi paikpa mytsaty nikarana kytsa harere humo zuba yhĩ mykaranaha. Ikiyahatsa batu. Niwazubaktsa. Siwatsa batu hĩ zikaha.

¹⁸ Asaktsa Deus harere bo batu hĩ niaha, iwatsahi batu sihyrinomyry. Batu ma zikaha Deus hyrinomyrywya baba humo batu sihyrinomyry iwatsahi kytsa miwa eze nizaranahatsa watsa niyziknaha. Siharerehakyrētsa asaktsa hawa mykaranaha batu sihyrinomyry. Deus harere humo batu sihyrinomyry, iwatsahi paikpa mytsaty mykaranaha.

¹⁹ Nisikpybybyinahatsa hi usts bo mysisapybyrikinaha. Tsōsĩ zikuikik naha tsahi ihyrikzitsopyryryk izumu. Nahapewohiknaha. Sisapybyikitsa tihi nikarana.

²⁰ Ana hi Sesus Kiristu soho humo batu ahahyrynyry. Ahamysapybara tsmoewynahaktsa!

²¹ Kytsa Sesus Kiristu harere bo zuba hyĩ mykaranahaze simysapyrētsa moziknaha. Ana hi botu tsiwabynaha. Ana humo hi tsikahahyrynyrykynaha i waze ikiahatsa ahamysapybyitsa tsikykarana tsmoewynaha. Myharere tyziwabyziukunahaktsa hĩ.

²² – O katukytsa! Taparaka amy ty batu imysapybara zuba tsikzihikiknaha.

²³⁻²⁴ Anabo hi wasani mytsaty ahabyitsa tsikykarana. “Iwa tsimaha zeka ahakurētsa tsimaha ahape tu ahasopyk” mybarapetu tsikykarana. Ana kino batu imysapy iwatsahi batu ahaku. Iwa tsikzurukunaha. Ahasopyk meky watu tsimyzurukunaha. Ahasuk ibykta mysykbaik zeka typapykik kyze ahasuk ezytyk ty korobyk tsimaha. Atawahi ahasopyk batu imysapy tsmoewynaha. Mekywa tu tsimoziknaha. Ahasopykwy ezytyk Sesus humo mytsaty tahaktsa! Sesus tuk tsimyzurukunaha! Ahasuk ezytyk ty korobyk tsimaha asa watsa tihi Sesus sopykwy humo zuba tsimyzurukunahaktsa! Iwaze wasani my tsimykarana. Hawa tsimyzurukunaha Kiristu wata tsimoziknaha iwa tsikahahyrynyrykynaha hĩ – my.

Hawa Kiristu ziknakara ikia niwatihiktsa!

²⁵ – O katukytsa! Taparaka ahamyspihikbatarētsa ziknakarana. Abaka ahamyspihikbata byihuktsa wasape tynakaranaha. Hawa wasani haty zuba tsimykarana hĩ. Katsaktsa atsaezubaha Sesus tuktsa tsimaha ana humo hi ahamyspihikbata byrihuja.

²⁶⁻²⁷ Kytsa humo ahakryri zeka niwazubakta! Haramwe junubabyizetu tynakokozonaha ahakoko byizeka Satanas harere bo yhĩ tsimykarana. Aty wahoro hokbowy zoksapare my zeka usta mytsuk, katsa mykoko byizeka Satanas mytuk mymykniki. Iwatsahi ahakryri byihuja.

²⁸ Aty ahatuktsa tsitsyhyryboarēta ziknakara zeka usts namy ty ka tyakse akse byity. Abaka tarabaja tykta. Iwaze tsipanamy usts kytsa bo nyny tsimy. Tsipanamyze hi wastuhu anamy ty sinamybyikitsa bo nyny tsimy.

²⁹ Asaktsa ahatuktsa siharerewabymybarētsa tu zeka niwazubakta. Aharere tisapyrēna humo zuba usts bo tynapamykysonaha i waze tyharape

hapokzitsikinaha. Utsa bo tysicsumuēhīnaha hỹ. Iwaze kytsa ahaharere piwabynaha zeka: “O anaharere hi tisapyrēna my” maha.

³⁰ Iwa tsimyzurukunaha zeka Deus hyrikoso ahahumo tsakurēta my-napykyryk. Imysapybara tyty tsimykaranaha zeka Deus hyrikoso ahahumo batu iaku. Deus hyrikoso zahawatawy iwatsahi Deus tyryktsa tsimoziknaha ahahyrinymyrētsa. Hawa Deus hyrikoso imysapyrēnikita my ikiahatsa ni-watihi ihumo ahamysapyrētsa tsimoziknaha. Ikiahatsa Deus hyrikoso tuk tsimynapykyknaha atahi bijoikpe bo mymyoktyhyryk. Deus ipe my:

“Hana puruze Sesus tuktsa kabo tysioktyhyk” my. Iwaze pahaoktyhyryk. Deus bo bijoikpe bo pahaoktyhyryk hỹ.

³¹ Iwatsahi pykyhytutaha! Harape humo ahaty kyri kyri byitaha! Ahape ty myija myija byitaha. Ahaty betsak betsak byitaha! Aty iotutsa pauk-tsitsa humo takyriki tsiharerewabymybarēta mozik. Iwaze ana kino tsi-moewynaha!

³² Ikiahatsa hi kytsa bo tysicsapywykynahaktsa! Ahahyrizikporētsa ty-harape pokzitsikinahaktsa! Ahamysapybyitsa tsikykaranaha Deus pahaok-zohik. Sesus Kiristu humo Deus mymyokzohik ispiriktsokdatawata my. Iwatsahi ikiahatsa niwatihiktsa. Aty batu imysapy abo my zeka ikia imys-apybara ty nikara tsiopiokzohik, mahani byitatu tsimyzuruku. Ikspiriktsok-datawata. Deus ahamysapybyitsa tsikykaranaha Sesus humo pahaokzohik iwatsahi ustsā imysapybara tsiopiokzohik hỹ Deus wata my – my.

5

O myzubaha Sesus watsa tsimyzurukunaha.

¹ Ikiahatsa Deus hyrytsa tsimaha. Atahi ahahumo tsimypokzitsiarēta hỹ. Iwatsahi ahamysapyrētsa tsimoziknaha. Hawa kytsa hyrytsa tahazotsa mysisopykzukunaha ikiahatsa Deus watsa tsimykaranaha. Ahazo watsa tsimoziknaha.

² Utsa tysicsapywykynahaktsa! Kiristu watsa tsipisapywykynahaktsa! Atahi myhumo tsimypokzitsiarēta iwatahi mysapyzekenihyrikosokda. Tapara kytsa siraratsa ziknasibakanaha iwaze Deus bo ziknasiwezokonaha ana humo hi simysapybyitsa nikaranaha Deus nisiokzohik atawatsa Sesus nihyrikosokdaze mymysapybyitsa tsikykaranaha Deus ihumo nimyokzohik. Deus tihi:

– O Sesus Kiristu mybarawy ezektsa sapyzekenihyrikosokda ta humo kakurēta. Hawa jokmorēnikia waok myze kakurēta anawahi Sesus nihyrikosokda iwatahi ibo iktsa myze kakurēta my. Mybarawy ezektsa humo tsimypokzitsiarēta babata ziwatawy – niy.

³ Ikiahatsa hi Deus tyryktsa tsimaha. Iwaze hawa wasani zuba tahaktsa! Kytsa ahatukze ustsā okeza bo iktsa zuba taha. Taokeza zuba mysipyryry-naha. Wytykyryk kino niwatihi tahabariktsa humo zuba ziktahasipihik-naha. Amy ty batu sisopyksapy wytykyryk nisiakzobyrikinaha batu mytsaty tsimykaranaha. Ahazokdi byihuja! Ahazokdibyitsa zeka mektsa namy ba zikzihikiknaha.

⁴ Ikiahatsa zuba wytykyryk nury soho tsimypamykysokonahaze ahamy-supehe byihuja. Ahaharerewabymybarabyihu ja. Anawaze ahaharere humo ustsā kytsa bo batu mysimiwyky. Ahamykni byihuja tynapykyknaha. Wasaniha ty tsimaha zeka ikiahatsa Deus pe tihi:

– O ikia zuba tsamysapyrēta. Nawa nizukni tsizubarēna tisapyrēna iwatsahi mykurētsa – tsimaha. Iwa tsimysasokonaha.

⁵ Atakta ustatsa bo tahyrizikwy zeka Deus tuk batu tawahi zikakpykyk. Wytyk usta maku bo tahyrizikwy zeka atatsa katsa Deus tuk batu tawahi

zikykykyk imysapybara bo mytsaty mynakaranaha asahi Deus tuk batu tahawahi zikakpykyknaha. Utsa namy tsihitsa watsa mynazihikiknaha batu Kiristu tyryktsa asahi sizokdirëtsa Deus tuk batu tahawahi zikakpykyknaha.

Kiristu harere bo zuba hyÿ tahaktsa kytsa!

⁶ Kytsa asahi Deus harere bo batu hÿ zikaha Deus tuk batu tahawahi zikykykyknaha. Kytsa ahape naha zeka:

– O hawa tsimyzurukunaha wasani tsimaha. Iwatsatu ahamysapybyitsa tsimykaranaha zeka ikiahatsa Deus tuk ahawahi tsimynapykyryknaha – mybarapetu nikaranaha. Anaharere batu wabyziu zikaha. Asaktsa mopamykysonaha zuba.

⁷ Siharere bo waby waby byitaha! Deus tihi:

– Kytsa kaharere bo batu hÿ zikahaze katuk batu tawahi zikapykyryknaha – my. Iwatsahi siharere bo ka waby waby byitahaktsa.

⁸ Taparaka wasaniha humo batu ahahyrinymyry. Kiristu harere humo batu ahahyrinymyry. Iwatsahi ahamysapybyitsa tsikykaranaha. Kytsa miwa ezektsa watsa tsikzurukunaha iwatsahi Kiristu harere bo batu hÿ tsikykaranaha. Deus harere humo batu ahahyrinymyry hÿ. Abaka meky watu tsimykaranaha. Sesus Kiristu harere bo hyÿ tsimykaranaha ihumo meky watu ahaspirikporëtsa tsimoziknaha. Hawa kytsa iwororo haburuk tu mokurunaha ezektsa watsa tsinymyrykynaha iwatsahi imysapybara bo batu hÿ tsimykaranaha meky watu tsimoziknaha.

⁹ Ikiahatsa hi Kiristu harere bo hyÿ tsimaha zeka kytsa humo tahasapywykynaha. Wasani tsimykaranaha. Kytsa bo ahaspihikbata byihuja ahaharere wasani zuba tsimykaranaha.

Iwa Kiristu harere bo hyÿ tahaktsa!

¹⁰ Ahape tu ahasopyk:

– Hawa Deus mozihihikik naha zuba tsimyzihikiknaha iwatsahi isopyk ty tanymyry tsihikik. Deus ykparawy humo tanymyryky – tsimaha.

¹¹ Kytsa Sesus harere bo yhÿ ahabyi zeka sisopyksapybyitsa mykaranaha.

¹² Ikiahatsa batu situk tsimaha. Asaktsa kytsa watsa asahi miwa eze pyrikpyrik mykaranaha kytsa papatu simysapybyitsa mykaranaha. Simysapybyitsa nikaranaha ana soho tihi batu tyso. Mysikpybyrëtsa simysapybyitsa nikaranaha humo. Ikiahatsa ispe tsimaha:

– O kytsa ahamysapybyitsa tsimykaranaha ana ty kino “niwazubakta” tsimaha – my.

¹³⁻¹⁴ Miwaka rika ty pok mahaze kywa mypubyize mynamy bo iktsa tsimaha. Anawahi Kiristu harere kytsa bo tsimypamykysokonahaze simysapybyitsa mykaranaha anasoho humo hi sihyrinymyrëtsa. Ahaharere rika wata mozik. Iwororo ha eze kywa mypubyi mozik. Anawahahi Kiristu harere tsimytsasokonahaze kytsa simysapybyitsa nikaranaha nisihyrinymyrykynaha iwaze iharere humo simysapybyitsa nikaranaha sityhyryze piwatawyky. Tapara aty zeka:

– Ikiakta tsipuruziukze popotyкта kyiktyкта ikia amysapybyita tsikykaranaha humo ibezehe tawata tsimy.

Tsikahazoziknahaktsa! Kiristu harere bo zuba yhÿ tahaktsa!

Hawa kytsa iwororo ha eze kywa mokurunaha ikiahatsa siwatsa tsimaha hawa wasani tsinymyrykynaha.

Kiristu harere humo wasanitsa tsimoziknaha – nikaranaha.

Iwa botu ziwataha.

¹⁵ Kaharere bo wabyziutaha! Ahape tu ahasopyk:

– O hawa haeze tsimyzurukunaha wasani ja tsimaha. Sispirikponikitsa – tsimaha. Iwa ahasopyk. Hawa tsimyzurukunaha pykyhytu tahaktsa!

¹⁶ Mybarawy ezektsa simysapybyitsa mykaranaha. Ikiahatsa batu. Meky-watu tsimoziknaha. Kytsa tysisapywyikiknahaktsa! Tysitsumuēhñahaktsa.

¹⁷ Iwatsahi mypehakatsa Sesus harere bo wabyziutahaktsa! Ahasopyksapy byihuja! Ikiahatsa hi mypehakatsa harere bo mytsatyziu tsimynakaranaha iwatsahi iharere bo zuba hyỹ tsimykaranaha.

¹⁸ Tsōsĩ ty ka tsō tsō byitaha. Kytsa tsōsĩ ty pikukunaha zeka batu saku. Tahakyri humo sisopyksapybyitsa mykaranaha. Tsōsĩ humo batu imysapy mykaranaha. Ikiahatsa batu. Deus hyrikoso ahatuk mynapykyryk ana kino tuzihikiknahaktsa!

¹⁹ Tsikzumubanhaze Deus bo tysakibazikiknahaktsa! Ikia zubaze kino niwatihi Deus bo tysakibazikikta! Hawa taparaktsa Deus bo nisakibazikiknaha ikiahatsa kino niwatihi tsimaha. Hawa Deus sohotsitsa nisakibazikiknaha ikiahatsa atsatu tsimaha. Deus hyrikoso humo iharere tuk tsimysakibazikiknahaktsa!

²⁰ Iwaze nanabyitaba ikiahatsa Deus bo tsimysakibazikiknaha. Ikiahatsa tihi:

– O Deus myzo ikia zuba amysapyrēnikita. Ikia zuba apunihikrēnikita, ikia amysakikynikita iwatsahi ikia humo ka mykurētsa tsimaha – my.

Iwa Deus bo tsimypamykysokonaha hỹ.

Kytsa, wytykyryk kino niwatihi tuharape pokzitsinaha.

²¹ Kyze Deus harere bo yhỹ tynakaranaha. Sesus Kiristu harere bo zuba hyỹ tynakaranaha iwatsahi ahaspirikporētsa tsimoziknaha. Utsa Sesus tuktsa harere bo kino niwatihi yhỹ tsimykaranaha.

²² Wytykyryk ikiahaka kino Kiristu harere bo hyỹ taha. Atsawatu ahapytsa harere bo yhỹ tynakaranaha.

²³ Kiristu mypehakatsa harere bo zuba hyỹ tsimykaranaha.

²⁴ Katsaktsa ituktsa tsimaha. Atahi myharek wata my. Katsaktsa inury watsa tsimaha. Sesus Kiristu tazo bo mymyoktyhyryk mykara. Iwatsahi iharere bo hyỹ tsimykaranaha. Atsawatu wytykyryk kino ahapytsa harere bo zuba tynakaranaha iwazahi ahapytsa ahapehatsa harere bo yhỹ tynakaranaha.

²⁵ Kytsa kaharere bo wabyziutaha! Ahaokeza humo ahamypokzitsiukoktsa! Tysitsumuēhñahaktsa! Hawa Kiristu myhumo tsimypokzitsiukoktsa ikiahatsa kino niwatihi ahaokeza tsysipokzitsinaha! Kiristu myhumo tsimypokzitsiarēta mysapyzekenihyrikosokda. Aparakbaha bo nihyrikosokda.

²⁶ Kiristu harere humo mysapyrētsa tsimoziknaha. Kytsa momurunaha zeka siziurētsa moziknaha. Astatu Kiristu harere bo yhỹ tsimykaranaha zeka siziurētsa watsa tsimoziknaha. Iharere humo ahamysapyrētsa tsimoziknaha.

²⁷ Kiristu hi:

– O katuktsa katuk ahawahi tynapykyryknaha. Wasani tsimoziknaha. Ahamysapyrētsa tsimoziknaha anawahi mozihikik – niy.

²⁸ Atsawatu kytsa ahaokeza tsysipokzitsinaha. Hawa Kiristu aparakbaha humo tsimypokzitsiukrēta iwatsa kytsa ahaokeza tsysipokzitsinaha. Amy ty tisapyrēna tsimyzihikiknaha batu ahabo zuba zikaha. Isapyrēnikia humo ahaokeza bo kino niwatihi tsimyzihikiknaha.

²⁹ Isapyrēnikia ty ahaokeza tsyhyryze tsiberinaha niwatihi. Ikiatu tsizapokzitsiki. Araparēta zeka tsipadisaha. Arapukrēta zeka tsipuku. Iwatahi isapyrēnikia ty hyryk tsimy zeka atsatu ahaokeza bo nyny tsimy.

³⁰ Kiristu wata tsimoziknaha. Atahi namypokzitsihikik. Atahi:

– O katuktsa ikiahatsa kanurywatsa, iwatahi pahapokzitsihikik – my. Iwa mysopyk mykara. – Kiristu tatuktsa humo tsimypokzitsiarēta iwatahaktsa kytsa ahaokeza humo ahamypokzitsihu.

³¹ Deus harere mype maku tasukzaze tazo perek taje perek my. Taparaka atazuba zikzuruku. Tasukza zeka mahani, taoke tuk mynapykyryk.

³² Kiristu tuktsa humo tsimypokzitsiukrēta ana watsa hi kytsa tahaokeza humo simypokzitsiukrēta. Anasoho hi piwatawyky. Tapara ana soho humo batu myhyrinymyry aba zuba tsinymyrykynaha.

³³ Kiristu tatuktsa humo tsimypokzitsiukrēta babata, atawahi ahaokeza tysipokzitsinahaktsa! Tapara isapyrēnikia ty ahabo zuba hyryk zikaha, abaka batu, isapyrēnikia ty ahaokeza bo kino niwatihi taha. Wytykyryk ikiahaka ahapytsa harere bo yh̄y tsimykaranaha h̄y. Iwa tuzurukunahaktsa – niy.

6

Hawa sizotsa tahahyrytsa humo mysisakihikynaha.

¹ – O jabyitsa ahazotsa harere bo hȳy tahaktsa! Siharere tsipiwabyziunaha zeka ma tsimaha. Ahajeza harere bo niwatihi hȳy tahaktsa! Siharere bo ma tsimaha zeka Deus ispe my: “O asaktsa wasani mykaranaha” – my.

²⁻³ Tubabatu Deus tyryktsa pe niy. – Ahazotsa harere bo hȳy taha. Ahamyharerewabyrētsa zeka aibani zuba tsimyhyrikosokdanaha – niy. Deus harere tisapyrēna iwatsahi ahazotsa ahajeza kino niwatihi siharere bo ma taha.

⁴ – O myzotsa ahahyrytsa humo ahahokani byrihuja ahaharere humo siakubyitsa mykaranaha. Siaku byizeka sioktsiukrēta moziknaha. Iki-ahatsa hi ahahyrytsa Kiristu harere humo tysihyrynymyrykynaha. Iwaze Sesus sopyk wa mozurukunaha iwa ikiahatsa soho humo ahasopykwatu mykaranaha – my.

Hawa sipehatsa tahatsumuēh̄tsitsa humo sisopyk.

⁵ Abaka kytsa ahahyryziksokzaharētsa kaharere bo wabyziutaha! Ahapehakatsa pahapehanaha zeka yh̄y tsimykaranaha. Sihyryziksokzawy soho pahapehanahaze yh̄y tsimykaranaha. Ahape tu ahasopyk batu tyso. – O ana hyryziksokzawy humo batu h̄y – tsimaha. Ahahyryziksokzawy humo ahapykyhytutaha! Ahapehatsa harere bo yh̄y tsimykaranaha watih̄i Kiristu harere bo hȳy tynakaranaha.

⁶ Tarabajaziu tykarannahaktsa! Ahapehatsa pahasukparanaha zeka tarabajaziutaha. Ahapehatsa ahaty sukpara habyzite kino niwatihi tarabajaziutaha. Kiristu tuktsa humo ahasopykziurētsa h̄y. Iwa Deus mozihikik ana humo hi ahasopykziurētsa tsimoziknaha.

⁷ Ahape tu ahasopyk:

– O kahyryziksokzawy kapehatsa bo mykara. Sesus Kiristu bo kino niwatihi. Iwatahi pisapybaka – tsimaha.

⁸ Sesus Kiristu mypehakatsa babata. Atakta abazubata. Mybarawy ezektsa pehakatsa babata my, atahi ihuak ty sihyryziksokzawy humo kytsa aparakbaha bo nyny my. Anabo hi mytsatyziu tahaktsa kytsa!

⁹ O sipehatsa abaka ikiahatsa pe my:

– Asaktsa ahatsyhyryze ahahyryziksokzawy humo mykaranaha tysisapywykynaha. Ahampybyty byihuja. Ahasakimyskyry byihujataha. Asaktsa ahatsyhyryze tarabaja mykaranaha. Deus hyrytsa maha ikiahatsa kino niwatihi Deus hyrytsa tsimaha. Iokzeka astsabani. Iwatsahi ahakzoziuhuktsa!

Myzo bjoikpe eze mybarawy ezektsa aparakbaha bo mysisapywyky. Ana humo hi ahaspiriktsokda byihuja kytsa! – my.

Deus sodadu suk imiokbyita wata ahabo nyny my, iwaze ahapunihikrētsa tsimoziknaha.

¹⁰ Aba pepykyk, kaharere ahabo motsaso pahatsumuēhī tsihikik. Ahapuni-hikrētsa tsimoziknaha ana humo hi pahatsumuēhī. Ikiahatsa Sesus Kiristu humo ahaspihikrētsa iwatsahi ahaspirikporētsa tsimoziknaha. Atahi ipuni-hikrēnikita my ba hawa tohi zikzukninaha. Iharere bo ma tsimykaranaha zeka izikwy ahatuk mynapykyryk.

¹¹ Sodadutsa pehakatsa sisuk ty mekywahaty ty sodadutsa bo nyny my. Sisuk ty imiokbyita iwatsahi sisukyrytsitsa ba ziksibanaha. Deus zikwy mytuk mynapykyryk. Iwatsahi mypunihikrētsa tsimoziknaha izikwy sodadutsa suk imiokbyita wata my. Katsahi:

– O myzo azikwy ty mybo nynytny – tsimaha. Yh̄y mykara. Iwaze Satanas harere bo batu h̄y tsimaha Deus zikwy humo, Satanas pahaspikh-batakaze iharere bo batu h̄y tsimaha.

¹² Mybarawy ezektsakta mysukyrybyitsitsa maha. Hyrikoso sapybara watsa mysukyrytsitsa maha. Sinurybyitsa tu mysukyrytsitsa babatsa maha. Hyrikoso sapybara myhumo batu siakparawy mymysukyryikiknahatsa maha. Iwatsahi siharere bo batu h̄y tsimaha. Asakta mysukyrytsitsa babatsa h̄y. Asahi namysapybyrikinaha. Kytsa Sesus humo sispirikpobyitsa hi siharere bo yh̄y mykaranaha. Sizubarētsa mysipehakanaha iwatsahi sisopyk watsa mozurukunaha. Asakta Sesus harere bo batu h̄y zikaha sispirikpobyitsa tu hyrikoso sapybara pehakatsa sipehakatsa niyzik. Asakta unata zuba siakparawy kytsa papa tu simysapybyitsa tu nikaranaha iwaze miwa siakparawy.

¹³ Iwatsahi Deus zikwyty tsimyzapykykynaha. Sodadutsa sisuk imiokbyita watsa ikiahatsa hi Deus zikwy tsimyzapykykynaha. Deus zikwy ahatuk mynapykyrykze ahapunihikrētsa tsimoziknaha. Ahaspirikporētsa tsimoziknaha Deus zikwy humo hyrikoso sapybara harere bo batu h̄y tsimaha.

¹⁴ Mybarawy ezektsa niwatsorokonahaze sisuk ty mekywaha tu korobyk niaha. Sisuk imiokbara ty korobyk niaha iwatsahi sisukyrytsitsa ba ziksibanaha. Ikiahatsa sodadutsa watsa tsimaha. Tapara sodadu tasukpesuk ty izezehirēnikia ty korobyk niy. Tazikoikaīwy ty haī niy. Ikiahatsa batu ahamyspihikbata. Wasani zuba tsimyzasonaha ikiahatsa sodadu zikoikaīwy watsa. Iwaze wasani tsimyzurukunahaze ikiahatsa sodadu suk imiokbyita ty korobyk niy tawata tsimaha. Hawa isuk imiokbyita humo ba zibezenaha, ikiahatsa wasani tsimykaranaha humo hyrikoso sapybara humo ahakyo-hokbyitsa maha.

¹⁵ Deus mybarawy ezektsa humo tsimypokzitsiarēta iwaze wasania ty Sesus Kiristu soho tsimyzasonahaze sodadutsa watsa. Sodadutsa pyry-suktsa ty simiokbyitsa ty korobyk maha siwatsa tsimaha.

¹⁶ Sesus Kiristu humo ahaspirikporētsa! tsimynakaranaha. Ihumo tsimyspirikponahaze sodadutsa watsa tsimaha. Sodadutsa orokpedawy imiokbyita. Iwaze sisukyrytsitsa orobiktsa ty iharazōrō ba zizaknaha. Atawahi hyrikoso sapybara pehakatsa mybo nimykzoikik iwatahi imysapybara myhumo nazihikik. Niwazubakta! Katsakta Sesus Kiristu humo mspirikporētsa imysapybara humo ba h̄y tsimaha.

¹⁷ Sesus Kiristu mymyoktyhyrykta tazo bo mymyoktyhyryk. Sesus watsa tsimoziknaha ana hi mozihikik. Taperykyze sodadutsa watsa. Sodadutsa tsorik imiokbyita taharek humo pu maha. Ikiahatsa hawa mytsaty tsimykaranaha pykyhytutaha. Iwaze Deus harere humo mytsaty tynakaranahaktsa! Deus hyrikoso iharere ty pahahyrinymyryky iwatsahi ikiahatsa sodadutsa watsa tsimoziknaha. Sodadutsa sokorotsapuzeze tyryeze kihiwa. Hawa sodadu isukyrytsa nisiba sokorotsapuzeze tyryezekihiwa ty ikiahatsa Deus harere humo Satanas harere nepykba.

¹⁸ Deus bo tynapamykysonahaktsa! Hawa Deus hyrikoso mozihikik ana hi tyzapykynahaktsa! Ahazikara byihuja tsiperykynahaktsa. Deus bo tynapamykysonaha. Tsibyituhukutunaha. Ikiahatsa tihi:

– O myzo Sesus tuktsa tsyhyryze tsimyzapykynaha. Nanabyitaba atyryktsa tsyhyryze tsimyzapykynaha.

¹⁹ Asaktsa mysitsumuēhī. Pauro kino niwatihi tsipitsumuēhī. Hawa wasania ty Sesus soho motsasoko tsipitsumuēhīkī iwaze ustsā kytsa bo ihumo sihyrinymyrētsa moziknaha. Tsiakusukniki. Atahi ahumo ipybybyita tu wasania ty motsasoziū! myzo tsimaha – my. Taparaka Deus Sesus Kiristu soho humo batu mymyhyrinymyry abaka kytsa sizubarētsa mymyhyrinymyrykynaha.

²⁰ Deus zikpeha iwatahi iharere motsasoikik. Abaka iharere humo kytsa siakyrīukrēnikitsa hurukwy bo zikoktyhyryknaha. Iwatsahi Deus bo katsyhyryze tsimyzapykyikiknaha. Wasani mykara ana hi ibo tsimyzapykyikiknaha. Ikiahatsa tihi:

– Myzo azikwy ty Pauro bo nyny tsimy iwaze aharere motsasoziuku. Ipybybyita azikwy humo tsipunihikrēta mozik – tsimaha.

Aba mopykykze kytsa bo mytsaty mykara.

²¹ Tikiko kaso ho ahabo motsaso. Ata humo kamypokzitsiarēta mytsy babatawa my. Mypehatsa Sesus tsyhyryze tarabajaziū mynakara. Tsiakzoz-iurēta tarabajā my. Tsiakubyrisorokrēta.

²² Iwatahi ahabo pipeha, hawa mynakara ana soho ahabo motsaso. Iwaze ikiahatsa batu tyso:

– Pauro ja. Yh̄ ja – tsimaha. Atahi ikiahatsa tuk mopamykyso.

Deus pahasapywyky.

²³ Deus bo ahatsyhyryze mopamykysoikik. Ipe my:

– O Deus myzo, mypehakatsa Sesus Kiristu niwatihi ahyrytsa bo tysisapywykynaha. Ba paikpa mytsaty zikaha, ikia hi tysiakuwyky. O myzo tsysitumuēhī ustsā kytsa wasani sisopyk. Sesus Kiristu harere bo hȳ mykaranaha iwaze ihumo mospirikpotohinaha iwa tsysitumuēhīkta!

²⁴ O myzo tysisapywyky. Amy humo siaku byizeka sibo tyzapykykta iwaze atuk tahawahi mynapykyryknaha. Sesus humo sipunihikrētsa moziknaha – my.

Iwa Deus bo ahatsyhyryze mopamykysoikik. Nepyk niwazuba.

Pauro

Pauro Piripos ezektsa bo ziwatahaka

Pauro Piripos ezektsa bo Sesus soho nitsasoko iwaze wastuhu Sesus humo sispirikporētsa niyziknaha. Bykyze sakyriukanikitsa hurukwy eze niapykyrykze sibo ziwatahaka. Deus hyrikoso Pauro tukniapykyryk iwatahi Deus harere ziwatahaka iwatsahi katsa kino niwatihi Sesus soho humo tanymyryky.

¹ Uta Pauro Timoteo niwatihi ahatsa katsaktsa Sesus Kiristu tsumuēhītsa tsimaha. Timoteo katuk my. Uta Sesus Kiristu tsumuēhītsa ahabo piwatahaka. Ikiahatsa Sesus tuktsa Piripos ezektsa ahabo piwatahaka. Sesus tuktsa sispirikpokotsa sitsumuēhītsa kino niwatihi sizubarētsa bo piwatahaka.

² Deus myzo bo mopamykysoko. Sesus Kiristu kino niwatihi iharere bo hȳ tsimykaranaha. Sibo hi mopamykysoko. Uta hi ispe my:

– O Deus myzo Piripos ezektsa Sesus tuktsa tysipokzitsikta! Ikia humo sakurētsa moziknaha ba paikpa mytsaty zikaha – my. Iwa ahatsyhyryze mykara.

Pauro Piripos ezektsa tsyhyryze Deus bo nipamykysoko.

³ Ahasoho humo mytsaty mykaraze Deus bo mosakibaziki:

– O Deus ikia zuba tsamysapyrēta – mykara.

⁴ Deus bo ahatsyhyryze mopamykysokoze kakurēta. Ahazubarētsa tsyhyryze Deus bo mopamykysokoze kakurēta h̄y.

⁵ Hawa tapara tsiktsumuēhīkīnaha bo mytsaty mykara. Deus harere ahabo iktasokoze ikziakbata zuba iharere bo hȳ tsimykaranaha nawaze tsiktsumuēhīkīnaha iwatahi kakurēta h̄y.

⁶ Ikiahatsa meky watu tsimoziknaha. Deus humo ahamysapyrētsa tsi-moziknaha. Iwa ahatuk mykara hawa mozihikik Deus zikwy humo yh̄y tsimykaranaha. Aibani zuba Sesus Kiristu myziksizoze hawa Deus mozi-hikikze mopykba.

⁷ Ikiahatsa soho mytsaty mynakaraze ana humo hi kakurēta. Ahahumo kamypokzitsiarēta. Kytsa sakyriukrēnikitsa hurukwy bo zikoktyhyrykna-haze, ziktsumuēhīnaha katuktsa tsikyzyknaha h̄y. Abaka sakyriukrēnikitsa hurukwy eze tsiktsumuēhīkīnaha. Iknakuruze Deus wasania ty ziwatawyky. Iharere zibetesaka ana humo hi kytsa iharere bo hȳ nikaranaha sispirikporētsa niyziknaha. Ikiahatsa kino niwatihi tsiktsumuēhīkīnaha. Iwatahi ahahumo kamypokzitsiarēta iwa wasani my h̄y.

⁸ Sesus Kiristu kahumo tsimypokzitsiarēta h̄y. Iwatahi utakta iwata my ahahumo kamypokzitsiarēta:

– Wasape my. Iwa Deus okzeka motsasoko ahahumo kamypokzitsiarēta h̄y. Ikiahatsa humo ka kahyrizikbarēta iwa Deus zikyrynomyryky – my.

⁹ Deus bo ahatsyhyryze ipe my:

– O myzo Sesus tuktsa Piripos ezektsa ahumo simypokzitsirētsa. Ikia humo hi myharape pokzitsikinaha. Asoho pinymyrytohinaha! Ba ziksimyiw y hawa myhyrynomyrywy baba humo sihyrynomyrētsa iwa tysitsumuēhīkīkta – my.

Iwa Deus bo ahatsyhyryze mopamykyso.

¹⁰ O Piripos ezektsa hawa tsimykara naha humo ahahyrinomyrētsa hawa wasani haty ahahyrinomyrētsa. Ba zikmyinaha. Nawa tsimyzurukunaha zeka Sesus myziksizoze batu ahasikpyby. Ahamysapyrētsa tsimoziknaha iwaze batu ahasikpyby.

¹¹ Iwa tsimyzurukunaha zeka wasania ty zuba tsimykarana. Hawa wasani tsimykarana. Iwaze kytsa sizubarētsa ahahumo hi Deus bo motsasokonaha:

– O Deus ikia zuba tsamysapyrēta. Ikia zuba wasani tsimykara – maha. Iwa ahahumo Deus bo mosakibazikiknaha.

Kabo ka Kiristu zuba mozihikik.

¹² O katukytsa hawa kytsa piksukyrykiknaha Sesus harere iktsasokoze, kytsa sizubarētsa humo wasani niyziknaha. Abaka kytsa sizubarētsa Sesus harere bo hỹ mykaranaha iwatsahi ihumo sispirikporētsa moziknaha. Sinini ikykaraze Sesus harere bo hỹ mykaranaha iwatahi kakurēta.

¹³ Ana kino sodadutsa pikperykynaha. Kytsa sizubarētsa kino niwatihi kasoho botu ziwabynaha. Uta kino sakyriukanikitsa hurukwy eze tu Sesus harere motsasoko ana hi ziwabynaha.

¹⁴ Iwaze katukytsa kabo iktsa mykaranahaze sakyriukanikitsa hurukwy eze tu sipunihikrētsa moziknaha. Deus hi nisiakuwyky iwatsahi Sesus harere bo hỹ mykaranaha ihumo sispirikporētsa. Sipunihikrētsa tu nanabyitaba Sesus harere motsasokonaha. Sipybybyitsa mykaranaha Sesus harere motsasokonaha batu pyk zikaha.

¹⁵ Wastuhu zuba kytsa niharapepehakanahatsa humo Sesus soho motsasokonaha. Kahumo sizokdirētsa iwatsahi Deus wasania ty Sesus soho motsasokonaha. Utsaktsa batu. Asahi simyzihikrētsa Deus harere siakparawy iwatsahi Deus wasania ty motsasokonaha.

¹⁶ Asahi kahumo simypokzitsirētsa iwatsahi Deus wasania ty motsasokonaha. Tubabatu Deus kape niy:

– Ahyriziktsokzawy humo wasania tytsaso. Myzubaha bokta! Kaharere wasania ty sibo tsiwatawykta! – niy. Iwatsahi asaktsa simyzihikrētsa katsyhyryze Deus wasania ty motsasokonaha.

¹⁷ Utsaktsa batu. Sizokdirētsa tu Sesus soho motsasokonaha, taha bo zuba mynakaranaha. Batu wasani zikaha. Asahi:

– Katsaktsa Sesus soho motsasokonaha zeka katsa Pauro watsa tsimoziknaha. Iwaze kytsa mysoho “O asahi sihyrinymyrētsa maha” mytsaty ahabyitsa zikaha. O Pauro sakyriukanikitsa hurukwy eze mysoho ziwabyze iaku byita niyzik mytsaty ahabyitsa mykaranaha – nikaranaha.

¹⁸ Wasaniha ty Sesus soho motsasonahaze anahumo hi kakurēta. Kytsa taha bo zuba mytsaty mykaranaha zeka Sesus soho motsasonahaze. Kytsa kino niwatihi simyzihikrētsa mykaranaha zeka Sesus soho motsasonaha iwatahi kakurēta mykara. Wasaniha ty Sesus soho motsasonahaze ana humo hi kakurēta mykara.

¹⁹ Iwatatu sakyriukrēnikitsa hurukwy eze tu kakurēta. Hawataeze piksukunaha ana humo hi kahyrinymyrēta. Ikiahatsa katsyhyryze Deus bo tsimypamykysokonaha atahi pahawaby iwaze piksukunaha. Sesus Kiristu hyrikoso piksumuēhī iwatahi piksukunaha anahumo hi kahyrinymyrēta.

²⁰ Kiristu tuk zuba mynakara ana hi mozihikik. Kamysapyrēta mynakara Kiristu kabo iktsa my zeka batu kasikpyby. Abaka Kiristu soho motsasokoze batu kapyby. Kapunihikrēta tu Deus wasaniha motsasoko. Iwaze kytsa hi:

– O Sesus Kiristu imysapyrēnikita h̃y – maha. Utakta kaspitu mopykyryk zeka yh̃y my. Kytsa pikbezenaha zeka niwatihi yh̃y my. Kiristu ihyrinymyryta babata harere mozihikik.

²¹ Uta kaspitu zeka Kiristu harere kytsa bo motsasoko. Kytsa Deus pe – O ikia zuba tsamysapyrēta – maha. Mohyrikosokda zeka uta Deus tuk kawahi mynapykyryk.

²² Uta kaspitohitu zeka kahyriziktsokzawy humo tybyri zuba mynakara wasani my. Hawa ha ty ja myzihikik batu kanyhy. Uta kaspitu mynapykyryk zeka hawa my. Kytsa pikbezenaha zeka wasani. Hawa ja mozihikik. Paikpa mytsaty mykara. Ske myparawy waha bo ikzumu.

²³ Mohyrikosokda tsihikik. Iwaze Kiristu tuk kawahi mynapykyryk. Iwatahi abaka pikbezenaha zeka wasi.

²⁴ Nawa tatu napykyryk zeka pahatsumuēhī iwaze ahahumo wasani. Iwatahi ahahumo mynapykyryk.

²⁵ Yh̄y ahatuk mynapykyryk iwaze pahatsumuēhī ana humo hi kahyrinymyrēta. Iwaze ikiahatsa Sesus harere bo hȳy tsimykaranaha ihumo ahaspirikporētsa tsimoziknaha iwa pahatsumuēhī. Ahaspirikporētsa tsimoziknaha ana humo hi pahatsumuēhī iwaze ahakurētsa tsimoziknaha.

²⁶ Iwaze ahabo mynakozoreze ikiahatsa hi:

— O katsaktsa mykurētsa Sesus Kiristu zikwy Pauro mybo ziwatawy iwatsahi mykurētsa h̄y — tsimaha

Deus harere humo ahapunihikrētsaktsa!

²⁷ Kyze Sesus Kiristu harere bo hȳy tsimaha ahaspirikporētsaktsa! Iharere bo zuba hȳy tahaktsa kytsa! Kyze ahabo mynakozore zeka, kaku zuba piwabyky. Ahabo zuk byizeka, kytsa ahasoho kabo motsasonaha:

— O Sesus tuktsa Piripos ezektsa wasani mykaranaha. Asaktsa atsa botu mytsaty mykaranaha. Iwaze Sesus harere bo tarabaja ziknakaranaha. Tyharape tsumuēhīkīnaha. Sesus harere bo hȳy mykaranaha iwatsahi ihumo sispirikporētsa Deus wasaniha humo tarabajaziu ziknakaranaha — mykaranaha. Iwa ahasoho ty mopamykysonaha.

²⁸ Ahapyby byihuja. Ahasukyrytsitsa pokso ahapyby byihuja. Ahapunihikrētsaktsa! Ahasukyrytsitsa ahabo iktsa maha zeka asahi sipybyrētsa moziknaha, Deus zikwy ahatuk zeka iktsa mahaze ana humo hi sipybyrētsa. Ahapunihikrētsa tu Deus zikwy mysiwatawyky iwatsahi Deus wasaniha ba zikpykba sihyrinymyrētsa h̄y.

²⁹ Kyze Sesus Kiristu humo ahaspirikporētsa Deus pahahyrinymyryky ikiahatsa iharere bo hȳy tsimykaranaha abaka itsyhyryze tsitsumuēhīkīnaha. Nimywatawyhik ihumo ahaspirikporētsaze iwa itsyhyryze tsitsumuēhīkīnaha. Ikiahatsa Kiristu tsyhyryze sinini tsimykaranahaze ana humo kino niwatihi nimywatawyhik iwa sitsumuēhīkīnaha.

³⁰ Katsaktsa mykubyrisorokrētsa! Kytsa nimysininiwykynaha atsatu pahasininiwy botu iktasaso. Abaka tybyri zuba mykarazo ana hi tsiwabybana.

2

Kiristu wata tasopykzu.

¹ Abaka Kiristu zuba myzahapehaka iwatsahi ahapunihikrētsa tsimoziknaha. Kiristu ahahumo tsimypokzitsiarēta iwatsahi ba paikpa mytsaty zikaha. Ikiahatsa hi ihumo ahakurētsa. Deus hyrikoso ahatuk mynapykyryk. Iwaze tyharape pokzitsikinaha zikahabyitsa tu ahamysapyrētsa tsimoziknaha.

² Iwatahi ahape my:

— O kytsa batu ahasopyk iwatsahi ba zikarapepehanaha! Hawa Sesus mymypokzitsiki iwa ikiahatsa kino niwatihi tynaharape pokzitsikinaha! Parakbaha atsa botu mytsaty tsimykaranaha! Ikiahatsaktsa tsahamykpyriziurētsaktsa my — iwa tsimykaranaha zeka ahahumo kakurēta h̄y.

³ Ahabo ka mytsaty mytsaty byitaha! — Uta zuba kahyrinymyrēta — batu tyso. Asahi iwa mykaranaha zeka siharererētsa zuba. Ikiahatsaktsa

tsahaspirikporētsa tsimahaktsa! Kytsa tuk ahakubyrisorokoktsa tsimaha. Ikiahatsa ustsasoho hi:

– O atakta tsimysapyrēta. Utakta batu – tsimaha. Iwa ustsasoho bo mytsaty tsimykaranaha.

⁴Utsa ahatukytsa tysisakihikykyknahaktsa. Batu ahasoho bo zuba mytsaty zikaha. Utsa tsysitsumuēhīnahaktsa.

⁵Hawa Sesus Kiristu mytsaty ziknakara astsa botu tahaktsa isopyk watu tahaktsa! Hawa Sesus Kiristu nikara isopyk watu kytsa bo ahasopyksapyhu ja tsimykaranaha!

⁶Atakta Deus wata ziknakara.

Sesus Kiristu Deus wata iwatatu tabo zuba mytsaty ahabyita nikara.

Sesus Deus wata hi. – Utakta abazubata – iwa batu mytsaty nikara.

⁷Atahi tazikwy zerekik. Atahi tsumuēhītsa niyzik.

Atahi ihyriziktsokzawy humo ity huak ahabyita wata. Mybarawy ezekta niyzik maku babata.

⁸Maku niyzikze Deus harere bo zuba hyỹ ziknakara. Kyze Deus nizihikik nahahumo nihyrikosokda iwa sinini nikara.

Kytsa iharapatawyhyta humo zihyrikiknahaze iwatatu Deus harere bo hyỹ ziknakara.

⁹Iwatahi Deus okzeka Sesus myhyrizikwani niyzik.

Atahi:

– O Sesus imysapyrēnikita. Sesus wasani nikara. Ata zuba myhyrizikwani – niy.

¹⁰Iwaze Sesus myhyrizikwani bjoikpe ezektsa bo piwatawy, mybarawy ezektsa bo kino niwatihi piwatawy, siakbatsa sizubarētsa kino niwatihi bo piwatawyky iwa Sesus myhyrizikwani mysiwatawyky.

Iwatsahi tsezubaha iharere bo yhỹ mykaranaha.

Sesus okeryk tahaekaratsa humo puruk puruk mykaranaha iwaze mypehakatsa mozik ziwatawykynaha.

¹¹Kytsa sizubarētsa piwabynahaze asa hi:

– O Sesus zuba mypehakatsa. Atazuba mypehakatsa.

Atahi wasani mykara. Atahi imysapyrēnikita – mykaranaha.

Iwa motsasokonahaze Deus myzo bo mopamykysoziukunaha hỹ.

Sesus tuktsa myzubaha bo Deus mysiwatawyky.

¹²Katukytsa wabyziutaha! Ahatuk ziknapykyrykze kaharere bo hyỹ ziknakaranaha hỹ. Abaka nokponi iksapy mynapykyryk atsawatu kaharere bo hyỹ tsimykaranahaktsa puētsik kaharere bo hyỹ tynakaranahaktsa. Hawa Kiristu mozihikik ana kino tsimykaranahaktsa kytsa! Iwa iharere bo ma tsimaha.

¹³Hawa Kiristu mozihikik ana ty hi tsimykaranaha iwa Deus pahatsumuēhīkī. Iwatahi zikwy ty ahabo nyny my iwatsahi ihumo hawa Kiristu mozihikik atsatu tsimyzihikiknaha. Iwa Deus harere bo zuba yhỹ tsimykaranaha hỹ.

¹⁴Hawa tsimykaranaha ahaharereharakyhyk byihuja. Ahahyriktsokzawy tsimykaranahaze ahapepehaka byihuja.

¹⁵Ahaharereharakyhyk byizeka Deus okzeka batu ahasikpyby. Wasani tsimykaranaha. Ikiahatsa Deus tyryktsa ahamysapyrētsa tsimoziknaha. Mybarawy ezektsa kytsa simyspihikbatarētsa mykaranaha. Asahi simysapybyitsa ziknakaranaha. Asatuk tsinapykyryknaha. Ikiahatsa situkze

byrisoiktsa hyrity watsa tsimaha. Hawa bijoikpe miwa eze byrisoiktsa natahahyrikubanahaze amypubyri mozik. Īwata ikiahatsa wasani tsimykarana Deu harere tisapyrēna mysiwatawyky.

¹⁶ Deu harere mysihyrinymyrykynaha. Deu wasania ty iharere humo simysapyrētsa moziknaha ana humo hi mysiwatawykynaha. Iwa zeka kakurēta. Sesus Kiristu myziksizoze nawa puruze Sesus kytsa soho motsaso:

– O atahi wasani mykara. Usta bo atakta batu. Batu wasani mykara – my. Nawa puruze Sesus myziksizoze ikiahatsa iharere bo hȳ tsimykarana iwaze ahahumo kakurēta. Hawa tsikykarana kahyrikzokzaharēta mykara ahatsyhyryze wasani ikykara, kahyrikzokzawy ahatsyhyryze kasokpykziurēta mykara iwa tsahahyrymyrētsa.

¹⁷ Pikbezenaha zeka ja. Tubabatu kytsa hozipyrykzatsa nisibanahaze Deu bo nyny ziknakarana. Pikbezenaha zeka utakta hozipyrykza zikziwezokonaha nawata mozik. Deu bo uta tu piknyny. Ikiahatsa kino niwatihi ahasprikporētsa babatsa zeka anaty hi Deu bo nyny tsimaha. Hozipyrykza hyrity wata. Ikiahatsa Deu harere bo hȳ tsimykarana iwaze ihumo tsimysprikpokonahaze ana ty hi Deu bo nyny tsimaha. Kytsa pikbezenaha zeka kakurēta my. Ikiahatsa kino niwatihi katuk ahakurētsa tsimykarana iwaze uta kino pahakusukni.

¹⁸ Ahakurētsaktsa! Tsahakurētsa zeka uta kino niwatihi kakurēta my.

Timoteo Epaporodito ahatsa sisoho motsasoko.

¹⁹ Mypehakatsa Sesus yh̄ myzeka Timoteo ahabo myzipeha. Iwa mytsaty mykara. Hawaze ahasoho piwaby zeka kakurēta mozik. Ahasoho piwaby zeka batu paikpa mytsaty mykara.

²⁰ Atakta kawata pahatsumuēh̄ tsihikik. Katukytsa tuk zeka atahi zuba ahahumo tsimypokzitsiukrēta h̄.

²¹ Utsa katukytsa taha bo zuba mytsaty mykaranaha. Sesus Kiristu pitsumuēh̄naha zeka batu mytsaty zikaha. Timoteo batu. Atahi Sesus harere bo zuba hȳ mynakara.

²² Hawa nikara ana hi botu tsahahyrymyrētsa. Isapyhanikia ty zuba ziknakara. Katuk tarabaja ziknakara. Hawa itse tazo tuk tarabajazi nikara iwata atakta katuk tarabaja nikara. Katsaktsa Deu wasania ty kytsa sizubarētsa bo tsiktsasokonaha iwaze kytsa Sesus harere bo zuba hȳ nikarana iwatsahi ihumo sispirikporētsa moziknaha, iwa tarabajazi tsikykarana.

²³ Atakta ahabo myzipeha. Tapara hawa ja my mykara kahyrymyrēta iwaze uta ahabo myzipeha.

²⁴ Uta kino ahabo mynakozore tsihikik. Mypehakatsa yh̄ my zeka abanurytu ahabo mynakozore. Iwa mytsaty mykara.

²⁵ Kyze mytsy Epaporodito ahabo myzipeha. Atakta katukta my katsa petoktsa tsikyziknaha Deu wasania ty tsiktsasokonaha h̄. Mykubyrisorokrētsa tsikykarana. Atahi ahasapyzeky kabo tsikzipehanaha tahi ziktsumuēh̄kī.

²⁶ Atakta ahahumo tsihyrikbarēta. Tsimyitsapyrēta niyzik anasoho tsiwabynaha. Tisukatsihikrēta nikara paikpa mytsaty mytsaty nikara.

²⁷ Ata kino tsimyitsapyrēta asiba nira Deu ihumo zipokzitsiki iwaze zizororowy. Mohyrikosokda zeka kasukatsihikrēta mozik.

²⁸ Iwatahi aidy ahabo myzipeha tsihikik. Ibo iktsa tsimahaze ahakurētsa. Ahahumo hi uta niwatihi abaka batu kasukatsihik.

²⁹ Myzumuze ihumo ahakurētsaktsa kytsa! Sesus tuktsa tyharape kusuknikinaha! Kytsa tahawatu simyhyrikwynikitsa mozikanaha.

Hawa Eparatorodito nikara. Kytsa isoho – O atahi tsimysapyrēta – maha. Ahasopyksapyhu ja!

³⁰ Atakta Kiristu nizihikik naha humo hi asiba nihyrikosokda. Nimytsumuēhīze Kiristu humo asiba nira. Iwa ahatsyhyryze nikara. Ikiahatsa zikahabara iwatahi ahasapyzekeniyzik.

3

Hawa Deus okzeka wasani my.

¹ O katukytsa nepykykze ahape my:

– Mypehakatsa Sesus humo ahakurētsaktsa! tsimaha – my, ana hi mozi-hikik. Kyze kapehawy botu iktsaso ahabo iwatahakazo. Kapehawy humo pahatsumuēhī iwatahi batu kasikpyby, kapehawy humo ahabo piwatahazo:

² – O kytsa pykyhytutaha! Kytsa simysapybyikitsa humo pahaspihik-bata tsihikiknaha. Sakmyitsa simysapybyitsa mykaranaha. Utsa kytsa nisipiakzyzykyknaha iwaze Deus okzeka simysapyrētsa mytsaty ahabyitsa mykaranaha. –

³ Katsaktsa Deus tyryktsa babatsa tsimaha. Tubabatu Moises harere hi:

– O kytsa tsikapiakzyzyknahaktsa iwaze iwatahata niyzik Deus tyryktsa kytsa bo tsiwatawynaha – niy. Ana kino mytsaty mykaranaha. Katsaktsa batu. Abaka katsaktsa ustsaktsa kytsa bo mysipokzitsikinaha iwaze katsaktsa Deus tyryktsa tsiwatawykynaha. Deus hyrikoso mymytsumuēhī iwatsahi Deus bo tsimysakibazikiknaha:

– O Deus myzo ikia zuba wasani tsimykarana. Ikia zuba tsamysapyrēta. Ikia humo ka mykurētsa hỹ – tsimykarana. Deus hyrikoso humo, katsaktsa mykurētsa, Sesus Kiristu sopykwy humo tsimykarana. Iwaze kytsa sinury humo nisipiakzyzykyknahaze ana humo hi batu sispirikpo. Sisopykwy humo batu sispirikpo. Sesus sopyk ty zuba tsimykarana hazyze katsa Deus tyryktsa tsimoziknaha ana hi tsiwatawynaha.

⁴ Katsaktsa Deus okzeka mymysapyrētsa tsimoziknaha. Taparaktsa sopykwy ty zuba batu hỹ tsimykarana, sihumo batu mospirikpo. Kytsa Deus okzeka simysapyrētsa mypehakatsa harere bo hỹ mykaranaha iwa zeka utakta motsasotohi. Aty zipiakzykik zeka wasani mytsaty my zeka utakta wasani tohi mytsaty mykara.

⁵ Utakta kapurukwy zumuze, estuba tsyhyryze ipykze kytsa zikpiakzyzykiknaha. Utakta Isareu ezekta my. Kazotsa Sudeutsa niaha. Utakta Bēsami tukytsa. Kazotsa Ebereutsa niaha iwa taypyk. Utakta Pariseutsa Moises harere bo yhỹ ziknakara.

⁶ Hawa wasani my ana hi mozi-hikik. Sesus tuktsa iksisukyrykik ana kino wasani mytsaty ahabyita ikykara. Moises harere bo yhỹ ikykara. Batu aty tohi kasoho ziktsaso:

– Atakta Moises harere bo batu hỹ nikara – niaha. Moises harere humo yhỹ ikykara iwaze Deus okzeka kamysapyrēta mozik mytsaty ahabyita ikykara.

⁷ Abaka batu. Mektatu Sesus harere bo zuba yhỹ mynakara. Hawa wasani mykara mytsaty ahabyita ikykara abaka batu mysapy kahyrinymyrēta my. Iwatahi kazotsa sopykwy iksimoewybaik. Tapara taparaktsa sopykwy humo kakparawy. Abaka mahani, sisopykwy humo batu kakparawy.

⁸ Sisopyk tsizubarēna botu imoewybaik. Abaka isapyrēnikia zuba mozi-hikik. Kiristu zuba mozi-hikik ana kino tsipyrēna atahi kapehakatsa mozik, iharere bo zuba hỹ mykara ana hi mozi-hikik iwa Sesus tuk mozuruku. Hawa ikykara naha ykpyri wa. Kytsa ykpyri pipaparakana atsawatu ustsaktsa sopykwy humo imoewybaik. Iwatahi Kiristu tukta babata mozi-hikik.

⁹ Sesus tuk mynapykyryk. Utakta Sesus tuk atsatu mytsaty tsimykaranaha. Atahi amy ty tisapyrēna ty kabo nyny niy. Tisapyrēna ty kabo nyny niyze batu Moises harere ibyky humo yh̄y iky. Tisapyrēna ty kabo nyny niyze, Sesus harere bo hȳ mykara iwatahi ihumo kaspirikporēta ikyzik. Iwa. Kiristu inahyryzikpo utakta niwatihi abaka ituk mynapykyryk.

¹⁰ Iwaze Kiristu harere bo hȳ mykara ihumo mospirikpoziyu zeka ituk mozuruku. Iwa Kiristu tuk mozuruku. Hawa Kiristu sinini nikara utakta niwatihi iharere bo hȳ mykara zeka moziksukyrykynaha. Iwa Kiristu wata mozik. Kiristu myhumo tsimypokzitsiarēta iwatahi kytsa mysapyzekenya zibezenaha. Katsa iwa tsimoziknaha batu mybo zuba mytsaty tsimykaranaha.

¹¹ Iwatahi Deus mozikyryzykpowy ana hi taperyky, iwaze ituk kawahi mynapykyryk.

Katsa Deus ske buruk tsimykurunahaze kytsa motururukunahaze tapara zumuta wata tsimaha.

¹² O kytsa batu tyso:

– O uta botu kamysapyrēta ikyzik tsizubarēna inymyrybaik. Sesus harere bo hȳ mykara iwatahi kaspirikporēta ikyzik iwatahi batu kahyrynymyry tsihik – my. Iwa batu tyso. Utakta tarabajazyu mykara iwaze Deus okzeka kamysapyrēta mozik iwatahi kapaikrēta tarabajazyu mykara. Batu kakubyry zikzumu. Ana humo hi Kiristu zikwatawyhik. Itukta ziknyhik, iwatahi kaspirikporēta babata mozik ana humo hi mynakara h̄y, tybyry zuba mykara.

¹³ O katukytsa batu mytsaty mykara:

– O utakta botu ikspirikpo baba – my. Iwa batu kapetu kasopyk. Hawa isapyrēnikia batu epyk. Nawaha ty ikykara naha ikspiriktsokda. Abaka hawa isapyhanikia ty ana ty zuba mykara. Kaspirikporēta ikyzik ana hi mozihihik.

¹⁴ Kytsa motururukunahaze. Ata para pomota itypyhanikita my. Ata hi batu tasukpe bo iktsa ziky. Batu paikpa iktsa ziky. Utakta iwata my. Deus Sesus Kiristu humo zikwatawyhik, ituk kawahi mynapykyryk, meky watu mozik ana hi piperyky h̄y.

¹⁵ Iwatsahi katsaktsa Sesus Kiristu harere bo hȳ tsimykaranaha ihumo myspirikporētsa h̄y iwatsahi mytsaty tahaktsa! Aty mektatu mytsaty my zeka Deus anahumo pahahyrynymyry. Nawaha ty wasani my Deus hi pahahyrynymyry.

¹⁶ Hawa Kiristu sopyk humo yh̄y tsikykaranaha atsatu iharere bo hȳ tahaktsa kytsa!

¹⁷ – O katukytsa! Hawa ahatuk zikzurukuze kasopyk watujataha tsimykaranaha. Utsa kytsa asaktsa kawatsa mozurukunaha sibo iktsazyu tsimykaranaha. Hawa mykaranahaze ahasopykzukuktsa tsimykaranaha! – my

¹⁸ Hawa ha ahabo motsasoko botu iktsaso. Tsizubarēna iktsasoko abaka ahabo motsasokozo. Kytsa sizubarētsa hawa mozurukunaha Kiristu sukyrytsitsa moziknaha, iwatahi kasukatsihikrēta. Hawa mozurukunahaze Kiristu sisapyzekenya harapatawyhyta humo nihyrykosokdaze nispiritsokdanaha.

¹⁹ Asaktsa Deus sinini ykarawy bo mysipehahik. Deus harere bo batu h̄y zikaha, hawa myzehikiknaha ana humo kino mytsaty mynakaranaha. Sisikpybybyikitsa:

– O kytsa mysopyk bo iktsa tahaktsa – maha. Sisikpybybyitsa tu taha bo zuba sisopyk iwatsahi atsatu mykaranaha.

²⁰ Katsaktsa batu tsimaha. Meky watu tsimoziknaha. Sesus Kiristu humo myspirikporētsa iwaze bijoikpe mysapy baba my. Myhudikhudikwy

tsimyzurukunahaze mysapy baba eze taperykynaha. Sesus Kiristu Deus bo mymyoktyhyrykta taperyky. Atahi bijoikpe ikny myziksizo. Mynasikzoze mybarawy bozo atahi taperyky.

²¹ Myziksizoze mynury ezytyk ty mybo nyny my. Abaka mynury humo mykubyrizumu. Mymyitsapyrētsa tsikyziknaha. Mynury mohyrikosokda. Iwaze Sesus mekta tu mynury ty mybo nyny my. Tsimyharabokzonaha. Mynury ezytyk mozikzo Sesus nury wata maha. Inury tisapyrēta hỹ. Sesus Kiristu tsipunihikrēta. Hawa tohi zikaha ba. Izikwy humo mynury huak ty iwaze izikwy humo mekta tu nury ty ezytyk mybo nyny my hỹ, ezytyk zuba mynury mozik. Hawa tohi zikykanahabyitsa.

4

Mypehawy ahabo my.

¹ O katukytsa ahahumo kamypokzitsiukrēta. Ahahumo kahyrikbarēta. Tsiipykusuknikinaha. Ahahumo kakurēta ahasoho kytsa bo motsasoko. Uta hi:

– O Piripos ezektsa humo kakurēta. Sesus tuktsa humo kakurēta hỹ – mykara. Iwa ziknakara. – O kytsa hawa Sesus sopyk tsimykaranaha ana humo kino ahakubyrisorokrētsaktsa tsimaha – my.

² Kyze utakta:

– O wytykyryk Eudia, Sītike ahaza wabytoktotahatsa! Tyharape pokzitsinahaktsa! Ikiahaka ahatukytsa Sesus Kiristu humo ahaspirikporēza iwazahi Sesus harere bo yhỹ tahaktsa! – mykara.

³ – Iki Sizikus katukta mynasitsumuēhĩ. Wytykyryk petoku asizahi myharape betsakaknahaze tysitsumuēhĩkta – my.

Tubatu asizahi katuk tarabajaziu nikaranaha. Deus wasani haty sizubarētsa bo nitsasokonaha. Keremente kino niwatihi ustsya mytuktsa Deus wasania ty kytsa sizubarētsa bo nitsasokonaha. Katsumuēhĩtsitsa Deus tsyhyryze tarabaja nikaranaha sinaro botu ziwatahaba. Bijoikpe eze Deus nisiny papeu humo sinaro ziwatahabaik, Sesus humo meky watu niyziknaha.

Ikiahatsa mytsaty mytsa byitaha Deus bo tsimypamykysokonaha.

⁴ – O katukytsa Sesus tuk tsinapykyryknahaze ahaku tsiwabykynaha! Ahape myzo. Ahaku tsiwabykynaha! – my.

⁵ Sizubarētsa tysipokzitsinaha ahakubyrisoroku ja. Sesus atsoko myziksizo ana bo hi mytsaty tahaktsa.

⁶ Batu paikpa mytsaty tsimykaranaha. Batu ahape tu ahasopyk:

– O Deus myzo kahumo pipokzitsi ja. Batu kanyhy – tsimaha. Iwa batu tyso. Ikiahatsa hi Deus bo tsimypamykysokonaha, amy humo ahakubyri ibo tsimyzapykykynaha. Ikiahatsa hi:

– O Deus myzo amy humo pikykubyri eze ka abo myzapykyky. Hawa ha myzehikik zeka kabo nyny tsimy iwatahi kakurēta mykara – tsimaha.

⁷ Iwa zeka mytsaty mytsaty byitaha, Deus pahapunihikwyky myzubaha ana humo kino batu sihyrinomyry ziwabykynaha zuba. Sesus tuk tsinapykyryknaha zeka mekywatsa tu tsimoziknaha. Ahamysapyrētsa tsi-moziknaha. Hawa tsimykaranaha zeka mytsaty mytsaty byitaha tsimaha, Deus hi ahapokzitsikitsa my ana humo hi ahahyrynomyrētsa. Iwatsahi ihumo ahakurētsa.

⁸ Pykyhytutahaktsa! Hawa mytsaty tsimykaranaha ana humo hi pykyhytutaha. Amy wasani zuba mytsatyziutaha! Kytsa pipokzitsikinahaze ana

humo hi mytsatyziutaha! Isapyrēnikia bo mytsatyziutaha! Iwa mytsatyziutaha. Wasaniha bo wabyziutaha ana humo hi kytsa sakurētsa moziknaha ana bo hi mytsatyziutaha. Deus okzeka, kytsa okze kino niwatihi wasani my. Sizubarētsa bo wasani my. Iwa ana bo kino mytsatyziutahaktsa. Iwa tsiziurēna. Batu tymyi. Tisapyrēna iwa ana bo kino mytsatyziutahaktsa! Tsizubarēna humo kino ahasikpyby byihuja ana bo hi mytsatyziutahaktsa kytsa!

⁹ Kaharere bo yh̄y tynakaranahaktsa! Nawa ha ty ahahyrinomyryky naha ty tynakaranahaktsa! Hawa mozuruku ikiahatsa tihiktsa! Kaharere tsizubarēna bo hȳy tahaktsa! Iwaze Sesus mymykusukniki ahapaok baze tu mynapykyryk.

Pauro Piripos ezektsa humo tsakurēta.

¹⁰ Abaka tsiktsumuēh̄izonaha. Tapara tsiktsumuēh̄ik̄naha. Iwaze tsepyknaha. Tsihokdahaēna tu tsepyknaha. Ikiahatsa kahumo tsahampokzitsirētsa ana humo kino kahyrinomyrēta. Abazuba kahumo ahamypokzitsiukrētsa tsiwatawyzonaha. Utakta Sesus tuk mynakara kakurēta, ikiahatsa tsipiktsumuēh̄inahaze niwatihi kakurēta mykara.

¹¹ Batu kasopyk:

– O kanamy nepykta tu batu kasopyk. Kanamybyita tu wasani my. Kanamyrēta mykara zikino wasani my, iwaha tu yh̄y – mykara.

¹² Utakta kanamy tsikaeni iwaha humo tu kakurēta. Kanamy tsizubarēna ana humo kino kakurēta. Hawa mozuruku wasani my. Hawa mykara iky niwatihi kabo wasani mykara. Kasorokrēta zeka wasani my. Karaparēta kino niwatihi wasani mykara. Kanamyrēta zeka wasani mykara, kanamybyita zikino niwatihi wasani mykara.

¹³ Hawa kahumo mykara ana humo hi kapunihikrēta mozik. Iwaze Sesus humo kaspirikporēta ikyzik. Kiristu humo hi pikpunihikwyky iwatahi kakurēta mozik. Izikwy humo ba hawa tohi zikaha. Iwatahi kapunihikrēta mozik.

¹⁴ Iwaze tsiktsumuēh̄inahaze wasani tsimykarana. Kytsa zikykniknahanaze batu katy arek iwaze tsikpokzitsikinaha.

¹⁵ Ikiahatsa Piripos ezektsa zuba tsiktsumuēh̄inaha. Masedonia ikny iknaparakze ikiahatsa zuba tsiktsumuēh̄ik̄naha. Anaeze tuze Deus wasania ty ykbata zuba ikyze iktsasoko kyze kino tsiktsumuēh̄ik̄naha. Ikiahatsa zuba okyrysaro ty kabo nyny tsikaha.

¹⁶ Utakta Tesaronika eze tuze kanamy nepyk hana bo ja. Anaeze ahanamy kabo tsibiakaknaha. Tsizubarēna okyrysaro ty kabo nyny tsikaha.

¹⁷ Ahanamy humo ka batu kamyzehik. Deus isapyrēnikia ty ahabo nyny my anahi mozhikik.

¹⁸ Nawa ha ty ikiahatsa kabo nyny tsikaha Epaporodito zebykyryk. Tsizubarēna ty kabo nyny tsikaha. Abaka piwatahaka utakta ahanamy humo kakurēta iwaze kakurēta h̄y. Iwatahi batu kakubyri. Isapyrēnikia ty topyririk koro tosikwaka. Deus ana okmorē pioksaze ana humo hi tsakurēta. Pahapokzitsiki h̄y. Ahanamy ustsas Sesus tuktsa bo nyny tsimykarana zeka atahi tsakurēta h̄y. Hawa tsikykarana topyririk koro tosikwaka.

¹⁹ Amy humo ahakubyri zeka anatyhi Deus ahabo nyny my. Ikiahatsa Sesus tuk tsimykarana. Atahi tsinamyrēta hiba iwatahi amy humo ahaku byri zeka ahabo nyny my atahi imysakihikyrenikita my.

²⁰ Iwatahi Deus koikny baktatu ipe my:

– O Deus myzo ikia zuba tsahyrizikporēta. Ikia zuba amysapyrēnikita tsimy – my. Iwa h̄y.

Abaka asiba nepyk kytsa bo mytsaty mykara.

²¹ Kyze Sesus tuktsa sizubarētsa ahahumo sihyrizikbarētsa. Katukytsa katuk ahahumo sihyrizikbarētsa.

²² Sesus tuktsa katuktsa ahahumo sihyrizikbarētsa. Asaktsa sipehakatsa myhyrizikwanikita humo tarabajaziu mykaranaha asahi ahahumo sihyrizikbarētsa mykaranaha.

Deus pahasapywyky.

²³ Iwaze utakta ahatsyhyryze Deus bo mopamykysoko:
– O Deus myzo Sesus tuktsa Piripos ezektsa tysisakihikykta! Mypehakatsa Sesus Kiristu tysipokzitsikikta! – mykara. Niwazuba. De.

Pauro

Pauro Korose ezektsa bo ziwatahaka

Amata, Epararas tihi ziky Korose ezektsa Sesus harere nitsasoko. Sizubarētsa ihumo sispirikporētsa niyziknaha. Bykyze ustsā myhyrinymyrykynahatsa wasanibara ty nisihyrinymyryky iwaze nisimiwykynaha, wastuhu Sesus humo batu sispirikpohuk. Iwaze Pauro ispe niy:

– Sesus humo zuba ma tahaktsa atahi zuba mysopyksapybyri humo mymyokzohik –. Deus hyrikoso Pauro tuk niapykyryk iwatahi Deus harere ziwatahaka iwatsahi katsa kino niwatihi Deus soho humo tanymyryky.

¹ Uta Pauro. Kiristu Sesus zikygzota. Tubabatu Deus kape niy:

– Ikiakta myzubaha bokta. Wasaniha ty sibo tytsaso – niy.

Hyŷ iky.

² Abaka ikiahatsa bo piwatahaka Timoteo katuk. Atahi mytuky mytuk Sesus harere bo hyŷ mynakara. Ikiahatsa Korose ezektsa bo tawatahaka. Ikiahatsa mytukytsa niwatihi Sesus harere bo hyŷ tsimykarānaha ihumo ahaspirikporētsa. Uta Deus bo mopamykysoko:

– O Deus myzo. Ikiā Korose ezektsa tysipokzitsiki, ahumo sakurētsa moziknaha – my.

Iwa Deus bo ahatsyhyryze mopamykysoko. Iwa Deus nizihikik.

Pauro Deus bo nipamykysoko, ihumo tsakurēta nikara.

³⁻⁴ Hawa ikiahatsa Kiristu Sesus harere bo hyŷ tsimykarānaha iwatsahi ihumo ahaspirikporētsa tsimoziknaha. Hawa Deus tyryktsa humo ahampokzitsiukrētsa anahi botu tsiwabynaha. Iwatsahi katsa ahatsyhyryze Deus bo tsimypamykysokonahaze mykurētsa. Deus Sesus Kiristuzo bo tsimypamykysoikiknaha.

– O Deus Korose ezektsa humo mykurētsa. Tynasipokzitsiki – tsimaha.

⁵ Tapara Sesus soho wasaniha tsiwabynahaze yhŷ tsikaha. Katsaktsa ahape tsimaha:

– Sizubarētsa asahi Sesus humo sispirikpotsa Deus tuk mynapykyryknaha tsimaha, iwatsahi ahaspihikrētsa tsikykarānaha. Ikiahatsa Sesus harere bo hyŷ tsimykarānaha iwatsahi tsimyhyrikosokdanaha zeka Deus tuk tsimypykyryknaha. Ana harere bo hyŷ tsimykarānaha ana humo hi ahaspirikporētsa tsimoziknaha. Iwatsahi Deus tyryktsa humo ahampokzitsiukrētsa.

⁶ Deus pahapokzitsiki. Mywatu namypokzitsiki anahumo hi ahahyrinymyrētsa. Deus wasania ty nikaraze tsiwabykynahaze wasani tsikaha. Abaka ustsā kytsa Deus wasaniha piwabykynaha. Ahawatsa Sesus harere bo hyŷ mykarānaha iwatsahi ihumo sispirikporētsa. Deus tyryktsa humo simypokzitsiukrētsa. Deus tuk mynapykyryknaha anahi aha watsa piperykynaha.

⁷ Epararas Sesus soho ahabo nitsasoko. Atakta mytuk nikara. Sesus pokzitsiwy tuk tarabaja ziknakara. Kiristu tsumuēhŷtsa niyze mytsyhyryze nimitysumuēhŷkī.

⁸ Ata hi:

“O Korose ezektsa Sesus tuktsa humo tyharape pokzitsinaha. Deus hyrikoso situk mynapykyryk iwatsahi Deus tyryktsa humo simypokzitsiukrētsa” – niy.

⁹ Ana tsiwabynahaze ahatsyhyryze Deus bo ziknapamykysokonaha. Katsa ahatsyhyryze Deus bo tsimypamykysokonaha:

– O Deus Korose ezektsa mytukytsa tsihyrinymyry. Hawaha mozurukunaha humo tsihyrinymyry. Imysapybara sibo tsiwatawy. Aokze wasaniha humo tsihyrinymyry. Ahyrikoso mysihyrinymyryky iwatsahi hawaha humo mozurukunaha zeka mytsaty maha – tsimaha. Ispe tsimaha:

– O Deus hyrikoso pahahyrinymyryky – tsimaha.

¹⁰ Iwa zeka ihyrinymyrytsa hỹ tsimykaranaha zeka hawa ha sa Deus mozihihik tsimykaranaha. Myzibiyituhukutu mypehakatsa ahahumo tsakurēta. Hawa haty tsimyzurukunaha zeka tsakurēta. Kytsa kino niwatihi tsiyipokzitsikinaha. Iwa tsimyzurukunaha Deus soho tsipinymyrytohinaha.

¹¹ Iwatahi Deus bo mopamykysoko:

– O myzo ikia Korose ezektsa ahumo sipunihikrētsa moziknaha. Ikia zuba tsapunihikrēta. Ikia tsamysapyrēta iwatahi tsiyipunihikwyky. Iwaze sipunihikrētsa moziknaha. Kytsa mysimyjakaranaha zeka tsiyibetsa. Sinini mykaranahaze ahumo siakubyrisorokrētsa – my iwa Deus ahatsyhyryze mopamykysoko my.

¹² Deus myzo mypehakatsa my. Okoroze kywaha tisapyrēna bo iktsa tsimaha. Katsaktsa mypehakatsa harere bo hỹ tsimaha zeka kytsa watsa tisapyrēna bo iktsa maha my. Ikiatsa Deus tyryktsa tsimoziknaha. Tatyryktsa mysipokzitsiki. Amy isapyha piperyky iwaze hi ikiahatsa bo nyny my, ana hi taperyky. Ahakuhuktsa. Deus pe tsimaha:

– O Deus ikia zuba tsamysapyrēta. Ikia humo ka mykurētsa. Katsa ikia tyryktsa tsimoziknaha. Mykurētsa tsimoziknaha – my.

¹³ Satanas batu imysapy. Kytsa papatu ituktsa imysapybara ty nikaranaha iwororobara siakparawy unata kywaha my. Ityryktsa simysapybyitsa mykaranaha. Imysapybyikia ty mykaranaha anatyhi ityryktsa mykaranaha. Deus babata zuba mymybetesaka iwatsahi Satanas tserekeknaha. Abaka Satanas harere bo ba ma tsimaha. Deus tse harere bo zuba hỹ tsimynakaranaha. Deus tse zuba myhumo tsimypokzitsiarēta. Atahi namybetesa.

¹⁴ Sesus tazo bo mymyoktyhyryk. Nihyrikosokdaze Deus mysapybyri ihumo nimyokzohik. Abaka Deus okzeka wasani niyzik iwatsahi mykurētsa h̃y.

Kiristu myhyrizikwy babata my.

¹⁵ Nanabyi isuknihybyize ba amy tohi bo zikozonaha Kiristu ta Deus wata. Kiristu tsinynaha. Deus bo ka ba zikozonaha. Kiristu zuba tsinynaha. Kiristu ta Deus tse babata niy. Estuba zubata itse. Deus nanabyity tsiyukni ahabyize Kiristuta koikny baktatu ituk ziknapykyryk. Atahi taparakta tu.

¹⁶ Deus nanabyi Kiristu humo nizukniki. Deus bijoikpe mybarawy ahapetuk nizukninaha. Nawa ha ty nanabyi bo natanykynaha. Deus Kiristu tuk nizuknikinaha. Nanabyi zinyahabikia mybarawy humo kino niwatihi Deus Kiristu tuk nizuknikinaha. Bijoikpe iknyktsa Deus tsumuēh̃itsa niwatihi nisisuknize. Wastuhu hyrikoso sapybara niyziknahatsa kino niwatihi Deus hi nisisukni. Deus, Kiristu harapetok sihumo nanabyi nizukniba. Atahi tazo tuk myzubaha nizuknikinaha. Anatyhi Kiristu bo niy, iwatsahi myzubaha Kiristu harere bo yh̃y mykaranaha.

¹⁷ Tapara nanabyi suknihybyize tu Kiristuta tapara kino niwata tu koikny baktatu. Bijoikpe mybarawy iwaha ihumo mynapykyryk. Iwaha hi tasapy eze tu mynapykyryk. Ihumo nanabyi tisapyrēna maha.

¹⁸ Sesus Kiristu parakbaha mysiakzo. Sizubarētsa mozumubanhaze iharere piwabynahaze mysiakzoko. Mypehakatsa babata my. Atahi myharek wata. Hawa myharamits̃i humo hi mytsaty tsimykaranaha iwa tsimykaranaha katsaktsa Kiristu harere humo tsimykaranaha. Myzubaha

hi mynury wata. Iwaze Kiristu tyryktsa iharere bo zuba hỹ mykaranaha. Atahi Deus tse babata. Nihyrikosokdaze Deus zihyrizikpowyze tsimys-apyrēta niyzik. Myzubaha iharere bo hỹ mykaranaha. Atahi myhyrizik-wyrēnikita babata niyzik atahi abazubata niyzik, ba hawa tohi zikzukninaha.

¹⁹ Deus tatuktuka nikara – O katse kawata mozihikik – Kiristu Deus atsatu my.

²⁰ Mybarawy ezektsa Deus bo ma zikahabyitsa. Sinini ykarawy ezektsa kino niwatihi Deus humo tahakyrikinaha. Iwaze Deus mybarawy ezektsa humo taokaniki iwatahu mahani iokani hyrinymyry iwaze hawa meky watu moziknaha mytsaty nikara. Atahi:

– Katse babata iharapatawyhyta humo pibezenhaze iwaze meky watu mytsaty mykaranaha. Kaharere bo hỹ mykaranaha – niy. Iwa Deus tatuktuka nikara. Mybarawy ezektsa humo mahani iokanihyrinymyry.

Abaka Kiristu harereziuwytša tsikyzyknaha.

²¹ Taparaka Sesus harere bo ma ahabyitsa iwatsahi Deus sukyrytsita moziknaha. Ikiahatsa ihumo batu ahakparawy. Iwatsahi hawa sa batu ahasopyksapy ana humo hi mytsaty tsikykaranaha. Hawa sa batu imys-apy tsikykaranaha. Deus ahakparawybyitsahi iwatsahi ahamysapybyitsa tsikykaranaha.

²² Abaka meky watu tsimoziknaha. Deus harereziuwytša zuba tsikyzyknaha. Itse babata ahasapyzekenihyrikosokda iwatsahi itukytsa tsimoziknaha. Iwatsahi wasani tsimykaranaha. Iokzeka tsimyzumunahaze batu ahasikpyby tsimaha. Batu aty tohi ahasoho humo:

– O ikiahatsa batu ahasopyksapy – maha. Ikiahatsa hi ahamysapyrētsa tsimoziknaha h̃.

²³ Ikiahatsa hi Deus harere humo tsimyspirikpotohinaha. Iharere bo ka hỹ tynakaranaha. Katsaktsa Deus tuk mywahi tsimynapykyryknaha ana hi taperyky. Ipery humo ahapunihiku ja. Utakta Deus wasania ty motsasoikik anahi kahyrikzokzawy. Nanabyitaba kytsa bo Deus wasaniha motsasokonaha h̃.

Pauro Sesus tuktsa nisitsumuēh̃h̃ekik.

²⁴ Abaka kakurēta. Ahatsyhyryze sinini mykaratatu kakurēta. Kiristu myzubaha bo sinini nikaraze. Asaktsa mozumubanhaze iharere piwaby-naha sihumo sinini mykara. Asahi Kiristu nury watsa. Iwatahi uta kino niwatihi sinini mykara. Ikiahatsa pokzi Kiristu nury watsa sinini mykara.

²⁵ Deus kape niy:

– Wasaniha ty tytsasokokta. Kytsa Sesus humo sispirikporētsa asahi katyryktsa maha iwatsahi sibo wasaniha tsimysasoziuku! Katyryktsa tsysitsumuēh̃ – niy. Atahi anaty kabo ziwatawy iwaze hi nanabyitaba wasania ty motsasoziuku.

²⁶ Taparaka Deus batu harere aha kytsa iharere batu siwabyhy. Deus wasaniha batu aty tohi ty tyhyrinymy. Abaka meky watu. Kytsa Deus harere bo hỹ mykaranaha ihumo sispirikporētsa iwatsahi wasani haty pinymyryknaha.

²⁷ Abaka myzubaha iharere piwabyknaha ana hi Deus mozihikik. Taparaka batu ahahyrynimyry abaka wasania ty pahahyrynimyryky. Iharere tisapyrēna, iwatahi myzubaha bo motsasoko. Sudeustsabyitsa bo kino motsasoko. Tapara Kiristu ahatuk ziknapykyrykze batu ahahyrynimyryhu abaka ahahyrynimyrētsa h̃. Deus humo hi ikiahatsa ituk tsimynapykyryknaha nizihikik iwatahi tsakurēta.

²⁸ Katsakta Sesus Kiristu soho tsimytsasokonaha. Nanabyitaba Sesus soho tsimytsasokonaha. Hawa imysapybara humo maha zeka tysispirikpokonaha. Nawa mozurukunaha zeka mysihyrinomyrynaha. Nawa Deus mozi-hikik iwa mozurukunaha. Tymi habiytsa tsiksihyrinomyrybanaha. Iwaze Deus okze mozumunahaze atahi:

– O asahi wasani mykaranaha. Kiristu tuk mozurukunaha iwatsahi simysapyrētsa moziknaha – my.

²⁹ Iwatatu utakta mysitsumuēhīkī. Deus tazikwy ty kabo nyny mykara iwatahi ihyriziktsokzawy humo mynakara. Atahi moziktsumuēhīkī, ana humo hi mysihyrinomyryky.

2

¹ – O kytsa kaharere tsiwabytoktonahaktsa. Hawa ahatsumuēhīekik, naha hi tsinymyrynaha. Raodisija ezektsa kino niwatihi asahi Sesus harere bo hȳ mykaranaha iwatsahi ihumo sispirikporētsa, iksitsumuēhīkī. Utsa kytsa Sesus tuktsa kanyhybyitsa kino iksitsumuēhīkī.

² Iwatsahi sizubarētsa sipunihikrētsa moziknaha. Tyharape pokzitsikinaha. Kahyritzokzawy humo ikiahatsa ahakurētsa tsimoziknaha. Tsimyharape pokzitsikinaha zeka Deus harere tsipinymyryziunaha iwaze ahaspirikporētsa tsimoziknaha. Taparaka Deus harere batu aha ana humo hi Kiristu kino pahahyrinomyryky.

³ Ata zuba Deus myspirikpowy mynatsasoko. Deus tasopyk mynatsasoko. Katsakta Kiristu harere bo hȳ tsimykarannahaze wasaniha humo myhyrinomyrētsa.

⁴ Iwatahi ahabo piwatahaka “Mytsatzyutaha kytsa!” Iwaze ba aty tohi ahabo zahaspihikbata. Siharere wasani mykaranahatsa watsa. Iwatsahi siharere bo ka waby waby byitaha! Pahaspihikbatakanahaze pahamyikinaha.

⁵ Iwatahi utakta ahasoho bo mytsaty mynakara. Utakta ahatuk byitatu ahasoho bo mytsaty mynakara. Ikiahatsa Kiristu humo ahaspirikporētsa ana humo hi kahyrinomyrēta. Ikiahatsa Kiristu humo ahaspirikporētsa tsimykarannahaze iwaha humo kakurēta – my.

Kiristu tuk tsimyzurukunahaze meky watu tsimoziknaha.

⁶ Ikiahatsa hi:

– Sesus imysapyrēnikita. Iharere bo zuba hȳ tsimykarannahaze – tsimaha. Iwaze iharere bo zuba hȳ tynakaranahaktsa!

⁷ Hwi jobonitakta iharatatsa wytyk zihiboani tahasapynaha niy. Katsakta hwi watsa Sesus humo myspirikporētsa iwatsahi mypunihikrētsa tsimoziknaha. Iwatsahi ihumo tsimyspirikpotohinahaktsa! Nawa isoho tsinymyrykynaha ana ty hi tsimyzurukunaha. Deus myzo bo tsimypamykysokonaha:

– O myzo ikia zuba tsamysapyrēta. Ikia humo ka mykurētsa – tsimykarannahaze.

⁸ O kytsa pykyhytutaha! Sesus soho humo mytsatzyutahaktsa. Utsa kytsa hi:

– Sesus harere bo batu h̄y – zikaha. Asa hi ihumo batu sispirikpo. Siharere bo ka waby waby byitaha. Ikiahatsa siharere bo yh̄y tsimykarannahaze zeka pahaspihikbatakanaha asahi Deus harere bo batu h̄y mykaranaha. Myzotsa siakbatsa harere humo zuba pahahyrinomyrykynaha. Siharere ty pahaspihikbatakanaha ahabo mybarapetu mykaranaha.

⁹ Kiristu Deus wata. Sesus mybarawy bo inasikze nimyhyrinomyryky. Nawa haty Deus mykara anatyhi nimyhyrinomyryky. Kiristu mytukze zikzurukuze astsatu Deus niy. Kiristu bo tsikozonahaze Deus soho humo

tsinymyrykynaha. Kiristu Deus wata anahumo hi Deus soho tsinymyrykynaha.

¹⁰ Kiristu harere bo hyĩ tsimykaranaha zeka Deus tazikwy ty mybo nyny my. Mymysapyrētsa tsimoziknaha. Kiristu imysapyrēnikita atahi abazubata my. Bijoikpe iknyktsitsa Deus tsumuēhĩtsitsa iharere bo hyĩ mykaranaha. Hyrikoso sapybara Satanas tsumuēhĩtsitsa iharere bo hyĩ mykaranaha.

¹¹ Kiristu tazikwy ty mybo nyny mykara. Tazikwy humo ahamysapybyitsa tsikykaranaha anahi tsimoewynaha. Deus nimyokzo iwatsahi ihumo tsimynapykyknaha. Mekywatu mytsaty tsimykaranaha Deus humo zuba mekywatu tsimoziknaha. Sudeutsa tahanury humo tahapiakzyzyknaha iwa mekywatu nikaranaha. Siwatahawyo humo Deus okzeka mekywatu niyziknaha. Katsakta niwahabyitsa. Deus hi mybo nimywatawyo iwaze ihumo mekywatu mytsaty tsimykaranaha iokzeka metutu tsimykaranaha. Iwaze mynury humo batu mytywataha. Katsakta Sesus tuk tsimynapykyryknaha ana humo hi ahamysapyrētsa tsimoziknaha.

¹² Kytsa nimyharasusukunahaze moranahaze mymyhatoto nahaze kywa Kiristu nury nitsahoroknahaze kywahi. Deus Sesus izihyryzykpowy iki-ahatsa kino niwatihi tsinahyryzykpoanaha Kiristu watsa, Deus zikwy humo mekywatu mytsaty tsimykaranaha ahamysapyrētsa tsimoziknaha. Deus Sesus Kiristu izihyryzykpowy ana hi sizikwy atsatu. Ata bo hi hyĩ tsimykaranaha zeka ahamysapyrētsa tsimoziknaha.

¹³ Taparaka ikiahatsa siakbatsa watsa. Deus harere bo yhy ahabyitsa ziknakaranaha. Moises harere bo yhy ahabyitsa ziknakaranaha. Ahamysapybyitsa tsikykaranaha. Abaka Deus humo mekywatu tsimoziknaha. Hawa Kiristu mytsaty mykara ikiahatsa kino niwatihi mytsaty tsimykaranaha. Ahamysapybyitsa tsikykaranaha humo nimyokzohik.

¹⁴ Deus harere humo tsikspirikponaha ka iharere katsa myhumo tsihokdaharēna iwatsahi ma ahabyitsa ziknakaranaha, iharere ty waby byizeka ana humo hi tsihyrinymyrēta. Iwaze Kiristu iharapatawyhyta humo nihyrykosokdaze iwatahi Deus mysapybyi humo nimyokzohik. Ana humo hi nispiriktsokda baba mysapybyi zipykbaik. Hawa kytsa namy zibykykspyknaha bykyze tysirezo tsikaha, batu amy tohi ty zikaha. Iwaze astatu Sesus mysapybyitsa tu tsikykaranaha humo iwahatu niokzo. Abaka ba zikzisyrezonaha tsizubarēna nepykba.

¹⁵ Kiristu hiba Satanas hyrikoso sapybara pehakatsa zikwy imysapybara zepykbaik. Iharapatawyhyta humo nihyrykosokdaze Satanas hyrikoso sapybara pehakatsa zikwy imysapybara zepykbaik. Iwaze myzubaha iwa zihyrynymyrykynaha iwatsahi sisikpybyrētsa niyziknaha. Sesus ipuni- hikanikita ipokso sisikpybyrētsa nikaranaha.

¹⁶ Kytsa pahakzo zeka:

— O kytsa ana disahawyo ty ka hauk hauk ahabyitaha. Ahaokpuwyo ty ka tsō tsō byitaha! Nawa puruze tarabaja byitaha! Byzoje iokpezubakata mynayzyke tsikahamyikahanahaktsa sabado eze mybyrywyo zuba iwaze tarabaja tarabaja byitaha! — mykaranaha. Iwa motsasokonaha zeka siharere bo waby waby byitaha.

¹⁷ Tapara Kiristu izumuze siharere bo yhy tsikykaranaha. Hawa ebuhuka bo iktsa tsimahaze anaka bamytohi, iwaze siharere ebuhuka hyrity waha Kiristu harere baba zuba my. Abaka Kiristu izumu iwatsahi siharere bo batu hyĩ tsimykaranaha Kiristu harere bo zuba ma tsimykaranaha.

¹⁸ Asahi pahasapybyi tsihikiknahaze hi:

– Myharere bo yh̄y habyi zeka Deus sinini ykarawy bo pahapeha. Deus okzeka batu ahamysapy – mybarapetu mykaranaha. Siharere bo batu waby zikaha! Asa hi:

– Katsa zuba myhyrinymyrētsa babatsa – mybarapetu mykaranaha.
– Mytsotospyk eze Deus bo tsikozonaha tsimykaranaha – mybarapetu mykaranaha. Hauk byize kytsa hi:

– O asaktsa simyharerewabyrētsa – maha niwahi mozihihiknaha. Bijoikpe iknyktsa Deus tsumuēh̄itsitsa bo iktsazuba maha. Hawa Deus bo tsimysakibazikiknaha asahi astsatu bijoikpe iknyktsitsa bo maha. Hawa mozihihiknaha zuba ana hi mykaranaha. Kytsa watsa mytsaty mykaranaha iwatsahi siharere batu ahawabyhy.

¹⁹ Abaka asahi Sesus Kiristu humo batu sispirikpo. Hawa imysapybara ty mytsaty mykaranaha. Simysapybyitsa pahamyi tsihihiknaha. Kiristu myharek wata. Ituktsa inury watsa. Mynury humo tsimynapykyknahaze iwa Deus humo mozihihik. Tsimymypuhyrynahaze mypaikrētsa tsimoziknaha. Nawa tatu Deus zikwy humo wasani mytsaty tsimykaranaha ihumo hi zuba myspirikporētsa tsimoziknaha Kiristu humo zuba mytsaty tsimykaranaha.

Katsaktsa mymysapybyitsa tsikykaranaha Deus nimityokzo. Kiristu mysapyzeka nihyrikosokda. Abaka Kiristu tuk meky watu mysopyk tsimaha.

²⁰ Katsaktsa mysapybyitsa tsikykaranaha ana hi tsmoewynaha. Tsikybakanahaze ba mytsaty zikaha anawahi katsaktsa Kiristu harere bo hȳy tsimynakaranaha, mysapybyitsa tsikykaranaha Kiristu zikwy humo tsmoewykynaha. Iwatsahi hyrikoso sapybara perytsa Satanas harere humo batu mykparawy. Iharere bo batu h̄y tsimykaranaha. Kytsa mysimiywynahatsa ahape maha:

²¹ – Ikiahatsa na ahadisahawy my zeka hauk hauk ahabyitaha! Tummy humo kino niwatihi tsō tsō byitaha. Ahanamy humo ka paik paik byitaha! – mykaranaha. Siharere bo batu h̄y tsimaha.

²² Disahawy soho humo ba h̄y ahasopyk. Mydisahawy tsipihauknaha zeka kyze ity tsipikaranaha. Mynamyhuhuk zeka moryryba. Asaktsa Deus mymyhyrinymyryky nahatsa batu tyso zikaha, hawa mytsaty mykaranaha zuba ana humo hi mymyhyrinymyryky tsihihiknaha.

²³ Kytsa sisopyk zubaha siharere piwabykynahaze mytsaty mykaranaha:
– O asaktsa ja sihyrinymyrētsa babatsa – mytsaty ahabyitsa mykaranaha. Sihyrinymyrētsa hyritywatsa asaktsa mybarapetu nikaranaha. Zimyikinaha. Kytsa asatu tahamyitsapyrikinaha zeka Deus harere bo batu h̄y mykaranaha. Kytsa tihi:

– Bijoikpe iknyktsa Deus tsumuēh̄itsitsa bo tsimysakibazikiknaha – maha. Iwa Deus harere bo batu h̄y zikaha. Asahi:

– O Deus katsaktsa ikia zuba mykparawy. Tsizubarēna ty abo nyny tsimaha – mybarapetu mykaranaha. Siharere ba zikmytsumuēh̄i. Batu isapy. Imysapybara ty tymoewy ahabyizeka ba ziksitsumuēh̄i. Zimiyihiknaha iwatsahi batu simysapy nikaranaha.

3

¹ Ikiahatsa kino tsiknahyrikonahatsa watsa iwatsahi Sesus tuk tyzurukunahaktsa kytsa! Sesus harere bo zuba hȳy tynakaranahaktsa! Sesus Kiristu Deus wata my, atahi Deus tuk mynadyhyky siharere bo zuba hȳy tynakaranahaktsa!

² Sibobijoikpe bo mytsaty tynakaranahaktsa. Hawa mynakaranaha bo hi mytsaty tsimykaranaha. Hawa Deus ahatsyhyryze mykara ana soho humo hi mytsaty tsimykaranaha.

³ Ikiahatsakta siakbatsa watsa. Tapara kytsa harere bo yh̄y zik-nakaranaha. Abaka batu. Kiristu harere bo zuba ma tsinakaranaha. Atahi bijoikpe eze mynapykyryk. Deus tuk atatu my, iwatahi Deus hyrikoso mytuk mynapykyryk. Asakta Sesus harere bo batu ma zikaha batu sihyrinymyry iwatsahi batu sispirikpo.

⁴ Ikiahatsa hi ahamysapyrētsa tsimoziknaha. Kiristu humo mekywa tu tsimoziknaha. Iharere bo zuba ma tynakaranaha. Iwatahi ata kino my-barawy bo myziksizoze ikiahatsa ituk tsimyzahakahazonaha. Kiristu humo ahamysapyrētsa tsimoziknaha. Atahi isopykziuhanikita my.

Taparaka mysopykwy. Abaka Sesus sopykwy ezytyk ty tsinakaranaha iwa Kiristu tuk tsimyzurukunaha.

⁵ Ikiahatsa ahamysapybyity ziknakaranaha bo yh̄y yh̄y ahabyitahaktsa! Imysapybara ahamyzihik zeka awatutaha. Utsa kytsa okeza ty ka hua hua byitaha. Kytsa wytykyryk mysioktyhyryknaha zeka myi myi byitaha ahasopyksapyhu ja. Makutsa ba zikarapewonaha. Ahabo zuba mytsaty mytsaty byitaha. Ahazokdi byihuja! Sizokdirētsa kytsa deusbyitsa pe yh̄y sisopyk watsa maha.

⁶ Ikiahatsa ana ty hi tsimykaranaha zeka Deus aha humo takyri. Ikiahatsa anatyhi ahasopykze Deus ahamumo takyri iharere bo batu h̄y zikaha.

⁷ Taparaka ikiahatsa kino iwa zikzurukunaha. Ikiahatsa tsimykiknaha ana humo zuba mytsaty tsikykaranaha.

⁸ Abaka mekywatutaha! Ahamysapybyiri tsmoewynaha. Ahaokani byihuja! Ahamysapy byihuja. Ahaharerewabymybara byihuja. Ahasakpare byihuja! Kytsa humo ka ahasakimijya byihu.

⁹⁻¹⁰ Taparaka ahamysapybyitsa tsikykaranaha. Abaka Kiristu humo ahaspirikporētsa mekywa tu tsimoziknaha. Abaka Kiristu wata tsimozik-tohinaha iwaze Deus soho humo ahahyrinymyrētsa babatsa tsimoziknaha. Iwatsahi ahape ty spihikbata spihikbata byitaha!

¹¹ Kiristu humo mekywa tu tsimaha, Sudeutsa Sudeutsabyitsa iwa Deus okzeka atsatu. Kytsa asahi sipiakzyzyktsa sipiakzyzykbyitsa Deus okzeka atsatu. Bipyritsa sihyrinymyrybyitsa, sitsumuēh̄itsa siokyrysarobyitsa asa kino Deus okzeka atsatu. Asakta Kiristu harere bo zuba ma mykaranaha. Ana bo hi zuba mytsaty tsimykaranaha. Iwaze Kiristu abazubata niyzik.

¹² Katsakta Sesus harere bo ma tsimykaranaha ana humo hi meky watu tsimoziknaha. Deus myhumo tsimypokzitsiarēta babata iwatahi nymy-watawy ityryktsa tsimoziknaha. Iokzeka wasani tsimaha. Mysapybyi ty tsimykaranaha zeka Deus mybo iktsa myze Sesus humo mymyokzohik iwatsahi tyharape pokzitsikinahaktsa! Tyharape sakihiknaha. — Uta zuba kahyrinymyrēta — ba ziky ustsya kytsa harere bo wabytaha! Ahamyzihihrētsa iwaze ustsya harere tsipiwabynaha. Ahakubyrisorokuja!

¹³ Hawa hatsa kytsa pahasapybyikinaha zeka tsysipokzitsinaha. Simymy-ijanikitsa tsysipokzitsinaha. Ba sihumo ahasakpare. Ahakubyrisorokuja! Ahamysapybara ty tsikykaranaha ana hi Kiristu zahaokzo iwatsahi kytsa pahasapybyikinaha zeka tysiokzonaha awatutaha mytsaty mytsaty byijataha tsysipokzitsinaha iwaze Kiristu watsa tsimoziknaha.

¹⁴ Iwa tsimyzurukunaha zeka wasani tsimaha. Tyharape pokzitsikinahaktsa! Iwa tsimyzurukunaha zeka wasani my. Atsezubaha tsimypykyryknaha zeka ahakurētsa. Astsatu mytsaty tsimykaranaha.

¹⁵ Kiristu zuba pahakusukniki iwatsahi astsa botu mytsaty tsimykaranaha. Ikiahatsa hi:

– O Kiristu tymytsumuēhīkta. Iwaze myhyrinymyrētsa babatsa tsimoziknaha. Katsaktsa Kiristu humo atsa botu mytsaty tsimykaranaha – tsimaha. Ana humo hi Deus nimywatawyhik. Iwatsahi Deus bo tsimypamykysokonaha:

– O myzo ikia zuba tsamysapyrēta. Ikia humo ka mykurētsa – tsimykaranaha.

¹⁶ Deus wasania ty Kiristu soho humo tyzurukunahaktsa! Kiristu wasaniha humo tyharape hyrinymyrnaha. Iwaze myhyrinymyrētsa babatsa tsimoziknaha. Iwaze Deus hyrikoso humo tysakibazikiknahaktsa! Deus harere ty tysakibazikiknahaktsa! Ikiahatsa hi:

– O Deus myzo ikia zuba tsamysapyrēta – iwa tsimysakibazikiknahaze.

¹⁷ Iwatsahi nawa ha ty tsimykaranaha zeka ana hi Sesus tuktsa pokzi tsimykaranaha. Nawa ha ty tsimytsasokonaha zeka ana hi Sesus pokzi tsimykaranaha. Iwaha hi Deus mozihikik atsatu tsimykaranaha. Deus bo tsimypamykysoikiknaha:

– O Deus myzo tsamysapyrēta. Sesus mysapyzekenihyrikosokda iwatahi tsamysapyrēta – tsimykaranaha.

Abaka Kiristu humo ahamysapyrētsa tsimoziknaha iwaze wasania ty tsimyzurukunaha.

¹⁸ – O wutykyryk sipytsakaza ahapytsa harere bo yh̄y tynakaranaha. Ikiahaka Sesus tuk tsiza iwazahi ahapytsa harere bo yh̄y tynakaranaha. Iwa zeka wasani my – my.

¹⁹ Makutsa pe my – O kytsa ahaokeza humo ahamypokzitsihuktsa. Ba sihumo ahasakpare. Tysipokzitsikinaha. Iwa zeka wasani my – mykara.

²⁰ – O ahahyrytsa kino niwatihi. Ikiahatsa ahazotsa harere bo ma tynakaranaha iwaha hi Deus mozihikik. Sesus tuktsa humo ahazotsa harere bo hȳy tynakaranaha. Iwa zeka wasani my – mykara.

²¹ – O sizotsa ahahyrytsa iwastuhu hatyty tynasipehakanaha. Tsimysibetsakikiknaha zeka siakubyitsa moziknaha – mykara.

²² – O sitsumuēhītsitsa siokyrysarobyikitsa. Tyzibytuhukutunaha azihitsa harere bo zuba hȳy tynakaranaha. Iwaze “O ikia wasani tsimy” my, ana hi tsiwaby tsihikiknaha. Siharere eze zuba ba tarabajaziu zikaha. Sesus pokzi ahahyryzitsokzawy pykyhytutaha! Tarabajaziu tsimykaranaha humo tyzibytuhukutu naha. Azihitsa pahasukparaka zeka tarabajaziu tsimykaranaha. Azihitsa ahaty sukparabyize kino niwatihi tarabajaziu tsimykaranaha h̄y. Iwa zeka wasani my – mykara.

²³ Ahahyryzitsokzawy humo. Ahakubyrisorokoktsa. Ikiahatsa azihitsa tsihyryze tarabaja tsimykaranaha h̄y. Deus humo kino niwatihi tsihyryze tatsumuēhīkī tsimykaranaha ana humo kino mytsatyziyu tsimaha. Iwatsahi ipokzi tarabajaziu tsimykaranaha.

²⁴ Kiristu mypehakatsa babata my, ikia ituk hi tarabajaziu tsimykaranaha. Atahi isapyrēnikia ty mybo nyny my. Iwatsahi tarabajaziu tsimykaranaha zeka hawa ihuak ty mybo nyny my.

²⁵ Katsa hi tamiy zeka sinini tsimykaranaha. Deus babata zuba mysoho humo tsihyrinymyrēta amy ty mysoho motsasoko wasani my. Iwa h̄y.

4

¹ – O sitsihitsitsa ahatsumuēhītsitsa asahi batu siokyrysaro humo nyny hukbyikitsa asa humo hi wasani tahaktsa! Tysisakihiknahaktsa! Mytsatyziutaha! Ikiahatsa humo kino ahapehakatsa bjoikpe ezekta my. Atahi pahapokzitsiki ikiahatsa kino niwatihi tsimaha, ahatsumuēhītsitsa tysipokzitsikinaha – my.

Myspirikpowy.

² O kytsa Sesus tuktsa Deus bo tynapamykysoikiknahaktsa. Ahazikabyihuktsa Deus bo tsimypamykysonahaze wabyziutaha! Ikiyahatsa hi:

– O Deus ikia humo ka mykurētsa – tsimynakaranaha.

³ Deus bo tsinapamykysokonahaze katsa mybo kino tsimyzapykynaha. Katsaktsa Deus wasania ty tsimytsasokonahaze kytsa ba zikmykninaha ana humo hi tsimyzapyky tsihikiknaha. Taparaka Deus wasania ty Kiristu soho ty myzubaha bo batu tyso, abaka myzubaha bo wasaniha mybo motsasoko katsa eze tu tsimytsaso tsihikiknaha hỹ. Ikiyahatsa Deus bo mytsyhyryze ty-pamykysonahaktsa. Deus harere humo zuba ikykara tahi sakyriukrēnikitsa hurukwy bo zikoktyhyryknaha.

⁴ Iwatsahi Deus bo tsimypamykysonahaze tsimyzapykykynaha:

– O myzo Pauro tuktsa tsumuēhĩ. Wasani mypubara ty motsasoziukunaha iwatsahi kytsa iharere piwabytoktonahaze – tsimaha. Iwa tahaktsa.

⁵ Kytsa Sesus humo sispirikpobyitsa wasani taha. Ahaspirikpohuktsa ana hi pinynaha. Iwaze Sesus soho sibo tytsasonaha.

⁶ Kytsa bo tsimypamykysokonahaze ahaharere tisapyrēna tsimaha. Kytsa ahaharere wasaniha humo siakparawy my. Iwaze piwabytoktonahaze. Ahaharere piwabynahaze – O siharere humo mykurētsa. Wasani my. Tahawaby tsihikik – maha.

Abaka pepykyk iwatahi mytukytsa bo mytsaty mykara.

⁷ Tikiko kasoho ahabo motsasoko. Atakta Sesus harere bo hỹ mynakara tahi atakta katsy wata. Atakta kakparawy, mytuk Sesus soho humo mymytsumuēhĩekik. Sesus tsumuēhĩtsa babata my.

⁸ Iwatahi ahabo pipeha. Mysoho motsasokoze ahakurētsa tsimoziknaha. Hawa tsimyzurukunahaze anahi motsasoze pahakusukniwyky hỹ. Wasani my.

⁹ Onesimu Tikiko tuk mokuru. Ata kino niwatihi Sesus harere bo hỹ mynakara iwatahi ihumo tspirikporēta. Wasani mozuruku. Katsaktsa ihumo mypokzitsirētsa. Atakta Korose ezekta my. Hawa tsimykaranaha ahabo motsasonaha.

¹⁰ Aristarakus katuk sakyriukrēnikitsa hurukwy eze mopykyryk. Atahi:

– O Korose ezektsa humo kahyryzikbarēta mykara – niy. Marakos kino niwatihi ahahumo tsihyryzikbarēta, atahi Baranabe tsy. Isoho botu ziwatahaka ahabo pomo zeka ipe tsimaha:

– O pakutynykta! Kawahoro humo awanu ty hāitykta. Mytuk tsikadisaha! – tsimaha.

¹¹ Sosue atsatu Sustas inarokota kino niwatihi ikiahatsa humo tsihyryzikbarēta. Ata kino Sudeu. Harakykbyi Sudeutsa asaktsa katuk Sesus humo myzitsumuēhĩkĩnaha. Kytsa Sesus humo sispirikporētsa ana humo hi tarabaja mykaranaha. Iwatahi kakurēta. Ziktsumuēhĩkĩnaha humo kakurēta hỹ.

¹² Epararas Sesus tsumuēhĩtsa niwatihi. Atakta ahudikhudikwy ezekta my ahahumo tsihyryzikbarēta. Atahi Sesus harere bo hỹ mynakara. Deus bo ahatsyhyryze mynapamykysoko. Atahi:

– O Deus myzo Korose ezektsa tsiyipunihiwyky iwatsahi Sesus humo batu sisikpyby. Asaktsa Sesus harere bo hỹ mynakaranaha iwatsahi ihumo sispirikporētsa. Sispirikporētsaze Sesus humo mospirikpotohinaha – my.

¹³ Atakta ahatsyhyryze tarabajazu mykara ana humo hi kahyrynymyrēta. Kytsa Raodisija ezektsa, Hieraporis ezektsa iwatsa sizubarētsa tsyhyryze tarabajazu mykara. Wasani mykara.

¹⁴ Rukas mediko mozororowykytsa katsaktsa ihumo mypokzitsirētsa. Atakta simyitsapyritsa nasipokzitsiki. Atakta Demas tuk aha humo sihyrizikbarētsa, ahasoho bo mytsaty mynakananaha.

¹⁵ Katsa ustsā Sesus tuktsa humo myhyrizikbarētsa. Asaktsa Raodisija ezektsa. Ninapa bo asaktsa iwahoro eze ziknapykyknaha asa humo hi myhyrizikbarētsa.

¹⁶ Kyze papeu iwatahaha tsipinyahaze Raodisija ezektsa bo nyny tsimaha. Iwaze Raodisija ezektsa kino niwatihi tsipinyanaha. Utakta usa papeu sibo iwatahaka ana hi kytsa zibykyryknaha. Asahi anapapeu ty ahabo nyny maha. Iwaze papeu zisapyzyknaha. Sipapeu iwatahaha tsipinyanaha.

¹⁷ Arakipus pe tsimaha:

– O Arakipus mypehakatsa Sesus hyriziktsokzawy humo zipeha. Anaty tsimyкта – tsimaha.

¹⁸ Abaka utatu piwatahaka, *Pauro ahahumo tsihyrizikbarēta mykara* ana kino piwatahaka. Deus bo katsyhyryze tsimypamykysokonaha. Siakyriukrēnikitsa hurukwy ezektatu mykara. Kahumo ahaspiriktsokd-abyihu!

Deus pahasapywyky.

Deus bo uta kino ahatsyhyryze mopamykyso:

– O Deus myzo Korose ezektsa tysipokzitsi – my. Iwa. Niwazuba.

Pauro

Pauro tapãbabaky Tesaronika ezeiksa bo ziwatahaka

Pauro Sesus tuktsa Tesaronika eze ziwatahaka anaezeiksa Sesus humo batu sispirikpo nisisukyrykynaha iwaze Pauro Sesus tuktsa nisiakusukniki. Deus Pauro ziapewywyky iwatahi katsa kino niwatihi tanymyryky.

¹ Uta Pauro ahabo piwatahaka. Siras Timoteo iwatsa katuk ahabo tawatahaka. Ikiahatsa mywatsa Sesus tuktsa tsimaha Tesaronika ezeiksa ahabo katsa tawatahaka. Deus myzo. Ikiahatsa ityryktsa tsimoziknaha. Sesus Kiristu ahapehatsa niyzik. Deus pahapokzitsiki iwatsahi Deus humo ahakurētsaktsa kytsa.

Hawa Sesus tuktsa Tesaronika ezeiksa usts mysipokzitsikinaha ana soho hi motsasokonaha.

² Katsaktsa Deus bo tsimypamykysokonahaze ahatsyhyryze ibo tsinapamykysokonaha ipe tsimaha:

– O Deus ikia tsamysapyrēta iwatahi Tesaronika ezeiksa tysipokzitsi iwatsahi asaktsa Sesus tuktsa sakurētsa moziknaha – tsimaha.

³ Deus myzo bo tsimypamykysokonahaze ahasoho bo mytsaty tsimykaranaha. Hawa Sesus harere bo hyỹ tsimykaranaha iwatsahi ihumo ahaspirikporētsa tsimoziknaha ana humo hi mytsaty tsimykaranaha. Ihumo ahapunihikrētsa tsimoziknaha. Sesus humo ahamypokzitsirētsa iwatsahi ihyriziktsokzawy tsizubarēna humo tsimykaranaha. Hawa ahapehaktsa Sesus Kiristu humo taperyky iwatsahi ahaspihikrētsa. Ihumo ahaspirikporētsa tsimoziknaha.

⁴ Iwaze tatukytsa, iwaze hi Deus ahahumo tsimypokzitsiarēta. Atahi zahawatawy ityryktsa tsimoziknaha niy iwatahi botu zahawatawy.

⁵ Deus wasania ty Sesus soho ahabo tsiktsasokonaha. Deus wasania ty tsiktsasokonahaze myharere zuba baeze. Katsa hi mykzohotsa tsikykaranaha. Deus hyrikoso humo mykzohotsa tsikykaranaha. Deus hyrikoso kino izikwy humo tsikykaranaha. Deus wasaniha humo ahaspirikporētsa tsimoziknaha. Hawa ahatuk tsikzurukunahaze naha humo ahahyrinymyrētsa. Hawa tsikzurukunaha nawaha ty tsikahatsumuēhikīnaha.

⁶ Katsa mywatsa mysopyk watu tsikykaranaha. Sesus watsa tsimyzurukunaha. Hawa tsikzurukunaha ahatukze ikiahatsa niwathihtsa mysopyk watu tsikykaranaha. Mytuk tsinymyrykynaha. Myharere tsiwabytoktonaha. Iwatsahi Sesus humo ahakurētsa tsimykaranaha. Deus hyrikoso humo ahakurētsa tsimykaranaha.

Iwa sinini tsikykaranahaze iwatsa tu ahakurētsa tsimykaranaha. Kytsa zahasukyrykynahaze Deus hyrikoso humo ahakurētsa.

⁷ Iwaze hawa tsikykaranaha ana humo Deus tuktsa tsikyzyknaha. Masedonia ezeiksa Keresia ezeiksa kino niwatihi ahasoho motsasokonaha:

– O Tesaronika ezeiksa Sesus tuktsa babatsa maha. Katsa asa watsa tsimyzurukunaha zeka wasani tsimaha – mykaranaha.

⁸ Nanabyitaba kytsa ahasoho ziwabybanaha. Ikiahatsa Deus harere bo hyỹ tsimykaranaha ihumo ahaspirikporētsa tsimoziknaha ana kino ziwabybanaha. Masedonia ezeiksa, Keresia ezeiksa kino niwatihi Sesus soho wasania ty ikiahatsa humo ziwabykynaha. Iwaze katsaktsa ahasoho ty batu tyso. Botu tsiktsasonaha abaka ba ziktsasonaha. Sesus soho ahahumo botu ziwabybanaha iwatsahi katsaktsa batu tyso.

⁹ Atsa tu mybo nipamykysokonaha. Hawa ahabo tsiknakozorenaha soho ty hi nitsasokonaha. Tsikumunahaze myhumo ahakurētsa ana kino nitsasokonaha. Hawa Deus byitsa batu ahakparawy iwatsahi tahaerikiknaha. Deus tuk zuba tsimynapykyryknaha. Deus koikny bakta tu ituk zuba tsimynapykyryknaha. Iharere bo zuba hȳ tsimykaranaha. Deus babata harere bo hȳ tsimykaranaha.

¹⁰ Ikihatsa Sesus zuba tsimyziperykynaha. Atahi Deus tuk mynapykyryk aibatohi zuba mybo myziksizo. Sesus Deus tse. Deus zihyritzikpowy. Atahi mymytsumuēhīki myhumo tsimypokzitsiarēta. Deus mymysapybara humo takyriki iwaze sinini ykarawy bo mymypehahik. Sesus wy nitytsumuēhī mysapy ziky nihyrikosokda iwatahi myhumo tsimypokzitsiarēta. Iwaze Deus sinini ykarawy bo ba zik mypeha. Iwa ana soho ty nipamykysobanaha.

2

Pauro Tesaronika eze tarabaja nikara.

¹ – O katukytsa katsaktsa ahabo tsiknakozorenahaze wasani tsikykaranaha. Ana humo ahahyrinymyrētsa –.

² Tapara Piripos ezektsa wasanibyitsa nikaranaha. Anaektsa nimysapybyrikinaha. Kytsa Deus soho humo batu sispirikpotsihik katsa Deus wasania ty tsiktsasokonaha. Iwatsahi katsa ahabo tsikumunaha. Deus humo mypunihikrētsa tsimoziknaha. Deus humo batu mysikpyby. Iwatsahi Deus wasania ty tsiktsasokonaha h̄y.

³ Hawa ahabo ziknatsasokonaha imyibara ty tsikykaranaha. Deus wasaniha humo tsiktsasokonahaze batu ahaty spihikbata, ahabo tsikt-sasokonahaze wasani tsikykaranaha. Ba aty tohi ty tyspihikbata.

⁴ Katsaktsa Deus harere wasani tsimytsasokonaha. Deus kino mype niy:
– O ikiahatsa kaharere ty tynapamykysokonahaktsa! – niy. Iwatsahi iharere kytsa bo tsimynatsasokonaha. Iharere tsimytsasokonahaze mysoho humo – O wasani – mykaranaha. Katsa kytsa bo iharere tsimytsasokonaha. Deus mozihikik ana hi tsimytsasokonaha. Iharere tsimytsasokonahaze iwaha humo kytsa batu siakparawy. Katsaktsa Deus okzeka wasani tsimaha, atahi nymypeha iwatahi mysoho humo:

– O ikiahatsa wasani tsimykaranaha – iwa myzeka mykurētsa. Ata kino mysopyk humo tsihyrinymyrēta hawa mytsaty tsimykaranaha humo tsihyrinymyrēta.

⁵ Katsaktsa ahaspihikbatabyitsa. Ahasoho humo:

– O Tesaronika ezektsa simysapyrētsa – batu aha. Tsiktsasokonahaze okyrysaro ty batu tykse. Deus zuba myharere humo tsihyrinymyrēta. Hawa tsikykaranaha humo tsihyrinymyrēta.

⁶ Kytsa myhumo harereziyu mykaranaha zeka ba zikzihikiknaha. Kytsa mype maha:

– O ikiahatsa ahamysapyrētsa – maha. Ana kino ba zikzihiknaha. Ikihatsa kino niwatihi iwa mybo batu tyso batu h̄y tsimaha. Utsa kytsa iwaha ba zikzihikiknaha.

⁷ Katsaktsa Kiristu nimywatawy. Kiristu mypehakatsa ahape niy:

– O ikiahatsa ahanamy ty ykzohotsa bo nyny tsimahaze. Okyrysaro ty sibo nyny tsimahaze – niy. Katsaktsa iwa ahabyitsa mysopyk. Batu ahanamy ty tytsihik. Ahahumo mymypokzitsiukrētsa. Katsaktsa ahajeza wa hi tsipahapokzitsikinaha. Ije tadisahawy ty tahyrytsa bo nyny mykara ziktatsawa. Katsa kino niwatihi ahahumo mymypokzitsirētsa atatsa watatsa.

⁸ Tsipahapokzitsikinaha. Iwatsahi Deus harere tsiktsasokonaha. Deus wasania ty tsiktsasobanaha. Kytsa pahabeze tsihikiknaha zeka katsa tsipahasapyzekynaha. Iwa ahahumo mypokzitsi. Katsaktsa ahahumo mymypokzitsiukrētsa hỹ.

⁹ O katukytsa mytsatyahaktsa. Hawa ja ahatukze zikzitsumuēhikīnaha. Okoroze unata myhyriziktsokzawy humo tsikykaranaha. Mynamyhuak bete iwaze hi mydisahawy tsikzibykyknaha. Iwatsahi ahanamy ty ba mybo nyny zikaha. Iwaze Deus wasania ty ahabo tsikpamykysokonaha. Ahanamy ty batu mybo nyny zikaha.

¹⁰ Katsaktsa ahatukze nawa tsikykaranaha ana humo kino ahahyrinymyrētsa. Deus kino niwatihi tsihyrinymyrēta. Ikiahatsa Deus harere bo hỹ tsimykaranaha mysoho humo ahahyrinymyrētsa. Katsaktsa ahatukze wasani tsikykaranaha. Deus okze wasani tsikykaranaha. Ikiahatsa myhumo batu tymyi.

¹¹ Katsaktsa ahazo tsawatsa tsikyziknaha, ana humo hi ahahyrinymyrētsa. Myhyrytsa watsa ahahumo mysopyk.

¹² Ana humo ahape tsikykaranaha.

– Ahakurētsaktsa! Deus harere tsiwabytoktonahaktsa! – tsikykaranaha. Sisukatsihikrētsa pe tsikykaranaha:

– O ahasukatsihikbyihu ja. Deus pahakusukniki – tsikykaranaha. Nawa tyzurukunaha. Iwa zeka Deus ahasoho humo my:

– O wasani mykaranaha. Sihumo kakurēta – my. Deus kino ityryktsa tsimyzihikiknaha humo pahakzo. Ityryktsa ahamysapyrētsa tsimoziknaha ana humo hi pahakzo niy.

Deus harere humo sinini tsikykaranaha.

¹³ Katsaktsa Deus wasania ty tsiktsasokonahaze tsiwabyziukunaha. Iharere bo hỹ tsikykaranaha. Iharere bo pykyhytutaha tsiwabytoktonaha. Ikiahatsa tihi:

– Kytsa harere zubahabara Deus harere baba zuba – tsikaha. Wasani mytsaty tsimykaranaha. Deus harere bo yhỹ my. Iharere humo ka meky watu tsimoziknaha. Ikiahatsa Sesus tuktsa harere humo ahamysapyrētsa tsimoziknaha. Iwaze ahahumo mykurētsa. Deus okze mykurētsa tsimoziknaha.

¹⁴ O mytukytsa! Sesus tuktsa Sudeja eze tahatukytsa humo sinini nikaranaha. Ikiahatsa kino niwatihi ahaōtutsa pauktsitsa humo sinini tsimykaranaha. Astsatu Sudeja ezektsa watsa sinini tsimykaranaha.

¹⁵ Asahi Sudeutsa Sesus mypehakatsa zibezehiknaha. Tubabatu sizotsa Deus nitsasokonahatsa nisibaiknaha. Abaka Sudeutsa katsa mymysukyrykynaha. Asahi sakyriwytsitsa tu mozurukunaha. Deus sisoho humo my:

– O asahi simysapybyrikitsa mykaranaha iwatahi takyriki – mykara.

¹⁶ Sudeutsabyitsa bo tsikykaranaha. Deus wasania ty Sudeutsabyitsa bo tsimytsaso tsihikiknaha. Asahi Sudeutsa Deus harere bo batu hỹ niaha iwatsahi myharere pepyk tsihikiknaha. Sudeutsabyitsa Deus bo mysioktyhyryk tsihikiknaha. Asaktsa Sudeutsa batu yhỹ niaha iwatsahi myharere pepyk tsihikiknaha. Tapara simysapybyitsa nikaranaha. Abaka simysapybyi niubara. Iwatahi Deus takyriki. Simysapybyitsa humo takyriki. Atahi:

– O ikiahatsa batu ahamysapy niy. Ahahumo pahasininiwyky – Deus niy.

Pauro Tesaronika bozo mynakozore tsihikik.

¹⁷ O mytukytsa kytsa pokso tsikwakiknaha, ahatuk tsimymysapy tsihikiknaha zetu. Ikiahatsa humo myhyrizikbarētsa. Ahasoho bo mytsaty ziknakanaha. Ahabo tsipiksizo tsihikiknaha zetu.

¹⁸ Ikiahatsa bo tsiksikyzykynaha ezetu. Uta hi ikzihikik ezetu batu zik. Satanas hyrikoso sapybara pehatsa humo wyzik batu. Iwatsahi ba ahabo zikumunaha.

¹⁹ Uta ezetu ahabo mynakozore tsihikik. Ikiahatsa humo hi mykurētsa. Utsa kino niwatihi aha humo sakurētsa. Sesus mybarawy bo myziksizoze katsakta ituk tsinapykyryknaha. Ikiahatsa Sesus harere bo hyĩ tsimykaranaha humo ahaspirikporētsa tsimoziknaha, iwahatu tu ahakurētsa. Sesus myziksizoze ipe tsimaha:

– O aharere Tesaronika ezektsa bo tsiktsasokonaha. Ana hi ziwabykynahaze hyĩ nikaranaha – tsimaha. Ikiahatsa ituk tsimypykyryknaha ana hi taperyky.

²⁰ Ikiahatsa humo mykurētsa. Iwahatu katsakta utsa kytsa pe:

– O Tesaronika myzubaha ezektsa simysapyrētsa maha – tsimaha. Iwa ahasoho bo mytsaty tsimykaranaha.

3

¹ Iwaze batu ahabo iktsa tsimaha. Ahahumo myhyrizikbarētsa iwatsahi batu mykubyrisorok. Iwatahi uta hi:

– O katsakta Atenas eze tsimypykyryknaha. Utakta, Siras ahatsa niwatihi katsa zuba tsimynapykyknaha.

² Iwaze Timoteo pe:

“O ikiakta tsiksikta. Tesaronika ezektsa bo tsimy” – iky.

– Hyĩ iky – niy. Iwatahi ahabo zipeha. Timoteo mytsy. Mytuk botu Deus tsyhyryze myhyriziktsokzawy mynakara. Deus wasania ty Kiristu soho natsasoko. Utakta ipehata tihi iwatahi pahakusukniki. Kiristu harere bo yhyĩ tsimykaranaha, ihumo ahaspirikporētsa ana soho humo pahatsumuēhi. Iwatahi zipehahik. Iwaze Timoteo niparak.

³ Iwatsa tu batu aty tohi Sesus harere bo batu hỹ zikaha, ihumo batu ahaspirikpo isukyrywy humo. Sesus humo sinini tsimykaranaha zeka iwatuze iharere bo ma tsimaha. Kytsa pahasukyrynaha zeka iwaze ikiahatsa Sesus harere bo ma tsimaha. Ikiahatsa sinini tsimykaranaha anahumo hi ahahyrinymyrētsa. Deus botu zahahyrinymyryky. Kytsa mymysukyrynaha humo ahahyrinymyrētsa.

⁴ Tubabatu katsa ahatukze tsiktsasokonaha. Hawa sinini tsimykaranaha soho botu tsiktsasokonaha. Ahabo botu tsiktsasokonaha atsawatu nikaranaha.

⁵ Iwatahi ahasoho iwaby tsihikik. Tozeka ja Sesus humo ahaspirikporētsa ana soho hi iwaby tsihikik. Ahahumo kahyrikbarēta. Iwatahi Timoteo ahabo iakzohik. Ahabo ipeha tahi niparakze ipe iky:

– Tesaronika bokta. Tesaronika ezektsa hawa ja mykaranaha sibo iktsaty – iky. Kapetu ikykara tozeka ja Sesus humo sispirikporētsa moziknaha. Tozeka ja Diabo hyrikoso sapybara pehatsa mysisapybyikik. Tozeka ja myharere piwabyziukunaha. Tozeka ja myhyriziktsokzawy anaeze zimyikinaha ana humo nikaranaha. Iwa ha humo mytsaty ikykara. Iwatahi Timoteo ahabo zipeha iwatahi niparak.

⁶ Abaka Timoteo botu ziksizo. Ahasoho ty nipamykysoko iwatsahi mykurētsa tsimykaranaha. Atahi:

– O Sesus harere bo hyĩ mykaranaha, ihumo sispirikporētsa wasani mykaranaha. Kytsa humo simypokzitsiukrētsa mykaranaha – niy. Atahi

mybo nipamykysoko, hawa mysoho bo mytsaty tsimykaranaha nikara. Atahi:

– O ahasoho humo sihyrizikbarētsa mykaranaha. Hawa ikiahatsa mybo tsimyzozore tsihikiknaha. Katsa kino niwatihi ahabo tsimynakozore tsihikiknaha – nikara.

⁷ Iwatsahi katukytsa sinini tsimykaranahaze ahahumo mykurētsa. Amy tsihokdaharēna zeka ahahumo mykurētsa tsimaha. Sesus humo ahaspirikporētsa iwatsahi mykurētsa.

⁸ Abaka ikiahatsa Sesus humo ahaspirikporētsa. Iwatsahi katsa ahahumo mykurētsa. Sesus humo tsimyspirikpokonaha zeka mykurētsa hỹ. Katsakta Deus bo tsimypamykysokonahaze tihi:

⁹ – O Deus ikia zuba tsamysapyrēta. Sesus tuktsa Tesaronika ezektsa aharere bo hỹ mykaranaha sihumo mykurētsa hỹ – tsimykaranaha. Iwatsahi batu mykubyri zikzumu Deus bo ahasoho ty tsikpamykysokonaha. Deus okzeka, ahahumo mykurētsa.

¹⁰ Natabyituhukutu Deus bo tsinapamykysokonaha. Ahabo tsimyzozorenaha zeka Deus harere tsimyzasobanaha. Iwaze Sesus humo tsimyspirikponaha baba.

¹¹ Deus myzo. Sesus myhyrinymyrytsa atahi mymytsumuēhīnaha. Iwatsa tu ahabo tsimynakozorenaha. Tsipahatsumuēhīnaha. Abaka amy ihokdaha humo tsipahatsumuēhīnaha. Iwatsahi ahabo tsimynakozorenaha.

¹² Deus namysapywyky iwatsahi tyharape pokzitsikinahaktsa. Taharape pokzitsitohinahaktsa. Kytsa sizubarētsa bo kino niwatihi sihumo ahamy-pokzitsiukrētsa tsimykaranaha. Katsa mywatsa tsimoziknaha. Myzubaha humo mypokzitsiukrētsa, ikiahatsa kino niwatihi tynakaranahaktsa kytsa.

¹³ Iwatsahi ahamysapybyitsa tu tsimykaranaha zeka anaka tsimoewynahaktsa. Kyze Sesus myhyrinymyrytsa myziksizoze wasanitsa tsimaha. Tsimyharape pokzitsikinaha zeka ba ahasikpyby. Deus myzo okeryk tsinamykahanahaze ba ahasikpyby. Sesus mypehakatsa myziksizoze tatyryktsa tatuk mysioktyhyk. Deus tatyryktsa soho pe my – O Tesaronika ezektsa wasani mykaranaha. Tahamysapybyi zimoewynaha. Deus harere bo zuba hỹ mynakaranaha – mykaranaha.

Iwa Deus tyryktsa mykaranaha. Deus okzeka ahamysapyrētsa tsimoziknaha.

4

Wasani zubaha ty tsimykaranaha anahi Deus mozihihikik.

¹ Aba ahabo botu tsiktsasokonaha katukytsa. Hawa tsimyzurukunaha anahi ahabo botu tsiktsasokonaha ana kino tsiwabyziunaha. Deus harere bo hỹ tsimykaranaha ana humo hi ahaspirikporētsa tsimoziknaha. Iwaze Deus ahahumo tsakurēta. Aba iwa zubahaty tsimaha zeka tisapyrēna ty tsimykaranaha. Abaka tisapyrēna ty puētsiktahaktsa. Abaka ahape my:

– Deus harere bo hỹ tynakaranahaktsa kytsa. Mytsasokozo mypehakatsa Sesus humo ahape my. Deus harere humo pykyhytu tynakaranahaktsa kytsa

² Myharere bo mytsatyta! Myspirikpowy tynakaranahaktsa kytsa. Myhyrinymyrywy iwa ahabo tsimykaranaha. Mypehakatsa Sesus humo hi ahabo tsimyzasokozonaha.

³ Wasani my ana humo kino Deus mozihihikik. Sesus harere humo pykyhytu tahaktsa kytsa. Ikiahatsa ahaokeza humo zuba tsizahaspihiknaha. Mektsa okeza bo ka hua hua byitaha. Wytykyryk kino niwatihi mekykyry pyitsa bo iktsa zuba tynakaranaha.

⁴⁻⁵ Ikiahatsa aokeza humo pykyhytutaha, Deus okzeka pykyhytutaha. Kytsa okzeka humo niwatihi pykyhytutaha. Ikiahatsa tsipasukzanaha zeka ahaokeza ty myiwy myiwy byitaha. Kytsa asahi Deus harere humo sihyrinymyrybyitsa ikiahatsa ba siwa zikaha mektsa okeza bo hua mynakaranaha. Ikiahatsaktsa ahaokeza bo zuba tynakaranaha.

⁶ Ahatukytsa humo ba zikaha. Siokeza bo hua hua byitaha. Ahatukytsa humo, ba zik sispihikbatanaha. Botu ahabo tsiktsasokonaha aba katsa tsimytsasokozonaha. Tisapyrēna ty tsimykaranaha. Atakta meky watu my zeka Deus ihumo takyri. Atahi:

– O batu imysapy my –.

⁷ Deus ta wasaniha mozihikik ana humo hi zahawatawy. Hawa wasania tyhi tsimykaranaha hỹ. Tamyikik zeka batu mymysapy. Usta oke tsipihuahua zeka batu amysapy tsimozik.

⁸ Aty kamyspirikpowy ahabyi zeka atahi Deus harere bo batu hỹ my. Ana kino kytsa harere zeky batu, Deus harere baba zuba. Deus hyrikoso mytuk mynapykyryk iwatsahi iharere bo hyỹ tsimykaranaha.

⁹ Ikiahatsa ahatukytsa humo ahamypokzitsiukrētsa tsimykaranaha. Ikiahatsa Sesus tuktsa tsimaha iwatsahi ahatukytsa humo ahamypokzitsiukrētsa iwaze ana soho batu tywataha. Deus pahahyrinymyryky iwatsahi tyharape pokzitsikinaha.

¹⁰ Iwa tsimykaranaha iwatahi ana soho hi batu tywataha. Sesus tuktsa Masedonia: ezektsa asa humo niwatihi ahamypokzitsiukrētsa. Abaka ahape my.

¹¹ – O tyharape pokzitsitohinahaktsa kytsa – tsimaha. Tapara ahabo tsiktsasokonaha hi:

– Ahaokanihinymyrybyihu ja! Ahaharerewabymybarabyihu ja. Ahahyriziktsokzawy humo tahaktsa iwatsahi ahadisahawy humo tsipahazisakanaha. Iwa tsimyzurukunaha. Tsimytsasokozonaha iwa tuzurukunahaktsa kytsa. Iwa tsimyzihikiknahaktsa kytsa – tsimaha.

¹² Iwaze kytsa Sesus harere bo yhỹ ahabyitsa ihumo batu sispirikpo ahasoho:

– O asaktsa wasani simysapyrētsa – mykaranaha. Ikiahatsa ahanamy humo zuba tsizahaspihikiknaha iwatsahi usts bo ba zikzapykyzonaha – kaboja kaboja – byi tsimaha. Ikiahatsa iwaze ahamysapyrētsa tsimoziknaha.

Sesus myziksizo naha soho.

¹³ Mytukytsa katsa tsipahspirikpokonaha siakbatsa soho humo ahahyrinymyrētsa tsimoziknaha hỹ. Siakbatsa soho motsasoko iwatsahi sihumo batu ahasukatsihik. Asaktsa Sesus harere bo hyỹ nikaranaha ihumo sispirikporētsa nikaranaha abaka siakbatsa humo kino batu ahasukatsihik. Kytsa asahi Sesus ba ziperykynaha sisukatsihikrētsa. Maku estuba situk mohyrikosokda zeka sisukatsihikrētsa. Mohyrikosokdaze ba Sesus tuk zikapykyryk iwatsahi sisukatsihikrētsa. Ikiahatsaktsa batu, Sesus tsipiperykynaha.

¹⁴ Sesus nihyrikosokda. Iwaze inahyrizikpo ana humo hi myhyrinymyrētsa. Siakbatsa kino niwatihi mynahyrizikponaha Sesus watsa. Deus Sesus mybarawy bo pipeha iwaze myziksizo. Siakbatsa Sesus humo sispirikporētsa asahi ituk mynasiknaha. Sesus tatuk mynasiokty. Ana humo kino myhyrinymyrētsa.

¹⁵ Amy ty ahabo motsasoko mypehaktsa katsa botu nimyhyrinymyryky. Ahabo motsasoko amy ty Sesus nimyhyrinymyryky. Sesus bijoikpe ikny myziksizo, atahi siakbatsa nasihyrizikpowy. Myziksizoze siakbatsa mynahyrizikponaha. Iwaze hi katsa mykbabyitsa tahahobyknaha. Ibaze

tsinazuzukbanaha. Tapara siakbatsa inahyirizikpobanahatsa iwaze katsa ibo tsinazuzuknaha.

¹⁶ Sesus myziksizoze kytsa iaksoho opykani huawa maha piwabynaha. Bijoikpe iknykta Deus tsumuēhĩtsa huawa myze anahi piwabynaha. Deus porawy itsumuēhĩtsa pioke hu hu nahaze ana kino niwatihi piwabynaha. Iwaze Sesus bijoikpe ikny mynasik. Tapara siakbatsa Sesus humo sispirikpotsa asahi mynasihyirizikpobanaha.

¹⁷ Iwaze katsa mykbabyitsa Sesus bo bijoikpe bo jobo tsimydoknaha. Siakbatsa Sesus nasihyirizikpowy situk bijoikpe bo tsimydoknaha. Anaeze tahahobyknaha. Anaeze tsimynazuzuknaha. Anaeze Sesus pauk baze tu mywahi tsimynapykyryknaha. Ituk mywahi tsimynapykyryknaha hỹ.

¹⁸ Iwatsahi iharere humo batu ahasukatsihik tsimaha. Iharere humo kytsa tysitsumuēhĩnaha. Iharere humo tysiakuwykynaha.

5

Sesus myziksizo naha taperyky.

¹ O katukytsa ikiahatsa hi:

– Hawa taeze ja Sesus myziksizo. Hana wa byzoje pitsuze ja Sesus myziksizo – tsimaha. Ana soho ka batu piwataha. Ikiahatsa botu tsinymyrybanaha, Sesus myziksizo naha humo ahahyrinymyrētsa. Atsoko myziksizo. Kytsa humo zipery nahabara tu atsoko myziksizo.

² Itsyhyryboarēnikita unata mozumuze tawata. Kytsa ibo mytsaty ahabyitsa tu mykaranaha, iwaze atsoko anamy pebykbaik. Nawa puruze Sesus myziksizoze itsyhyryboarēnikita wata ity pery ahabyita bo sibo zumu. Sesus niwatihi my kytsa ity pery ahabyitsa tu myziksizo atsoko myziksizo.

³ Atsoko wytyk ibykyhy natapyrize atatsa watatsa. Anawa hi Sesus myziksizoze atsoko myziksizo. Kytsa mytsaty ahabyitsa tu atsoko sibo mozumu. Kytsa hi:

– O abaka batu amy tohi mahaze abaka tisapyrēna niyzik my – mytsaty ahabyitsa tu nikaranaha. Iwa mytsaty mykaranahaze atsoko Sesus myziksizo. Atsoko ipokso sipybyrētsa moziknaha. Ba aty tohi ipokso zikwak. Iwa my Sesus myziksizoze atsoko myziksizo. Wytyk tabykyhy pepurukze imyitsapyri ziktatsa watatatsa Sesus myziksizoze kytsa sinini mykaranaha hỹ.

⁴ Mytukytsa Deus harere tsiwabyziukunaha hỹ. Ikiahatsa ahahyrinymyrētsa. Sesus myziksizoze ky humo tsipiperykynaha. Ikiahatsa itsyhyryboarēnikita ahapapa tu mozumu nahaze kywa anawahi Sesus taperyky tsimaha. Kytsa miwa haburuk tu pyrik mykaranaha zeka ba zikozonaha. Okoro eze zuba mokozonaha. Iwatsahi ikiahatsa batu kytsa watsa miwa haburuk tu pyri mykaranaha tsawatsabyitsa. Wasani tsinymyrykynaha, hawa kytsa okoro eze mokozonaha, siwatsa wasani tsinymyrykynaha. Iwatsahi Sesus myziksizoze ikiahatsa kino tsipiperykynaha, iwaze hawa wasani tsimyzurukunaha.

⁵ Deus harere humo ahahyrinymyrētsa. Iwatsahi ikiahatsa kytsa okoro eze pitabakanaha siwatsa tsimaha. Hawa tsimykaranaha okoro ezektsa watsa tsimaha, ahahyrinymyrētsa. Kytsa Deus harere bo batu hỹ mykaranaha, asahi kytsa unata ezektsa watsa maha batu sihyrinymyry. Sihyrinymyrybyitsa hi paikpa mytsaty mykaranaha, siwatsa miwa haburuk pyrik mykarana-hatsa watsa. Katsaktsa batu.

⁶ Iwatsahi ahapasatsihikrētsa tsimykaranaaha batu siōtutsanikitsa watsabyitsa. Iwa zeka batu paikpa mytsaty tsimykaranaaha. Tykymybanahaktsa kytsa. Ba zikwakyrinaaha. Wasani mytsatytahaktsa! Utsa kytsa mowakyrikiknaha zeka ikiahatsa batu zikaha iwa ba zikzurukunaha.

⁷ Unata hi tsizurubakanaha iwaze hi unata tsōsī zikzikuikiknaha asaktsa simysapybyrikitsa pypykbe mynakaranaha.

⁸ Katsa batu. Katsa okoro ezektsa tsipitabakanahaziktsa watsa tsimyzurukunaha, Sesus taperyky. Tsipiperykynaha Sesus humo myspirikporētsa iharere bo zuba hyŷ tsimykaranaaha iwatsahi Satanas harere bo batu hŷ tsimaha. Mymysapybyitsa tu mahani tsimykaranaaha. Deus humo mymypo-kzitsirētsa. Kytsa humo niwatihi mypokzitsirētsa. Sesus katsa mymyoktyhyryk ana hi taperyky.

⁹ Deus nimywatawy. Iwatsahi katsa kino ituk mywahi tsinapykyryknaha. Mysapybyi ty tsikykaranaaha tamoewy iwatahi Deus pahaokzohik ana humo hi nimywatawy. Mysapybyitsa tsikykaranaaha ana humo hi sinini ykarawy bo Deus mymypeha ana humo hi Deus batu mytywatawy. Mypehakatsa Sesus Kiristu takino Deus bo mymyoktyhyryk ana humo nimywatawy.

¹⁰ Atahi mysapyzeken nihyrikosokda iwatsahi katsa ituk mywahi tsimynapykyryknaha. Tsimyhyrikosokdanahaze aibatohi eze zuba Sesus myziksizo ituk tsimynapykyryknaha. Mohyrikosokda byizeka aibani zuba Sesus myziksizo astatu, katsa ituk mywahi tsimynapykyryknaha.

¹¹ Iwatsahi iharere humo usts kytsa tysitsumuēhīnaha. Tynasiakuwykynaha. Katsa aba tsimyzurukunaha Sesus tuk mywahi tsimynapykyryknaha ana humo hi tynasiakuwykynaha.

Aba myspirikpowy pepykykze ahape mykarazo.

¹² O mytukytsa asahi pahahyrinymyrykynaha pykyhytu siharere bo wabyziutaha. Asahi ahahumo simypokzitsiukrētsa mykaranaaha, hawa mypehakatsa Sesus motsasoko naha tihi mykaranaaha. Asahi pahahyrinymyrykynaha. Ahatsyhyryze pahatsumuēhīkīnaha ahapehatsa moziknaha.

¹³ Iwatsahi sihumo ahamypokzitsiukrētsa tsimykaranaaha. Iwatsahi mykparawytsa. Mypehakatsa Sesus nisiwatawy nahatsa pahatsumuēhīnaha, iwaze pahatsumuēhīnahaze tsysipokzitsikinahaktsa kytsa! tsimaha. Ahatuk zeka awatu tynakaranaha! Ahakurētsa tsimoziknaha.

¹⁴ O mytukytsa kaharere motsasokozo. Kytsa asaktsa sidikarēnikitsa pe:
– Myhyriziktsokzawy humo tyzikbyituhukunahaktsa – tsimaha. Siakubyitsa tynasiakuwykynaha. Kytsa Sesus harere humo tsikaeni zuba sihyrinomy zeka iwatsahi ihumo puētsik zuba nisispirikponaha asahi tsysitsumuēhīnaha. Sipybyrēnikitsa tsysitsumuēhīnaha, ahapybybyihu ja tsimaha. Kytsa sasabyitsa humo ja ahakubyrisoroku. Tohi ahatuk imysapybyita ty my zeka ba zik taokani, ihumo wasani tynakara iwa ahatuk tynakaranaha.

¹⁵ Pykyhytutaha! Ikiahatsa aty pahakyrity zeka ba zikatsapusare. Aty pahakyrityzeka ba zikaha tsapusare. Ikiahatsa tsipokzitsinaha. Ahatuk sasabyitsa humo tsysipokzitsikinaha hŷ.

¹⁶ Ahahakurētsa tynapykyknaha!

¹⁷ Deus bo zuba tynapamykysokonaha kytsa! Deus bo tsimykaranaaha.

¹⁸ Deus bo tyzikbyituhukunahatu nawa tsimaha:

– O Deus ikia humo mykurētsa tsimaha. Amy ty mybo nyny tsimykaranaaha ty wasani my – tsimaha. Iwa tsimypamykysokonaha Deus pe tsimykaranaaha. Ahaku zeka iwa Deus bo tsimypamykysokonaha. Ahakubyzize kino iwa Deus bo tsimypamykysokonaha. Hawa ha tsihokdahaarēna

zeka iwa tsimypamykysokonaha. Ana hi Deus mozihihik, Sesus tuktsa bo mozihihik. Wasani my tsimykaranaha Deus hyrikoso batu meky watu tsimaha.

¹⁹⁻²⁰ Aty ahatuk motsasoko zeka Deus hyrikoso humo tsiwabytoktokonahaktsa. Deus hyrikoso abo motsasoko zeka pykyhytu wabyziutaha. Wabyziu byizeka ba abo motsasozo my iwatsahi iharere bo pykyhytu wabytaha.

²¹ Kytsa tihi:

– O katsaktsa Deus hyrikoso humo tsimytsasokonaha – nikaranaha. Siharere soho humo mytsatzyiutaha. Siharere wasani habo zuba hyỹ tsimaha. Siharere sapy byizeka ana bo ka ba hỹ tynakaranaha iwaze kytsa mybarapetu nikaranaha.

²² Hawa mysapybyiwy zeka tsimoewynahaktsa!

²³ Deus hi mymyakuwyky hỹ. Utakta ipe my:

– O Deus tysipokzitsikikta. Iwatsahi simysapyrētsa moziknaha – my. Sesus Kiristu myziksizoze ahamysapyrētsa hỹ. Batu ahasikpyby. Deus pahapokzitsiki iwatsahi mypehakatsa Sesus Kiristu myziksizoze batu ahasikpyby my.

²⁴ Deus hi nimywatawy iwatahi namypokzitsiki. Iharere wasani my hawa ziknakara atsawatu mynakara.

²⁵ Ikiahatsa mytsyhyryze Deus bo tsimypamykysokonaha. Katsa atukytsa tsimaha.

²⁶ Mytukytsa bo tuharapehapyryknahaktsa kytsa.

²⁷ Uta ahabo motsasoko Sesus harere ty motsasoko. Amy ty ziwatahaka usts a mytukytsa sasabyitsa bo tsipinyaha.

Deus pahasapywyky.

²⁸ Abaka Deus pe my:

– O Sesus Kiristu tysipokzitsikikta. Sihumo amypokzitsiukta – my. De.
Pauro

Pauro Tesaronika ezektsa bo ziwatahakazo

Pauro usa papeu Tesaronika ezektsa bo ziwatahakazo. Sesus myziksizo naha soho ziwatahaka. Deus Pauro ziapewywyky iwatahi katsa kino niwatihi tanymyryky.

¹ Uta Pauro ikiahatsa bo piwatahaka. Siras Timoteo iwatsa katuk mykaranaha. Ikiahatsa Tesaronika ezektsa, Sesus tuktsa tsimaha. Ahabo hi piwatahaka.

² Deus myzo. Atahi pahapokzitsiki. Mypehakatsa Sesus Kiristu kino niwatihi pahapokzitsiki. Deus Sesus Kiristu ahatsa pahapokzitsikinaha. Iwatsahi Deus humo ahakurētsaktsa anawa hi Deus mozihikik.

Kiristu myziksizoze hawa imyzubaha mozurukunaha, ana soho motsasoko ihuak ty mybo nyny my.

³ O mytukytsa ahahumo mykurētsa Deus bo tsimypamykysokonahaze:

– O Deus Tesaronika ezektsa, asahi Sesus tuktsa humo mykurētsa – tsimykaranaha. Iwatsahi wasani mykaranaha. Sesus humo tsimyspirikpotohinaha. Tyharape pokzitsikinaha. Tyharape pokzitsitohinaha. Iwatsahi mykurētsa.

⁴ Kytsa bo niwatihi ahasoho ty tsimypamykysokonahaze mykurētsa. Asahi Deus harere wabytsitsa izumubanhaze ahasoho ty tsimypamykysonaha. Katsaktsa ahasoho ty ustsā Sesus tuktsa bo tsimypamykysokonaha. Hawa ahapunihikrētsa tsimoziknaha. Iwatsatu sinini tsimykaranaha. Sesus humo ahaspirikporētsa iwaze ustsā kytsa pahasininiwykynaha. Sesus humo ahaspirikporētsa tsimykaranaha. Ana soho hi ustsā tuktsa bo katsa tsimypamykysokonaha.

⁵ Ahasininiwy humo tsimykaranaha. Anatyhi Deus ababo wasani mykara piwatawyky.

Ahasininiwy humo Deus tyryktsa tsimoziknaha. Ahasininiwy soho humo ahamysapyrētsa tsimoziknaha.

⁶ Iwatahi Deus wasani mykara. Hawa ha tsa pahasininiwyky iwaze Deus tihi mysisininiwyky. Iwa Deus wasani piwatawy.

⁷ Sesus myziksizoze ba sininizo zikaha. Katsa niwatihi mytsaty mytsaty byija taha. Mypehakatsa Sesus myziksizoze mykurētsa tsimoziknaha. Sesus bjoikpe ikny mynasik naha humo taperyky. Sesus mynasikze ituk bjoikpe iknyktsa mynasiknaha. Sizikwyrēnikitsa.

⁸ Mynasikze izo hyrizik waha my. Hawa izo mokoroba nahawa atahi amy imysapybara pepyky. Iwa my. Myziksizoze asahi Deus humo simykparawybyitsa mysisininiwyky. Myziksizoze asahi Deus harere humo hŷbyi ziknakaranahatsa mysisininiwyky.

⁹ Asaktsa Deus pauk baze ba zikaha metutu tahawahi mynapykyryknaha. Iwa mysisininiwyky. Deus zuba imysapyrēnikita my ana humo kino batu sihyrinymyry.

¹⁰ Sesus myziksizoze iwa pomoze. Ityryktsa isoho ty mopamykysoziukunaha. Asahi ihumo sispirikporētsa iwaze ipe maha:

– O Sesus ikia zuba wasani tsinakarata. Ikia hi tsamysapyrēta – maha. Ikiahatsa kino niwatihi situk Sesus bo tsimypamykysoziukunaha. Ihumo ahaspirikporētsa iwatsahi ibo tsimypamykysoziukunaha. Isapyha humo hŷbyi tsikykaranaha iwatsahi Sesus bo myharere tsiziubakanaha.

¹¹ Iwaze katsa Deus bo tsimypamykysonahaze. Pororo tsimykarana ha Deus bo ikiahatsa tsyhyryze tsimypamykysonaha. Ikiahatsa botu Deus harere bo hỹ tsikaha. Iwatsahi ipe tsimaha:

– O Deus Tesaronika ezektsa ahumo atyryktsa moziknaha. Ikiya tsysitsumuēhīkī iwatsahi simysapyrētsa moziknaha. Asahi wasaniha mozi-hikiknaha iwatahi tsysitsumuēhīkī. Hawa wasani mozi-hikiknaha iwa sibo tsimykaraha. Azikwy humo simysapyrētsa moziknaha. Hawa ha ty Sesus humo sispirikporētsa moziknaha – tsimaha. Iwa Deus bo ahatsyhyryze tsimaha.

¹² Iwaze kytsa mypehakatsa Sesus soho ahahumo mopamykysoziukunaha. Iwa zeka ahatuk tu niwatihi Deus humo tsiknakokonaha. Ikiahatsa kino niwatihi Sesus bo tsimysakibazikiknaha. Iwaze Deus pahapokzitsiki. Mypehakatsa Sesus ziphata kino niwatihi pahapokzitsiki, asahi pahapokzitsikinaha.

2

Sesus sukmo sohowy myziksizoze sa hawa maha.

¹ O katukytsa. Aba mypehakatsa Sesus Kiristu myziksizo naha soho humo mytsaty taha. Katsa ibo harape bo tsinazuzuknaha ana humo hi mytsaty tsimaha. Katsa ahape tsimaha.

² Mytsaty mytsaty byijataha. Kytsa ahabo motsasonaha zeka:

– O iwaha pomoze Sesus myziksizoze botu ziharamu – mykaranahaze. Ikiahatsa waby waby byitaha. Asahi mybarapetu mykaranaha. Asahi mymypsipihikbatakanaha zeka:

O iwaha pomoze Sesus myziksizoze botu ziharamu Deus hyrikoso mype nikara asahi mybarapetu mykaranaha. Utsa kino:

– O iwaha pomoze Sesus myziksizoze botu ziharamu Pauro mybo ziwatahaka asa kino niwatihi mybarapetu mykaranaha. Anaharere humo hi waby waby byitaha – mybarapetu mykaranaha.

³ Siharere humo ka ja paikpa mytsaty mytsaty byitaha. Siharere bo ka waby waby byitaha. Mymypsipihikbataikiknaha zuba. Ikiahatsa pykyhytutaha. Iwa ha mozumuze kytsa sizubarētsa Deus harere bo batu h̃y zikaha. Tapara iwa maha. Simysapybyitsa mykaranaha ana humo kino siakparawy. Tapara kytsa Deus harere bo batu h̃y mykaranaha. Kyze maku mozumu atakta sipehakatsa mozik. Atahi Deus sukyrytsitsa pehatsa mozik. Ata kino Deus siakbatsa sapy bo myzipaha. Mopykba.

⁴ Tapara kytsa mysimiwy. Nanabyitaba kytsa bo mybarapetu mykara. Imysapybyita mozuruku. Kytsa pipehanaha zeka atahi batu ma ziky batu isopyksapy. Amy humo kytsa wasani mytsaty mykaranaha ana humo hi batu h̃y my. Uta zuba abazubata my. Deus wahoro zubata bo mytsuk. Anaeye dyhy my. Atahi – Utakta Deus my – iwa mybarapetu mykara. Imysapybyita mynakara iwatahi pispihikbataka.

⁵ Uta ahatuk ikykaraze Tesaronika eze ana soho hi iktsasoko. Kaharere kok tsihokdaharēna! Uta ahatukze botu iktsasoko imysapybyita pehatsa soho humo botu iktsasoko.

⁶ Abaka Deus zikwy humo ba zikzumu. Iwaze pehatsa imysapybyita batu isukmo. Ana humo hi ahahyrinymyrētsa. Deus yh̃y my zeka imysapybyita mozumu. Isukmo byizeka mahani. Deus hỹy myze zuba imysapybyita mozumu.

⁷ Abaka kytsa sizubarētsa imysapybyita pehatsa harere bo hỹy mykaranaha. Iwatsahi simysapybyitsa mykaranaha. Deus harere bo yh̃yabyitsa mykaranaha iwatsahi batu sispirikpo. Deus imysapybyita pehatsa soho mymywatawyky. Aibani zuba imysapybyita pehakatsa

mozumu. Aba Deus hyrikoso myzubaha humo tsimypokzitsiukrēta. Atahi imysapybyita pehatsa pe batu hỹ my. Abahi atahi mymypokzitsiki piksispyk zeka. Iwaze imysapybyita pehatsa mozumu.

⁸ Iwaze imysapybyita pehatsa natakaha. Mypehakatsa Sesus Deus zipehata myziksizoze imysapybyita pehakatsa pibeze. Hu my humo zuba pibezehek. Myziksizoze okoro zikywa mozik. Niytahi imysapybyita pibezehek.

⁹ Iwaze imysapybyita pehakatsa Satanas harere bo hyỹ mykara. Satanas harereze mozumuku. Iwa mozumuze Satanas tamyrawy myziskyk. Itsapyriwy humo mysispihikbataikik. Amy ty kytsa zikaha baraty ana kino mykara. Tsapyriwy humo mykara. Iwa itsapyriwy piwatawyky. Kytsa bo mybarapetu mynakara. Ana pokso hi mpybyrētsa mykaranaha itsapyriwy pokso iwatsahi mysimiywyikiknaha.

¹⁰ Kytsa mysispihikbataikik. Asahi mohokdanaha hỹ. Imysapybyita mykara sibo mybarapetu mykara. Asa kino mohokdanaha amy ty wasani humo batu siakparawy. Amy ty wasani ana humo hi batu waby zikaha. Iwatsahi simysapybyitsa mozihikiknaha. Deus bo mysioktyhyryk batu hỹ sisopyk.

¹¹ Iwaze kytsa Deus harere humo batu siwaby. Myspihikbatawy zuba siakparawy. Iwatahi Deus kino niwatihi:

– Ikiahatsa mospihikbatawy zuba ahakparawy. Iwa za iharere tsipiwabynaha – my. Iwaze mysispihikbatakanaha.

¹² Iwatsahi tisapyrēna ty Sesus soho humo batu hỹ sisopyk. Simysapybyitsa mykaranaha zeka sakurētsa mykaranaha. Imysapybara siakparawy. Iwatahi Deus ispe my:

– O ikiahatsa batu ahamysapy. Iwatsahi batu katuk tynapykyryknaha. Ahawahi sinini ykarawy bo pahapeha ana bo metutu tsipahasapynaha – my.

Ikiahatsa hi Deus harere bo hyỹ tsimaha.

¹³ O katukytsa ikiahatsa meky watu tsikyzyknaha. Katsakta Deus bo tsimypamykysokonahaze ipe tsimykaranaha:

– O Deus Tesaronika ezektsa asahi Sesus tuktsa humo sakurētsa moziknaha – tsimaha. Deus ahahumo tsimypokzitsiukrēta iwatahi zahawatawy. Iwatsahi mykurētsa. Tubabatu zahawatawy. Iharere tsiwaby tsihikiknaha ikiahatsa bo ziwatawyky. Iwatsahi Deus hyrikoso humo iharere bo hyỹ tsimykaranaha. Wasani tsimykaranaha. Sesus humo ahaspirikporētsa. Ityryktsa tsikyzyknaha.

¹⁴ Deus hi zahakzoko. Wasaniha humo zahakzoko. Katsa tisapyrēna ty tsiktasokonahaze zahakzoko. Sesus mypehakatsa nimykzo iwatsahi ituk tsimyzurukunaha. Katsa mykurētsa ituk tsimyzurukunaha. Zipehata Deus bo nimyoktyhyryk iwatsahi mykurētsa tsikyzyknaha.

¹⁵ Iwaze mytukytsa amy ty katsa tsipahahyrinymyrykynaha pykyhytutaha tynakaranahaktsa! Amy ty katsa ikiahatsa bo tsiwatahakanaha pykyhytutaha tynakaranahaktsa! Tapara usts kytsa nimyhyrinymyrykynaha ana hi mysopyk niyzik. Ikiahatsa kino niwatihi mysopyk humo tsikspirikpotohinaha hỹ. Ana tyhi tsimykaranaha.

¹⁶ Mypehatsa Sesus myhumo tsimypokzitsiarēta babata. Deus myzo kino niwatihi myhumo tsimypokzitsiarēta. Botu mybo nitsasoko:

– O ikiahatsa katuk ahawahi tsinapykyryknaha – my. Iharere humo mykurētsa. Mymypunihikwyky.

¹⁷ Iwatsahi Deus bo tsimypamykysokonahaze ipe tsimaha:

– O Deus tysitsumuēhī, tysipunihikwyky. Iwaze hi pisapybakanaha. Wasape ha zuba motsasokonaha. Ikia humo simysapyrētsa moziknaha sakurētsa moziknaha – tsimaha.

Iwa Deus bo ahatsyhyryze tsimypamykysokonaha.

3

Ikiahatsa mytsyhyryze Deus bo tsimypamykysonaha.

¹ Abaka katukytsa ikiahatsa Deus bo mytsyhyryze typamykysonahaktsa! Iwa typamykysokonaha:

– O Deus tisapyrēna ty Sesus soho ty situk typamykysonahaze tysitsumuēhī. Aidy sizubarētsa bo typamykysoziukunaha. Kytsa bo mopamykysokonahaze iwaze aharere bo hỹ mykaranaha.

² Sakurētsa tisapyrēna humo maha. Ikiahatsa mywatsa my. O Deus sisakimyijanikitsa ba ziksisininiwynaha. Kytsa tisapyrēna humo sispirikpobyitsa siaknitsitsa mysibakzykynaha. Asahi simysapybyitsa mykaranaha. Ikia batu h̃y tsimy zeka ba ziksibanaha – tsimaha my.

Iwa Deus bo mytsyhyryze tsimypamykysokonaha.

³ Mypehakatsa kino pahatsumuēhīekik. Pahakuwyky. Imysapybyita ba pahasininiwy. Sesus humo ka ba zahabezenaha Sesus ahahumo tsimypokzitsiukrēta. Iwatahi imysapybyikita pokso ja ba ahapybyhuk.

⁴ Katsa ahahumo mykurētsa Sesus hi mymypokzitsiki ikiahatsa soho humo mspihikrētsa. Amy ty tsikahahyrinymyrykynaha ty atsatu tsimyzurukunaha. Myharere bo hỹ tsimykaranaha.

⁵ Katsa Deus bo tsimypamykysokonahaze ahatsyhyryze niwatihi:

– O Deus sihumo tsimypokzitsiukrēta. Ana soho ty hi tysihyrinymyryky. Sihyrikbarasorykrētsa moziknaha. O mypehakatsa tysitsumuēhī Kiristu wata sipunihikrētsa moziknaha. Zipehata tsipunihikrēta ituktsa kino niwatihi iwata sipunihikrētsa moziknaha – tsimaha.

Iwa Deus bo ahatsyhyryze tsimypamykysokonaha, de.

Sesus tuktsa tarabaja mahatsa.

⁶ Kyze mytukytsa usa spirikpowy tsimaha. Mypehakatsa Sesus Kiristu iharere ahabo tsimytsasonaha. Wastuhu kytsa ahatuk zeka batu tarabaja zikaha. Ba ziksitsumuēhīnaha. Tarabaja batu h̃y zikaha. Sizikarētsa. Myspirikpowy soho humo batu waby zikaha iwatsahi sibo batu tyso.

⁷ Ikiahatsa botu ahahyrinymyrētsa. Katsaktsa ahatukze tsikahatsumuēhīkiknaha. Tarabajaziu tsikykaranaha. Iwa zikzurukunaha. Katsaktsa mypasaratsihikrētsa. Iwatsahi ikiahatsa astatu namysopykzuku mywatsa ikiahatsa ahapasaratsihikrētsa tsimoziknaha.

⁸ Katsaktsa tarabajaziu tsikykaranaha. Okoroze unata kino niwatihi tarabaja tsikykaranaha. Ahadisahawy ty mybo nyny tsikykaranhaze katsa okyrysaro ty ahabo nyny tsikykaranaha. Ihuak ty okyrysaro nyny tsikykaranaha. Kytsa nymytsumuēhīkīnaha zeka okyrysaro ty sibo nyny tsikykaranaha.

⁹ Iwa tsimyzurukunaha. Ikiahatsa astatu mysopykzukutsa kytsa. Mywatsa tihi tsimyzurukunahaktsa! Katsaktsa Sesus ykzohotsa disahawy ty mybo nyny tsimaha zeka wasani tsimaha. Katsa mykzohotsa ahawahoro tsarawybyita humo haīhaī tsimaha zeka wasani tsimaha. Katsaktsa batu h̃y tsimaha. Katsa hi tsipahatsumuēhīnaha okyrysaro ty ahabo nyny tsikykaranaha. Iwaze myhyriziktsokzawy bo iktsa tsimaha. Iwaze ikiahatsa mywatsa tu tahaktsa!

¹⁰ Botu tsiktsasokonaha ahape tsimaha:

– Aty mytuk mytytsumuehi ahabyizeka ba zik tadisaha. Aty mytuk yh̃ habyi zeka iwatahi idisahawy ty batu ibo nyny tsimaha – tsikaha.

¹¹ Wastuhu kytsa ahatukze batu ahaty tsumuēhĩ. Sizikarētsa maha mopamykysoikiknaha zuba. Batu iksa zuba zikaha. Ana hi tsiwabynaha sizikarētsa soho iwatsahi tsinymyryzonaha ihyriziktsokzawy soho tsimaha.

¹² Myspirikpowy tsiwabytoktonaha. Wabyziutaha! Sihyriktsokzahaby-itsa pe my:

– Mypehakatsa Sesus Kiristu humo tsipahakzonaha. Ihyriziktsokzawy humo zikbyituhukutu! Iwatsahi atukytsa tsimysidisahawykykynaha. Pykyhytutaha humo, wasani tsimykaranaha – tsimaha.

¹³ Ikihatsa, mytukytsa hi batu ahaku byrizikzumu tisapybakanahaktsa! Ahamysapyrētsa tsimoziknaha.

¹⁴ Aty myharere bo ahabyi zeka tsinytoktonaha. Aty myharere papeu humo batu h̃ my zeka ba ituk zikpamykyso. Batu ituk zikparak iwaze hi tisikpybyrēta mozik.

¹⁵ Iwata humo ba zikmykyriwy. Atsy wata ipe tsimy:

– O katsy Deus harere bo wabyty! Iharere bo hỹ tsimy. Iki Sesus humo tispirikporēta tsimyкта – tsimaha.

Aba kaharere mopykyk.

¹⁶ Katsa Deus humo ahatsyhyryze tsikzapykykynaha. Katsa hi:

– O mypehakatsa ikia tsimymykywyky. Iwaze batu paikpa mytsat tsimykaranaha. Ahakurētsa tsimynakaranaha h̃ – tsimaha.

¹⁷ Abaka uta babata tu, piwataha. *Utakta Pauro ahahumo kahyrikbarēta* my. Iwa piwatahaka. Papeu humo tsizubarēna iwa piwatahaka.

Deus pahasapywyky.

¹⁸ Abaka Deus pe my:

– O mypehakatsa Sesus Kiristu tysipokzitsiki. Sizubarētsa humo tsimypokzitsiukrēta – my. De.

Pauro

Pauro Timoteo bo tapara ziwatahaka

Timoteo Pauro tuk zinymyrykyta, iwaze Pauro Timoteo zerikikze papeu ibo ziwatahaka. Hawa Sesus tuktsa nisipokzitsiki iwatahi ispirikpowy ibo ziwatahaka. Deus hyrikoso Pauro ziapewywy iwaze katsa kino niwatihi ana humo hi tanymyryky.

¹ Uta Pauro. Timoteo abo piwatahaka. Kiristu Sesus zikykhohik. Sesus Kiristu Deus tazo bo mymyoktyhyrykta niwatihi zikpehahiknaha iwatatu iakzohota my. Sihumo Deus wasania ty mopamykysoko. Katsa Sesus humo myspihikrētsa.

² Ikiakta katse wata. Iki katuk Sesus humo aspirikporēta. Deus pe my:
– O Deus kazo Timoteo humo tyzipokzitsikita iwatahi kytsa nasipokzitsi. O kazo Kiristu Sesus mypehatsa humo niwatihi ahahumo tsakurēta mykara – my.

Kytsa asahi tahaspirikpowy baratyty mynakaranaha asa bo hi – niwazuba pyktaha – tsimy.

³ Iki Epeso eze tsimytare. Nezeba Masedonia bo niukuruze ape:
– Iki Epeso eze tsimytare tsihikik iky. Abaka atsatu mykara Epeso tsimytare iwatahi asaktsa nisihyrinymyrykynahatsa asahi mybarapetu nikaranaha tysipehahik. Amy baratyty mysihyrinymyrykynaha. Deus harere batu mysihyrinymyrykynaha tahaharere ty zuba kytsa bo mysihyrinymyrykynaha. Iwatahi iki tysipehahik ispe tsimy:

“O meky watu tsimysihyrinymyrykynaha. Niwazuba pyktaha! Ahahyrinymyry byiziky tsimy.

⁴ Ahazotsa niakbakaranahatsa soho ty ka soso byitaha. Amy sinaro nikaranaha ana soho ty ka soso byitaha. Anatyhi tsimypamykysokonaha zeka kytsa Deus harere bo hỹ ahabyitsa. Tsimyhapepehakanaha zuba. Deus mybo tsimysapyrēta ja mykaranaha, iwa motsasokonaha. Iwahatu ahazotsa harere ty ka soso byitaha” tsimy – my.

Iwa sibo tsimytsasoko.

⁵ Iwa sibo tytsaso iwatsahi simypokzitsirētsa mynakaranaha. Simysapybyitsa soho humo batu mytsaty mykaranaha zeka simypokzitsirētsa mykaranaha. Sesus humo mospirikpotohinaha zeka, kytsa humo simypokzitsiukrētsa mynakaranaha. Deus harere bo hyỹ mykaranaha zeka iwaze kytsa humo simypokzitsirētsa.

⁶ Kytsa ahatukze kaharere humo batu siakparawy. Asahi batu wasani zikaha. Kytsa mekta ske buruk tu myzaranahaze tsa watsa moziknaha. Myzaranahatsa tihi:

– Hāta sa iske – maha, tsawatsa kytsa Deus soho mopamykysokonaha zuba. Hawa mospirikpo maha. Asahi saksoho humo piwabynaha zuba ana humo hi siakparawy.

⁷ Asa kino kytsa mysihyrinymyry tsihikiknaha. Mahani. Moises harere ty mysihyrinymyrykynaha batu zikaha. Amy ty motsasokonaha ana humo hi batu sihyrinymyry. Batu wabyziuhu zikaha iwatsahi batu sihyrinymyry. Motsasokonahaze:

– Katsaktsa myhyrinymyrētsa – asaktsa mybarapetu mykaranaha, iwatsahi waby waby byitaha.

⁸ Deus harere ana hi Moises ziwatahaka tisapyrēna my. Ana humo hi myhyrinymyrētsa. Ana humo kino mytsaty tsimaha zeka wasani tsimaha. Ana humo hi hyỹ tsimaha zeka wasani tsimaha.

⁹ Iwahatu Deus harere ty Moises pe niy. Astatu Moises iharere ziwatahaka. Kytsa simysapybyitsa mykaranaha asa bo hi ziwatahaka. Kytsa batu simysapy asa bo hi ziwatahaka. Kytsa batu wasani mykaranaha asa bo hi ziwatahaka. Taparaka Deus harere ty sibo nyny niy. Kytsa iharere humo batu siakparawy. Kytsa mypehatsa harere bo batu yhỹ niaha. Kytsa Deus humo batu sispirikpo, asaktsa simysapybyitsa nikaranaha. Asahi tahazotsa nasibakanaha, ustsas kytsa kino niwatihi nasibakanaha iwatahi sibo ziwatahaka. Taparaka Moises Deus harere ziwatahaka.

¹⁰ Kytsa ustsas okeza nasihuahuakanaha, wytykyryk kino niwatihi asizahi tahawaktykyryk pytsa batu iksa zuba zikaha. Kytsa naharapewowokanaha. Asahi jabyitsa nasiaksekenaha. Kytsa okyrysaro yksetsitsa sityshyryboarētsa maha. Simyspihikbatanikitsa. Siharerewabymybarētsa bo imysapybyitsa mykaranaha iwa asa kino zuba Deus harere ziwatahaka, ana humo hi hỹ maha zeka tahamysapybyi pimoewynaha.

¹¹ Deus kape niy:

– Wasania ty tytsasokta! niy. Nanabyitaba kaharere tytsaso niy. Anaharere zuba motsasoko. Ana pe wasani ty my. Deus imysapyrēnikita, ata zuba wasani mykara – niy.

Hawa Deus Pauro zipokzitsiki.

¹² Kiristu Sesus mypehatsa kape niy:

– O ikia zawatawy iwaze tsimysapyrēta tsimozik. Iwaze nanabyitaba kasoho wasani tsimytsasoko iwa katsyhyryze tarabajatykta tsipiktsumuēhī – niy.

Kyze Sesus tazikwy ty kabo nyny niy iwahatu isoho wasani motsasoko. Atahi kahumo tsimypokzitsiukrēta iwatahi kakurēta.

¹³ Taparaka ihumo batu kakparawy. Sesus tuktsa ziknasisukyryky, Sesus kino batu kakparawy. Deus batu kanyhy. Kaspirikpobyita hi batu kahyrinymyry. Atahi iwatahu mozikpokzitsiki.

¹⁴ Iwaze mypehatsa uta kahumo tsimypokzitsiarēta. Ihumo kaspirikporēta ikyzik. Abaka ustsas kytsa humo kamypokzitsiarēta ana humo hi zikyrinymyryky. Kiristu Sesus tuk tsinapykyryknahaze iwa tsimyzurukunaha.

¹⁵ Katsa hi:

– Sesus Kiristu mybarawy bo inasik. Kytsa simysapybyiri humo izumu. Zumuze kytsa asahi tahamysapybyiri pimoewynahaze asa kino Deus bo mysioktyhyryk nikara – iwa tsimytsasokonaha. Wasi my. Utakta kamysapybyita tu ikykara Deus Sesus humo zikyokzohik niy.

¹⁶ Sesus Kiristu kahumo tsimypokzitsiarēta. Mahani ziksininitsihikik. Iwatahi kahumo batu iakyri. Uta ihumo kaspirikporēta ana humo hi zikperyky. Zikperyky zeka ustsas bo niwatihi mysiperyky. Utakta kamysapybyita ikykara kahumo ziperyky iwaze ustsas bo niwatihi taperyky. Deus ustsas pe:

– Pauro imysapybyita ziknakara. Utakta batu pimiyiwy kasopyk. Iwatahi mozipokzitsiki – niy. Aba kytsa Sesus humo batu sispirikpo kahumo Deus harere bo hỹ maha. Hawa Deus kahumo isopyk asahi Sesus humo sispirikporētsa h̃y. Deus tuk mynapykyryknaha niwatihi. Mytuk ibaze mynapykyryknaha.

¹⁷ Iwaze Deus bo tsimypamykysokonahaktsa!

– O Deus ikia zuba tsamysapyrēta h̃y. Aharere pykyhytuty tsiwabyziunaha. Tubabatu ikia taparaktas pehatsa tsiky. Abaka katsa mypehatsa tsimozik. Mytsekokatsa pehatsa tsimozik niwatihi. Iki zuba awahi koikny baktatu. Katsa abo ba zikozonaha. Iki zuba awahi tsimynapykyryk batu

aty tohi awata. Iwatsahi katsa abo ikia zuba abazubata tsimy, bjoikpe eze mybarawy eze kino niwatihi abazubata tsimy, ikia zuba wasani tsimykara – tsimaha.

Iwa tsimypamykysokonaha.

¹⁸ Iwaze Timoteo ikia katse wata. Iwatahi pahyrinomyry. Tubabatu Deus sohokotsitsa abo nitsasokonaha, siharere bo hi mytsatyzotyкта! Siharere bo mytsatyziu tsimy zeka Sesus humo tarabajaziu tsimykara. Kytsa aharere humo tahamysapybyri pimoewykynaha. Iwahatu ikia sodadu wata ikia hi amy ty isapybara tsipimoewyky. Hawa sodadu sisukyrytsitsa bo niwatorokonaha ikia isapybara humo batu yhȳ tsimykara.

¹⁹ Deus harere bo hȳ tsimykara. Batu pyk ziky. Amy ty wasani my tsihyrinomyrēta. Atsatu tsimykara. Utsa kytsa usa wasaniha humo batu sihyrinomyry. Iwatsahi wasani ha humo batu yhȳ zikaha. Asahi Sesus humo batu sispirikpo. Tsaraha pihik bo moharazuk ezekta hyritywata. Sesus humo sispirikpobyitsa tu iwatsahi iharere humo batu ma zikaha. Hawa tsaraha niharazuk asahi Sesus humo sispirikpobyitsa ziknakanaha.

²⁰ Situk tu makutsa petoktsa maha. Estuba Himeneu inarokota usta Aresādere inarokota. Iwaze ispe iky:

– Ikiahatsa Satanas harere bo yhȳ tsimykanaha. Atahi za ahapehatsa mozik – iky. Iwa nitsasoko. Deus soho zisapybyrikinaha, kaharere humo mopyk tsihiknaha iwatahi iksibetsakak. Deus soho humo batu zikaha iwatahi iksibetsakak tozeka ja aibani Sesus humo mospirikpozonaha iwa mytsaty iky.

2

Hawa Deus bo tsimypamykysokonaha ana soho hi piwatahaka.

¹ Tapara ahape my:

– Deus bo typamykysonahaktsa! Myzubaha tsyhyryze Deus bo typamykysonahaktsa.

“O Deus tsysitsumuēhīkī tsimaha. O myzo sihumo tsimypokzitsiarēta tsimaha. Ikia zuba wasani tsimykara” tsimykanaha – iky.

Iwa ibo tsimypamykysonaha. Kytsa tsyhyryze Deus bo tyzapykykynahaktsa! Amy tisapyrēna anahi itsyhyryze tsimyzapykykynaha.

² Mypehatsitsa tsyhyryze Deus bo typamykysonahaktsa. Sihudikhudikwy pehakatsitsa tsizubarēna tsyhyryze Deus bo typamykysonahaktsa. Iwa hi:

– O Deus mypehatsa myhumo simypokzitsiukrētsa h̄y. Iwatsahi mykurētsa tsimaha. Ba zikahapebetsaknaha kyzekta tsimykanaha. Katsa mykurētsa zuba tsimoziknaha. Deus harere bo zuba hȳ tsimykanaha iwaze wasani tsimykanaha – tsimaha.

³ Katsa tsimyharape pokzitsikinaha zeka Deus tsakurēta. Deus mymyoktyrykta my takino myhumo tsakurēta. Utsa kytsa kino niwatihi myharape pokzitsikinahaze tsakurēta h̄y.

⁴ Myzubaha Deus humo sispirikporētsa moziknaha ana hi mozihikik. Iharere wasani my kytsa iharere piwabynaha anahi mozihikik. Iharere bo hȳ maha zeka sinini ykarawy bo ba zikmypeha. Iwahatu myzubaha iharere bo hȳ maha mozihikik.

⁵ Iwatahi Deus babata ikaha tahi zuba. Kytsa simysapybyritsa humo takyriki. Iwaze Sesus Kiristu mytsapuhyripyrywyta mybarawy bo inasikze maku niyzik. Nihyrikosokda kytsa zibezena. Nihyrikosokdaze kytsa simysapybyitsa nikaranaha iwatsatu nisiokzo. Atahi mysapyzekenihyrikosokda ata zuba myhumo.

⁶ Iwatahi Sesus humo Deus ba ziktakyri. Iwa Sesus humo Deus kytsa ty batu ziktakyriwy. Deus wasaniha nitsaso tsihikikze Sesus ni-hyrikosokda naha soho nitsasoko. Sesus nihyrikosokda ana humo hi kytsa sihyrinymyrëtsa. Deus bo mysioқтыhyryk hỹ ana humo kino sihyrinymyrëtsa.

⁷ Deus zikpeha kakzohota mozik. Iharere motsasoko ana humo hi zik-watawy. Kytsa Sudeutsabyitsa mysihyrinymyryky sibo zikykhohik. Wasi my. Kamyspihikbatabyita mykara. Ata hi:

– “Ikiahatsa Sesus humo ahaspirikporëtsa tsimoziknaha” ispe tsimy iwa kape niy: “Iharere bo hỹ tahaktsa kytsa” ispe tsimy: “Iwa kape” – niy. Iwa.

⁸ Iwaze abo motsasoko. Kytsa hudikhudikwy eze tu Deus bo typamykyson-ahaktsa. Izumubanahaze Deus bo mopamykysokonaha. Simysapyrëtsa tahatsipatsa ty jobo bazuzu sisopyk iwa Deus bo mopamykysokonaha. Sibetsakokbyitsa Deus bo mopamykysokonaha. Siakyriukbyitsa kino niwatihi mopamykysokonaha. Izumubanahaze Deus bo mopamykysokonaha.

Wytykyryk Sesus humo sispirikporëza.

⁹ Wytykyryk kino niwatihi. Sesus humo sispirikporëza. Tahasuk ty korobyk mahaze sisapyrëza moziknaha. Sisuk wasani my zeka kytsa batu sibo iktsaziu zikaha. Siharadi meky watu batu mykaranaha iwatsahi kytsa sibo batu iktsaziu zikaha. Sinaha tisapyrëna. Sisuk tsipokzitsarëna ty batu korobyk zikaha. Sisuk tsiziurëna korobyk maha. Iwatsahi kytsa sihumo batu iktsaziu zikaha. Wytykyryk tahasuk soho bo batu mytsaty zikaha. Hawa sizubarëtsa mysipokzitsinaha mytsaty maha. Ana bo hi mytsaty maha.

¹⁰ Wytykyryk motsasokonaha:

– O katsa za Sesus humo mospirikpoza tsimaha – maha. Asizahi pipokzit-sikinaha zeka kytsa sisoho:

– O siza hi simysapyrëza hỹ – maha.

¹¹ Sesus tuktsa izumubanahaze wytykyryk tahabyri mopykyryknaha. Ahatuk ka soso byitaha:

– O katsaza myhyrinymybyiza iwazahi waby zuba – mykaranaha. Iwa soso byitaha. Asiza mypehatsa harere pinymyrykynaha.

¹² Kytsa bo amy batu imysapybara ty ka istry spirikpo spirikpo byitaha! my. Iwa wytykyryk pe my. Asiza kytsa ba ziksipehanaha. Asiza pe my – Ikiahaka ahabyri ahakso byitaha – my.

¹³ Iwa asiza bo motsasoko. Tapara Deus Adão nizukni. Iwaze Ewa nizukni.

¹⁴ Hyrikoso sapybara pehatsa Satanas inarokota Adão bo mybarapetu niy. Wytyk zuba iharere humo yhỹ niy. Barapetu niyze atatsa iharere humo yhỹ niy. Atatsa hi tapara Deus harere bo batu ma niy.

¹⁵ Iwazahi simyitsapyrëza. Ibykyhy mopurukze ky tsapyriwa. Siza Sesus humo mospirikponaha zeka tahahyrytsa tuk sakurëza moziknaha. Utsa humo mysipokzitsikinaha zeka sakurëza moziknaha. Tahasuk ty korobyk maha zeka tisapyrëna mozurukunaha Deus asiza mysioқтыhyryk. Tahamys-apybyri pimoewynaha zeka Deus mysioқko. Iwa hỹ.

3

Sesus tuktsa sispirikpokonahatsitsa soho motsasoko.

¹ Myspirikpowyhani baba wabytoktotaha! – Aty Sesus tuktsa pehakatsa zispirikpokota mozihihik zeka wasani my – my.

² Iwaze atakta bazimyi. Wasani mozuruku. Iwa zeka atakta estuba zubatatsa piakse. Batu paikpa mytsaty ziky. Utsa harere piwabyziyu. Kytsa iwahoro bo pomonahaze:

– O kawahoro bo pakutyny. Awanu tyhãity – my. Mypehakatsa Deus harere ty kytsa mysihyrinymyryziuku.

³ Kytsa opuwy tsõsĩ ba ziku. Kytsa ba ziksike. Ba ziktasakpare. Atahi kytsa humo tsimypokzitsiukrêta. Utsa kytsa okyrysaro ba ziaксе.

⁴ Namyspirikpokotsa tahahyrytsa mysipokzitsiki. Tahyrytsa iharere bo ma mykaranaha. Tahyrytsa simysapyrêtsa maha.

⁵ Tahyrytsa humo imypokzitsi byizeka iwaze Sesus tuktsa humo kino niwatihi batu imypokzitsiuk. Tahyrytsa humo imypokzitsi byizeka Sesus tuktsa mozumubanhaze ba ziksipokzitsi batu ziky.

⁶ Maku Sesus humo abaka iharere bo yhỹ mykara batu myspirikpokotsa zikyzyk. Ata kino mypehakatsa Sesus tuktsa tuk batu ziwatawy. Mypehakatsa Sesus tuktsa tuk tsiwatawy zeka batu imysapy my. Atahi mytsaty mykara:

– O uta mypehakatsa my. Kytsa kaharere ty mysipirikpo uta zuba wasani my zeka – my. Iwa mytsaty mykara. Tubabatu hyrikoso sapybara pehatsa Satanas inarokota atsatu mytsaty nikara.

– O uta zuba wasani my – nikara. Iwatahi Deus ipe niy:

– Batu ba. Ikiya batu amysapy – niy. Iwaze Sesus humo ispirikpoziubyita mozik zeka Satanas wata mozik. Deus tihi – Ikiya batu amysapy tsimy – niy.

⁷ Maku Sesus tuktsa namyspirikpota mozik zeka kytsa sizubarêtsa isoho humo piziukunaha. Asahi Sesus humo batu sispirikpo mykaranaha:

– O atahi tsimysapyrêta iharere tsiwabykynaha – maha. Kytsa sizubarêtsa iharere humo siakparawy byizeka tisukatsihikrêta mozik. Tisukatsihikrêta zeka jokaraharêta hyrity wata. Irara tawerykywy bo mynatsukze ba zikzoihik iakubyri mozumuze ta wata kytsa sizubarêtsa sispirikponahatsa soho zisapybyrikinahaze siakubyri mozumu niwatihi. Satanas werekywy hyrity wata bo mynatsuk. Iwatahi kytsa isoho tihi:

– O atahi tsimysapyrêta. Wasani my – maha. Iwaze isukatsihikbyita mozik.

Sesus tuktsa tsumuêhĩtsitsa soho motsasoko.

⁸ Abaka Sesus tuktsa tsumuêhĩtsitsa soho piwatahaka. Asahi sitsumuêhĩtsitsa namyspirikpokotsa watsa mozurukunaha. Kytsa sisoho:

– O asaktsa simysapyrêtsa – maha. Sitsumuêhĩtsitsa harere wasani mykaranaha. Ba zik mospihikbatanaha. Kytsa opuwy tsõsĩ ba ziku. Utsa kytsa namy ba zikzihiknaha. Okyrysaro ba zikzihĩtsa naha.

⁹ Taparaka kytsa Deus harere humo ka batu sihyrinymyry. Abaka sihyrinymyrêtsa. Deus sibo taharere nitsasoziuku, sitsumuêhĩtsitsa harere humo sispirikporêtsa. Iwatsahi wasani mykaranaha mospirikpokonaha.

¹⁰ Tsikumubanhaze sitsumuêhĩtsitsa soho humo tsimypamykysokonaha. Ikiyahatsa hi:

– O atahi wasani mozuruku ja tsimysapyrêta ja – tsimaha. Iwa tsimypamykysokonaha. Kytsa isoho humo yhỹ maha zeka tsimysapyrêta hỹ. Iwaze sitsumuêhĩtsa mozik.

¹¹ Sitsumuêhĩtsitsa okeza kino niwatihi simysapyrêza maha. Ba zikaha pisohonaha. Ba zikaha pimijanaha. Batu paikpa mytsaty zikykaranaha. Wasani mykaranaha. Wasape ha zuba motsasokonaha.

¹² Sitsumuêhĩtsitsa tasukza zeka wasani maha. Estuba zuba tatsa piakse, iokeza petokuruk zeka batu imysapy my. Maku petok okeza zeka ba ziwatawynaha. Sitsumuêhĩtsitsa hyrytsa siharere bo yhỹ mykaranaha. Iwahoro ezektsa sisopyk wasani mykara.

¹³ Sesus tuktsa nasitsumuēhīkīnaha zeka kytsa sisopyk tisapyrēna maha. Deus wasania ty ustsa kytsa bo motsasokonaha. Batu sisikpyby. Sisikpyby-byitsa Deus wasania ty Sesus soho motsasokonaha.

Taparaka batu myhyrinomyry abaka myhyrinomyrētsa.

¹⁴ Aba Timoteo abo piwatahaka. Iwaze zuba abo mynakozore tsihikik.

¹⁵ Hawa my zeka aibani zuba abo mynakozore iwatahi papeu abo piwatahaka. Anapapeu humo iwatahaha tsipinyze hawa tsimyzuruku ana humo hi ahahyrinomyrētsa tsimoziknaha. Deus tyryktsa mozumubanhaze Deus wahoro hyrity wata maha. Wahoro harakurukwy wata tyrikto niy ba ziknatsihyrikpetok. Iwa Deus tyryktsa iharere bo hȳ mykaranaha iharakurukwy watsa sipunihikrētsa moziknaha. Deus harere bo hȳ mykaranahaze ituk tahawahi mynapykyryknaha. Batu simyiwu sipunihikrētsa moziknaha.

¹⁶ Kytsa Sesus humo batu sispirikpo. Hawa katsaktsa Sesus humo myspirikporētsa ana humo hi batu sihyrinomyry. Sihyrinomyrybyitsa tu Deus wasaniha ahabara ty sihumo tsihokdaharēna. Abaka batu. Abaka katsa myhyrinomyrētsa. Abaka Sesus Kiristu sibo motsasoko. Sesus maku wata niyzik. Deus hyrikoso isoho hi:

– O ikia wasani my. Ikia zuba tsamysapyrēta – my.

Atakta bijoikpe iknyktsitsa Deus tsumuēhītsitsa ibo iktsa nikaranaha. Sesus tuktsa ustsa bo mopamykysokonaha, kytsa nanabyitaba sizubarētsa bo mopamykysoikiknaha.

Sizubarētsa ihumo sispirikporētsa niyziknaha.

Deus ity zihyrikpowyze ispitu niyzikzo

bijoikpe bo nido.

Deus tuk mynadyhyky. Iwa h̄y.

4

Simyhyrinomyryziubyikitsa.

¹ Aiba tohi kytsa hyrikoso sapybara hyritywatsa harere bo hȳ mykaranaha. Asa soho hi ahabo motsasokonaha. Deus hyrikoso mybo botu nitsaso. Kytsa hyrikoso sapybara harere piwabykynaha, Deus hyrikoso mybo mypubara ty nipamykysoko. Iwahi:

– Bykyze wastuhu kytsa Sesus humo batu sispirikpo. Sesus zerekeknaha. Sesus soho humo nispiriktsokdanaha. Hyrikoso sapybara humo Sesus humo nispiriktsokdanaha. Hyrikoso sapybara harere bo zuba hȳ mykaranaha. Asahi nispiphikbatakanahatsa harere humo yh̄ maha. Hyrikoso sapybara meky watu siharere ana humo hi mysihyrinomyrykynaha – niy.

² Simyspiphikbatanikitsa. Hyrikoso sapybara hyritywatsa harere bo yh̄ mykaranaha. Asahi hyrikoso sapybara situk tsahi nispiphikbatakanaha. Nisimiywykynaha. Wasani ja mykaranaha batu sihyrinomyry. Batu imysapy ja batu sihyrinomyry. Paikpa mytsaty nikaranaha. Asahi siakbatsa watsa iwatsahi batu harere zikaha. Sihyritywatsa asahi batu tahapetu sisopyk. Iwatsahi wasani ja mykara batu sihyrinomyry, siakbatsa watsa.

³ Asahi mype nikaranaha:

– O ikia asukza byizeka wasani mykaranaha: – mybarapetu sisopyk. Mydisahawy soho humo niwatihi mype maha:

– O ikiakta siraratsani ty hauk hauk byity! – mybarapetu mykaranaha. Deus hi siraratsa ty mybo nyny niy. Myzohotsa ty nyny niy. Iwatahi siraratsa sizubarētsa myhumo wasani my. Siraratsa sizubarētsa tsimynasiborokonaha zeka wasani my. Ikiatsa Sesus humo ahaspirikporētsa iwatsahi siraratsa sizubarētsa tsimynasiborokonaha. Ikiatsa hi:

– O Deus ikia tsamysapyrêta ikia zuba mydisahawy ty mybo nyny tsiky – tsimykaranaha.

Iwaze mydisahawy ty haukbaiktaha myzohotsa kino niwatihi tahaborobaiknaha.

⁴ Deus suknihi ka wasaniha zuba. Iwatsahi nanabyity tsinamydisa-hakanaha. Iwatsahi mydisahabyitu Deus bo tsimypamykysonaha:

– O myzo ikia hi mydisahawy ty mybo nyny tsimykara. Ikia zuba tsamys-apyrêta iwatsahi mykurêtsa – tsimaha.

⁵ Deus hi:

– Nanabyi nizukni wasani my. Kytsa bo wasani my – my. Mydisahawy ty tsimymydisahakanaha zeka Deus bo tsimypamykysokonaha:

– Ikia zuba tsamysapyrêta – ipe tsimaha. Iwatsahi mekywaha tu tsimymy-disahakanaha.

Sesus Kiristu tsumuêhîtsa imysapyrênikita.

⁶ – O Timoteo hawa abo motsasokonaha ikia kino mytukytsa bo tytsaso. Hawa Sesus Kiristu tsumuêhîtsa tisapyrêna mykara. Atsatu tsimytsasoko – mykara. Iwaze tu ikia Sesus Kiristu tsumuêhîtsa babata tsimozik. Botu Sesus harere tsiwaby. Ana harere wasani my. Atsatu hyÿ tsimykara. Ikia kyry tsibik wata. Atahi taopuwy pezukukze taypyk. Ikia Deus harere bo hyÿ tsimykara ze tsahyrinymyrêta tsimozik. Kyry tsibik taopuwy humo tsakurêta mozik. Deus harere niwatihi zatsumuêhîkî. Mypowy waha. Ikia Deus harere bo hyÿ tsiky kara. Abaka niwatihi iharere bo hyÿ tsimykara. Iwa tsimyzuruku.

⁷ Kytsa siakbatsa harere soho ty motsasokonaha zeka waby waby byitaha. Anahi batu iakparawy my. Ana harere bo yhyÿ tsimy zeka Sesus harere humo ba hÿ ziky. Iwatahi ana humo hi batu awabyhy. Ikia hi Deus hyrikoso iaksoho bo hyÿ tsimykara. Iwatatu Sesus humo tsimyspirikpotohi.

⁸ Ahanury humo ahapaikrêtsa zeka wasani my. Tsimyzibiyituhukutu zeka Deus harere humo hyÿ tsimykaranaha zeka wasani hÿ tsimy. Iharere bo hyÿ tsimykaranaha zeka wasani my iwa zeka tsimyzurukunaha. Bykyze tsimykobabanaha zeka Deus tuk mywahi tsimynapykyryknaha. Ituk tsimynapykyryknaha myspituzo tsimaha.

⁹ Anaka iharere wasani hÿ. Ana humo hi tspirikporêta hÿ.

¹⁰ Iwatsahi tarabajaze tsimykaranaha. Katsaktsa Sesus humo myspirikporêtsa. Sesus tawahi ispituzo atahumo kino myspirikporêtsa. Katsaktsa itsyhyryze tatsumuêhîkî tsimykaranaha iwatsahi usts a kytsa Sesus humo sispirikporêtsa. Sesus humo mysipirikpokonaha iwatsahi tahatsumuêhîkînaha tsimykaranaha. Deus kytsa sizubarêtsa mysioktyhyryk.

¹¹ O Timoteo ana humo kino kytsa tsihyrinymyry. Ana kino kytsa tsipehaka.

¹² Timoteo ikiakta apykyhyzytykta pykyhytuty. Usts a kytsa asoho ty batu tyso:

– O Timoteo mykyryburukta wata iharere ty batu tywaby – maha.

Iwa abo batu tyso. Ikia hi wasani tsimyzuruku. Kytsa Sesus humo sispirikporêtsa asahi tysipokzitsi. Usts a kytsa kino niwatihi tysipokzitsiki. Tsimytsasoziuku. Deus humo aspirikporêta hÿ. Amysapybyi ty tsimykara zeka tsimoewyhyk. Ikia wasani tsimyzuruku iwaze tu usts a Sesus tuktsa awatsa mozurukunaha. Amy ty tsimykara siakparawy iwatsahi wasani mykaranaha niwatihi pasopykzukunaha.

¹³ Tspikperykyze abo mozumu papeu tsipiny. Papeu Deus harere my. Ana papeu humo iwatahaha tsipinykyze opykani tsimytsasoko iwaze hi Deus

harere kytsa piwabynaha. Asahi mozumubannahaze papeu humo iwatahaha tsipinyze. Deus harere tsimytsasoko. Sesus harere ty tsihyrinymyrykykta:

¹⁴ Jatuba tu Deus tazikwy ty abo nyny niy. Tarabaja humo tazikwy ty abo nyny niy. Deus sohokotsa ibo nitsasokonahaze iwa zuruze Deus tazikwy ty abo nyny niy. Sesus tuktsa nasispirikponahatsa tahatsyhyrypetsa ty aharek humo paik paik nikaranahaze, iwaze Deus tazikwy atuk nizapywy. Nasispirikponahatsa sopyk humo tahatsyhyrypetsa ty aharek humo paik paik nikaranaha. Iwa zuruze mytsatyzo tsimy. Iwa kytsa ahasopyk Deus hyrikoso humo nikaranaha. Abaka Deus zikwy atuk mynapykyryk.

¹⁵ Hawa motsasoko mytsatyziu tsimy! Iwa tsimyzuruku zeka kytsa asoho tihi:

– O Sesus harere bo hyĩ mykara. Pykyhytu iharere bo hyĩ mykara – maha. Iwa asoho ty mykaranaha.

¹⁶ Ikia tu pykyhytuty tsimykara. Hawa tsimysihyrinymyry pykyhytu tsimy. Iwa tsimysihyrinymyryky. Wasani tsimyzeka tsamysapyrēta tsimozik. Kytsa asahi pawabykynaha simysapyrētsa moziknaha. Iwa isopyk zeka ikia Deus tuk awahi tynapykyryk. Kytsa asahi pawabykynaha asa kino niwatihi Deus tuk tahawahi mynapykyryknaha hĩ.

5

Hawa Sesus tuktsa ty tsimaha.

¹ Maku iktsaikbata imysapybyita mykara zeka betsak betsakbyity. Ituk tsimypamykysoko zuba hawa imysapybyita mykara ana humo hi tsimypamykysoko. Azo wata humo tsinakara nahawa tihi. Kytsa siypykyzytyktsa bo tsimypamykysokoze atukytsa babatsa humo tsinakara naha wa.

² Wytykyryk sistsaikbaza simysapybyiza mykaranaha zeka asiza bo tsimypamykysokoze ajeza humo tsinakara naha wa tihi.

Sipyitsabyiza bo tsimypamykysoko zeka atukykyry babaza humo tsinakara naha wa tihi. Wytykyryk tsimypamykysokoze batu mytsaty ziky:

– O uta piaksetsihikik – tsimy. Iwa batu mytsaty tsimy. Ba ziksimyi.

³ Aba haramukukaka soho motsasoko. Hawa asiza tysitsumuēhĩnaha motsasoko. Haramukukaka babaza.

⁴ Haramukukaka sihyrytsa sispitu zeka iwatsahi tahajeza bo mysisakihikynaha! Asahi tahajeza humo simypokzitsiukrētsa. Atatsa istiokatsa kino ipokzitsitsita moziknaha. Kytsa tatukytsa hi mysipokzitsikinaha wasani my. Deus niy:

– O kytsa tatukytsa humo mysipokzitsikinaha zeka wasani – niy: Tubabatu asahi tahahyrytsa nisipokzitsikinaha. Abaka sihyrytsa kino tahajeza mysipokzitsikinaha. Sihyrytsa tahajeza disahawy ty nyny mykaranaha. Isuk humo niwatihi ibo nyny mykaranaha!

⁵ Haramukukaka asiza zubaza atatsa Deus bo mopamykysoikik. Atatsa ustsatsyhyryze Deus bo mopamykysoikik. Pibytuhukutu atatsa Deus bo myzapykyikik. Unata eze kino niwatihi atatsa Deus bo mopamykysoko. Atatsa Deus humo tispirikporētatsa. Kytsa atatsa bo disahawy ty nynyntaha! Atatsa bo isuk ty nynyntaha tsimaha.

⁶ Haramukukaka atatsa zuba mytsaty mykara zeka batu tytsumuēhĩ. Asiza hi nawakyriki naha zuba ana humo hi mytsaty mykaranaha. Asizahi sispituze niakbakanahatsa waza batu wasani mykaranaha. Niakbakanahatsa ustsatsa batu isty tsumuēhĩ asiza ustsatsa batu isty tsumuēhĩ iwazahi niakbakanahatsa waza. Mymysapybyikinaha. Iwatsahi batu isty tsumuēhĩ.

⁷ Amy abo motsasoko atsatu sibo tsimytsasoko. Haramukukaka situkytsa bo. Iwatsahi kytsa sizubarētsa sisoho hi:

– O asiza siza wasani mokurunaha – maha.

⁸ Katsakta mytukytsa isty pokzitsiu byizeka batu mysapy tsimaha. Iwa tsimukurunaha zeka katsa Sesus humo batu mospirikpo. Katsa Sesus taereke iwata mytukytsa mysopyk zeka. Kytsa Sesus humo batu sispirikpo asahi situkytsa mysipokzitsikinaha. Iwatsahi katsakta mytukytsa humo mypokzitsi byizeka katsa tu tsimysapybyikinaha.

⁹ Haramukukaka sizubarēza sinaro ty papeu humo batu tywataha. Sitsaikbaza zuba papeu humo tsipiwatahaka, asizahi humo Sesus tuktsa mysipokzitsikinaha. Iwatsahi sinaro ty papeu humo tsipiwatahaka. Sitsaikbaza sesēta anos zuba papeu humo tsipiwatahaka. Atatsa ibarikta estuba zubata zeka papeu humo tsipiwatahaka.

¹⁰ Utsa kytsa sisoho mopamykysokonaha:

– O atatsa tsimysapyrētatsa. Nimysapywyky. Ihyrytsa kino iharere bo hỹ mykaranaha. Batu pimyiki. Kytsa iwahoro zumunahaze atatsahi: “Pakutyny niy. Tsikadisaha my papyrytsapik” my iwa mykara. Sudeutsa sopyk ty kytsa mysipyrytsapikik. Zikbyituhukutu Deus tyryktsa mysitsumuēhĩkĩ, asahi mozurukunahaze tsihokdaharēnaze atatsa kytsa mysitsumuēhĩ. Utsa kytsa tsyhyryze mymysapywyky – maha. Iwa mozuruku. Atatsa kino papeu humo tsipiwatahaka, atatsa haramukuka babatatsa hỹ.

¹¹ Sitsaikbabyiza tu niharamukukakanahaza papeu humo tywataha wataha byitaha. Asiza siza mekta maku tuk. Kiristu tsyhyryze batu tarabaja zikaha. Maku mektatu piakse mykaranaha bo mytsaty mykara.

¹² Atatsa hi nitsasoko zeka:

– O batu kazeky niy. Kiristu tsyhyryze zuba tarabaja mykara – niy. Bykyze maku atatsa ziakehyryk. Iwaze kytsa atatsa soho:

– Atatsa nitsasoko “Kiristu tsyhyryze zuba tarabaja my niy.” Aba maku atatsa ziakehyryk. Kiristu tsyhyryze batu tarabaja nikara maha. Taharere ty batu hỹ niy – maha.

¹³ Haramukukaka sistsaikbabyiza mowakyrikiknaha zuba. Nipamykysoikiknaha zuba. Siharerewabymybarēza maha. Batu sipasaratsihik. Wahoro taba zuba paikpa mynapamykysoikiknaha. Imysapybara ty zuba mynatsasoikiknaha.

¹⁴ Iwazahi tahapytsazonaha maha. Sitsaikbabyiza tu tahapytsazonaha zeka jokboha mytsaty mykaranaha. Tahabykyhynahaze. Tahabykyhytsa mysipupuruknahaze mysipokzitsinaha. Iwaze kytsa asahi Sesus tuktsa batu siakparawy sisoho batu siharerewabymybara. Mysukyrytsitsa haramukukaka soho batu siharerewabymybara.

¹⁵ Wastuhu haramukukaka botu Sesus harere bo batu hỹ niaha. Ibaze zerekiknaha. Abaka Satanas harere bo yhỹ maha. Kaharere haramukuka soho tsipiwaby.

¹⁶ Iwaze wytykyryk Sesus tukykyryk iwa mozurukunaha. Atatsa itukytsa haramukuka zeka, atatsa kino haramukuka humo tsimypokzitsiarētatsa. Sesus tuktsa asahi mozumubannahaze atatsa humo batu ipokzitsi. Iwatsahi haramukukaka hi asizazubahaza mysipokzitsikinaha. Sesus tuktsa haramukukaka sibo zuba mysitsumuēhĩkĩnaha. Iwazahi haramukukaka sinamybyikiza tysitsumuēhĩnaha.

¹⁷ – Mymyspirikpokotsa Sesus tuktsa tysitsumuēhĩziukunahaktsa! kytsa. Ahanamy ty sibo nynytahaktsa, ahadisahawy ty sibo nynytahaktsa! Sesus tuktsa mysitsumuēhĩziukunaha zeka nynytohitaha! Asahi Sesus harere ty mymyhyrinymyrykynaha zeka asa kino ahanamy ty sibo nynytohitaha. Siharere tsiwabyziukunaha – my.

¹⁸ Iwa ikiahatsa ahasopyk. Deus harere botu ziwatahaka. Moises Deus harere botu ziwatahaka:

– Ahararatsa ahatsyhyryze tarabaja mykaranaha zeka isty sakiwara sakiwara byitaha iwatsahi tadisahakanaha. Ahararatsa ty pahatsumuēhīnaha zeka mytadisahanaha – my. Usta papeu Deus harere tihi:

– Aty atsyhyryze pahatsumuēhīkī anamy ty ibo nynytykta! Wasani my. Iwatsahi nasipirikponahatsa Sesus tuktsa ahanamy ty sibo nynytahtaktsa. Sesus tuktsa sizubarētsa tahanamy ty nasipirikponahatsa bo nynytahtaktsa! – tsimaha.

¹⁹ – Estuba maku Sesus tuktsa myspirikpokotsa soho tsiharerewabymy-barēta zeka ba ziwaby. Atahi:

“O myspirikpokotsa imysapybyita nikara” my. Ana kino ba ziwaby. Kytsa petoktsa myspirikpokotsa soho motsasokonaha zeka:

“O imysapybyita nikara” maha. Wabytahaktsa. Kytsa harakykbyihi myspirikpokotsa soho motsasokonaha zeka:

“O myspirikpokotsa imysapybyita nikara” maha. Asa kino wabyziutaha tsimy – my.

²⁰ Myspirikpokotsa Sesus tuktsa pisapybyi zeka myzubaha okzetu tsibetsakaknaha. Imysapy byizeka batu pykzekeny iwaze kytsa sizubarētsa okze tu tsibetsakik. Ibo tsipibetsak zeka ustsya myspirikpokotsa sipybyrētsa maha:

– O katsa kino niwatihi tabetsakiknaha – maha. Iwatsahi sipybyrētsa. Imysapybyitsa mykaranaha humo sisikpybyrētsa.

²¹ O Timoteo kaharere bo hyĩ tykta! Ana hi papehaka atsa tyty tsimy. Deus kaharere piwabyky Sesus Kiristu niwatihi kaharere piwabyky. Bijoikpe iknyktsa asahi Deus nisiwatawyky kaharere piwabykynaha, sizubarētsa kaharere piwabykynaha ape ikykara naha ty piwabykynaha. Iwatahi myspirikpokotsa atsawatu asopyk. Ba ziktsaso:

– O atakta maku kaharereziuwu kapokzitsikitsa ihumo batu kasakpare. Usta maku imysapy byita zeka tsipibetsak! – my.

²² Maku myspirikpokotsa mozike atsyhyrypetsa ty iharek humo paik tsimy. Iwa tsimy mysopyk ty zuba. Pykyhytuty. Ikiya ahyrizik watuty atsyhyrypetsa ty maku harek humo paik tsimy. Ustsya kytsa simysapybyitsa mykaranaha zeka ikia batu. Ba situk zikasapy. Atazuba mozik zeka bazimyi. Tsimysapyrēta tsimozik.

²³ O Timoteo pihik baba ty zuba ba tsō tsimy. Ahakuki tsapyri myzibiyituhukutu iwatahi duabohotsa tsik tsipiku. Myhakoki hwi waha duabohotsa tsik ty tsō tsimyze iwaze ahakuki jokboha mozik.

²⁴ Wastuhu kytsa sizubarētsa okzeka pisapybyikinaha. Kytsa sizubarētsa simysapybyitsa nikaranaha ana soho humo sihyrinomyrētsa. Deus mysisininiwyky ana humo hi sihyrinomyrētsa. Ustsya kytsa pisapybyikinahaze kytsa papatu mykaranaha iwaze kytsa simysapybyitsa mykaranaha soho humo batu sihyrinomyry. Aibani zuba kytsa simysapybyitsa nikaranaha soho humo sihyrinomyrētsa.

²⁵ Iwaze wastuhu kytsa sizubarētsa okzeka simysapyrētsa nikaranaha. Kytsa sizubarētsa amy tisapyrēna maha ana soho humo sihyrinomyrētsa. Ustsya kytsa simysapyrētsa mykaranahaze kytsa papatu mykaranaha. Tisapyrēna hi piokpitsikīnaha. Abaka batu aty tohi hawa simysapyrētsa mykaranaha sihyrinomyrētsa. Aibani zuba kytsa hawa tisapyrēna nikaranaha ana soho humo sihyrinomyrētsa hỹ.

6

¹ Sesus tuktsa asahi mysitsumuēhīkīnaha okyrysaro perykytsa batu sibo nyny ziky. Iwatsa tu nisitsumuēhīkīnaha zuba. Asahi maku sitsihitsa wasani sisopyk maha iwa sihumo tsimy. Iwa ihumo sisopyk zeka kytsa Sesus humo batu sispirikpo.

– O Deus harere bo wasani my – mykaranaha, ahahumo Deus harere bo wasani my mykaranaha. Myhyrinymyrywy batu amy tohi siharerewabymybara maha. Iwa sihumo tsimy.

² Wastuhu Sesus tuktsa tahatukytsa humo nisitsumuēhīkīnaha. Utsa Sesus tuktsa sihumo sitsihitsa niyziknaha. Iwatsahi batu tyso:

– O atakta Sesus tukta niwatihi. Iwatahi iharere bo batu hỹ – my. Iwa batu tyso. Ikia ispe tsimy:

– Asa bo hi tysitsumuēhīnahaktsa Sesus tukta niwatihi iwata tu tsitsumuēhīnaha. Ata maku Sesus humo tsimypokzitsiarēta iwatsahi tsitsumuēhīnaha – tsimy. Timoteo ana humo hi tsihyrinymyryky. Sesus tuktsa tsihyrinymyryky:

– Tsisapybakanahaktsa! tsimy. Iwa tsimyzurukunaha tsimy. Sesus humo tsimypokzitsiarēta iwatahi tytsumuēhīnahaktsa! – tsimy.

Iwa tsimyzurukunaha.

Sesus spirikpowy tsihyrinymyrykta.

³ Sesus Kiristu mypehaktsa iharere wasani my. Aty iharere bo hyỹ my zeka Deus hi:

– O atakta tsimysapyrēta – my. Aty tohi meky watu mysihyrynimyryky zeka Sesus harere humo batu ihyrynimyry. Iharere batu iakparawy.

⁴ – Katsa zuba myhyrynimyryrētsa tsimaha – maha. Mahani ba. Sihyrynimyrybyitsa tu sisopyk. Myharapepehakanaha zuba. Sizokdirētsa. Mopamykysoikiknaha zuba. Siharerewabymybarētsa maha. Utsa kytsa soho humo myharape ziubyikinaha. Iwazeka simytsatyharētsa moziknaha.

⁵ Kytsa tuk mopamykysoikiknaha zuba. Sesus Kiristu harere batu siakparawy. Iharere pimiyikinaha. Iwa mytsaty mykaranaha.

– Katsa Deus humo tsimyspirikponaha zeka mynamyrētsa tsimoziknaha – mytsaty ahabyitsa zikaha. Iwa tahape tu sisopyk mybarapetu mykaranaha.

⁶ Sesus tukta tsinamyrēta wata. Deus humo tsinamyrēta wata. Mynamyrētsa zeka mydikrētsa. Mynamy tsikaeni zikino mydikrētsa. Deus mytuk mynapykyk iwatsahi mykurētsa. Takino tsimysapyrēta hỹ.

⁷ Katsa tsikpupuruknahaze batu mynamykyryk. Iwa tsimyyhyrikosokdanahaze batu amy tohi ty mytuk wabehyryk zikaha. Katsa zuba Sesus mymyoktyhyryk.

⁸ Iwatsahi mykurētsa. Katsa mydisahawy mysuk iwaha humo mykurētsa.

⁹ Kytsa tihi:

– O kanamy tsizubarēna zeka kakparawy, okyrysarowaka kino niwatihi kakparawy. Kanamyrēta mozik hỹ – my. Asahi okyrysaro mysisapybyikinaha. Amo batu sapy my okyrysaro soho humo mykaranaha. Asahi siraratsa watsa maha. Sirara tsaraparēta zeka tawerykywy bo mynatsuk. Anaeze mora. Iwa maku tahi:

– O uta kanamyrēta hỹ – my ta kino okyrysaro humo amy ty imysapybyitsa mykara. Bykyze tisukatsihikrēta mozik. Sinini ykarawy bo ba zikzoizo. Hawa siraratsa tawerykywy bo ba zikzoik atahi sinini ykarawy eze ba zikzoik. Deus tuk ba ziktasapy.

¹⁰ Asahi okyrysaro humo simysapybyitsa mykaranaha. Asahi okyrysaro siakparawy iwatsahi Sesus humo batu sispirikpo. Sesus soho humo

nispiriktsokdanaha. Okyrysaro tsizubarēna ziaksekenaha. Sisukatsihikrētsa nikaranaha. Sispirikpobyitsa tu sisukatsihikrētsa nikaranaha.

Abaka Timoteo ikia bo zuba motsasoko.

¹¹ O Timoteo ikia hi Sesus tukta babata tsimy. Iwatahi amo imysapybara humo tsimoewykta! Wasani tsimyzuruku. Deus harere bo hỹ tsimykara. Deus humo tspirikpoziurēta. Utsa kytsa tysipokzitsikikta. Kytsa humo batu apyby. Sinini tsimykara zeka tsapunihikrēta tsimozik. Batu tyso!

– O uta zuba myhyrizikwanita – iwa batu tyso. Utsa kytsa harere bo wabyziuty.

¹² Timoteo Sesus humo tspirikpoziurēta tsimykta! Kytsa asahi motururukinahatsa watsa. Sipaikrētsa moziknaha. Ikia siwata tsimozik. Ikia Deus bo zuba mytsaty tsimykara hawa kytsa motururuknaha iwaze aty tapara pomo tawata. Ikia hi Sesus humo tsaspirikporēta babata iwatahi tsapunihikrēta tsimozik. Sesus humo tsaspirikporēta h̃y. Tsimyhyrikosokda zeka Deus tuk awahi tsimynapykyryk. Ikia kytsa sizubarētsa okze botu nitsasoko:

– O utakta Sesus harere humo mospirikpoko – tsiky. Iwa kytsa okze tsiktsasoko. Iwaze Deus zawatawy.

¹³⁻¹⁴ Sesus Kiristu harere bo hỹ tsimykta! Iwaze batu amysapybyita tsimykara. Sesus asoho humo batu amysapy ziky. Sesus harere humo zuba tsimyzuruku, mekywaha myharere bo ka ba yh̃y tsimy. Sesus Kiristu myziksize mymyoktyhyryk. Atahi tsipiperykyze wasani tsimyzuruku. Ana hi motsasoko, Deus okze tu abo motsasoko. Sesus Kiristu okze tu niwatihi abo motsasoko. Deus kino kytsa abazubatsa ihumo sispitu. Siraratsa sisarakatsa kino niwatihi ihumo sispitu. Sipehakatsa niwatihi ihumo sispitu. Iwaze Sesus Kiristu tsipunihikrēta batu ipyby. Sipehatsa Pōtios Piratus iokeryk tu amy ty wasani my atsatu nikara. Batu ipokso ipybybyita ziknakara wasapeha ty zuba nikara.

¹⁵ Deus mozhikik zeka Sesus mybo myzipeha iwa mybo myziksizo. Deus tsimysapyrēta mykara. Atahi zuba abazubata. Utsa pehatsa iharere bo hỹ mykaranaha. Ata pehatsa kino myhyrizikwani my. Deus zuba mytsihitsa kytsa sizubarētsa humo sitsihitsa my.

¹⁶ Katsa tsimyhyrikosokdanaha. Deus koikny baktatu. Tawahi mynapykyryk. Amy skaraba tisapyrēna ihumo zuba tisapyrēna. Isapy haramwe jekwaha humo tisapyrēna. Haramwe bo iktsa tsimy zeka batu isapy iwa zeka ihumo tisapyrēna zuba motare. Iwaze katsaktsa ituk ahabyi zeka hawa haramwe bo batu iktsa tsimaha katsa mymysapybyiri humo ba ibo iktsa tsimaha. Katsa batu ibo iktsa zikaha. Mysapybyitsa tsimykaranaha zeka ba ituk tsimynapykyryknaha. Katsaktsa iharere bo hỹ tsimahaze mekywatsa tu tsimoziknaha. Ihumo ahamysapyrētsa tsimoziknaha iwatsahi iharere bo hỹ tsimahaktsa kytsa! tsimaha. Iwatsahi katsa tihi:

– O Deus ikia zuba wasani tsimykara. Ikia zuba tsamysapyrēta. Myhyrizikwanita awahi tsimynapykyryk. Azikwy kino niwatihi atuk awahi mynapykyryk – tsimaha. Iwa ibo tsimypamykysokonahaktsa kytsa.

¹⁷ Timoteo Sesus tuktsa asahi sinamynikitsa pe tsimy:

– O sinamynikitsa batu tyso “O katsa zuba myhyrizikwanitsa tsimaha.” Ahanamy byizeka sa hawa tsimaha Ahanamy humo tsikaeni zuba ahakparawy zeka. Deus humo tspirikpokonahaktsa! Atahi mynamykusukniki. Amo wasani my anaty hi mybo nyny my – tsimy.

Iwa sibo tsimy:

18 – Utsa kytsa tysipokzitsikinahaktsa. Sibō tsisapybanahaktsa!
Ahanamy utsa bo tsibiakaknahaktsa! Iwa sinamynikitsa bo
tsimypamykyso.

19 Ahanamy ty nyny tsimaha zeka, usa ahanamy ka Deus baze tu my-
napykyryk. Ahanamy mekywaha tu Deus baze tu maha, anaeze tawahi
ahanamy mynapykyk. Iwaze ikiahatsa Deus tuk ahawahi tsimynapykyryk-
naha hỹ – tsimy.

Iwa Timoteo ikia sinamynikitsa bo tsimytsaso.

Aba nepyk.

20 – O Timoteo Deus harere bo hỹ tsimykarakta! Pykyhytuty iharere
bo hỹ tsimyкта! – my. Kytsa asahi Deus harere humo batu siakparawy
sibo batu motsaso. Tsikaeni zuba sibo tsimypamykysoko. Siharerewabymy-
barẽtsa maha. Asa hi:

– Katsa zuba myhyrinymyrẽtsa – mybarapetu mykaranaha. Situk ba
zikmysapynaha.

21 Kytsa siharere piwabykynahaze sibo yhỹ mykaranaha. Iwatsahi Sesus
humo batu sispirikpo. Sesus zerekiknaha siharere humo. Iwa my.

Deus pahasapywyky.

Aba ikia pe Deus kino ahumo tsimypokzitsiarẽta Sesus tuktsa sihumo
mysipokzitsihiki niwatihi. De.

Pauro

Pauro Timoteo bo ziwatahakazo

Pauro siakyriukrēnikitsa hurukwy eze niapykyrykze Timoteo bo ziwatahakazo. Timoteo tatse wata ziknazukniki. – Atsoko pikbezenaha – nikara. Deus Pauro ziapewywyky iwaze katsa kino niwatihi tanymyryky.

¹ Uta Pauro. Timoteo ikia bo papeu humo piwatahaka. Tubabatu Sesus Kiristu kytsa bo zikpeha, kape niy:

– Ikia sizubatsa bo tsimy. Deus wasania ty tsimytsaso. Kytsa kaharere bo hỹ mykaranaha zeka kahumo sispirikporētsa moziknaha asaktsa tahawahi Deus tuk mynapykyryknaha tsimy – niy.

² Timoteo ikiakta katse wata tsikyzyk. Utakta ikia humo kamypokzitsiarēta. Deus myzo, Sesus Kiristu mypehakatsa sibo atsyhyryze mopamykysokoze ispe my:

– O kazo Timoteo humo amypokzitsiukta. Ihumo tsimypokzitsiarēta. O kazo ahumo tsakurēta mozik – my. Iwa Deus bo atsyhyryze mopamykysoko.

Hawa Deus humo kakurēta my. Abaka kasoho ahabo piwataha.

³ Kyze uta Deus bo motsasoko:

– O kazo ikia zuba tsamysapyrēta – mykara. Deus tsyhyryze pitsumuēhīkī mykara. Pykyhytu iharere bo hỹ mykara. Iharere humo batu kaspirik-tsokdahu. Myzotsa niwatihi iharere bo hỹ ziknakaranaha. Deus bo mopamykysokoze ikia soho ty okoroze unata ibo mopamykysoikik. Ikia soho humo mytsaty mynakara.

⁴ Ikparakze tsasukatsihikrēta. Tsikpuziuku ana bo hi mytsaty mykara. Ikia bo mynakozore tsihikik. Ikia bo mynakozore zeka kakurēta. Kakurēta h̃y.

⁵ Ikia Sesus humo tsimyspirikpoko ana bo hi mytsaty mykara. Ihumo aspirikporēta h̃y. Tubabatu aikiwa Roide atatsahi Sesus humo tispirikporētatsa. Iwaze aje Eunise kino niwatihi ihumo tispirikporētatsa. Abaka ikia kino niwatihi ihumo tsimyspirikpoko ana humo hi kahyrinymyrēta.

⁶ Iwatahi abo motsasoko. Tubabatu Sesus tuktsa tuk ispirikpokota tsikyzyk. Uta katsyhyrypetsa ty aharek humo paik paik iky. Ispirikpokota tsikyzykze katsyhyrypetsa ty aharek humo paik paik iky, Sudeutsa sopykwy ty iky. Ana bo hi mytsatyzotyкта! Deus zikwy abo izumu. Ihyrikoso atuk mynapykyryk. Pykyhytuty ihyrikoso tuk tsimyzuruku. Izikwy humo tsimyzuruku. Ana bo hi mytsatziutyкта! Iwaze izikwy humo tarabajaziu tsimykara.

⁷ Deus hyrikoso mybo izumu. Ihyrikoso humo batu mypyby. Deus mybarawy nizuknikita tazikwy mybo inazukmywy. Izikwy humo katsa sizubarētsa humo mymypoکزitsirētsa. Katsa mypetu mysopyk iwatsahi mysapybyitsa ba tsinakaranaha. Deus hyrikoso humo mypetu mysopyk.

⁸ Kytsa asahi Sesus harere bo batu h̃y nikaranaha sakyriukrēnikitsa hurukwy bo zikoktyhyryknaha. Sesus harere iktsasokoze katsipa humo zikoktyhyryknaha. Abaka sakyriukrēnikitsa hurukwy eze tu mopykyryk. Iwatatu kahumo batu asikpyby. Sesus harere humo kino niwatihi batu asikpyby. Sesus harere humo sinini mykara. Ikia kino niwatihi Sesus harere tsimytsasokoze sinini tsimykara. Iwatuze sinini tsimykara Sesus harere tsimytsasoikikze Deus patsumuēhī. Sinini tsimy zeka atahi papunihikwyky.

⁹ Deus kino botu ityryk nimywatawyhik. Tapara mybarawy eze ky nizukni iwaze bijoikpe nizukni iwaze botu nimywatawyhik. Katsa mysapyrētsa humo batu myty watawy. Myhumo tsimypokzitsiarēta ana humo hi nimywatawyhik. Deus tihi:

– O amy ty isapyrēnikia ty sibo nyny my – niy. Katsa mysapyrētsa humo batu nyny aha.

– Asahi Sesus Kiristu harere bo hyŷ mykaranaha iwatsahi myspirikporētsa tsimoziknaha iwaze amy ty isapyrēnikia ty sibo nyny my – niy.

¹⁰ Taparaka ana soho humo batu myhyrinomyry abaka myhyrinomyrētsa. Sesus Kiristu humo tsinomyrykynaha. Sesus mymyoktyhyrykta humo tsinomyrykynaha. Sesus botu mybarawy bo inasik iwatahi tsinomyrykynaha. Sesus kino isapyrēnikia ty mybo nyny mykara. Sesus nihyrikosokda. Iwaze harakykbyri zuruze nahyrikiziko ispitu niyzikzo. Iwatsahi katsakta mohyrikosokdanaha humo batu mypyby. Sesus wasaniha nitsasoko.

– Tsimyhyrikosokdanahaze namyhyrizikpowyzo. Mywahi Deus tuk tsimypykyryknaha – niy. Iwaze katsakta Sesus humo tsimyspirikponahaze iwatsahi tsimyhyrikosokdanaha humo batu mypyby.

¹¹ Deus botu zikwatawyhik. Sesus kape niy:

– Wasania ty motsasoko katuktsa tsihyrinomyryky – niy. Tsihyrinomyrykyta my. Sesus zikwatawyhik iwatahi mykzohotsa.

¹² Ana humo hi sinini mykara. Sesus wasaniha humo sinini mykara. Kytsa Sesus harere humo batu sispirikpo asahi ziksukyrykynaha. Utakta Sesus humo kaspirikporēta. Ihumo batu kasikpyby. Abaka Sesus zikny iwatahi pikspirikpoko hŷ. Ata kino tsihyrinomyrēta. Atahi imysapyrēnikita. Nawa ha ty ibo nyny iky tahi ana hi myziperyky. Hawa ha taeze Sesus myziksizo naha humo kaspihikrēta iwaze kabo nynyzo my.

¹³ Deus wasania ty ikia abo iktsasoko. Deus harere anahi abo iktsasoko hyŷ tsimykyara. Hawa zikzuruku naha humo kawata tsimyzuruku. Tyzikwatuku Sesus humo aspirikpotohikta! Kytsa humo tsamypokzitsiarēta. Iwa tsimyzuruku. Sesus Kiristu tuk zeka iwa tsimyzurukunaha.

¹⁴ Deus harere ty pykyhytu tynakara. Iharere iktsasoko. Ana bo hi mytsaty tsimykyara. Ba aspiriktsokda huk. Deus hyrikoso mytuk mynapykyryk. Atahi mymytsumuēhīkī iwatsahi Deus harere humo ba zikspiriktsokdanaha.

Iwa Pauro Timoteo bo ziwatahaka.

¹⁵ Kytsa Asia ezektsa zikarekbaiknaha. Ana hi botu tsiwaby. Situk Pisero zikarekek. Eremosenes kino niwatihi zikarekek.

¹⁶ Onesiporo zuba ziktsumuēhīkī. Kabo inakozore sakyrikrēnikitsa hurukwy eze kabo nikozore. Kahumo batu isikpyby. Atahi zikykuwyky. Ihumo kakurēta ikykara. Iwaze Deus pe iky:

– O kazo Onesiporo itukytsa humo kino niwatihi tysipokzitsikikta tsimy – iky.

¹⁷ Atahi Homa bo niukuru. Izumuze paikpa zikberiki iwatahu kabo zumu.

¹⁸ Tapara Onesiporo Epeso eze tuze ziktsumuēhīkī. Ana soho humo hi tsahyrinomyrēta. Iwatahi Deus pe my:

– O kazo ikia Onesiporo tsimypokzitsikikta. Sesus myziksizoze ihumo tsimypokzitsiarēta – my.

Iwa Deus bo itsyhyryze my.

2

Sesus Kiristu tukta babata tsipunihikrēta mozik.

¹ – O Timoteo ikiakta katse wata tsikyzyk. Deus Sesus Kiristu mymypokzitsiki. Katsa Sesus tuktsa tsimaha. Mymypokzitsiki, iwatahi batu apyby. Amo wasani tsimykyara! – my.

Tubabatu uta ahyrinomyryky.

² Amy ty ahyrinomyryky naha ty tsiwabyba hỹ. Aba ustsá tsimysihyrinomyryziuku. Kytsa tysiny asaktsa aharere pykyhytu pinomyrykynaha. Ahyrinomyryky naha ty atsatu msihyrinomyryziuku. Bykyze asahi atsatu mykaranaha ustsá kytsa msihyrinomyrykynaha. Kytsa aharere humo motsasoziukunaha pykyhytuty mykaranaha.

³ Sesus tuktsa sizubarẽtsa sinini mykaranaha. Ikiá sinini tsimykara zeka batu apyby. Ikiá sodadu wata tsimozik. Ikiá Sesus Kiristu sodadu wata tsimozik. Iharere bo zuba hỹ tsimykara.

⁴ Sodadu tapehatsa harere bo zuba hỹ mykaraze tawata. Ikiá niwatihi Sesus harere bo zuba hỹ tsimynakara iwatahi sodadu wata tsimozik. Iwa tsimykara. Sodadu amy iakparawy ha humo batu yhỹ ziky. Tapehatsa harere bo zuba hỹ mynakara. Ihyriziktsokzawy humo zuba mynakara. Ikiá iwahaty tsimyzuruku. Sesus apehatsa my. Iwaze amy akparawy ba yhỹ ziky, iharere bo zuba hỹ tsimykara, sodadu wata tsimozik.

⁵ Iwaze ustsá kytsa motururuknahaze tapara pomoze mozihikik. Iwaze sisopyk humo yhỹ nikara iwaze motururuknaha, niwazuba nikara. Ikiá atawata tsimozik amy Deus myzehikik nahaty zuba tsimykara. Amy ty Sesus mynazihikik naha ty zuba tsimykara, iwatahi tapara zumuta wata tsimozik.

⁶ Iwaze usta maku tatsuhuk mozikezoze. Atahi tadisahawy sukpesapy myzekezokoze tapara tadisaha. Ikiá niwatihi Sesus Kiristu tsyhyryze hyriziktsokzawy humo tsimy. Hyriziktsokzawy humo tykta! Kytsa msihyrinomyryky iwa ahyriziktsokzawy. Iwaze Sesus asoho humo:

– O ikiá tsamysapyrẽta – my. Iwaze ikiá Deus harere bo hỹ tsimykara sodadu wata. Ikiá tyzibytuhukutu hawa Sesus mozihikik yhỹ tsimy maku kytsa nitururuknahaze tapara izumuta wata. Ikiá Sesus tsyhyryze hyriziktsokzawy humo tsimykara maku itsuhuk eze wata.

⁷ Kaharere bo mytsatyziú tykara. Amy kaharere piwatawyky atsatu mypehatsa mykara. Atahi pahyrinomyryky.

⁸ Deus wasaniha abo nitsasoko. Sesus Kiristu soho bo mytsaty tsimykara. Sesus Kiristu nihyrikosokda. Deus hi zihyryzikpowy iwaze ispitu niyzikzo. Dawi tsekoka Sesus niy. Ata hi zihyryzikpozo. Deus wasaniha nitsasokoze ana hi iktsasoko.

⁹ Deus harere iktsasoko ana humo hi sinini mykara. Kytsa sakyriukrẽnikitsa hurukwy bo zikorokiknaha. Karikutsitsiwyttsa ty zikektsawarakanaha. Iwatahi batu pão my. Iwatatu Deus harere sihumo ba zikpyk. Deus sohowy ba pyk ziky.

¹⁰ Iwatahi sinini mykara. Kytsa asahi Deus nisiwatawyhik sityhyryze sinini mykara, iwatsahi Deus wasania ty piwabykynaha. Sinini mykaraze iwatsahi Sesus humo sispirikporẽtsa. Sesus Deus bo msioktyhyryk katsa mywatsa Deus bo msioktyhyryk. Simysapyrẽtsa moziknaha. Deus tuk asatu mynapykyryknaha tahawahi Deus tuk mynapykyryknaha.

¹¹ Hawa botu katsaktsa tsiwabynaha ana harere wasani my. Utakta niwatihi ahabo iktsasoko aba motsasoko.

– Kytsa Sesus pokzi mymybanaha zeka iwatsa tu ituk namyhyrizikpobawyo.

Tsinahyryzikponaha zeka ituk mywahi tsinapykyryknaha.

¹² Sinini tsimykaránaha zeka Sesus Kiristu pokzi mypehakatsa watsa tsimoziknaha.

Katsaktsa kytsa pe tsimaha zeka: “O utakta batu Sesus tukta my. Sesus batu kanyhy” tsimykaránaha. Iwaze Sesus niwatihi mype my: “O uta kino batu kanyhy my.

Asahi batu katuktsa my” niy.

¹³ Iharere bo hyĩ ahabyizeka iharere humo mynapykyryk.

Iharere wasani my.

Tapara nitsasoko atsatyty mykara

iharere tisapyrēna hĩ.

Tawahi nitsasoko iwaze atsatu – mykara.

Deus tsumuēhĩtsa tsimysapyrēta.

¹⁴ Ikiawabytsitsa bo tsimy. Iwa tsimysihyrinomyryky. Mytsatyziu tsimy Deus pawabyky. Deus okzeka tsimysihyrinomyryky. Ispe tsimy:

– Pykyhytutaha kytsa! Ahaharere humo ahape ty peha peha byitaha iwa zeka ustsakya kytsa mysisapybyrinaha. Iwazeka kytsa ba ziksitsumuēhĩnaha. Kytsa pahawabykynahaze Sesus humo batu sispirikpo. Iwazeka ahaharere humo ba zikspirikponaha – tsimy. Iwa awabytsitsa bo tsimy.

¹⁵ Wasani tyzurukukta! Pykyhytuty wasani tyzurukukta! Iwaze Deus asoho tihi:

– Atakta tsimysapyrēta. Kaokzeka wasani mykara – my. Wasani tsimyzuruku zeka batu asikpyby. Deus ahyriziktsokzawy bo iksa myzeka batu asikpyby. Deus harere ty kytsa tysihyrinomyrykik. Tysihyrinomyry baba iwa abo my.

¹⁶ Kytsa asahi siharerewabymybaranikitsa ana ka Deus batu iakparawy. Ikiawakino batu situk tsimypamykysoko asaktsa kytsa ba ziksitsumuēhĩ. Sesus humo sispirikporētsa ba ziksitsumuēhĩ. Iwa siwabytsitsa batu imysapy nikaranaha. Iwaze sibo ba ziktsaso. Siharere ba ziktsaso. Asaktsa ustsakya mysisapybyrikinaha.

¹⁷ Sispirikpowy mykōrōrōtsa watsa. Inury piokbakanaha. Hawa inury mykōrōrōtsa humo piokbakanaha, kytsa Sesus humo ba sispirikpo tahaspirikpowy zimyikiknaha iwatsahi sispirikpowy mykōrōrōtsa watsa. Asahi myhyrinomyrykynaha zeka kytsa Sesus humo batu sispirikpo. Situk estuba maku Imeneu inarokota, usta Pireto inarokota, iwatsa sispirikpowy kino mykōrōrōtsa watsa. Sispirikpowy humo kytsa Sesus harere bo batu yhĩ niaha.

¹⁸ Wastuhu Sesus tuktsa siharere ziwabykynaha. Asahi siharere bo asiba yhĩ niaha. Iwaze Sesus harere humo asiba ziakbatanahaze batu yhĩ niaha. Asa tihi:

– Kytsa niakbakanahatsa botu bijoikpe bo nidoknaha – mybarapetu nikaranaha.

– Deus mybarawy ezektsa nisierekek – mybarapetu nikaranaha. Kytsa anahi ziwabynahaze paikpa mytsaty nikaranaha. Kytsa jakara bo nizaranahatsa watsa niyziknaha. Sispirikpowy humo paikpa mytsaty nikaranaha. Iwatsahi wastuhu Sesus tuktsa Sesus harere bo asiba batu yhĩ nikaranaha.

¹⁹ Katsa hiba Deus harere humo tsinomyrykynaha. Ustsakya kytsa simyspihikbatanikitsa sihumo batu mospirikpo. Deus harere zuba tsiwabynaha. Mypehakatsa tahyrytsa humo tsihyrinomyrēta hĩ. Aty motsasoikik:

– O katsaktsa Deus hyrytsa – tsimaha. Deus ispe my:

– Ahasapybyri tsmoewynaha! – niy. Iwa Deus tahyrytsa bo motsasoko.

²⁰ Myporosuktsa mywahoro eze sizubarētsa tsimykaranaha. Wastuhu zuba piyituhukunaha tu tsimykaranaha. Ustsakya batu. Katsa mymyikaha boktsa zubatsa myporosuktsa sisapyrētsa tsimykaranaha. Mymyikaha humo morosuk tsipyrēna tsimykaranaha. Katsaktsa myporosuktsa watsa.

²¹ Hawa katsa morosuk tsipyrēna tyakse tsihikik mymyikaha boktsa zubatsa, Deus hyriziktsokzawy humo mymykse tsihikik. Deus okzeka wasani tsimoziknaha. Iwaze Deus mype my:

– O ikiahatsa katsumuëhĩtsa tsimoziknaha. Ikiahatsa humo kakurëta. Amy humo wasani tsimykaranaha! – mykara. Iwatsahi morosuktsa watsa tsimoziknaha atakta mymyikahaze tsimykaranaha. Deus mysoho:

– O ikiahatsa tsamysapyrëtsa tsimaha. Iwatahi ikiahatsa katsyhyryze tarabaja tsimykaranaha – my. Tarabaja tsizubarëna humo mykyzodiharëtsa tsimykaranaha kahumo kytsa Sesus harere mysihyrinymyryky my. Mysapybyitsa tsikykaranaha botu tahamoewyhik ana humo hi Deus tsakurëta hÿ.

²² – O Timoteo ikia ba mykyryburuktsa wata tsimykururu! Asahi imysapybyitsa zuba mykaranaha. Utsa okeza mysihuahuakanaha. Ikiakta hawa wasani zuba tsimyzuruku. Imysapybara humo ka ikiakta batu yhÿ ziky. Sesus Kiristu humo aspirikpohukta! Kytsa tysipokzitsiki. Kytsa humo batu akyri. Maku tsimysapyrëta Deus bo mopamykysoko. “O Deus myzo tisapyrëna humo tsiktsumuëhĩ my”. Ikia niwatihikta ituk tawata tsimysapyrëta tsimozik – my.

²³ Kytsa asahi sipehatsitsa zuba batu siharere ty batu tyso. Ikia sibo tsimypamykysoko zeka tsipahabetsakwynaha.

²⁴ Mypehakatsa tsumuëhĩtsaktsa ba zikmybetsaknaha. Kytsa mymypokzitsiki. Deus harere mysihyrinymyryziuku. Kytsa harere piwabyziuku, iwatahi mysihyrinymyryziuku.

²⁵ Aty myharere ty wabyziyu zeky byizeka batu ziksibetsak. Wasanikia ty tsimy. Sibo tsimytsasoko. Aibani tozeka ja aharere humo simysapybyitsa mykaranaha mysimoewyhiknaha Deus mysitsumuëhĩ iwatsahi simysapybyitsa mykaranaha mysimoewyhiknaha. Aharere humo sispirikporëtsa moziknaha.

²⁶ Tubabatu hyrikoso sapybara pehakatsa nispipihikbataka iwaze tahawerekywy nahatsa watsa niaha. Siraratsa tahawerekywy bo nipupunaha. Astatsu kytsa hyrikoso sapybara pehatsa harere bo yhÿ mykaranaha. Siraratsa tahawerekywy naha tsawatsa. Iwa kytsa sispirikpobyitsa zeka hyrikoso sapybara pehatsa harere bo yhÿ nikaranaha. Iwa mozurukunaha. Bykyzehu tozeka ja aharere humo hyrikoso sapybara pehatsa bo ba yhÿ zikaha. Amy ty wasania ty zuba yhÿ mykaranaha.

3

Aibani zuba ziharawybabaka tsihokdaharëna iwatsahi pykyhytutaha.

¹ Kaharere bo mytsatziutaha. Sesus harazetu kytsa sinini mynakaranaha. Sesus tuktsa Deus harere bo hyÿ mynakaranahaze tsihokdaharëna mozik. Kytsa simysapybyitsa mykaranaha sihumo tsihokdaharëna mozik.

² Kytsa asa zuba mynakaranaha. Sisorekanikitsa. Sisakimyijarëtsa mykaranaha okyrysaro tsihitsa mozihikiknaha. Motsasokonaha – Katsa zuba myhyrinymyrëtsa – mybarapetu mynakaranaha. Myhyrinymyrëtsa mytsaty ahabyitsa mynakaranaha. Siharerewabymybarëtsa. Kytsa tahanamy ty harape bo nyny maha zeka:

– O ikia tsimysapyrëta ana humo hi mykurëtsa – iwahaty batu harere. Tahazotsa harere bo batu ma zikaha. Deus harere humo batu wabyziyu zikaha.

³ Tatukytsa humo niwatihi tahasopyksapybyri mynakaranaha. Batu aty tohi humo simypokzitsiu. Kytsa sizubarëtsa humo sisopyksapybyitsa mynakaranaha. Zikaharapeziunahabyitsa. Batu tahapetu sisopyk iwatsahi tahamysapybyrity mykaranaha batu tymoewy. Sizokdirëtsa. Zikasihokyknahabyitsa.

⁴ Situkytsa sisukyrytsitsa bo mysioқтыhyryknaha. Mysibanaha bo. Simytsatyhybyitsa tu iwatsahi batu simysapy mynakaranaha. Motsasokonaha:

– O uta zuba wasani. Uta myhyrizikwani – mykaranaha. Deus humo batu siakparawy iwatahi Deus batu iaku. Asa zuba sakurëtsa. Mynazihikiknaha ty zuba mykaranaha.

⁵ Asahi:

– O katsaktsa Deus hyrytsa – mybarapetu mykaranaha. Deus zikwy humo batu sihyrinomyry. Amy mozhikiknaha humo zuba mykaranaha. Deus harere bo batu hÿ mynakaranaha. Deus hyrikoso humo batu sihyrinomyry. Ikiä situk tsimykarä zeka tyserekeкта my.

⁶⁻⁷ Wastuhu wytykyryk mysispihikbatakanaha. Wytykyryk asizahi batu mytsaty zikaha. Mysimiwykynaha. Siwakyrizerëza.

– O katsaktsaza Deus harere tsipinomyrynaha – mykaranaha. Batu sihyrinomyry. Tsikaeni zuba zinomyrynaha. Iwazahi batu sispirikpo Deus harere bo batu hÿ zikaha. Iwaze kytsa asahi mybarapetu ziknakaranaha wytykyryk pe maha. Siwahoro bo kytsa papatu ziknapupukunaha. Inapupunahaze imysapybara ty ziknasyhyrinomyrykynaha. Iwazahi wytykyryk Deus harere humo batu sispirikpo.

⁸ Tubabatu Moises Deus harere baba ziknatsasoko. Sãbores Sãnes ahatsa Moises harere humo batu siakparawy. Deus harere baba humo batu siakparawy. Kytsa simyspihikbatanikitsa watsa. Astsatu mykaranaha. Kytsa bo mybarapetu mykaranaha, iwatsa tu Deus harere humo batu siakparawy. Sesus harere humo batu sispirikpo.

⁹ Kytsa sihyrinomyrytsa pe:

– Batu amy tohi ty isty hyrinomyry – nikaranaha. Taparaktsa tubabatu astatu Sãnes Sãbores ahatsa bo niwatihi ziknakaranaha. Astatu kytsa bo ziknakaranaha. Iwatsahi sizubarëtsa tihi:

– Batu amy tohi ty ziksihyrinomyrynaha iwatsahi batu mywabyhy – nikaranaha.

Abaka kasohowy asiba nepyk wabyty tsimy.

¹⁰ O Timoteo hawa mozuruku naha humo tsahyrinomyrëta. Kytsa nasihyrinomyryky anaha humo kino tsahyrinomyrëta. Hawa Sesus humo kaspirikporëta ana humo kino niwatihi tsahyrinomyrëta. Hawa kytsa humo batu kasakpare uta hi nasipokzitsiki ana humo kino tsahyrinomyrëta. Kakubyrisorokrëta. Hawa sinini ikykara ana humo kino tsahyrinomyrëta.

¹¹ Kytsa asahi Sesus humo batu sispirikpo asahi zikziksininiwykynaha. Ätiokiä eze sinini ziknakara. Ikonio eze niwatihi sinini ziknakara. Risitera eze niwatihi sinini ziknakara. Sesus hi mypehakatsa zikbetesaka. Ziktsumuëhĩkĩ. Ana humo hi tsahyrinomyrëta.

¹² Katsaktsa Deus harere bo hyÿ tsimykaranaha zeka kytsa mymysininiwykynaha. Asahi Sesus Kiristu humo batu sispirikpo iwatsahi mymysininiwykynaha.

¹³ Kytsa asahi batu simysapybyitsa mykaranaha mysihyrinomyrykynaha. Simysapybyitsa babatsa mynakaranaha. Kytsa mysispihikbatakanaha. Utsa kytsa kino niwatihi sibo mybarapetu mykaranaha. Paikpa myharape spihikbataikiknaha.

¹⁴ Hawa zahyrinomyryky nawa tsimyzuruku. Hawa taparaktsa sihyrinomyrëtsa zahyrinomyrykynaha nawa tsimyzuruku. Siharere wasani my ana humo hi tsahyrinomyrëta. Iwatahi siharere bo hyÿ tynakara.

¹⁵ Ikiä jabastuze Deus harere papeu humo iwatahaha tsinykyry. Iharere humo tispirikporëta tsimozik. Ana papeu tsipinykyze hawa Deus tuk tsimynapykyrykynaha ana hi tsinomyryky. Sesus Kiristu humo tsimyspirikpo zeka Deus bo mymyoktyhyryk.

¹⁶ Tubabatu mydiritsa Deus harere ziwatahakanaha. Iharere ziwatahakanahaze Deus zikwy humo sihyrinomyrëtsa. Iharere wasani my. Ana papeu tisapyrëna niy. Iwatsahi Deus harere wasani humo tanymyryky. Amysapybyita tsimy kara zeka amysapybyiri ka tsimoewybaik. Aty pimyiki zeka papeu humo amyiwyyhy piwatawy. Hawa wasani haty papeu humo mysopyk mymywatawyky. Hawa Sesus tuktsa mozurukunahaze anahi mymywatawyky.

¹⁷ Deus tsumuëhïtsa iharere papeu humo iwatahaha pinymyryky. Deus iakparawy ty zuba pinymyryky. Ana bo zuba Deus tsumuëhïtsa papeu humo yhy mykara. Imysapyhaty zuba mynakara mekywa humo tisapyrëna mykara, Deus harere papeu humo. Utsa niwatihi mysitsumuëhï. Nanabyi humo niwatihi wasani mynakara myziwatawyky Deus harere papeu humo. Iwaha hy.

4

¹ Abaka Deus okzeka abo motsasoko tsiwabytoktokta! Sesus Kiristu okzeka niwatihi abo motsasoko. Atakta myziksizoze hawa kytsa mozurukunaha soho motsasoko. Atahi kytsa simysapyrëtsa pe my:

– O ikiahatsa wasani ziknakaranaha – my. Utsa kytsa simysapybyitsa pe my:

– O ikiahatsa batu ahamysapybyitsa ziknakaranaha – my. Iwa kytsa myzubarëtsa pe my. Kytsa sispitutsa pe my iwaze niakbakanahatsa pe kino niwatihi my. Myzubaha pe my. Sesus Kiristu myziksizoze iwa my. Simysapybyitsa ziknakaranahatsa pe my:

– Ikiatsaktsa sinini ykarawy bo taha! – my. Anabo mysipehahik. Iwaze simysapyrëtsa pe my:

– O ikiahatsaktsa pahasapywyky – my.

Iwa myziksizoze tatuktsa tuk my.

² Iwatahi iharere tynatsasokokta! Tsihokdaharë naze kino iharere tytsasoikik. Ihokdaha byize kino niwatihi tytsasoikik. Kytsa imyitsitsa tynasibetsakak:

– O amo imysapybyitsa zeka tyszimoewyhykta! Sesus humo tyspirikponahaktsa! Ahapunihikrëtsaktsa – tsimy iwatsahi simysapyrëtsa moziknaha. Asakparebyijaty. Akubyrisorokok ja tsimy. Iwa tsihyrinomyryky.

³ Bykyzehu kytsa ispirikpowy babata ba ziwabynaha. Iharere atakta batu ziky. Amo siakparawy zuba ana bo hi yhy mykaranaha. Kytsa amy zimyikinaha ana ty hi mysihyrinomyrykynaha. Ana hi siakparawy. Iwatsahi sihyrinomyrytsitsa bo piwaby tsihikiknaha iwaze amy ty siakparawy piwabykynaha.

⁴ Deus harere batu siwabyhy. Amy imysapybara zuba piwabykynaha.

⁵ Iki Timoteo pykyhytuty. Hawa tsimyzuruku naha humo pykyhytuty iwazeka wasani tsimynakara. Sinini tsimykara tsapunihikrëta tsimozik. Deus wasaniha tsinatsasoko. Deus zawatawy itsumuëhïtsa tsimozik, iwatahi tsipitsumuëhïkï.

⁶ Hawaeze ja kytsa pikbezenaha batu sispirikpo. Utakta sirara wata. Tubabatu kytsa siraratsa ty Deus bo nyny ziknakaranahaze tapara nisibakanahaze ky wa. Uta niwatihi hawa eze ja kytsa pikbezenahaze utatu Deus bo katy nyny my Deus pokzi pikbezenahaze Sesus pokzi ba ziktakyri.

⁷ Uta kaokzetuze Deus harere motsasoziuku zuba mynatsasoikik. Sesus humo kaspirikporëta ziknakara. Utsa kytsa kahumo Deus harere bo yhy mykaranaha. Sesus Kiristu zikzitsumuëhïekik pyk ahabyita ziknakara, zikzibytuhukutu Sesus Kiristu tsihyryze zikzitsumuëhïekik. Hawaeze ja

mohyrikosokda amy ty Deus kape ziknakaranaha ty tsizubarēna humo ma ikykara.

⁸ Kakubyrisorokrēta Deus tsyhyryze zikzitsumuēhīkik. Hawa kytsa sizubarētsa motururuknahaze tapara estuba siharaze pomo tahi iwaze kytsa ipe maha:

– O ikiakta tsipisapybaka – mykaranaha. Iwa mypehakatsa Sesus kytsa sizubarētsa okzeka kape my:

– O ikia tsisapybaka ikia wasani tsikykara. Deus zabetesaka iwatahi amysapyrēta tsikyzyk – my.

Kakubyrisorokrēta Sesus kasoho humo harereziu mykara. Myziksizoze kasoho kytsa bo iwa motsaso. Mypehakatsa wasani mykara. Hawa tsimyzurukunaha bo iktsa ziknakara. Myziksizoze ustsā bo niwatihi:

– Ikiahatsa wasani tsikykarānaha. Deus okzeka wasani tsikykarānaha – my. Iwa motsaso taperytsitsa bo motsaso. Iwatsahi taperyky myziksizo naha humo tsimyzihihiknaha.

Timoteo ikia bo zuba mopamykyso.

⁹ Abaka kabo aidytynykta asukmotsihik zeka.

¹⁰ Kytsa katuktsa zikarekbaiknaha. Demas tanamy bo zuba mytsaty mynakara. Zikarekek zuba. Tesaronika bo niparak. Keresēte Karatas bo niparak. Titu Daramasia bo niukuru iwa nikaranaha.

¹¹ Rukas zuba katuk nitare. Ikiakta Marakos tyziberikta! Ibo tsipomo zeka atuk tyziokty. Marakos Deus hyriziktsokzawy humo piktsumuēhī.

¹² Tikiko pe my:

– O ikia Epeso bokta! – iky. Hyỹ niy.

¹³ Kabo tsinaparāk zeka kakpyzazawy tuk tuja. Toroadē eze Karapo wahoro eze tihi ikzerekek. Papeu tuktū. Riweros tisapyrēna asahi siraratsa hwyk hi tyzibykyk. Riweros kino tynasibykykta tsimy.

¹⁴ Aresādere zikmyijaka. Atahi pero tuk tarabaja ziknakara. Hawa zikmyijaka naha humo mypehakatsa tsihyrinyrēta atahi ana sohōtyhi ibo mykara.

¹⁵ Ity pykyhytuty ihumo tsimy. Ihumo amytsatyhyhokta tsimykara. Myharere iakparawy byita tsakryiokrēta. Atahi:

– Ikiahatsa ahamysapybyitsa tsimykarānaha – niy. Tsipihobyk zeka amytsatyhyhokta tsimy.

¹⁶ Tapara Sesa abazubata tuktsa okzeka iktsasoko utakta kasoho iktsasoko. Batu aty tohi zikbetesa:

– O atahi tsimysapyrēta my. Amy imyiki batu mykara – niy. Batu aty tohi iwa kasoho ty batu tyso. Sizubarētsa zikarekbaiknaha. – O mytuktsa tsimaha – mybarapetu nikaranaha. Iwaze Deus tihi sisoho batu hỹ my. Deus ispe:

– O ikiahatsa Pauro tsikzerekbaiknaha. Kaokzeka ahamysapybyitsa tsimykarānaha. Pauro tsikzerekiknaha humo ahamysapybyitsa tsimykarānaha – my.

Iwa Deus sisoho motsaso zeka kasoho humo batu hỹ my. Iwaze utakta Deus bo mopamykysoko:

– O kazo kasoho humo kytsa humo aty kyri kyri byity. Uta sihumo batu kakyri. Asahi zikarikiknaha sihumo batu aty kyri kyri byity – my.

¹⁷ Asahi zikarikiknaha. Mypehakatsa zuba katuk nitare. Atahi ziktsumuēhīkī. Iwatahi Sudeutsabyitsa bo Deus wasania ty motsasoko.

Kytsa sizubarētsa Sudeutsabyitsa Deus wasania ty motsasobaka mypehakatsa zikwy ziktsumuēhĩ. Atahi zikoktyhyryk. Kytsa parinita watsa, sakyriukrētsa zikbezekyzykynaha mypehakatsa zikoktyhyryk.

¹⁸ Mypehakatsa, kytsa zikbezekyzykynahaze zikbetesaka. Mohyrikosokdaze pikoktyhyryk ituk kawahi mynapykyryk, mynahyryzikpoze Sesus tuk kawahi mynapykyryk. Atahi abazuba sipehatsa mozik. Iwaze sizubarētsa tihi:

– O ikia zuba tsamysapyrēta awahi amysapyrēnikita – tsimaha hỹ. Iwa ibo tsimytsasokonaha hỹ.

Myzubaha humo kahyryzikbarēta.

¹⁹ Ūta Pirisira Akiro ahatsa humo kahyryzikbarēta. Onesiporo itukytsa niwatihi iwatsa humo kahyryzikbarēta. Iwa sibo tsimytsasoko, sihumo kahyryzikbarēta hỹ.

²⁰ Erasto Korĩto eze nitare. Teropemo tsimytsapyrēta iwatahi Miretus eze ikzerekek.

²¹ Iki kabo tyzumu. Hyrytsik wōbyitu tyzumu hỹ. Katukytsa Euburus, Pudēs, Rinus, Kaudio ustsā niwatihi iwatsa ahumo tsihapyrykyknaha maha.

Deus pahasapywyky.

²² O Timoteo atsyhyryze Deus bo mopamykysoko ipe mykara:

– O Deus myzo ikia humo Timoteo tsipunihikrēta mozik. O myzo Sesus tuktsa kino niwatihi tysipokzitsiki – my. Iwa atsyhyryze Deus bo mopamykysoko. Iwa hỹ. De.

Pauro

Pauro Titu bo ziwatahaka

Titu kino niwatihi Pauro tuk zinymyrykyta. Titu itsikzikdihi Sipire inarokota anaeze hi Sesus tuktsa nisipokzitsiki. Pauro papeu humo zispirikpokozo. Deus Pauro ziapewywyky iwatahi katsa kino niwatihi tanymyryky.

¹ Uta Pauro. Titu bo piwatahaka. Utakta Deus ykzoho my. Sesus Kiristu zikpeha ahabo iwatahi pahahyrinymyryky. Iwaze Deus kape niy:

– O ikia awatawyhyta tsihyrinymyrykta. Iwatahi Sesus humo mysipirikpotohi. Iwatsahi amy ty wasani my sihyrinymyrētsa. Iwa kaharere bo hỹ mahaze mozurukunaha – niy.

² Deus ykparawy zuba anatyhi yhỹ tsimahaze mywahi ibaze tsimynapykyknaha. Iwatsahi iharere bo hỹ tsimaha. Tapara Deus mybarawy izuknihyize atahi:

– O asaktsa kawatawyhytsa kabaze mynapykyknaha. Sispitu tahawahi kabaze mynapykyknaha – iwa mysoho ty niy. Deus harere zuba wasani mynakara. Batu mybarapetu ziky.

³ Kyze utakta Deus harere bo hỹ myze iwazehi iharere motsasoko. Iharere Sesus soho kytsa sizubarētsa bo motsasoko. Deus zikpeha iharere motsasoko. Deus zikpehata hi hỹ iky iwatahi ikiahatsa bo motsasoko, Deus mymyoktyhyrykta naha soho humo mykara.

⁴ Titu bo piwatahaka. Ikia katse wata tsikyzyk. Katsaktsa Sesus humo myspirikporētsa Deusta myzo. Sesus Kiristu mymyoktyhyrykta. Iwaze Deus bo atsyhyryze mopamykysokoze ipe my:

– O myzo Titu tsipokzitsikikta, iwatahi mytsaty mytsaty byri my. Sesus Kiristu humo tsakurēta mozik – my. Iwa atsyhyryze Deus bo mopamykysoko.

Titu hyriziktsokzawy soho.

⁵ Kereta tsikzikdihi sihezōnike taeze. Anaeze tarabaja tsimy kara. Uta ikia tuk tarabaja tsikykarannahaze batu ipykba. Myhyriziktsokzawy batu ipykba tsikaha. Iwaze uta Kereta tsikzikdihi ekze niparak. Iwatahi mytarabaja tsipykbata. Ikia hi myspirikpokotsa tysiawatawy asahi Sesus tuktsa tysin. Iwaze Sesus tuktsa tysitsumuēhīnaha. Mysihyrinymyrykynaha maha. Kytsa hudikhudikwy taba paikpa tsimy kara myspirikpokotsa tysiawatawy. Hawa abo botu iktsaso atsatu tsimy kara. Iwa tsimy.

⁶ – Sesus tuktsa myspirikpokotsa wasani mykarakta! tsimy. Kytsa sizubarētsa isoho tyhi:

“O tahi wasani my” – mykaranaha. Atakta ikahatatsahi zuba ioke. Ihyrytsa Sesus harere bo hỹ mykaranaha. Kytsa ihyrytsa soho motsasonaha zeka:

– O ihyrytsa batu simysapy maha. Tahazo harere bo batu h̃y maha – nikaranaha atahi ba ziwatawy. Atahi Sesus tuktsa myspirikpokotsa tuk ba zitasapy.

⁷ Myspirikponahatsa Sesus tuktsa tuk Deus tsyhyryze tarabaja mynakara. Deus hyriziktsokzawy humo. Wasani mykarata iwaze kytsa ihumo batu siharerewabymybara. Atahi batu tyso:

– Uta zuba kahyrinymyrēta ba ziky – nikara. Sesus tuktsa myspirikpokotsa batu sisakpare. Atahi tsōsī kasasa ba ziku. Ba zikokyknaha. Okryrsaro tsihitsa ba zikyzyknaha. Ba mybarapetu ziky. Iwa mozuruku.

⁸ Ata kino kytsa iwahoro bo mozumukunahaze atahi:

– O pakutyny tsimy. Kabaze dyhy tyny – my. Amy ty wasania ty ana kino iakparawy zuba. Kytsa bo pisapywyky. Kytsa bo wasani isopyk mykara. Ata kino Deus harere bo hyỹ mykara. Tapetu isopyk iwaze amy ty takparawy zuba batu mynakara. Iwatahi wasani mozuruku.

⁹ Deus harere humo tispirikporêta. Deus harere wasani baba mytsaty mynakara. Iwatahi Deus harere tuk ba zimyi. Deus harere mysihyrinymyryziuku. Amy soho Deus harere humo ziwaby anatyhi mysihyrinymyryky. Deus harere humo tsihyrinymyrêta. Kytsa Deus harere tsikaeni zuba siakparawy mysihyrinymyryky. Iwatsahi Deus harere bo hyỹ mynakaranaha. Kytsa Deus harere humo batu sispirikpo asahi mysihyrinymyry iwaze iharere bo zuba hyỹ mykaranaha tsiky.

¹⁰ Iwaze kytsa sizubarêtsa Deus harere bo batu hỹ mykaranaha. Asahi Sudeutsa maha. Myharere bo yhỹ zikahabyikitsa. Mopamykysoikiknaha zuba. Siharekykarêtsa Deus harere soho humo mybarapetu mykaranaha.

¹¹ Tysiharerepykikta. Niwazubakta tsimy. Asahi tatukytsa nisiaknikinaha amy ty batu wasani my ana humo kino mysihyrinymyrykynaha. Iwatsahi situkytsa Sesus harere bo batu hỹ maha. Asaktsa batu sisikpyby maha. Asahi okyrysaro zuba siakparawy. Okyrysaro humo zuba mysihyrinymyrykynaha. Iwatahi ikia tysiharerepykwiy niwazubakta tsimy.

¹² Kereta tsikzikdihi taparakta tihi:

– O Kereta ezektsa simyspihikbatarêtsa maha. Mybarapetu ziknakaranaha. Sakyriukrêtsa maha. Tahadisahawy humo zuba mynakaranaha. Batu sipasaratsihik – niy.

Iwa Kereta ezektsa soho nitsasoko. Atahi Kereta ezekta niwatihi iwatuze tatukytsa soho nitsasoko.

¹³ Iharere wasani my. Kereta ezektsa asahi batu simysapy maha. Iwatahi Titu ikia tysibetsak tsimysipeha:

– Tysoso byitaha – tsimy. Asaktsa siharere piwabyikiknaha tysibetsak. Iwaze siharere wasanibara ana hi mopykba. Iwazehi Sesus humo sispirikporêtsa babatsa moziknaha.

¹⁴ Iwaze Sudeutsa taparaktsa harere batu ahawabyhy niakbakaranahatsa harere batu ahawabyhy. Siharere wasanibara humo iwatsahi batu ahawabyhy. Kytsa harere batu wasani my asaktsa zimyikinahatsa siharere bo batu yhỹ maha iwahahi siharere kino batu ahawabyhy. Atukytsa ispe:

– Siharere bo ka waby waby byitaha – tsimy.

¹⁵ Asahi wasani mykaranaha. Simysapyrêtsa moziknaha. Hawa mozurukunaha tisapyrêna bo zuba iktsa mykaranaha. Asaktsa batu imysapy mykaranaha. Sisopyksapybyitsa tu mykaranaha. Hawa mozurukunaha pisapybyikinaha. Imysapybara bo zuba iktsa mykaranaha. Asahi Sesus humo batu sispirikpo. Deus tihi:

– O anahi wasani – my. Ana humo hi batu sihyrinymyry. Deus tihi:

– Anahi batu wasani – my. Anatyhi batu sihyrinymyry. Imysapybara zuba ana bo mytsaty mykaranaha.

¹⁶ Asa tihi:

– Katsaktsa Deus soho humo myhyrinymyrêtsa – mybarapetu mykaranaha. Hawa mozurukunaha Deus tyryktsa byitsa watsa mykaranaha. Deus harere humo batu hỹ zikaha. Kytsa ustsa humo tahakyrikinaha. Deus humo batu siakparawy. Wasani baraty ziknakaranaha, isapybara ty ziknakaranaha iwatsahi Deus soho humo batu sihyrinymyry.

2

Hawa ha ty ahyrinymyry naha ty atsatu tsimyкта.

¹ O Titu ikia sisopyksapybyitsa humo pykyhytuty. Ikia mekywata tu tsimyкara. Amy ty wasania ty zuba Sesus tuktsa tysihyrinymyry. Deus harere ty tysihyrinymyryky iwaze iharere bo hyŷ mykaranaha. Iwa tsimyzurukunaha.

² Ikia sitsaikbatsa pe tsimy:

– O kytsa tsōsī ty ka tsō tsō byitaha tsimy. Ahapyrirybyihu ja. Wasani zuba tynakaranahaktsa. Sesus humo ahaspirikporētsa tsimoziknaha. Utsa kytsa humo tynaharape pokzitsikinahaktsa! Iwa kytsa ahasopyk ahakubyrisoroku ja. Iwa Deus humo tsimyzurukunaha zeka ahakurētsa tsimoziknaha – tsimy.

³ Tsimytsasoko wytykyryk sistsaikbaza pe kino niwatihi tsimy. Ispe tsimy:

– Ikiahaka kino Deus harere bo hyŷ taha. Kytsa sizubarētsa soho ahaharerewabymybara byihuja. Tsōsī ty ka tsō tsō byitaha. Ikiahaka wasani haty zuba tynasihyrinymyrykynaha – tsimy.

⁴ Tapara kykyrky sipyitsahazytykza mysispirikponaha. Asiza hi:

– Ikiahaka katsa mywa ahapyitsa tynasipokzitsikinaha ahahyrytsa humo kino niwatihi tynasipokzitsikinaha – tsimy.

Iwa wytykyryk taparakykyry sipyitsahazytykza mysispirikponaha. Taparakykyry ppykyhyza pe tihi:

⁵ – Ikiahaka wasani tsimahaktsa! – maha. Ahamysapyrētsaktsa! Usta maku bo ka hua hua byitaha. Ahawahoro ezektsa humo ahampokzitsiukuktahaktsa. Ahapytsa harere bo yhyŷ tynakaranaha. Iwa taparakykyry ppykyhykza wytykyryk mysispirikponaha. Iwa mozurukunaha zeka ustsasiso humo maha:

– O Deus harere wasani kok my maha. Aty tohi iharere bo hyŷ my zeka wasani mykaranaha – maha. Batu aty tohi Deus harere ba zisohometunaha.

⁶ Atsatyty siypykyhydytyktsa pe tsimy:

– Ahasakparebyihu ja! Wasani tynakaranaha – tsimy.

⁷ Titu ikia kino tsipisapywyky. Niahatsahi ustsas kytsa ikia watsa pisapywykynaha, iwaze hi asa kino pasopykzukunaha. Amy ty wasape haty zuba mysihyrinymyryky. Iwa mysihyrinymyry zeka wasani zuba mytsaty tsimyкта. Ba zimyi. Deus harere isapyrēnikia tyzuba asopyk.

⁸ Aharere ty wasani zuba tsimyкта! Deus harere humo mysihyrinymyrykik iwatsahi kytsa ikia batu siakparawy asoho pisohometu tsihikiknaha ba zikaha. Aharere soho pisapybyrikyzykynaha. Aharere wasani tsimy zeka iwaze sisikpybyrētsa. Aharere tisapyrēna humo sisikpybyrētsa moziknaha.

⁹ Kyze kytsa asahi tarabajaziu mykaranaha batu okyrysaro humo sibonynyhukbyitsa iwatsahi asaktsa usta tsumuēhītsa zubata. Asa pe tsimy:

– Ahakzohotsa atahi okyrysaro humo ahabo nynyhukbyitsa. Iharere bo hyŷ tsimykaranaha. Hawa sa iakparawy humo zuba tsimykaranaha. Ihumo batu ahakryi! Batu ahaokanihuk – iwatsahi ahahumo tsakurēta mozik.

¹⁰ Inamy ty ka aokok aokok byitaha. Ikiahatsa tarabajaziu tynakaranahaktsa kytsa. Tarabaja tsizubarēna iwatsahi kytsa ahasoho tihi:

– O asahi tarabajaziu nikaranaha asahi Deus harere bo hyŷ nikaranaha iwatsahi Deus harere wasani my. Deus harere humo tarabajaziu nikaranaha – maha tsimy.

¹¹ Deus mype niy. Aba pahasapywyky iwatahi kytsa sizubarētsa zipehata bo mysioкtyhyk. Ikiahatsa kabo myzahaoktyhyryk.

¹² Iwaze Titu ikia hi kytsa tysihrinymyryky. O Sesus tuktsa imysapybara ka tsimoewynahaktsa! Kytsa ykparawy, asahi Sesus humo sispirikpobyitsa ana kino tsimoewynahaktsa! Iwatsa tu wasani tsimyzurukunaha. Abaktsa kytsa okzeka wasani tsimyzurukunaha niwatihi. Deus ykparawy ty zuba hỹ tynakaranaha. Anabo hi zuba hỹ tynakaranaha.

¹³ Iwa tsimyzurukunaha. Katsaktsa tsipiperykynaha. Katsaktsa mymyoktyhyrykta myziksizo naha humo taperyky. Taperykynahatsa hi mykurētsa tsimykaranaha. Sesus Kiristu myziksizoze kytsa sizubarētsa ipe maha:

– O Deus ikia tsamysapyrēta – my. Deus zuba wasani my. Iwaha mozumuze mymyoktyhyrykta myziksizoze tisapyrēna h̃ maha.

¹⁴ Sesus Kiristu mysapyzekenihyrikosokda. Iwatsatu katsa mysapybara humo Deus mymyokzo ihumo hi mysapybyi tamoewy. Sesus nihyrikosokdaze iwatsahi mysapyrētsa tsimozikanaha. Ityryktsa tsimoziknaha. Iwatsahi tisapyrēna ty zuba tsimykaranaha h̃.

¹⁵ O Titu iwa ikia Sesus tuktsa bo tsimytsaso. Mysisapywy. Mysihyrinymyrykik. Sisopyksapybyitsa mykaranaha zeka tsysibetsak. Ispe tsimy:

– Niwazubaktsa ahamysapybara ty pyktaha – tsimy. Aharere piwaby-naha. Aharere pykyhytu piwabykynaha. Aharere tsikaeni zuba piwabyky-naha zeka ispe tsimy:

– Kaharere bo wabytoktotaha. Sesus Kiristu hi botu zikpeha iwatahi ahabo motsasoko iwatsahi kaharere tsiwabytoktonaha – my. Iwa. Pauro Titu bo ziwatahaka.

3

Titu Sesus tuktsa bo motsasoko.

¹ Ikia hi:

– O ahapehatsa harere bo hỹ tynakaranaha. Sitsumuēh̃itsa harere bo kino niwatihi hỹ tynakaranaha. Pahapehanaha zeka tarabajaziu tsimaha. Tsisapybanaha ana tarabaja tsimahaktsa kytsa – tsimy.

² – Utsa kytsa soho humo ba ahaharerewabymybarahuja tsimaha. Iki-hatsa humo ka batu mykyriuk. Kytsa sizubarētsa humo taharape pokzitsiki-nahaktsa tsimaha. Iwa kytsa bo ahasopyk tsimaha – tsimy.

³ Tapara kino katsa Deus harere bo batu hỹ mysopyk. Kytsa kino niwatihi nimymyikiknaha. Myzokdiarētsa tsikykaranaha. Katsa mykparawy ty zuba atsatu tsikykaranaha. Katsa imysapybara ty zuba tsikykaranaha. Anatyhi tsikykaranaha batu mypetu mysopyk. Kytsa myhumo tahakyrikinahaze katsa kino niwatihi sihumo tsikmykyrikinaha, iwa kytsa humo mysopyk.

⁴ Deus mymyoktyhyrykta. Hawa myhumo nimypokzitsiki nimywatawy. Ata kino mymyoktyhyryk.

⁵ Katsaktsa wasani ahabyitsa tu tsikykaranaha iwatahu nimyoktyhyryk. Katsaktsa batu mysopyksapy iwatahu nimyoktyhyryk. Ata zuba mymy-pokzitsiki iwa humo namykse. Ihyrikoso mymysapybyri humo mymyok-zohik. Aba wasani tsimaha. Taparaka katsaktsa myzotsa hyrytsa zubatsa. Abaka ba. Katsa Deus hyrytsa tsikyziknaha. Mopurukzonahaze tsawatsa. Taparaka imysapybara ty tsikykaranaha. Abaka ba, Deus hyrikoso humo wasani tsimykaranaha.

⁶ Deus hyrikoso mytuk mynapykyryk. Deusta isorokbyita babata katsa mybo tahyrikoso ty nyny niy. Sesus Kiristu mymyoktyhyrykta. Iwatahi Deus hyrikoso mybo zipeha mytuk mynapykyryk.

⁷ Deus hi tahyrikoso zipeha atahi mytuk mynapykyryk. Sesus Kiristu humo zuba wasani tsimyzurukunaha. Iwaze Deus mysoho humo niy:

– Kaokzeka wasani tsimaha. Ahawahi kabaze tsimynapykyknaha – niy. Abaka ana hi taperykynaha. Mykurëtsa. Katsaktsa Deus tuk mywahi tsimynapykyryknaha ana hi taperyky.

⁸ Amy ty abo iktsasoko wasani my.

Atukytsa bo tsimytsasokta! Amy ty abo iktsasoko atsatu atukytsa Deus humo sispirikporëtsa bo tytsasokokta. Tyzibytuhukutu mysisapywykynaha. Mysisapywykynaha zeka ustsya kytsa mysitsumuëhiknaha. Iwa tsimaha Deus ahahumo tsakurëta mozik. Iwa tsimyzurukunaha.

⁹ Kyze kytsa asahi mopamykysoikiknaha zuba. Siharere wabymybarëtsa maha. Asahi taparaktsa harere soho ty mopamykysoikiknaha. Asahi taparaktsa soho piwataha tsihikiknaha.

– O aty sa mydiritsa sinaro tsiwatahakanaha – mykaranaha ana soho hi mopamykysoikiknaha. Moises harere humo kino niwatihi mopamykysoikiknaha. Iwa tahapetu nikaranaha siharere ty batu pykyhytu waby zikaha. Siharere bo batu hÿ tsimy. Siharere humo kytsa ba ziksitsumuëhiknaha iwatatu batu awabyziuhu. Asahi mopamykysonaha zuba.

¹⁰ Ustsya Sesus tuktsa mysihyrinymyrykynaha. Amy ty imysapybara ty mysihyrinymyrykynaha. Katsaktsa myhyrinymyrëtsa mybarapetu mykaranaha iwatsahi Sesus tuktsa mysimiywykynaha. Deus harere tsikaeni zuba mysiwaby tsihikiknaha. Ikiya hi tsiyibetsakak. Ispe tsimy:

– Batu tyso. Imysapybara ty batu tyso. Niwazubakta. Pyk tsimy – tsimy. Isty hyrinymyry ahabyizeka tsiyibetsakakzo.

– Batu tyso. Amy ty kino imysapybara kino ba ziktsaso – tsimy. Aharere ty waby byizeka situk ka pão pão byity. Batu situk tsimynapykyryk my.

¹¹ Ikiya kino sisoho humo tsahyrinymyrëta. Hawa sisopyksapybyitsa ziknakaranaha humo tsahyrinymyrëta. Deus harere bo batu ma zikaha. Imysapybara ty zuba mynakaranaha. Asahi isopyksapybyitsa mykaranaha ana humo hi sihyrinymyrëtsa iwatsahi kytsa sizubarëtsa sisoho:

– O asaktsa simyihitsa mynakaranaha – mykaranaha.

Abaka pepykbahaniki.

¹² Kyze Aretemas abo pipeha. Tyzeka ja Tikiko abo pipehaka. Aty ja pipeha batu kanyhy. Myzumuze aidykta ikiya Nikoporis bokta tsimy. Anaeze kabo tsimykozoreze. Nabo hyritsik pokteze zuba mynapykyryk.

¹³ Kytsa petoktsa maha. Atuk tu maha. Estuba Aporo inarokota. Usta Senas inarokota. Atahi kytsa harere humo pitsumuëhikik. Petoktsa motururuknahaze ikiya anamy ty sibo nyny tsimy. Mykurunahaze sidisahawybyitsa tu iwaze adisahawy ty sibo nyny tsimy.

¹⁴ Sesus tuktsa pe tsimy:

– O tsiyapyanahaktsa kytsa! Ahanamy ty sinamybyitsa bo nyny tahaktsa. Wasani tahaktsa kytsa. Tarabajaziu tahaktsa! Iwa tsimyzurukunaha – iwa ape my.

¹⁵ Kytsa katuk ahumo sihyrizikbarëtsa mynakaranaha. Atukytsa pe:

– Uta Pauro ikiahatsa humo kahyrizikbarëta.

Deus pahasapywyky.

Deus bo mopamykysoze uta tihi:

– O Deus Titu ituktsa sihumo tsimypokzitsiukrëta tsimy – my. Iwa Deus bo ahatsyhyryze mopamykysoko. De. Iwa ziwatahaka Titu bo nepyk.

Pauro

Pauro Onesimu tsyhyryze Piremo bo ziwatahaka

Tubabatu wastuhu kytsa tarabaja ziknakaranaha sitsihitsa batu okyryrsaro ty sibo nyny nikaranaha. Kytsa sinamy wa niyziknaha paikpa sihumo okyryrsaro ty ziknasihuakaknaha iwaze hi ziknasitsihitsakanaha. Iwatsatu sisakihikytsa tahatsumuēhītsitsa nasisapybyriki. Onesimu tatsihitsa papatu niwakik iwaze Pauro harere ziwabyze Sesus tukta niyzik. Pauro itsihitsa bo ziksiwyhikzoze itsyhyryze papeu humo ziwatahaka. Onesimu tsihitsa Piremo inarokota atahi Pauro iharereziu ata bo hi Onesimu humo ziwatahaka.

¹ Uta Pauro. Ikia Piremo bo piwatahaka. Sesus Kiristu soho iktsasoko ana humo hi kytsa siakyriukrēnikitsa hurukwy bo zikoktyhyryknaha. Mytuky Timoteo katuk mykara. Ata kino katuk papeu humo piwatahaka.

² Katsaktsa Sesus tuktsa bo papeu humo tawatahaka. Asahi awahoro bo inauzuzuknaha. Myzawy Apia bo piwatahaka. Arakipus kino niwatihi atakta sodadu wata atahi mytuk Sesus tsyhyryze tarabajaziu mynakara. Sesus tuktsa awahoro bo mynakypyknahaze papeu ty sibo tsipinyny. Ikia mytuk Sesus tsyhyryze tarabajaziu tsimykar. Katsaktsa ikia humo mymypo-kzitsirētsa.

³ Ahatsyhyryze Deus bo mopamykysoko. Sesus Kiristu mypehatsa bo niwatihi mopamykysoko. Ispe mynakara:

– O Deus myzo Piremo bo tsiapywyky. Sesus tuktsa iwahoro bo inazuzuk-nahaze tsiapywyky. Tsiapykzitsikikta! Ba paikpa mytsaty tynakaranaha. Ikia humo sakurētsa moziknaha – mykara.

Piremo Sesus humo tispirikporēta. Iwaze kytsa humo tsimypokzitsiukrēta.

⁴⁻⁵ O kaharereziuwytza Piremo. Kytsa tihi:

– O Piremo mypehakatsa Sesus humo tispirikporēta hỹ. Atakta Sesus tuktsa humo tsimypokzitsiukrēta – mykaranaha. Ana iwabyze Deus bo asoho mopamykysoko:

– O Deus myzo Piremo humo kakurēta mykara. Tsiapywyky Piremo bo usts Sesus tuktsa bo niwatihi – my.

⁶ Katsaktsa ikiahatsa tuk Sesus humo myspirikporētsa. Myspirikporētsa babatsa zeka hawa Sesus tazo bo mymyoktyhyryk naha humo tanymyryto-hinaha. Sesus humo mykurētsa babatsa tsipinymyrykynaha.

⁷ O kaharereziuwytza ahumo kamypokzitsiarēta. Ikia Deus hyrytsa humo tsamypokzitsiukrēta ana iwabyze kakurēta. Iwatahi ikia humo kapuni-hikrēta mozik. Ikia kytsa ba ziksimyiwytza usts Sesus tuktsa nisiakusukni.

Pauro Onesimu tsyhyryze myzapykyky.

⁸ Iwaze katsaktsa Sesus tuktsa humo mymypo-kzitsiukrētsa. Hawa tykta tsimyzeka ba zapeha. Sesus Kiristu humo aziky wata ikia bo zuba motsaso.

⁹ Katsa tsimyyharape pokzitsikinaha. Kaharere bo yhỹ tsimykar. Ikia kino tsimyyzihikik. Iwa abo motsasoko. Taparakta ypykyhy Sesus Kiristu wasania ty iktsasoikik ana humo hi kytsa siakyriukrēnikitsa hurukwy bo zikoktyhyryknaha.

¹⁰ Abaka Onesimu soho motsaso. Utakta siakyriukrēnikitsa hurukwy eze tuze atahi Sesus humo tispirikporēta. Kaharere bo Sesus soho humo hỹ nikaraze iwaze Sesus humo tispirikporēta niyzik. Iwatahi katse wata niyzik. Ihumo kamypokzitsiarēta. Ikia tsipiktsumuēhĩ naha humo hi mozihikik.

¹¹ Taparaka atakta asohometuwy. Aharere bo batu yh̄y ziknakara. Abaka atakta Sesus humo mektatu niyzik. Kaokzeka tsimysapyrēta patsumuēh̄i. Botu ziktsumuēh̄ik̄i. Ata hi tsimysapyrēta iwatahi mymytsumuēh̄i.

¹² Onesimu humo kamypokzitsiarēta. Iwatatu abo piserezo.

¹³ Siakyriukrēnikitsa hurukwy eze Sesus soho wasania ty iktsasoko naha humo, atakta katuk natasapy tsihikik, iwaze piktsumuēh̄i. Atahi asapyzeken mozik.

¹⁴ Aharere piwaby tsihikik. Ibeta yh̄y tsimyzeka uta kino niwatihi hȳy my. Ba zapehariziubyi.

¹⁵ Atakta nokponi niukuru. Taparaka atuk batu are. Tozeka ja inaparak iwaze myziksizoze atuk tawahi mynapykyryk.

¹⁶ Taparaka atuk tarabajaziu ziknakara batu okyrysaro ty ibo nyny tsiky. Ipehakatsa tsikyzyk. Abaka atsy hi Sesus humo tspirikporēta. Ihumo kamypokzitsiarēta. Iki kino ihumo tsamypokzitsiarēta babata atsyhyryze tarabaja mykara. Atsy wata Sesus humo tspirikporēta. Iwatahi ihumo tsimypokzitsiarēta.

¹⁷ Iki hi:

– O Pauro katukta. Sesus harere humo harapetok tarabaja tsimykaranaha – tsimykara. Uta awahoro bo my zeka kape:

– Pakutyny – tsimy. Onesimu bo ka wa tsimy my.

¹⁸ Taparaka abo imysapybyita tu nikara. Anamy ziake zeka zamyi. Amy ziake zeka papeu humo tsihiwataha. Anatyhi itsyhyryze pisirezo.

¹⁹ Abaka katsyhyryty piwatahaka:

– *Uta Pauro abo pisirezo.* Amy ty Onesimu ziake zeka ana kino uta pisirezo – my. Iki Sesus humo tsaspirikporēta kaharere humo. Deus tuk awahi tsimynapykyryk. Deus wasania ty tyso byizeka batu aspirikpo. Anahi kabo tsihiwataha wata anasoho bo mytsatyziutykta!

²⁰ Iwaze katsakta Sesus humo myspirikporētsa iki Onesimu humo tsimypokzitsiukrēta! Katsy my. Awahoro bo pomez:

– O pakutynykta – iwa tsimyzeka kakurēta mozik.

²¹ Botu iktsaso:

– O Onesimu katsy humo tsimypokzitsiukrēta – my. Iki kaharere bo hȳy tsimykara kahyrinymyrēta. Hawa Onesimu tsyhyryze myzapykyky wasani isopyk. Iwa piwatahakaze ta botu mytsaty mykara.

²² Iwaze kawanu sapy tsikymynahaktsa! Hawa ikiahatsa katsyhyryze Deus bo tsimypamykysokonaha utakta iharere piperyky. Amy ty ibo tsizapykykynaha anahi Deus ahabo yh̄y my. Kytsa tihi:

– Tsihiwataha za – maha hi piperyky.

Abaka pepykykze kytsa bo mytsaty mykara.

²³ Epararas ikiahatsa humo tsihyrizikbarēta. Atakta katuk siakyriukrēnikitsa hurukwy eze tu. Atahi Sesus soho nitsasoko iwatahi kytsa siakyriukrēnikitsa hurukwy bo ziokyhyryknaha.

²⁴ Katuktsa Marakos, Aristarakus, Demas, Rukas iwatsa ahahumo sihyrizikbarētsa mykaranaha.

Deus pahasapywyky.

²⁵ Deus bo ahatsyhyryze mopamykysoko:

– O Deus myzo Sesus Kiristu iki tysisapywyky. Siwahi tsimynapykyryk – my. Iwa Deus bo mynapamykysoko. De. Niwazuba.

Pauro niy

Sudeutsa asaktsa Sesus harere bo hyĩ mykaranaha sibo ziwatahaka

Tubabatu Deus Sudeutsa isopykwytsa nisispirikpo asahi iharere bo tsikaeni zuba ma zikaha iwaze aty ja Sudeutsa bo ziwatahaka, Sesus soho ty nisispirikpoko. Sesus zuba Deus bo mymyoktyhyrykta atahi myhyrizikwanikita ana hi ziwataha. Deus hyrikoso ituk niapykyryk tahi iwatahi Deus harere ziwataha. Abaka katsa kino niwatihi Sesus soho humo tanymyryky.

Deus tse babata.

¹ Tapara Deus taparaktsa bo ziknapamykysoko iharere ziwabykynaha. Hawa hatsa myzotsa Sudeutsa bo ziknapamykysokonaha. Deus sohokotsa taparaktsa bo iharere ziknatsasokonaha.

² Abaka Deus tatse mybo zipeha, atahi Deus harere mybo motsasoko. Atahi mybarawy nizukni Deus harere eze. Deus isuknihyize ipe:

– Mybarawy tsizubarēna abo nyny my – niy.

³ Atahi imysapyrēnikita my. Atahi imykyzonikita my. Deus wata my, hawa Deus mykara mymywatawyky. Iharere humo mybarawy ezektsa bo pisapywyky. Mybarawy iharere humo wasani mykara. Atahi mysapyzekenihyrikosokda iwaze mymysapybyitsa tsikykaranaha tsmoewynahaze atahi mymyokzohik. Iwaze bjoikpe bo nido. Deus humo ba hawa tohi zikaha ibaze tadyhy. Deus tihi:

– Kapanuryk taba dyhyty – niy.

Deus tse bjoikpe iknyktsitsa ahatsa soho.

⁴ Atahi taparakta my. Bjoikpe iknyktsitsa Deus tsumuēhĩtsitsa simysapyrētsa maha atakta tsimysapyrēta babata my. Deus bjoikpe iknyktsitsa soho – Ikihatsa katsumuēhĩtsitsa tsimaha – my.

Deus ipe niy: – O katse babata tsimy – my

⁵ Ba bjoikpe iknykta soho Deus ipe: – Iki katse tsimy. Aba azo mozik – niy.

Ana harere ty hi batu tyso. Iwaze tihi: – Iki kape kazo asopyk.

Utakta ipe katse my – niy.

Anaharere batu bjoikpe iknyktsa bo ziky.

⁶ Iwaze Deus tse babata estuba zubata mybarawy bo zipehaze Deus tihi: – Bjoikpe iknyktsitsa sizubarētsa katsumuēhĩtsitsa ibo mynasakibazikiknahaktsa!

“Ikiakta tsamysapyrēta. Ahumo mykurētsa hỹ” tsimaha – niy.

⁷ Deus harere papeu humo bjoikpe iknyktsa soho botu ziwatahakanaha.

– Bjoikpe iknyktsitsa katsumuēhĩtsitsa maha.

Mysipehaze aidytsa mykaranaha zopok waha.

Deus harere bo ma mykaranaha.

Asaktsa imysapybara izo hyrity watsa – niy.

⁸ Itse soho zuba Deus harere papeu humo tihi:

– Iki zuba mybarawy ezektsa tysipehakakta.

Awahi abazubata tsimy.

Hawa tsimykara ba zimyi wasani tsimykara.

⁹ Hawa ha ty tisapyrēna hỹ tynakara, hawa ha ty batu isapy batu hỹ tynakara.

Iwatahi Deus zawatawyhik ba iakyri tabo zikozonaha.

Atuktsa sakurētsa moziknaha, iki zuba akubabata – niy.

¹⁰ Deus harere niwatihi papeu humo:

- Ikiabazubata koikny bakta tu mybarawy tsikzukni.
 Iki hi bijoikpe tsikzukni wytyk tsikzukni.
- ¹¹ Mybarawy mopykba. Ikiakta awahi tsimynapykyk ba zikokza.
 Mybarawy mysuk isapy barawa mozik.
 Hawa mysuk mysykbaikze mopapykiknaha.
 Anawahi mybarawy mysapybyrize mohokda.
 Iwaze Deus usa mybarawy isapyzey mozokni.
- ¹² Hawa mysuk ty zozozo tsimaha iwaze usta mysuk tsikorobyknaha.
 Iki mybarawy mopykze iwaze usa mybarawy isapyzey mozokni.
 Iki zuba koikny baktatu astatu tsimy, ba zik tsaikba.
 Awahi amysapyrēta – niy.
- ¹³ Deus bijoikpe iknykta humo batu ziky iwatahi batu ipe my:
 – Kabaze dyhy ty! Kapanuryk taba dyhy ty!
 Bykyze kazikwy humo asukyrytsitsa ahare bo hyĩ mykaranaha – niy.
- ¹⁴ Bijoi kpe iknyktsitsa hawa mykaranaha. Asaktsa sihyrikosotsa maha.
 Deus tsumuēhĩtsitsa maha. Deus tyryktsa bo mysiakzoko, mysitsumuēhĩnaha.
 Deus tyryktsa Sesus Kiristu humo simysapyrētsa moziknaha, iwaze sibo
 Deus bijoikpe iknyktsitsa mysiakzoko.

2

Deus harere tsiwabytoktokonahaktsa.

- ¹ Deus tse babata mybo zia kzo iwatahi iharere bo tsiwabytoktokonahaktsa!
 Iharere wasani zuba. Pykyhytu iharere bo hyĩ tynakaranaha iwaze
 myspirikporētsa tsimoziknaha.
- ² Deus harere taparaktsa bo nitsasokonahaze bijoikpe iknyktsa ana ty hi
 hyĩ nikaranaha. Anaharere bo myzotsa batu hĩ nikaranaha iwatsahi sinini
 nikaranaha.
- ³ Katsaktsa ja. Abaka Deus wasania ty tsiwabytoktokonaha zeka Deus pe
 myzo mysopyk. Deus wasania ty tywabyziū ahabyizeka batu Deus pe myzo
 mysopyk. Sinini tsimykaranaha hĩ. Myzotsa watsa sinini tsimykaranaha.
 Bijoi kpe iknyktsitsa batu mybo tyso hawa Deus pe myzo mysopyk. Sesus
 abazuba tahi ituktsa bo Deus wasania ty nitsaso. Hawa Deus pe myzo
 mysopyk sibo nitsasoko. Iwaze asahi:
- Nawa ha ty botu tsiwabynaha iharere baba, ana humo kino wasani hĩ –
 niaha. Iwaze ituktsa mybo nitsasokonaha.
- ⁴ Iwaze Deus siharere bo yhĩ mykara. Tahyrikoso humo hi amy ty
 kytsa batu zikaha asatu mykaranaha. Deus hyrikoso situk mynapykyryk
 iwaze aparakbaha mozororobanaha, Deus zikwy humo. Deus isapyha ty
 aparakbaha bo nyny niy. Deus hyrikoso situk mynapykyryk iwatsahi kytsa
 sipybyrētsa. Iwaha humo Deus siharere bo yhĩ mykara. Iwatsahi wasania ty
 ahabyi zeka sinini tsimykaranaha.

– Sesus Kiristu Deus ziphata Deus bo mymyoktyhyryk –.

- ⁵ Iwaze mybarawy mopykze Deus usa mybarawy mozokni. Deus hi:
 – Mybarawy ezytyk ezektsa ahaharere bo yhĩ mykaranaha – niy. Ana
 kino bijoikpe iknyktsitsa batu tyso. Katsaktsa mybarawy ezektsa bo nitsaso.
- ⁶ Aty Deus harere botu ziwatahaka:
 – Kazo kytsa asaktsa nisisukni sipunihikbyitsa maha.
 Iwatsatuze asaktsa ba zikspiriktsokda.
 Sihumo tsimypokzitsiukrēta.
- ⁷ Abaka bijoi kpe ezektsa sihyrizikwanitsa. Mybarawy ezektsa batu.
 Aiba tohi mybarawy ezytyk myze

mybarawy ezektsa myhyrizikwanitsa tsimoziknaha,
 Deus humo aparakbaha sizubarëtsa myharere bo yhỹ mykaranaha.
 Simysapyrëtsa moziknaha – niy.

⁸ Abaka mybarawy ezektsa ispehatsabyitsa.

Aiba tohi zuba mybarawy ezytyk ezektsa mysipeha.

⁹ Abaka Sesus bo iktsa tsimaha. Deus wytyk bo zipehaze jokboa tu mywata niyzik. Bijoikpe iknyktsitsa sihyrizikwanitsa niyziknaha. Abaka mekybotu my. Sesus nihyrikosokda humo atahi abazubata mozik. Aparakbaha iharere bo zuba hỹ mykaranaha. Deus mywatu impokzitsi iwatahi Sesus mysapyzekenihyrikosokda.

¹⁰ Deusta koikny bakta tu mybarawy nizukni. Tsizubarëna nizukni. Iwatahi mybarawy ezektsa tatuktu mysisapy tsihikik, ihyrytsa moziknaha anawahi mozihikik. Iwatahi Sesus mymyoktyhyrykta mysapyzekenihyrikosokda sinini nikara, wasani my. Deus aparakbaha humo tsimypokzitsiukrëta iwatahi itse babata mysapyzekenihyrikosokda sinini nikaraze – wasani my – Deus niy.

¹¹ Sesus humo mywatu simysapyrëtsa moziknaha. Deus tse babata humo simysapyrëtsa moziknaha. Sisapyrënikitsaktsa Deus hyrytsa maha. Iwaze Sesus myzubaha okze:

– O asaktsa simysapyrëtsa maha utakta ispe: “katukytsa” kasopyk – niy.

¹² Hawa nitsaso botu Deus harere papeu humo ziwatahaka. Ata tihi:

– Kazo asoho katukytsa bo motsasoko,

izumubanahaze abo mosakibaziki

“O kazo ikia tsamysapyrëta” – niy.

¹³ Deus harere papeu humo ziwatahazo. Ta tihi:

– Utakta Deus humo kaspirikporëta iwatahi iharere bo hỹ iky – niy.

Ata tihizo: – Utakta kahyrytsa tuk mynapykyryk. Deus hi isty kabo nyny niy – niy.

Iwa botu ziwatahaka Deus harere papeu humo Sesus soho ziwatahaka.

¹⁴ Sesus mybarawy ezekta mywata niyzik. Mybarawy ezektsa ihyrytsa tsimoziknaha. Mytsani myspu tsimaha iwatahi mywata niyzik. Mybarawy ezekta tuze mohyrikosokda ziky. Nihyrikosokdaze hyrikoso sapybara nisipehakata, Satan as inarokota, Sesus humo zikwybyita niyzik. Sesus ba hawa tohi zikzukni iwatahi Satan as zikwybyita niyzik. Tapara Satan as myzubaha ziknamykbabaka abaka batu, Sesus tahyrikosokdawy humo iwaze Satan as myzuba myhyrikosokdawy batu ziky.

¹⁵ Mybarawy ezektsa batu mohyrikosokda tsihikiknaha. Pibytuhukutu tahapyby myziykyknaha. Tahapetu sisopyk tihi:

– Utakta ba zikara – mynakaranaha. Sesus hi mysapyzekenihyrikosokda. Abaka mywatu ispe:

– Tsimyhyrikosokdanaha zeka ahapyby byihu ja – my.

¹⁶ Sesus bijoikpe iknyktsitsa ba ziksitsumuëhĩ. Mybarawy ezektsa Abarão tsekokatsa asa hi mysitsumuëhĩkĩ asaktsa ihumo simysapyrëtsa moziknaha. Atahi Deus bo mysioktyhyryk.

¹⁷ Iwatahi mybarawy ezektsa Deus bo mysioktyhyrykta itukytsa wata niyzik. Mybarawy ezekta niyzik. Sesus taparakta Deus wahoro zubata eze ziknapamykysokota wata niyzik. Atakta Deus tsumuëhĩtsa my, Sesus niwatihi. Deus tsumuëhĩtsa my. Ziknapamykysokota mybarawy ezektsa nisitsumuëhĩkĩ Sesus niwatihi mybarawy ezektsa nisitsumuëhĩkĩ. Mybarawy ezektsa humo tsimypokzitsiukrëta hỹ. Sesus Deus harere bo hỹ ziknakara, iwatahi imysapyrënikita my mybarawy ezektsa sapyzekenihyrikosokda iwa Deus bo nisioktyhyryk iwatahi mywatu ihumo simysapyrëtsa moziknaha, iwatsahi Deus pe:

– Myzo – mysopyk. Deus mype:
 – Kahyrytsa ahasapybyikitsa tsikykaranaha Sesus humo pahaokzo – iwa Deus mykara.

¹⁸ Sesus sinini nikara. Satanas hyrikoso sapybara ty zimiywy tsihikik naha zetu batu hỹ niy. Iwatahi Sesus mybarawy ezektsa mysitsumuẽhĩ. Asaktsa ustsá mysimiywy tsihikiknaha ata hi mysitsumuẽhĩkĩ iwatsahi wasani zuba yhỹ mykaranaha. Iwatsahi batu simyi ana humo hi Sesus mybarawy ezekta niyzik iwatahi mywatu namytsumuẽhĩkĩ.

3

Moises Deus tsumuẽhĩtsa. Sesus Deus tse babata.

¹ Iwatsahi Sesus soho humo mytsatziutaha katukytsa! Deus nimywatawy ityryktsa tsimoziknaha. Sesus hi mybo nitsasoko Deus zipehata my mywata niyzik. Atakta ziknapamykysokota taparakta myhyrizikwani. Ustsá bo tihi zeka:

– O katsaktsa Sesus mymyoktyhyrykta humo myspirikporẽtsa tsimoziknaha iwatahi mymytsumuẽhĩkĩ hỹ – tsimaha. Iwatsahi Sesus soho humo mytsatziutaha! my.

² Ata kino Deus harere humo hyỹ ziknakara, iharere humo pykyhytu hyỹ ziknakara. Moises Deus harere bo yhỹ ziknakara. Atahi Deus tyryktsa nisihyrinymyryky. Sesus kino niwatihĩ Deus harere humo pykyhytu hyỹ ziknakara.

³ Atakta abazubata. Sesus abazuba tahi Moiesta jokboata tu iwatahi Sesus harere bo hyỹ tsimykaranhaze wasani tsimykaranaha. Kytsa wahoro mozoknikinahaze katsaktsa:

– O awahoro tisapyrẽta ikia asopykziurẽta – tsikaha. Maku tsihyrinymyrẽta iwahoro nizukniki naha humo. Moiesta jokboata tu zuba myhyrizikwani my. Deus Sesus soho:

– Ikia abazubata – my. Iharere abazubata my.

⁴ Kytsa wahoro zuba nizuknikinaha. Deusta mybarawy tsizubarẽna nizukni.

⁵ Moises Deus hyriziktsokzawy wasani ziknakara. Deus tyryktsa nisihyrinymyryky iwa tarabaja ziknakara. Hawa Deus mykara nisihyrinymyryky. Deus tyryktsa humo tsimypokzitsiukrẽta atakta Deus tsumuẽhĩtsa zuba.

⁶ Sesus Kiristu hi Deus isopyk katse babata my. Atahi Deus hyrytsa humo tsimypokzitsiukrẽta hỹ. Katsaktsa Deus hyrytsa tsimaha, atakta myperytsa zubata. Mypunihikrẽtsa zeka katsa tihi:

– O Sesus humo mysapyrẽtsa tsimoziknaha, mywahi Deus tuk tsimynapykyryknaha ana humo ka mykurẽtsa hỹ – tsimaha.

Deus tyryktsa iziuha bo tsimypupunaha.

⁷ Iwatsahi Sudeutsa siakbatsa ba siwa zikaha! Tubabatu Deus hyrikoso sisoho ziwatahaka:

– Abaka kaharere tsiwabynahaktsa!

⁸ Kaharere tsiwabynehaze batu hỹ tsimaha iwaze batu tyso.

Taparaktsa ahadiritsa kaharere bo batu hỹ ziknakaranaha sioktsiokanikitsa.

Jerukbara eze tuze kaharere bo batu ma zikaha.

Tahapetu sisopyk:

⁹ “O katsaktsa mysapybyitsa tsimykaranaha zeka Deus myhumo batu iakyri” nikaranaha.

Sitsyhyryze kazikwy iwatawy iwatsa tu kaharere bo batu h̃y ziknakaranaha.

¹⁰ Kuarēta nityktseheze ziknasitsumuēh̃k̃i iwatsa tu kaharere bo batu h̃y ziknakaranaha.

Iwaze sihumo takyriki.

Kapetu kasopyk: “O simysapybyitsa soho humo mytsaty ziknakaranaha.

Kasopyk humo batu sihyrinymyry iwatsahi zikmyikinaha” iky.

¹¹ Iwatahi ikykubyrisorokbyize

batu aty tohi katuk zikapykyryk iky – Deus hyrikoso niy.

Deus harere hi papeu humo botu ziwataha.

¹² O katukytsa pykyhytutaha! Hawa mytsaty tsimykaranaha pykyhytutaha! Deus koikny bakta tu tawahi my atahi zinymyrybata. Hawa ja isapybara bo mytsaty tsimykaranaha zeka tamyikik tsimaha. Iwaze Deus harere humo batu h̃y tsimykaranaha iwatsahi pykyhytutaha! Ahamyspihikbata byihuja!

¹³ Pibiyituhukutu tyharape kusuknikinahaktsa! Iwaze tsimahaze ba ahamyiwy. Deus mydiritsa siakbatsa pe:

– Aba kaharere humo hỹ tahaktsa – niy. Deus kino myhumo niwatihi – Abaka kaharere humo hỹ tahaktsa! – my, iwaze tyharape punihikwyna-haktsa kytsa! Sesus Kiristu humo tsikaha spirikpotohinaha.

¹⁴ Tapara Sesus humo ahaspirikporētsa ihumo ahakurētsa tsikyziknaha. Iharere wasani tsimaha. Ihumo tyspirikponaha! Kyze mywahi ituk tsinapykyryknaha. Tsimyhyrikosokdanahaze Kiristu watsa tsimoziknaha.

¹⁵ Deus harere papeu humo:

– Abaka kaharere bo wabytaha!

Kaharere tsiwabytahnaze batu h̃y iwa batu tyso.

Taparaktsa ahadiritsa kaharere bo batu ma ziknakaranaha

Ba siwa zikaha! – niy.

¹⁶ Mydiritsa Deus harere ziwabynaha. Mydiritsa Deus harere humo batu h̃y ziknakaranaha. Asaktsa Moises Esito ekze nisioktyhyryk nahatsa.

¹⁷ Asaktsa jerukbara buruk niukurunaha. Isapybara ty nikaranaha ana humo hi Deus takyriki, iwatsahi jerukbara buruk niukurunaha. Kuarēta nityktseheze ziharamuze. Anaeze sizubarētsa niakbanaha.

¹⁸ Asa kino Deus harere bo batu h̃y ziknakaranaha. Iwatahi Deus hi:

– Iziuha botu nikymy ba zikapykyryknaha – niy.

Iwa h̃y niy.

¹⁹ Iwatahi ziuha Deus botu nikymyze ba zikpupunaha. Iharere humo batu h̃y ziknakaranaha, iwatsahi iziuha bo ba zikpupunaha.

4

¹ Deus hi mybo nitsasoko tahi:

– Iziuha aha bo ikymyba anaeze tsimypykyryknaha – niy. Katsaktsa pykyhytu tsimahaktsa! Imysapybara ty tsimykaranaha zeka tsimiwykynaha! Deus harere humo zuba hỹ tahaktsa. Iwaze iziuha bo tsinapupunahaktsa!

² Mydiritsa siakbatsa Deus harere ziwabynaha. Ana ty hi batu h̃y ziknakaranaha. Deus nisisapywy tsihikik batu zik asahi iharere humo batu h̃y ziknakaranaha. Katsa kino niwatihi Deus wasania ty tsiwabykynaha. Pykyhytutaha anaharere humo hỹ tsimahaktsa!

³ Katsaktsa ihumo myspirikporētsa iwatsahi iziuha bo abaka tsimyna-pupunaha. Anaeze tsimymybyrynaha. Hawa Deus byrykywy katsa kino ni-watihi tsimymybyrynaha. Deus mybarawy nizuknibaze tabyryky, tahyryzik-tsokzawy zipykze tabyryky. Katsa kino niwatihi iziuha eze tsimybry tsihikiknaha. Taparaktsa mydiritsa siakbatsa Deus sisoho tihi:

– Iziuha eze botu ahabo ikymyba
ba zikabyry – niy.

Sihumo takyriki iwa niy.

⁴ Deus tabyrywy soho iharere papeu humo ziwatahaka:

– Nawa zuruze usta tsyhyry humo estuba zuba ziakbataze Deus mybarawy nizukni.

Kyze nawa zuruze usta tsyhyry humo petok ziakbataze tabyryky tahyryzik-tsokzawy zipykze – niy.

Deus harere papeu humo ibyrykywy soho.

⁵ Deus harere papeu humo ziwatahazo mydiritsa siakbatsa soho:

– Iziuha eze botu ikymyba ba zikabyry – niy.

⁶ Deus iziuha bo kytsa mynapupunaha mozihikik. Asaktsa mydiritsa siakbatsa hi iziuha eze Deus botu sitsyhyryze zikymyba, ba zikpupunaha, anaeze ba zikabyry. Iharere humo ma zikahabyitsa tuze iziuha bo batu paku paku. Iwaze Deus ustsya kytsa iziuha bo mynapupunaha iwa mozihikik.

⁷ Bykyze iwatahi usta zuruze soho:

– Abaka kaharere humo hyỹ tsimaha – niy. Deus harere Dawi ziwatahaka hi:

– Abaka kaharere bo wabytaha!

Kaharere tsipiwabynaha zeka ahasopyksapyhu ja – niy.

Iwa Dawi tsekokatsa ziwatahaka.

⁸ Sosue nihyrikosokdata Deus tyryktsa, Kanaã bo nisioktyhyryk. Deus iziuha nisioktykyryk zeka Deus usta zuruze soho:

– Abaka kaharere bo hyỹ tsimaha – batu tyso. Nawa Dawi ziwatahaka ustsya tyryktsa soho niy. Asahi Deus iziuha bo mynapupunaha.

⁹ Iwatahi Deus hyrytsa pe niy:

– Kahudikhudikwy tisapyrēna bo tynapupunahaktsa! – my. Deus mybarawy nizuknize iwaze tabyryky. Tabyryky nahawatihi katsa kino tsimymybyrynaha anawahi Deus mozihikik.

¹⁰ Deus sapy iziuha bo tsinapupunaha zeka tsimymybyrynaha. Myhyryzik-tsokzawy mopyk. Hawa Deus tabyrykyze katsa kino tsimymybyrynaha hỹ.

¹¹ Iwatsahi Deus hudikhudikwy tisapyrēna boktsa! Ana soho bo hi mytsatyziutahaktsa! Mykubyrisorokrētsa tsimoziknaha iwaze iziuha bo tsimaha. Ba siakbatsa wa zikaha. Asaktsa Deus harere humo batu hỹ ziknakaranaha iwatsahi Deus hudikhudikwy bo ba zikpupunaha.

¹² Deus harere ka simyharerewabytsa wata my. Iharere mynamy-hyrinymyryky. Deus harere tsipiwabynahaze hawa ha ty mytsaty tsimykaranaha mymywatawyky. Hawa tsimyzihikiknaha mymywatawyky. Mytsaty tsimykaranahaze hawa ha ty wasani my Deus harere mymywatawy. Mytsaty tsimykaranahaze hawa ha ty batu isapy iharere mymywatawy. Deus harere sokorotsapu wata. Sokorotsapu titsarirēta, petok taba itsariwyhyta tawata. Siraratsa nizyzykyrywy wata. (Ipoiktsa sotsokowy buruk maha sokorotsapu tuk tsizykwynaha. Iwatsahi myraratsani sipoiktsa iknyktsa tsiboknaha.) Hawa sokorotsapu myraratsani metutu mykara nawaze Deus harere hawa mytsaty tsimykaranaha hawa tsimyzihikiknaha metutu mykara.

¹³Deus zinyba hỹ, katsa ba ijokbyi bo zikaha. Hawa tsimykaranaha zinyba. Tsimyhyrikosokdanahaze atahi mymywaby. Tsimytsasonahaze:

– O nawa ikykara – botu ziny iwaze hawa tsimytsasokonaha wasani tsimaha zeka tsihyrinymyręta. Iwatsahi mydiritsa watsa byitahaktsa! Deus harere bo hỹ tsimahaktsa iwaze Deus hudikhudikwy tisapyręna bo tsimypupunaha

Sesus ziknapamykysokota babata myhumo tsimypokzitsiaręta.

¹⁴Tubabatu taparakta ziknapamykysokota Deus wahoro zubata bo ziknatsukuk. Iwatahi Deus tse babata bijoikpe bo nitsuk Deus tuk. Atahi abazubata. Iwatsahi ihumo tsimyspirikpotohinaha.

¹⁵Taparakta Deus wahoro zubata eze sizubarętsa nisitsumuęhĩkĩ. Asaktsa batu sipunihik nisitsumuęhĩkĩ. Sesus hi mymytsumuęhĩkĩ atahi mybarawy eze ziknapykyrykze sinini ziknakara. Iwatahi mymytsumuęhĩkĩ. Satanas zimyiwy tsihikik Sesus iharere bo batu hỹ ziknakara. Iwaze Satanas nimymyiwy tsihikikze Sesus mymytsumuęhĩkĩ myhumo tsimypokzitsiukręta. Atahi mymypokzitsiki ta mywata niyzik. Hawa haty tsimykaranaha zinyba iwatahi mymytsumuęhĩkĩ.

¹⁶Iwatsahi Sesus bo tsipomokonaha. Mysikpybybyitsa Deus myzo bo tsimypamykysobanaha. Mypunihikrętsaktsa! Deus myzo hi mymysapywyikik. Myhumo tsimypokzitsiukręta. Mypunihikbyitsa zeka atahi mymytsumuęhĩkĩ. Iwatsahi mypunihikrętsa tsimoziknaha.

5

¹Hawa taparaktsa Deus wahoro zubata eze ziknapamykysokonahatsa siwatawyhytsa niyzik naha motsasoko. Deus nisiwatawy kytsa tu nisiwatawy. Iwaze kytsa nisitsumuęhĩnaha ana humo hi Deus nisiwatawy. Nawa ha ty kytsa Deus bo zibiakaknaha ana kino Deus bo nyny niaha. Aparakbaha humo nyny ziknakaranaha. Deus okzeka myraratsa nisiwezokonaha iwatahi Deus sitsihitsa humo batu iakyri simysapybyitsa nikaranaha nisiokzohik.

²Sipunihikbyitsa tu iwatsahi harape humo simypokzitsiukrętsa niaha. Asaktsa zimyikinahatsa humo simypokzitsiukrętsa. Asaktsa batu sihyrinymyry niwatihi sihumo simypokzitsiukrętsa. Taparaktsa Deus wahoro zubata eze ziknapamykysokonahatsa sipunihikbyitsa kino nikaranaha. Iwatsahi ustsaha humo simypokzitsiukrętsa niaha.

³Asaktsa kytsa watsa. Iwaze myraratsa Deus okzeka nisiwezokonahaze asahi:

– O Deus kamysapybyita tu ikykara iwatahi karara ty ikia bo nyny my iwaze tsikokzohik. Iwaze ikia kape:

“Amysapybyita tu tsikykara paokzohik myraratsa tsihitsa niwatihi simysapybyitsa tu nikaranaha iwaze myraratsa ty kabo nyny tsimykara iwaze mysiokzohik my” – nikaranaha.

⁴Batu aty tohi ziktawatawy ziknapamykysokota zikyzyk. Batu. Deus humo maku ziknapamykysokota mozik ata hi maku ziwatawy. Arę tapara ziknapamykysokota niy. Deus humo iwatawyhyta niyzik.

⁵Taparaktsa Deus wahoro zubata eze ziknapamykysokonahatsa siwatsa Kiristu mynakara. Siwatsa ba ziktawatawy, Deus hi ziwatawy. Iwatawyhyta tu Deus ipe niy:

– Ikiakta katse, abaka azo mozik – Deus niy.

⁶Usta harere Deus papeu humo ziwatahaka:

– Merikisedek wata tsimozik.

Merikisedek Deus ziknapamykysokota Deus wahoro zubata eze ziknakara.

Aparakbaha nisibetesaka Sesus iwata katyryktsa tysitsumuēhĩ mynakara.

Mysibetesaka, tawahi mysitsumuēhĩkĩ

Deus harere papeu humo niy.

⁷ Sesus mybarawy ezekta tu Deus bo ziknapamykysoko. Deus bo hua hua niy, ihyritsik zipoko. Deus zikwybata tu nizihikik zeka ziaксе iwa zeka batu zikyrikosokda. Iwaze Deus zitsumuēhĩkĩ Sesus tasoho bo zuba batu mytsaty ziknakara, tazo bo zuba mytsaty ziknakara. Iharere bo zuba hyỹ ziknakara. Iwatahi Deus iharere ziwabyky.

⁸ Atakta Deus tse babata niy. Iwatatu sinini ziknakara ana humo hi Deus harere bo hyỹ ziknakara. Sinini nikara atahi Deus harere bo hyỹ ziknakara ana humo hi zinymyryky. Anahumo ihyriziktsokzawy nikymyba.

⁹ Atakta tsimysapyrēta. Imysapyrēnikita tu mybarawy ezektsa Deus bo mysioktyhyryk. Asaktsa iharere bo zuba hyỹ mykaranaha, ihumo simysapyrētsa moziknaha. Deus tuk tahawahi mynapykyryknaha.

¹⁰ Deus Sesus pe niy:

– Ikia zuba tapara ziknapamykysokota tsimozik. Merikisedek wata tsimozik. Mybarawy ezektsa tysitsumuēhĩ mynakara, koikny bakta tu tawahi mysitsumuēhĩkĩ – Deus niy.

Deus harere tsipinymyrytohinaha.

¹¹ Tapara ziknapamykysokota niy. Hawa Sesus Kiristu Merikisedek wata pahahyrinymyrykyzyky. Hawa ha ty tsihokdaharēna batu ahawabyhy. Ana harere tsihokdaharēna humo batu wabyziu zikaha.

¹²⁻¹³ Tapara Deus harere bo hyỹ tsimykaranahaze hawa batu ihokdaha ahahyrinymyrētsa. Hawa wasani batu ahahyrinymyry. Hawa batu imysapy batu ahahyrinymyry. Ikiahatsa sibikyhytsa watsa tsimaha. Ibykyhy taje tsotsik pezuku tawata tsimaha. Ibykyhy myzoho bazikboro ikiahatsa iwatsa tsimaha. Aibani zuba ibykyhy siraratsani piboro. Iwaze ikiahatsa Deus soho tsimysihyrinynymyrynahatsa watsa usts kytza zuba pahahyrinymyryknaha. Ikiahatsa hawa ha ty wasani ahape tu ahasopyk iwatsahi ahamysapyrētsa tsimoziknaha. Batu ba hawa tsihokdaharēna batu ahahyrinymyry iwatsahi sibikyhytsa watsa.

¹⁴ Aty skaraba Deus harere bo zuba hyỹ mynakara hawaha tsihokdaharēna pinymyryky, iwaze tsimysapyrēta mozik. Asaktsa siypyktsa watsa maha, asahi myzoho piboronaha. Hawa Deus okzeka wasani my sihyrinymyrētsa, hawaha ty batu sapy sihyrinymyrētsa niwatihi. Sispirikporētsa moziknaha. Tahapetu sisopyk iwatsahi sispirikporētsa moziknaha. Iwatsahi siypyktsa watsaktsa kytza Deus harere piwabyziukunaha.

6

¹ Kiristu harere, nawa ha ty botu tsiwabynaha ana soho bo hi mytsaty mytsaty byitaha! Ana myspirikpowy batu ihokdaha hỹ. Ana myspirikpowy:

– Ahamysapybyitsa tsikykaranaha ana humo hi Deus tuk batu tsinapykyryknaha iwatsahi tsmoewynaha! Deus harere bo hyỹ tsimykaranaha iwatsahi tsimyspirikpokonaha.

² Pihik ty myharasusuwy! Usts kytza tahatsyhyrypetsa ty ahaharek humo paik mahaze Deus hyrikoso ahatuk mynapykyryk. Deus siakbatsa nasihyryzikpobazo. Asaktsa Deus harere bo batu hỹ mykaranaha Deus sinini ykarawy bo mysipeha – niy. Ana kino botu tsinymyrynahaha abaka usta myspirikpowy tsiwabytoktonahaktsa! Iwaze tsipinymyrybanahaktsa kytza.

³ Iwatahi ana hi tsihokdaharēna ahabo tsimytsasoziukunaha. Katsa hi:
 – O Deus ikia tynamytsumuēhīkta tsimahaktsa! – tsimaha.

⁴ Kiristu harere zimoewynahatsa hawa ja niaha. Tubabatu Kiristu harere ziwabynahaze iharere bo yhỹ niaha. Deus hyrikoso situk niapykyryk.

⁵ Asahi:

– O Deus harere tisapyrēna hỹ – nikaranaha. Hawa ha ty kytsa batu zik Deus mykaraze, iwaze asa tihi:

– O Deus zikwyrēnikita my. Ata hi zuba mybo mynasikzo ana ty hi mykara – nikaranaha. Ihumo sipybyrētsa.

⁶ Iwaze Kiristu zerekeknaha ihumo batu sispirikpo niaha. Simysapybyitsa nikaranaha batu isty erek batu zikaha. Sesus Kiristu humo mospirikpozonahaze batu zikaha. Nispirikpobyinahatsa tu kytsa watsa asaktsa Deus tse iharapatawyhyta humo pihyryzikyzykyzonaha. Deus tse pimyjikanaha. Asahi Deus tuk ba zikakpykyknaha.

⁷ Hawa mytsuhuk humo mymywatawyky. Mytsuhuk piokyrywynaha. Hyritsik mynawōze siriktsa moziponaha. Iwaze mydisahawyrētsa tsimoziknaha. Iwa Deus nimysapywyky.

⁸ Usa waratok batu isapy my. Tserekrēna. Towahaditsa zuba mopykyryknaha. Anahi waratok batu mydisahawyky iwa zeka taoketarahoko. Waratok batu sapy hỹ. Na wata asaktsa Kiristu zerekeknahatsa tu Deus sinini ykarawy bo mysipeha.

⁹ – O katukytsa ikiahatsa mekywa tu tsimoziknaha. Asaktsa Kiristu zerekeknahatsa batu siwatsa tsimaha. Kiristu humo ahamysapyrētsa tsimoziknaha. Sesus humo tsimyspirikpotohinaha – tsimaha.

¹⁰ Ikiahatsa Deus hyriziktsokzawy humo tsikykaranaha. Tapara ahatukytsa tsiksitsumuēhīkīnaha. Kiristu tuktsa humo tsipokzitsinaha. Abaka niwatihi Deus tyryktsa mysitsumuēhīnaha. Iwaze Deus humo ahamypokzitsarētsa tsiwatawykynaha. Ana humo kino Deus ba zikspiriktsokda iwaze pahasapywykyry. Atakta imysapyrēnikita tu pahasapywyky.

¹¹ Sesus myziksizo iwatsahi taperykynaha. Taperykynahaze tuharapepokzitsikinahaktsa! Tyharape tsumuēhītohinahaktsa! Anaeze tu tsimyzihikiknaha.

¹² Ahazikabyrihuja! Pykyhytuty ahahyriziktsokzawy humo tahaktsa! Kytsa asaktsa tubabatu Deus humo sispirikporētsa babatsa siwatahaktsa! Deus ispe niy:

– Aibani pahasapywyky – niy. Siakubyrisorokrētsa tu ziperykynaha bykyze Deus isapyhanikia ty sibo nyny niy. Siwatsa tsimahaktsa kytsa! Ahakubyrisoroku ja tsimaha.

Hawa ha ty Deus nitsaso atsatu mykara.

¹³⁻¹⁵ Taparakta Abarão iwa niy. Atakta tsihipikrēta. Deus ipe niy:

– Ikia pasapywyky. Kazikwy humo atse mopuruk ihumo atsekokatsa sizubarētsa moziknaha. Kaharere wasani atsa tyty mykara – Deus niy. Atakta tsimiharerewabyrēta tu iharere wasani hỹ, atsatu nikara. Abarão iharere bo hyỹ nikara. Tapetu isopyk:

– Deus katse ty kabo nyny my – nikara. Tsihipikrēta niapykyk. Iwatahi Deus harere humo itse nipuruk. Deus harere wasani nikara. Iwa hỹ.

¹⁶ Katsaktsa tsimytsaso tsihikiknahaze – Myharere wasani hỹ – my iwaze Deus okzeka myharere wasaniha. Katsa hi:

– O Deus ziknyba hawa motsasoko wasani mykara – my. Iwaze kytsa mysoho iharere wasani my. Hawaha motsaso atsatu mykara maha. Iwaze ba zikahapebetsaknaha, wasape nikara.

¹⁷ Deus kino niwatihi tatyryktsa pe:

– Utakta pahasapywyky ikiahatsa katuk ahawahi tsimynapykyryknaha – niy. Ityryktsa bo ziknapamykysoko atahi:

– Kaharere wasani my. Utakta koikny baktatu kaharere atsatu mykara. Kaharere zuba – niy.

¹⁸ Deus mype niy:

– Utakta pahasapywyky – niy. Ata tihizo:

– Kaharere babaka wasani mykara – niy. Ana harere soho batu mytsaty my. Tozeka ja ba harere mykara. Batu ba. Deus ba zikmyspihikbata iharere humo wasani my. Iwatsahi mypunihikrëtsa! Katsaktsa botu Deus pe:

– O myzo ikia humo mysapyrëtsa tsimoziknaha – tsikaha. Iwatsahi taperykynaha! Atakta mymysapywyky, ihumo mysapyrëtsa tsimoziknaha ana hi taperyky iharere humo taperyky.

¹⁹ Deus humo mysapyrëtsa tsimoziknaha, mywahi ituk tsimynapykyryknaha iwatsahi taperykynaha. Iwatsahi mypunihikrëtsa. Iharere humo mykurëtsa. Deus harere humo batu mypyby atahi mymysapywyky iwatsahi mykurëtsa tsimoziknaha. Deus tuk mywahi tsimynapykyryknaha ana hi taperykynaha.

Tubabatu taparaktsa Deus wahoro zubata eze ziknapamykysokonahatsa Deus sapy eze ipokpedawy bo nikaranaha. Atahi tapara ziknapamykysokota anaeze nitsuk hokbowy ty panu hi iokpezawy ty ana bo hi nitsuk Deus bo ziknapamykysoko myraratsa spu Deus bo nyny niy. Kytsa tsyhyryze Deus bo ziknapamykysoko. Sesus niwatihi bijoikpe bo nitsuk. Anaeze Deus bo isapyha ty nyny niy. Anaeze Deus mopykyk naha bo hi nitsuk iwaze isapyha ty nyny niy ziknapamykysokota wata. Abaka Deus baze atahi mytsyhyryze mynapamykysoko.

²⁰ Tapara Sesus bijoikpe bo nido. Myharaze Deus bo niy. Atahi tapara inapamykysokota niyzik. Iwatahi mytsyhyryze Deus bo napamykysoko, anaeze Merikisedek wata ityryktsa tawahi mysitsumuëhîkî. Aibani Deus bo mymyoktyhyryk ana hi taperykynaha.

7

Merikisedek Serusarëhe zipehata Deus bo ziknapamykysota niwatihi.

¹ Abaka Merikisedek soho motsaso. Atakta Serusarëhe Ezektsa bo zipehata niy. Kytsa tsyhyryze Deus bo ziknapamykysoikik. Taparakta Abarão tasukyrytsitsa bo niwatoroko, nipykze tawahoro bo ziksikiri. Ske buruk Merikisedek zihobyk. Merikisedek ipe niy:

– Deus zuba pasapywyky, isapyrënikia ty abo nyny my – niy.

² Abarão niwatorokoze tasukyrytsitsa namy ziaaksebaik. Sinamy ty tsapukte buruk tuze iwaze ibo zibiakak. Tsizubarëna ty ibo nyny niy. Inamy mytsyhyrytsa sepyk nawaha estuba ibo nyny niy usta namy ty are niy. Iwa Merikisedek bo zibiakak. Merikisedek zinaro piwatawy tihi:

– Atakta tatyryktsa humo wasani ziknasipehaka – my. Serusarëhe hudikhudikwy Ezekta mypehakatsa niy. Serusarëhe hudikhudikwy naro piwatawy.

– Ata humo ihyrytsa sakurëtsa moziknaha – my.

³ Deus harere Merikisedekzo soho ty batu tyso. Taje soho ty batu tyso. Tadiritsa soho ty batu tyso. Tapurukwy ty batu tyso. Tahyrikosokdawy ty

batu tyso. Atakta Deus tse babata wata niy. Deus bo ziknapamykysoikik. Merikisedek ityryktsa bo tawahi nisitsumuêhîkî.

⁴ Atahi tsimyharerewabyrêta nawa ha ty ahabo motsasoko. Isoho bo mytsatyziutahaktsa! Abarão mydiri taparakta tu tanamy ty tsapukte buruk zibiakak. Taparaktsa sisukyrytsitsa namy ziake ana kino nyny niy. Abarão isoho bo mytsaty nikara:

– O atahi tsimysapyrêta my – niy. Iwa mytsaty nikara.

⁵ Tubabatu Abarão tsekokatsa Rewi inarokota Moises ihyrytsa pe:

– Ahatukytsa tahanamy ty tsapukte buruk ahabo pibiakaknaha. Iki-hatsa Deus wahoro zubata eze ziknapamykysonahatsa humo tahanamy ty tsapukte buruk ahabo nyny maha. Sinamy mytsyhyrytsawa sepyk nawa mahaze estuba ahabo nyny maha – niy. Iwa Moises harere papeu humo ziwatahaka. Rewi hyrytsa tahatukytsa namy ty zikziaksekenaha, namy ty sibo zikzibiakaknaha. Sizubarêtsa Abarão tsekokatsa niaha iwatuze tahatukytsa namy ty sibo nyny nikaranaha.

⁶ Merikisedek mekywa tu niy. Atakta batu Rewi tukytsabyita niy, usta mekta tukytsa tu niy. Iwatatu Abarão tanamy ty ibo zibiakak. Inamy mytsyhyrytsawa sepyk nawaha ty estuba myze ibo nyny niy. Tapara Deus Abarão pe:

– Naka ahudikhudikwy mozik. Atsekokatsa sizubarêtsa moziknaha – niy. Iwa Deus harere Abarão pe niy. Kyze Merikisedek Abarão pe niy:

– Deus pasapywyky ahumo tsimypokzitsiukrêta – niy.

⁷ Abarão ihyrizikwani ibo nitsaso. Merikisedek tihi:

– Deus pasapywy ahumo tsimypokzitsiukrêta – niy. Aty anaharere motsasoko tsimyharerewabyrêta hÿ. Atakta isoho motsasoko abazubata kytsa iharere bo ma nikaranaha.

⁸ Kytsa sizubarêtsa Deus wahoro zubata eze ziknapamykysonahatsa tahanamy ty sibo nyny mykaranaha. Asaktsa hawa eze mohyrikosokdanaha. Merikisedek batu ata hi meky watu my. Deus harere hi:

– Merikisedek ispitu my – niy. Iwaze Abarão tanamy ty tsapukte buruk ibo zibiakak.

⁹⁻¹⁰ Merikisedek ske buruk Abarão zihobykze batu itsekokatsaka. Rewi itsekoka ipurukbyize, aibani zuba nipuruk, iwaze itsekokatsa Abarão eze tu niapykyryk. Iwaze Abarão tanamy ty tsapukte buruk ibo zibiakakze Rewi Abarão tsekokatsa tadiri tuk my, iwatahi ata kino niwathi ibo nyny niy. Ipurukbyita tu tadiri tuk inamy ty Merikisedek bo nyny niy. Atakta tapara ziknapamykysonahatsa Deus wahoro zubata eze sibo abaktsa kytsa sinamy pibiakaknaha. Ata hi Merikisedek bo inamy ty nyny niy.

¹¹ Asaktsa Deus wahoro zubata eze ziknapamykysonahatsa mymyhyrinomyrykynaha. Iwatsahi Deus harere bo zuba hyÿ tsimykarannahaze mysapyrêtsa tsimoziknaha ana hi sihyriziktsokzawy maha. Rewi tsekokatsa Deus wahoro zubata eze ziknapamykysonahatsa tu batu sipunihik, Deus harere sihumo tsihokdaharêna. Iwatahi Deus usta ziwatawy atakta mytsyhyryze ziknapamykysokota niyzik. Kiristu ziwatawy. Atahi Deus wahoro zubata eze ziknapamykysokota niyzikze, batu Rewi tsekokatsa watsa, ata hi Merikisedek wata niyzik. Kiristu zikwy mytuk mynapykyryk iwatsahi Deus harere bo hyÿ tsimykarannaha. Ihumo mysapyrêtsa tsimoziknaha.

¹² Rewi tsekokatsa Moises harere humo Deus wahoro zubata eze ziknapamykysonahatsa. Abaka Deus usta ziwatawy, ityryktsa sitsyhyryze ziknapamykysokota niyzik. Abarão hi atakta koikny baktatu Rewi tsekokatsa sisapyzekeniyzik. Rewi tsekokatsa humo ba mysapyrêtsa tsimoziknaha ba zikyknaha. Kiristu humo zuba mysapyrêtsa tsimoziknaha iwatahi Deus

ziwatawy. Abaka Moises harere humo batu myhyrinymyry tsihikik, Kiristu harere bo zuba hyŷ tsimykaranaha.

¹³⁻¹⁴ Atakta Deus zipehata mybetesatsa mozik batu Rewi tsekokatsa niy. Deus ipe niy:

– Ikia katyryktsa tsyhyryze kawahoro zubata eze tynapamykysokota tsimozik – niy. Atahi batu Rewi tsekokatsa niy. Atakta Suda tsekokatsa niy. Moises batu tyso Suda tsekokatsa soho:

– Ikiahatsa Deus wahoro zubata eze ziknapamykysonahatsa anaeze myraratsa mysiwezona iwaze myraratsa ty Deus bo nyny tsimykaranaha – iwa Moises batu tyso.

Usta ziknapamykysokota Merikisedek wata.

¹⁵ Iwatahi Rewi tsekokatsa Deus wahoro zubata ziknapamykysonahatsa batu ihyriziktsokzaha zikaha. Deus usta zipehata sisapy ziakse. Sesus Kiristu zipehata Merikisedek wata my.

¹⁶ Atahi Deus wahoro zubata eze mynapamykysota niyzik. Kytsa harere humo, batu mynapamykysota niyzik batu sisopykwy humo kino niwatihi mynapamykysota niyzik. Atahi ispitu my, koikny bakta tu iwatahi Deus wahoro zubata eze mynapamykysokota niyzik.

¹⁷ Deus harere isoho papeu humo botu ziwataha:
– Ikia kawahoro zubata eze tynapamykysokota.

Kahyrytsa tsyhyryze tynapamykysoko awahi tysitsumuēhīkī hŷ,
Merikisedek wata tynakara – niy.
Deus harere papeu humo ziwatahaka.

¹⁸ Asaktsa Moises harere bo yhŷ nikaranaha batu sipunihik, ana harere humo aparakbaha Deus bo ba ziksioktyhyryk. Iwatahi Deus hi:

– Moises sopyk humo ba tsimyzurukunaha. Kaharere, abaka humo zuba hyŷtahaktsa kytsa! – Deus niy.

¹⁹ Moises sopykwy humo ba mysapytsa zikyziknaha. Sesus hi Deus bo mymyoktyhyryk ata humo hi Deus okzeka mysapyrētsa tsimoziknaha, iwatsahi taperykynaha.

²⁰ Deus Sesus ziwatawyze iwahoro zubata eze mynapamykysokota mozik. Atahi:

– Pawatawyhik kawahoro zubata eze mynapamykysokota botu iktsaso atsatu mykara. Utakta koikny bakta tu my kaharere botu iktsaso wasani mykara – niy.

Tapara Rewi tsekokatsa nisiwatawyze iwahoro zubata eze ziknapamykysonahatsa niyziknaha ana harere ty batu tyso nisiny zuba niy. Sesus bo zuba ana harere nitsasoko.

²¹ Deus harere papeu humo:

– Ikia kawahoro zubata eze tynapamykysokota,
kahyrytsa tsyhyryze awahi tysitsumuēhīkī.

Ahyriziktsokzawy batu zikpykba

awahi tynapamykysokota tsimy – niy.

Deus harere wasani my ba meky watu mytsaty tykara.

²² – Nawa ha ty botu iktsaso atsatu mykara – niy. Iwa Deus Sesus pe zuba niy. Iwatahi iharere abaka wasani mykara. Sesus humo zuba ana harere abaka bazimyi wasani Moises Deus harere nitsasoko ana harere wasani niy. Iharere abaka Sesus pe wasani.

²³ Rewi tsekokatsa Deus wahoro zubata eze ziknapamykysonahatsa nikaranaha. Ziknahyrikosokzakanahaze mektsatu ziknaharape sapyzekykynaha. Iwa hŷ.

²⁴ Sesus ta mekywa tu my. Koikny bakta tu batu aty tohi zisapyzeyky. Sesus zuba tawahi mynapamykysokota my.

²⁵ Iwatahi izikwy humo mysapyrētsa tsimoziknaha. Katsa Deus pe tsimykaranahaze:

– O myzo Sesus humo myspirikporētsa iwatsahi abo tsimypamykysokonaha. Ikiā humo ka mykurētsa – tsimaha. Iwaze Sesus humo mysapyrētsa tsimoziknaha. Atahi tawahi koikny bakta tu. Deus bo mytsyhyryze mynapamykysoko iwatahi Deus bo mymyoktyhyryk hỹ. Ihumo mymytsumuēhĩkĩ iwatsahi mykurētsa hỹ.

²⁶ Atakta tsimytsumuēhĩrēta. Katsa mypunihikbyitsa tu batu sapy tsimaha. Sesus zikwy humo zuba mypunihikrētsa tsimoziknaha. Atahi tsimysapyrēta hỹ. Batu zimyi. Isapybara bo batu mytsaty ziky. Kytsa asaktsa hawa sisapybyitsa mykaranaha ba mywa ziky my. Ata hi imysapyrēnikita bijoikpe bo nido. Deus tuk tasapy anaeze mynapykyryk hỹ.

²⁷ Pibytuhukutu tapara ziknapamykysonahatsa Deus wahoro zubata eze myraratsa ty ziknasiwezokonahaze. Asahi:

– O Deus mysapybyitsatu tsikykaranaha ikiā myraratsa spu humo tymyokzohik. Atyryktsa sisapybyitsa tu nikaranaha humo kino niwatihi tysiokzohik – nikaranaha. Pororo ziknakaranaha.

Sesusta batu siwatsa my. Estuba zuba Deus bo tanury tynyny niy. Mysapybyitsatu tsikykaranaha anahumo hi nihyrikosokda, ba zikyrikosokdazo abaka tawahi ispitu my.

²⁸ Tapara Moises bo nitsaso. Deus kytsa nisihyrinymyrykyze taparaktsa iwahoro zubata eze ziknapamykysonahatsa nisiny. Asaktsa sipunihikbyitsa tu zimyikinaha. Bykyze zuba Deus tse babata ziwatawy. Bykyze itse babata pe:

– Ikiā zuba kawahoro zubata eze tynapamykysokota awahi tynapamykysokota. Kahyrytsa tsyhyryze awahi tysiysumuēhĩkĩkta. Ikiā babata zuba batu zimyi – niy. Deus harere wasani hỹ. Sesus hi mynamybetesawyky my, tawahi mynapamykysokota my taharere tyhi mynakara.

8

Sesus mytsyhyryze Deus bo mynapamykysoikik.

¹ Sesus Kiristu zuba tapara Deus wahoro zubata eze mynapamykysokota ana hi tsipahahyrinymyry tsihikiknaha. Atahi ipyrirykybyita tsimiharerewabyrēta hỹ. Atahi Deus tuk bijoikpe bo nitsuk, anaeze Deus panuryk taba modyhyky.

² Asaktsa Deus wahoro zubata ziknapamykysonahatsa Deus pokpedawy bo ziknapupukunaha anaeze Deus bo ziknapamykysoikiknaha. Ityryktsa tsyhyryze Deus bo ziknapamykysoikiknaha. Sesusta meky wa tu my. Deus wahoro zubata ata hi kytsa nizuknikinaha anaeze Sesus batu mopykyryk, atahi Deus hudikhudikwy bo bijoikpe eze mynapykyryk. Anaeze hi isapy mozik, anaeze mytsyhyryze Deus bo mynapamykysoikik hỹ.

³ Asaktsa Deus wahoro zubata eze ziknapamykysonahatsaktsa tisapyrēna ty Deus bo nyny ziknakaranaha. Deus hi nisiny iwatsahi kytsa tisapyrēna ty Deus bo nyny ziknakaranaha, siraratsa humo kino niwatihi ziknasiwezokonaha. Iwaze siraratsa ty Deus bo nyny ziknakaranaha. Sesus mytsyhyryze mopamykysokota ustsā ziknapamykysokonahatsa watsa Sesus isapyrēnikia ty Deus bo nyny niy.

⁴ Atakta mybarawy ezekta batu ziknapamykysokota my. Ustsā Deus wahoro zubata eze ziknapamykysonahatsaktsa asaktsa Moises harere humo

zuba yh̃ nikananaha iwatsahi kytsa tisapyrēna ty Deus bo nyny ziknakananaha.

⁵ Hawa ha ty bijoikpe eze tu wasani my. Wytyk ezeka hyrikoso zuba my. Deus parik Moises nizuknita atakta ihyrikoso zuba my, ihudikhudikwy baba hi bijoikpe eze tu anahi wasani my. Tubabatu Moises hara tykbaba humo tabete niriktohoze Deus taparik hyrikoso ziwatawy – Nawaty – niy. Deus ipe niy:

– Apararik ty pykyhytu tyzukni! Kahyrikoso hi abo pawatawy – niy. Ziknapamykysonahatsakta kytsa bo nisitsumuēhikīnaha Sesus bijoikpe eze tu mynamytsumuēhikī. Atakta mytsumuēhikītsa.

⁶ Deus tatse zipehaze ihyriziktsokzawy tisapyrēna ipe niy. Asakta Deus wahoro zubata eze ziknapamykysonahatsa, Rewi tsekokatsa sihyriziktsokzawy tisapyrēna. Sesus Deus tse mysapuhyripyrywyta ihyriziktsokzawy tisapyrēna h̃. Tubabatu Deus Moises bo nitsasokoze iharere humo tisapyrēna. Deus hi:

– Aparakbaha mysisapywyky – niy. Iwaze ziknapamykysokonahatsa humo nawa ha ty nitsaso astsatu nikara, iwa kytsa nisisapywyky. Sesus bo nitsasoze iharere tisapyrēna, iharere mymysapywyky. Sesus humo mymysapywyky h̃. Katsa anaharere bo hỹ tsimykarannahaze ana humo hi myspirikporētsa tsimoziknaha. Ihumo kino niwatihi mysapyrētsa tsimoziknaha. Anaharere bo hỹ tsimykarannahaze Deus tuk mywahi tsimynapykyryknaha iwatsahi mykurētsa tsimoziknaha Sesus humo Deus mymysapywyky h̃.

⁷ Tapara Deus Moises bo nipamykysoko. Anaharere tisapyrēnaha zeka usta harere ty batu tyso.

⁸ Moises harere humo myzubaha simysapybyitsa niyziknaha iwaze sisoho Deus harere papeu humo ziwatahaka:

– “Aba usta harere Isareu tyryktsa

Sudeutsa bo motsasoko

abaka kaharere humo sispirikporētsa moziknaha.

⁹ Tubabatu taparaktsa ahadiritsa bo iktsasoko.

Esito ekze iksioktyhyryk.

Kaharere sibo iktsasoikik.

Kaharere humo batu h̃ zikaha.

Iwatahi siharere bo kawabybarawa nazukniki” – Deus niy.

¹⁰ Deus hi:

– Abaka usta harere Isareu itsekokatsa bo motsaso,

abaka kaharere sibo motsaso.

Kaharere humo simysapyrētsa moziknaha.

Kaharere bo mytsatyziu mynakananaha,

kaharere humo ba zikspiriktsokdanaha.

Kaharere bo hỹ mykarannaha iwa mozihikiknaha.

Asahi kape sisopyk:

“O atazuba Deus my” maha.

Utakta ispe kasopyk:

“O asakta katyryktsa h̃” – my.

¹¹ Nawatsatu kahumo tsipiknynaha.

Iwatsahi situkytsa bo batu sihyrinomyry.

Situkytsa pe – O Deus tsinynahaktsa! – iwa ba ziktsaso.

Nawatsatu piknynaha iwatsahi isty peha peha byitahaktsa.

Kytsa myhyrizikwanibyitsa, myhyrizikwanitsa, nawatsatu iwa piknynaha.

¹² Simysapybyitsa tu nikananaha

ana soho bo batu mytsatyzo my.
Simysapybyitsa tu ziknakaranaha humo myspiriktsokdabaik.

Simysapybyitsa tu nikaranaha mysiokzohik niy.
Iwa Deus harere papeu humo tatyryktsa soho botu ziwataha.

¹³ Tapara kyka mopykba. Ezytyk isapyzekeny mozik iwaze ibykyka tsi-moewynaha. Iwa Deus mype niy:

– Kaharere tapara tuky Moises bo iktsasoko ana bo ka mytsaty mytsaty byitaha! Abaka kaharere bo zuba hyĩ tahaktsa! Iwatsahi ahamysapyrētsa tsimoziknaha – Deus niy.

9

Kiristu Deus hudikhudikwy bo nitsuk.

¹ Iwatsahi asaktsa Moises harere bo hyĩ nikaranaha Deus bo:

– O ikia zuba tsamysapyrēta – pororo ziknakaranaha. Iwa Deus parik eze ziknakaranaha. Ataparik kytsa nizuknikinaha.

² Taparaktsa tahararatsa hwyk ty iparik nizukninaha. Tsapukte buruk panu ty zipokpedawynaha. Nataba panu ipokpedawy eze:

– Deus imysapyrēnikita sapy my – niaha. Anaeze rikatsasapy ouro ty, sidisahawyzozowy kino niwatihi atabete hi atsikara ty Deus bo zozo ziknakaranaha. Zikzibytuhukunaha zozozo ziknakaranaha. Iwa hỹ.

³ Iwaze usta taba ipokpedawy eze:

– Atakta imysapyrēnikita babata sapy my – niaha. Anaka abazubaha niy.

⁴ Anaeze siraratsa wezowy ouro ty zoknihita. Ana bete iokmorēnikia ty Deus bo zikziwezokonaha. Iwaze usta sinamysuk ouro ty zoknihita. Tsiziurēta. Anaeze joporosuk tsibik ouro ty zoknihita ty zik niaha. Mana zinaroko sidisahawy joporosuk eze pokpok niaha anaeze zik niaha. Iwaze taparakta Arō zozowy ty bita niaha, tubabatu izozowy humo tasakarebaik. Tapara ky Deus harere Moises bo nitsaso iwaze Moises iharere harahare humo ziwatahaka. Harahare petok aha humo ziwatahaka ana harahare humo petokuha sinamysuk eze zik niaha. Iwa. Sinamysuk eze zik niaha.

⁵ Sinamysuk bete sihyrikosotsa sisapyrētsa. Bijoikpe iknyktsa hyrikosotsa. Sinamysuk tahasara harapu bete niapykyryk. Anaeze ziknapamykysokonahatsitsa simysapybyitsa nikaranaha, kytsa kino niwatihi simysapybyitsa nikaranaha, ana soho hi Deus bo nitsasokonaha:

– O Deus mysapybyitsa tsikykaranaha ana humo hi myraratsa tsiksibakanaha sispu bo iktsa tsimyze ana humo hi tymokzohik – nikaranaha. Iwaze Deus hi:

– Ahamysapybyitsatu tsikykaranaha ana soho humo hi takyriki ahararatsa ahasapyzekeny tsiksibakanahaze pahaokzohik – niy. Iwa tisapyrēna hỹ. Abaka ana soho ba pahahyrinymyry.

⁶ Iwaze Moises tukytsa ata parik nizuknibanaha iwaze asaktsa ziknapamykysonahatsaktsa ipokpedawy taba ziknapupuikiknaha. Anaeze tsizubarēna nikymynahaze Deus okzeka sihyriziktsokzawy ziknakaranaha.

⁷ Usta ipokpedawy tabaka taparaktsa ziknapamykysonahatsa tuk estuba zuba ibo ziknatsukuk. Ba zikzytyhykwa ziktsukuk. Iytyk tsehewywa eze zuba ziknatsukuk. Zinatsukukze myraratsa spu zuba zikorokonaha. Iwaze Deus pe niy:

– O Deus kararatsa kasapyzekeny ibeze iwatahi kamysapybyita tu ikykara tsikokzo. O Deus myraratsa ahyrytsa sapyzekeny tsiksibanaha iwatahi simysapybyitsa tu nikaranaha tysiokzohik. Abaka myhumo akyri byihuja – nikara.

⁸ Katsa mytsaty tsimykarannahaze anapokpedawy eze taparakta ziknapamykysonahatsakta tuk estuba zuba zuruze inatsuk, Deus hyrikoso ana soho nimyhyrinymyryky. Hawa kytsa Deus sapy bo ba zikpupunaha Deus hyrikoso nimyhyrinymyry. Iparik atatuze kytsa Deus bo bijoikpe eze ba zikpupunaha.

⁹ Ziknapamykysonahatsa Deus wahoro zubata eze tuze, sisapyrēnikitsa ty zuba Deus bo nyny nikaranaha. Siraratsa ty kytsa sapyzokytsa Deus bo nasiwezokonaha. Iwatsatu siraratsa ty nyny nikaranahaze kytsa hi:

– Katsakta batu mysapy tsimaha, mysapybyitsa tu tsimykarannaha – nikaranaha.

Hawa ha ty ziknakaranaha Deus parik eze nimyhyrinymyryky. Aba zuba Kiristu mozumuze iwaze katsa Deus bo tsipomonaha. Ihumo mysapyrētsa tsimoziknaha.

¹⁰ Moises harere bo yh̄y nikaranaha. Wastuhu sidisahawy humo batu hauk niaha. Wastuhu siopuwy humo ba zikunaha. Sisopyk tyty tahakpikiknaha iwa ziknakaranaha. Sinury humo zuba siziurētsa niyzikiknaha, simiywynahatsa nikaranaha, iwa ziknakaranaha. Aibani Deus harere abaka nitsasokoze hawa Kiristu humo zuba mysapyrētsa tsimoziknaha ana harere hi taperyky.

¹¹ Iwatsatu Kiristu izumu. Ata hi ziknapamykysonahatsa Deus wahoro zubata eze nisisapyzoky atahi nymytsumuēh̄k̄i.

– Hawa ha ty isapyrēnikia ty ahabo nyny my – mykara. Deus bo mytsyhyryze mynapamykysoko! Batu iparik eze tu my, ana hi kytsa nizuknikinaha. Atahi bijoikpe bo Deus tuk tasapy Deus baze niapykyryk anaeze Deus bo mytsyhyryze mynapamykysoko, ana hi tisapyrēna.

¹² Deus tuk tasapyze aparakbaha hi:

– Atazuba mysapyrēnikia bo nitsuk. Estuba zuba nitsuk. Siraratsa spu ty batu wabehyryk niy. Hozipyrykza spu pikuza spu iwa batu wabehyryk niy. Sispu ty Deus bo batu tywatawy ziknapamykysonahatsa Deus wahoro zubata siwatsa niy. Mysapyzoky nihyrikosokda iwatahi taspu tyty Deus bo zinyny. Ispu humo mysapyrētsa tsimoziknaha iwatsahi mywahi Deus tuk tsimynapykyryknaha – nikaranaha.

¹³ Tapara kytsa simysapybyitsa ziknakaranaha, Moises mypehawy bo batu h̄y ziknakaranahaze simysapybyitsa ziknakaranaha. Iwatsahi ziknapamykysonahatsa Deus wahoro zubata eze siraratsa spu ty nisinyzokonaha. Sisopyk humo hozipyrykza spu, pikuza spu, pikuza tsibik ziwezokonaha izohyri ty iwa nisinyzokonaha. Iwaze Deus okze wasani niyziknaha.

¹⁴ Iwa maha zeka Kiristu spu humo mysapyrētsa babatsa tsimoziknaha. Ihumo myspirikporētsa. Kiristu batu ziky tsimysapyrēta zuba. Bazimyi. Deus koikny baktatu ihyrikoso ituk mynapykyryk. Atatu nizihikik Deus bo itanyny niy, mysapyzoky nihyrikosokdaze iwaze Deus bo atatu itanyny niy. Atahi:

– O kazo ziknapamykysokonahatsa awahoro zubata eze siraratsa nisiwezobanahaze kytsa simysapybyitsa nikaranaha ikia hi:

“O asakta wasani maha siraratsa kytsa sapyzoky nisibanaha iwatahi wasani maha” tsiktsasoko. Abaka kaspu humo aparakbaha simysapyrētsa babatsa moziknaha, sisapyzoky ikyrikosokda iwatahi ikia ispe:

“O ahamysapyrētsa babatsa tsimaha katsespu humo tsimy” – Kiristu niy.

Mysapyrētsa tsimoziknaha iwatsahi mysapybyitsa tsikykarannaha mytsaty mytsaty byijataha. Hawa Deus koikny baktatu itsyhyryze tarabajaziu tsimykarannaha ana humo hi mytsaty tsimykarannaha.

Abaky Deus harere.

15 – Asaktsa Moises harere bo yh̃ nizihikiknaha tsahi tapara iharere bo batu h̃ ziknakaranaha iwatsahi zimynahatsa tu nikaranaha. Kiristu simysapybyitsa nikaranaha humo nihyrikosokda. Abaka Sesus Kiristu hyrikosokdawu humo Deus simysapybyitsa nikaranaha mysiokzohik. Iwatahi Deus harere abaky mybarawy ezektsa bo niy. Ikiahatsa kawatawyhytsa tsimaha. Katuk ahawahi tsimynapykyknaha, Kiristu mytsapuhyripyrywyta ahasapyzky nihyrikosokda iwatsahi ahamysapyr̃tsa babatsa tsimoziknaha – niy. Iwa Deus Kiristu humo mymysapywyky.

16-17 Kyze aty my zeka:

– O uta mohyrikosokdaze kahyrikyky ty abo nyny my – my. Mohyrikosokdaze ihyrikyky ty usta bo nyny my za. Atatuze usta inamy batu ziaксе. Ispitu zeka usta namy ba ziaксе. Aty tsasoho tihi:

– Atakta nihyrikosokda – niy. Iwaze zuba kytsa piwabynahaze ihyrikyky ty usta piakse.

18 Taparaktsa mydiritsa siakbatsa siraratsa nisibanaha. Iwaze zuba Moises harere bo yh̃ nikaranaha.

19 Moises Deus harere aparakbaha bo nitsasoko iwaze pikuza tsibik zibeze hozipyrykza kino niwatihi zibeze sispu ty pihik ty tsakykyha niy. Joporosuk bo su niy. Iwaze iparikiha sazik ty isopo inarokoha nizokbatsi panu hozipyrykzazi nitsazikze isopo ity sok niyze izi tsitsairihar̃na niyzik ispu humo. Kyze kytsa siharek bete su niy, ipapeu humo kino niwatihi siraratsa spu ty su niy.

20 Kytsa bete, ipapeu humo kino niwatihi sispu ty su niyze ata hi:

– Deus harere mybo nitsaso iwatsahi ana harere bo yh̃ tsimahaktsa! Ana spu ahaharek bete su myze iwaze ikiahatsa Deus harere bo yh̃ tsimaha – niy.

21 Iwata Moises Deus parik bete siraratsa spu ty su niy. Iparik isapyr̃nikia ty sibete niwatihi siraratsa spu ty susu nikara.

22 Asaktsa Moises harere bo yh̃ nizihikiknaha siraratsa ty ziknasibaikiknaha. Iwaze kytsa meky watu niyziknaha siraratsa spu humo. Deus anabo hi iksa niyze bazik takyri kytsa simysapybyitsa nikaranaha sispu humo nisiokzohik. Sinamy kino niwatihi siraratsa spu nisiharasusukuze tisapyr̃na niyziknaha. Siraratsa sibaha byizeka batu sispu, iwaze Deus kytsa simysapybyitsa tu nikaranaha batu isty okzohik. Iwa h̃.

Sesus Kiristu mysapyzky nihyrikosokda iwatahi Deus mysopyksapybyitsa tsimykaranaha mymyokzohik.

23 Ziknapamykysonahatsa Deus wahoro zubata eze siraratsa ziknasiaikiknaha, aparakbaha sapyzky ziknasibakanaha. Asaktsa bijoikpe bo Deus tuk tawahi mynapykyryknaha ispu meky watu maha. Katsaktsa Kiristu spu humo, mysapyr̃tsa tsimoziknaha, ana humo hi bijoikpe bo mywahi Deus tuk tsimynapykyryknaha.

24 Iwatahi Kiristu Deus iparik bo batu paku. Anaeze ky bo kytsa suknihi bo ba ziksuk. Iparik hyritywata bijoikpe eze tu, batu paku. Bijoikpe bo Deus tuk tasapy. Anaeze hi Deus bo mytsyhyryze mynapamykysoikik iwa mymytsumũh̃k̃.

25 Iytyk tsehewa estuba zuba taparakta ziknapamykysonahatsa Deus wahoro zubata eze imysapyr̃nikita babata sapy bo nitsuk. Nitsukze siraratsa spu zebykyrykze. Deus ana bo hi iksa niyze aparakbaha simysapybyitsa nikaranaha nisiokzohik. Kiristu anabo batu paku atatu Deus bo itanyny mykara. Estuba zuba Deus tuk tasapy iwatahi ibo itanyny niy.

²⁶ Ziknapamykysokonahatsa wa horokba ziknakaranahatsa tu nihyrikosokdaikiknaha. Mybarawy nizuknize sinini mynakara batu iwa hỹ. Estuba zuba nihyrikosokda ba zikyrikosokdazo. Mybarawy epykbyize Kiristu wytyk bo inasikze nihyrikosokda iwatahi izumu imysapybara zimoewyba.

²⁷ Nawatsatu tsimyhyrikosokdanahaze Deus metutu mymysapy.

– Ata hi my:

“Asaktsa wasani my. Utsa batu simysapy my” – my. Iwa myhuak ty mybo nyny my, asaktsa Sesus harere bo yhỹ ahabyitsaktsa sinini ykarawy bo mysipehahik.

²⁸ Kiristu niwatihi estuba zuba nihyrikosokda. Deus bo atatu itanyny niy. Taparakta Deus wahoro zubata eze siraratsa nisiba siwatsa Sesus mysapyzeken nihyrikosokda. Iwaze mysapybyitsa tsikykaranaha Deus pahaokzohik. Sesus botu nihyrikosokda mybarawy bo myziksizo. Myziksizoze batu mysapybara bo baziky, myziksizoze izikwy humo mysapyrẽtsa tsimoziknaha. Abaka atahi mytaperyky hỹ, ihumo mysapyrẽtsa tsimoziknaha.

10

¹ Kyze asaktsa Moises harere bo yhỹ nizihikiknahaze Deus harere tsikaeni zuba sihyrinomyry. Deus wahoro zubata eze taparakta tuk ziknapamykysonahatsa siraratsa nisibaikiknaha, iwatsahi pororo ziknakaranaha kytsa sitsyhyryze nisibakanaha iwatsa tu kytsa batu sispirikpo.

² Simysapyrẽtsa niyziknaha zeka batu tahapetu sisopyk:

– O katsaktsa batu myku imysapybara humo tsikykaranahatsa hi mysukatsihikrẽtsa tsimykaranaha – nikaranaha. Simysapyrẽtsa niyziknaha zeka siraratsa tyka beze beze byitaha.

³ Iytyk tsehewa tu siraratsa nisibakanaha pororo ziknakaranaha, tahamysapybyi humo nikaranaha iwatsahi siraratsa nisibanaha. Iwatsatu batu tyso:

– Abaka mysapyrẽtsa. Deus okzeka wasani tsimaha mysapybyitsa tsikykaranaha pahaokzohik – nawa batu tyso. Asahi:

– Katsa tsimynahatsa. Hawa mysapybyitsa tsimykaranaha – nikaranaha.

⁴ Pikuza spu hozipyrykza spu kino niwatihi simysapybyitsa ziknakaranaha anahumo hi batu siokzo.

⁵ Iwatahi Kiristu izumu. Ziokpyryze Deus pe niy:

– O kazo mybarawy ezektsa siraratsa mysibanahaze akubyita tsimykara.

Mybarawy ezektsa tisapyrẽnikia ty abo nyny mahaze akubyita tsimykara.

Kanury tsipikomyze kabo nyny tsimy iwatahi mybarawy ezekta mozik.

⁶ Mybarawy ezekta siraratsa mysibaze imysapybyitsa nikara naha humo, akubyita tsimozik.

Aokze siraratsa nikorobanahaze simysapybyri humo akubyita tsimozik.

⁷ Iwatahi utakta: “O Kazo mybarawy bo mynasik iwatahi aharere bo zuba hỹ mynakara.

Iwa my. Hawa kasoho botu papeu humo ziwatahaka” – niy.

Iwa Kiristu tazo pe niy.

⁸ Tapara iwa niy:

– Mybarawy ezektsa siraratsa ziknasibakanahaze Deus iakubyita ziknakara. Tisapyrẽnikia ty ibo nyny ziknakaranahaze iakubyita niyzik. Deus

okzeka siraratsa ziknasiwezobaiknahaze iakubyita ziknakara. Kytsa simysapybyitsa nikaranaha humo siraratsa nisibanahaze iwatsahi simysapybyitsa nikaranaha ana humo hi Deus nisiokzohik iwatatu iakubyita nikara – niy.

Iwa Sesus Deus soho niy. Tubabatu Moises taharere humo nisipehahik iwatatu Deus sisopyk humo iakubyita ziknakara.

⁹ Iwaze Kiristu hi:

– Uta wytyk bo mynasikze aharere bo zuba hyŷ mynakara iwaze kahumo akurēta tsimozik – niy.

Iwa myze mymywatawy abaka siraratsa wezo humo niwazuba mykara.

– Deus harere bo pykyhytu zuba hyŷ mynakara iharere bo zuba hyŷ mynakara iwaze siraratsa ty ka abaka beze beze byitaha tsimaha. Myzubaha sapyzky mohyrikosokda – niy. Iwatahi Deus mysapybyitsa tsikykaranaha mymyokzohik Kiristu mysapyzky nihyrikosokda.

¹⁰ Sesus Kiristu Deus nizihikik naha humo zuba hi hyŷ nikara iwa zikzuruku. Ikahaty zuba nihyrikosokda iwa Deus bo atatu itanyny niy. Nihyrikosokdaze mysapybyitsa tsikykaranaha Deus ihumo mymyokzohik. Iwatsahi ihumo mysapyrētsa tsimoziknaha, ana hi Deus mybo piwatawy.

¹¹ Zikbyituhukutu Deus wahoro zubata eze ziknapamykysokonahatsa siraratsa ziknasiwezoikiknaha. Deus wahoro zubata eze ziknariktorikto-hokonaha tahahyrikosokzawy humo zuba ziknakaranaha. Siraratsa nasiwezokonahaze kytsa simysapybyitsa nikaranaha batu isty okzohik. Deus siraratsa koro bo iktsa nikaraze kytsa simysapybyitsa nikaranaha ana humo hi batu isty okzo.

¹² Sesus Kiristuta ikahaty zuba nihyrikosokda. Nihyrikosokdaze kytsa simysapybyitsa nikaranaha Deus Sesus humo nisiokzohik. Sesus Deus bo atatu itanyny niy. Deus baze ipanuryk taba mynadyhyky. Anaeze tawahi mynapykyryk.

¹³ Anaeze hi Sesus tasukyrytsitsa mysiperyky, iharere bo yhyŷ mykaranaha, ana hi piperyky. Deus botu ipe niy:

– Uta kazikwy humo asukyrytsitsa aharere bo hyŷ mykaranaha – niy.

¹⁴ Ikahaty zuba nihyrikosokda. Katsa mysapybyitsa tsikykaranaha ihumo nimyokzohik iwatahi nihyrikosokda. Ihumo mywahi mysapyrētsa tsimoziknaha.

¹⁵ Deus hyrikoso ana ty hi nimyhyrinymyryky. Tapara Deus harere papeu humo ziwatahaka:

¹⁶ – Aibani uta katyryktsa kazikwy humo simysapyrētsa moziknaha.

Abaka sibo motsasoze kaharere bo mytsaty tynakaranaha.

Abaka sakurētsa kaharere bo mytsatyziu mynakaranaha.

Kaharere humo ba zikspiriktsokdanaha – niy.

¹⁷ Kyze Deus hyrikoso iwa ziwatahaka.

– Hawa ahamysapybyi tsikykaranaha ana bohi ba mytsaty ziky.

Hawa ahasopyksapybyri tsikykaranaha soho ba mytsaty ziky – Deus hyrikoso niy.

¹⁸ Mysapybyitsa tsikykaranaha Deus taokaniki abaka batu. Iwatsahi mysapybyitsa tsikykaranaha humo siraratsa ba ziksiwezozonaha. Sesus Kiristu nihyrikosokdaze mysapyzky niyzik iwatahi Deus mymyokzohik mysoho ty batu tywaby. Atahumo hi mysapyrētsa tsimoziknaha.

O kytsa Deus bo tsimahaktsa Sesus Kiristu humo.

¹⁹ Iwaze hi:

– O katukytsa mysapyrētsa tsimoziknaha. Mypunihikrētsa tsimoziknaha. Deus bo tsimypamykysokonahaze katsa ipokso batu mypyby tsimaha. Sesus

Kiristu mysapyzekenihyrikosokda iwatsahi Deus imysapynikia bo tsimypupunaha. Hawa taparaktsa:

“Atakta imysapyrēnikta babata sapy bo” ziknapupukunaha siwatsa Deus bo tsimynapamykysokonaha. Batu ipokso mypyby – tsimaha.

²⁰ Taparakta ziknapamykysonahatsa tuk ana ipokpedawy panu ana bo hi pororo ziknakara iwaze Deus bo ziknapamykysoikik. Katsa Sesus mysapyzekenihyrikosokda naha humo Deus bo tsimypamykysokonaha. Nihyrikosokdaze ipokpedawy panu nisykbaik abaka Sesus humo Deus bo tsimaha. Atakta ispituzo iwatahi, iske ezytyk wa, atakta Deus ske tsimaha. Iwatsahi ibo tsimynapamykysokonaha hỹ.

²¹ Sesus mynapamykysokota my. Atahi abazubata my. Deus tyryktsa mysitsumuēhĩkĩ, ata kino mymytsumuēhĩkĩ hỹ.

²² Iwatsahi Deus bo tsimypamykysonahaktsa! Ihumo tsimyspirikpobanahaktsa! Ba ahape tu ahasopyk:

– Tozeka ja kasapybyita mykara. Kamysapyrēta ja. Batu kanyhy – iwa batu tyso. Sesus humo mysapyrētsa hỹ. Hawa mymytsyhyrytsapik nahawa iwaze myziurētsa tsimoziknaha, iwatsa katsa ihumo mysapyrētsa tsimoziknaha.

²³ Hawa ha ty Deus motsasoko atsatu mykara. Katsa hi:

– Deus mymysapywyky ituk mywahi tsimynapykyryknaha – tsimaha. Batu tyso:

– Deus ja mymysapywy. Tozeka ja ituk mywahi tsimynapykyryknaha. Batu mynyhy – iwa batu tyso.

Deus harere bo zuba tsimykaranaha, iwatsahi iharere humo tsimyspirikpotohinahaktsa kytsa! Iharere tsiperynaha.

²⁴ Tyharape pokzitsikinahaktsa! Tyharape tsumuēhĩnahaktsa! Hawa Deus humo mysapyrētsa tsimoziknaha iwatsahi ustsak ytsa tysisapywykynaha! Katsa sihumo mypokzitsirētsa iwatsahi tysisapywykynahaktsa.

²⁵ Tynakykpyknahaktsa kytsa! Wastuhu Sesus tuktsa zukbyitsahi tsiwabynaha. Ba siwa zikaha. Tynakykpyknahaktsa iwatsahi Deus harere ty tanymyryky. Tyharape hokusukninahaktsa! Mypehatsa atsoko myziksizo iwatsahi taperyky iwaze tynakykpyknahaktsa!

²⁶ Abaka Deus harere wasania ty tsiwabynaha. Ana harere bo hi hỹ tsimykaranaha tsa tu batu ma zikaha, iwaze Deus myhumo taokanizo. Iwatsahi katsa Deus pokso mypybyrētsa tsimozikzonaha. Iwaze batu mysapyzo, iwataku Sesus mysapyzekenihyrikosokda iwatsahi batu myhuakak mysapybyi humo tsimynakaranaha.

²⁷ Hawa Deus mykara ana pokso hi mypybyrētsa. Katsa iharere bo hỹ aha byizeka sinini tsimykaranaha. Iwaze Deus mymypehanaha taperyky. Hawa mykpyri piwezona waha sinini tsimykaranaha.

²⁸ Tubabatu asaktsa Moises harere bo batu yhỹ niahaze ustsak ytsa nisi-baiknaha. Kytsa petoktsa hawazeka harakykbyihitsa nitsasokonahaze:

– O atakta isapybyitatu nikara, Moises harere bo batu hỹ niy – nikaranaha. Kytsa atsatu nitsasokonaha zeka iwaze ata maku zibezenaha. Kytsa ihumo batu simypokzitsiu iwatsahi zibezenaha.

²⁹ Abaka kytsa siwatsa maha, asahi Deus tse humo batu siharereziu. Deus botu ispe:

– Ahamysapyrētsa tsimoziknaha. Katse ahasapyzekenihyrikosokda ahamysapybyitsa tsikykaranaha Sesus humo zahaokzohik iwatsahi ahamysapyrētsa tsimoziknaha – niy. Asaktsa katse harere bo batu hỹ niaha. Asahi:

– O Deus atse nihyrikosokda katsaktsa ihumo batu mospirikpo, iharere bo batu hỹ tsimaha – mykaranaha. Iwa niahaze Deus hyrikoso soho

pisapybyikinaha. Ihyrikoso sihumo tsimypokzitsiukrēta my, asaktsa ihumo pisapybyikinaha. Iwatsahi sinini mykaranaha. Kytsa Moises harere bo batu hỹ nikaranaha sinini nikaranaha. Asa hi Deus hyrikoso zisapybyrikinaha sinini mykaranaha hỹ.

³⁰ Hawa Deus tyryktsa tuk mykara iwa myhyrinymyrētsa. Deus harere papeu humo botu ziwatahaka:

– Tubabatu utakta katyryktsa mysitsapusare iky. Abaka batu.

Asaktsa kaharere bo hỹ mykaranaha zeka, sisukyrytsitsa pokso mysibetesaka.

Asaktsa zisapywykynaha isapyrēnikia ty sibo nyny my.

Uta ispe my:

“Ikiahatsa tsisapywykynaha my”.

Utsa kaharere bo batu hỹ mynakaranaha.

Utakta ispe my: “Ikiahatsa batu mysapy tsikykaranaha” my.

Simysapybyitsa tuze sinini ykarawy bo mysipehahik – niy.

Iwa Deus harere papeu humo botu ziwatahaka.

³¹ Deus koikny baktatu tawahi mynapykyryk. Atakta myhumo takyriki zeka sinini tsimaha. Wasani tsimyzurukunaha zeka ihumo batu mypyby!

³² Hawa tsikykaranaha bo mytsaty tsimaha. Tapara Deus wasania ty tsiwabynahaze ana humo hi hỹ tsikykaranaha. Deus hyrikoso ahatuk niapykyryk. Asaktsa Sesus humo batu sispirikpo pahasininiwykynahaze tsihokdaharēna hỹ. Ikiahatsa ahakubyrisorokrētsa tsikyziknaha.

³³ Utsa kytsa Sesus harere bo batu hỹ mykaranaha pahasapybyikinaha, myzubaha bo pahasapybyikinaha. Iwaze kytsa okzeka sihumo sinini tsikykaranaha. Kytsa sizubarētsa ana bo hi iktsa nikaranaha. Iwaze ikiahatsa kytsa tysitsumuēhīnaha asaktsa sinini mykaranaha tysitsumuēhīkīnaha. Tsimyhyrikosokdanaha zeka batu ahapyby.

³⁴ Ahatukytsa Sesus humo sispirikpo ana humo hi sakyriukrēnikitsa hurukwy bo kytsa mysipeha iwatsahi tsiknasisukpararenaha sihumo ahampokzitsirētsa iwatsahi sibo tsiknakozorenaha. Ahasukyrytsitsa ahanamy ziaksenahaze ahakurētsa tsikyziknaha. Ikiahatsa tihi:

– Deus mymysapywyky isapyrēnikia ty mybo nyny my, bijoikpe eze ituk tsimynapykyryknaha mywahi ituk tsimynapykyryknaha. Ana hi tisapyrēna hỹ. Mynamy aiba tohi zuba myworoba Deus mybo nyny mahaka ana ka batu hawa tohi ziky tawahi mynapykyryk – tsimaha.

³⁵ Iwatsahi ahapunihikrētsaktsa kytsa! Ahapunihikrētsa tu zeka Deus tisapyrēnaha ty ahabo nyny my.

³⁶ Hawa ha ty Deus mozihikik pykyhytu tahaktsa! Ahakubyrisorokoktsa! Iharere bo hỹ tsimaha zeka ahapunihikrētsa tsimoziknaha. Iwaze Deus isapyrēnikia ty botu ahabo nitsasoko anatyhi ahabo nyny my.

³⁷ Deus harere papeu humo:

– Aibani zuba atakta myziksizo.

Iokboha zuba pykaremyny.

³⁸ Kahyrytsa kahumo mospirikpotohinaha

iwatsahi katuk tahawahi mynapykyryknaha.

Kahumo sispirikpo byizeka sihumo batu kaku – Deus niy.

Nawa Deus harere papeu humo ziwatahaka.

³⁹ Katsa Deus humo myspirikporētsa. Batu aty tohi mysoho tihi:

– O asaktsa Deus humo batu sispirikpo iwatsahi sinini ykarawy bo mykaranaha – iwa batu aty tohi mysoho ba ziktsaso. Katsa Deus humo myspirikporētsa iwatsahi ituk mywahi tsimynapykyryknaha. Mysapyrētsa tsimoziknaha. Iwa hỹ.

11

Taparaktsa Deus humo sispirikporētsa nikaranahaze hawa nikaranaha.

¹ Kyze Deus harere bo hyĩ tsimykaranaha iwatsahi ihumo myspirikporētsa iwaze hawa ha ty taperykynaha atsatu mybo nyny my. Ihumo myspirikporētsa mypetu mysopyk:

– Hawa ha ty Deus bo tsikzapykykynaha anatyhi mybo nyny my – tsimaha.

² Tubabatu taparaktsa Deus harere bo hyĩ ziknakaranaha ihumo sispirikporētsa. Iwatahi Deus sisoho ziknatsasoko:

– O asaktsa kaokzeka simysapyrētsa – niy.

³ Deus harere bo hyĩ tsimykaranaha zeka taharere eze mybarawy nizukni, ana hi myhyrinymyrētsa. Aba ibo iktsa tsimykaranaha nizukni. Zinynahabara humo kino nizukni. Taparaka batu tsarawyky iwaze hi tsizubarēna nizukni.

⁴ Aba Abeu soho bo mytsaty my, atakta Deus harere bo hyĩ ziknakara ihumo tspirikporēta hĩ. Atahi Deus isapyha ty Deus bo nyny niy. Iziky kino niwatihi isapyha ty Deus bo nyny niy. Abeu Deus bo nyny niy wasani niy. Atahi Deus humo tspirikporēta hĩ iwatahi Deus ipe niy:

– Ikia kaokzeka wasani tsimy – niy. Iziky bo batu tyso. Atakta Deus humo batu ispirikpo iwatahi isapybara ty ty nikara. Abeu nihyrikosokda. Tubabatu nihyrikosokda iwatahu iharere humo batu myspiriktsokdahu, Deus humo ispirikpota babata niy.

⁵ Aba Enoke soho bo mytsaty my, atakta Deus harere bo hyĩ ziknakara ihumo tspirikporēta hĩ. Iokzahabyitatu Deus bo nido, Deus zikwy humo hi nido. Itukytsa batu ity nyzo niaha, Deus bo botu nido. Tapara idobyize Deus isoho tihi:

– O ata humo kakurēta – niy.

⁶ Katsa Deus harere bo batu hĩ tsimykaranaha, iharere humo mospirikpo byizeka myhumo batu iaku. Katsa ibo tsimypamykysonahaze mypetu mysopyk:

– O Deus koikny baktatu my, myhumo tsimypokzitsirētsa mymysapywyky hĩ ana humo hi myhyrinymyrētsa – tsimaha. Iwaze myhumo tsakurēta my.

⁷ Aba Noe soho bo mytsaty my Deus tihi:

– Mybarawy ezektsa pihik humo mysiharazuzukbaik iwaze mysiakbabawyhik – niy. Ana soho ziwaby Noe hyĩ niy. Hyritsik batu inyhy iwatahu Deus harere bo yhĩ niy. Tsaraha puētsikbyita nizukniki iwaze ioke ihyrytsa ahatsa sireheta moziknaha. Noe taoke zuba, tahyrytsa tuk Deus harere bo hyĩ nikaraze ustsakysa iharere bo batu hĩ ziknakaranaha ziwatawyky. Iwatahi Deus hi:

– O ikia kaokzeka wasani tsimy – niy.

⁸ Aba Abarão soho bo mytsaty my. Deus ipe niyze:

– Nabo meky botu tsikasapykta! Nabokta! – niy. Hyĩ niy. Inyhybyita tu mekybotu Deus harere humo niukuru, iwatahi ihumo tspirikporēta niukuru.

⁹ Kyze anabo zumu. Ana soho Deus tihi:

– Naka asapy mozik – niy. Ana bo zumuze isukmota wata niukuru. Batu wahoroko niy. Siraratsa hwyk iparik niy, tatse Isake tuk niapykyryk, itsekoka Sako kino niwatihi iparik eze niapykyryknaha. Deus ispe niwatihi:

– Naka ahasapy mozik – niy. Deus harere bo hyĩ nikaranaha ihumo sispirikporētsa iwatsahi iparik eze niapykyryknaha.

¹⁰ Abarão ihudikhudikwy eze ziperyky, anaeze hi Deus mozukni anaeze hi tisapyrēna ana kino ziperyky. Anaka ba zikokda.

¹¹ Aba Sara soho bo mytsaty my. Deus ipe niy:

– Tsiktsaikbatatsa tu tsipabykyhy – niy. Deus harere bo hyĩ ihumo tispirikporētsa iwatahsahi tabykyhy.

¹² Ibarikta Abarão nitsaikbata Deus harere humo ioke tabykyhy. Itsekokatsa sizubarētsa niyziknaha. Hawaze itsekokatsa my. Batu aty tohi ihyrinomyry, byrisoiktsa watsa, batu myhyrinomyry, nimyra hyritywaha niwatihi tsizubarēna hiba, ba ziksiwatawynaha.

¹³ Deus humo sispirikporētsa Abarão, Isake, Sako ahatsa iwa Deus humo sispirikporētsa babatsa. Deus botu ispe niy:

– Anaka ahasapy mozik – niy. Iwatsahi ana soho hi taperyky. Tahatuktu sisopyk:

– Deus harere humo naka mysapy mozik mykaranaha. Mytsekokatsa naka sisapy mozik iharere humo hĩ – nikaranaha. Iwa Deus harere bo hyĩ nikaranaha ihumo nispirikpokonaha iwatsahi sakurētsa niyziknaha. Deus harere nitsasokoze atsatu mykara ana humo hi sihyrinomyrētsa iwatsahi sakurētsa moziknaha.

– O katsaktsa mybarawy eze tsimypykyryknaha tuze mysukmotsa tsimaha. Kasapy bo tsipiharamunaha zuba – niaha. Nihyrikosokdanahaze ana humo hi batu sisukmo iwatsa tu Deus harere humo sakurētsa.

¹⁴ Asaktsa motsasoikiknaha:

– O kahudikhudikwy tsipiharamunaha zuba – mykaranaha usa hudikhudikwy taberiki.

¹⁵ Tahasapy ekze inaonaha tsa hi batu mytsaty zikaha. Tahasapy bo mytsaty mykaranaha zeka iwaze zikzisonaha. Batu ihokdaha.

¹⁶ Asaktsa usa hudikhudikwy taberiki, ana bo hi mytsaty nikaranaha. Anahudikhudikwy bijoikpe bo tisapyrēna. Deus hi anahudikhudikwy sibo nyny my. Deus sihumo batu sikpyby. Ipe nikaranahaze:

– Katsaktsa Deus hyrytsa tsimaha, ihumo myspirikporētsa – nikaranaha. Deus ana harere bo yhy niy.

¹⁷⁻¹⁸ Aba Abarão soho bo puētsik mytsaty my. Abarão tatse ty Deus bo nyny niy. Deus botu ipe niy:

– Atse mopurukze ihumo atsekokatsa sizubarētsa maha – niy. Yhy nikara iwatahi ana harere humo hi itse nipuruk. Kyze Deus Abarão niyze hawa kahumo iakparawy babata pinymyry tsihikikze, iwatahi atakta kaharere bo ma my zeka pinymyry tsihikik. Iwaze Deus ipe niy:

– Atse ikahatahi tsibezehekta! – niy. Iwa niyze – Atakta kahumo tsimypokzitsiarēta babata – mytsaty nikara. Iwaha humo Abarão ihumo iakparawy pihyrinomyryky. Deus ipe niyze:

– Atse ikahatahi tsibezehekta, Abarão iharere bo hyĩ niy.

¹⁹ Tatse asiba zibeze tatuktu isopyk:

“O Deus katse Isake mynahyrikpowy” – niy. Abarão Deus harere bo hyĩ niy ihumo tispirikporēta babata my, ana bo Deus nikozoze ipe niy:

– Niwazubakta! – niy. Iwaze Abarão tatse tawahoro bo zisihyrykzo. Atahi inahyrikpo tawata niy. Iwa Abarão tatse Deus bo nyny niy, hawa ihumo tispirikporēta babata ziwatawy.

²⁰ Aba Isake soho bo mytsaty my. Atakta Deus harere bo hyĩ nikara ihumo tispirikporēta iwaze tahyrytsa pe:

– Deus pahasapywyky, bykyzehu isapyrēnikia ty ahabo nyny my – niy. Iwa ihyrytsa Sako Esau ahatsa bo nikara.

²¹ Aba Sako soho bo mytsaty my. Atakta Deus humo tispirikporēta zumuza-kaze Deus pe niy:

– O ikia zuba amysapyrēnikita ahumo kakurēta hỹ – niy. Nitsaikbata tu tazozowy humo tatyhuziwy niy. Sako tatsekokatsa pe:

– O Deus isapyrēnikia ty ahabo nyny my – niy. Iwa Sose hyrytsa pe niy.

²² Aba Sose soho bo mytsaty my. Atakta Deus harere bo hyỹ nikara ihumo tispirikporēta nikara zumuzakaze tatukytsa pe:

– Isareu tsekokatsa Esito ekze tsinaonahaze, kapoiktsa tysizozikyknaha nabo kahudikhudikwy bo tu tysiityknaha – niy.

²³ Aba Moiseszo soho bo mytsaty my. Asaktsa Deus harere bo hyỹ ziknakaranaha ihumo sispirikporētsa iwatsahi tahatse ziokpitsihiknaha. Esito ezektsa pehakatsa tihi:

– Sudeutsa makuskyrytsa mopuruknahaze tsysibanaha! – niy. Iwatatu Moises zo ihumo batu pyby. Itse tsiziurēta iwatsahi byzoje harakykbyihi zirahaze tabykyhy ziokpitsinaha.

²⁴ Aba Moises soho bo mytsaty my. Atakta Deus harere bo hyỹ ziknakara ihumo tispirikporēta. Esito ezektsa ipe sisopyk:

– Abazubata ste tatse tu tsimy – nikaranaha. Taypykze ana harere batu iakparawy. Deus harere bo hyỹ nikaraze itukytsa bo iakparawy.

²⁵ Situk sinini ziknakara. Imysapybara tu batu hỹ nikara, batu tabo zuba ziknakara. Deus bo zuba ziknakara iwatahi tatukytsa tuk sinini ziknakara.

²⁶ Batu tapetu isopyk:

– O Esito eze tu mynapykyryk zeka kanamy tsizubarēna hỹ my – iwa batu tyso. Deus tyryktsa nisitsumuēhĩ tsihikik hỹ. Iwatahi tatukytsa harere bo batu hỹ nikaranahaze Kiristu wata niyzik. Kytsa iharere bo kino niwatihi batu hỹ nikaranaha, Deus tyryktsa nisitsumuēhĩkĩ zeka tsakurēta hỹ niy. Inamy tsizubarēna humo tsikaeni zuba iakparawy. Iwatahi Deus ziperyky:

– O atahi isapyrēnikia ty kabo nyny my – ana humo kino tsihyrinymyrēta niy.

²⁷ Deus harere bo hyỹ nikara ihumo tispirikporēta tu Esito ekze niparak. Ispehatsa kyriwy humo batu ipyby. Deus harere bo zuba hyỹ nikara ihumo tispirikporēta tsakurēta. Deus bo mytsaty ziknakara nawa zikzuruku iwatatu Deus bo batu iktsa niy, isoho humo mytsaty ziknakara.

²⁸ Moises Deus harere humo hyỹ nikara ihumo tispirikporēta iwaze Isareu tsekokatsa pe:

– Bijoikpe iknykta Esito ezektsa hyrytsa taparaktsa mysiba. Iwatsahi hozipyrykzatsa spu ty ahahokbowytsa bo susu taha. Iwaze bijoikpe iknyktsa iharapu taba my ahahyrytsa taparaktsa batu mysiba ahahyrytsa mysiharamu zuba. Hozipyrykzatsa spu bo iktsa niyze ahahyrytsa ba ziksiba – niy.

Kyze hawa Deus sihumo tsimypokzitsiukrēta mytsaty ziknakaranaha tahamyikaha bo pororo ziknakaranaha Paskoa inarokoha bo.

²⁹ Isareu tsekokatsa kino niwatihi Deus harere bo hyỹ ziknakaranaha ihumo sispirikporētsa. Iwatsahi buburu zuba zitsikzanaha, siekze pihik nitsehespyk. Buburu zuba Pihik Tsikyri inarokoha niy. Bykyze Esito ezektsa atsatu koikny zitsikzakanahatsa tu pihik nisiharapusu. Batu aty tohi arehabytsa.

³⁰ Aba Isareu tsekokatsa soho bo mytsaty my. Asaktsa Deus harere bo hyỹ ziknakaranaha ihumo sispirikporētsa niaha. Sipehatsa Sosue tuk Deus humo sispirikporētsa hỹ. Serikoho okpedawy haraharetsa ty iokarawyhyta iwatsahi sisukyrytsitsa ba ziknapupunaha, anahi inakarabaik. Nawa puruze usta tsyhyry humo petok, Serikoho petaba nikarikinahaze atsoko haraharetsa naktsaktsakbaiknaha.

³¹ Aba Rahabe soho bo mytsaty my. Atatsa Serikoho ezektatsa niy. Tapara kytsa hapik paikpa ziknaparakatatsa. Aiba eze atatsa Deus harere bo hỹ ziknakara ihumo tispirikporētatsa. Sosue kytsa Serikoho hudikhudikwy bo nisipehaze iwa nizokparakanaha, asahi sodadutsa pokso niwakiknaha. Iwaze atatsa wahoro bo izumunahaze atatsa ispe niy:

– Pakutaha. Ikza pahaokpitsīhihik, bykyze kytsa pahaberinahaze ba zahapetumunaha – niy. Bykyzehu Serikoho hudikhudikwy ezektsa Deus harere bo batu h̃ zikaha, iwatsahi kytsa nisibanahaze Rahabe batu. Atatsa itukytsa batu isty ba. Atatsa Deus harere bo hỹ nikara ihumo tispirikporētatsa tu nitare.

³² Aba ustsā kytsa Deus harere bo hỹ ziknakaranaha ihumo sispirikporētsa ahabo batu motsaso, Kideō, Barak, Sasō, Sepata, Dawi, Samue, ustsā Deus sohokotsa iwatsa sisoho batu motsaso, sisoho piwataha zeka ba zikpyk.

³³ Asaktsa Deus harere bo hỹ ziknakaranaha ihumo sispirikporētsa h̃. Ustsā tyryktsa bo niwatorokonahaze sisapyziaksenaha iwatsahi niwakiknaha. Deus okzeka zisapywykynaha iwatahi isapyrēnikia ty sibo nyny niy. Wastuhu kytsa Deus humo sispirikporētsa iwatsahi ustsā kytsa parinita bo nisihorokiknaha, iwatsatu parinita humo batu siborohuk iwa Deus harere bo hỹ ziknakaranaha ihumo sispirikporētsa ziwatawykynaha.

³⁴ Wastuhu kytsa Deus humo sispirikporētsa iwatsahi ustsā kytsa izo zuba bo nisioktsokiknaha, iwatsatuze izo humo ba zikarakoronaha iwa Deus harere bo hỹ ziknakaranaha ihumo sispirikporētsa ziwatawykynaha. Ustsā kytsa asiba nisibanaha sokorotsapuzezety asaktsa niwakiknaha, Deus sihumo tsimypokzitsiukrēta iwatsahi niwakiknaha. Ustsā kytsa siakubyitsa tu sipunihikrētsa niyziknaha. Ustsā bipyritsa bo niwatorokonahaze sipunihikrētsa niyziknaha. Iwatsahi bipyritsa sipokso niwakbaiknahaze nanabyitaba nitururukuknaha. Iwa ziknakaranaha Deus harere bo hỹ ziknakaranaha ihumo sispirikporētsa.

³⁵ Aba wytykyryk soho bo mytsaty my. Asiza hi Deus harere bo ziknakaranaha ihumo sispirikporēza iwazahi sihyrytsa botu niakbanahatsa tu Deus nasihyrizikpowy tahajeza bo tu ziksizonaha.

Usiza sakyriukrēnikitsa nisimyitsapyriwykynahaze sinini nikaranahatsa nihyrikosokdanaha humo. Sakyriukrēnikitsa ispe:

– Deus harere bo yh̃ ahabyi zeka ihumo ahaspirikpobyihu ja iwatsahi ba zikamyitsapyrizonaha – niaha. Anahi batu siwabytoktoho. Myhyrikosokdanaha humo batu sipyby. Asiza tihi:

– Batu. Tsimyhyrikosokdanaha zeka, bykyzehu Deus mymyhyrizikpowyzo, iwaze mywahi ituk tsimynapykyryknaha h̃ – iwa mytsaty ziknakaranaha. Iwaze kytsa nisibanaha.

³⁶ Ustsā kytsa Deus harere bo hỹ ziknakaranaha ihumo sispirikporētsa iwatsahi kytsa ziknasiapikiknaha. Nisisapybyikinaha. Nisikikinaha, myraratsa hwyk tsazikihi ty nisikikinaha. Karikutsitsiwytsa ty nisitsipatsawarakanaha, iwaze sakyriukrēnikitsa hurukwy bo nisihuruknaha. Asaktsa Deus harere bo hỹ ziknakaranaha ihumo sispirikporētsa tu kytsa nisimyijaikiknaha nisisininiwykynaha.

³⁷⁻³⁸ Ustsā kytsa Deus harere bo hỹ ziknakaranaha ihumo sispirikporētsa sisukyrytsitsa haraharetsa nisipaparakanaha iwa nisibakanaha. Ustsā kytsa Deus harere bo hỹ ziknakaranaha ihumo sispirikporētsa sisukyrytsitsa tsapukte buruk bokokik niaha iwa nisibanaha. Sokorotsapuzeze ty nisibakanaha. Ustsā kytsa Deus harere bo hỹ ziknakaranaha ihumo sispirikporētsa tahasukyrytsitsa pokso niwakiknaha batu sisuku. Tahasuk ty myraratsa hwyk ty ziwowokonaha, hozipyrykza hwyk hi kaberto hwyk hi

kino niwatihi tahasuk ty niaha. Jerukbara tahasapy niaha. Hara jobonita bo zukzuk niaha batu wahoroko. Harahare hoke bo tahokpitsikĩnaha, wytyk hoke eze niwatihi tahokpitsikĩnaha. Batu sidisahawyky taharapa zikziykikiknaha. Kytsa simyijaikiknahatsa ziknasiapikiknaha. Kytsa sisoho:

– O asaktsa sakmyitsakohok ziknakaranaha. Kytsa okzeka sakmyit-sakoho niaha. Deus okzeka simysapyrẽtsa hỹ, mybarawy ezektsa batu sapy mykaranaha iwatsahi katyryktsa humo sisikpybyrẽtsa – Deus niy.

³⁹ Asaktsa Deus harere bo hyỹ ziknakaranaha ihumo sispirikporẽtsa babatsa. Deus sisoho hi:

– O ikiahatsa tsahamysapyrẽtsa tsimaha – niy. Simysapyrẽtsa mybarawy eze zikzurukunaha. Deus isapyrẽnikia ty sibo nyny ahaziwazy niy. Iwatsa tu nihyrikosokdanaha.

⁴⁰ Deus aparakbaha nisisapywytsihikik. Iwatahi ziperyky mybo mytsaty nikara. Abaka asahi iharere bo hyỹ mynakaranaha ihumo sispirikporẽtsa myzubarẽtsa mymysapywyky. Ihumo mysapyrẽtsa tsimoziknaha. Iwatahi katsaktsa Deus zikwy humo mysapyrẽtsa tsimoziknaha, ustsya kytsa taparaktsa kino niwatihi ihumo sispirikporẽtsa simysapyrẽtsa moziknaha. Myzubarẽtsa Sesus watsa tsimoziknaha ihumo mysapyrẽtsa babatsa tsimoziknaha. Iwa hỹ.

12

Deus myzo.

¹ Kyze asaktsa taparaktsa sizubarẽtsa Deus harere bo ziknakaranaha ihumo sispirikporẽtsa. Hawa haeze zikzurukunaha tsiwabynaha ana humo hi katsa hi:

– O Sesus harere humo pykyhytutaha hyỹ tahaktsa. Hawa mymysapybyitsa tsikykaranaha tsmoewynahaktsa – tsimaha.

Atakta moparakze tapara pomo tsihikik amy titsakyrikrẽna zikatsimoevy. Iakubyri mozumu zeka iwatatu ba pyk ziky. Katsa mysapybyitsa tsikykaranaha iwa tsmoewynahaktsa! Nanabyi soho bo ka mytsaty mytsaty byitaha! Katsaktsa tsipimyikinaha iwatsahi Sesus harere humo hyỹ tahaktsa! Tapara zumu tawa tsimoziknaha. Iwaze Deus humo myspirikporẽtsa tsimoziknaha.

² Sesus bo mytsatyziutahaktsa! Ihumo Deus harere bo hyỹ tynakaranahaktsa! Atahi Deus humo tispirikporẽta hỹ. Deus harere bo hyỹ ziknakara. Iwata tsimoziknahaktsa! Atakta nihyrikosokdaze tatuktu isopyk:

– Bykzehu kazo tuk kakurẽta mozik. Asaktsa zikmyijakanaha iwatatu sisapyzeken iharapatawyhyta humo myhyrikosokda. Kytsa hi:

“O kytsa iharapatawyhyta humo mohyrikosokda zeka sisikpybyrẽtsa maha.” Siwa ba mytsaty ziky batu kasikpyby. Deus harere bo hyỹ ikykara iwatahi ituk kawahi mopykyrykze kakurẽta hỹ ana soho bo mytsaty mynakara. Iwaze tsihokdahrẽna Deus humo kamypokzitsiarẽta iwatatu mohyrikosokda – niy. Abaka Deus panuryk taba modyhyky. Deus tuk ityryktsa mysipeha.

³ Hawa Sesus sinini ziknakara naha bo mytsaty tahaktsa! Sakyriukanikitsa ihumo batu siakparawy. Asaktsa Deus harere bo batu hỹ zikaha sispirikpobyitsa tu iwatsahi ziaknikinaha. Atahi tsipunihikrẽta hỹ. Iwata bo hi mytsaty tahaktsa! Iwaze iwata ahapunihikrẽtsa tsimoziknaha. Ihumo tsimyspirikpotohinaha.

⁴ Simysapybyitsa mymypeha tsihikiknaha. Deus wasania ty sibo tsiktasonahaze ana humo hi zahamyijakanaha. Asahi pahabanahatsa ziwazy. Sesus wata batu sinini tsimykaranaha.

⁵ Deus harere bo mytsatzyiutahaktsa! Iharere papeu humo botu ziwatahaka iwa niy. Deus tahyrytsa humo nawa isopyk iwatahi botu ziwatahaka:

– Kahyrytsa pahasininiwyky zeka tsiwabytoktonahaktsa!

Ikiahatsa sinini tsimykaranaha ana humo hi tsinymyrykynaha.

Utakta pahapehahikze tubyizuba taha!

⁶ Mypehatsa myhumo tsimypokzitsiukrēta iwatahi mymysininiwyky iwaze mysapyrētsa tsimoziknaha.

Kahyrytsa spirikpowy bete mysipehako iwaze

wasani mykaranaha iwa kaharere bo piwabytoktononaha – niy.

Iwa Deus harere papeu humo niy. Ana humo hi ahaspiriktsokda byihuja!

⁷ Iwaze sinini tsimykaranahaze ahakubyrisoroktsaktsa! Sinini tsimahaze ahatuktu tsimaha:

– O myzo bijoikpe eze tu mysapyrētsa tsimoziknaha iwahi mozihihikik, iwatahi pahasininiwyky – tsimaha. Katsa myhyrytsa pimynahaze mytaharapehanaha, Deus mykara nawatihi.

⁸ Aty itse isopyksapybyita tuze ipe ahabyizeka:

– Atakta isopyksapybyita atsebyitatu my – tsimaha. Deus kino niwatihi tahyrytsa mysipehaka iwatsahi simysapyrētsa moziknaha. Ispehahuk byizeka batu ihyrytsa babatsa zikyziknaha.

⁹ Mypykbyize myzotsa harere bo yh̄y tsikykaranaha. Ziknamypehakanahaze siharere bo yh̄y ziknakaranaha. Asahi kytsa zuba iwatsa tu siharere bo yh̄y tsikykaranaha. Deus hi bijoikpe eze tuze ihyrikoso my, ata harere humo pykyhytu hȳ tahaktsa! Iwatahi ata mymypehaze iharere humo atsoko hȳ tsimykaranaha, iwa ituk mywahi tsimynapykyryknaha.

¹⁰ Myzotsa ziknamypehakanahaze mysapyrētsa tsikyzyknaha. Sisopyk humo wasani tsikaha, ana hi nizihikiknaha. Deusta tsihyrynymyrēta iwatahi iharere wasani nikara, iwa mysapyrētsa babatsa tsimoziknaha ana humo hi mozihihikik, Sesus wa tsimoziknaha ana hi mozihihikik.

¹¹ Deus mymypehaze mysukatsihikrētsa tsimoziknaha. Sinini tsimykaranahaze batu myku. Bykyzehu mykurētsa tsimozikzonaha. Mydikrētsa Deus harere humo hȳ tsimykaranaha, iwatsahi mysapyrētsa tsimoziknaha h̄y. Mysapyrētsa tu Deus harere humo hȳ tsimykaranaha iwatsahi mykurētsa h̄y.

Deus harere bo zuba hȳ tsimykaranaha.

¹² Iwatsahi ahabo ka mytsaty mytsaty byitahaktsa! Sisukatsihikrētsa tysitsumuēh̄inahaktsa! Asahi tsikaeni zuba Deus harere humo hȳ mynakaranaha. Iwaze ahahumo sispirikporētsa moziknaha.

¹³ Wasani haty zuba ikiahatsa mytsatzyiutahaktsa! Iwatsahi sisopyksapybyitsa tu simysapyrētsa moziknaha.

¹⁴ Ahaōtutsa pauktsitsa bo tysisapywykynahatsa kytsa! Harape tybetsak betsak byitaha! Mysapyrētsa babatsa tsimoziknaha. Mymysapybyitsa tu tsimykaranaha zeka mypehatsa Sesus ba zinyanaha.

¹⁵ Deus myhumo tsimypokzitsiukrēta, myzibytuhukutu myhumo tsimypokzitsiukrēta iwatsahi tyharape tsumuēh̄inahaktsa kytsa! Deus harere humo hȳ tsimykaranaha iwa tyharape tsumuēh̄ik̄naha. Wiharata iskpita wata anahi imyrawywy wata ahabyitaha. Wiharata myrawy batu sapy my. Aty Deus harere bo batu h̄y ahabyi zeka itukytsa kino niwatihi Deus harere bo batu h̄y zikaha. Atakta batu imysapy my. Wiharata iskpita wata. Iwatsahi pykyhytutaha kytsa! Ahatukytsa tysitsumuēh̄ik̄nahaktsa! Iwaze kytsa ahaharere humo ba zikmyinaha.

¹⁶ Asahi mekta oke tu pipyrirykyze tysitsumuēhīnahaktsa! Kytsa Deus harere bo zuba hyĩ mykaranaha tyharape pokzitsinahaktsa! Esau wata ba zikaha. Atahi Deus harere bo batu hỹ nikara. Atahi taparakta taypykta myhyrizikwani. Tabo zuba mytsaty ziknakara. Tsaraparēta niyze tatsy pe niy:

– O katsy adisahawy ty kabo nynytykta. Uta tapara ikypykta hi myzo mohyrikosokdaze ihyrikyky kanamy mozik! Abaka adisahawy ty kabo nyny tsimy zeka ikia taypykta wata tsimozik, myzo mohyrikosokdaze ihyrikyky anamy mozik. Ikia kasapyzeky tsimozik iwatahi Deus pasapywyky. Iwa tsimyzeka adisahawy huak zuba – niy. Deus harere humo batu hỹ niy, iwatahi tadisahawy bo zuba mytsaty nikara. Iwabyitaha.

¹⁷ Aibani zuba Esau myhyrizikwanita niyzik tsihikik. Izo itsyhyryze Deus bo nipamykyso tsihikik ba hawa tohi zikaha. Itse iykpykbita tsyhyryze botu Deus bo nipamykyso. Iwa hỹ. Tapara taypykta tsukatsihikrēta nikara. Nipuziuku. Deus pisapywyky ana hi nizihikik. Hawa niy ahahyrinymyrētsa iwatsahi iwata byitaha!

¹⁸ Kyze taparaktsa myzotsa hara jobonikita bo zumukunaha hara inarokoha Sinija. Zumunahaze izo zuba. Bijoikpe satata nioktsirōrō miwa niyzik. Zopoktsa inabybyknaha. Ana pokso sipybyrētsa. Ana kino nimypybytyknaha.

¹⁹ Sibekeresuka hyritywa ziwabynaha. Deus yksoho ziwabynahaze sipybyrētsa nikaranaha:

– O niwazubaktsa! katsa mypybyrētsa – niaha.

²⁰ Moises tihi:

– Hara jobonita bo ka zukzuk byitaha! Myraratsa harasukpetara bo ka dodo byitaha. Estuba harasukpetara mydo zeka tsibezekta! Haraharetsa tysipaparanahaktsa iwatahi tsibezenaha – niy. Ana harere pokso sipybyrētsa.

²¹ Moises niwatihi tsipybyrēta. Hara bete niapykykze nanabyi bo nikozokoze ana pokso hi tsipybyrēta:

– Nanabyi bo ikozoze ana pokso mytydydykyktu. Kapybyrēta mykara – niy.

²² Niwazuba! Ikiahatsa batu siwatsa tsimaha. Deus harere tsipiwabynahaze ahapybybyihu ja. Ikiahatsa usta hara bo jobonikita bo tsikzumunaha. Ata hara Siaō inarokoha, anaeze hi Serusarēhe hudikhudikwy my. Deus koikny baktatu isapy bo tsikzumunaha. Isapy Serusarēhe inarokoha bijoikpe eze kino niwatihi. Anabo hi tsikzumunaha. Anaeze Deus tsumuēhītsitsa mynapykyknaha, bijoikpezektsa sizubarētsa mynapykyryknaha. Deus humo sakurētsa nikaranaha.

²³ Kiristu Deus zipehata ityryktsa bo tsikzumunaha. Siwatsa ityryktsa tsimaha niwatihi. Sizubarētsa Deus tyryktsa maha. Tapara taypykta tawata myhyrizikwanitsa moziknaha. Deus papeu humo sinaro ziwatahaka ana papeu bijoikpe eze tu my iwatsahi sakurētsa hỹ. Ikiahatsa Deus bo tsikzumunaha. Atakta kytsa huak ty sizubarēna ty nyny my. Asaktsa mybarawy Ezektsa wasani ziknakaranaha, iwatahi isapyrēnikia ty sibo nyny my, tahawahi Deus tuk mynapykyryknaha. Usta mybarawy Ezektsa simysapybyitsa tu ziknakaranaha Deus sinini ykarawy bo mysipeha. Ikiahatsa sihyrizikararawyttsa bo tsikzumunaha. Asahi Deus humo simysapyrētsa niyziknaha.

²⁴ Sesus mytsapuhyripyrywyta bo tsikzumunaha. Ata humo hi mysapyrētsa tsimoziknaha. Abaka Deus harere mybo nitsasoko. Nihyrikosokda iwatsahi ispu humo mysapyrētsa tsimoziknaha. Hawa taparaktsa siraratsa

spu Deus bo wabehyryk ziknakaranaha, katsakta Sesus spu humo mysapyrëtsa tsimoziknaha ispu tisapyrëna hỹ. Kaĩ tatsy zibezehik iwatsahi ispu humo mytsaty tsimykaranahaze. Katsa Deus pe tsimaha:

– O Deus ikia Abeu spu tsipitsapusare tsimaha. Sesus mysapyzeken nihyrikosokda iwatsahi ispu bo mytsaty tsimykaranahaze, Deus pe tsimaha:

“O Deus mysapybyitsatu tsikykaranaha iwatahi Sesus spu humo tsimymyokzo” tsimaha.

²⁵ Iwatsahi Deus harere bo wabyziutahaktsa! Tubabatu Deus hara Sinija inarokoha bo niy. Moises Deus harere taparaktsa bo nisihyrinymyrykik. Batu hỹ – niaha. Iwatsahi sinini ziknakaranaha, sihuak ty Deus sibo nyny niy. Batu siaku. Abaka Deus bijoikpe ikny mymyhyrinymyryky. Iharere bo yhỹ ahabyi zeka sinini tsimykaranaha hỹ.

²⁶ Sinija jobonita bo izumuze kytsa bo nitsaso, nitsasokoze mybarawy nitydydykyk tu. Abaka mytuk mopamykysokozo atahi:

– Mybarawy pitydydywyzo. Mybarawy pitydydywyzoze. Bijoikpe kino niwatihi pitydydywyzo – niy.

²⁷ Deus hi:

– Estuba zuba mybarawy pitydydykyzo – niy. Iwatahi mybarawy nizukni hana bo ja meky watu mozikzo. Mybarawy bijoikpe kino niwatihi izikwy humo ezytyk mozikzo. Itydydykokbara zuba motare.

²⁸ Deus hudikhudikwy ba zihokza, anaka itydydykokbara. Deus myzubaha bo abazubata mozik ba hawa tohi zikzukninaha. Anaeze ituk tsinapykyryknaha. Iwatsahi Deus bo tsimysakibazikiknahaktsa kytsa!

– O Deus ikia zuba apunihikrënikita. Ikia zuba amysapyrënikita ahumo ka mykurëtsa hỹ. Abaka mywahi atuk tsimynapykyryknaha ana humo hi mykurëtsa – tsimaha.

O kytsa iharere humo pykyhytu wabyziutahaktsa! Hawa ha ty mozihikik naha ty zuba tsimahaktsa! Atahi abazubata ihumo mypybyrëtsa iwatsahi iharere bo zuba hyỹ tsimykaranaha.

²⁹ Deus harere bo hyỹ tsimykaranaha ihumo myspirikporëtsa. Izo moko-robaik nahawa. Deus izo waha, asaktsa iharere bo yhỹ ahabyizeka nasipykwy izo waha hỹ.

13

Hawa tsimyzurukunaha Deus myhumo tsakurëta.

¹ Kyze ikiahatsa Sesus tuktsa tyharape pokzitsikinahaktsa!

² Sisukmotsa ahawahoro bo mozumunaha zeka ikiahatsa hi:

– Mywahoro bo paku paku tynaha ahawanu ty haĩ haĩ taha – tsimaha. Sihumo ahamypokzitsirëtsa tsimaha. Tubabatu wastuhu kytsa sisukmotsa pe:

– Paku paku taha – niaha. Sisukmotsa zubatsa ja nikaranaha asahi bijoikpe iknyktsa Deus tsumuëhĩtsa niaha.

³ Asaktsa sakyriukrënikitsa hurukwy eze niapykyryknaha sibo mytsatziu tsimykaranaha! Sibaze tu watsa sibo mytsaty tahaktsa! Tysisapywykynahaktsa. Kytsa sinini mykaranahaze sibo mytsatziutahaktsa! Ahape tu tsimykaranaha:

– Tozeka ja katsa kino niwatihi sinini tsimykaranaha – tsimaha. Iwatsahi tysisapywykynaha.

⁴ Ikiahatsa hi tsikaha:

– O katsa tsimymysukzanahaze wasani tsimaha – tsikaha. Wasani hiba. Aty ustatsa pihuahua tsihikikze batu isopyksapy my. Amatatsa ustatsa

barikta pihuahua tsihikikze batu isopyksapy my. Iwa tsimyzurukunaha zeka Deus pahamyitsapyriwyky.

⁵ Ahaokyrysaro soho bo ka mytsaty mytsaty byitahaktsa! Ahanamy humo ahakurētsa ana kino tsikaeni zuba tuzihikiknaha! Deus hi ahape my:

– Utakta ahapok baze tu mynapykyryk, ikiahatsa kakparawy iwatahi ba zahaerek – my. Iharere humo ahakurētsa hỹ. Deus ahasoho humo ba zikspiriktsokda.

⁶ Iwatsahi ahapunihikrētsa tsimoziknaha. Ustsaktsa sipybyrētsa pe:

– Mypehakatsa mymytsumuēhĩkĩ.

Kytsa pokso batu mypyby.

Hawa kytsa mybo mykaranaha ana pokso batu mypyby.

Deus hi myhumo tsimypokzitsiukrēta mynakara – tsimaha.

⁷ Ahapehatsa soho bo mytsaty tahaktsa! Tubabatu Deus taharere ty zahahyrinymyrykynaha. Hawa zikzurukunahaze ahaspiriktsokdabyihu ja. Hawa wasani ziknakaranaha. Nihyrikosokdanahaze Deus humo sispirikporētsa hỹ. Siwa tahaktsa kytsa! Ikiahatsa kino Deus humo tyspirikpotohinaha.

⁸ Sesus Kiristu kino atahi my. Hawa tapara ziknakara aba kino niwatihi mynakara. Aiba eze kino niwatihi astatu mynakara. Koikny baktatu mykara hỹ.

⁹ Utsa kytsa siharere pahahyrinymyrykynaha zeka siharere meky watu maha. Deus harere humo batu zahahyrinymyry. Mydisahawy soho humo pahahyrinymyrykynaha. Pahaspihikbatakanaha. Siraratsani tsimymydisahanaha zeka wasani my. Siraratsani ty hauk ahabyizeka wasani my. Deus harere humo zuba mysapyrētsa tsimoziknaha atahi mymysapywyky hỹ.

¹⁰⁻¹¹ Tubabatu Deus wahoro zubata eze taparaktsa ziknapamykysonahatsa iwa ziknakaranaha. Siraratsa nisibaiknaha mysopyksapybyitsa tsikykaranaha humo nisibaiknaha. Deus siraratsa spu bo iktsa niyze iwatahi nisiokzohik. Iwaze siraratsa spu Deus imysapyrēnikia bo zibykyryk.

– Taparakta ziknapamykysokota imysapyrēnikia bo nitsuk – niaha. Anaeze Deus siraratsa spu bo iktsa niyze taokaniki iwata tu kytsa sisopyksapybyitsa nikaranaha humo nisiokzohik. Kytsa siraratsa nurytsa nokponi ziknasiskiknaha. Sihudikhudikwy bara botu nasiskiknaha. Anaeze nisiwezokonaha. Batu sizoho ziboronaha.

Siraratsa wata Sesus nihyrikosokda. Mysapyzeky nihyrikosokda iwatsahi ihumo mysapyrētsa tsimoziknaha. Hawa siraratsa nurytsa sihudikhudikwy bara botu ziknasiskiknaha, iwaze Sesus nihyrikosokdaze, kytsa sihudikhudikwy bara botu zibezena. Deus ispu bo iktsa niyze iwatahi mysapybyitsa tsikykaranaha nimyokzohik.

¹² Sihudikhudikwy bara botu nihyrikosokda. Kytsa sispirikpobyitsa tu nizukyryknaha. Anaeze iharapatawyhyta humo zihyrikiknaha. Iwaze mysapyzeky nihyrikosokda.

¹³ Iwatsahi Sesus wata tsimahaktsa! Mysapyzeky nihyrikosokda. Iwatsahi hawa Sesus mozihihikikze tsimaha. Kytsa myharere bo yhỹ ahabyizeka wasani my. Mymymyijakanaha zeka wasani my. Iwatahaktsa!

¹⁴ Katsaktsa mybarawy eze tu tsimyzurukunaha, mysapy eze tu tsimynapykyrykspyknaha hawa eze tamiwy. Usa hudikhudikwy taberi. Bijoikpe myhudikhudikwy baba mozik. Ana hi mysapy mozik. Anaeze Deus tuk tsimynapykyryknaha.

¹⁵ Iwatsahi Deus bo tsimysakibaziknahaktsa! Katsa hi:

– O Deus myzo Sesus humo ikia bo tsimypamykysokonaha. Ikia zuba amysapyrēnikita. Ikia zuba abazubata. Ikia humo ka mykurētsa tsimoziknaha – tsimykaranaha. Ana hi Deus piwabyze tsakurēta mozik. Tubabatu kytsa siraratsa ty Deus bo nyny ziknakaranaha. Abaka myraratsa ty ba nynyzo zikaha. Abaka myharere ty ibo tsimytsasokonaha. Iwatahi myharere humo tsakurēta mozik.

¹⁶ Sinamybyikitsa tysitsumuēhīnahaktsa! Asaktsa batu sidisahawyky ahadisahawy ty sibo nynyta. Kytsa bo tysisapywykynahaktsa! Ahaspiriktsokda byihuja. Iwatahi Deus ahahumo tsakurēta mozik.

¹⁷ Ahapehatsa harere bo ma tynakaranahaktsa! Siharere humo pykyhytutaha hyŷ tsimykaranaha. Ahahyryzikararawytsa humo simypokzitsiukrētsa. Deus bo hawa pahapokzitsikinaha zeka motsasokonaha. Myzaharapokzitsikinaha iwaze ahamysapyrētsa tsimoziknaha. Iwatsahi pahatsumuēhī tsihikiknaha. Siharere bo ma tsimykaranaha zeka sakurētsa maha. Siharere bo yhyŷ ahabyi zeka sisukatsihikrētsa maha. Iwa zeka ba zatsumuēhīnaha.

¹⁸ O kytsa mytsyhyryze Deus bo typamykysokonahaktsa! Deus okzeka wasaniha humo zuba tsimyzihikiknaha. Mypetu mysopyk iwatsahi batu tyso. – Sozeka ja wasani tsizurukunaha. Batu mynyhy – iwatahi batu tyso. Katsaktsa Deus okzeka wasani tsimykaranaha ana humo hi myhyrinymyrētsa hŷ.

¹⁹ O kytsa ahabo myziksi tsihikikzo. Deus bo katsyhyryze typamykysonahaktsa! Ikihatsa hi:

– O Deus myzo aidytynykta mybo tyziksizo – tsimaha.

Deus bo mopamykysoko.

²⁰ Uta Deus bo ahatsyhyryze mopamykyso:

– O Deus ikia humo zuba sakurētsa moziknaha. Ikia hi mypehatsa Sesus tsikzihyryzikpowy. Abaka sihumo tsimypokzitsiukrēta hozipyrykza perytsa wata atahi hozipyrykzatsa mysiperyky my. Sisapyzekenihyrykosokda iwatsahi meky watu niyziknaha, ihumo simysapyrētsa niyziknaha iwatsahi atuk tawahi mynapykyryknaha hŷ.

²¹ Myzo aharene bo zuba hyŷ tynakaranaha, ana humo kino tysitsumuēhī! Hawa tsimyzihikik ana humo kino tysizikykyrykta. Ahumo sipunihikrētsa moziknaha. Hawa tisapyrēna humo tysitsumuēhīkī. Asahi:

“Sesus Kiristu ikia amysapyrēnikita. Ikia zuba tsahyryzikporēta” iwa tawahi mykaranaha ana hi myzo bo myzapykyky – my.

Iwa Deus bo ahatsyhyryze mopamykysoko.

Abaka pepykbaka.

²² Kyze katukytsa kaharere tsiwabytoktonahaktsa! Utakta pahakusukniki iwatsahi ikiahatsa Sesus tuktsa babatsa tsimoziknaha ana humo hi papeu humo ahabo piwatahaka. Kahumo ja ahakubyrisorokok kawatahaha pykyhytu tsipinymyrynaha. Kapapeu humo jokboha zuba iwatahaka.

²³ Mytsy Timoteo soho tawaby tsihikik. Sakyriukrēnikitsa hurukwy ekze zoihik. Iwatahi piperyky. Mozumu zeka ituk ahabo tsimynakozorenaha.

²⁴ Katsaktsa ahapehatsa bo, Sesus tuktsa sizubarētsa pe:

– O mytukytsa ahahumo myhyryzikbarētsa – tsimaha. Sesus tuktsa Itaria ezektsa kino niwatihi ahahumo sihyryzikbarētsa.

Deus pahasapywyky.

²⁵ Ahatsyhyryze Deus bo mopamykysoko. – O myzo tysisapywyky sihumo amypokzitsiukokta! – my. Niwazuba.

Tsiaku Sudeutsa Sesus tuktsa nanabyitaba napykyryknahatsa bo ziwatahaka

Tsiaku Sesus tukytsa taparaka Sesus humo batu ispirikpo, Sesus inahyirizikpoze ihumo nispirikpobaba. Atahi Sesus soho humo nispirikpota niyzik, Serusarēhe eze. Kytsa sispirikpobyitsa Sesus tuktsa nisisukyryknaha iwatsahi sizubarētsa niwaknaha. Iwaze Tsiaku sibo paikpa ziwatahaka wasania ty nispirikpoko. Deus hyrikoso ituk niapykyryk iwatahi Deus harere ziwatahaka iwatsahi katsa kino niwatihi wasaniha humo tanymyryky.

¹ Uta Tsiaku. Deus tsumuēhītsa. Mypehakatsa Sesus tuk tarabaja mykara. Iwatahi ikiahatsa bo piwatahaka. Ikiahatsa Deus tyryktsa Sudeutsa tapara baba dose ikiahatsa nanabyitaba nasiokty ahabo hi piwatahaka.

Ikiahatsa Sesus bo hỹ tsimykaranaha iwatsahi ihumo ahaspirikporētsa.

² O katukytsa ahadisahawy mopyk zeka ahasukatsihikbyihu ja. Bipyritsa pahasapybyikinaha zeka batu ahasukatsihik. Hawa ha ty mektsatu tsihokdaharēnaha zeka ahabo zeka batu ahasukatsihik sihumo ahakurētsa tsimaha

³ Mytsatzyiutaha! Hawa tsihokdaharēna mozumu zeka Deus humo ahaspirikporētsa babatsa tsimoziknaha. Ihumo ahaspirikporētsa zeka ahapunihrētsa tsimoziknaha. Sinini tsimykaranaha zeka ahahyirizikbarasorokrētsa.

⁴ Ahakubyrisorokrētsa tuze Deus tihi:

– O asahi simysapyrētsa. Simysapybyitsa ziknakaranaha ana humo hi sisikpybyrētsa mykaranaha abaka mahani. O asahi sakurētsa batu siakubyrī – my. Sesus tuktsa babatsa tsimaha iwatsatu ahamysapyrētsa tsimoziknaha. Ahamysapybyitsa tsikykaranaha Deus Sesus humo zahaokzohik.

⁵ Ahahyrinymyry byitsa zeka Deus bo tuzapykynaha. Atahi batu tyso:

– O tsipikyknikinaha batu ahabo nyny my – iwa ba zikmybetsak. Pahaspirikpoko. Pahahyrinymyry tsihikik. Deus bo tsimyzapykykynahaze atahi imysapyrēnikita iwatahi ahabo nyny my h̃y. Iwaze ihumo ahaspirikporētsa babatsa tsimoziknaha.

⁶⁻⁷ Iwaze Deus pe tsimaha:

– Tsimymyhyrinymyry katsaktsa Sesus humo myspirikporētsa tsimoziknaha. Iwatsahi batu tyso:

“O mybo nyny my ja tsikaha batu myhyrinymyry”. Aty: “O nawa ha ty myzapykyky Deus kabo nyny my ja” – atakta pihik hyrity waha. Pihik nanabyitaba ihiridawy wa ha zopok humo. Aty Deus humo tsikaeni zuba ispirikpo iwaze pihik ihiridawy hyrity waha.

⁸ Aty Deus humo tsikaeni zuba ispirikpo niwatihi paikpa mytsaty mykara. Aba nawa mytsaty mykara. Byriri meky watu mytsaty mykara. Kytsa harere humo meky watu mytsaty mykara. Kytsa paikpa mytsaty mynakanaha. Asa tihi:

– Deus bo myzapykyky naha zeka mybo baija mybo nyny ziky – maha. Atahi Deus humo tsikaeni zuba ispirikpo iwatahi meky watu mytsaty nikara. Deus humo ispirikpobyita zeka iwatahi Deus batu ibo nyny my.

Ahatukytsa sinamybyitsa sinamyrētsa kino niwatihi Deus okzeka atsatu maha.

⁹ Kyze Sesus tuktsa inamy byizeka tsakurēta! Deus okzeka tsinamyrēta wata atahi iakparawy.

¹⁰ Sesus tukta tsinamyrēta inamy mopykbaze niwatihi tsakurēta. Inamy ty okyrysaro waha

¹¹ Haramwe naharamwekeze okyrysaro mokoroba tsikzōhanirēna humo nasarotōbaik. Okyrysaro mynapykze batu sapy niy. Okyrysaro aidy hana bo ja. Tsinamyrēta okyrysaro waha. Usta inamy ziaaksebase inamy hana bo ja. Aidy hana bo ja. Iwatahi Sesus tukta tsinamyrēta tsakurēta, Deus okzeka inamybyrita wata iwatahi tsakurēta mykara. Deus ihumo niwatihi iakparawy.

Tsihokdaharēna mozumuze hawa tsimaha.

¹² Katsakta sinini tsimykaranaha zeka pykyhytuty tsimaha. Hawa ha ty meky watu tsihokdaharēna tsimykaranahaze Deus harere bo hȳ tsimykaranaha ihumo ahaspirikporētsa h̄y, batu pyk zikaha, ihumo ahaspirikporētsa zuba. Iwatsatu ahakurētsa tsimoziknaha. Iwatuze sinini tsimykaranaha Deus humo ahaspirikporētsa h̄y. Sininikarawy nepykze Deus tihi:

– Ikiahatsa katuk tsinapykyryknaha my. Iwaze hi ikiahatsa bo isapyrēnikia ty nyny my – my. Ikiahatsa ahawahi Deus tuk tsinapykyryknaha. Iwa Deus sinini mykaranahatsa bo my. Asa humo hi tsimypokzitsiarēta. Iwaze sinini mykaranahatsa sakurētsa batu mysisapybyriki.

¹³ Deus mybo imysapybara ty batu ziky. Katsa tu tsimymysapybyrikinaha. Deus batu. Iwatahi tsipisapybyrikinahaze batu tyso:

– Deus humo imysapybyiki – iwa batu tyso. Deus nimysapybyriki batu zikaha. Katsa tu tsimymysapybyrikinaha. Deus batu.

¹⁴ Katsa zuba tsipisapybyrikinaha. Hawa ha tsimyzihikiknaha mywerykywy wata mozik. Imysapybara tsimyzihikiknaha iwatsahi mysapybyitsa tsimykaranaha. Imysapybara ty tsikykaranaha iwatsahi katsatu tsikmyspihikbatakanaha.

¹⁵ Iwaze Deus mype my:

– Ikiahatsa batu katuk ahawahi tsimynapykyryknaha. Nokponi tsimynapykyryknaha ba kanyhytsa – my. Iwaze tsipisapybyrikinahaze Deus tuk ba mywahi tsimysapykyryknaha mybo batu mytyny.

¹⁶ O katukytsa ahaty spihikbata spihikbata byitaha!

O Deus mybarawytza, atahi myzo. Ata hi haramwe nizukni. Byzoje nizukni byrisoiktsa niwatihi nisisukni niy, mybarawy nizukniba.

¹⁷ Asa kino moziknaha. Deus batu meky watu zikyzyk. Astatu zuba mynakara. Myzibytuhukutu imysapyrēnikia ty mybo nyny mynakara. Mynamy ty mybo nynybaik my. Myzibytuhukutu myhumo tsimypokzitsiarēta. Haramwe hyrity wabyita. Haramwe naharamwebaik isopyk iwaze ebuhuka sukni isopyk. Deus batu. Astatu my.

¹⁸ Nimywatawyhik iwaze ityryktsa tsimoziknaha. Iharere bo hȳ tsimykaranaha iwatsahi ihumo myspirikporētsa ityryktsa tsimoziknaha. Iwaze tapara katsa mysapyrētsa tsikykaranaha, anahi nizihikik. Utsa parakbahatsa kino niwatihi simysapyrētsa moziknaha katsa myhumo.

Deus harere tsiwabytnahaze iharere bo hȳ tsimahaktsa!

¹⁹ – O katukytsa tsiwabytoktonahaktsa! Pyk tohi tahaze tytsasonaha. Aidy waby tsimaha. Aibani zuba tsipakyrikinaha! – iwaze mytsaty tsimaha. Aibani zuba tsinymyryknaha

²⁰ Tsipahakyrikinaha zeka batu ahamysapy. Ikiahatsa tsipahakyrikiknaha zeka ahamysapybyitsa tsimykaranaha. Deus ahakryri humo batu iakparawy iwaze ityryktsa iharere bo batu h̄y zikaha, iwatsahi ahakryri byihuja.

²¹ Iwaze ahasopyksapybyitsa tsimykaranaha tsimoewyhiknaha! Deus harere bo tsiwabynahaze hyĩ tsimaha. Deus harere bo zuba tsimynakaranaha. Iharere humo mymyhyrinymyryky. Iharere humo tsimyzurukunaha zeka mysapyrētsa tsimoziknaha. Batu mysikpyby Deus okzeka mysapyrētsa tsimoziknaha.

²² Deus harere tsiwabynaha zeka ana wa hi tsimykaranaha. Iharere bo yhyĩbyizeka tahaspihikbatakanaha zuba.

²³ Asahi Deus harere piwabynaha zuba iwaze iharere bo batu ma zikaha. Asahi maku wata. Atakta moknywy bo atsoko iktsa niy.

²⁴ Bykyze niparakze atsoko tahyrikoso humo nispiriktsokda. Iwa kytsa Deus harere bo sisopyk. Iharere bo atsoko ziwabynaha iwatsatu batu ma zikaha. Niahatsahi iharere humo nispiritsokdanaha. Maku atsoko moknywy bo iktsa niyze tawata tahyrikoso humo nispiriktsokda.

²⁵ Utsa batu. Asahi iharere pinymyrykynaha. Deus wasania ty pinymyrykynahaze iharere bo kino mytsaty mykaranaha. Sakurētsa maha. Iharere humo ba zikspiritsokdanaha. Myzibytuhukutu iharere piwabykynaha. Iharere bo ma mykaranaha. Iharere humo myspirikporētsa. Wasani my. Ana humo hi simysapyrētsa moziknaha. Imysapybara humo ka batu hĩ zikaha. Deus zikwy ty mybo nyny my iwatsahi iharere bo hyĩ tsimykaranaha. Iwatahi Deus myhumo tsakurēta mozik.

²⁶ Deus harere bo ma ahabyizeka katsa tu tsimymyspihikbatakanaha. Aty iharere imysapybara ty motsasoko, anaharere tymoewy byizeka Deus humo ispirikpoziubyita. Taspihikbataka zuba.

²⁷ Deus myzo my. Hawa tsimyzurukunaha nimyhyrinymyryky. Hara-mukuka tysipokzitsinaha. Sizotsa byitsa tysipokzitsinaha. Pykyhytutaha parakbaha harere humo pahamyiwykynaha batu ma ziky, anaharere Deus batu iakparawy. Siharere bo yhyĩ ahabyizeka Deus pahabetesaka. Iwaze Deus:

– Wasani tsimaha. Kahumo ahaspirikporētsa babatsa tsimoziknaha – niy.

2

Parakbaha astsabani tsawatsa tysipokzitsikinahaktsa.

¹ – O katukytsa abaka ikiahatsa mypehakatsa Sesus tuktsa tsikyzyknaha. Atahi imysapyrēnikita. Sesus humo ahamypokzitsiukrētsa. Sizubarētsa soho ty soso byitaha:

“O ta myhyrizikwani iwatahi mykparawy, usta myhyrizikwybyita iwaze batu mykparawy” – tsimy. Ana hi Deus humo batu imysapy. Parakbaha atsatu tsimaha!

² Tsinakypyknaha zeka maku tsinamyrēta mytsuk. Isuk tisapyrēta. Tsinaharēta.

³ Ikiahatsa ja ihumo ahakparawy. Iwaze ikiahatsa tsinamyrēta pe:

– O myhyrizikwanita baze dyhyty idyhywy tisapyrēta! – tsimaha. Iwaze zikehe maku inamybyita niwatihi ahabo mynatsukze atahi isuksapybyita iwatsahi ihumo batu ahakparawy. Ikiahatsa inamybyita pe:

– O nabo sinamybyitsa baze tyk humo tu dyhytykta – tsimaha. Iwaze inamybyita humo batu ahakparawy. Batu imysapy tsimaha.

⁴ Iwa tsimysiwatawyky, ikiahatsa estuba zuba maku humo wasani tsimykaranaha. Usta batu, meky watu tsimykaranaha. Isuk humo zuba meky watu ibo tsimykaranaha. Ikiahatsa ahanyhybyitsa tu isuk bo zuba iktsa tsimykaranaha anahi Deus okzeka batu imysapy tsimaha:

⁵ O katukytsa kaharere bo wabyziutaha! Deus parakbaha sinamybyitsa nisiwatawy. Asahi Sesus tuktsa, iwatsahi Sesus harere bo hyĩ mykaranaha

ihumo sispirikporētsa iwatsahi Deus tyryktsa moziknaha. Asahi tahawahi ituk mynapykyryknaha. Deus tyryktsa tuze isapyrēnikia ty sibo nyny my.

⁶ Ikiahatsa hi sinamybyitsa tsimysisapybyrikinaha.

Sinamynikitsa hi myzahasapybyrikiknaha, maku kytsa harere wabytsa bo myzahaoktyknaha.

⁷ Asa kino Sesus soho humo siharerewabymybarētsa. Ikiahatsa Sesus tuktsa tsimaha. Sesus ahapehakatsa abazubata my. Batu aty tohi Sesus wata. Iharere bo zuba hỹ tsimykarana. Asaktsa isoho humo zisapybyrikinaha, Sesus tuktsa zisapybyrikinaha iwatsatu sisapyrētsa ahasopyk.

⁸ Deus abazubata. Tsipisapywyknaha zeka Deus harere bo hỹ tsimykarana anaharere hi:

– Utsa parakbahatsa tysipokzitsiukuktsa awa humo tsinakara nahawa tihi ustsaktsa tysipokzitsiki! – niy. Tubabatu ky tu anaharere ziwatahaka ana bo hi yhỹ tsimykarana zeka tsipisapywyknaha.

⁹ Ikiahatsa kytsa sisukziurētsa tsimynasinyky nahaze ana humo hi batu ahamysapy tsimaha. Deus harere bo batu hỹ zikaha, iwatsahi ahasikpybyrētsa tsimykarana.

¹⁰ Taparakta Moises Deus harere pehawy ziwatahaka. Tsizubarēna ziwatahaka. Katsa anaharere tsizubarēna bo ma ahabyi zeka ahasikpybyrētsa tsimoziknaha. Deus harere humo yhỹ ahabyitsa tu ahasikpybyrētsa tsimaha.

¹¹ Iharere tihi:

– Mekta oke tatsa ba ziaксе niy. Usa harere mekta ty kaba zikarapebezenaha – niy. Ikia usta oke ty ykse byizeka wasani tsimy. Ikia maku tsipibeze zeka iwaze Deus harere bo batu hỹ ziky. Iwatuze mekta oke batu ziaксе Deus harere bo batu hỹ ziky. Iwatahi asikpybyrēta.

¹² Deus harere bo ma tahaktsa! Iwa tsimyzurukunaha zeka batu zimynaha. Iwa tsimykarana zeka wasani my. Iwaze Deus batu mybo tyso:

– Batu ahamysapy tsimaha – my. Iwa wasani tsimyzurukunaha.

¹³ Utsa kytsa ty isty pokzitsiu ahabyizeka Deus kino niwatihi ba zahapokzitsiu. Batu ahape – ahamysapyrētsa – iwa batu tyso. Ikiahatsaktsa kytsa tsimysipokzitsikinaha zeka wasani tsimaha, Deus kino niwatihi pahapokzitsiki. Atahi ahape:

– Ikiahatsa wasani tsimykarana – my.

Deus harere bo hỹ tsimykarana haze ihumo ahaspirikporētsa tsimoziknaha.

¹⁴ Katukytsa katsa kytsa bo tsimysipokzitsikinahaze Deus niwatihi mymypo-kzitsiki. Katsa hi:

– Sesus humo myspirikporētsa – tsimaha zeka nawa Sesus zikzuruku katsa kino niwatihi tsimyzurukunaha.

Katsa Sesus humo mospirikpo byizeka ba ituktsa zikaha. Sesus harere bo ma ahabyi zeka katsa Sesus tuktsa babatsa ba zikaha. Katsa tu tsimymyspihikbatakanaha.

¹⁵ Sesus tuktsa sisuk byizeka hawa tsimaha. Sesus tukza batu sidisahawyky hawa tsimaha.

¹⁶ Tsimytsasonaha zeka:

– O wasani my. Abahi wastuhu pahapokzitsikinaha. Ahasuk ty nyny maha. Ahadisahawy ty nyny maha iwatsahi mytsaty mytsaty byitaha – tsimaha iwa mybarapetu tsimykarana. Sisuk ty sibo nyny byizeka tsimyt-sasokonaha zuba. Ahaharere batu imysapy tsimaha. Ikiahatsa Sesus tuktsa babatsa mytsaty ahabyitsa tsimykarana. Ikiahatsa hi sidisahawy humo nyny byizeka batu wasani zikaha. Ahasuk humo batu nyny byizeka batu wasani zikaha. Deus hi:

– Batu ahamysapy – my. Ikiahatsa ahadisahawy ty ahasuk ty iwa sibo nyny tahaktsa!

¹⁷ Tsimytsasokonaha zeka – Sesus harere bo hyĩ tsimykarana ihumo myspirikporētsa – iwaze kytsa humo batu ahamypokzitsiu asatu tahaspihikbatakanaha.

¹⁸ Wastuhu mype:

– Ikiahatsa Sesus humo ahaspirikporētsa iwatsahi Deus okzeka ahamysapyrētsa tsimaha. Uta hi kytsa humo kamypokzitsiukrēta iwatahi Deus okzeka kamysapyrēta – my.

Utakta ipe my. Kytsa humo imypokzitsi byizeka, ustsā batu sihyrinomyry. Sihyrinomyry byizeka katsaktsa Sesus humo myspirikporētsa tsimaha. Katsa Sesus tuktsa babatsa ahawatawybyitsa. Kytsa tsimysipokzitsikinaha zeka iwaze katsaktsa Sesus humo myspirikporētsa ana humo hi aparakbaha sihyrinomyrētsa. Iwa my.

¹⁹ Deus babata estuba zubata tu. Ana humo hi ahahyrinomyrētsa. Wasani tsimaha. Hyrikoso sapybaratsa kino niwatihi Deus estuba zubata tu sisopyk. Iwatsahi sipybyrētsa mytydykyryknaha tu. Deus hi:

– Ikiahatsa batu ahamysapy – my iwatsahi sipybyrētsa. Ana humo hi spiriktsokda spiriktsokda byitaha!

²⁰ O tsiwakyrirēta! Iwa tsimytsasokonaha zeka Sesus humo myspirikporētsa ja iwaze kytsa humo batu ahamypokzitsi asatu tahaspihikbatakanaha. Ikiahatsa Deus humo batu ahaspirikpo. Iwa pahawatawyhik.

²¹ Abarão soho piwatawyky. Tubabatu Abarão Deus humo tispirikporēta ziknakara iwatahi iharere bo hyĩ ziknakara, iwatahi tispirikporēta hĩ. Deus harere bo zuba hyĩ ziknakara iwatahi zikzuruku. Abarão tatse ty para bete zihoeke. Siraratsa wezowy bete tatse zihoeke, iwatahi tatse ty Deus bo nyny niy.

²² Iwaze asiba tatse zibezetatu Deus zipeha tahi nikara. Abarão Deus harere bo hyĩ ziknakara. Iwaze Deus Abarão pe niy:

– O wasani tsimykara. Kaharere bo hyĩ zuba tsimykara – niy.

²³ Deus ipe tu isopyk:

– Abarão kaharere humo tispirikporēta iwatahi “O atahi tsimysapyrēta my” Tatse asiba zibezetatu kaharere humo tispirikporēta – niy. Tapara Deus hi:

– O atahi kaharereziuwu niy. Abarão kaharere tsihokdahanena iwata tu ma nikara – niy.

²⁴ Deus mype my:

– Ikiahatsa ahamysapyrētsa tsimaha. Kahumo ahaspirikporētsa. Kaharere bo hyĩ zuba tsimykarana zeka wasani tsimaha, iwa tsimyzurukunaha – mykara.

²⁵ Iwaze Hahabe inarokotatsa. Atatsa kytsa iakparawy tatsa. Iwatatsa tu Deus humo tispirikporētatsa nikara. Atatsa Sosue tuktsa sisukparakatsa tawahoro eze nisiokpitsihik. Sosue tuktsa Deus tyryktsa niaha. Asahi nisiokpitsihikze. Bykyze usta ske bo nisiwatawyhik iwatsahi sisukyrytsitsa batu isty ba. Iwatahi Deus atatsa soho tihi nikara:

– Uta atatsa pibetesa. Atatsa wasani my – niy. Iwa atatsa zibetesa.

²⁶ Katsa tsimyhyrikosokdanahaze mynury wytykoke bo mytsahoroknaha. Myhyrizikararawyta meky botu tasapy. Ikiahatsa Deus harere bo batu hĩ ihumo batu ahaspirikpo. Iwatsahi ba ziktsasonaha:

– O katsaktsa Sesus humo myspirikporētsa – tsimaha. Iwaze sizubarētsa humo batu ahamypokzitsi iwa tsimykarana zeka mybarapetu

tsimykarana. Deus harere bo ma ahabyi zeka iwatsahi batu ituktsa babatsa tsimaha.

3

Myharere nitsasoko.

¹ O katukytsa myharere soho motsaso. Hawa tsimytsasokonaha pykyhytytykta. Mysapybyitsa tsimykarana zeka Deus hi:

– Batu ahamysapy – my. Katsa parakbaha myzubabyitsa tu myharere piwabykynaha ana humo hi pimiyikiknaha zeka batu isapy tsimaha. Ahahyrinymyrytsa tsimaha zeka sizubarêtsa ahaharere piwabykynaha Deus hi:

– Ahamysapybyitsa tsimaha – my. Sizubarêtsa humo hi tsipimiyikiknaha. Iwatsahi sihyrinymyrykytsa batu sizuba.

² Natabyituhukutu tsipimiyikiknaha. Myharere tisapyrêna zuba zeka iwaze katsa Deus harere bo hyÿ tsimykarana, mysapyrêtsa tsimoziknaha. Imysapybara ka batu mykparawy, wasaniha humo zuba tsimykarana.

³ Pikuza bo mytsaty tsimaha. Pikuza sake zozowyty isake bo tsykyk tsimaha. Iwatahi pikuza kino mytuk paikpa mykara. Hana bo tsimykuru tsihikiknahaze kino mytuku mokuru iwatsahi isakizozowy isake eze tsykykby tsikaha. Mystîazik isakizozowy hyrity wata.

⁴ Tsaraha puêtsikbyita bo mytsaty tsimaha. Tsaraha puêtsikbyita zopok humo mokuru. Iharazozikwy humo mokuru. Hana bo iharazozikitsa mozihikik na ha bo hi zuba tsaraha mokuru. Iharazozikwy humo hi mokuru. Mystîazik iharazozikwy hyrity wata.

⁵ Iwatatu mystîazik tsikaeni tsibik tsizubarêna ihumo tsimytsasoikiknaha. Nanabyi tsimytsasokonaha batu pyk zikaha. Mystîazik izo waha. Izo tsikaeni niahatu zuba waratok humo mynapokze mokorobaik. Izo tsikaeni zuba iwahatu mynapokbaik.

⁶ Mystîazik niwatihi. Mystîazik izohyrytywa. Mystîazik humo tsimypamykysokonaha. Tsimysapybyrikinahaze batu imysapy tsimaha. Katsa izo hyritywaha tsimaha. Izo mokorobaikze hwitsa moröktsiroronaha. Batu sapy my. Myharere ty sizubarêtsa tsipimiyikiknaha zeka batu imysapy tsimaha. Satanas humo myharere pisapybyriki. Zikzibytuhukutu ihumo tsimysapybyrikinahaze Satanas harere bo yhyÿ tsimykarana. Iwa katsa mystîazik humo tsimykarana. Mystîazik tsikaeni tsibik ihumo amy ty batu sapy tsimykarana.

⁷ Parakbaha kytsa siraratsa, sisarakatsa pyryhyktsa, piknutsa iwatsa meky meky watu mykarana mysipyknaha myraratsa niyziknaha.

⁸ Mystîazik batu. Batu aty tohi taharere meky watu batu ziky. Hawa ha ty batu sapy tsimypamykysokonaha batu pyk zikaha. Hawa ha ty batu mykparawy ana hi tsimytsasokonaha. Myharere batu sapy tsimaha, pyryhyk itsapyrita mymyborozik tawata.

⁹ Katsaktsa Deus bo tsimypamykysokonaha:

– O Deus myzo ikia hi tsamysapyrêta – tsimaha. Kyze kytsa soho tsiksihareresapybyrikinaha. Asaktsa parakbaha Deus nisisukni tahyrytywatsa nisisukni ba zik sisoho metunaha. Myharere parakbaha soho tsimypamykysokonaha batu ahamysapy tsimaha.

¹⁰ Mysakeze tuk petok harere tsimypamykysokonaha. Deus tsimysapyrêta tsimaha. Kytsa soho batu simysapy tsimaha niwatihi. Niwazubaktsa!

O katukytsa ahaharere humo batu wasani zikaha. Petok myharere zikahabyitsa. Tisapyrêna zuba tsimypamykysokonaha.

¹¹ Niwazubaktsa. Pihik pupuputsa titsarakrēna, usa pihik titsiksipiarēna ba zikahapekyky. Batu zikaha.

¹² Katukytsa umaha hara meky watu ba ziktahara, duabohotsa haratsa meky watu ba ziktahara. Ba hawa tohi zikaha. Iwaha hi pihik kino. Pihik titsarakrēna pihik titsiksipiarēna pupuputsa eze atsatu batu myzizo. Iwatsahi petok myksoho ba zikpamykysonaha! Tisapyrēna ty zuba tsimy-pamykysokonaha.

Myhyrinymyrywy baba.

¹³ Aty ahabaze ihyrinymyryta babata iharekykarabyita zeka atakta ba ziktaso:

– Uta zuba kahyrinymyrēta – baziky. Ata zuba ustsā bo mysisapywyky iwaze ihyrinymyrynika mysiwatawyky. Iwaze kytsa isoho motsasokona:

– O atakta ihyrinymyryta babata – mykaranaha.

¹⁴ Ahazokzirētsa tsimaha zeka mybarapetu ahasopyk, ahyrinymyrybyita babata. Ikiā mytsaty tsimyzeka:

– Uta zuba kahyrinymyrēta hawa mytsaty tsimyzeka wasani my – mybarapetu tsimaha. Ahabo zuba mytsaty tsimykaranaha zeka Deus humo batu ahaspirikpo. Ahaspirikpobyitsa tsiksispihikbatakanaha.

¹⁵ Iwahatu tsimyzurukunaha zeka Deus harere bo batu hỹ zikaha. Mybarawy ezektsa harere bo zuba tsiwabykynaha, siharere bo zuba hyỹ tsimykaranaha. Hawa haty Deus hyrikoso pahayrinymyryky batu hỹ zikaha. Anahi Satanas hyrikoso sapybara pehatsa iharere bo yhỹ tsimykaranaha.

¹⁶ Iwatsahi batu ahasapy tsimaha, ahazokzirētsa. Ahasoho bo zuba mytsaty tsimykaranaha. Ahamysapybyitsa tsimykaranaha. Tsipliksohometukunaha iwatsahi paikpa mytsaty tsimykaranaha. Iwaze batu ahamysapy tsimaha. Ahamysapybyitsa tsimykaranaha.

¹⁷ Ahayrinymyrywy tuze Deus harere bo zuba hyỹ tsimykaranaha. Tisapyrēna ty tsimyzurukunaha zeka ihumo ahamysapyrētsa tsi moziknaha. Ahahareresapyrētsa tsi moziknaha. Kytsa tuk ahakurētsa. Ahakyribyitsa. Mypehakatsa harere bo hyỹ tsimykaranaha. Batu mybarapetu ahasopyk. Sizubarētsa batu mysimyiki. Tyharape pokzitsiukuknaha. Batu metutu zikaha. Tsimymysapywykynaha zeka ba ziktsaso:

– O katsa zuba mysapyrētsa tsimaha bazikaha – iwa tsimyzurukunaha zeka ahayrinymyrywy baba tsimaha.

¹⁸ Tohi kino sakyriukanikitsa mysiakusukniki mykara. Atahi maku mysiparikikze tawata. Mysiparikikta iwatahi taparikihitsa taypyknaha. Iwa maku kino sakyriukanikitsa bo mysiakusukniki iwatsahi sakyriukrētsa meky wa tu moziknaha Deus okzeka simysapyrētsa moziknaha.

4

Sispirikpobyitsa tuk batu mynapykyryk.

¹ Natabyituhukutu hawa ha ty tsimyzihikiknaha anahi tsimaha iwa tsimyzurukunaha. Ikiāhatsa ahahumo zihika ty zuba ahasopyk. Ustsā bo batu mytsaty zikaha. Ahabo zuba mytsaty tsinakaranaha. Iwatsahi batu ahaharereziu. Tsisisohometukunaha paikpa mytsaty tsinakaranaha.

² Ahanamy tsipebyk tsihikiknaha. Inamy tsizubarēna ty batu itykse iwatsahi tahakyrikinaha. Ikiāhatsa ahanamy bo zuba mytsaty tsimykaranaha. Iwatsahi ustsā tsinasisukyrykynaha iwaze sinamy takse tsimykaranaha. Ustsā kytsa namy tsi piaksekyzykynaha. Iwaze

tsahasakparëtsa tsimykaranaha. Ahatuk zuba betsak tsimykaranaha. Batu ahanamyky tsimaha. Ahanamybyitsa tu Deus bo batu sapyky zikaha.

³ Ikiahatsa Deus bo ahanamy humo tsimyzapykykynaha zeka ahabo batu nyny my.

– Amo skaraba Deus batu mybo nyny ziky – tsimaha. Deus ahabo nyny byizeka iwatahi ahamysapybyitsa humo tsimaha. Tsimyzapykykynahaze ikiahatsa tihi:

– O amy ty batu sapy my – tsimaha. Iwaze Deus ahabo batu nyny ziky. Deus harere bo batu hỹ tsimaha, ahanamy tsizubarëna tsimyzihikiknaha, iwaze ahabo zuba tsimykaranaha. Hawa Deus ahahumo mozihikik batu mytsaty tsimaha.

⁴ Ikiahatsa wytyk hyritywatsa. Atatsa hi tabarikta zereke iwaze usta tuk tasapy. Iwa ikiahatsa kino Deus tserekeknaaha ustsya kytsa bo tsimykurunaha. Sizubarëtsa Deus humo batu siakparawy, iharere humo batu hỹ zikaha. Asahi zuba ikiahatsa ahakparawytsa ahatuktsa moziknaha. Iwatsahi iwa tsimykaranaha zeka sizubarëtsa tahakyrikinahatsa watsa tsimoziknaha. Ahatuktsa asahi Deus humo batu siakparawy iharere humo batu hỹ, ikiahatsa kino niwatihi Deus humo takyriukinahatsa watsa tsimoziknaha. Ahaharereziuwbyitsa tsimoziknaha.

⁵ Deus harere papeu humo tubabatu ziwatahaka. Deus hyrikoso mytuk mynapykyryk. Myhumo tsimypokzitsiarëta. Iharere bo hyỹ tynakaranahaktsa! Deus harere bo hyỹ ahabyi zeka Deus hyrikoso myhumo batu iaku. Iwa tubabatu papeu humo ziwatahaka. Anaharere batu waby tsimaha.

⁶ Deus myhumo tsimypokzitsiarëta. Myzibytuhukutu myhumo tsimypokzitsiukrëta. Deus harere tubabatu ziwatahaka. Atahi motsasoikik zeka. – Uta zuba wasani my – atahi Deus ykparawybyita. Atakta Deus bo mopamykysoikik zeka:

– O Deus tsiktsumuëhĩ my – iwa Deus mypehakatsa mozik hỹ. Atahi Deus iakparawy.

⁷ Deus harere bo hyỹ tsimyzeka Satanaharere humo batu hỹ tsimy. Satanaharere bo batu hỹ ahabyi zeka ata kino ahapokso moparakik.

⁸ Deus pauk baze tu tsimypykyknaha zeka ata kino niwatihi ahatuk mynapykyryk. Iwa tsimyzurukunaha. Mysapybara tsimoewynaha. Hawa ha ty wasani tsimykaranaha. Batu tahapetu ahasopyk:

– O Deus atatu ja iky batu kahyrinymyry – iwa mytsaty mytsaty byitaha. Iwa mytsaty ahabyizeka Deus tuktsa babatsa tsimoziknaha.

⁹ Tsimysapybyitsa tu tsimykaranaha zeka iwatsahi ahasukatsihikrëtsa tsimoziknaha. Kazi tsimykaranaha. Typuziukunahaktsa. Ahakubyitsa tu ahamysapybara humo pyktaha. Ahamysapybyiri humo Deus okzeka ahasukatsihikrëtsa za.

¹⁰ Deus pe tsimaha:

– O katsa mybo tymytsumuëhĩkta tsimaha. Ikia zuba tsahyrinymyrëta katsa batu myku katsa mysapybyiri humo iwatahi tymytsumuëhĩ – tsimaha. Iwaze Deus ahahumo yhỹ mykara. Atahi pahatsumuëhĩ hỹ.

Myharere soho.

¹¹ O katukytsa ustsya kytsa soho ba ziksisohometunaha! Ahatukytsa soho tsimykaranaha zeka Deus harere humo tsimyspiriktsokdanaha. Tsimytsasokonaha zeka:

– O katukytsa ikiahatsa batu wasani zikaha – tsimaha. Tahaspihikbatakanaha.

O Deus harere batu isapy tsimaha. Deus harere myhumo tsikaeni zuba kakparawy, iwatahi mybo awatu. Deus harere batu ahakparawy tsimaha iwatsahi tsimysapybyrikinaha.

¹² Iwa Deus wata tsimaha, Deus zuba tsihyrinymyrëta, atahi mypehakatsa. Hawa mytsaty tsinakaranaha ana humo hi tsihyrinymyrëta. Deus zuba kytsa bo motsaso simysapyrëtsa pe:

– Ikiahatsa tsahamysapyrëtsa my pahatsumuëhĩ kazikwy ty ahabo nyny my – niy. Kyze simysapybyikitsa pe:

– O ikiahatsa batu ahamysapy iwatsahi tsimhyrikosokdanahaze batu katuk tsimynapykyryk – my. Iwaze batu tyso ahatukytsa pe:

– O ikia batu amysapy – tsimaha. Deus zuba tsihyrinymyrëta babata aty tsimysapyrëta tsihyrinymyrëta. Aty imysapybyita tu ana humo kino niwatihi tsihyrinymyrëta. Iwaze kytsa soho ty batu tyso ikia batu amysapy. Ikiahatsa ahahyrinymyry byitsa iwatsahi ahatukytsa soho ba ziktsaso.

Byriri sa hawa tsimaha.

¹³ O katukytsa wabytoktotaha! Ikiahatsa zuba tsimypamykysokonahaze:

– O katsa myhyrinymyrëtsa iwatsahi: “O kytsa ustsahudikhudikwy boktsa! Anaeze estuba taytyktsehe. Mynamy tabiak! Okyrysaro tsizubarëna takse hỹ” – tsimaha. Iwa tsimypamykysokonaha.

¹⁴ Katsa byiri ky soho humo batu myhyrinymyry. Tozeka ja byiri mybo tisapyrëna hawa. Tozeka ja mybo batu isapy. Katsa batu myhyrinymyry hỹ. Hawaze tsimhyrikosokdanahaze katsa batu myhyrinymyry. Katsa bijo zatata hyritywaha. Haramwe mynaharamweze bijo zatata myokzubaik. Katsa kino niwatihi aibatohi tsimhyrikosokdanaha. Hawaze batu ahahyrinymyry. Bijo zatata batu mopykyryk, katsa kino niwatihi mybarawy eze ba zikakpykyryknaha mohyrikosokdanaha.

¹⁵ Iwatsahi asa zuba tsimypamykysokonaha:

– O Deus mozihikik zeka katsa ba zikyrikosokdanaha my. Byriri usa hudikhudikwy bo tsimaha. Deus mozihikik naha humo zuba tsimykuruna-haktsa! Deus mozihikik naha humo zuba anaeze mynamy tabiak okyrysaro takse – iwa tsimypamykysokonaha.

¹⁶ Iwaze ikiahatsa mytsaty tsimaha zeka: – O katsa zuba myhyrinymyrëtsa – iwatsahi hawa tsimypamykysokonaha, atsatu tsimykaranaha. – Katsaktsa myhyrinymyrëtsa – iwa mytsaty ahabyitsa tsimykaranaha. Hawa ha ty Deus mozihikik ikiahatsa batu ahahyrinymyry, ahasoho zuba tsimyzihikiknaha. Batu wasani tsimaha.

¹⁷ Aty hawa ha ty tsimysapyrëna ty zinymyryky zeka batu ziky iwatahi isapybyriki. Deus ipe my:

– Ikia batu amysapy – niy. Katsa hi:

– Hawa ha ty wasani tahaktsa kytsa! – tsimaha.

5

Sinamyrëtsa soho motsasoko.

¹ O sinamyrëtsa wabytaha! Abaka ahanamy zuba. Iwaze hi sinini tsimykaranaha. Iwatsahi tsimopuziukunaha. Kadi tsimykaranaha!

² Ahanamy atsoko mohokda. Ahanamy tsipokzitsarëna ka mobibiba. Wazazatsa ahasuk piokbaiknaha.

³ Ahanamy mosysykbai. Ahaokyrysaro ouro parata iwa zikarabai, nioktsirörö. Ahanamy zozo tsikaha. Ustsahudikhudikwy niworobai mokozonaha zeka asa hi:

– O atahi tisorekrēta, tanamy zizozoko zuba iwatahi batu iaku mynakara – mykaranaha. Jokboha kyrituk tu ahanamy mokoroba iwaze ba zinyzonaha. Izowaha, katsa izo humo sinini tsimaha. Tahanamy zuba zozo tsikykarana-haze Deus pahasininiwyky. Iwaze Deus ape my:

– Ikia batu amysapy – my.

⁴ Kytsa awaratok eze tarabaja ziknakaranahaze okyrysaro ty batu sibo nyny tsikaha. Wabytaha! Deus bo zahasohokonaha, ikia humo tahokanikinaha. Deus zikwyrēnikita mysiwabyky. Atahi siharere ziwaby. Asahi awaratok eze tarabaja nikaranaha batu okyrysaro humo. Deus pe niaha:

– O Deus bijoikpe ezekta inamyrēnikita mybaze myhyriziktsokzawy humo batu okyrysaro ty mybo nyny ziky – niaha. Iwatsahi mynamybyitsa sinini tsikykarana. Ikiahi inamyrēnikita humo sininiwyky hawa katsa mywatsa sinini my iwa tsimy. Ikia hi mypehakatsa my. Asahi bijoikpe ezekta, asahi mybarawy ezektsa humo niwatihi ikia zuba abazubata my niaha. Iwaze Deus tihi:

⁵ O sinamynikitsa ikiahatsa mybarawy eze tuze ahanamyrētsa. Ahanamy humo ahakurētsa. Hawa ha humo ahakparawy zeka atsatu tsiapiaksenaha. Ahadisahawy tisapyrēna ty zuba tsizadisahakanaha. Abaka meky watu. Deus ahape:

– Ikiahatsa sinini ykarawy boktsa! – my. Anabo hi pahasininiwy.

⁶ Ikiahatsa batu wasani tsimykarana. Wastuhu wasani mykaranahatsa sihumo tsiksisapybyrikinaha. Wastuhu simysapyrētsa ziknasibakanaha, iwa tsikykarana. Asahi zikahabyitsa tu iwaze ikia tsiksibanaha. Iwaze Deus sinamyrētsa sinini ykarawy bo mysipehahik.

Deus bo tsimypamykysokonaha ana humo tsakubyrisorokrētsa.

⁷ Iwaze ahakubyrisoroku ja! Sesus myziksizonaha taperyky, iwatsahi ahakubyrisorokuja. Sesus taperykykta kytsa! Ikiahatsa hi waratok tsihitsu wata tsipiperykynaha. Atahi wihara piperyky. Tapara hyritsik tapery. Hyritsik mynawōze mysiparik. Wihara mytaharaze niwatihi hyritsik nawōzo. Iwa waratok tsihitsu piperyky my, tsiakubyrisorokrēta.

⁸ Ikiahatsa iwatsa tsimoziknaha. Ikiahatsa kino niwatihi Sesus myziksizonaha tsipiperykynaha. Ihumo tsiperykynahaze Sesus mozumuzo naha jokboha. Iwatsahi ihumo ahaspirikpotohi ahapunihikrētsa. Batu ahaku. Sesus myziksizo hỹ.

⁹ O katukytsa ahatuk zuba awatutaha! Tsimyhapesapybyikiknaha zeka Deus hi:

– O ikiahatsa batu wasanibyitsa ahamysapybyitsatu tsimykarana – my. Kyze zikiehe jokboha kyrituk tu myziksizo. Kytsa simysapybyitsa Deus ispe my:

– Batu wasani tsimaha – my. Katsa myty ykso ykso byitaha. Myty betsak betsak byitaha iwaze Deus hi:

– O ikiahatsa ahamysapyrētsa – my.

¹⁰ – O katukytsa Deus sohokotsa mytsaty tsimaha! Niakbanahatsa bo mytsaty tsimaha! Tubabatu asahi Deus harere ziknatsasokonaha. Asahi kytsa sizubarētsa Deus harere humo sispirikpobyitsa asa humo hi sinini nikaranaha. Sinini nikaranahaze iwatsatu Deus humo sispirikpotohi ziknakaranaha. Ikiahatsa hi siwatsa tsimyzurukunahaktsa kytsa! Iwatsatu sinini tsimykarana Deus humo ahaspirikpotohi – my.

¹¹ Katsa Deus sohotsitsa soho:

– O sipunihikrētsa hỹ niaha – tsimaha. Mytsatyziu tsimykarana! Taparakta So sinini ziknakaraze tybyri zuba ziknakara. Deus ziktsumuēhĩkĩ.

Tapara So tanamy zihokzabaik, inamy hana bo ja. Iwatatu Deus humo nispirikpotohi atahi pe:

– O Deus wasani my – nikara. Iwaze Deus ustsana my ty ibo nyny niy. Iwa mypehakatsa ihumo tsimypokzitsiukrêta. Atahi mymypokzitsiki. Myhumo tsimypokzitsiarêta niwatihi.

¹² Aba usa harere my. Wabyziutahaktsa katukytsa! Hawa ha ty wasani zuba tsimytsasokonaha. Ahaharere wasani byizeka Deus hi:

– O ahaharere batu imysapy – my. Myzibytuhukutu hawa ha ty wasani zuba tsimytsasokonaha. Batu tyso – O aba kaharere tisapyrêna my. Deus okzeka kaharere wasani my. Atahi mybarawy nizukni iokzeka kaharere wasani my. Tisapyrêna my. Atahi bjoikpe nizukni iokzeka kaharere tisapyrêna my tsimaha – iwa ba ziktsaso. Usta tsyhyryze tsipitsumuêhî tsihik zeka ikia hi:

– O patsumuêhî – tsimy. Atsatu tsimy. Usta tsyhyryze amy tsumuêhîtsihik byizeka ikia hi: – O ba zatsumuêhî – tsimy. Ity batu tsumuêhî. Iwaze ba ziktsaso – Deus okzeka kaharere tisapyrêna – my. Hawa tsipihareresoko atsatu tsimykara. Iwa tsimyzurukunaha zeka Deus batu pahasininiwyky.

¹³ Kyze ikiahatsa baze aty sinini mykara zeka Deus bo tsimypamykysonaha.

– O tyziktsumuêhîkta tsimy – tsimaha. Ikiahatsa baze aty tsakurêta zeka Deus bo tsimysakibazikiknaha iwatahi:

– O Deus ikia hi tsamysapyrêta – tsimaha.

¹⁴ Ikiahatsa tuk aty tsimyitsapyrêta zeka Sesus tuktsa asahi myspirikpokotsa mysihuahuaka!

– Mywahoro bo paku tynahaktsa – tsimaha. Myzumunahaze itsyhyryze Deus bo mopamykysonaha. Imyitsapyrita pizororowy ana hi Deus bo myzapykykynaha. Imyitsapyrita harek humo itutawy ty su maha, iwaze Deus pizororowy. Asa hi:

– Mypehakatsa Sesus humo myspirikporêtsa iwatsahi ihumo itutawy ty aharek bete su tsimaha – maha. Iwa tsimykaranaha.

¹⁵ Iwaze Deus bo myzapykykynahaze Deus pizororowy. Kytsa Sesus humo sispirikpotsa babatsa Deus pizororowy. Iwaze imysapybara ty nikara zeka Deus piokzohik. Iwa imyitsapyrita tsakurêta mozikzo.

¹⁶ Iwatsahi imysapybara ty tsimykaranaha zeka ustsana Sesus tuktsa bo tsimypamykysokonaha. Ahapetuk typamykysokonaha. Iwaze Deus hyrikoso myzahakse mysapyrêtsa tsimoziknaha. Iwatahi Deus mymypokzitsiki pisikpybybyriwyky. Iwa tsimyzurukunaha zeka wasani tsimaha. Deus zikwy ahabaze mynapykyryk. Tsimyzapykykynaha humo izikwy ahatuk mynapykyryk. Ahamysapyrêtsa tsimoziknaha.

¹⁷ Taparakta Erias mywata. Erias Deus bo ziknapamykysoikik. Tubabatu Erias atatuze Deus bo nipamykysoziuku:

– O Deus hyritsik ty ka zâk zâkbyity! – niy. Ba ziknawõ. Deus iharere ziwabyze iwahi batu hyritsik ziknawõ. Harakykbyihi nityktseheze hyritsikbara.

¹⁸ Bykyze Deus bo nipamykysokoze:

– O Deus hyritsik mybo tyziwõkta! – niy. Hyritsik nizapykykyze Deus ziwaby. Hyritsik nawõzo hÿ. Wytyk wihara taharazoze zibakaranaha. Iwa ikiahatsa Erias watsa tsimahaktsa! Ikiahatsa Deus bo tsimypamykysonaha. Amy skaraba Deus bo tsimyzapykykynahaze ana hi tsipiperykynaha. Ihumo ahaspirikporêtsa babatsa iwa amy ty tsimyzapykykynaha atsatu Deus ahabo nyny my.

¹⁹ O katukytsa! Aty ahatuk Deus harere tsikaeni zuba iakparawy iwatahi pimyiki iwa zeka ikia ity tsipitsumuēhīnaha. Ituk Deus bo tsimypamykysokonaha. Ikia tsimyzihikik:

– O atakta Deus harere bo yhỹ myzo zeka ba zimyi – iwatahi ikia Deus bo ituk tsimypamykysoko. Taharere ty wasani haty nikara Deus harere iakparawyo atakta tsimysapyrēta niyzikzo.

²⁰ Iwaze atahi zimyita zitsumuēhīkī Deus hi:

– Atahi wasani my. Tsiktsumuēhīkī iwatahi imysapybyita tu nikaraze piokzohik – my. Deus bo pioktyhyryk. Sinini ykarawy bo ba zikpeha. Imysapybyita tu nikaratatu piokzohik. – Ana bo hi mytsatzyiutahaktsa! tsimaha

Tsiaku niy

Peduru tapara papeu humo Sesus tuktsa bo ziwatahaka nanabyitaba napykyryknaha

Peduru Sesus tuk zinymyrykyta. Sesus tuktsa bo ziwatahaka nisi-akusukniki. Sispirikpobyitsa nisisapybyrikinaha iwatahi sibo ziwatahaka. Deus Peduru ziapewywyky iwatahi Deus harere ziwatahaka. Aba katsa kino niwatihi Sesus soho humo tanymyryky.

¹ Utakta Peduru. Kiristu Sesus iakzohota. Sesus Kiristu kape niy:

– Ikia myzubaha bo tsimy. Nanabyitaba wasania ty tytsaso – niy.

Yh̄y iky.

Aba ikiahatsa Deus tyryktsa bo piwatahaka. Zahawatawy. Nanabyitaba tsinapykyryknaha. Põto eze tsinapykyryknaha. Karatas eze, Kapazosia eze, Asia eze, Bitinija eze iwa tsinapykyryknaha. Sihudikhudikwy eze ktsa ahasoho – O bipyritsa – mykaranaha. Deus batu – Asahi katyryktsa – my.

² Deus myzo koikny bakta tu niy:

– O asaktsa mysiwatawy. Amy skaraba niwa nikara, asaktsa mekywa tu moziknaha simysapyrëtsa moziknaha iwatahi mysiwatawy. Sesus Kiristu harere bo yh̄y mynakaranaha iwaze simysapyrëtsa moziknaha. Sesus katse babata sisapy zeky nihyrikosokda iwatahi kahyrikoso situk mynapykyryk – niy. Aba Deus bo ahasoho motsasoko:

– O myzo atyryktsa humo tsysipokzitsikikta. Asaktsa nanabyitaba mynapykyryknaha tsysakihikykyta. Ahumo sakurëtsa babatsa moziknaha – my. Iwa Deus bo mopamykysoko.

Deus sapyrënikia ty ana humo hi tsinamyspihikiknaha.

³ Katsaktsa Deus tsimytsasokonahaktsa:

– O Deus myzo ikia zuba tsamysapyrëta. Ikia Sesus Kiristuzo tsimy wasani tsimy kara – tsimaha. Atahi Sesus Kiristu nihyrikosokdaze izihyryzikpowy. Iwatsahi katsa ihumo tsimyspirikponaha zeka Deus tyryktsa tsimoziknaha. Deus myhumo tsimypokzitsiarëta iwaze ihyrytsa tsimoziknaha.

⁴ Iwatsahi tsipiperyknaha. Deus tuk mywahi tsimynapykyryknaha iwatsahi taperyky. Deus bijoikpe eze tu isapyrënikiaha ty kino mybo nyny my. Deus mybo nyny mahaka ba zikyryry batu hawa tohi ziky ba zikokda. Deus isapyrënikiaha ty tawahi mynakara anatyhi Deus mybo nyny my.

⁵ Deus isapyrënikia ty tabaze botu ziky my. Sesus Kiristu humo tsimyspirikponaha zeka Deus tawahi ahahumo tsimypokzitsiukrëta. Aibani hawa ibo mymyoktyhyryk ana hi myzubaha bo piwatawy. Ituk mywahi tsimynapykyryknaha ana hi taperyky.

⁶ Ana soho bo hi mytsaty tynakaranahaktsa kytsa! Ana humo hi ahakurëtsa. Mybarawy eze tuze tsimyzurukunaha batu ahaku. Sinini tsimykarana humo ahasukatsihikrëtsa. Ahamyitsapyri humo batu ahaku. Pahamyijaikiknaha humo batu ahaku.

⁷ Ouro wa tsipokzitsarëna katsaktsa ouro wa. Katsa kino Sesus humo myspirikporëtsa zeka ihumo mymypokzitsirëtsa h̄y. Katsaktsa ouro izo bo piakzananaha wa takpyky amybara tu ja iwaze amy ty ouro baba zuba motare, iwa Deus niwatihi mybo my. Sinini tsimykarana zeka Sesus humo myspirikporëtsa ana humo hi tsihyrinymyrëta. Sinini tsimykarana zeka Deus harere bo yh̄y tsimykarana. Myspirikporëtsa h̄y wasani tsimykarana. Ba zikpyk ana humo hi Deus tsihyrinymyrëta. Ouro izo eze ky waha. Sesus Kiristu myziksizoze Deus ahape:

– Kaokzeka ikiahatsa ahamysapyrētsa. Ahaharere wasani Sesus watsa ahapunihikrētsa tsimoziknaha – my.

⁸ Katsa Sesus Kiristu bo batu iktsa zikaha iwatsa tu ihumo mymy-pokzitsirētsa. Aba ihumo ba zynynaha iwazehi ihumo ahaspirikporētsa hỹ. Ahaspirikporētsa zeka ahakurētsa tsimoziknaha. Sesus Kiristu humo ahakurētsa hỹ.

⁹ Ikiahatsa Sesus humo tsikspirikpokonaha. Iwatahi Deus bo pahaoktyhyryk. Aba ahakurētsa Deus baze tu tsinapykyryknaha iwatsahi ahakurētsa hỹ. Abaka ikiahatsa ituk tsimynapykyryknaha. Tawahi ahahumo abaka ba zikmyrek tsahahyrinymyrētsa hỹ.

¹⁰ Tubabatu Deus sohokotsa mytsaty nikaranaha. Hawa Deus mybarawy ezektsa mysipokzitsiki ana soho bo mytsaty nikaranaha. Anahi zinymyry tsihikiknaha. Asaktsa:

– Hawa Deus hyrytsa humo mysioktyhyryk. Hawa ihyrytsa humo tsimy-pokzitsiukrēta – nikaranaha. Iwa ziknapamykysokonaha. Tapara Deus mybarawy ezektsa mysioktyhyryk iwa Deus sohokotsa ziknapamykysokonaha.

¹¹ Kiristu hyrikoso Deus sohokotsa tuk niapykyryk. Ata soho sibo nitsasokoro. Ata soho:

– Deus zipehata sinini mykara. Sininiwy nepykze Deus isoho “O katse humo kakurēta” – my kytsa isoho humo niwatihi – O atakta imysapyrēnikita. Wasani mykara – maha. Anasoho ziwabynahaze Deus sohokotsa hi:

– Aty skaraba Kiristu hyrikoso mybo hi motsasokoro – nikaranaha.

¹² Deus sohokotsa ispe niy:

– Batu ikiahatsa bo zuba katse sinini mykara. Aiba ezektsa kino niwatihi sinini mykara – niy.

Taparaktsa Deus sohokotsa ana harere ziknatsasokonaha. Abaka kytsa Deus wasania ty ahabo motsasokonaha atsatu ahabo motsasokonaha. Deus hyrikoso harere humo motsasoikiknaha. Ata kino Deus bijoikpe ikny inasikta ata soho motsasokonaha. Bijoikpe iknyktsa Deus tsumuēhītsitsa kino niwatihi inasikta harere pinymyry tsihikiknaha.

Deus imysapyrēnikita. Iwatsahi ahamysapyrētsa niwathiktsa.

¹³ Kyze iwatsahi meky watu tsimoziknahaktsa! Sesus Kiristu myziksizoze Deus tisapyrēna ty ahabo nyny my ihumo myspihikrētsa. Ahanamy bo ka mytsaty mytsaty byitaha. Sesus Kiristu myziksizo naha bo zuba mytsaty tynakaranaha!

¹⁴ Tapara ahaspirikpobyize ahasopyksapybyitsa ziknakaranaha. Abaka mahani. Deus harere bo hỹ tsimykaranaha ana humo hi tsinymyryknaha. Amy ty wasani tsimynakaranahaktsa!

¹⁵ Deus imysapyrēnikita. Ata kino ba zimyi. Atahi zahawatawyhik. Iwatsahi ikiahatsa iwata tyzurunahaktsa! Ahaharere wabymybara byihuja ahaharere humo kino wasani tynakaranahaktsa!

¹⁶ Deus papeu humo botu ziwatahaka:

– Utakta ba zimyi. Kamysapyrēta. Iwatsahi ikiahatsa kawatu tykarana-haktsa. Kawatsa tihi ba zimyinahaktsa – niy.

¹⁷ Iwaze Deus bo tsimypamykysokonahaze ipe tsimaha:

– O Deus myzo – tsimaha.

Atakta myzubatsa astsatutsa watsa isopyk. Hawa mykaranaha ty mot-saso. Asahi wasani mykaranaha zeka isapyrēnikia ty sibo nyny my. Asahi sisopyksapybyitsa mykaranaha zeka sinini ykarawy bo mysipehahik. Hawa mykaranaha zuba humo motsasoko. Iwatsahi hawa tsimyzurukunaha zeka pykyhytutaha tsimaha.

¹⁸ Tapara zikzurukunahaze isapybara ty tsikykaranaha. Ahazotsa watsa zikzurukunaha, sisopyk yh̄y tsikykaranaha iwatsahi ahasopyksapybyitsa tsikykaranaha. Deus zikwy humo meky watu tsimoziknaha. Ihumo ahamysapyr̄etsa tsimoziknaha. Hawa sa niy Sesus Kiristu ahasapyzeken zibezenaha. Ahasapyzeken nihyrikosokda iwaze Deus bo myoktyktsa niyzik. Atahi Deus ouro ty batu nyny niy. Parata ty kino niwatihi batu nyny niy. Ouro aiba eze mohokda. Iwaze parata niwatihi mohokda. Batu pykyhy ipokzitsi.

¹⁹ Deus Sesus hyrikosokdawy huak tsipokzitsar̄ena hiba. Kiristu nihyrikosokdaze ahasapy ziake. Taspu ahapokzi ziweke. Taparaktsa hozipyrykzatsa wa kytsa sapyzeken ziknasibakanaha. Iwatahi sisopyksapybyitsa nikaranaha Deus nisiokzohik hozipyrykzatsa ziknasiwezokonaha anahumo hi nisiokzohik. Hozipyrykzatsa sisapyr̄etsa zuba nisibakanaha. Hozipyrykzatsa simyitsapyr̄etsa zeka ba ziksibanaha. Atawata hi Kiristu ahasapyzeken nihyrikosokda. Imysapyr̄enikita tu ahapokzi nihyrikosokda hozipyrykza wata niy.

²⁰ Tapara Deus mybarawy isuknihybyize Sesus mymyoktyhyrykta ziwatawyhik. Iwatatu abazubata Deus tatse zipedahik. Mybarawy ezektsa bo inasik iwaze Deus bo pahaoktyhyryk. Aibaze myzubaha ihumo mospirikponaha.

²¹ Kyze Sesus nihyrikosokdaze Deus zihyrizikpowy. Myzubaha ibo iktsa maha. Atahi imysapyr̄enikita wasani mykara. Iwatsahi taperyky. Ikiahatsa Deus humo ahaspirikpor̄etsa iwahi Deus mozihikik.

²² Abaka Deus harere bo yh̄y tsimykaranahaze, Deus hi:
– O asaktsa wasani mykaranaha. Mekywatu niyziknaha – niy. Ahatukytsa humo ahamypokzitsiukr̄etsa h̄y. Ba zikahape spihikbatanaha ahatuktsa humo ahamypokzitsiukuk.

²³ Ahazotsa ikny tsipupurukuknaha. Ahazotsa mybarawy ezektsa niakbanaha. Ikiahatsa kino niwatihi tsimyhyrikosokdanaha. Abaka ikiahatsa tsimypurukzonaha hyrity watsa, Deus hyrytsa tsimoziknaha. Deus ba zikyrikosokda. Katsaktsa Deus harere bo yh̄y tsimykaranaha zeka Deus hyrytsa tsimoziknaha. Deus harere ba zikpyk, tawahi mypyk. Ikiahatsa hi tsimypurukzonahatsa hyrity watsa ihyrytsa tsimoziknaha.

²⁴ Deus papeu humo
– Mybarawy ezektsa wihara sazik waha.

Abaka wihara sazik anatu byi
hana bo nasazikt̄o baik.

Wihara sazik hana bo ja
atsoko nihokda

²⁵ Deus harere ba zikpyk.

Tawahi iharere mynapykyryk – niy.
Ana kino botu tsiwabynaha. Deus wasania ty tsiwabynahaze iharere bo yh̄y tsimykaranaha.

2

Sesus harahare tsipokzitsiar̄eta hyrity wata. Sesus tuktsa Deus tyryktsa maha.

¹ Kyze amy ty sisopyksapybyitsa batu h̄y zikaha ahamyspihikbata byrihuja. Wasape tsimykaranaha! Mektsa humo ahazokdi byrihuja! Ahasopyksapy byihuja! Ahaharerewabymybara byihuja! Iwa tsimykaranaha. Tapara ahaspirikpobyitsa tu tsikykaranaha. Abaka batu. Mekywatu tsimoziknaha.

² Mypehatsa ahahumo tsimypokzitsiukr̄eta. Iharere papeu humo ziwatahaka ana kino tsipinymyrykynaha! Ibykyhy ipurukuhu zytyk tawa taje

tsotsik iakparawy. Ikiahatsa kyry watsa Deus harere ahakparawy. Iharere anawaha. Ibykyhy wotsik humo taypykyk anawa hi Deus harere humo meky watu tsimoziknaha. Ahamysapyrētsa tsimoziknaha.

³ Iwaze Sesus humo ahaspirikporētsa atahi Deus pahaoktyhyryk, atahi ihumo pahapokzitsiki.

⁴ Mypehakatsa Sesus humo ahaspirikporētsa. Atahi harahare ispitu zek tawata. Sesus zuba ispitu mynapykyryk. Wastuhu kytsa ihumo batu siakparawy. Sispirikpobyitsa hi ihumo batu siakparawy. Isoho:

– Atakta batu imysapy – sisopyk. Deus hi isoho:

– Atakta imysapyrēnikita. Zikpehata ba zikmyi. Mybarawy ezektsa kabo mynasioktyhyryk – niy.

⁵ Ikiahatsa Sesus humo tsimyspirikponaha zeka atahi aahumo tsimypokzitsiukrēta. Ikiahatsa haraharezatatsa hyrity watsa tsimoziknaha. Deus wahoro zubata haraharezatatsa ty hi nizukniki. Asahi ihumo sispirikporētsa iwahoro zubata hyrity watsa maha. Deus hyrikoso situk mynapykyryk iwatsahi iwahoro hyrity watsa maha. Abaka ikiahatsa hi Deus wahoro zubata eze ziknapamykysokonahatsa watsa tsimaha. Mekywatu tsimoziknaha. Deus hyrikoso ahatuk mynapykyryk humo ahamysapyrētsa tsimoziknaha. Tubabatu Deus wahoro zubata eze ziknapamykysokonahatsa Deus zitsumuēhīkīnaha. Siwatsa ikiahatsa ziknapamykysokonahatsa watsa ikiahatsa Deus tsitsumuēhīkīnaha. Nawa haty Deus bo nyny niaha ana humo hi tsakurēta nikara. Atsatu nawa ha Deus bo nyny tsimaha ana humo hi tsakurēta mykara. Sesus humo ahaspirikporētsaze Deus aahumo tsakurēta mykara.

⁶ Deus papeu humo ziwatahaka:

– Kytsa wahoro mozoknikinahaze haraharetsa mysiwatawykynaha.

Utakta harahare hyrity wata.

Harahare tisapyrēta.

Harahare ustsā haraharezatatsa iwa babatsa tu buruhuwa nisizozokonaha.

Atahi harahare hyrity wata myzipeha.

Siaō sapy waha bo myzipeha.

Atahi myzubaha ibo iktsa zuba maha.

Wasani mykara.

Aty ihumo tspirikporēta atahi batu isikpyby.

Atahi tsakurēta hỹ

Iwa Deus papeu humo niy.

⁷ Ikiahatsa Sesus humo ahaspirikporētsa ahabo harahare hyrity wata my. Harahare tisapyrēta. Ihumo sispirikpobyitsa Sesus batu siakparawy, atahi sibo harahare isapybyita hyritywa my. Deus harere papeu humo ziwatahaka:

– Wahoro suknikitsa ata harahare humo batu hỹ zikaha.

Ata harahare hi tisapyrēta niyzik.

Ata humo hi ustsā haraharezatatsa iwa babatsa buruhuwa nisizozokonaha – niy.

⁸ Usa Deus papeu humo ziwatahakazo:

– Ata harahare humo hi kytsa mynarahanaha.

Kytsa Deus harere humo batu hỹ zikaha

sisopyksapybyitsa nikaranaha.

Iwatsahi harahare hyrity wata nisimiywy – niy.

Ata hyrity wata Kiristu kytsa abazubatsa pehakatsa mozik. Asahi iharere bo batu hỹ zikaha natukyrikihyk nahatsa watsa. Hawa Deus nizihikik batu hỹ niaha.

⁹ Ikiahatsa hi meky watu tsimoziknaha. Deus zahawatawy. Tubabatu ityryktsa Sudeutsa nisitsihikik. Iwatahi zahawatahawya. Ikiahatsa Deus wahoro zubata eze ziknapamykysokonahatsa hyrity watsa Deus tsitsumuēhiknaha. Mekywatu tsimoziknaha. Deus hyrytsa tsimoziknaha. Deus zahawatawy iwatsahi ipe tsimaha:

– O Deus myzo ikia zuba wasani tsimykarana. Ikiya zuba tsamysapyrēta. Ikiya myhyrizikwanikita – tsimaha. Iwa ahamysopyksapybyitsa tsikykaranaha iwaze tsimoewyhiknaha ana ty hi tsipiwatawykynaha.

Tapara ikiahatsa kytsa miwa ezektsa watsa tsimaha. Abaka kytsa iworo-roha buruktsa watsa tsimaha ahamysopyksapybyitsa tsikykaranaha tsimoewyhiknaha.

¹⁰ Tapara ikiahatsa Deus hyrytsa byitsa tu. Abaka ihyrytsa babatsa tsikyzykna. Tapara ahanamybyitsa watsa abaka batu. Abaka Deus ahamo tsimpokzitsiukrēta.

Katsa Deus tuk tsimyzihihiknaha.

¹¹ Kyze – O katukytsa ikiahatsa mybarawy eze sisukmotsa watsa tsimaha. Bipyritytsa watsa. Mybarawy eze tsinapykyryksyknaha. Ikiahatsa ahabo zuba mytsaty tsimykaranaha zeka ahamysopyksapybyitsa tsimykaranaha. Ikiahatsa tsimyikinaha. Ahamysapybyitsa tsimykaranaha ana hi tsimoewynaha – my.

¹² Kytsa Sesus humo sispirikpobyritsa zimyijaikiknaha. Sesus tuktsa soho motsaso tsihikiknaha:

– Myokzeka batu wasani mykaranaha. Kytsa nisibaikiknahatsa watsa – mybarapetu mykaranaha. Ikiahatsa siokzeka batu zimyina. Ahahyryzikporētsa wasani tsimahaktsa! Ahamysapyrētsa tsimaha iwaze ahasoho mot-sasokonaha:

– O asahi wasani mykaranaha – maha. Siharereziubyitsa ahasopyk wasaniha humo harereziu mykaranaha. Nawa puruze Sesus myziksizoze ahasoho tihi:

– O asaktsa simysapyrētsa – mykaranaha.

¹³ Kyze ikiahatsa Sesus tuktsa tsimaha. Mypehakatsa Sesus hyrytsa tsimaha. Mypehakatsa harere bo yhỹ tahaktsa! Iwa tsimyzurukunaha zeka Sesus soho ty ka batu tyso:

– O atakta batu imysapy – maha. Iwa ba ziktsasonaha. Mypehakatsa abazubatsa Sesa harere bo yhỹ tsimykaranaha. Mypehakatsitsa ustsa hudikhudikwy ezektsa iharere bo yhỹ mykaranaha.

¹⁴ Ahapehakatsa harere bo yhỹ tsimykaranaha. Deus harere humo Sesa zahapeha. Kytsa simysopyksapybyitsa nikaranaha ipokso sipybyrētsa. Kytsa hi simysapyrētsa sisoho:

– Myokzeka wasani tsawatsa tsimaha – mykaranaha.

¹⁵ Asaktsa Sesus humo sispirikpobyritsa ahasoho pahaziubyri tsihikiknaha. Ikiahatsa hi tsipisapybanaha zeka batu zikaha.

¹⁶ Zihitsa tsumuēhĩtsa pe:

– Tsimyzukehik – niy. Kyze ikia tsipiksi iwa hana wa tihi mykaranaha. Hana bo ja tahasapy tsihikiknaha nabo mokurunaha. Katsa Sesus humo tsimyspirikponaha zeka siwatsa mymyzihikrētsa. Myharere zuba zeka tyso so byitaha iwa zeka batu imysapy tsimykaranaha. Iwa tihi:

– Aba mymyzihikrētsa iwaze tsipipokzitsikinaha. Deus harere bo zuba yhỹ tsimykaranaha – tsimaha.

¹⁷ Myzubaha bo wasani tsimykaranaha! Utsa Sesus tuktsa ahaturytsa humo ahamypokzitsiukrëtsaktsa! Deus harere bo pykyhytuty yhÿ tsimykaranaha. Mypehakatsa abazubata harere bo yhÿ tsimykaranaha. Takino usts pehakatsa sihudikhudikwy ezektsa siharere bo yhÿ mykaranaha. Iwaze sizubarëtsa bo wasani tsimykaranaha.

Kiristu sininiwyky atawata tsimyzurukunahaktsa.

¹⁸ Kyze O Sesus tuktsa ahatsihitsa harere bo yhÿ tsimykaranaha. Ahatsihitsa ahabo wasani mykaranaha zeka siharere bo yhÿ tsimykaranaha. Ahatsihitsa ahabo wasani ahabyizeka niwatihi siharere bo hyÿ tsimykaranaha. Ahatsihitsa simysapyrëtsa harere bo yhÿ tsimykaranaha. Sisakimiyjanikita zeka kino niwatihi siharere bo yhÿ tsimykaranaha.

¹⁹ Utsa kytsa pahasapybyikinaha zeka Deus harere bo yhÿ tsimykaranaha humo sinini tsimykaranahaze. Iwa Deus myzehikik ahahyrinymyrëtsa. Ikiatsa sinini tsimykaranaha zeka ahakubyrisoroku ja iwaze Deus tisapyrëna ty ahabo nyny my.

²⁰ Ahatsihitsa pahabetsakaknaha ahamysapybyitsa tsimykaranaha humo Deus tisapyrëna ty ahabo batu nyny ziky. Ahazikaranikitsa zeka pahasininiwyky iwaze Deus isapyrënikia ty batu ahabo nyny ziky. Ikiatsa kino tsipisapybakanaha zeka ahatsihitsa pahasininiwykynaha tu iwaze Deus tisapyrëna ty ahabo nyny my. Ahapunihikrëtsa tsimoziknaha.

²¹ Ana humo kino Deus zahawatawyhik sinini tsmaha Kiristu wata zahawatawy.

Kiristu ahasapyzesty sinini nikara iwatsahi ikiahatsa sinini ykarawy bo ahawahi ba zikahasapynaha. Atahi imysapyrënikita tuze sinini nikara. Iwata tsimyzurukunahaktsa ana bo kino Deus zahawatawyhik.

²² Kiristu ba zimy. Ba zikmyspihikbata.

²³ Utsa ihumo siharerewabymybarëtsa atakta sibo batu harere. Kytsa zimyijakanahaze batu taty tsapusare niy. Tasukyritsitsa ty batu tyso:

– Ikiatsa tsipiksapybyrikinaha iwatahi sinini tsmaha iwa mozihikik – my. Iwa batu tyso. Atahi:

– O Deus ikia kahumo tsipikpokzitsiki kahyrinymyrëta. Iki hi wasani tsimykar. Kasukyritsitsa bo wasani tsimykar – niy. Iwa Deus bo nitsaso.

²⁴ Mysopyksapybara humo Kiristu nihyrikosokda. Iharapatawyhyta humo nihyrikosokdaze mysopyksapybyitsa tsimykaranaha mysapyzesty nihyrikosokda, iwaze mysopyksapybyitsa tsikykaranaha Deus nimyokzohik. Nihyrikosokda iwatsahi mypunihikrëtsa tsikyziknaha. Batu mypyby. Mekywatu tsimoziknaha. Deus okzeka mysapyrëtsa. Kiristu tetekwy humo tsikzororonaha.

²⁵ Tsikykmynaha. Katsaktsa hozipyrykzatsa hyrity watsa asahi ske byita buruk nizaranaha. Abaka Deus mymyoktyhyryk. Ituk tsinapykyryknaha. Atahi myhumo tsimypokzitsiukrëta. Iwaze myzarabyitsa wa tsimoziknaha.

3

Hawa sisukzakatsa sisopyk.

¹ Kyze nawa sipytsakaza! Ahapytsa harere bo yhÿ tykaranaha. Wastuhu ahapytsa Deus harere bo yhÿ ahabyizeka ikiahaka zuba iharere bo hyÿ tsimykaranaha. Ikihaka wasani tsimykaranaha zeka ahapytsa Deus harere bo hyÿ mykaranaha. Ikihaka ityso byizeka Deus harere bo hyÿ mykaranaha.

² Ikihaka wasani tsimyzurukunahaze ahapytsa tahapehe mykaranaha:

– Kaoke tatsa tsimysapyrētatsa. Atatsa iktsa zuba isopyk – mykara. Iwatahi Sesus Kiristu humo tspirikporēta mozik.

³ Kykyryk pykyhytutaha! Ahasuk ty wasania tyzuba korokbyktaha! Ahasuk wasanita ty korobyk tsimaha zeka kytsa ahabo batu iktsaziu zikaha. Ahaharadi humo kino niwatihi hazizo hazizo byritaha iwatsahi kytsa ahabo batu iktsaziu zikaha. Ahanahatsa humo ouro bara tu ahatsyhyrytariktsa ipokzitsi baratu.

⁴ Mysuk mysykbaik batu zikokzo. Mynahatsa hana bo ja, mytsyhyrytariktsa mohokdanaha. Ahamoksapyrētsa Deus okzeka batu ipokzitsi. Ahahyryzikararawy hiba Deus humo tsipokzitsarēta. Ahazikarabyrihu ja kytsa tysitsumuēhī ana humo hi Deus tsakurēta. Ba zikmyi ana humo kino Deus tsakurēta.

⁵ Tubabatu taparakykyhy zikzurukunaha. Asizahi Deus humo sispirikporēza, asizahi Deus tisapyrēna ty ziperykynaha. Asiza kino tahapytsa harere bo yhỹ ziknakaranaha. Tahapytsa humo simypokzitsiarēza hỹ. Iwazahi Deus okzeka simysapyrēza niyziknaha.

⁶ Asiza Sara waza. Atatsa tabarikta Abarão harere bo yhỹ ziknakara. Iki kapehakarta hyrity watsa nikara. Iwa atatsa tabarikta pe isopyk. Iwaze ikiahaka Sara waza tsimoziknaha. Ahapunihikrēza ahapyby byihuja Sara waza tsimaha. Iwaze Sara hyrytsa waza tsimoziknaha.

⁷ Kyze kytsa bo motsasoko. Ahaokeza batu sipaik maha ana humo hi mytsatzyiutaha. Iwatsahi tysipokzitsinahaktsa! Deus tabo pahaoktyhyryk iwa ahaokeza kino niwatihi tabo mysiooktyhyryk. Asizahi iharere bo yhỹ maha zeka ikiahatsa watsa iwatsahi harapetok tu tabo pahaoktyhyryk. Atatsa ka tsipokzitsikinahaktsa! Iwatsa tsimyzurunaha zeka Deus bo tsimypamykysokonahaze pahawaby.

Ahamysapyrētsa tsimykaranahatsa.

⁸ Kyze sizubarētsa bo kapehawy motsasoko. Astsa botu mytsaty tsimykaranaha! Tyharape pokzitsinahaktsa! Utsa tahatsumuēhīnaha. Asa zuba batu tyso – uta zuba wasani – kasopyk iwa batu tyso. Tyharape pokzitsikinahaktsa!

⁹ Deus zahawatawyhikze ahape niy. – Amy ty tisapyrēna ty ahabo nyny my – niy. Kytsa pahamyijakanaha zeka ikiahatsa sibo ba ziksimyija. Kytsa ahabo tahasakaninaha zeka awatu taha. Iki ahatsa hi tysipokzitsinaha.

¹⁰ Mytsatzyiutaha! Deus harere humo papeu ziwatahaka:

– Atahi tawahi tsakurēta mozihikik
atahi batu mybarapetu mykara. Ba zikbetsak.

¹¹ Mysopyksapybyritsa tsimoewynaha
katsaktsa tsipisapybakanaha!

Mypehatsitsa batu imysapy mynakaranaha
katsaktsa tsipiharereziukunaha.

¹² Mypehakatsa kytsa sisopyksapyrētsa bo nasisuparaka iwaze sihumo
mysipokzitsiki.

Ibo mopamykysokonahaze mysiwabyziuku.

Kytsa sisopyksapybyitsa mykaranaha
sihumo takyriki – niy.

Iwa Deus harere papeu humo ziwatahaka.

Kiristu tuktsa ihumo sinini mykaranaha.

¹³ Iwaze tsipisapybakanaha zeka aty sa pahakniki

¹⁴ Iwatuze wasani tsimykarannahaze siharereziubyitsa pahasapybyikinaha. Iwaze ahakurētsa tsimoziknaha! Sipybyrētsa tu nikaranaha ikiahatsa ahapunihkrētsa tsimoziknaha! Iwaze Deus tisapyrēna ty ahabo nyny my.

¹⁵ Kiristu ahapehakatsa bo ka iktsazuba tahaktsa! Iharere bo zuba ma tsimynakaranaha. Aty my zeka tahi:

– Hawa Sesus humo aspirikpo – my. Sesus humo ahaspirikporētsa babatsa tsimaha zeka iwaze ahasikpybybyitsa Sesus soho sibo tsimytsasoziukunaha.

¹⁶ Sibbo tsimytsasoziukunahaze sihumo ahamypokzitsirētsa, ahaharerez-iuwytsa ty iwatsahi piwabytoktokonaha. Ahamysapyrētsa zeka siharerewabymybaranikitsa ty ka ba ziksisonaha. Ahasopyksapyrētsa humo ahaharere soho ziubyibatabyihuktsa mykaranaha!

– Kiristu hyrytsa batu simysapy maha – ana kino motsaso tsihikiknaha. Wasani tsimykarannaha iwatsahi batu siharerewabymybara pimiyikiknaha.

¹⁷ Kytsa pahasapybyinaha zeka ahamysapyrētsa humo wasani. Kytsa pahasapybyikinaha Deus hi pahapokzi tsihikik. Ikiahatsa kytsa pahamyijakanaha zeka ahamysapybyitsa tsimykarannaha humo batu wasani. Ana humo hi Deus takyriki.

¹⁸ Kiristu soho bo mytsatyziutaha! Hawa nihyrikosokda mytsatyziutaha. Mysapokzitsikitsa mysapyzeken nihyrikosokda. Estuba zuba nihyrikosokda iwaze Deus mysopyksapybyitsa tsikykarannaha Kiristu humo mymyokzohik. Kiristu imysapyrēnikita tuze siharereziubyitsa sapyzeken nihyrikosokda. Iwaze Deus bo mymyoktyhyryk. Mybarawy boze isukyrytsitsa inury zibezena. Deus zihyryzikipowy.

¹⁹ Kiristu sinini ykarawy bo inakozore. Anaeze Deus harere nitsasoko. Sinini ziknakaranahatsa hurukwy eze hi Deus harere nitsasoko.

²⁰ Asahi Deus harere bo batu hỹ zikaha. Tubabatu Noe tsaraha puētsikbyita nizuknikize Deus harere bo batu hỹ zikaha. Deus mybarawy ezēktsa humo iakyri tsihikbyita nikara. Tsakubyrisorokrēta nikara iharere bo yhỹ maha ziperyky. Sizubabyitsa tu iharere bo hyỹ nikaranaha. Oito zuba iharere bo ma nikaranaha. Oito zuba tsaraha puētsikbyita bo nipupunaha. Deus oito zuba nasizuk. Asahi zuba tsaraha puētsikbyita eze tu niapykyryknaha. Utsaktsa pihik bo tahababaiknaha.

²¹ Pihik kino myharasusuwy soho piwatawyky. Myharasusunahaze ba zikmypiknaha. Katsaktsa tsimyharasusunahaze myzubaratsa pe:

– Abaka Deus okzeka wasani tsimaha. Iharere bo zuba hyỹ tsimykarannaha. Sesus nihyrikosokda na humo mysapyrētsa tsimoziknaha – tsimaha. Anahi pihik eze myharasusuhiknahaze myzubahaha bo tsiwatawynaha. Sesus Kiristu nihyryzikpozo anahumo hi iwatsa tsimykarannaha.

²² Ata hi bijoikpe bo nido. Deus tuk napykyryk. Ipanuryk taba mynapykyryk. Sizubarētsa iharere bo hyỹ mynakaranaha. Bijoikpe iknyktsa Deus tsumuēhītsitsa, simyharerewabyrētsa zikwytsitsa bijoikpe pehatsitsa iwatsa Sesus Kiristu harere bo ma mynakaranaha.

4

Hawa Kiristu zikzuruku ikiahatsa iwatsa tsimyzurukunaha.

¹ Kiristu mybarawy eze tuze sinini nikara. Ana bo kino mytsatyziutaha! Mysapokzitsiwy tuk sinini nikara iwatsahi ikiahatsa hi astsatu mytsaty tahaktsa. Ikiahatsa kino niwatihi aba sinini tsimaha tu tsikahazozikymybanaha. Sinini tsimaha zeka imysapybara humo batu hỹ zikaha iwatsahi batu ahamyi wasani tsimykarannaha.

² Tapara ahaharere bo zuba yh̃ ziknakaranaha abaka batu, Deus harere bo zuba ma tsinakaranaha.

³ Tubabatu kytsa sispirikpobyitsa watsa zikzurukunaha. Imysapybara ty zuba ziknakaranaha. Ana hi niwazuba tsikaha! Tapara wytykyryk ziknasisapybyrikinaha. Utsa kytsa nasiwowokoronaha, jabyiza ziknasipyrirykyknaha ustsya kytsa ziknasipyrirykyknaha, tsōsī zikzikukunaha humo batu kyik ziky, tsahamypyryjkrētsa, deusbyitsa bo zuba ziknapamykysonaha. Abaka asa kino botu nepykbanaha niwazuba.

⁴ Abaka sispirikpobyitsa okzeka ikiahatsa Sesus humo meky watu tsi-moziknaha. Ahamysapyrētsa iwatsahi pahasapybyrikinaha. Ikiahatsa imysapybara ba h̃ zikaha. Amy ty batu imysapy batu situk zikaha ana humo kino batu sihyrinymyry iwatsahi ahasoho humo siharerewabymybarētsa. Ahasoho humo mybarapetu mykaranaha.

⁵ Siharerewabymybarētsa tu ka Deus bo tytsasonaha. Hawa mybarawy eze zikzurukunaha Deus bo motsasonaha. Aty wasani ziknakara Deus tisapyrēna ty ibo nyny my. Atakta imysapybyita tu ziknakara Deus sinini ykarawy bo myzipeha. Kiristu myziksizoze kytsa ihuak ty sibo nyny my. Iwaze kytsa simysopyksapybyitsa kino niwatihi sihuak ty sibo nyny my.

⁶ Tubabatu myzotsa nihyrikosokdanaha, hawa mybarawy eze zikzurukunaha, Deus nisiny. Atahi sihuak ty sibo nyny niy. Katsa mywatsa sihuak ty Deus sibo nyny niy. Kiristu Deus harere sibo nitsasoko. Iwaze asaktsa sipitutsa kino niwatihi Deus tuk tahawahi mynapykyryknaha.

Isapyrēnikia sohotsitsa ustsya bo tysitsumuēh̃naha.

⁷ Aibani tsizubarēna nepyk. Ikiahatsa hi Deus bo tsimypamykysokonaha. Batu ahakubyrizikzumu. Ahape tu ahasopyk tsimykymynahaktsa iwaze Deus bo tsimynapamykysokonaha.

⁸ Tyharape pokzitsikinahaktsa! Ahamysapyrētsa tsimaha iwatsahi ahatukytsa sisopyksapybyitsa nikaranaha ana soho bo hi batu mytsaty zikaha. Iwa tsimyzurunaha zeka Deus okzeka wasani tsimaha.

⁹ Ahatukytsa ahawahoro bo mozumukunahaze ikiahatsa ispe tsimaha:

– Kawahoro bo paku paku tynaha tohi buruk tihi ahawanu tyh̃aitaha tsimaha. Iwa tsimysasonaha sisukmotsa bo tsimaha. Ahaharerehakyhyk byihuja.

¹⁰ Deus tisapyrēna ty mybo nyny my. Iwaze mywatu tsiaksekenaha. Iwatsahi ustsya tahatsumuēh̃naha.

¹¹ Ustsya kytsa bo tsimypamykysokonahaze Deus harere sibo tsimyt-sasokonaha. Ustsya bo tsimysitsumuēh̃nahaze Deus zikwy humo tsipi-watawykynaha. Iwaze kytsa:

“Deus zuba imysapyrēnikita my. Ihyrytsa bo tisapyrēna ty nyny my. Ana bo kino iktsa tsimaha” – mykaranaha. Katsaktsa Sesus Kiristu bo tsimyt-sasokonaha:

– O ikia zuba wasani tsimykara. Ikia hi tsamysapyrēta ahaharere bo zuba tsiwabytoktonaha – tsimaha. Iwa tsimyt-sasoikiknaha tawahi ituk tsimynapykyryknaha. Iwa h̃ my.

Hawa Kiristu tuktsa wa sinini tsimykaranaha.

¹² Katukytsa ahahumo kamypokzitsiarēta. Sinini tsimykaranaha zeka Kiristu humo ahaspirikporētsa iwatsahi ahapyby byihuja. Ikiahatsa Sesus pahadutu. Batu tyso:

– Amo skaraba sinini tsimykaranaha. Ustsya kytsa sininiwy bo batu istykzo – tsimaha. Iwa batu tyso. Sinini tsimykaranaha zeka batu ahasukatsihik.

¹³ Kiristu ahaziky wata niyzik. Atahi sinini nikara atawatahi ikiahatsa kino tsimaha. Abaka sinini tsimykaranaha bykyze Kiristu imysapyrēnikita tu piwatawykyze ahakurētsa hỹ. Ikiahatsa ahamysapyrētsa iwata tsimoziknaha. Iwaze ahakurētsa hỹ.

¹⁴ Ikiahatsa Kiristu hyrytsa tsimaha. Asaktsa Sesus humo sispirikpobyitsa ahasoho humo siharerewabymybarētsa. Zahasohozibyibatakanahaze ahakurētsaktsa! Pahasohometukunaha zeka Deus hyrikoso ahatuk mynapykyryk. Ana bo kino mytsatyziu tsimahaktsa! Hawa Deus hyrikoso wasani mynakara iwatahi ahatuk mynapykyryk, ustsā siharerewabymybaranikitsa anahi piwatawyky.

¹⁵ Kytsa harape ty beze beze byitaha. Ustsā namy ty ka ykse ykse byitaha. Ahatsyhyryboa byihuja! Ustsā kytsa humo batu isty myija. Batu ahaharerewabymybara. Iwa tsimykaranaha zeka kytsa pahasapybyikinaha ana humo hi wasani my.

¹⁶ Sinini tsimykaranaha zeka Kiristu hyrytsa humo meky watu my. Ana humo kino batu ahasikpyby. Ikiahatsa hi:

– O Deus myzo sinini tsimykaranaha Kiristu hyrytsa humo iwaze mykurētsa – tsimaha. Kiristu humo kytsa pahamyijakanahaze iwa Deus bo tytsasonaha.

¹⁷ Abaka Deus mybarawy ezektsa bo iktsa mynakara. Asaktsa ihyrytsa mysimyijakanaha sibo iktsa mynakara. Amo simysapybyitsa mykaranaha ana humo hi sihuak ty sibo nyny my. Aibani sihuak ty sibo nyny my. Sinini ykarawy bo mysipeha. Iwaze asa hi wasaniha humo batu sispirikpo iwatsahi sinini ykarawy bo mysipeha.

¹⁸ Deus harere papeu humo ziwatahaka:

– Tsihokdaharēnaha zeka simysapyrētsa Deus bo mysioktyhyryk.

Iwaze hawa ja asaktsa sisopyksapybyitsa nikaranaha ana humo hi tsihokdaharēna hỹ.

Asaktsa Deus harere bo yhỹ habyitsa mykaranaha Deus bo batu mysioktyhyryk,

asahi sinini ykarawy bo mysipehahik – niy.

¹⁹ Iwaze katsaktsa Deus harere bo ma tsimahaze kytsa mymymyi-jakanaha ana hi Deus myzehikik iwatsahi ihumo myspirikporētsa hỹ. Mybarawysuknitsa humo myspirikporētsa. Iwaze tyzipokzitsikinahaktsa! Deus hi myhumo tsimypokzitsiukrēta babata mybarawysuknitsa myhumo tsimypokzitsiarēta hỹ.

5

Deus tuktsa hozipyrykzatsa watsa maha.

¹ Abaka myspirikpokonahatsa bo pahapehaka ikiahatsa humo Sesus tuktsa sipokzitsikitsa pahapehaka. Uta kino niwatihi ikiahatsa watsa Sesus tuktsa sipokzitsikitsa. Hawa Kiristu sinini nikara motsasoko. Utakta ibo iktsa iky. Kaokzetu nitsakikinaha. Deus sizubarētsa bo Kiristu imysapyrēnikita mysiwatawy. Iwaze utakta niwatihi iwata kamysapyrēta mozik.

² Deus zahawatawy ihyrytsa myspirikpokotsa tsimoziknaha ana humo hi zahawatawyhik. Iwatsahi hawa hozipyrykzatsa perytsitsa mynasipokzikinahatsitsa iwatsa ikiahatsa Deus hyrytsa tynasipokzitsikinahaktsa kytsa! Mykyzoziurētsa iwatsahi tatsumuēhīnaha hỹ. Ahahyritzokzawyy humo ahakurētsaktsa anahi Deus mozihikik. Batu ahape tu zikaha:

– Tyzeka ja kytsa okyrysaro ty kabo nyny maha – my. Iwa zeka batu mytsaty tsimaha. Ahape tu ahasopyk:

– Hawaze kytsa tahatsumuēhīnaha – tsimaha. Iwa ahape tu ahasopyk.

³ Isty ykzo ykzo byitaha. Isty betsak betsak byitaha sihumo tysipokzitsikinaha. Wasani tsimykaranaha. Iwa tsimyzurukunaha zeka ahawatsa wasani mykaranaha niwatihi. Pahasopykziukunaha. Asa hi:

– Myspirikponahatsa simysapyrētsa astsatu tsimyzurunahaktsa kytsa – maha.

⁴ Kiristu mysopykanikita my. Atahi mykzotsa hozipyrykzatsa perytsitsa wata my. Kiristu myziksizoze ihuak ty ahabo nyny my. Hawa mybarawy ezektsa siharereziuwysitsa sitsohorik ty nyny niaha. Sitsorik ty ouro ty nyny nikaranaha. Bykyze ouro mohokda. Ikiahatsa hi Deus isapyrēnikia ty ahabo nyny my zeka. Anahi tawahi tisapyrēna.

⁵ O ahapykyhyzytyktsa! Pykyhytutaha hawa haty sitsaibatsa mopamykysokonahaze siharere bo ma tynakaranaha. Ahazubarētsa tahapetsumuēhīnaha!

– Ūta zuba wasani mykara – iwa batu tyso. Tahaharerewabynahakta! Deus harere ziwataha:

– Asa sizokzianikitsa utakta sihumo ikykyriki awatutsa zuba mysitsihikik. Asa sisorokbyitsa mysitsumuēhīekik hỹ – niy.

⁶ Iwatsahi ikiahatsa myhyrizikwanikita ihumo tsahamozikrētsa tsimoziknaha. Deus izikwyrēnikita ba hawa tohi zikzukninaha. Ikiahatsa ihumo tsahamozikrētsa tsimoziknahaze Deus ahahumo tsakurēta mozik.

⁷ Paikpa mytsaty tsimykaranaha zeka Deus bo tsimypamykysonaha:

– O Deus myzo paikpa mytsaty ikykara. Ikia humo kaspirikporēta iwatahi ikia tsipiktsumuēhī – tsimaha. Iwa ibo tytsasonaha iwatahi ahahumo tsimypokzitsiukrēta mynakara.

⁸ Tsikymynahaktsa tsahasuparakanahaktsa! Ahasopyksapybyitsa tsimykaranaha tsimoewynaha. Parini irapaze kakaik myze. Tawata Satanas mypaukta pyryrykba mykara. Sesus humo mspirikporētsa ana kino mopyk tsihikik. Ihumo pykyhytutaha! Sesus humo ahaspirikporētsa iwatsahi Satanas harere bo ba hỹ zikaha.

⁹ Tsikahapunihiknahaktsa. Satanas hyrikoso sapybara pehaktsa harere bo waby waby byitaha. Ikiahatsa ipe tsimaha:

– Aharere batu mykparawy. Aharere bo batu hỹ – tsimykaranaha. Iwa ibo tsimytsasoikiknaha. Ahawatsa usts Sesus tuktsa sinini nikaranaha. Nanabyitaba ahaturkytsa Sesus humo mymymyijakanaha ana kino ahahyrinymyrētsa.

¹⁰ Sininipyk tsimykaranaha. Deus ahahumo tsimypokzitsiukrēta. Kiristu imysapyrēnikita. Deus zahawatawyhik Kiristu wata tsimoziknaha. Kiristu tuk tsimyzurukunaha. Deus humo wasani tsimykaranaha Sesus humo tyspirikpotohinahaktsa! Ana humo hi pahatsumuēhīekik. Deus zikwy humo tsahamyharerewabyrētsa tsimoziknaha. Sesus tsipunihikrēta my iwaze iki-ahatsa iwata tsimoziknaha. Atahi tawahi imysapyrēnikita. Iwaze ikiahatsa iwata tsimoziknaha hỹ, Sesus zikwy humo ahamysapyrētsa tsimoziknaha.

¹¹ Izikwy tawahi napykyryk. Myzubahatsa pehaktsa mozik. Abazubata mozik myzubaha iharere bo zuba hỹ mynakaranaha. Batu aty tohi iharere bo batu ma zikaha. Iwa hỹ.

Abaka pepykyryk, katukytsa humo myhyrizikbarētsa.

¹² Abaka kawataha mopykyk. Kapapeutsa ikiahatsa bo izubabaratu. Siras Sesus harere bo hỹ mynakara atahi kapapeu ty ahabo nyny my. Ata kino myzipeha kapapeu ty ahabo nyny my. Uta pahakusukniwyky iwatahi papeu humo piwatahaka. Deus myhumo tsimypokzitsiukrēta iharere bo zuba hỹ mynakara. Iwatsahi ihumo tyspirikpotohikinahaktsa!

¹³ Kytsa kapauk bazektsa ahahumo sihyrizikbarētsa. Asahi Sesus tuktsa niwatihi Babironija ezektsa maha. Asahi ikiahatsa watsa Deus nisiwatawyhik. Marakos niwatihi ahahumo tsihyrizikbarēta. Atahi katse wata.

¹⁴ Tyharape pokzitsikinahaktsa! Iwaze tyharapehapyryknahaktsa!

Deus pahasapywyky.

Utakta Deus bo mopamykysoikik ipe my:

– O myzo ahahyrytsa batu paikpa mysaty zikaha. Ikia hi tysiakusukniwykykta – my. Niwazuba.

Peduru

Peduru papeu Sesus tuktsa nanabyitaba napykyryknaha sibo ziwatahakazo

Peduru Sesus humo sispirikpotsa bo ziwatahaka. Wastuhu zuba sihyrinymyrykytsa wasanibara ty nisihyrinymyryky ana humo hi niakmyikinaha. Iwatahi Peduru Sesus tuktsa pe niy: – Pykyhytutahaktsa siharere bo ka batu yhỹ tsimaha – ana hi ziwatahaka. Deus Peduru ziapewywyky iwatahi Deus harere ziwatahaka, iwatsahi katsa kino niwatihi tanymyryky.

¹ Uta Simaõ Peduru, Deus zikwatawy iakzohota. Sesus tsumuëhĩtsa my. Sesus tuktsa sizubarëtsa bo piwatahaka. Papeu humo sibo piwatahaka. Sesus Kiristu wasani nikara, Deus wata my. Atahi Deus bo mymyoktyhyrykta. Ikiahatsa mytuk Sesus humo ahaspirikporëtsa ata humo hi tsikspirikpokonaha. Ihumo tsikspirikponahaze katsaktsa mynamyrëtsa watsa tsimoziknaha.

² Deus harere bo hỹ tsimykaranaha. Ahawahi iharere bo hỹ tsimykaranaha iwaze isoho tsinymyrytohinaha. Deus bo ahatsyhyryze my:

– O Deus, myzo atyryktsa tysiakuwyky! tysipokzitsikikta! tsimy – my.

Deus zahawatawyky iwatsahi wasani tsimykaranaha.

³ Deus nimywatawy iwatsahi katsa Sesus watsa tsimoziknaha. Atahi wasani mynakara. Imysapyrënikita katsa iwatsa tsimoziknaha. Iwatahi Kiristu tazikwy ty mybo nyny my iwaze iharere bo hỹ tsimykaranaha iwa tsimyzurukunaha. Katsa nimywatawy anahumo kino myhyrinymyrëtsa h̃.

⁴ Deus harere tihi:

– Kawata ahamysapyrëtsa ahaziurëtsa tsimoziknaha – niy. Anaharere humo hi tsimyspirikponahaze ahapunihikrëtsa h̃. Ahanamyrëtsa watsa tsimoziknaha. Iharere ty ahabo wasania ty tsipokzitsiarëna mozik. Nawa ha ty tisapyrëna ty zuba ahabo nyny my. Nawa ha ty tisapyrëna ahabo nyny myze wasani tsimykaranaha. Pykyhytu iharere bo hỹ taha. Asaktsa Sesus humo sispirikpobyitsa tu iharere bo batu h̃ zikaha. Iharere batu siakparawy. Ikiahatsa mekywa tu tsimaha. Niwaha hi Deus mozhikik naha zuba tsimyzihikiknaha. Ahahyryzikporëtsa tsimoziknaha.

⁵ Iwatsahi ihumo tsikspirikpokonahaze tsipisapykynaha! Wasani tsimykaranahaze Deus harere tsinymyryziukunaha.

⁶ Niwa hi Deus nizihikik tsinymyrykynahaze ahape tu ahasopyk ahamysapybyitsa tsikykaranaha tsmoewynaha. Ahape tu ahasopyk zeka ahakubyrisorokuja. Ahakubyrisorokrëtsa zeka Sesus humo ahamypokzitsirëtsa iwaze tu kytsa Sesus humo pahamyijakanaha ikiahatsa ihumo ahamypokzitsirëtsa.

⁷ Deus humo ahamypokzitsirëtsa tu zeka ahatukytsa tysisapywynaha. Batu ahamyi. Ahamyiby zeka ustsya kytsa tysipokzitsikinaha.

⁸ Iwa tahaktsa! Iwa tsimyzurukunaha zeka parakbaha pahasohozuinaha: – Asaktsa wasani mykaranaha. Sesus humo sispirikporëtsa iwatsahi mysipywykynaha. Ustsya mysipokzitsikinaha. Sesus tazikwy ty sibo nyny my iwatsahi mysipokzitsikinaha – mykaranaha.

⁹ Asaktsa Deus harere bo yhỹ ahabyi zeka sihyryzikubyitsa watsa. Kytsa tsikaeni zuba iktsa mykaranaha. Simysapybyitsa nikaranaha, Deus botu nisiokzohik anahumo hi nispiriktsokdanaha.

¹⁰ O katukytsa hawa ha ty Deus mozihikik ana humo zuba tsinymyrytohi-naha. Iharere bo zuba pykyhytu hyŷ tsimaha! Iwa tsimyzurukunaha zeka ba zimyinaha. Deus zahawatawy iwatsahi ahamysapyrētsa tsimoziknaha.

¹¹ Iwa tsimyzurukunahaze Sesus mymyoktyrykta mype my:

– Katuk ahawahi tsimyzurukunaha. Pany kabo tyzekebanahaktsa! Uta kytsa sizubarētsa mysipehaze kaokzeka wasani my ikiahatsa kino niwatihi katukytsa sizubarētsa tysipehanaha – mykara. Iwa mypehakatsa Sesus Kiristu motsaso. Atahi Deus bo mymyoktyrykta.

¹² Tubabatu Deus harere bo hyŷ tsikykanaha, iharere bo botu hyŷ tsimyzurukunaha ahaspiriktsokda byihuja! Ana humo hi mopamykysozo.

¹³ Utakta kaspituze Deus harere ahabo motsasozo ana hi wasani my.

¹⁴ Mohyrikosokda naha humo Sesus Kiristu botu kabo mypubara ty nitsaso.

¹⁵ Iwatahi iharere motsasoko. Iharere pykyhytu piwatahaka iwaze mohyrikosokdaze iharere humo batu ahaspiriktsokdahu, iharere bo mytsatyz-iutaha.

Kiristu tsipunihikrēta. Imysapyrēnikita ana soho hi tsimytsasokonaha.

¹⁶ Katsa tsimytsasokonaha batu amybara petu mysopyk mypehakatsa Sesus Kiristu mybarawy bo myziksizo ana tyhi tsimytsasokonaha. Myziksizoze aparakbaha izikwy bo mokozoneha. Anaharere ikiahatsa bo iktsasoko. Ana kino Deus harere my katsaktsa izikwy botu tsinynaha atahi tsipunihikrēta.

¹⁷ Deus imyharerewabynikita. Atahi myzo my. Imysapyrēnikita my. Sesus hara jobonikita bete Deus ipe niy:

– Kawata tsamysapyrēta hŷ – iwa ipe niy. Deus yksoho tsiwabynaha:

– Atakta katse babata. Ihumo kakurēta. Ihumo kamypokzitsiarēta – niy.

¹⁸ Katsa hi iharere tsiwabynaha. Katsa Sesus tuk hara jobonikita beteze Deus yksoho bijoikpe ikny tsiwabynaha.

¹⁹ Tubabatu Deus sohokotsa harere humo myspirikporētsa. Siharere humo myspirikporētsa, Deus yksoho bijoikpe ikny tsiwabynahaze siharere humo tsikspirikpotohinaha.

Deus sohokotsa harere bo mytsaty tahaktsa! Siharere rika wata. Miwa eze tuze rika iwaze kytsa mypubyi haeze iktsa niaha iwa Deus sohokotsa harere nimyhyrinymyryky iwatsahi tsinymyrykynaha. Myzokorosohoze byrisoik jekyrikoso natakaha. Sesus Kiristu myziksizoze tawata byrisoik jekyrikoso wata. Iwatsahi taperykynahaze Deus sohokotsa harere bo mytsatyziu tahaktsa!

²⁰ Deus sohokotsa iharere ty zuba ziwatahakanaha. Hawa mykara ana kino ziwatahakanaha. Deus hyrikoso humo pykyhytutaha ziwatahakanaha. Katsa niwatihi tsimypamykysonaha, Deus hyrikoso humo zuba tsimypamykysoziukunaha.

²¹ Deus sohokotsa harere humo nitsasokonaha. Deus hyrikoso nisia-pewywyky. Deus hyrikoso humo zuba nitsasoikiknaha.

2

Deus soho humo meky watu mykaranahatsa.

¹ Tapara Sudeutsa tuk Deus sohobyitsa natakaha. – Katsaktsa Deus sohokotsa – mybarapetu nikaranaha. Atsawatu mahazo sihyrinymyrytsa mozumuzonaha. Deus sohobyitsa imysapybara ty pahahyrynymyryryna. Sesus harere bo batu ma sisopyk anatyhi pahahyrynymyryryna. Ikiahatsa kino niwatihi iharere bo batu ma ahasopyk ana hi mozihikiknaha. Deus Sesus Kiristu humo simysapybyitsa tu nikaranaha botu nisiokzohik

anahumo kino batu hỹ niaha. Iwaze Deus sohokobyitsa sinini ykarawy bo mysipehahik. Sisopyksapybyitsa atsoko nasipykwy.

² Sizubarẽtsa siwatsa imysapybara ty mykaranaha. Iwaze ustsya kytša sibo iktsa mykaranahaze:

– Sesus tuktsa wasani ahabyitsa mykaranaha. Pimyikiknaha naka batu imysapy mykaranaha Sesus humo sispirikpobyitsa watsa maha – mybarapetu mykaranaha.

³ Sihyrinymyrynikitsa amybara botu motsasokonaha. Tahapehawya ty zuba pahahyrinymyrykynaha. Ahaokyrysaro mozihikiknaha iwatsahi wasanihabara ty pahahyrinymyrynaha. Mysispihikbataikiknaha Deus sibo iktsa mykara. Tubabatu sisoho:

– Kaokzeka batu simysapy – niy. Deus ba zikuru iwatahi nasisuparaka. Bykyze sinini ykarawy bo mysipehahik.

⁴ Bijoikpe ezektsa simysapybyitsa nikaranahaze Deus nisisininiwy. Sinini ykarawy bo nisipehahik. Batu sihumo impokzitsi. Sisapy eze miwa zuba, anaeze karikutsitsiwytsa ty nisitsipawarakanaha iwaze nisihurukuknaha. Anaeze piperykynaha, iwa myze Deus mybarawy ezektsa sihuak ty nyny my. Hawa zikzurukunaha ana humo hi sihuak ty sibo nyny my. Asaktsa wasanitsa bo isapyrẽnikia ty sibo nyny my. Saustsa simysapybyitsa tu nikaranaha sinini ykarawy bo tahawahi mynapykyrykynaha.

⁵ Tubabatu taparaktsa simysapybyitsa nikaranahaze Deus nisisininiwy. Batu sihumo impokzitsi. Myto ty nasiharasuwy Noe taoke tahyrytsa tuk iwatsa Deus nisierewy iwatsahi batu isty harasu. Asa zuba Deus harere bo hỹ ziknakaranaha. Tapara myto Noe tihi:

– O kytša ahamysapybyi tsmoewykynahaktsa! Deus harere bo hỹ tahaktsa! – niy. Atazuba – O myzubaha wasani tsimykaranhaktsa! – nitsasoko.

⁶ Tubabatu Sodoma ezektsa Komora ezektsa ahatsa iwa Deus tihi:

– Ikiahatsa kaokzeka ahamysapybyitsa tsimykaranhaha – niy. Iwaze nisibabaik. Deus izo bijoikpe ikny zipahahik. Sizubarẽtsa niharakorobainaha. Ana humo hi Deus ustsya nispirikpokoro. Ustsya simysapybyitsa siakparawytsa, iwaha bo iktsa niahaze simysapybyitsa tymoewy.

⁷ Ro zuba niwak. Deus zibetesa zitsumuẽhĩ. Deus okzeka atakta wasani nikara. Zikzibytuhukutu tisikpybyrẽta kytša hudikhudikwy ezektsa simysapybyitsa ziknakaranaha iwatahi tisikpybyrẽta. Sisopyk humo iakubyita ziknakara.

⁸ Ro tsimysapyrẽta nimymyijaikiknahatsa hi batu iaku. Zikzibytuhukutu kytša tsasohowy ziwabykyze tisikpybyrẽta. Hawa simysapybyitsa humo iakubyita ziknakara.

⁹ Asaktsa Deus harere bo hỹ mykaranaha. Asahi iharere siakparawytsa mysitsumuẽhĩ iwatsahi batu imysapy batu zikaha. Deus zuba ihyrizikporẽnikita. Asaktsa iharere bo yhỹ ahabyitsa mysimyitsapyriwyky. Ba zikspiriktsokda. Iwa myze Deus motsaso sinini ykarawy bo mysipehahik.

¹⁰ Asaktsa simysapybyitsa mozihikiknaha asa bo hi mysisininiwyky. Asahi mymysapybyrikinahatsa Deus harere bo batu yhỹ zikaha. Ata kino mysisininiwyky. Asaktsa ty imysapybara ty zuba mymyhyrinymyrykynaha batu sisikpyby. Simytsatyhybyitsa tu ziknakaranaha iwatsahi imysapybara ty zuba mykaranaha. Kytša mysimyikiknaha. Tahaokzeka:

– Katsa zuba wasani tsimaha – mybarapetu mykaranaha. Bijoikpe ezektsa Deus tsumuẽhĩtsita soho siharerewabymybarẽtsa. Sisoho zisapybyrikinaha. Siharerepykyhybyikitsa.

¹¹ Bijoikpe ezektsa Deus tsumuēhītsitsa siharerepykyhybyikitsa harere ty hi batu tyso. O ikiahatsa ahamyharerewabyrētsa. Iwatsatu sipunihikrētsa Deus bo batu tyso:

– O asaktsa batu simysapy siharere batu imysapy – maha. Iwa batu tyso Deus zuba ihyrizikporēnikita babata mytsaty nikaranaha.

¹² Asaktsa imysapybara ty mohyrinymyrykynaha siraratsa watsa. Hawa ha ty mozhikiknaha ana ty zuba mykaranaha, siraratsa watsa maha. Mytsaty zikahabyitsa mymyjakanaha. Utsa mysimyjaikiknaha. Deus asahi nasipykwy. Katsaktsa siraratsa werekywy bo mysibanaha. Asa wahi Deus mysipykwy.

¹³ Asaktsa ustsā mysinininiwykynaha. Deus mysimyitsapyriwy. Kytsa okzeka wasanibara ty mykaranaha. Okoroze simysapybyitsa mykaranaha. Mymyspihikbatakanahaze sakurētsa nikaranaha. Batu sisikpyby. Ahatuk zeka tsahayktsiarētsa watsa maha. Simysapybyitsa nikaranaha humo ahayziktsīarētsa waha maha ahabo mybarapetu mykaranaha. Ahatuk tahadisahanahaze mymyjaikiknaha. Mymyjaikiknahaze sakurētsa.

¹⁴ Wytykyryk bo iktsa mahaze mysiakza tsihikiknaha. Kytsa Sesus humo tsikaeni zuba sispirikporētsa mysimiywykynaha. Mysispihikbatakanaha. Taha bo zuba mynakaranaha. Okyrysaro bo zuba mytsaty mynakaranaha. Deus tihi:

– Utakta pahamyitsapyriwy – niy. Ana humo kino ba zikwaknaha.

¹⁵ Asaktsa wasani batu siakparawy iwaze Deus harere bo batu ma zikaha. Kytsa nizaranahatsa watsa niyziknaha. Ske babata humo batu sihyrinymyry. Mykurunaha Barão wata Barão Beore tse niy. Atakta wasanibara ty nikara. Okyrysaro nizihikik iwaze imysapybyita nikara.

¹⁶ Deus pikuzā ziharerewyky iwaze Barão zibetsakak. Pikuzā tihi:

– Ikia Deus harere bo zuba hyỹ tsimyкта! – niy. Iwatahi pikuzā tatsihitsa zibetsakak. Pikuzā nitsaso Deus zikwy humo niy.

¹⁷ Asaktsa wasanibyitsa nikaranaha kytsa mysimiywykynaha. Asaktsa juhoha eze ky mytsehebaik naha eze ky waha. Bijoikpe zatata watsa zopoktsa mynabybykyk zekywa. Hyritsik mynawō naha ziky waha bo mytsaty tsimaha. Atsawatu ja my. Tozeka ja wasani maha, amybara tu sa tsipiperykynaha. Deus sisapy miwaha bo mysipehahik. Sisapy titsikdepykrēna anaeze tahawahi mynapykyknaha.

¹⁸ Asaktsa pahamyi tsihikiknaha. Siharere batu sisopyksapy. Sityrykmyitsa. Asahi:

– Katsa zuba wasani tsimaha. Iwazehi ustsā kytsa okeza bo mysiakzanaha. Taha bo zuba tsimynakaranaha. Deus okzeka katsa zuba wasani tsimaha – mybarapetu mykaranaha. Abaka asaktsa Sesus humo mospirikpokonaha asahi mymyi tsihikiknaha.

¹⁹ Siharere humo mypehakatsa harere bo batu yhyỹ tsimaha, ana soho motsasonaha mybarapetu mykaranaha. Asa hi:

– Hawa ha ty katsa tsimyzihikiknaha iwa tsimyzurukunaha. Katsa wasani tsimyzihikiknaha zeka iwa tsimykaranaha. Katsa wasani ahabyi zeka atsatu tsimozihikinahaze Deus mymyoktyhyryk – maha. Asaktsa batu zikaha. Imysapybara ty nizihikiknaha iwatsahi wasaniha ahabyitsa mynakaranaha.

²⁰ Wastuhu kytsa ziakbatakanahaze Deus harere humo mospirikpokonaha. Imysapybara ty mykaranaha pimoewynaha. Sesus Kiristu harere bo hyỹ mykaranaha atahi mysioktyhyrykta. Kyze kytsa Sesus harere humo batu siakparawy siharere hi piwabyziukunaha. Iwaze Sesus harere

humo tsikaeni zuba piwabynaha. Iwatsahi simysapybyitsa mynakarazonaha. Tapara Sesus humo sispirikporëtsa iwatsahi sipunihikrëtsa niyziknaha. Abaka simysapybyitsa mynakarazonaha. Sipunihikbyitsa mozikzonaha.

²¹ Kytsa Deus harere humo batu sihyrinymyry meky wa tu asahi tsikaeni zuba mysimyitsapyriwy. Sihyrinymyrybyitsa tu mohyrikosokdanahaze tsikaeni zuba mysimyitsapyriwy. Asaktsa Deus harere zinymyrykynaha iwaze iharere bo tisapyrëna yhÿ nikaranaha kyze Deus sohokobyitsa nisimiwynaha. Iwaze simysapybyitsa nikarazonaha. Deus harere batu siakparawy. Asahi mohyrikosokdanahaze Deus mysisininiwy baba. Taparaka sihyrinymyrëtsa iwaze iharere bo batu yhÿ mynakaranaha, asaktsa Deus sinini ykarawy bo mysipehahik.

²² Iwa nitsasoko:

– Tsikuparini tapytsui bo ziksizo iwaze tadisahazo – tsimaha. Kytsa Deus harere siakparawy bykyze yhÿ ahabyitsa tu zimyiwykynaha tsikuparini watsa. Katsa iwa tsaso:

– Pazahare pihik ikny inazoze iwaze taparawy bo ziksizo tsahõrõ bo – tsimaha. Atsawatu kytsa Deus harere tsikaeni zuba siakparawy bykyze hyÿ aha byitsa tu zimyiwykynaha pazaharetsa watsa. Asaktsa imysapybara ty mykarazonaha.

3

Sesus myziksizo.

¹ O kaharereziuwytza papeu usa ahabo piwatahaka. Papeu ty ahabo piwatahazo iwatsahi wasaniha bo zuba mytsaty tsimykaranaha. Botu tsiwabynaha anabo mytsatyzo tsimaha.

² Tubabatu Deus sohokotsitsa wasaniha soho nitsasokonaha. Nawa ha ty Deus mykara anaty hi botu nitsasokonaha. Siharere bo mytsatyziutahaktsa! Sesus Kiristu myoktykytsa inasik. Abaka iharere tsiwabyziunahaktsa! Anaharere sakzohotsa ahabo nitsasokonaha.

³ Mybarawy mynapyksohoze kytsa simysapybyitsa mykaranaha ahabo mozumunaha. Siakmyitsa. Asahi batu sisopyksapy taha bo zuba mytsaty mykaranaha. Asaktsa:

– Sesus Kiristu myziksizo ja – mykaranaha.

⁴ – Hawaze sa myziksizo. Haziu mykaranaha. Tapara isuknihibyize atsatu mykara. Taparaktsa botu nihyrikosokdabanaha mybarawy batu ipyk. Koikny baktatu mykara – iwa mybarapetu mykaranaha.

⁵ Deus wytyk bijoikpe iwaha nizukni. Deus harere humo mybarawy niyzik. Wytyk pihik ikny natakahaze. Pihik jobo zatata tuk, pupuputsa wytyk ikny tu niaha. Deus pihik metutu nizapy.

⁶ Pihik zuba eze taparaktsa niakbabaiknaha. Hyritsik natatebaik naha bara humo niharazulukbaiknaha. Myto humo pupuputsa zitsawakaknahaze niakbabaiknaha.

⁷ Abaka bijoikpe mybarawy kino niwatihi Deus tawahi piperyky. Hawa eze zuba Deus myzihikze izo ty mybarawy pikorobawy ana humo hi mymykbaba. Abaka myto bara Deus izo humo mymykbaba. Iwaze kytsa simysapybyitsa mykaranaha sinini ykarawy bo mysipehahik.

⁸ O kaharereziuwytza mypehakatsa okzeka estuba okoroze tawa miu anos mytyk tseheze ky wa. Mytyk tseheze ky wa okoroze tawa ihumo atsatu ana bo kino mytsaty tsimahaktsa!

⁹ Sesus botu niy:

– Uta myziksizo hÿ – niy. Asaktsa simysapybyitsa hi:

– Atakta myziksizo ja – mykaranaha. Kytsa simysapybyitsaktsa Deus sinini ykarawy bo mytsaty zuba mykara iwatahu tsiakubyrisorokrêta. Ihumo sispirikpobyitsa batu sakbakzyzyky iwatahi tsiakubyrisorokrêta. Asahi simysapybyitsa tu nikaranaha pimoewynaha iwatahi tsiakubyrisorokrêta.

¹⁰ Sesus atsoko myziksizo. Myzubaha typerybyitsatu atsoko myziksizo. Itsyhyryboa tawata unata eze kytsa namy pebykyryk. Iwapuruze Sesus myziksizoze itsyhyryboata mozumuze tawata ity peryhy byitatu mozumu. Iwaze bijoikpe nepyk. Tapara nitotokoknaha ykpyri humo nepyk. Niwa ha ty bijoikpe eze tsizubarêna mohokdaba iwa mopyk. Mybarawy kino niwatihi mokoroba. Deus tsizubarêna pepykba, tsizubarêna mohokdababa ana humo hi ja tsahayrinymyrêtsa.

Deus Sesus myzipehazoze ana humo hi tapery!

¹¹ Iwaze ahamysapybara ty tsimykaranaha zeka ahasopyk tsmoewykynahaktsa! Tsipisapywykynahaktsa! Deus harere bo zuba hyÿ tahaktsa!

¹² Iwaze Deus Sesus myzipehazoze ana humo hi tapery! Iwazehi bijoikpe mokoroba. Mopyk. Mybarawy eze ky kino niwatihi izo humo mynatsotsokbaik.

¹³ Deus mybaratsa pe niy:

– Usa mybarawy mozokni. Usa bijoikpe mozokni usa wytyk mozokni. Anaeze wasanitsa zuba mynapykyryknaha. Simysapyrêtsa zuba anaeze mynapykyryknaha – niy. Ana hi taperyky.

¹⁴ Kaharereziuwyttsa ahahumo kamypokzitsiarêta. Hawa eze Sesus myziksizo ana humo hi taperyky. Iwatsahi ahamysapybara tsmoewynaha. Tyzibytuhukutu Deus harere bo ma tsimykaranaha. Wasani iharere bo hyÿ tsimaha zeka ahakurêtsa tsmoziknaha. Mekywa tu tsmoziknaha.

¹⁵ Mypehakatsa aibani zuba myziksizo iwa zeka ustsaktsa Deus bo mysiokty tsihikik. Iwatahi mytuk tsiakubyrisorokrêta mykara, ana humo kino mytsatzyiutaha.

Pauro mytsy ihumo mypokzitsirêtsa botu ahabo ziwatahaka. Iwapuruze Sesus myziksizoze botu isoho ziwatahaka. Atakta tsihyrinymyrêta babata. Deus zihyrinymyryky iwatahi ahabo ziwatahaka Deus tahyrinymyrywy ibo ziwatawyky atsatu ahabo ziwatahaka.

¹⁶ Tsiharerehokdarêta. Imyspirikpowy kino niwatihi tsihokdaharêna. Iwatsahi kytsa sizubarêtsa iharere myzimyikiknaha. Kytsa asahi Sesus humo sispirikporêtsa tsikaeni zuba iharere myzimyikiknaha. Iwatsahi mohyrikosokdanahaze Deus sinini ykarawy bo mysipehahik.

¹⁷ Kaharereziuwyttsa. Kamyspirikpowy bo wabyziutaha! Ikiatsa Sesus humo ahaspirikporêtsa. Kytsa mozumunahaze pahamyi tsihikiknaha ana humo hi ahayrinymyrêtsa. Pykyhytutaha! Asaktsa Deus harere batu siakparawy sihumo pykyhytutaha iwatsahi batu ahamyi.

¹⁸ Ikiatsa hi Deus harere bo zuba hyÿ tsimykaranaha. Mymyoktyhyrykta harere humo zuba hyÿ tsimykaranaha. Atahi ahahumo tsmypokzitsiukrêta. Isoho tsinymyrytohinaha. Ihumo tspirikpotohinaha. Ipe tsimaha:

– Ikiatsa zuba tsamysapyrêta. Ikiatsa tsapunihikrêta – tsimaha. Abaka ana ty hi tynatsasokonaha. Katsaktsa ituk mywahi tsimynapykyknahaze iwa tsimynatsasokonaha. De. Niwazuba.

Peduru

Suão Sesus tuktsa bo ziwatahaka

Tubabatu kytsa watahaha – Suão ziwatahaka – mynakaranaha. Suão Sesus tuk zinymyrykyta. – Tynaharape pokzitsikinaha – ana hi ziwatahaka. Aba katsa kino niwatihi tanymyryky.

Sesus Kiristu Deus harere baba.

¹ Abaka katsaktsa ikiahatsa bo tahawatahakanaha. Sesus Kiristu ahabo tawatawy tsihikik iwatsahi tawatahaka. Deus isuknihi byituze Sesus Kiristu koikny baktatu my. Atakta Deus harere babata tu hỹ. Iharere humo tsikspirikpokonaha zeka meky watu tsimoziknaha. Tsimyhyrikosokdanahaze ituk mywahi tsimynapykyryknaha Sesus Kiristu inasikze iharere tsiwabynaha hỹ. Tsinynaha. Ituk zikzurukunaha. Abaka ibo mytsatziyu tsimykaranaha.

² Atakta mybarawy bo inasikze mywata niyzik. Iwatsahi katsaktsa tsiny-naha. Ata soho hi tsimytsasokonaha. Asahi ihumo mospirikponahaze meky watu moziknaha. Tsimyhyrikosokdanahaze Deus tuk mywahi tsimynapykyryknaha. Atakta Deus tuk tawahi mynapykyryk. Tubabatu Deus tuk koikny baktatu mybo tawatawy.

³ Nawa ha ty botu tsinynaha ahabo tsimytsasokonaha. Botu tsiwabynaha hi ahabo tsimytsasokonaha. Tsimytsasokonahaze isoho humo ahahyrinymyrẽtsa. Ikiahatsa mywatsa Deus myzo hyrytsa tsimoziknaha. Katsaktsa Sesus Kiristu tukytsa tsimaha ikiahatsa kino niwatihi mytuk itukytsa tsimoziknaha. Iwatsahi ahabo tsimytsasokonaha ikiahatsa kino niwatihi mytukytsa tsimoziknaha. Katsaktsa myzubarẽtsa astsatu tsimoziknaha hỹ.

⁴ Anahi tawatahaka iwatsahi ahakurẽtsa tsimoziknaha. Ikiahatsa Sesus humo ahaspirikporẽtsa. Katsaktsa mykurẽtsa tsimykaranaha

Deus haramwe eksok hyrity wa.

⁵ Wabyziutaha! Deus wasania ty ahabo tsimytsasokonaha. Deus haramwe eksok hyrity wa. Atazuba imysapyrẽnikita. Ihumo mypubara zuba. Katsa mysopyksapybyitsa tu tsimykaranaha zeka batu ituk zikapykyknaha. Amy ty batu mysapy kytsa papatu tsimykaranahaze mysikpybyrẽtsa tsimoziknaha. Katsa wasani tsimaha zeka haramwe eksok hyrity wa iwaze Deus tuk tsimypykyryknaha. Anahi Sesus mybo nitsaso katsa iharere tsiwabynaha.

⁶ Katsaktsa:

– O Deus atukytsa tsimaha – mytsaty ahabyitsa tsimykaranaha. Hawaha tsimytsasokonaha zeka mysapybyitsa tu tsimykaranaha mybarapetu tsimykaranaha. Katsa wasanibara ty tsimyzurukunaha. Iwaze batu Deus tuktsa tsimoziknaha.

⁷ Deus ta batu zimyi batu ziky. Atazuba haramwe eksok hyrity wa. Wasanikita. Katsa iwata tsimyzurukunaha zeka tyharape hapokzitsikinaha, Deus mysopyksapybyitsa tu tsikykaranaha mymyokzohik. Sesus Deus tse iharapatawyhyta humo taspu ziwebaik nihyrikosokda ana humo hi mysapybyitsa tsikykaranaze Deus mymyokzohik. Abaka Sesus humo meky watu tsimoziknaha. Ihumo mysapyrẽtsa tsimoziknaha hỹ.

⁸ Katsa tihi zeka:

– Katsaktsa isapyrẽnikia ty zuba tsimykaranaha zeka. Deus harere bo zuba hỹỹ tsimynakaranaha – mybarapetu tsimykaranaha. Batu ma zikaha. Iwa tsimykaranaha zeka mybarapetu tsimykaranaha. Anaharere humo hi baija tsimykaranaha.

⁹ Mysopyksapybyitsa tsimykaranaha zeka Deus bo tytsasonaha. Iwa mysapybyitsa ty ibo tsimytsasokonaha zeka iwahatu mymyokzohik. Iwa botu nitsaso iwatahi mysapybyitsa tsimykaranaha iharere humo mymyokzohik. Iharere wasani my. Ihumo meky watu tsimoziknaha. Ihumo mysapyrëtsa tsimoziknaha hỹ.

¹⁰ Deus hi:

– Mybarawy ezektsa simysapybyitsa mykaranaha – niy. Tsimytsasokonaha zeka:

– O katsaktsa batu. Wasani tsimaha – mybarapetu tsimykaranaha. Iwa mybarapetu tsimykaranaha zeka Deus harere humo batu ahahyrinymyry tsipiwatawykynaha. Deus botu nitsaso mybarawy ezektsa sisapybyitsa mykaranaha, katsaktsa ipe tsimaha zeka:

– O batu wasani tsimy – iwatahi Deus mospihikbatakata wata mybarapetu tsimykaranaha.

2

Kiristu mymytsumuëhëkik.

¹ O myzubaha kahyrytsa watsa ikiahatsa bo piwatahaka iwahatu hawa batu sapybara humo ka batu ahakparawy. Iwaze imysapybara ty ka moewyhiktaha. Ikiahatsa ahamysapybara ty tsimaha zeka Sesus Kiristu ahatsyhyryze Deus bo mopamykyso. Atahi pahabetesaka Deus myzo babata bo mopamykysoko. Sesus imysapyrënikita my.

² Ata kino mysapyzekenihyrikosokda. Nihyrikosokdaze mysapyzekeniyzik. Iwatahi Deus mymyokzohik. Mybarawy ezektsa sizubarëtsa imysapybara ty nikaranaha mysiokzo tsihikik hỹ.

³ Deus harere bo hyỹ tsimykaranahaze itukytsa tsimoziknaha. Iharere bo hyỹ tsimykaranaha ana humo hi itukytsa tsimoziknaha. Anahi tsinymyrykynaha.

⁴ Aty iharere bo hyỹ byizeka katsa mype:

– Utakta Deus humo kahyrinymyrëta – mybarapetu nikara. Deus harere wasape nikara iharere wasani zuba ana humo kino batu ma ziky.

⁵ Kytsa Deus harere bo hyỹ maha zeka Sesus humo sispirikporëtsa moziknaha. Asa kino Deus humo simypokzitsiukrëtsa anatyhi kytsa bo piwatawynaha. Deus harere bo hyỹ mykaranaha zeka hawa haty Deus mozihikik yhỹ mykaranaha iwa Deus sopyk tanymyry.

⁶ Katsaktsa Deus pe tsimaha:

– O Deus hawa tsimyzihikik ana bo hyỹ – tsimaha. Iwaze hawa Sesus zikzuruku katsa kino niwatihi isopyk watu tsimykaranaha. Sesus watsa tsimyzurukunaha zeka iwaze hawa Deus mozihikik yhỹ tsimykaranaha. Hawa mozihikik ana humo hi myhyrinymyrëtsa hỹ.

Abaky mypehawy.

⁷ Kaharereziuwyttsa botu ahabo iktsasoko atsatu ahabo piwatahaka, kaharere ezytyk. Tubabatu myzotsa niakbakanahatsa botu nitsasonaha hawa ahasopyk. Aba kino atsatu piwatahaka, kaharere ezytyk waha my.

⁸ Ana soho hi ahabo piwatahaka. Hawa Sesus zikzuruku ikiahatsa kino niwatihi kytsa sopyk anahi tsinynahaze ana kino ezytyk waha my. Hawa Kiristu zikzuruku naha bo mytsaty tsimykaranahaze ana humo kino myhyrinymyrëtsa. Sesus anaharere bo yhỹ ziknakara, iwatahi myzubaha bo nasisapywyky. Katsa kino niwatihiaktsa! Sesus haramwe eksok wa. Aty iharere bo hyỹ mykaraze maku iwororo waha eze pitabaka tawata Sesus tuk kytsa mysipokzitsiki.

⁹ Atahi:

– O uta Deus harere bo hỹ mykara. Katsy batu kakparawy ihumo kakyrirēta – iwa mybarapetu mykara. Ata kino tatsy humo takyrikize zimykik iwatahi Deus harere bo batu ma ziky. Maku miwa ha buruk pitabakaze tawata, tatsy tsiakyriurēta humo.

¹⁰ Aty tatsy humo imypokzitsiki Deus harere bo hỹ mykara. Batu zimyi. Ata kino maku iwororo waha eze pitabaka tawata, tatsy pipokzitsiki humo.

¹¹ Atahi tatsy humo takyriki iwaze Deus harere bo batu h̃ ziky. Zimykiki. Ata kino maku wata miwa ha buruk pitabaka. Iktsabyitatu miwa humo izarata tawata. Atakta tatsy humo takyriki miwa ha buruk ta wata. Tsiakyriurēta tuze Deus harere bo batu h̃ ziky izarata wata paikpa nikara.

¹² O katukytsa Sesus humo ahaspirikporētsa iwatsahi botu ahamysopyksapybyri ty tsikykaranaha zahaokzohik.

Sesus Kiristu myzahapokzitsiki mysapyzekeny nihyrikosokda iwatahi Deus ahamysopyksapybyri ty tsikykaranaha zahaokzohik.

Ana hi ahabo piwatahaka.

¹³ O sizotsa ahabo piwatahaka.

Abaka atahi Deus nanabyitaba suknihibyize koikny baktatu ata humo hi tsinynaha,

Sesus Kiristu kino niwatihi tsinynaha.

O siypykyhydytyktsa ahabo kino niwatihi piwatahaka.

Hyrikoso sapybara pehatsa harere bo batu h̃ tsimaha.

Abaka ikiahatsa Deus tuktsa tsimoziknaha. Kahyrytsa watsa ahabo piwatahaka,

Deus myzo humo botu ahahyrinymyrētsa.

¹⁴ Sizotsa ahabo piwatahaka atahi Deus nanabyitaba suknihibyize koikny baktatu

ata humo kino ahahyrinymyrētsa.

Atakta Sesus Kiristu ata kino niwatihi tsahahyrinymyrētsa.

Siypykyhydytyktsa ahabo piwatahaka ahapunihikrētsa humo.

Deus harere ahatuk, iharere bo zuba mytsaty tsimykaranaha.

Hyrikoso sapybara pehakatsa harere bo batu h̃ tsimaha.

¹⁵ Ikiahatsa Deus sukyrytsitsa batu ahakparawy! Kytsa asahi Deus humo batu siakparawy tsizubarēna mozihikiknaha. Ikiahatsa ja! Ikiahatsa siwatsa tsizubarēna tsimyzihikiknaha zeka Deus myzo batu ahatuk ziknapykyryk.

¹⁶ Kytsa asahi Deus harere bo batu h̃ mykaranaha tsizubarēna mozihikiknaha. Tahanamy bo zuba mytsaty mykaranaha. Amy bo iktsa maha zeka ana kino mozihikiknaha. Asa hi:

– O katsa zuba mynamy tsizubarēna. Iwatsahi myhyrizikwanitsa tsimoziknaha – mykaranaha. Kytsa sibo iktsa maha mozihikiknaha. Ikiahatsa siwatsa ahasopyk zeka Deus humo batu ahaspirikpo.

¹⁷ Aibani sinamy mohokdaba. Kytsa sinamy zuba mozihikiknaha bykyze sinamybyitsa moziknaha. Deus harere bo hỹ tynakaranahaktsa iwaze Deus tuk tahawahi mynapykyryknaha h̃.

Sesus Kiristu sukyrytsitsa.

¹⁸ O katukytsa tsizubarēna mopykbaze Satanas mozumu. Atakta Sesus batu iakparawy, isoho botu tsiwabynaha. Atahi sisukyrytsa. Sizubarētsa Sesus Kiristu sukyrytsitsa botu zumunaha, iwatsahi nanabyitaba mopykbaze ana humo hi myhyrinymyrētsa.

¹⁹ Asahi Kiristu humo batu siakparawy mysapy ekze zipokonaha. Sesus tuktsa iwatsahi mytukytsa watsa nikaranaha. Nitsasonahaze:

– Katsaktsa ahaututsa pauktsitsa tsimykaranaha – mybarapetu nikaranaha. Mytutsa pauktsitsa babatsa zeka ba zikponaha. Ziponahaze myututsa pauktsitsa byitsa tu iwa ziwatawynaha.

²⁰ Ikiahatsa hi nawa ha ty wasani ahahyrinymyrëtsa. Deus hyrikoso ahatuk mynapykyryk iwatsahi nawa ha ty wasani ahahumo tsahahyrinymyrëtsa.

²¹ Iwatahi aha bo piwatahaka. Asahi sispihikbatakatsitsa batu wasape zikaha, sihyrinymyrybyitsa bo batu tywataha. Ikiahatsa hi ahahyrinymyrëtsa iwatahi ahabo piwatahaka.

²² Kytsa simyspkihikbatanikitsitsa tihi:

– O Deus Sesus ty batu typeha. Sesus Deus tse byitatu. Deus Sesus zo byitatu – mykaranaha. Iwaze nitsasokonaha asahi Sesus Kiristu humo batu siakparawy.

²³ Aty:

– O Sesus Deus tse ana humo hi batu spirikpo mykara – iwa my zeka atakta batu Deus humo ispirikpo. Atahi:

– O Sesus Deus tse babata – mykara. Atahi Deus humo tspirikporëta.

²⁴ Deus wasania ty botu tsiwabynaha. Deus humo tsikspirikponahaze iharere bo hyÿ tsimykaranaha. Iharere bo hyÿ tynakaranahaktsa! Iharere bo hyÿ tsimykaranaha zeka hawa Deus mozihikik yhyÿ tsimykaranaha. Sesus tuk tsimynapykyryknaha.

²⁵ Kiristu botu mype niy:

– Kahumo meky watu tsimoziknahaktsa kytsa! Iwahatu tsimyhyrikosok-danahaze Deus tuk mywahi tsimynapykyryknaha hÿ – niy.

²⁶ Asaktsa Sesus humo batu sispirikpo mybarapetu ahabo sisopyk. Iwatahi ahabo piwatahaka sihumo pykyhytuty iwatahi piwatahaka.

²⁷ Deus hyrikoso ahatuk mynapykyryk. Batu ikiahatsa zubabyitsa Kiristu Deus hyrikoso ahabo zipeha. Deus hyrikoso atahi pahahyrinymyry babata. Wasani haty pahahyrinymyry. Ahape my:

– Sesus harere bo hyÿ tynakaranahaktsa! – my. Atahi batu mybarapetu isopyk. Iharere bo hyÿ tsimaha zeka Sesus tuk tsimynapykyryknaha hÿ.

Katsaktsa Deus hyrytsa.

²⁸ – O katukytsa Kiristu harere bo hyÿ tahaktsa. Iwa zeka hawa ahasopyk zeka batu ahasikpyby. Sesus myziksizoze batu ahasikpyby iwaze ahapuni-hikrëtsa tsimoziknaha hÿ.

²⁹ Deus wasani mykara ana humo hi ahahyrinymyrëtsa. Asaktsa wasani mykaranaha. Deus harere bo hyÿ mykaranaha Deus hyrytsa moziknaha. Ana soho bo hi mytsaty tsimykaranaha.

3

¹ Deus myzo myhumo tsimypokzitsiarëta. Iwatahi mype my:

– Asahi kahyrytsa – my. Katsaktsa Sesus tukytsa tsimaha. Ana humo hi mytsaty tahaktsa! Iwaze kytsa Deus humo batu siakparawy katsa Deus hyrytsa ana humo hi batu sihyrinymyry. Sesus Deus tse babata ana humo sihyrinymyrybyitsa iwatsahi katsa Deus hyrytsa niwatihi batu sihyrinymyry.

² O katukytsa katsaktsa botu Deus hyrytsa tsimaha. Aibani Deus tuk mywahi tsimynapykyryknaha. Iwaze hawa tsimaha. Batu mynyhy. Kiristu myziksizoze katsaktsa ihyritywa tsimoziknaha ana humo hi myhyrinymyrëtsa. Hawa Kiristu mykara myhyrinymyrëtsa ibo tsimykozona-haze myhyrinymyrëtsa babatsa.

³ Katsaktsa Kiristu wata tsimoziknaha ana humo hi mytsatytahaktsa. Iwatsahi tahasapywykynaha iwaze Kiristu wata tsimaha. Kiristu imysapyrēnikita, batu amy tohi. Katsa mysopyksapybyitsa tu tsimykaranaha zeka ihumo batu mykparawy.

⁴ Asahi pisapybyikinaha zeka Deus harere bo batu hỹ zikaha. Asaktsa simysopyksapybyitsa mykaranaha zeka Deus harere humo batu hyỹ zikaha.

⁵ Sesus zuba tsimysapyrēta. Zumuze mybarawy ezektsa bo mysapybyitsa tsimykaranaha iwatatu nimyokzohik. Ihumo zuba mysapybyitsa tsimykaranaha ana hi tsmoewyhiknaha. Sesus zuba Deus harere bo hyỹ mynakara.

⁶ Aty Kiristu harere bo hyỹ mykara imysapybara ty pimoewyhik. Pisapywyky iwa Deus mozihikik anahumo hyỹ mykara. Imysopyksapybyiri mykara zeka Sesus humo batu ispirikpo. Sesus humo batu ihyrinomyry.

⁷ Katukytsa pykyhytutaha! Asaktsa Sesus humo batu sispirikpo ikiahatsa pahamiwy tsihikiknaha iwatsahi pahapihikbatakanaha. Siharere bo ka waby waby byitaha! Asaktsa wasani sisopyk Deus okzeka wasani mykaranaha. Asahi Deus okzeka Kiristu watsa wasani mykaranaha.

⁸ Kytsa simysapybyitsa ziknakaranaha asaktsa hyrikoso sapybara pehakatsa Satanas hyrytsa. Tapara Deus bijoikpe mybarawy nizuknize Satanas Deus harere bo batu hỹ niy. Deus tse babata mybarawy ezektsa bo inasikze Satanas zikwy zipykbaik iwaha bo hi Sesus inasik.

⁹ Katsa Deus hyrytsa tuze mysopyksapybyiri humo batu mymyzihik. Deus myzo hyrikoso mytuk mynapykyrykyk iwatsahi mysapybyitsa tsimykaranaha batu zikaha.

¹⁰ Aty Deus tse zeka sihumo myhyrinomyrētsa. Aty Satanas tse zeka sihumo myhyrinomyrētsa. Asahi wasanibyitsa sisopyk Deus hyrytsa byitsa tu maha. Asahi itukytsa tuk tahakyrikinaha batu Deus hyrytsabyitsa tu maha ihumo sispirikpobyitsa. Deus hyrytsa ihumo sispirikporētsa zeka iwatsahi taharapepokzitsikinaha.

Tyharape pokzitsikinahaktsa kytsa.

¹¹ Tyharape pokzitsikinahaktsa! Sesus humo tsikspirikpokonahaze ana harere tsiwabynaha. Tynaharape pokzitsikinahaktsa kytsa.

¹² Kaĩ waka ta byita ja. Atahi hyrikoso sapybara pehakatsa Satanas tse niy. Imysopyksapybyita nikara. Atahi tatsy zibezehek. Tatsy humo takyriki iwatahi tatsy zibeze. Itsykta wasania ty ziknakara atakta batu, imysopyksapybyiri ty ziknakara. Itsy wasani ziknakara iwatahi ihumo tsizokdirēta nikara. Iwa byita ja.

¹³ O katukytsa, Sesus humo sispirikpobyitsa ahahumo takyrikinaha zeka ahapyby byihuja.

¹⁴ Asa watsa byijataha asahi sinini ykarawy bo Deus mysipeha. Katsaktsa meky watu tsimoziknaha. Mytukytsa humo mymypoکزitsirētsa. Iwatsahi batu sinini ykarawy bo tsimaha. Asaktsa ustsya mysisapybyrikinaha zeka sinini ykarawy bo maha. Asawatsa byijataha!

¹⁵ Usta bo tsipisapybyrikinaha zeka mybakatsa watsa. Deus okzeka atahi tatukytsa humo takyriki mybakatsa watsa. Atahi imysopyksapybyita tu nikara batu tymoewy. Atakta Deus tuk ba mynapykyryk ana humo hi ahahyrynyrētsa.

¹⁶ Kiristu nimyhyrinomyryky tyharape pokzitsikinahaktsa. Atahi mysapyzeyky nihyrikosokda. Mysapyzeyky niyzik. Katsa kino niwatihiktsa tsimaha! Aty usta Sesus tukta pibeze tsihikik zeka katsa ipe tsimaha:

– O isapyzeken tsimoziknaha ipokzi tsimhyrikosodanaha – tsimaha. Iwa Kiristu nimypehaka.

¹⁷ Aparakbaha Sesus tuktsa sinamybyitsa zeka mynami ty sibo nyny tsimaha! Sibo tybiak byizeka soso byitaha:

– O katsakta Deus humo mypokzitsirētsa – ba zikaha iwa zeka mybarapetu tsimykaranaha.

¹⁸ Katukytsa ustsā Sesus tuktsa tsysitsumuēhīnaha. Sihumo amypokzitsi zeka ahanami ty sibo nyny tsimaha. Ahanami tsibiaknaha. Tsysipywykynaha. Iwaze sihumo ahamypokzitsiukrētsa tsimaha hỹ.

Deus okzeka mypunihikrētsa tsimoziknaha.

¹⁹ Myzubaha bo tsimysisapywykynaha zeka iwa Deus mozihikik hỹ tsimykaranaha. Ana soho humo hi myhyrinymyrētsa. Iwaze Deus bo batu tyso:

– Utakta amy ty akparawy yhỹ ja. Aharere baba ty yhỹ ja – iwa batu tyso. Myzubaha humo ahamypokzitsi zeka iwatsahi Deus okzeka batu ahapyby.

²⁰ Tspimyikinaha zeka mytsatziu tynakaranaha:

– O abaka kamysapybyita tu mykara hawa my – tsimaha. Ahapyby byihua Deus tsihyrinymyrēta babata mymysapywyky iwaze batu ahapyby.

²¹ Katukytsa imysapybara ty tsimykaranaha ana soho humo hi mytsaty byijataha iwaze Deus okzeka batu mypyby. Mypunihikrētsa tsimoziknaha. Deus bo tsimypamykysonahaze mykurētsa tsimozikzonaha. Iwaze imysapybara humo ka mytsaty byijataha.

²² Amy ty ibo tsimyzapykykynaha ana humo hi mybo nyny mykara. Iharere bo ma tsimykaranaha. Iwaze hawa Deus mozihikik naha humo mysopyk iwatsahi amy ty tsimyzapykykynaha mybo nyny mykara. Iwatahi nanywabyky.

²³ Deus mype:

– Ikiahatsa Sesus humo ahaspirikpohuktsa! Tynaharape pokzitsikinahaktsa! – niy. Iwa Deus mybo nitsasoko. Atsatu Sesus botu zahyrynyky.

²⁴ Asakta Deus harere bo hỹ mykaranaha ihumo mozihikiknaha sisopyk. Asa kino ihyrytsa maha. Sibo tsysipywyky sihumo tsimypokzitsiukrēta. Deus hyrikoso ihyrytsa tuk tawahi mynapykyryk. Iwaze Deus mymysapywyky, ihyrikoso mytuk tawahi mynapykyryk.

4

Deus hyrikoso wasanita mekywatuta isopykta.

¹ O kaharereziuwytitsa nanabyitaba kytsa mybo mybarapetu mynakaranaha. Iwatsahi siharere humo batu hỹ. Ahamytsatyhaīrētsa. Atahi:

– Utakta Deus hyrikoso humo pinymyryky – my. Ahamytsatyhaīrētsa. Tapara wabyziutaha! Ikiahatsa zuba tsimypamykysokonaha:

– O ihyrinymyrywy wasani ja Iwaha ja. Deus nitsasoko – tsimaha.

² Deus harere baba humo nitsasokoze tsinymyrykynaha. Asahi Deus harere mymyhyrinymyrynahaze mype mykaranaha:

– Deus Sesus zipehata my. Mybarawy inasikze maku niyzik – mykaranaha. Zikino Deus sohokotsa piwatawykynaha. Deus hyrikoso situk mynapykyryk.

³ Ustsā Sesus Kiristu soho mekytu motsasokoronaha asahi batu Deus harere ty tyso. Asakta:

– Deus Sesus ty mybarawy bo batu ty peha. Batu maku yzik – mykaranaha. Asatu tahyrinymyrykynaha. Deus hyrikoso situk ba zikapykyk. Asa kino Sesus bo batu siakparawy, Sesus sukyrytsitsa ana humo kino mymyhyrinymyrykynaha. Botu tsiwabynaha, atakta Sesus bo batu iakparawy isukyryhyta hyrikoso mozumu. Atahi botu izumu.

⁴ Katukytsa ikiahatsa hi Deus hyrytsa tsimaha. Atakta Sesus humo batu iakparawy, sisukyrytsitsa moziknaha atakta hyrikoso sapybara pehakatsa ata humo hi kytsa Sesus humo batu sispirikpo. Asahi Sesus sukyrytsitsa Satanas harere bo hỹ mykaranaha. Deus hyrikoso ahatur mynapykyrykta abazuba tsipunihikrēta h̃ ba hawa tohi zikzukninaha. Iwatsahi Deus sohobyitsa harere nepykna. Sizikwy mohokda.

⁵ Asahi Deus sohobyitsa kytsa Sesus humo batu sispirikpo asahi sinamy soho zuba mopamykysokonaha. Deus hyrikoso situk ba mynapykyryk iwaze kytsa Deus bo batu siakparawy siharere piwaby tsihikiknaha.

⁶ Katsa hiba Deus hyrytsa tsimaha. Kytsa Sesus humo sispirikporētsa myharere piwabyziukunaha. Kytsa Deus harere bo batu h̃ mykaranaha myharere humo kino niwatihi batu siakparawy. Iwatsahi aty Deus harere baba ty mymyhyrinymyrykynaha mytsatziu tynakaranahaktsa. Asahi mymyitsa, wasanibyitsa mykaranaha asa humo kino batu h̃ tsimaha.

Deus myhumo tsimypokzitsiarēta iwatsahi tyharape pokzitsikinahaktsa!

⁷ – O kaharereziuwysitsa tyharape pokzitsikinahaktsa! Sesus tuktsa bo tysisapywykynaha zeka hawa Deus mozihikik ana bo hi yh̃ tsimykaranaha. Katsa tsimyharape pokzitsikinaha zeka Deus hyrytsa babatsa tsimoziknaha. Sesus tukytsa tsimaha. Iwaze Deus harere bo hỹ tsimykaranaha.

⁸ Deus myzubaha humo tsimypokzitsiukrēta. Ata zuba sizubarētsa humo mysipokzitsi tsihikik. Iwatahi aty ustsaha humo ka imypokzitsiu byizeka Deus tukytsa byitsa tu.

⁹ Deus myhumo tsimypokzitsiukrēta ana humo hi botu myhyrinymyrētsa. Deus tatse zipeha atahi itse babata. Mybarawy ezektsa bo tatse zipehaze myhumo tsimypokzitsiukrēta ziwatawy. Sesus mysapyzekenihyrikosokda iwaze tazo bo mymyoktyhyryk. Iwa Deus myhumo tsimypokzitsiukrēta myhyrinymyrētsa h̃.

¹⁰ Tubabatu katsa Deus humo batu mykparawy Deus zuba myhumo tsimypokzitsiukrēta. Iwaze mybo tatse zipeha. Katsa mysopyksapybyitsa tsikykaranaha ihumo mymyokzohik. Atahi mysapyzekenihyrikosokdaze mysapybyi tsikykaranaha Deus Sesus humo mymyokzohik. Iwaze tsimyhyrikosokdanaha zeka Deus tuk mywahi tsimynapykyrykna.

¹¹ O katukytsa Deus myhumo tsimypokzitsiukrēta zeka iwatsahi tyharape pokzitsikinahaktsa tsimaha.

¹² Batu aty tohi Deus ty ityny. Tsinaharapepokzitsikinaha zeka Deus mytuk mynapykyryk. Iharere bo hỹ tsimykaranahaze ustsaha bo tsimysisapywykynaha. Iwatsahi Deus zikwy mytuku myhyrinymyrētsa h̃.

¹³ Deus hyrikoso mybo zipehahik. Ihyrikoso hi mytuk mynapykyryk. Iwatsahi hawa Deus mozihikik ihyrikoso humo yh̃ tsimykaranaha. Ihyrikoso mytukze iharere bo hỹ tsimykaranaha. Ihyrikoso kino myhumo tsimypokzitsiukrēta.

¹⁴ Deus tatse babata zipeha. Mybarawy ezektsa bo zipeha iwatahi inasikze myzubarētsa Deus bo mymyokty tsihikik. Hawa Sesus nikara ana bo hi iktsa tsikaha. Iwatsahi Sesus Deus bo mymyoktyhyrykta ana hi myzubaha bo tsimytsasokonaha.

¹⁵ Aty my zeka:

“O Sesus Deus tse babata tihi my” – niy. Isikpybybyita tu Sesus Deus tse motsasoko iwaze Deus ituk mynapykyryk. Atahi hawa Deus mozihikik yhy mynakara.

¹⁶ Deus tatse zipeha atahi katsa tazo bo mymyoktyhyryk. Iwatsahi myhumo tsimypokzitsiukrêta myhyrinymyrêtsa. Iwatsahi katsa tihi:

– O Deus myhumo tsamypokzitsiukrêta – tsimaha. Iwaze sizubarêtsa bo tsimysasokonaha:

– O Deus myzubaha humo tsimypokzitsiukrêta – tsimaha. Kytsa humo tsipisapywykynaha zeka hawa Deus mozihikik ana ty hi yhy tsimaha. Deus kino myhumo tsimypokzitsiukrêta.

¹⁷ Sizubarêtsa bo tsimysisapywykynaha zeka mypunihkrêtsa tsimoziknaha. Deus simysapybyitsa tu nikaranahatsa boze tihi:

– Kaokzeka ikiahatsa ahamysapybyitsa tsikykaranaha. Katse ahasapyzekenihyrikosokda iwatahi ihumo pahaokzohik – my. Iwatsahi motsasokoze katsakta batu mysikpyby. Katsakta iokzeka mypunihkrêtsa tsimaha. Kytsa bo tsimysisapywykynahaze mypunihkrêtsa tsimoziknaha. Katsa Kiristu watsa mysopyk zeka iwatsahi ihumo batu mysikpyby.

¹⁸ Deus myhumo tsimypokzitsiukrêta ana humo hi tsimyspirikponaha zeka batu mypyby. Mypybybyitsa tu zeka kytsa tsimysisapywykynaha iwatsahi mypunihkrêtsa tsimaha. Mypybyrêtsa zeka katsakta:

– Deus myhumo tsimypokzitsiukrêta ja. Mysapybyitsa tu tsimykaranaha mymyokzo ja – tsimaha. Iwa tamyiba zeka mypybyrêtsa tsimoziknaha. Mypybyrêtsa tu zeka ustsaha humo ba ziksipokzitsi.

¹⁹ Taparaka Deus myhumo tsimypokzitsiukrêta. Abaka katsakta Deus humo mymypokzitsirêtsa. Ihumo ustsaha bo tahapokzitsikinaha hy.

²⁰ Katsakta ustsaha Sesus tuktsaha humo tahakyrikinaha zeka Deus harere bo batu hy tsimykaranaha. Kytsa humo ahamypokzitsi byizeka ba ziktsasonaha:

– O Deus ahumo mymypokzitsirêtsa – mybarapetu tsimykaranaha. Batu aty tohi Deus ty tyny. Kytsa bo iktsa ziknakaranaha. Mytuktsa bo iktsa tsimykaranaha, sihumo tsimypokzitsibyinaha zeka Deus humo kino niwatihi ba zikmypokzitsi. Deus humo mymypokzitsibyitsa babatsa ata kino batu iktsa ziky. Iwatsahi batu ihumo mymypokzitsi mytsaty ahabyitsa tsimykaranaha.

²¹ Kiristu botu nimyhyrinymyryky:

– Ikiahatsa Deus humo ahapokzitsirêtsa zeka tyharape pokzitsikinahaktsa! – niy. Iwa Kiristu nimyhyrinymyryky.

5

Sesus tuktsa sispirikpobyitsa harere humo nepyknaha.

¹ Kyze asakta Deus Sesus zipehata humo mospirikpokonaha asahi Deus hyrytsa maha. Sesus Deus tse ana hi motsasokonahaze Sesus tukytsa moziknaha.

² Myzo tapokzitsi zeka ihyrytsa kino niwatihi tahapokzitsikinaha. Deus humo tsimypokzitsikinaha zeka iharere bo zuba hyhy tsimykaranaha. Iwa tyharape pokzitsikinaha hy tsimykaranaha.

³ Deus humo tsimypokzitsikinahaze iharere bo hyhy tsimykaranaha. Iwa ihumo tsimypokzitsirêtsa hy. Batu iharere ihokdaha iwatsahi iharere bo hyhy tsimykaranaha.

⁴ Asakta Sesus humo batu sispirikpo Deus hyrytsa humo sizikwy nepykba. Katsakta Sesus humo mspirikporêtsa botu sizikwy myhumo nepyk. Sesus zikwy mytuk mynapykyryk iwatsahi batu sipunihik.

⁵ Kytsa Sesus Deus tse humo sispirikporëtsa asa zuba sispirikpobyitsa zikwy nepykbaik iwa hỹ.

Asahi Sesus Kiristu Deus tse babata piwatawynaha.

⁶ Deus Sesus zipeha. Mybarawy ezektza bo inasikze Deus harere bo hỹ ziknakara. Iwaze Suão Sesus pihik ty ziharasusuze. Aiba eze zuba iharapatawyhyta humo tabezewy mysapyzekenihyrikosokda iwahatu katsa Deus tuk mywahi tsimynapykyryknaha. Nihyrikosokdaze Deus zipehata nikara. Abaka Deus zipehata mynakara. Tawahi Deus zipehata mynakara.

⁷⁻⁸ Sesus nimyhyrinymyryky:

– Utakta Deus tse – nikara. Mytsaty tsimykarannahaze hawa niy ta ziharasusuhik. Mytsaty tsimykarannahaze hawa mysapyzekenihyrikosokda atahi Deus tse babata humo myhyrinymyrëtsa. Deus hyrikoso kino niwatihi mymyhyrinymyryky:

– Sesus Deus tse – my. Atahi wasania ty zuba mynatsasoko. Iwatsahi harakykbyi myspirikpowy Sesus Deus tse babata mykaranaha iwatsahi myhyrinymyrëtsa.

⁹ Maku harere humo tsikspirikponaha. Deus imysapyrënikita iwaze iharere humo tsikspirikpobanaha hỹ. Abaka aty mybo nitsasoko Sesus Deus tse ata kino Deus tihi my. Iwatahi iharere wasani hỹ.

¹⁰ Deus hi tatse soho nitsasoko. Asahi Sesus humo sispirikporëtsa:

– O Deus tse Sesus humo kaspirikporëta wasani myhỹ – maha. Sispirikpobyitsa:

– Amy ty Deus tatse soho nitsasoko batu kaspirikpo, iharere bo batu hỹ – maha. Iwa motsasokonahaze Deus imyspihikbatanikita wata mykaranaha. Simysapybyitsa tu iharere humo batu sispirikpo iwatsahi Deus imyspihikbatanikita motsasokonaha.

¹¹ Deus harere bo wabyziutaha! Deus:

– Katse ahasapyzekenihyrikosokda anahumo hi mekywa tu tsimyzurukunaha! Sesus tuk tsimyzurukunahaktsa! Tsimyhyrikosokdanahaze katuk ahawahi tsimynapykyryknaha – niy.

¹² Asahi Deus tse humo sispirikporëtsa meky watu moziknaha. Sesus tuk mozurukunaha. Myhyrikosokdanahaze Deus tuk tahawahi mynapykyryknaha. Sispirikpobyitsa batu. Sesus zikwy situkba zikapykyryk mohyrikosokdanahaze batu Deus tuk zikapykyryknaha. Nokponi mynapykyryknaha sinini ykarawy bo tahasapynaha.

Asaktsa mohyrikosokdanahaze tahawahi Deus tuk mynapykyryknaha.

¹³ Ahabo ziwatahaka. Ikiahatsa Deus tse humo ahaspirikporëtsa iwaze meky watu tsimoziknaha. Sesus tuk tsimyzurukunaha. Tsimyhyrikosokdanahaze ahawahi Deus tuk tsimynapykyryknaha hỹ. Iwatahi ahabo piwatahaka.

¹⁴ Kyze katsaktsa Deus bo tsimypamykysokonaha. Deus bo tsimyza-pykykynaha zeka hawa Deus mozihikik iwaze myharere piwaby. Iwatsahi mypunihikrëtsa tsimoziknaha nawa ibo tsimyzapykykynaha.

¹⁵ Myhyrinymyrëtsa tu myharere piwaby zeka amy ty tasapyky zeka Deus mybo nyny my. Amy ty mozihikik naha zuba ibo tasapyky zeka iwaze mybo nyny myhỹ.

¹⁶⁻¹⁷ Aty mytukytsa tuk isopyksapybyi mykara zeka ikiahatsa itsyhyryze Deus bo tsimypamykysokonaha. Deus sisopyksapybyi mysiokzohik iwaze Deus tuk tawahi mynapykyryk. Myzubarëtsa tamiyikik. Atakta Deus okzeka

batu imysapy ihyrikoso pimijianaha zeka atahi ba iokzohok iwaze itsyhyryze Deus bo ba zikpamykyso. Atakta sinini ykarawy bo Deus pipeha. Nokponi Deus bara botu sinini ykarawy bo tasapy.

¹⁸ Deus hyrytsa imysapybara humo ba hỹzo zikaha. Deus tse sihumo tsimypokzitsiukrẽta tu iwatsahi sisopyksapybyitsa tu batu hỹ mykaranaha. Satanas sihumo batu ziky Deus tse sihumo tsimypokzitsiukrẽta hỹ.

¹⁹ Katsakta Deus hyrytsa tsimaha. Deus zikwy mytuk mynapykyryk iwatsahi myhyrinymyrẽtsa. Utsa mybarawy ezektsa pykyhytu zikahabyikitsa Satanas zikwy situk mynapykyryk iwatsahi sispirikpobyitsa mynakaranaha.

²⁰ Deus tse inasik. Botu mybarawy bo izumu ana humo hi myhyrinymyrẽtsa. Deus soho humo nimyhyrinymyryky. Hawa Deus mykaraze nimyhyrinymyry iwaze Deus babata humo nimyhyrinymyryky. Ata zuba wasani mykara. Ata zuba isopyksapyrẽnikita. Ata soho humo hi tsipinymyrykynaha. Sesus humo myspirikporẽtsa. Sesus Deus tse humo tsimyspirikpokonaha zeka Deus humo myhyrinymyrẽtsa. Iharere bo zuba hỹ tsimykaranaha iwaze meky watu tsimoziknaha. Ata zuba Deus babata. Aty iharere bo hỹ mykara mekywa tu mozik. Mohyrikosokdaze Deus tuk tawahi mynapykyryk hỹ.

²¹ Kahyrytsa pykyhytutaha! Deusbyitsa harere bo ka yhỹ byitaha kytsa Deus soho pimiyinaha zeka iwatsahi pykyhytutaha!

Suã

Suão ziwatahakazo naha

Tubabatu iwatahaha ana hi – Suão ziwatahaka – kytsa mynakaranaha. Wasanibara humo pykyhytu maha hi nizokparakanaha, “tyharape pokzitsikinaha” niyzo. Deus hyrikoso ituk niapykyryk iwatahi Deus harere ziwataha. Iwatsahi katsa kino niwatihi tanymyryky.

¹ Uta Suão myspirikpokotsa atatsa bo piwatahaka kapokzitsihi babatsa. Deus zawatawy ahyrytsa kino niwatihi nisiwatawy iwatahi ahabo piwatahaka. Abaka iktsaikba. Uta ikiahatsa humo kamypokzitsiarêta hÿ. Uta zubabyita sasabyitsa kino niwatihi Deus harere humo zinymyrykynahatsa.

² Wasania humo hi katsaktsa tsinaharapepokzitsikinaha. Iharere bo mytsaty tsinakaranaha humo natabyituhukutu. Iwatsahi ahahumo mymypo-kzitsirêtsa. Deus harere bo hÿÿ tsimykarannahaktsa ahahumo mymypo-kzitsirêtsa.

³ Utakta Deus myzo bo mopamykysoko. Itse Sesus Kiristu bo kino niwatihi mopamykysoko ispe my:

– O Deus ahyrytsa tysisapywykykta! Tysipokzitsikikta! Ikia tysitsumuêhîkta iwatsahi batu paikpa mytsaty mykaranaha.

Iwaze Deus harere bo yhÿ tsimykarannahaze Sesus humo mykurêtsa – my.

Hawa wasania ty tsimykarannaha. Mymypokzitsiukunaha.

⁴ Uta kaku zuba iwabyky. Aha soho iwabyze. Wastuhu ahyrytsa Deus harere bo hÿÿ mykaranaha iwatahi kaku zuba iwabyky. Ana wahi Deus nizihikik ana humo hi ahyrytsa mozurukunaha. Nawa ha ty ipehatsa mozihikik mykaranaha.

⁵ Aba kapokzitsihi babatatsa, awatawyhytatsa uta aha pe my:

– Tyharape pokzitsikinahaktsa. Tyzisapybakanahaktsa – ana harere ezytyk bara. Tapara tsiwabykynaha tihi atsatu taparaky tihi Sesus humo tsikspirikponaha zeka ana harere tsiwabynaha ana hi wasani my atsatu piwatahazo.

⁶ Deus pehatsa mybo nitsaso:

– Tyharape pokzitsikinahaktsa! – niy. Kytsa bo tysisapywykynaha iwahi Deus mozihikik tsimyzurukunaha.

⁷ Iwaze sasabyitsa kytsa mysispihikbatakanahatsa asaktsa mybo sizubarêtsa pomokonaha. Kytsa mysispihikbatakanaha. Asa hi:

– O Kiristu mybarawy bo batu inasik. Batu mywata zikyzyk – mykaranaha. Aty iwa my zeka atahi imyspikbatakata atahi Sesus humo iakyriwy tu.

⁸ Iwatsahi pykyhytutaha! Siharere bo waby waby byitaha! Ikiahatsa siharere humo tsikspirikponaha zeka ahahyriziktsokzawy nepyk. Sesus tsyhyryze tarabajatahaktsa! Iwaze Deus ahatarabaja humo isapyha ty zuba ahabo nyny my. Tarabajaziu tsimykarannaha zeka amy ty tisapyrêna ty Deus ahabo nyny mykara.

⁹ Kytsa asahi Kiristu humo batu siakparawy asaktsa:

– Kiristu hyrinymyrytsa wasani. Abaka katsaktsa puêtsik myhyrinymyrytsa ezytyk ty iwaze tsipahahyrinymyrykynaha – mybarapetu mykaranaha. Asahi Deus tuk batu hÿÿ zikaha. Asaktsa Sesus hyrinymyrytsa zuba mymyhyrinymyrykynaha asa kino Deus tuk mynapykyryknaha. Sesus tuk mopykyknahaze Deus harereziuwyttsa maha.

¹⁰ Aty ahabo pomonahaze Kiristu hyrinymyrykywy ty ahabo ity sukmo byizeka Kiristu soho ty ahabo tyso byizeka ba kawahoro bo paku tynahataha. Iwatsa humo ka ba Deus pahasapywykykta ba tsimaha, soso byitaha.

¹¹ Sibō tsimytsasonaha zeka – Deus pahasapywyky – iwaze ipehatsa pimiyiwy wasani hawaha tsimaha. Iwa kytsa mytsaty ahabyitsa zikaha:

– O sihyrinymyrytsa wasani my. Utsa harere humo sispirikporētsa – maha. Iwa nisispihikbatakanahaze yhỹ tsimaha mytsaty ahabyitsa zikaha.

Kaharere ziharawy.

¹² Aba kino nanabyi tsasohobara maitu ahabo iktsasoho tsihikiknaha batu zik papeu humo tywataha byita my. Byi ahabo mynakozore tsihikikzo iwaze atuk mopamykyso ahape babatu my. Iwa myzehe mykurētsa tsimozikbanaha.

¹³ Aeky hyrytsa ahasoho bo mytsaty mykaranaha. Asoho motsasoikiknaha – O Deus humo iwatawyhytatsa – maha. Atatsa niwatihi Deus ziwatawy. De. Niwazuba iwatahaka iwa.

Suão

Suão harakykbyihi ziwatahakazo

Tubabatu – Suão ziwatahaka – iwatahaha ana hiba kytsa nikaranaha. Deus hyrikoso ituk niapykyryk iwatahi papeu humo Kaijo bo ziwatahaka. Aba katsa kino niwatihi tanymyryky.

¹ Uta Suão myspirikpokotsa. Ikia Kaijo kaharereziuwu bo piwatahaka. Ikia humo kamypokzitsiarêta. Katsakta Deus harere bo hyÿ tsimykaranaha.

Kaijo soho.

² Deus bo atsyhyryze mopamykysoko:

– O Deus myzo Kaijo tsipokzitsikikta! Arabyitatu ja tynapykyryk – mykara. Hawa sa tsimy kaharereziuwu. Ahyrizikararawy tsakurêta kahyrinymyrêta ana bo hi botu iwaby.

³ Wastuhu mytukytsa abo inakozorenahaze kabo izumunahaze. Kape niaha:

– O Kaijo wasani mykara, Deus harere bo hyÿ mynakara. Iharere humo zuba mozuruku – nikaranaha. Siharere iwabyze kakurêta ikykara.

⁴ Piwabyze kahyrytsa soho asahi Deus harere bo hyÿ mykaranaha kakurêta ikykara. Ana humo hi kakurêta ikapykyryk.

⁵ Kaharereziuwu mytukytsa abo pomonahaze tsiksisapyky. Meki iknytsa tu kino tahakypykykwy bo izumunahaze kino tsiksipokzitsiki.

⁶ Asahi mynakypyknahaze siharere ziwabykynaha. Asahi:

– O Kaijo myhumo tsimypokzitsiukrêta. Tisokpykziurêta – mykaranaha. Mytukytsa abo mozumuzonahaze tysitsumuêhîzokta. Sihumo amypokzitsihu. Awani mynatururukzonahaze usa hudikhudikwy bo amy ty sibo nyny tsimy. Tsihyrizikporêta tu tysitsumuêhî Deus okzeka wasani. Deus tsyhyryze tarabaja mykaranahaze mysitsumuêhîki ana hi tisapyrêna.

⁷ Nanabyitaba mynakurunahaze Sesus soho mynatsasokonaha. Sesus sispirikpobyitsa namy ba ziaksenaha. Katsakta Sesus humo myspirikporêta mynamy ty ka sibo nyny tsimaha.

⁸ Iwatsahi sihumo tahapokzitsikinaha tisapyrêna. Mysitsumuêhînahaze Deus okzeka wasania ty tsimytsasokonaha siwatsa. Iwaze Deus wasania ty tsimytsasokonaha watsa sihumo tahatsumuêhînahaha. Iwa Deus okze my.

Dioterepes zisapybykirita soho my. Demeteriu tisapyrêta soho my.

⁹ Uta papeu humo tsikaeni zuba sikypykykwy bo iwatahaka. Dioterepes kaharere bo batu hÿ niy.

– O utakta Sesus tuktsa pehatsa myhyrizikwanikita mozik – niy. Atakta kaharere bo batu yhÿ aha.

¹⁰ Iwatahi ahabo pomo zeka imysapybyihaty motsasoko zeka uta pipeha. Atahi mysopyksapybyri ty mykara. Iwaze ustsá kytsa nispiphikbataka iwa nitsasoko iwatatu ba ziaku. Iwaze tsinakypyknahaze ustsá mytukytsa mozumunahaze ba ispe pany kawahoro pakutyny zikaha. Aty ispe pany pakutaha my zeka wasani mykara atawyzik batu imysapy iwatahi kytsa nisisukewy.

¹¹ Kaijo kaharereziuwu wasania ty zuba tisopykdu imysapybara ty ka sopykdu sopykdu byitaha. Aty wasania ty zuba mykara zeka atahi Deus tukta aty imysapybara ty zuba mykara zeka atahi Deus batu inyhy, ispirikpobyita Deus humo batu sihyrinymyry.

¹² Demeteriuta wasani mykara. Kytsa sizubarêtsa isoho. – Atakta wasani mykara – mykaranaha. Katsa kino niwatihi isoho atsatu tsimaha. – Atahi tsimysapyrêta – tsimaha. Myharere wasani ahahyrinymyrêtsa.

Aba mopykykze ikiahatsa bo mytsaty mykara.

¹³ Ikia bo abazuba ha ty mopamykyso tsihikizetu. Papeu humo ba ziwataha.

¹⁴ Iwa zeka ikia bo mynakozore. Uta ikia tuk mopamykyso iwaze harape tuk tsimypamykysonaha.

¹⁵ Deus bo atsyhyryze mopamykyso:

– O myzo Kaijo tsipokzitsikikta! Ahumo tsakurêta mozik – my. Asahi aharezeziuwytza kabaze:

– O katsakta Kaijo humo myhyrizikbarêtsa. Isoho bo mytsaty tsimykaranaha – niaha. Iwaze atuktsa soho bo siwatu mytsaty tsimykaranaha. De. Niwazuba.

Suão

Sudas Sesus tuktsa bo ziwatahaka

Sudas Sesus tukytsa, Tsiaku tsy. Sesus tuktsa hi ziwatahaka, iwaze nisispirikpoko. Sihyrinymyrytsa wasanibara ty nisihrinymyryky ana humo hi – pykyhytutaha sibo batu yh̄y tsimaha – niy. Deus Sudas zia-pepewyky iwatahi Deus harere ziwatahaka. Aba katsa kino niwatihi ana hi tanymyryky.

¹ Uta Sudas. Sesus Kiristu tsumuēh̄tsa. Tsiaku tsy. Ikiahatsa bo piwatahaka. Deus hi zahawatawy. Deus myzo babata. Atahi ahahumo tsimypokzitsiarēta. Sesus Kiristu ahahumo tsimypokzitsiukrēta. Pahapokzitsiki.

² Uta Deus bo ahatsyhyryze mopamykysoko:

– O myzo ahyrytsa humo amypokzitsihukta. Batu paikpa mytsaty mykaranaha. Ahumo sakurētsa. Botu sihumo tsimypokzitsiukrēta. Tysipokzitsitohikta – mykara.

Iwa Deus bo ahatsyhyryze mopamykysoikik.

Deus soho humo mymyspihikbatakanahatsa.

³ Kaharereziuwyttsa mytsaty ikykara:

– Abaka katukytsa bo piwatahaka. Sesus Kiristu tazo bo mymyoktyhyryk. Mymysapybyitsa tsikykaranaha Sesus humo mekywa tu tsimoziknaha, anahi tawatahaka iwatatu batu. Tapara Sesus tahyrinymyrywy ty nimyspirikpoko. Anahyrinymyrywy papeu humo pykyhytu ziwatahaka ana ty hi piwatahakazo. Anaspirikpowy humo ka ja spiriktsokda spiriktsokda byijataha ana humo hi tsimyspirikponaha – mykara.

⁴ Kytsa Sesus humo sispirikpobyitsa ahapapatu izumunaha. Siharere meky watu. Asaktsa:

– Deus isapyha ty mybo nyny my. Iwatatu zeka tsipisapybyikinaha Deus tisapyrēna ty mybo nyny mykara. Mymysapybyitsa tsimykaranaha zeka myhumo ba ziky – mybarapetu mykaranaha. Sesus Kiristu ahapehatsa babata. Sesus Kiristu batu sipehatsa iharere bo batu yh̄y mykaranaha. Siharere meky watu. Deus bo batu yh̄y mykaranaha. Tubabatu Deus sisoho mybo nitsasoko.

– Iske myparawy watsa iwaze kytsa sihumo pimiyikinaha – niy. Siharere humo Deus ispe niy:

– Ikiahatsa batu wasani tsimykaranaha iwaze sinini ykarawy bo pahapehahik – niy.

⁵ O kytsa mytsaty tynakaranahaktsa! Tubabatu Deus Isareu tsekokatsa Esito bara botu nisioktyhyryk. Deus humo sispirikpo byitsahi nisibabaik. Ana humo ka botu ahahyrinymyrētsa, kaokzeka anasoho bo hi mytsatyziu tsimaha zeka wasani tsimaha.

⁶ Wastuhu bijoikpe ezektsa soho bo mytsaty tsimykaranaha! Asahi simysapybyitsa nikaranaha, Deus harere bo batu yh̄y nikaranaha. Iwatahi sinini ykarawy bo nisipehahik. Sinini ykarawy miwa anaeze mynapykyryknaha ba zikziponaha. Sesus Kiristu myziksizoze sinini tohi maha. Anasoho bo mytsatyziu tynakaranahaktsa!

⁷ Iwaze hi Sodoma, Komora eze zikzurukunahatsa iwaze ustsia siututsa pauktsitsa ahatsa ana ezektsa sisoho bo hi mytsatyta. Sihudikhudikwy ezektsa makutsa tu naharapewowohikknaha. Tapara wastuhu bijoikpe iknyktsa iwa ziknakaranahatsa iwatahi Deus sinini ykarawy bo nisipehahik. Anaeze izo zuba eze mynaharakorokonaha tawahi ba zikbe, anaeze

tahawahi sinini mynakaranaha. Anahumo Deus mybo nitsasoko ana soho bo hi mytsatyziu tynakaranahaktsa!

⁸ Asaktsa sispirikpobyitsa ahabo izumunaha. Simysapybyitsa tu mykaranaha. Sitsotuspykrënikitsa watsa iwaze hawa ha ty imysapybara ty mymyhyrinymyrykynaha. Deus humo sispirikpobyitsa asa zuba siakparawy, Deus harere soho pisapybyikinaha. Iharere bo batu ma zikaha. Bijoikpe ezektsa Deus tsumuëhĩtsitsa mysisapybyrikinaha.

⁹ Bijoikpe ezekta Mikeu inarokotakta niwa ahata. Atahi taparakta bijoikpe ezektsa Deus tsumuëhĩtsa. Hyrikoso sapybara pehakatsa Satanas ituk ni-pamykysokoze, ipe niy:

– Aty sa nihyrikosokdata Moises nury nitsahorok – niy. Ana humo kino niharapepehakanahaze Mikeu tihi:

– Utakta ba zabetsak Deus zuba ape my. Abo awatutykta, Deus zuba pabetsak – niy. Hyrikoso sapybara pehakatsa Moises nury humo Mikeu kino batu tyso.

¹⁰ Asahi ahabo zumunaha Deus harere humo sispirikpobyitsa sihyrinymyrybyitsa hi pimykiknaha. Sihyrinymyrybyitsa hi mopyknaha, asaktsa siraratsa watsa taha bo zuba mytsaty mykaranaha.

¹¹ Asaktsa sinini mykaranaha. Simysapybyitsa tu mykaranaha ana humo hi sinini mykaranaha. Niwahi Deus mozihikik.

Asaktsa Kaĩ watsa sizokdirëtsa mozurukunaha ana humo hi sinini mykaranaha.

Asaktsa Barão watsa. Atahi okyrysaro zuba iakparawy iwatsahi imys-apyrënikia siakparawy ana humo pimykiknaha Barão watsa.

Asaktsa Korã watsa Deus harere bo batu ma zikaha Korã watsa maha. Iwatahi Deus sisoho humo:

– Asaktsa batu simysapy mykaranaha – mykara.

¹² Asaktsa sisopyksapybyitsa ikiahatsa tuk mozumunahaze ioktsirörönikia watsa maha. Ikiahatsa ahadisahawy tsipahadisahakanahaze Sesus ahas-apyzeky nihyrikosokda ana bo hi mytsaty tsimykaranaha, asa kino ahatuk ioktsirörönikia watsa maha. Duabohotsa tsik tsipikunahaze Sesus ahas-apyzeky nihyrikosokda ana bo hi mytsaty tsimykaranaha, asaktsa taha bo zuba mytsaty mykaranaha. Sisikpybybyitsa tu asa zuba mytsaty mykaranaha. Ustsahumo batu simypokzitsi.

Asahi bijo zatata watsa. Bijo zatata zuba hyritsik ba ziknawõ. Bijo zatata zopoktsa tuk mopaparakak zekywaha ba zikziksizo.

Iwaze asaktsa hwi watsa iharakawy pomoze ba ziktahara. Hwi haratatsa bobokohotsa watsa tahawahi mokbanaha.

¹³ Asahi pihik ihiridawy watsa. Pihik ihiridawy humo itsiksoroporo nimirazata bo pipaparakke ky waha. Asahi sisikpybybyitsa simysapybyitsa tu mykaranaha kytsa okze tu mynakaranaha.

Asahi byrisoiktsa watsa. Byrisoiktsa nanabyitaba mynaukurunaha. Asa niwatihi paikpa mykaranaha. Asa kino pimykiknaha. Iwaze Deus sinini ykarawy bo mysipehahik. Anaeze miwahaeze zuba tahawahi my-napykyryknaha.

¹⁴⁻¹⁵ Tubabatu Enoke sisoho nitsasoko. Asahi Deus humo sakparawybyitsa soho nitsasoko. Tapara nipupurukuknahaze botu sisoho nitsaso. Atakta Enoke Adão tsekoka. Adão tsekokatsa sizubarëtsa. Adão tsekokatsa sete nipupurukuknaha. Kyze Enoke zinaropykyk. Atakta simysapybyitsa soho nitsasoko. Tapara simysapybyikitsa nipupurukuknahaze sisoho tihi:

– O asahi Deus humo batu siakparawy. Sisikpybybyitsa tu Deus okze ka simysapybyitsa tu mykaranaha. Wasanibyitsa mykaranaha. Isapybara ty

mykaranaha. Deus harere bo batu hỹ zikaha. Iwatahi mypehakatsa bijoikpe ezektsa tatsumuẽhĩtsitsa tuk mozumu. Mypehakatsa sizubarẽtsa tuk mozumunaha. Myzumuze mypehakatsa ihumo simysapybyitsa mykaranaha ispe:

“Ikiahatsa katuk zeky batu ahamysapy” my. Iwa Deus sinini ykarawy bo mysipehahik – Enoke niy. Tubabatu iwa Enoke sisoho nitsasoko.

¹⁶ Asaktsa sisopyksapybyitsa taha humo tu tahakyrikinaha iwatsahi pimiyikiknaha. Taha bo zuba mytsaty mynakaranaha. Utsa kytsa soho humo mysisapybyrikinaha. Asa zuba mopamykysokonaha:

– O katsaktsa mysapyrẽtsa – mybarapetu mykaranaha. Simysapybyitsa tu usts pe maha:

– Ikiahatsa wasani tsimaha – mybarapetu mykaranaha. Iwa mopamykysonahaze usts namy piakse tsihikiknaha. Iwa simysapybyitsa mykaranaha.

Asahi Sesus humo sispirikpoziubyitsa soho pykyhytutahaktsa.

¹⁷⁻¹⁸ Ikiahatsa kaharereziuwytza mytsatyziu tynakaranahaktsa! Nawa ha ty Sesus Kiristu ykzohotsa botu ahabo nitsasokonaha ana bo hi mytsaty tsimykaranaha. Ahape nikaranaha.

– Aibani mybarawy mopykze kytsa ahabo mozumunahaze pahasopykziubyikinaha Deus sakparawybyitsa pahamyijakanaha zuba. Tahahumo zihikaty zuba mynakaranaha ana bo zuba mytsaty mynakaranaha.

¹⁹ Simysapybyitsa Sesus tuktsa metutu tahasapy tsihikiknaha. Sesus tuktsa siharerewabymybararẽtsa moziknaha ana hi mozihikiknaha. Deus hyrikoso situkbyitsa mynapykyryk. Hawa ha mozihikiknaha ana humo hi zuba mynakaranaha.

²⁰ O kaharereziuwytza botu Sesus humo ahaspirikporẽtsa hỹ. Ihumo tyspirikpotohinahaktsa ahamysapyrẽtsa tsimoziknaha. Deus bo typamykysoikiknahaktsa! Deus zikwy humo ibo tupamykysoikiknaha.

²¹ Deus ahahumo tsimypokzitsiarẽta ana humo hi tsikspirikpokonaha. Deus ahahumo tsimypokzitsiukrẽta ana humo hi ahaspirikporẽtsa! Sesus Kiristu tazo bo pahaoktyhyryk. Ahawahi izo tuk tsinapykyryknaha. Ana hi taperyky – my.

²² Wastuhutsa:

– Sesus humo kaspirikporẽta zeka kamysapybyita ikykara zeka piokzohik. Batu kanyhy – maha. Asa bo hi Deus wasania ty tsimytsasoziukunaha.

²³ Utsa simysapybyitsa tysitsumuẽhĩnaha. Aty izo bo mynautsok zeka tyzezonaha. Anawaze simysapybyitsa tysitsumuẽhĩnaha niharakorobaik tawata. Wastuhutsa simysapybyitsa tu nikaranaha batu sisikpyby. Iwatsatu tysisapywykynaha. Sihumo ahamypokzitsirẽtsa. Pykyhytutaha! Hawa nikaranaha batu ahakparawy ba ahasopyk watu ba zikaha! Simysapybyitsa mykaranaha iwatsahi siwabyitsa!

Deus bo tysakibazikiknahaktsa.

²⁴ O Deus zuba abazubata my. Atahi mynamykuwyky iwaze imysapybara ty tsimoewynaha. Sesus tazo bo mymyoktyhyryk iwaze Deus tuk mywahi tsimynapykyknaha. Iwaze wasani tsimaha. Katsaktsa mysapybyitsa tsikykaranaha atahi mymyokzohik ihumo meky watu tsimoziknaha. Mymysapyrẽtsa. Deus tukze mywahi tsimynapykyknaha mykurẽtsa.

²⁵ Katsa ape tsimaha:

– O Deus ikia zuba Deus babata. Batu aty tohi ikia wata, ikia zuba myzo babata. Ikia Sesus Kiristu tsipeha atahi abo mymyoktyhyryk. Ihumo myspirikporẽtsa iwaze ikia bo mymyoktyhyryk.

O ikia zuba wasanita. Ikia tsamysapyrēnikita. Azikwykyta ba hawa tohi zasukninaha.

O ikia zuba myhyrinomyrytsa babata. Ikia apunihikrēnikita. Aharere eze tu mybarawy tsikzukni nanabyitaba aharere. Tapara mybarawy tsikzuknize bjoikpe ezektsa atsumuēhītsitsa iwa nitsasokonaha abaka katsaktsa situk asoho humo tsimysakibazikiknaha. Mywahi atuk tsimynapykyryknaha iwa tsimykaranaha – tsimaha.

Iwa my hỹ. De. Niwazuba.

Sudas

Deus mytsotyspykwaha Suão bo nitsaso

Suão Sesus zinymyrykyta nitsaikbata, sakyriukrēnikitsa hurukwy eze niapykyryk. Itsikzikdihi Patamos inarokota anaeze niapykyryk. Deus aiba eze hawa mynakara Suão bo ziwatawy. Iwaze ana zinyze hi ziwatahaka. Deus Suão ziapewywy iwatsahi katsa kino niwatihi tanymyryky.

¹ Hawa ha ty Deus Sesus Kiristu bo nitsaso. Aibani hawa maha humo kino Sesus Kiristu bo nitsaso. Tapara mybarawy ezektsa batu siwabyhy. Iwaze hi Sesus Kiristu ana harere humo hi tatsumuēhītsa pe niy. Iwaze bijoikpe iknykta Deus tsumuēhītsa, Suão bo izipeha, atahi iharere ibo nitsasoko. Bijoikpe iknykta Deus tsumuēhītsa Suão bo itsotyspykwaha ziny.

² Nanabyi zinyky, nanabyi ziwabyky anahi papeu humo Suão ziwatahaka.
– Sesus nikaranaha ty ana hi Deus harere baba – niy.

³ – Atakta papeu iwatahaha ty myzubaha bo opykani motsasoko tsakurēta hỹ. Asaktsa ipapeu iwatahaha ty piwabynahaze sakurētsa hỹ. Ataharere bo hỹ maha zeka sakurētsa. Aiba eze zuba iwatahaha atsawatu my. Iwa – niy.

Sesus tuktsa mynauzuzukbanahaze Deus harere piwabynaha sibo Deus soho piwatahaka.

⁴ Utakta Suão. Asia ezektsa sete sihudikhudikwy bo piwatahaka. Sesus tuktsa mynauzuzukbanahaze iharere piwabynaha ahabo piwatahaka. Ahatsyhyryze Deus bo ikpamykysokoze ipe icy:

– O Deus myzo ikia koikny baktatu aibani zuba tsimyziksizo ahyrytsa bo. Tysipokzitsiziuku iwatsahi batu paikpa mytsaty mykaranaha ahumo sispirikporētsa moziknaha. Sete hyrikosotsa niwatihi Deus dyhywy iokeryk maha ikiahatsa niwatihi astsatu Deus hyrytsa bo tsimahaktsa! – my. Iwa my.

⁵ Sesus Kiristu niwatihi! Atahi pahapokzitsiziuku, ihumo ahaspirikporētsa tsimoziknaha. Atakta wasani zinybata tu ana kino motsasoko. Atahi tapara inahyryzikpota atatuzo, ba zikyrikosokdazo. Atahi abazubata. Usts pehakatsa iharere bo zuba hỹ mykaranaha.

Atahi myhumo tsimypokzitsiukrēta. Atahi mysapyzekenihyrikosokda, mysapyzekenitaspubaba zipuku. Ihyrikosokdawy humo mysapybyriwy Deus nimyokzohik nispiriktsokda abaka mysapyrētsa tsimoziknaha iwaze isapybara ty ka abaka awatutaha.

⁶ Kiristu hi:

– Ikiahatsaktsa Deus kazo tsipitsumuēhīnaha, asa watsa Deus wahoro zubata eze ziknapamykysonahatsa. Ikiahatsa Deus tyryktsa tsimaha iwatahi pahapehaka hỹ, ikiahatsa ituk tsipitsumuēhīnaha – niy. Iwatsahi Sesus Kiristu pe:

– O Sesus Kiristu ikia azo bo tsimymyoktyhyk ikia zuba myhyryzikwani ba hawa tohi zasukninaha, ikia zuba tsamysapyrēta awahi tsimynakara – tsimaha. Siwatahaktsa kytsa!

⁷ Tsimykozona! Sesus bijoikpe satata ikny mynasik. Myzubaha pinyaha. Ibezetsitsa kino niwatihi ibo mokozoneha. Myzubaha ibo mokozonehaze sisukatsihikrētsa mopuziukunaha. Iwa.

⁸ Sesus ipe niy:

– Utakta koikny baktatu. Utahi nanabyi ikzukniki ba hawa tohi zikusukninaha. Nanabyi isuknihibabyize kino niwata tu. Aiba mybarawy mopykze kino nawa tatu myziksizo – niy. Iwa hỹ.

Suão tatsotospykwaha eze Sesus ziny.

⁹ Kyze uta Suão. Ikiyahatsa Sesus humo ahaspirikporêtsa iwatahi utakta ahaziky my. Ahatukta my ikiahatsa watsa hawa Sesus mynazihikik-naha humo zuba hyĩ mynakara. Ahawata sinini mynakara ana humo kino kapunihikrêta ikyzik, Sesus abazubatsa mysipehaze uta niwatihi ituk mysipeha. Ipokzitsiwy humo kytsa piksukyrykynaha. Iwatsahi uta tsikzikdihî Paratôs inarokota bo zikoktyhyryknaha. Kytsa Sesus harere bo hyĩ zikahabyitsa hi zikoktyhyryknaha. Sesus harere iktsasoko naha humo hi zikoktyhyryknaha. Deus harere wasaniha iktsasokonaha humo hi ziksukyrykynaha.

¹⁰ Domiko eze Sesus inahyrizikpo mytsaty tsimykarannahaze Deus hyrikoso katuk mynapykyk. Deus hyrikoso katuk mopykyrykta tu ihumo hi tisopykzi-urêta ziwabyky. Iaksoho opykaniha kasukpe baze iwaby porawy suka waha my iwaby.

¹¹ Iaksoho kape nikara:

– Hawa ha bo tsimykozo naha bo papeu humo tsipiwatahaka. Ana papeu ty Sesus tuktsa bo tyziskarenaha, asaktsa Asia ezektsa bo my. Sesus tuktsa inazuzukbanahaze Deus harere piwabynaha papeu iwatahaha ty sibo hi nyny tsimy. Asaktsa Sesus tuktsa Epeso ezektsa bo, Esmirina ezektsa bo. Perekamo ezektsa bo, Tiatira ezektsa bo, Saradis ezektsa bo, Piradepija ezektsa bo, Raodisija ezektsa bo iwatsa bo Asia sete tapapeu iwatahaha ty sibo tyziskarenaha – iaksoho niy.

¹² Kyze kasukpe bo iktsa iky, aty ja kape niy tawy iktsa iky. Iwaze sete rika wakatsa bo iktsa iky. Rikatsa suk ouro niy.

¹³ Sitazahara eze maku wata niriktohoko. Tisukzezerêta ipyrysukpetsa buruk niy. Izikwoekaĩwy wata ouro ty hi. Tapaopuke buruk haĩ niy.

¹⁴ Tsiharadibarazarêta mazori hyrity waha. Nebe waha. Ihyriziktsa eze izo inapok naha iwaze niapykyryk.

¹⁵ Ipyrytsa simiokbyitsa barõse niy tapara izo bo pioktsoknahaze tsikakarêta ky wa. Iaksoho iheridawy ykpyri waha.

¹⁶ Tapanuryk taba tatsipyk eze sete byrisoiktsa nisibykyk. Sokorotsapu wata isake buruk izoik niy. Petok zohota. Iok humo haramwe tokbaha niyzik tawa niukuru.

¹⁷ Ibo ikozoze, iokeryk iknaraha, ikumuza tawata ikyzik. Iwaze tapanuryk taba tatsyhyrype ty kahumo paik niytahi:

– Apyby byihu ja! Utakta koikny baktatu my. Nanabyi isuknihibabyize nawa tatu. Kawahi nawa tatu.

¹⁸ Tapara ikumuzaspyk abaka kawahi hawa tohi kasuknihukbyita my-napykyryk. Mybarawy ezektsa mohyrikosokdanahaze kahumo isapyha eze mopykyryknaha, isapy ykarawy bo maha, kahumo ahabo mysipehaka.

¹⁹ Iwaze amy tsipinyaha ana hi tsiwatahakta! Kyze hawaha abo motsaso. Tsizubarêna abo piwatawy ana hi tsiwatahakta!

²⁰ Hawa ha ty tsihokdaharêna zeka abo motsasoziuku. Kapanuryktabat-saktsa sete byrisoiktsa maha. Sete rikatsa, Sesus tuktsa watsa maha. Ana bo hi iktsa tsikyze hawa ha ty tsihokdaharêna zeka abo piwatawy. Ana humo kino pahyrinymyry. Rikatsa Sesus tuktsa watsa maha. Asaktsa siuzuzukwy waha kaharere piwabynaha asahi sete hudikhudikwytsa Asia eze tu maha. Byrisoiktsa sete bijoikpe iknyktsa Deus tsumuêhĩtsa watsa maha. Asaktsa Sesus tuktsa nisipokzitsiziukunaha – niy. Iwa atakta kasukpe baze ni-pamykysoko atahi Sesus nikara. Kabo nitsasoko hỹ.

2

Deus soho Sesus tuktsa bo asaktsa Epeso eze mynakykpykynaha.

¹ Sesus hi:

– Uta tsiwataha Sesus tuktsa Epeso ezektsa myspirikpokotsa bo tsimy. Ipe tsimy:

“Uta hi Sesus byrisoiktsa ty kapanuryk taba sete ahatsa ty paik ikykarata”. Sete rikatsa suk tazahara buruk pitabaka. Rikatsa suk eze ouro ty suknihitsa.

² Utakta kapehawy ipe my:

“Utakta ahanyba hỹ. Hawa tarabajaziu tsikykaranaha humo botu ik-tsa iky. Hawa tsimyzurukunaha humo ana kino ahanyba. Kahumo sinini tsikykaranahaze ahapunihihrẽtsa tsikyziknaha. Kytsa simysapybyitsa nikaranaha batu ahakparawy. Asaktsa ahabo zumunahaze tihi katsaktsa Deus wasaniha makzohotsa zispihikbatakanaha. Simyspihikbatanikitsa soho ikiahatsa sakzohotsa ja tsikaha. Siharere humo batu ahaspirikpo asaktsa zahaspihikbatakanahatsa iwatsahi ahamytsatyhaĩrẽtsa.

³ Kytsa kaharere bo yhỹ ahabyitsa mykaranaha sispirikpobyitsa tu pahasyrykynahaze ikiahatsa ahakubyrisorokrẽtsa ziknakaranaha. Sihumo batu ahasukatsihik kahumo sinini tsikykaranaha.

⁴ Iwa tsikykaranaha. Iwatsa tu kahumo tsikaeni zuba ahamypokzitsi anasoho humo mopamykysoko. Tapara kahumo tsimyspirikponahaze kahumo ahamypokzitsirẽtsa. Abaka batu kapokzi tsikaeni zuba ahamypokzitsi. Batu wasani zikaha.

⁵ Hawa ahasopyk mytsatytaha! Hawa tsipiksapybyrikinaha awatutaha! Hawa tapara kahumo tsikykaranaha atsawatuzoktaha! Ahasopyk ty ty-moewy byizeka ahabo mozumuze aharika isapyrẽnikia piakse. Utsa rika ahasapyekze piakse. Ikiahatsa kasohotsitsabyitsa tsimoziknaha, utsa kytsa mysiwatawy asaktsa kasohotsitsa moziknaha ahasapyekze piaksenaha.

⁶ Ikiahatsa Nikorai harere batu ahakparawy uta niwatihi iharere batu kakparawy. Asaktsa Nikorai tuktsa hawa ty mykaranaha batu ahakparawy tsimaha, uta niwatihi hawa ty mykaranaha batu kakparawy.

⁷ Aty Deus hyrikoso harere piwaby tsihikik zeka atakta piwabytokto. Hawa ha ty Deus hyrikoso Sesus tuktsa bo maha piwabytoktonaha! Asaktsa kaharere bo hyỹ mynakaranaha. Kahyrikoso humo sipunihihrẽtsa moziknaha wihara ty sibo nyny my. Hwi Deus ziparikik tasapy eze tu tawahi ba iharaparahun. Ana wihara humo, Deus tuk tsimynapykyryknaha. Aty wihara pezuk zeka ba zikara. Anawahi katuk ahawahi tsimynapykyryknaha isapyrẽnikia ty ahabo nyny my” – niy. Atakta kasukpe baze niy atahi:

– Kaharere tsiwataha – kape niy.

Iwa kapehawy Epeso ezektsa myspirikpokotsa bo my niy.

Deus soho Sesus tuktsa bo asaktsa Esmirina eze mynakykpykynaha.

⁸ Sesus hi:

– Uta kasoho tsiwataha Sesus tuktsa Esmirina ezektsa myspirikpokotsa bo tsimy. Uta kasoho sibo uzuzukukwy eze kaharere piwabykynaha, myspirikpokotsa ipe tsimy:

“Utakta taparakta koikny bakta tu my. Nanabyi isuknihibabyize nawa tatu my. Bykyze mybarawy mopykze nawa tatu my. Uta zikbesespyknaha abaka kawahi kaspitu mynapykyryk. Ahabo kasoho ty my.

⁹ Ahasoho inyba hỹ. Hawa sinini tsikykaranaha ana humo hi kahyrinymyrẽta. Ahanamybyitsa tsimaha, kaokze kahanamyrẽtsa tsimaha, wasani tsimaha iwatahi isapyrẽnikia ty ahabo nyny mykara. Asaktsa ahape katsaktsa Sudeutsa tsimaha mybarapetu mykaranaha Kiristu humo

siharerewabymybarêtsa, ahahumo kino niwatihî siharerewabymybarêtsa maha. Satanas harere bo zuba yhỹ mynakaranaha. Kiristu harere bo batu yhỹ zikaha.

¹⁰ Sinini tsimaha zeka ahapybybyihu ja! Hyrikoso sapybara pehakatsa Satanas sakyriukrênikitsa hurukwy bo pahaoktyhyryk iwa my zeka amy ty sa batu mysapy tsimaha ana hi mozihikik. Sinini tsimaha. Iwatsa tu ahatuktsa mysibanaha zeka kaharere bo hỹ tsimykaranaha iwatsahi tsimyspirikpotohinaha! Utakta isapyrênikia ty ahabo nyny my ihuak ty my. Ahawahi katuk tsimynapykyryknaha. Iwa kasoho Esmirina ezektsa myspirikpokotsa bo my” – niy.

¹¹ Aty Deus hyrikoso harere piwaby tsihikik zeka atakta piwabytokto. Hawa ha ty Deus hyrikoso Sesus tuktsa bo maha tsiwabytoktonaha! Asaktsa kaharere bo hỹ mynakaranaha mokbabanahaze ba iwatsatu mynahyryzikponaha iwazeka ba zikhyrykosokdanaha. Kytsa abazubatsa mokbabanahaze asahi inahyryzikpo nawa tsatu katuk mynapykyryk.

Atakta kasukpe baze niy, atahi – kaharere tsiwataha – iwa Sesus kape niy.

Deus soho Sesus tuktsa bo asaktsa Perekamo eze mynakykyryknaha.

¹² Sesus hi:

– Kasoho tsiwataha Perekamo ezektsa bo asaktsa uzuzukukwy eze kaharere piwabynaha. Myspirikpotsa pe tsimy:

“Utakta sokorotsapu isake buruk myzoikeze tawata. Petok zohota. Utakta kasoho ty ahape my.

¹³ Haneze tsimypykyryknaha anaeze kahyrynymyrêta. Ahaotuktsa pauktsitsa Satanas tyryktsa maha iharere bo yhỹ mykaranaha. Ikiyahatsaktsa kaharere bo zuba hỹ tsimykaranaha. Siakyriukrênikitsa Satanas harere bo yhỹ nikaranaha asaktsa Âtipas zibeze atahi kasoho nitsasoko. Iwatsa tu zibezenahaze ahahudikhudikwy eze ikiahatsa kahumo ahaspirikporêtsa.

¹⁴ Wastuhu ahatuk Barão spirikpowy humo yhỹ maha. Iwatahi kaokze ka ikiahatsa batu ahamysapy tsimaha. Ahasoho humo pahabetsak. Barão imysapybara ty Barak zispirikpo. Iharere humo Isareu tsekokatsa ziknamysapybyikinaha. Ispe niy:

‘Sizoho ty deusbyita bo nyny niaha iwaze tsipiboronaha zeka wasani my. Utsa okeza tsimysihuanaha zeka wasani my. Utsa kytsa bo tsimysimynaha zeka wasani my’ niy. Ana harere humo Isareu ezektsa nisimiywy ihumo batu imysapy nikaranaha.

¹⁵ Utsa ahatuk kino Nikorai harere bo yhỹ mykaranaha.

¹⁶ Imysapybara ty ka tymoewytaha! Ahamsapybyri ty arek ahabyi zeka ahabo mozumuze pahazuwy. Kasokorotsapu zeze kasake buruk ta humo pahasininiwy. Iwa kasoho Perekamo ezektsa myspirikpokotsa bo my” – niy.

¹⁷ Aty Deus hyrikoso harere piwaby tsihikik zeka tsiwabytoktokta! Deus hyrikoso iwa h̃ ahaspioekeke zeka wabytaha. Sesus tuktsa uzuzukwy myspirikpokotsa pe niy.

Asaktsa kaharere bo hỹ mynakaranaha sibo atsikara ty bjoikpe iknykyty nyny my. Atsikara bo ba zik kozonaha ana hi sidisahawy mozik. Haraharezatatsa ty estuba estubaha zuba nyny my. Haraharezata humo inaro ezytyk piwatahaka. Batu aty tohi inaro pinymyryky. Ata zuba haraharezata ty ibo nyny my atahi tanaro pinymyry.

Atakta kasukpe baze niy, atahi – kaharere tsiwataha – iwa Sesus kape niy.

Deus soho Sesus tuktsa bo asaktsa Tiatira eze mynakykyryknaha.

¹⁸ Sesus hi:

– Kasoho tsiwataha Tiatira ezektsa bo asaktsa uzuzukukwy eze kaharere piwabynaha. Myspirikpotsa pe tsimy:

“Utakta Deus tse babata. Kahyriziktsa izo watsa. Kapyrytsa simiokbyitsa watsa tapara izo bo pioktsoknahaze tsikakarēta ky wa. Utakta hi kasoho ahape my.

¹⁹ Ahasoho humo botu ahanyba. Wasani tsimykaranaha. Kaharere humo tsimyspirikpokonaha. Hawa ustsā humo tarabajaziu tsimykaranaha, tyn-asitsumuēhēkiknaha tyharape pokzitsikinaha ana kino iny. Kahumo sinini tsikykaranaha. Abaka amy ty wasani my puētsik tsimykaranaha.

²⁰ Iwatsa tu aba estuba ahatuk imoewyhybara. Ana humo hi mopamykysoko. Sesebeu hi mykara:

‘Ikza Deus harere motsasoko. Ustatsa tsipipyryryk zeka wasani my. Ustsā kytsa tsimysimiwy zeka wasani my. Deusbyitsa izoho ahabo nyny myze tsipiboro zeka wasani my’ iwa motsasoko. Imyspihikbatanikitatsa tu mybarapetu mykara. Atatsa harere humo katsumuēhētsa nymyikinaha iwatsahi simysapybyitsa mykaranaha. Ikiatsa ja. Atatsa humo batu tsinaha ahaokze ka atatsa harere wasani my iwatsahi ikiatsa atatsa pe ‘Nabo pāoty’ batuha.

²¹ Atatsa humo kakubyrisorokrēta. Tozeka ja imysapybyitatsa mynakara zeka pimoevy iky. Iwatatsa tu tamysapybyrity batu tymoevy.

²² Iwatahi atatsa wanu sinini ykarawy bo mopapykik. Anaenze sinini mykara ituktsa kino niwatihi sinini mykaranaha. Simysapybyitsa arek ahabyi zeka mysininiwy” – my.

²³ Asaktsa iharere siakparawy asahi:

– O atatsa mysipirikipowy wasani my, atatsa harere bo yh̄y tsimaha maha. Asaktsa mysipykik. Kyze kytsa Sesus harere siakparawy mybarawy ezektsa hawa mytsaty mykaranaha Deus pinyba ana humo hi sihyrinymyrētsa. Mybarawy ezektsa hawa myzehikiknaha Deus pinyba ana humo kino sihyrinymyrētsa. Hawa kytsa mozurukunaha mybarawy eze tuze Deus mywatu myhuak ty nyny my.

²⁴ Ustsā Tiatira ezektsa atatsa mysipirikipowy humo batu h̄y zikaha. Atatsa hi kytsa mysimiwyky. Satanas harere baba hi myzihik niy. Iwaze kasoho ahabo meky watu, iwaze amy ty botu iksaso yh̄y tsimaha.

²⁵ Kahumo tsimyziperykynahaze amy botu kasoho humo tsinymyrynaha ana humo kino tsimahaktsa! Ahabo myziksizo naha tsipiperykynaha kaharere bo zuba h̄y tsimykaranaha.

²⁶⁻²⁸ Tapara kazo kape niy:

“Ikia abazubatsa kytsa tysiperykykta tysipokzitsiuziukukta. Aparakbaha nanabyitaba pehatsa tsimozik” niy. Anaharere katuktsa bo my. Asahi simyharerewabybarētsa sispirikpobyitsa tu siharere bo yh̄y maha. Katuktsa mysiperykynahatsa kino niwatihi. Asaktsa kaharere humo batu h̄y maha hawa katsa morosuk natokze tawata asahi siharere bo h̄y maha. Ma zik ahabyizeka Deus mysitotokbaikze ky wa. Deus harere bo yh̄y maha mysipehanaha. Iwa ispe my katukytsa.

Asaktsa kahumo piperykynahaze katsyhyryze pitsumuēhēkiknaha, kaharere humo zuba h̄y mynakaranaha. Byrisoik ty mynakyukze tawata sibo nyny my. Uta Kiristu byrisoik wata my. Sibo kaharere bo h̄y mynakaranaha niy. Iwa kasoho Tiatira ezektsa mysipirikipokotsa pe my – niy.

²⁹ Aty Deus hyrikoso harere piwabyy tsihikik zeka tsipiwabytoktota. Deus hyrikoso iwa h̄y ahaspiokeketsa zeka katuktsa uzuzukwy mysipirikipokotsa pe niy wabytoktotaha!

Atakta kasukpe baze niy atahi – kaharere tsiwataha – iwa Sesus kape niy.

3

Deus soho Sesus tuktsa bo asaktsa Saradis eze mynakykpykynaha.

¹ Sesus hi:

– Kasoho tsiwataha Sesus tuktsa Saradis ezektsa myspirikpokotsa bo tsimy. Kasoho sibo uzuzukukwy kaharere piwabynaha. Myspirikpotsa pe:

“Utakta Deus hyrikosotsa sete ahatsa. Byrisoiktsa ty kino sete ahatsa niwatihi my. Kasoho ahabo my. Ahasoho iwaby hỹ. Hawa tsimykaranaha anasoho iwaby. Utsa kytsa ahasoho humo ‘O Saradis ezektsa Sesus harere bo hỹ mykaranaha iwatsahi ihumo sispirikporẽtsa hỹ’ maha. Anaka wasapehabara, kahumo ahaspirikpobyitsa tu kahyrinymyrẽta hỹ.

² Popotahaktsa! Tsinymyry naha humo kino pykyhytutaha. Kaharere humo asiba tsikspiriktsokdahanaha ana bo hi mytsatyzotahaktsa! Tsimyzurukunaha Deus okzeka batu wasani tsimaha, ihumo batu ahapokzitsi ana kino iwaby.

³ Hawa ha tsinymyrykynaha ana humo hi mytsatytahaktsa! Deus wasaniha tsiwabynahaze ahakurẽtsa. Abaka ana harere humo wabyziutaha. Ahamysapybyitsa tsikykaranaha zeka tsimoewynahaktsa! Popo ahabyizeka ahabo itsyhyryboarẽnikita mozumuze tawata. Ity pery habyitsa ty ahabo mozumu. Itsyhyryboarẽnikita kytsa papatu mozumuze tawata. Mozumu naha humo batu ahahyrinymyry.

⁴ Wastuhu ahatuk Saradis eze tu simysapyrẽtsa. Kazikwy humo mekywa tu moziknaha. Satanas harere bo batu yhỹ niaha. Asahi kytsa watsa tahasuk ezytyk ty korobyk ahatsa watsa. Asaktsa katuk mynapykyryknaha, sisukbarazarẽtsa ezytyk katuk mynapykyryknaha. Deus okze ka ‘ikiahatsa ahamysapyrẽtsa tsimaha.’ Iwa katuk tahawahi mynapykyryknaha my. Simysapyrẽtsa Deus hyrikoso humo.

⁵ Iwaze asaktsa kaharere bo hỹ mynakaranaha sisukbarazarẽtsa ezytyk watsa maha. Asaktsa mekywa tu moziknaha Deus hyrikoso humo, iwatsahi ustsya kytsa bo batu ziksیمیwynaha ana humo hi kytsa sisukbarazarẽtsa ezytyk watsa maha. Sinaro Deus papeu humo ziwataha ba zikokza. Ana papeu kytsa sizubarẽtsa asaktsa Deus tuk tahawahi mynapykyryknaha sinaro ziwataha. Kyze kazo bijoikpe iknyktsa sitsumuẽhĩtsitsa niwatihi ispe my: ‘Iktsa tsimahaktsa! Asaktsa kahyrytsa maha’ my. Iwa kasoho Saradis ezektsa myspirikpokotsa pe tsimy” – niy.

⁶ Aty Deus hyrikoso harere piwabytsihikik zeka atakta tsiwabytoktokta. Deus hyrikoso iwa hỹ ahaspioekeke zeka wabytaha Sesus tuktsa uzuzukwy myspirikpokotsa pe niy!

Atakta kasukpe baze niy atahi – Kaharere tsiwataha – iwa Sesus kape niy.

Deus soho Sesus tuktsa bo asaktsa Piradepija eze mynakykpykynaha.

⁷ Sesus hi:

– Kasoho tsiwataha katuktsa Piradepija ezektsa mysopyktsa bo tsimy. Kasoho sibo uzuzukukwy eze kaharere piwabynaha. Myspirikpotsa pe:

“Utakta Kiristu imysapyrẽnikita. Deus zipehata babata my, katsipykeze tu hokbowy hyrizik pyryrykwy my, ata hi mydiri Dawi zikziperykyta. Hokbowy ty zoksapare my zeka ba aty tohi hokbo ziky. Hokbowy ty my zeka ba aty tohi zoksapare ziky. Uta zuba my. Kasoho ty ahape my.

⁸ Ahasoho iwaby hỹ. Hawa tsimykaranaha iwaby. Ahapunihikrẽtsa tsikaeni zuba kaharere humo hỹ tsimykaranaha. Kasoho humo ba kaharere warihuk. Abaka uta hokbowy ty ahaokeryk zoksapare my pany tynapupunaha! Uta zuba hokbowy ty zoksapare, ba aty tohi hokbo zihokbo.

⁹ Wabytaha! Asaktsa Satanas hyrikoso sapybara pehakatsa. Asa hi: ‘Katsaktsa Sudeutsa’ maha. Mymyspihikbatakanaha. Wastuhu situk ahabo mozumunahaze ahape: ‘Ikiahatsa wasani’ maha. Tsimyzumubanhaze asaktsa niwatihi Deus harere piwabynaha. Asa hi: ‘Sesus ahahumo tsimy-pokzitsiukrēta’ maha.

¹⁰ Tapara ahape iky ‘Kytsa myzahamyijakanahaze kahumo ahakubyrisorokrētsa’ iky. Sinini tsikykarannahaze ahahakubyrisorokrētsa tsikykarannaha. Kaharere bo hyĩ tsimykarannaha. Aiba nanabyitaba mybarawy ezektsa bo mysininiwynahaze iwa mysiakpynaha ikiahatsaktsa ba. Kazikwy humo kytsa ahahumo batu zikaha.

¹¹ Atsoko ahabo myziksizo. Kaharere bo hyĩ tsimykarannaha zeka iwaze kahumo ahaspirikporētsa ahahuak ty nyny my. Ana humo hi pykyhytutaha iwaze ahahuak usts ba ziaksenaha. Kahumo tsimyspirikpotohinaha!

¹² Kaharere humo hyĩ mynakanahatsaktsa sipunihikrētsa moziknaha. Asahi iharakurukwy wata atahi Deus wahoro zubata ezekta. Ataharakurukwy hi tawahi mynapykyryk. Iwata asaktsa Sesus humo sispirikporētsa Deus tuk tahawahi mynapykyryknaha. Ba hawa tohi zikaha. Deus naro sihumo piwataha, Deus hudikhudikwy tanaro kino sihumo piwataha. Ihudikhudikwy Serusarēhe ezytyk, tahudikhudikwy Deus bijoikpe ikny mynazepik. Iwaze kanaro ezytyk sihumo piwataha. Iwa kasoho Piradepija ezektsa myspirikpokotsa pe tsimy” – niy.

¹³ Aty Deus hyrikoso harere piwaby tsihikik zeka tsipiwabytoktokta. Deus hyrikoso iwa hĩ ahaspiokeketsa zeka uzuzukukwy perytsitsa pe niy katuktsa bo wabytoktonaha!

Atakta kasukpe baze niy atahi – Kaharere tsiwataha – iwa Sesus kape niy.

Deus soho Sesus tuktsa bo asaktsa Raodisija eze mynakykpykyknaha.

¹⁴ Sesus hi:

– Kasoho tsiwataha katuktsa Raodisija ezektsa myspirikpokotsa bo tsimy. Kasoho sibo uzuzukukwy eze kaharere piwabynaha. Myspirikpotsa pe tsimy:

“Uta kamysapyrēta. Amy motsasoko naha atsa tyty mykara. Kahyrizikporēnikita. Deus nanabyi zuknihybyize uta kino nawa tatu my. Uta Deus tuk mybarawy ikzukni. Kasoho ahape my.

¹⁵⁻¹⁶ Ahasoho iwaby hĩ. Hawa tsinakanannaha iwaby.

Hawa tsimyzurukunaha humo kahyrinymyrēta. Ikiahatsa pihik itsikzoha barawaha tsimaha. Ikiahatsa pihik itsikwarik barawaha watsa tsimaha zeka wasani. Ikiahatsa kahumo batu ahamypokzitsi, kahumo tsikaeni zuba ahakparawy. Kahumo tsipikpokzitsikinaha mozihikik. Ikiahatsa kahumo ahakparawy byizeka anahi jokboha pihik itsikwarika waha. Ikiahatsa kahumo ahakparawy tsikaeni zuba batu imysapy my, iwatahi pihik dē zuba maha wa tsimaha. Iwatahi kapyspykrēta asiba ikzizohok iwa ahabo mytsaty mykara.

¹⁷ Ikiahatsa ahape tu tsimynakanannaha:

‘O katsaktsa mynamyrētsa. Ba amy tohi zikzihikiknaha’ mytsaty ahabyitsa. Kaokzeka ahapokzitsibyitsa watsa. Ahanamyrētsa ja tsimynakanannaha ahanamybyikitsa watsa tsimaha. Tsihyrizikubyitsa watsa. Ahasukbyitsa watsa tsimaha.

¹⁸ Kaharere bo wabyziutaha! Kaouro baba botu izo bo iwezokonahawa tsipiaksenaha. Iwa tsimaha zeka ahanamyrētsa watsa tsimoziknaha. Ahasukbarazarētsa kabo tsimyzapykynaha zeka iwaze batu ahasikpyby.

Ahahyризиктса sowy kabo tsimyzapykynaha zeka iwaze iktsa tsimaha. Kaharere bo hyŷ tsimaha zeka iwaze ahamysapyrētsa tsimoziknaha. Kahumo ahaspirikporētsa babatsa hi iwatsahi sinamyrētsa watsa tsimoziknaha. Ahakurētsa tsimaha.

¹⁹ Asa humo kamypokzitsiarēta, amy humo imysapybara humo maha zeka mysibetsakak. Mysizuspyk iwatsahi amy ty wasani mykaranaha. Iwatsahi batu ahanyi, ahamysapybyity tsimykaranaha zeka tsmoewynaha!

²⁰ Kaharere bo wabytoktotaha! Hawa mytsaty tsimykaranaha kahumo meky watu tsimoziknaha. Ikiahatsa wahoro hyrity watsa, uta hokbowy humo toto mynakaraze. Aty kaksoho piwaby zeka hokbowy ty zoksapare my zeka iwahoro bo mytsuk. Anaeze mynapykyryk ituk pikdisaha. Ata kino katuk tadisaha. Iwa tsimyzurukunaha zeka ikiahatsa kawatsa tsimoziknaha iwatsahi iwa tynakaranahaktsa.

²¹ Asa kaharere bo hyŷ mynakaranahatsaktsa ispe my: ‘Panytynaha! Kabaze dyhytyny!’ my. Siwatsa utakta Deus kazo harere bo hyŷ ikykara iwatahi ‘Pany! Kabaze dyhyty! katukytsa mysipehaka’ kape niy. Abaka kazo dyhywy bete mynapykyryk kytsa mysipehaka hŷ. Iwa kasoho Raodisija eze ktsa myspirikpokotsa pe tsimy” – niy.

²² Aty Deus hyrikoso piwaby tsihikik zeka atakta tsiwabytoktokta! Deus hyrikoso iwa hŷ ahaspioekeke zeka wabytaha Sesus tuktsa uzuzukukwy myspirikpokotsa pe niy!

Atakta kasukpe baze niy, atahi – kaharere tsiwataha – iwa Sesus kape niy.

4

Deus hudikhudikwy bjoikpe eze sizubarētsa Deus bo mosakibazikiknaha ana hi iny.

¹ Kyze katsotyspykwaha eze hokbowy iny. Hokbowy bjoikpe eze zoksapare ahata iny. Berekze suka wata botu iwaby ata hi iwabyzo. Kape niyzo. Atahi kape nikara:

– Pany, pakutyny! Hawa maha humo pahyrinymyry – niy.

² Atsoko Deus hyrikoso zikykse iwaze bjoikpe bo iktsa iky. Anaeze bjoikpe eze idyhywy tisapyrēta bo iktsa iky. Aty idyhywy bete nidyhyky tabo iktsa iky.

³ Atahi iok haramwe jekyrikoso harahareziktsa sipokzitsiarētsa watsa, tsikarikpukarikpukrētsa. Idyhywy haraputaba tsokma natazikto tsikakarēta anahi harahareziktsa esmerarada wata.

⁴ Idyhywy kytsa mysipehaka nahaeze ky tisapyrēna harape baze ustsida sidyhydyhywytsa. Wīte kwatero sidyhywytsa niaha. Tapara taypykyryknahatsa simyharerewabyrētsa asa hi sibete nidyhydyhykynaha. Sisukbarazarētsa. Ouro ty sitsorikihitsa.

⁵ Idyhywy ikny hyrikosotsa bo iktsa iky. Ikaripukaripu bo iktsa iky. Siaksoho mytotoko nahaze ky wa nikaranaha. Idyhywy baze sete rikatsa napokoknaha. Asahi Deus hyrikosotsa sete maha.

⁶ Idyhywy okeryk zarape waha moknywy bo iktsa tsimykarannahaze ky wa ana waha bo ikozo, iharaharezik kiristau wata.

Kyze idyhywy okeryk nanabyitaba siraratsa sispitutsa maha. Sihorokykyktsa babatsa. Sihyризиктсаzubarētsa, sinury wa tu sihyризиктса. Iharaze isukpe baze iwa.

⁷ Estubaka irara parini wata. Usta irara pikuza wata. Usta irara makuok wata. Usta irara wohorek hyritywata nitsatsaka tawata niy.

⁸ Sizubarētsa sisarapaikitsa niaha. Usta tsyhyry humo ziakyri naha wa sisarapaikitsa niaha. Estuba estuba zuba ses sisarapaikitsa niaha. Nataba

harakykbyi isarapaik, usta tabaha harakykbyihi isarapaik iwa hỹ. Sisarapaiktsa eze ihyriziktsa sizubarẽtsa, nanabyitaba sihyriziktsa, sisarapaikitsa upukezi sihyriziktsa niaha sisarapaiksupetaba hyriziktsa kino niwatihi sihyriziktsa niaha. Siraratsa sispitutsa nisakibazikiknaha pyk ahabyitsa nikaranaha. Okoroze, unata aha eze nisakibazikiknaha. Asa hi nikaranaha:

– O Deus ikia tsamypokzitsiukrẽta
ikiakta azikwyrẽnikita

ba hawa tohi zikasukninaha.

Tsamysapyrẽta. Asopykziurẽnikita. Nanabyi zuknihyize ikia tu.

Aba kino niwatihi ikia tu nikaranaha.

Tsimyziksizo hỹ

iwa nisakibazikiknaha.

⁹ – Ikia zuba tsamysapyrẽta tsinakara. Ikia zuba wasani tsimynakara. Ikia zuba ahyrizikporẽnikita tsinamypokzitsiki asopyksapyrẽnikita hỹ iwatsahi mykurẽtsa tsimykaranaha – iwa nisakibazikiknaha. Iwa atakta idyhywy eze kytsa mysipehaka ibo nisakibazikiknaha. Atahi koikny baktatu tawahi atatu my.

¹⁰ Nisakibazikiknahaze tapara taypykyryknahatsa simyharerewabybarẽnikitsa wĩte kwatero ahatsa wytyk bo inatsubaiknaha ipe niaha atahi idyhywy bete nidyhyky. Atakta imysapyrẽnikita ihumo mynatsunaha. Atahi Deus mybarawytsa siraratsa nisisukni iwatsahi mynatsunaha. Atahi koikny baktatu tawahi nawa tatu mynapykyryk ipe maha:

– Ikia zuba amyharerewabyziurẽnikita – maha. Tahatsorik ty iokeryk zizozokonaha. Asahi:

¹¹ – O ikia zuba mybaratsa, ikia myhumo amypokzitsiukrẽta.

Ikia Deus babata, mypehakatsa.

Ikia mybarawy tsikzukni, nanabyi tsikzukni aharere humo tsizubarẽna anatu maha.

Myzubarẽtsa tsikmysukni. Iwatsahi abo tsimysakibazikiknaha ikia zuba tsamysapyrẽta ba zimi,

ikia zuba azikwyrẽnikita ba hawa tohi zasukninaha, ikia zuba tsamyharerewabyrẽta.

Asopykziurẽnikita, amyhyrizikporẽnikita awa sukniabyita iwa abo tsimysakibazikikiknaha – niaha.

Atahi idyhywy bete nidyhyky ibo hi nisakibazikiknaha hỹ.

5

Papeu iwaze hozipyrykza hyrity wata iwaha iny.

¹ Kyze papeu zikwaraka turãrã ty pirikwyhyha bo iktsa iky. Anapapeu atakta tadyhywy bete nidyhyky tapanuryk taba zibykyk. Nataba natabaha papeu humo iwatahaha. Ipirikwyhyha hi sete ahatsa niaha.

² Iwaze bijoikpe iknykta Deus tsumuẽhĩtsa tsipunihikrẽta iny. Atahi tsiaksohopykrẽta nikara:

– Batu aty tohi imysapyta iwaze ipirikwyhyha ba zikbabari iwa zeka papeu ty ba hyrikok zeky – niy.

³ Ba aty tohi bijoik pe eze. Mybarawy eze kino ba aty tohi. Mybarawy opuke bo kino ba aty tohi. Ba aty tohi ipirikwyhyha ty ba hyrikok ziky, iwatahi papeu bo batu iktsa ziky.

⁴ Iwatahi utakta ikpuziuku. Ba aty tohi ipirikwyhyha ba ziksibabari iwaze papeu bo iktsa my. Ba aty tohi imysapyta humo ipirikwyhyha ba zikbari zeky ahabyi tahi ikpuziuku.

⁵ Kyze estuba tapara taypykta tsimyharerewabyziurẽta kape niy:

– Asukabyity! Iktsa tykta! – estuba zuba Suda iknykta. Mydiri Dawi tsekokatsa atahi ipirikwyhyha mysibabaribaik iwaze hi papeu humo iwatahaha pinyba. Atakta abazubata tsipunihikrēta parini wata. Atahi isokpykziurēnikita. Satanas iharere bo hỹ mykara.

⁶ Iwaze hozipyrykza tsibik iny. Idyhywytsa tazahara eze nirikto-hoko. Siraratsa sihokykyktsa babatsa, taparaktsa simyharerewabyrētsa iwatsa hozipyrykza ispokteze niapykyryk. Anaka hozipyrykza bezewy aba ispituzo. Iharanitsa sete ahatsa. Ihyriziktsa kino sete ahatsa. Asahi Deus hyrikoso nanabyitaba mybarawy ezektsa bo ahatsa sete nisipehaka.

⁷ Hozipyrykza modyhykyta bo niparak papeu ipanuryk taba niapykyryk naha ty okok niy.

⁸ Napapeu zibykze siraratsa sapetoktsa sapetoktsa hozipyrykza okeryk taekaratsa humo puruk puruk niaha. Situk taparaktsa wīte kwarterotsa hozipyrykza okeryk kino niwatihi okmymy nikaranaha. Asaktsa ipamykzuywyttsa humo. Sioporosuktsa ouro zuba ha atsa eze jokmorēnikia niaha. Deus hyrytsa ibo mopamykysonahaze jokmorēnikia waha ibo my. Hawa jokmorēnikia mybo waok myze mykparawy Deus kino niwatihi. Katsa Deus bo tsimypamykysokonahaze Deus iakparawy.

⁹ Siraratsa sispitutsa, taparaktsa sizubarētsa iwatsa tasakebazik ty, ezytyk ty nisakibazikiknaha:

– Ikia zuba papeu tsiptakse. Ikia zuba pirikwyhyha tsimysibari.

Ikia zuba abazubata tsapunihikrēta. Kytsa zabezenaha humo yhỹ zuba tsiky.

Mysapyzeky iharapatawyhyta humo tsikyrikosokdaze kytsa sizubarētsa Deus bo tsiksioktyhyryk.

Kytsa simysapybyitsa nikaranahatsa Deus ahumo mysiokzohik.

Tsikyrikosokda naha humo sasabyitsa mybarawy ezektsa bo,

meky mekywatu sihareretsa sasabyitsa bipyritsa

nanabyi sihudikhudikwytsa iwatsa Deus bo tsiksioktyhyryk.

Ana humo hi papeu ipirikwyhyha tsimysibabari.

¹⁰ Deus sizubarētsa humo tsimypokzitsiarēta mozik,

tatyryktsa tuk mypehakatsa moziknaha, aharere humo.

Aharere bo hỹ mykaranaha iwatsahi sispirikporētsa moziknaha.

Mybarawy eze maha siperytsitsa moziknaha.

Asaktsa Deus wahoro zubata eze ziknapamykysonahatsa siwatsa moziknaha,

Deus pitsumuēhīnaha, itsumuēhītsitsa moziknaha Deus tyryktsa babatsa iwa nisakibazikiknaha.

¹¹ Iwaze inyzo. Bijoikpe iknyktsa Deus tsumuēhītsitsa iksiwaby, sizubarētsa. Bijoikpe iknyktsitsa abazubatsa. Kytsa humo batu sihyrinymyry ba ziksiwatawybanaha. Asaktsa idyhywy zihaszawynaha. Siraratsa sispitu napetok napetok taparaktsa kino niwatihi zihaszawynaha.

¹² Opykania ty nisakibazikiknaha, asahi:

– O hozipyrykza tsibik tabezewyta

ikiahi azikwyrēnikita. Ikiahi anamynikita.

Ikiahi ahyrinymyryta babata. Ikia hi tsapunihikrēta.

Ikiahi tsaharereziurēta myzubatsa ahumo iktsazuba mynakaranaha.

Ikiahi tsahyryzikporēta amysapyrēnikita. Ikiahi tsasopykziurēta.

Ikia bo zuba tsimysakibazikiknaha!

nisakibazikiknaha.

¹³ Kyze abazubatsa ibo nisakibazikiknaha, ana hi iwabyky. Bijoikpe Ezektsa, mybarawy Ezektsa, asaktsa mypuke Ezektsa, buburuzuba iknyktsa iwatsa nanabytabaktsa ibo nisakibazikiknaha:

– Atakta tadyhywy bete modyhykyta,
hozipyrykza bo kino niwatihi tysakibazikiknahaktsa!

Ikia zuba tsamysapyrēta. Ikia zuba tsamyharerewabyrēta myzubaha ahumo iktsazuba mynakaranaha.

Ikia zuba azikwyrēnikita. Ikia zuba tsasopykziurēta.

Iwa mywahi hozipyrykza bo tsimysakibazikiknaha! Deus bo tsimysakibazikiknaha!

Iwa nisakibazikiknaha.

¹⁴ Siraratsa sispitutsa sihokykyktsa babatsa iwa tihi:

– Katsa kino niwatihi! – niaha. Iwa hỹ kyze taparaktsa taekaratsa humo puruk puruk nikaranaha. Atakta tadyhywy bete nidyhyky hozipyrykza kino niwatihi simysapyrētsa sihumo taekaratsa humo puruk puruk nikaranaha.

6

Iokpyripyrihyha iksiny.

¹ Iwaze hozipyrykza bo inyzo. Papeu sete iokpyripyrihyha bo niy. Tapara iokpyrikihiha iharapepewy niakbabaribaik iny. Iwaze estuba sirara ispituta:

– Pany! – niy. Iaksoho hyritsik bipyri waha nikara.

² Atsoko pikuzza tsibarazarēta bo ikozo. Atakta isukpetara bete taparaky ty wabe ahata nidyhyky niy. Ouro ty hi itsorikihita. Atahi niparakze sizubarētsa paik zipykba iwatsahi iharere bo hyỹ mykaranaha.

³ Iwaze atahi atakta kytsa zibezenhata hozipyrykza tsibik usta iokpyrikihiha iharapepewy niakbabaribaik. Petok niakarak. Usta sirara ispituta iwaby. Atahi:

– Pany! – niy.

⁴ Iwaze usta pikuzza tsaririta izo waha bo ikozo. Atabete nidyhyky mykyriwy ty ibo nyny niy. Iwaze mybarawy Ezektsa ata humo hi mowatsoronaha, sizubarētsa ihumo mowakubyrinaha. Atahi sokorotsapu tsizezerēta ty ibo nyny niy.

⁵ Iwaze atahi atakta kytsa zibezenhata hozipyrykza tsibik usta iokpyrikihiha iharapepewy niakbabaribaik. Harakykybyi hi iokpyrikihiha niakbabari. Usta sirara ispituta iwaby. Atahi:

– Pany! – niy.

Atsoko pikuzza ioktsirōrōta iny. Atabete nidyhyky, barāso ty mypewy hyritywakata tatsikpyk eze wabe ahata nidyhyky.

⁶ Siraratsa sapetoktsa sapetoktsa nawa situk maku iaksoho wata iwaby. Atahi:

– Estuba mypaik suk zibykykzo tsipokzitsarēna estuba zuruze tarabaja nikara anahumo zihuak. Harakykybyihi ahotsa suk zebykykzo tsipokzitsarēna estuba zuruze tarabaja nikara anahumo zihuak. Ituta usaka ba ziktakyky! Duabohotsa tsik kino niwatihi usaka ba ziktakyky! Ihuak ty jokbohohamo humo zuba tsikaeni aty zuba zikzihuakak! – niy.

⁷ Iwaze atahi atakta kytsa zibezenhata hozipyrykza tsibik usta iokpyrikihiha iharapepewy niakbabaribaik. Siharakyktsitsa zuba iokpyrikihiha niakbabari. Usta sirara ispitu ta iwaby:

– Pany! – niy.

⁸ Atsoko usta pikuzo tsitozoarêta bo ikozo. Atabete myhyrikosokdawy inarokota ibete nidyhyky. Iapik abazubatsa siakbatsa ykarawy ezektsa iapik niukurunaha. Atahi ibaze:

– Mybarawy ezektsa abazubatsa myharape banaha! Sapetoktsa sapetoktsa nawahatsa tsimysihobykze estuba tsipibeze myzubarêtsa tsapukte tsipibeze iwa tsimykara. Myrapa humo myokbanaha mymysapyri humo mokbanaha, siraratsa siakryiukrênikitsa humo mokbanaha iwa sizubarêtsa mysibanaha – niy.

⁹ Iwaze atahi atakta kytsa zibezenahata hozipyrykza tsibik usta iokpyrikihiha iharapepewy niakbabaribaik mytsyhyry watsa iokpyriwy niakbabari. Iwaze jokmorênika wezowy opuke bo iktsa iky. Anaeze kytsa hyrizikararatsa bo ikozo. Sakyriukrênikitsa istyba. Asa hi Deus harere bo hyÿ nikaranahatsa ihumo nispirikponahatsa, Deus wasania ty nitsasoikiknaha iwatsahi sakyriukrênikitsa nisibanaha Sesus humo sispirikpobyitsa iwatsahi nisibanaha.

¹⁰ Asahi opykani kadi nikaranaha:

– O Deus mypokzitsikitsa ikia zuba azikwyrênikita ba hawa tohi zasukninaha. Amy wasania ty zuba tsimykara. Asopykziurênikita. Ahyrizikporêta hawaze ja mybarawy ezektsa tsimysizuwy, nimbakanahatsa hawa eze ja tsimymysapusare – nikaranaha.

¹¹ Iwaze siwa tu isuk tsibarazarêta ezytyk ty sibo nyny niy. Atahi:

– Ahakubyrisorokrêtsaktsa. Sakyriukrênikitsa ustsahatukytsa mysibanaha. Hawa zahabanaha ustsahatukytsa Sesus tsumuêhîtsa kino mysibanaha. Mysibanahaze ahakubyrisorokrêtsaktsa – niy.

¹² Iwaze atahi atakta kytsa zibezenahata hozipyrykza tsibik usta iokpyrikihiha iharapepewy niakbabaribaik. Ustsahatukytsa humo iziakyri zuba iokpyrikihiha niakbabari. Ana niakbarize wytyk nitydydydykyk tu. Haramwe miwa niyzik panu nioktsirôrô nahawa. Byzoje ispu ty iokperirihitawa niy.

¹³ Byrisoiktsa bijoikpe iknyktsa wytyk bo mynatsunaha. Mynatsunahaze umaha hara zopoktsa myzitsunahaze ky wa.

¹⁴ Bijokpe nihokda. Papeu ihara tukarehewaha bijoikpe taha tukare niy. Hara jotabanikia mekybotu tahasapy. Sasabyitsa itsikzikdihitsa kino niwatihi mekybotu tahasapynaha. Nanabyi mytydydykyk tu.

¹⁵ Iwaze mybarawy ezektsa pehakatsitsa, sodadutsa pehakatsitsa, sinamynikitsa, sihyrinymynikitsa, sitarabaja tsihikanikitsa, asaktsa tarabaja zuba mykaranahatsa okyrysaro byitsa kino niwatihi abazubatsa iwa tahaukpitsîna. Harahare oke bo tahaukpitsîna. Hara joboni ha bo anaeze harahare puk eze tahaukpitsîna.

¹⁶ Hara, haraharetsa ahatsa pe niaha:

– Mybete tynatsu. Haraharetsa tynamyokpitsîna. Iwaze Deus tadyhywy bete modyhykyta batu mybo iktsa ziky. Atahi kytsa zibezenahata hozipyrykza tsibik myhumo takyriki.

¹⁷ Atahi myhumo takyriki, katsa sipokso mpybyrêtsa. Iwapuruze batu aty tohi sakyriwy bo iktsa tsimaha abazubaha mopyk sipokso sakubyri zumu – nikaranaha.

7

Isareu ezektsa sizubarêtsa iksiny.

¹ Iwaze bijoikpe iknyktsa Deus tsumuêhîtsa sapetoktsa sapetoktsa iwatsa bo ikozo. Asahi mybarawy ipaiko eze niriktotohokonaha. Iwaze zopoktsa

sihumo ba ziknabybyk naha. Zopoktsa sihumo mybarawy eze ba ziknabybyknaha. Zopoktsa sihumo hwitsa bo ba ziknabybyknaha. Buburu zuba bo kino niwatihi zopoktsa ba ziknabybyknaha.

² Iwaze usta bijoikpe iknykta bo ikozozo. Haramwe sukewy ikny izumu. Atakta Deus humo inymyryhywyhyta tuk. Kytsa Sesus harere bo hyŷ mykaranaha ihumo sispirikporētsa mysiwatawyky ana hi:

– Atakta Deus tse maha. Atahi koikny bakta tazo tuk mynapykyryk – niy. Iwaze opykani kakaik niy sapetoktsa sapetoktsa iwa bijoikpe iknyktsa bo opykani kakaik niy. Tapara asaktsa bijoikpe iknyktsa Deus nisiakzo sihyriziktsokzawy bo asaktsa wytyk zimyiwynaha. Buburu zuba bo kino niwatihi zimyiwynaha.

³ Iwaze bijoikpe iknykta ipaiko eze ta:

– Byri tahaktsa! Wytyk, hwitsa, buburu zuba iwaha tymyimyibytaha! Byritaha. Tapara Deus tsumuēhītsa siokpe humo tysiwatanaha. Inymyryhywy siokpe humo. “Asaktsa Deus tse maha” tsipiwatanaha – niy. Yhŷ niaha.

⁴ Iwaze siokpe watahatsa kytsa nisiwatawybanaha, 144.000 iwaby. Sizubarētsa hiba. Wastuhu estuba estuba zuba aparakbaha siokpe humo nisinymyhywykynaha Isareu tsekokatsa niaha.

⁵⁻⁸ Suda tyryktsa 12.000 siokpe humo nisiokpewatahaka. Reubē tyryktsa 12.000 siokpe humo nisiokpewatahaka. Kade tyryktsa 12.000 siokpe humo nisiokpewatahaka.

Ashere tyryktsa 12.000 siokpe humo nisiokpewatahaka. Napatari tyryktsa 12.000 siokpe humo nisiokpewatahaka. Manasa tyryktsa 12.000 siokpe humo nisiokpewatahaka.

Simeō tyryktsa 12.000 siokpe humo nisiokpewatahaka. Rewi tyryktsa 12.000 siokpe humo nisiokpewatahaka. Isaka tyryktsa 12.000 siokpe humo nisiokpewatahaka.

Seburō tyryktsa 12.000 siokpe humo nisiokpewatahaka. Sose tyryktsa 12.000 siokpe humo nisiokpewatahaka. Bēsami tyryktsa 12.000 siokpe humo nisiokpewatahaka.

Asaktsa sizubarētsa siokpe humo nisiokpewatahaka asaktsa Deus hyrytsa nisiwatawy.

Myzubaha humo ba ziksiwatawybanaha tsa bo ikozo.

⁹ Iwaze kytsa sizubarētsa bo ikozo. Ba ziksiwatawybanaha myzubahatsa. Wastuhu kytsa bipyritsa maha. Kytsa aparakbaha sizubarētsa. Nanabyitaba sihudikhudikwytsa. Asaktsa meky mekywaha harere tu mopamykysokonaha, kytsa sizubarētsa hozipyrykza tsibik iokeryk niapykyryknaha atakta tadyhywy bete nidyhyky. Atahi kytsa zibezenhata ibo mosakibazikiknaha. Sisukbarazarētsa nikaranaha. Tsarakzapatsa ty nisibykyknaha.

¹⁰ Asaktsa opykani ka nikaranaha:

– Deus zuba mybetesatsa. Sesus hi nihyrikosokda hozipyrykza tsibik wata tazo bo mymyoktyhyrykta. Deus tadyhywy bete mynadyhyky – niaha.

¹¹ Bijoiikpe iknyktsa abazubatsa dyhywy zihaszawynaha. Taparaktsa simyharerewabyrētsa siraratsa sispitu sapetoktsa sapetoktsa iwatsa Deus okeryk niokmymyhykynaha. Asaktsa:

– Ikia zuba tsamysapyrēta – nikaranaha.

¹² Asaktsa:

– Iwa myhŷ. Deus hi imysapyrēnikita ibo tsimysakibazikiknahaktsa! Izikwyrēnikita ba hawa tohi zikzukninaha. Tisopykziurēta. Tisopyksapyrēta.

Ihyrizikporēnikita. Imyharerewabyrēnikita. Ipunihikrēnikita. Koikny bak-tatu tawahi mynapykyryk hỹ. Iwa – nikaranaha.

¹³ Kyze estuba tapara taypykta kape niy:

– Hawa hatsa skaraba sisukbarazarētsa. Hana iknytsa sa izumunaha – niy.

¹⁴ – O kapehakatsa batu kahyrinomy. Ikiya zuba tsahyrinomyrēta kabo tsimytsaso – iky. Atahi:

– Asaktsa kytsa sukyrytsitsa humo nisizukunaha tu. Iwatsa tu Sesus harere bo hỹ nikaranaha ihumo sispirikporētsa nikaranaha. Atahi kytsa zibezenahata hozipyrykza tsibik atahi sisapyzekenihyrikosokda ana humo hi hỹ nikaranaha nispirikponaha. Iwatsahi siziurētsa. Simysapybyri humo nikaranahatsa tu Deus hozipyrykza tsibik humo nisiokzohik.

¹⁵ Iwatsahi Deus dyhywy baze morikto riktohonaha. Okoroze unata ahaze Deus myzitsumuēhiknaha iharere bo hỹ mykaranaha. Batu pyk zikaha. Tahawahi ituk mynapykyryknaha. Deus hi mynasipokzitsiki, hawa ha ty mysimy naha pokso mysipokzitsiki.

¹⁶ Ihumo hi ba sirapa zikzumu. Ba sirapuruk. Haramwe humo ba zikpiakoronaha iwaze ba izohoni ziyknaha.

¹⁷ Atahi Deus dyhywy bete nidyhykyta nihyrikosokda hozipyrykza tsibik atahi sispirikpotsa mozik. Sihumo tsimypokzitsiukrēta. Atahi pihik bo mysioқтыhyryk ana hi pihik pupuputsa watsa tsipikunahaze ahawatu ahaspitu tsimoziknaha. Deus mysihyritsytsykyk ba zikpuzonaha – iwa hỹ.

8

Iokpyrikihiha ziharawy iny.

¹ Iwaze atakta kytsa zibezenaha hozipyrykza tsibik iokpyrikihiha ziharawy zuba niakbabaribaik. Utsa tsyhyry humo petok zuba siakyrikihiha niakbabari. Iwaze abazubatsa bijoikpe eze tu tsikaeni zuba pywa niapykyryk, meja ora eze batu harere aha.

² Iwaze atahi porawy suka wata kytsa hu nikaranaha bijoikpe iknyktsa bo nyny niy. Asaktsa Deus okeryk niriktotohonaha. Porawy watsa ty ustsatsyhyry humo petok zuba, sete ahatsa bo bijoikpe iknyktsa bo nyny niy. Estuba estuba zuba porawy ty nyny niy.

³ Usta bijoikpe iknykta ouro ty ioporosukokta iwaze izumu. Ata hi jokmorēnikia wezowy baze niriktotohoko, anaeze kytsa Deus bo nipamykysokonaha. Izumuze jokmorēnikia wezowysapy bo usta ipe niy:

– Jokmorēnikia tsizubarēna ty abo nyny my. Deus hyrytsa ibo nipamykysoikiknaha, siharere jokmorēnikia tuk tsimytsakykynaha! Aoporo suk anaeze tsimytsakykynaha ana kino Deus dyhywy okeryk tsipiwezoko – niy.

⁴ Iwaze jokmorēnikia ziwezokoze Deus hyrytsa harere tuk itsakykyha, nikorokonaha zatata jobo nizoko. Bijoikpe iknykta humo zatata jobo Deus bo niy. Deus hyrytsa harere zatata tuk jobo nidoko.

⁵ Iwaze bijoikpe iknykta jokmorēnikia suk izo ty ziharek. Iwaze iwezowy bo zibykyk niy. Iwaze mybarawy bo izo inapapyk. Atsoko nitok. Nanabytaba pare parezo nikara. Wytyk nitydydykyk tu kytsa siaksoho pokso sipybyrētsa nikaranaha.

Porawy wakatsa eze mopamykyzukunaha.

⁶ Iwaze bijoikpe ezektsa sete ahatsa porawytsa nasibykyknaha tahazozik-bakanaha niaha.

⁷ Tapara estuba bijoikpe iknykta taporawy ziokehuhukuze hyritsik izo harahareziktsa iwatsa myspu hyritywaha nawōkō. Izo ispu waha niwatihi mybarawy bete nawōkō. Bijoikpe iknykta humo inawōkō. Wytyk, hwitsa towahaditsa aha tsapukte ezeka nikorobaik. Nepykbaba. Nabaze are ahabara.

⁸ Iwaze usta bijoikpe iknykta taporawy ziokehuhuku. Aba petoktsa botu ziokehuhunaha. Iwa niahaze hara jobonita mokoroko ziktawata buburu zuba bo inaotsok. Iwaze inaharazukze tsapukte ezeka ispu waha niyzik.

⁹ Piknutsa jokboha niakbakanaha. Tsarahatsa puizipyrykbyitsa jokboha nipyknaha. Tsizubarēna nepyk.

¹⁰ Iwaze usta bijoikpe ezekta taporawy ziokehuhu. Aba harakykbyihitsa botu nisiokkehuhukunaha. Iwaze byrisoik puētsikbyita bijoikpe iknykta wytyk bo inasik. Rika mokorobakaze tawata buburu jokboha niy, pupuputsa niwatihi jokboha nisipykwy.

¹¹ Ispianikia byrisoik naro. Byrisoik humo jokboha pihik tispiaarēna niyzik, mybarawy ezektsa ana pihik zikukunahatsa hi ispi humo niakbakaranaha.

¹² Iwaze usta bijoikpe iknykta taporawy ziokehuhuku. Abaka sapetoktsa sapetoktsa ahatsa botu tahaporawytsa nisiokkehuhukunaha. Iwaze wytyk hararikazowy nimyi. Haramwe pykyhy ihyrizikubyitatu. Byzoje pykyhy kino niwatihi ihyrizikubyitatu. Byrisoiktsa pykyhy kino sihyrizikubyitsatu. Iwatsahi mypubyi ahabo ba zikozonaha sihyrizikubyri humo. Okoroze unata aha taparaka miwa zuba.

¹³ Iwaze iktsazo ikyze wohorek joboni nitsatsaka tabo iktsa iky. Nitsatsakaze opykani ka nikara:

– Mybarawy ezektsa simypokzitsiubyitsa moziknaha. Simypokzitsiubyitsa sinini mykaranaha. Bijoikpe iknyktsa harakykbyihitsa porawytsa mysiokehuhunahaze iwaze simypokzitsiubyitsa – niy. Iwa wohorek niy.

9

¹ Iwaze usta bijoikpe iknykta taporawy ziokehuhuku. Aba mytsyhyry wa botu nisiokkehuhukunaha. Iwaze bijoikpe iknykta Deus tsumuēhītsa byrisoik wata bo iktsa iky. Bijoikpe ikny wytyk bo inasik. Aty ja myhyrizikpyryrykwy ibo nyny niy, iwaze hi myhyrizikpyryrykwy ihoke pomobara hokbowy nizapare niy.

² Atatsa byrisoik wata ihoke pamabara hokbowy nizapare, iwaze atsoko zatata zipoko. Izo piwezokonaha zikywa. Haramwe zatata humo miwa. Nanabyitaba zatata humo naoktsībaik.

³ Iwaze masetsa zatata buruk wytyk bo inasiknaha. Asahi Deus harere humo pikzahatsa watsa kytsa nisihorokonaha.

⁴ Estuba bijoikpe iknykta ispe niy:

– Hwitsa, iparikia, towahaditsa iwaha humo ka isty sarouk sarouk byitaha! Kytsa zuba tysihohoronaha. Siukpe watahabyitsa ty zuba jataha. Siukpe watahatsaktsa “Deus hyrytsa” asa humo ka awatutaha.

⁵ Abaka isty baba byitaha byzoje mytsyhyrywaze tsimysitsapyriwyky-naha, tysihohoronaha! – niy. Asaktsa masetsa wakatsa kytsa pikzahatsa mysihohoronaha ziktsa watsa.

⁶ Asaktsa Deus hyrytsabyitsa, asahi siukpe wataha byitsaktsa nisihohoronaha. Byzoje mytsyhyry wa pitsunahaze pikzahatsa humo sihohorohotsa watsa. Asahi:

– O katsaktsa tsimyokbanaha tsimyzihikiknaha, tsimyokbanaha ja. Hawa skaraba tsimaha – niaha. Zikykbahanabyitsa tu sinini mykaranaha zuba.

⁷ Asaktsa masetsa pikuzatsa watsa, mowatsoronahaze mokymybanahatsa watsa. Siharek humo hyritywaha ouro ty sitsoriktsa. Kytsa ok watsa.

⁸ Siharadi wytykyryk haradi waza. Sitsapu parini tsapu tsawa.

⁹ Taharawe suk ty tububyita ty. Korobyk niaha. Sisasuka wa tykburuktsa pikuzatsa mysikyrikinaha ziktsa watsa sisukyrytsitsa bo mowatsoronaha humo.

¹⁰ Pikzahatsa wa tsa hi nisihohorokonaha. Simyhohorowy humo kytsa mysitsapyriwynaha byzoje mytsyhyrytsa wa pitsunuhaze mysimyitsapyriwynaha. Asahi Deus humo siukpe wataha byizeka mysimyitsapyriwybanaha.

¹¹ Masetsa watsa ykzokotsa atakta ihoke pamabara tsiokezezerēna ezektsa pehatsa. Ebereu harere Abadō inarokota, kereka harere Aporiã inarokota, myharere – Atakta isopysapybyikita – my.

¹² Iwa. Amy ja mymypybytyky estuba botu nimyharamu, aba petok ka mozumu.

¹³ Iwaze usta bijoikpe iknykta taporawy ziokehuhuku. Usta tsyhyry humo iziakyri nahawa ziokehuhuku. Ziokehuhukuze iaksoho jokmorēnikia wezokowy eze iwaby. Jokmorēnikia wezokowy ouro Deus okeryk, anaikny hi iaksoho iwaby. Jokmorēnikia wezokowy porawytsa niy. Sapetok sapetok paiko eze iwaby.

¹⁴ Bijoikpe iknykta atahi iwaze babatu porawy ziokehuhuku iaksoho ipe nikara:

– Hyrikoso sapybara siakwarahatsa ty zoksaparety! Sapetoktsa sapetoktsa nawa buburu Euperetes inarokota bo. Anaeze karikutsitsiwytsa siakwaratsa. Tysisatsuknaha! – niy.

¹⁵ Asaktsa bijoikpe iknyktsa kytsa abazubatsa sisukyrytsitsa mykaranaha. Mybarawy ezektsa tsapukte buruk mysipyknaha. Deus harere humo zoksapare maha hi piperykynaha. Nawa taeze ja ahabyitsa. Tozeka ja usta motyk tseheze ja. Usta byzoje ja. Usta okoroze ja. Deus myze – Abaka tsiponaha – my. Ana piwabynahaze piponaha iwaze mybarawy ezektsa tsapukte buruk mysipyknaha.

¹⁶ Uta sodadutsa abazubatsa siakpyri iwaby. Abazubatsa dusētos mirioētsa pikuzatsa bete niukurunaha.

¹⁷ Katsotyspykwaha eze sodadutsa pikuzatsa ahatsa iksinyky. Taharawe suk ty tububyita ty korobyk niaha. Wastuhu sirawe suk tsaririta izo hyrity watsa. Utsa harawe suk tsikakrēna harahareziktsa sipokzitsanikitsa watsa, sapiratsa watsa. Utsa sirawe suk tsitozoharēna ěsopire hyrity waha niaha. Pikuzatsa kino niwatihi. Pikuzatsa harektsa kino parinita harek tsa watsa niaha. Sisake buruk izo hyritywaha zipokorok. Ěsopire zatata izohyri waha sisake buruk zipokorok nikaranahaze.

¹⁸ Izo, zatata, ěsopire aha hi pikuzatsa sake buruk zipoko naha humo hi mybarawy ezektsa niakbakaranaha. Asta okoro eze tu aba zuba niakbakanaha.

¹⁹ Pikuzatsa sakeze, simyrawytsa siatsa eze aha. Siatsa pyryhyktsa harektsa watsa asa hi kytsa nisiborokonaha.

²⁰ Pikuzatsa atsokyka mybarawy ezektsa nisipyknaha. Nitarenahatsaktsa nanabyi sukni humo batu ity moewy aha. Hawa Deus humo tsimypokzitsirētsa, asaktsa sisuknihitsa humo simypokzitsirētsa. Sinamy ouro sukni hi, parata sukni hi, iku sukni hi, hwi sukni hi, harahare sukni hi, iwa sinamy tahatsyhyry ty ty nisisuknikinaha asa hi siakparawy. Sisuknihitsa ba waby zikaha, ba zikozonaha, ba pão zikaha iwa iwatsatu sinamy siakparawy, sisoho humo mytsaty ahabyitsa tu nikaranaha:

– Katsakta mynamy hi mydeus maha – nikaranaha. Hyrikoso sapybara kino niwatihi siakparawy siharere humo hyŷ mykaranaha batu pyk zikaha, Deus babata humo ka batu yhŷ zikaha.

²¹ Utsa kytsa mysibanaha humo kino ba ma zikaha. Kytsa tahakparawybyitsa myrawy ty nyny nikaranaha. Usiza bo nisipyripyrirykyknaha. Utsa kytsa namy bo batu iktsa zuba zikaha. Sitsyhyryboarĕtsa. Iwa sisopyktsa zikzurukunaha sisopyksapybyitsa nikaranaha moewy ahabyitsa ziknakaranaha.

10

Bijoikpe iknykta papeu tuk inasik.

¹ Kyze usta bijoikpe iknykta tsipaikrĕta inasik. Isuk zatata hyritywa niukuru. Tsokma iharapu taba nazikto. Iok haramwe wa niu. Iektsa wahoro putotowytsa wa izo wa niukuru.

² Papeu tsibik itsipyk eze niapykyryk. Papeu nizapare iwaze kytsa pinyknaha. Taeknury taba buburu zuba bete pare niy. Taekwazo taba wytyk bete pare niy.

³ Iwaze opykani kakaik niyze, parini kakawa niy. Kakaik niyze nitotokorok. Sizubarĕtsa sete aha nitotokoroknaha.

⁴ Nikaranahaze nitotokoknahaze papeu humo iwatahatsihikikze iaksoho bijoikpe ikny kape niy:

– Nitotokoknaha ty ka iwaby zuba ity wataha wataha byity! Ana tsihokdaharĕna iwaze mektsa bo ba ziwataha – niy.

⁵ Iwaze bijoikpe iknykta taeknury taba buburu bete pare usta taba wytyk bete pare niyze tapanuryk taba jobo sukyhy niy, ana bo hi ikozo. Atahi Deus ziwabyze:

⁶ – Atakta koikny bakta tu tawahi mynapykyryk ata hi bijoikpe, mybarawy, buburu zuba iwa nizukni, abazubaha bijoikpe eze ky abazubaha mybarawy eze ky, abazubaha buburu buruktsa iwa mybarawy nizukni – niy. Atahi kaharere piwabyky iharere zuba motsasoko:

– Abaka bapyk ziky – niy.

⁷ Amy botu nitsasonaha, anawahi myzehikik kasohotsitsa zitsumuĕhĭkĭnahatsitsa bo kino atsatu mykara. Tapara nizihikik naha ka tsihokdaharĕna ana humo ka batu aty tohi ihyrinymyryhuk. Bijoikpe iknykta porawy ziokehuhukuze, iwaze Deus nizihikik naha ka tsihokdaharĕnikia aba kino atsaty ty mykara my. Iwa Deus harere niy.

⁸ Iwaze iaksoho bijoikpe ikny iwabykynaha. Kabo nitsasoko:

– Bijoikpe iknykta mybarawy bete, buburu zuba bete nataba pare nataba pare niriktohoko ibokta! Papeu tsibik itsipyk eze ky tyzibykykta! – niy. Hyŷ iky.

⁹ Iwaze uta ibo ikparak. Ipe iky:

– Na ty papeu atsipkykezeky ty kabo nynytykta – iky. Yhŷ niy. Iwaze kabo nyny niyze. – Papeu ty haukykta! Asake eze titsaragrĕna pete waha mozik. Tsipihuruzukze arakokeze tsibuarĕna mozik – niy.

¹⁰ Papeu bijoikpe iknykta itsipykezeky ibykyk. Papeu ty hauk ikyze kasakeze titsaragrĕna niyzik. Ihuruzukze karokokeze tu tsibuarĕna niyzik.

¹¹ Kyze kape niyzo:

– Deus wasania ty tytsasokta! Hawa Deus ibo mysioktyhyryk tsihikik aparakbaha bo tytsasokta! Kytsa aparakbaha abazubatsa meky mekywatu sihareretsa, abazubatsa sipehatsitsa nanabyitaba sihudikhudikwy ezektsa iwa aparakbaha ibo mysioktyhyryk tsihikik. Iwa kytsa abazubatsa Deus wasania ty tytsaso! – niy.

11

Petoktsa isotsitsa.

¹ Kyze bijoikpe iknykta hwibihi ty iwatawywy ty kabo nyny niy. Deus harere kape niy:

– Kyiktykta! Kawahoro zubata tsiwatawy! Jokmorēnikia wezokowy ty tsiwatawy! Hana wa tsa ja kytsa kabo mosakibazikiknaha. Asaktsa: “O ikia zuba tsamysapyrēta” mykaranaha. Iki sibo iktsa tsimyeze. Hana wa ja tsimysiwatawy.

² Wahoro pe ty ka watawy watawy byity. Kytsa Sesus humo sispirikpobyitsa ana bete pare maha – niy. Asiba estuba tsyhyrywy motyk tseheze pimyinaha. Kahudikhudikwy tsiziurēna kuarēta dois byzoje pitsunahaze pimyikinaha.

³ Miu, dusētos e sesēta wa purunahaze. Anaeze wytykyryk petokzahaza mysipeha kaharere motsasonaha. Sisuk panu boroho waha ty korobyk niaha. Zikzibytuhukunahatsa kytsa Sesus bo batu yh̄y niaha iwatsahi batu sispirikpo ispe niaha:

– Ahamsapybyitsa tsikykarannahaze ka tsimoewynahaktsa! Deus harere bo matahaktsa – mykaranaha.

⁴ Petokzahaza kasohotsiza oriwereja waza petok rikapuwy suk waza maha, asaktsa mybarawy ezektsa nisipokzitsikita baze niriktotohokonaha, Deus harere bo hȳy mykaranaha.

⁵ Utsa kytsa pahapesukyrykynaha zeka ba zikaha. Izo sisake buruk tahasukyritsitsa bo iwa usts mysisukyrynahaze mysibanaha.

⁶ Asiza hi kazikwy situk mynapykyryk. Kazikwy ty sibo nyny iky. Kaharere motsasonahaze asiza hi. – Hyritsik ba ziknawōzo – maha zeka ba ziknawō, pupuputsa siharere humo ispu mozik. Mybarawy ezektsa bo amy imysapybara humo zikino siharereze nanabyi humo mymyzuwykynaha. Nanabyi humo mozhikiknaha zikino mykaranaha. Mytsasonahaze yh̄y maha iwa amy mozhikiknahaze hi ana kino atsawatu mykaranaha.

⁷ Kaharere nitsasobannahaze sirara tserirēta mozumu myzubaha humo kino tsimypybytyharēta atahi ihoke pomobara buruk myzoik. Kasohotsiza mysihudizuze iwaze mysiba.

⁸ Iwaze sihudikhudikwy Serusarēhe inarokoha eze asiza inury motarenaha. Anaeze sipehatsa iharapatawyhyta humo zihyrikiknaha iwa ha eze zibezenaha. Anaeze sihudikhudikwytsa simysapybyitsa tu nikaranaha, Sodoma ezektsa watsa, Esito ezektsa kino niwatihi sizubarētsa simysapybyitsa nikaranaha.

⁹ Kytsa abazubatsa nanabyitabaktsa, kytsa aparakbahatsa abazubatsa, nanabyitaba sihudikhudikwytsa, asaktsa meky mekywatu tahaharere humo mopamykysokonaha iwatsa sinury bo nikozonaha. Harakykbyihi zuruze asiba zuruze sibo iktsaziu niaha. Asaktsa batu tahatotonaha niaha batu iwa aha!

¹⁰ Mybarawy ezektsa sakurētsa. Kasohotsiza mysibanahaze sakurētsa moziknaha. Tahamyikahakanaha. Sakurētsa hi tahanamy pibiakaknaha. Kasohotsiza harere batu siakparawy, sihumo sinini nikaranaha iwatsahi siharere nepykbaze sakurētsa niyziknaha.

¹¹ Iwaze harakykbyi hi zuruze tokbaha eze Deus hu niy. Sibete hu niyze inasihyrikikpo. Kyikyik niaha. Mybarawy ezektsa ana bo iktsa niahaze sipybyrētsa niyziknaha.

¹² Petokzahaza Deus iaksoho upyk inasihyrikikpowynahaza iwaze ispe: – Pany! – niy. Ana ziwabynahaze jo bo nidoknaha. Sisukyrytsitsa sibo iktsa niahaze zatata buruk tu bijoikpe bo nidokoroknaha.

¹³ Iwaze babatu wytyk nitydydykyk iwaze sihudikhudikwy tsapukte bu-ruk zitsepeloktokbaiknaha, kytsa abazubatsa niakbakanaha wytyk nitydydykyk naha humo sete miutsa niakbanaha. Niwahnahatsaktsa tahapybyspyk. Iwatsahi Deus pe niaha – O ikia zuba tsapunihikrēta, ikia bijoikpe eze tsimiharerewabyrēta – niaha. Tahapybyspyk kabo nipamykysokonaha.

¹⁴ Iwaze mybarawy ezektsa petok baba imypybytyky iwaha nimyharamu. Byri! Usa aba mozumuzo. Harakykbyihi mymypybyty humo maha.

Porawy ziharawy.

¹⁵ Iwaze ziharawy babata usta bijoikpe iknykta porawy ziokehuhuku. Botu usta tsyhyry humo petok ty hu niy abaka mopykyryk. Ziokehuhuze kakaik niaha siaksoho opykani iwaby.

– Abaka Deus zuba mybarawy pehatsa. Kiristu zipehata niwatihi abazubatsa mysipeha. Aba zuba mymypokzitsita, tawahi mybarawy ezektsa nasipehaka. Bapyk ziky – nikaranaha.

¹⁶ Iwaze taparaktsa wīte kwatero ahatsa Deus okeryk tahaekaratsa humo puruk puruk nikaranaha iwaze okmymy okmymy nikaranaha ihumo sispirikporētsa iwatsahi inatsunaha. Asaktsa tahadyhywy bete nidyhydyhykynaha Deus baze asahi iokeryk okmymy okmymy nikaranaha.

¹⁷ Deus pe nikaranaha:

– O Deus ikia zuba tsamysapyrēta.

O Deus ikia tsamypokzitsiarēta ikia zuba Deus babata.

Koikny baktatu ikia ahyrinymyryta babata.

Tsamiharerewabyziurēta atsaesubaha tsimynakara.

Azikwyrēnikita ba hawa tohi zasukninaha.

Abaka abazubatsa mybarawy ezektsa mysipeha anahumo hi mykurētsa.

¹⁸ Asukyrytsita ahumo tahakyrikinaha.

Asaktsa aharere bo batu yh̄y mykaranaha ahumo sinini mykaranaha iwatsahi sakyriukrētsa mykaranaha.

Asaktsa imysapybyri humo nikaranahatsa humo sinini mykaranaha ana hi sihuak waha.

Abaka abazubatsa botu niakbanahatsa huak ty sibo nyny tsimy. Hawa mybarawy eze zikzurunaha zeka ihuak ty nyny tsimy.

Asohotsitsa atsumuēh̄tsa kino niwatihi ihuak ty sibo nyny tsimy.

Atryktsa abazubatsa bo ihuak ty sibo nyny tsimy.

Asaktsa aharere bo hȳy mykaranaha.

Myhyrizikwanitsitsa pykyhy myhyrizikwybyikitsa kino niwatihi sihuak ty sibo nyny niy.

Abaka asaktsa mybarawy ezektsa mysiakninaha

asaktsa ikia tuk ba zikakpykyknaha asahi mohokdanaha – nikaranaha.

Iwa taparaktsa Deus bo niaha.

¹⁹ Iwa Deus wahoro zubata hokbowy bijoikpe eze zoksapare niy. Anaeze kytsa Deus myspirikpowy harahare humo iwatahaha ouro suk eze mynapykyryk. Atsoko ihyrikoso humo siaksoho ziwabynaha. Pare parezo nikara. Wytyk nitydydykyryk tu. Iwaze hyritsik harahareziktsa ty nawōkō abazubatsa bo inawōkō. Iwa h̄y.

12

Hotsoikarazata wytyk zibezekyzyky.

¹ Kyze bijoikpe eze abazubaha iwatawy natakaha. Ba aty tohi niwaha ty tyny. Tapara wytyk bo iktsa iky, atatsahi isuk hi haramwe bo mokozoneha.

Byzoje ipyrytsa upuk eze niapykyryk. Itsorik ka byrisoiktsa niapykyryk-naha. Dose byrisoiktsa ty niaha.

² Atatsa hi tabykyhytatsa. Itsapyri humo kadi nikara.

³ Kyze usta inymyryhywy bijoikpe eze natakahazo. Hotsoikarazata tsariribahata ana bo iktsa iky. Sete harektsa, itsorik ouro hi niwatihi siharek watu sitsorik isipehatsaktsa zuba maha. Iharanitsa humo kino niwatihi. Asaktsa mytsyhyrytsa watsa. Sitsorik humo kino niwatihi siharek humo tahawatu pupuwa iwaha inykyry.

⁴ Ia humo byrisoiktsa sizubarētsa nisikyrihyk tsapukte buruk byrisoiktsa nisikyrihyk, byrisoiktsa bijoikpe ikny iwaze wytyk bo nasipaparaka. Tabykyhytatsa okeryk hotsoikarazata pyk niy. Ibykyhy mopurukze ziborot-sihikik iwatahi iokeryk pyk niy.

⁵ Atatsa bykyhy nipurukze maku skyry niy. Atahi kytsa abazubatsa mysipeha, batu aty tohi iharere bo batu yh̄ zikaha. Atakta upepe hyrity wata itsipykeze iwa myzubaha bo mysipeha. Upepe pokso myzubatsa iharere bo hȳ tsimykaranaha.

Nipurukze Deus tihi ziokyhyryk, jobo nido. Deus dyhywy anaeze kytsa nisipeha nabo niy iwahi hotsoikarazata taba ziboro.

⁶ Wytyk niwatihi jerukbara bo niwakik. Anaeze Deus isapy botu zikymy, anaeze Deus atatsa humo tsimypokzitsiukrēta. Nawa puruze miu dusētos e sesētos iwa ihumo tsimypokzitsiukrēta.

⁷ Atsoko bijoikpe eze Mikeu tuktsa hotsoikarazata tatuktsa ahatsa niwatorokonaha. Mikeu tuktsa bijoikpe iknyktsa Deus tsumuēh̄itsitsa maha. Hotsoikarazata tuktsa tapara bijoikpe iknyktsa niwatihi. Deus harere bo yh̄ ahabyitsa hi hotsoikarazata nisioktyhyryk hyrikoso sapybara niyziknaha.

⁸ Mikeu tuktsa sipaikrētsa iwaze hotsoikarazata tuktsa nepykbanaha. Bijoikpe eze hyrikoso sapybara ba ziktarenaha. Deus ispe niy:

– Nabo p̄otaha! – niy. Nitururuknaha meky botu tahasapynaha.

⁹ Tubabatu hotsoikarazata pyryhyk niy. Hyrikoso sapybara perytsa nisipehaka Satanas inarokota. Mybarawy ezektsa mysispihikbataikik. Iwaze bijoikpe ikny nisipapykik iapiktsa ituk. Mybarawy bo nasipaparahiknaha.

¹⁰ Kyze iaksoho iwaby bijoikpe ikny kakaik niy. Atahi:

– Abaka Deus tyryktsa tabo mysioktyhyryk. Mybarawy ezektsa sibetesatsa ana ihyriziktsokzawy nepykba. Abazubatsa izikwy bo iktsa niaha. Izikwyrēnikita tu hawa tohi ba zikzukninaha. Deus zipehata mywata Sesus Kiristu atahi kytsa abazubatsa. Isokpykziurēnikita. Tsihyrizikporēnikita. Hotsoikarazata tsiharerewabymybarēta bijoikpe ikny itapapykwy. Mytukytsa soho Deus bo nispipihikbataikik. Okoroze unata kino niwatihi Deus okeryk sisoho ty zispipihikbataikik. Deus tihi bijoikpe ikny inapapykik.

¹¹ Mytukytsa Sesus tuktsa Deus zikwy humo sipunihikrētsa niyziknaha. Utsa kytsa nisiba tsihikiknahaze Sesus humo sispirikporētsa iwatsahi batu pyk niaha. Batu sipyby. Ihumo nispirikpotohinaha. Atahi hozipyrykza tsibik wata sisapyzekenihyrikosokda iwatsahi sispirikporētsa niyziknaha. Atahi sisapyzekenihyrikosokda ispu nipuku iwaze sispirikporētsa niyziknaha. Abazubatsa bo wasape nitsasokonaha. Deus wasania ty nitsasoikiknaha. Iwatahi Satanas sisoho ziwabyze takyriki itsapyriwy nepykbaik.

¹² Iwaze bijoikpe ezektsa ahakurētsaktsa! Mybarawy ezektsa ihumo sisukatsihikrētsa. Pihik ezektsa niwatihi sinini mykaranaha. Hyrikoso sapybara pehakatsa mybarawy eze iwatsahi ihumo sinini mykaranaha. Atahi sibo inasik iwatsahi ihumo sinini mykaranaha. Atakta takyriki, bykyzehu zuba Sesus tuktsa imyitsapyriwy mopykba ana humo hi takyriki.

¹³ Iwaze hotsoikarazata mybarawy bo tapapykwyze mytsaty niyze: “Kasapy bijoikpe eze tu nihokda tawahi tasapy” – niy. Iwazehi wytyk tabykyhy zepuruktatsa zikziapikiktahi.

¹⁴ Iwaze Deus petoktsa isarapaiktsa ty atatsa bo nyny niy. Wohorek abazuba ta sarapaikty hi niy. Iwatatsahi jerukbara bo nitsatsaka, tasapy bo niy. Anaeze atatsa humo tsimypokzitsiukrēta, harakykbyihi usa itsapukte buruk piytyktsehize. Deus atatsa humo pipokzitsi anaezeka hotsoikarazata batu itykni.

¹⁵ Iwaze hotsoikarazata pihik tasake ezeky zipuku buburu hyrity waha niapykyryk. Wytyk hapik hi buburu maha wa iapik niukuru. Tozeka ja nawaze pihik humo mytuba nikara.

¹⁶ Mybarawy atatsa zitsumuēhīkī iwaze hi wytyk awatubara isakiki-hawaha. Pihik zikuba hotsoikarazata saki zeky inapuku naha zikubaik.

¹⁷ Iwatahi hotsoikarazata wytyk humo takyriki. Iwaze niparak. Atatsa itsekokatsa bo niy. Sizubarētsa Deus harere bo hyĩ nikaranaha, asahi Sesus spirikpowy bo hyĩ nikaranaha ana humo hi wasani mozurukunaha, wasaniha soho motsasokonaha sibo hi niwatsorokonaha. Hotsoikarazata nisibatsihikik.

¹⁸ Hotsoikarazata nimyra eze niriktohoko.

13

Itsikarara usta hotsoikarazata wata ziktsotospykze iny.

¹ Kyze itsikarara buburu zuba ikny inazokota bo ikozo iharanitsa mytsyhyrytsa watsa. Siharektsa sete niy. Estuba mytsyhyrytsa usta taba petoktsa watsa iharektsa iharanitsa watu itsorikta, asaktsa kytsa pehatsitsa tsorik hyrity watsa niaha. Siharek watahatsa. Imysapy byikiwy ty ziwatahaha iwaha siharektsa humo. Deus soho humo hi batu mysapy nikaranaha iwahahi siharek humo iwatahaha.

² Itsikarara atakta parini hyrity wata niy. Ipyrytsa sirara tsiakyriukrēta uruso pyrytsa watsa. Isake parini sake wa niy. Iwaze hotsoikarazata tazikwy ty itsikarara bo nyny niy. Iwatahi kytsa pehatsa niyzik. Asaktsa hotsoikarazata harere bo hyĩ nikaranaha, itsikarara harere bo kino niwatihi hyĩ nikaranaha hotsoikarazata hyrikoso sapybara pehakatsa.

³ Estuba itsikarara iharek skohota nīzororo. Asiba nirata tu. Maku maktsa mywata zeka mora. Hotsoikarazata zikwy humo nīzororo. Kytsa abazubatsa ipokso nipybybaiknaha. Asa hi:

– Amy skaraba myhumo mahani iakyri – niaha. Iwatsahi ituktsa niyziknaha, iharere bo hyĩ nikaranaha.

⁴ Kytsa humo hotsoikarazata okeryk inarahanaha, ata humo hi zikwy ty itsikarara bo nyny niy. Kytsa kino niwatihi itsikarara okeryk inarahanahaze asa hi:

– Itsikarara zuba zikwyrēnikita, hawa tohi ba zikzukninaha – iwa mybarapetu nikaranaha. Amy ty Deus bo zuba tsimypamykysokonaha ty ka atsa tyty itsikarara bo nikaranaha.

⁵ Hotsoikarazata itsikarara pe. – Deus soho humo aharereziubiyhukta! Amy tsimyzehikik naha ty zuba ty! Isoho tsimysapybyri: – niy. Deus byzoje kuarēta dois zitsuze anaeze kytsa nisipeha.

⁶ Iwatahi itsikarara Deus ziharereziubiyiki imysapybara ty nitsasoko. Deus harere soho zisapybyriki. Deus sapy humo zisapybyriki. Asaktsa bijoikpe ezektsa humo kino niwatihi nisisapybyriki.

⁷ Hotsoikarazata itsikarara pe niy:

– Deus tuktsa bo tywatsoronaha. Iwatahi Deus humo batu siakparawy – niy. Hotsoikarazata zikwy ty itsikarara bo nyny niy. Izikwy humo sizubarëtsa aparakbahatsa bo bipyritsa hudikhudikwy ezektsa, meky meky-watu siharere, nanabyitaba sihudikhudikwy ezektsa iwa izikwy humo iharere siakparawy.

⁸ Iwatsahi mybarawy ezektsa sizubarëtsa itsikarara Deus wata mytsaty ahabyitsa nikaranaha. Asa zuba Deus papeu humo sinaro itsikarara bo yhy niaha. Hozipyrykza tsibik wata nira papeu humo sinaro ziwataha. Deus mybarawy nizukni isuknihyize sinaro botu ziwataha, hozipyrykza wata ipapeu humo niy. Asa zuba itsikarara harere bo batu yhy nikaranaha.

⁹ Iwatsahi ikiahatsa tsimyzihihiknaha zeka wabytaha tsiwabyziunaha.

¹⁰ Aty Deus humo sakyriukrënikitsa tyhurukwy zeka ta hurukwy. Aty tabezewy zeka sokorotsapuzeze ty pibeze.

Iwatsahi Deus tuktsa sipunihikrëtsa niyziknaha. Siakubyrisorokrëtsa zeka sinini mykaranaha zeka Deus humo mospirikpotohinaha. Iwa hy.

¹¹ Kyze usta irara tsakyriukrëta bo iktsa iky. Abaka petoktsa niy. Wytyk ekze nizohik. Iharanitsa petoktsa zuba hozipyrykza wata. Hotsoikarazata aksoho wa batu imysapy niy.

¹² Itsikarara tsumuëhïtsa niy. Tsiharererëta niy. Mybarawy ezektsa pe niy:

– Itsikarara harere bo hy taha! Atakta itekihikta nizerorota iharere bo hy taha! – niy. Itsikarara hotsoikarazata zikwy usta bara ty irara tsiakyriukrëta bo nyny niy.

¹³ Iwaze atakta kytsa ziknahabara ty nikara itsikarara hi nikara. Izo bi-joikpe ikny iharere humo inatsuku. Kytsa abazubatsa ana bo nikozonahaze sipybyrëtsa nikaranaha.

¹⁴ Amo kytsa batu zikaha atakta mykara iwatsahi kytsa ipe maha:

– O ikia tsamysapyrëta – nikaranaha. Sispirikpobyitsa tu – atakta imysapyrëta – mybarapetu nikaranaha. Iwataha humo itsikarara inymyryhywy niy. Kytsa abazubatsa iharere bo hy nikaranaha irara tsiakyriukrëta. Kyze kytsa pe niyzo. – Itsikarara hyrikoso tyzokninaha tsimaha! Atakta sokorotsapuzeze ty itekihikta niratatu ata wata ihyrikoso tyzukninahakta! – niy. Hy nikaranaha.

¹⁵ Izoknihita itsikarara hyrikoso waha nipykze irara iakyriukanikita ibo hu niy. Iwaze itsikarara hyrikoso wata inahyryzikpo, mopamykysoko. Kytsa iharere bo yhy ahabyitsaktsa tysibaiknaha.

¹⁶⁻¹⁷ Itsikarara hi:

– Kanaro ahanuryk taba ahatsyhyrysukpe humo tsiwatahanaha. Ahaokpe humo kino niwatihi kanaro tsiwatahanaha. Kanaro ty tywataha byizeka mysisininiwy – niy.

Iwa mybarawy ezektsa abazubatsa nisipeha. Kytsa batu sibo tysapykyk, abazubatsa, myhyrizikwanitsa, pykyhy myhyrizikbyikitsa sinamyrëtsa, sinamybyitsa, asaktsa tsumuëhïkïnaha batu okyrysaroko, asaktsa simozikrëtsa nikaranaha iwa abazubatsa maha siokpe humo inaro tsiwatahanaha, sitsyhyrysukpe humo kino niwatihi inaro tsiwatahanaha. Asaktsa inaro humo tywataha byizeka ba zikhuaknaha sinamy ba zikhuak zikaha. Iwatsahi batu amy tohi tyhuak niaha. Batu amy tohi ty nyny zikaha. Inumero bo iktsa tsimahaze inaro soho bo mytsaty tsimykaranaha.

¹⁸ Ana bo hi tsinymyrykynahaktsa! Tsinymyrykynahaze, iwatahawy kino niwatihi ahahyrynimyrëtsa. Iwatahawy maku naro wata. Inumero 666 my.

14

Deus tyryktsa nisakibazikiknaha.

¹ Kyze usta bo katsotyspykze iktsa iky. Atakta nira hozipyrykza tsibik wa ta ibo iktsa iky. Hara jobo Siaō inarokota harabete niriktohoko. Kytsa abazubatsa ituk niaha sêto kuarêta kwatero miutsa. Inaro ty siokpe watahatsa, izo naro kino niwatihi siokpe watahatsa.

² Iaksoho bijoikpe ikny iwabyky. Iaksoho ihiridawy iakpyri waha. Iaksoho hyritsik bipyri wa niukuru. Sipamykyziuwyttsa sisukasapyrêtsa nisakibazikiknaha.

³ Deus pauk baze nisakibazikiknaha 144.000 ahatsa. Sisakibazikezytyk nisakibazikiknaha. Siraratsa sispitu sapetoktsa sapetoktsa iwa siokze tapara taypykyknahatsa wîte kwatero ahatsa niwatihi sisakibazik iwaby. Sizubarêtsa anasoho batu sihyrinomyry. Asa zuba 144.000 miutsa botu Deus bo nisioktyhyryk Deus tuk mynapykyryknaha asa zuba sisakibazik ezytyk humo sihyrinomyrêtsa hÿ.

⁴ Asaktsa wasani nikaranaha sihyrizikporêtsa Deus harere bo hyÿ ziknakaranaha. Asaktsa hozipyrykza tsibik wata atahi nihyrikosokda ituk napykyryknaha, Sesus harere bo hyÿ mykaranaha. Mybarawy ezektsa sispirikpobyitsa situk ba zikapykyryknaha. 144.000 miutsa Deus bo nisioktyhyryk iharere zuba nizihikiknaha. Sesus Kiristu nisioktyhyrykta. Abaka tahawahi Deus tuk mynapykyryknaha hÿ.

⁵ Utsa bo batu zikaha. Simysapyrêtsa ba zik mospihikbatanaha.

Bijoikpe iknyktsa harakykbyihi sisoho nitsasokonaha.

⁶ Kyze usta bijoikpe iknykta bo iktsa iky. Atahi joboni nitsatsaka. Mybarawy ezektsa bo Deus wasania ty nitsasokoro anahumo hi zipaha. Abazubatsa mybarawy ezektsa bipyritsa bo, nanabyitaba sihudikhudikwy ezektsa bo, ityryktsa sizubarêtsa meky meky watu siharere iwatsa sibo abazubatsa Deus wasaniha nitsasokoro. Deus wasaniha humo batu pyk, tawahi kytsa ihumo sispirikporêtsa ana hi motsasokonaha.

⁷ Bijoikpe iknykta opykani hua hua niy:

– Deus harere humo tsiwabytoktonaha! “O Deus ikia zuba tsasopykziurêta, aharere humo ma tsimykaranaha” tsimahaktsa! Iwa tytsaso. Aibani zuba kytsa abazubatsa huak ty sibo nyny my. Hawa mybarawy eze ziknakaranaha humo sibo ihuak ty nyny my. Deus hi bijoikpe, mybarawy, buburu zuba pupuputsa iwatsa nisisukni atahi ihuak ty mybarawy ezektsa bo nyny my – niy.

⁸ Kyze usta bijoikpe iknykta taparababakta hapik niy. Iwaze niy:

– Asaktsa sizikwytsa Babironija ezektsa nepykbanaha abazubaha inarokoha. Simysapybyitsa nikaranaha tsahi nepykbaik. Hawa kytsa utsa bo tsôsî waha ty nyny niaha iwaze ihumo simopykyhybyitsa mynapykyryknaha siwatsa niaha. Abaka sizikwy nepykbaik, hawa wihara nibibibaikze wytyk bo natsuku iwa sizikwy nepyk. Sisapy natsehpetok – niy.

⁹ Kyze usta bijoikpe iknykta, iapik niukuru abaka harakykbyihi joboni nitsatsakanaha. Jaksoho opykani hua hua niy atahi:

– Asaktsa itsikarara, ihyrikoso kino niwatihi ispe: “O ikia tsamysapyrêta tsimy” nikaranaha. Asahi sinini mykaranaha. Asaktsa sityhyrysukpe panuryk taba inaro ziwatahaka siokpe humo kino niwatihi ziwatahaka iwatsahi sinini mykaranaha –.

¹⁰ Deus sihumo takyriki, iwatahi batu isty pokzitsi iwatahi mysimyit-sapyriwybaka. Batu isty wak. Izo eze sinini mykaranaha, ěsopire moko-robaka anaeze mysisininiwynaha. Atakta hozipyrykza tsibik wa ta nira, iokze sinini mykaranaha. Bijoikpe iknykta Deus tsumuěhĭtsitsa kino niwatihi sinini mykaranahaze sibo mokozokonaha.

¹¹ Sinini mykaranahaze izo zatata jobo tawahi myzukuruk. Unata, okoroze niwatihi zatata piwezoikik, asaktsa sinini ykarawy bo tahawahi napykyryknaha. Asaktsa itsikarara, ihyrikoso kino niwatihi ispe niaha:

– Ikia tsamysapyrěta – niaha. Asahi inaro ty tahanury humo ziwataha abazubatsa sinini ykarawy bo tahawahi napykyryknaha. Anaeze batu sibirywyhuk.

¹² Iwatsahi Deus tuktsa – ahapunihikrětsaktsa – tynakaranaha. Siakubyrisorokrětsa tu zeka sinini mykaranahaze Sesus humo myspirikpotohinaha. Asaktsa Deus harere bo hyĭ mynakaranaha.

¹³ Kyze jaksoho bijoikpe ikny kape niy:

– O mybarawy ezektsa wastuhu sakyriukrěnikitsa Deus tuktsa mysibanaha. Sesus humo sispirikporětsa iwatsahi mysibanaha. Iwa tsatu sakurětsa maha. Ana kino tsiwatahakta! – niy. Deus hyrikoso tihi:

– Yhĭ, amy ty wasape tsimy. Mybarawy eze tuze Deus hyriziktsokzawy humo zuba nikaranaha, ihumo zitsumuěhĭkĭnaha.

Niakbabanahaze tahabyrynaha, hawa sinini ziknakaranaha ana humo hi myspiriktsokdanaha. Sihyriktsokzawy huak situk napykyryknaha – niy. Iwa Deus hyrikoso niy.

Mydisahawytsa izozikwy.

¹⁴ Kyze katsotyspykze ikozozo. Bijoikpe zatata tsibarazarěna bo iktsa icy. Maku hyrity wata bijoikpe zatata bete nidyhyky. Ouro ty itsorikihita niy. Itsipyk eze penari ty wabehata niy. Tsitsarirěta.

¹⁵ Usta bijoikpe iknykta Deus hudikhudikwy ezekta izoi. Atakta bijoikpe zatata bete nidyhykyta bo huahua niy. Ipe niy:

– Kytsa disahawytsa watsa tysizoziknahaktsa! Iwaze babatu wihara wata nakymy. Iwaze penari ty tysizoziknaha! – niy.

¹⁶ Atakta bijoikpe zatata bete nidyhykyta tyk bo niy. Mybarawy bo penari ty nisizozikba. Iwa abazubaha zizozikbaik.

¹⁷ Kyze usta bijoikpe iknykta bo iktsa icy. Deus hudikhudikwy ekze izoi. Ata kino niwatihi penari ty wabe niy. Titsarirěta.

¹⁸ Usta bijoikpe iknykta jokmorěnikia wezowy niparak. Atahi izo perykytsa niy. Atakta huahua niy. Tatukta bo penari zibykykta ipe niy:

– Duabohotsa nijakuknaha hĭ. Duabohotsa suk penari ty tynasisukzyzyk! – niy.

¹⁹ Iwatahi wytyk bo niy. Duabohotsa suk nasisukzyzykba. Nepykbanahaze duabohotsa suk bo pokpok niy, anaeze duabohotsa nisipypyrikiknaha. Deus kytsa iharere bo batu hĭ mysimyitsapyriwy. Hawa duabohotsa tsik zipypyrikbanaha, iwata kytsa Deus humo sispirikpobyitsa sinini mykaranaha.

²⁰ Hudikhudikwy pauk bo duabohotsa nisipypyrikiknaha. Duabohotsa tsik tsizubarěna zipypyrikiknaha ana hi sispirikpobyitsa spu waha. Kytsa Deus harere bo batu hĭ nikaranaha sispu tsizubarěna teresětos kirometeros sispu mosokok niaha. Sispu meteros estuba zihiboani mopupuku. Kytsa Deus harere bo batu yhĭ sispu sok niaha hĭ.

15

Bijoikpe iknyktsa mymyitsapyriwytsa tuk katsotyspyk eze iny.

¹ Kyze bijoikpe eze ustsaba zubaha inymyryhywy bo iktsa iky. Batu aty tohi humo ihyrinymyryhuk. Tsihokdaharēna batu inymyryhy. Ana humo hi kapybyrēta ikykara. Usta tsyhyry humo petok ziakyri sete bijoikpe iknyktsa bo iktsa iky. Asaktsa myitsapyriwytsa usta tsyhyry humo petok zibykyknaha. Ana kino mybarawy bo myzipaparanahaze Deus iakyriwy mopyk. Deus ispe niy:

– Kamyitsapyriwytsa mybarawy bo tsipaparanahaktsa! Mybarawy ezektsa bo asaktsa kahumo batu sispirikpo iwatsahi kaharere humo batu yh̄ nikananaha sinini mykaranaha – niy.

² Kyze buburu zuba widero waha bo iktsa iky, Buburu zuba izo ty tsakykyhy hawa iwatatu tsitsikworororēta. Buburu zuba baze kytsa bo iktsa iky. Deus botu sipamykyziuwyttsa ty sibo nyny niy. Asahi itsikarara bo niwatsoronaha, ihyrikoso ana izikwy nepykba niaha. Atakta inaro ihumo kino niwatihi niwatsoronahaze izikwy hi nepykba. Abaka Deus bo nipamykyziukunaha.

³ Deus bo nisakibazikiknaha. Moises Deus tsumuēh̄tsa harere ty nisakibazikiknaha. Atakta nihyrikosokda hozipyrykza tsibik wata, iharere kino niwatihi nisakibazikiknaha. Asahi:

– O ikia hi tsimymypokzitsiki ikia zuba Deus babata.

Apunihikrēnikita ba hawa tohi tasukninaha.

Hawa ha tsimy kara zeka tisapyrēna h̄y.

Tsahyrizikporēta hawa tsimy kara naha wasani.

Ikia zuba aparakbaha tsimysipeha.

Kytsa bo tisapyrēna ty sibo nyny tsimy.

Wasape haty zuba tsimypamykyso.

⁴ Iwaze abazubatsa aharere humo piwabytoktonaha.

Aparakbaha ikia abazubata maha. Ikia zuba tsasopyksapyrēta.

Batu isapybara ty ziky. Iwaze parakbaha abo mozumunaha.

Mybarawy ezektsa abazubatsa ape maha. “O ikia zuba tsamysapyrēta.

Ikia zuba wasani tsinakarata ana hi tsinymyrykynaha” – nikananaha.

Iwa kytsa buburu zuba baze Deus bo nisakibazikiknaha.

⁵ Kyze Deus wahoro zubata bo bijoikpe eze ikozo. Anaeze Deus sapy zoksapare niy.

⁶ Bijoikpe iknyktsa sete ahatsa Deus wahoro zubata eze ziponaha. Usta tsyhyry humo petok ziakyri sete ahatsa myitsapyriwytsa zibykyknaha. Sisukarikpu karikpukrētsa sisukbarazarētsa h̄y, ouro tahazikwoekaīwy ty tahapaukpuke buruk haīhaī niaha.

⁷ Siraratsa sapetoktsa sapetoktsa ahatsa siupurusuktsa hyrity watsa ty sibo nyny niy. Ouro suknihitsa ty niaha. Estuba sirara ispituta, sete sioporosuktsa hyrity watsa ty sete bijoikpe iknyktsa bo nyny niy. Estuba estuba zuba siwatu niy, itsaeze Deus kyriwy ty inaharek duabohotsa tsik hyrity waha. Atahi koikny bakta tu tawahi ispitu, ikyriwy hi siporoktsa eze niy.

⁸ Deus wahoro zubata eze zatata inaharek niy. Deus ipunihikrēnikita humo zatata tsizubarēna. Ata hi imysapyrēnikita anahumo hi zatata zuba iwahoro eze niyzik. Batu aty tohi ba ziksuk, zatata pokso. Bijoikpe iknyktsa myitsapyriwytsa nasipaparabanahaze iwatsahi kytsa Deus wahoro zubata bo mynapupunaha. Sininikarawy mopykbaze iwaze zatata mohokda.

16

Sioporosuktsa hyritywatsa anaeze Deus iakyriwy duabohotsa tsik waha inaharek.

¹ Kyze iaksoho opykani ha iwaby, bijoikpe iknyktsa sete ahatsa sibo niy. Deus wahoro zubata ikny niy. Ata hi:

– Tsiksinaha! Mybarawy bo pāotaha! Sioporosuktsa hyrity watsa sete ahatsa Deus ykyriwy inaharek tsisusunaha! Deus ykyriwy anaha hi sispirikpobyitsa bo suretaha! Asaktsa iharere bo batu hỹ zikaha iwatsahi sibo hi tsihuhikainaha – niy.

² Tapara estuba bijoikpe iknykta inaparak. Taoporosuk hyrity wata ezeky ty wytyk bo suhikare niy. Atsoko kytsa abazubatsa asaktsa siokpe humo itsikarara naro iwatahaha, asaktsa itsikarara zoknihita iharere bo yhỹ nikaranaha. Asa bo hi siakōrōrōtsa sitsapyrētsa niaha. Mobibibakanaha siakōrōrōtsa humo. Iwa tapara bijoikpe iknykta taoporosuk ezeky ty zipukuhik.

³ Kyze usta bijoikpe iknykta taoporosuk hyritywata ezeky ty buburu zuba bo zipuku. Atsoko pihik siakbatsa spu wa niyzik. Iwatsahi piknutsa pihikyrytsitsa niakbabaiknaha. Botu petoktsa bijoikpe iknyktsa siupurusuktsa ezeky ty surehik niaha.

⁴ Kyze usta bijoikpe iknykta taoporosuk hyritywata ezeky ty zipuku. Pihik zitsiktōtōtōkō. Pupuputsa bo kino niwatihi zipuku. Iwaze ana pihik kino ispu niyzik. Botu harakykbyihi bijoikpe iknyktsa sipurusuktsa ezeky ty sure niaha.

⁵ Kyze usta bijoikpe iknykta bo ikozo atahi pihik perykytsa Deus bo nipamykysoko. Iharere iwaby. Atahi:

– Ikia koikny baktatu, tsiziurēnikita. Tsamysapyrēta tisopyksapyrēta. Simysopyksapybyitsaktsa ahumo simyitsapyrirētsa ana hi wasani my. Aharere humo tisapyrēna.

⁶ Asaktsa asohotsitsa, atyryktsa kino niwatihi ziknasibakanaha, sihumo sispu nisoko. Aba ustsā spu mosuze ana hi sihuak – niy.

⁷ Kyze iaksoho jokmorēnikia iwezowysapy ikny iwaby – O mypokzitsikitsa, ikia zuba Deus babata. Apunihikrēnikita ba hawa tohi zasukni-naha, simysopyksapybyitsaktsa ahumo simyitsapyritsa ana hi wasani my. Tsasopykziurēta hawa sinini nikaranaha tisapyrēna – niy.

⁸ Kyze usta bijoikpe iknykta taporosuk hyrity wata ezeky ty zipuku. Haramwe bete zipuku. Iwatsahi mybarawy ezektsa izo humo niharakoronaha.

⁹ Iwatsahi simysopyksapybyitsaktsa izohani humo niharakoronaha. Asaktsa simysapybyitsa ziknakaranaha ba zimoewynaha. Siharerewabymybarētsa. Deus ipunihikrēnikita atahi myitsapyriwytsa mybarawy ezektsa bo mysipehaka. Iwatsa tu simysopyksapybyitsaktsa Deus soho ty batu tyso – ikia tsazuba mynakata – iwa batu tyso. Siharerewabymybarētsa. Deus soho pisapybyrikinaha. Botu siharakyktsitsa zuba iwa bijoikpe iknyktsa sioporosuktsa eze ky ty sure niaha.

¹⁰ Kyze usta bijoikpe iknykta taoporosuk hyrity wata ezeky ty zipuku. Itsikarara dyhywy bete zipuku. Iwatahi isapy bo miwa niyzik. Miwa hiba. Asaktsa iharere bo hỹ nikaranaha miwa tsahi pyik pyik nikaranaha. Tahamyitsapyri humo tahastiāriktsa nisiboronaha.

¹¹ Iwatsatu Deus soho zisapybyrikinaha tahamyitsapyri humo. Simysapybyitsa nikaranaha batu tymoewy. Sakōrōrōtsa humo Deus atakta bijoikpe ezekta, isoho pisapybyrikinaha. Botu mytsyhyrytsa wa bijoikpe iknyktsa sioporosuktsa ezeky ty surehik niaha.

¹² Kyze usta bijoikpe iknykta taoporosuk hyrity wata eze ky ty zipuku. Buburu bo Euperetes inarokota zipukuhik. Iwatahi buburu nitsehebaik. Haramwe sukewy taba mypehatsitsa mozumunahaze siske nikymy. Iwaze pitsikzanaha.

¹³ Kyze hyrikoso sapybara harakykbyihi bo iktsa icy. Asaktsa hawa batu simysapy kytsa sihumo mytsaty mykaranaha. Mysimytsatyhykynaha. Hyriketsa watsa niaha. Hyrikoso isapybara estuba hotsoikarazata sake eze izoi. Usta ihyrikoso sapybara itskarara sake eze izoi. Usta Deus so-hokotsabyita tu isake eze izoi.

¹⁴ Hyrikoso sapybara harakykbyihi sipehakatsa Satanas. Amo kytsa batu zikaha, astsatu nikaranaha, siwatawyhytsa nikaranaha. Nanabyitaba sihudikhudikwytsa bo niaha. Abazubatsa sipehatsa bo siakzohotsa niaha. Kytsa abazubatsa niwatsoro tsihikiknaha. Iwaze siharere humo kytsa abazubatsa niwatorokonaha. Deus tuktsa nisisukyrikinaha. Nawa puruze nisisukyrikinahaze Deus zikwyrënikita myzubahatsa bo nisiwatawyky ba hawa tohi zikzukninaha ana humo hi sihyrinymyrëtsa.

¹⁵ Kiristu tihi:

– Wabytaha! Uta mozumuze, kytsa katy pery ahabyi zeka mozumu itsyhyryboata wata. Kytsa papatu mozumu. Asaktsa pikperykynahatsaktsa mozumuze asahi sakurëtsa. Kytsa tahasuk pipokzitsikinaha zeka asa watsa maha. Ba tahasikpyby ziyknaha – niy. Iwa Kiristu niy.

¹⁶ Kyze hyrikoso sapybara harakykbyihitsa humo kytsa pehatsitsa inakypyknaha, sisapy bo inasioktyhyryknaha. Anaeze Aremakedõ inarokoha. Iwa Ebereu harere my. Aba usta tsyhyry humo ziakyri bijoikpe iknykta sioporosuktsa hyrity watsa eze ky ty zipuku.

¹⁷ Iwaze bijoikpe iknyktsa ziharawybabata taporosuk hyrity wata ezeky ty jobo to zipuku. Iaksoho Deus wahoro zuba idyhywy ikny opykani kakaik niy.

– Niwazuba – niy.

¹⁸ Iwa niyze siaksoho nitotoko nahaze ky wa ziwabynaha. Wytyk nityhyrykyk tu nitydydykyk tu niwahaka batu mynyhy. Kytsa tahapetu nikaranaha – Isuknihibyize wytyk nawa batu aha. Aba zuba niy – nikaranaha.

¹⁹ Babironija inarokoha sihudikhudikwy abazubaha inakarakbaik nataba nataba aha inakarakbaik. Utsa hudikhudikwy abazubaha Deus harere humo zipykba. Deus Babironija ezektsa nisiperyky tahamysapybyi pi-moewy naha hi, ziperyky. Asaktsa imysapybara ty ka batu ity moewy iwatahi takyriwy sibo zipeha, iwaze sihudikhudikwy inakarakbaik. Sinini ykarawy bo nikaranaha. Deus takyriwy duabohotsa tsik waha niy. Duabohotsa tsik batu pihik ty tsakykyha iwaha Deus takyriwy iwa hÿ my.

²⁰ Tsikzikdihitsa sizubarëtsa nihokdanaha. Hara jobonikia kino niwatihi nihokdabaik.

²¹ Harahareziktsa bijoikpe ikny inatsukurunaha. Sitsakyrikrëtsa. Wastuhu kuarëta kiros itsakyzik. Kytsa bete inatsukurunaha. Sinini nikaranahaze Deus zisapybyrikinaha. Siskyryziubyitsa tu Deus soho zisapybyrikinaha, harahareziktsa bijoikpe ikny inatsukurunaha iwatsahi Deus soho zisapybyrikinaha. Iwa hÿ.

17

Wytyk sasabyitsa iakparawytatsa itsikarara ahatsa.

¹ Iwaze estuba situkta bijoikpe iknykta sete ahatsa tukta kape nikara. Taoporosuk ty wabe ahata kabo izumu. Kape niy:

– Pany! Uta Deus sihudikhudikwy humo mysisinininaha humo abo piwatawy – niy. Sihudikhudikwy buburu sak ezeky niy. Anaezektisa simysapybyitsa mykaranaha imysapybara zuba mynazihikiknaha. Asahi wytyk watatsa atatsahi kytsa humo mozuruku. Atatsa makutsa iakparawytatsa sizubarëtsa zikzipyrirykyknaha sihudikhudikwy ezektisa deusbyitsa tsizubarëtsa siakparawy, – O deustsa babatsa – mytsaty ahabyitsa mykaranaha. Iwatahi sihudikhudikwy Deus myzipyk.

² Kytsa sizubarëtsa pehakatsa atatsa nisimyiki, atatsa humo imysapybara mynazihikiknaha. Kytsa abazubatsa niwatihi atatsa humo pisapybyikiknaha. Sispirikpobyitsa ustsā bo tsōsī hyrity waka siopuwy ty nyny maha, iwatsahi sityryknymyryhybyitsa nikaranaha atsatyty atatsa nisimiyiwyky. Atatsa watsa sihudikhudikwy ezektisa kytsa Deus bo batu yhÿ mykaranaha iwa nisimiyiwynaha.

³ Iwatahi Deus hyrikoso kasapy iziakse, iwaze bjoikpe iknykta jerukbara bo zikoktyhyryk. Anaeze wytyk bo ikozo. Atatsa itsikarara itsaririhitababata bete nidyhyky iny. Inury humo nanabyi humo imysapybara iwatahata. Deus soho bara tu iwatahaha. Sete harektsa niy. Iharanitsa humo kino niwatihi mytsyhyrytsa nesepyk niy.

⁴ Wytyk suk tsaririhitababata ty korobyk niy. Inapiritsa ouro hi sikarikpu karikpukrëtsa niy. Harahare zipyryktsa sipokzitsiarëtsa, peroratsa kino niwatihi sipokzitsiarëtsa. Atatsa itsipykeze ioporosuk zibykyk, anaeze isapybara hi inaharek. Atatsahi ziknasisapybyrikitatsa ana humo hi ioporosuk inaharek.

⁵ Iokpe humo iwatahahatatsa niy. Inaro iwataha batu aty tohi inaro humo ihyrinymyry. Inaro hi:

– Atatsa katsa simysapybyiza je iakparawy Babirō watatsa. Atatsa hi kytsa nisimiyiwyikiktatsa. Iwaze sasabyitsa simysapybyitsa mykaranaha – niy. Anahi iokpe humo ziwatahaka.

⁶ Atatsa hi Deus tyryktsa spu zikuku iwatatsahi nityryknymyryhybyi, tsōsī humo hi, tsiydikrëtsa Deus tyryktsa abazubatsa siakbatsa, asaktsa Sesus harere bo hyÿ mykaranaha iwatsahi ihumo sispirikporëtsa asahi nisiba.

Atatsa bo iktsa ikyze kapybyrëta ikyzik.

⁷ Bjoikpe iknykta kape niy:

– Amo skaraba tsimykotoktoko niy. Ahyrinymyrybyita tu sa tsapybyrëta. Abaka amy bo iktsa tsiky abo motsasoziu. Wytyk itsikarara bete nidyhyky sete iharektsa mytsyhyrytsa nesepyk iharanitsa iwa sisoho abo motsasoziu – niy.

⁸ Itsikarara tsinyta tapara ka ispitu. Abaka batu. Aibani tawahi nira ihokepomobara ikny myzoik iwaze sinini ykarawy bo mykara. Asaktsa tapara kino Deus papeu humo sinaro watahabyitsa itsikarara pokso sipybyrëtsa. Nanabyizuknihybyize Deus papeu humo botu ziwataha, kytsa Deus tuk tahawahi mynapykyryknaha sinaro Deus papeu humo botu ziwatahaka. Asa hi Deus papeu humo sinaro watahabyitsa itsikarara pokso sipybyrëtsa nikaranaha. Taparaka itsikarara ispitu abaka mohokda. Aibani zuba mynatakahazo ana humo hi sipybyrëtsa:

⁹ Atakta myhyrinymyrywy baba zuba amy iktsa tsiky aha humo tsihyrinymyrëta. Atakta pykyhytu mytsatyziu mykara. Harektsa itsikarara sete, hara jobonikia sete maha. Atatsakatsa haratsa bete nidyhyky. Iharektsa mypehakatsa watsa maha. Myhudikhudikwy mypehakatsa watsa iharektsa maha.

¹⁰ Sipehakatsa mytsyhyry wa botu myokzanaha. Usta tsyhyry humo ziakyri maha tawatahi mysipehaka. Iwaze ustakta abahi batu itykaha, iwaze

natakahaze kino ba iwatatu zikapykyryk atsoko mohokda, iokboha zuba mysipeha.

¹¹ Itsikarara tapara ispitu ziknapykyryta tu abaka batu botu nira nihokda, ata hi ipehatsa, sete pehatsa watsa, ata hi sinini ykarawy bo my.

¹² Iharanitsa mytsyhyrytsa watsa tsiksinynahatsa hi. Asa hi mypehakatsa moziknaha. Aiba zuba sihudikhudikwy mysipehanaha simypehatsa mytsyhyrytsa watsa destsa mykaranaha. Iwatsatu simypehawu aba zuba itsikarara humo hi mysipehakanaha, jokboha zuba uma ora zuba mysipehanaha.

¹³ Asaktsa tahatuk yh̄y mykaranaha, estuba zuba wata mytsaty mykaranaha. Iwaze tahamyrawy ty itsikarara bo nyny maha. Iwatsahi iharere bo yh̄y mykaranaha.

¹⁴ Asaktsa hozipyrykza tsibik wata ibo mowatsorokonaha pibeze tsihikiknaha. Atahi atakta abazubata sihumo mytasoho. Atakta hozipyrykza tsibik wata sizikwy nepyk. Hozipyrykza tsibik wata ituktsa, ziwatawynahatsa, asahi iharere bo hȳy mykaranaha iwa situk sipehatsa bo mowatsorokonaha. Hozipyrykza tsibik tsizikwyr̄eta tu ba hawa tohi zikzukninaha simyrawy zepykba iwatahi taharere sotsatuk iwaze ituk zinymyrykynahatsa tuk nasepykwy. Atahi abazubata my.

¹⁵ Bijoikpe iknykta kape niyzo:

– Buburu zuba tsinynaha. Atatsahi wytyk imysapybyiki tatsa, makutsa iakparawykytatsa, atatsa hi buburu sak eze nidyhykytatsa. Asahi aparakbaha meky watu sihareretsa. Nanabyitaba sihudikhudikwytsa – iwa.

¹⁶ Iharanitsa mytsyhyrytsa watsa tsiksinynahatsa itsikarara tuk wytyk imysapybyikitatsa humo tahakyrikinaha. Inamy ty piaksebaiknaha inury bo iktsa maha isuk kino pibobobaiknaha isukbyi tatsa pereknaha itsani piboronaha motare naha ka izo bo pioktsoktsoknaha iwaze mokorobaik.

¹⁷ Deus humo mypehawu mykaranaha. Atatsa pibezenahaze ana hi Deus nizihikik. Sipehakatsa asaktsa tahapetu sisopyk:

– Myzikwy itsikarara bo nyny tsimaha – niaha. Hawa Deus nizihikik ana hi nikaranaha, tubabatu botu nipamykyso iharere bo yh̄y mykaranaha.

¹⁸ – Atatsa wytyk tsinynahatatsa katsa kytsa ziknasisapybyiriki atatsa hi sihudikhudikwy aba zuba hyrity waha my, sihudikhudikwy abazubatsa mypehakatsa atatsa siakparawy. Atatsa harere bo yh̄y mykaranaha – niy. Iwa bijoikpe iknykta niy, hawa ha iny nahaka kabo nitsasoziuku.

18

Babironija naktsihipetotokbaiknaha.

¹ Iwaze usta bijoikpe iknykta bo ikozozo. Bijoikpe ikny inasikik. Tsipuni-hikr̄eta. Tsimysapyr̄eta tu okoroze ky waha tuk inasik mybarawy bo zihyrikaroba.

² Iaksoho opykani kazi nikara. Atahi:

– Sihudikhudikwy Babir̄o abazubaha inarokoha hudikhudikwy inakarakbaik. Nepyk. Batu aty tohi isapy bo ba zikzumuzo. Hyrikoso sapybara hyrikosotsa zuba niwatihi sisapy mozik. Asaktsa sisarakatsa kytsa ba zik-siboronaha simytsazor̄etsa ahatsa sisapy moziknaha.

³ Babironija ezektsa kytsa abazubatsa sipehakatsa nisimiywynaha. Batu imysapybara nisiakpybanaha. Hawa sakmyitsa kytsa sispirikpobyitsa usta kytsa bo ts̄s̄i siukpuwy ty sibo nyny maha, iwaze sityryknymyryhybyitsa moziknaha atsatyty isapy ezektsa nisimiywykynaha. Sipehakatsa namy

tsizubarēna ziaksenaha, amy bo iktsa niaha atsatu nizihikiknaha. Amy ty nizihikiknaha atsa tu ziaksenaha. Iwatsahi sinamyrētsa niyziknaha – niy.

⁴ Iwaze usta iaksoho bijoikpe ikny iwaby nawa nikara.

Sihudikhudikwy ezeka tuparakik katyryktsa ekze tuparaknaha
ba imysapybara ty taha

pahasininiwy nahaze kino ba situk tsimaha,
iwa tsimaha zeka ba situk sinini tsimaha.

⁵ Sihudikhudikwy ezektsa simysapybyri izozoha wa ziyzik.

Bijoikpe bo zumu. Imysapybyri atatsa tuk nikaranaha ana humo hi
atatsa tuk sinini mykaranaha.

Deus humo ba zikspiriktsokda kytsa tsiksibakanaha humo.

⁶ Iwaze ikiahatsa kino ahabo nyny nikaranaha jokboatu iwatsahi ikiahatsak-
tsa abazuba ibo nyny tsimaha.

Tsipihuak nahaze kino atatsa ahabo nyny nikaranaha humo ibo tsipi-
harapobetehenaha.

Ahaoporosok ty kino tyharek babatu taha.

Ahabo tamyrawy nyny nikaranaha ka tsiharapobetehenaha.

⁷ Tapara atatsahi:

– Ikza kaziurētatsa.

Kanamysapokzitsarēna. Kanamyrētatsa my hỹ – niy.

Deus ibo isininiwyty aba zuba taha iwaze isukatsihik humo ka.

Tapara – Kanamyrētatsa, kakurētatsa nikara.

Tapetu ziknakara. Tapetu zuba isopyk iwa ziknakara.

Sasabyitsa pehatsa watatsa modyhyky

ikza katsa haramukukabyitatsa ba sinini zikyzo.

⁸ Ana humo hi asta okoroze tu zuba sinini mykara.

Tsimyitsapyrētatsa. Tsiaraparētatsa.

Tisukatsihikrētatsa. Sinini ykarawy bo my. Atatsa izo bo myharakoroba –
niy. Iwa hỹ. –

Mypokzitsikitsa humo atahi Deus zubata izikwyrēnikita tu ba hawa tohi
zikaha.

Atakta ihuak ty atatsa bo nyny my – niy.

Iwa iaksoho bijoikpe ikny kape niy.

⁹ Babirō mokorobaze mybarawy ezektsa pehakatsa ihumo
mopukarakanaha. Mopuziukunaha. Asaktsa ustsya mysimiwykynaha,
taha bo zuba mytsaty nikaranaha asaktsa Babirō zatata bo iktsa mahaze
mopuziukunaha.

¹⁰ Tahapybyspykēryktsa tu sihudikhudikwy mokorokonaha bo moko-
zokonaha. Nokponi tu morikto riktohokonaha ipokso iwatahi:

– O Babironija ikia sihudikhudikwy abazubaha myhudikhudikwy zik-
wyrēnikia iwaha tu Deus humo atsoko uma ora eze zuba botu sinini
tsimykara – mykaranaha.

¹¹⁻¹² Iwaze mynamy huakaktsitsa mybarawy ezektsa kino kaka maha,
iwaze hi mopuziukunaha ipokzi iwa zeka ba aty tohi mynamy zihuak
mykaranaha. Mytyryzikihi humo ja ba zihuaknaha mykaranaha. Ba aty
tohi my ouro ty parata ty harahareziktsa sipokzitsianikitsa ba kōpara zikaha.
Iwaze perora bara humo kino ba, usa panu jakarabara humo kino ba panu
tsaririha humo zityryzikiknaha humo kino ba, hozipyrykza zityryzikihi
humo kino ba anahi tsaririha ba nanabyi humo kino ba, nanabyi hwitsa
suknihi humo kino ba hwi aba zubata humo kino ba pero ty zuknihita kino
ba barōse humo kino niwatihi batu ba.

¹³ Batu aty tohi mynamy disahawy ty kanera tsakykywy humo kino ba jokmorēnikia miha ba zihuak naha. Duabohotsa tsik, itutawy tiriko upa humo iwaze tirikotsa ziktsa humo kino ba pikuzatsa hozipyrykzatsa, wytykburuktsa kytsa tarabajaziu mykaranahatsa asahi okyrysaro humo sibo nyny aha hokbyitsa kytsa ahanamy watsa ba asaktsa ba zikwaknaha.

¹⁴ Kytsa sinamy ziaксеkenahatsa Babirō ezektsa pe maha:

– Isapyrēnikia ty tsimyzihikiknaha hana bo ja. Ahanamy nihokdaba. Taparaka ahanamy tsizubarēna ahasapyrētsa hỹ. Abaka nepykbaik, ahanamy tawahi nihokdaba. Ba ziaксеzonaha – maha.

¹⁵ Ziaксеkenahatsa nokponi tu niriktoriktohokonaha zatata bo iktsa nikaranaha. Asaktsa ihumo sinamyrētsa niyziknaha. Sipybyrētsa nipuziukunaha. – Katsa kino niwatihi tsimyyharakorobanaha kok – nikaranaha. Iwaze nipuziukunaha.

¹⁶ Asa hi:

– Sihudikhudikwy ezektsa simypokzitsiubyitsa maha. Sihumo mysukat-sihikrētsa. Tapara amy tsipokzitsarēna ty zuba korobyk nikaranaha. Sisuk ty tsaririta niy. Hozipyrykza zi sisuk tisapyēna iwaze ustsa sibo iktsa niaha. Sisapyrētsa ty ouro ty, harahare zipyryktsa tsipokzitsarēna ty peroratsa ty iwa tahasuk humo ziknakaranaha.

¹⁷ Iwatatsahi uma ora eze zuba sinamy tsizubarēna nepykbaik. Tsarahatsa sibudurēnikitsa perytsitsa sitsumuēhītsitsa jokeze niukurunahatsa buburu zuba buruk niukurunaha – iwatsahi nokponi tu niriktoriktohokonaha.

¹⁸ Izatata bo iktsa nikaranahaze:

– Myhudikhudikwy tisapyrēna. Usta hudikhudikwy batu nawaka, tisapyrēna – niaha. Iwa kazi nikaranaha.

¹⁹ Tahasopyk ty wytyk tazyty taharatōtōkōnaha, wytyk tazy ty tutu nikaranahaze sisukatsihikrētsa nisiwatawy. Nipuziukunahaze:

– O sihudikhudikwy ezektsa simypokzitsiubyitsa. Tapara sinamyrētsa. Tsarahatsa budutsa perytsitsa sihumo sinamyrētsa niyziknaha, Babirō ezektsa sinamyrētsa tu siokryrsaro sibo zihuakikiknaha. Abaka nihokda. Uma ora zuba hana bo ja. Tawahi nepykba – nikaranaha.

²⁰ – O bjoikpe ezektsa ahakurētsaktsa! Deus tyryktsa, Deus sohokotsa, Deus ykzohotsa tsasohokotsa iwatsa ahakurētsaktsa! Deus humo sihudikhudikwy ezektsa sinini mykaranaha. Iharere humo sinini mykaranaha. Asaktsa zahasukyriekiknaha abaka Deus ihuak ty sibo nyny my. Siakyriukrētsa abaka ihuak humo sinini ykarawy bo maha – my. Iwa bjoikpe iknykta kabo nitsasoziuku.

²¹ Kyze bjoikpe iknykta tsipaikrēta harahare zuba zibykyk. Harahare zuba buburu zuba bo nipapykik. Tu niy:

– Uta harahare ikpapykik nahawa Deus Babirō hudikhudikwy zipyk. Anahudikhudikwy bo ba zik nakozorezo, tawahi mohokda.

²² Anaeze batu aty tohi zikpamykyzu. Sitanatanawytsa bereketsa siokepepehetsa iwatsa ba ziksiwabyzonaha. Atakta isapyrēnikiatsa ty nizukniki ba ziknakozorezo. Wytykyryk wanatsitsa mysiwazikinaha ba ziksiwabyzonaha.

²³ Anaeze rika ba zinyaha. Kytsa tahasukzanaha humo sakurētsa, tahamyikahanahaze ba zinyzonaha. Sinamy ziaксеkenahatsa sinamyrētsa niyziknaha. Kytsa humo mybarapetu nikaranaha iwatsahi sinamyrētsa ziknakaranaha. Abaka batu, sinamy nihokda. Nepykbaik – niy.

²⁴ Babironija abazubaha sihudikhudikwy eze Deus tyryktsa spu humo zinykynaha iwahahi izuhaha Deus sohokotsitsa humo hi mybarawy ezektsa

Deus tyryktsa iwatsa nisibakanaha iwatahi Deus sinini ykarawy bo nisipeha. Anaenze tahawahi mynapykyryknaha.

19

¹ Iwaze iaksoho opykani myzubaha iaksoho waha bijoikpe ezeky iwabyky nawa nikaranaha:

– O Deus zuba imysapyrēnikita tsimahakta! Atahi isopykziurēnikita. Itse babata mymyoktyhyrykta. Atahi zikwyrēnikita ba hawa tohi zikzukninaha. Tsimysapyrēta.

² Kytsa iharere bo batu hỹ zikahabyitsa ahatsa hi batu sispirikpo simyit-sapyritsa moziknaha. Iharere humo sinini mykaranaha. Anaty hi wasani my. Wytyk kytsa bo hua ziknakara atatsa hi mybarawy ezektsa nisimiwyky atatsa humo simysapybyitsa nikaranaha. Deus atatsa humo tatsapusare niy. Sinini nikara atatsa hi Deus tsumuēhītsitsa nisibaik iwatahi tatsapusare niy ana ty hi wasani my – nikaranaha.

³ Iwaze nisakibazikikzonaha:

– O Deus zuba imysapyrēnikita tsimahakta! Hawa zatata jobo mydoko, iwa Babirō ezektsa sinini mynakaranaha, siwahi sinini ykarawy bo maha – nikaranaha.

⁴ Kyze abazubatsa yhỹ nikaranaha. Taparaktsa taypykyryknahatsa wīte kwatero, sapetoktsa sapetoktsa siraratsa sispitutsa kino niwatihi Deus dyhywy okeryk tahaekaratsa humo puruk puruk nikaranaha. Asa hi:

– O ikia zuba tsamysapyrēta. Ikie humo mykurētsa – nikaranaha.

Hozipyrykza tsibik hyritywata sukwawy soho.

⁵ Iwaze myksoho waha Deus dyhywy ikny iwaby nawa nikara. – Deus zuba imysapyrēnikita tsimahaktsa! Sitsumuēhītsitsa sizubarētsa bo, kytsa nanabyitaba sihudikhudikwy ezektsa bo niwatihi my. Abazubatsa iharere piwabytoktonaha, myhyrikwanitsa myhyrizikwabyitsa niy kino niwatihi piwabytoktokonaha. Asaktsa:

“O Deus ikia zuba tsamysapyrēta tahaktsa!” – niy.

⁶ Iwaze sizubarētsa yksoho opykani ha iwabyky. Ithridawy akpyri waha iwabyky. Atsawatu hyritsik bipyri waha nitotoko nawa hi iwaby. Asahi:

– O Deus ikia zuba mypokzitsikitsa. Abaka mybarawy ezektsa abazubatsa pokzitsikitsa tsimozik. Zikwyrēnikita ba hawa tohi zikzukninaha. Kytsa abazubatsa aharere bo hỹ mykaranaha. Ahumo zuba tsimyspirikpokonaha ikia tsamysapyrēta tsimykaranaha.

⁷ Mykurētsa tsikykaranaha! Mydikrētsa tsikyziknaha! Atakta hozipyrykza tsibik wata nihyrikosokda abaka tasukza iwatsahi Deus bo tsimysakibaziknahaktsa! “Ikia zuba tsamysapyrēnikita” tsimaha. Tapytsatatsa botu tazozikba.

⁸ Atatsa nikymy.

Isuk tsibarazarēna ty ibo botu nyny niy. Isuk jakarabara. Tsiziurēna ziksyknahabikia, tsikaripukaripukrēna. Atatsa isuk tisapyēna hawa Deus tyryktsa amy ty tisapyrēna mynakaranaha ana soho hi piwatawyky – niy.

⁹ Iwaze bijoikpe iknykta kape niy:

– Na tsiwatahakta! Asaktsa hozipyrykza tsibik sukwawy waha zahak-zokonahaktsaktsa ahakuhuktsa. Iwaze bijoikpe iknykta niyzo nawa Deus harere baba – kape niy.

¹⁰ Iwaze uta kaekaratsa iokeryk puruk puruk iky. Iwaze bijoikpe iknykta kape niy:

– Awatu tykta utakta ikiatukta ahatukytsa tukta aha iwaze sasabyitsa wasania ty zuba mynakanarahatsa Deus wasaniha Sesus soho nitsaso, Deus mykara nahatsa kytsa nisiwatawy.

Abaka Deus sohokotsa atsatu motsasokonaha, Deus harere baba humo – niy. Iwa Deus bijoikpe iknykta kabo nitsasoziuku.

Maku pikuzar ibarazabaharēta bete nidyhyky.

¹¹ Iwaze bijoikpe sakpare aha iny. Pikuzar tsibarazarēta iny. Amata ibete nidyhyky petok inarokota niy. Estubaka inaro – Deus harere bo hỹ mynakarata usa inaro ka “Wasapeha ty zuba mynatsasokota” – my. Atahi amy ty wasani sispirikpobyitsa pe mykara. Mysisininiwyze wasani my. Niwatsorokokoze sakyriukrēnikitsa tuk wasani my. Tisopyksapyrēta.

¹² Ihyriziktsa izo hyrity watsa tsihizikuarētsa. Sitsorikzubarēta ouro zuba niaha. Sipehakatsa tsorik wata niaha. Iokpe humo inaro iwatahaha. Atazuba inaro humo tsihyrinymyrēta ustsaktsa batu sihyrinymyryhy si-humo tsihokdaharēna.

¹³ Iakpyzazawy ispubaharēta, kytsa ipe sisopyk:

– Deus harere – mynakananaha.

¹⁴ Iapik sodadutsa bijoikpe iknyktsa nikaranaha. Asaktsa pikuzatsa sibarazarētsa bete tahadyhydyhykynaha. Sisukbarazarētsa. Siziurētsa.

¹⁵ Isake ikny sokorotsapu zeze wata niy. Itsaribahata niy. Ata sokorotsapu zeze tuk kytsa abazubatsa iharere bo batu h̃ niaha sispirikpobyitsa tu sizikwy nepykbaik. Sipokzitsikitsa mozik, itsipyk eze tanoro wata my peho hi zibykyk, ana pokso hi sispirikpobyitsa iharere bo hỹ mykaranaha, sipehakatsa niyzik. Deus zikwyrēnikita takyriki simyharerewehanikitsa humo iwatsahi mysinininiwyky. Hawa duabohotsa tsik pyik pyik tsimykananaha iwa sispu tsizubarēna.

¹⁶ Iakpyzazawy humo inaro iwatahaha ihyry humo kino niwatihi inaro ziwatahaka. Petok inarohota. Estubaka – Kytsa pehatsa abazubata – inarokota. Usta kino – Kytsa abazubatsa pokzitsikitsa – inarokota. Iwa inaro petok.

¹⁷ Iwaze bijoikpe iknykta inyo. Haramwe bete niriktoho. Kaka niy. Sisarakatsa jo bo nitsatsakanahatsa bo opykani kakaik niy:

– Panytynaha Deus myikaha bo tynazuzuknaha.

¹⁸ Sihudikhudikwytsa pehatsitsa ni tsiboronaha! Sodadutsa sykzotsitsani tsiboronaha! Sodadutsani, pikuzatsani, tahatsihitsani, abazubatsani tsiboronaha! Bipyritsani kytsa tarabajaziu nikaranaha okyrysaro tyhyrykbyitsani, myhyrizikwanikitsani, myhyrizikwanibyitsani iwatsa tsiboronaha – niy. Iwa sisarakatsa pe niy.

¹⁹ Iwaze itsikarara bo iktsa iky. Mybarawy ezektsa pehakatsa situk inakypykbanaha, asaktsa siharere bo yh̃ nikaranaha, abazubatsa niwatsorokonaha bo inakypykbanaha. Atakta pikuzar bete nidyhyky ituktsa ahatsa sibo hi niwatsorokonaha.

²⁰ Atakta pikuzar bete ziknadyhykyta itsikarara tsipa humo ziockyhyryk. Iwaze Deus sohoko tsa byitatu ata kino niwatihi tsipa humo ziockyhyryk. Atakta itsikarara zikwy humo amy ty kytsa batu zikaha, atahi nikara, itsikarara zikwy humo. Ana humo hi kytsa itsikarara naro siokpe humo ziwatahaka iharere bo yh̃ nikaranaha. Sispirikpobyitsa tu mybarapetu nikara batu sinymyryhy. Asaktsa itsikarara izoknikita pe – Ikiatamysapyrēta – nikaranaha. Iwatsahi petoktsa, itsikararatsa, estubaka Deus sohokotsabyitatu usta itsikarara niwatihi ahatsa sitsipatsa nisioktyhyrykze izo zuba bo nisioktsokik, ēsopire tazy inapok anaeze mokorobakanaha. Sispitsa tu izo zuba bo nisioktsokik anaeze tahawahi mynapykyryknaha.

²¹ Atakta pikuzza tsibarazarēta bete nidyhyky itsikarara apiktsa nisiba, sokorotsapu zeze hyrity wa ta tasake burukta ty nisibaik. Sisarakatsa sini ziborobaiknaha. Sisorokrētsa niyziknaha.

20

Miu mytyk tseheze aibani zuba.

¹ Iwaze bjoikpe iknykta tyk bo inasikta inyzo tatsipykeze myhyrizikpyryrikwytsa ty wabe ahata iny. Ihokezuba myhyrizikpyryrikwytsa ty hi zoksapare nikara iwaze karikutsitsiwytsa titsakyrīkrētsa ty niwatihi inasibykyk.

² Atahi hotsoikarazata zīakwarabaik, atakta hyrikoso sapybara perytsa sipehatsa. Satanas inarokota. Iwa tahi miu anos mytyktseheze zīakwarahata.

³ Iwatahi bjoikpe iknykta Deus tsumuēhītsa Diabo iokezubakara bo inapapykik. Zihukbohik iwaze zitsykykik niy, nawaze mybarawy ezektsa ba ziksispihikbata. Miu anos piharamuzetu pisatsukzonaha. Iwaze kino iokboha kyrituktu mopykyk.

⁴ Atsoko wastuhutsa idyhywytsa bo ikozo, sibete nidyhykynahatsaktsa Deus zikwy tuk nikaranaha Deus hi sibo nyny niy. Iwazeka tapara niakbānahatsa hyrizikaratsa kino niwatihi asa hi Sesus harere nitsasoziukunahatsa hi nisibanaha. Deus harere humo ahatsahi nikaranaha niwata iwatsahi itsikarara okeryk tahaekaratsa ty batu puruk puruk zikaha ihyrikosotsa humo kino niwatihi batu zikaha, iwatahawy humo kino batu tahaharek humo iwaze tahatsyhyrysukpe humo batu aha iwa nikaranaha tsahi sisipitu. Aba Sesus tuk mynapykyknaha. Asahi ituk miu anos mytyktseheze sipehatsa mozīknaha.

⁵ Kytsa tapara batu inahyryzikponaha. Aiba zuba Deus ustsā kytsa botu niakbanaha mynasyhyryzikpo tsizubarēna mytyktseheze miu anos piharamunahaze iwaze ustsā kytsa mynasyhyryzikponaha.

⁶ Asaktsa tapara Deus inasyhyryzikpowy sakurētsa mozīknaha. Katsaktsa isapyrēnikia ty tsimaha zeka mykurētsa tsmozīknaha anawatsa sakurētsa mynakaranaha. Asaktsa izo bo batu isty tsok. Tubabatu kytsa Deus wahoro zubata eze ziknapamykysokonahaktsa siwatsa mozīknaha. Asaktsa Kiristu tsumuēhītsitsitsa ituk kytsa mysipehakanaha, miu anos mytyktseheze mysipehakanaha.

Satanas zikwy nepykba.

⁷ Iwaze miu anos ziharamuze Satanas tsiokezubarēna eze izohik. Iakwarawytsa ty satsuk niyze izohik.

⁸ Izoize kytsa abazubatsa pe my, sibo mybarapetu mynakara. Nanabyitaba kytsa bo my. Sispīrikpobyitsa pehakatsa, Kok inarokota, Makok bo kino niwatihi mybarawy ezektsa bo mybarapetu mynakara. Parakbaha ihumo mynapykyk mowatsorokonaha bo mynakapykyknaha. Abazubatsa mynakykykyknaha nimirā waha sizubarētsa hỹ ba ziktsasonaha tsihokdāharēna. Sesus tuktsa bo mowatsorokonaha.

⁹ Sispīrikpobyitsa nanabyitaba maha. Deus tyryktsa mynasyokehyrynaha mysiba tsihikiknaha. Deus hudikhudikwy myzīhasazawynaha, ana hudikhudikwy iakparawy, ana buruk myzīhasazawynaha, ihudikhudikwy ezektsa mysiba tsihikiknaha. Atsoko Deus bjoikpe ikny sispīrikpobyitsa bo izo nazipik. Asaktsa Satanas harere bo hỹ mykaranaha, asa bo hi izo nazipik iwatsahi mysiba.

¹⁰ Kyze Satanas hyrikoso sapybara pehakatsa izo bo tapapykykwy. Pihikzotsabyri wata anaeze ēsopire tazy mokorobaka, ba zikpyk. Tapara itsikarara

ata kino niwatihi Deus sohokotsa byitatu izo bo zuba nisioktsokik. Anaeze sinini mynakaranaha, unata, okoroze anaeze sinini mynakaranaha. Ba zikpyk.

Siakbatsa Deus okeryk natakahanaha.

¹¹ Iwaze idyhywy puëtsikbyita ibarazaharëta iny. Ibete nidyhyky tabo iktsa iky. Mybarawy, bjoikpe aha iokze niwakik iwa. Batu isty nyzo.

¹² Iwaze niakbakanahatsa kino iksinyky myhyrizikwytsa iwaze myhyrizikwybyitsa ahatsa kino niwatihi asa kino iokeryk niriktoriktohokonaaha idyhywy okeryk papeu iwatahaha ty zoksapare niaha. Iwaze usa kino nizapare naha Deus tyryktsa narotsa iwatahaha hawa mybarawy eze zikzurukunaha hawa papeu humo ziwatahakanaha hi nikara. Anapapeu iwatahaha zinyze iwaze ihuak ty estuba estuba zuba siwatu sibo nyny niy.

¹³ Kytsa buburu zuba tahabakanahatsa kino niwatihi idyhywy okeryk natakahanaha. Asaktsa mybarawy eze niakbakaranahatsa idyhywy okeryk natakahakanaha. Asaktsa siperykywy kino niwatihi idyhywy okeryk natakahanaha. Abazubatsa iokeryk natakahakanaha. Hawa mybarawy eze zikzurukunaha ana humo hi ihuak ty Deus sibo nyny niy.

¹⁴ Iwaze Deus ihyrikosokdawy pihikzotsabyri bo ziooktsokik. Niakbanahatsa sapy ziperykynaha kino niwatihi anaeze nisipaparahik. Anaeze isty tu nikara, tahawahi nikorokonaha. Anaeze niakbanahatsa simysapybyitsaktsa mybarazonaha.

¹⁵ Asaktsa sinaro Deus papeu humo batu tywataha iwatsahi izo bo zuba nisioktsotsokik. Asaktsa izo bo pihikzotsabyri hyrity waha bo tahasapynaha nisipaparahik. Iwa hÿ.

21

Bjoikpe ezytyk mybarawy ezytyk aha mozik.

¹ Iwaze bjoikpe ezytyk, mybarawy ezytyk aha bo iktsa iky. Bjoikpe mybarawy aha iwa tapara Deus nizukni botu nihokda. Buburu zuba kino nihokda.

² Deus hudikhudikwy Serusarëhe ezytyk iny niapykyk. Bjoikpe ikny inasik. Tisapyrëna. Tapytsatatsa watatsa tsiziurëtatsa maku atatsa mozihikik piakse tsihikik. Anawa Deus hudikhudikwy ezytyk tisapyrëna niyzik.

³ Iwaze opykani iaksoho idyhywy ikny iwaby. Atahi:

– Abaka Deus hudikhudikwy kytsa tuk mynapykyryk iwatsahi ityryktsa moziknaha atahi Deus babata iwatahi situk mynapykyk.

⁴ Atahi tsimopuziukunahaze mymyhyritsikwiki iwazeka ba zikykbazonaha. Kytsa ba ziksukatsihik. Ba zikzumuzo ba sininizo zikaha. Mymyit-sapyribyitsa tsimoziknaha mykurëtsa tsimykaranaha. Katsa ba zikpuzonaha. Ana hi mopykba. Ibykyka mohokdaba.

⁵ Atahi tadyhywy bete tadyhyta atahi:

“Abaka uta zuba ezytyk mozoknizo”.

Kape niyzo:

– Na tsiwataha naka myharere wasaniha myharere baba motsasokonaha ka atsatyty mykara.

⁶ – Utakta koikny bakta tu, nanabyi suknihibyize tatu. Mybarawy mopykbaze kino kaspitu. Botu iky. Aty iarapuruk zeka ibo nyny my. Pihik pupuputsa iknykyty ibo nyny my, ana humo hi ahaspitu tsimoziknaha.

⁷ Aty kaharere bo hyÿ mynakara zeka isapyha ty ibo nyny my. Utakta sihumo Deus babata, asaktsa kahyrytsa moziknaha hÿ.

⁸ Kytsa kaharere bo yh̄y ahabyizeka izo bo zuba mysioktsokik, isapy pihikzotsabyri waha my. Asahi kaharere humo sisikpybyr̄etsa, siharere-wabymybar̄etsa, isapybara nisihyrybatanahatsa, kytsa simybanikitsa, ustsas okeza humo sakparawytsa kytsa ustsas simyrawytsihiktsa asahi deusbyitsa humo hȳy mykaranaha, kytsa nispipihikbatakanahatsa bo iwatsa asahi izo bo zuba mysioktsokik, anaeze ēsopire tazy mynakoroko anaeze motarenaha. Utakta mysioktsokikze asaktsa myokbazonaha. Sinini ykarawy bo tahawahi mynapykyryknaha h̄y – Deus niy.

Seruser̄he ezytyk.

⁹ Iwaze estuba bijoikpe iknykta sete ahatsa tukta kabo izumu. Bijoikpe iknykta ioporosuk hyrity wata, taeze Deus iakyriwy ty inaharek. Atahi:

– Pany! Tapytsatatsa abo piwatawy. Hozipyrykza tsibik wata ni-hyrikosokda atatsa hi piakse – niy.

¹⁰ Iwaze Deus hyrikoso ezekykse. Bijoikpe iknykta hara joboni tabo zikoktyhyryk. Anaeze Deus hudikhudikwy Seruser̄he ezytyk bo zikwatawy. Ihudikhudikwy bijoikpe ikny inasik, Deus ikny inasik. Ihudikhudikwy tisapyr̄ena inyky.

¹¹ Kytsa ihudikhudikwy bo iktsa mahaze:

– O Deus zuba imysapyr̄enikita. Ata zuba ihyrizikpor̄enikita imysopykzi-ur̄enikita – maha. Atahi rikazowywata. Ihudikhudikwy ikaripu karipu wa haraharezikwata tsipokzitsar̄eta tawata, moknywy wata kiristau wata.

¹² Ihudikhudikwy jokarawy joboniha tahasapynaha dosetsa hokbowytsa niaha. Bijoikpe iknyktsa dose hokbowytsa baze nisiperykynaha. Ihok-bowytsa humo iwatahaha. Taparaktsa Isareu hyrytsa naro ty hokbowytsa humo ziwatahakanaha dose tyryktsa.

¹³ Haramwe sukewy taba harakykbyihi hokbowytsa, haramwe arahawytataba harakykbyihi, hokbowytsa haramwe sukpe taba harakykbyihi hokbowytsa, haramwe itsikpypepe taba harakykbyihi hokbowytsa iwa hok-bowytsa dose ahaktsa.

¹⁴ Ihudikhudikwy okarawytsa harahare buzutsa bete zizozokonaha. Haraharetsa dose tsa ahatsa bete nizuknikinaha. Haraharetsa humo dose ahatsa naro ziwatahaka. Hozipyrykza tsibik zinymyrykynahatsa asa naro hi haraharetsa humo.

¹⁵ Bijoikpe iknykta katuk nipamykysota hwi tsibik ouro suknihiity iwatawywy humo zibykyk. Atahi hudikhudikwy, ihokbowytsa, jokarawytsa iwatsa nisiwatawyky.

¹⁶ Hudikhudikwy tabaktsa harape watu niaha. Bijoikpe iknykta sihudikhudikwy ziwatawyky. Atsukykyk taba Dois miu dus̄etos kirometero niy. Nahudikhudikwy tsakiar̄ena jobonita nokponiha nizukninaha niwatihi harape watu niaha.

¹⁷ Jokaraha ziwatawyky. Bijo bo ziwatawy ses̄eta kwatero meteros niy. Hwi tsibik ty ziwatawyky. Hawaze meteros humo ziwatawyky bijoikpe iknykta kape niy.

¹⁸ Ihudikhudikwy tisapyr̄ena. Ouro ty hi izoknihita, widero wata anaeze asatu tahanyaha moknywy hyrity wata. Jokaraha saspe hi izoknihita.

¹⁹⁻²⁰ Haraharetsa dose sibete jokaraha nizukninaha sisapyr̄enaty. Harahare humo harahareziktsa zipyryktsa sipokzitsiar̄etsa tsykyk niaha. Tapara harahare bete diamate usta sapira iwaze, usta akate, usta esmerarada, usta onis, usta karan̄eriã usta kirisorite usta beriu, usta topas, usta kasedoni, usta tyrokoise, usta ametiste, iwatsa ty haraharetsa eze harahareziktsa tsazipyritsa sisapyr̄etsa ty niaha.

²¹ Dose hokbowytsa ahatsahi peroratsa. Hokbowy wa tu perora ka atsatu tsibuzuarēna estuba zuba niy, Sihudikhudikwy ske ouro zuba. Myoknywy wata niy.

²² Deus wahoro zubata, anaeze kytsa ziknakypykyknaha eze iharere ziwabynaha, batu isty ny. Deus hi mypokzitsikitsa, atakta zikwyrēnikita tu ba hawa tohi zikzukninaha atahi anaeze napykyryk. Atakta hozipyrykza tsibik wata nihyrikosokda anaeze napykyryk niwatihi Deus tuk iwatsahi Deus wahoro zubata hana bo ja isapy zuba, abaka Deus nanabyitaba ihudikhudikwy anaeze mynapykyryk.

²³ Sihudikhudikwy haramwe bara byzoje kino bara Deus humo wy okoro ziky wa niukuru.

²⁴ Mybarawy ezektsa rika buruk mokurunaha Deus humo okoro waha mozik sipehatsitsa tahanamy mynazukninaha. Asaktsa Deus bo mot-sasokonaha.

²⁵ Sihudikhudikwy tsoiehek batu hokbo zikaha. Okoroze unata ihok-bowytsa sisaparehitsu. Iunubarahukbara okoro zuba mynapykyryk.

²⁶ Mybarawy ezektsa tahanamy tisapyrēna mynazukmynaha. Asa hi:
– O Deus ikia hi zuba Deus babata. Abazubakatsa tsamysapyrēta, ba aty tohi awa sukniabyita. Atahi nihyrikosokda hozipyrykza tsibik wata tsahyrikporēta tsamysopykziurēta. Ahumo mykurētsa – maha.

²⁷ Sihudikhudikwy aty imysapybara ty mykara zeka ibo ba ziktsuk imysapybara tuk zeka ba ziktsuknaha. Aty imysikpybytyhaka humo my zeka ba ziktsuk, mospihikbata humo kino ba ziktsuk, ikatsahi zuba Deus sinaro papeu humo ziwatahakanahatsa zuba ihudikhudikwy bo mopupunaha. Asa hi zuba hozipyrykza tsibik wa tuktsa. Iwa Deus tuk mynapykyryknaha asa hi ihudikhudikwy bo mynapupunaha. Iwa hỹ.

22

¹ Iwaze bijoikpe iknykta pihik kino kabo ziwatawy. Pihik tsiziurēna moknywy waha. Pihik ispitu. Pihik Deus dyhywy ikny tsiziurēna. Atakta hozipyrykza tsibik wata botu nihyrikosokda niwatihi isapy ikny tsiziurēna. Isapy Deus sapy atsatu.

² Pihik hudikhudikwy ske tazahara buruk niy. Pihik saktaba usta saktaba niwatihi hwitsa niaha. Hwitsa humo kytsa sakurētsa niyziknaha. Mytyktseheze wihara mynakymy. Mytyktseheze wihara ty dose ha nijakuk nikaranaha. Byzoje byzoje wa zuba wihara nakymyky. Okyry mybarawy ezektsa mysizororowybaka. Sakurētsa.

³ Imysapybara ba zikapykyryk. Deus ituk, iwaze batu imysapybara ty mahani.

Deus dyhywy kytsa peha ykarawy eze ihudikhudikwy. Atakta hozipyrykza tsibik wata botu nihyrikosokda idyhywy niwatihi ihudikhudikwy my. Atsatu sidyhywy sisapy. Sitsumuēhītsitsa ipe:

– O ikia zuba tsamysapyrēta – mynakanaha.

⁴ Atakta nihyrikosokda hozipyrykza tsibik wata iok pinynaha inaro siokpe humo piwatahanaha.

⁵ Ihudikhudikwy miwa ba zikyzykzo. Unata mohokda. Rika hana bo ja. Haramwe mohokda. Deus izikwyrēnikita tu ba hawa tohi zikzukninaha atahi sibo ziharamwewy ihumo okoro zikywa nizukni. Atahi mypokzitsikitsa babata, ihudikhudikwy ezektsa ituk kytsa bo simypokzitsikinaha, ituk kytsa mysipehakanaha tawahi mynaharapekypykyknaha.

Sesus sukmywy.

⁶ Kyze bijoikpe iknykta kape niy:

– Iharere wasape niy. Takino yhỹ tsimaha zeka tisapyrēna my. Deus zikwyrēnikita tu hawa sa mynakara isohokotsitsa mysihyrinymyryky, ihyrikoso humo mysihyrinymyryky. Atahi bijoikpe iknykta sitsumuēhītsitsa bo zipehahik, hawa sa mynakara byi puētsik zuba mysihyrinymyryky – niy.

⁷ Sesus hi:

– Wabyziutaha! Jokboha kyritoktok ahabo myziksizo! Asaktsa kaharere bo hỹ mynakaranaha tsaktsa ana humo hi nspirikpokonaha sakurētsa moziknaha. Asaktsa kapapeu humo iwatahaha humo mospirikpokonaha sakurētsa mynakaranaha – niy.

⁸ Uta Suão. Uta hi iwaby, ana hi inyba. Nanabyi bo iktsa ikyze kaekaratsa ty puruk puruk iky. Tsizubarēna ziwabybaze bijoikpe iknykta okeryk iknaraha. Atakta tsizubarēna zikwatawyky iwatahi iokeryk puruk puruk iky. Iktsa zuba mynakara iwatahi iokeryk puruk puruk my zeka wasani my mytsaty ahabyita ikykara.

⁹ Ata hi:

– Kaokeryk ka puruk purukbyity! Utakta awata. Katsaktsa Deus tsumuēhītsa mytukytsa watsa tsimaha. Asaktsa Deus sohokotsa maha myzubarētsa Deus harere papeu humo ziwataha ana humo kino hỹ tsimykaranaha. Deus okeryk zuba aekaratsa ty puruk puruk tsimy ipe: “Ikia zuba tsamysapyrēta” – niy.

¹⁰ Iwaze kape niy:

– Hawa botu tsiwataha aibani atsatu mykara. Kaharere ty wasani my. Iwatahi hawa ty mynakara sihyrinymyrybyitsa bo typamykysokta!

¹¹ Aty imysapybyita mynakara zeka niwatihi zuba tynakara. Aty isapybyrikitsa mykara zeka niwatihi tynakara. Aty tsimysapyrēta mykara zeka niwatihi zuba tynakara. Aty wasani mykara zeka, wasani niwatihi tynakara – iwa niy.

¹² Iwaze Sesus niy:

– Wabytaha Sesus niy. Uta atsoko myziksizo katuk imysapyha ahabo mynazukmy hawa mybarawy eze zikzuruku naha zeka ihuak ty ahabo nyny my.

¹³ Utakta koikny baktatu, suknihibyize kino utatu. Mybarawy mopykze kino kawahi mynapykyryk.

¹⁴ Sakurētsaktsa sisukbarazarētsa maha. Asaktsa tahasuk botu nitsapikbanaha Deus ispe niy: “Kahudikhudikwy boktsa! Paku tsimaha. Zoihi buruk pakutyny! Iwaze ikiahatsa hwi ispita tu, wihara ty zuba tsizoknahaktsa!” – my.

¹⁵ Sihudikhudikwy ape bo siakparawytsa ba zikpupunaha. Simyrawytsihiktsa simysapybyikitsa, sihyrybatatsa simybakatsitsa simyspihikbatakatsa siharere iwa mynakaranaha ba zikpupunaha.

¹⁶ – Uta Sesus bijoikpe iknykta katsumuēhītsa abo ipeha. Ahabo nanabyi kawahoro zuba taeze ahabo motsasoko. Utakta Dawi itsekokatsa iknykta uta byrisoik tsihizikuarēta wata.

¹⁷ Deus hyrikoso iwaze tapytsasohotatsa nikaranaha: “Pany”. Atahi piwaby zeka ata kino my: “Pany”. Ata kino iapuk zeka: “Pany” aty zeka pihik puputsa ikny ispituha mozhikik pihik ty nyny my batu ihuak. “Pany” – niy Deus hyrikoso.

Abaka mopykyryk.

¹⁸ Uta Suão, kapehawy papeu humo pinynahatsa bo my. Kamyiwybyita tu amy ty tisapyrēna ty zuba my. Iwatahi wabytoktotaha! Aty Deus harere papeu humo ziwataha, puētsik piwataha iwaze hawa Deus simysapybyitsa

bo mykara atsatu ibo mykara. Hawa Deus takyriwy simyitsihikrētsa bo mykara atsatu sibo mykara – Asaktsa Deus harere puētsik piwataha.

¹⁹ Aty Deus harere papeu humo iwatahaha meky watu mozokni zeka iwaze asaktsa Deus hudikhudikwy tsiziurēna bo ba zikpupunaha. Iwatsahi asaktsa wihara humo ispitu moziknaha ba zezoknaha. – Iwa hỹ.

²⁰ Atakta tsizubarēna nitsasoko:

– Uta atsoko myziksizo – Sesus niy.

Iwaze ipe my:

– Yhỹ tsimyziksizo hỹ – my. Iwa mypehakatsa Sesus bo my.

²¹ Aba nepyk Sesus pe my – O mymypoکزitsikitsa ahyrytsa meky watu moziknaha myhumo tsamypokزitsiukrēta! iwatsa humo tu amypokزitsihukta – my. Iwa hỹ.